

Konda: కండె బసదు
నశ్శొకబర్షు



Konda Dora New Testament which was published in 2006

Konda: కొండ బాసదు నెగ్గి కబ్బు

Konda Dora New Testament which was published in 2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files dated 7 May 2025
840896da-3a66-5e43-9018-4a95a349d60c

Contents

మత్తయి	1
మార్కు	56
లూకా	89
యోహాను	144
అపొస్తలు	186
రోమ	241
1కొరింథి	269
2కొరింథి	294
గలతీ	309
ఎఫెసీ	318
ఫిలిప్పీ	328
కొలోసీ	335
1దెస్స	342
2దెస్స	348
1తిమోతి	351
2తిమోతి	358
తీతు	363
ఫిలోమో	366
ఎబ్రి	368
యాకోబు	388
1పేతురు	394
2పేతురు	401
1యోహాను	405
2యోహాను	412
3యోహాను	413
యూదా	414
ప్రకటన	417

మత్తయి రాస్తి సువార్త

నెల్య కిబిసినిక

దేవుణు మాటిజ్ రాస్తిమన్ని పుస్తకమాతి బయ్బిలుదు వడాయ్ ఒప్పుమానం, కొత్త ఒప్పుమానం ఇజి రుండి ముక్కెజ్ మన్నె. వడాయ్ ఒప్పుమానమ్దు యేసుప్రబు వందిజ్ వెప్తామన్ని సజతిజ్, ఎలాగ పూర్తి ఆతె ఇజి కొత్త ఒప్పుమానం జాగర్త నద్విజి సుడఃజిజి నెస్సెజానాద్. కొత్త ఒప్పుమానమ్దు మన్ని మొదోహి పుస్తకమ్నె మత్తయి రాస్తి సువార్త. యేసు ప్రబు సినుర్ లొఇ మన్ని పన్ను పెర్తికానాతి మహి మత్తయి ఇనికాండ్రె ఇక్క రాస్తమనాన్. (మత్తయి 9:9-13) యేసు ప్రబుజ్ నిలువ పొక్తి వెనుక, ఇంజుముంజు 25-35 వంటిజ్ వెనుక ఇక రాసి ఆత మనాద్. ఇజి యా సజతిజ్ వందిజ్ నెస్సికార్ వెప్పినార్. దేవుణు వన్ని ప్రవక్తరు వెట వర్గతిమహి క్రీస్తు ఇనికాన్ యేసుప్రబునె ఇజి యూదుర్ ఆతికార్ నెస్తిజ్ ఇజినె ఇక్క రాస్త మనాద్. యేసుప్రబు పుట్టి వందిజ్, మరి దని వెనుక జర్గతి సజతిజ్ వందిజ్ దేవుణు ముజాల వన్ని ప్రవక్తరు వెట వర్గతిక ఎలాగ అయాలెకొండెనె పూర్తి ఆతె ఇజి వడాయ్ ఒప్పుమానమ్దాన్ దన్ని వందిజ్ మన్ని మాటిజ్ లాగ్గి రుజువ్ కిజి తొరినినాన్. దేవుణు ప్రవక్తరు వెట వర్గతి సజతిజ్ యేసుప్రబు బత్తుదు అయాలెకొండె పూర్తి ఆతె (మత్తయి 1:23, 2:6, 14, 18, 23) ఇస్రాఏలు లోకుర్ రాజు ఆతిమహి దావీదు తెగాదు పుట్టికాన్ ఇజి రుజువ్ కిదెజ్, వన్ని తెగాదు పుట్టివరి పేరుకుబా మజి తొరినినాన్. మరి దేవుణు ఏలుబడిః కిని వందిజ్ యా పుస్తకమ్దు సంఠో సుట్కు రాస్త మనాద్. దేవుణు ఏలుబడిః కిని వందిజ్ యేసుప్రబు లోకురిజ్ నెస్సిక్తి కతెజ్ యా పుస్తకమ్దు 13-14 అద్యయమ్కాజ్ రాస్త మనాద్. యేసు, దేవుణు మరిసి ఆతికాండ్రె ఇజి యా సువార్తదాన్ డటం వెప్పినాన్.

యాక యేసు తెగ

1 అబ్రహాం తెగాదికాతి దావీదు రాజు* తెగదు పుట్టి యేసు క్రీస్తు తెగ యాక.

2 అబ్రాహాము మరిసి ఇస్సాకు, ఇస్సాకు మరిసి యాకోబు, యాకోబు మరిసిర్ యూదాని వన్ని దాద్నిర్, తంబేర్సిర్.

3 యూదా మరిసిర్ పెరెసుని జెరహు, వరి యాయ పేరు తాహారు. పెరెసు మరిసి ఎస్రోము, ఎస్రోము మరిసి అరాము,

4 అరాము మరిసి అమ్మినాదాబు, అమ్మినాదాబు మరిసి నయస్సోను, నయస్సోను మరిసి సాల్మాను.

5 సాల్మాను మరిసి బోయజు, బోయజు యాయ పేరు రాహాబు, బోయజు మరిసి ఓబేదు, ఒబేదు యాయ పేరు రూతు. ఓబేదు మరిసి యెసయ.

6 యెసయ మరిసి రాజు ఆతి దావీదు. దావీదు రాజు మరిసి సాలోమోను, సాలోమోను అయ్సి, ముజాల ఊరియెజ్^a అల్సి ఆతి మహికాద్.

7 సాలోమోను మరిసి రెహాబాము. రెహాబాము మరిసి అబీయా, అబీయా మరిసి ఆనా.

8 ఆనా మరిసి యెహోసపాతు. యెహోసపాతు మరిసి యెహోరాము, యెహోరాము మరిసి ఉజ్జయూ.

9 ఉజ్జయూ మరిసి యోతాము, యోతాము మరిసి ఆహాజు, ఆహాజు మరిసి హిజ్కయూ.

10 హిజ్కయూ మరిసి మనసె, మనసె మరిసి ఆమోను, ఆమోను మరిసి యోసీయా.

11 యోసీయా మరిసిర్ యెకొనియని వన్ని దాద్నిర్, తంబేర్సిర్. వరి కాలమ్దు బబులోను దేనెమ్ది రాజు యూదురిజ్ వెట్టిపణి కినివరిలెకొండె అసి తొహ్తా ఒత్తాన్.

12 బబులోను దేనెమ్దు సాహి వెనుక అబె యెకొనియెజ్ మరిన్ పుట్టాన్. వన్ని పేరు సయల్తీయెలు, సయల్తీయెలు మరిసి జెరుబాబెలు.

13 జెరుబాబెలు మరిసి అబీహూదు, అబీహూదు మరిసి ఎలియాకీము, ఎలియాకీము మరిసి అజోరు.

14 అజోరు మరిసి సాదోకు, సాదోకు మరిసి ఆకిము, ఆకిము మరిసి ఎలిహూదు.

15 ఎలిహూదు మరిసి ఎలియాజరు, ఎలియాజరు మరిసి మత్తాను, మత్తాను మరిసి యాకోబు.

* **1:1 1:1** దావీదు ఇస్రాయేలు లోకుర్ వందిజ్ దేవుణు ఏర్కాటు కితి రాజు. వాంతు ఇస్రాయేలుది రుండి రాజు వన్ని ముజాల సప్తులు ఇనికాన్ ఏలుబడిః కిజి మహాన్. ^a **1:6 1:6** 2:3ము 11:1-27.

16 యాకోబు మరిసి యోసేపు, వన్ని ఆల్ని అతి మరియ పొటాదు క్రిస్తు ఇజ కూకె అతి యేసు పుట్టాన్.

17 యా లెకెండ అబ్రాహాము బాణిజ్ అసి దావీదు రాజు దాక మొతం పదనాల్లి తరమ్మకు, దావీదు రాజు బాణిజ్ అసి యూదురిజ్ బబులోను దేసమ్మదు వెట్టి పణి కిని వరిలెకెండ తొస్సొబతి కాలమ్దాక పదనాల్లి తరమ్మకు. యూదురు బబులోను దేసమ్మదు సాహి బాణిజ్ అసి యేసు క్రిస్తు దాక పదనాల్లి తరమ్మకు.

యా లెకెండ యేసు క్రిస్తు పుట్టాన్. కనెలిజాణిజ్

18 యేసు క్రిస్తు యా లెకెండ పుట్టాన్. వన్ని అయేసి అతి మరియెజ్ యోసేపు వందిజ్ వెన్బాత మహద్. గాని వారు రివర్ ఉండ్రె బానె గూర్వెండ ముందాల్ని అది దేవుణు అత్తు సత్తుదాన్ పాత డిస్తాద్.

19 గాని దనిజ్ పేరు కితికాన్ అతి యోసేపు దేవుణు రూలుజ్ లోజీజి మనికాన్ కక, విజెరిజ్ ఎద్రు సిగు కిబిన్వీండ, ఎయెర్బా నెన్వీండ, దన్నిజ్ డిసి సీదెజ్ ఇజి ఒడెబితాన్.

20 యోసేపు యా సజతిజి వందిజ్ అలోసనం కిజి మహివలె దేవుణు దూత కలాదు వన్నిజ్ తోరె అజి ఈహు వెహ్లాన్, “దావీదు రాజు తెగ్గాతికాన్ అతి యోసేపు, నిజి పేరుకితి మని మరియెజ్ డగ్రికిదెజ్ అనుమానం ఆమ. ఎందనిజ్ ఇహిజి దేవుణు అత్తు సత్తుదాన్ అది పాత డిస్తా మనాద్.

21 అది ఒరెన్ కొడెః ఇడనాద్లె. వన్ని లోకాజ్ పరి పావమ్కాణిజ్ వాండ్రు రక్కిస్సాన్లె. అందెజి వన్నిజ్ యేసు† ఇజి పేరు ఇడదెజ్వలె”,

22-23 “ఉండ్రె విడిః బోదెలి పాత డిసి ఒరెన్ మరిన్ ఇడ్వాద్లె. వాండ్రు ఇమ్మానుయెలు ఇజి కూకె అనాన్లె”, ఇమ్మానుయెలు ఇహిజి దేవుణు మా వెట తోడుః మనాన్ ఇజి అర్దు. ముందాల దేవుణు ప్రవక్త వెట వర్గితి యా మాటిజి నిజం పూర్తి అదెజ్ యాకెజ్ విజు యా లెకెండ జగ్రితె.

24 యోసేపు నిద్రదాన్ తెలిఅతిజ్ దేవుణు దూత వన్నిజ్ వెహ్లా వజనె మరియెజ్ అల్ని లెకెండ వన్ని ఇండ్రె కూక్ ఒతాన్.

25 గాని మరియ మరిన్ ఇడ్విదాక వాండ్రు దని డగ్రి సాన్వితాన్. మరిన్ పుట్టిజ్ వాండ్రు వన్నిజ్ యేసు ఇజి పేరు ఇట్టాన్.

2

తూర్పుదాన్ గ్వానురు వాజినార్

1 హెరోదు రాజు విలుబడిః కిజి మహివలె యూదయ దేసమ్మదుమని బెట్లెహాము ఇని నాటో యేసు పుట్టాన్. వాండ్రు పుట్టి వెన్యా తూర్పు దరోటాన్ గ్వానురు* యెరూసలేం ఇని పట్టుమ్మదు వాతార

2 పట్టుమ్మదు వాతారె, “యూదురిజ్ రాజు అదెజ్ ఇజి పట్టి కొడెః ఎంబె మనాన్? వాండ్రు పుట్టిదన్నిజ్ గుర్తు తొరిసిని సుక్క, మాపు తూర్పుదరోటు సుడతావ్. వన్నిజ్ పొగడిజి మాడిస్తెజ్ ఇజి వాత మనావ్”, ఇజి వెహ్లాన్.

3 యా మాటిజ్ విహారె హెరోదు రాజుని వన్నివెట యెరూసలేమ్దికార్ విజెరి నండో గాబ్రి ఆతార.

4 హెరోదు రాజు, వెరి పుజెరిజ్ విజెరిజ్ ని యూదురి రూలుజ్ నెస్సిస్సి వరిజ్ విజెరిజ్ కూకెపిస్తాండ్రె, “క్రిస్తు అతికాన్ ఎంబె పుట్టాన్?”, ఇజి వెన్బాతాన్.

5 “యూదయ దేసమ్మదుమని బెట్లెహాము”, ఇజి వారు వెహ్లాన్, “ఎందనిజ్ ఇహిజి, యా లెకెండ దేవుణు ముజాల ఒరెన్ ప్రవక్త వెట వర్గిత మహాన్.”

6 “యూదయ దేసమ్మదు మని బెట్లెహామా, నీను యూదయ నాహ్కాజ్ లోఇ ఇజెరికి ఆఇ. ఎందనిజ్ ఇహిజి, నీ లోఇహాన్ ఒరెన్ రాజు లెకెండ† విలుబడిః కినికాన్ పుట్టాన్లె. వాండ్రు నా లోకుర్ అతి ఇస్తాయెలు లోకురిజ్ గపుడువెన్ లెకెండ మంజినాన్లె.”

7 సన్దివలె హెరోదు రాజు, మరి ఎయెర్బా నెన్వీండ గ్వానురుజ్ కూకెపిస్తాండ్రె సుక్క తోరె అత్తి సరియాతి టయం వరిజ్ వెన్బాజి నెస్తాన్.

† 1:21 1:21 యేసు ఇని మాటదిజ్ అర్దుం, యెహోవ దేవుణు రక్కిస్సాన్ నిల్లిజి సాయం కిజినాన్. * 1:22-23 1:22-23 యేసయ 7:14. * 2:1 2:1 సుక్కిజి వందిజ్ నదుపు నెస్తికార్. † 2:6 2:6 మిశా 5:2.

8 వరిజ్ బేత్తెహేమ్దు పోక్తాండ్రె, “మీరు సొన్ని నెగ్రెండ అయా కొడోడిజ్ రెబాజి సుడోజి వాండ్రు ఎంబె మనాన్ ఇజి నజిబా కబ్రురు తగ్గిల. అయావలె నానుబా సొన్ని వన్నిజ్ పొగ్డిజిజి మాడిఱ్సు”, ఇజి వరిజ్ వెప్తాన్.

9 వారు రాజు వెప్తా మాట వివారె సోతార్. సొన్ని మహివలె, వారు తూర్పు దరొటు సుడోతిమహి సుక్క, వరి ముందాల నడిజిజి మహాద్. కొడోఱ్ మహి బాడ్డి మున్ను అందితిజ్ అయా సుక్క అబ్బె నిహాద్.

10 సుక్క సుడోతిజ్ వారు గొప్పు సర్ల ఆతార్.

11 ఇండ్రె సొహారె అయ్సి ఆత్తి మరియు వెట మన్ని కొడోడిజ్ సుడోతారె ముణుకుజ్ ఊరజి వన్నిజ్ పొగ్డిజిజి మాడిఱ్సారె. నస్తివలె వారు ఒత్తిమహి పెటెజ్ రేతారె బజారం, సాంబ్రాణి, బోలాం[†] ఇనికెజ్ వన్నిజ్ నొడిత సీతార్.

12 “హేరోదు రాజు డగ్రు మరజి సొన్యాట్”, ఇజి దేవుణు దూత కలాదు వరిజ్ వెప్తా వజి, వారు మరి ఉండ్రె సరిదాన్ వరి దేసె సొహారె.

అయ్గుప్తు దేసమ్దు సొన్నినారె

13 గ్వానురు మరజి సొహి వెనుక ఒరెన్ దేవుణు దూత యోసేపుజ్ కలాదు తోరె ఆజి, “నీను నిజ్అ, హేరోదు రాజు కొడోడిజ్ సప్తెజ్ సుడోజినాన్. అందెజె వెటనె కొడోడిజ్ని అయ్సిజ్ అసి అయ్గుప్తు దేసమ్దు సొన్అ. మరి ఇనిక కిదెజ్ ఇజి నాను నిజి వెప్పిదాక అబెనె మన్అ”, ఇజి వెప్తాన్.

14 నస్తివలె వాండ్రు నిజితండ్రె, కొడోడిజ్ని అయ్సిజ్ అస్తాండ్రె అయా పొదోయెన్ అయ్గుప్తు దేసమ్దు సొండ్రెజ్ సోతాన్.

15 హేరోదు సానిదాక అబెనె మహాన్. “అయ్గుప్తు దేసమ్దాన్ నా మరిసిజ్ నాను కూక్”, ఇజి దేవుణు ముందాల ప్రవక్త వెట^{*} వర్తితి మాట యా లెకెండ్రె పూర్తి ఆతాద్.

16 గ్వానురు వన్నిజ్మోసాం కితార్ ఇజి నెస్తాండ్రె హేరోదు రాజు నండ్రె కోపం ఆతాన్. వారు వెప్తా టయమ్దిజ్లెక కితాండ్రె బేత్తెహేమ్దుని, మరి డగ్రు మని ప్రాంతమ్కాజ్ మన్నినాహ్కాజ్ మన్ని రుండి పంటిజ్ని దన్ని అడిగి వయ్సు మని కొడోడిజ్ విజిరిజ్ సప్తెజ్ అడ్ర సీతాన్.

17-18 “రామా నారుదాన్ ఉండ్రె పెరి జాటు వెహాద్. గుండ్రె కొత్తె ఆజి అడజిబాజిని జాటునె. రాహేలుకీ దన్ని కొడోడె వందిజ్ అడజిబాజినాద్. కొడోడె సాతిజ్ అది ఓరిన్లెజ్ అటేవతాద్.” యిరివ్యు ప్రవక్తవెట దేవుణు ముజాల వర్తితిమహి యా మాట యాలెకెండ్రె పూర్తి ఆతాద్.

నజరేతుదు మరజి వాజినారె

19 హేరోదు సాతి వెనుక అయ్గుప్తు దేసమ్దు మహి యోసేపుజ్ ఒరెన్ దేవుణు దూత కలాదు తోరె ఆతాండ్రె,

20 “నీను నిజ్అ, కొడోడిజ్ని అయ్సిజ్ అసి ఇస్తాయేలు దేసమ్దు సొన్అ. ఎందనిజ్ ఇహిజ, కొడోడిజ్ సప్తెజ్ సుడోజి మహికార్ సాత సొహారె”, ఇజి వెప్తాన్.

21 అందెజె యోసేపు నిజితాండ్రె కొడోడిజ్ని అయ్సిజ్ అస్తాండ్రె ఇస్తాయేలు దేసమ్దు మరజి సొండ్రెజ్ సోతాన్.

22 గాని హేరోదు సాతి వెనుక వన్ని మరియు ఆత్తి అరకెలాయు యూదయ దేసమ్దు ఏలుబడిఱ్ కిజినాన్ ఇజి నెస్తాండ్రె అబ్బె సొండ్రెజ్ తియాలాతాన్. కలాదు వెప్తా లెకెండ్రె యూదయ దేసెం సొన్ఏండ గలీలయ ముటూదు సొహాన్.

23 అబ్బె నజరేతు ఇని పట్టుమ్దు సొహాండ్రె బత్తితాన్. “నజరేతుదికాన్ ఇజి వాండ్రు కూకె ఆనాన్లె”, ఇజి దేవుణు ప్రవక్తరు వెట క్రీస్తు వందిజ్ వర్తితిమహి మాటెజ్ యా లెకెండ్రె పూర్తి ఆతె.

[†] 2:11 2:11 సాంబ్రాణిసాంబ్రాణి ఇని మరొందాన్ దోహాక్కి నెగ్గి వాసం మన్ని గొప్పు విలుబాతి ఒప్పు బోలబోలం ఇని మరొందాన్ నెగ్గి వాసం మన్ని ఒప్పు మాయముకు లెకెండ్రెవా పణి కిలాద్. ^{*} 2:15 2:15 హోనియ 11:1. [§] 2:17-18 2:17-18 ఇస్తాయేలు (యూదురి) లోకరిజ్ అనిగోగ్ ఆజి ఇసాన్కు మరినియాతి యాకేబు అల్సిన రాహేలు. నెబుక్కడెనెనరె బబులోసుదు ఏలుబడిఱ్ కిజి మహివలె ఎప్తయెనిది యూదురిజ్ అప్త ఒత్తాన్. వరి లోజ నంబెందారె బానె సప్పె ఆతార్.

3

బాప్తిసం సీని యోహాను యేసువందిజ్ సరి తయార్ కిజినాన్.

1-2 అయ దినమ్కాజ్ బాప్తిసం సీని యోహాను వాతండ్రె, “దేవుణు ఏలుబడికి కిని కాలం డగ్రు ఆత మనాద్. అందెజె మీరు పాపమ్కు ఒప్పుకొడిజె డిసీ సీదు”, ఇజె యూదయ బిడిజె బూమి ప్రాంతమ్కాజ్ సాటిసి మహాన్.

3 “ప్రబు లోకుడగ్రు వాదెజ్ సరి తయార్ కిదు, వన్ని వందిజ్ సరి తినాజ్ కిదు”, ఇజె బిడిజె బూమిదాన్ ఒరెన్ డేల్ని వెప్పిని కంటం వాజినాద్* ఇజె యెసయ ప్రవక్త వెట దేవుణు ముందాల వర్గితక విని వందిజె.

4 యోహాను ఒంటి బులుస్కాడిజె తయార్ కితి సాకెజ్ తోడిగితాండ్రె, నడుముదు తోలు బెట్టు తోహా ఆజె మహాన్. వాండ్రు మేపిలెక్ని అడివి తేనె, తింజి బత్తిజి మహాన్.

5 యెరునలేమ్దికారని, యూదయ దేసెమ్దికార విజెరె, మరి యొర్దాను గడ్డ డగ్రు మని నాహ్కాడికార విజెరె సోతార యోహాను వెప్పికెజె వెండ్రెజ్ వన్నిడగ్రు వాతార.

6 వారు, కితి పాపమ్కు ఒప్పుకొడిజె యొర్దాను గడ్డదు వన్ని కియుదాన్ బాప్తిసం లాగె ఆజె మహాన్.

7 పరిసయరు, మరి నదుకయరు నంణొండార యోహాను బాప్తిసం సీజె మహిబాన్ వాతార. పరిజ్ నుడిజె వాండ్రు ఈహు వెప్తాన్, “మీరు వినం మన్ని సరాన్ లెకెండ్ మన్నికిదెర్. దేవుణుబాణిజ్ కోపం వాజినాద్ ఇజె నమ్మిజి మీరు వాతిదెరా? సిల్లెద్. వన్ని కోపమ్దాన్ తప్తె ఆదెజ్ ఇజె మీరు వాతిదెరా? నిజెమె అయలెకెండ్ ఇజె నాను ఒడిదెజ్ సిల్లెద్.

8 మీ పాపమ్కు ఒప్పుకొడిజె డిసీ సీజె దనిజ్ తగితి పణిజ్కిజె తోరిస్తు.

9 ‘మాపు అబ్రాహము తెగ్గాతికాప్, అందెజె మాపు సిక్నదాన్ తప్తె ఆనాప్లె’ ఇజె మీ మన్నుదు మీరు ఒడిబిమాట్. ఎందనిజె ఇహిజ, యా పణకాణిజ్ అబహముజ్ కొడోర్ పుటిసెజ్ దేవుణు అట్టికాన్ ఇజె నాను మిజి వెప్పిన.

10 దేవుణు మరెక మొదొల్ కత్తి విసిరెదెజ్ కియుదు గొడెలి అస్తి వన్నిజ్ పొలిత మనాన్. నెగ్గి పట్టు అనిజ మరెకాజ్ విజు కత్తి సిసుద్ విసిర్నాలె.

11 మీరు పాపమ్కు ఒప్పుకొడిజె డిసీ సీతి వందిజ్. నాను మిజి ఏరుదాన్ బాప్తిసం సీజెన. నా వెనుక వానికాన్ నజి మిస్తి అతికారం మనికాన్. వన్ని జోడ్కు పిండెదెజ్బా నాను తగ్గిక ఆవె. వాండ్రు దేవుణు ఆత్మదాన్ని, సిసుదాన్ మిజి బాప్తిసం సీనాన్లె.

12 వాండ్రు గాలి ఇడ్డి సేపా కిదు అస్తి వన్నిజ్ పొలిత మనాన్. వాండ్రు వన్ని కలమ్దిజ్ నుబారం కిజె గాలి ఇట్టి కూలిజ్ కొటు ఇండ్రో ఒసి వాక్నాలె. పొటుదిజ్ నందిజె సిసుదు సురనాలె.”

యేసు బాప్తిసం లాగె ఆజెనాన్.

13 నస్తివలె యోహాను కిదాన్ బాప్తిసం లాగె ఆదెజ్, గలిలయదాన్ యేసు యొర్దాను గడ్డదు వాతాన్.

14 “సీ కియుదాన్ బాప్తిసం లాగె ఆదెజ్, నజి అవ్సరం గాని నీను బాప్తిసం లాగె ఆదెజ్ నా డగ్రు వాతిదా?”, ఇజె యోహాను వన్నిజ్ అడ్డు కిదెజ్ నుడతాన్.

15 “ఏలు యా లెకెండ్ జర్గిపెద్. విజు యా లెకెండ్ దేవుణుదిజ్ ఇస్టమాతివజె పూర్తి కినిక మజి తగ్గె”, ఇజె యేసు వెప్తాన్. నస్తివలె యోహాను ఒప్పుకొటాన్.

16 బాప్తిసం లాగె ఆతి వెటనె యేసు ఏరుదాన్ వెల్లి వాతాన్. అయావలెనె ఆగాసం రే ఆతాద్. దేవుణు ఆత్మ పాపురపాటి లెకెండ్ యేసు మున్ను డిగ్జె వానిక యోహాను నుడితాన్.

17 “వీండ్రు నా ఇస్టమాతి మరిన్, విని మున్ను నాను నండో సర్ద ఆజెన”, ఇజె దేవుణు మంజిని బాడిదాన్ వెప్పిని ఉండ్రె జాటు వాతాద్.

4

యేసుజ్ సయ్తాన్ పరిస కిత్తిక.

* 3:3 3:3 యెసయ 40:3.

1 వెనుక దేవుణులు అత్తు యేసుజ్ బిడిజ్ బూమి ప్రాంతముడు నడపిస్తాన్. అబె సయ్యూన్ యేసుజ్ తప్ప కిబిస్తాజ్ పరిస కిజి నుడతాన్.

2 నలవయి రోస్సు రెయు పొకల్ ఉపాస్ మహి వెనుక వన్నిజ్ బజ కట్టాద్.

3 సయ్యూన్ వన్ని డగ్గు వాతండ్రె, “నీను దేవుణు మరిసి ఇహిజ, యా పణకుజ తిండి ఆల ఇజి వెహా”, ఇజి వెహ్తాన్.

4 నస్తివలె యేసు “లోకు బత్తిజినిక తిండిదానె ఆవద్, గాని దేవుణు వెయుదాన్ వాని విజు మాటాణిజ్ బా బత్తిజి నాన్ ఇజి దేవుణు మాటదు రాస్త మనాద్”*, ఇజి వన్నిజ్ వెహ్తాన్.

5 వెనుక సయ్యూన్ యేసుజ్ దేవుణు పట్టుం ఆతి యెరుసలేముడు కూక్త ఒతండ్రె, అబె మని దేవుణు గుడిః కొసాదు నిల్పాన్.

6 అబె నిల్పాండ్రె “నీను దేవుణు మరిసి ఇహిజ, ఇబ్బెణిజ్ అడిగి డాట్ అ. ‘నీ వందిజ్ వన్ని దూతరిజ్ దేవుణు ఆడ్ర సీనాన్. నీ కాల్కు పణకుజ తగ్గిలివిండ వారు నిజి వరి కిరాణిజ్ పెర్న అస్సార్’ * ఇజి దేవుణు మాటదు రాస్త మనాద్”, ఇజి వెహ్తాన్.

7 యేసు వన్నిజ్, “ ‘నీ ప్రబు ఆతి దేవుణుదిజ్ పరిస కిదెజ్ ఆవద్’* ఇజి బా రాస్త మనాద్”, ఇజి వెహ్తాన్.

8 మరి ఉండ్రె నుటు, సయ్యూన్ యేసుజ్ నండ్రె ఎత్తు మని ఉండ్రె గొరోన్ ముస్సు, ఎక్కిస్తాండ్రె యా లోకముడు మని విజు దేసెమ్ కాజ్, మరి వన్యాజ్ ముస్సు ఏలుబడిః కినివరి అతికారమని వరిజ్ కలిగితి మనికెజ్ విజు తోరిస్తాన్.

9 అత్తెజ్ తోరిస్తాండ్రె, “నీను నా ఎద్దు ముణుకుజ్ ఊరిజి నజి పొగడిఃజి మాడిఃజి యాకెజ్ విజు నాను నిజి సీన”, ఇజి వెహ్తాన్.

10 యేసు వన్ని వెట, సయ్యూనా, నా బాణిజ్ సాన్ అ, “నీ ప్రబు ఆతి దేవుణుదిజ్ పొగడిఃజి మాడిఃజి, వన్నిజ్ సేవ కిదెజ్ ఇజి దేవుణు మాటదు రాస్త మనాద్”, ఇజి వెహ్తాన్.

11 అయావలె సయ్యూన్ వన్నిజ్ డిసి సాహాన్. దేవుణు దూతార్ వాజి వన్నిజ్ నెగెన్ నుడతార్.

యేసు సువార్త సాటిస్తాజ్ మొదొల్సినాన్

12 యోహాను కయేది మహాన్ ఇజి విహండ్రె యేసు గలిలయదు మని నజరేతు ఇని పట్టుమ్దు మరజి వాతాన్.

13 వెనుక యేసు నజరేతు పట్టుం డిసి జెబులూను, నప్తాలి ప్రాంతమ్ కాజ్ డగ్గు, గలిలయ సందారం పడకాదు మని కపెర్నహు ఇని పట్టుమ్దు వాతండ్రె బత్తిజాన్.

14-16 “జెబులూను ప్రాంతమా, నప్తాలి ప్రాంతమా, యోర్దాన్ అతాహ పడక సమ్దరం డగ్గు మని యూదురు ఇకార్ బత్తిజిని గలిలయ ప్రాంతమా, సీకటిదు బత్తిజి మహికార్ గొప్ప జాయ్ నుడతార్. సాపు ఉండ్రె నీడ లెకెండ్ మని దేసెమ్దు బత్తిజి మహి లోకుర్ ముస్సు, జాయ్ పుట్టాద్”*. ఇజి దేవుణు ముజాల యెసయ ప్రవక్త వెట వర్గితి మాట యా లెకెండ్ యేసు వాతిజ్ పూర్తి ఆతాద్.

17 అయా వలెహాన్ అని యేసు, “దేవుణు ఏలుబడిః కిని కాలం డగ్గు ఆత మనాద్. అందెజి మీ పాపమ్కు ఒప్పుకోడిఃజి డిసి సీదు”, ఇజి సాటిస్తాజ్ మొదొల్సినాన్.

యేసు సిసూరిజ్ కూక్కినాన్

18 యేసు గలిలయ సమ్దరం ఒడుదాన్ నడిసి మహివలె, పేతురు ఇజి కూకె ఆతిసీమోనుజ్ నీ, మరి వన్ని తంబెరీని ఆతి అంద్రెయెజ్ నుడతాన్. వారు జాలెరిజు. వీరు రివిర్ సమ్దరమ్దు వల పొక్కి మొయెజ్ అని మహాన్.

19 “నా వెట రదు. నా వెట వాదెజ్ లోకురిజ్ నెస్పిస్సివరి లెకెండ్ నాను మిజి తయార్ కినాలె”, ఇజి యేసు వరిజ్ వెహ్తాన్.

20 వారు వెటనె వరి వలేజ్ డిఃస్తారె వన్ని వెనుక సాహాన్.

21 అబెణిజ్ సొన్ని మహిజ్ యేసు జెబెదాయి మరిసి ఆతి యాకోబుజ్ ని, వన్ని తంబెరిసి ఆతి యోహానుజ్ నుడఃతాన్. వారు రిఎర్వరి బుబ్బు ఆతి జెబెదాయి వెట డోణిదు వలెజ్ నెగెణ్ కిజి మహివలె యేసు వరిజ్ కూక్తాన్.

22 వెటనె వారు వరి డోణిని వరి బుబ్బుజ్ డిఃస్తారె వన్ని వెనుక సొహార్.

యేసు జబ్బుది వరిజ్ నెగెండ్ కిజినాన్.

23 యేసు గలిలయ దేసెం విజు బూలాజి యూదురు మీటిజ్ కిజిని ఇల్కాజ్ వరిజ్ నేస్సిసి, దేవుణు ఎలుబడిః కిని కాలం వందిజ్ సువార్త సాటిసి మహాన్. విజు రకమ్మది జబుది వరిజ్ ని బాదదాన్ ఇజ్ మహివరిజ్ నెగెండ్ కిత్తాన్.

24 యేసు పేరు సిరియ దేసమ్మదు విజు సారితాద్. రకరకమ్మది జబుదివరిజ్ లోకుర్ వన్ని డగ్రు తత్తార్. నండో నోపిదాన్ బాద ఆజి మహి వరిజ్, దెయం అస్తి వరిజ్, మూర్న జబు మహి వరిజ్, కిక్కుకాల్కు సాతివరిజ్ వన్ని డగ్రు తతిజ్ వాండ్లు వరిజ్ నెగెండ్ కిత్తాన్.

25 గలిలయ, దెకపొలి*, యెరూసలేము, యూదయ, యొర్దాను అతాహి పడఃకదాన్ మంద లోకుర్ వాజి వన్ని వెట సొహార్.

5

గొరొన్ మున్సు కిత్తి బోద.

1 యేసు మంద లోకురిజ్ నుడఃతాండ్లె ఉండ్డి గొరొత్ ఎక్తాన్. అబె బనిమహిజ్, వన్ని సిసూర్ వన్ని డగ్రు వాత్తార్.

2 అయావలె వాండ్లు వరిజ్ యా లెకెండ్ వెప్పి బోదిస్తజ్ మొదోల్స్తాన్.

3 "దేవుణుదిజ్ నెందితిలెకెండ్ బత్తిజి డన్సిలోఇ మాపు తకుదికామ్" ఇజి నెసి మజి మరి మండ్లెజ్ ఎయెర్బా ఇజి కోరిజిసరో, దేవుణు సిజిని దీవనమ్మకు మంజిని. ఎందనిజ్ ఇహిజు, వారు దేవుణు కిని ఎలుబడిఃదు మంజినార్.

4 ఎలు దుకమ్మదాన్ అడఃబాజి మన్నికార్ దేవుణు సిని దీవనమ్మకు మంజినికార్ ఆనార్లె, ఎందనిజ్ ఇహిజు దేవుణు వరిజ్ ఓదరిస్తాన్.

5 నిసాతి గుణం మనికార్ దేవుణు సిని దీవనంకు మంజినికార్ ఆనార్లె ఎందనిజ్ ఇహిజు యా లోకం విజు వరి సొంతం ఆనాద్.

6 దేవుణు వెప్తి వజి నీతినిజాయిదాన్ మండ్లెజ్ ఇజి నండో ఆన మనికార్ దేవుణు సిని దీవనమ్మకు మంజినికార్ ఆనార్లె, ఎందనిజ్ ఇహిజు వరి మన్సు నిండ్లు అనిలెకెండ్ వరి అనిజ్ దేవుణు తీరిస్తాన్లె.

7 కనికారం తోరిస్తాన్ దేవుణు సిని దీవనమ్మకు మంజినికార్ ఆనార్లె, ఎందనిజ్ ఇహిజు దేవుణు వరి మున్సు కనికారం తోరిస్తాన్లె.

8 నెగ్గి మన్సు మనికార్ దేవుణు సిని దీవనమ్మకు మంజినికార్ ఆనార్లె, ఎందనిజ్ ఇహిజు వారు దేవుణుదిజ్ నూణార్లె.

9 లోకుర్ సమాదనమ్మదాన్ మండ్లెజ్ ఇజి పణి కినికార్ దేవుణు సిని దీవనమ్మకు మంజినికార్ ఆనార్లె, ఎందనిజ్ ఇహిజు వారు దేవుణు కొడోరె ఇజి కూకె ఆనార్లె.

10 దేవుణు వెప్తి వజి నాయం వందిజ్ మల్లెజ్ ఓరిస్సికార్ దేవుణు సిని దీవనమ్మకు మంజినికార్ ఆనార్లె, ఎందనిజ్ ఇహిజు వారు దేవుణు కిని ఎలుబడిఃదు మంజినార్లె.

11 నా మున్సు నమకం ఇట్టి వందిజ్ లోకుర్ మీ మున్సు నిందెజ్ మోప్పి మిజి మల్లెజ్ కిజి, మరి మీ మున్సు అబద్ధమాతి సెఇ మాటజ్ విజు వెప్పి వెలె మీరు దేవుణు సిని దీవనమ్మకు మంజినికార్.

12 అయావలె నండో సర్ద ఆజి మండ్లు. ఎందనిజ్ ఇహిజు పరలోకామ్దు* మిజి నండో పలం దొహ్ కాద్దె. మీ ముందాల బత్తిజి మహి దేవుణు ప్రవక్తరుజు వెటబా వారు యాలెకెండ్ మల్లెజ్ కిత్తార్.

సోరు - జాయ్

* 4:25 4:25 దెక్కుపాలి ఇహిజు పది పట్టుమ్మకు ఇక్కెజ్ గలిలయ నమ్మదరం అతాహి పడఃక మహా.

* 5:12 5:12 దేవుణు మంజినిమబాడ్డి

13 మీరు యీ లోకమీదు సొరు ననికిదెర్. గాని, సొరుదిజ్[†] రుసి సొహిజ, ఎలాగ దనిజ్ రుసి మర్జి తపిస్తెజ్ ఆనాద్? అక వెల్లి వసిరిజి లోకుర్ మట్టెజ్ నె ఆఎండ మరి ఇని పణిదిజ్ బా రెజక.

14 మీరు యీ లోకమీదు మనివరిజ్ జాయ్ ననికిదెర్. గొరొన్ ముస్సు, మని పట్టుం డాజ్ జి మండ్రెజ్ అట్ వద్.

15 ఎయెర్ బా ఉండ్రీ దీవ కసిని తూముదాన్ ముసి ఇడ్ ఎర్. గాని ఇండ్రెణివరిజ్ విజెరిజ్ జాయ్ సినివజ దీవ కంతూదునె ఇడ్వార్.

16 అయాలెకెండెన, మీ బత్తు విజెరిజ్ జాయి సీనివజ మండ్రెజ్. నస్తివలె మీరు కిని నెగ్గి పణిజి నుడెజి లోకుర్ విజెర దేవుణు మంజిని బాడిడు మని మీ బుబాతి దేవుణుదిజ్ పొగిడిఃనార్.

దేవుణు సీతి రూలుజు వందిజ్

17 దేవుణు సీతి రూలుజ్ గాని, దేవుణు ప్రవక్తరు వెహ్తా మాటెజ్ గాని డెయ్ జి పొక్తెజ్ నాను వాత మన్న ఇజి మీరు ఒడబిమాట్. వనకాజ్ డెయ్ జి పొక్తెజ్ ఇజి సీల్లెద్, గాని అయాలెకెండెన పూర్తి కిడిజ్ నె నాను వాత మన్న.

18 ఏలుహాన్ అసి బూమి ఆగాసం సిల్లెండ ఆతిజ్ బా దేవుణు మాటదు మని ఉండ్రీ ఇజిరి అక్కరం గాని, నున్న గాని, రాస్తి మని లెకెండె పూర్తి అవిండ సొన్ ఉ ఇజి నాను మిజి నిజం వెహ్తాన.

19 ఎయెన్ బా దేవుణు మాటదు మని ఇజిరి ఆగ్నేజ్ లోక ఉండ్రీ దనిజ్ లోజిజి మన్ ఏండ, అయాలెకెండె లోజి ఏండ మండ్రెజ్ ఇజి లోకురిజ్ నెస్తిస్తిజి వన్సిజ్, దేవుణు ఏలుబడిః కినివరి లోక లావ్ ఇజిరికాన్ లెకెండె వాండ్రు ఇడ్వార్. గాని ఎయెర్ బా దేవుణు మాటదు రాస్తిమని లెకెండె లోకురిజ్ నెస్తిసి అయాలెకెండెన కిజి మహిజి దేవుణు ఏలుబడిః కినివరి లోక వారు గొప్ప పెరికార్ ఆనాల్.

20 మీరు కిని పణిజ్, పరిసయ్యరుజుని యూదురి రూలుజ్ నెస్తిస్తికార్ కిని పణిజి ముస్సు, దేవుణు ముందాల ఒదె సరి ఆతికెజ్ ఇహిజనె, మీరు దేవుణు కిని ఏలుబడిః మంజినిదెర్ లె ఇజి నాను మిజి వెహ్తాన.

సప్తిక అవిద్

21 “లోకాజ్ సప్తిక అవిద్”[✠] ఎయెన్ బా ఒరెన్ వన్సిజ్ సప్తిజి, వన్సిజ్ తవ్వేండ తీర్పు వానాద్ లె ఇజి ముందాహాన్ అసి వెహ్తా మని మాట మీరు వెహిమనిదెర్ గదె?

22 గాని ఏలు నాను మిజి వెహ్తాక ఇనిక ఇహిజి ఎయెన్ బా, మరి ఒరెన్ వన్సి ముస్సు కోపం ఆతిజి వన్సిజ్ తీర్పు వానాద్. ఎయెన్ బా మరి ఒరెన్ వన్సిజ్ “పణిదిజ్ రెకెకి”, ఇజి వెహ్తాజి వాండ్రు నన్ హద్ది నజం ఎద్దు దన్సి వందిజ్ సమాదనం వెహ్తాజ్ వలె. ఎయెన్ బా మరి ఒరెన్ వన్సిజ్ “బుద్ది సీతికి”, ఇజి వెహ్తాజి, వాండ్రు ఎలాకాలం సిను కసి మంజిని బాడిడు అర్వు మంజినాన్.

23-24 నీను దేవుణుదిజ్ నంద సుర్పి మాళి పీటాదు నంద సిదెజ్ సొనివెలె, మరి ఒరెన్ వన్సిజ్ నీ ముస్సు ఇనికాద్ కోపం మనాద్ ఇజి అబె నిజి ఎత వాతిజి, నంద సిదెజ్ తతి వన్యాజ్ అబె ఇడెజి వెటని నంద సుర్పి మాళిపీట డిసి సొన్సి, ముందాల నీను వనివెట రాజినం ఆల. వెనుక మర్జి వాజి దేవుణుదిజ్ నంద సుర్పి సీల.

25 నిజి కోర్టు కిడిజ్ అకు మని వన్సి వెట బేగి రాజినం ఆల. టయం మనివెలెన ఆక కీల. సీలిజి వాండ్రు నిజి తీర్పు కిని వరిజ్ ఒవజెప్పాన్. తీర్పు కినికార్ నిజి జెలిదు ఇడ్ దెజ్ అతికారిజ్ ఒవజెప్పార్. వాండ్రు నిజి జెలిదు ఇడ్వార్.

26 ఉండ్రీ వయ్యబా సిల్లెండ అపు మనిక విజి సీనిదాక నీను వెల్లి వాదెజ్ అట్ ఇ, ఇజి నాను నిజి నిజం వెహ్తాన.

27 “రంకు బూలాదెజ్ అవిద్” ఇజి వెహ్తా మనిక మీరు వెహి మనిదెర్ గదె.

28 గాని నాను మిజి వెహ్తాక ఇనిక ఇహిజి ఎయెన్ బా మన్సుదు సెక ఆనదాన్ ఉండ్రీ అయ్ లి కొడెడిజ్ బేస్తిజి వాండ్రు అయవలెనె దనివెట వన్సి మన్సుదు పాపం కీతికాన్ ఆజినాన్.

[†] 5:13 5:13 యేనుప్రుజు కాలమీదు ఏలు దొహ్కొత్తిరెండె మన్సి సొరు సిల్లెత్తాద్. అయాలెలె సొరువెట తెల్లిని ఇన్సుబా కూడిత మహా తడి కిత్తిజి సొరు విజి కరిగిజి సొనాద్, ఇన్సు మిగిలినాద్. అయాలెలె లోకుర్ సొరు రుసి సిల్లిక ఇజి వెహ్తా మహార్. ✠ 5:21 5:21 నిర్గమ 20:13.

29 నీ ఉణెర్ కణక నిజి తప్ప కిబిన్సిజ దనిజ్ లాగ్వి విసీర్త. నీనె ఎల్ల కాలం సిను మంజిని బాడిడు సాన్సి అరెండ, మీ ఒణెల్దాన్ ఉండ్రీ ముక సాహిజ అక్కాదె నెగెద్.

30 మరి నీ ఉణెర్ కియు నిజి తప్ప కిబిన్సిజ, దనిజ్ కత్త్రి విసీర్త. నీనె ఎలాకాలం సిను మంజిని బాడిడు సాన్సి అరెండ, నీ ఒణెల్దాన్ ఉండ్రీ ముక సానికద నెగెద్.

31 ఎయెన్బా వన్ని ఆల్నిజ్ డిసి సీదెజ్ ఇహిజ ఇబ్బాణిజ్ అసి నీను నా ఆల్ని అఎద్ ఇజి దనిజ్ ఉండ్రీ విడిఃఆకు రాసి సీదెజ్ ఇజి వెహ్పిక మీరు వెహి మనిదెర్ గదె?

32 గాని నాను మీ వెట వెహ్పిక ఇనిక ఇహిజ, రంకు బూలాఇదనిజ్ మాసి డిఃస్త్రి సీతిజ, వాండ్రు దనిజ్ రంకు బూలాదెజ్ కిబిన్సికాన్ ఆజినాన్. మరి ఎయెన్బా దనిజ్ వెండెలి కితిజ వాండ్రు దనివెట రంకు బూలానికాన్ ఆజినాన్.

ప్రమాణమ్కాజ్ వందిజ్

33 మరి ఇనిక ఇహిజ, “ నీను కితి ఒట్టు పొక్తిక అయాలెకెండ కివిండ తప్పజ్ అఎద్, దేవుణు ముందాల కితి ఒట్టుదిజ్ అయావజని కిదెజ్ ” ఇజి వెహ్పిక ముందాహాన్ అసి మీరు వెహిమనిదెర్ గదె.

34 నాను మీ వెట వెహ్పిక ఇనిక ఇహిజ ఇనిదనిజ్ బా ప్రమాణం కిమాట్. ఆకాసం తోడుః ఇజి వెహ్మాట్, అక దేవుణు బనిని సింహాసనం.

35 సీలిజ బూమి తోడుః ఇజి వెహ్మాట్, అక దేవుణు వన్ని కాల్యు ఇడ్చి పీట. మరి యెరూసలేం తోడుః ఇజి వెహ్మాట్, రాజు ఆతి దేవుణుదిజ్ నెందితి పట్టుం.

36 నీ బుర్ర తోడుః ఇజిబా వెహ్మాట్, ఎందనిజ్ ఇహిజ నీ బుర్రది కొప్పవెంటి ఉండ్రీబా తెలాజ్ గాని కరిజ్ గాని కిదెజ్ నీను అటోఇ.

37 మీ మాటోజ్ ‘ఒఒ ఇహిజ ఒఒ’, ఇజి మండ్రెజ్. ‘అఎద్ ఇహిజ అఎద్’, ఇజి నె మండ్రెజ్. వనకాజ్ మిస్త్రికె నెఇ వన్నిబాణిజ్ వానికెజ్”.

కణకాదిజ్ బదులు కణక.

38 “ కణకాదిజ్ బదులు కణక, పలుదిజ్ బదులు పలు’ ఇజి దేవుణు మోసేజ్ సిత్తి మన్ని రూలుదు వెహ్పి మహిక మీరు వెహిమనిదెర్ గదె?

39 నాను మిజి వెహ్సాన్, నెఇ పణిజ్ కిని వరిజ్ అడ్డు కిమ. మరి నీను వన్ని ముస్సు, కోపమాజి వాండ్రు నిజి కిత్తిదన్నెజ్ మరజి కిదెజ్ అఎద్. ఎయెన్బా ఉణెర్ లెపాదు డెయ్విజ, డేబు లెపబా వన్నిజ్ తోర్నెత్.

40 ఎయెన్బా నిజి కొర్టు కిజి నీ సాక లాగ్దెజ్ సుడెఃతిజ, నీ కండువాబా వన్నిజ్ సీజి మనెత్.

41 మరి, ఒరెన్ రోమ సయన్మదికాన్ వన్ని ఒస్తుజ్ పిండిజి వన్ని వెట ‘ఉండ్రీ మయిలు దూరం రల’ ఇజి నిజి బలవంతం కితిజ వన్నివెట రుండి మయిలుజ్ దూరం ఇడ్చి సాన్త.

42 నిజి లొన్సివన్నిజ్ సీతి, మరి నిజి అప్ప లొన్సివరిబాణిజ్ మొకొం మహ్మాట్”.

నీ పగ్గతి వరిజ్ ప్రేమిన్త.

43 “ నీ పడకాతి వన్నిజ్ ప్రేమిన్త, పగాతి వరిజ్ ఇన్డం ఆవిండ మనెత్. ముస్సు, కోపమాదాన్ మనెత్’, ఇజి వెహ్పిమహిక మీరు వెహిమనిదెర్ గదె?

44 గాని నాను మిజి వెహ్పిక ఇనిక ఇహిజ, మీ పగ్గతి వరిజ్ ప్రేమిన్తు, మిజి హిమ్స కిజిని వరి వందిజ్ పార్దనం కిదు.

45 అహిజ మీరు పరలోకామదు మన్ని మీ బుబ్బాతి దేవుణుది నిజమాతి కొణెర్ ఇజి తోరె ఆనిదెర్లె. దేవుణు నెఇవరి ముస్సుబా నెగ్గెవరి ముస్సుబా వన్ని పొదు జాయ్ సిబిసినాన్. నాయం మని వరి ముస్సుబా నాయం సీలివరి ముస్సుబా పిరు పొక్కినాన్.

46 మిజి ప్రేమిన్సివరిజి మీరు ప్రేమిన్సిజ దేవుణు మిజి పలం సీనాన్ ఇజి మీరు ఒడిఃబిజనిదెరా? పను వెర్నికార్బా అహి కిజినార్ గదె?

47 మీరు మీ కుల వరిజి మీరు మాడిసినిదెర్ ఇహిజ మీరు ఆఇకార్ కినిదనిజ్ ఇంక మిస్త్రికె ఇనిక కిజినిదెర్? యూదురు ఆఇకార్బా అయాలెకెండ కిజినార్ గదె?

48 పరలోకామదు మన్ని మీ బుబాతి దేవుణు ఇని కల్లి సీలికాన్. అందెజె మీరుబా అయాలెకెండెనె మండ్రు.”

6

జాగ్రత్త మండ్రు

1 మీరు కిని నెగ్గి పణిజ్ లోకుర్ సుడెడెజ్ ఇజి వరి ముందాల కివిండ జాగ్రత్త మండ్రు. ఎండనిజ్ ఇహిజ ఆహె కితిజి పరలోకామ్దు ముని బుబ్బాతి దేవుణు బాణిజ్ మిజి ఇని పలంబా దొహ్కావ్ద.

2 అందెజి అవ్సరం ముని వరిజ్ ఇనికబా సితిజి, వేసం కినికార్ కిని లెకెండె అక విజేరిజ్ తెలిని లెకెండె జోడుబాంక ఊకిపిసి డేల్ని వెహ్కాట్. విజెరి ముందాల మిజి గొప్పు పేరు వాడెజ్ ఇని ఆసదాన్ వారు యూదురు మీటిజ్ కిని ఇల్కాజ్, మరి సరదు ఆహె కిబిస్సార్. వరిజ్ అయావలెనె పూర్తి పలం దొహ్కా మనాద్ ఇజి నాను మిజి నిజం వెహ్కాన.

3 గాని నీను అవ్సరమ్దు మునివరిజ్ సాయం కినివెలె, నీ ఊణెర్ కియు కినిక నీ డేబ్రు కియు నెస్సెజ్ ఆవ్ద.

4 అహిజ నీను సితిక ఎయెర్బా నెన్ఎండ మంజినాద్. అయావలె ఎయెర్బా నెన్ఎండ నీను కితిక సుడెజిని నీ బుబ్బాతి దేవుణు నిజి పలం సీనాన్లె.

5 మీరు పార్దనం కినివెలె వేసం కిని వరి లెకెండె మన్మాట్. లోకుర్ విజేరి సూణి లెకెండె యూదురు మీటిజ్ కిని ఇల్కాజ్, మరి సర్దు నిల్ని పార్దనం కిడెజ్ వరిజ్ ఇస్సం. వరిజ్ పూర్తి పలం దొహ్కా మనాద్ ఇజి నాను మిజి నిజం వెహ్కాన.

6 గాని నీను పార్దనం కినివెలె. నీను గదిదు సొన్ని సేష్టా కెహ్కా, ఎయెర్బా తొణ నీ బుబ్బాతి దేవుణు వెట పార్దనం కిల. అహిజ ఎయెర్బా నెన్ఎండ నీను కితిక సుడెజిని ఎయెర్బా తొణ ఆణ నీ బుబ్బాతి దేవుణు నిజి పలం సీనాన్.

7 మీరు మీరు పార్దనం కినివెలె యూదురు ఆణ వరి లెకెండె పణిడిజ్ రెణ మాటిజ్ వెహ్కాట్. అయాలెకెండె లావ్ వర్గితిజానె దేవుణు వినాన్ ఇజి వారు ఒడెబిజినార్.

8 మీరు వరిలెకెండె మండ్రెజ్ ఆవ్ద. ఎండనిజ్ ఇహిజ మిజి అవ్సరం అతిక ఇనిక ఇజి మీరు లొన్ని ముందాల్ని మీ బుబ్బాతి దేవుణు నెసినాన్.

9 “అందెజి మీరు యా లెకెండె పార్దనం కిడెజ్. ‘పరలోకామ్దు ముని మా బుబ్బాతి దేవుణు, లోకుర్ విజెరి నీ పేరు గొప్పు నెగ్గి ఇజి గవ్సరం సిపిర్.

10 నీ ఏలుబడిః లోకుర్ విజెరి ముస్సు మనీద్. పరలోకామ్దు నిజి ఇస్సమాతికెజ్ జర్గిని లెకెండెనె బూమి ముస్సుబా జర్గిపిద్.

11 రోజురోజుదిజ్ మిజి కావాలిస్తి తిండి అయ రోజు మిజి సీజి మన్లె.

12 వేరెదికార్ మా వెట కితి తప్పుజ్ మాపు వరిజ్ సెమిస్తి లెకెండెనె, మాపు కితి తప్పుజ్ మిజిబా సెమిన్లె.

13 పాపం కిబిస్తి నెణ ఆసెజ్ మా లొణ రెవెండ, సయ్యాను బాణిజ్ మిజి తప్పిన్లె’.

14 లోకుర్ మిజి కిని తప్పుజ్ మీరు వరిజ్ సెమిస్తిజి, పరలోకామ్దు మున్ని మీ బుబ్బాతి దేవుణుబా మీరు కిని తప్పుజ్ మిజి సెమిస్సాన్.

15 గాని, మీరు లోకుర్ మీ వెట కిని తప్పుజ్ మీరు వరిజ్ సెమిన్ఎండ మహిజ, పరలోకామ్దు మున్ని మీ బుబ్బాతి దేవుణుబా మీరు కిని తప్పుజ్ మిజి సెమిన్ఎన్.”

ఉపాస్

16 “మీరు ఉపాస్ కినివలె, వేసం కిని వరిలెకెండె మండ్రెజ్ ఆవ్ద. ‘మాన్ ఉపాస్ మంజినాప్’ ఇజి విజేరి నెస్సెజ్ ఇజి వారు మొకొం నీర్సం కిజి మంజినార్. అయావలెనె వరిజ్ పూర్తి పలం దొహ్కా మనాద్ ఇజి నాను మిజి నిజం వెహ్కాన.

17-18 గాని మీరు ఉపాస్ కినివెలె బురాదు నూనె రాసె ఆజి మొకొం ఊర్పాజి మండ్రు. అహిజ మీరు ఉపాస్ కినిక లోకుర్ ఎయెర్బా నెన్ఎర్. గాని ఎయెర్బా తొణ మీ బుబ్బాతి దేవుణు ఒరెండ్రె నెస్సాన్. ఎయెర్బా నెన్ఎండ మీరు కినిక సుడెజిని మీ బుబ్బాతి దేవుణు మిజి పలం సీనాన్.”

సమ్సారం

19 డొజారి డుగ్గెజి ఒతెజ్ అక్కు మని, మరి నెదని కరి తిండ్రెజ్ అకుమని యా బూమి ముస్సు మీ వదిజ్ సమ్సారం గణెన్మాట్.

20 గాని డొబ్బరిబు డుఃగజ ఒత్తెజ్ అట్తెజ, మరె సెద గాని కరి గాని పాడః కిడెజ్ అట్తెజ దేవుణు మంజని బాడిఃదు మీ వందిజ్ నమ్సారం గణస్సు.

21 ఎందనిజ్ ఇహిజ నీ నమ్సారం ఎంటె మనాదో అబెనె నీ మన్సుబా మంజినాద్.

22 కణక ఒడొలేదిజ్ దీవ లెకెండెన మనాద్. నీ కణక నెగ్గక ఇహిజ నీ ఒడొలేదిజ్ విజు నెగ్గకెజ్ తసి మంజినాద్.

23 నీ సెజ ఉదెనమ్దాన్ నీ కణకెజ్ జొజ్ నుడిజి మహిజ, నీ మన్సు విజు సీకటి మంజినాద్. నీ ఒడొల్ విజుబా సీకటి ఆజి మంజినాద్. నిజీ మనాద్ ఇజినీను ఒడొబిజిని జామ్ సీకటి ఆతిజ, అయ సీకటి ఎసోనో సీకటి.

24 ఎయెనబా రిఎర్ ఎజుమానిరు వందిజ్ ఉండ్రె లెకెండె వణి కిడెజ్ అట్తెజ. ఒరెన్ వన్సిజ్ ప్రేమిని మరె ఒరెన్ మున్సు ఇన్డె సిల్లెండ మంజినాన్. సిల్లిజ ఒరెన్ వన్సిజ్ లొజిజి నమ్మకమాతి వనిలెకెండె మంజినాన్. మహివన్సి మున్సు సెజ మహిజ్ వర్గిజి మంజినాన్. అయలెకెండెన దేవుణుదిజ్ నీ డబ్బుదిజ్ ఉండ్రె లెకెండె ప్రేమిన్సిజ్ మీరు అట్తెజదెర్.

విసారిన్ మాట్

25 అందెజె నాను మిజీ వెప్పిక ఇనిక ఇహిజ, ఇనిక తినాప్లె, ఇనిక ఉణాప్లె ఇజి మీ బత్తు. వందిజ్ విసారం ఆమాట్. మరె మా ఒడొలేవందిజ్ ఇనిక పొర్పానాప్లె ఇజి ఒడిబిమాట్. మీ పాణం తిండిదిజ్ మిన్సిక ఆదా? మీ ఒడొలే సొక్క పాతెజ మిన్సిక ఆదా?

26 ఆగామ్మదు ఎగ్గిని పొటిజ నుడెదు. అవి విత్తె, కొయ్తె, ఒసి కొటుదు వాక్తె గాని పరలోకామ్దు మని మీ బుబ్బాతి దేవుణు వనకాజ్ పొస కిజినాన్. మీరు వన్కా మిన్సి విలువ మనికిదెర్ ఆఇదెరా?

27 మీ లోజి ఎయెనబా విసారిస వన్సి బత్తుదిజ్ ఉండ్రె గంట కుడుప్తెజ్ అట్తెనాండ్రా?

28 మరె ఎందనిజ్ సొకెజ వందిజ్ మీరు విసారిసినిదెర్? మడిజిజ మని పూజు నుడెదు, అవి కన్డబాడెజ్, సొక కిడెజ్ నూలుజ్ తయార్ కిజ్.

29 అహిజ్ బా విజు అన్సి కలిగితి మన్సి సొలోమోను రాజు యా ఉండ్రె పూజు లకెండె సోకు మన్సి ఉండ్రె సొక్క తొడిగివెత్తాన్, ఇజి నాను మిజీ వెప్పిన.

30 నేడ్డు మంజి విగెహిజ్ సిసుద్ నురె ఆని మడిజిజ మని యా గడిదిజ్ దేవుణు యా లెకెండె సోకు సిత్రాన్. అహిజ, ఇజిరె నమకం మనికిదెరా మరె ఒదె నగెండెమిజి సొకెజ్ తొడిగిన్ వెత్తాండ్రా?

31 అందెజె మీరు, “ఇనిక తినావెల్, మరె ఇనిక ఉణావెల్, సిలిజ ఇనిక పొర్పానావెల్”, ఇజి ఒడిబిజి బాద్ ఆమాట్.

32 ఎందనిజ్ ఇహిజ దేవుణుదిజ్ నెన్ ఇకార్ నె వినక వందిజ్ రెబాజినార్. యాకెజ్ విజు మిజీ అవ్సరం ఇజి పరలోకామ్దు మని మీ బుబ్బాతి దేవుణు నెసినాన్.

33 గాని విజు దనిజ్ ఇంక దేవుణు ఏలుబడి కిని వందిజ్ నీ మరె వన్సి ఎద్దు మీరు నీ తినిజియ్ దాన్ మండ్రెజ్ ఇజి అస ఆజి మండ్రు. నన్సివలె మిజి కావాలిన్సికెజ్ విజు మిజి దోహ్ క్కె.

34 విగెహిజ్ వందిజ్ విసారిన్సొట్. విగెహిజ్ జర్గిని వన్కా వందిజ్ విగెహిజ్ విసారిన్సు. ఎమేణి రోజుదిజ్ తగితి కన్డం అయ రోజుదు మంజినె.

7

తీర్పు కిమాట్

1 “మహి వరి మున్సు తీర్పు కిమాట్. అహిజ దేవుణు మిజీబా తీర్పు కిమాన్ వెల్.

2 మీరు మహివరిజ్ ఎలాగ తీర్పు కినిదెర్ అయలెకెండెన దేవుణు మిజిబా తీర్పు వానాద్ వెల్. మీరు ఇని కొల్లదానె దేవుణు మిజీబా తీర్పు సీనాన్లె.

3 నీ కణకాదు ఉండ్రె తూలం ననిక మహివలె, దనిజ్ నుడెవండ, నీను, నీ తంబెరి కణకాదు మని ఇజిరె కసరాదిజ్ ఎందనిజ్ బెసినె?

4 ‘నీ కణకాదు తూలం ననిక మనివెల్ అక లాగెండ, నీ తంబెరి కణకాదు మని ఇజిరె కసరాదిజ్ నాను లాగ్గి విసీర్పు’ ఇజి నీను ఎలాగ వెప్పినె?

5 వేసం కినికిదిరా, ముందాల నీ కణకాదు మని తూలం ననిక లాగిం. అయావలి నీ తంబెరి కణకాదు మని ఇజిరి కనరాదిజ్ నెగెండ్ సుడఃజి లాగిదిజ్ అట్టి.

6 దేవుణుదిజ్ నెందితి సజతిజ్ అక్కజ్ ఇస్టం కిణ వరిజ్ నెస్పిస్తజ్ ఇజి సుడఃమట్. అయలెకెండ్ కితిజ, వారు తిండి సీని వరిజ్ కట్టి సెణ నుకుడిజ్ లెకెండ్ వారు కొపం ఆజి మరజి మీ ముస్సు వాజి అర్నార్. గొప్ప విలువ మనికెజ్ పండ్రిజ్ ముందాల ఇట్టిజ అక్కజ్ వన్కాజ్ కాల్యాణిజ్ మట్టి లెకెండ్ వారుబా కివారిలె.

7 మీరు ఇనిక లొస్సిదెరొ అక మిజి దేవును సీనాన్. ఇనిక మీరు రెబాజినిదెరొ అక దేవుణు మిజి సీనాన్. కొత్తు మీ పందిజ్ దేవుణు సెప్లా రే ఆనాన్.

8 లొస్సివరిజ్ విజెరిజ్ దొహ్కె, రెబానివన్నిజ్ తొరె ఆజినాద్. కొత్తిని వన్నివందిజ్ సెప్లా రే ఆనాద్.

9 మీ మరిన్ మిజి తిండి లొస్సిజ, మీరు ఎయిదెరెబా వన్నిజ్ పణుకు సీనిదెరా?

10 మరి వాండ్రు మెయి లొస్సిజ, సరాన్సీనిదెరా?

11 మీరు సెఇకిదెరొ ఆతిజ్బా మీ కొడొఃరిజ్ నెగ్గి ఇనామ్కునె సేదిజ్ ఇజి నెస్పిదెరొ. అహిజ పరలోకామ్దు మని మీ బుబ్బాతి దేవుణు, వన్నిజ్ లొస్సివరిజ్ దినిజ్ ఇంక మరి ఒది నెగ్గి ఇనామ్కు సెవిండ్రా?

12 అందెజె విజు సజతిజ లొః, మహికార్ మిజి ఇనిక కిదిజ్ ఇజి మీరు కోరిజినిదెరొ అయలెకెండ్నె మీరు వరిజ్ కిదు. దేవుణు మోసెజ్ సేతి రూలుజ్నె దేవుణు ప్రవక్తరు పగ్గితి మాటెజ అర్దం యాకాద్.”

ఒసార్ సరిని ఇహ్కా సరి

13 ఇహ్కా సరి గవ్నిదాన్ సొండ్రు. ఎందనిజ్ ఇహిజ నాసనమ్దు సొని సరి ఒసార్దిక. అయ గవునిబా ఒసార్దిక. అయ సర్దు సానికార్ నండ్ండ్ఠార్ మనార్.

14 ఎలాకాలం మంజిని బత్తు సీని సరి ఇహ్కాదికాదె, దని గవునిబా ఇహ్కాదిక. అయ సరిదాన్ నడిఃనికార్ కొకెండ్ఠార్.

మరాన్ని దని పట్టు

15 నెగ్గికామ్ ఇజి నాటిసనికార్ గాని తవు నెస్పిస్సి ప్రవక్తరు వందిజ్ జాగరత మండ్రు. వారు ప్రమాదమాతి మూర్కతం మని కార్నుకుడిజ్ లెకెండ్ మనికార్. గాని వెల్లిహన్ గొరొ లెకెండ్ ప్రమాదం సెలికార్ ఇజి తొరె ఆజినార్.

16 పరి పణిజాణిజ్ మీరు వరిజ్ నెస్పిదెరొలె. ఎయెరెబా సాప్పుతుపెజాణిజ్ ద్రాసపట్టు కొయెవెరొ. సాప్పు మరొకాజ్ బొడె పట్టు కొయెవెరొ.

17 అయలెకెండ్నె విజు నెగ్గి మరొకాజ్, నెగ్గి పట్టునె అస్సు, మరి సెణ మరాతు సెణ పట్టునె అస్సు.

18 ఉండ్రి నెగ్గి మరాతు సెణ పట్టు అన్ఉ, మరి సెణ మరాతు నెగ్గి పట్టు అన్ఉ.

19 నెగ్గి పట్టు అన్ఇ మరెక్ విజు కత్తి సినుద్ విసీరె ఆనెలె.

20 అయలెకెండ్నె పరి పణిజాణిజ్ మీరు వరిజ్ నెస్పిదెరొ.

21 ప్రబువా, ప్రబువా ఇజి నజి కూక్కికార్ విజెరె దేవుణు విలుబడిఃదు మన్వెరొ, గాని పరలోకామ్దు మని నా బుబెజ్ ఇస్టమాతి వజ కినికాండ్రె దేవుణు విలుబడిఃదు మంజినాన్.

22 తీర్పు తీరిసని దినమ్దు నండ్ండ్ఠార్ నా డగ్రు వాజి, “ప్రబువా, ప్రబువా మాపు నీ పేరుదాన్ దేవుణు ప్రవక్తరు వజ వరగెవతాసా? నీ పేరుదాన్ దెయమ్కాజ్ వెరెవతాసా? నీ పేరుదాన్ నండ్ం బమ్మాతి పణిజ్ కివతాసా?”, ఇజి వెహ్నార్.

23 అయావలి, “నాను మిజి ఎసెజ్బా నెన్వెత. సెణ పణిజ్ కినికిదిరా, నా డగ్రుహన్ సొండ్రు ఇజి వరిజ్ తినాజ్ వెహ్నా.

బుద్ధి మనికాన్ని బుద్ధి సెలికాన్

24 అందెజె, యా నా మాటెజ్ వెంజి అయా వజ కినికాన్ ఎయెన్బా, నటు ముస్సు వన్ని ఇలు తొహ్తి బుది మనివన్నిజ్ పొలిత మనాన్.

25 పిరు వాతాద్. గడ్డెజ్ నిండ్రిజి సొహా. గాలి వాజి అయ ఇలు ముస్సు డెఃతూద్ గాని అయ ఇలు పునాది నటు ముస్సు మనిజ్ అరెవతాద్.

26 గాని యా నా మాటెజ్ వెంజి వన్నా లెకెండ కిఇకార్ ఎయెన్బా ఇన్ను మున్ను వన్ని ఇలు తొప్తి బుద్ది సీలి వన్నిజ్ పోలిత మనాన్.

27 పిరు వాతాద్. గడ్డెజ్ నిండ్రిజి సాహె. గాలి వాజి అయ ఇలు మున్ను డెయెతాద్. అయావలె అయ ఇలు నండొ జాటుదాన్ అడిగి అర్తాద్.”

28 యేసు యా మాటెజ్ వెప్తి వీజితిజ్ లోకుర్ విజెరె వన్ని బోదదిజ్ బమ్మ అతార్.

29 ఎందనిజ్ ఇహిజ వాండ్రు, యూదురి రూలుజ్ నెస్సిన్సి వరి లెకెండ ఆఎండ, అతికారం మనివన్ని లెకెండెన్ వాండ్రు బోదిస్తాన్.

8

1 యేసు అయ గొలొన్డిఃగిజి వాతివలె మంద లోకుర్ వన్ని వెనుక వాతార్.

2 కుప్తు రోగం* మనికాన్ ఒరెన్ వాతండ్రె వన్ని ముందాల ముణుకుజ్ ఊరిజి, “ప్రబువా, నాను నెగెణ్ అదెజ్ ఇజి నిజి మన్ను మహిజ, నజి నెగెణ్ కిదెజ్ అట్టి”, ఇజి వెప్తాన్.

3 అందెజి వాండ్రు కియు సాప్పి వన్నిజ్ ముట్టాండ్రె, “నజి మన్ను మనాద్, నీను నెగెణ్ ఆఅ”, ఇజి వెప్తాన్. వెటనె వన్నిజ్ మహి పెరి జబు డిఃస్త సాహాద్.

4 నస్తవలె యేసు వన్నివెట, “యాక ఎయెరిజ్ బా ఇనికబా వెహ్ ము. నీను తీనాజ్ సాన్ని నీ ఒడొల్ పుజెరిజి తోరినెఅ. నీను నెగెణ్ ఆతి దనిజ్ వరిజ్ రుజువ్ లెకెండ మోని ముజలె అడ్ర సెతి వజి దేవుణుదిజ్ సంత సీఅ”, ఇజి వెప్తాన్.

ఒరెన్ సదాతిపతి ఆతి వన్ని నమకం

5-6 యేసు కపెర్నూమము ఇని పట్టమ్దు వాతివలె సదాతిపతి† ఒరెన్ వన్ని డగ్రు వాతండ్రె, “ప్రబువా, నా పణిమన్ని ఒరెన్ కికు కాల్యు సాని జబుదాన్ నండొ బాద ఆజి నా ఇండ్రొ గూర్త మనాన్”, ఇజి వెప్సి బతిమాలితాన్.

7 “నాను సాన్ని వన్నిజ్ నెగెణ్ కిన”, ఇజి యేసు వెప్తాన్.

8 నస్తవలె అయ సయెనమ్ది అతికారి ఈహు వెప్తాన్, “ప్రబువా, నీను నా ఇండ్రొ వాదెజ్ నాను తగ్గిక ఆఎ. గాని నీను ఉండ్రె మాట వెప్తిజి ఆనాద్, నా పణిమన్ని నెగెణ్ ఆనాన్.

9 నీను అయాలెకెండ కిదెజ్ అట్టిఇజి నాను నెసిన. ఎందనిజ్ ఇహిజ నా మున్ను అతికారం మన్నికార్ మనార్. నా అడిగి సయెనమ్దికార్ మనార్. నాను ఒరెన్ వన్నిజ్ ‘సాన్అ’ ఇహిజ సానాన్. మరి ఒరెన్ వన్నిజ్ ‘రఅ’ ఇహిజ వానాన్. నాను నా పణి మనిసిదిజ్ ‘అయ పణి కిఅ’ ఇహిజ వాండ్రు ఆక కినాన్.”

10 యేసు యా మాట వెంజి బమ్మ అతాండ్రె వన్ని వెనుక వానివరిజ్ సుడఃజి, “వన్నిజ్ మన్ని లెకెండ దేవుణు మున్ను నిసా పెరి నమకం మని ఎయెరిజ్ బా ఇస్రాయేలు లోకుర్ నడిఃమి, నాను సుడఃదెజ్ సీల్లె ఇజి నాను మిజి నిజం వెప్సిాన్.

11 నాను మిజి వెప్సిాక ఇనిక ఇహిజ, దేవుణు కిని ఏలుబడిః వానివలె, తూర్పుదాన్ పడఃమరదాన్ నండొ లోకుర్ వాజి అనిగెగెరి ఆతి అబ్రాహాము, ఇస్సాకు, యాకోబు ఇని వరివెట పరలోకామ్దు విందుదు బస్సార్.

12 గాని దేవుణు కిని ఏలుబడిఃదు తవ్ఎండ మంజినావ్లె ఇజి ఒడఃబిజిని వరిజ్ వెల్లి సీకటిదు విసీరనాన్. అబె లోకుర్ అడఃబాజి పల్కు కొహ్ క్వి మంజినార్.”

13 యేసు అయా సదాతిపతిజ్, “సాన్అ, నీను నమ్మితి వజని జిగ్గినాద్”, ఇజి వెప్తాన్. అయ గడిఃయాదునె వన్ని పణిమనిసి నెగెండ ఆతాన్.

యేసు నండొ లోకురిజ్ నెగెండ కిజినాన్.

14 వెనుక యేసు పేతురు ఇండ్రొ వాతాన్. వన్ని మీమ్ సీ నోబుదాన్ గూర్తిమనిక సుడఃతాన్.

* 8:2 8:2 కుప్తు రోగం ఇహిజ పెరిజబ్బు అయ జబ్బు వాతిజి కిక్కు కాల్యు మన్ని డెగ్విజ్ తవ్జి సానాదెలె జబ్బు మన్నిబాన్ ముట్టిజి నెన్విద్ † 8:5-6 8:5-6 సదాతిపతి ఇహిజ రోమనయ్యమ్దు మన్ని వందమణిసీరె నయ్యమ్ది వరిజ్ ఆతికారి.

15 వాండ్లు దని కియుదు ముట్టిజ్ సరి దనిజ్ మహి నోబు డిఃస్త సాహద్. అది నిజితాదె వన్నిజ్ నెగెండ్ సుడఃదెజ్ మొదోల్స్తాద్.

16 పాదు ఆతివలె, దెయమకు అస్తి వరిజ్ నంణెండారిజ్, లోకుర్ వన్ని డగ్రు తతార్. వాండ్లు ఉండ్రి మాటదానె దెయమకాజ్ పెర్తాన్, మరి జబుది వరిజ్ విజేరిజ్ నెగెన్ కితాన్.

17 “వాండ్లు మా నీరసమకు లాగితాన్, మరి మా జబుజ్ వాండ్లు పిండితాన్”* ఇజి యెసయ ప్రవక్త వెట దేవుణు ముజాల వగ్గితి మాటిజ్ పూర్తి అదెజ్ యాక జగ్గితాద్.

యేసు వెట సాండ్రిజ్ ఇహిజ ఇనిక కిదెజ్

18 యేసు వన్ని డగ్రు మని మంద లోకురిజ్ సుడఃజి సమదరం అతాహ పడక సాండ్రిజ్ ఇజి వన్ని సిసూరిజ్ వెప్తాన్.

19 నస్తివలె, యూదురి రూలుజ్ నెస్సిస్సికాన్ ఒరెన్ వన్ని డగ్రు వాతండ్రి, “బోద కనికి, నీను ఎంబె సాహిజ్ బా నీ వెట నానుబా వాన్”, ఇజి వన్నిజ్ వెప్తాన్.

20 నస్తివలె యేసు, “నకెజ బోరోజ్ మనె, ఆగాసమదు ఎగ్రిజిని పొటిజ గూడుకు మనె, గాని లోకు మరిసి ఆతి నజ్ బుర్ డుట్టి మండ్రిజ్ బా బాడిః సిల్లెద్”, ఇజి వెప్తాన్.

21 సిసూర్ లొఇ ఒరెన్ వాతండ్రి, “ప్రబువా నాను ముందాల సాస్సి నా బుబ్బు సాతి పిన్ గు పెరజి పొక్కి వాన్”, ఇజి వెప్తాన్.

22 నస్తివలె యేసు, “సాతికారె* పరి సాతి వరిజ్ పెరజి పొక్కిర్, నీను నావెట రఅ”, ఇజి వన్నిజ్ వెప్తాన్.

యేసు తుపాన్ దిజ్ అలెప్పిసినాన్

23 యేసుని వన్ని సిసూర్ డోణి ఎక్కారె అబ్బెణిజ్ సోత సాహర్.

24 వారు సాస్సి మహిజ్ యేసు డోణిదు నిద్ర కిజి మహాన్. వెటనె అయ సమదరమదు గాలితూపాన్ రేజితాద్. ఉల్కెజ్ వాజి అయ డోణి ముస్సు అర్తె.

25 సిసూరు సాస్సి వన్నిజ్ నిక్కారె, “ప్రబువా, సాన సానాఫ్లె, మజి రక్సిన్ అ”, ఇజి వన్నిజ్ నిక్కారె.

26 అయావలె యేసు వరిజ్, “ఎందనిజ్ మీరు నిసా తకు నమకం మనికిదెర్ ఆజినిదెర్?”, ఇజి వెప్తాండ్రి నిజ్ జి గాలిదిజ్ ఉల్కెజు అలెజి మన్ అ ఇహాన్. ఆకెజ్ పూర్తి పలక ఆతె.

27 వారు బుబ్బు ఆతారె, “ఏండ్లు ఎలాగ మర్తికాండ్రి? గాలిని ఉల్కెజ్ బా వన్నిజ్ లొజిజిన్”, ఇజి వగ్గితార్.

దెయం అస్తి రిఎరిజ్ నెగెండ్ కిజినాన్

28 యేసు సమదరం అతహి పడక మని గదరెను ఇని నారు అందితిజ్, దెయం అస్తికారె రిఎర్, యూదురు పరి సాతివరిజ్ సమాది కిని సాలమ్ కాణిజ్ సోతారె వన్ని ఎద్రు వాతార్. వారు జంతు నని మూర్కతం మనికార్కక ఎయెర్ బా అయ సరి సాన్ ఏర్.

29 “ఓ దేవుణు మరిసి, మా వెట మిజి ఇని పణి? కాలం వాని ముజాల మజి బాద కిదెజ్ ఇబ్బె వాతిదా?”, ఇజి డేడిఃస్తార్.

30 వరి ఎద్రు కండెక్ దూరమదు పండ్రిజ్ మంద మెయేజి మహె.

31 అయ దెయమకు వన్నిజ్ “నీను మజి ఉల్పిని లెకెండ్ ఇహిజ, అయ పండ్రిజి లొఇ మజి పోక్ అ”, ఇజి బతిమాలతె.

32 వాండ్లు వన్కాజ్ “సాండ్లు” ఇజి వెప్తాజ్ అయ దెయమకు వరిజ్ డిఃస్టినె పండ్రిజి లొఇ సాహె. అయ మంద పండ్రిజ్ విజు గొరోన్ ముస్సుహాన్ ఉహాక్కి సాహెని సమదరమదు అర్తె సాతె.

33 పండ్రిజ్ మేప్పికార్ ఉహాక్కి సాస్సి పట్టుమదివరిజ్ జగ్గితికెజ్ విజు వెప్తార్. దెయం అస్తి మహివరిజ్ జగ్గితికబా వెప్తార్.

* 8:17 8:17 యెసయ 53:4. † 8:22 8:22 అయాలెకెండ్ వెస్తివలె దేవుణువెట ఇని పొత్తు సిల్లి ఆత్మదిజ్ నెందితి నజిజిజి వందిజ్ యేసు వెప్తాన్. నిజం సాతివరి వందిజ్ అవిద్. యా మాటిజ్ దేవుణు విలుబడిః అడిగి మనెఇ పరి వందిజ్ వెప్తాన్. యా మాటిజ్ యాలెకెండ్ నె లాక 15:24,32, మరె ఎవెను 2:1 బాన్ బా రాస్త మనాద్. § 8:28 8:28 యేసుప్రబు కాలమదు సుట్టు బోరోకిజి సాలమ్ కెండ్ తయార్ కిజి సాతి వరిజ్ సమాది కిజి మహర్. పినుగు సాలమ్ లొఇ ఇడ్డి పణుకుదాన్ సాలమ్ దిజ్ మూసి మహర్.

34 నన్నెవలె అయ పట్టుమదికార విజేరె సోసి యేసుజ్ నుడొడెజ్ వన్ని ఎర్దు వాతార్. వన్నిజ్ నుడొటిజ్, వరి నారు డిసి సాన్అ ఇజి వన్నిజ్ బతిమాల్తార్.

9

యేసు కిక్కుకాల్కు అర్ది వన్నిజ్ నెగెండ్ కిజినాన్

- 1 యేసు డోణి ఎక్టాండ్రె నెరు డాట్టి కపెర్నహము ఇని వన్ని సొంత పట్టుమదు వాతాన్.
- 2 అయావలె నెగెండార్ కికు కాల్కు అర్ది మంసమదు గూర్జిమహి ఒరెన్ వన్నిజ్ యేసు డగ్రు తతార్. దేవుణు మున్ను వరి నమకం యేసు నుడొతాండ్రె, “మరిన్, దయెరమదాన్ మన్అ, నీ పాపమకు నెమిన్దు మన”, ఇజి కికు కాల్కు అర్ది వన్నిజ్ వెప్తాన్.
- 3 యూదురి రూలుజ్ నెస్పిన్సికార్ నెగెండార్ “వీండ్రు దేవుణుదిజ్ దూసిస్సాన్”, ఇజి వరి లోఇ వారె వర్గితార్.
- 4 యేసు వరి మన్నుదు మనికెజ్ నెస్తాండ్రె ఈహు వెప్తాన్ “మీరు ఎందనిజ్ మీ మన్నుదు నెఇకెజ్ ఒడొజినిదెర్?”.
- 5 “నీ పాపమకు నెమిన్దుమన ఇజి వెహ్నిక నులునా? నీను నిజ్జెన సడిఅ ఇజి వెహ్నిక నులునా?”.
- 6 “లోకు మరిన్ ఆతి నజ్జి బూమి మున్ను పాపమకు నెమిన్దెజ్ అతికారం మనాదె ఇజి మీరు నెస్టెజ్ వెలె.” వెనుక కికు కాల్కు అర్దివన్ని వెటె, “నిజ్అ నీ మన్సం అని ఇండ్రె సొన్అ”, ఇజి యేసు వెప్తాన్.
- 7 వాండ్రు నిజితండ్రె ఇండ్రె సొహ్న్.
- 8 లోకురె విజేరె అక నుడొజి బమ్మ అతార్. లోకురిజ్ యా లెకెండ్ అతికారం సితి దేవుణుదిజ్ పొగిడితార్.

యేసు మత్తాయిజ్ కూక్కినాన్

- 9 యేసు అబెణిజ్ సొన్ని మహిజ్, పన్ను వెర్నికాన్మత్తయి ఇనికాన్వన్ని బూడిదు బస్త మహాన్. యేసు వన్నిజ్ నుడొజి, “నా వెటె రఅ”, ఇజి వెప్తాజ్, వాండ్రు నిజితాండ్రె యేసు వెటె సొహాన్.
- 10 వెనుక యేసు మత్తాయి ఇండ్రె బోజనం కిదెజ్ బన్ని మహిజ్, నండొండార్ పన్ను పెర్నికార్ని* పాపం కినికార్ ఇజి పరినయెరు వహ్నికార్ వాతారె వన్ని వెటెని వన్ని సిసూర్ వెటె బోజనమదిజ్ బస్తార్.
- 11 పరినయెరు అక నుడొజి, “ఎందనిజ్ మెజి నేర్పిన్సికాన్ పన్ను వెర్నివరి వెటె, పాపం కినివరి వెటె బోజనం కిజినాన్”, ఇజి వన్ని సిసూర్జె వెన్బాతార్.
- 12 యేసు అయ మాట విహండ్రె, “బమ మనివరిజె డాక్టర్ అవ్సరం, నెగెణ్ మని వరిజ్ డాక్టర్ అవ్సరం సిల్దె”, ఇజి వెప్తాన్.
- 13 “మీరు మహి వరి మున్ను కనికారం తోరిన్దెజ్ ఇజినె నాను కోరిజిన గాని కత్తి పూజెజ నాను కోరివి*, ఇజి దేవుణు వెప్తా మాటది అర్దం ఇనికాదో ఇజి మీరు సొన్ని నెస్సు. పాపం కిని వరిజ్ కూక్కిజె నాను వాత మన, నెగెణ్ మనికావ్ ఇజి ఒడొబిని వరిజ్ అవిదె”, ఇజి వెప్తాన్.

యేసుజ్ ఉపాన్వందిజ్ వెన్బాజినార్.

- 14 నన్నెవలె యోహాను సిసూరు వన్ని డగ్రు వాజి, “మాపుని పరినయెరు డిజెన్విండ ఉపాన్ మంజినావ్, గాని నీ సిసూర్ ఎందనిజ్ ఉపాన్ మన్విర్?”, ఇజి వెన్బాతార్.
- 15 దనిజ్యేసు ఈహు వెప్తాన్, “పెండ్లి దజడాయెన్, పెండ్లి కాలెజ వెటె మని వెలె వారు దుకమ్దాన్ మంజినారా? పెండ్లి దజడాయెన్ వరిబాణిజ్ కూకె ఆతి వెనుక వారు ఉపాన్ మంజినార్.”
- 16 “ఎయెర్బా పడాయ్పాతదు కొత పాత ముక కుడుప్పి గుత్విర్. ఆహా కితిజి కొత పాత ముక కెటె అజి కిజినక మరి లావ్నాదె.

* 9:10 9:10 పన్ను పెర్నివరిజె యూదురు ఇన్దు కివిత్తార్. యూదురు పన్ను పెర్నివరిజె తక్కుదికార్ మరి గొప్ప పాపం కినికార్ ఇజి ఒడొబిజి మహర్. వారు రోమ ప్రభుత్వం వందిజ్ పన్ను పెర్ని మహర్. అక్క యూదురి రులుదిజ్ పడిఎండ మహర్. వారు కిని పణిదాన్ వారు ఆఇవరివెటె కూడొజి మహిజ్ వారు నుబ్బురు సిల్లికార్ ఇజి వరివందిజ్ ఒడొబిజి మహర్. * 9:13 9:13 హోన్య 6:6.

17 ఎయెర్బా వడాయి తోలు సన్నిదు కొత ద్రాళ్ళ కల్లు వాక్వర్. ఆహె కిటిజ కొత ద్రాళ్ళ కల్లు పులాజ్ ఆనివెల తోలు సంసి పెడెల్నాద్, ద్రాళ్ళ కల్లు వెల్లి సోనాద్. మరి సంసి పాడానాద్. కొత ద్రాళ్ళ కల్లు కొత తోలు సన్నిదునె వాక్సెజ్. అయావలె రుండిబా పాడెః ఆఉ.”

సాతి అయ్యలిని జబు మని బోదిలి

18 యేసు యా మాటెజ్ వరి వెట వెహ్ని మహివలె, యూదురి మిటిజ్ కిని ఇండ్రోణి ఒరెన్ అతికారి వాతండ్రె వన్ని ఎద్రు ముణుకుజ్ ఊర్జి, “నా గాలు యెలె సాతాద్. నీను వాజి ని కియు దని మున్సు ఇడెఃఅ. అది బత్కినాద్”, ఇజి వెహ్సాన్.

19 యేసు నిజెతండ్రె వన్ని వెట సోహాన్. వన్ని సీసూర్బా సోహార్.

20-21 నస్తవలె వనెండు వంటిజాణిజ్ వెల్లి ఆని జబుదాన్ బాద్ ఆజిమహి ఉండ్రీ బోదెలి, “యేసు తోడిఃగితిమని నీరి సొక్కదు ముట్టిజ సరి నాను నెగెండ్ ఆన”, ఇజి దని మన్సుదు ఒడఃబితాదె వన్ని వెనుక వాతాదె వన్ని పాత సెంగుదు ముట్టాద్.

22 యేసు వెనుక మర్జిజ దనిజ్ సుడఃజి, “ఓ బయి దయెరమ్దాన్ మన్అ. నీను నా మున్సు ఇట్టి మని నమకమ్నె నిజి నెగెంజ్ కిత మనాద్”, ఇజి వెహ్సాన్. అయావలెనె అయి బోదెలి నెగెండ్ ఆతాద్.

23-24 నస్తవలె యేసు అతికారి ఇండ్రో వాతిజ్, పిరుడిః ఊక్కివరిజ్ గగోల్ ఆని వరిజ్ సుడఃజి, “ఇబ్బొణిజ్ సొండ్రు, యా ఇజిరి బయి నిద్రి కిజినాద్ గాని సావద్”, ఇజి వెహ్సాన్. వారు వన్నిజ్ వెక్కిని సిక్సార్.

25 అబె నిండ్రీతి మహి లోకురిజ్ విజిరిజ్ వెల్లి పొక్తి వెనుక, యేసు ఇండ్రో డుఃగితాండ్రె అయ్యలి కిదు అన్సిజ్అది నిజెతాద్.

26 యా కల్లురు అయ ప్రాంతం విజు సారితాద్.

యేసు గుడ్డిదివరిజ్ని గుల్లవన్నిజ్ నెగెండ్ కిజినాన్.

27 యేసు అబెణిజ్ సొన్ని మహివలె రిఎర్గుడ్డిఃవారు వన్ని వెనుక వాతారె, “ఓ దావీదు మరిసి, మా మున్సు కనికారం తోర్సెః”, ఇజి డేల్ని వెహ్సార్.

28 యేసు ఇండ్రో డుఃగితి వెనుక వారు వన్ని డగ్రు వాతార్. వాండ్రు వరిజ్ ఈహు వెనబాతాన్. “ ‘యాక కిదెజ్ నాను అట్ట’, ఇజి మీరు నమిజినిదెరా?”, “ప్రబువా మాప్ నమిజినాప్”, ఇజి వారు వెహ్సార్.

29-30 నస్తవలె యేసు వరి కణుకెజ ముట్టి ఈహు వెహ్సాన్. “మీరు నమితివజనె యాక మిజి జర్గిపిద్”, ఇజి వెహ్సా వెటనె వరి కణుకు బేస్తార్. “ఎయెర్బా యాక నెస్తాజ్అవద్”, ఇజి యేసు వరిజ్ గట్టిజ వెహ్సాన్.

31 గాని వారు సోహార్ అయ ప్రాంతం విజు వన్ని వందిజ్ సొట్టార్.

32 యేసుని వన్ని సీసూర్అబెణిజ్సొన్ని మహిజ్ దెయం అస్తి ఒరెన్ గులవన్నిజ్ వన్ని డగ్రుతతార్.

33 యేసు దెయమ్దిజ్ఉల్పిజ్ వెటనె అయ గుల్ల వాండ్రు వర్గిదెజ్ మొదోల్స్తాన్. అక సుడఃజి లోకుర్ విజిరి బమ్మ ఆతారె, “ఎనెజ్బా ఇస్తాయెలు దేసమ్దు యా లెకెండ్ ఇనికబా జర్గిపితాద్”, ఇజి వర్గితార్.

34 గాని పరిసయరు ఈహు వెహ్సార్, “దెయమ్కాజ్ నెయ్యు సాయమ్దానె వీండ్రు దెయమ్కాజ్ పేర్జినాన్”.

పణిమన్సిర్ తక్కు

35 యేసు విజు పట్టమ్కాజ్, విజు నాహ్కాజ్ బూలాజి యూదురు మీటిజ్ కిని ఇల్కాజ్ వరిజ్ నేర్పిసి, దేవుణు ఏలుబుడః కిని వందిజ్ సువార్త వెహ్సా విజు రకమ్ది జబుది వరిజ్, బాదదాన్ మని వరిజ్ నెగెండ్ కితాన్.

36 యేసు మంద లోకాజ్ సుడఃజి, వన్ని పాణం నొతాద్. ఎందనిజ్ ఇహిజ వారు గప్పడువెన్ సిల్లెండ్రె నద్రితి గొరెజ్ లెకెండ్, ఇనిక కిదెజ్ ఇజి నెన్ఇ వరి లెకెండ్ మహార్.

37-38 నస్తవలె యేసు వన్నిసీసురిజ్, “కొయెదెజ్ మన్ని వంటలెకెండ్ లోకుర్ సంణెండార్ మన్సె. గాని కొయెనికార్ తకునె. అందెజి వన్ని వంట కొయెని వందిజ్ పణికిని వరిజ్ పోకల ఇజి కొత యజుమానిజ్ బతిమాల్దు”, ఇజి వెహ్సాన్.

10

యేసు పన్నెండు మణిసి సినురిజ్ కూక్కినాన్

1 యేసు పన్నెండు మణిసి సినురిజ్ డగ్రు కూక్కాండ్రె దెయమ్కాజ్ పేరదెజ్, మరి విజు రకమ్ది జబుది వరిజ్ని బాదదాన్ మని వరిజ్ నెగిండే కిదెజ్ వరిజ్ అతికారం సితాన్.

2 అయ పనెండు మణిసి అపొస్తుడురి పేరుకు ఇకెజ్. మొదోహికాన్ సీమాను, (పేతురు ఇజి వాండ్రు కూకె అతాన్) పన్నె తంబెరెసి అతి అంద్రెయ, జెబదయి పొటాదికార్ యాకోబుని యోహాను,

3 పిలిపుని బర్దెలోమాయి, తోమని పన్ను వెర్జి మహికాన్ మతాయి, అలపయి పొటాదికాన్ యాకోబు, తదాయి

4 యూదయ దేసం వందిజ్ ఉసారాఅజిని సీమాను*, యెసుజ్ మోసం కిజి ఒపజెప్పికాన్ అతి ఇస్కరియోతు యూద.

5 యేసు అయ పనెండు మణిసి సినురిజ్ పొక్కివలె ఈహు వెహ్తాన్. “యూదురు ఆజవరి నడిమి మీరు సొన్యాట్. సమరియదివరి పట్టుమ్కాజ్ బా సొన్యాట్.

6 గాని మీరు ఇస్రాయేలుది మురుతి గొరెజ్జెకెండ్ మనివరి నడిమి సొండ్రు.

7 మీరు సొన్సి, ‘దేవుణు ఏలుబడిః కినిక డగ్రు ఆత మనాద్’ ఇజి సొట్టు.

8 జబుదివరిజ్ నెగిండ్ కిదు, సాతి వరిజ్ నిక్కు, పెరి కస్టమ్ది వరిజ్ నెగెణికిదు, దెయమ్కాజ్ పేర్లు. యా పణిజ్ కిదెజ్ అతికారం నెడ్డిఃని మిజి దోహికాన్ మనాద్. అందెజ్ మీరు ఎయెరిబాణిజ్ బా ఇనికబా లోనెండ్ ఇకెజ్ నెడిఃని కిదు.

9 మీరు సొనివెలె బజారం, రుపాయ్ గాని వెండి, రుపాయ్ గాని రాగి రుపాయ్ గాని మీ సన్నిదు ఒమాట్.

10 పయనం కినివెలె సన్ని ఒమాట్. రుండి సొక్కెజ్, జోడ్కు, డుడు ఇనికబా ఒమాట్. ఎందనిజ్ ఇహిజ పణికినికాన్ పన్నుజ్ కావాన్ కెజ్ దోహికాన్ తగ్గికాన్.

11 మీరు ఎమేణి పట్టుమ్దు సొహిజ్ బా అబె ఒరెన్ నెగ్గివన్నిజ్ రెబాజి పన్ని ఇండ్రెన్ అబెణిజ్ సాని దాక మండ్రు.

12 మీరు అయ ఇండ్రె డుఃగితిజ సరి, ‘మిజి సమాదనం మనిద్’ ఇజి వెహ్తా.

13 అయ ఇండ్రెణికార్ మిజి డగ్రు కిజతిజ, నస్తివెలె మీరు వెప్పిలెకెండ్ వరిజ్ దీవనమ్కు మంజిని. వారు తగిఇకార్ ఇహిజ అయాలెకెండ్ వరిజ్ జర్దివిద్.

14 మీరు ఉండ్రె పట్టుమ్దు గాని, ఉండ్రె ఇండ్రె గాని అందితిజ, వారు మిజి డగ్రు కివిండ మరి మీ మాటెజ్ డగ్రు కివిండ మహిజ, వరి మున్ను వారె దేవుణు బాణిజ్ సిక్కు అప్పె ఆజినార్ ఇనిదన్నిజ్ గుర్తు లెకెండ్, మీరు అయ పట్టుమ్నో ఇల్లునో డిఃని సొనివెలె మీ పాదమ్కాణి దుల్లి దూల్పి సొండ్రు.

15 దేవుణు తీర్పు తీరిస్సి రోజుదు అయ పట్టుమ్దు మని వరిజ్ ఒద్దె లావ్ సిక్కు సీనాన్ ఇజి నాను మిజి నిజం వెప్పెన. సోదోమ గొమోర పట్టుమ్కాజ్ మహివరిజ్ సొన్సి నిక్కు మనివిద్.

16 కార్నుకుడిజ నడిమి గొరెజ్జెకెండ్ నాను మిజి లోకుర నడిమి పొక్కిన. అందెజ్ మీరు సరాన్ను లెకెండ్ బుది మనికిదెర్, పావుర పొటిజ లెకెండ్ సెఇకెజ్ ఇనికెజ్ సిలికిదెర్ ఆజి మండ్రు.

17 లోకుర వందిజ్ జాగర్ల మండ్రు. వారు మిజి కోర్దురు ఒపజెప్పి, మరి యూదురు మీటిజ్ కిని ఇల్కాజ్ మిజి కొరెజ్జెణిజ్ డెయ్యునారెలె.

18 రాజారిజ ముందాల, అదికారిజ ముందాల నా మున్ను నమకం ఇట్టి వందిజ్ మజి అసి తోప్పి ఒనార్దె. వరి ముందాలని యూదురు ఆజి వరి ముందాల నా వందిజ్ మీరు వరిజ్ సువార్దె వెప్పెద్దెర్.

19 గాని వారు మిజి తోప్పి ఒనివెలె ఇనిక వెహ్తెజ్, అక ఎలాగ వెహ్తెజ్ ఇజి మీరు బెజి ఆమాట్. అయావలెనె వర్దిదెజ్ సరి అతి మాటిజ్ మిజి దోహికాన్.

20 ఎందనిజ్ ఇహిజ అయావలె వర్గినిక మీరు ఆజదెర్. మీ బుబ్బు అతి దేవుణు ఆత్మ మీ లోఇహాన్ వర్గినికెలె.

* 10:4 10:4 కనాయదికాన్ సీమాను - తెలుగు లోమది ఏలుబడిఃదాన్ యూదురు దేనిమదిజ్ విడుదు కిదెజ్ ఉసారదాన్ నుడిఃజిని యూదురు నజం మనాద్ అయా నజిమదికాన్ ఒరెన్ సీమాను.

21 దాద్ని తంబేరిజ్, తంబెరి దాద్నిజ్, అపోసి మరిసిజ్ సప్తజ్ ఒపజెప్పారె. కొడోర్ అయ్సి అప్పొసిర్ మున్ను, గొడబ అజి వరిజ్ సపిస్సారె.లె.

22 నా మున్ను, నమకు ఇట్టి వందిజ్ విజెరె మీ మున్ను, పగదాన్ మంజెనారె. గాని ఆకార్ దాక ఓరీస్సి వన్నిజ్ దేవుణు రక్కిస్సారె.లె.

23 ఉండ్రీ నాటో మిజి హిమ్స కితిజ, మరి ఉండ్రీ పట్టమ్దు ఉహ్కాక్కి సొండ్రు. లోకు మరిసి వాని ముందాల నువార్ల సాటనిసి పణి పూర్తి విజ్జెండ ఆనాద్, ఇజి నాను మిజి నిజం వెప్పొన.

24 సద్వినికాన్ నెస్సిస్సివన్ని మున్ను, వెరికాన్ అవన్. పణిమన్ని యెజుమాని మున్ను, వెరికాన్ అవన్.

25 సద్వినికాన్ నెస్సిస్సివన్ని లెకెండ్ర్ ఆతిజ ఆనాద్. పణిమన్ని యెజుమాని లెకెండ్ర్ ఆతిజ ఆనాద్. ఇండ్రోణి యెజుమానిజ్ వారు బయిల్జెబులు† ఇజి కూక్కి మోసం వెహ్హో ఇహిజ ఇండ్రోణికార్ ఆతి మీ వందిజ్ మరి ఎసోసో సెజ మాటజ్ వెహ్హారె.లె.

26 అందెజి వరిజ్ మీరు తియెల్ ఆమాట్. డాప్తి మనికెజ్ విజు తోరె ఆనె. నెన్వింద మున్సి మనికెజ్ విజు నెనె ఆనె.లె.

27 మీ వెట నాను సీకటిదు వెహ్హి మాటజ్, మీరు జాయ్దు వెహ్హు. మీ గిబిజ వెహ్హి మాటజ్ విజెరె వినిలెకెండ్ర్ మిద్దెజ మున్ను,హన్ మీరు డటం వెహ్హు.

28 ఆత్మదిజ్ సప్తజ్ అట్వింద ఒడోల్దిజ్నెన సప్తజ్ అట్టి వరిజ్ మీరు తియెల్ ఆమాట్. గాని ఆత్మని ఒడోల్దిజ్ సిను మంజని బాడిడు పోక్కి నానం కిదెజ్ అతికారం మని దేవుణుదిజ్నెన తియెల్ అజి మండ్రు.

29 ఉండ్రీ కానుదిజ్ రుండి ఇజి పంట పొటిజ్పారె అజినెగదె. అహిజ్బా నీ బుబ్బాతి దేవుణు నెన్వింద దన్ని లోక ఉండ్రీబా అడ్డి బూమిదు సాదెజ్ ఇజి డిసి సీవన్.

30 నీ బుర్రది కొవు విజుబా లెక కిబె ఆత మనాన్.

31 అందెజి మీరు తియెల్ ఆమాట్. మీరు యా ఇజిరి పంట పొటిజ మిస్సి విలువ మనికిదెర్.

32 లోకుర్ ముందాల నజి ఒప్పకొణి, విజెరె నానుబా వరివందిజ్ పరలోకామ్దు మని నా బుబాతి దేవుణు ఎద్రు ఒప్ప కొణా.

33 గాని ఎయెన్బా లోకుర్ముందాల నజి నెన్వి ఇజి వెహ్హెజ, పరలోకామ్దు మని నా బుబ్బాతి దేవుణు ముందాల నానుబా వన్నిజ్ నెన్వి ఇజి వెహ్హారె.లె.

34 బూమి మున్ను, సమాదనం తపిస్సెజ్ నాను వాత మన ఇజి మీరు ఒడోబిమాట్. పగ తపిస్సెజ్నెన వాత, సమాదనం ఆవద్.

35 ఎందనిజ్ ఇహిజ, మరిసిజ్ వన్ని అప్పొసి మున్ను, గాడ్డిజ్ దని అయ్సి మున్ను, కొడియెసిజ్ దని మీమ్సి మున్ను, పగ కిబిస్సెజ్నెన నాను వాత మన.

36 నా మున్ను, నమకు ఇట్టి వందిజ్ ఒరెన్ వన్ని మున్ను, వన్ని సొంత ఇండ్రోణికార్ పగాతికార్ ఆనార్.*

37 బుబెజ్బా యాయెజ్బా నజి మిస్సి ప్రేమిస్సికాన్ నజి తగ్గికాన్ అవన్. మరిసిజ్బా గాల్పిజ్బా నజి మిస్సి ప్రేమిస్సికాన్ నజి తగ్గికాన్ అవన్.

38 కస్తమకు ఓరిస్సెజ్ మన్ను సిల్లికాన్, మరి నా వెట సాదెజ్ ఇజిబా మన్ను సిల్లికాన్, ఎయెన్బా నజి తగ్గికాన్ అవన్.

39 వన్ని పాణమ్దిజ్ కాపాడెదెజ్ ఇజి నుడిఃతిజ వాండ్రు దన్నిజ్ సొన్పిస్సాన్. నా వందిజ్ వన్ని పాణం సొన్నిస్సికాన్ దనిజ్ కాపాడ్సాన్.

40 నిజి డగ్రు కినికాన్ నజినె డగ్రు కిజనాన్. నజి డగ్రు కినికాన్ నజి పోక్కివన్నిజ్బా డగ్రు కిజనాన్.

41 ఒరెన్ దేవుణు ప్రవక్తజ్, వాండ్రు దేవుణు ప్రవక్త ఇజి నెనె ఎయెన్బా వన్నిజ్డగ్రు కితిజ, దేవుణు ప్రవక్తజ్ దోహ్కొ లెకెండ్ర్ వన్నిజ్బా పలం దోహ్కొద్దె. ఒరెన్ నీతి నిజాయితి మని వన్నిజ్ వాండ్రు నీతి నిజాయితిదికాన్ ఇజి నెనె ఎయెన్బా వన్నిజ్ డగ్రు కితిజ, నీతి నిజాయితిమని వన్నిజ్ దోహ్కొ లెకెండ్ర్ వన్నిజ్బా పలం దోహ్కొద్దె.లె.

† 10:25 10:25 దేవుణుదిజ్ పొగడిజ మూడినిం యూరురు ఆకార్ మాడిసి మహి, ఉండ్రీ బొమ్మనె బెయెల్జెబులు. యూరురు అరు బొమ్మదిజ్ "పొర్తిజ్ మాడిస్సి బొమ్మ", ఇజి వెక్కిని వహ్హు మహర్. అందెజి వారు యెనుప్రబుజ్ బెయెల్జెబులు ఇజి కూక్కివెలె వన్నిజ్ నండ్ మోసం వెహ్హ మహర్. * 10:36 10:36 మికా 7:6.

42 యా నా సిసూర్ లోఇ ఇజరి ఒరెన్ వన్నిజ్ వాండ్రు నా సిసూర్ ఇజి నెసి ఎయెర్బా ఉండ్రి గలన్ ఏరు సితిజి, దనిజ్ తగితి వలం తవ్విండ వన్నిజ్ దోహ్కాద్ ఇజి నాసు మిజి నిజం వెహ్సినన్.”

11

యేసుని బాప్తీసం సీని యోహాను

1 యేసు వన్ని వనెండు మన్ని సిసూర్జి బోదిసి వీజితి వెనుక, అబెణిజ్ సోసి గలిలయ దేనమ్దు మని పట్టుమ్కాజ్, నాహ్కాజ్ సువార్త సాట్టజ్, బోదిస్తిజ్ సాహాన్.

2-3 జెలిదు మని యోహాను క్రీస్తు కిని పణిజ్ వందిజ్ వెంజి, “వానికి నీనెనా? సిలిజి మరి ఒరెన్ వన్నిజ్ మాపు ఎర్దు సుడేజి మండ్రిజ్నా?”, ఇజి వెన్బాదెజ్ వన్ని సిసూర్జి యేసు డగ్రు పోక్తాన్.

4-5 యేసు వరిజ్ ఈహు వెహ్సాన్, “గుడ్డిదికార్ సుడేజిసూర్, సాటాదికార్ నడిజిసూర్, పెరి జబు మనికార్ నెగెణ్ ఆజినార్, బోయెరాదికార్ వెంజినార్, సాతికర్ నిజి ఆజినార్, బీదాతి వరిజ్ సువార్త వెహ్ ఆజినాద్, ఇజి యా లెకెండ్, మీరు సుడేజినికెజ్, వెంజినికెజ్ మర్జి సొన్ని, యోహానుజ్ వెహ్సా.

6 గాని నా మున్ను మన్ని నమకం డిఃసి సెకాన్ దేవుణు సీని దీవెనమ్కు మంజినికాన్ ఆనాన్లె.”

7 యోహాను సిసూర్ మర్జి సొన్నిమహిజ్ యేసు యోహాను వందిజ్ ఈహు వర్గిదెజ్ మొదోల్స్తాన్. “ఇనిక సుడేదెజ్ మీరు బిడిమ్ బూమి ప్రాతమ్దు సాహిమహిదెర్? గాలిదిజ్ దూజ్జిని గడిదిజ్ పోలితి ఒరెన్ వన్నిజ్ సుడేదెజ్నా?”

8 సిల్లిజి మరి ఇనిక సుడేదెజ్ మీరు సాహి మహిదెర్? నెగ్రి సొక్కిజ్ తోడేగితి మని ఒరెన్ వన్నిజ్ సుడేదెజ్నా? నూనాజ్ మని నెగ్రి సొక్కిజ్ తోడేగితి మంజినికార్ రాజురి ఇల్కాజ్ మంజినార్ గదె?

9 సిల్లిజి మరి ఇనిక సుడేదెజ్ మీరు సాహిమహిదెర్? ఒరెన్ దేవుణు ప్రవక్తజ్ సుడేదెజ్నా? నిజమె, దేవుణు ప్రవక్తజ్ ఇంక పెరివన్నిజ్నె ఇజి నాసు మిజి వెహ్సినన్.

10 “నాను నా కాబ్దు తనివన్నిజ్ నిజి ఇంక ముజాల పోక్కు. వాండ్రు నీ ముజాల నీ సరి నెగెండ్ కినాన్”^{*} ఇజి వన్ని వందిజె దేవుణు మాటదు రాస్త మనాద్.

11 బోదెక పొటారు పుట్టివర్ లోఇ యోహాను ఇంక మిస్సికాన్ ఎయెర్బా సీలెన్. గాని దేవుణు ఏలుబడిః కినిదని లోఇ ఇజిరికాన్ అతికాన్, యోహానుజ్ ఇంక పెరికాన్ ఇజి నాసు మిజి నిజం వెహ్సినన్.

12 బాప్తీసం సీని యోహాను కాలమ్దాన్ ఏలుదాక దేవుణు ఏలుబడిః కినిక బలవందమ్దాన్ ముజాల వాజినాద్. మరి గొప్ప నత్తు మనికార్ దనిజ్ అడ్డు కిదెజ్ సుడేజిసూర్.

13 మోసి సీతి రూలుజ్ని దేవుణు ప్రవక్తరు విజెరెబా దేవుణు ఏలుబడిః కినివందిజె యోహాను కాలమ్దాక వర్గిజి మహార్.

14 నమిదిజ్ మిజి ఇస్టం మహిజ, ఏలియ వానాన్లె ఇజి ముజాల వెహ్సిక విని వందిజ్నె.

15 మి గిబ్బిజ్జాణిజ్ నెగెండ్ వెంజి అయో వజి నడిజి మండ్రు.

16-17 “యా తరమ్ది వరిజ్ ఇనిదనిజ్ నమానం వెహ్సాజ్? వారు నతారు బని, మహివరిజ్ డేల్నిని కొడోఃర్ లెకెండ్ మనార్.” “మాపు మీ వందిజ్ పిరుడిః ఉహ్కాప్ గాని డాల్ఇతిదెర్, సాతి ఇండ్రో పాటిజ్ పాప్టామ్ గాని మీరు గుండ్ కొతె ఆజి మీరు అడేబ ఇతిదెర్”.

18 యోహాను వాతివెలె వాండ్రు తిండి వందిజ్ లావ్ ఒడేబివండ్ రోజి ఉపాన్ కిజి మహాన్. వాండ్రు అయాలెకెండ్ తిన్వండ్, ఉణెవండ్ మన్నిజ్ వన్నిజ్ దెయం అస్తాద్ ఇజి వారు వెహ్సినార్.

19 లోక్ మరిసి అతి నాసు తింజి, ఉణిజి వాతాన్కాక ‘వీండ్రు తిండి కకూర్కికాన్’ మరి ఉణిజి సొన్నికాన్, పన్ను పెర్లివరిజ్ని పాపం కిజిని వరిజ్ కూలాయెన్ ఇజి వారు వెహ్సినార్. గాని దేవుణు బాణిజ్ వాని గెణం మన్నికార్ వారు కిజిని నెగ్రి వణిజాణిజ్ అయ గెణం సరియాతిక ఇజి రుజుమ్ కిజినాద్.”

నమకం సిల్లికార్ మన్ని పట్టుమ్కు

20 మరి యేసు ఎమెణి పట్టుమ్కాజ్ నండ్ బమ్మ అతి పణిజ్ కితిజ్బా వారు వరి మన్ను మారినెవతారో, అయ పట్టుమ్కాజ్ మున్ను కొపం అజి వర్గితాన్.

^{*} 11:10 11:10 మతా 3:1.

21 అబయా! కోరజీన పట్టుమీదు మనికిదెరా మిజి అస్సా గొప్పు కర్ణమ్మకు, వానెనో, అబయా! బెత్నయ్యపట్టుమీదు మన్నికిదెరా మిజిబా ఎస్సా గొప్పు కర్ణమ్మకు వానెనో. ఎండనిజ్ ఇహిజ నాను మీ నడిమి కితి మహి బమ్మాతి పణిజ్ తూరుని సీదోను పట్టుమ్మకాజ్ కిని మంజనిక ఇహిజ వారు ఎస్సా ముజాల బస్స సొక్కెజ్ తోడిగిజి ఒడోడు నీరు రాసె ఆజి ఉహాన్ కిజి పరి పాపమ్మకు ఒప్పుకోడోజి డిసి సీజి మన్సు మారిసి అయాలెకెండ్ మినికార్ ఇజి తొరొస్తార్ మరి.

22 అందెజి నాను నిజి వెప్పొక ఇనిక ఇహిజ తీర్పు తీరిస్సి రోజుదు తూరుని సీదోను పట్టుమీదివరిజ్ మిస్తి సిక్కు మిజి వానాదలె.

23 ఓ కపెర్నహూమా, “ఆగానమ్మదు మనికిదెరా, మీరు ఆగానమ్మదాక అందిజిని గొప్పు వారు ఇజి మీరు ఒడోబిజినిదెరా? గాని దేవుణు అయా లోకమ్మదు విసిర్నె. మీ నడిమి కితి మహి బమ్మాతి పణిజ్ నాణు సొదోము పట్టుమీదు కిని మంజనిక ఇహిజ అయ సొదోము పట్టుమీదికార్ పరి అలవాటుజ్ డిసి సీజి అయ పట్టుమీదిజ్ దేవుణు సిక్కు సివిండ ఏలుదాక మహాద్ మరి.

24 అందెజి నాను నిజి వెప్పొన తీర్పు తీరిస్సి రోజుదు సొదోము పట్టుమీదు మహివరిజ్ వాని దన్నిజ్ మిస్తి సిక్కు మీ లోకురి మున్సు వానాదలె.”

వందితివరిజ్ కూక్కినిక.

25 వెనుక యేసు ఈహు వెప్తోన్, “పరలోకామ్మదిజ్ ని బామిదిజ్ ప్రబువాతి నా బుబ్బా, నాను నిజి పొగోడిజిన. ఎండనిజ్ ఇహిజ గెణం మన్ని వరిజ్ ని సదువు మన్ని వరిజ్ యా సజతిజ్ తెలియ కివిండ యా సదువు సిల్లి వరిజ్ తెలియ కిత్తి.

26 నిజమె బుబ్బ, ఈహు కినికాదె నిజి ఇస్టం ఆతాద్.

27 బుబ్బ విజు సజతిజ్ నా కీదు ఒవజెప్ప మనాన్. బుబ్బ అవిండ మరి ఎయెర్బా మరిసిజ్ నెన్వీర్. మరిసిని, మరిసి వన్నిజ్ తెలివి కిదిజ్ ఎర్లితికారె బుబ్బాజ్ నెస్తార్. మరి ఎయెర్బా నెన్వీర్.

28 కళ్ళబాడోజి బరు పిండోజి వందితి విజిదెరె, మీరు నా డగ్గు రదు. నాను మిజి రొబిన్సు.

29 నాను సార్లిదికాన్. నాను మెతని మన్సు మనికాన్. నా వెట కూడోజి ఉండ్రె పూండు మీ మెడో మున్సు పొకె అజి మాటు కూడోజి పణికినాల్, మీరు నా అడ్రెజ్ లోజిజి నా బాణిజ్ నెస్సు. నన్సివలె మీ పాణమ్కాజ్ నిమాలు కలగినాద్.

30 ఎండనిజ్ ఇహిజ నా కూడోజి నా పూండు అడిగి పణి కిత్తిజి పణి నూలు మంజినాద్, బరుబా సుల్కానిక మంజినాద్.”

12

యేసు విస్త్రాంతిదినమ్మదు ప్రబు.

1 అయాపలె యూదురి విస్త్రాంతిదినమ్మదు యేసు పంట గుడ్డెదాన్ సొన్ని మహిపలె, వన్ని సిసూరిజ్ బజి కట్టిజ్, వారు సెరెక్ తెప్పి నూల్లి తింజి మహోర్.

2 అయాక పరిసయ్యరు సుడోతారె, “ఇదిలో, మోసె సిత్తి రులుపజి విస్త్రాంతిదినమ్మదు కెదిజ్ ఆజి పణి, నీ సిసూర్ కిజినార్”, ఇజి యేసుజ్ వెప్తోర్.

3 వాండ్రు పరివెట ఈహు వెప్తోన్, “దావీదు రాజుని వన్నివెట మహివరిజ్ బజి కట్టిజ్, వాండ్రు ఇనిక కిత్తాండ్రె ఇజి మీరు దేవుణు మాటుదు ఎనెజ్బా సద్విజతిదెరా?”*

4 వాండ్రు ఇనిక కిత్తాన్ ఇహిజ, గుడారమ్మదు† సొన్ని, దేవుణు ముజాల ఇడ్డిమహి రొట్టెజ్ లాగితాన్. వాండ్రుని వన్నివెట మహికార్ విజెరె తిహోర్. అయాక పుజెరిబునె తప్ప మరి ఎయెర్బా తిండ్రెజ్ అవిద్ ఇజి మోసె సిత్తి రూలుదు వెప్తా మనాద్.

* 12:3 12:3 దావీదు రాజు కిత్తిక సమయేలు ప్రవక్త పుస్తకమ్మదు రాస్తి మనాద్. 21:1-6. † 12:4 12:4 గుడారమ్మదు విజు విస్త్రాంతి దినమ్మదు దేవుణుదిజ్ పూజ సిత్తిలెకెండ్ 12 కొత్త రొట్టెజ్, సమాజ గుడారమ్మదు మన్ని బల్లారు ఇడ్డి మంజిని కొత్త రొట్టెజ్ ఇడ్డి బాణిజ్ లాగితి పదాయ రొట్టెజ్ పుజెరిబు తినార్. లేవి 24:5-9 అయకాలమ్మదు యెరునల్లెమ్మదు మన్ని దేవుణు గుడి సెల్లెతాద్. దావీదు రాజు మరియాతి సొలోమొను కాలమ్మదునె యెరునల్లెమ్మదు మన్ని దేవుణు గుడి వాండ్రు తోహిస్తాన్.

5 దేవుణు గుడిడు మన్ని పుజేరిబు విస్త్రాంతిదినమ్దు పణి కిజినార్ గాని అక తప్ప ఆవద్ ఇజ దేవుణు మాటదు రాస్తి మన్నిక మీరు ఎసెజ్బా నద్విఇతిదెరా?

6 దేవుణు గుడిడిజ్ ఇంక మిస్సికాన్ ఇబ్బె మనాన్ ఇజ నాను మిజి వెహ్సిన.

7 'మీరు మహిపరి ముస్సు కనికారం తొరిస్తెజ్ ఇజనె నాను కోరిజిన గాని కట్టి సీజిని పూజెజ నాను కోర్ప' ఇని మాటదిజ్ అర్థం మీరు నెసిమంజనిక ఇహిజ, ఇని తప్పబా కిజవరి ముస్సు తప్పు మాటెజ్ వెహ్వితార్ మరి.

8 ఎందానిజ్ నాను యాలెకెండ్ వెహ్సినక ఇహిజ, లోకుమరిసి అతి నజి విజు దన్నిజ్ అతికారం మనాద్. విస్త్రాంతి దినమ్దు లోకుర్ ఇనిక కిదెజ్వలె ఇజ వెహ్హిజ్బా నజి మనాద్.

9 అబ్బెనిజ్ సొస్సి మహిపలె, వాండ్రు యూదురు మీటిజ్ కిని ఉండ్రి ఇండ్రో సొహ్సన్."

10 వహ్హి అర్ది ఉండ్రి కియు మన్నికాన్ ఒరెన్ అబ్బె మహ్సన్. యేను ముస్సు తప్పు మొప్పెజ్ ఇనికాదో ఉండ్రి నజతిపందిజ్ నుడిజి వారు వన్నిజ్ ఈహు వెనబాతార్, "విస్త్రాంతిదినమ్దు ఎయెరిజ్బా నెగెండ్ కినిక దేవుణు రూలుదిజ్ తగ్గాదా?"

11 యేను వరిజ్ ఈహు వెహ్సన్, "మీ లోఇ ఎయెరిజ్బా ఉండ్రి గొర్ మహిజ, విస్త్రాంతిదినమ్దు అక్క ఉండ్రి గాందదు అర్దిజ, మీరు దనిజ్వెల్లి లాగిఇదెరా?"

12 మెండగొరెదిజ్ ముస్సు లోకు ఎస్సానో విలువ మన్నికాన్. అందెజ్ విస్త్రాంతిదినమ్దు మేలు కినిక దేవుణు మోసెజ్ సీత్రి రూలుదిజ్ తగ్గాద్."

13 అయావలె వాండ్రు వహ్హి కియు అర్ది వన్నిజ్ "నీ కియు నవ్అ", ఇజ వెహ్సన్. వాండ్రు కియు సాహ్సన్. అయావలె అక నెగెండ్ మన్ని మరి ఉండ్రి కియు లెకెండ్ ఆతాద్.

14 గాని పరిసయరు వెల్లి సాహారె యేనుజ్ ఎలాగ నప్పెజ్ ఇజ వన్నిజ్ పడిఎండ ఆలోసనం కిత్తార్.

దేవుణు ఏర్పాటు కితికాన్

15 యేను అయా నజతి నస్త్రాండ్రి అబెనిజ్ సొహ్సన్. నండెండార్ వన్ని వెనుక సొహ్సార్. వాండ్రు వరి జబ్బుది వరిజ్ విజెరిజ్ నెగెండ్ కిత్తాన్.

16 నా వందిజ్ ఎయెరిజ్బా వెహ్హిల్ ఇజ వరిజ్ వెహ్సన్.

17 యెసయ ప్రవక్త వెట దేవుణు ముజాల వర్తితి యా మాటెజ్ పూర్తి ఆదెజ్ ఇజ యా లెకెండ్ జర్గితాద్.

18 "ఇదిలో, నాను ఏర్పాటు కితి నా పణి మన్ని వీండ్రి, నాను వన్నిజ్ ప్రేమిసిన, వన్ని ముస్సు సర్ల ఆజిన. నాను వన్ని ముస్సు నా అత్తుదిజ్ పోక్కు. వీండ్రు విజు జాతిది వరిజ్ నాయం తీరిస్సాన్లె.

19 వీండ్రు జటిజ్ ఆవిన, డెల్సెవిన, విన్ని కంటం వీదిజ ఎయెరిజ్ విన్పినవన్.

20 నలిగితి గడిడిజ్ వాండ్రు తెప్పి విసీరవన్, నమని దీవదిజ్ వాండ్రు నవ్పెన్. వాండ్రు నాయమ్దిజ్ గెల్పినాన్.

21 లోకుర్ విజెరె వన్నిజె ఆనదాన్ ఎర్దు నుడిజి మంజినార్. వాండ్రు విజు జాతిజి వరిజ్ నాయం తీరిస్సాన్."*

యేనుని బయల్జెబ్బులు

22 అయావలె నెగెండార్, దెయం అస్తిమహిజ్ వర్గిదిజ్ అల్లె గుల్ల అతి ఒరెన్ వన్నిజ్ యేను డగ్గు తతార్. యేను వన్నిజ్ నెగెండ్ కిత్తాన్. వాండ్రు నుడిడిజ్, వర్గిదిజ్ అట్టాన్.

23 లోకుర్ విజెరె బమ్మ ఆజి, "మావ్ ఎర్దునుడిజి కాప్కిజి మంజిని దావీదు రాజు తెగ్గదికాన్ వీండ్రు ఆవ్ండ్రా?", ఇజ వర్గిజి మహ్సార్.

24 పరిసయరు అయ మాట విహారె, "విజు దెయమ్కాజ్ నెయ్యి అతి బయల్జెబ్బులు సాయమ్దాన్ వీండ్రు దెయమ్కాజ్ పెరజినాన్", ఇజ వెహ్సార్.

25 యేను వరి ఆలోసనమ్కు నెసి వరిజ్ ఈహు వెహ్సన్. "ఎమేణి దేనమ్దికార్బ వ రిజ్ వారె పగ ఆజి ఎరలిజి మహిజ అయ దేసం పాడాహాన్. అయాలెకెండ్ ఎమేణి పట్టుమ్దికార్ గాని ఇండ్రోణికార్

* 12:7 12:7 హోసయ 6:6. † 12:20 12:20 అయ మాటదిజ్ అర్థం ఇనిక ఇహిజ, లోకుర్ దేవుణు ముస్సు మన్ని నమకమ్దిజ్ కండెక్ వెనుక అతిజ్ దయరం సిల్లెండ్ అతెజ్ యేను వన్నిజ్ డీసి సివిన మొకొం మహ్విన్. * 12:21 12:21 యెసయ 42:1-4.

గాని, వరిజ్ వారి, పగ ఆజి ఎర్రలిజ మహిజ నీ ఎవేణి పట్టుం గాని ఇల్లు గాని ఏలుబా లావ్ రొన్ను నిల్పి మున్వద్.

26 నర్త్తును అడిగి మన్నికార్ ఉండ్రి జటుదికార్, మరి ఉండ్రి జటుదివరివెట పగ ఆజి ఎర్రె ఆజి విదెం కిజి మహిజ, వన్ని ఏలుబడిః ఎలాగ లావ్ రొన్ను నిల్పి మంజినాద్.”

27 బయిల్జెబ్బులు సాయమదాన్ నాను దెయమ్కాజ్ పేర్రిజ, మీ లోకుర ఎలాగ దెయమ్కాజ్ పేర్రినార్? అందెజి నా వందిజ్ మీరు వెహ్పికెజ్ తప్ప ఇజి వారి రుజావ్ కిజినార్.

28 గాని దేవుణు అత్తు నత్తుదాన్ నాను దెయమ్కాజ్ పేర్రిన ఇహిజ, నిజమె దేవుణు ఏలుబడిః కినిక మీ నడిఃమి వాత మనాద్.

29 నుడేఃదు, ఒరెన్ నత్తుమని వన్నిజ్ ముజాల తోహ్విండ, వన్ని ఇండ్రి డుఃగ్జి ఇండ్రిణి సామనమ్కు ఎయెరిజ్బా ఒతెజ్ అట్టార్? ముజాల వన్నిజ్ అసి తోహ్విజనె డోజి కిదెజ్ అట్టార్.

30 నా వెట కూడ్రి మన్ఇకాన్ ఎయెన్బా నజీ పగాతికాన్ అనాన్. లోకురిజ్ దేవుణు డగ్గు తత్తెజ్ నా వెట కూడేఃజి మన్ఇకాన్ లోకాజ్ నెద్రిస్సికాన్ ఆజినాన్.

31 మరి నాను మీజి వెహ్పినిక ఇనిక ఇహిజ, లోకుర్ కిని విజు పాపమ్కాజ్, దూనణదిజ్ దేవుణు సెమిస్సాన్, గాని దేవుణు అత్తుదిజ్ దూసిని వెహ్పిజ ఆకెజ్ ఎనెజ్బా సెమిస్సాన్.

32 లోకు మరిసి అతి నజీ పడిఃవిండ ఇనికబా వర్గితిజ దేవుణు వన్నిజ్ సెమిస్సాన్. గాని దేవుణు అత్తుదిజ్ పడిఃవిండ వర్గిని వన్నిజ్ యా లోకమ్దుబా, వాని లోకమ్దుబా దేవుణు సెమిస్సాన్.

33 మరాన్ నెగ్గిక ఇహిజ దని పండుబా నెగ్గికదె. సిలిజ, మరాన్ నెగ్గిక ఆపెండ మహిజ దని పండుబా నెగ్గిక అవద్. మరాతి పండుదానె మరాన్ ఎలాగ మర్రికాదో ఇజి నెన్జెజ్ అనాద్.

34 వినం మన్నిసరాన్ నన్నికిదెరా, సెఇకిదెరాతి మీరు నెగ్గి మాటెజ్ ఎలాగ వర్గిదెజ్ అట్టిదెర్? మీ మన్నుదు మీరు ఒడిఃబిని దన్నిజ్ తగితి లెకెండ్నె మీ వెయు వర్గిజినాద్.

35 నెగ్గి మన్ను మన్ని వన్నిజ్ కూలిజ్ కోట్టుకిత్తి మన్నిలెకెండ్, వని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజె వానె సెఇ మన్ను మనివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజె వానె.

36 గాని నాను మీజి వెహ్పినిక ఇనిక ఇహిజ, దేవుణు తీర్పు తీరిన్ని రొజుదు, లోకుర్ వర్గితి మహి విజు మాటెజె వందిజ్ లెక్క సిదెజ్ వలె.

37 అహిజ మీ మాటెజెఃజిజె మీరు సిక్కుదాన్ తప్పె అనిదెర్, సిల్లిజ మీ మాటెజెఃజిజె మీరు మీ మున్ను సిక్కు తప్ప అనిదెర్.

ఓన ఉండ్రి గుర్తు

38 నస్సివలె నెగ్గెండార్ పరిసయరుని యూదురి రూలుజ్ నెస్సిస్సికార్ యేసు డగ్గు వాజి వన్నిజ్, “బోదకినికి, నీను దెవుణుబాణిజ్ వాతికాన్ ఇనిదన్నిజ్ గుర్తు లెకెండ్ నీను తోరిసిని ఉండ్రి బమ్మాతి పణి సుడుఃదెజ్ ఇజి కోరిజినావ్”, ఇజి వెహ్పార్.

39 వాండ్రు వరిజ్ “యా తరమదికిదెర్ అతి మీరు సెఇకిదెర్. దేవుణుదిజ్ నెన్ఇకిదెర్నె, గుర్తు లెకెండ్ ఉండ్రి బమ్మాతి పణి కిజి తోరిన్అ ఇజి వెహ్పిదెర్. గాని దేవుణు ప్రవక్త అతి ఓనెజ్ జర్గితిక తప్ప మరి ఇని గుర్తుబా ఎయెరిజ్బా తోర్వెద్.

40 ఓన మూండ్రి రొన్ను పెరి మెయి పొటాదు ఎలాగ మహండ్రో, అయలెకెండ్నె, లోకుమరిసి అతి నానుబా మూండ్రి రొన్ను బూమి లొఇ మంజినలె.

41 ఓన వెహ్పి మాటెజ్ విహారె నినివెదికార్ వరి పాపమ్కు ఒప్పు కొడిఃజి డిఃస్స సితార్. అందెజె తీర్పు తీరిసిని దినమ్దు వారు యా తరమది వరి వెట నిల్పి విరిమున్ను తీర్పు తీరిస్సార్లె. ఇదిలో, ఓనెజ్ మిస్సికాన్ ఒరెన్ ఇట్టె మనాన్ ఇజి నాను వెహ్పిన.

§ 12:39 12:39 పదాయ ఒప్పుమానమ్దు ఓన వందిజ్ రాన్ మనాద్ వాండ్రు వయనం కిజి మహి ఓడదాన్ నమ్దరమ్దు వినెరి అతిజ్ ఉండ్రి పెరి మెయి, దేవుణు వెహ్పి వజి వన్నిజ్ డిఃజితాద్ మూండ్రి రొన్ను వెనుక వన్నిజ్ నమదరం ఒడ్డుదు పాణమ్దాన్ కక్కాద్ ఓన గుర్తు వందిజ్ మూనె అని వందిజ్ మరి మూండ్రి వాండ్రు సాతి వరి బాణిజ్ మరి మరేజి నిజిజె వెహ్పన్.

42 ఆక్రమి దినమకాజ్ తీర్పు తీరిననివలె, దనిణ దేసమది రాణి ఉండ్రీ సానిలెకెండ్ బాన్ మంజినాద్దె. ఎందనిజ్ ఇపాజ సాలోమోసు వర్గిని గెణంమన్ని మాటెజ్ వెండ్రెజ్ నండో దూరం మన్ని దన్ని దేసమదాన్ వాతాద్. ఇదిలో, సాలోమోసుజ్ మిస్కాన్ ఒరెన్ ఇబ్బె మనాన్. గాని యా తరమదికార్ వన్ని మాటెజ్ గిబ్బిజ్ ఒడెజి వెన్వీర్, అందెజె యా తరమది వరిజ్ తీర్పు మంజినాద్లె.

43 ఉండ్రీ దెయం ఒరెన్ వన్నిజ్ డిసి వెల్లి వాతి వెనుక, మండ్రెజ్బాడ్డి వందిజ్ రెబాజి బిడిఁమబూమిదు బూలాజినాద్. గాని ఎంబెబా దనిజ్బాడ్డి దొహ్కావతాద్.

44 నస్తవలె 'నాను డిస్సి వాతి నా ఇండ్రో మరజి సానాల', ఇజి దనిజ్ అదిసె వెహ్నద్. మరజి వాతిజ్ అది డిస్సి సిత్రకాన్, నెగెండ్ సిపాజి సుబరం కిజి ఎయెరబా మన్ఇ ఇల్లు లెకెండ్ మన్నక సూణాద్.

45 నస్తవలె అది మరజి సొన్ని, దన్నిజ్ ఇంక సెఇకెజ్ అతి మరి ఏడు దెయమకాజ్ దన్నివెటె కూక్కు తనాద్. అవిక వని లోఇ సొన్ని అబెనె బస కిసె. అయావలె వన్ని గతి ముందాహి దనిజ్ మున్ను కస్టం ఆనాద్. అయలెకెండ్నె యా తరమది వరిజ్ గతిబా మంజినాద్."

యేసు అయ్సిన తంబెరిజు

46 యేసు మంద లోకూర్ వెటె వర్గిజి మహివలె, వన్ని అయ్సిన తంబెరిజు వన్నివెటె వర్గిదెజ్ ఇజి వెల్లి నిహ మహార్.

47 అయావలె ఒరెన్, "ఇదిలో నీ యాయని నీ తంబెరిజు నీ వెటె వర్గిదెజ్ ఇజి వెల్లి నిహ మనార్", ఇజి వన్నిజ్ వెహ్నాన్.

48 అందెజె వెహ్నావన్నిజ్ సుడెజి, "ఎయెద్ నా యాయ? ఎయెరు నా తంబెరిజు?", ఇజి వెన్బాతాన్.

49 వన్ని సినూర్జి కియు తోరిసి, "ఇదిలో నా యాయని నా తంబెరిజు.

50 పరలోకామదు మన్ని నా బుబ్బెజ్ ఇస్టం ఆతివజి కినికాండ్రె నా తంబెరి, నా తజ్జె, నా యాయ", ఇజి వెహ్నాన్.

13

విత్తు విత్తివన్ని కత.

1 అయ దినమదునె, యేసు ఇండ్రోణిజ్ వెల్లి సొన్ని సమ్దరం పడెకాదు బస్తాన్.

2 మంద లోకూర్ వన్ని డగ్గు వాతిజ్ వాండ్రు ఉండ్రీ డోణిదు ఎక్క బస్తాన్. లోకూర్ విజెరి సమ్దరం పడెకాదు నిహార్.

3 అయావలె వాండ్రు వరిజ్ సుడెజి నండో సజతిజ్ కత వజి వరిజ్ వెహ్నాన్ "ఒరెన్ రయ్యు వాండ్రు విత్తు విత్తెజ్ సాహాన్.

4 వాండ్రు విత్తి మహిజ్ సెగం విత్తు సరి పడెకాదు అర్రె. పొటిజ్ వాజి వన్నాజ్ తిహె.

5 సెగం విత్తు సటు మున్ను మని లావ్లోతు సీలి డుల్లిదు అర్రె. డుల్లి లోతు లావ్ సీల్లితిజ్ అవి వెటెనె నేర్రె.

6 గాని డుల్లి తకు మహిజ్ వెలెజ్ లోఇ సొన్ఇతిజ్, పొదు సోసి ఎండ తాక్తిజ్ అవి సాతె.

7 సెగం విత్తు సాప్పుతువజి అర్రె. సాప్పు తప్పుజ్ పెరిసి వన్నాజ్ అణసు తిగితె.

8 మరి సెగం విత్తు నెగ్గి బూమిదు అర్రె. అబ్బె విత్తి విత్తుదిజ్ వంద వంతుజ్, అరువయవంతుజ్, ముపయవంతుజ్ లెక్క పండితె.

9 గిబ్బిజ్ ఒడెజి వెంజి అయాలెకెండ్ నడిజి మండ్రు.

10 వన్ని సినూర్ వాతార్, "ఎందనిజ్ నీను కత వజి వరిజ్ వెహ్సాన్", ఇజి వన్నిజ్ వెన్బాతార్.

11 వాండ్రు వరిజ్ ఈహు వెహ్నాన్. "దేవుణు ఏలుబడిఁ కిని వందిజ్ డాఁజితి మని సజతిజ్ దేవుణు మిజ్ తెలివి కిత మనాన్, గాని విరిజ్ తెలివి కివన్.

12 దేవుణు ఏలుబడిఁ కిని వందిజ్ నెస్సి మని వన్నిజె మరి తెలివి కిసాన్. వన్నిజె మరి నండో నెస్సిస్సాన్. ఇనికబా అర్లం ఆఇ వన్నిబాణిజ్ వాండ్రు నెస్సిమనికబా లాగ్ ఆనాద్.

13 ఎందనిజ్ నాను కత వజి వరిజ్ వెహ్సాన్ ఇహిజి, వారు సుడెజినార్ గాని సుడెజితిక వరిజ్ తోర్వద్. వెంజినార్ గాని నెగెండ్ వన్వీర్, అర్లంబా కిపర్.

14-15 మీరు ఎన్నివలెబా వెంజినిదెర్ గాని అర్థం కిదెజ్ అట్ ఇదెర్. ఎన్నివలెబా సుడఃజినిదెర్ గాని ఇనిక ఇజి నెన్ ఇదెర్. వారు వరి కణకాణిజ్ సుడఃజి, గిబిజాణిజ్ వెంజి మన్నుదాన్ అర్థం కిజి నా దరోట్ మహిజ, నాను వరిజ్ నెగెన్ కిత మరి. గాని అయి లెకెండ్ జర్గివిండ్ వరి మన్ను కొడుంపుదాన్ నిండ్రిత మనాద్. వరి గిబిజ్ మందజ్ ఆతె. వారు వరి కణ్కు, మూక్త మనార్.* యా లెకెండ్ ఎనయి ప్రవక్తవెట దేవుణు ముజాల వర్గితి మాట వరి మున్ను, పూర్తి ఆతె.

16 మీ సుడఃజినికెజ్, వెంజినికెజ్, మీరు అర్థం కిజినిదెర్. అందెజె మీరు దేవుణు సీజిని దీవనమ్ కు మన్నుకిదెర్.

17 నండెండార్ ప్రవక్తరుని సీతి నిజాయిి మన్నికార్ మీరు సుడఃజిని వన్నాజ్ సుడఃదెజ్ ఆన ఆతార్, గాని సుడఃదెజ్ అట్ ఎతార్. మీరు వెంజిని వన్నాజ్ విండ్రెజ్ ఆన ఆతార్ గాని విండ్రెజ్ అట్ ఎతార్.

18 విత్తు, విత్తివన్ని కతదిజ్ అర్థం మీరు జాగర్త వెండ్తు.

19 ఎయెన్ బా దేవుణు ఏలుబడిః కిని వందిజ్ వెప్పి మాటెజ్ వెంజి దనిజ్ అర్థం అట్ విండ్ మహిజ, నయ్నాన్ వాజి వన్ని మన్నుదు వితి దనిజ్ పెర్తు ఒనాన్. యాకాదె మడిజు నడిఃమిహాన్ సొని సర్దు అర్తి మన్నువిత్తు.

20 సెగెండార్ నట్టు మున్ను, మని లోతు సెల్లి డుల్లి నన్నికార్. సెగెం విత్తు, అయా డుల్లిదు అర్తి. గాని వారు దేవుణు మాట వెంజి సర్దదాన్ దనిజ్ వెటనె మన్నుదు ఇడ్వార్.

21 వారు కండెక్ కాలం దేవుణుమున్ను, నమకమ్ దాన్ నిల్వార్. గాని క్షమ్మకు, స్రమెజ్ వానివలె వెటనె దేవుణు మున్ను, మన్ని నమకం వారు డిఃసి సీజినార్.

22 మరి ఒరెన్ విత్తు, అర్తి మన్ను సొప్పుతుపెజ్ నేర్పి బూమి నన్నికాన్. వాండ్రు దేవుణు మాట వెంజినాన్ గాని యా లోకమ్ ది బత్తు, వందిజ్ విసారం ఆజి మరి డబ్బు వందిజ్ సెజ ఆన ఆజి, వనిజ్ అణసు తిగిజి మంజినె. వన్ని బత్తుదు పలం సీలి నన్నికాన్ ఆనాన్.

23 మరి ఒరెన్ విత్తు, అర్తి మన్ను నెగ్గి బూమిలెకెండ్ మనాన్. వాండ్రు దేవుణు మాట వెంజి దనిజ్ అర్దం కిజినాన్. వాండ్రు, విత్తి విత్తుదిజ్ వంద వంతుజ్, అరువయి వంతుజ్, ముపయి వంతుజ్ పలం సీనాన్.

కారు మొక్కెజ్

24 యేసు మరి ఉండ్రీ నజతి కత వజి వరిజ్ వెచ్చాన్. “దేవుణు ఏలుబడిః ఇహిజ, వన్ని మడిజు నెగ్గి విత్తు, విత్తి వన్నిజ్ పోలిత మనాద్.

25 గాని విజెర్ నిద్ర కిజి మహివలె, వన్ని పగాతికాన్ వాతాండ్రె, కూలిజ నడిఃమి కారు విత్తు, వితాండ్రె సొహాన్.

26 కూలిజ్ నేర్జి పిరితెనె, సెరిక్ పోక్తివలె, నెగ్గి కూలిజ్ లెకెండ్ మన్ని కారుబా తోరితాద్.

27 వన్ని వణి మసిర్ మడిజు యాజుమాని డగ్గు వాతారె, “ఓ బాబు, నీను నీ మడిజు నెగ్గి విత్తు, నె వితిగదె? మరి ఎమేణి యా కారు మొక్కెజ్ వాతె?”, ఇజి వెన్ బాతార్.

28 “ఒరెన్ పగాతికాన్ యాక కితాన్”, ఇజి వాండ్రు వెచ్చాన్. అయి పణి మనిసిర్ మాపు సొన్ని వనకాజ్ లాగ్జి కొటు కిదెజ్ నిజి ఇష్టమ్ నా? ఇజి వెన్ బాతార్.

29 అయావలె వాండ్రు, “ఏలు పొని, నెగ్గి కూలిజ్ లెకెండ్ మన్ని కారు మొక్కెజ్ మీరు లాగ్గివలె వనకవెట ఒకవేల కూలిజ్ బా తెప్పిదెర్ ను.

30 కొయెని కాలం వానిదాక రుండిబా కూడఃజి పిరిపిద్. కొయెని కాలమ్ దు, నెగ్గి కూలిజ్ లెకెండ్ మన్నికారు మొక్కెజు ముజాల కొయెజ కటిజ్ తొప్పి సుర్దు, వెనుక కూలిజ్ కొయెజ తసి నా కొటుదు వాక్కు’, ఇజి కొయెని వరిజ్ వెచ్చాన్”, ఇజి వెచ్చాన్.

సర్పుగిడ కత

31 యేసు మరి ఉండ్రీ నజతి కత వజి వరిజ్ వెచ్చాన్. “దేవుణు ఏలుబడిః ఇహిజ, సర్పు మొక్కెజ్ విత్తుదిజ్ పోలిత మనాద్. ఒరెన్, అక్క వన్ని మడిజు విత్తాన్.

* 13:14-15 13:14-15 యొనయి 6:9,10.

32 అయోక విజు విత్తు, లోక ఇజిరికాదె, గాని పిరితిజు కున మొక్కెజు విజు వనకాణ్ లోకె విరిక ఆజు మరాన్ లెకెండె ఆనాద్. ఆగనమదు ఎగ్రిజిని పొటిజ్ వాజి దన్ని కొమెజు గూడు తోప్పి బన్ని.

33 యేసు మరి ఉండ్రీ సజతి కత వజ వరిజ్ వెప్టాన్. “దేవుణు ఏలుబడిః ఉండ్రీ బోదెలి నండో నెగ్గి దూరుదు కలప్తిమన్ని పులాజ్ మన్ని కండెక్ దూరుదిజ్ పోలిత మనాద్. అయోక కలప్తి మన్ని దూరుదిజ్ విజు పులాజ్ కినిదాక పణి కినాద్.”

34 యేసు కత వజనె విజు మాటెజ్ లోకురిజ్ వెప్టాన్. కత వజ ఆవిండ ఇనికబా వరిజ్ వెహావితాన్.

35 “నాను కత వజనె వెయోదాన్ వెప్పా. లోకం పుట్టి బాణిజ్ అని డాఃజితిమన్ని సజతిజ్ నాను తెలివి కిన”⁴, ఇజి ప్రవక్త వెట దేవుణు ముజాల వర్గితి మాటెజ్ పూర్తి ఆతాద్.

36 సన్మివలె వాండ్రు లోకురిజ్ డిఃసి ఇండ్రో సాహాన్. వన్ని సిసూర్ వన్ని డగ్గు వాజి, “మడిఃజు మన్నినెగ్గి కూలిజ్ లెకెండె మన్ని కారు మొక్కెజు వందిజ్ వెప్టా కతదిజ్ అర్థం మజి వెహాఅ”, ఇజి వెప్టార్.

37 అందెజి వాండ్రు ఈహు వెప్టాన్. “నెగ్గి విత్తు, విత్తికాన్ లోకు మరిసి అతి నాను.

38 మడిఃజు యా లోకం. నెగ్గి విత్తు, దేవుణు ముస్కు, నమకం ఇడ్డి మన్ని దేవుణు కొడోర్ నెగ్గి కూలిజ్ లెకెండె మన్ని కారు మొక్కెజ్, సర్వూను కొడోర్.

39 వనకాణ్ విత్తికాన్ పగాతికాన్ అతి సర్వూను. కోత్త కొయ్నిక యా లోకమదిజ్ ఆక్కర్ దినం. కొయ్నికార్ దేవుణు దూతార్.

40 నెగ్గి కూలిజ్ లెకెండె మన్ని కారుదిజ్ లాగ్గి కొట్టుకిజి సుర్ని లెకెండెనె యా లోకమది ఆకర్ దినమబా వానాద్.

41-42 నెగ్గి కూలిజ్ లెకెండె మన్ని కారుదిజ్ లాగ్గి కొట్టు కిజి సనుద్ సుర్ని లెకెండె, పాపం కిజిని వరిజ్, మరి పాపం కిబిన్నీ విజు దన్నిజ్ నా ఏలుబడిఃదాన్ వెల్లి పోకెజ్ ఇజి, లోకుమరిసి అతి నాను నా దూతారిజ్ పోక్వాలె. వారు వరిజ్ సిసుద్ విసిర్ నాలె. అబ్బె వారు అడఃబాజి, పల్కు కొప్పి మంజినార్.

43 నీతి నిజాయి మనికార్ వరి బుబ్బొతి దేవుణు కిని ఏలుబడిఃదు పొడ్డు లెకెండె జాయ్ నీజి మంజినార్. మీరు గిబ్బిజ్ ఒడఃజి వెంజి అయోవజి నడిఃజి మండ్రు.

దేవుణు ఏలుబడిః

44 “దేవుణు ఏలుబడిః కినిక, మడిఃజుదు డాప్తిమన్ని విలువతి ఆస్తిదిజ్ పోలిత మనాద్. ఒరెన్ ఆ విలువతి ఆస్తిదిజ్ సుడఃతిజ్, ఎయెర్ బా నెన్ ఏండె మరి డాప్తి, గొప్ప సర్దదాన్ సాన్ని వన్నిజ్ మనికెజ్ విజు పొర్తి అయ మడిఃజు కొటాన్.

45 మరి నాను మిజి వెప్పిన, దేవుణు ఏలుబడిః కినిక ఇహిజు, ఒరెన్ ముజెలు సపుకారి రెబాజిని గొప్ప విలువ మన్ని ముజెలు లెకెండెనె.

46 వాండ్రు రెబాజిని లెకెండె మన్ని, ఉండ్రీ విలువతి ముజెలుదిజ్ సుడఃతాండ్రె, సాన్ని వన్నిజ్ కల్గితి మనికెజ్ విజు పొర్తి అయ ముజెలు కొటాన్.

47 మరి నాణు మిజి వెప్పిన, దేవుణు ఏలుబడిః కినిక ఇహిజు, సమ్దరమదు పొక్కిని రకరకమది మొయెజ్ అస్సి వలాదిజ్ పోలిత మనాద్.

48 అయ వల నిండ్రీతిజ్ మొయెజ్ అస్సికార్, వల పడకాదు లాగ్గి బసి, నెగ్గి మొయెజు గంపాదు ఇడ్వార్. సెజ మొయెజు విసిర్ నార్.

49 యా లెకెండెనె యా తరమది ఆక్కర్ దినంబా వానాద్. దేవుణు దూతార్ వాజి నీతి నిజాయి మన్ని వరిబాణిజ్, సెజవరిజ్ ఎర్లిసార్.

50 వారు వరిజ్ గొప్పె వెరి సిసు బాడ్డిదు అర్ ప్పార్. అబె అడఃబాజి, పల్కు కొహాక్కి మంజినార్.”

51 “యా విజు సజతిజు వందిజ్ మిజి అర్థం ఆతాదా?”, ఇజి యేసు వరిజ్ వెన్ బాతాన్. “ఒబ”, ఇజి వారు మరజి వెప్టార్.

52 “దేవుణు ఏలుబడిః కిని వందిజ్ నెస్తి మన్ని యూదురి రూలుజ్ నెస్తిస్సికార్ విజెరె, వన్ని ఆస్తి ఇడ్డి మన్ని గదిదాన్ పడాయెకెజ్, కొత్తకెజ్ ఉండ్రె లెకెండె వెల్లి తని ఇండ్రోణి ఏజుమానిజ్ లెకెండె మనాన్”, ఇజి వాండ్రు వరిజ్ వెప్టాన్.

⁴ 13:35 13:35 కీర్తన 78:2.

53 యేసు యా కతెజ్ వెహ్లా వీజతి వెనుక, అబెణిజ్ సాహాన్.

54 వన్ని సొంత పట్టుమదు వాతాండ్రె, వాండ్రు యూదురు మీటిజ్ కిని ఇల్కాజ్ లోకురిజ్ నెన్నిసి మహాన్. “విన్నిజ్ యా గెణం, యా బమ్మాతి పణిజ్ కిని సత్తు ఎంబెణిజ్ వాతాద్”, ఇజి వారు బమ్మ అజి వర్గితార్.

55 “వీండ్రు కునెల్ వాండ్రు మరిసి ఆఎండ్రా? విన్ని అయేసి పేరు మరియ గదె? యాకోబు, యోసేపు, సీమోను, యూద ఇనికార్ విన్ని తంబెరిసిర్ గదె?

56 విన్ని తజిసిక్ మా వెట మనెగదె? యాకెజ్ విజి వినిజ్ ఎంబెణిజ్ వాతె?

57 వారు వన్ని మున్సు కోపం అజి మహాన్. గాని యేసు వరిజ్ “ఒరెన్ ప్రవక్త, వన్ని సొంత ఇండ్రొనె గవ్దరపం సిల్లికాన్ అజినాన్”, ఇజి వెహ్లాన్.

58 వన్ని మున్సు వరిజ్ నమకం సిల్లితిజ్ వాండ్రు అబ్బె లావ్ బమ్మాతి పణిజ్ కివితాన్.

14

యోహాను బుర కత్తినార్

1-2 నస్తవలె హేరోదురాజు యేసు వందిజ్ మాటజ్ విహండ్రె, “వీండ్రు సాతి పరిబాణిజ్ మర్జి నిజితి బాప్తిసం సీని యోహాను. అందెజె యా బమ్మాతి పణికిని సత్తు వన్ని లోఇ మనాద్”, ఇజి వన్ని పణి మన్సిరిజ్ వెహ్లాన్.

3 వన్ని తంబెరిసి అతి పిలిపు ఆల్ని హేరోదియ వందిజ్ హేరోదురాజు ఆడ్ర సిత్తిలెకెండె యోహానుజ్ అసి గొలుసుదాన్ తోప్పె జెలిదు ఇడ్డ మహాన్.

4 ఎందనిజ్ ఇహిజ, “దనిజ్ నీ వందిజ్ అల్ని లెకెండె ఇడె ఆతిక దేవుణు మోసెజ్ సిత్తి రూలుదిజ్ పడివిద్”, ఇజి యోహాను వన్నిజ్ వెహ్లా మహాన్.

5 యోహానుజ్ సప్తెజ ఇజి హేరోదు రాజు ఒడిబితాన్, గాని లోకుర్ విజెరె వీండ్రు ఒరెన్ దేవుణు ప్రవక్త ఇజి వెప్పె మహిజ్ విన్నిజ్ సప్తెజ్ తియెలాత మహాన్.

6 హేరోదు రాజు పుట్టి రోజు వాతిజ్, హేరోదియ గాల్ని వాజి పరి వందిజ్ డాట్టి కరజతాద్. హేరోదు రాజుజ్ గొప్పు సర్ద ఆతాన్.

7 అందెజె అది ఇనిక లోస్టిజ్ బా సీన ఇజి వాండ్రు దనివెట ఉండ్రె ఒట్టు పొక్కి దన్నిజ్ ఉండ్రె మాట సిత్తాన్.

8 అయేసి దనిజ్ సుత్తిస్తి లెకెండెనె అది సాహదె, “బాప్తిసం సీని యోహాను బుర కత్తి ఉండ్రె పలెందు సిద్”, ఇజి లోస్తాద్.

9 రాజు గొప్పు బాద ఆతాన్. గాని వాండ్రు కితి ప్రమాణం వందిజ్, వన్ని వెట విందుదిజ్ బస్తిమిహి కూలెజ్ వందిజ్ అది లోస్తిక సిద్జె ఇజి ఆడ్ర సిత్తాన్.

10 జెలిదు మహి యోహాను బుర కత్తిపిస్సన్.

11 వన్ని బుర ఉండ్రె పలెమదు ఇడ్డ తపిసి దనిజ్ సిబిస్తాన్. అది అయోక దని అయేసి డగ్రు ఒత సిత్తాద్.

12 యోహాను సిసూర్ వాజి వన్ని పిసుగు పెర్సి ఒసి సమాది కితార్. నస్తవలె వారు యేసు డగ్రు వాతారె వెహ్లాన్.

అయదు వేలుజ్ లోకాజ్ బోజనం సీనిక

13 జర్గితి సజతిజ్ విజి విహండ్రె యేసు ఉండ్రె డోణి ఎక్కి ఎయెర్ బా మన్ ఇ ఉండ్రె బాడ్డిదు ఒరేండ్రె సాహాన్. వాండ్రు సాహి సజతి వెంజి అయ పట్టుమదికార్ నండెండార్ నడిసిని వన్ని వెనుక సాహాన్.

14 వాండ్రు అతాహా పడక జోరె అందితిజ్, డోణిదాన్ డిగితాన్ అయా మంద లోకురిజ్ సుడెతాండ్రె పరి మున్సు కనికారం ఆతాన్. పరి జబ్బుదివరిజ్ నెగెండె కిత్రాన్.

15 పొద్దు అతివెలె వన్ని సిసూర్ వన్ని డగ్రు వాజి, “అక్క ఎయెర్ మన్ ఇ బాడ్డి, విలునె పొద్దు ఆతాద్. యా లోకుర్ నాహ్లాజ్ సొన్ని వారి వరిజ్ బోజనమకు కొండెజ్ వరిజ్ పోక్ అ”, ఇజి వెహ్లాన్.

16 “వారు సొండ్రెజ్ అక్కరె సిల్లెద్. మీరె వరిజ్ తిండ్రెజ్ ఇనికబా సీదు”, ఇజి యేసు వరిజ్ వెహ్లాన్.

17 “ఇదిలో, మా వెట అయదు రోటెజ్ ని రుండ్డి మెయెజ్ నె మనె”, ఇజి వారు వెహ్లాన్.

18 “అయకెజ్ నా డగ్రు తగాట్”, ఇజి యేసు వెహ్లాన్.

19 వెనుక లోకాజ్ పసి గడ్డి మున్ను బస్త్ర ఇజి వెహ్లాండ్రె అయ్దు రొటెజ్ నిరుండి మొయెజ్ కీదు అస్తాండ్రె ఆగాను దరిజ్ నుడెజి దేవుణుదిజ్ వందనమ్కు వెహ్ని రొటెజ్ రుక్సి నీసూరిజ్ సితాన్. సీసూర్ అక లోకాజ్ సీబాత సితార్.

20 వారు విజెరె పొట పంజు తిహార్. వెనుక మిగిలిత్తి ముక్కెజ్ పన్నెండు గంపెజ్ సీసూర్ పెహ్టార్.

21 బోదెక్న్ కొడోర్ అవిండ తిహికార్ అయ్దువేలు మన్ని మొగకొడోర్ మహార్.

యేసు ఏరు మున్ను నడిసినాన్.

22 లోకురిజ్ పొక్తి వెటనె యేసు వన్ని సీసూర్జ వెటనె ఉండ్రె డోణి ఎకిసి, వన్నిజ్ ఇంక ముజాల అతాహ పడక సొండ్రు ఇజి వరిజ్ పొక్తాన్.

23 వరిజ్ పొక్తి వెనుక, వాండ్రు ఒరేండ్రె పార్లనం కిదెజ్ ఉండ్రె గొరొత్ ఎక్తాన్. పొదు ఆతివెలె వాండ్రు ఒరేండ్రె అబ్బె మహాన్.

24 గాని డోణి ఒడ్డుదాన్ నండో దూరం సాహాద్ గొప్ప గాలి కిజి మహిజ్ ఉల్కెజాణిజ్ డోణి ఇతల్ అతార్ దూజ్జి మహాద్.

25 కోడిజామ్దు యేసు సందారమ్దు ఏరు మున్ను నడిజి వరి డగ్రు సాహాన్.

26 వాండ్రు సమ్దరమ్దు ఏరు మున్ను నడిసినక సీసూర్ నుడెజితార్ తియెల్ అతార్. “అబయా యాక ఉండ్రె దూబ”, ఇజి వారు తియెల్ ఆజి డెల్స్తార్.

27 వెటనె యేసు, “దయరమ్దాన్ మండ్రు, ఇక నానె, తియెల్ ఆమాట్”, ఇజి వెహ్టాన్.

28 పేతురు, “ప్రబువా, నీనె ఇహిజ, నాను ఏరు మున్ను నడిజి నీ డగ్రు వాదెజ్ సెలవ సిద్అ”, ఇజి వెహ్టాన్.

29 “రఅ”, ఇజి యేసు వెహ్టాన్. నన్తివలె పేతురు డోణి డిగ్జి యేసు దరోట్ ఏరు మున్ను నడిజిత వాతాన్.

30 గాని గాలిదిజ్ నీజిత్తి ఉల్కెజ నుడెజి తియెలాజి వాండ్రు ముడుంగజి మహాన్. “ప్రబువా నజి రసినఅ”, ఇజి డెల్స్తాన్.

31 వెటనె యేసు వన్ని కియ సాప్పి వన్నిజ్ అస్తాన్. “ఇజిరి నమకం మనికి, ఎందనిజ్ నీను అనుమానం ఆతి?”, ఇజి వెహ్టాన్.

32 వారు డోణి ఎక్తిజ్ గాలి అలెతాద్.

33 నన్తివలె డోణిదు మనికార్ వాజి, “నిజమె, నీను దేవుణు మరిసినె”, ఇజి వెహ్ని వన్నిజ్ పొగడిజి మాడిస్తార్.

34 వారు అతాహ పడక సొన్ని గెనెసెరెతు నాటో అందితార్.

35 అబ్బెణి లోకుర్ వన్నిజ్ గుర్తు అస్తారె డగ్రు మని నాహ్కాజ్ కబ్బు పొక్తార్. లోకుర్ వరి కస్టమ్దు మన్ని వరిజ్ విజెరిజ్ వన్ని డగ్రు తత్తార్.

36 జబ్బు వన్నికార్ వన్ని సొక్క సెంగుబా ముట్టజ్ బతిహాలజి సెలవ లొస్తార్. ముట్టికార్ విజెరె నెగెండ్రె అతార్.

15

నెగ్గెక్కిజ్ సెఇక్కిజ్

1-2 నెగెండ్రె పరిసయరుని యూదురిజ్ రూలుజ్ నెస్సిన్వికార్ యెరూసలేమ్దాన్ వాతారె యేసుజ్, “ఎందనిజ్ నీ సీసూర్ బోజెనమ్దిజ్ ముందాల కికు నొరబావిర్, వెద్దెల్జ అలవాటుజ నెక్కి పొక్కినార్?”, ఇజి వెన్బాతార్.

3 యేసు వరిజ్ ఈహు మరజి వెహ్టాన్, “మీరు ఎందనిజ్ మీ అలవాటుజ వందిజ్ దేవుణు ఆడ్రెజ నెక్కి పొక్కినిదెర్?

4 మీ యాయ బుబ్బరిజ్ గవరం సీదు, మరి ఎయెర్బా అయ్సి అప్పొసిరిజ్* దూసినె వెహ్టిజ వన్నిజ్ తప్పెజ్వలె* ఇజి దేవుణు రూలుదు వెహ్టా మనాద్.

* 15:4 15:4 నిగ్గమ 21:17; లేవి 20:9. * 15:4 15:4 నిగ్గమ 20:12 ద్వితి 5:16.

5-6 గాని మీరు నెస్సిసిని దన్ని లోఇ తేడ మనాద్ మీరు నెస్సిసినిక ఇనిక ఇహిజ ఎయెన్బా, “నాను మిజి ఇనికబా ఉండ్రీ సాయం లెకెండ్ కిస ఇజి ఇట్టి మనిక, దేవుణుడిక్ నంత సిత్త మన్ను’ ఇజి అయెసి అప్పొసిరిక్ వొప్పెజు, వాండ్రు మరి గవరమదాన్ నెగెండ్ సుడెడెక్ అక్కర సిల్లెద్. ఇజి అయాలెకెండ్ మీ అలవాటు వందిక్ మీరు దేవుణు మాటదిక్ సీలి లెకెండ్ కిజినెదెర్.

7-9 వేసం కినికిదెరా, “యా లోకుర వరి బెద్వెజాణిక్ నజి పొగ్గిజనార్ గాని వరి మన్ను నా బాణిక్ దూరం మనాద్. వారు పణిదిక్రెంపిండ్ నజి పొగ్గిజనార్. వారు నెస్సిస్సికెక్ విజు లోకురి రూలుక్నె, ✱ ఇజి యెసయ ప్రవక్త వెట దేవుణు ముజాల మీ వందిక్ వర్గితిక నిజమె”, ఇజి వెప్తాన్.

10 యేసు అయ మంద లోకురిక్ డగ్రు కూక్తాండ్రె ఈహు వెప్తాన్, “మీరు జాగర్త వెంజి నెగెండ్ అర్థం కిదు.

11 వెయుదాన్ లోఇ సొనిక ఇనికబా ఎయెరిక్బా ఇనిక అపిద్. గాని లోఇహాన్ వెయుదాన్ వెల్లివాని మాటెక్నె ఒరెన్ వన్నిక్ సెఇక కిసె.”

12 నస్సివలి వన్ని సిసూర్ వాతారె, “యా మాటెక్వెంజి పరిసయరు నండొ కోపం ఆతిక సిను నెస్సిదా?”, ఇజి వెప్తాన్.

13 వాండ్రు సిసూరిక్, “పరలోకామ్దు మన్ని నా బుబ్బొతి దేవుణు ఉణునఇ విజు మొకెక్ వేలెజాణిక్ తెరి ఆనె వారబా అయ మొకెక్ లెకెండ్నె.

14 వరిక్ డిసి సిదు. వారు గుడ్డిదివరిక్ సరి తోరిస్సి గుడ్డిదికారె. ఒరెన్ గుడ్డిదికాన్ మరి ఒరెన్ గుడ్డి వన్నిక్ సరి తోరిస్సిజు వారు రిఎరబా గాంతదు అరనార్”, ఇజి వెప్తాన్.

15 అందెజి వేతురు, “యా కత వందిక్ మజి అర్థం ఆనిలెకెండ్ వెహాల”, ఇజి వెప్తాన్.

16 యేసు వరిక్, “విలుబా మీరు మహివరిలెకెండ్ మనిదెరా? విలుబా నిన్ని మాటెక్ అర్థం కిదెక్ మిజి బుద్ది సిల్లెదా?

17 వెయుదాన్లోఇ సొనిక, పొటాదు సొన్ని మరి అయాక మీరు బయలు బస్సివలి బూమిదు సొన్నినాద్, ఇక మీరు నెస్సిఇదెరా?

18 గాని వెయెదాన్ వెల్లి వాని మాటెక్ మన్నుదాన్ వాజినె. ఆకెజి లోకుదిక్ సెఇక కిజినె.

19 సెఇ ఆలోసనమ్కు, సప్పికెక్, రంకు బూలొనిక, కేలారబూలొనిక, డొజి కినిక, అబద్ధం వెప్పొకెక్, దేవుణుడిక్ దూసిస్సికెక్ యాకెక్ విజు మన్నుదానె వాజినె.

20 యాకెజి ఒరెన్ వన్నిక్ సెఇక కిజినె. కికు నొరబావిండ ఉటిజ అక ఒరెన్ వన్నిక్ సెఇక కివి.”

కనానియది బోదెలిక్ మన్ని సమకం

21 యేసు అబ్బెణిక్ నండొ దూరం సొన్ని ఉండ్రీ గొరొన్ ఎక్సి డిగితాండ్రె తూరు, సీదోసు ఇని పట్టుమ్కాక్ సెందితి ప్రాంతమ్కాక్ సొహాన్.

22 వాండ్రు అబ్బె అందితిక్ అబ్బెణిక్, కానాన దేసెమ్ది ఉండ్రీ బోదెలి వాతాదె, “ప్రబువా, దావీదు మరిసి నజి కనికారం తోరిన్అ. నా గాల్పిక్ దెయం అస్తిక్ గొప్ప బాద్ ఆజినాద్”, ఇజి డేల్ని వెప్తాన్.

23 యేసు దనిక్ ఉండ్రీ మాటబా వెహావితాన్. అందెజి వన్ని సిసూర్ వాజి, “ఇది మా వెట గగోల్ ఆజి వాజినాద్, దనిక్ పోక్తె”, ఇజి బతిమాల్తార్.

24 వాండ్రు వరిక్, “మురుతి మెండగొరైక్ లెకెండ్ దేవుణుబానిక్ దూరం ఆతి ఇప్రాయేలు లోకుర డగ్రు నాను పోకె ఆత మన్ను”, ఇజి వెప్తాన్.

25 అది వన్ని ముజాల వాజి ముణుకుక్ ఊరెజి, “ప్రబువా, నజి సాయం కిత”, ఇజి వెప్తాన్.

26 వాండ్రు దనిక్, “కొడొరి తిండ్రెక్ మని రొటెక్ లాగ్గి నుకుడిక్ సీనిక నాయం ఆవిద్”, ఇజి వెప్తాన్.

27 అది, “నిజమె ప్రబువా, గాని ఎజమాని తింజిమహిక్ బల్లదాన్ అర్చి ముక్కెక్ నుకుడుక్ తింజినె గదె?”, ఇజి వెప్తాన్.

28 నస్సివలి యేసు, “బయి, నా మున్ను మని నీ సమకం గొప్ప పెరిక. నీను కోరితి లెకెండ్నె నిజి ఆపిద్”, ఇజి దనిక్ వెప్తాన్. అయ గడియాదునె దని గాల్పి నెగెండ్ ఆతాద్.

నాల్లి వెయిక్ లోకాక్ బోజనం సీనిక

✱ 15:7-9 15:7-9 మెసయ 29:13.

29 యేసు అబెణిజ్ సొన్ని గలీలయ సమదారం పడకాదాన్ వాజి అబె ఉండ్రీ గోరేత్ ఎక్తాండ్రై బస్తాన్.

30 సొటావరిజ్, గుడ్డివరిజ్, గుల్లవరిజ్, కికు కాల్కు అర్దివరిజ్ మరి అజ జబ్బుదివరిజ్ నండోడారిజ్ అసి ముంద లోకుర్ వన్ని డగ్గు వాతార పరిజ్ వన్ని కాల్కు అడ్డి ఇట్టార్. వాండ్రు వరిజ్ నెగెండో కిత్తాన్.

31 గుల్లవరిజ్ వర్గిదెజ్ వాతాద్. కికు కాల్కు అర్దికార్ నెగెమడ ఆతార. సొటాదికార్ నడిఃతార, గుడ్డిదికార్ సుడఃదెజ్ అట్టార్. యాకెజ్ సుడఃజి లోకుర్ విజెరి బమ్మ ఆతార ఇస్తాయేలురి దేవుణుదిజ్ పొగిడిఃతార.

32 యేసు వన్ని సిసూర్జి కూక్తాండ్రై వరిజ్, “యా లోకుర్ నావెట మంజి మూండ్రీ దినమ్మకు ఆతె. విరిజ్ తిండ్రెజ్ బా ఇనికబా సిల్లెద్. నజి పరి ముస్సు, కనికారం ఆజిన. వరిజ్ బజదావ్ పోక్తెజ్ మజి మన్ను రెవి. వారు కణ్కు త్రివిజి సర్దు అరనారను”, ఇజి వెప్తాన్.

33 సిసూర్ వన్నిజ్, “నిసా ముంద లోకురిజ్ తీప్పిన్జిజ్ బిడిఃమ్బూమి ప్రాచుతమ్మదు ఇనిక దోప్కానె?”, ఇజి వెప్తాన్.

34 యేసు వరిజ్, “మీ బాన్ ఎసోడు రొటెజ్ మన్నె?”, ఇజి వెన్ బాతాన్. వారు, “ఏడు రొటెజ్ ని సెగం ఇజిరి మొయెజ్ మన”, ఇజి వన్నిజ్ వెప్తాన్.

35 లోకురిజ్ బూమిదు బస్సు ఇజి యేసు వెప్తాన్.

36 వెనుక అయ ఏడు రొటెజ్ ని మొయెజ్ కీదు అస్తాండ్రై దేవుణుదిజ్ వందనమ్మకు వెప్పి అయాకెజ్ రుక్కి వన్ని సిసూర్జి సితాన్. వారు లోకాజ్ సీబాజి సితార్.

37 లోకుర్ విజెరి పొట వంజా తిహి వెనుక మిగిలితి ముక్కెజ్ ఏడు గంపెజ్ నిండ్రు వన్ని సిసూర్ పెప్తార్.

38 బోదెక్ ని కొణ్డోర్ అవిండ తిహి మొగకొణ్డోర్ నాల్లివెయిజ్ మహార్.

39 అయ ముంద లోకురిజ్ పొక్కి వెనుక యేసు డోణి ఎక్తాండ్రై మగదాన్ ఇని నాటో సొహాన్.

16

1 నస్తవలె పరిసయేరుని సదుకయేరు యేసుజ్ డగ్గు పరిక్కు కిదిజ్, వన్ని మాటెణిజిజ్ వన్నిజ్ అస్తెజ్ ఇజి డగ్గు వాతార. దేవుణుని వన్నిజ్ పోక్తాన్ ఇనిదన్నిజ్ రుజువ్ లెకెండో ఆగాసమ్దాన్ ఉండ్రీ బమ్మాతి పణి కిజి మజి తోరిన్ అ, ఇజి వెప్తాన్.

2 వాండ్రు వరిజ్, “పొర్దు అనివెలె ఆగసం ఎర్రజ్ మహిజి నేండ్రు నెగెణ్ మంజినాద్ ఇజి మీరు వెప్పినిదెర్.

3 మరి, పెందల ఆగసం ఎర్రజ్ ఆజి మొసాప్ మహిజి, నేండ్రు గాలి పిరు వానాద్, ఇజి మీరు వెప్పినిదెర్. ఆగసం సుడఃజి అయ రోజి ఎలాగ మంజినాద్ ఇజి వెప్తాజ్ మీరు నెప్పిదెర్, గాని జర్గినికెజ్ సుడఃజి కాలమ్దిజ్ గుర్తు అస్తెజ్ అట్ ఇదెర్.

4 యా తరమ్దికార్, సెఇకార్ ఆతికార్ దేవుణు వందిజ్ వరిజ్ మన్ను సిల్లెద్ గుర్తు లెకెండో ఉండ్రీ బమ్మాతి పణి వందిజ్ వెన్ బజినార్, గాని దేవుణు ప్రవక్త ఆతి ఓనెజ్ జర్గితిక తప్ప మరి ఇనికబా ఉండ్రీ గుర్తు మరి తోర్ ఎద్”, ఇజి వెప్తాన్.

5 వెనుక యేసు వరిజ్ డిఃసి అబ్బెణిజ్ సొహాన్.

6 వారు డోణి ఎక్తార సమదరం అతాహ పడక సొన్ని మహివలె, వన్ని సిసూర్ రొట్టెజ్ ఒత్తెజ్ పోస్త మహార్. నస్తవలె యేసు, “పరిసయేరుది మరి సదుకయేరుది పులాజ్ కిని దూరువందిజ్ మీరు గొప్ప జాగర్త మండ్రు”, ఇజి వెప్తాన్.

7 “మావ్ రొట్టెజ్ తెఇతి వందిజె యా మాట వెప్తాన్”, ఇజి ఒరెన్ వెట ఒరెన్ వర్గిజి మహార్.

8 యేసు అక నెస్తాండ్రై, ఎందానిజ్ మీరు నమకం తక్కు మనికిదెర్ అజినిదెర్! మీ బాన్ రొట్టెజ్ సిల్లితిజ్ మీరు ఎందనిజ్ ఒరెన్ మరి ఒరెన్ వెట వర్గిజినిదెర్?

9 ఏలుబా మీరు అర్దం కిజి నెస్తెజ్ అట్ ఇదెరా? అయేదు రొట్టెజ్ మహివలె అయేదు వెయిజ్ లోకాజ్ తీప్పిన్జిజ్ మిగిలితికెజ్ ఎసోడు గంపెజ్ పెప్తాదెరో?

10 మరి ఏడు రొట్టెజ్ మహివలె నాల్లి వెయిజ్ లోకాజ్ తీప్పిన్జిజ్ మిగిలితికెజ్ ఎసోడు గంపెజ్ పెప్తాదెరో? వినుకాజ్ బా మీరు ఎతు కిఇదెరా?

11 నాను వర్గితక రొట్టెజ్ వందిజ్ ఆవద్ ఇజ ఎందనిజ్ మీరు అర్ధం కిజి నెన్ఇదెర్? గాని పరిసయేరుని సదుకయేరుది పులాని దూరు వందిజ్ మీరు జాగర్త మండ్రు ఇజి నాను వెప్తా”, ఇజి వెప్తాన్.

12 నస్తివలె వాండ్రు జాగర్త మండ్రు ఇజి వెప్తాక రొటి తయారా కిని పులాని దురు వందిజ్ ఆవద్ గాని పరిసయేరుని సదుకయేరుది పులాని దూరు నని బోద వందిజ్ జాగర్త అజి మండ్రు ఇజి వెప్తాన్, ఇజి వారు అర్ధం కిజి నెస్టార.

13 యేసు పిలిపుది ఆతి కయసెరియ పట్టుమందిజ్ డగ్రు మన్ని నాహ్కాజ్ వాతిజ్ “లోకు మరిసి ఆతి నా వందిజ్, నాను ఎయెన్ ఇజి లోకుర్ వెహె అజినార్?” , ఇజి వన్ని సిసూర్జి వెన్బాతాన్.

14 “సెగొండార బాప్టిసం సీని యోహాను ఇజినార్, సెగొండార ఏలియ ఇజినార్, మరి సెగొండార యిరిమ్ము ఇజినార్, సిల్లె ప్రవక్తజి లోఇ ఒరిన్ ఇజి సెగొండార వెహె అజినార్”, ఇజి వారు వెప్తార్.

15 అందెజి యేసు, “గాని నాను ఎయెన్ ఇజి మీరు వెప్సినిదెర్?” , ఇజి వెన్బాతాన్.

16 పేతురు ఆతి సీమోను, “నీను బత్తిజిని దేవుణు మరిసి ఆతి క్రిస్తు*”, ఇజి వెప్తాన్.

17 యేసు, వన్నిజ్, “యోన మరిసి ఆతి సీమోను, నీను దేవుణు సీజిని దివనముకు ముజినికాన్. యాక నిజి తెలియకెత్తిక లోకుర్ఎయెర్బా ఆవర్ గాని పరలోకామదు మని నా బుబ్బాతి దేవుణునె.

18 గాని నాను నిజి వెప్సిక ఇనిక ఇహిజి నీను పేతురు, నీ పేరుదిజ్ తర్ధం సట్టు ఇజి నాను యా నుటు మున్ను నా సజమందిజ్ తోహ్పా. అయా లోకమది సత్తుజ్ దనిజ్ గెలిస్తెజ్ అట్విద్.

19 దేవుణు ఏలుబడి: కిజిని పరలోకామదిజ్ నెందితి ఆతికారం నాను నిజి సీన†, యా లోకమదు నీను ఇనిక తోహ్పాదో, అయాక పరలోకామదుబా తోహె అనాద్. యా లోకమదు నీను ఇనిక కుత్సిదో, అయాక పరలోకామదుబా కుతె అనాద్”, ఇజి వెప్తాన్.

20 వెనుక యేసు, వాండ్రు క్రిస్తు ఆతికాన్ ఇజి ఎయెరిజ్బా మీరు వెప్తాజ్ ఆవద్ ఇజి వన్ని సిసూరిజ్ కసితం వెప్తాన్.

21 అయి వెలెహాన్ అసి యేసు, నాను యెరుసలేమదు సొండ్రెజ్ వెలె, మరి అబె పెదెలుజ, పెరి పుజెరిజుని యూదురి రూలుజ్ నెస్సొన్సి పరి కిదాన్ నండో ఇమనెజ్ ఒరిస్సాలె, లోకుర్ నజి సప్పొల్లె సాతి మూండ్రె రోజుదు దేవుణు నజి మరి మర్జిని క్విసాలె ఇజి నండో సజతిజ్ వన్ని సిసూరు వెట వెప్సి మహాన్.

22 పేతురు యేసుజ్ ఉండ్రె పడెకాదు కూక్ ఒతండ్రె, “ప్రబువా, నిజి యా లెకెండో జర్గిదెజ్ ఆవద్”, ఇజి గటిజి వెప్తాజ్ మొదొల్స్తాన్.

23 అహిజి, వాండ్రు పేతురు దరిజ్ మర్జి బేసి, “ఓ సయతానా! నీను నజి ఉండ్రె అడ్డు లెకెండో మని. నీ మన్నుదు మని సజతిజ్ దేవుణుబాణిజ్ వాతిక ఆవద్, లోకుర్ ఒడెబినికెజి”, ఇజి వెప్తాన్.

24 నస్తివలె యేసు వన్ని సిసూరిజ్ నుడెజి, “ఎయెన్బా నా వెనుక వాదెజ్ ఇహిజి, వాండ్రు వన్ని సొంత ఆనెజ్ విజు డిసి సీజి వన్నిజ్ వాజిని కన్ఠంకు విజు ఒరిస్తెజ్ తయారాజి పిండెజి నా వెట సాదెజ్బా తయారాజి నా వెనుక వాదెజ్యలె.

25 ఎయెన్బా వన్ని పాణమందిజ్ వాండ్రె కాపాడెదెజ్ ఇజి నుడెతిజి వన్నిజ్ ఎలాకాలం ముజిని బత్తు మన్విద్. నా వందిజ్ ఎయెరిజ్బా వన్ని పాణం నన్ఠం ఆతిజి, వాండ్రు ఎలాకాలం ముజిని బత్తుదు సానాన్.

26 ఎయెన్బా వాండ్రు కొరిజినిక్కెజ్ దోహ్కీ యా లోకమది అస్సిని సర్గ విజు దోహ్కీ వెనుక దేవుణువెట ఎలాకాలం ముజిని బత్తుదు సొన్విండ మహిజి ఇని లబం మనాద్? దేవుణువెట ఎలాకాలం ముజిని బత్తుదిజ్ బదులు మరి ఇనిక సీదెజ్ అట్వాన్?

27 లోకు మరిసి ఆతి నాను, నా బుబ్బాతి దేవుణు గొప్పు జాయ్దాన్, వన్ని విజు దూతరిజ్ తోడు: అసి రాజు లెకెండో వాలాలె. వెనుక ఒరిన్ వన్నిజ్ వన్ని పణిదిజ్ తగితి లెకెండో వలం సీనాలె.

28 లోకుమరిసి ఆతి నాను రాజు లెకెండో ఏలుబడి: కినిక నూణిదాక, ఏలు నిహిమన్ని పరిలోఇ సెగొండార సావర్ ఇజి నాను మిజి నిజం వెప్సిన్”, ఇజి వెప్తాన్.

* 16:16 16:16 క్రిస్తు ఇని మాటదిజ్ అర్ధం దేవుణు ఏర్పాటు కిత్తి పొక్తికాన్ † 16:19 16:19 పరలోకమది తాలం కిక్కు ఇజి తెలుగుదు రాస్త మనాద్.

17

యేసు, మోసెని ఏలీయ

1 ఆరు రోస్సు వెనుక యేసు, పేతురుని యాకోబు, యాకోబు తంబెరిసి ఆతి యోహానుజ్బా కూక్తాండ్రె వన్నివెట బతాన్. వారు నండో ఎత్తుమని ఉండ్రీ గోరోన్ ముస్సు ఎక్కు సూహర్.

2 అబ్బె వరి ముందాల వన్ని రూపు మారితాద్. వన్ని మొకొం పొద్దు లెకెండ ఆతాద్. వన్ని సొకెజ్ మెర్సిని జాయ్లెకెండ తెలాజ్ ఆతె.

3 ఇదిలో, నస్తివలె అబ్బె మోసెని ఏలీయ యేసు వెట వర్గిజ మంజునిక వరిజ్ తోర ఆతాద్.

4 నస్తివలె పేతురు, “ప్రబువా, మాటు ఇబ్బె మహిజ నెగెద్. నిజ్ ఇస్సం ఇహిజ, ఇబ్బె నిజ్ ఉండ్రీ, మోసెజ్ ఉండ్రీ, ఏలీయెజ్ ఉండ్రీ, ఆహె మూండ్రీ గుడుఃనిజ్ తోహ్నా”, ఇజి వెప్తాన్.

5 వాండ్రు వర్గిజ మహివలె నండో జాయ్మని ఉండ్రీ మొసాప్ వరిజ్ వ్డెగ్తాద్. “ఇదిలోన్ వీండ్రు నజి ఇస్త్మాతి నా మరిన్. విన్ని ముస్సు, నాను సర్త ఆత మన్ను. విన్ని మాటిజ్ నెగెండ వెండ్రు”, ఇజి ఉండ్రీ జాటు అయ్ మొసోపుదాన్ వాతాద్.

6 సిసూర్ యా మాట విహార నండో తియెల్ ఆజి పడ్డెగ్గి అర్తార్.

7 యేసు వరి డగ్రు వాజి వరిజ్ ముట్టి, “నిజ్దు, తియెల్ ఆమాట్”, ఇజి వెప్తాన్.

8 వారు కణ్ణు పెర్తి బెస్తిజ్ యేసుజ్ తప్ప మరి ఎయెరిజ్బా తోవతార్.

9 వారు గోరోన్ డిగ్జి వాజి మహివలె, “లోకు మరిసి ఆతి నాను, సాతి వరిబాణిజ్ మర్జి నిజ్నిదాక, మిజి తోర ఆతి యా సజతిజ్ వందిజ్ ఎయెరిజ్బా వెహ్మాట్”, ఇజి యేసు వరిజ్ వెప్తాన్.

10 నస్తివలె వన్ని సిసూర్, “ఏలీయ* ముజాల వాదెజ్ ఇజి ఎందనిజ్ యూదురి రూటుజ్ నెస్సిస్సికార్ వెస్సిసూర్?”, ఇజి వన్నిజ్ వెన్బాతార్.

11 అందెజ్ వాండ్రు, ఏలీయాన్ ముజాల వాజి మండ్రెజ్, యాక నిజమె. వాండ్రు వాజి విజు నెగెణ్ తయార్ కిసాన్.

12 అహిజ ఏలీయ ముజాల వాత మహాన్, గాని వారు వన్నిజ్ గుర్తు అస్టెజ్అట్ఎండ వరిజ్ ఇస్త్మాతి లెకెండ వన్నిజ్ పడిఎండ కితార్. లోకుమరిసి ఆతి నానుబా అయాలెకెండ వరి కిదాన్ ప్రమెజ్ ఓరిస్సాలె”, ఇజి వరిజ్ వెప్తాన్.

13 బాప్తిసం సీని యోహాను వందిజ్ వాండ్రు వరివెట వర్గిజనాన్ ఇజి వారు అర్దం కితార్.

దెయం అస్తి కొడెడిజ్ నెగెణ్ కిజినాన్

14 వారు మంద లోకుర్డగ్రు వాతివలె ఒరెన్ వన్ని డగ్రు వాజి వన్ని ముందాల ముణ్ణు ఊరెజి,

15 “ప్రబువా నా మరిన్ ముస్సు, నీ కనికారం తోరిన్అ వాండ్రు మూర్పు పెప్తిజ్ నండో బాద్ ఆజినాన్. వాండ్రు ఎనెజ్ ఎనెజ్ సినుద్ సిలిజ ఏరుదు అర్పి మంజినాన్.

16 నాను నీ సిసూర్ డగ్రు వన్నిజ్ తత్త గాని వారు వన్నిజ్ నెగెండ కిదెజ్ అట్ఎతార్”, ఇజి వెప్తాన్.

17 అందెజ్ యేసు, “యా తరమెదికిదెర్ ఆతి మీరు మహికార్ మిజి నెస్సిస్సి తప్ప సరిదాన్ నడిసి మన్నుదెర్. మీరు నాముస్సు, నమకం సిల్లికిదెర్. నాను ఎస్సా కాలమకు దాక నాను మిజి ఓరిసి మండ్రెజ్ వలె వన్నిజ్ నా డగ్రు తగాట్”, ఇజి వెప్తాన్.

18 నస్తివలె యేసు అయ్ దెయమెదిజ్ ఉండ్రీ ఆత్ర సితిజ్ అక్క వన్నిజ్ డిస్తతాద్. అయ్ గడియూదునె ఆ ఇజిరికాన్ నెగెండ ఆతాన్.

19 దని వెనుక వన్ని సిసూర్వాండ్రు ఒరెండ్రె మహివలె యేసు డగ్రు వాతారె, “మాపు ఎందనిజ్అయ్ దెయమెదిజ్ సాన్పిస్తిజ్ అట్ఎతాన్?”, ఇజి వెన్బాతార్.

20-21 ఉండ్రీ సర్పుగిడ నస్త్తు సమకం మహిజ యా గోరోన్దిజ్ సుడెజి, “ఇబ్బెణిజ్ అబ్బె సాన్అ’ ఇజి వెప్తిజ అది అబ్బె సానాద్. మీరు కిదెజ్ అట్ఇక ఇనికబా మన్ఏద్, ఇజి నాను మిజి నిజం వెస్సిసూ”, ఇజి వెప్తాన్. మిజి సస్సా నమకం సిల్లెద్, అందెజ్ మీరు కిదెజ్ అట్ఇదెర్.

* 17:10 17:10 పాడయ్ బప్తిమాన్మదు మన్ని మలాకి ప్రవక్త పుస్తకమదు రస్తిమన్నిలెకెండ ఇహిజ, ఏలీయ ముజాల వాదెజ్ ఇజి యూదురు నవ్విజినార్. మలాకి 3:1, 4:5-6.

22 వారు గలీలయ దేసమందు వాతివెలె యేను, “లోకు మరిసి ఆతి నాను లోకుర్ కియుదు ఒవజెవె ఆనాలె.

23 వారు నజీ నప్పార్, మరి మూండ్రి దినమదు నాను మరజి నిజెఆనాలె”, ఇజి వరిజ్ వెప్తొజ్ వారు నండొ దుకం ఆతార్.

24 యేసుని వన్ని సిసూర్ కెవర్పువముదు వాతివెలె, సెగం సెకల్[†] లెక్క వన్ను పెర్నికార్ వేతురు, డగ్రు వాతార్, “మిజి బోడ కినికాన్ దేవుణు గుడిడిచి వన్నుసివిండ్రా?”, ఇజి వెన్బాతార్.

25 “ఒఒ వాండ్రు సీనాన్”, ఇజి వాండ్రు వెప్తొన్. వేతురు ఇండ్రొ వాటిజ్, వాండ్రు వర్గిఎండ ముజాల యేసు వర్గితాన్. “సీవోను, యా లోకమది రాజుర్ ఎయెర్బాణిజ్ సిస్తుని వన్నుజ్ ఒనూలు కిజినార్ వరి సొంత దేసమది వరిబాణిజ్నా, సిల్లిజి అయదేసమదు మన్ని ఆఇ దేసమదివరి బాణిజ్నా? నీను ఇనిక ఒడెబిజిని?” ఇజి వన్నిజ్ వెన్బాతాన్.

26 “వారు విద్దెం కిజి గెల్లిస్తి దేసమదివరిబాణిజ్జె”, ఇజి వేతురు వెప్తొన్. యేసు వన్నిజ్, “అపొజి సొంత దేసమదికార్ సివిండ్ర తప్పై ఆజినార్.

27 మాటు వరిజ్ అడ్డు మంజిని వరిజ్లెకెండ మండ్రెజ్ ఆవద్. నీను సేరుదు సొన్ని గాలం పొక్కి ముందాల దొమ్మోని మొయదిజ్ అసి దని వేయు రెక్కి సుడెతిజి, ఉండ్రొ సెకెల్ కాను దని వెయ్దు మంజినాద్. అయాక లాగ్గి నీ వందిజ్నీ నా వందిజ్ వన్ను సిఅ”, ఇజి వెప్తొన్.

18

దేవును కిని ఏలుబడిడు పెరికాన్

1 నస్తివలె సిసూర్ యేను డగ్రు వాజి, “దేవుణు కిని ఏలుబడిః కినివలె మాలోఇ ఎయెన్ అబ్బె పెరికాన్ మంజినాన్?”, ఇజి వన్నిజ్ వెన్బాతార్.

2 వాండ్రు ఒరెన్ ఇజిరి కొడొడిజ్ కూక్కి వరి నడిమి నిల్వ్తాన్.

3 మరి వాండ్రు ఈహు వెప్తొన్, “మీరు ఇజిరి కొడొర్ లెకెండ మన్ను మరిసి, వరి లెకెండ ఆఎండ మహిజ, మీరు ఎనెజ్బా దేవుణు కిని ఏలుబడిడు సొండ్రెజ్ అబ్బెఇదెర్, ఇజి నాను మిజి నిజం వెప్పొన.

4 అందెజి యా ఇజిరి కొడొః లెకెండ తగె ఆనికాన్ ఎయెండ్రొ, వాండ్రె దేవుణు కిని ఏలుబడిడు పెరికాన్ ఆనాన్.

5 మరి ఎయెర్బా నా మున్ను మన్ని నమ్మకమదు యా ఇజిరి కొడొర్ లెకెండ ఆతికాన్ ఇజి ఒడెబిసాండ్రొ ననివన్నిజ్ డగ్రు కినికాన్, నజి డగ్రు కిజినాన్.

6 గాని, నా మున్ను నమకం ఇట్టి మని యా కొడొః నన్ని ఒరెన్ వన్నిజ్, ఎయెర్బా పాపం కిబిస్తిజ, వాండ్రు వన్ని మెడదు ఉండ్రొ పెరి జత్తవణుకు తొవె ఆజి సమ్దరం అడ్డి ముడుఃగిజి సొనిక వన్నిజ్ ఒద్దె నెగెద్.

7 ఎందానిజ్ ఇహిజ, లోకురిజ్ పాపం కిబిస్తి నజతిజి వందిజ్ యా లోకమది వరిజ్ స్రమెజ్ తవ్ఉ. యాకెజ్ తవ్ఎండ వాదెజ్వెలె. గాని యాకెజ్ ఎయెన్వెట వానినొ వన్నిజ్ వెప్తొజ్ అబ్బెఇ నని కస్మకు మంజినె.

8 నీ కియూబా, నీ కాల్యుబా నిజి పాపం కిబిస్తిజ, దనిజ్కత్తి విసీర్అ. రుండి కికు కాల్యు మంజి ఎలాకాలం మంజిని సిసుబాడిడు అర్పి దనిజ్ ఇంక, కికు కాల్యు సిల్లెండ ఆజి ఎలాకాలం దేవుణు వెట మంజిని బత్తుదు సొనిక నెగెద్.

9 మరి నీ కణక నిజి పాపం కిబిస్తిజ దనిజ్లాగ్జి విసీర్అ. రుండి కణ్యు మంజి ఎలాకాలం మంజిని సిసుబాడిడు అర్పి దనిజ్ ఇంక, ఉండ్రె కణక మంజి ఎలాకాలం దేవుణు వెట మంజిని బత్తుదు సొనిక నెగెద్.

10 యా ఇజిరి వరి లోఇ ఎయెరిజ్బా మిరు ఇజిరి కణ్యుకు సుడెమాట్. ఎందానిజ్ ఇహిజి వరలోకామదు నా బుబ్బు డగ్రు మంజిని దూతార్ ఎస్తివలెబా వరిజ్ సుడెజి మంజినార్.

మరుతి గొర్రె కత్త.

† 17:24 17:24 యెరుసలెమ్మందు మన్ని దేవుణు గుడిడిజ్ అవసరమవూతికెజ్ కిజి నెగెండ సుడిడిజ్ ఒరెనొరెన్వన్నిబాణిజ్, సెగం సెకెల్ వన్నులెకెండ పెర్జె మచార్. యారురు ఆతి మొగవారు 20 వయ్యులాత్తిమహికార్ విజెరి గుడిః వన్ను సిదెజ్ ఇజి దేవుణుమారుదు రాస్త మనాద్. అక్క రుండి లోన్ను కూలిడిజ్ నమాసం మచాద్. నిర్గమ 30:13-16. 2దినను 24:9-14, నెహెమ్మ 10:32.

11 గొర్రెళ్ల లెకెండే మురుతి సాహి లోకురిజ్ రెబాజి రక్సిస్త్రెజ్ ఇజిసి లోకుమరిసి* ఆతి నాను ఇబ్బె వాత మన్ను†.

12 ఒరెన్ వన్నెజ్ వంద గొర్రెళ్ల మంజి వన్నాజ్ లొఇ ఉండ్రీ మురుతిజ, మహి తొబయ్ తొమ్మిది గొర్రెజ డిసి, మురుతి గొర్రెజ్ రెబాజి సాన్ఎండ్రా? మీరు ఇనిక ఒడేబిజినిదెర్?

13 దనిజ్ దొక్కొతిజ, వన్నీ మురుఎండ మని తొబయ్ తొమ్మిది గొర్రెజ మున్ను, యా మురుతి ఉండ్రీ గొర్రె వందిజ్ వాండ్రు గొప్పు సర్ల ఆనాన్, ఇజి నాను మిజి నిజం వెహ్సాన్.

14 అయలెకెండేన్ యా ఇజిరి వరిలొఇ ఒరెన్బా పాడాఃజి సొండ్రెజ్ దేవుణు మంజిని బాడిఃదు మని మీ బుబాతి దేవుణుదిజ్ ఇష్టం సిల్లెద్.

15 మరి నీ తందెరిజి లొఇ ఒరెన్ నిజీ తప్పు పణిజ్ కతిజ, మరి ఎయెర్బా నెన్ఎండ వాండ్రుని నీను మనివెలి వాండ్రు కితి తప్పు పణిజ్ తొరినెల. వాండ్రు నీ మాట వెహిజి నీను వన్నెజ్ మరజి నీ వెట కూడఃజి మంజిని వన్నెలెకెండే కిత్తి.

16 గాని వాండ్రు నీ మాట వినెండ మహిజ, ఒరెన్ వన్నెజ్నొ, రిపిరిజ్నొ నీ వెట తోడుః అసి వన్నె డర్గు సాన్ఎ. అహిజ దేవుణు మాటదు మని లెకెండే రిఎర్ మువర్ది సాసిరి మాటజెవెట విజు సజతిజ్ నిజమాతికెజ్ ఇజి రుజువ్ కిదెజ్ వలె‡.

17 వాండ్రు వరి మాటబా వినెండ మహిజ, అయ సజతి దేవుణు సజమదిజ్ తెలియ కిల. సజమది వరి మాటబా వాండ్రు వినెండ మహిజ వన్నెజ్ ఆఇ వన్నె ననికాన్, సిల్లిజి వన్ను వెర్రికాన్⁴ ఇజి నుడఃల.

18 యా బూమి మున్ను మీరు ఇనిక తొప్పాదెరో, అయాకెజ్ దేవుణు మంజిని బాడ్డిదుబా తొహ ఆనెలి. మరి యా బూమి మున్ను మీరు ఇనిక కుత్తిదెరో, అయాకెజ్ పరలోకామ్ము దేవుణుబా అడ్డు కినాలె. మరి యా బూమి మున్ను ఇనిదన్నెజ్ సెలవ సీనిదెరో పరలోకామ్దాన్ దేవుణుబా దన్నెజ్ సెలవ సీనాలె ఇజి నాను మిజి నిజం వెహ్సాన్.

19 మరి ఎయెర్బా రిఎర్కూడఃజి, ఉండ్రె మన్ను కల్లిజి ఇనికబా లొస్త్రెజ్బా, పరలోకామ్దు మన్నె నా బుబ్బాతి దేవుణు, మీరు కోరిజిని లెకెండే మీ వందిజ్ కినాన్లె.

20 అహిజ ఎంబె రిపిర్నొ, మువర్నొ నా పేరుదాన్ కూడఃజి వాజి మహిజ, అబ్బె వరివెట నాను మంజినలె.”

కనికారం తొరినెఇ పణిమనిసి

21 నస్త్రెవలె పేతురు యేసు డర్గు వాతండ్రె, “నా తబేరి ఒరెన్ నా వెట తప్పు కితిజ నాను ఎసోడు సుట్టు వన్నెజ్ సెమిస్త్రెజ్? ఎడుః సుట్టు సెమిస్త్రెజ్ అనాదా?”, ఇజి వెన్బాతాన్.

22 యేసు వన్నెజ్, “ఏడు సుట్టు అవెద్. డబయ్, సుట్టు ఏడు* ఇజి నాను నిజీ వెహ్సాన్”, ఇజి వెహ్సాన్.

23 ఎందానిజ్ ఇహిజ దేవుణు ఏలుబడిః కినిక ఇహిజ, వన్నె పణిమన్నిర్వెట వారు వన్నె బాణిజ్ లొస్త్రెమన్నె అపుదిజ్ లెక్క సూణి ఒరెన్రాజుజ్ పొలిత మనాద్.

24 లెక్క నుడఃదెజ్ మొదోల్స్త్రె వలె, పది వెయ్యజ్ తాలందుజ్† అప్పు లొస్త్రెజ్ మరజి సిదెజ్ మన్నె ఒరెన్ వన్నెజ్, వన్నె డర్గు తత్తార.

25 వన్నెజ్ అప్పు తీరిస్త్రెజ్ అల్ఇతిజ్, వన్నెజ్ని వన్నె అల్లిజ్, కొడొరిజ్, మరి వన్నెజ్ కల్లితి మనికెజ్ విజు పొర్లి అప్పు తీరినెల ఇజి యాజుమాని ఆడ్ర సిత్తాన్.

26 అయ పణిమణిని వన్నె ఎద్దు ముణుకుజ్ ఊరిజి మాడిఃస్తాండ్రె, “నజీ సెమిన్లె నజీ మరి కండెక్ సమయం సిదా నాను అప్పు విజు మరజి సీన్’ ఇజి బతిమాలతాన్.

* 18:11 18:11 లోకుమరిసి ఇని మాట అరామియ బాసదాన్, “నాను” సిల్లిజి “నజీ,నాది”, ఇజి అర్థమానిలెకెండే యూదురు వెహ్సా ముహాల్. యేసుప్రబుబా వన్నె వందిజ్ వెహ్సాజ్ యాలెకెండే వెహ్సా ముహాల్. యాలెకెండే వెహ్సామహివలె నాన్ క్రీస్తు ఇజి వాండ్రు తినాజ్ వెహ్సావండ వన్నె వందిజ్ వెహ్సా ముహాల్. దానియేలు ప్రవక్త పుస్తకముదు రాస్త్రె మన్నె దన్నెజ్ తగితిలెకెండే, వాండ్రు యా పేరు వన్నె వందిజ్ వెహ్సా ముహాల్. దానియేలు 7:13-14. యేసుజ్ పగతికార వాండ్రు మాముల్గ వన్నె వందిజ్ అహ వెహ్సానాన్ ఇజి ఒడఃబితార. గాని వన్నెజ్ సమ్మిత్తికార వాండ్రె క్రీస్తు ఇజి వెహ్సా ముహాల్ ఇజి అర్థం కిత్తార. † 18:11 18:11 గ్రీకు బాసాదు రాస్త్రెమన్నె ముకెలమాతి పుస్తకమకాజ్ యా మాట మన్నె గాని నెగం పుస్తకమకాజ్ సిల్లెద్ ‡ 18:16 18:16 ద్విత్తి కాండం 19:15 § 18:17 18:17 యూదురు ఆతికార ఇనిదన్నె వందిజ్బా వన్నె వెర్రివరివెట కూడిజి మన్విర్ * 18:22 18:22 నాల్లి వంద తొబయ్ సుట్టు ఇహిజ ఎన్సివెలిబా సెమిసి మండ్రెజ్ ఇజి అర్థం. † 18:24 18:24 ఉండ్రె వెయి తాలదు ఇహిజ వెయి అక్క రూపాయెదిజ్ లావ్ మన్నె

27 అయి ఎజుమాని పణిమనిసి మున్ను కనికారం ఆజి, నీ అప్పు విజు తెవితాద్ ఇజి వన్నిజ్ సొండ్రెజ్ నెలవ సిత్తాన్.

28 గాని అయి పణిమనిసి వెల్లి వాజి సొన్ని మహివలె, వన్నిజ్ వంద దినారముకు* అప్పు మని, వన్నివెట కూడజి పణికిజిని ఒరెన్ వన్నిజ్ సుడజితాన్. వన్నిజ్ అస్తాండ్రె గొతిక పణిసి, “నీను నజి అప్పు మన్ని డబ్బు మర్జి సిదా’, ఇజి బలవంతం కిత్తాన్.

29 వన్నివెట కూడజి పణికినికాన్ అతి అయి పణిమనిసి వన్ని ఎర్లు ముణుకుజ్ ఊర్జి, “నజి నెమిన్ అ, నిజి మరి కండెక్ నమయం సిదా? నిజి సిదెజ్ మన్ని అప్పు విజు నాను మర్జి సీన’, ఇజి బతిమాల్తాన్.

30 గాని వాండ్రు అక ఒవుకొడెవిండ, అప్పు విజు మర్జి సీనిదాక వన్నిజ్ జేలుదు ఇడిస్తాన్.

31 వరివెట కూడజి పణికినికారం సెగొండార్, యా జర్ గితిక విజు సుడజితారం నండో బాద ఆతార. వారు సొన్ని జర్గితిక విజు ఎజుమానిజ్ వెహ్తార.

32-33 నన్దివలె అయి ఎజుమాని వన్నిజ్ కూక్ పిస్తాండ్రె, “మూర్కం మని పణిమనిసి, నీను నజి బతిమాల్తెజ్ నాను కనికారం ఆజి నిజి నెమిసి, నీ అప్పు విజు తెవితాద్ ఇజి నిజి వెహ్తాలెకెండ్ నీ వెట కూడజి పణి కిని వన్నిజ్ నీనుబా సెమిసి వన్ని మున్ను కనికారం తోర్స్తెజ్ గడె?”, ఇజి వెన్ బాతాన్.

34 నన్దివలె అయి ఎజుమాని వన్ని మున్ను కోపం ఆతాండ్రె వాండ్రు అప్పు విజు మర్జి సీనిదాక వన్నిజ్ హిమ్స కినివరిజ్ ఒవజెప్తాండ్రె జెల్లుదు ఇడిస్తాన్.

35 మీరు మీ మన్నుదాన్ మీ తంబెరిజవెట నెమిన్ విండ మహిజ పరలోకామ్దు మన్ని నా బుబ్బాతి దేవుణుబా యా లెకెండ్ నె మీ లొఇ ఒరెన్ వెట కినాన్.

19

అల్సిజ్ డి:స్సి సీని వందిజ్

1 యా మాటెజెవెహ్తా విజితి వెనుక యేసు గలిలయ డి:సి, యోర్దాన్ గడ్డ అతాహ పడక మని యూదయ నాహ్కాజ్ సొహాన్.

2 మంద లోకుర్ వన్ని వెనుక సొహార్. వాండ్రు అబ్బె వరి జబ్బుది వరిజ్ నెగెండ్ కిత్తాన్.

3 సెగొండార్ వరినయరు, వన్ని మాటెజాణిజ్ వన్నిజ్ తప్పు అన్తెజ్ ఇజి వన్ని డగ్రు వాతారె, “ఇని తప్పుబా తొవిండ ఒరెన్ వన్ని అల్సిజ్ డి:సి సీనిక దేవుణు మోసిజ్ నీత్తి రూలుజ్ వజ నాయమ్నా?”, ఇజి వెన్ బాతార.

4 వాండ్రు వరిజ్, “ముజాహాన్ దేవుణు లోకురిజ్ తయార కితివలె వరిజ్ మొగ్గ కొడెని బోదెలి లెకెండ్ తయార కిత్తాన్*.

5 అందెజె మొగ్గ కొడెని వన్ని అయిసి అప్పొసిరిజ్ డి:సి వన్ని ఆల్పి వెట కూడజినాన్. వారు రివిర్ ఉండ్రె ఒడెజెల్ ఆనార్.*

6 అందెజె అబ్బెణిజ్ అసి వారు రివిర్ ఆవిండ ఉండ్రె ఒడెజెల్ ఆన మంజినార్. అందెజె దేవుణు జత కుడుప్పి వరిజ్ లోకుర్ కేట కిదెజ్ ఆవింద ఇజి దేవుణు మాటదు రాస్తి మన్నిక మీరు ఎనెజ్ బా నద్దిఇతిదెరా?”, ఇజి వరిజ్ వెన్ బాతాన్.

7 వారు వన్నిజ్, అక్క అయాలెకెండ్ మహిజ, ఒరెన్ వన్ని అల్సిజ్ డి:స్సెజ్ ఇహిజ, ఉండ్రె విడ్డిజ్ ఆకు రాసి సీజి దనిజ్ డి:స్సెజ్ ఆనాద్ ఇజి మోసె ఎందనిజ్ ఆడ్ర సిత్తాన్?”, ఇజి వెన్ బాతార.

8 యేసు వరిజ్, “మిజి నసొని కటినమతి మన్ను మహిజ్, మోసె అయి లెకెండ్ నెలవ సిత్తాన్ గాని ముజాహాన్ అసి అయి లెకెండ్ జర్గివితాద్.

9 రంకు బూలాతిజానె తప్పు మరి ఇనిదని వందిజ్ బా ఒరెన్ వన్ని ఆల్సిజ్ డి:సి మరి ఉండ్రె దనిజ్ ఇడె ఆతిజి వాండ్రు దనివెట రంకు బూలానికాన్ ఆజినాన్ ఇజి నాను మిజి వెహ్తాన్”, ఇజి వెహ్తాన్.

10 వన్ని సినూర్ వన్నిజ్, “అల్పి మాసిర్ నడిమి నజితిజ్ యాలెకెండ్ మనాద్ ఇహిజ, పెండ్లి ఆవిండ మంజినికాదె నెగెద్”, ఇజి వన్నిజ్ వెహ్తార.

* 18:28 18:28 వంద దినారముకు ఇహిజ అయి కాలమ్దు వది లొసొ పణికిని కూలిదిజ్ నమానం మహద్. * 19:4 19:4 ఆది 1:27. * 19:5 19:5 ఆది 2:24.

11 యేసు వరిజ్, “మీరు వెప్తా మాట విజేరె అస్త్రజ్ అట్వర, గాని దేవుణు ఎయెరిజ్ అయ లెకెండ్ సితాండ్రొ వారె కిడెజ్ అట్నార.

12 సెగొండార్ ఆండెరిజ్* లెకెండ్నె అయసి పొటాదాన్ పుట్నార. సెగొండారిజ్ లోకుర ఆండెరిజ్ లెకెండ్ కిజనార. మరి సెగొండార్ దేవుణు ఏలుబడిః వందిజ్ వెండ్లి ఎండజ్ వరిజ్ వారె ఆండెరిజ్ ఆజి మంజినార.

13 సస్త్రవలె యేసు కికు ఇడ్డి పార్లనం కదిజ్ ఇజి సెగొండార్ ఇజిరి కొడొరిజ్ వన్ని డగ్రు తత్తార. వన్ని సినూర్ కొడొరిజ్ తత్తి వరిజ్ జిటిజ్ ఆజి గొల కిత్తార.

14 గాని యేసు, “యా ఇజిరి కొడొరిజ్ నా డగ్రు రపీర్, వరిజ్ అడ్డు కిమాట్. దేవుణు ఏలుబడిః కినిక నినివరిదిసె”, ఇజి వరిజ్ వెప్తాన్.

15 వరి మున్ను కికు ఇడ్డి పార్లనం కితి వెనుక వాండ్రు అబ్బెణిజ్ సాహాన్.

ఆస్తి మని దజడాయెన్.

16 ఇదిలో, ఒరెన్యేసు డగ్రు వాతండ్రె, “ఓ బోదకినికి, దేవుణు వెట ఎలాకాలం మంజిని బత్తుదు నాను మండ్రెజ్ ఇహిజ నాను ఇని నెగ్గి పణిజ్ కిడెజ్”, ఇజి వన్నిజ్ వెన్బాతాన్.

17 యేసు వన్నిజ్, “నెగ్గి పణిజ్ వందిజ్ ఎండనిజ్ నీను నజి వెన్బాజిని? నెగ్గికాన్ దేవుణు ఒరెండ్రె మనాన్. దేవుణు ఎలాకాలం మంజిని బత్తుదు నీను మండ్రెజ్ ఇహిజ, దేవుణు సీతి ఆండ్రెజ్ లోజిజి మన్అ”, ఇజి వెప్తాన్.

18 వాండ్రు, “ఇని ఆండ్రెజ్?”, ఇజి వన్నిజ్ వెన్బాతిజ్ యేసు వన్నిజ్, “సప్తెజ్ ఆఎద్, రంకు బూలాదెజ్ ఆఎద్, డొజు కిమా, అబద్దమందిజ్ సాస్యం వెప్తా.

19 అయేసి అప్పొసిరిజ్ గవరమ్దాన్ నెగెణ్ సుడెఃఅ. ✱ మరి నీను నిజి ప్రేమిసినిలెకెండ్ మహివరిజ్ ప్రేమిన్అ” ✱, ఇజి వెప్తాన్.

20 అండ్రెజ్ అయ దజడాయెన్, “యాకెజ్ విజు నాను కిజినె మంజిన. మరి ఇనిక నజి తకు మనాద్?”, ఇజి వెప్తాన్.

21 యేసు వన్నిజ్, “నీను పూర్తి నెగ్గికి ఆదెజ్ కోరితిజ, నీను సొన్ని నిజి కల్లితి మనికెజ్ విజు పొర్ని, బీదాతివరిజ్ సీబాజి సీఅ. ఆహె కితిజ పరలోకామదు నిజి ఆస్తి కల్లిజి మంజినాద్. వెనుక నావెట రఅ”, ఇజి వెప్తాన్.

22 అయ దజడాయెన్ నండ్రె ఆస్తి కల్లిజి మనికాన్ కాక అయ మాట విహండ్రె ఇజిరి మొకొ అతాండ్రె సాహాన్.

23 సస్త్రవలె వన్ని సినూర్జ సుడెఃజి, యేసు”, ఆస్తి మన్నికాన్ దేవుణు కిని ఏలు బడిఃదు సొండ్రెజ్ గొప్ప కస్టం ఇజి నాను మిజి నిజం వెప్తాన్.

24 మరి నాను మిజి వెప్తాన్ ఇనిక ఇహిజ, ఆస్తి మనికాన్ దేవుణు ఏలుబడిఃదు సొని దనిజ్ ఇంక, ఒంటి దొపానం బోరొదాన్ డుగ్గనిక సులు ఆనాద్”, ఇజి వెప్తాన్.

25 సినూర్ యా మాట విహారె నండ్రె బమ్మ అతారె, “దేవుణు రక్సిన్తి లెకెండ్ ఎయెన్ మండ్రెజ్ అట్నార?”, ఇజి వెప్తాన్.

26 యేసు వరిజ్ సుడెఃజి, “యాక లోకాజ్ అట్ఇకాదె, గాని దేవుణు విజు కిడెజ్ అట్నాన్”, ఇజి వెప్తాన్.

27 పేతురు వన్నిజ్ సుడెఃజి, “ఇదిలో మాపు విజు డిఃస్తావె నీ వెట వాజినాప్, మజి ఇనిక దొహ్కాద్లెలు?”, ఇజి వెన్బాతాన్.

28 యేసు వరిజ్, “యా లోకం మరి కొత్తాక ఆనివెలె లోకు మరిసి ఆతి నాను గొప్ప జాయమని గొప్ప సింహాసనమదు బని ఇస్తాయేలుది వన్నెండు తెగ్గాతివరిజ్ తీర్పు తీరిన్సివెలె, నా వెనుక వాతి మీరుబా, నావెట వన్నెండు గొప్ప సింహాసనమకాజి బని వరిజ్ తీర్పు కినిదెరెలె.

29 మరి ఎయెర్బా నా వందిజ్ వరి ఇల్లుజొల్లు, అన్నతంబెరిజబ, బీబి తజినికజ్బా, అయేసి అప్పొసిరిజ్బా, బూమిపుట, కొడొకొకరిజ్బా డిఃస్తి సీతిజ నినివరిజ్ యాకెజ్ వంద వందుజ్ దొహ్కా. దన్నివెట ఎలాకాలం మంజినిబత్తుబా దొహ్కాద్.

* 19:12 19:12 అండెర ఇహిజ వాండ్రు కొడొః ఇడ్డిజ్ అట్ఇకాన్. ✱ 19:19 19:19 నిర్గమ 20:12-16; ద్వితి 5:16-20.

✱ 19:19 19:19 లేవి 19:18.

30 గాని మొదోహికార్ ఇజ ఒడేబిని నండోండార్ కడేవెరదికార్ ఆనార్. కడేవెరదికార్ ఇజ ఒడేబిని నండోండార్ మొదోహికార్ ఆనార్లె.

20

ద్రాసటోటాదు పణికినికార్

1 “దేవుణు ఏలుబడిః కినిక ఇహిజ, వన్ని ద్రాసటోటాదు పణికిదిజ్ పణికిని వరిజ్ కూక్తజ్ వెందాల నిజ్జె వెల్లి సొన్సి మహి ఉండ్రి టోట యెజమానిజ్ పోలిత మనాద్.

2 ఉండ్రి రోజు పణిదిజ్ ఉండ్రి దినారం* కూలి సీన ఇజ ఒప్పకొటాండ్రె, వన్ని ద్రాక్కు టోటాదు పణి కిదిజ్ వరిజ్ పోక్తాన్.

3 వెసుక అంబెలి వేలాదు వాండ్రు వెల్లి సొహివలె సత్తాదు ఇని పణి సిల్లెండ నిహిమని సెగొండారిజ్ సుడేతాన్.

4 వాండ్రు వరిజ్, “మీరుబా నా ద్రాక్కుటోటాదు పణిదిజ్ సొండ్రు, మిజి సరియాని కూలి సీన”, ఇజ వెప్తాన్.

5 వారు సొహార్. మరి వాండ్రు పన్నెండు గంటజ, మూండ్రి గంటజబా ఆహె కితాన్.

6 మరి అయ్దు గంటజ సొహిజ్ మరి సెగొండార్కాలి నిహిమనివరిజ్ సుడేతాన్. వాండ్రు వరిజ్, “యా దినం విజు ఎందనిజ్ మీరు ఇబ్బె సెడ్డిసె నిహిమహిదెర్?”, ఇజ వెన్బాతాన్.

7 వారు వన్నిజ్, “ఎయెర్బా ఇని పణిదిజ్ బా మజి కూక్ వితార్, అందెజ్”, ఇజ వెప్తాన్. వాండ్రు వరిజ్ “మీరుబా నా ద్రాస టోటాదు పణిదిజ్ సొండ్రు”, ఇజ వెప్తాన్.

8 పొదు ఆతివెలె అయ ద్రాస టోట ఎజుమాని పణి నూణి వన్నిజ్ కూక్తాండ్రె, “పణికినివరిజ్ కూక్కి, కడేవేరి వాతివరిబాణిజ్ మొదోల్పి ముందాల వాతికార్ దాక వరిజ్ కూలి సీఅ”, ఇజ వెప్తాన్.

9 పొద్దు డిగ్గివలె పణిదిజ్ వాతివరిజ్ ఒరెన్ ఒరెన్ వన్నిజ్ ఉండ్రి దినారం కూలి దోహ్కాద్.

10 ముందాల వాతికార్ మజి లావ్ దోహ్కాచ్చె, ఇజ ఒడేబిజితార్ గాని వరిజ్ బా ప్రతి ఒరెన్ వన్నిజ్ ఉండ్రి దినారమెనె కూలి దోహ్కాద్.

11 అయక దోహ్కాచ్చెలె వారు టోట ఎజుమానిజ్ ఎద్దు మొరొ ఆతార్.

12 వారు, “కడేవెరిదు వాతికార్ ఉండ్రి గంటనె పణి కితార్ గాని వెలార్ కన్బడేజి విజు పణి కితిమని మజి ఎందనిజ్ నీను వరిజ్ సమానం కితి?”, ఇజ వెన్బాతాన్.

13 వాండ్రు వరి లోఇ ఒరెన్ వన్నిజ్, “బయి, నాను మిజి ఇని అనెయం కివిత. ఉండ్రి దినారమదిజ్ పణి కిన ఇజ మీరు ఒప్పకొటిదెర్ గదె?”

14 మీ కూలి అసి మీరు సొండ్రు. మిజి సితి లెకెండ కడేవెరిదు వాతివన్నిజ్ బా సీదిజ్ నజి ఇన్సం ఆతాద్.

15 నా డబుదాన్ నజి ఇన్సమాతి లెకెండ కిదిజ్ నజి అక్కు సిలెదా? నాను వరిజ్ ఒదరిసి సితి వందిజ్ నీను గోస ఆజినిదెర్?”, ఇజ వెన్బాతాన్.

16 అయా లెకెండెన్ కడేవెరిదికార్ ఇజ ఒడేబిజినికార్ మొదోహికార్ ఆనార్, ముందాహికార్ ఇజ ఒడేబినికార్ కడేవెరిదికార్ ఆనార్.”

యేసు వన్ని సావు వందిజ్ మరి వెప్సానాన్.

17 యేసు యెరూసలేమీదు సొన్సి మహివలె, వాండ్రు వన్ని పన్నెండు మణిసిరి సినురిజ్ ఉండ్రి పడేకాదు కూక్త ఒతాండ్రె వరిజ్ ఈహు వెప్తాన్.

18 ఇదిలో మాటు యెరూసలేమీదు సొన్సిమాట్. అబ్బె లోకుమరిసి ఆతి నాను పెరి పుజెరిజ, యూదురి రూలుజ్ నెన్సిన్సి వరిజ్ ఒపజెపె ఆనాలె. వారు నజి సావుదిజ్ సిక్కి సీనార్లె.

19 మరి వారు నజి వెక్కి, కొరడిజాణిజ్ డెయేజి, సిలువ పోక్తజ్ యూదురు ఆఇ వరిజ్ ఒపజెప్పార్లె. మూండ్రి రోస్కాజ్ నాను మర్జ నిక్కాన్లె.”

20 సన్తివలె జెబెదెయి మరిసిరి ఆయ్సి వరి వెటె యేసు డగ్రు వాతాదె ముణుకుజ్ ఊరేజి మాడిసి, “సాయం కిఅ”, ఇజ వెప్తాద్.

* 20:2 20:2 అయ కాలమ్దు ఉండ్రి రోజు పణిదిజ్ కూలి ఉండ్రి దినారం మహాద్.

21 “నీను ఇనిక కోరిజిన?” , ఇజి వాండ్రు వెప్తూన్. అందెజె అది, “నీను రాజు వజి ఏలుబడిః కినివెలె, యా నా రిఎర్ మరిసిర్ ఒరెన్ నీ ఉణెర్ పడఃకాదుని ఒరెన్ నీ డేబ్రు వడఃకాదు బని మండ్రెజ్ ఇజి నాను కోరిజిన”, ఇజి వెప్తూన్.

22 యేసు, “నీను ఇనిక వెన్ బాజినాదొ ఇజి నిజి తెలివిద్”, ఇజి వెప్తూండ్రె వరిజ్, “నాను ఉండెజ్ మని గినాదిక ఉండెజ్ మీరు అట్ నిదెరా?”, ఇజి వెప్తూన్. వారు, “మాప్ ఉండెజ్ అట్నూప్”, ఇజి వెప్తూన్.

23 యేసు వరిజ్, “తవ్ ఏండ నాను ఉణి గినాదిక మీరు ఉణిదెర్, గాని నా ఉణెర్ పడఃకాదుని డేబ్రు పడఃకాదు బని కిటిస్సిక నా కీదు సిల్లెద్, నా బుబ్బు కియుదాన్ ఎయేరిజ్ తయార్ కిత మనాండ్రొ వరిజ్ అక్కెజ్ దొహ్ క్కు”, ఇజి వెప్తూన్.

24 మహి పది మన్నిర్ సిసూర్ వరి అయేసి యేసుజ్ లొస్తి అయ మాట విహారె రిఎర్ ముస్సు, కోపం ఆతూర్.

25 యేసు వరిజ్ విజేరిజ్ కూక్తాండ్రె వరిజ్, “యూదురు ఆజవరి రాజుర్ వరి లోకుర్ ముస్సు, అతికారమ్ దాన్ మంజినార్. వరి పెరి అదికారిజు వరిజ్ మని అతికారమ్ దాన్ లోకురిజ్ అణను తిగిజినార్ ఇజి మీరు నెస్సిదెర్ గదె?

26 గాని మీరు వారు లెకెండ్ మండ్రెజ్ ఆఎద్. గాని మీ లొజ ఎయేరిబా పెరికాన్ ఆదెజ్ ఇహిజ, వాండ్రు మిజి పణిమన్ని ఆదెజ్ వెలె.

27 మరి ఎయేరిబా విజేరి ముస్సు, పెరికాన్ ఆదెజ్ ఇజి కోరిజనికాన్, వాండ్రు మిజి విజేరిజ్ వెటి పణికి వనిలెకెండ్ ఆజి మండ్రెజ్.

28 ఎలాగ ఇహిజ లోకు మరిసి ఆతి నాను, విజేరి నజి పణి కిపిర్ ఇజి నాను రెవెతా, గాని పణి కిదెజె వాత మన్ను. మరి నండెండారిజ్ బత్ కిస్టెజ్, వరిజ్ విడుఃదల కిదెజ్ వరి వందిజ్ నా పాణం సీదెజె నాను వాత మన”, ఇజి వెప్తూన్.

గుడిఃదికార్ నుడఃజినార్

29 యేసుని వన్ని సిసూరయెరికో పట్టుమ్ దాన్ సొన్ని మహిజ్, నండొ లోకుర్ వన్ని వెనుక సాహార్.

30 ఇదిలో సరిపడఃకాదు బన్తిమని రిఎర్ గుడ్డిదికార్, యేసు అయా సరిదాన్ సొన్నినాన్ ఇజి వెహారె, “ప్రబువా, దావీదు మరిసి, మా ముస్సు కనికారం తోరినత”, ఇజి డేల్ సి వెప్తూన్.

31 లోకుర్ వరిజ్ “పలక మండ్రు” ఇజి గోల కిత్తూర్. గాని వారు, “ప్రబువా, దావీదు మరిసి మా ముస్సు కనికారం ఆత”, ఇజి మరి ఒదె డేల్సి వెప్తూన్.

32 యేసు నిహండ్రె వరిజ్ కూక్తాన్. “నాను మిజి ఇనిక కిదెజ్ ఇజి మీరు కోరిజనిదెర్?”, ఇజి వరిజ్ వెన్ బాతాన్.

33 “ప్రబువా మా కణ్బు నూణి లెకెండ్ కిత”, ఇజి వారు వెప్తూన్.

34 యేసు వరి ముస్సు, కనికారం ఆతాండ్రె వరి కణకాజ్ ముట్టాన్. వెటనె వారు నుడఃదెజ్ అట్టూర్ వన్ని వెట సాహార్.

21

ఓసన్న

1-2 వారు యెరూసలేము అందిని ముంజాల, ఒలివ మరెక్ మని గొరొన్ ముస్సు మని బెత్ పాగె ఇని నాటొ వాతూర్. వాతిజ్ యేసు వన్ని సిసూర్ రివిరిజ్ కూక్తాండ్రె ఈహు వెప్తూన్. “మీ ఎద్రు మని నాటొ సొండ్రు. అందితిజ సరి, తొహ్తి మన్ని ఉండ్రె గాడ్ డెజ్ ని దనివెట మని గాడ్ డె పిలాదిజ్ బా మీరు నూణిదెర్. వనకాజ్ కుత్సి నా డగ్రు పేరిజ తగాట్.

3 ఎయేరిబా మిజి ఇనిక బా వెన్ బాతిజ వన్నాజ్ ప్రబుజ్ కావాలి ఇజి వన్నిజ్ వెప్తూ. వెటనె వాండ్రు వనకాజ్ మీ వెట పొక్కూర్.”

4-5 “ఇదిలోన్ గాడేది మున్ను ఎక్కి, సార్లీదాన్ నీ రాజు వాజినాన్. గాడేది పిల్ల అతి ఇజిరి గాడేది మున్ను ఎక్తాండ్రె, నీ డగ్రు వాజినాన్ ఇజి సియోను గాల్పి* అతి దనిజ్ వెప్తు”, ఇజి దేవుణు ప్రవక్తవెటఁ దేవుణు ముజాల వర్గితి మాటజ్ పూర్తి ఆదెజ్ యాకెజ్ జర్గితె.

6 యేసు వరిజ్ వెప్తా వజని సిసూర్ సాహారె కిత్తార్.

7 వారు గాడేదిని దని పిలదిజ్ తత్తార్. వన్యాజ్ మున్ను వరి సాల్వెజ్ పప్తాజ్, యేసు దని మున్ను బస్తాన్.

8 నంణెండార్ వరి సాల్వెజ్ సరి అందు వప్తార్. మరి నంణెండార్ మరికాణి కొమెజ్ కత్తి సరి అందు వప్తార్.

9 మంద లోకుర్ వన్ని ముందాల సొన్ని మహికార్, వన్ని వెనుక వాజి మహికార్, “దావీదు మరిసిజ్ ఓసన్న†! ప్రబు సితి అతికారమ్దాన్ వాజినాన్ పొగ్గడె అనికాన్ పరలోకామ్దు దేవుణుదిజ్ ఓసన్న”, ఇజి వారు డేల్పి మహార్.

10 యేసు యెరూసలేం పట్టుమదు వాతిజ్, లోకుర్ విజెరె “వాండ్రు ఎయెన్?”, ఇజి బమ్మ అతారె ఒరెన్ మరి ఒరెన్ వెట వర్గిజి మహార్.

11 “వీండ్రు గలీలయదు మన్ని నజరేతు ఇని నాటోణి ప్రవక్త అతి యేసు”, ఇజి వన్ని వెట మహి అయ మంద లోకుర్ వెప్తార్.

యేసు దేవుణు గుడిడు సొన్నినాన్.

12 యేసు దేవుణు గుడి లొక సాహండ్రె, అబ్బె గుడి అరబుదు మహి కొణి వరిజ్ పొర్ని వరిజ్ విజెరిజ్ వెల్లి పొక్తాన్. డబ్బు మారిసిని వరి బల్లెజ్ని పాపుర పొటిజ పొర్నివరి పీటజ్ మహ్తా విసీర్తాన్.

13 వాండ్రు వరిజ్, “నా ఇలు పార్దనం కిని ఇలు ఇజి కూకె అనాదెలి, † ఇజి దేవుణు మాటదు రాస్త మనాద్ గాని మీరు దనిజ్ డొజారిజి సాలం* లెకెండ కితి మనిదెర్”, ఇజి వెప్తాన్.

14 గుడ్డిదికార్, సాటాదికార్ దేవుణు గుడిడు వన్ని డగ్రు వాతిజ్ వాండ్రు వరిజ్ నెగిండ కిత్తాన్.

15 గాని వాండ్రు కితి బమ్మాతి పణిజ నుడేజి, దేవుణు గుడి అరబుదు మని కొడోర్, “దావీదు మరిసిజ్ ఓసన్న”, ఇజి డేల్పినిక విహారె, పెరి పుజెరిబుని, యూదురి రూలుజ్ నెస్సిన్సికార్ నంణె కోపం అతార్.

16 వారు వన్నిజ్, “యా కొడోర్వెప్పినిక ఇనిక ఇజి నీను వెంజినిదా?”, ఇజి వెన్బాతార్. యేసు వరిజ్, “ఓ వెంజిన్, కొడోర్ని ఇజిరి కొడోర్ని వెయుదాన్ నీను పొగ్గడేజిని మాటజ్ తయార్ కితి మన్ని* ఇజి దేవుణు మాటదు రాస్తి మనిక మీరు ఎనెజ్బా నద్విఇతిదెరా?”, ఇజి వెప్తాన్.

17 వాండ్రు వరిజ్డిసిని పట్టుమదున్ వెల్లి సాహండ్రె బెతానియ ఇని నాటో సొన్ని అయ రయ్యు అబ్బె మహాన్.

బొడెమరాన్ వప్పినాద్

18 పెందల వాండ్రు మరజి పట్టుమదు సొన్ని మహిక వన్నిజ్ బజ కట్టాద్.

19 సరి పడకాదు మని ఉండ్రె బొడెమరాన్ నుడేజి, మరాన్ డగ్రు వాతండ్రె నుడేతిజ్ అకుజ్ తప్తు మరి ఇనికెజ్ తోర్ఉతె. వాండ్రు దనిజ్ నుడేజి, “మరి ఎనెజ్బా నీను కాయెజ్ అనిఇలె”, ఇజి వెప్తాన్. వెటనె బొడెమరాన్ వప్తా సాహాద్.

20 సిసూర్ అక్కు నుడేతారె బమ్మ అతార్, “నిసొని బేగి బొడెమరాన్ ఎలాగ వప్తా సాహాద్?”, ఇజి వారు వర్గితార్.

* 21:4-5 21:4-5 యెరుసలేం పట్టుమదిజ్ సియోను పట్టు ఇజిబా పేరు మహాద్ ఎందానిజ్ ఇహిజ అయ పట్టు సియోను గెరెన్ మున్ను తొప్తా మహాద్. అమదిజ్ సియోను గాల్పి ఇజి వెప్పివలి యెరుసలేం పట్టుమది వరిజ్ గుర్తు కిజి వెప్పిమహార్ వారు ఇహిజ ఇస్రాయేలు లోకుర్ గుర్తు. † 21:4-5 21:4-5 జేకరి 9:9. † 21:9 21:9 అరామియ బాసాదు ఓసన్న ఇని మాటదిజ్ మజి ఏలు రక్కిన్అ ఇజి అర్థం మనాద్. గాని లోకుర్ పొగ్గడిదెజ్ మరి ఎయెన్బా వెరికాన్ వానివలి వరిజ్ కూక్కి ఒనిలెకెండబా వెప్పిమహార్. * 21:13 21:13 యెరుస 56:7. * 21:13 21:13 యిర్మియా 7:11. * 21:16 21:16 కీర్తన 8:2.

21 యేసు వరిజ్, “నాను మిజి నిజం వెప్పిన, మిజి నమకం మంజి, మీ లొఇ అనుమానం సిల్లెండ మహిజ, యా బొడెమరాన్దిజ్ కితికది అఎండ, యా గొరొతిజ్ సుడెజి”, నీను ఇబ్బెణిజ్ పెరి ఆజి సమ్దారమ్దు సొన్ని అరఅ’ ఇజి వెప్తిజి అయవజనె జర్గినాదలె.

22 మిజి నమకం మహిజ మీరు పార్లనం కిజి ఇనిక లొస్సిదెరొ, అయాక మిజి డొహ్కూద్లె”, ఇజి వెప్తాన్.

23 యేసు దేవుణు గుడిఁదు సొహండ్రె గుడిఁ అరజుదు బొదకిజి మహివలె, పెరి పుజెరిజుని లొకుర్ పెద్దెల్జ వన్ని డగ్రు వాతారె, “ఇని అతికారమ్దాన్ నీను యా పణిజ్ కిజిని? ఎయెర్ నిజి యా అతికారం సిత మనార?”, ఇజి వన్నిజ్ వన్బాతారె.

24 యేసు వరిజ్, “నానుబా మిజి ఉండ్రె మాట వెన్బాన. అయాక మీరు నజి వెప్తిజి ఇని అతికారమ్దాన్ నాను యా పణిజ్ కిజిని ఇజి నానుబా మిజి వెప్పా.

25 బాప్తినం సీని యోహూనుజ్, బాప్తినం సీదెజ్ మని అతికారం ఎంబెణిజ్ వాతాద్ దేవుణుబాణిజ్నా, సిల్లిజి లొకుర్ బాణిజ్నా?”, ఇజి యేసు వరిజ్ వెన్బాతాన్. “దేవుణుబాణిజ్ వాతాద్’ ఇజి మాటు వెప్తిజి, మరి ఎందానిజ్ మీరు వన్నిజ్ నమ్మిఇతిదెర్? ఇజి మజి వెన్బానాన్.

26 గాని, యోహూను ఒరెన్ దేవుణు ప్రవక్త ఇజి లొకుర్ విజెర్ నమిజినారె. అందెజి లొకుర్ బాణిజ్ వాతాద్’ ఇజి వెప్తిజ్ మజి తియెల్నె, ఇజి వరి లొఇ వారె వర్గెతారె.

27 అందెజి వారు, “మజి తెలివ్ద”, ఇజి యేసుజ్ మరజి వెప్తారె. నస్తివలె వాండ్రు, “ఇని అతికారమ్దాన్ యా పణిజ్ కిజిని ఇజి నానుబా మిజి వెహ్ఎ”, ఇజి వరిజ్ వెప్తాన్.

రిఎర్ మరిసీర్ కత

28 “దిన్నివందిజ్ మీరు ఇనిక ఒడెబిజినిదెర్? ఒరెన్వన్నిజ్ రిఎర్ మరిసీర్ మహారె. వాండ్రు పెరివన్ని డగ్రు సొహండ్రె, “మరిన్, నేండ్రు నీను ద్రాక్కు టోబాదు సొన్ని పణి కిల”, ఇజి వెప్తాన్.

29 వాండ్రు, “నాను సొన్ఎ, ఇజి మరజి వెప్తాన్. గాని వెనుక మన్ను మారిస్తాండ్రె సొహాన్.

30 నస్తివలె అప్పొసి, కొగ్రిమరిసి డగ్రు సొహండ్రె అయా వజనె వెప్తాన్. వాండ్రు, ఒబా, నాను సొన”, ఇజి వెప్తాన్ గాని సొన్ఎతాన్.

31 “యా రిఎర్ మరిసీర్ లొఇ అప్పొసి వెప్తి వజి కితికాన్ ఎయెన్?”, ఇజి యేసు వరిజ్ వెన్బాతాన్. వారు, “పెరికాండ్రె”, ఇజి వెప్తారె. యేసు వరిజ్ “పన్ను పెర్నికారెని సానిదికెజ్ మిజి ఇంక ముజుల దేవుణు కిని ఏలుబడిఁదు సొనారలె ఇజి నాను మిజి నిజం వెప్పిన.

32 ఎందనిజ్ ఇహిజ యోహూను వాతాండ్రె, నీతి నిజాయ్దాన్ బత్తిదెజ్ ఇజి మిజి సరి తోరిస్తాన్ గాని మీరు వన్నిజ్ నమ్మిఇతిదెర్. పన్ను పెర్నికారెని సానిదికెజ్ వన్నిజ్ నమ్మితారె. అయాకెజ్ సుడెతిజ్బా మీరు మన్ను మరిసి మీరు కితి తవుజ్ ఒప్పకొడిఁజి డిసి సీజి వన్నిజ్ నమ్మిఇతిదెర్”, ఇజి వెప్తాన్.

పాలి సితి టోట కత

33 “మరి ఉండ్రె కత విండ్రు. బూమి మనికాన్ ఒరెన్ ఉండ్రె ద్రాసటోట ఉణుస్తాన్. దని నుటులం కోట తొప్తాన్. ద్రాక్కు పట్టురసం లాగ్దెజ్ ఉండ్రె గానుగు తయారె కిబిస్తాన్. కావ్కిదిజ్ ఉండ్రె ఎత్తుమని ఇలుబా తయారె కితాన్. వెనుక అయ ద్రాక్కు టోట సెగెండారె రయతురిజ్ పాలిదిజ్ సితాండ్రె వయనం కిజి మరి ఉండ్రె దేనం సొహాన్.

34 పట్టు, వండ్రె కాలమ్దు వన్ని వంతుజ్ లొస్తెజ్ ఇజి వన్ని పణి మన్నిరిజ్ పాలి అస్తి మని వరి డగ్రు పొక్తాన్.

35 పాలి అస్తిమనికారె వన్ని పణి మన్నిరిజ్ అస్తారె ఒరెన్ వన్నిజ్ డెయెతారె, ఒరెన్ వన్నిజ్ సప్తారె, మరి ఒరెన్ వన్నిజ్ పణికాణిజ్ డెయెతారె.

36 మరి, వాండ్రు ముజుల పొక్తివరిజ్ ఇంక నండెండారె పణిమన్నిరిజ్ పొక్తాన్. వరిజ్బా పాలి అస్తిమనికారె అయావజనె కితారె.

37 “నా మరినిజ్ పొక్తిజి వన్నిజ్ వారు గవరం సీనారలె”, ఇజి వెప్తాండ్రె కడెవెరిదు వన్ని మరిసిజ్ వరి డగ్రు పొక్తాన్.

38-39 గాని పాలి అన్తిమనికార్ మరిసిజ్ నుడఃతారె, “వీండ్తు యా తోటాదిజ్ అకు మనికాన్, రదు, మాటు వినిజ్నప్పి యా టోట మా సొంతదిక కినాట్”, ఇజి వన్నుజ్ అసి ద్రాక్కు తోటదిజ్ వెల్లి విసిర్తారె వన్నుజ్ నప్తార్.

40 అందెజె ఆయా ద్రాస టోట ఎజుమాని వానివలె అయ పాలి అన్తిమనివరిజ్ ఇనిక కినాన్? ఇజి వెన్బతాన్.

41 “అయా నెఇవరిజ్ నండో కటిసమతి సావుదాన్ సప్పాన్. మరి పట్టు పండ్ణి కాలమ్దు వన్నుజ్ సరియాతి వందుజ్ సీని రెప్పురిజ్ ద్రాస టోట పాలిదిజ్ సీనాన్”, ఇజి వారు వెప్తార్.

42 యేసు వరిజ్, “ ‘ఇలు తోప్పాకార్ నెక్కి పోక్కి పణుకునె, మూలాదిజ్ బుర్ర పణకు ఆత మనాద్. యాక దేవుణు కీదాన్ జగ్గితిక. యాక మా కణకెజ బమ్మాతిక’, ఇజి దేవుణు మాటుదు రాన్తి మనిక మీరు ఎనెజ్బా నద్విఇతిదెరా?”.

43 అందెజె దేవుణు ఏలుబడిః కినిక మీ నడిఃమిహాన్ లాగ్గి దనిజ్ తగితి పట్టు సీని వరిజ్ సీనాన్”, ఇజి నాను మిజి వెప్పాన.

44 ఎయెన్బా యా పణుకు ముస్సు అర్రిజి వాండ్తు ముకెజ్ ఆనాన్. యా పణుకు ఎయెన్ ముస్సు అర్నాదో వాండ్తు గుండ ఆనాన్”, ఇజి యేసు కత వెప్పి వీజితాన్.

45 యేసు వెప్తి కతెజ్ విహారె పెరి పుజెరిబుని పరిసయరు, వరి వందిజె వాండ్తు వెప్పి మనాన్ ఇజి అర్దం కితార్.

46 వారు వన్నుజ్ కయ్దు కిడెజ్ ఉండ్రె ఉపాయ్ నుడఃతారె గాని లోకుర్ విజెరె వన్నుజ్ ఒరెన్ ప్రవక్త ఇజి నమ్మితి వందిజ్ లోకురిజ్ తియెలాతార్.

22

పెండ్లివిందు

1 యేసు మరి కతవజి వరిజ్ వెప్తాన్

2 “దేవుణు కిని ఏలుబడిః ఇహిజి వన్ను మురిసి పెండ్లిదిజ్ విందు తయార్ కితిమని ఒరెన్ రాజుజ్ పోలిత మనాద్.

3 పెండ్లి విందుదిజ్ రదు ఇజి ముజాల వెప్తి మహివరిజ్ కూక్కి తగాట్ ఇజి వాండ్తు వన్ని పణిమన్నిరిజ్ వరి డగ్గు పోక్తాన్. గాని వాదెజ్ ఒవ్వెతార్.

4 నన్తివలె వాండ్తు మరి నెగొండార్ పణిమన్నిరిజ్బా పోక్తాండ్రె, “పెండ్లి విందుదిజ్ రదు”, ఇజి ముజాల వెప్తిమహివరిజ్, “నాను కోడ్డిజ్, బలన్తి పడెజ్ ఒవ్విసి విజు తయార్ కిత మన. పెండ్లి విందుదిజ్ మీరు రదు ఇజి వరిజ్ వెప్తా”, ఇజి వరిజ్ వెప్తాన్.

5 వారు పణిమన్నిర్ వెప్తి మాటదిజ్ కండెకబా లన్యం కివిండ, ఒరెన్ వన్ని మడిజు సాహాన్ మరి ఒరెన్ వన్ని బేరమదిజ్ సాహాన్.

6 మహికార్ వన్ని పణిమన్నిరిజ్ అస్తారె మర్యాద లాగ్గి నప్తార్.

7 అయ రాజు నండో కోపం ఆతాండ్రె వన్ని నయనమదిజ్ పోక్కి వన్ని పణిమన్నిరిజ్ సప్తివరిజ్ కతిస్తాండ్రె, వరి పట్టుమదిజ్ సినదాన్ ముటిస్తాన్.

8 వెనుక వాండ్తు పెండ్లి విందు తయార్ అత మనాద్, వన్ని పణి మన్నిరిజ్, “గాని ముజాల పెండ్లి విందుదిజ్ కూకెఆతి మహికార్ విందుదిజ్ వాదిజ్ తగ్గికార్ ఆవిర్.

9 మీరు రస్త సహాకాజ్ సొన్ని మిజి తోరినివరిజ్ విజేరిజ్” విందుదిజ్ రదు’ ఇజి కూక్తు”, ఇజి వెప్తాన్.

10 అయ పణిమన్నిర్ రస్త సహాకాజ్ సాహారె వరిజ్ తోరితి నెగ్గివరిజ్, నెఇవరిజ్ కుడుప్పి, వరిజ్ తత్తెజ్ అట్టివరిజ్ విజేరిజ్ తత్తార్. పెండ్లి విందు సమద్ నిండ్రెతాద్.

11 నన్తివలె పెండ్లి విందుదిజ్ వాతివరిజ్ నుడఃదిజ్ రాజు వాతాన్. పెండ్లిసొక్కు తోడుగివిండ పెండ్లి విందుదిజ్ అబ్బె బన్తిమని ఒరెన్ వన్నుజ్ నుడఃతాన్.

12 రాజు వన్నుజ్, “ఓ, కూలాయెన్, పెండ్లిసొక్కు తోడుగివిండ నీను ఎలాగ లోఇ వాతి?”, ఇజి వెన్బతాన్. వాండ్తు వర్గివిండ అలేత మహాన్.

13 నస్తవల రాజు, “వినిజ్ కిక్కురాలు, తోహ్ని వెల్లి దూరమ మన్ని సీకటి బాడిడు విసీరదు. అబ్బి వాండ్రు ఎలాకాలం అడఃబాజి, పల్కు కొహ్క్కిక్కు మంజినాన్”, ఇజి వన్ని పణి మన్నిరిజ్ వెహ్హన్.

14 “కూకై ఆతికార్ నంణిండాన్ గాని, ఎరై ఆతికార్ కొకొండాం.”

కయినరిజ్ పను సీని వందిజ్

15 నస్తవల పరిసయరు వెల్లి సొన్ని వాండ్రువర్గిని మాటదాన్ యేసుజ్ తప్పు అస్తైజ్ ఇజి కుట్ర ఆజి మహార్.

16 వారు వరి సిసూరిజ్, హేరొదియరు* జటుదివరివెట యేసు డగ్రు పోక్తార్. వారు సొన్ని, “బోద కినికి, నీను, మన్ను కల్లివిండ దేవుణు సరివందిజ్ నిజమదాన్ బోదిసిని నెగ్గికి ఇజి మాపు నెస్సాప్. నీను లోకురి ఎలాగ మర్రికార్ ఇజి మొకొం నుడఃజి వరిజ్ సర్ల కిబిస్తైజ్ ఇజి వర్గినికి ఆఇ.

17 అహ్పాజి కయినరుజ్ పను సీనిక నాయమా? నీను ఇనిక ఒడఃబిజిని? మజి వెహ్హా”, ఇజి వన్నిజ్ వెహ్హార్.

18 యేసు వరి సెఇ బుద్దిదిజ్ నెస్తాండై, “వేసం కినికిదేరా! ఎండనిజ్ నాను వహ్ని మాటదాన్ నజి అస్తైజ్ నుడఃజినిదెర్?

19 పన్ను సీని ఉండ్రై కాసు నజి తోరిస్తు”, వారు ఉండ్రై దినారం వన్ని డగ్రు తతార్.

20 “దిని మున్ను మని బొమ్మ ఎయెర్ది? రాస్తమని రాంత ఎయెర్ది?”, ఇజి వాండ్రు వరిజ్, వెన్బాతాన్.

21 వారు, “కయినరుది”, ఇజి వెహ్హార్. నస్తవలె వాండ్రు, “కయినరుది కయినరుజ్ సీదు, దేవుణుది దేవుణుదిజ్సీదు”, ఇజి వరిజ్ వెహ్హన్.

22 యా మాట వెంజి బమ్మ ఆతారె వారు వన్నిజ్ డిఃస్త సాహార్.

23 సాతికార్ మరజి నిజ్నిక సిల్లెద్ ఇజి నదుకయరు వెహ్హినార్. వారు అయా రోజుదునె వన్నిడగ్రు వాజి ఈహు వెన్బాతార్.

24 “బోదకినికి, ఒరెన్ కొడోర్ సిల్లెండ సాతిజి వన్ని తంబెరి సాతివన్ని ఆల్పిజ్ పెండ్లి ఆజి సాతివన్ని వందిజ్ కొడోర్ పుటిస్తైజ్ వలె ఇజి మోసె రాస్తి సీతి రూలుదు మనాద్.

25 మా నడిమి ఏడు గురు తంబేర్బు మహార్. పెరికాన్పెండ్లి ఆతాండ్రై సాతాన్. వన్నిజ్ కొడోర్ సిల్లెర్ కక వన్ని తంబెరి సాతివన్ని ఆల్పిజ్ ఇడః ఆతాన్.

26 నడిమి వాండ్రుని కొగ్గి నడిమి, అయా లెకెండ్నె వీన్కొడోదాక విజేరె దనిజ్పెండ్లి ఆజి సాతార్.

27 కడఃవేరిదు అయా బోదలబా సాతాద్.

28 అహ్పాజి సాతి వరిబాణిజ్ మరజి నిజ్ని వెలె యా ఏడుగురు లోఇ ఎయెరిజ్ అది ఆల్పి ఆనాద్లె? ఇనిక ఇహ్పాజి బత్తిజిమహివలె అది ఏడుగురుదిజ్బా ఆల్పి ఆత మహాద్ గదె?”, ఇజి వెన్బాతార్.

29 యేసు వరిజ్, “దేవుణు మాట ఇజి, మీరు నెన్ఇదెర్ దేవుణు సత్తు ఎస్సా ఇజి మీరు నెన్ఇదెర్ అందెజి అర్లం కివిండ మీరు నంణె తప్పుమాటాజ్ వెహ్హినిదెర్.

30 ఎండనిజ్ ఇహ్పాజి, సాతి విరబాణిజ్ మరజి నిజ్ని వెలె ఎయెర్బా పెండ్లి ఆవిర్, పెండ్లిదిజ్ సివిర్. వారు పరలోకామది దేవుణుదుతాజ్ లెకెండ్ మంజినార్.

31-32 సాతికార్ మరజి నిజ్ని పందిజ్ దేవుణు మిజి వెహ్హి మనిక మీరు ఎన్జిబా నద్దిఇతిదెరా? నాను అబ్రాహమాను దేవుణు, ఇస్సాకు దేవుణు, యాకోబురి దేవుణు ఇజి వాండ్రు సాతి వరి దేవుణు ఆవిన్, బత్తిజిని వరి దేవుణునె”*, ఇజి వెహ్హన్.

33 అయ మాట విహారె వన్ని బోద వందిజ్ లోకుర్ బమ్మ ఆతార్.

పెరి ఆడ్ర

34 యేసు నదుకయరు వెయ్కు మూక్తాన్ ఇజి విహారె పరిసయరు కూడఃజి వాతార్.

35-36 వరి లోఇ ఒరెన్ దేవుణు రూలుజ్ నెగెండ్ నెస్తికాన్, “ఒ బోదకినికి దేవుణు సీతి ఆడ్రెజి లోఇ పెరి ఆడ్ర ఇనిక?”, ఇజి వన్నిజ్ పరిక్కు కిదెజ్ వెన్బాతాన్.

* 22:16 22:16 హేరొదియరు జటుదికార్ లోమదికార్ యూదురు మున్ను కిని ఏలుబడిదిజ్ ఇన్లం కిత్తి యూదురు ఆతికార్. పరిసయరిజ్నె హేరొదియరిజ్ ఇని పొత్తు సిల్లెద్. గాని లోకుర్ యెనువ్రబుజ్ ఇన్లంమానిదన్నుజ్ తియలొజి మహార్. * 22:31-32 22:31-32 నిగ్రమ 3:6.

37 యేసు వచ్చి, “నీ పూర్తి మన్నుదాన్, నీ పూర్తి ఆత్మదాన్, నీ పూర్తి పాణమ్దాన్ నీ ప్రభు ఆతి దేవుణుడికి ప్రేమిస్తావు.*

38 యాకాదె గొప్ప ముక్కెలమతికని, మరి మొదోహి ఆడ్ర.

39 రుండి ఆడ్ర ఇనిక ఇహిజ, “నీను నిజి ప్రేమిస్సి లెకెండ్ మహి వరిజ్బా ప్రేమిన్అ.*

40 దేవుణు సీతి రూలుజ్ని ప్రవక్తరు వర్గితి మాటజ పునాది ఆతిక యా రుండి ఆడ్రజ్”, ఇజి వరిజ్ వెహ్జాన్.

41-42 పరిసయెరు కూడిజితి మనివెలి యేసు వరిజ్ సుడజి, క్రీస్తు వందిజ్ మీరు ఇనిక ఒడజిబిజినిదెర్? వాండ్రు ఎయెర్ది కుటుమదికాన్ ఆనాన్? ఇజి వెన్బాతాన్. “వాండ్రు దావీదు రాజు తెగ్గదికాండ్రె”, ఇజి వారు వెహ్జార్.

43-44 అయాలెకెండ్ మహిజ మీరు నిజం వెహ్సినిదెర్. “నాను నీ పగాతి వరిజ్ నీ పాదమక అడిజిగి ఇడ్పిదాక నీను నా ఉణెర్ పడజకాదు బసి మన్అ. ఇజి ప్రభు నా ప్రభు వెట వెహ్జాన్.* యా లెకెండ్ దేవుణు ఆత్మదాన్ దావీదు వర్గితివలె వచ్చిజ్ ఎలాగ ప్రభు ఇజి కూక్కినాన్?

45 దావీదు వచ్చిజ్ ప్రభు ఇజి కూక్కిజ్, వాండ్రు ఎలాగ వచ్చి మరిసి ఆనాన్?”, ఇజి వాండ్రు వరిజ్ వెన్బాతాన్.

46 ఎయెర్బా మరజి ఉండ్రీ మాటబా వెహ్జాజ్ అట్వితార్. అయి రోజుదాన్ వచ్చిజ్ ఇనికబా వెన్బాదెజ్ ఎయెర్జిబా దయెరం సాలివితాదె.

23

విడు కన్జమ్కు

1 నన్జివలె యేసు లోకురిజ్ని వచ్చి సిసూరజి ఈహు వెహ్జాన్.

2 యూదురి రూలుజ్ నెస్సిస్సికార్ని వరిసయెరుజ్, ముందాల మోసెజ్ మహి లెకెండ్ అతికారమ్దాన్ దేవుణు సీతి రూలుజ్ నెస్సిస్సిజ్ అక్కు మనికార్.

3 అందెజి వారు మిజి వెహ్సి విజు వనకాజ్ లోజిజి అయాలెకెండ్ కిదెజ్వెలె. గాని వరి పణిజి సుడజి, వరి లెకెండ్ కిమాట్. ఎందనిజ్ ఇహిజ వారు వెహ్జార్ గాని అయ లెకెండ్ కివీర్.

4 లోకుర్ గుజుమదు పిండెజ్ అట్ఇ నని బరుజ్ తోహ్సి ఇడ్పి లెకెండ్ మని పెరి పణిజి కిదెజ్ ఇజి బలవంతం కిసార్ గాని ఉండ్రీ డెస్సుదాన్ కద్దిస్తెజ్ అట్టి సుల్కాని బరు లెకెండ్మచ్చి ఇజిరి సాయమ్బా వారు కివీర్.

5 లోకుర్నూణి వందిజె వారు విజు పణిజ్ కిజినార్. దేవుణు మాటజ్ రాస్తి ఇట్టి ఇజిరి పెట్టెదిజ్* పెరిక కిజినార్. మరి వరి సొకెజిజి† అన్నుజ్ పెరికెజ్ కిజినార్.

6 విందుదు వారు ముకెలమాతి బాడిజ్ కోరిజినార్. యూదురు మీటిజ్ కిని ఇల్కాజ్ బస్తెజ్ ఇజి వారు ముకెలమాతి బాడిజ్ కోరిజినార్.

7 నతెజి నడెమి వారు లోకుర్ వెట మాడిసె అదెజ్, బోదకినికార్ ఇజి కూకె అదెజ్ కోరిజినార్.

8 గాని మీరు ఇహిజ, ‘బోదకినికె’ ఇజి కూకె ఆమాట్. ఎందనిజ్ ఇహిజ దేవుణు ఒరేండ్రె మి బోదకినికాన్ మీరు విజిదెరి అన్నతంబేరిజు.

9 బూమి మున్ను ఎయెర్జిబా బుబ్బు ఇజి పేరు ఇడజమాట్. దేవుణు ఒరేండ్రె మీ బుబ్బు. వాండ్రు పరలోకామ్దు మనాన్.

10 మీరు ఎయెదెర్బా నెస్సిస్సికి ఇజి కూకె ఆమాట్. ఎందనిజ్ ఇహిజ క్రీస్తు ఒరేండ్రె మిజినెస్సిస్సికాన్.

* 22:37 22:37 ద్వితి 6:5. * 22:39 22:39 త్వి 19:18. * 22:43-44 22:43-44 క్షిప్ 110:1. * 23:5 23:5 యా ఇజిరి పెట్టెజ్ తలెదాన్ తయార్ కితిప్పిజ్ దన్ను లోఇ పడాయే ఒప్పమానమ్దు మన్ను సగం మాటజ్ రాసి ఇడ్డి మంజినార్. నిప్రమ 13:1-10, 13:11-16. ద్వితి 6:4-9, 11:13-21. దేవుణు మాటదు రాస్తి మన్నికెజ్ ద్వితి 6:8, 11:18. యా లెకెండ్ లోజిజి మంజినాన్ ఇజి తోరిస్తెజ్ 12 వయస్సు దాట్టి మొగ్గెడోవేర్ యావెటి ఉండ్రీ వరి నెప్రుదుని మరి ఉండ్రీ వెటి డేబ్బ కియందుబా తోహా ఆజి మహార్. ముకెలం పార్శునం కినివలె అహా కిజి మహార్. † 23:5 23:5 యూదురు అతికార్ దేవుణు పణికినికార్ ఇజి తోరిఅదెజ్, మరి దేవుణు సీతి ఆడ్రెజ్ ఎత్త కినిస్తిలెకెండ్ ఉండ్రీ నీలి రంగు లోల్య నస్సిక పొర్వాజి మహర్. యాక పొర్వాదెజ్ ఇజి వరిజ్ ఆడ్ర సిత్ర మహన్ సంకృ 15:37-41, ద్వితి 22:12. గాని యూదురిజ్ రూలుజ్ నెస్సిస్సికార్ని పరిసయెరుజ్ వారు గొప్ప నెగెండ్ దేవుణుదిజ్ లోజిజినకార్ ఇజి తోరిస్తెజ్ అక్కు గొప్ప పెరిక పొర్వాజి మహర్.

11 మీ లోక విజేరిజ్ ఇంక పెరికాన్, విజేరిజ్ పణిమన్ను అదెజ్వెలె.

12 ఎయెర్బా వన్నెజ్ వాండ్రె పెరికాన్ కితిజ వాండ్రు ఇజిరికాన్ ఆనాన్. ఎయెర్బా వన్నెజ్ వాండ్రె తగి ఆతి మహిజ వాండ్రు పెరికాన్ ఆనాన్.

13 వేసం కినికిదెరాతి పరిసయరుజ్నేని ఊదురు రూలుజ్ నెస్సిసినికిదెరా! అబయా, మిజి ఎసోనో కస్టమ్కు వానె. ఎందనిజ్ఇహిజ లోకుర్ దేవుణు విలుబడిడు సోనెండ వరి ఎద్దు సేప్లాజ్ కెహ్ని పొక్కినిదెర్. మీరె సోనెఇతిదెర్. సొండ్రెజ్ సుడేజి మహి వరిజ్ సరి సిఇతిదెర్.

14 వేసం కినికిదెరాతి పరిసయరుజ్నేని యూదురు రూలుజ్ నెస్సిసినికిదెరా, అబయా, మిజి ఎసోనో కస్టమ్కు వానె. మీరు సిగు సిల్లెండ రాండి బోదెకాజ్ మొసెం కిజి మిజి లాబం తప్పిసినిదెర్ మీరు ఎలాగమర్తికార్ ఇజి నస్రెజ్ అవద్ ఇజి మీరు లోకుర్ ఎద్దు లావ్ నిరిండ్ మన్ను పార్లసం కిజినిదెర్. దన్నివందిజ్ మిజి పెరి సిక్కు వానాద్దె.

15 వేసం కినికిదెరాతి పరిసయరుజ్నేని యూదురి రూలుజ్ నెస్సిసినికిదెరా, అబయా! మిజి ఎసోనో కస్టమ్కు వానె. ఒరెన్ వన్నెజ్ మీవెట కుడుఃప్తజ్ మీరు నమ్దరం డాల్సీ బూమి విజి బూలాజినిదెర్. ఒరెన్ మీ వెట కూడిఃతిజి, వన్నెజ్ ఎల్లకాలం సిను మంజిని బాడిడు సొండ్రెజ్, మిజి ఇంక రుండి వంతుజ్ తగ్గి ననికాన్ తయార్ కిజినిదెర్.

16 యూదురు రూలుజ్ నెస్సిసినిదెర్ ఆతి మీరు లోకురిజ్ నెగ్గిసరి తోరిస్తెజ్ మన్నుకిదెర్, గాని మీరు మహివరిజ్ సరి తోరిసిని గుడ్డిదికార్ లెకెండ మన్నుదెర్ అబయా! మిజి ఎసోనో కస్టమ్కు వానె. ఒరెన్ దేవుణు గుడిః తోడుః ఇజి పరవణం కితిజి, అయ పరవణమ్దాన్ వాండ్రు తప్తె అదెజ్ ఆనాద్. గాని దేవుణు గుడిః లోఇ మని బజారం తోడుః ఇజి ప్రమాణం కితిజి వాండ్రు అయ ఒప్పుమానమ్దాన్ తప్తె అదెజ్ అట్విన్ ఇజి మీరు నెస్సిసినిదెర్.

17 గుడ్డియాతి బుద్ధి సీలికిదెరా! ఎమేణిక పెరిక? దేవుణు గుడిఃదు మని బజారమ్నా, సీలిజి బజారమ్దిజ్ దేవుణు వందిజ్ కేట కిత్తక ఇజి కిజిని దేవుణుగుడిఃనా?

18 మరి ఎయెర్బా నంద సుర్ని మాలి పీట తోడుః ఇజి ప్రమాణం కితిజి, వాండ్రు అయ ప్రమాణమ్దాన్ తప్తె అదెజ్ అట్వాన్. గాని దని మున్ను మని పూజి సీతి వనకాజ్ తోడు అసి ప్రమాణం కితిజి వాండ్రు అయ ప్రమాణమ్దాన్ తప్తె అదెజ్ అట్విన్ ఇజి మీరు నెస్సిసినిదెర్.

19 యూదురు రూలుజ్ నెస్సిసిని గుడ్డిదికార్ లెకెండ మన్నుకిదెరా! ఎమేణిక పెరిక? పూజి సీతికాదా? సీల్లిజి పూజి సీతిదన్నెజ్ దేవుణు వందిజ్ కేట కిత్తిలెకెండ కిజిని సంత సుర్ని మాలి పీటనా?

20 అందెజె సంత సుర్ని మాలి పీట తోడుః అసి ప్రమాణం కినికాన్ నంద సుర్ని మాలి పీటిదిజ్ మరి దని మున్ను మన్ను విజి వనకాజ్ తోడు అసి ప్రమాణం కిజినాన్.

21 మరి దేవుణు గుడిః తోడు అసి ప్రమాణం కినికాన్, దేవుణు గుడిఃదిజ్నే దని లోక మంజిని విజి వనకాజ్నే బాన్మంజిని దేవుణుదిజ్ తోడు అసి ప్రమాణం కిజినాన్.

22 పరలోకం తోడు ఇజి ప్రమాణం కినికాన్, దేవుణు బన్ను సింహాననమ్దిజ్నే దని మున్ను బని మంజిని దేవుణుదిజ్బా తోడు అసి ప్రమాణం కిజినాన్.

23 వేసం కినికిదెరాతి పరిసయరుజ్నేని యూదురి రూలుజ్ నెస్సిస్సికిదెరా, అబయా మిజి ఎసోనో కస్టమ్కు వానె. మీరు పొదిస కుసాదాన్, సోపుదాన్, జిలకారదాన్[†] దేవుణుదిజ్ దసమ్బాగం[‡] సీజినిదెర్. గాని నాయం, కనికారం, దేవుణు మున్ను మని నమకం నన్ను దేవుణు సీత్తి రూలుదుమన్ను ముకెలమతి మాటేజ్ మీరు నెక్కి పొక్కినిదెర్. రుండిబా ఉండ్రె లెకెండ కిజి మంజినిక ఇహిజ ఒదె నెగెండ మహద్ మరి.

24 సరి తోరిస్సి గుడ్డికిదెరా! ఉణిదని లోఇ డోమెజ్ అర్తి మహిజ మీరు జాలిస్సిదెర్. గాని ఒంటె ననికెజ్ అర్తిజి అక్క నెస్రెజ్ సీల్లెద్ ఇజి అయాలెకండ్నే డిఃజ్నేకిదెర్ మీరి.

25 వేసం కిజినిదెర్ ఆతి, యూదురి రూలుజ్ నెస్సిస్సికిదెరా, పరిసయరుజాండె, లోకుర్ మున్నుహాన్ మిడిఃస్తి ఇడ్లిగిన్నెజ్నేని కుడుకెజ్ లెకెండ మన్నుకిదెర్. మీరు మీరుబా వెల్లిహాన్ సుడిఃతిజి నెగ్గవరికెండ

† 23:23 23:23 పొదిస, సాపు, జిలకార ఇప్పిజ్ విజి కరిదికెజ్ ఆఉ ఇక్క తిండిదిజ్ రుసి కూడుః ఇజి వంట కినివలె కలప్పెజ్.
 ‡ 23:23 23:23 అబ్రహామునె తోలిత దసమ్బాగం సీత్తిలెకెండ పదాయ్ ఒప్పుమానమ్దం రాత్రి మనాద్. ఆది 14:20. వెనుక ఇస్రాయేలు లోకుర్ వరిజ్ దోహక్కి వనక లోఇ దసమ్బాగం సిదెజ్ ఇజి దేవుణు ఆర్తె సీత్తాన్. దసమ్బాగం ఇహిజ పది లోఇ ఉండ్తె.

తోర ఆజనిదెర్. గాని మీ మన్ను నిండ్రు సెజ బుద్దిజ్‌ని సెజఉదెసమ్‌కు, మరి నాను గణాస్తికెజ్ విజు నజీనె ఇజి ఒడొబిని వరిలెకెండెనె.

26 గుడ్డి అతి పరిసయ వాండ్రు ముజాల మీరు మన్ను నెగ్గెండె కిదు, అయావెలె మీరు లోఇని వెల్లి మిడిస్సి ముని కుడుకెజ్‌ని గినెజ్‌లెకెండె ఆనిదెర్.

27 వేసం కినికిదెరాతి, యూదురి రూలుజ్ నెస్సిస్సికిదెరా, పరిసయురుజాండె, వెల్లిదాన్ సుడొతిజు మీరు గొప్ప సోకుమని సున్నం డెయ్‌తి మని దూకి ననికిదెర్! దూకి లోఇ సాతి పరి డుమ్ము మరి విజు సెకెకెజ్ మన్నులెకెండె మీరుబా మన్నుదెర్.

28 అయా లెకెండెనె మీరు వెల్లి సుడొతిజు నాయం మనికిదెర్ ఇజి తోరె ఆజి నిదెర్. గాని లోఇ మీరు బక్తి మనికావ్ ఇజి పొజీజి నికిదెర్, సెజ బుద్దిదాన్ నిండ్రితి మన్నుకిదెర్.

29 వేసం కినికిదెరాతి యూదురి రూలుజ్ నెస్సిస్సికిదెరా, పరిసయురుజాండె, మిజి ఎసోనో కస్తమ్‌కు వానె. మీరు దేవుణు ప్రవక్తరు దూకిజు మున్ను, సమాది తోస్సి, నీతినిజాయి మున్ను పరి సమాది మున్ను, సోకు కిజినిదెర్.

30 అనిగొగొర్ కాలమ్‌దు మాపు మంజనిక ఇహిజు, వారు దేవుణు ప్రవక్తరిజ్ సప్తి మహివలె పరివెట మూపు కూడొవెతావ్ మరి ఇజి మీరు వెస్సి మంజనిదెర్.

31 అందెజి దేవుణు ప్రవక్తరిజ్ సప్తి మహి పరి మరిసీర్ ఇజి మీ మాటదానె మిజి మీరి సాసెం వెహె ఆజనిదెర్.

32 అందెజి మీ అనిగొగొర్ కితి పాపమ్‌దు తకు మనిక మీరు పూర్తి కిదు.

33 సరాన్ ననికిదెరా! సరాస్సు, కొడొర్‌నని మీరు ఎలాగ ఎలాకాలం సిసు మంజని బాడ్డిదాన్ తప్తె ఆనిదెర్.

34 అందెజి నాను, ప్రవక్తరుజ్‌ని బుద్దిమని వరిజ్, బోద కిని వరిజ్ మీ నడిమి పోక్కిన. నెగొండారిజ్ మీరు సప్పిదెర్, మరి నెగొండారిజ్ మీరు సిలువ పోక్కిదెర్, మరి నెగొండారిజ్ యూదురు మీటిజి కిని ఇల్కాణిజ్ కొరెడెజిజిజి డెయ్‌జి ఉండ్రి పట్టుమ్‌దాన్ మరి ఉండ్రి పట్టుమ్‌దు ఉల్పిదెర్.

35 నీతి నిజాయి మనికావ్ అతి ఏటిలు నలదాన్ మొదోలీసి, దేవుణు గుడిడిజ్‌ని సంత సుర్పి మాతి పీటదిజ్ నడిమి మీరు సప్తి మహి బెరాకియ మరిసి అతి జెకరియదాక, నీతి నిజాయి మన్నికారాతి విజెరిజ్ సప్పివరి నల బూమి కారిస్తి మన్ను వందిజి సిక్కు మీ మున్నునె వానెలె.

36 యా సిక్సెజ్ విజు యా తరమ్‌ది పరి మున్నునె వానె ఇజి నాను మిజి నిజం వెహ్సిన్.

37 ఒ యెరూసలేమా, యెరూసలేమా నీను ప్రవక్తరుజ్ సప్పికి, నీ డగ్రు పోక్కివరిజ్ పణకాణిజ్ డెయ్‌నికి, ఉండ్రి కొరు దని ఏలెకాజ్ కుడుప్పి దని రెకెజ అడ్లి ఇడ్డి లెకెండె, నీ కొడొరిజ్ కుడుప్పెజ్ ఇజి నాను ఎసాడు సుట్కునో ఆపు ఆత మన్ను, గాని నిజి ఇస్టం సిల్లెండ మహాద్.

38 ఇదిలో దేవుణు వన్నుగుడి: డిసి సిన్సాన్, అందెజి అక్క కాలి మంజినాద్.

39 ప్రబు సిత్తి అతికారమ్‌దాన్ ఆనికాన్[☆] ఇజి నీను వెహ్సిదాక నజి నీను మరి సుడొతిజు, ఇజి నాను నిజి నిజం వెహ్సిన్.”

24

తరమ్‌దిజ్ అక్కర్‌దిజ్ గుర్తు.

1-2 యేసు దేవుణు గుడిడాన్ సోతాండ్రె దూరం సాస్సి మహిజ్, సిసూర్ వన్ని డగ్రు వాతారె, దేవుణు గుడి: వందిజ్ కూక్కుసాస్సి గొప్పజు వర్గిజు మహోర్. వాండ్రు వరిజ్, “మీరు యాకెజ్ విజు సుడొతిదెర్. గాని ఇక్క ఉండ్రి పణకు మున్ను మరి ఉండ్రి పణకు నిల్పి మన్‌విండ ఆహె ఆనాద్‌లె, ఇజి నాను మిజి నిజం వెహ్సిన్”, ఇజి వెహ్సిన్.

3 యేసు బలివ మరెక్ మని గొరొన్‌మున్ను బస్సి మహివలె, మరి ఎయెర్ డగ్రుసిల్లెండ మహివలె, సిసూర్ వన్ని డగ్రు వాతారె, “యాకెజ్ ఎనిజె జర్గెనె? నీను మరెజి వానిదనిజ్, మరి యా తరమ్‌దిజ్ అక్కర్‌దిజ్ గుర్తుజ్ ఇనికెజ్? మజి వెహ్‌అ”, ఇజి వెన్‌బాతారె.

4 యేసు వరిజ్ ఈహు వెహ్సిన్. “ఎయెన్‌బా నిజి మోనిం కివిండ జాగర్ల సుడొతిజు మండ్రు.

☆ 23:39 23:39 క్రిస్తి 118:26.

5 ఎందానిజ్ ఇహిజ నండొండార్ వాజి, నా పేరు ఇడె: ఆజి, “నానె క్రీస్తు” ఇజి వెహ్ని నండొండారిజ్ మొసెం కిసార్.

6 మీరు విదెమ్కు వందిజ్ వెనిదెర్లె. మరి విదెమ్కు వానెలె ఇజి సాటిస్సికబా వినిదెర్లె. అయావలె తియెల్ అవిండ ముండ్రు. యాకెజ్ విజు జర్గిదెజ్వెలె. గాని యాక ఆక్కర్ అవిద్.

7 లోకర్ ముస్సు, లోకర్ని దెసమ్కాజ్ ముస్సు, దెసమ్కు పగ ఆజి మంజెనె. అబ్బె ఇబ్బె నండొ నాహ్కాజ్ కరు, బూమి కర్గినికెజ్ వానెలె.

8 యాకెజ్ విజు ఉండ్రీ బోదెలి కిదు అస్తెజ్ ముజాల వాని నోప్పి మొదోల్స్తి లెకెండె.

9 నస్తివలె లోకర్ మిజి అసి తోహ్ని హిమ్మెజ్ కిజి సప్తెజ్ ఒపజిమ్మార్లె. నా ముస్సు నమకం ఇట్టి వందిజ్ లోకామ్దు మన్ని విజు జాతిదికార్ మిజి ఇస్సం కివీండ ఆనార్.

10 నండొండార్ పరి నమకం డిస్సు నీసార్లె. ఒరెన్ మరి ఒరెన్ వన్నిజ్ మొసం కినాన్. ఒరెన్ మరి ఒరెన్ వన్నివెట పడివీండ ఆనార్.

11 నండొండార్ డొజి ప్రవక్తరు వాజి తప్ప బోదెజ్ నెస్సిని లోకురిజ్ తప్ప సర్దు నడిపిసి, నండొండారిజ్ మొసం కిసార్.

12 దేసమ్ది రూలుజ్ లాజివీండ బల్లిజినికార్. ఆజినిజ్ లోకర్ ప్రేమ సిల్లికార్ ఆనార్. మహిపరిజ్ ప్రేమిస్సి ప్రేమ సిల్లిండాజి మంజెనార్.

13 గాని ఆక్కర్దాక కష్టమ్కు ఓరిసిని వన్నిజ్ దేవుణు రక్కిస్సానెలె.

14 దేవుణు ఏలుబడి: కిని వందిజ్ సువార్త బూమి ముస్సు మని లోకాజ్ విజు ఉండ్రీ సాక్సం లెకెండె వెహె ఆనార్లె. నస్తివలె యా తరమ్దిజ్ ఆక్కర్ వానాద్.

15 ప్రవక్త ఆతి దానియేలువెట దేవుణు ముజాల వర్గితి మహి లెకెండె, “నానసం కిని సెఇక ఆతిక”^{*} దేవుణు గుడిడు నెగ్గి బాడిడు నిల్సి మంజెనిక సూణివెలె (యాక సద్వినికాన్ నెసి అర్దం కిదెజ్) ఆయ గడియ వానాద్లె.

16 నస్తివలె యూదయ దేసమ్దు మంజెనికార్ గొరొకాజ్ ఉహ్కెజ్ వలె.

17 మిదె ముస్సు, మంజెనికాన్ ఇండ్రోణిజ్ ఇనికబా వెల్లి ఒతెజ్ ఇజి డిగ్గెజ్ అవిద్.

18 మడిజు మంజెనికాన్ వన్ని సాల్వెజ్ ఒత్తెజ్ ఇజి ఇండ్రో వాదెజ్ అవిద్.

19 ఆయ దిసమ్కు కొడెరిజ్ పాలు ఉట్టిస్సి అయ్సికాజ్, పొటాదు మన్ని బోదెకాజ్ ఎస్సానో కష్టమ్కు మన్నికెజె.

20-21 అయాకెజ్ ఉండ్రీ పినికాలమ్దునో, రోమ్ని దిసమ్దునో రెవీండ ఆపిద్ ఇజి పార్దనం కిజి ముండ్రు. ఎందానిజ్ ఇహిజ, లోకం మొదోల్స్తి బాణిజ్ అసి ఏలుదాక రెజ నని కష్టమ్కు వానె. అండెజె అయా కష్టమ్కాణిజ్ తప్పె ఆదెజ్ ఇజి మీరు ఉహ్కె సొనిక ఉండ్రీ పిన్నికాలమ్దునో, విస్త్రాతిదిసమ్దునో^{*} అవిండ ముండ్రెజ్ ఇజి పార్దనం కిజి ముండ్రు.

22 అయా కష్టమ్కు మన్ని దిసమ్కు తక్కు కిదెజ్ ఇజి దేవుణు ఒడెబిండ మహిజ బూమి ముస్సు, మన్నకాన్ ఎయెనబా తప్పె ఆదెజ్ అట్వెన్. గాని దేవుణు ఎర్లిస్తి మన్ని వరి వందిజ్ అయా దిసమ్కు తక్కు కిసార్లె.

23 అయా కాలమ్దు ఎయెనబా మిజి, “ఇదిలో క్రీస్తు ఇబ్బె మనాన్”, సిల్లిజ, “వాండ్రు అబ్బె మనాన్” ఇజి వెహ్నిజ పరి మాటెజ్ అసాట్.

24 నస్తివలె డొజిక్రీస్తుర్, డొజి ప్రవక్తరు వాజి నండొ బమ్మాతి పణిజ్, ముజాల ఎనెజ్బా తోఇ నని బమ్మాతి పణిజ్ కిజి, అట్టిజ దేవుణు ఎర్లిస్తి మన్నిపరిజ్బా మొసం కిదెజ్ సూణార్.

25 జాగర్త మండ్రు! ఏలె అక్కెజ్ ఇనిక్కెజ్బా జర్గినె ముజాలె నాను మిజి వెహ్తా మన.

26 అండెజె ఎయెనబా, “ఇవిలోన్ వాండ్రు అబ్బె బిడిమ్బూమిదు ప్రాంతమ్దు మనాన్” ఇజి వెహ్నిజ్బా మీరు సానాట్. సిల్లిజ, “ఇవిలోన్ వాండ్రు ఇబ్బె గొనె మనాన్” ఇజి వెహ్నిజ్బా నమ్మిమాట్.

^{*} 24:15 24:15 దాని 9:27; 11:31; 12:11. ^{*} 24:20-21 24:20-21 పిన్నికాలమ్దు గొప్ప పెరి వాజి మహద్. అండెజె విజుణాన్ గడ్డెజ్ నండ్రెజి మన్నిజ్ పిన్నిదిజ్ పయనం కిదెజ్ గొప్ప కష్టమాజి మంజెనార్ ముండ్రెజ్ బాడ్రి దొహ్కెజ్నె, తిండి దొహ్కెజ్నె గొప్ప కష్టమాజిదాని యూదురి రూలుజ్ వజి విస్త్రాతిదిసమ్దు మూడు నాలగి ములుదిజ్ లావీ దూరం పయనం కిదెజ్ అవిద్ ఇజి మహద్.

27 ఎందానిజ్ ఇహిజ, మిర్నినిక ఎలాగ తూర్పుదాన్ వడమూర దాక తోర ఆజినాదో, అయలెకెండెన్ లోకు మురిసి ఆతి నాను వానివలెబా మంజినాద్,

28 డేగెజ్ వానివలె పినుగుజ్ మంజినె ఇజి గుర్తు కిదెజ్ అట్టిలెకెండెన్ యేసు వానిదన్నిజ్ బా టెటాజ్ తోర్ని గుర్తుజ్ మంజినె.

29 అయా కస్టమేకు మని దినమేకు వీజితివెటినె, “పొద్దు సీకటి ఆనాద్, నెల జాయ్ సివిద్, ఆగాసమేదు మని సుక్కెజ్ రాల్తె. ఆగాసమేదు మన్నిలావరకమేది సత్తు మన్నికెజ్ కర్షినె.*

30 నన్నివలె లోకుమరిసి ఆతి నాను వానిదనిజ్ గుర్తు ఆగాసమేదు తోర్నాద్. బూమి ముస్కు మని నండో తెగ్గెజాణికార్ గుండె కొత్తె ఆజి అడఃబనార్. నన్నివలె లోకుమరిసి ఆతి నాను గొప్పు సత్తుదాన్ దేవుణు జాయ్ దాన్ ఆగాసమేదు మని మొసాపు ముస్కు వానిక వారు సూణారలె.

31 జోడుబంకెజి జాటుదాన్ నాను నా దూతెజ్ పోక్కు. వారు ఆగాసమేదు యా కొసాదాన్ అయా కొసాదాక నాలేగి దిక్కుజాణికే దేవుణు ఎర్లిస్తి మన్ని వరిజ్ ఉండ్రెబాన్ కినార్.

32 ఇదిలో బోడె మరాన్ దిజ్ సుడఃజి యాక మీరు నెస్తు. బోడె మరాన్ ఆకు రాల్లి సిర్గిస్తివెలె, ఎండ కాలం డగ్రు ఆతాద్ ఇజి మీరు నెసినిదెర్.

33 అయలెకెండెన్ మీరు యాకెజ్ విజి జర్నినిక సూణివెలె, నాను దారబంద్రమేదునె మన్న ఇజి మీరు నెస్తు.

34 యాకెజ్ జర్నినిదాక యా తరమేదికార్ తవ్వేండ బత్తిజినె మంజినార్ ఇజి నాను మిజి నిజం వెప్పిన.

35 ఆగాసమేని బూమిబా సిల్లెండ ఆనె, గాని నా మాటెజ్ ఎనెజ్ బా అయలెకెండెన్ సాన్ఉ.

36 అయ దినం వందిజ్ అయ గడియ వందిజ్ ఎయెర్ బా నెన్ ఏర్. వరలోకామేదు మన్ని బుబ్బాతి దేవుణు ఆవిండ దేవుణు దూతార గాని మురిసిబా నెన్ ఏన్.

37 నోవాహు కాలమేదు ఎలాగ మనెనె, అయలెకెండెన్ లోకుమరిసి ఆతి నాను వానికబా మంజినాద్.

38 గడ్డ నిండ్రెని ముజాల నోవాహు ఓడః లోజి డుఃగితిమహి దినమే దాక లోకుర్ ఉణిజి, తింజి, వెండ్రి ఆజి, వెండ్రిదిజ్ సీజి మహోర్†.

39 బూమి విజి ముడఃగిని లెకెండె గడ్డ నిండ్రెజి విజేరిజ్ పేర్టి ఒతిదాక, ఇనిక జర్నినాద్లె ఇజి వారు నెన్ ఏండ మహోర్. అయా లెకెండెనె లోకుమరిసి ఆతి నాను వానివలెబా మంజినాద్.

40 రిఎర్ ముడఃజి మంజినార్. ఒరెన్ వన్నిజ్ డిఃసి ఒరెన్ వన్నిజ్ కూక్కు ఒనాన్.

41 రుండి బోదెక్ ఉండ్రె జెత్తు వణకుదు నూర్జి మంజినె. ఉండ్రె దనిజ్ డిఃసి ఉండ్రె దనిజ్ కూక్కు ఒనాన్.

42 ఎమేజి దినమేదు మీ ప్రబు వానాండ్రో ఇజి మిజి తెలివిద్. అందెజి మీరు జాగరతదాన్ ఎద్దు సుడఃజి మండ్రు.

43 యాక మీరు అర్లం కిజి నెస్తు. ఎమేజి గడియాదు డోజారి వానాన్ ఇజి ఇండ్రెణి ఎజుమాని నెస్తిజ, డోజారి ఇండ్రె డుఃగిదెజ్ సరి సివిండ తెలి మంజి సూణాన్.

44 మీరు నా వందిజ్ ఒడఃబిజి గడియాదు, లోకు మరిసి ఆతి నాను వాన. అందెజి మీరు ఎస్తివలెబా తయార్ ఆజి మండ్రెజ్ వెలె.

45 బుద్ధిమని నమిదెజ్ అట్టిమని పణిమన్ని ఎయెన్? ఇండ్రెణి వరిజ్ విజేరిజ్ నెగెణ్ సుడఃజి సరి ఆతి వేలాదు, వరిజ్ సరి ఆతి బోజునం సీదెజ్ ఇజి ఇండ్రెణి ఎజుమాని ఒపజెప్తి లెకెండె మన్నికాండ్రె బుద్ధి మన్ని పణిమనిసి.

46 అయ ఎజుమాని మరజి వానివలె, వన్నిజ్ ఒపజెప్తి లెకెండె అయా పణిమన్ని కిజి మంజినిక ఇహిజ అయ ఎజుమాని సుడఃతిజి అయ పణిమన్నిజ్ నెగెద్.

47 అయ ఎజుమాని వన్నిజ్ కల్లితిమని విజి దనిజ్ సూణికాన్ లెకెండె అయ పణిమనిసి కినాన్ ఇజి నాను మిజి నిజం వెప్పిన.

* 24:29 24:29 యెనయ 13:10; 34:4. † 24:38 24:38 దేవుణు బూమి విజి ముడుగి నిని లెకెండె పేరు రపిసి గడ్డ నిండ్రెని ముజాల ఉండ్రె ఓడ తాయార్ కిదెజ్ ఇజి నోవాహుజ్ వెప్తన్. అయా ఓడ 30 మూరెజ్ సాంపు 50 మూరెజ్ వెడల్పు 30 మూరెజ్ ఎత్తు మన్నిక. నోవాహుని వన్ని ఇండ్రెణికార్ వజెర్, మరి విజి జంతుజ్ పొట్టిజ్ పొర్టిజ్ అండ పోత్తు జత్తు లెక్క ఒటాదు డుఃగి విదు రోస్కు వెనక పిరు వాదెజ్ ముద్దెల్నిదాక లోకుర్ వరిజ్ అలవాటుజ్ లెకెండె బత్తిజి మహోర్.

48-49 “గాని అయ పణిమనిసి సెఇకాన్ ఆజి నా ఎజుమాని వాదెజ్ నండో అలన్యం ఆనాద్”, ఇజి అయ సెఇ పణిమన్ని వన్ని మన్నుదు ఆలోననం కిజి వన్నివెట పణికిని వరిజ్ డెయెజి, మరి ఉణివరివెట కూడెజి ఉణిజి తింజి మంజినాన్.

50 వాండ్రు తొఇ దినమదు ఒడెబిఇ గడియాదు వన్ని ఎజుమాని వానాన్.

51 అయ ఎజుమాని వన్నిజ్కత్త్రి, బక్తి మనికాప్ ఇజి పొజిజిని వరివెట వరివందెజ్ తయార్ కిత్తిమన్ని బాడిందు పొక్కాన్. అబ్బె పల్కు కొహ్కొ, అడెబాజి మంజినార్.

25

పదిమణిసి విడిః బోదెక్

1 మరి దేవుణు ఏలుబడిః కినిసి ఇహిజ వరి నూనెజాణి దీవెజ్ అసి పెండ్లి దజడః వన్నిజ్ ఎద్రు సుడెదెజ్ సాహిమహి పదిమన్ని విడిః బోదెకాజ్ పోలిత మనాద్.

2 వినకాజ్ లొఇ అయదుగురు బోదెక్ బుద్ది సిలికెజ్, అయదుగురు బోదెక్ బుద్ది మనికెజ్.

3 అయ బుద్ది సిలికెజ్ వనక దీవెజ్ అస్తె గాని నూనెజ్ ఒఉఃతె.

4 బుద్ది మనికెజ్ వనక దీవెజెవెట సీనిజు నూనెబా ఒతె.

5 పెండ్లి దజడఃయెన్ వాదెజ్ అలన్యం ఆతిజ్ అవిక్ విజు కొహ్జి నిద్ర కిజి మవె.

6 మదరెయ్యు, “ఇవిలోన్ పెండ్లి దజడఃయెన్, వన్నిజ్ ఎద్రు సుడెదెజ్ వాతి బోదెకాండ్ వెల్లి రదు”, ఇజి ఉండ్లి గగోలిదాన్జాటు వాతాద్.

7 నస్తవలె బోదెక్ విజుండ్కె నిజ్జి వన్కా నూనెజాణి దీవెజ్ సాడిఃతిజ్ ఎకిసి నెగెండ్ కిత్తె.

8 గాని అయ బుద్ది సిలికెజ్, “మా దీవెజ్ నమజి సాన్నినె. అందెజి మీ నూనె లొఇ కండెక్ మజిబా సిదాట్”, ఇజి బుద్ది మని వనకాజ్ లొన్ని.

9 అయావలె బుద్దిమని బోదెజ్, “సిల్లె, సిత్తిజు మజిని మిజి సాల్వండ్ ఆనాద్. అందెజి మీరు పొర్నివరిబాన్ సాన్ని కొండు”, ఇజి వెప్తా.

10 అవి నూనె కొండెజ్ సాన్ని మహిజ్ పెండ్లి దజడః వాతాన్. నస్తవలె తయార్ ఆతి మనికెజ్ వన్నివెట పెండ్లి విందుదిజ్ లొఇ సాహి. దని వెనుక సేహాలెక్ కెహ్ వె ఆతె.

11 దన్ని వెనుక, మహి బుద్దిసిల్లి బోదెక్ వాజి, “బాబు, బాబు మజి నెహ్లా రెఅ”, ఇజి కూకై.

12 వాండ్రు వరిజ్, “నాను మిజి నిజం వెహ్సిన, నాను మిజి నెన్ ఎ”, ఇజి వెహ్సాన్.

13 నాను వాజిని రోజు గాని అయ గడిఃయబా మీరు నెన్ ఇతిదెర్, అందెజి మీరు తెలి ఆజి మండ్రు.

మూఎర్ పణిమణిసిర్

14 మరి దేవుణు ఏలుబడిః కినిక ఇహిజ ఒరెన్ దేనం సాండ్రెజ్ ఇజి వన్ని పణిమన్నిరిజ్ కూక్కి, వన్ని ఆస్తి వరిజ్ ఒపజిప్తి వన్ని లెకెండ్ మనాద్.

15 వండ్రు ఒరెన్ పణిమన్నిజ్ అయదు తాలంతుజ్*. మరి ఒరెన్ వన్నిజ్ రుండి, తాలంతుజ్ మరి ఒరెన్ వన్నిజ్ ఉండ్లి తాలంతుజ్ యాలెకెండ్ ఒరెన్ ఒరెన్ దన్ని వెట పణికిదెజ్ అట్టి లెకెండ్ వరిజ్ సితాన్. వెనుక వాండ్రు పయనం కిజి దేసం సాహ్జిన్.

16 అయదు తాలంతుజ్ లొస్తికాన్ వెటనె సాన్ని వనకవెట బేరం కిజి మరి అయదు తాలంతుజ్ గణస్తాన్.

17 రుండి తాలంతుజ్ లొస్తికాన్బా అయా లెకెండ్నె కిజి మరి రుండి గణస్తాన్.

18 గాని ఉండ్లి తాలంతు లొస్తికాన్ సాహ్ంద్రె బూమిదు గాండ్ కారిసి వన్ని ఎజుమాని డబ్బు మూస్తాన్.

19 లావ్కాలం సాహి వెనుక వరి ఎజుమాని మరజి వాతండ్రె వరి సిత్తి డబ్బుజాణిజ్ వారు ఇనిక కిత్తి మనార్ ఇజి సుడెఃతాన్.

20 నస్తవలె అయదు తాలంతు లొస్తికాన్, మరి అయదు తాలంతుజ్ తతాండ్రె, “బాబు సీను నజి అయదు తాలంతుజ్ ఒపజిప్తి గదె, ఇదిలో అకెజె ఆవండ్ మరి అయదుబా నాను కుడుచ్చ”, ఇజి వెహ్సాన్.

* 25:15 25:15 ఉండ్లి తాలంతు ఇహిజ దినారమకు అయాలెకెండ్ ఇహిజ ఆరు వెయిక్ రోన్సు పణికితిజి దోహ్కొ కూలిదిజ్ నరియాతి డబ్బుజ్ నేహి లెక్కదిజ్ సుడెజి ఇంసు మింసు ఆరు లెక్కెజ్ రూపాయ్ మంజిన్.

21 వన్ని ఎజుమాని వన్నిజ్, “నమకం ఇడెదెజ్ అట్టి నెగ్గి పణిమన్ని, నీను నెగెండె కిత్తి. యా కండెక్ బాన్ నిజి నమిదెజ్ అట్టి నని పణి నీను కిత్తి. అందెజె నండో వనకాజ్ నాను నిజి ఒవజెప్పాలి. నీను వాజి నీ ఎజుమానివెట సర్ల ఆజి మన్ అ”, ఇజి వెప్తాన్.

22 రుండి తాలంతుజ్ లొస్సికాన్ వాతాండ్రె, “ఎజుమాని నీను నజి రుండి తాలంతుజ్ ఒవజెప్పి గదె, ఇదిలో అకెజె ఆవిండ మరి రుండి తాలంతుజ్ గణస్త”, ఇజి వన్నిజ్ వెప్తాన్.

23 ఎజుమాని వన్నిజ్, “నమకం ఇడెదెజ్ అట్టి నెగ్గి పణిమనిసి, నీను నెగెండె కిత్తి. యా కండెక్ బాన్ నీను నమిదెజ్ అట్టి నని పణి నీను కిత్తి. అందెజె నిజి నండో వన్కాజ్ ఒవజెప్పి. నీను వాజి నీ ఎజుమాని వెట సర్ల ఆజి మన్ అ”, ఇజి వెప్తాన్.

24 నస్తివలె ఉండ్రె తాలంతు లొస్సికాన్ వాతాండ్రె, “బాబు నీను విత్తెజ బాడిదాన్ కొయ్ నకి, మరి ఉణున్ ఇ బాడిదాన్ పంట కొయ్ ని మూర్కతం మనికి ఇజి నాను నెస్త.

25 అందెజె నాను తియెల్ ఆజి బూమిదు గాంద కార్తి నీ డబ్బు డాప్త. ఇదిలో నీది, నీను లొన్ అ”, ఇజి వెప్తాన్.

26 అందెజె వన్నిజ్ నుడేజి అయ ఎజుమాని, “బదకమాతి సెజ పణిమన్ని, నాను విత్తెజ బాడిదాన్ కొయ్ నికాన్, ఉణున్ ఇ బాడిదాన్ పంట కొయ్ నికాన్ ఇజి నీను నెస్తి?

27 అహిజ నా డబ్బు వడ్డి సీని నవ్ కారిజ బాన్ నీను సీని మంజునిక ఇహిజ నాను వాతివెలె వడ్డి కుడుప్పి నా డబ్బు నజి దోహ్ కార్ద మరి.

28 అయ ఉండ్రె తాలంతు వన్నిబాణిజ్ లాగ్ జి పది తాలంతుజ్ మనివన్నిజ్ సీఅ.

29 నమిదెజ్ అట్టికాన్ ఎయెండ్రె, వన్నిజ్ మరి లావ్ దోహ్ క్కె. వరిజ్ మరి నండో కల్లిజి మంజిని. నమ్మిదెజ్ అట్టెజ వన్ని బాణిజ్, వన్నిజ్ కల్లితిమన్ని ఇజిరికబా లాగె ఆనాద్.

30 పణిదిజ్ రెజ యా పణిమన్నిజ్ వెల్లె సీకటుదు విసీర్దు. అబ్బె పల్కు కొహ్ క్కి అడేబాజి మంజినాద్.

మెండ గొర్రెజ్ ని ఎలెటి గొర్రెజ్

31 నస్తివలె యేను ఈహు వెప్తాన్. “లోకుమరిసి ఆతి నాను నా గొప్పు గవ్ రమ్దాన్, నా విజి దూతెజ తోడు; అసి వన్నివెలె, రాజు పజి ఎలుబడి; కిదెజ్ దేవుణు మంజిని బాడిదు మంజిని గొవ జాయ్ దాన్, విజి దూతారిజ్ నావెట తోడు అసి వానివలె, రాజుపజి ఎలుబడి; కిదెజ్ పరలోకమ్దు మంజిని గొప్పు జాయ్ మన్ని నా సింహానమ్దు బసి మంజిన.

32 నస్తివలె బూమి మున్ను మని లోకుర్ విజెరె నా ఎద్దు కూడేజి వానార్. గొర్రెజ్ మేప్పి గప్పడుయెన్ ఎలెటి గొర్రెజ్ నిజి మెండ గొర్రెజి ఎరలిసినిలెకెండె నాను లోకాజ్ ఒరెన్ ఒరెన్ వన్నిజ్ ఎర్లిస్తాలె.

33 నాను ఉణెర్ పడక మెండ గొర్రెజి, డేబపడక ఎలెటి గొర్రెజి నిల్వాలె.

34 రాజు ఆతి నాను నా ఉణెర్ పడక మని వరిజ్ నుడేజి, “నా బుబ్బాత్తి దేవుణు నిజిని దీవనమ్ కు మంజి వన్నిజ్ సెందితికిదెరా, లోకం పుట్టి బాణిజ్ అసి దేవుణు మీ వందిజ్ తయార్ కితిమన్ని దేనం మీ సొంత కిజి మండ్రు.

35 ఎందానిజ్ ఇహిజ, నజి బజి కట్టిజ్ మీరు బోజనం సెతిదెర్, ఏహ్ కట్టిజ్ ఏరు సెతిదెర్, నాను ఆఇకాన్ ఆతిమహిజ్ నజి డగ్గు కితిదెర్.

36 నాను డుమ్డ ఆతిమహిజ్ నజి సొక్కెజ్ సెతిదెర్. జబుదాన్ మహిజ్ నజి నెగెండె నుడేతిదెర్, నాను జెలిదు మహివలె నుడేదెజ్ వాతిదెర్, ఇజి వెప్తాన్.

37 నస్తివలె దేవుణుదిజ్ లోజెతిమహి సీతినిజాయిమన్నికార్ ఆతి వారు, “ప్రబువా, ఎస్తివలె నిజి బజుదాన్ నుడేతిజ్ నిజి బోజనం సెతావ్? ఎస్తివలె ఎహ్ కట్టిజ్ మాపు నిజి ఏరు సెతావ్?

38 ఎస్తివలె ఆఇకి ఆతిమహిజ్ నుడేజి నిజి డగ్గు కితావ్? ఎస్తివలె డుమ్డ ఆతి మహిక నుడేజి నిజి సొక్కెజ్ సెతావ్?

39 ఎస్తివలె నీను జబుదాన్ మహిక, జెలిదు మహిక నుడేజి నీ డగ్గు వాతావ్?”, ఇజి వన్నిజ్ వెన్ బానార్లె.

40 నస్తివలె రాజుఆతి నాను, “నా తంబెరిజి ఆతివరి లొఇ ఇజిరికాన్ ఆతి ఒరెన్ వన్నిజ్ మీరు ఇనిక కితిదెర్, అయక మీరు నజి కిత్తిదెర్, ఇజి నాను నిజి నిజం వెప్తాన్”, ఇజి వరిజ్ వెప్తా.

41 నస్తివలె వాండ్లు డేబ్ల పడకాదు మని వరిజ్ నుడఱి, “నయెప్ పొందితికిదెరా, నా డగ్గహాన్ సొండ్లు, నయితానుజ్ నీ వన్ని దూతర్ వందిజ్ తయార్ కిత్తి మని ఎలకాలం సిను మంజిని బాడిడు సొండ్లు.

42 ఎందనిజ్ ఇహిజ, నాను బజ సాత, గాని మీరు నజీ బోజనం సిఇతిదెర్. ఎప్పి కట్టిజ్ ఉండెజ్ ఇనిక సిఇతిదెర్.

43 ఆఇకానాతి మహిజ్ మీరు నజీ డగ్గు కిఇతిదెర్. డుమ్డ ఆతిమహిజ్ మీరు నజీ సొక్కెజ్ సిఇతిదెర్. జబ్బుదాన్ మహివలె జెలిదు మహివలె మీరు నజీ నుడఱెజ్ రెఇతిదెర్”, ఇజ వెప్పా.

44 వారుబా వన్నిజ్, “బ్రబువా ఎస్తివలె నీను బజదాన్ మహిక, ఎప్పిదాన్ మహిక, ఆఇకి ఆతి మహిక, డుమ్డ మహిక, జబుదాన్ మహిక, కయెదు మహిక నుడఱిజి నిజీ సాయం కివితావ్?”, ఇజ వెన్బానార్.

45 నస్తివలె నాను, “యా ఇజిరె వరి లోఇ ఒరెన్ వన్నిజ్ ఇనిక మీరు కిఇతిదెరో, అయాక నజీబా మీరు కిఇతిదెరో”, ఇజి వరిజ్ వెప్పా.

46 నస్తివలె వారు ఎలకాలం మంజిని సిక్నాదు సొనారలె, గాని దేవుణుడిజ్ లోజీతికార్ ఎల్లకాలం మంజిని బత్తుదు సొనార్.”

26

యేనుజ్ పడిఎండ కుల్లు ఆజినార్

1-2 యేను యాకెజ్ విజు వెస్తి వీజతి వెనుక వన్ని సిసూరజ నుడఱి, “రుండి రోస్సు వెనుక పస్సు పండోయ్* వాజినాద్ ఇజి మీరు నెస్సిదెర్. నస్తివలె లోకు మరిసి ఆతి నాను నిలువ పోకె ఆదెజ్ ఇజి ఒవజెవె ఆనాలె”, ఇజి వరిజ్ వెప్పాన్.

3 నస్తివలె పెరి పుజెరిబుని లోకురి పెద్దెల్లజ విజేరె, విజేరె విజు పుజెరిబ ముస్సు పెరి పుజెరి ఆతి కయవ ఇండ్రో కూడఱిజి వాతార్.

4 యేనుజ్ ఎలాగబా ఉపాయ్ కిజి అసి సప్తెజ్ ఇజి అబ్బె వారు ఉండ్రె ఆలోసనం కితార్.

5 “మాపు ఏలు వన్నిజ్ అస్తిజి లోకుర్ వెట గొడఱిబ కినార్లె, అందెజె యా పండోయెదు పోని”, ఇజి వారు వగ్గితార్.

ఉండ్రె బోదెలె యేను బురాదు వాసనం మన్ని నూనె వక్కినార్.

6-7 యేను బెతానియ ఇని నాటో ముజాల కుస్తురోగమ్దాన్ మహి సీమాను ఇండ్రో వాతిజ్, అబ్బె వాండ్లు బోజనమ్దిజ్ బస్తాన్. నస్తివలె ఉండ్రె బోదెలి నూన్నాజ్ పణుకుదాన్ తయార్ కిత్తి ఉండ్రె సీసాదు†, నండో విలువమని, నండో వాసనం మని నూనె ఉండ్రె పెరి సీస తత్తాదె వన్ని బుర్ల ముస్సు. వక్తాద్.

8-9 సిసూర్ అక్క నుడఱిజి కోపం ఆతారె, “ఎందనిజ్ యా ణిదిజ్ రెఇ ణి? యాక నండో డబ్బుదిజ్ పొరెసి, అయ డబ్బు బీదవరిజ్ సీదెజ్ ఆనాద్ గదె?”, ఇజి వెప్పార్.

10 యేను అక్క నెస్తాండ్రె, “యా బోదెలి నా వందిజ్ ఉండ్రె నెగ్గె పణి కితాద్ మీరు ఎందనిజ్ దన్నిజ్ అర్ల కిజినిదెర్?”

11 బీదాదికార్ మీవెట ఎస్తివలెబా మంజినార్. గాని నాను ఎలకాలం మీ వెట మన్వె.

12 నజీ మూస్సి వందిజ్ తయార్ కిత్తి లెకెండె యా బోదెలి యా నూనె నా ఒడఱిల్ ముస్సు. వక్తాద్.

13 యా బూమి ముస్సు, ఎంబెబా యా దేవుణు ఏలుబడిఱి కిని వందిజ్ నువార్ల సాటిస్సివెలె అది కితి యా పణి దన్నిజ్ ఎత్తుకిత్తి లెకెండె సాటిసి మంజినాద్లె”, ఇజి వెప్పాన్.

* 26:1-2 26:1-2 యూదురు వరి అని గొగొరిజ్ దేవుణు అయ్యుగుప్పు దేసమ్దు వెటిపణి కిజి మహిబాణిజ్ నండో పంటిజ్ ముజాల డిప్పిని తత్తి దన్నిజ్ ఎత్తు కిజినికాదె పస్సు పండోయె పస్సు. ఇహిజ డాట్టి సాహిక ఇహిజ సప్పికానాతి దేవుణు దూత, మెండగొరెది నల దారబంద్రమ్కాక్ రానె ఆతి మన్ని ఇల్లాజ్ డట్టి సాహి సమయమ్దిజ్ గుర్తినినాద్. అయ ఇల్లా పుట్టి పెరి వన్నిజ్ దేవుణు దూత నవ్వెతాన్ గాని మెండ గొరెది నల దారబంద్రమ్కాక్ రానె ఇ అయగుప్పు దేసమ్దు వరి విజు ఇల్లాజ్ పుట్టి పెరి వరిజ్ విజెరిజ్ దేవుణు దూత నస్తాన్. యా పండోయె విజు సమయమ్దిజ్ కినార్ యూదురు విజు దేసమ్కాజ్ పండోయె కిదెజ్ ఇజి యెరుసల్లేమ్దు కూడఱిబ వానార్ నిర్లమ 12. † 26:6-7 26:6-7 యా నూన్నాజ్ పణుకు పేరు అలవాస్తదు ఇజి, యా పణుకు నండొకరీదిక తిల్లాజ్ మంజినాద్ యాక గీసి లోకుర్ పునెజ్ తయార్ కిజినార్

14-15 నన్నీవలె పన్నెండు మణిసిరీ సిసూర్ లోజ ఒరెన్ ఇన్నురియోతు యూద ఇనికాన్ పెరి వుజెరిజ డగ్రు సాహాండ్రె, “నాను యేసుజ్ మిజి ఒవజెప్పిజ నజి ఇనిక సీనిదెర్?”; ఇజి వెన్బాతాన్. అందెజి వారు ముప్పుయ్ వెండి రూపయ్బు తూస్తారె వన్నిజ్ సిత్రార్.

16 అబ్బొణిజ్ అసి యూద యేసుజ్ వరిజ్ ఒవజెప్పెజ్ ఉండ్రె అవ్కాసం సుడేజి మహాన్.

ప్రబు ఏర్పాటు కిత్తి బోజనం

17 పులాజ్ సిల్లి రొట్టెజ్ తయార్ కిని పన్ను పండోయ్ది మొదోహి దినమ్దు వన్ని సిసూర్ యేసు డగ్రు వాతారె, “పన్ను ఉండెజ్ నీ వందిజ్ మాపు ఎంబె తయార్ కిదెజ్, ఇజి నీను కోరిజని?”; ఇజి వన్నిజ్ వెన్బాతారె.

18 వాండ్రు వరిజ్, “మీరు పట్టుమ్దు పలానివన్నిబాన్ సొన్ని, నా సమయం డగ్రు ఆతాద్. నా సిసూర్ వెట కూడేజి నీ ఇండ్రో పన్ను పండోయ్ కిదెజ్ ఇజి బోదకినికాన్ వెప్పొనాన్, ఇజి వన్నిజ్ వెప్తు”, ఇజి వరిజ్ వెప్తాన్.

19 వన్ని సిసూర్ సొన్ని యేసు వరిజ్ వెప్తొ లెకెండేనె పన్ను పండోయ్దిజ్ తయార్ కిత్తారె.

20 పొద్దు అతివెలె వన్ని పన్నెండు మన్ని సిసూర్ వెట బోజనమ్దిజ్ బస్తాన్.

21 వారు బోజనం కిజి మహివలె వాండ్రు, “మీ లోజ ఒరెన్ నజి ఆజవరి కీదు ఒవజెప్పొనలె, ఇజి నాను మిజి నిజం వెప్పొన”, ఇజి వెప్తాన్.

22 వారు విజెరె నండో దుకం ఆజి ప్రతి ఒరెన్ ఒరెన్, “ప్రబువా, నిజమె నాను ఆవి గదె?”, ఇజి వన్నిజ్ వెన్బాతారె.

23 యేసు, “నావెట గినెదు కియు ముడుక్కీకాన్ ఎయెండ్రో వాండ్రె నజి ఒవజెప్పికాన్.

24 లోకుమరిసి ఆతి నా వందిజ్ దేవుణు మాటదు రాస్తిమహి లెకెండే నాను సొనాలె, గాని లోకు మరిసి ఆతి నజి ఎయెన్ ఒవజెప్పొండ్రో వన్నిజ్ కప్పమ్నె. వాండ్రు పుట్టింండ మంజినిక ఇహిజి వన్నిజ్ ఎస్సొనో బాగ మహాద్ మరి”, ఇజి వెప్తాన్.

25 వన్నిజ్ ఒవజెప్పొ యూద, “బోదకినికీ నాను ఆవి గదె?”, ఇజి వెన్బాతాన్. యేసు, “ఒబ సీనె”, ఇజి మర్రజి వెప్తాన్.

యేసుజ్ ఒవజెప్పెజ్ యూద ఒవు కొడ్డినాన్.

26 వారు బోజనం కిజి మహిజ్ యేసు ఉండ్రె రొట్టె అస్తాండ్రె దేవుణుదిజ్ వందనమ్కు వెప్పొ, అయాక రుక్కి, వన్ని సిసూర్జి సితాండ్రె, “మీరు యాక లొసి తిండ్రు, యాక నా ఒడోల్”, ఇజి వరిజ్ వెప్తాన్.

27 మరి వాండ్రు గిన్ను అసి దేవుణుదిజ్ వందనమ్కు వెప్పొ, అయాక వరిజ్ సీజి, “దిన్ని లోజ మనిక విజెరె ఉండు.

28 యా గిన్నుదు మన్నిక నా నల, నండోండారిజ్ వరి పాపమ్కు సెమిస్తెజ్ ఇజి కారిసిని నా నల. ఇక్కదె దేవుణు నా నలదాన్ కిజిని ఒవుమానం.

29 నా బుబ్బొతి దేవుణు కిని ఏలుబడిదు మరి మీ వెట కొత్తాజ్ ఉణిదాక ద్రాక్కు పట్టు రసం మరి ఎసెజ్బా నాను ఉణివలె, ఇజి నాను మిజి వెప్పొన”, ఇజి వెప్తాన్

30 మరి, ఉండ్రె పాటః పొర్తారె వారు ఒలివ మరెక్ మని గొరొన్ మున్ను సాహార్.

పేతురు వన్నిజ్ నెన్వి ఇజి వెప్పొనలె ఇజి యేసు మూజాల వెప్పొనాన్.

31 నన్నీవలె యేసు వరిజ్ సుడేజి, “గొరెజ్ అడినివన్నిజ్ నాను కత్తొలె, గొరెజ్ మంద నెదరినె సొనలె”, ఇజి దేవుణు మాటదు రాస్తి లెకెండే, యా పొదోయ్నె నా వందిజ్ నిల్దెజ్ అట్విండ మీరు విజెదెరె నజి డిసి సొనిదెరెలె.

32 గాని దేవుణు నజి మర్రజి బత్తుదు నిక్కి వెనుక, మిజి ఇంక ముజాల గలీలయదు సొనాలె”, ఇజి వెప్తాన్.

33 అందెజి పేతురు, “విజెరె మీ వందిజ్ నిల్దెజ్ అట్విండ డిసి సొహిజ్బా, నాను ఎసెజ్బా నిజి డిసి సొనం”, ఇజి వన్నిజ్ వెప్తాన్.

† 26:30 26:30 మాములుగ కీర్తన 113-114. పన్ను పండోయ్దిజ్ బోజనం కిదెజ్ మొదొల్లిని వెలె పార్వార్. 115-118 బోజనం కిత్తి విజితిజి పారజి మహాన్. * 26:31 26:31 జీకరి 13:7.

34 యేసు వచ్చి, “యా పొదోయ్ న కొర్తు కెరెని ముజాల నీను, నజీ నెన్ ఎ ఇజి మూండ్రి నుట్టు, నీను వెప్పిలె, ఇజి నాను నిజి నిజం వెప్పిన్”, ఇజి మరజి వెప్తాన్.

35 పేతురు వచ్చి, “నాను నీ వెట సాదెజ్ ఇహిజ్ బా గాని నిజి నెన్ ఎ ఇజి ఎసెజ్ బా వెహ్ ఎ”, ఇజి వెప్తాన్. మహి సిసూరబా అయాలెకెండె వెప్తార్.

గెత్సెముని టోట

36 నస్త్రవలె యేసు వచ్చి సిసూరవెట గెత్సెముని ఇని టోటాదు సాహన్. వాండ్రు వరిజ్, “నాను అబె సాస్సి పార్లనం కిజి మరజి వానిదాక ఇబ్బె బని మండ్రు”, ఇజి వెప్తాన్.

37 పేతురుని జెబెదయి మరిసిరిజ్ వచ్చివెట ఒతాన్. వాండ్రు నండో దుకం ఆజి బాద ఆదెజ్ మొదోల్స్తాన్.

38 వాండ్రు వరిజ్, “నాను సాదెజ్ డగ్రు ఆతిలెకెండె మన్ను ఓరిస్తెజ్ అట్ ఇ నసా బాద నజీ కల్లిజినాద. మీరు ఇబ్బెనె బని నావెట తెలి మండ్రు”, ఇజి వెప్తాన్.

39 యేసు అబ్బెణిజ్ కండెక్ దూరం సాహండ్రి ముణుకుజ్ ఊరెజి, “నా బుబ్బు, నీను అట్టిజి యా కష్టమకు నా బాణిజ్ లాగ్ అ. గాని నా ఇష్టం వజి ఆవెద, నీ ఇష్టం వజి జెర్గిపెద”, ఇజి పార్లనం కితాన్.

40 వెనుక వాండ్రు సిసూర డగ్రు మరజి వాతివెలె వారు నిద్ర కినిక నుడేజి, “ఉండ్రి గంటబా నా వెట తెలి ఆజి మండ్రిజ్ మీరు అట్ ఇతిదెరా? ఇజి పేతుజ్ వెన్ బాతాన్.

41 “సయ్యాను మిజి పరిస కిజి తప్పదు సాన్ ఏండ పార్లనం కిజి తెలి మండ్రు. ఆత్మ తయారెన్ గాని ఒడోల్ సత్తు సిల్లెండ ఆజినాద.”

42 మరి రుండి నుట్టు సాస్సి, “నా బుబ్బు, యా కష్టమకు నాబాణిజ్ లాగ్ జె ఆవెద, నాను ఓరిస్తెజ్ వలె ఇహిజి నీను ఇష్టం ఆతి లెకెండె, అయావజి జెర్గిపెద”, ఇజి పార్లనం కితాన్.

43 మరి వాండ్రు మరజి వాతివెలె, మరి కణక రెపెజ్ బరుదాన్ మూర్గి మహిజ్ వారు మరి నిద్ర కిజినిక నుడేతాన్.

44 వాండ్రు మరజి సాహండ్రి మూండ్రి నుట్టుబ అయా మాటెజ్ నె వెప్పి పార్లనం కితాన్.

45 వెనుక వాండ్రు వచ్చి సిసూర డగ్రు వాత్తాండ్రి వరిజ్ నుడేజి, “ఏలుబా మీరు నిద్ర కిజి రోమ్ జనిదెరా? ఇదిలో లోకుమరిసి ఆతి నజీ సెఇవరి కియుదు ఒపజెప్పి గడియ డగ్రు ఆతాద.

46 ఇదిలో నజీ ఒపజెప్పికాన్ వాజినాన్, లెదు మాటు వరి వెట దనూల్ ఆదెజ్ సానాట్”, ఇజి వెప్తాన్.

యేసుజ్ అసి తోనాప్పినార్

47 వాండ్రు వర్గిజి మహివలె, వన్నెండు మణిసి సిసూర లోఇ ఒరెన్ యూద వాతాన్. పెరి పుజెరిజు, లోకురి పెద్దెల్ జి పోక్తిమని మంద లోకుర్ కూడమకు, డుడ్యు అస్తారె వచ్చి వెట వాతార్.

48 యేసుజ్ ఒపజెప్పికాన్, “నాను ఎయెరిజ్ ముదు కిజిననో, వచ్చిజ్ అస్త్రు”, ఇజి ఉండ్రి గుర్తు లెకెండె ముజాల వరిజ్ వెప్తా మహాన్.

49 యూద వెటెనె యేసు డగ్రు వాతండ్రి, “బోదకినికి”, ఇజి వెప్తాండ్రి పోమ్ జి వచ్చిజ్ ముదు కితాన్.

50 యేసు వచ్చి, “కూలాయెన్, నీను ఇనిక కిదెజ్ వాతిదో అక్క కిల”, ఇజి వెప్తాన్. నస్త్రవలె లోకుర్ ముజాల్ వాజి వచ్చి మున్ను అరెన్ వచ్చిజ్ అస్తారె తోప్తార్.

51 అయావలెనె యేసు వెట మహికాన్ ఒరెన్ వచ్చి కియు సాప్పి కుర్ల లాగిత్తాండ్రి పెరి పుజెరిజ్ పణిమచ్చి గిబ్బి తెప్ప కత్తాన్.

52 యేసు వచ్చి, “నీ కూడం మరజి ఒరాదు ఇడేఅ, కుర్ల అప్పికార్ విజెరి కుర్లదానె సానార్.

53 నాను ఏలు నా బుబ్బెజ్ సాయం లోస్టిజ, నా బుబ్బు వన్నెండు గుంపుజ్ నయనమది వరిజ్ ఇంక లావ్ దూతెజి నా వందిజ్ పోక్ ఏండ్రా? మీరు ఇనిక ఒడేబిజినిదెర్?

54 గాని నాను అయాలెకెండె లోస్టిజ, యాలెకెండెనె ఇకెజ్ జర్గిదెజ్ ఇజి దేవుణు మాటదు రాస్తె మహిక ఎలాగ పూర్తి ఆనాద?

55 అయావలె యేసు మంద లోకురిజ్ నుడేజి, “నాను ఒరెన్ డోజి కినికాండ్రా? మీరు కుర్లజాణిజ్, కొణెజాణిజ్ నజీ అస్త్రెజ్ వాతిదెరా? విజు రోన్ను, నాను దేవుణు గుడియ బసి బోదిసి మహాగదె. అయావలె మీరు నజీ అన్ ఇతిదెర్.

56 ఎందనిజ్ ఇహిజ ముజాల దేవుణు వర్గితి మాటజ్ ప్రవక్తరు రాస్తి మహికెజ్ అయాలెకెండ్ పూర్తి ఆడెజ్ యాకెజ్ విజు జర్గితె”, ఇజి వెహ్తాన్. నస్తివలె వన్ని సిసూర్ విజేరె వన్నిజ్ డిఃస్తారె ఉహ్క సాహర్.

యేసు యూదురి కొర్డుదు

57 యేసుజ్ అస్తికార్ వన్నిజ్ విజు పుజేరిజు ముస్సు పెరి పుజెరి ఆతి కరుప ఇండ్రో తత్తూర్. అబ్బె పెరి పుజేరిజు లోకురి పెదలుజు కూడిత వాత మహూర్.

58 దినిజ్ ఆక్కర్ ఇనిక అనాదొ ఇజి నెన్జెజ్, పేతురు కండెక్ దూరమదాన్ వన్ని వెనుక సొన్ని విజు పుజెరిజు ముస్సు పెరి పుజెరి ఇలు అరిజుదు కావ్కిని వరి వెలు బస్తాన్.

59 పెరి పుజెరిజు, ననహెద్రి నజంకీ ఇజి యూదురి కోర్టుదికార్ విజేరె యేసుజ్ సప్తజ్ తగితి రుజువ్ వందిజ్ వన్ని ఎద్దు అబద్ధం సాక్యం వెహ్పివరిజ్ రెబాజి మహూర్.

60 వన్ని ఎద్దు అబద్ధం సాక్యం వెహ్పివార్ నండెండార్ వాతూర్ గాని వన్నిజ్ సప్తజ్ తగ్గి ఇనికబా దొహ్కావితాద్.

61 కడెవేరిదు రిఎర్ ముజాల వాజి, “నాను దేవుణు గుడిదిజ్ అర్ప్పి మరి మూండ్రి రోహ్కాజ్ లోఇ దనిజ్ మురజి తోహ్తాజ్ అట్టు ఇజి వాండ్రు వెహ్తాన్”, ఇజి వారు వెహ్తూర్.

62 నస్తివలె విజు పుజెరిజు ముస్సు పెరి పుజెరి ఆతికాన్ నిజ్తాండ్రి యేసుజ్, “నీను ఇనికబా మరజి వెహ్తానా? మీరు మీ ముస్సు వెహ్సాని యా మాటజ్ ఇనికెజ్?”, ఇజి వెహ్తూన్.

63 గాని యేసు ఇనికబా వర్గింండ జువ్ న మహూన్. అందెజి విజు పుజెరిజు ముస్సు పెరి పుజెరి ఆతికాన్ వన్నిజ్ నుడెజి, “బత్తిజిని దేవుణుదిజ్ తోడు అసి నీ వెలు ప్రమాణం కిజి నాను నిజి వెన్బాజి, “నీను క్రిస్తు నా, దేవుణు మరిసినా? అహిజ నజి వెహ్తాన్”, ఇజి వెహ్తూన్.

64 యేసు వన్నిజ్, “నీను వెహ్తాక నిజమె. గాని లోకుమరిసి ఆతి నాను, వాని గొప్ప అతికారం మన్ని కాలమదు దేవుణు ఉణ్డెరె పడకారు బనిమంజి ఆగానమదాన్ మొసొపు ముస్సు వానిక మీరు నూణిదెర్ ఇజి నాను మిజి విజేరిజ్ నిజం వెహ్సాన్”, ఇజి వెహ్తూన్.

65 నస్తివలె విజు పుజెరిజు ముస్సు పెరి పుజెరి ఆతికాన్ నండె కోపం ఆతండ్రి, వన్ని సాక్యెజ్ కిసి ఆజి, “వాండ్రు దేవుణుదిజ్ దూసిని వర్గితాన్! మరి ఇంక సాక్కిరిజు అవ్సరం సిల్లెద్. ఇదిలో వాండ్రు దేవుణుదిజ్ దూసిని వర్గితిక మీరె వెహ్సాదెర్.

66 మీరు ఇనిక ఒడెబిజినిదెర్?”, ఇజి వరిజ్ వెహ్తూన్. అందెజె వారు”, వీండ్రు సాపుదిజ్ తగ్గికాన్”, ఇజి వెహ్తూర్.

67-68 నస్తివలె వారు వన్ని మొకోమదు పూసి, ముటి అసి గుదితూర్. సెగొండార్ కియుదాన్ డెయ్జి, “క్రిస్తు నిజి డెయ్తికాన్ ఎయెండ్రో ఇజి మజి వెహ్తాన్, నీను దేవుణు ప్రవక్తగదె?”, ఇజి వెహ్తూర్.

పేతురు యేసుజ్ నెన్వి ఇజి మూండ్రి నుటు వెహ్సానాన్.

69 అయావలె వెల్లె అరజుదు పేతురు బన్ని మహికెజ్ పణిమన్ని ఆతి ఉండ్రి బోదెలి వాతాదె, “నీనుబా గలీలయాదికాన్ యేసు వెలు మహికె”, ఇజి వెహ్తూర్.

70 పేతురు, “నీను ఇనిక వర్గిజినిదొ నజి తెలివీద్”, ఇజి బాన్మహి విజేరె ఎద్దు వెహ్తూన్.

71 వాండ్రు అబ్బెణిజ్ వెల్లెహి గవ్ని డగ్గు సాహిజ్, మరి ఉండ్రి పణిమన్ని ఆతి బోదెలి వన్నిజ్ నుడెజి, “వీండ్రు నజరేతుదికాన్ ఆతి యేసు వెలు మహూన్”, ఇజి అబె మహివరిజ్ వెహ్తూర్.

72 వాండ్రు నాను వన్నివెలు మండ్రిజ్ సిల్లెద్ ఇజి ప్రమాణం కిజి, “నాను వన్నిజ్ నెన్వి”, ఇజి వెహ్తూన్.

73 కుండెక్టయం ఆతి వెనుక అబ్బె సిహిమహికార్ పేతురు డగ్గు వాజి, “నిజమె, నీనుబా వన్నివెలు మహికి. నీను వర్గిని మాట విహిజాన్ తెలిజినాద్”, ఇజి వెహ్తూర్.

§ 26:59 26:59 నీన్హద్రిం నజు ఇహిజ 71 లోకుర మంజిని యూదురి పెరి కోర్టులికెండ్ మహూర్ విజేరె పుజెరిజు ముస్సు పెరిపుజెరిఆతికాన్ మరి పెరి పుజెరి ఇనెకాన్ ఇజెరె నజతిజ వందిజ్ తీర్పు తీరిసి మహూర్. నీన్హద్రిం నజమదు అయ నమయమది పెరి పుజేరి వన్ని ఇండ్రిణి మొగవారు, మహి ముకలమాతి పుజెరి ఇండ్రిణికార్ దేవుణు గుడి కావ్ కినినె నయ్యి ముజాల పెరి పుజెరిలికెండ్ మహికార్ మంజనార్. యెరూసల్లెమదు వన్ని నీన్హద్రిం నజమదిజ్ పెరి నజతిజ వందిజ్ తీర్పు తీర్పిజ్ అతికారం మనాద్.

74 నన్నెవలె వన్నీజ్ వాండ్రె నయివనిబె ఆజి ప్రమాణం కిజి, “నాను వన్నీజ్ నెన్ఎ”, ఇజి వరిజ్ వెహ్తాన్. వెటని కొరు కెరెతాద్.

75 నన్నెవలె, “కొరు కెరెని ముజాల నజీ నెన్ఎ ఇజి మూండ్రీ సుట్టు. నీను వెహ్ప్పాలె”, ఇజి యేసు వన్నీజ్ వెహ్పి మాట ఎతు కితాండ్రె పేతురు వెల్లి సాహండ్రె గుండె కొతె ఆజి డటం అడఃబతాన్.

27

యూద, వన్నీజ్ వాండ్రె ఉరి ఆజినాన్

1 పెందాల, పెరి పుజెరిబుని లోకురి పెద్దెల్జ విజెరె యేసుజ్ నపిస్తెజ్ ఇజి ఉండ్రీ నిర్ణం కిబిస్తెజ్ ఇజి ఉండ్రె కుట్ర ఆతార్.

2 వారు వన్నీజ్ తొహారె, రోమఅతికారి ఆతి పీలాతు డగ్రు తత్తారె వన్నీజ్ ఒవజెహ్తార్.

3 నన్నెవలె వన్నీజ్ ఒవజెహ్తి యూద, వారు యేసుజ్ సప్తెజ్ ఇజి తీర్పు కితార్ ఇజి నెసాండ్రె, మన్నుదు నండో దుకం ఆజి అయ మువయవెండి రువయెబు పెరి పుజెరిబుని పెద్దెల్జ ఎద్రు మహ్త తత్తాన్.

4 “ఇని తప్పు సిలివన్నీజ్ ఒవజెహ్తి నాను పాపం కిత”, ఇజి వాండ్రు వెహ్తాన్. “దనిజ్ నజీ ఇని పొతు సిల్లెద్. అయాక నీ బాజిత”, ఇజి వారు వెహ్తార్.

5 అందెజె యూద అయ వెండి రువయెజ్ దేవుణుగుడిః లోఇ విసీరతాండ్రె సాహాన్. వెనుక సాన్ని వన్నీజ్ వాండ్రె ఉరి లాగె ఆతాన్.

6 పెరి పుజెరిబు అయ వెండి రూపయెబు పెహ్తారె, “ఇకెజ్ ఒరెన్ వన్నీజ్ సప్పి వందిజ్ సిత్తి డబ్బుజ్, అందెజె నంద వెటెబు అరిప్పిక దేవుణు రూలుదిజ్ వడిఃఏద్”, ఇజి వర్గితార్.

7 వారు అయ డబుదాన్ ఆఇ దేసెమేది వరిజ్ మూస్తెజ్, కుమెరివన్నీ ముడిఃజ్ కొణాల్ ఇజి ఉండ్రీ నిర్ణం కితార్.

8 అందెజె ఏలుదాక అయ ముడిఃజ, “నల ముడిఃజ’ ఇజి కూకె ఆజినాద్.

9-10 “దేవుణు నజీ ఆడ్ర సిత్తిలెకెండ్, ఇస్తాయేలు లోకురి వన్నీ వందిజ్ విలువ లెకెండ్ సిత్తి ముప్పుయే వెండి రూపయెజ్ వారు లాగితారె కుమెరి వన్నీ బూమి కొండెజ్ సితార్”*. ఇజి దేవుణు ముజాల ప్రవక్త ఆతి యిరిమ్యు వెట వర్గితక యా లెకెండ్ పూర్తి ఆతాద్.

యేసు పీలాతు ఎద్రు నిల్పినాన్

11 యాకెజ్ జరిగిజి మహివలె యేసు పెరి అతికారి ఆతి పీలాతు ఎద్రు నిల్పి మహాన్. నన్నెవలె అతికారి ఆతి పీలాతు, “యూదురిజ్ రాజు ఆతికి నీనెనా?”, ఇజి వన్నీజ్ వెన్బాతాన్. “నిజమె, నీను వెహ్పి లెకెండ్నె”, ఇజి యేసు మరజి వెహ్తాన్.

12 పెరి పుజెరిబు, పెద్దెల్జ వన్నీ మున్ను తప్పుజ్ మోహ్పివెలె వాండ్రు ఇనికబా మరజి వెహ్వేతాన్.

13 నన్నెవలె పీలాతు, “వీరు నీ మున్ను ఎసా తప్పుజ్ మోహ్పినార్, యాకెజ్ వినెఇతిదా?”, ఇజి వన్నీజ్ వెన్బాతాన్.

14 వాండ్రు వారు వెహ్పి మాటెజ్ఉండ్రీ దనిజబా మరజి ఇనికబా వెహ్వేతాన్. అందెజె అతికారి నండో బమ్మ ఆతాన్.

15 పన్నుపండోయెదిజ్ జెలిదు మన్నెవరి లోఇ, లోకుర్ కోరజిని ఒరెన్ వన్నీజ్ విడుదల కిని అలవాటు అతికారిజ్ మనాద్.

16 అయావలె బరాబ ఇని ఒరెన్ మూర్కతం మన్ను అన్నయ వాండ్రుననికాన్ ఒరెన్ జెలిదు మహాన్.

17 అందెజె లోకుర్ విజెరె కూడఃజి వాతివెలె పీలాతు, “నాను ఎయెరిజ్ విడుదల కిదెజ్ ఇజి మీరు కోరిజినిదెర్? బరబ్బునా, సిల్లిజ క్రీస్తు ఇజి కూకె ఆజిని యేసుజా?”, ఇజి వరిజ్ వెన్బాతాన్.

18 వారు యేసు మున్ను గోస ఆతారె వన్నీజ్ ఒవజెహ్తి మనార్ ఇజి వాండ్రు నెస్త మనాన్.

19 పీలాతు నాయం తీరిస్సి బాడిఃదు బస్తీ మహివలె వన్నీ ఆల్పి, “ఇని తప్పుబా సిల్లి అయా నెగ్గవన్నీజ్ ఇనికబా కిదెజ్ నీను కూడఃదెజ్ ఆఏద్. వన్నీ వందిజ్ నేండ్రు ఉండ్రీ కలారు నాను నండో బాద కళ్లిత మన”, ఇజి వన్నీజ్ కబ్బురు పోక్తాద్.

* 27:9-10 27:9-10 జెకరి 11:12,13; యర్మీయా 19:1-13; 32:6-9.

20 పెరి పుజెరిబుని పెద్దెల్బ, బరబ్బెజ్ డిఃసి సీజి యేసుజ్ నప్పజ్ ఇజి అతికారి ఒప్పిలెకెండ్ వెహ్జెజ్ ఇజి లోకురిజ్ రేప్పి మహార.

21 “యా రివర్ లొఇ ఎయెరిజ్ నాను డిఃస్టెజ్ ఇజి మీరు కోరిజనిదెర్?” , ఇజి అతికారి వరిజ్ వెన్బాతిజ్, “బరబ్బెజ్నె”, ఇజి వారు మరజి వెహ్జెర్.

22 “అహిబ క్రీస్తు ఇజి కూకె ఆజిని యేసుజ్ నాను ఇనిక కిదెజ్?”, ఇజి వరిజ్ వెన్బాతిజ్ “వన్నిజ్ సిలువ పొక్అ”, ఇజి విజెరె వెహ్జెర్.

23 “ఎందానిజ్ వన్నిజ్ సిలువ పొక్జెజ్, వాండ్రు ఇని తప్ప పణి కిత్తాన్?”, ఇజి పిలాతు వరిజ్ వెహ్జెజ్, “వన్నిజ్ సిలువ పొక్అ”, ఇజి మరి ఒదె వారు డేల్ని వెహ్జెర్.

24 గగోలిని లావ్ఆజినిక అవిండ మరి ఇనికబా కిదెజ్ అట్విన్ ఇజి నెస్తాండ్రె పిలాతు, లోకుర్ విజెరె ఎద్రు ఏరు లొసి వన్ని కికు నొరబజ, “ఇని తప్పసిల్లి వన్ని నలదిజ్ నజి ఇని సమందం సిల్లి, మిజెని సమందం మనాద్”, ఇజి వెహ్జెన్.

25 అందెజి లోకుర్ విజెరె, “వన్ని నల మా మున్సుని మా కొడోర్ మున్సు మనీద్*”, ఇజి మరజి వెహ్జెర్.

26 నన్వవలె వారు కోరితి లెకెండ్ని వాండ్రు బరాబెజ్వరి వందిజ్డిఃస్తి సితాన్. గాని యేసుజ్ కొరడెఃజాణిజ్ డెయెజి సిలువ పొక్జెజ్ ఒపజెహ్జాన్.

సయ్నమ్దికార్ యేసుజ్ వెక్రిసినార్.

27 నన్వవలె అతికారి సయ్నమ్దికార్ యేసుజ్ వారు బత్తిజిని ప్రీటోరియం ఇని ఇండ్రో ఒతార, సయ్నమ్దికార్ విజెరె వన్ని సుటులం కూడిఃతార.

28 వారు వన్ని నీరి సొకెజ్ లాగితారె మరి ఉండ్రె ఎరాని నీరి సొక వన్నిజ్ తొడుఃగిస్తాతార.

29 వారు సాప్యాణిజ్ అటారె ఉండ్రె టోప తయార్ కిజి వన్ని బురాదు ఇట్టార. ఉండ్రె డుడు వన్ని ఉణిరెకియుదు అస్సిస్తారె వన్ని ఎద్రు మూణుకుజ్ ఉఃరజ, “యూదురిజ్ రాజు ఆతికి గెలిన్అ”, ఇజి వెప్పి వన్నిజ్ వెక్రిస్తార.

30 వన్ని మున్సు పూసి, అయ డుడు లాగ్గి వన్ని బురాదు మరి మరి డెయ్తార.

31 వన్నిజ్ వెక్రిసి వీజితి వెనుక వన్నిజ్ తొడుఃగిస్తి మహి నీరి సొక్క లాగితారె, వన్ని నీరి సొక్కెజ్ తొడుఃగిస్తారె సిలువ పొక్జెజ్ వారు వన్నిజ్ ఒత్తార.

యేసు సిలువ పొక్ ఆజినాన్

32 వారు సొన్ని మహివలె కురినియ ఇని పట్టుమ్దికాన్ సీమోను ఇని ఒరెన్ వన్నిజ్ సుడఃతారె, సిలువ పిండెదెజ్ వన్నిజ్ బలవంతం కితార.

33 బుర్రె పెణకి ఇని అర్దం ఆని పేరుమని గొల్గొత్త ఇని బాడిఃదు వాతార.

34 అబె సేందు కలప్పి ద్రాస కడు వన్నిజ్ ఉండెజ్ సిత్రార గాని వాండ్రు కెవతాన్,

35 వన్నిజ్ సిలువ పొక్కి వెనుక వన్ని సొక్కెజ్ ఎయెరిజ్ దొహ్కె ఇజి నెస్టెజ్ సీటిజ్ పొక్కారె వన్ని సొక్కెజ్ నీబె ఆతార.

36 దన్ని వెనుక వారు అబ్బె బసి వన్నిజ్ కాప్కిజి మహార.

37 “పిండ్రు యూదురిజ్ రాజు ఆతి యేసు”, ఇజి వాండ్రు కితి తప్ప రాసి వన్ని బురాదిజ్ మున్సు ఇట్టార.

38 వన్ని ఉణిరె పడకాదు ఒరెన్ వన్నిజ్, వన్ని డేబ్ర పడకాదు ఒరెన్ వన్నిజ్ రివర్ డొజారిజి వన్ని వెట సిలువ పొక్కార.

39-40 అయ నర్దు సానికార్ విజెరె బుర్రె దుక్కి, “దేవుణు గుడిదిజ్ అరప్పి మూండ్రి దిన్మకాజ్ మరజి తొప్పికి, నీసు దేవుణు మరిని ఇహిబ నిజి నీనె రక్సిన్అ, సిలువదాన్ డిఃగ్జె రఅ”, ఇజి వన్నిజ్ వడిఃఎండ నెఇ మటెజ్ వెప్పి మహార.

41 అయ లెకెండ్నిన, పెరి పుజెరిబు, లోకురి పెద్దెల్బ, దేవుణు మోసెజ్ సీతి రూలుజ్ నెస్సిన్సికార్ విజెరె వన్నిజ్ వెక్రిస్తార.

* 27:25 27:25 వన్ని నల మా మున్సుని మా కొడోర్ మున్సు రపిద్ - తెలుగు

42 “వీండ్లు మహి వరిజ్ తప్తిస్తాన్, గాని వన్నిజ్ వాండ్రె తప్తె ఆదెజ్ అట్వితాన్. వాండ్రు ఇస్త్రాయేలుది రాజు ఇహోన్. ఏలు వాండ్రు సిలువ మున్సుహోన్ డిఃగితిజ వన్నిజ్ మాపు నమినాన్.

43 వాండ్రు దేవుణు మున్సు, నమకుం ఇట్టాన్. “నాను దేవుణు మరిసి” ఇజి వెప్తాన్. అందెజె దేవుణుదిజ్ వన్నిజ్ సిలువదాన్ రక్తిస్తాండ్రా, ఇజి మాటు సూణాట్ దేవుణు వన్నిజ్ తప్తిసీన్ ఇజి వారు వెప్తార్.

44 అయా లెకెండన్ వన్నివెట సిలువ పోకె ఆతి మని డొజారిజ్బా వన్నిజ్ వెక్తిస్తార్.

యేసు సిలువారు సాజినాన్

45 మదెనమదాన్ మూండ్రీ గంటెజ్దాక దేసెం విజు సీకటి ఆతాద్.

46 డగ్రు మూండ్రీ గంటెజ్ఆతివెలె యేసు, “ఏలి, ఏలి లమ సబక్తాని”, ఇజి నండొ డేల్లివెప్తాన్. “నా దేవుణు, నా దేవుణు నజీ ఎండనిజ్కీయు డిఃస్తి?”* ఇజి యా మాటదిజ్ అర్లం.

47 అబ్బె నిహి మహికార్ సెగెండార్ యా మాట విహారె, “వాండ్రు ఏలియెజ్ కూక్కినాన్”, ఇజి వెప్తార్.

48 వెటెనె వరి లొఇ ఒరెన్ ఉహాక్కి సొన్ని దూది తత్తాండ్రె పులూని రసమదు ముడుక్కి యేసుజ్ ఉండెజ్ ఉండ్రీ డుడుదాన్ వన్ని వెయెదు అందిస్తాన్.

49 మహికార్”, ఇనిక కిమ, ఏలియ వాజి వన్నిజ్ తప్తిస్తాన్ను, సూణాట్”, ఇజి వెప్తార్.

50 యేసు మరి డటం డేల్లిస్తాండ్రె పాణం డిఃస్తాన్.

51 ఆయ గడిఃయాదునె దేవుణు గుడిఃదు మని తెర మున్సుహోన్ అడ్డి దాక కింజితాద్ రుండి ముకెజ్ ఆతె. బూమి కద్దితాద్. సటుజ్బదెజ్ ఆతె.

52 దూకిజ్ రే ఆతెనె ముజాల సాతి మహి నీతి నిజాయితి మనికార్ నండొండార్ ఒడొల్దాన్ మరజి నీజీతార్.

53 వారు దూకిజాణిజ్ వెల్లి వాజి, యేసు సాతి వరిబాణిజ్ మరజి నిజీతి వెనుక దేవుణు వన్నివందిజ్ కేట కిత్తి పట్టుమదు† సొన్ని నండొండారిజ్ తోరె ఆతార్.

54 నదాతిపతి‡ మటయేసుజ్ కావకిజి మహికార్ బూమి కద్దినిక, మరి జర్గితికెజ్ విజా సుడఃజె నండొ తియెల్ ఆతార్. “వీండ్లు, నిజమె దేవుణు మరిసినె”, ఇజి వెప్తార్.

55 నండొండెక్ బోదెక్ కండెక్ దూరమదాన్ సుడఃజె మహా. వారు యేసుజ్ అవ్నరం ఆతికెజ్ కిజి గలీలయదాన్ వన్నివెట వాతికెజ్.

56 వన్కా లొఇ మగ్గలెనె మరియాని, యాకోబు, యోసె ఇని వరి అయేసి ఆతి మరియని జెబెదాయి మరిసిరిజ్ అయేసి బానె మహార్.

యేసుజ్ మూస్సిక

57-58 యేసుజ్ లొజిజి మనికానాతి అరిమతా ఇని పట్టుమదికాన్ యోసేపు ఇని ఒరెన్ ఆస్తి మన్నికాన్. పొద్దు ఆతివెలె, వాండ్రు పిలాతు డగ్రు సూహాండ్రె యేసు ఒడొల్ లొస్తాన్. యేసు ఒడొల్ వన్నిజ్ సీదెజ్ ఇజి పిలాతు ఆడ్ర సితాన్.

59 యోసేపు అయ ఒడొల్ లొస్తాండ్రె నెగ్గి తెలూని పాతెజాణిజ్కీ సుటిసి, సటుదిజ్ దొల్పిస్తి, వన్ని వందిజ్ తయార్ కితి మహి కొత్త దూకిదు ఇడఃతాన్.

60 ఉండ్రీ గుండ్రాని సెప్ట పణకు నడిపిసి దూకిదిజ్ అడు కితాండ్రె సూహాన్.

61 మగ్గలెనె మరియాని మరి ఉండ్రీ మరియ అబ్బె దూకిదిజ్ ఎద్రు బస్తమహా.

దూకిదిజ్ కావ కిజినార్.

62-63 మగ్గనూడిజ్, ఇహిజ విస్త్రాంతిదిసం వందిజ్ తయార్ ఆని దిసం వెనుక, వెరి పుజెరిజుని, పరిసయరు పిలాతు డగ్రు కూడఃజి వాతారె, “బాబు, అయ అబద్దం వెప్పొ మొసెం కితికాన్ బత్తితి మహావలె, “మూండ్రీ దిసమకు ఆతి వెనుక నాను మరజి నీజ్నాలె” ఇజి వెప్తా మహిక మజి ఎతు మనాద్.

64 అందెజె మూండ్రీ దిసమకుదాక దూకిదిజ్ నెగెండ సుడఃదిజ్ ఆడ్ర సీఅ. సిల్లిజ వన్ని సినూర్ వాజి వన్నిజ్ వెరజి ఒసి, వాండ్రు సాతి వరి బాణిజ్ మరజి నిజీతాన్, ఇజి లొకురిజ్ వెహ్పార్. అహా కితిజి కడిఃవెరిదిక మొదొహిదనిజ్ ఇంక మరి ఒది మోసెం ఆనాద్”, ఇజి వెప్తార్.

* 27:46 27:46 కీర్తన 22:1. † 27:53 27:53 మోయాసలేం. ‡ 27:54 27:54 నయనమది వంద మఱిసిరిజ్ నడిపిసికాన్.

§ 27:59 27:59 ఉండ్రీ రకం గొప్ప విలువాతి నునాజ్ మన్ని పాతెజ్.

65 అందెజె పిలాతు, “కాప్ కినివరిజ్ ఒసి మీరు కియుదాన్ కిదెజ్ అట్టి లెకెండే దూకిదిజ్ జాగర్త కాప్ కిదు”, ఇజి వరిజ్ వెహ్లాన్.

66 వారు సొన్ని అయ దూకిదిజ్ సీలు పొకిస్తారె, జాగర్త సుడేదెజ్ కాప్ కిని వరిజ్ బ ఇడేతారె.

28

యేసు మర్జి నిజిజినాన్

1 ఏస్త్రాంతిదినం గడస్తె సొహి వెనుక, వారమదిజ్ మొదోహి దినమదు జాయ్ అజి మహివలె, మగ్గలెనె మరియాని మరి ఉండ్రి మరియ దూకిదు సుడేదెజ్ సొహారె.

2 వెటనె బూమి కద్దితాద్. ఎందనిజ్ ఇహిజి పరలోకమదాన్ ఒరెన్ దేవుణు దూత డిగిత వాత్తాండ్రె అడు మహి పణుకు ఎర్లిసి దని ముస్సు, బస్త మహాన్.

3 అయ దూత ఒడోల్ మిర్చిని జాయ్ లెకెండే మహాద్. వన్ని సొక్కెజ్ గాండులెకెండే తెలాజ్ మహి.

4 వన్నిజ్ సుడేజి కాప్ కినికారె తియెల్ అతారె వణక్కి వరి పాణం సొహి లెకెండే అత మహారె.

5 దేవుణు దూత అయ బోదెకాజ్ సుడేజి, “మీరు తియెల్ అమాట్. సిలువ పొకి ఆతిమన్ని యేసుజ్ మీరు రెబాజినిదెర్ ఇజి నాను నెసిన్.

6 వాండ్రు ఇబ్బి సిల్లెన్. వాండ్రు వెహ్లా లెకెండెనె మర్జి నిజితాన్. రదు, వాండ్రు గూర్తిమహి బాడిః సుడేదు.

7 మీరు బేగి సొన్ని వాండ్రు సొతి వరిబాణిజ్ మర్జి నిజ్తాన్. వాండ్రు మిజి ఇంక ముజాల గలీలయ సొన్నినాన్. మీరు అబ్బి వన్నిజ్ దనుల్ అనిదెర్, ఇజి వన్ని సిసూరిజ్ వెహ్లా. ఇదిలో యాక ఏలు నాను మిజి వెహ్లాన ఇజి వరిజ్ వెహ్లాన్.

8 అందెజె అవిక్ తియెల్ అజి గొప్ప సర్దదాన్ వన్ని సిసూర్జి యా మాటెజ్ వెహ్లాజ్ ఉహ్ కిన్ సొహి.

9 వెటనె యేసు వన్యా, ఎద్దు తొర ఆతాండ్రె, “మిజి నెగెండే మనిద్”, ఇజి వెహ్లాన్. అవిక్ వన్ని డగ్రు వాజి పాదమకు అసి వన్నిజ్ పడ్డిగ్గి మాడిస్తె.

10 నన్దివలె యేసు, “మీరు తియెల్ అమాట్. మీరు సొన్ని నా కూలెజి వెట గలీలయదు సొండ్రు ఇజి వెహ్లా. వారు అబె నజి దనుల్ అనారె”, ఇజి వనకాజ్ వెహ్లాన్.

11 అవిక్ సొన్ని మహిజ్, దూకిదిజ్ కాప్ కిజి మహికారె సెగెండారె పట్టుమదు సొహారె, జర్గితి సజతిజ్ విజు పెరి పుజెరిజి వెట వెహ్లాన్.

12-13 అందెజె వారు లోకురి పెద్దెల్జి వెట కూడేజి వాతారె ఉండ్రి అలోసనం కితారె. వారు అయ సయనమది వరిజ్ నండ్ డబ్బుజ్ సితారె, “మాపు నిర్ది కిజి మహివలె వన్ని సిసూర్ మదరెతు వాతారె వన్నిజ్ పెహ్లా ఒతారె ఇజి మీరు వెహ్లా.

14 యా మాట అతికారి గిబ్బుదు సొహిజి మాపు వన్నివెట వర్గిజి మిజి ఇనికబా రెవిండ నూణావ్ లె”, ఇజి వరిజ్ వెహ్లాన్.

15 అందెజె అయ సయనమదికారె డబ్బు అస్తారె వరిజ్ వెహ్లాపజనె కితారె. యా డోజకత ఏలుబా యూదురి లోఇ సొటె అజినె ముంజినాద్.

16 పదకొండు మన్ని సిసూర్ యేసు వరిజ్ వెహ్లా మన్ని గలీలయాది గొరెత్ సొహారె.

17 వారు వన్నిజ్ సుడేతిజ్ వన్నిజ్ పొగడిజి మాడిస్తారె. గాని సెగెండారె అనుమానం ఆతారె.

18 నన్దివలె యేసు వరి డగ్రు వాతాండ్రె, “పరలోకమదుని బూమి ముస్సు, విజు అతికారమకు దేవుణు నజి సిత మనాన్.

19 అందెజె మీరు సొన్ని విజు జాతిజాణి వరిజ్ నా సిసూర్ కిదు. బుబ్బి పేరుదాన్, మరిన్ పేరుదాన్, దేవుణు అత్తు పేరుదాన్ వరిజ్ బాప్తిసం సీదు.

20 మరి నాను మిజి ఆగ్గు సితెలికెండే, నాను మిజి నెన్ పిస్తి విజు వనకాజ్ లోజిజి మండ్రెజ్ ఇజి వరిజ్ నెస్సిన్. ఇదిలో నాను యా లోకమది ఆక్కరె దాక ఎలాకాలం తవ్వెండే మీవెట ముంజన్”, ఇజి వరిజ్ వెహ్లాన్.

మార్కు రాస్తే సువార్త

నెల్వు కిబిసినిక

యా పుస్తకం రాస్తికాన్ మార్కు. వీండ్రు బర్నబెజ్ దడ్రుదికాన్. విన్నిజ్ మరి ఉండ్రి పేరు యోహాను ఇజబా కూక్నార్. బర్నబని పవులు నెల్వుదాన్ పేతురువెట కూడఃజి క్రీస్తు సివపణి కిదెజ్ మార్కుజ్ అవ్కానుం దోహ్కాద్. యా సువార్త రాస్తెజ్ పేతురుబాణిజ్ నెస్తాండ్రె రాస్తాన్ ఇజి అర్థమాజినాద్. రాస్తి కాలం క్రీస్తు యా లోకమ్దు వాజి సాజి మర్ది నిజితివెనుక సెగం పంటిజ్ గడఃస్తివెనుక రాస్తాన్. ముకెలమతిక, క్రీస్తు గొప్ప పెరి బమ్మాతి పణిజ్ కిత్తి దేవుణు మరిసి ఇజి, దేవుణుదిజ్ సేవ కితికాన్ ఇజి, మార్కు రాసి తోరిస్తాన్. క్రీస్తు వెహ్తి బోదదిజ్ ఇంక క్రీస్తు కిత్తి బమ్మాతి గొప్ప పెరి పణిజి వందిజ్ లావు వెహ్ని రాస్త మనాన్. క్రీస్తు కిత్తి గొప్ప పెరి బమ్మాతి పణిజ్ పద్దెనిమితి రాస్త మనాన్. నాలిగినె కతెజ్వజ రాస్తాన్.

యోహాను దేవుణు మాటసాటిసినాన్

1 దేవుణు మరిసి ఆతి యేసు క్రీస్తు* వందిజ్ సువార్త ఇబ్బె మొదోలిసినాద్.

2 పూరిబ దినమ్కాజ్ ముజాల దేవుణు వన్ని మరిసిజ్ వెహ్తి మాటిజ్ యెసయ ప్రవక్త ఈహు రాస్త మహాన్. “ఇదిలో, నాను నా కబ్బు తన్నివన్నిజ్ నీ ముజాల పోక్కిన. లోకు నిజి ధర్మ కిదెజ్ ఇజి వాండ్రు నీ ముందల నీ సరి నెగెండ్ కినాన్†.

3 బిడిఃమ్బూమిదాన్ వాండ్రు ఈహు డేల్ని వెహ్నినాన్ ప్రబుజ్ లోకుడగ్రు వాదెజ్ సరి తయర్ కిదు. ప్రబుజ్ లోకుడగ్రు వాదెజ్ సరి తినాజ్ కిదు‡”.

4 యెసయ ప్రవక్త వెహ్తివజి యోహాను బిడిఃజ్ బూమిదు వాతాన్. “లోకుర్ పాపమ్కు డిఃసిసిజి బాప్తినం లాగి ఆదు. దేవుణు పాపమ్కు సెమిస్తాన్ ఇజి వెహ్ని యోహాను బాని లోకాజ్ బాప్తినం సీజి మహాన్.

యేసు బాప్తినం లాగి ఆజినాన్

5 యూదయ దేనిమ్దికార్ విజెరి, యెరూసలేం పట్టుమ్దికార్ విజెరి సోత్తారి యోహాను డగ్రు వాతార్. వారు పాపమ్కు ఒప్ప కొటార్. యోహాను వరిజ్ యొర్దాన్ గడ్డాదు బాప్తినం సితాన్.

6 యోహాను ఒంటి బులుస్కాణిజ్ తయార్ కిత్తి సొక్క పొర్బాజె, నడఃముదు తోలు బెల్లు తోహ్తా మహాన్. వాండ్రు మెపిలెక్కి అడిఃవి తేని తింజి మహాన్.

7 యోహాను లోకాజ్ ఈహు వెహ్ని వెహ్తాన్, “నా వెనుక ఒరిన్ వానానై. వాండ్రు నజి మిన్ని నండ్ పెరికాన్. వన్ని జోడు బెల్టు కూతెజ్బా నాను ఏవటితికాన్ ఆవి.

8 నాను మిజి ఏరుదు బాప్తినం సీజిన. నా వెనుక వానికాన్ దేవుణు ఆత్మదాన్ బాప్తినం సీనానై”.

9 ఆ దినమ్కాజ్ ఒర్పెండు యేసు గలీలయదు మన్ని నజరేతుదాన్ యొర్దాన్ గడ్డాదు వాతాన్. అబ్బె యోహాను యేసుజ్ యొర్దాను గడ్డాదు బాప్తినం సితాన్.

10 గడ్డదాన్ వెల్లి వాజిమహిజ్ ఆగాసం రే ఆతాదె దేవుణు ఆత్మ పావరపాటి లెకెండ్ వన్ని ముస్సు. వానిక యేసు సుడఃతాన్.

11 “నీను నాను ప్రేమిసిని నా మరిన్. నీ వందిజ్ నాను నండ్ సర్గ ఆజిన”, ఇజి పరలోకమ్దాన్ ఉండ్రి కంటం వాతాద్.

12 వెటనె దేవుణు ఆత్మ యేసుజ్ బిడిఃమ్ బూమిదు పోక్నాన్.

13 వాండ్రు అబ్బె నలవయ రోస్కు రెయూపాగల్ మహాన్. సర్యాన్ యేసుజ్ తప్ప కిబిస్తిజ్ పరిన కిజి సుడఃతాన్. అబ్బె అడిఃవి జంతుజ్వెట మహాన్. దేవుణుదూతార్ వన్నిజ్ నెగెండ్ సుడఃతార్.

యేసు సిసూరిజ్ కూక్కినాన్.

* 1:1 1:1 లోకాజ్ రక్తిస్తెజ్ దేవుణు ఏరేపాటు పోక్కినాన్. † 1:2 1:2 మలాకి 3:1. ‡ 1:3 1:3 యెసయ 40:3.

14 హేరోదు రాజు యోహానుజ్ బెలిదు ఇడితివెనుక యేసు గలీలయదు సాహంధ్రే దేవుణునువార్త బోదిస్తాన్.

15 “దేవుణు ముజాల్పా ఏర్పాటు కిత్తి టయం ఏలు వాతాద్. దేవుణు ఏలుబడికి కిని గడియ డగ్రు ఆత మనాద్. మీ పాపమకు ఒప్పుకోడేజి డిసిసిదు, నాను వెప్పి నువార్త నమ్మిదు”, ఇజి యేసు వరిజ్ బోదిస్తాన్.

16 యేసు గలీలయ సమదరం ఒడ్డుదాన్ సొన్నిమహిజ్ సీమోనుజ్ని వన్నితంబెరిసియాతి అంద్రెయెజ్ సుడేతాన్ వారు సమదరమదు వల పొక్కి మొయేజ్ అసి మహార్. ఎందానిజ్ ఇహిజి వారు జాలెరిజు.

17 “నా వెట రదు. లోకాజ్ ఎలాగ నా సిసూర్ కిదెజ్ ఇజి నెప్పిస్తాలె”, ఇజి యేసు వరిజ్ వెప్తాన్.

18 వారు వెటనె వలేజ్డిసి వన్నివెట సాహార్.

19 యేసు కండెక్ దూరం నడిజి సాహిజ్ జెబెదెయ మరిసి యాకోబుని, యాకోబు తంబెర్ని యోహాను, వరిడోణిదు బసి వలేజ్ నెగెండ్ కిజి మహిజ్ సుడేతాన్.

20 యేసు వరిజ్ సుడేతివెటనె కూక్తాన్. వారు అప్పొనిజ్, వన్నివెట కూడేజి వణికినివరిజ్ డోణిదు డిసి యేసువెట సాహార్.

యేసు దెయమదిజ్ ఉల్ఫినాన్

21 యేసుని వన్నిసిసూర్, కవెర్నూము ఇని పట్టమదు సాహార్. విస్తాంతిదినమదు యేసు యూదురి మీటిజ్ ఇండ్రో సాహంధ్రే నేరిప్పిజ్ మొదొల్తాన్.

22 యేసు నెప్పిస్తక విహార్ లోకుర్ నండో బమ్మ ఆతార్. ఎందానిజ్ ఇహిజి యూదురి రూలు నెప్పిప్పివరి లెకెండ్ ఆవండ నండో అతికారమదాన్ మన్ని వన్నులెకెండ్ నెన్పిస్తాన్.

23 నస్తివలె వరి మీటిజ్ ఇండ్రో దెయం అస్తి మహికాన్ ఒరెన్ మహార్.

24 వాండ్రు “నజరేతుదికి యేసు, మా వెట నిజి ఇని వణి? మా వణి విజి అడు కిదెజ్ వాతిదా? నీను ఎయెండ్రో ఇజి నాను నెసిన్. నీను దేవుణు బాణిజ్ వాతి నెగ్గి వాండ్రు”, ఇజి డటం గగోలాజి వెప్తాన్.

25 అందెజి యేసు, “అల్లెజి మన్అ. విప్పిజ్ డిసి వెల్లి రఅ”, ఇజి ఆ దెయమదిజ్ కోపం దాన్ వెప్తాన్.

26 అయవలె అయ దెయం అది అస్తిమహివన్నిజ్ దూక్కి డట్టం డేల్స్తాదె డిస్త సాహద్.

27 అబ్బె మనికార్ విజెరె ఇక సుడేతార నండో బమ్మ ఆతార్. “ఇక ఇనిక? వీండ్రు కొత్త నజతిజ్ నెర్పిసినాన్. దేవుణు సత్తు దాన్ అతికారమదాన్ వీండ్రు సాన్అ ఇజి దెయమకాజ్ వెప్పిస్తాన్. అవి డిసి సొన్నినె”, ఇజి ఒరెన్ వెట ఒరెన్ వర్గితార్.

28 వన్ని వందిజ్ మాటజ్ అయా గలీలయ ప్రాంతం సుటుల విజు వెటనె సెద్రితె.

యేసు నండోడారిజ్ నెగెండ్ కిజినాన్.

29 వారు మీటిజ్ కిని ఇండ్రోణాజ్ సొన్ని యాకోబు, యోహానువెట, కూడితార సీమోను, అంద్రెయె ఇని వరి ఇండ్రో సాహార్.

30 సీమోను మీమ్మి నోబు అస్త మహద్. వారు వెటనె దని వందిజ్ యేసు వెట వెప్తార్.

31 యేసు దని డగ్రు వాజి కిదిజ్అసి దనిజ్నిక్తాన్. నస్తివలె నోబు డిస్తాద్. నోబు డిస్టిజ్ అది వరిజ్ ఉండెజ్ సీతాద్.

32 పొద్దు సాహి ఆతివలె లోకుర్ నండో నండో రకమకాణిజ్ బాద ఆజి మహివరిజ్ దెయమకు అస్తివరిజ్ విజెరిజ్ యేసు డగ్రు తత్తార్.

33 పటనమదికార్ విజెరె ఆ ఇల్లు ముజాల్ కూడిత మహార్.

34 యేసు నండో రకమకాణి జబ్బుమహి నండోడారిజ్ నెగెండ్ కిత్తాన్. దెయం అస్తివరిబాణిజ్ వన్కాజ్ ఉల్ఫాన్. వీండ్రు దేవుణు మరిసి ఇజి దెయమకు నెస్తి మహి అందెజి వాండ్రు వన్కాజ్ వర్గివండ కిత్తాన్.

యేసు గలీలయదు సాటిసినాన్

35 మర్న నాండిజ్ యేసు సీకటి మంబునె నిజ్జి పెందల ఎయెర్ సిల్లి ఉండ్రెబాడ్డిదు సాహంధ్రే పార్లనం కిత్తాన్.

36 సీమోను, వన్ని వెట మహికార్, యేసుజ్రెబాజి మహార్.

37-38 యేసుడు నుడొకతారె, “విజేరె నిజి రెబాజినార్”, ఇజి వెహ్మిజ్ యేసు, “డగ్రు మని మరి పట్టుమ్కాజ్ బా సొనాట్. నాను అబెబా దేవుణు మాటిజ్ సాటిస్తెబ్బలె. దన్ని వందిజె నాను వాత మన్ను”, ఇజి వెహ్మిజ్.

39 యేసు గలీలయ విజు బూలాజి యూదురు మీటిజ్ కిని ఇల్లాజ్ బోదిస్తాన్. దెయం అన్తి వరిబాణిజ్ వన్నాజ్ ఉల్తాన్.

యేసుప కుస్తు రోగం ఆతివన్నిజ్ నెగెండ్ కిజినాన్.

40 ఒరెన్ కుస్తు రోగం మనికాన్ యేసు డగ్రు వాజి ముణుకుజ్ ఊరిజి, “నిజి ఇన్సం మహిజ నజి నెగెండ్ కిదెజ్ అట్ నీ”, ఇజి బతిమాలితాన్.

41 యేసు వన్ని మున్ను కనికారం ఆజి కియు సాప్పి వన్నిజ్ ముట్టి, “నజి ఇన్సం నీను నగెండ్ ఆఅ”, ఇజి వెహ్మిజ్.

42 వెటనె వన్నిజ్ మహి జబ్బు డిస్తాద్. వాండ్రు నెగెండ్ ఆతాన్.

43-44 అయవలె యేసు, “ఎయెవెటబా ఇనికబా వెహ్మి. నీను తినాజ్ సొన్ని నీ ఒడొల్తయూద పుజేరిజ్ తోరిన్ అ. నీను నెగెండ్ ఆతి వందిజ్ మోసి ముజాల్ ఆడ్ర సితివజ దేవుణుదిజ్ నంత సిఅ” అహె నీను నెగెండ్ ఆతి ఇజి లోకురిజ్ తోరిన్ అ”, ఇజి కనితం వెహ్మి పోక్తాన్.

45 గాని ఆ నెగెండ్ ఆతికాన్ సొన్ని వాండ్రు నెగెండ్ ఆతిక విజేరిజ్ మరి ఒద్దె వెహ్మిజ్. అహిజ్ బా విజుబాణిజ్ నండె లోకురి యేసుబాన్ వాతార్.

2

యేసు కిక్కు కాల్కు అర్తివన్నిజ్ నగెండ్ కిజినాన్

1 నెగెం రోమ్కు ఆతి వెనుక యేసు మరి కపెర్నహముదు వాతాన్. వాండ్రు ఇండ్రో వాతాన్ ఇని విజెరె వెహ్మిజ్.

2 నండె లోకురిబాన్ కూడిజి వాతార్. అన్తెజ్ అట్ ఇ లోకురివాతార్. అందెజె ఇల్లు లోఇబా అరబుదుబా బాడ్డి సిల్లెండ ఆతాద్, యేసు వరిజ్ దేవుణు మాటిజ్ బోదిస్తాన్.

3 కిక్కు కాల్కు అర్తి వన్నిజ్* నాల్వెర్ పిండిత తతారె నెగెండార్ యేసుబాన్ వాతార్.

4 అబ్బు నండె లోకురి మహిజ్ వన్నిజ్ యేసు డగ్రు ఒతెజ్ అట్ ఏండ ఆతార్. అందెజె యేసు నిహిమహి జాగమున్ను మెడదిజ్ బోరోకితారె ఆ జబ్బు ఆతివన్నిజ్ సాపదాన్ యేసు నిల్పి మహిబాన్ డిప్తార్†.

5 వన్నిమున్ను మని వరి నమకం నుడొకతారె, యేసు జబ్బు ఆతివన్నివెట కాలయెజ్ నీ పాపమ్ కు సెమి ఆతె మన్నె”, ఇజి వెహ్మిజ్.

6 అబ్బు నెగెండార్ యూదురి రూలు నేర్పిన్సికార్ బస్త మహార్. వారు మనున్నుదు.

7 వీండ్రు ఎందానిజ్ ఈహు వెహ్మిజ్ నాన్. వీండ్రు దేవుణువెట సమానం ఆతికాన్ ఇజి దేవుణుదిజ్ దూసిసినాన్. దేవుణు ఒరెండ్రె పాపమ్ కు సెమిన్సికాన్ గదె”, ఇజి వారు ఒడిజిబితార్.

8 వారు ఈహు ఒడిజిబిజినిజ్ యేసుజ్ వెటనె తెలితాద్. యేసు వరిజ్ వెహ్మిజ్, “ఎందానిజ్ మీరు మీ మనున్నుదు అహె ఒడిజిబినిదెర్?

9 యా జబ్బుది వన్నిజ్ నీ పాపమ్ కు సెమి ఆతె మన్ను ఇజి వెహ్మిజ్ క సులునా? నీను నిజిజి సాప పెర్తి నడిజి అ ఇజి వెహ్మిజ్ క సులునా?

10-11 లోక్కు మరిసి ఆతి నజి లోకురి పాపమ్ కు సెమిన్సిజ్ బూమి మున్ను అతికారం మనాద్. ఇజి మీరు నెహ్మిజ్ వలె ఇజి వెహ్మిజ్ కిక్కు కాల్కు అర్తి వన్నిజ్ “నాను నిజి వెహ్మిజ్, నిజ్ అ, నీ సాప అసి ఇండ్రో సొన్ అ”, ఇజి వెహ్మిజ్.

* 2:3 2:3 వక్రవయపు ఇనిజబ్బుదాన్ నడిజెజ్ అట్ నాన్ † 2:4 2:4 అయ దేసంతు మేడడెజ్ ఎలాగ తయార్ కిన్ ఇహిజ పటిజ్ పప్పి దన్నిమున్ను దుల్లిదాన్ పణుకుజ్ దాన్ మేడ పోక్తార్. మేడ మున్ను ఎక్తెజ్ ఇహిజ పాపమ్ కు మన్నె

12 వెటని ఆ కిక్కు, కాల్యు, అర్చికాన్ నిజ్జి వన్ని సాప అసి వారు విజేరె సుడోజి మహిజ్ నడిజి సాహాన్. అక్క నుడిజతారె వారు విజేరె బమ్మ అతార. “నిన్ని వణి మాట్ ఎనెజ్బా తోవట్” ఇహార దేవుణుదిజ్ స్తుతి కితార.

పను పెర్చికాన్ లేవిజ్ యేసు కూక్చినాన్

13 యేసు మరి గలీలయ నమ్దరం గట్టుదు సాహాన్. లోకుర వన్ని డగ్ర వాతిజ్ వరిజ్ దేవుణు మాటెజ్ నెస్సిస్తాన్.

14 యేసు నడిజి సొన్ని మహిజ్ అల్పయజని వన్ని మరిసి లేవి[‡] ఇని పను పెర్చికాన్ ఒరెన్ వన్ని ఆపినురు బస్తమహిక సుడోజతాన్. యేసు వన్నిజ్ “నీను నా సినుడు అఅ. నా వెట రఅ”, ఇజి వెహ్సాన్. లేవి నిజ్జితాండ్రె యేసువెట సాహాన్.

15 వెనుక యేసు లేవి ఇండ్రె బోజెనమ్దిజ్ బస్తాన్. సెఇ వణి కినికార అబ్బె మహార. పను పెర్చికార వారు యూదురు వెహ్సా రూలు వజ నడిజకార. ఎసాండ్రె లోకుర యేసువెట మహార. వారుబా యేసు, వన్ని సిసూరవెట బోజెనమ్దిజ్ బస్తార.

16 పరిసయరు లోఇ మన్ని యూదురి రూలుజ్ నెన్పిన్నికార వనిజ్ సుడోజి “ఎందనిజ్ వీండ్రు పన్నుపెర్చివరివెటని పాపం కినివరివెట ఉణిజనాన్”, ఇజి సిసూరిజ్ వెన్బాతార.

17 యేసు ఆ మాట వెంజి “నెగెండ నిల్లివరిజ్ డాక్టరు కావాలి. నెగెండ మన్నివరిజ్ ఎందానిజ్లు మరి డాక్టరు. నీతి నిజమాతి మన్నివరిజ్ అవ్ది. పాపం కితివరిజ్ కూకెక్తెజె నాను వాత మన్ను, ఇహాన్.

ఉపాన్ వందిజ్ యేసుజ్ వెన్బాతార

18 అయవలె బాప్తీసం సీని యోహాను సిసూరని, పరిసయరు, యూదురి రూలువజి ఉపాన్కిజి మహార. నెగెండ్రె లోకుర వాజి యేసుజ్ వెన్బాతార, “యోహాను సిసూర ఉపాన్కిజినార, పరిసయరి సిసూర ఉపాన్కిజినార, ఎందానిజ్ నీ సిసూరి ఉపాన్కివరి?”

19 యేసు ఈహు వెహ్సాన్, “పెండ్లి కూలెజ్ పెండ్లిదజ్జడవెట మన్నివెలె ఉపాన్ మండ్రెజ్ అటూరా? పెండ్లిదజ్జడవరివెట మన్నివలె వారు ఉపాన్ మండ్రెజ్ అట్వరి.

20 పెండ్లిదజ్జడజ్ వరి నడిమిహాన్ ఒని దినం వానాద్లె. అయ రోజు వారు ఉపాన్మంజినార.

21 యేసు మరి వెహ్సాన్: “ఎయెరబా పాడాయ్ పాతదు కొత్త ముక్క కూడొప్పె గుత్వరి. ఆహె కితిజి అయకొత్త పాత ముక్క వడాయి పాతదిజ్ లాగ్గాదె బోరొ ఒద్దె లావు ఆనాద్.

22 “ఎయెరబా వడాయ్ తోలునన్నిదు కొత్త ద్రాక్కకలు వాక్వన్. అహె కితిజి కొత్త ద్రాక్కకలు పాజు వాజి అయ సన్ని పెడెల్నాద్. ద్రాక్కకలు విజి వాజ్న సొనాద్. సన్ని పాడునాద్. అందెజె కొత్త ద్రాక్కకల్లు కొత్త తోలు సన్నిదునె వాక్తెజ్”.

యేసు విజి వన్యాజ్ మున్ను ప్రబు

23 ఉండ్రె విస్త్రాంతి దినమ్దు యేసుని సిసూర పంట గుడ్డెదాన్ నడిసి సొన్ని మహార. అయవలె సిసూర నెరేకె తెప్పి మహార.

24 పరిసయరు అయక సుడోజతారె, “ఇదిలో ఎందానిజ్ వారు విస్త్రాంతి దినమ్దు రూలుదిజ్ తప్పినార. ఇజి వన్నిజ్ వెహ్సార.

25 అయవలె యేసు వెహ్సాన్, “దావీదురాజు, వన్నివెట మహి లోకుర బజి కట్టిజ్ వాండ్రు ఇనిక కిత్రాండ్రె ఇజి మీరు ఎనెజ్బా నద్విజదెరా?”

26 అబ్యాతారు ఇనికాన్. విజెరె పుజెరిజి మున్ను పెరి పుజెరి మహివలె దావీదురాజు సమాజి గుడారమ్దు డుగితాండ్రె, దేవుణు ఎద్దు ఇడ్డి రొట్టెజ్ లాగితాండ్రె తిహాన్. అక్క పుజెరి తప మరి ఎయరరబా తిండ్రెజ్ అవ్ది గాని తిహాండ్రె వన్నివెట మహిపరిజ్బా సిత్తాన్.

27 వెనుక యేసు వరిజ్ వెహ్సాన్, “ముజాల్ దేవుణు లోకుదిజ్ విస్త్రాంతిదినం ఏర్పాటు కిత్తాన్. గాని విస్త్రాంతి దినమ్వందిజ్ లోకుదిజ్ ఏర్పాటు కివ్న్.

[‡] 2:14 2:14 వన్నిజ్ మరి ఉండ్రె పేరు మత్తయి వన్ని వణి వన్నుపెర్చికాచె.

28 లోకుమరిసి అతి పిట్టి నజీ విజు వన్యూజ్ మున్సు అతికారం మనాద్. మరి, విప్రాంతి దినమ్దు ఇనిక కిదెజ్ ఇజ లోకాజ్ వెప్తాజ్ బా అతికారం మనాద్.

3

యేసు కియు అర్దివన్నుజ్ నెగెండ్ కిజినాన్

1 మరి యేసు యూదురి మీటిజ్ ఇండ్రో సోహాన్. అబె ఉండ్రి కియు అర్దికాన్ ఒరెన్ మహాన్.

2 అబ్బొ మహికార్ నెగెండాల్ యేసు యా జబ్బుదివన్నుజ్ విప్రాంతిదినమ్దు నెగెండ్ కినాండ్రో ఇజి బాగ సుడిజి మహార్. ఎందనిజ్ ఇహిజ విప్రాంతిదినమ్దు ఇని పణిబా కిదెజ్ ఆవద్ కాక యేసుజ్ ఇని దన్నుజ్ బా తప్పు మొప్పెజ్ ఇజి సుడిజి మహార్.

3 యేసు కియు అర్దివన్నుజ్, “విజేరి ముజాల వాజి నిల్ అ”, ఇజి వెప్తాన్.

4 నస్తవల్ యేసు, “దేవుణు మోనిజ్ సితి రూలువజ విప్రాంతి దినమ్దు నెగ్గి పణి కిదెజా, సెఇ పణి కిదెజా? పాణం అర్దిపెజ్ నా? ఇజి పరిజ్ వెన్ బాతాన్. గాని వారు అలెతార్.

5 పరి మన్సు గర్వాజ మహిజ్ యేసు నండ్ దుకం ఆతాన్. కోపం దాన్ పరిజ్ సుడెతాన్. అయు కియు అర్దివన్నువెట, “నీ కియు నవ్ అ”, ఇజి వెప్తాన్. వాండ్రు కియు సాప్తిజ్ ఆ కియు నెగెజ్ ఆతాద్.

6 నస్తవల్ పరినయరు వెల్లి సాహి వెటనె హెరోది ఇని పరివెట కూడెజి యేసుజ్ ఎలాగ్ నప్పెజ్ ఇజి ఆలోసనం కితార్.

యేసువెట మంద లోకుర్ సొన్సినార్

7 అందెజి యేసు వన్ని సిసూర్ వెట గలీలయ నమ్దరంబాన్ సోహాన్. మందలోకుర్ గలీలయదాన్ పరివెనుక సోహార్.

8 యేసు కిత్తి గొప్ప పణిజి వెంజి యూదయ దేసెమ్దు మన్ని విజు వాన్యూజికార్, యెరూసలేందాన్, నమ్దరం పడకాద్ తూరు సిదోసు ఇని పట్టుమి ప్రాంతమకాజ్ వాతి నండ్రో లోకుర్ వన్నుబాన్ వాతార్.

9 నండ్రో లోకుర్ వాజి మహిజ్ నిల్పిమండ్రెజ్ ఇహెకు ఆజి దన్ని మున్సు అఎండ మండ్రెజ్ ఉండ్రి ఇజి డోణి తని బానె ఇడెదు ఇజి సిసూర్ వెట యేసు వెప్తాన్.

10 ఎందానిజ్ ఇహిజ నండ్రోడాంజ్ యేసు నెగెజ్ కితాన్. అందెజి జబ్బు అతిమహికార్ విజేరి యేసుజ్ ముట్టెజ్ ఇజి నెక్కె ఆజి సోహార్.

11 దెయం అస్తికార్ యేసుజ్ సుడెతివెటనె వన్ను ముజాల్ ముణుకుజ్ ఊరిజి, పడగెజి మాడిస్తారె “నీసు దేవుణు మరిసి”, ఇజి గగోలాతార్.

12 “నాను ఎయెన్ ఇజి ఎయెర్ వెట వెప్తాట్”, ఇజి యేసు పరివెట కనితం ఆడ్ర సిత్తాన్.

యేసు పన్నెండు మణిసిరిజ్ అపొస్తురువజి ఏర్పాటు కిజినాన్.

13 వెనుక యేసు ఉండ్రి గొరోత్ ఎక్కి సోహాండ్రె వన్నువెట ఒతెజ్ వాండ్రు కోరితిపరిజ్ వన్ను డగ్రు కూక్తాన్. వారు వన్నుబాన్ సోహార్.

14 యేసు పన్నెండు మనిసిరిజ్ వన్నుబాన్ మండ్రెజ్ ఇజి, దేవుణు మాట విజేరిజ్ వెప్పివందిజ్ షొక్రెజ్ ఇజి ఏర్పాటు కితాన్. (విరిజె అపొస్తురు ఇజి కూక్తాన్)

15 దెయమ్కాజ్ ఉల్పెజ్ అతికారం వరిజ్ సితాన్.

16-19 యా పన్నెండు మణిసిరి ఎయెర్ ఎయెర్ ఇహిజ సీమోసు (యేసు వన్నుజ్ పేతురు ఇని పేరు సితాన్) జెబెదయ మరిసిర్ యాకోబు, వన్ను తంబెరిసి యోహాను ఇనికార్ (యేసు వరిజ్ బొయనర్గసున్ ఇని పేరు సితాన్. దన్ను అర్థం ఇనిక ఇహిజ దీడెజినికార్ ఇజి) అంద్రెయ, పిలిప్ప, బర్తోలోమయ, మత్తయి, తోమా, అల్ఫయ మరిసి యాకోబు, తద్దయ, యుదయ దేసెంవందిజ్ ఉసారాజిని సీమోసు*, యేసుజ్ యూదురు అతికారిజి కీదు ఒవజిప్పికానాతి ఇన్సరియోతు యూద.

యేసు బయల్ జెబ్బులు ఇని దెయం సాయందాన్ దెయమ్కాజ్ ఉల్పిన్నాన్ ఇహార్.

* 3:16-19 3:16-19 రోమాది ఏలుబడిదాన్ యూదురు దేసెవందిజ్ విడుదల కిదెజ్ ఉసార్దాన్ సుడెజిని యూదురు నజం మనాద్. అయా నజమదికాన్ ఒరెన్ సీమోసు

20 యేసు ఉండ్రొ ఇండ్రో వాతిజ్ మరి నండో లోకుర్ అబ్బె కూడితార్. అందెజె యేసుజ్ని సిసూరిజ్, బోజనం కిదెజ్బా కాలి సిల్లెతాద్.

21 యేసు ఇండ్రొణికార్ యా సజతి విహారె వన్నిజ్ మత్తి సెద్రితాద్ ఇజ వెప్పొ వన్నిజ్ అస్సెజ్ సాహార్.

22 యెరూసలేమదాన్ వాతి యూదురి రూలుజ్ నెస్సిస్సికార్ వెప్టార్, “దెయమ్కాజ్ నెయ్కి ఆతి బయల్జెబ్బులు[†] వన్నిజ్ అస్సాన్. వన్ని సత్తుదాన్ వీండ్రు దెయమ్కాజ్ పేర్జినాన్”, ఇజ వెప్టార్.

23 నస్సివలె యేసు వరిజ్ కూక్కి వరిజ్ అర్లమాదెజ్ కత వజ ఈహూ వెప్టాన్, “సయ్తాన్ సయ్తానుజ్ ఎలాగ ఉల్స్సాన్.

24 ఉండ్రొ దేసమ్దికార్ వరిజ్ వారె జటిజాజి ఎర్లిజి మహిజ అయ దేసెం పాడానాద్.

25 ఉండ్రొ ఇండ్రొణికార్ వరిజ్ వారె జటిజాజి ఎర్లిజి మహిజ ఆ కుటం పాడానాద్.

26 సయ్తాన్ వన్ని గుంపుదు మన్నివరివెట జటిజాజి కేట ఆతిజ నండో కాలం వరిముస్సు ఏలుబడిః కిదెజ్ అట్వన్.

27 ఒరెన్ సత్తుమన్ని వన్నిజ్ ముజాల తోహావీండ, ఎయెర్బా వన్ని ఇండ్రొ డుగ్గెజి సామనమ్కు ఒత్తెజ్ అట్వన్. ముజాల వన్నిజ్ తోప్పిజానె డొజ కిదెజ్ అట్వార్[‡].

28 నాను నిజం వెప్పొన, లోకుర్ కినివిజు పాపమ్కాజ్ని, దూసిసిని మాటిజ్ దేవుణు సెమిస్సాన్.

29 గాని దేవుణు ఆత్మదిజ్ దూసిస్తిజి వన్ని పాపం ఎనెజ్బా సెమిస్వన్. వన్ని పాపం ఎలా కాలం మంజినాద్”.

30 యేసు ఈహూ ఎందానిజ్ వెప్టాన్ ఇహిజ సయ్తాన్ సాయమ్దాన్ యేసు దెయమ్కాజ్ ఉల్స్పొనాన్ ఇజ యూదురి రూలుజ్ నెస్సిసినికార్ వెప్టార్.

యేసు అయ్సి తంబెర్సిర్

31 యేసు అయ్సిని తంబెర్సిర్ వాండ్రు మన్ని ఇల్లుముజాల్ వాతారె యేసుజ్ కూక్కి తగ్గ అ ఇజ ఒరెన్వన్నిజ్ ఇండ్రొ పోక్తార్.

32 అయ ఇండ్రొ యేసు సురుల నండో లోకుర్ బస్త మహార్. వారు వెప్టార్, “నీ యాయ తంబెర్సిర్ వెల్లి నిహారె నిజి కూక్కినార్”.

33-34 దనిజ్ యేసు, “నా యాయ? నా తంబెర్సిర్ ఎయెర్ ఇజ నాను వెప్పొ”. అబ్బె సురుల బస్తిమనివరిజ్ సుడేజి యేసు వెప్టాన్, “ఇదిలో నా యాయని, నా తంబెర్సిర్”.

35 “ఎందనిజ్ ఇహిజ దేవుణుదిజ్ ఇస్సమాతివజ కినికాండ్రె నా తంబెరి, నా తజి, నా యాయ ఇజ వెప్టాన్.

4

విత్కు విత్తివన్ని కత

1 యేసు మరి ఒర్పు గలీలయ సమ్దరం పడకాదు నెన్పిస్తిజ్ మొదోల్స్తాన్. మందలోకుర్ వన్ని డగ్రు వాతిజ్ సమ్దరమ్దు ఉండ్రొ డోటిదు ఎక్కి బస్తాన్. లోకుర్ విజెరి సమ్దరం పడకాదు నిహార్.

2 అయవలె వాండ్రు నండో సజతిజ కతవజ వరిజ్ నెస్సిస్తాన్. వాండ్రు ఉండ్రొ సజతి కత వజ ఈహూ వెప్టాన్.

3 సుడేదు, ఒరెన్ రయ్యు వాండ్రు విత్కు విత్తెజ్ సాహాన్.

4 వాండ్రు విత్తి మహిజ్ సెగం విత్కు సరి పడకాదు అరై. ఆ పొటిజ్ వనకాజ్ పెప్పె తిహె.

5-6 మరి సెగం విత్కు సటు ముస్సు లావ్ డుల్లి సిల్లిబాన్ అరై. డుల్లి లావు సిల్లితిజ్ అవి వెటెన నేర్కొని వెల లొఇ సాన్ఇజ్ పొద్దు సాసి ఎండ తాక్కివలె అవి సాతె సాహె.

7 మరి సెగం విత్కు సాప్పు తుపెజ్ లొఇ అరై. సాప్పు తుప్పెజ్ పిరికాజ్ తిగితె. అందెజె పంట పండవితాద్.

8 మరి సెగం నెగ్గి బూమిదు అరై. అక్కెజ్ నేర్జి పిరితెనె విత్తి విత్కుదిజ్ ముప్పుయ్ వంతుజ్ లెక్క పండితె.

9 యేసు మరి వెప్టాన్, “గిబ్బిజ్ ఒడేజి వెంజి అయవజ నడిఃజి మండ్రు”.

† 3:22 3:22 యాక సయ్తానుజ్ మరి ఉండ్రొ పేరు ‡ 3:27 3:27 సత్తుమన్నికాన్ ఇజ యేసు సయ్తాన్ వందిజ్ వెప్పొనాన్. సయ్తాన్ ముస్సు యేసుజ్ సత్తు మనాద్ ఇజ వెప్పొనాన్.

10 యేసు ఒరెండ్రె మహిజ్ పన్నెండు మణిసిర్ సిసూర్ని మరి సెగొండార్, “నీను కత వజ నెన్పిన్తి మాటెజ అర్తం ఇనిక?”, ఇజ వన్నిజ్ వెన్బాతార్.

11-12 అందెజె యేసు, “దేవుణు కిని ఏలుబడిః వందిజ్ డాజితిమహి గొప్పు సజతిజ్ దేవుణు మిజి తెలివి కిత్ర మనాన్. గాని మహిపరిజ్ విజుబా కతవజ నెన్పిన్తిజ్ ఎందానిజ్ కతవజ వెస్తా ఇహిజ “వారు సుడిఃనార్ గాని తోవర్. వెండ్రెజ్ ఇహిజ వెంజినార్ గాని అర్తం కిదెజ్ అటవర్. ఎందానిజ్ ఇహిజ వారు అర్తం కిజి వరి పాపమ్మకు సెమిస్సాన్*” ఇహాన్.

13 యేసు వరివెట వెప్తాన్, “రయ్యువన్ని వందిజ్ నాను కతవజ వెప్తాక మిజి అర్తం ఆవిదా? ఆహిజ నాను కతవజ వెప్తాకెజ్ విజు మిజి ఎలాగ తెలినాద్?

14 విత్తికాన్ దేవుణు మాట వెప్పికాన్.

15 సెగొండార్ విత్తు అర్తి సరి పడఃకనన్నికార్. వారు వెహివెటనె సయ్యూన్ వాజ ఆ మాటెజ్ లాగ్గి ఒసినాన్.

16 మరి సెగొండార్ విత్తు అర్తి సటుపణుకు మున్ను మన్ని ఇస్సా నన్నికార్. వారు దేవుణుమాట వెహివెటనె సర్దదాన్ మన్నుదు ఇడ్పార్.

17 గానివెల లొఇ సాన్ఇలెకెండ్ దేవుణుమాట వరి మన్ను లొఇ సాన్విద్. వారు కండెక్ కాలం సమ్మిజి మంజినార్. దేవుణుమాట సమ్మితి వందిజ్ కస్టమ్కు మాలైజ్, వాన్వెలె దేవుణు మున్ను మన్ని వరి సమకం వెటనె డిన్న సినార్.

18-19 మరి సెగొండార్ విత్తు అర్తి సాప్పు తుపెజ్ నేర్పి బూమివజ మనార్. గాని ఎలాగ బత్తిదెజ్ ఇని వందిజ్ మన్ని వినారం, డబ్బు గణిసిని వందిజ్ మన్ని ఆస విజు కూడిఃజి వారు దేవుణుదిజ్ సమ్మివిండ కిదెజ్ వారు వెహి మాటదిజ్ అణను తిగ్జెనె. పంట పండవిండ అతిలెకెండ్ వారుబా ఆజినార్.

20 సెగొండార్ అర్తి విత్తునెగ్గి బూమిదువజ మనార్. వారు దేవుణుమాట వెంజి అర్దం కిజి దేవుణు మున్ను సమకం ఇడ్పార్. నెగ్గి బూమిదు అర్తి విత్తు బస్త్రణిదిజ్ ముప్పుదు బస్త్రజ్ అర్వయ్ బస్త్రజ్ వంద బస్త్రజ్ పండ్డివజ వారు మంజినార్.”

దీవ జాయ్ సీనివజ కంతుద్ ఇడ్జెజ్

21 యేసు వరివెట ఈహు వెప్తాన్, “దీవ కసిసి అబల మూక్కినొ మన్నం అడిఃగినొ ఎయెరుబా ఇడ్విర్. జాయ్ సీనివజ దీవ కంతూదు ఇడ్పార్.

22 ఎందానిజ్ ఇహిజ ఏలు డాఃజితి మన్నికెజ్ విజు ఒర్పెండ్ తోరె ఆనె.

23 మీరు గిబ్బిజ్ ఒడఃజి వెంజి అయావజ సడిఃజి మండ్రు”.

24 యేసు మరి వెప్తాన్, “మీరు వెహిక జాగర్త అర్దం కిదెజ్వలె. మీరు నెగ్గెండ అర్దం కిజిమహిజ, దేవుణు వన్ని మాటెజ్ అర్దం కిచిస్సాన్లె. ఒబ మరి ఒద్దె అర్దం కిచిస్సాన్లె.

25 నాబాణిజ్ వెంజి అర్దం కిజినివన్నెజ్ దేవుణు మరి తెలివి కినాన్. గాని వెంజి అర్దం కిజివన్నిబాణిజ్ వాండ్రు అర్దం కిత్తి మన్నికెజ్బా లాగాన్వన్”.

నెరజి పిరిసిని విత్తువందిజ్ కత

26 యేసు మరి వెప్తాన్, “దేవుణు ఏలుబడిః ఈహు మనాద్. ఒరెన్ రయ్యు వాండ్రు విత్తు బూమిదు విత్తినాన్.

27 వాండ్రు రెయ్యూజ్నిర్ కిజి పెందల నిజిజి మంజినాన్. వన్నిజ్ తెలివిండ ఆ విత్తు నేరజి పిరిసిని.

28 ముజాల ఆకు, దన్ని వెనుక సెరెన్, దన్ని వెనుక సెరెన్దు గింజ ఇక విజు బూమిని పుటిసినాద్.

29 పంట పండ్పాద్. కొయ్నికాలం వాతిజ్ వాండ్రు కొడుఃవేలి అసి కొయ్జినాన్”.

సర్పుగింజ వందిజ్ కత

30 మరి యేసు ఈహు వెప్తాన్, “దేవుణు వన్నిలోకురిజ్ కినిఏలుబడిః ఇని దనివెట షోలిస్తెజ్ ఆనాద్? మాటు ఎమేణి కతవజ అయాక నెన్పిన్తిజ్ అట్పాట్?

* 4:11-12 4:11-12 యెసయ 6:9,10.

31 అయాక సర్కు గింజదిజ్ పొలిత మనాద్. అక్క బూమిదు విత్తివలె లోకమ్దు మన్ని విజు విత్త్యాజ్ లోఱ ఇజిరికాద్.

32 ఆహిజ్బా అక్క విత్తివలె నేరజి పిరిసి విజు కుస మొక్కజులోఱ పెరిక ఆనాద్. దన్ని కొమెజ్ పెరికెజ్ ఆనె. ఆగసమ్దు ఎగ్రిజిని పొటిజ్ వాజి దన్ని నీడఃదు గూడుక్ తొప్పొన్.

33 వారు అరదం కిదెజ్ అట్టి ససా దేవుణు మాటజ్ ముజూల్ వెప్తి లెకెండ కత వజ యేసు నండొ వెప్తాన్.

34 కత వజ ఆవండ యేసు పరిజ్ ఇనికబా నెన్పిన్వితాన్. అహిజ యేసు వన్ని సిసూర్ వెట ఒరెండ్ర మహివలె విజు వన్యాజ్ అరదం కిజి వెప్తాన్.

యేసు తుపాన్దిజ్ నిల్ప్పినాన్

35 ఆ పొదొయ్సమ్దరం అతాహ పడక సానాట్ ఇజి యేసు సిసూర్ వెట వెప్తాన్.

36 లోకాజ్ డిసి యేసు మహి డోణిదు ఎక్కి సిసూరు వన్నిజ్ ఒతార్. మరి సెగం డోణిజ్బా పరి వెట మహె.

37 వారు సొన్ని మహిజ్ పెరి తుపాన్ వాతాద్. ఉల్పాజ్ విజు డోణిదు డెయ్తె ఏరుడోణిదు నిండ్రితె.

38 యేసు డోణి వెనుకపడక బుర్రగడిః ముస్సు నిద్ర కిజి మహాన్. సిసూరు వన్నిజ్ నిక్కి, “బోదకినికి, మాటు విజు ముడఃగిజినాట్. నిజి విసారం సిలదా?”, ఇజి వన్నిజ్ వెప్తాన్.

39 యేసు నిజిజి గాలిదిజ్ ఉల్పాజ్, పల్లక్ ఆదు ఇజి వెప్తాన్ పెరి గాలి అణస్తాద్ విజు అలెతాద్.

40 నన్నివలె వాండ్రు, “మీరు ఎందనిజ్ తియెల్అజినిదెర్? మిజి నా ముస్సు నమకం సిలదా?”, ఇజి సిసూర్ వెట వెప్తాన్.

41 వారు గొప్ప తియెలాతార, “పీండ్రు ఎలాగ మప్తికాండ్రొ గాని, గాలి నమ్దరమ్బా విన్ని మాటదిజ్ లోజెత్తె”, ఇజి ఒరెన్వెట మరి ఒరెన్ వర్గితార్.

5

యేసు దెయం అస్తిమహివన్నిజ్నెగెణ్కిజినాన్

1 యేసుని సిసూర్ సమ్దరం అతాహ పడక గెరసేసు ఇని లోకరి ప్రాంతమ్దు వాతార్.

2 యేసు డోణి డిఃగితి వెటనె దెయం అస్తికాన్ ఒరెన్ దూకిజాణ్ ఎద్రు వాతాన్.

3 వాండ్రు దూకిజాణిజ్ బత్తిజు మహాన్^{*} వన్నిజ్ గొల్కుదాన్బా తొప్తాజ్ ఎయెర్బా అట్విర్.

4 నండొ నుట్టు వన్ని కాల్యాజ్ కిక్కాజ్ గొల్స్కాణిజ్ తొప్తాజ్బా వాండ్రు గొల్స్కు తెప్పి ముక్కెజ్ కిత్తాన్. ఎయెరుబా వన్నిజ్ సాదిస్సెజ్ అట్వితార్.

5 వాండ్రు రెయూబా వెడెకబా దూకిజాణ్ గొరోకాణ్ గగోలాజి వన్నిజ్ వాండ్రె పణకుజాణ్ డెయె ఆజి మహాన్.

6 వాండ్రు దూరమ్దాన్ యేసుజ్ నుడఃతాండ్రె ఉహ్కీవాజి ముణుకుజ్ ఊర్జి మాడిఃస్సాన్.

7 విజు దన్నిజ్ అతికారం ఆతి దేవుణు మరిసియాతి, యేసువా, నా వెట నిజి ఇని పణి? నజి బాద కివి ఇజి దేవుణు పేరు అని నీను ఒట్టు కిత”, ఇజి డేల్లి వెప్తాన్.

8 ఎందానిజ్ ఇహిజ యేసు, ఓ దెయం, విన్నిజ్ డిసి వెల్లి సొన్అ”, ఇజి వెప్పి మహాన్.

9 యేసు, “నీ పేరు ఇనిక? ఇజి వెన్బాతాన్. వెన్బాతిజ్, నా పేరు సీన, ఇహిజ మాపు నండొండార్ ఇజి వెప్తాన్.

10 మజి యా దేసమ్దాన్ ఉల్పొ ఇజి దెయం అస్తికాన్ యేసుజ్ మరి మరి బతిమాల్తాన్.

11 అయావలె పండ్రెజ్ మంద గొరోన్ నెల్కుదు మెయెజి మహె.

12 ఆ దెయమ్కు, మజి పండ్రెజ్ లోఱబా పోక్అ. వనకలోఱ సొండ్రెజ్ మజి నెలువ సిదా”, ఇజి యేసుజ్ బతిమాల్తె.

13 అందెజె వాండ్రు వన్యాజ్ నెలవ సిత్తాన్ అయావలె దెయమ్కు వన్నిజ్ డిఃసినె పండ్రెజ్లోఱ సొహె. అయపండ్రెజ్ మంద విజు గొరోతాణ్ ఉహ్కీ వాజి ఒడ్డుదాన్ సమ్దరమ్దు అర్తినె సాతె. అక్కెజ్ డగ్గు రుండి వెయిజ్ పండ్రెజ్ మహె.

* 5:3 5:3 అయ దేసమ్దికార్, సట్టుబొరోజిజి సాలమలెకెండ తయార్ కిజి సాతివరిజ్ నమాది కిజి మహార్. పినుగు సాలమలొఱ ఇడ్డి పణకుదాన్ సాలమదిజ్ మూని మహార్. యా దెయం అస్తిమహికాన్ బానె మహాన్.

14 పండ్రిజ్ మేప్పికార్ ఉహ్కీ సొన్ని పట్టుమది వరిజ్ పట్టుమది వల్సెజు మన్నివరిజ్ జర్గిత్కిజ్ వెహ్తార్. లోకుర్ జర్తిక సుడెడెజ్ సాహార్.

15 వారు యేసు డగ్రు వాతిజ్ నండో దెయమకు అస్తిమహికాన్ సొక్కెజ్ తోడిగిజి నెగ్గి బుదిదాన్ అబ్బెబ్బిమహికా సుడెజ్తార్. సుడెజ్తారి తియెలాతార్.

16 యాక సుడెజ్తికార్ దెయమకు అస్తివన్నిజ్ ఇనిక జర్గితాద్, పండ్రిజి ఇనిక జర్గితాద్ ఇజి విజు లోకాజ్ వెహ్తార్.

17 అయవలె లోకుర్ యేసుజ్, “మా ప్రాంతం డిసి సాన్అ”, ఇజి బతిమాలితార్.

18 యేసు డోణి ఎక్కిజ్ దెయమకు అస్తిమహికాన్ వన్ని డగ్రు వాతాండ్రె, నీ వెట నానుబా వాన ఇజి బతిమాలితాన్.

19 గానియేసు సరి సిపితాన్, నీను ఇండ్రొ సొన్ని ప్రబు నీ వందిజ్ కిత్తి గొప్ప పణివందిజ్ వాండ్రు నీ మున్ను ఎలా కనికారం తోరిస్తాన్ ఇనివందిజ్ వరిజ్ వెహ్అ ఇజి వెహ్సాన్.

20 వాండ్రు సాహండ్రె యేసు వన్ని వందిజ్ కిత్తి గొప్ప పణిదెకపాలీదు వెహ్తాజ్ మొదోల్స్తాన్. అక్క వెంజి విజేరి బమ్మ అతార్.

యేసు సాతి అయేలిజ్ నిక్కినాన్, జబ్బు అతిమహి అయేలికొడెదిజ్ నెగెండ కిజినాన్

21 యేసు డోణిదు ఎక్కి నమ్దరం అతాహ వడక మరి సాహాన్. నన్వివలె నండో లోకుర్ వన్ని డగ్రు వాతార్. యేసు నమ్దరం ఒడ్డుదు నిహ మహాన్.

22-23 నన్వివెలె ఉండ్రె యూదురి మీటిజ్ ఇండ్రెణి అతికారి యాయారు ఇని ఒరెన్బానె వాతాన్. వాండ్రు యేసు డగ్రు వాజి వన్ని పాదమకాజ్ మాడిస్తాండ్రె, నా ఇజ్జి గాలు సాజినాద్, దయకిజి నీను వాజి అది బత్కిని వజి దని మున్ను కిక్క ఇడెజి నెగెణ్ కిఅ, ఇజి బతిమాలితాన్.

24 యేసు వన్నివెట సాహాన్. సేన లోకుర్ నెక్కె ఆజి యేసువెట సాహార్.

25 వరిలోఇ ఉండ్రె అయేలి కొడె మహాద్. అది పన్నెండు పండెజాణ్ వెల్లి ఆని జబ్బుదాన్ బాద ఆజి మహాద్.

26 అది సేన డాక్టరుజాబాన్ నెగెణ్ అదెజ్ సాహాద్ గాని ఆ జబ్బు సాన్ ఏతాద్. అకాదె అవిండ దనిజ్ మని డబ్బు విజు కర్పు అతిజ్ బా ఆ జబు సాన్ ఏండ మరి నండో అతాద్.

27-28 అది యేసువందిజ్ వెహ్ మహాద్. యేసు అయ సరిదాన్ వాజినాన్ ఇజి వెంజి యేసు తోడిగితి మన్ని నిరి సొక్కె సెంగుదు ముట్టిజసరి నెగెణ్ ఆన ఇజి ఒడెజి తాద్. అది లోకుర్ వెట సొన్ని యేసు వెనుక వాతాద్ వన్ని నీరిసొక్కెది సెంగుదిజ్ ముట్టాద్.

29 వెటనె వెల్లి సొనిక నిహాద్. దనిజ్ మహి జబు డిస్తాద్ ఇజి అది నెస్తాద్.

30 వన్నిలోఇహాన్ దేవుణు సత్తు వెల్లి సాహాద్ ఇజి యేసుజ్ తెలితాద్. వెటనె వాండ్రు లోకురిజ్ మర్జి సుడెజి, ఎయెర్ నా సొక్కెదు ముట్టాన్? ఇజి వెన్బాతాన్.

31 దన్ని సిసూర్, సేన లోకుర్ నెకె ఆజి నిజి ముట్టినార్ గదె. ఆహె అతిజ్ బా నజి ఎయెరో ముట్టార్ ఇజి ఎందనిజ్ వెహ్సాన్? ఇజి యేసుజ్ వెహ్తార్.

32 నజి ముట్టికాన్ ఎయెండ్రె ఇజి వరివందిజ్ యేసు సురుల సుడెజి మహాన్.

33 అయవలె అయ బోదెలి అది నెగెణ్ అతిక నెసి నండో తియెల్ ఆజి వన్నిపాదమకుజ్ మూడికుజ్ ఊరిజి వజితాద్. దన్నిజ్ జర్తిక విజి వెహ్తాద్.

34 యేసు దనిజ్, బయ నీను నా మున్ను నమకం ఇడ్డి అందెజి నీను నెగెణ్ ఆతి. సమదనమదాన్ సాన్అ. నీను నెగెండ ఆతి ఇహాన్.

35 యేసు వర్జిమహికా యాయారు ఇండ్రెణిజ్ నెగెండార్ వాజి, నీ గాలు సాతాద్. బోదకిని వన్నిజ్ యేలు బాద కిదెజ్ అక్కర్ సిల్లెద్ ఇజి యాయారుజ్ వెహ్తార్.

36 వారు వెహ్తిక వెన్ఇవజి యేసు అయ అతికారిజ్, తియెల్ అమ, నా మున్ను నమకం ఉండ్రె ఇడెజి అ ఇజి వెహ్సాన్.

37 యేసు పేతురు, యాకోబు, యాకోబు తంబెర్ని యాహాన్ మరి ఎయెజ్ బా వన్నివెట ఒవితాన్.

† 5:27-28 5:27-28 అయ కాలమదు అయ దేనమది మెగవారు నీరి సొక్కె తోడిగిజి మహార్. దన్ని అడిగి మాముల్ సొక్కెని బెల్లు తోడిగిజి మహార్

38 వారు యూదురి మీటిజ్ ఇల్లు అతికారి ఇండ్రో సాహార్. అయావలె అబ్బె లోకూర్ గగోలాజి అడఃబాజి మహిక సుడఃతార్.

39 యేసు ఇలు లోఇ సొన్ని వరిజ్ వెహ్హన్, మీరు ఎందనిజ్ గగోలాజి అడఃబాజినిదెర్? యా ఇజ్జికాద్ సావీద్ ఇది నిర్త కిజినాద్.

40 వారు యేసుజ్ వెహ్హన్ సికితార్. యేసు అడఃబాజి మహి లోకాజ్ విజెరిజ్ వెల్లి పోక్తాన్. వెల్లి పోక్కి, అయేసి అపొసిరిజ్, వన్నివెట మహి సిసూరిజ్ అసి యేసు ఆ ఇజ్జికాద్ మహి గదిదు సాహాన్.

41 ఆ ఇజ్జదన్నిజ్ కీదు అస్తాండ్రె, తలీత కుమి ఇజి వెహ్హన్. అయి మాటదిజ్ అర్దం ఇనిక ఇహిజి ఇజ్జి అయేలి నిజ్అ ఇజి నాసు నీ వెట వెహ్హన్ ఇజి,

42 అయేలి వెటన నిజ్జి నడిఃతాద్. దనిజ్ వన్నెండు వండెజ్ వయసు. అబ్బె జగ్గితిక సుడఃతారె అయేసి అపొసీరు, సిసూరు బమ్మ ఆతార్.

43 జగ్గితిక ఎయెజ్ బా వెహ్హట్ ఇజి యేసు వరిజ్ కసితం ఆడ్ర సితాన్. దన్నిజ్ బోజనం సీదు ఇజి అయేసి అపొసిరిజ్ వెహ్హన్.

6

యేసుజ్ సొంతనాటో గవరం సిఎతార్

1 యేసు అబ్బెణాన్ వన్ని సొంత పట్టుమాతి నజరేతు సాహాన్. సిసూర్ బా వన్ని వెట సాహార్.

2-3 విస్తాంతి దినమ్ దు వాండ్రు యూదురి మీటిజ్ ఇండ్రో నేర్పిన్జెజ్ మొదోల్స్తాన్. అక్క వెహికార్ నండోండార్ బమ్మ ఆజి, వీండ్రు ఎమేణిజ్ నెస్తాన్? వన్నిజ్ నిన్ని గెణం ఎమేణిజ్ దోహ్ క్తాద్? వీండ్రు బమ్మాని పణిజ్ కిజినాన్. వీండ్రు మాపు నెసిని కంసెల్ వాండ్రు గదె. వీండ్రు మరియమ్మ మరిసిగదె. యాకోబు, యోసి, యూద, సీమాసు, విని తంబెరిగెర్ గదె. వన్ని తజిసిక మా వెట మన్నెగదె. ఇజి వెహ్హర్. వారు వన్నిమున్ను కోవమాజి మహార్.

4 దన్నిజ్ యేసు ఇనిక ఇజి వెహ్హన్ ఇహిజి, ఒరెన్ ప్రవక్తెజ్ సొంత పట్టుమ్ దు, సొంత ఇండ్రో, సొంత కుటుమ్ దివరిబాన్ గవరం సిల్దెద్. మరి ఎంబె సాహిజ్ బా వన్నిజ్ గవరం మనాద్.

5 నెగొండార్ జబ్బు అతివరిజ్ కియుదాన్ ముట్టి నెగెణ్ కిత్తాన్ గాని అబ్బె నండో బమ్మాతి పణికిదిజ్ యేసు అట్వితాన్.

6 వన్ని మున్ను వరిజ్ నమకం సిల్లిదిజ్ వాండ్రు బమ్మ ఆతాన్. యేసు సురుల మన్ని నాహ్కాజ్ బూలాజి నేర్పిస్తాన్.

యేసు వన్నెండు మణిసిర్ సిసూరిజ్ పోక్కినాన్

7 యేసు వన్నెండు మణిసిర్ సిసూరిజ్ వన్ని డగ్గు కూక్తాండ్రె రిఎరిజ్ రిఎరిజ్ పోక్తాన్. వరిజ్ దెయమ్ కాజ్ పేర్దిజ్ అతికారం సిత్తాన్.

8-9 మీరు ప్రయనం కినివెలె కియుదు ఉండ్రె డుడ్డునె ఒత్తెజ్. బోజనం గాని సన్ని గాని డబ్బు గాని ఒత్తెజ్ ఆవద్. సొండ్రెజ్ కాల్యాజ్ జోక్కు ఒత్తగాని, పొర్పాదెజ్ రుంఠె సొక్కెజ్ ఒమాట్”, ఇజి యేసు వెహ్హన్.

10 మీరు ఎయె ఇండ్రో సొనిదెరో, అయి పట్టుం డిసిన్దాక బానె మండ్రు.

11 ఎంబెబా మిజి లోకూర్ డగ్గు కివిండ మహిజి మీ మాట వెండ్రెజ్ కెఇతిజి, అబ్బెణిజ్ మీరు డిసి సొనివెలె మీ పాదమక డుల్లి దులుపు. వరిమున్ను వారె దేవుణుబాణిజ్ సిక్కి తప్పె ఆజినార్ ఇన్నిదన్నిజ్ గుర్తులెకెండ్ ఆహె డుల్లి దులుపు”.

12 సిసూర్ సొన్ని లోకాజ్, పాపమ్ కు డిఃస్సు ఇజి బోదిస్తార్.

13 లోకూరిజ్ అస్తి నండో దెయమ్ కాజ్ పేర్జి, జబ్బు అతి నండోడారిజ్ నూనె రాసి నెగెండ్ కిత్తార్.

బాప్తినం సీని యోహానుజ్ రాజు సహ్హన్

14 యేసు పేరు విజుబాన్ సారత సాహాద్. అందెజె యేసు కిత్తి గొప్ప పణిజవందిజ్ హేరోదురాజు వెహాన్. నెగొండార్ ఇనిక వెహ్హర్ ఇహిజి “వీండ్రు సాతివరిబాణిజ్ మర్జి నిజితి బాప్తినం సీని యోహాను అందెజె యా బమ్మాతి పణిజ్ కిదిజ్ నత్తు వన్నిలోఇ మంజినాద్” ఇహార్.

15 నెగెండార్ వీండ్లు ఏలియ ప్రవక్త ఇహార్. మరి నెగెండార్ వీండ్లు ముజల్ మహి దేవుణు ప్రవక్తలొక బరెన్ ప్రవక్త వజ మనాన్ ఇజ వెహ్సార్.

16 హేరోదురాజు యాక విజు వెంజి నాను బుర డెయిన్సి యోహాను నిక్షజ బత్మితికాండ్రె యేసు ఇజ వెహ్సాన్.

17-18 హేరోదురాజు ఎందానిజ్ ఈహు వెహ్సాన్ ఇహిజు, వాండ్లు వన్ని తంబెరెసియతి పిలిపు ఆల్సి హేరోదియెజ్ తతాన్. యోహాను హేరోదుజ్, నీ తంబెర్సి ఆల్సిజ్ నీవందిజ్ ఇడె ఆతిక దేవుణు మోసెజ్ సత్తి రూలుదిజ్ వడిఎద్ ఇజ వెహ్సాన్. అందెజె దన్ని వందిజ్ వాండ్లు యోహానుజ్ అసి తోహ్తాండ్రె జెలిదు ఇడిస్తాన్.

19 అందెజె హేరోదియ యోహాను మున్సు పగదాన్ మహాద్. వన్నిజ్ సప్పిజ్ నుడెతాద్ గాని అట్వితాద్.

20 ఎందానిజ్ ఇహిజు హేరోదు యోహానుజ్ తియెలాతాన్. వాండ్లు బరెన్ నీతి నిజాయితి మన్నికాన్ ఇజి దేవుణు కేటాకాన్ ఇజి, హేరోదు రాజు నెస్తాన్. అందెజె జెలిదు ఇడ్డి కాహడజి మహాన్. యోహాను వెహ్సా మాటిజ్ వెహవలి హేరోదురాజు అర్దం కిడెజ్ అట్వితాన్ గాని సర్దదాన్ వెంజి మహాన్.

21 అహిజు యోహానుజ్ సప్పిజ్ హేరోదియెజ్ ఉండ్రె అవ్కానం వాతాద్. అక్క ఎలాగ ఇహిజు హేరోదురాజు వాండ్లు పుట్టిరోజు గుర్తు కిడెజ్ అయానాండిజ్ ఉండ్రె పెరి విందు కితాన్. వాండ్లు గవరుమెంటు అదికారిజ, సయ్యుమ్ది వరిలోక పెరి అతికారి గలిలయ దేనిమది పెద్దెల్జ విజెరిజ్ విందుదిజ్ కూక్తాన్.

22-23 నస్తివలి హేరోదియ గాలీని విందుదిజ్ వాతి వరిజ్ సర్ద కిబిస్టెజ్ వరి ముజాల డాట్టి కరజితాద్. అక్క నుడితారె విజెరి సర్ద ఆతార్. సర్ద ఆతిజ్ హేరోదురాజు, నిజి ఇస్వమాతిక ఇనికబా నజీ లోన్అ, అక్క నాను నిజి సీన, ఇజి దనివెట బట్టు కితాన్.

24 అది సొన్ని అయ్సివెట, నాను రాజుజ్ ఇనిక లొస్టెజ్ ఇజి వెన్బాతాన్. అయ్సి, బాప్తీసం సీని యోహాను బుర లొన్అ ఇజి వెహ్సాద్.

25 వెటె అది రాజు డగ్రు సొన్ని బాప్తీసం సీని యోహాను బుర కత్తి ఉండ్రె పల్లెమ్దు ఇడెజి ఏలె నజీ తసిసిదా ఇజి వెహ్సాద్.

26 అక్క వెహ్తాండ్రె హేరోదురాజు గొప్ప బాద ఆతాన్ గాని, వాండ్లు కిత్తి బట్టువందిజ్ వన్నివెట బోజనమ్దిజ్ బస్తిమహి కూలెజ వందిజ్ దన్నివెట కిత్తి మాట తప్పెజ్ కెవితాన్, ఇజి వెహ్సాజ్ అట్వితాన్.

27-28 వెటె రాజు యోహాను బుర కత్తి తగ్గి అ ఇజి జమానుజ్ ఆడ్ర సీజి పోక్తాన్. జమాను జెలిదు సొన్ని యోహాను బుర కతాండ్రె ఉండ్రె పల్లెమ్దు ఇడెజి తత్తాండ్రె అయ్లిదిజ్ సితాన్. అది ఆ బుర అయ్సిజ్ సితాన్.

29 జగ్గతిక వెంజి యోహాను సిసూర్ వాజి ఆ పీనుగుదిజ్ పెర్జి ఒసి సమాది కితార్.

యేసు అయ్దు వెయిజ్ మెణిసిరిజ్ బోజనం సీజినాన్

30 అపొస్తరు వరెజమాతాజి వారు కిత్తి పణిజ్ విజు, బోదిన్సి వన్యాజ్ వందిజ్ విజు యేసుజ్ వెహ్సార్.

31 నస్తివలి యేసు “ఎయెరు సిల్లిబాన్ మాటి సొన్ని నణెం రోమ్మాట్, ఇజి సిసూర్వెట వెహ్సాన్. ఎందానిజ్ ఇహిజు నండొ లోకుర్ వాదిజ్ సాండ్రెజ్ ఆతార్. బోజనం కిడెజ్ బా కాలి సిల్లెండ ఆతాద్.

32 అందెజె వారు ఉండ్రె డోణి ఎక్కి ఎయెర్బా మన్ఇ బాడ్డిదు వారె సొహార్.

33 యేసుని, సిసూర్ సొన్నిమహిజ్ నండొ లోకుర్వరిజ్ నుడెతారె వరిజ్ గుర్తు అసి విజు పట్టుమ్కాణ్ ఉహ్కప్పి వరిజ్ ఇంక ముజాల బాన్ సొహార్ అందితార్.

34 యేసు డోణిదాన్ డిగితివలి మహి నండొ లోకాజ్ నుడెజి వన్ని పాణం నొత్తాద్. ఎందానిజ్ ఇహిజు వారు గవడుయెన్ సిల్లి నెద్రితి గొరెజ్ లెకెండ్ మహార్. అందెజె యేసు వరిజ్ నండొ నజతిజ్ నెన్పిస్తాన్.

35-36 యేసు నెర్పిసి మహిజ్ పొద్దుఆజి మహాద్. సిసూర్ వన్నిడగ్రు వాజి యాక ఎయెరు మన్ఇ బాడ్డి. ఏలి పొద్దు ఆజినాద్. పడకాద్ మన్ని నాహ్కాజ్ వలిసెజు సొన్ని బోజనం కొండెజ్ విరిజ్ పోకల. ఇహార్.

37 గాని యేసు సిసూరిజ్ మీరె వరిజ్ తిండ్రెజ్ ఇనికబా సీదు”, ఇజి వెహ్సాన్. దన్నిజ్ వారు మాపు సొన్ని రుండి వంద దెనారిదిజ్* రొట్టెజ్ కొడెజిజి తత్తెజ్ బా నిస్సొ లోకురిజ్ సాల్విద్ ఇజి వెహ్సార్.

38 మీబాన్ ఎస్సొండు రొట్టెజ్ మన్నె? సొన్ని సుడెడు”, ఇజి యేసు సిసూరిజ్ వెహ్సాన్. వారు సొన్ని సుడెజిజి అయ్యదు రొట్టెజ్ రుండి మొయెజ్ మన్నె ఇజి వెహ్సార్.

39 విజెరిజ్ పసిగడ్డి మన్నిబాన్ గుంపుజ్ లెకెండ్ బనెకిదు ఇజి యేసు సిసూరిజ్ వెహ్సాన్.

40 లోకుర్ యాచయ్ మనిసిర్, గుంపుజ్ వంద మనిసిర్ గుంపుజ్ బహ్సార్.

41 అయవలె యేసు అయ్యదు రొట్టెజ్, రుండి మొయెజ్ అసి, ఆగసం దరోట్ సుడెజిజి వనకవందిజ్ దేవుణుదిజ్ వందనమ్మకు వెహ్సాన్. వెహ్సాండ్రె రొట్టెజ్ రుక్కి లోకురిజ్ సీబాజి సీదు ఇజి వెహ్సొ సిసూరిజ్ సీత్తాన్. అయ మొయెజ్ బా విజెరిజ్ సీబాజి సీదు ఇజి సీత్తాన్.

42 వారు విజెరి పొట వంజు తిహార్.

43 మిగిలిత్తి రొట్టె ముక్కెజ్, మరి మొయెజ్ ముక్కెజ్ వన్నెండు గంపెజ్ సిసూర్ కెహ్సార్.

44 రొట్టెజ్ తిహికార్ మొగవారె అయ్యదుమొయెజ్ లోకుర్ మహార్.

యేసు సమ్దరం మున్ను నడిజినాన్

45 యేసు లోకాజ్ పొక్కి వెనుక వెటనె సిసూరిజ్ డోణిదు ఎకిసి అతాహవడెక బేత్సయిద్ ఇని నాటో వన్నిజ్ ఇంక ముజాలె సొండ్రు ఇజి వెహ్సొ పొక్తాన్.

46 వరిజ్ పొక్కి యేసు పార్దనం కిదెజ్ గొరెత్ ఒరెండ్రె మహాన్.

47 పొద్దు అతివలె డోణి సమ్దరం నడిమి మహాద్, యేసు గొరెత్ ఒరెండ్రె మహాన్.

48 గాలి ఎద్దు డెయ్యిజ్ డోణి నడెపిస్సెజ్ సిసూరిజ్ గొప్పు కన్టం ఆత్తాద్. అక్క యేసు సుడెజిజి. కోడిజం ఆజిమహిజ్ యేసు సమ్దరం మున్ను నడిజిజి వాతాండ్రె సిసూర్ మన్ని డోణి డాట్టిసొండ్రెజ్ నడిసి వాతాన్.

49 యేసు సమ్దరం మున్ను నడిజినిక సిసూర్ సుడెజిజి అక ఉండ్రి దూబ ఇజి ఒడిబిత్తార్. వారు డటం గగిల్ ఆతార్.

50 అక్క దూబను ఇజి వారు నండ్రి తియెలాతార్. వెటనె యేసు వరివెట, “సమ్దరమ్దాన్ మండ్రు ఇక్క నానె తియెలాచు”, ఇజి వరిజ్ వెహ్సాన్.

51 నస్తివలె యేసు వరివెట డోణిదు ఎక్తాన్. గాలి విజు అణస్తాద్. వారు నండ్రి బమ్ము ఆతార్.

52 యేసు అయ్యదు రొట్టెజ్ రుండి మొయెజిజి అయ్యదుమొయెజ్ లోకాజ్ బోజనం సిత్తిక సుడెజిజిబ యేసు కిత్తి అయ్యా బమ్మాతి పణివందిజ్ అర్దం కివితార్. ఎందానిజ్ ఇహిజి వరి మన్ను గట్టెజ్ మహాద్.

యేసు గెనేసెరెతు ఇనిబాన్ లోకాజ్ నెగెండ్ కిజినాన్

53 వారు సమ్దరం డాట్టి గెనేసెరెతు ఇనిబాన్ వాతారె డోణి అబ్బె తొహ్సార్.

54 వారు డోణి డిగితిజ్ సరి లోకుర్ యేసుజ్ గుర్తు అస్తార్.

55 వెటనె ఆ దేసెమ్ది నాహ్కణికార్ విజెరి సొన్ని జబ్బు అతివరిజ్ యేసు మనాన్ ఇజి వెహి బాడిదు సాపాదు పిండ్డి తత్తెజ్ మొదో ల్స్తార్.

56 యేసు నాహ్కజ్ పట్టమ్కాజ్ ఎంబె సాహిజ్ బా లోకుర్ జబ్బు అతివరిజ్ యేసు వాని సర్దు తత్త ఇడెజిజి. యా జబ్బు అతికారె నీ సొక్క సెంగుదుబా ముట్టిజ్ సెల్వ సీదా ఇజి బతిమాలజి యేసుజ్ మరి మరి వెహ్సార్. ఎస్సాండాం వన్ని సొక్కదిజ్ ముట్టితారె వారు విజెరి నెగెండ్ ఆతార్.

7

యూదపెదెలుజా రూలాజ్ దేవుణు రూలుదిజ్ తేడె వాతాద్

1-2 యెరూసలేమ్దాన్ వాతి పరిసయ్యరుని, యూదురి రూలు నెస్సిసినికార్ సెంగెండాం యేసుబాన్ కూడెజి వాతార్. యేసు సిసూర్ యూదురుజు రూలుదు వెహ్సాలెకెండ్ కిక్కు నొరబెండ్ బోజనం ఉణిజి మహిక వారు అబ్బె సుడెజిజి. అక్క పరిసయ్యరు సుడెజిజి తప్ప.

3 పరిసయ్యరు, యూదురు, విజెరి, పూర్బమ్దికార్ వెహ్సారూలు వజ కిక్కు నొరబాతి వెన్కనె ఉణెణార్.

* 6:37 6:37 రోమన్ వరి కాలమ్దు మన్ని డబ్బు ఇక్క అయకాలమ్దు ఉండ్రి దినారి ఉండ్రి రోజుది కూలి.

4 వారు సత్తదాన్ వాతిజ, రూలువజ ఏరు లోజె అవిండ ఇనికబా ఉణ్విర్. ఇక్కాదె ఆవిండ గిన్నెజ్ కుండెజ్ మరి కంసు బిందెజ్ ఎలాగ మిడిస్టెజ్ ఇజి నండో రూలుజ్ వరిజ్ మన్నె. ఆ రూలుజ్వజ వారు కిజినార్.

5 అందెజె పరిసయరుని, యూదుర్ రూలుజ్ నెన్పిసినికార్, “ఎందానిజ్ నీ సిసూర్ పూర్బమ్దికార్ వెప్తి రూలువజ నడివిండాజినార్ ఎందానిజ్ వారు కిక్కు నోర్బమ్దిజ్ బోజనం కిజినార్”, ఇజి యేసుజ్ వెన్బాతార్.

6-7 యేసు వరిజ్, “వేసం కినికారాతి మీ వందిజ్ యెసయ ప్రవక్త ఎప్తిక నిజమె. యా లోకుర్ సజి వెయుదాన్ గవరం సీజినార్ గాని పరి మన్ను నాబాణిజ్ దూరం మనాద్. వారు సజి పొగడిజి మాడిసినిగార్ గాని అక్క పణిదిజ్ రెవిద్. ఎందానిజ్ ఇహిజ వారు లోకుర్ వెప్తి రూలు దేవుణు మాట ఇజి లోకాజ్ నెస్పినినార్*.

8 దేవుణు వెప్తి రూలు డిసిసిజి, మీరు పూర్బమ్దికార్ వెప్తి రూలువజ నడిజినిదెర్”, ఇజి వెప్తాన్.

9 యేసు వరిజ్ మరి వెప్తాన్, “పూర్బమ్దికార్ వెప్తివజ నడిదెజ్, ఇజి దేవుణు అడ్రెజ్ వడకాదు నెక్తెజ్ మిజి బాగ తెలినాద్.

10 ఎలాగ ఇహిజ మీ యాయ బుబ్బురిజ్ గవరం సీజి బాగ సుడెదెజ్ ఇజి యాయెజ్ గాని బుబ్బెజ్ గాని దూసిస్తిజ వన్నిజ్ సప్తెజ్ ఇజి దేవుణు మోసజ్ సిత్తి రూలు మనాద్.

11-12 గాని ఒరెన్ వన్ని అయేసి అపొసిరిజ్, నాను మిజి ఇనికబా ఉంత్రి సాయమలెకెండ్ కిన ఇజి ఇడ్డిమన్నిక కొర్బాన్ ఇజి వెప్తిజ నాండిజ్ అసి వాండ్రు అయేసి అపొసిరిజ్ ఇనికబా సాయం కిదెజ్ అవసరం సిల్లెద్ ఇజి మీరు నెన్పిసినిదెర్. (కొర్బాన్ ఇహిజ దేవుణుదిజ్ సీన ఇజి ఒట్టు కినిక ఇజి అర్టం)

13 ఈహు మీ పూర్బమ్దికార్ వెప్తివజ నడిజి మిరు దేవుణు వెప్తి రూలుదిజ విలువ సిల్లెండ్ కిజినిదెర్. నిన్ని సజతిజ్ నండో మిరు కిజినిదెర్”.

14 యేసు లోకాజ్ మరి వన్నిదెగ్రు క్కూండ్రె “నాను వెప్సినిక మీరు విజిదెర్ జాగర్తవెంజి నెగెండ్ అర్దం కిదు.

15-16 వెయుదాన్ లోఇ సానికెజ్ ఇనికబా లోకాజ్ మయ్లు కిదిజ్ అట్విద్. గాని మన్ను లోఇహాన్ వెల్లి వానికది లోకాజ్ నెవిణ్ కిజినాద్”.

17 యేసు లోకాజ్ డిసి ఇండ్రో వాతివెనుక వన్ని సిసూర్, కతవజ వెప్తి దన్నిజ్ అర్టం వెన్బాతార్.

18-19 యేసు వరిజ్ ఈహు వెప్తాన్ “మీరుబా ఆఇవరిలెకెండ్ అర్టం కిదెజ్ అట్ఇదెరా? వెల్లిహాన్ పొటలొజ సాని ఇని బోజనమ్బా లోకాజ్ మయ్లు కివిద్. ఎందనిజ్ ఇహిజ అక్క మన్నుదు సానివిండ వన్ని పొటాదుని సాన్నినాద్. అక్క పొటదాన్ బయలు బన్నివలె వెల్లి సాన్నినాద్. ఇజి మీరు నెన్పినిదెర్”. (ఇబ్బె సుడెతి ఇని బోజనమ్బా ఉండెజ్ ఆనాద్ ఇజి యేసు నెలవ సిత్తాన్)

20 మరి యేసు వెప్తాన్, ఒరెన్ వన్ని మన్నులోఇహాన్ వెల్లి వానికది వన్నిజ్ మయ్లు కిజినాద్.

21-22 మన్నులోఇహాన్ వానిక ఇనికెజ్ ఇహిజ, సెఇ ఆలోసనమ్కు, కెలార్బూలానిక, లోకాజ్ సప్పికెజ్, రంకు బూలానిక, ఆఇవరిజ్ మన్నికెజ్ దోవొకెజ్ ఇజి ఆస, సెఇ పణి కినిక, మొసిం కినిక, మన్నుదు అనసె ఆజి మండ్రెజ్ అట్ఇక, గోస దూసిసినిక, నానె పెరికాన్ ఇజి గర్త అనిక, అర్టం కిఇ మన్ను మన్నిక.

23 యాక్కెజ్ విజు లోకుర్ మన్నులోఇహాన్ వెల్లి వాజి ఒరెన్ వన్నిజ్ మయ్లు కిని.

ఉంత్రి కనానియది అయేలి కొడో: యేసు మున్ను ఇడ్రి నమకుం

24 యేసు అబెణిజ్ నండో దూరం సాన్ని ఉంత్రి గొరెన్ ఎక్కి డిగిఱాండ్రె తూరు సీదోసు ఇని పట్టుమ్కాజ్ డగ్రు మన్ని ముటిజ సాహాన్. బానెఉంత్రి ఇండ్రో సాన్ని ఎయెజ్బా తెలివిండ మంజిన ఇజి మన్నుదు ఒడెబితాన్. గాని వాండ్రు అట్విత్తాన్.

25-26 యూదురు ఆఇ జాతిదు పుట్టి సురోవెకొనియదికాద్ ఉంత్రి అయేలి కొడో: యేసు అబ్బె మనాన్ ఇజి వెంజి వెటని అబ్బె వాతాదె యేసు పాదమ్కాజ్ అర్తాదె మాడిస్తాద్. దన్ని గాల్నిజ్ దెయం అస్త మహాద్. “నా గాలుజ్ అస్తిమన్ని దెయమ్దిజ్ ఉట్విఅ”, ఇజి యేసుజ్ బతిమాలితాద్.

* 7:6-7 7:6-7 యెసయ 29:13

27 దన్నిజ్ యేసు, “ముజాల్ కొడోరిజ్ పొట పంజు బోజనం తీప్పిస్తజ్. కొడోర్ తిండ్రెజ్ మన్ని రొట్టెజ్ లాగజి నుకుడిజ్ సీనిక తగ్ ఏద”, ఇజి వెప్తూన్†.

28 అది, “ప్రబు, నీను వెప్తొక నిజమె. గాని నుకుడిజ్ బా కొడోర్ ఉణిజి బల్ల అడిగి అర్పిక ఉణిజి నె గదె ఇజి వెప్తూన్.

29 యేసు, నీను బాగ వెప్తొ. నీను ఇండ్రొ సొన్ అ. ఆ దెయం నీ గాలుజ్ డిస్త సొహద్ ఇహాన్.

30 అది ఇండ్రొ సొన్ని సుడేతిజ్ గాల్ని మన్గుం మున్సు గూర్త మహద్. దెయెం దనిజ్ డిస్త సొహద్.

యేసు బోయర నతి అతివన్నిజ్ నెగెండ కిజినాన్

31 యేసు తూరు ప్రాంతం డిసి, సీదోను, దెకపాలి ప్రాంతమదాన్ గలిలయ సమదరం డగ్రు వాతాన్.

32 నన్నివల బోయర నతియాతి ఒరెన్ వన్నిజ్ నెగెండార్ యేసుబాన్ తత్తార్. “వన్ని మున్సు కియు ఇడేజి నెగెండ కి అ”, ఇజి బతిమాలేజి వెప్తూన్.

33 యేసు లోకురబాణిజ్ వన్నిజ్ అజి ఒసి, డెస్సెజ్ వన్ని గిబ్బిదు ఇడ్తాన్. వన్ని సొంత డెస్సెజ్ పూస్తాండ్రె గుల్ల వన్నిజ్ నాలికాదు ముట్తాన్.

34 ముట్తాండ్రె అగసం దరోట్ దేవుణదిజ్ సుడేజి ఉసుర్ గొటాండ్రె బాదఅజి ఎపాత ఇజి వెప్తూన్. దని అర్థం ఇనిక ఇహిజ రే ఆదెజ్ ఇజి.

35 వెటనె వన్నిగిబ్బిజ్ వెండ్రెజ్, వన్ని నాలిక వర్గిదెజ్ వాతాద్. వాండ్రు బాగ వర్గిదెజ్ మొదోల్స్తాన్.

36 “ఎయెవెట వెహ్లాట్”, ఇజి యేసువరిజ్ కసితం వెప్తూన్. నా వందిజ్ వెహ్లాట్ ఇజి నండో వెహ్లాట్ బా అలిఎండ వారు యేసువందిజ్ మరి నండో వెప్తూన్.

37 యేసు విజు బాగ కిత్తాన్. బోయరవన్నిజ్ బా వెనివజ, గుల్లవన్నిజ్ బా వర్గినివజ కిజినాన్ ఇజి వారు వెప్తూర్ బమ్మ ఆతార్.

8

యేసునాల్లివెయిజ్ మణిసిరిజ్ బోజనం సీజినాన్.

1-2 ఆ దినమకాజ్ మరి ఒర్గు నండో లోకుర్ కూడ్డి వాతార్. వరిజ్ ఉండెజ్ బోజనం ఇనికబా సిలిజ్ యేసు వన్ని సిసూర్ జి కూక్తాండ్రె వెప్తూన్, నజి యా లోకుర్ నావెట వాజి మూండ్రె తీస్సు ఆతె. వరిజ్ తిండ్రెజ్ ఇనికబా సిల్లెద్. అందెజి విరి వందిజ్ నా పాణం నోజిన్.

3 విరిజ్ నాను బోజనం సిఎండ ఇల్కాజ్ పోక్తిజి కణకు తర్వజి నద్దు అర్పార్. ఎందనిజ్ ఇహిజ వరిలోఇ నెగెండార్ నండో దూరమదాన్ వాత మనార్”, ఇజి వెప్తూన్.

4 అయవలె వన్ని సిసూర్ వెప్తూర్, బిడిమబూమిదు విరిజ్ విజెరిజ్ బోజనం సిదెజ్ ఎమేణిజ్ తతెజ్?

5 మీ బాన్ ఎసోడు రొటెజ్ మన్నె? ఇజి యేసు సిసూరిజ్ వెన్ బాతాన్. మా బాన్ ఏడు మన్నె ఇజి సిసూర్ వెప్తూర్.

6 అయవలె యేసు లోకాజ్ బూమిదు బస్సు ఇజి వెప్తూన్. ఆ ఏడు రొట్టెజ్ అసి దేవుణదిజ్ వందనమకు కితాండ్రె. వన్కాజ్ రుక్కి లోకాజ్ సీబాజి సీదెజ్ సిసూరిజ్ సీత్తాన్. వారు లోకాజ్ సీబాజి సీత్తార్.

7 వరిబాన్ సెగం ఇజి మొయెజ్ బా మహె. యేసు వన్కాజ్ బా వందనమకు వెస్సి సీబాజి సీదు ఇజి సిసూరిజ్ సీత్తాన్.

8 లోకుర్ విజెరె పొట పంజు తిహార్. వెసుక సిసూర్ మిగ్గితి రొట్టె ముక్కెజ్ ఏడుః గవెజ్ కెప్తూర్.

9-10 డగ్రు నాల్లి వెయిజ్ లోకుర్ అబ్బె మహార్. లోకాజ్ విజెరిజ్ పోక్తి యేసు సిసూర్ వెట ఉండ్రె డోణి ఎక్తాండ్రె దల్మనుత ఇని ప్రాంతం సాహన్.

11 నెగెండార్ వరినయరు వాతారె యేసువెట తర్కిస్తెజ్ మొదోల్స్తాన్. దేవుణని వన్నిజ్ పోక్తాన్ ఇనిదన్నిజ్ రుజువెలెకెండ ఆగసమదాన్ ఉండ్రె బమ్మాతి పణికిజి మజి తోరిన్ అ ఇజి వెప్తూర్.

† 7:27 7:27 యేసు వెప్తొ దన్ని అరదం ఇనిక ఇహిజ ముజాల వన్నిసొంత లోకురాతి యూదురిజ్ వాండ్రు నెగెండ కిడెవలె వరిజ్ వానికెజ్ ఆఇవరిజ్ సీదెజ్ ఆవద్ ఇజి

12 యేసు మన్నుడు గొప్ప బాదాజి ఉసుర్కొటాండ్రె యా లోకుర్ ఎండనిజ్ బమ్మ అని పణి తోరిన్ అ ఇజి వెప్పినార్. యా లోకాజ్ గుర్తులెకెండ ఇని బమ్మమాని పణిబా దేవుణు తోరిన్ ఏన్ నిజమెఇజి వెచ్చాన్.

13 నస్తవలె యేసు వరిజ్ డిస్తాండ్రె డోణి ఎక్కి నమదరం డాట్టి అతాహ పడక సాహన్.

యేసు పరిసయరువందిజ్ హేరోదువందిజ్ వెప్పినాన్

14 అహిజి సిసూర్ రొట్టజ్ తత్తజ్ పోస్తార్. వరిబాన్ డోణిదు ఉండ్రె రొటె మహాద్.

15 యేసు సిసూరిజ్ వెచ్చాన్. పరిసయరుది పులాజ్ కిని దూరు* వందిజ్, మరి హేరోదురాజుది పులాజ్ దూరు వందిజ్ మీరు జాగర్త మండ్రు.

16 మాటు రొట్టజ్ తెఇతిజ్ యేసు ఈహు వెప్పినాన్, ఇజి వారు ఒరెన్ వెటె ఒరెన్ వర్గితార్.

17 వారు వెహాసినిక యేసు నెని ఎందానిజ్ మీరు రొట్టజ్ సిల్లితివందిజ్ వర్గిజినిదెర్? ఏలుబా అర్థం కిజి నెన్సెజ్ అటెఇదెరా? మీ మన్ను గట్టి అత మనాదా?

18 మీజ్ కణుకు ముంజిబ తొఇదెరా? గిబిజ్ ముంజిబా వెన్ ఇదెరా? ఇనికబా ఒణిబిఇదెరా?

19 అయదు రొట్టజ్ ముక్కెజ్ కిజి అయదు వెయిజ్ లోకాజ్ సిబాతి సిత్తిజ్ మిగ్గితిక్కెజ్ ఎసాడుః గంపెజ్ మీరు కెప్పాదెర్? ఇజి యేసు సిసూరిజ్ వెన్ బాతాన్. అందెజి సిసూర్ పన్నుండ్రె గంపెజ్ కెప్టాప్ ఇహార్.

20 యేసు మరి వెన్ బాతాన్, ఏడు రొట్ట ముక్కెజ్ కిజి నాల్లి వెయిజ్ లోకాజ్ సితి వెనుక మిగ్గితికెజ్ ఎసాడు గంపెజ్ కెప్పాదెర్? ఏడు గంపెజ్ ఇజి వారు వెచ్చార్.

21 యేసు సిసూరిజ్ వెచ్చాన్, మీరు ఏలుబా నాను కితి బమ్మాతి పణిజి వందిజ్ అర్థం కిదెజ్ నెన్ ఇదెరా?

యేసు బేత్ సయ్య పట్టుమదు ఒరెన్ గుడ్డివన్నిజ్ నెగెండ్రె కిజినాన్

22 యేసుని, వన్ని సిసూర్ బేత్ సయ్య ఇని నాటో వాతార్. అయవలె నెగెండ్రె ఒరెన్ గుడ్డివన్నిజ్ యేసుబాన్ తత్తార్. యేసు, నీను వన్నిజ్ ముట్ అ”, ఇజి వాండ్రు నెగెండ్రె అనివందిజ్ బతిమాలితార్.

23 యేసు అయ గుడ్డివన్నిజ్ కీదు అస్తాండ్రె నారు డాటిసి ఒత్తాన్. అయ గుడ్డివన్ని కణుకాజ్ పూసి డెస్సెజాణ్ ముట్టి “నిజి ఇనికబా తోరిజినాదా”, ఇజి వెన్ బాతాన్.

24 వాండ్రు కణుకు పెర్జి, సెడిబా తొర్జినాద్, గాని లోకు మరెక్ నడిజిని వజి తోరిజినాద్ ఇజి వెచ్చాన్.

25 మరి ఒర్పు యేసు వన్ని కణుకెజి ముట్టాన్. నస్తవలె వన్ని కణుకు నెగెండ్రె అతిజ్ విజి నెగెండ్రె నుడితాన్.

26 యేసు వన్నిజ్ బేత్ సయ్య మరజి సాన్యా ఇజి వెప్పి వన్ని ఇండ్రె పోక్తాన్.

యేసు ఎయెన్ ఇజి పేతురు వెప్పినాన్

27 యేసుని, వన్ని సిసూర్ పిలిపుది అతి కయసరయ పట్టుమదిజ్ డగ్రు మన్ని నాహ్కాజ్ పయెన్ కిజి మహార్. సాన్ని మహిజ్ సర్దు యేసు వరిజ్ వెన్ బాతాన్, నాను ఎయెన్? ఇజి లోకుర్ వర్గిజినార్?

28 దన్నిజ్ సిసూర్, నెగెండ్రె నీను బాప్తిసం నీని యోహను ఇజినార్. మరి నెగెండ్రె నీను పూర్ బమదున్ మహి ఏలియ ప్రవక్త ఇజినార్. మరి నెగెండ్రె నీను పూర్ బమదున్ మహి ప్రవక్తలొ ఇ ఒరెన్ ఇజి వెహాసినిన్, ఇహార్.

29 అహిజి మీరు నజి ఎయెన్ ఇజి వెహాసినిదెర్? ఇజి యేసు సిసూరిజ్ వెన్ బాతాన్. నస్తవలె పేతురు, నీను క్రీస్తు ఇహిజి దేవుణు ఏర్నాటు కితి పోక్తాన్”, ఇజి వెచ్చాన్.

30 యాక ఎయెన్ వెటెబా వెహ్కాజ్ ఇజి కసితంవరిజ్ ఆర్త్ర సిత్తాన్.

యేసు వన్ని సాపువందిజ్ వెప్పినాన్

31 యేసు వరిజ్ నెన్ పిన్జెజ్ మొదొల్ స్తాన్, లోకుమరిసి అతి నాను నండ్రె మాలిజ్ ఒరిన్జెజ్ వలె. యూదు పెద్దెల్, పెరి పుజెరిబు, యూదురి రూలుజ్ నెన్ పిన్జెకార్ నజి నెక్వటాక్వార్ లోకుర్ నజి సప్పార్లె. సాజి మూండ్రె దినమ్కాజ్ దేవుణు నజి మరజి నిక్కాన్లె.

32 యేసు యాకెజ్ విజి డాప్ వండ్రె వెహ్కాజ్ పేతురు యేసుజ్ ఉండ్రె పడకాదు ఒసి, ప్రబువ నిజి యలెకెండ్రె జర్గిదెజ్ అవిద్ ఇజి గటిజి వెహ్కాజ్ మొదొల్ స్తాన్.

* 8:15 8:15 హేరోదురాజు కితి తప్ప పణిజ్ పరిసయరు నెన్సెజ్ తప్ప బోదెజ్ పులాజ్ దూరు పులాజ్ కినిలెకెండ్రె లోకాజ్ సెకక కిజినాద్ ఇజి యేసు వెప్పినాన్.

33 యేసు సిన్వూరదరోట్ మర్జి సుడఃజి కోపమ్దాన్ పేతురుజ్ వెప్సాన్. “ఓ సయ్యనా నాబాణిజ్ డిఃసి సాన్అ. నీ మన్సురు మన్ని ఆలోసనమ్కు దేవుణుబాణిజ్ వాతికెజ్ ఆఱ. లోకుబాణిజ్ వాతికదె నీను ఆలోసనం కిజిని”.

34 నస్తవలె యేసు లోకాజ్ విజిరిజ్, సిన్వూరజి వన్నిబాన్ కూక్కి ఈహు వెప్సాన్. ఎయెన్బా నావెట వాదెజ్ ఇహిజి వాండ్రు వన్ని సొం ఇస్టమకు నజి నమ్మితివందిజ్ వన్నిజ్ వాని ఇని మాలెజ్బా ఓరిస్తెజ్ తయారాజి నావెట వాదెజ్†.

35 ఎయెరుబా వన్ని పాణదిజ్ కాపాడెదెజ్ సుడఃతిజి వన్నిజ్ ఎలాకాలం దేవుణువెట బత్కిని బత్కు దొవ్కావిద్. గాని ఎయెన్బా నా వందిజ్, సువార్త వందిజ్ వన్ని పాణం సీతిజి వన్నిజ్ ఎలాకాలం దేవుణువెట బత్కిని బత్కు దొవ్కానాద్.

36 ఒరెన్ వాండ్రు కొరితివజి యా లోకమ్ది ఆస్తినుకం విజి దొవ్కాఆజి వన్నిజ్ ఎలాకాలం దేవుణువెట బత్కిని బత్కు దొవ్కామ్ది మహిజి, ఇని లాబం ఇని లాబంబా సిల్లెద్.

37 ఎందానిజ్ ఇహిజి ఎలాకాలం బత్కిని పాణమ్దిజ్ బదులు ఇనికబా సిదెజ్ లోకఅత్వీన్.

38 యా తరమ్దికార్ నండో నెఇకార్ దేవుణువందిజ్ మన్సు సిల్లెండ మన్నికార్. నా బుబ్బు ఆతి దేవుణుజాయ్దాన్ దేవుణు దూతెజి వెట వానివలె, నా వందిజ్ నామాటెజివందిజ్ సిగు ఆనివరివందిజ్ లోకుమరిసియాతి నానుబా సిగు ఆన్”.

9

1 యేసు వరిజ్ ఈహు వెప్సాన్, “నాను నిజం వెహ్సాన్. ఇబ్బె నిహిమహి వరిలోఇ నెగొండార్ దేవుణు గొప్పునత్తుదాన్ వన్ని లోకురిజ్ ఏలుబడిః కిజినిక సూణిదాక సాపిర్”.

యేసుప్రబుజ్ మూర్తి మారిసినాద్.

2 ఆరు రొన్సుసాహివెనుక యేసు పేతురు, యాకోబు, యోహానుజ్ వన్నివెట ఉండ్రి పెరి గొరోత్ కూక్ ఒత్తాన్. ఆ నాలేవరిత్తు అబ్బి మరి ఎయెర్బా సిల్లెర్. అబ్బి వరివర్దు వన్నిమూర్తి మారితాద్.

3 యేసు పొరపాతి మహి సాక్క జిగిజిగి మెరిసిని తెల్లనిజాయ్ వజి ఆతాద్. యా లోకమ్దు నసా తెల్లాజ్ నొరిబానికార్ ఎయెర్ సిల్లెర్.

4 మోసని, ఏలియ వరిజ్ తొర ఆతార్. వారు యేసువెట వర్గిజి మహార్.

5-6 అక్క సుడఃజి సిన్వూర తియెలాతార్. అందెజి పేతురు ఇనిక వెప్సాజొ నెన్విండ, “ప్రబు, మాటు ఇబ్బె మహిజినిగెద్. అందెజి మూండ్రి గుడుఃనెజి తొప్పిట్. నిజి ఉండ్రి, మోసెజి ఉండ్రి, ఎలియెజ్ ఉండ్రి” ఇహ్సాన్.

7 ఆయవలె ఉండ్రి మొసాప్ వరిజ్ పిడఃగితాద్. అయవలె అయ మొసాప్ లొఇహ్సాన్, “ఏండ్రు నా ఇస్టమాతి నా మరిన్. విన్నిమాట వెండ్రు”, ఇజి ఉండ్రి కంటం వాతాద్.

8 వెటనె వారు సురుల సుడఃతిజి వరివెట యేసు తప్ప ఎయెర్బా తొర్వితార్.

9 వారు గొరోన్ డిఃగిజివాజి మహివలె, “లోకుమరిసియాతి నాను సాతివరిబాణిజ్ మర్జి నిజినిదాక మీరు సుడఃతిక మహిక ఎయెజ్బా వెప్పాట్”, ఇజి యేసు వరిజ్ కనితం వెప్సాన్.

10 యేసు వెప్సావజి వారు ఎయెజ్ వెహ్విండ వరిమన్సురు ఇడఃజి వరిలోఇ వారి వర్గితార్, “సాజి నిజ్నిక ఇహిజి అర్లం ఇనిక?”.

11 నస్తవలె వారు యేసుజ్ వెన్బాతార్, “ఏలియ ముజుల్ వాదెజ్వెలె ఇజి యూదురి రూలు నెన్పిస్సికార్ ఎందానిజ్ వెహ్సానార్?”

12 యేసు ఏలియ ముజుల్ వానాన్ ఇజి వెప్సాక నిజమె. వాండ్రు వాజి విజు కొత్తజ్ కినాన్లె*. గాని లోకుమరిసియాతికాన్ నండో కస్టమ్కు ఓరిసి మాలెజ్ ఆజి లోకువన్నిజ్ నెక్కిపొక్కార్ ఇజి రాస్తి దనిజ్ అర్లం మిజి తెలినాదా?

13 గాని నాను మిజి వెహ్సాన్, ఏలియ వాతాన్. వన్ని వందిజ్ రాస్తి లెకెండ వరిజ్ ఇస్టం ఆతి వజి వారు వన్నిజ్ కితార్. ఇజి వెప్సాన్.

† 8:34 8:34 * 9:12 9:12 వదాయ్ ప్రమాణమ్దు మన్ని మలాకి ప్రవక్త రాసి పుస్తకమ్దు రాస్తిమన్నిలెకెండ ఇహిజి ఏలియ ముజుల్ వాదెజ్ ఇజి యూదురి నమ్మిజనార్. మలాకి 3:1; 4:5-6.

దెయం అస్తికొడోదిజ్ యేసు నగెండ్ కిజినాన్

14 యేసుని, సిసూర్, మహి సిసూర్ మహిబాన్ వాతిజ్ సిసూర్ సురుల నండ్ లోకుర్ కూడ్తి మహిక నుడుతార్. యూదురి రూలు నెన్పిన్నికార్ సిసూర్వెట వాదిసి మహార్.

15 అబ్బె మహి లోకుర్ విజెరి యేసుజ్ నుడేతార్ నండ్ బమ్మ అజి వెటన వన్నిబాన్ ఉహ్కీవాజి వన్నిజ్ మాడిస్తార్.

16 నస్తవలె యేసు, “మీరు ఇనిదన్నిజ్ సిసూర్వెట వాదిసి మహిదెర్? ఇజి వెన్బాతాన్.

17 ఆ జనమ్లొఇ ఒరిన్ ఈహు వెహ్తాన్, “మేస్తర్, నా మరిసిజ్ నీ డగ్రు తత్త. వన్నిజ్ ఉండ్రి దెయం అస్తాదె వన్నిజ్ వర్గింపిండ్ కితాద్.

18 ఆ దెయం నా మరిన్ అన్ని వేడేదు అబ్బెనె వన్నిజ్ అర్ప్పినాద్. నస్తవలె వాండ్రు వెయుదాన్ పెంపులు కక్కి వల్లు కొహానినాన్. వాండ్రు డుడ్డువజి డజ్ న అజినాన్. ఆ దెయమ్దిజ్ ఉల్పు ఇజి నీ సిసూర్ వెట నాను వెహ్ గాని సిసూర్ అట్పెతార్.

19 యేసు వెహ్తాన్, “నమకం నిల్లి యా తరమ్దికిదెరా, నాను ఎస్సాకాలం మీవెట మంజిన? మీరు కిజినికెజ్ ఎస్సా ఓరిస్తాజ్? వన్నిజ్ నా డగ్రు తగ్ అ”.

20 నస్తవలె వారు ఆ కొడోదిజ్ యేసుడగ్రు తత్తార్. ఆ దెయం యేసుజ్ నుడేతిజ్ సరి వన్నిఒడోల్ విజు వణకిసి బూమిద్ అర్ప్పాద్. అర్ప్పాదె వాండ్రు నుడేబాజి పొజు కత్తాన్.

21 నస్తవలె యేసు, “వన్నిజ్ దెయం అసి ఎస్సా కాలం ఆతాద్?”, ఇజి అపొసిజ్ వెన్బాతాన్. “ఇజి వెలెనాన్”, ఇజి అపొసి వెహ్తాన్.

22 “ఆ దెయం కొడోదిజ్ నస్తాజ్ ఇజి నండ్ నుట్టు సిసూద్, నిల్లిజి ఏరుదు అర్ప్పి మహాద్. నీను ఇనికబా కిదెజ్ అట్టి ఇహిజ మా మున్సు కనికారం అజి మజి సాయం కీఅ”, ఇజి అపొసి యేసుజ్ వెహ్తాన్.

23 యేసు వెహ్తాన్, “నీను ఇనికబా కిదెజ్ అట్టిజ ఇజి మీరు నజి వెహ్పాదెరా? ఎయెన్బా దేవుణు మున్సు నమకం ఇడ్డిజి వన్నిజ్ దేవుణు ఇనికబా కిదెజ్ అట్టాన్”.

24 వెటన ఆ ఇజి వన్ని అపొసి, “నాను నమిజిన. అనుమానం సిల్లెండ్ నమినివజి నాను నిజి నమ్మిదెజ్ సాయం కీఅ”, ఇజి డటం వెహ్తాన్.

25 అబ్బె లోకుకూడేజి ఉహ్కీ వానిక యేసు నుడేజి ఆ దెయమ్దిజ్ “ఓ గుల్లబొయర దెయం, యా కొడోదిజ్ డిసి వెల్లి సాన్ అ ఇజి నాను ఆడ్రి సీజిన. ఎనెజ్ బా మర్జి వన్ని లొఇ రమ”, ఇజి డటిసి వెహ్తాన్.

26 నస్తవలె ఆ దెయం గగొలాజి వన్నిజ్ గొప్ప వణకిసి డిస్త సాహాద్. ఆ కొడోదిజ్ నుడేతిజి సాతివన్నివజి మహాన్. అక్క నుడేజి నండ్ డార్ “యా కొడో సాత సాహాన్” ఇహార్.

27 గాని యేసు వన్ని కీదు అసి నిక్తిజ్ వాండ్రు నిహాన్.

28 యేసు ఉండ్రి ఇండ్రి సాహివెనుక, యేసు అజి మహిజ్ వన్నిసిసూర్, “మాపు ఎందానిజ్ ఆ దెయమ్దిజ్ ఉల్పైజ్ అట్పెతామ్? ఇజి వెన్బాతార్.

29 అందెజి యేసు, “యా రకం దెయమ్కు పార్దనం వెలెనె గాని మరి ఇనిదనివెలెబా సాన్ ఉ”, ఇజి వెహ్తాన్.

యేసు వన్ని సావువందిజ్ మరి వెహ్పానాన్

30 వారు అబెణిజ్ సాన్ని గలీలయదాన్ సాన్ని మహార్. వారు ఎంబె మంజినారొ ఇజి ఎయెజ్ బా తెలిదెజ్ యేసుజ్ ఇన్టం నిల్లెతాద్.

31 ఎందానిజ్ ఇహిజ, యేసు వన్ని సిసూర్జ నెన్పిసి మహాన్. ఇనిక ఇహిజ, “లోకుమరిసియాతి నజి లోకాజ్ ఒవజిప్పార్లె. వారు నజి సప్పార్. ముండ్రి రోస్కాజ్ నాను బత్తిజి నిజ్ నాలె.

32 గాని యేసు వెహ్పామాట సిసూర్ అర్దం కివితార్. ఆ మాటజి వందిజ్ వన్నిజ్ వెన్బాదెజ్ వారు తియెలాతార్.

విజెరిజ్ మున్సు పెరికాన్ ఎయెన్?

33 వారు కవెర్నూము ఇని పట్టమీదు వాతార్. వారు ఇండ్రి వాతిజ్ యేసు మీరు సర్దు ఒరిన్ వెట ఒరెన్ ఇనిదని వందిజ్ వాదిసి మహిదెర్. ఇజి వెన్బాతాన్.

34 గాని వారు ఇనిక వర్ణించడం అలెతార్. ఎందానిజ్ ఇహొజు వానివలె సర్దు 'మా లొఇఎయెన్ పెరికాన్' ఇజి ఒరెన్వన్నివెటు మరిఒరెన్ వాదిసి మహార్.

35 నన్నివలె యేసు బస్తాండ్రె వన్నెండు మణిసిర్ సిసూరిజ్ కూక్కి ఈహు వెహ్లాన్, ఎయెన్ మహి వరిమున్ను పెరికాన్ ఆనాండ్రొ, వాండ్రు విజెరి ఇంక అగిజి మండ్రెజ్. వాండ్రు విజెరిజ్ సేవ కిడెజ్.

36-37 వెనుక యేసు ఒరెన్ ఇజ్జి కొణ్ణెదిజ్ తసి వరినడిఃమి నిల్పాన్. మరి ఆ కొణ్ణెదిజ్ ఎతాండ్రె ఈహు వెహ్లాన్, "ఒరెన్ ఇజ్జి కొణ్ణెదిజ్ ఎయేర్ నా పేరు అసి వరిఇండ్రె డగ్రు కినారొ వారు నజి డగ్రు కినార్. ఎయేర్ నజి డగ్రు కినారొ నజి అఎండ నజి పోక్కివన్నిజ్ డగ్రు కినార్.

మా మున్ను పగసిల్లికాన్ మా పడఃకారు మన్నికాండ్రె

38 యోహూసు వెహ్లాన్, "మేష్టర్, ఒరెన్ నీ పేరు అసి దెయమ్కాజ్ ఉల్పిక మాప్వండఃతావ్. వాండ్రు మాలోఇ మనికాన్ ఆవన్. అందెజి మాహు వన్నిజ్ అడ్డు కిత్తావ్.

39 యేసు వెహ్లాన్, "వన్నిజ్ మీరు అడ్డు కిమాట్. నా పేరు అసి యేలు బమ్మాతి పణికినికాన్ వెటినె నా వందెజ్ నిఇక వెహ్లావ్.

40 మా మున్ను పగ సిల్లికాన్ మా పడఃకారు మనికాండ్రె.

41 నాను నిజం వెహ్లాన్, ఎయేర్బా మీరు క్రీస్తు వారుఇజి వెహ్లాన్, నా పేరు అసి గినాడు ఏరుఉండెజ్ మిజి సితజి దేవుణు వరిజ్నిజం ఇనాయం సీనాన్.

తప్పకిబిసినివన్నిజ్ నండొ సిక్కి వానాద్

42 నామున్ను నమ్మకం ఇడ్డి యా ఇజిరి కొణ్ణెనిన్ని వరిలోఇ ఒరెన్వన్నిజ్ ఎయేర్బా తప్పకిడెజ్, సరి తోరిస్తిజి వాండ్రు మెడఃదు పెరి జతవణుకు తోవా ఆజి సమదరమ్దు అడఃగి ముడిఃగి సొనొక వన్నిజ్ నెగెద్. ఎందానిజ్ ఇహొజు తప్పకిబిస్తివన్నిజ్ ఒద్దె సిక్కి వానాద్.

43 నీ కియు నిజి తప్ప కిబిస్తిజి దనిజ్ కత్తి విసిర్అ.

44 రుండి కికు మంజి ఎలాకాలం సిసు మంజినిబాన్ సొన్వీండ ఉండ్రె కియు మంజి ఎలాకాలం బత్తిదెజ్ దేవుణుబాన్ సొనిక నెగెద్.

45-46 నీ కాల తప్పకిబిస్తిజి దన్నిజ్ కత్తి విసిర్అ. రుండి కాల్యు మంజి ఎలాకాలం సిసు మంజినిబాన్ దేవుణు నిజి అర్వీవండ, సొట వాండ్రు ఆజి ఎల్ల కాలం బత్తిదెజ్ దేవుణు బాన్ సొనిక నెగెద్.

47 నీ కణుక తప్పకిబిస్తిజి దన్నిజ్ లాగ్గి విసిర్అ. రుండి కణుకు మంజి దేవుణు నిజి నరకమ్దు అర్వీవండ ఉండ్రె కణక మంజి దేవుణు ఏలుబడిఃదు మంజినిక నెగెద్.

48 బానె వరి పిడుఃకు† సొఉ. సిసు నమ్వీద్.

49 సొరుదాన్ ఇడ్డివజి దేవుణుదిజ్ నమ్మిని వన్నిజ్ సిసు నని కస్తందాన్ ఇత్తాన్.

50 సొరు, నెగ్గికాది గాని దన్నిజ్మని రుసి సొహొజి ఎలాగ మరి దన్నిజ్ రుసి తప్పిస్తెజ్ ఆనాద్? మీరుబా సొరు రుసి సీనివజి ఒరెన్వెట ఒరెన్ సమనం కల్లిజి మండ్రెజ్.

10

అల్లిజ్డిఃస్టెజ్నాయమ్నా ఇజి యేసు నెన్పినినాన్

1 యేసు, వాండ్రు మహిబాణిజ్ డిఃసి యూదయ ప్రాంతమ్దు వాజి యొర్దాన్ గడ్డ డాట్టాన్. మరి వన్నిబాన్ నండొ లోకుర్ వాతార్. ఎనిజ్బా నెన్పినినిలెకెండ యేసు వరిజ్ నెన్పిస్తాన్.

2 నెగెండార్ పరినయేరు యేసుడగ్రు వాజి వన్నిమాటజి తప్ప అన్జెజ్ నుడఃతార్. వారు యేసుజ్ వెన్బాతార్, మోనె సితి రూలువజి ఒరెన్ వన్నిఅల్లిజ్ డిఃస్టెజ్ తగితి రూలుమనాదా?

3 అందెజి యేసు, మోనె ఇని రూలు మిజి సితాన్? ఇజి వరిజ్ వెన్బాతాన్.

4 ఒరెన్ వన్ని అల్లిజ్ డిఃస్టెజ్ ఇహొజి ఉండ్రె అక్క, రాసిసిజి దన్నిజ్ డిఃస్టెజ్ ఆనాద్. ఇజి మోనె సితి రూలుదు మనాద్, వారు వెహ్లాన్.

5 యేసు వెహ్లాన్, మీ మున్నుజ్ నస్సా గర్ర అతిజ్నెనె యా ఆడ్ర రాసి సితాన్.

† 9:48 9:48 నల్లిసానిదన్నిజ్ లొఇమున్ని పిడుఃకుజ్

- 6 గాని దేవుణులు లోకాల్ వుటిస్తేవలె మొగకొడో అయ్యేలి కొడోలెకెండ్ వరిజ్ వుటిస్తాన్.
- 7 అందెజె మొగవండ్రు వన్ని అయ్యేసి అపొసిజ్ డిసి వన్ని ఆల్సెవెట కూడోజి మంజినాన్.
- 8 రిఎర్ ఉండ్రె ఒడోల్వజి అజిమంజినార్. అందెజె మరి ఎసిజ్బా వారు రిఎర్ అండ ఉండ్రె లోకున్.
- 9 అందెజె దేవుణులు జత్తకూడిప్పివరిజ్ లోకు అజి కినిక అవద్.
- 10 వారు ఇండ్రె మహిపలె సిసూర్ యా సజతి వందిజ్ యేసుజ్ మరి వెన్బాతార్.
- 11 యేసు వెప్తాన్, “ఒరెన్ ఆల్సెవెట డిసి మరిఉండ్రె దనిజ్ ఇడ్డెఅతిజి వాండ్రు రంకు బూలాజినాన్.
- 12 అయి లెకెండ్ అయ్యేలికొడో మాసిజ్డిసి మరి ఒరెన్వన్నిజ్ ఇడ్డెఅతిజి అది రంకుబూలాజినాద్”.

యేసు ఇజిరి కొడోరిజ్ దీవిసినాన్

- 13 లోకుర్, వరిఇజిరి కొడోరిజ్” వరిమున్కు వన్ని కిక్కు ఇడ్డెదెజ్ ఇజి యేసుబాన్ తత్తార్. అక్కు సుడోతార్ సిసూర్ వరిజ్ జట్టెజ్ ఆతార్.
- 14 గాని యేసు అక్కు సుడోతాండ్రె సిసూర్మున్కు కోపం ఆతాన్. “యా ఇజిరి కొడోరిజ్ నా డర్దు రపిర్. వరిజ్ అడ్డు కిమాట్. ఎందానిజ్ ఇహిజి యాలెకెండ్ మన్నికార్ దేవుణులు ఏలుబడిదు మంజినార్.
- 15 నాను వెప్తా కిజిమె. ఇజిరి కొడోరిజ్ నమకం ఇడ్డెవజి దేవుణుమున్కు నమకం ఇడ్డెకార్ దేవుణులు ఏలుబడిదు మంజినార్. సిల్లెకార్ సొన్వర్”, ఇజి యేసు వెప్తాన్.
- 16 నస్తవలె యేసు అయి ఇజిరి కొడోరిజ్ ఎత్తి, వరి మున్కు కిక్కు ఇడ్డెజ్హిమజి దీవిస్తాన్.

ఆస్తి మనికాన్ యేసుడర్దు వాజినాన్

- 17 యేసు అబ్బెహాన్ సొండ్రెజ్ సొత్తిజ్ ఒరెన్ ఉహ్కీ వాజి వన్ని ముజుల్ ముణుకుజ్ ఊర్జి మాడిస్తాన్, “ఒ నెగ్గి బోదకినికి, దేవుణువెట ఎలాకాలం మంజిని బత్తుదు మండ్రెజ్ ఇహిజి నాను ఇనిక కిదెజ్”, ఇజి యేసుజ్ వెన్బాతాన్.
- 18 “నీను ఎందానిజ్ నజి నెగ్గి ఇజి వెహ్సినె? దేవుణు ఒరెండ్రె నెగ్గికాన్. మరి ఎయెన్బా నెగ్గికాన్ అవన్.
- 19 దేవుణు వెప్తా రూలువిజి నిజి తెలినాద్. లోకాజ్ సప్తెజ్ అవద్, రంకు బూలాదెజ్ అవద్, డోజి కిమా అబద్దమదిజ్ సొస్య వెప్తా, ఎయెజ్బా మోసం కినిక అవద్, యాయ బుబ్బరిజ్ గవరమదాన్ నెగ్గెండ్ సుడిదెజ్”, ఇజి యేసు వన్నిజ్ వెప్తాన్.
- 20 వెప్తాజ్ “బోదకినికి, ఇజిరి వెలెహన్ అసి యా విజువనకాజ్ లోజిజినె నాను మంజిన్”, ఇజి వాండ్రు వెప్తాన్.
- 21 యేసు వన్నిజ్ సుడోజి వన్నిజ్ ప్రేమిస్తాన్. “నీను ఉండ్రె కిదెజ్ మనాద్. అక్కు ఇనిక ఇహిజి నీను సొస్తి నిజి కల్లితిమనిక విజు పొగ్గి అయి డబ్బుజ్ బీదాతివరిజ్ సిఅ. అయవలె పరలోకమదు నిజి ఆస్తి దొహ్కాద్. వెనుక వాజి నా సినూ ఆఅ”, ఇజి యేసు వెప్తాన్.
- 22 యామాట వెహ్ండ్రె వాండ్రు మొకొం ఊతాండ్రె మన్నుదు దుకమాజి సొహ్. ఎందానిజ్ ఇహిజి వాండ్రు నండో ఆస్తి మన్నికాన్.
- 23 నస్తవలె యేసు సురుల సుడోజి సిసూర్జి వెప్తాన్. “ఆస్తి మన్నికాన్ దేవుణు ఏలుబడి అడిగి మండ్రెజ్ ఎస్సానో కప్టం.
- 24 యేసు వెప్తా మాటెజ్ సిసూర్ వెహెర్ బమ్మ ఆతార్. యేసు మరి వెప్తాన్, “కొడోరాండె దేవుణు ఏలుబడి అడిగి మండ్రెజ్ ఎస్సానో కప్టం.
- 25 ఆస్తిమన్నికాన్ దేవుణుకిని ఏలుబడిదిజ్ లోజిజి మండ్రెజ్ ఇహిజి కప్టం. ఉండ్రె ఒంట బోహనం బోరోదాన్ డుగ్గెనిక దన్నిజ్ ఇంక సులునె”.
- 26 యాక వెంజి సిసూర్ మరి ఒడ్ది బమ్మ ఆతార్. అహిజి దేవుణు రక్సిన్సిలెకెండ్ ఎయెన్ మండ్రెజ్ అట్టాన్? ఇజి వారు ఒరెన్వెట మరి ఒరెన్ వెప్తాన్.
- 27 నస్తవలె యేసు వరిజ్ సుడోజి, అయా లోకాజ్ అట్టెకాదె గాని దేవుణు విజు కిదెజ్ టూన్”, ఇజి వెప్తాన్.
- 28 నస్తవలె వేతురు, మాపు విజు డిస్తాపె నీవెట వాతావ్ ఇజి యేసుజ్ వెప్తాన్.

29-30 యేసు మరి వెప్తాన్, నాను వెప్తాక ఇనిక ఇహిజ, నా వందిజ్, నువార్త వెప్తా వందిజ్, ఇలుజొల్లు నా దాదతంబేరిబు, తజీబీబికాజ్, కొడొరిజ్, అయ్సిఅపొసిరిజ్, బూమిజ్ డిసివన్సిజ్ యా లోకమ్దునె వంద వందుజ్ ఇల్లు, దాదతంబేరిజ్, బీబితజ్జు, కొడొరిజ్, అయ్సిఅపొసిరి, బూమి, కల్లినాద్. అక్కాదె ఆవండ దేవుణుదిజ్ నవుత్తివరిజ్ యా లోకమ్దు కన్వమ్కుబా వానె. గాని దేవుణు రాజువజ వానివలె వాండ్రు ఎలాకాలం దేవుణువెట బత్తినాన్.

31 అయలెకెండన్ కడెవెరిదికార్ ఇజి ఒడిబినికార్ మొదొహికార్ ఆనార్. ముందహికార్ ఇజి ఒడిబినికార్ కడెవెరిదికార్ ఆనార్.

యేసు మరిఉండ్రీ సుటు వన్సిసావు వందిజ్ వెప్తినాన్

32 యేసుని, సిసూర్ యెరూసలేమ్దు సొన్సి మహార్. లోకుర్బా వరివెట సొన్సి మహార్. యేసు వరి ముజొల్నడితాన్. యేసు యెరూసలేమ్దు సొన్సిని వందిజ్ సిసూర్ బమ్ముజతార్. లోకుర్ తియెలాతార్. యేసు వన్వొండు మణిసిరి సిసూర్ వన్సిడ్రు కూక్కి, వన్సిజ్ జర్గినిక వరిజ్ వెప్తాన్.

33 “ఇదిలో మాటు యెరూసలేమ్దు సొన్సినాట్. లోకుమరిసియాతి నాను పెరి పుజెరిబ, యూదురి రూలువెప్తా వరిజ్ ఒవజెప్పారె. వారు నజీ సావుదిజ్ సిక్కు సీజ యూదురు ఆఇవరిజ్ నజీ ఒవజెప్పారె.

34 వారు నజీ వెక్కిసి, నా మున్కు పూసి, కొర్దదాన్ డెయెజి నప్పారె. మూండ్రీ రోస్కాణిజ్ మరజి నిజ్నాలె”, ఇజి వెప్తాన్.

యాకోబుని యోహాను యేసువెట ఉండ్రీమాట వెహ్సినార్

35 నన్సివలె జెబెదయ మరిసిరాతి యాకోబు యోహాను ఇనికార్ యేసుడ్రు వాతారె, “ఓ బోదకినికి, మాపు ఇనికబా లొన్సిజ అక్క మజీ సీదెజ్వెలె” ఇహార్.

36 యేసు వరిజ్ “నాను మీ వందిజ్ ఇనిక కిదెజ్?”, ఇజి వెన్బాతాన్.

37 వారు, “నీను రాజువజ ఏలుబడిః కినివలె మజీ ఒరెన్వన్సిజ్ నీ ఉణెర్ వడెకాదు ఒరెన్వన్సిజ్ నీ డేబ్రు వడెకాదు బనె కిల ఇజి కోరిజినాన్”, ఇజి వెప్తాన్.

38-39 యేసు వరిజ్ “మీరు ఇనిక లొనిసిదెరో మీరు నెన్ఇదెర్. నాను ఒరిస్సెజ్ మన్సి నండొ బాదెజ్ మీరు ఒరిస్సెజ్ అట్టిదెరా? నాను పొందిని బాప్తినం పొందిదెజ్ అట్టిదెరా?”, ఇజి వరిజ్ వెన్బాతిజ్ వారు, “మాప్ అటూప్ ఇహార్. దనిజ్ యేసు నాను ఒరిస్సి నండొబాదెజ్ మీరు ఒరిస్సిదెర్. నాను పొందిని బాప్తినం మీరు పొందిదెజ్.

40 గాని నా ఉణెర్ వడెకాద్ డేబ్రు వడెకాద్ ఎయెర్ బస్సెజ్ ఇజి తీర్మనం కితిక నాను ఆవి. దన్సి వందిజ్ దేవుణు తీర్మనం కిత్త మనాన్. వాండ్రు తీర్మనం కితివరిజ్ అక్క సీనాన్.

41 మహి వది మన్సి సిసూర్ యా మాట వెహ్చారె యాకోబుని యోహాను మున్కు కోవమాతారె.

42 యేసు సిసూరిజ్ విజెరిజ్ కూక్కి ఈహు వెప్తాన్, “యూదురు ఆఇవరిలోఇ ఏలుబడిః కిదెజ్ అతికారం మన్సికార్ వరిమున్కు అతికారం తోరిస్సార్ వరిలోఇ పెరికార్ వరిజ్ మన్సి అతికారమ్దాన్ లోకురిజ్ అణను తిగ్జినార్ ఇజి మిరు నెన్సిదెర్.

43 మీరు వరిలెకెండ మండ్రెజ్ ఆవద్. గాని మీ లోఇ ఎయెన్బా పెరికానాదెజ్ ఇహిజి వాండ్రు మిజి పణిమణిసిరి లెకెండ ఆదెజ్ వలె.

44 మరి ఎయెన్బా మిజి విజెరె మున్కు నెయ్కి ఆదెజ్ ఇహిజి వాండ్రు మిజి విజెరిజ్ వెటిపణిమణిసిరిలెకెండ ఆదెజ్ వలె.

45 ఎందానిజ్ ఇహిజి లోక్కు మరిసిఅతి నానుబా లోకాజ్ సేవ కిదెజ్ వాత గాని సేవ కిబె ఆదెజ్ రెవత. మరి నండొండారిజ్ వరి పాపమ్కాణి విడువదల కిదెజ్ నా పాణం సిదెజ్ వాత మన్కు”.

యేసు గుడ్డిఅతి బర్తిముయిజ్ నెగెండ కిజినాన్

46 యేసుని సిసూర్ యెరికోపట్టుమ్దు వాతారె. వారు నండొ లోకుర్వెట పట్టుమ్దాన్ సొన్సి మహిజ్ తిమాయి మరిసి అతి బర్తిముయి ఇని గుడ్డివాండ్రు సరి వడెకాదు లొన్సిపాదెజ్ బన్వ మహార్.

47 సరి దాన్ వాజనికాన్ నజరేతువాండ్రు యేసు ఇజి వెంజి, “ఓ యేసు, దావీదుమరిసి నా మున్కు కనికరం తోరిన్అ”, ఇజి డటం గగోలెతాన్.

48 సేన లోకువన్నిజ్ “పలాక్ మండ్లు ఇజ గోల కిత్తార. గాని వాండ్లు “ఓ “దావీదుమరిసి, నా మున్ను కనికారం తోరిన్అ”. మరి ఒద్దె డట్టం డేల్స్తాన్.

49 యేసు నిహండ్లె, “వన్నిజ్ కూత్అ”, ఇజ వెహ్సాన్. వెహ్సాజ్ వారు ఆ గుడ్డివన్నిజ్ కూక్కి, “దయరం మన్అ, యేసు నిజి కూక్కినాన్, నిజ్అ”, ఇజ వెహ్సాన్.

50 వెటనె వాండ్లు వన్ని నీరి సొక్క, విసిర్లాండ్లె నిజ్జి యేసు బాన్వతాన్.

51 యేసు వన్నివెట, “నాను నిజి ఇనిక కిదెజ్ఇజి నీను కోరిజిని?”, ఇజ వెన్బతాన్. నస్తవలె వాండ్లు, “యేసు, నాను బేస్తెజ్ ఆపిద్”, ఇజ వెహ్సాన్.

52 యేసు, “నీను నా మున్ను నమకం ఇడ్డి అందెజి నీను నెగిండ్ ఆతి నీను ఇండ్రో సాన్అ” ఇహాన్. వెటనె నుడుదెజ్ అట్టాన్. వాండ్లు యేసువెట సోహాన్.

11

యేసుజ్ రాజువజ మర్యాద సీజినార్

1-2 యేసుని, వన్నిసినూర్ యెరూసలేం డగ్రుమన్ని బెత్పాగె బేతానియ ఇని నాహ్కజ్ వాతార. యా నాహ్కజ్ ఒలివ గోరోన్డగ్రు మన్నె. అబ్బె వాతిజ్ యేసు సినూర్ రివిరిజ్ కూక్కి, “మీరు ఎద్దు మని నాటో సాండ్లు. అబ్బె సాహిజుసరి తోహ్తా మని ఉండ్రి పెరి గాడెదె పిల్ల మీరు నూణిదెర్ దని మున్ను ఎయెర్బా ఎనెజ్బా బన్ఏతారె. దనిజ్ కుత్సి నాబాన్ పేర్జి తగట్”.

3 “మీరు ఎండా కుత్సినిదెర్ ఇజి ఎయెర్బా వెహ్సాజ, యాక ప్రబుజ్ కావాలి. మరి వెటనె దన్నిజ్ మర్జి పోక్సాన్ ఇజి వెహ్సా” ఇహాన్.

4-5 వారు సాన్ని ఇల్లుముజుజాల్ వీదిదు తోహ్తా మని ఉండ్రి గాడెదె పిల్లదిజ్ నుడతార. వారు దనిజ్కుత్సి మహిజ్, అబ్బె మనికార్, “ఎందానిజ్ మీరు యా గాడెదె పిల్లదిజ్ కుత్సినిదెర్”, ఇజి వెన్బతార.

6 యేసు వరిజ్ వెహ్తా వజనె సినూర్ వెహ్సాన్. అబ్బె మహికార్ వరిజ్ సరిస్తార.

7 వారు గాడెదె పిల్లదిజ్ యేసుబాన్ తత్తార. దన్నిమున్ను బస్తెజ్ వరి పాతెజ్ వహ్సాజ్ యేసు దన్నిమున్ను ఎక్కి యెరూసలేమ్దు సాండ్లెజ్ సోతాన్.

8 సాహిజ్ సేన లోకు వరి నీరి సొక్కజ్ సర్దు వహ్సాన్. మరి నెగిండాంగుడ్డెదు మని మరికాణి కొమ్మెజ్ తతార సర్దు వహ్సాన్. ఆహె కిజి వారు యేసుజ్ మర్యాద కిత్తార.

9-10 ముజుల్ సాన్ని మహికార్, వెనుక వాజి మహికార్, “ఓనన్న! ప్రబు సిత్తి అతికారమ్దాన్ వాజినికాన్ పొగ్డె: ఆనికాన్*. మా అని గొగొఆతి దావీదు రాజువజి ఏలుబడి: కిదెజ్ వాని ప్రబు గొప్ప వాండ్లు పరలోకమ్దు మన్ని దేవుణుదిజ్ ఓనన్న!”, ఇజి డేల్స్తాన్.

11 యేసు యెరూసలేమ్దు వాజి దేవుణు గుడిదు సోహాన్. అబ్బె మహి విజుదనిజ్ యేసు నుడతాన్. గాని పొద్దు ఆతిజ్ వన్నెండు మణిసిర్ సినూర్వెట బేతానియ నాటో సోహాన్.

పట్టు సిల్లి బొడెమరాన్

12 మర్చ నాండెజ్ యేసు, వన్ని సినూరు బేతానియదాన్ సాన్నిమహిజ్ యేసుజ్ బజ కట్టాద్.

13 యేసు దూరమ్దాన్ ఉండ్రి బొడెమరాన్ నుడెతాన్. పట్టు కాలం ఆఇజ్బా మరాతు ఆకుజ్ మహె. మరాత్వపట్టు మంజిని ఇజి డగ్రు సాహండ్లె నుడెతాన్. గాని ఆకు తవ పట్టు సిల్లు.

14 యేసు ఆ మరాతిజ్” నీ పట్టు మరి ఎనెజ్బా లోకురతిన్ఏంండ ఆపిర్” ఇజి వెహ్సాన్. వాండ్లు వెహ్సాక సినూర్ విహర్.

యేసు యెరూసలేమ్దు మన్ని పెరిదేవుణుగుడిదు సోహాన్

15 యేసుని వన్ని సినూర్ యెరూసలేమ్దు వాతిజ్, యేసు అబ్బెమహి యూదురి దేవుణు గుడిదు సోహాన్. అబ్బెగుడి: అర్బుదు మహి కొణి వరిజ్ పొర్నివరిజ్ విజెరిజ్ వెల్లి పోక్సాన్. డబ్బు మారిన్ని వరి బల్లెజ్ని పాపురపొటిజ పొర్నిని వరి పిటిజ్ మహ్తా విసిర్లాన్.

16 ఇని సామానమ్బా ఎయెర్బా దేవుణు గుడి: బాడి:దాన్ బరు మోస్తెజ్ యేసు సరి సివితాన్.

* 11:9-10 11:9-10 కీర్తన 118:26.

17 యేసు వరిజ్ నెన్పిసినివెలె ఈహు వెహ్సాన్, “నా గుడిః విజెరి లోకాజ్ పార్దనం కిని గుడిః ఇజి కూకె ఆనాద్లె†, ఇజి దేవుణు మాటదు రాస్త మనాద్. గాని మీరు దన్నిజ్ డోజారిజ సాలం‡ లెకెండ్ కిత్తి మన్నిదెర్”.

18 యేసు వెహ్సాక లోకుర్ విజేరె వెంజి బమ్మ అతార్. అబ్బె మహి పెరిప్పుజెరిబు, యూదురి రూలుజ్ నెన్పిసినికార్ అక్క, నుడేజి తియెలాతార్. యేసుజ్ ఎలాగ నస్తజ్ ఇజి ఆలోసనం కితార్.

19 పొద్దు ఆతివలె యేసుని, వన్ని సిసూర్ ఆ పట్టుమ్దాన్ సొహార్.

పట్టు సిత్తి బొడెమరాన్ వందిజ్ యేసు వెహ్సానాన్

20 పెందాల్పి వారు సొన్నిమహిజ్ యేసు పట్టు రెబాతి బొడెమరాన్ వెలెజాణిజ్ మరాన్ విజు సాతిక వారు నుడుఃతార్.

21 పేతురు యేసు వెహ్సాక గుర్తు కిత్తాన్. “ప్రబు నీసు నయవ్ సిత్తి బొడెమరాన్ సాత మనాద్”, ఇజి వెహ్సాన్.

22-23 యేసు వరివెలె ఈహు వెహ్సాన్, “మీరు దేవుణు మున్ను నమకం ఇడఃదు. నాను నిజం వెహ్సాన్. ఎయెర్బా యా గోరోదీజ్” పెర ఆజి నమదరమ్దు అర్అ’ ఇజి వన్ని మన్నుదు అనుమానం సిల్లెండ నమిజి వెహ్సాజ ఆ వజనె జర్గినాద్”.

24 అందెజి నాను వెహ్సాన్, మీరు పార్దనం కినివెలె మీరు ఇనికెజ్ లోసినిదెరో అక్కెజ్ దోహ్కంండ ముజాలె అక్కెజ్ దోహ్కాద్ ఇజి నమ్మిదు. నస్తివలె అక్కెజ్ విజు మిజి కల్లిన్.

25 మీరు ఎనెజ్బా పార్దనం కినివెలె ఎయెన్బా మీ మున్ను తప్పకత్తి మనాన్ ఇహిజి వన్నిజ్ సెమిస్తజ్.

26 నస్తివలె వరలోకమ్దు మన్ని నీ బుబ్బాతి దేవుణు మీ తప్పజ్బా సెమిస్తాన్.

యేసుజ్ ఎయెన్ అతికారం సితాన్ఇజి వెన్బాజినార్

27 యేసుని, వన్నిసిసూర్, మరి యూరూసలేమ్దు వాతార్. యేసు అబ్బె దేవుణుగుడిః నడిఃజి మహిజ్ పెరిప్పుజెరిబు యూదురి రూలుజ్ నెన్పిసినికార్ యూదపెద్దెల్జి వన్నిబాన్ వాతార్.

28 వారు యేసుజ్ వెన్బాతార్, “నీసు ఇని అతికారమ్దాన్ యా పణిజ్కిజిని? యాపణిజ్ విజుకిదెజ్ ఎయెన్ నిజి అతికారం సితాన్?”.

29 యేసు వెహ్సాన్, “నాను మిజి ఉండ్రీమాట వెన్బాన్. నజి జబాబ్ వెహ్సా. అయవలె యా పణిజ్ ఎమేణి అతికారమ్దాన్ కిజిన ఇజి నాను మిజి వెహ్సా.

30 యోహానుజ్ బాప్తీసం సేదెజ్ అతికారం ఎంబెణిజ్ వాతాద్? దేవుణు బాణిజ్నా, లోకుర్బాణిజ్నా? నజి వెహ్సా.

31-32 యేసు వెహ్సామాట వెంజి వరిలోఇ వారె ఒడిఃబితార్. దేవుణుబాణిజ్ వాతాద్ ఇజి వెహ్సాజి అయవలె ఎంధనిజ్ మీరు వన్నిజ్ నమ్మిఇతిదెర్ ఇజి వెన్బానాన్. లోకుర్ బాణిజ్ వాతాద్ ఇజి వెహ్సాజి వారు లోకాజ్ తియెల్ అతార్. ఎందానిజ్ ఇహిజి యోహాను దేవుణు మాట వెహ్సా ప్రవక్త ఇజి లోకుర్ నమ్మితార్.

33 అందెజి వారు, “మజి తెలివిద్”, ఇజి మర్జి వెహ్సార్. అయవలె యేసు, “అహిజి, యా ఎంమేణి అతికారమ్దాన్ యా పణిజ్ కిజిన ఇజి మిజి నానుబా వెహ్సా”, ఇజి వెహ్సాన్.

12

పాలిసిత్తి టోటకత

1 యేసు వరిజ్ కతవజి ఈహు వెహ్సాన్. “ఒరెన్వన్నిజ్ కండెక్ బూమి మహాద్. వాండ్రు ఆ బూమిదు ద్రాసమ్మెకెజ్ ఉణుస్తాన్. దన్ని సురుల కోటి తోహ్సాన్. దన్నిలోఇ ద్రాక్కుపట్కురసం పీర్లెజ్ పణుకుదు ఉండ్రీ గనుగు తయార్ కిబిస్తాన్. టోట కావ్కిదెజ్ ఉండ్రీ ఎత్తుమన్ని ఇల్లుబా తయార్ కిత్తాన్. వెనుక ద్రాసటోట సెగొండార్ రెయ్తుతురిజ్ పాలిదిజ్ సిత్రాండ్రె వయనం కిజి మరి ఉండ్రీ దేసం సొహాన్.

2 పట్టు, పంట్ని కాలమ్దు ఆ టోట విజమాని వన్నిజ్ వానివంతు లోని తగ్గల ఇజి ఒరెన్ పణిమన్నిజ్ పాలి అన్మిమన్నివరిడ్రు పోక్తాన్.

† 11:17 11:17 యెసయ 56:7. ‡ 11:17 11:17 యిర్మీయ 7:11

3 గాని పాలి అస్తిమన్నికార్ వన్నుజ్ డెయ్యారె వహి కీదాన్ మర్రి పోక్తార్.

4 అయవలె ఆ టోట ఎజుమాని మరి ఒరెన్ పణిమణిసిజ్ వరిడగ్రు పోక్తాన్. వారు వన్నుజ్బురాదు గాయం ఆనివజ డెయ్యజి సిగు కిజి పోక్తార్.

5 యజుమాని, వెనుక, మరి ఒరెన్వన్నుజ్ వరిబాన్ పోక్తాన్. వన్నుజ్ వారు డెయ్య సప్తార్. అయవజనె ఎజుమాని వన్ని పణిమణిసిర్ సెన లోకురిజ్ పోక్తాన్. సెగొండారిజ్ వారు డెయ్యతార్. మహివరిజ్ సప్తార్.

6 ఆక్కరదిజ్ అయ ఎజుమానిజ్ వాండ్రు ప్రేమ కిత్తి ఒరెండ్రెమహి మరిసి మిగిలిత్తాన్. అందెజె వన్నుజ్ పోక్తాన్. ఆ పాలి అస్తిమన్నికార్ నా మరిసిజ్ గవరం సీనారలె ఇజి వరిబాన్ పోక్తాన్.

7 ఆ పాలి అస్తిమన్నికార్ ఎజుమాని మరిసిజ్ సుడెజెతారె వీండ్రు యా టోటదిజ్ అక్కుమన్నుకాన్ రద్దు మాటు విన్నిజ్ సప్పి యా టోట మాది కినాట్”, ఇజి వారు కూడిజి వర్గితార్.

8 అందెజె వారు ముస్సు అర్తాండ్రె వన్నుజ్ సప్తార్. సప్తారె టోట వెల్లి విసిర్తార్.

9 ఆ టోట ఎజుమాని వరిజ్ ఇనిక కినాన్? వాండ్రు వాజి ఆ అస్తిమహివరిజ్ సప్తాండ్రె ఆ టోట ఆఇ రెయ్యురిజ్ పాలిదిజ్ సీనాన్.

10-11 యేసు మరి వెప్తాన్. “ఇల్లు తోహ్నికార్ నెక్కిపొక్తి పణుకునె మూలదిజ్ ములపణుకు ఆతాద్. యాక దేవుణు కియుదాన్ ఇర్గతిక. యక మా కణుకెజి బమ్మాతిక* ఇజి దేవుణు మాట రాస్తి మన్నుక మీరు సద్విఇదెరా?

12 యేసు యా కతవజ నెన్పిస్తిక వెహారె ‘మా వందిజ్ వెప్తాన్’ ఇజి పెద్దెలుజు నెస్తారె యేసుజ్ అస్తెజ్ ఇజి సుడెజెతార్. గాని మందలోకురిజ్ తియెలాతారె వన్నుజ్ డిజెస్తారె సాహార్.

పన్ను సీదెజా పోనినా ఇజి వెన్బాజినార్

13 వెనుక వారు పరిసయరుజ్ని హెరోదురాజు పార్తిలోఇ సెగొండారిజ్ యేసుమాటదు తప్ప అస్తెజ్ వన్నుబాన్ పోక్తార్.

14 వారు వన్ను డగ్రు వాజి, ఓ బోదకినికి, నీను నిజం వెహ్నికి ఇజి మాప్సెస్నాప్. నీను ఇజిరికార్ ఇజి పెరికార్ ఇజి తేడ తోఇకి వరిజ్ ఇస్సమాతిలెకెండ్ర వర్గినికి ఆఇ దేవుణు సరి వందిజ్ నిజమదాన్ నెన్పిసినికి. కయసరుజ్ పన్ను సీనిక నాయమనా అవిదా?

15 యూదురు ఆతి మాపు అక్కసీదెజా పోనినా? ఇజి యేసుజ్ వెన్బాతార్. వారు వేసం కినికార్ ఇజి నెసి “వీరు నా మాటదు ఎందానిజ్ తప్ప అస్తెజ్ సుడెజెనిదెర్? ఇజి యేసు వెన్బాతాన్. యేసు మరి వెప్తాన్, ఉండ్రె దినారి కాసు తసి నజి తోరిస్తు”.

16 వారు తసి వన్నుజ్ తోరిస్తార్. నస్తవలె వాండ్రు, దిన్నిముస్సు మన్ని బొమ్మ ఎయెది, దని ముస్సు రాస్తి రాంత ఎయెది? ఇజి వెన్బాతాన్. “కయసరుది”, ఇజి వారు వెప్తార్.

17 అయవలె యేసు కయసరుజ్ సెందితికెజ్ కయసరుజ్ సీదు. దేవుణుదిజ్ సెందితికెజ్ దేవుణుదిజ్ సీదు ఇజి వెప్తాన్. యేసు వెప్తిక వారు వెంజి బమ్మ ఆతార్.

సాతి వెనుక బత్తిఎరఇజి సెగొండార్ వెహ్నినార్

18 నస్తవలె సాతివెనుక మరజి నిజినిక సిల్లెద్ ఇజి నెన్పిసిని సదుకయరు ఇనివరి లోఇ సెగొండార్ యేసుడగ్రు వాతార్. వారు యేసుజ్ ఉండ్రె ప్రస్సు వెన్బాతార్.

19 “ఓ బోదకినికి, ఒరెన్ పెండ్లి ఆతి వెనుక కొడోర్ సిల్లెండ సాతిజి వన్ని తంబెర్సి ఒన్నిసిజ్ ఇడె ఆజి కొడోర్ ఇడిదెజ్. అహ సాతివరి వందిజ్ కొడోర్ పుట్టిస్తాజ్వలె ఇజి మోసి సత్తి రూలుదు మనాద్.

20 ఏలు సుడెజె ఆ ఉండ్రె కాలమదు ఏడుగురు తంబెరిజు మహార్. తోలేసురదికాన్ ఉండ్రె బోదెలిదిజ్ పెండ్లి ఆతాన్. కొడోర్ సిల్లెండ సాతాన్.

21 సాతిజ్ నడిపి వాండ్రు ఒనిసిజ్ పెండ్లి ఆతాన్. వాండ్రుబా కొడోర్ సిల్లెండ సాతాన్. వెనుక కొగ్రి నడిపి దన్నిజ్ ఇడె ఆతాన్.

22 అహ ఏడుగురుబా దన్నిజ్ పెండ్లి ఆజి కొడోర్ సిల్లెండ సాత సాహార్. కడెవెరిదు అయ బోదెలిబా సాతాద్.

* 12:10-11 12:10-11 కీర్తన 118:22,23.

23 అహిజ సాతివరిబాణిజ్ మరజి నిజినివెలి అ బోదేలి అయా ఏడు గురు లోఇ ఎయెజ్ ఆల్ని ఆనాద్? ఏడుగురుదిజ్బా ఆది ఆల్ని అత మహాద్గదె?

24 యేసు వరిజ్ ఈహు వెప్తాన్. “దేవుణు మాటజ్ మీరు నెన్ఇదెర్. దేవుణుసత్తు ఎస్సా ఇజి మిజి నెన్ఇదెర్. అందెజి మీరు తప్ప వెప్సానిదెర్.

25 సాతి వరిబాణిజ్ మరజి నిజినివలి ఎయెర్బా పెండ్లి ఆవెర్. పెండ్లిదిజ్ సివెర్ వారు పరలోకమ్దు మున్ని దేవుణు దూతెజలెకెండ్ మంజినార్.

26 సతి వరిజ్ దేవుణు మరజి నిక్కివందిజ్ మోసె రాస్తి పుస్తకమ్దు, వెయ్జి మహి తుపెజా డగ్రుహాన్ దేవుణు మోసెజ్ వరితి మాట మీరు సద్విఇదెరా? నాను, అబ్రాహం దేవుణు, ఇస్సాకు దేవుణు, యాకోబుదేవుణు, ఇజి దేవుణు అయవలి వెప్తాన్

27 అందెజి వాండ్రు సాతిసాహికార్ మాడిసెని దేవుణు అవెన్ బత్తిజి మున్నికార్ మాడిసెని దేవుణునె ఇజిమాటు సుడిజినాట్. సాతికార్బత్తివెర్ ఇజి మీరు వెప్తా గొప్ప తప్ప†.

విజు రూలుదు లోఇ ముకెలమాతి రూలు ఎమేణిక?

28 యూదురిజ్ రూలు నెన్పిస్సివరి లోఇ ఒరెన్బానె వాజి యేసు సదుకయరుజవెట వాదిసినిక వెహాన్. వారు మరజి వెప్తాజ్ అల్ఠెఇవజి యేసువరిజ్ జబాబ్ సిత్తాన్ ఇజి సుడిజి వాండ్రు వెన్బాతాన్ దేవుణు సత్తి విజు రూలుజలొఇ ముకెలమాతిక ఎమేణిక?.”

29 దస్సిజ్ యేసు వెప్తాన్, “విజు వన్యాజ్ లోఇ ముకెలమాతిక యాకదె, “ఓ ఇస్రాయేలుదికిదెరా, మీరు వెండ్రు. ప్రబువాతి మా దేవుణు ఒరెండ్రె.

30 నీను నీ పూర్తి మన్సుదాన్, పూర్తి పాణమ్దాన్, పూర్తి బుద్ధిదాన్, పూర్తి సత్తుదాన్ ప్రబువాతి దేవుణుదిజ్ ప్రేమిస్తెజ్”.*

31 దిస్సి వెనుక ముకెలమాతి రూలు ఇనిక ఇహిజ, “నీను నిజిని ప్రేమిస్సిలెకెండ్ మహివరిజ్ విజెరిజ్ ప్రేమినఅ”,† యీ రుండి రూలుజి మిస్తిక రూలుజ్ మరి ఎమేణికబా సిల్లెద్.

32 సస్తివలె అయ మణిసి వెప్తాన్. ఓ బోదకిసికి నీను బాగ వెప్తా. “దేవుణు ఒరెండ్రె. వాండ్రు తప్ప మరి ఎయెన్ దేవుణు సిలెన్”, ఇజి నీను వెప్తాక నిజమె.

33 నీ పూర్తి పాణమ్దాన్, పూర్తి బుద్ధదాన్ పూర్తి సత్తుదాన్ నీ దేవుణుఅతి ప్రబుజ్ ప్రేమిస్తెజ్, నిజి నీనె ప్రేమిస్సివజి మహివరిజ్ ప్రేమిస్తిక, దేవుణుదిజ్ సీజిని విజు పూజెజి మున్సు, దేవుణుదిజ్ కిజిని దూపమ్కాజ్ మున్సు నండ్ ముకెలమాతిక”.

34 యేసు వెప్తాక వాండ్రు నెగెండ్ అర్తం కిజి జబాబ్ వెప్తాన్ ఇజి సుడిజి యేసు ఈహు వెప్తాన్. “నీను దేవుణుదిజ్ ఏలుబడిః ఆడిగి మండ్రెజ్ డగ్రు ఆతి. అబ్బెణాన్ ఎయెన్బా యేసుజ్ ఇనికబా వెన్బాదెజ్ దయరం సిల్లెద్.

35 ఒర్పుయేసు దేవుణుగుడిఃదు నెన్పిసి మహిజ్ ఈహు వెన్బాతాన్. రాజువజి వాని క్రీస్తు పూర్వమ్దు మహి దావీదురాజు కుటుమ్దు పుట్టాన్ ఇజి యూదురిజ్ రూలుజ్ నెన్పిసికార్ ఎందనిజ్ వెప్సానార్?

36 దావీదురాజు దేవుణుఅత్తుదాన్ ఈహు వెప్తాన్: “నాను నీ వగ వరిజ్ నీ పాదం అగ్గి ఇడ్మిదాక నీను నా ఉణెర్ వడక బసి మనఅ ఇజి ప్రబు నా ప్రబువెట వెప్తాన్*.

37 దావీదురాజు క్రీస్తుజ్ ప్రబుఇజి కూక్సాన్. అహిజ ఎలాగ క్రీస్తు వన్ని మరిసి ఆనాన్?”. యేసు వెప్తాక వెంజి లోకుర్విజెరె నండ్ సర్ల ఆతార్.

38 యేసు లోకాజ్ నెన్పిసినివెలి ఈహు వెప్తాన్. “యూదురి రూలుజ్ నెన్పిసినివరి వందిజ్ జాగర్ల మండ్రు. వారు నండ్ దరది నీరి సొక్క† తోడిగిజి బూలాదెజ్ కొరిజినార్. సత్తెజి సడిమి పెరికార్ ఇజి మాడిసెని అదిజ్ కొరిజినార్.

† 12:27 12:27 అబ్రహము, ఇస్సాకు, యాకోబు ఇనికార్ యూదురు పెరి అనిగొగెరు వారు నండ్ పంబిజి ముందాల సాతసాహో. గాని వారు ఏలు దేవుణుబాణిజ్ బత్తిజి వన్యజ్ మాడిసెని మంజినార్. ‡ 12:30 12:30 ద్వితీ 6:4,5. § 12:31 12:31 లేవ 19:18.

* 12:36 12:36 కీర్తన 110:1. † 12:38 12:38 యీ నండ్ దరది నీరి సిక్క పెరి లోకు తోడిగిజి మహాన్.

39 యూదురి మీటిజ్ ఇండ్రో సోహిజ ముకెలమాతి బాడ్డిదు బస్తైజ్, విందుదు సోహిజ బస్తైజ్ ముకెలమాతి బాడ్డిదు వారు కోర్జినార్.

40 ఇనిక సిల్లి ముండమణిసిజ్ మొసెం కిజి వన్కాజ్ కల్లితిక వారు ఒనార్. లోకుర్ విజేరె విరజెనుడజిజ గొప్ప నెగ్గికార్ ఇజి వెప్పివజి వారు నండో పార్దనం కిజినార్. నిని లోకాజ్ గొప్ప సిక్కు వానాద్”.

ముండ మన్ని అర్పి నంద

41 యేసు దేవుణుగుడిడు సంత సీనిపెతి ఎద్దుబస్తాన్. దేవుణుగుడిడు వాతికార్ సంత పెతిదు డబ్బు అర్పిమహిక వాండ్రు సుడజిజ మహాన్. అస్తిమన్నకార్ నండోండార్ నండో డబ్బుజ్ ఆ పెతిదు అర్పివార్.

42 నస్తవలె ఉండ్రీ బీద ముండ మన్ని వాజి రుండి కాణిజ్ అర్పివార్.

43 యేసు సిసూరిజ్ వన్నిడ్రు కూక్కి, “నాను నిజం వెప్పిన, దేవుణు సుడతిజ్ యా ఇనిక సిల్లి రాండి బోదెలి మహివిజేరిజ్ మున్ను లాపు అర్పివార్.

44 అస్తిమన్నికార్ వరిజ్ కల్లితి అస్తిబాణిజ్ అర్పివార్. గాని అది దన్నిజ్ సిల్లిబాణిజ్ దన్నిజ్ బల్కుదెజ్ మన్నికెజ్ విజి సంత పెట్టెదు అర్పివార్”, ఇజి వెప్తాన్.

13

యేసు గుడివందిజ్ వెప్పినాన్

1 యేసు దేవుణుగుడిదాన్ సొన్ని మహిజ్ వన్ని సిసూర్ లోఇ ఒరెన్, “వ్రబు యా పణుకుజ్ ఎస్సా గొప్పవి యా మేడెజ్ ఎస్సా గొప్పవి”, ఇజి వెప్తాన్.

2 వన్నిజ్ యేసు వెప్తాన్, “మీరు ఏలు సుడజిజని యా గొప్ప నెగెండ తోర్జిని మేడెజ్ ఉండ్రీ పణుకు మున్ను మరి ఉండ్రీ పణుకు నిల్లిమనవిండ లోకుర్ వనకాజ్ లాగ్గు అర్పివార్ పూర్తి నాననం కినారె”.

3 యేసు దేవుణుగుడి ఎద్దు ఒలివ గొరొత్, బస్తి మహిజ్ పేతురు, యాకోబు, యోహాను, అంద్రెయ ఇనికార్ మరి ఎయెర్బా వెన్ఎండ యేసుజ్ వెన్బాతార్.

4 “యాకెజ్ ఎనెజ్ జర్గిలె? ఇక్కెజ్ విజి జర్గిదెజ్ డగ్రు అతాద్. ఇజి తొరిసిని గుర్తు ఇనిక? మజి వెమాఅ.

5 యేసు వరిజ్ వెప్తాన్, “ఎయెర్బా మిజి మొసెం కిఎండ జాగర్త సుడెదు మండ్రు.

6 నండో లోకుర్ నా పేరు ఇడెఅజి వానారెలె. “దేవుణు ఏర్పాటు కిత్తి పొక్కి క్రిస్తు నాన్”, ఇజి వెప్పి నండోండారిజ్ మొసెం కినారెలె.

7 మీరు విద్దెమకు వందిజ్ వనిదెర్లె. మరి విద్దెమకు వానెలె ఇజి సాటిసినిక వెనిదెర్లె. అయవలె తియెలామ. అక్కెజ్ విజి జర్గిదెజ్ వెలె. గాని యాక అక్కర్ ఆవిద్.

8 లోకుర్మున్ను లోకుర్ని దేనమ్కాజ్ మున్ను దేనమ్కు విద్దెం ఆనాలె. అబ్బె ఇబ్బె నండోబాన్ బూమి కడ్డినాద్లె. కరు వానాద్లె. యాక్కెజ్ విజి ఉండ్రీ బోదెలి కియుదు అస్తైజ్ ముజల వానినోపిజ్ మొదోల్స్తెలెకెమండ ఇక్కెజ్ విజి జర్గిజ మహిజ అక్కర్ దిసమ్కు వాజినాద్ ఇజి నెస్తిజానాద్.

9 మీరు జాగర్త మండ్రెజ్. లోకుర్ మిజి కొర్టుదు ఒపజెప్పాద్లె. యూదురి మీటిజ్ ఇల్కాజ్ మిజి కొరడెజాణిజ్ డెయనార్లె. రాజుర్జ ముందాల అదికారిజ ముందాల, నా మున్ను నమకం ఇట్టివందిజ్ మిజి నిల్పార్లె. అయావెలె నా వందిజ్ సువార్త వెప్పిద్లెర్లె.

10 దేవుణు సువార్త బూమెమున్ను మని విజేరిజ్ అక్కర్ దిసమ్కాజ్ ముజల వెప్తాజ్ వలె.

11 వారు మిజి తొప్పి ఒని క్కోర్దుడు ఒప్పజెప్పివెలె మీరు అబ్బె ఇనిక వెప్తాజ్ ఇజి బెజి ఆమాట్. అయవలె దోహ్కైలె. వెప్పికిదెర్ మీరు అఇదెర్ దేవుణు అత్మ మిజి వెప్పికాదె మీరు వెప్పిదెర్”.

12 యేసు మరి వెప్తాన్. “దాద్ది తంబేర్కిజ్ తంబెర్ని దాద్దిజ్ అబ్బాసి మరిసిజ్ నప్పెజ్ ఒపజెప్పాన్లె. కొణోర్ అయేని అబాసిర్ మున్ను గొడెబఅజి వరిజ్ సప్పార్లె.

13 మీరు నా మున్ను నమకం ఇట్టివందిజ్ విజేరె మీ మున్ను పగదాన్ మంజినారెలె. అక్కర్దాక ఓరిన్ని వన్నిజ్ దేవుణు రక్కినార్లె.

దేవుణుగుడి లోఇ నండోతియెలెఅనిక ఉండ్రీ వానాద్లె

14 దేవుణుగుడిః లొఇ మండ్రెజ్ ఆఇ నాసనం కిని నెఇక అతిక ఉండ్రీ* దేవుణు గుడిఃదు నెగ్గి బాడ్డిదు నిల్పి మంజినిక నూణివలె (యాక నదీవనికాన్ అర్దం కిదెజ్వలె) యూదయ దేనిమేదు మంజినికార్ గొరోకాజ్ ఉప్తాజ్ వెలె.

15 ఇల్లు మున్ను మన్నికార్ ఇనికబా సామానం తత్తెజ్ ఇజి మర్జి ఇండ్రొ సొన్నాట్.

16 గుడెదు పణి కిజి మహికార్ వరి పాత తత్తెజ్ ఇజి మర్జి ఇండ్రొ సొనిక ఆవిద్.

17 ఆ దినమకాజ్ పొటద్ మన్ని వన్నాజ్ పాలు ఊట్పిసిని వనకాజ్ గొప్పు కన్డం.

18 ఇక పినికాలమేదు రెవండ పార్దనం కిదు.

19 ఎందానిజ్ ఇహిజ దేవుణు యా లోకం పుటిసిబాణిజ్ అసి ఏలుదాక రెఇనిన్ని గొప్పు కన్డంకు వానె. నిన్నికెజ్ మరి ఎనెజ్బా రెఉ.

20 దేవుణు ఆ కన్డం అతి రోస్కుతకు కివిండ మహిజ ఎయెనబా తప్పె ఆదెజ్ అఅట్పిన్. గాని దేవుణు ఎర్దిసివరి వందిజ్ ఆ రోస్కుకు దేవుణు తక్కు కిత్తాన్.

21 ఆ రొస్కాజ్ ఎయెనబా ఇదిలో క్రీస్తు అబ్బె మనాన్, సిల్లిజ క్రీస్తు ఇబ్బె మనాన్, ఇజి వెప్తాజి వరి మాట నమ్మిమాట్.

22 ఆ కాలమేదు నానె క్రీస్తు ఇజి అబద్దం వెప్తాకార్, నానె దేవుణు పోక్తి ప్రవక్త ఇజి అబద్దం వెప్తాకార్ వానార్. వారు నండో బమ్మాతి పణిజ్ ముజాల ఎనెజ్బా తొఇ నన్ని బమ్మాతి పణిజ్కిజి మొసెం కిదెజ్ నూణార్. అట్టిజ దేవుణు ఎర్లిన్సి మన్ని వరిజ్బా మొసెం కిదెజ్ నూణార్.

23 అందెజి మీరు జాగర్త మండ్రెజ్. నాను ముజాలె విజు మిజి వెప్తా మన్ను.

లోకుమరిసి దేవుణుజాయ్దాన్ వానిరోజు

24-25 ఆ కన్డంమాతి రోస్కుసాహి వెనుక పొదు సీకటి ఆనాద్. నెల జాయ్ సివిద్. సుక్కెజ్ ఆగసమేదాన్ రాల్పె. ఆగాసమేదు మన్నికెజ్ కద్దినె.

26 నస్తివలె లోకు మరిసియాతి నండో సత్తుదాన్ గొప్పు జాయ్దాన్ కూడిఃతి సొకుదాన్ మొసాప్ మున్నువానిక లోకుర్ నూణార్లె.

27 నాను నా దూతరిజ్ పోక్తానె యా లోకమేది కొనెజదాన్ ఆగసమేది కొనెజదాక నాల్లి మూలెజాణిజ్ దేవుణు ఎర్లిన్సి వరిజ్ ఉండ్రెబాన్ తపిన్ను.

బోడెమరాన్ది సజతి

28 బోడెమరాన్దిజ్ సుడెఃజి యాక మీరు నెస్తు. దన్ని ఆక్కుజ్ రాలేజి సిగ్రిసినివలె ఎండకాలం డగ్గు ఆతాద్ ఇజి మీరు నెస్సిదెర్.

29 ఆయలెకెండెనె మీరు యాక్కుజ్ విజు జర్గిజనిక సుణివలె నాను మర్జి వాదెజ్ డగ్గు ఆతాద్ ఇజి నెన్సినిదెర్లె.

30 యా సజతిజ్ విజు జాగ్రిని ముందాల య తరమేదికార్ సావర్ ఇజి నాను మిజి నిజం వెప్తాన్.

31 ఆగసం బూమి సిల్లెండ ఆనె. గాని నా మాటెజ్ ఎలాకాలం మంజినె.

ఎయెన్ నెన్జి రోజు, ఎయెన్ నెన్ఇ గడిఃయ

32 నాను మర్జి వాని రోజువమదిజ్, గడిఃయవందిజ్ ఎయెజ్ నెన్విర్. బుబ్బనె ఆవిండ పరలోకమేదు మన్ని దూతార్బా మరిసిబా నెన్విర్.

33 యేసు మరి వెప్తాన్, "మీరు పార్దనం కిజి జాగర్త మండ్రు. ఆ రోజు ఎనెజ్బానాదొ మిజి తెలివిద్.

34 ఎలాగ ఇహిజ ఒరెన్, ఎజుమాని వన్ని ఇల్లు వన్ని పణిమన్నిరిజ్ ఒవజెప్పి, వరివరిపణిజ్ వరి వరిజ్ తోరిసి, ఇల్లు కాపుదిజ్ ఒరెన్ వన్నిజ్ ఇడ్డి దేసం సొండ్రెజ్ సాహి వజనె.

35 అందెజి మీరు జాగర్త ఎర్దుసుడెఃజి మండ్రు. ఎందనిజ్ ఇహిజ ఇల్లు ఎజుమాని పొద్దు ఆతివెలె వానానొ, మదరెయ్యు వానానొ, కొరు కెరెని వెలె వానానొ, సిల్లిజ జాయ్అతిజి వానానొ మిజి తెలివిద్.

* 13:14 13:14 యా నెఇక ఇనిజి వెప్తాజ్ సిల్లెడ ఆఇ దేయమక మాలిపెట వందిజ్ నొ క్రీస్తుజ్ ఎర్దిసిని వన్ని వందినొ వెప్తాన్. దిన్ని వందిజ్ దానియెల్ ప్రవక్త రాన్వ మహాన్ 9:27; 11:31; 12:11.

36 ఎజుమాని వందిళ్ ఎద్దు సుడిఱ గడిఱయదు వెటనె వాతిజ మీరు నిద్ర కిజి మనికవాండ్లు సుడుఱదెళ్ అవ్ద.

37 నాను మిజి వెప్తికదె విజేరిజ్బా వెప్సిన్. జాగర్త కావ్ కిదు”.

14

1 పస్సు పండోయని, పులాజ్ ఆజ రొట్టెజ్* పండోయవాదెజ్ రుండి రోస్సు మనాద్. పెరిపుజెరిజుని, యూదురి రూలు నెన్పిసినికార్ యేసుజ్ ఎలాగబా ఉపాయ్ కిజి అసి సప్తెజ్ సుడిఱనార్.

2 “పండోయలోఱ వస్సిజ్ తొప్తాజ లోకు గొడఱబ కినార్ అందెజె పండోయచ లోఱ పోని ఇజి వారు వెప్తార్.

ఉండ్రి అయ్ లికొడో యేసు బురాదు వాసనం నూనె వాక్తార్

3 యేసు బేతనియ ఇనినాలో సీమోసు ఇన్ని వస్సి ఇండ్రో బేజనమ్ దిజ్ బస్తాన్. విండ్లు కుస్టురోగం ఆస్తిమహిజ్ యేసు నెగెండ కిత్త మహాన్ నస్తివలె ఉండ్రి బోదెలి నూనజ్ పణుకుదాన్ తయార్ కిత్తి ఉండ్రి సీసాదు† నండ్రి విలువమస్సి జటమామ్మి ఇని నెగ్గి వాసనం మస్సి నూనె తత్తాదె మూతడగ్రు రెక్సి యేసు బురాదు వాక్తార్.

4-5 అబ్బె మహికార్ నెగెండార్ యాక సుడిఱజి కోపమాజి వరిలోఱ వారె వెప్తార్, “ఎందానిజ్ యా నూనె పాడు కిజినాద్? యా నూనె మూండ్రి వందెజ్ దినారమ్ జ్ ముస్సు డబ్బుదిజ్ పొర్ని అయ డబ్బు బీదది వరిజ్ నీదెజ్ ఆనాద్ గదె”, ఇజి దస్సిజ్ గోల‡ కిత్తార్.

6 నస్తివలె యేసు, “దస్సిజ్ ఉండ్రి డిఱెస్సు ఎందనిజ్ దస్సిజ్ అర్ల కిబిసినిదెర్? అది నజి నెగ్గి పణి కిత్తాద్.

7 బీదదికార్ ఎస్తివలెబా మీవెట మంజినార్. వరిజ్ ఎనెజ్బా మీరు సాయం కిదెజానాద్. గాని నాను ఎలాకాలం మీవెట మన్ద.

8 అది కిదెజ్ అట్టిపణి విజి కిత్తాద్. నజి సమాది కిని ముజాల పీనుగు తయార్ కిని అలవాటువజ నా ఒడోలదెజ్ వాసనం నూనె వాక్సి అది నజి తయార్ కిత్తాద్.

9 నాను మీవెట నిజం వెప్సిన్, యా బూమి ముస్సు ఎంబెబా దేవుణు సువార్త అది ఏలుబడిఱ వందిజ్ సువార్త సాటిసినివలె అది కిత్తి యా నెగ్గిపణి దస్సిజ్ ఎత్తు కినిలెకెండ సాటిసి మంజినాదెలె”.

10 నస్తివలె వస్సెండు మణిసిరి సిసూరిలోఱ ఒరెన్ ఇస్కరియోతు యూద ఇనికాన్ యూదురి పెరిపుజెరిజుబాన్ సొస్సి యేసుజ్ ఒపజెప్తెజ్ తోడుఱ కిన ఇజి వెప్తాన్.

11 యూదవెప్తాక వెంజి పెరిపుజెరిజు సర్ల ఆతార్. వస్సిజ్ డబ్బుజ్ సీనావ్ ఇజి వారు ఒట్టు కిత్తార్. అందెజె యేసుజ్ ఒపజెప్తెజ్ యూద ఉండ్రి అవ్ కాసం సుడిఱజి మహాన్.

యేసు సిసూరివెట పస్సు బోజనం ఉణిజినాన్

12 పులాజ్ నీల్లి రొట్టెజ్ తయార్ కిని పస్సు పండోయది మొదోహి దినం వాతాద్. అయ దినం దేవుణుదిజ్ మెండ గొర్ల పిల్లాదిజ్ పూజి కినిక యూదురి అలవాట్. యేసు సిసూరి వస్సి డగ్రు వాజి, పస్సు బోజనం ఉండెజ్ నీవందిజ్ మాపుఎంబె సొస్సి తయార్ కిదెజ్ నీసు కొరిజిని? ఇజి వెన్ బేతార్.

13 యేసు రివర్ సిసూరిజ్ కూక్సి, “మీరు పట్టుమ్దు సొండ్లు. అబ్బె ఒరెన్, కుండాదు ఏరు పిండెజి మీ ఎద్దు వానాన్. మీరు వస్సివెట సొండ్లు.

14 వాండ్లు సొబా ఇండ్రోణి ఎజుమానిజ్, “నా సిసూరి వెట పస్సు బోజనం కిదెజ్ ఎంబె గది మనాద్ ఇజి బోదెకినికాన్ నిజి వెన్ బాజినాన్”, ఇజి వెప్తం.

15 నస్తివలె ఆ ఇల్లు ఎజుమాని విజి తయార్ ఆతి మేడముస్సు మని పెరి గది ఉండ్రి తోరిస్సాన్. అబ్బె మజి పస్సు బోజనం తయార్ కిదు”, ఇజి వెప్తాండ్రి పొక్తాన్.

16 సిసూరిపట్టుమ్దు సొహారి యేసు వెప్తిలెకెండెనె విజి సుడిఱతార్. వారు పస్సు బోజనం తయార్ కిత్తార్.

17 పొద్దు ఆతిజ్ యేసు వస్సెండు మంది సిసూరివెట అబ్బె వాతాన్.

* 14:1 14:1 వినకవందిజ్ ముకెలమాతి మాటిజి ఆర్లం వెప్సిని బుకుదు పండోయ్ మాట రాస్సిబాన్ సుడుఱదు † 14:3 14:3 యా నూనజ్ పణుకు మీరు అలవాస్సరు ఇజి యా పణుకు నండ్రి కరిదితిక తెల్లాజ్ మంజినాద్. యక గిసి లోకుర్ పునెజ్ తయార్ కిజినార్ ‡ 14:4-5 14:4-5 అయకాలమ్దు ఉండ్రి దినారి ఉండ్రి రోజుది కూలి

18 వారు బోజనం కినివెలె యేసు వెప్తూన్, “మీ లోక ఒరెన్ నజీ పగాతివరి కియుదు ఒవజెప్పాన్ల ఇజి నాను నిజం వెప్పాన్”.

19 అక్క వెంజి వారు నండొదుకం ఆజి ఒరెన్ వెనుక ఒరెన్ “నాను అవిగదె? ఇజి వన్నిజ్ వెన్బాతార్.

20 యేసు వెప్తూన్, “మీరు పనెండు మనిసిర్లోక ఒరెన్, నావెట గినెదు లొట్టె ముండొక్కికాండ్రెక్కి.

21 లోకుమరిసి నా వదిజ్ దేవుణు మాటదు రాస్సి మహిలెకెండ నాను సానాన్లె. గాని లోకు మరిసియాతి నజీ ఒవజెప్పి వన్నిజ్ గొప్ప కన్టం. వాండ్రు పుట్వెండ మంజినిక ఇహిజ వన్నిజ్ ఎస్సానో బాగ మహాద్ మరి”.

యేసుజ్ గుర్తుకిని బోజనం

22 వారు బోజనం కిజిమహిజ్ యేసు ఉండ్రెలొట్టె అస్తాండ్రె దేవుణుదిజ్ వందనమ్కు వెప్పి ముకెజ్ కిజి సిసూరిజ్ సితాన్. “మీరు యక లొసితిండ్రు, ఇక నా ఒడొల్” , ఇజి వరిజ్ వెప్తూన్.

23 వెనుక యేసు ద్రాక్కు కల్లు మన్ను గిన అసి దేవుణుదిజ్ వందనమ్కు కిజి వరిజ్ సితాన్. వారు విజెరి ఆ గినదిక ఉటార్.

24 యేసు మరి వెప్తూన్. “ఇక్క నా నల, నండొండారిజ్ వరి పాపమ్కు సెమిస్తెజ్ ఇజి కారిసిని. నా నల ఇక్కాదె దేవుణు నా నలదాన్ కిజిని ఒవుమానం.

25 నాను నిజం వెప్పాన్, దేవుణు కినిఎలుబడిడు నాను కొతాజ్ ఉణి దినం దాక మరి ఎసెజ్ బా ద్రాక్కు కల్లు ఉణెవి”.

26 మరి ఉండ్రె పాట * పార్తారె ఒలివ మరెక్ మన్ని గొరెన్ మున్ను సొతార్.

పేతురు యేసుజ్ నెన్ఎ ఇజి వెహ్నాలె ఇజి ముజాల వెప్పానాన్

27 వారు సానివెలె యేసు వరిజ్ వెప్తూన్. మీరు విజిదెరి నజీ డిసిని సానిదెరై. ఎందనిజ్ ఇహిజ దేవుణు మాటదు యాలెకెండ రాస్సు మనాద్. “గొరెజ్ అడినివన్నిజ్ నాను కత్తాలె. గొరెజ్ మంద సెద్రినె సానెలె”. †

28 గాని దేవుణు నజీ మరజి బత్తుదు నిక్కివెనుక మిజి ఇంక ముజల గలిలయదు సానాలె. ఇహాన్.

29 నన్వివలె పేతురు, “విజెరి మీ వదిజ్ నిల్తెజ్ అట్వెండ డిసిని సాహిజ్ బా నాను నిజి డిసిని సాన్వి”.

30 యేసు వెప్తూన్, “ఓ పేతురు, నాను నిజి నిజం వెప్పాన్, యా పొదొయ్ కొరు రిజకెరిని ముజల నీను నజి నెన్ఎ ఇజి ముసారె వెప్పాలె”.

31 గాని పేతురు ఒవుకొణ్ణెవిండ ఒద్దె డట్టం వెప్తూన్, “నాను నీ వెట సాతిజి సాన. నాను నిజి నెన్ఎ ఇజి వెహ్వి”. అయ వజనె వారు విజెరి వెప్తూర్.

యేసు గెత్తేమనె టోటదు పార్తనం కిజినాన్

32 నన్వివలె యేసు, వన్నిసిసూర్ వెట గెత్తేమనె ఇని టోటదు సాహర్. యేసు సిసూరిజ్, “నాను సాన్ని పార్తనం కిజి మరజివాని దాక మీరు ఇబ్బె మండ్రు”, ఇజి వెప్తూన్.

33 యేసు పేతుజ్, యాకోబుజ్, యోహానుజ్ వన్ని వెట ఒతాన్. వాండ్రు నండొ దుకం ఆజి బాద ఆదెజ్ మొదొల్స్తాన్.

34 వాండ్రు వరిజ్ వెప్తూన్, “సాదెజ్ డగ్రు అతిలెకెండ మన్ను బరిస్తెజ్ అట్జ నసానా బాదనజి కల్లిజినాద్. మీరు ఇబ్బెనె బసి నా వెటె తెల్లి మండ్రు.

35 యేసు అబ్బెణిజ్ నెగం దూరం సాహండ్రె వడిగజ్ అర్తాండ్రె “ఒబా, నిజి ఇస్టమాతివజి యా కన్టమ్కాణ్ నజి తప్సిన్అ”, ఇజి పార్తనం కితాన్.

36 యేసు దేవుణుదిజ్ ఈహు వెప్తూన్, “ఓ బా నీను విజు కిడెజ్ అట్టి. యా కన్టమ్కు నా బాణిజ్ లాగ్ అ. గాని నా ఇస్టమ్వజి అవిద్, నీ ఇస్టమ్వజి అవిద్”.

37 పార్తనం కితివెనుక యేసు సిసూర్ డగ్రు సాహిజ్ వారు నిద్రి కిజి మహర్, “ఓ సీమోను, నీను నిద్రి కిజినిదా? ఉండ్రె గంటబా తెలి ఆజి మండ్రెజ్ మీరు అట్ఇదెరా?”, ఇజి పేతురుజ్ వెన్బాతాన్.

§ 14:20 14:20 యేసుని వన్ని సిసూర్ బోజనం కితివెలె ఉండ్రె గినాది పట్టురసమ్మ లొట్టె ముడుకారె డగ్రుమన్ని కూలెజ్ ఈహు గిన్నదాన్ తినార్ * 14:26 14:26 క్రిస్ట 115-118 బోజనం కిత్తి వీజిత్తిజి పారెజి మహర్ † 14:27 14:27 జెకరియ 13:7.

38 సర్దును మిజి పరిస కిజి తప్పుదు అన్విండ ఇహిజి పార్దనం కిజి తెలి ఆజి మండ్రు అత్తు తయార్నె, గాని ఒడోల్దిజ్ సత్తు సిల్లెండ ఆజినాద్.

39 యేసు మరి ఒర్పు సొన్ని ముజాల వేప్తా మాటజ్నె వెప్పొ పార్దనం కితాన్.

40 యేసు మరజివాజి సుడోతిజ్ సిసూర్ మరి నిర్తి కిజి మహార్. ఎండానిజ్ ఇహిజి వరి కణుకు రెప్పెజ్ బరుదాన్ ముగిజి మహె. నస్తివలె వారు యేసుజ్ ఇనిక వెప్తాజ్ తెలివితాద్.

41 యేసు ముసారి వాజి సిసూర్ నిర్తి కిజి మహిక సుడోజి వరిజ్ వెప్తాన్, “ఏలుబ మిరు నిర్తి కిజి రోమ్జినిదెరా? ఏలు ఆనాద్. ఇదిలో, లోకుమరిసియాతి నజీ నెఇవరికియుదు ఒవజిప్పి గడియ డర్పు వాతాద్.

42 లేదు, ఏలు మాట్ వరివెట. దసూలాదెజ్ సొనాట్ ఇదిలో నజీ ఒవజిప్పికాన్ వాజినాన్”.

యేసుజ్ అరెస్టి కిజినార్

43 యేసు యా మాటజ్ వెప్పొమహిజ్ పన్నెండు మనిసిర్ సిసూర్లోఇ ఒరెనాతి ఇస్కరి యోతు యూద ఇనికాన్ అబ్బొ వాతాన్. పెరిపుజెరిజు లోకురి పెద్దలుజు పోక్తిమున్ని మందలోకుర్ కూర్జెజ్, కోణెజ్ అస్తారె వన్నివెట వాతర్.

44 యేసుజ్ ఒవజిప్పికాన్, “నాను ఎయెరిజ్ ముద్దు కినానొ వన్నిజ్ మీరు తోహాసి జాగర్ల ఒతు”, ఇజి ముజలె వరిజ్ ఉండ్రి గుర్పులెకెండ్ వెప్తా మహాన్.

45 యూద వెటనె యేసుడర్పు వాతాండ్రె, “ఒ బోదకినికి” ఇజి వెప్పొ వన్నిజ్ పొంబితాండ్రె ముదు కితాన్.

46 నస్తివలె వన్నివెట వతిమహిలోకుర్ యేసుజ్ అస్తారె తోహ్తార్.

47 వెటనె యేసుడర్పు మహిసిసూర్ లోఇ ఒరెన్, వన్ని కూర్ల లాగ్లి విజెరి మున్ను పెరిపుజెరిజి మున్ను మన్ని పణిమనిసి అతి వని గిబ్బొ తెప్ప కత్తాన్.

48 యేసు వెప్తాన్, “నాను డోజివాండ్రునా? నజీ అస్తాజ్ కూర్జెజ్ కోణెజ్ అసి ఎందనిజ్ మీరు వాతిదెర్?”

49 రోజు నాను మీ వెటనె మంజి దేవుణుగుడిదు నెన్పిన్ గదె. అయవలె మీరు నజీ ఎందనిజ్ అన్ఇతిదెర్? గాని దేవుణు మాటదు రాస్తివజ ఇక విజు ఈహు జరిగెడిజ్ వెలె”.

50 నస్తివలె వన్ని సిసూర్ విజెరి వన్నిజ్ డిస్తారె ఉహ్కా సాహార్.

51-52 ఒరెన్ దజడాయెన్, యేసు వెనుక, లోకుర్ వెట సొన్ని మహాన్. వాండ్రు సొక్క తోడ్గివిండ ఉండ్రి పాతనె పిడిగిత మహాన్. వారు వన్నిజ్ అస్తాజ్ వాండ్రు పిడిగితిమున్ని పాతడిసి డుమండ అతాండ్రె ఉహ్కాన్.

యేసుజ్ సన్హద్రి సజంజని యూదురి కొరటునడిమి నిల్వార్.

53 యేసుజ్ తోహి ఒతికార్ వన్నిజ్ విజెరిపుజెరిజి మున్ను పెరిపుజెరిబాన్ తత్తార్. పెరిపుజెరిజి విజెరి, పెద్దెల్జు, యూదురి రూలుజ్ నెన్పిసినికార్ అబ్బొ కూడ్డి వాత మహార్.

54 యేసుజ్ విజెరి మున్ను పెరిపుజెరిజి ఇండ్రి ఒసిమహిజ్, పేతురు వెనుక దూరమదాన్ సొన్ని డేవ దాక వాతాన్. వాండ్రు అబ్బొ కాన్కినిపరివెట బస్తాండ్రి సిను కాయజి మహాన్.

55 పెరిపుజెరిజి విజెరి, అబ్బొ కూడ్డి వాతి సన్హద్రి సజం విజు యేసుజ్ సప్తజ్ తగితి రుజువ్ వందిజ్ వన్ని ఎర్దు అబద్దం వెప్పొవరిజ్ రెబాజి మహార్. గాని వన్నిజ్ సప్తజ్ అగితి రుజువ్ వెప్పొ ఎయెర్బా దోహ్కావితార్.

56 నంఠెండార్ వన్నిమున్ను అబద్దం సానెమ్కు వెప్తార్. గాని ఒరెన్ వెప్తాక మరి ఒరెన్ వెప్తా దనిజ్ తేడః మహాద్.

57 నస్తివలె నెగెండార్ వన్నిమున్ను ఈహు అబద్దం సానెమ్కు వెప్తార్.

58 “లోకు తోహ్తా యా దేవుణుగుడిదిజ్ నాను అరిప్పొ విసిర్జి, మూండ్రి రోస్కాజ్ లోకు కీదు పణి అఎండ మరి ఉండ్రి దేవుణుగుడి తోహ్తా ఇజి వాండ్రు వెప్తాక మావ్వెహ్”, ఇజి వారు వెప్తార్.

59 గాని వారు వెప్తా సాస్యమబా ఒరెన్ వెప్తాక మరి ఒరెన్ వెప్తా దనిజ్ తేడః అతాద్.

60 నస్తివలె విజెరి మున్ను పెరిపుజెరి నిజితాండ్రె యేసుజ్ వెన్బాతాన్, “నిను ఇనికబా మరిజి వెహ్ఇదా? వీరు నీ మున్ను వెప్పొని యా మాటజ్ ఇనికెజ్?”.

61 గాని యేసు ఇనికబా మరణి వెహ్విండ్ అలెతాన్. విజేరె పుజెరిజ మున్సు, పెరిపుజేరి యేసుజ్ మరి వెన్బాతాన్, “నీను దేవుణు మరిసిఆతి క్రీస్తునా?”.

62 యేసు వెహ్సాన్, “నానె, లోకుమరిసియాతి నాను గొప్ప అతికారం మన్ని దేవుణు ఉణెర్ పడకాదు బసిమంజినిక, నయణిదెర్ మరి ఆగనమ్దు దాన్ మొసాప్ మున్సు, నాను వానిక మీరు నూణిదెర్లె”.

63-64 విజెరి పెరిపుజెరి మున్సు, పెరి పుజేరి యేసు వెహ్సాక వెంజి వన్ని సొక వాండ్రె కిన్ ఆతాండ్రె. వెహ్సాన్, “మరి ఇంక సాసిరిజ్ అవనరం సిల్లెద్. వాండ్రు వెహ్సాక మీరు వెహిదెర్. వాండ్రు దేవుణు దూసిసి వరగితిక మీరు వెహిదెర్ దన్నివందిజ్ మీరు ఇనిక వెహ్సానిదెర్? యేసు దేవుణుదిజ్ దూసిస్తి వందిజ్ సిక్కు కిజి సప్తెజి ఇజి విజేరె ఒప్పుకోటార్.

65 నస్తివలె సెగొండార్ యేసు మున్సు పూస్తార్. వారు గరండదాన్ వన్ని కణుకేజి తోహ్సి కణుకేజ్ మూక్తార్ వన్నిజ్ గుతార్. నిజి ఎయెర్ గుతార్ ఇజి తోవిండ వెహ్అ”, ఇజి వన్నివెట వెహ్సార్. జమానుజుబా యేసుజ్ కిరాణిజ్ డెయెతార్ ఒత్తార్.

యేసుజ్ నానునెన్ఎ ఇజి పేతురు వెహ్సానాన్

66 పేతురు విజెరి మున్సు, పెరి పుజెరి అరీజుదు మహివలె అయ ఇండ్రెణి పణి మన్ని ఉండ్రె అబ్బె వాతాద్.

67 పేతురు సిను కాయెజిమహిక సుడెజి వాండ్రు ఎయెన్ ఇజి నెస్టెజ్ అది నెగ్రెండ సుడెతాద్. “నీనుబా నజెరేతు వాండ్రు ఆతి యేసువెట మహికి”, ఇజి అది వెహ్సాద్.

68 అందెజి పేతురు, “నీను ఇనిక వర్గిజినిదో నజీ తెలివద్”, ఇజి వెహ్సి వెల్లి గవునిడగ్రు సాహాన్. నస్తివలె కొరు కెరెతాద్.

69 అయ పణికినికాద్ పేతుజ్ గవునిడగ్రు సుడెజి అబ్బె నిహిమహి పరివెట మరి వెహ్సాద్, “పిండ్రు వరిలోఇమహ్కాన్ ఒరేన్”.

70 గాని పేతురు మరి, “నాను అవి ఇజి వెహ్సాన్. నణెం సాహివెనుక పేతురు డగ్రు నిహిమహికార్, “నీను గలిలయదికి, నిజం నీనుబా వరిలోఇ ఒరెన్”, ఇజి వెహ్సార్.

71 నస్తివలె పేతురు, “మీరు వెహ్సానిని వన్నిజ్ నజీ నెన్ఎ ఇజి వెహ్సి వన్నిజ్ వాండ్రె సయివ్ సీబెఆజి ఒట్టు కితాన్.

72 వెటనె రిజి ఒర్కు కొరు కెరెతాద్. నస్తివలె పేతురు, యేసు వన్నివెట, “కొరు రిజి కెరెని ముజల నీను నజీ నెన్ఎ ఇజి ముసార్ వెహ్సాలె”, ఇజి వెహ్సామాట ఎత్తు కితాండ్రె నండో దుకమాజి అడెబతాన్.

15

యేసుజ్ తోహ్సిపిలాతుజ్ ఒవజెప్పినార్

1 పెందాల సీకటి మన్బునె, పెరిపుజెరిజు, యూదపెదెలుజు, యూదురి రూలుజ్ నెన్పిసినికార్, ననూద్రెం సజమ్దికార్ విజేరె కూడ్లి యేసుజ్ ఎలాగ సప్తెజ్ ఇజి ఆలోసనం కితార్. వారు వన్నిజ్ తోహ్సి ఒత్తార్ రోమ దేనెమ్ది అతికారిఆతి పిలాతుజ్ ఒవజెప్పార్.

2 “నీను యూదురి రాజనా?”, ఇజి పిలాతు యేసుజ్ వెన్బాతాన్. నస్తివలె యేసు, “ఒఒ నీను వెహ్సాలెకెండెనె”, ఇజి వెహ్సాన్.

3 పెరిపుజెరిజు యేసుమున్సు, నండో తప్పజ్ మొహ్సార్.

4 నస్తివలె పిలాతు యేసుజ్ మరి వెన్బాతాన్, “నీను మరణి ఇనికబా వెహ్సాదా? మీరు నీ మున్సు ఎన్నా తప్పజ్ మొహ్సాన్ గదె”.

5 అహె వెహ్సాతిజ్బా యేసు ఇని మాటబా మరణి వెహ్ఎతాన్. అక్క సుడెజి పిలాతు బమ్మ ఆతాన్.

6 ఏంటు ఏంటు కిని పన్ను పండొయ్జి లోకుర్ కొరిజిని ఒరెన్ కమ్దువన్నిజ్ విడుదల సీదెజ్ పిలాతుజ్ అలవాటు.

† 14:63-64 14:63-64 నండో కోపం ఆతాద్ ఇజి తోరెన్జెక్ సొక్క కిస్సార్. గాని విజేరె పుజెరి మున్సు, మన్ని పెరి పుజెరి వన్ని సొక్కకిస్సెజ్ ఆవద్ ఇజి లేవి. 21:10 దు రాస్స మానా.

7 అయవలె బరబ్బుఇనికాన్ ఒరెన్ అన్నయవాండ్రు నన్నికాన్ జెలిదు మహాన్. వాండ్రు, వన్నివెలు మహికార్, ఏలుబడిః కినివరిజ్ ఎద్రిస్తారె నెడెడారిజ్ సప్త మహార్. అందెజె వరిజెజలిదు ఇట్త మహార్.

8 లోకర్ పిలాతుబాన్ వాజె, “నీను కిని ఆలవాటువజ ఒరెన్వన్నిజ్ డిసి సిఅ”, ఇజి వెప్తార్.

9-10 పెరిపుజెరిబు గోస ఆతారె యేసుజ్ నజి ఒవజెప్తారె ఇజి పిలాతు నెస్తాన్. అందెజె వాండ్రు “యూదురిరాజుజ్ నాను మిజి డిసి సిదెజ్ కొరిజనిదెరా? ఇజి వెన్బాతాన్.

11 గాని పెరిపుజెరిబు బరబ్బుజ్ డిసి సిజి యేసుజ్ సప్తజ్ ఇజి ఆతికారి ఒప్పిలెకెండె వెప్తాన్ ఇజి లోకురిజ్ రిప్పి మహార్.

12 నస్తివలె పిలాతు, “యూదురిరాజు ఇని మీరు వెహ్సినవన్నిజ్ నాను ఇనిక కిదెజ్?”, ఇజి వెన్బాతాన్.

13 వారు, “వన్నిజ్ సిలువ పొక్అ”, ఇజి నండె డెల్స్తారె.

14 అందెజె పిలాతు, “ఎందనిజ్ వన్నిజ్ సిలువ పొక్తె? వాండ్రు ఇని తపువణి కివిన్”, ఇజి వెప్తాన్. గాని వారు, “వన్నిజ్ సిలువ డెయెజి సవ్అ”, ఇజి నండె డెల్స్తారె.

15 పిలాతు లోకాజ్సర్ద కిబిస్తిజ్ బరబ్బుజ్ విడజుదల కితాన్, యేసుజ్ కొర్దజాణిజ్ డెయెబిసి. సిలువ పొక్తె ఒవజెప్తాన్.

సయనమదికారయేసుజ్ వెక్తిస్తారె

16 నస్తివలె సయనమదికారె యేసుజ్ ప్రెటోరియం ఇని పిలాతుని పెరిఇండ్రొ ఒతారె అబ్బి మహి సయనమది వరిజ్ విజెరిజ్ కూడుప్తారె.

17 వారు యేసుజ్ ఎరాని రంగుది నీరి సొక్క పొర్పిసి సాప్కాణిజ్ అటారి ఉండ్రె బోపి తయార్ కిజి బురాదు ఇడెతారె.

18 “యూదురి రాజు గెల్చిఅ? ఇజి వెప్పి వారు యేసుజ్ వెక్తిస్తారె.

19 వారు మరి మరి డుడుదాన్ వన్ని బురాదు డెయ్యారె వన్నిముస్సు పూస్తారె. వెనుక ముణుకుజ్ ఊరిజె వన్నిజ్ మాడిసి వెక్తిస్తారె.

20 వారు వెక్తిసి విజితి వెనుక వన్నిజ్ తోడిగిసి మహి ఎరాని సొక్క లాగ్గి వన్ని నీరి సొక్క తోడిగిస్తారె సిలువ పొక్తెజ్ వన్నిజ్ ఒత్తారె.

యేసుజ్ సిలువదు డెయెజినార్

21 కురేనియాదికాన్ సీమోసు ఇని ఒరెన్ ఉండ్రె నాటోహాన్ అయసరి వాజి మహాన్. నస్తివలె యేసువందిజ్ సిలువ పిండెడిజ్ సయనమదికారె సీమోసుజ్ బలవంతం కిత్రారె. సీమోసు, అలెక్కందరుని, రూపుఇని వరి అప్పిసి.

22 వారు గొల్లోతఇని బాడ్డిదు యేసుజ్ తత్తర్. గొల్లోత ఇహిజ బుర్ర పిణికి బాడ్డిఇజి అర్దం.

23 అబె యేసుజ్ ఉండెజ్ ద్రాక్కలదు బోలం* ఇని సేందుమాయం కల్చి నత్తర్. గాని వాండ్రు కెవితాన్.

24 సయనమదికారె యేసుజ్ సిలువదు డెయ్యారె. వెనుక వన్ని సొక్కజ్ ఎయెజ్ దోపాకె ఇజి నెస్తెజ్ సీటిజ్ పొక్తారె వని సొక్కజ్ సీబె అతారె.

25 పెందాల తొమ్మిది గంటజ్ యేసుజ్ సిలువ డెయెతారె.

26 “యూదురిజ్ రాజు”, ఇజి యేసుముస్సు మోప్తి నేరం బోర్దుదు రాసి సిలువారు ఇత్తారె.

27-28 యేసువెలు రివెర్ డొజారిజ్ సిలువారు పొక్తారె. ఒరెన్వన్నిజ్ ఉణెరె వడెకాదు ఉండ్రె సిలువారు, మరి ఒరెన్ వన్నిజ్ డెబె వడెకాదు ఉండ్రె సిలువారు.

29-30 నస్తివలె అయ సరిదాన్ సొన్నిమహికార్ వరి బుర్రూక్కి యేసుజ్ దూసిస్తారె, “ఒహో దేవుణుగుడిదిజ్ అరిప్పి విసీరిజి మూండ్రె రోస్కాజ్ నాను తొప్పాకి నిజి నీనె రక్కిసి. సిలువదాన్ డిగిజి రఅ” ఇహార్.

31-32 అయవజనె పెరిపుజెరిబుని యూదురి రూలునెన్పిసినికారె, “వీండ్రు మహివరిజ్ రక్కిస్తాన్. గాని వీండ్రు వినిజె రక్కిస్తెజ్ అట్వెన్. ఇస్తాయెలురాజు ఆతి క్రీస్తు ఏలు సిలువదాన్ డిగిజి వాతిజ అక్క

* 15:23 15:23 బోలం కల్పతిజ నొప్పి నెన్విందె ఆనాద్

నూణావె మాపు నమినావ్”, ఇజ ఒరెన్ వెట ఒరెన్ వెస్పా వన్నిజ్ వెక్రిస్తార్. యేసువెట సిలువ డెయెఆతి డొజారుబుబా వన్నిజ్ వెక్రిస్తార్.

యేసు సిలువమున్ను పాణం డిఃస్తాన్

33 వేడెః వన్నెండు గంటజాణిజ్ మూండ్రి గంటేజ్దాక దేసం విజు సీకటి ఆతాద్.

34 మూండ్రి గంటేజ్ యేసు, “ఎలోయ, ఎలోయ లమ నబక్తాని”, ఇజ డటం డేల్ని వెప్తాన్. దని అర్థం ఇనిక ఇహిజ, “నా దేవుణు, నా దేవుణు నజి ఎందనిజ్ నీసు డిఃస్త్రి” ఇజ.

35 బానె నిహికార్ సెగిండార్ యామాట వెహారె, “ఇదిలో వీండ్రు ఎలియేజ్ కూక్కినాన్” ఇహార్.

36 ఒరెన్ ఉహ్కీ సొన్ని దూతి తత్తాండ్రె నెందు ద్రాక్కు కలుదు ముడఃక్కి ఉండ్రె డుడ్డుదాన్ యేసుజ్ ఉండ్రెజ్ వెయ్యు అందిస్తాన్. “నణెం మండ్రు. ఏలియ వాజి వినిజ్ డిస్పాండ్రె సెలీస నూణాట్”, ఇజ వాండ్రు వెప్తాన్.

37 నస్త్రివలె యేసు డటం డేల్స్తాండ్రె పాణం డిఃస్తాన్.

38 అయవలె యెరూసలేమ్దు మహి దేవుణు గుడిఃదు మహి తెర మున్నుహాన్ అడిగిదాక కింజితాది రుండి ముక్కిజ్ ఆతె.

39 సిలువ డెయ్యిబాన్ నిహిమహి సయనమ్ది మంద దుఃసిసిరిజ్, యేసు ఈహు డేల్స్తాండ్రె పాణం డిఃస్త్రిక సుడఃజి, “వీండ్రు నిజం దేవుణు మరిసినె”, ఇజ వెప్తాన్.

40 సెగిండెక్ అయ్లికొడొక్ దూరం నిల్ని సుడఃజిమహి. వన్కాజ్ లొఇ మగ్గలేనె మరియు, ఇజిరి యాకోబు, యోసె ఇనివరి అయ్సిఆతి మరియు, సలోమి ఇనికెజ్మహి.

41 యేసు గలీలయదు మహివలె ఇవిక్వన్నివెట సొన్ని వన్నిజ్ అవ్సరమాతికెక్ కిజిమహి. ఇవిక్అవండ యెరూసలేమ్దు యేసువెట వాతి నండొ అయ్లికొడొక్బా అబ్బె మహి.

యేసు పినుగు సమాదిదు ఇడ్టార్

42-43 అరిమతయ ఇని పట్టుమ్దికాన్ యోసేపుఇని ఒరెన్ అబ్బె మహాన్. వాండ్రు సన్హార్తిం సజమ్దు మన్నివరిలొఇ పెరికాన్ ఒరెన్. దేవుణు ఏలుబడిః వందిజ్ వాండ్రు ఎర్దు సుడఃజి మహాన్. వీండ్రు సొన్ని, దయరమ్దాన్, యేసు పినుగు సిలువ మున్నుహాన్ జాయ్ మనుబునె డిప్తెజ్ పిలాతుబాన్ సెలవల్స్తాన్. అయ దినం విస్తాంతిదినం ముజాల మహి తయార్ కినిదినం. అందెజ్ అయ తయార్ కినిదినం పొదొయెనె యోసేపు పిలాతుబాన్ సెలవ లొస్టెజ్ సాహాన్.

44 యేసు ఎస్కాండె సాతాన్ ఇజ వెంజి పిలాతు బమ్మ ఆతాన్. సయనమ్ది వరిఅతికారిజ్ కూక్కి వెన్బాతిజ్ యేసు ఎస్కాండె సాతాన్ ఇజ నెస్తాన్.

45 యేసు సాతాన్ ఇజ సయనమ్ది వరిఅతికారి వెహి మాట పిలాతు వెంజి యోసేపుజ్ యేసుజ్ పినుగు ఒపజెస్తాన్.

46 యోసేపు నెగ్గి తెల్లని పాత కొడఃజితసి, పినుగు సిలువదాన్ డిఃప్పి అయ పాతెజాణ్ పినుగుదిజ్ సుటిసి సటుదిజ్ దొల్స్తె దూకిదు ఇడ్టాన్. ఉండ్రె గుండ్రని సెప్ట వణుకు నడిపిసి దూకిదిజ్ అడ్డు కిత్తాండ్రె మూక్తాన్.

47 మగ్గలేనె మరియు, యోసె అయ్సిఆతి మరియు యేసు పినుగుదిజ్ ఇడ్డిబాడ్డి సుడఃజె.

16

యేసు మర్రి నిజితాన్

1 విస్తాంతిదినం గడిస్త్రిసాహివెనుక, మగ్గలేనె మరియు, యాకోబు అయ్సి మరియు, సలోమి, ఇనికెక్ యేసు పినుగుదిజ్ రాస్టెజ్ వాసనం నూనె కొడిఃజి తత్తె.

2 వారమ్దిజ్ మొదొహి దినమ్దు పెందాల్ని నిజిజ్ పొర్దు సోసి మహివలె అవిక్సమాది డగ్గు సాహె.

3 సమాది డగ్గు సొన్ని మహిజ్ అవిక్ “సమాది మూక్తి వణుకు మా వందిజ్ ఎయెర్ గూర్ప్పార్?” ఇహె.

4 నస్త్రివలె అవిక్ సుడఃజిజ్ ఎయెర్ అయ పెరివణుకు సమాదిదాన్ గూర్ప్పిలెకెండ తోరతాద్. అది ఒద్దె పెరిక

5 నన్నీవలె అవిక్అయ సమాది లోఇ వక్షజి సాహిజ్ నీరి తెల్లాని సాక్క పొరీపాజి ఉణెర్ పడకాద్ బన్ని మహి ఒరెన్ దక్షిణాయెనుజ్ సుడతె. వన్నిజ్ సుడకజి అవిక్సంణె తియెలతె.

6 అయ దక్షిణాయెన్ వరివెటె, “తియెల్ ఆమాట్, నిలువ పొకె ఆతి మన్ని నజరేతు వాండ్రు ఆతి యెనుజ్ మీరు రెబాజినిదెరా? వాండ్రు ఇబ్బె సిల్లెన్. వాండ్రు బత్తిజి నిజిత మనాన్. వన్నిజ్ ఇడ్డి బాడ్డి సుడకదు.

7 వాండ్రు మిజి ఇంక ముజాల గలీలయ మీరు సొన్నినాన్ వాండ్రు మిజి వెప్పిపజి మీరు అబ్బెవన్నిజ్ సూణిదెల్ల ఇజి సిసురిజ్ మరి పేతురుజ్ వెప్టు”, ఇజి వెప్టాన్.

8 అక్క వెపానె అవిక్ వణక్కి బమ్మ అజి సమాదిదాన్ వెల్లి వాజి బాణిజ్ ఉహ్క్కి సాహె. అవిక్ తియెల్ ఆతెనె ఎయెర్వెటెబా ఇనికబా వెహ్ఉతె.

యేసు మగ్గలేని మరియెజ్ తోరె ఆతాన్

9 యేసు ఆదివారం పెందాల్ప సమాదిదాన్ బత్తిజినిజ్జి మగ్గలెనె మరియెజ్ తోరె ఆతాన్. యా మరియ ఎయెర్ ఇహిజి యేసు ఏడు దెయమ్కాజ్ ఉల్పి నెగెండ్ కిత్తి అయెలి కొణ్ణె.

10 యేసువెటె మహికార్ యేసు సాతిజ్ దుకమ్దాన్ ఒడకబిజి అడకబాజి మహిజ్, అది సాహాదె విజి సజతిజ్ వరిజ్ వెప్టాన్.

11 యేసు బత్తిజి నిజితాండై నజి తోరె ఆతాన్ ఇజి అది వెప్పి మాట వారు నమివెత్తార్.

యేసు రిఎర్ సిసూరిజ్ తోరెఆతాన్

12 వెనుక రిఎర్ సిసుర్ ఉండ్రై నాటో నడిసి సొన్నిమహిజ్ యేసు వరిజ్ తోరె ఆతాన్. గాని ఆఇ మూర్తి వజి తోరెఆతాన్.

13 వారు సొన్ని, మహి సిసూరిజ్ యా సజతి వెప్టార్. గాని వారు యా రిఎరి మాటేజబా నమివెత్తార్.

యేసు పదకొండు మణిసి సిసూరిజ్ తోరెఆతాన్

14 మరి ఒర్పుపదకొండు మణిసి సిసూర్ బోజనం కిజిమహివలె యేసువరిజ్ తోరె ఆతాన్. యేసు నిజితి వెనుక వన్నిజ్ సుడకతివరి మాట నమిఎండాతివందిజ్, వరి అనుమానమ్దిజ్ యేసు వరిజ్గటిజి వెప్టాన్.

15 యేసు వరివెటె, “మీరు లోకం ముస్సు మని విజి దేసమ్కాజ్ సొన్ని దేవుణు సువార్త విజేరిజ్ వెప్టు.

16 ఎయెర్బా నా ముస్సు నమకం ఇడకబాజి బాప్తీసం లాగెఆతిజి వరిజ్ దేవుణు రక్కిస్సాన్. గాని నా ముస్సు నమకం ఇడకతి వరిజ్ సిక్కు వానాద్.

17 ఎయెర్ నజి నమ్మినారో వారు యా బమ్మాతి పణిజ్కిదెజ్ అట్టూర్. అక్కెజ్ ఇనికెజ్ ఇహిజి నా పేరుదాన్ వారు దెయమ్కాజ్ ఉల్వూర్. వారు కొత్తబాసెజ్ వర్గినార్.

18 సారాస్కాజ్ అస్తిజబా అవిక్ కట్టిజబా సావీర్. ఇనికబా గొప్ప విసమాతిక ఉటిజబా సావీర్. జబ్బు ఆతివరి ముస్సు కికు ఇట్టిజి వారు నెగెండ్ ఆనార్”, ఇజి వెప్టాన్.

దేవుణు యేసుజ్ వరలోకమ్దు ఒత్తాన్

19 యేసు యాకెజ్ విజి వెప్పివెనుక దేవుణు యేసుజ్ వరలోకమ్దు ఒత్తాన్. యేసు అబ్బె దేవుణు ఉణెర్ పడకాద్ బస్సాన్.

20 యేసు సిసూర్ విజిబాన్ సొన్ని దేవుణు సువార్త వెప్టార్. వారు కిత్తి విజి పణిదిజ్ దేవుణు సాయం కిత్తాన్. వారు కిత్తి బమ్మాతి పణిజాణ్ వారువెప్పి మాట నిజం ఇజి దేవుణు తోరిస్తాన్.

లూక రాస్తి సువార్త

నెల్లు కిబిసినిక

యా సువార్త లూక ఇని ఒరెన్ డాక్టరు, దెయొవిలెజ్ రాస్తికాదె. యేసు యా లోకమదు బల్కుత్తివలె జర్గితి దన్నివందిజ్ కత వజ రాస్త మనాన్. యేసు పుడుఃగు వందిజ్ మహి సువార్త ఇంక లావు వెప్తా మనాన్. మరి యేసు కిత్తి నండో బమ్మాని వణిజ వందిజ్, నండోండో జబ్బుదాన్ మహి వరిజ్ నెగెణ్ కిత్తిదన్ని వందిజ్ వెప్పొనాన్. యేసు దేవుణు మరిసి ఇహిజబా లోకు వజ పుట్టి, లోకురి పాపముకాజ్ వందిజ్ సాజి, మరి దేవుణువెట ఎలాకాలం బత్కిని బత్కుదు నడిపిసినాన్ ఇజి యా సువార్తదు వెప్పొనాన్.

1-4 లూక తియెపిలెజ్ రాసినాన్. మా నడిమి జర్గితి సజతిజ వందిజ్ కతవజ రాస్తిజ్ నండోండో సుడఃతార్. మొదోహానె, యా సజతిజ సుడఃతి సాసిర్, మరి, సువార్త బోద్దికార్ మజి వెప్తార్. వారు మజి వెప్తా వజనె, వీరు రాస్తార్. నాను యా సజతిజ్ విజు మొదోహానె బాగ నెస్త మహ. అందెజె అయాకెజ్ నీ వందిజ్ వరస రాస్తిజ బాగ మంజినాద్ ఇజి నాను ఒడఃబిత. ఎందానిజ్ ఇహిజ, అయావలె నిజి నెన్పిన్సి విజు వన్మాజ్ పూర్తి అర్థం నిజి నెస్తజానాద్.

బాప్తినం సీని యోహాను పుడగు వందిజ్ వెప్పొనాన్.

5 హెలోదురాజు యూదయ దేసెం ఏలుబడిః కిజి మహివలె, జెకరియ ఇని ఒరెన్ పుజెరి మహాన్. వీండ్లు అబియ పుజెరి జట్టుదు మహికాన్. విన్ని ఆల్ని ఎలిసబెతు. అది అహారోను పుజెరి కుటుమ్దికాద్నె.

6 వీరు రిఎర్బా, నింద సిల్లెండ ప్రబు సీతి ఆడ్రెజ, రూలుజ విజు లోజిజి, దేవుణు ముందాల సీతినిజాయితిదాన్ మహార్.

7 ఎలిసబెతు గొడ్డు బోదెలి. అందెజె వరిజ్ కొడోర్ సిల్లెర్. వారు రిఎర్బా నండో డొక్త ఆతార్.

8 ఉండ్రీ నట్టు జెకరియ జట్టుజ్ పుజెరి వణికిదెజ్ వంతు వాతాద్. అయావలె జెకరియ దేవుణు ముందాల పుజెరి వణి కిజినాన్.

9 పుజెరిజ మన్ని అలవాటు లెకెండ, సీటి పోక్తారె, జెక్తయెజ్ ఏర్పాటు కితార్. దేవుణు గుడిఃదు సాన్ని దూపం సురుదెజ్ వన్నిజ్ ఏర్పాటు కితార్.

10 దూపం సురుదెజ్ వేల ఆతాద్. నస్తవలె అబ్బె కూడిఃతిమహి మందలోకుర్ విజెరి వెల్లి మంజి పార్లనం కిజి మహార్.

11 నస్తవలె, దేవుణుదిజ్ దూపం సుర్ని మాలి పిటి ఉణెర్పడఃకాద్ దేవుణు దూత నిహాన్. నిహండ్రె వన్నిజ్ తోరె ఆతాన్.

12 జెకరియ, దేవుణు దూతెజ్ సుడఃతాండ్రె, గజిబిజి ఆజి నండో తియెల్ ఆతాన్.

13 అయావలె దేవుణు దూత వన్నిజ్, “జెకరియ, సీను తియెల్ ఆమ. నీ పార్లనం దేవుణు వెహాన్. నీ ఆలు ఎలిసబెతు ఒరెన్ కొడోః ఇడ్మాద్దె. వన్నిజ్ యోహాను ఇజి పేరు ఇడఃదెజ్.

14-17 వాండ్రు ప్రబు ఎర్దు పెరికాన్ ఆనాన్. ద్రాక్కు కలుని మరి సోస్తిక ఇనికబా వాండ్రు ఉణెవెన్. అయిసి పొటలోఇ పెండం ఆతి బాణిజ్ మొదోల్ని దేవుణు ఆత్మ వన్నిజ్ నడిపిస్సాన్. ఇస్తాయేలు దేనుమది లోకురిజ్ నండోండోరిజ్ వరి దేవుణు ఆతి ప్రబు దరోట్ మహి తనాన్. ఏలియ ప్రవక్త లెకెండ నండో గొప్ప నత్తుదాన్ వాండ్రు ప్రబు ముజాల సానాన్. ఎందానిజ్ ఇహిజ, అప్పొసి మరిసిరిజ్ కూడుఃపైజె. నాయం మన్నికార్ బుద్దిదాన్ నడిపివజ, విరి సరిదు దేవుణుమాట వెన్ఇవరిజ్, నడిపిస్తెజ్ ప్రబు వానివలె, వన్నిజ్ ఎర్దు సుడఃదెజ్ లోకాజ్ తయార్ కినివందిజ్ యా లెకెండ కినాన్లె. అందెజె వాండ్రు పుట్టివెలె మిజి గొప్ప సరద కినాన్లె. మరి, నండోండోరిజ్ సరద కిబిస్సాన్లె”, ఇజి వెప్తాన్.

18 నస్తవలె జెకరియ దేవుణు దూతెజ్ వెన్బాతాన్, “యాక ఎలాగ నాను నెస్తెజ్? నాను డొక్త. నా బోదెల్బా డొక్తి ఆతాద్”, ఇజి.

19 అందెజె దేవుణు దూత, “నాను గబ్రియెలు. దేవుణు పడఃకాద్ నిల్ని మంజనికాన్. నీ వెట వర్గిజి, నిజి యా నెగ్గి కల్లు వెప్తాజ్ దేవుణు నజి పొక్త మనాన్.

20 గాని నాను వెళ్ళి మాటెట్లీ నీను నమిఇతి. అందెజె యాకెజ్ జగ్గినిదాక, నీను గుల్ల ఆజి మంజనిలె. నాను వెళ్ళికెజ్ జగ్గిదెజ్ దేవుణు ఏరపాటు కితి కాలమ్దు, చూర్తి ఆనలి", ఇజి వెప్తూన్.

21 నస్తివలె లోకుర్ జెక్రయెజ్ కాప్ కిజి మహూర్. వీండ్రు ఎండనిజ్ దేవుణు గుడిఃదు నిసా ఆల్సెం ఆతూన్ ఇజి బమ్మ ఆజి మహూర్.

22 వాండ్రు వెల్లె వాతివెలె, వరి వెట వర్గిదెజ్ అబ్వెతూన్. అయావలె దేవుణు గుడిఃదు వినిజ్ దేవుణు ఇనికదో ఉండ్రి దర్సనం * తోరిస్తాన్ ఇజి నెస్తార్. వెయు రజతిజ్, వాండ్రు వరిజ్ కియు నయన్ కితాన్. వాండ్రు గుల్ల ఆజి మహూన్.

23 వన్ని పణి కాలం వీజితిజ్ వాండ్రు వన్ని ఇండ్రో సాహూన్.

24 సెగం రోస్సు సాహి వెన్కా, వన్ని ఆల్ని ఎలిసబెతు పాత డిఃస్తాద్. అయ్యదు నెలదాక అది ఇండ్రోనె మహూద్.

25 "ప్రబునె నా వందిజ్ యాక కితాన్. ఏలు నా ముస్సు కణక పెప్తూ బస్తాండ్రె లోకుర్ ఎద్దు నజీ మహి సిగుసెట్టు లాగితాన్", ఇజి వెప్తూన్.

యేసు పుడుఃగు వందిజ్ వెప్సిసాన్

26 ఎలిసబెతు పాత డిఃసి ఆరునెలాదు, దేవుణు గబ్రియెలు దూతెజ్, గలిలయ ప్రాంతమ్దు మన్ని నజరేతు ఇని పట్టుమ్దు పోక్తాన్.

27 యోసేపు ఇన్ని ఒరెన్ వన్నిజ్ వెన్బాతి ఉండ్రి విడ్డి బోదెలిబాన్ దేవుణు దూత సాహూన్. అయ విడ్డి బోదెలి పేరు మరియ. యోసేపు దావీదు కుటుమ్దికాన్.

28 దేవుణు దూత లోఇసాహండ్రె, మరియామ్మెజ్ సుడఃజి, "వందనం, ప్రబు నీ వెట మనాన్. నిజి నెగింద దీవిస్స మనాన్", ఇజి వెప్తూన్.

29 అయ మాటెజ్ వెపాదె, మరియ నండ్రో బాద ఆతాద్. వన్ని మాటెజిదిజ్ అర్దం ఇనికదో ఇజి దన్ని గర్భమ్దు బమ్మ ఆతాద్.

30 అయావలె దేవుణు దూత దన్నిజ్, "మరియ నీను తియెల్ ఆమ. దేవుణు నీ ముస్సు కనికారం తోరిస్త మనాన్.

31 నీను పాత డిఃసిదె, ఒరెన్ కొడోదిజ్ ఇడ్డిలె. వన్నిజ్ యేసు ఇజి పేరు ఇడఃఅ.

32 వాండ్రు పెరికాన్ ఆనాన్. విజుదనిజ్ అతికారం మని దేవుణు మరిసి ఇజి కూకె ఆనాన్లె. వన్ని అనిగొగొరె ఆతి దావీదు రాజు ఆతివజ, దేవుణుఆతి ప్రబు వన్నిజ్ రాజు కినాన్లె.

33 వాండ్రు, యాకోబుజ్ తెగ్గతివరిజ్ ఎలాకాలం ఏలుబడిః కినాన్లె. ఏలుబడిః కిదెజ్ అతికారం వన్నిజ్ ఎలాకాలం మంజినాదలె", ఇజి వెప్తూన్.

34 అయావలె అది, "నాను ఎనెజ్బా మొగకొడో వెట కూడఃఎనె. యాక ఎలాగ జగ్గినాద్?", ఇజి దేవుణు దూతెజ్ వెన్బాతూన్.

35 అందెజె దేవుణు దూత, "దేవుణు ఆత్మ నీ ముస్సు వానాన్లె. మొసావీ కితిజి నీడ పిడఃక్కాద్. అయలెకెండ, విజు దన్నిజ్ అతికారం మన్ని దేవుణు సత్తు నిజి పిడఃక్కాద్దె. అందెజె పుట్టికాన్ దేవుణు బాణిజ్ వానికాన్. వాండ్రు దేవుణు మరిసి ఇజి కూకె ఆనాన్లె.

36 నీ డగ్గుహి లోకుఆతి ఎలిసబెతు డోక్రి కాలమ్దు ఒరెన్ బయిజ్ పాత డిఃస్త మనాద్. గొడ్డు బోదెలి ఇజి కూకె ఆతిదనిజ్ ఏలు ఆరు నెలెజ్.

37 విజు కిదెజ్ దేవుణు అట్టికాన్", ఇజి వెప్తూన్.

38 అయావలె మరియ, "ఇదిలో, నాను దేవుణు పణిమణిసి. నీను వెళ్ళి లెకెండె నజి జగ్గిపిద్", ఇజి వెప్తూద్. అకవెహండ్రె దేవుణు దూత దని బాణిజ్ సాహూన్.

మరియ ఎలిసబెతుబాన్ ససాన్సినాద్

39 అయావలెనె, మరియ తయారె ఆతాద్. ఆతాదె, యూదయ దేసెమ్ది గొరోణె ప్రాంతమ్దు మని ఉండ్రి పట్టుమ్దు బేగి సాహద్.

* 1:22 1:22 దర్సనం ఇహిజ ఇనికాదో ఉండ్రి నజతి కలె లెకెండె టిటాజ్ తోరి ఆనికాదె అయక దేవుణు నవ్విదాన్ తోరి ఆజినాద్

40 అబ్బె మని జెకరియ ఇండ్రో సొహదె, ఎలిసబెతుజ్ దసూల్అతాదె, నమొస్సె వెప్తాద్.

41-42 మరియ వెప్తా వందసం ఎలిసబెతు వెహివెలె, దన్ని పొటాద్ మన్ని పిండం సర్దదాన్ కర్లితాద్. ఎలిసబెతు దేవుణు అత్తు దాన్ నిండ్రిజి సరద ఆజి ఈహు డటం వెప్తాద్. “అబ! బోదోకా లోఇ, దేవుణు నిజినె నెగండ దీవిస్తాన్. నీ పొటాద్ మన్ని కొడోడిజ్బా దీవిస్తాన్.

43 నా ప్రబుజ్ అయ్సినీ నా డగ్రు వాదెజ్ నాను ఏవటిదిక ఆవి.

44 ఇదిలో నీ వందసం నా గిబ్బురు అర్లిజ్, నా పొటాద్ మన్ని పిండం సరదదాన్ కర్లితాద్.

45 ప్రబు దనిజ్ వెప్తా మాటెజ్ జర్గినాద్ ఇజి నమకం ఇట్టికాద్ గొప్పది.

మరియ దేవుణుదిజ్ పొగిడిజి పార్జినాద్.

46 అయావలె మరియ ఈహు వెప్తాద్. “నా పాణం ప్రబు గొప్ప పెరికాన్ ఇజి వెప్సినాద్.

47-49 వాండ్రు వన్ని పణిమణిసిఅతి నా ఇజ్రి బత్తుదిజ్ సుడోతాన్. అందెజె నా పాణం నజీ రక్కిన్సి దేవుణు బానె సరద ఆజినాద్. గొప్ప సత్తు మన్ని దేవుణు నా వందిజ్ గొప్ప పణిజ్ కితాన్. అందెజె ఏలుదాన్ లోకుర్ విజెరి నా వందిజ్, దేవుణు దీవిస్తాకాద్ ఇజి వెహ్పారలె. వాండ్రె నెగ్గి దేవుణు.

50 వన్నిజ్ తియెల్ ఆనివరి ముస్సు, వన్ని కనికారం తర తరం మంజినాద్.

51 వాండ్రు వన్ని సత్తుదాన్ గొప్ప పణిజ్ కితాండ్రె తోరిస్తాన్. నానె పెరికాన్ ఇజి వరి లోఇ ఒడోబిజి గర్త ఆతి వరిజ్ వాండ్రు సెద్రిస్తాన్.

52 గర్త మని అతికారిజ, అతికారం దాన్ డిష్టాండ్రె ఇజిరి వరిజ్ పెరికార్ కితాన్.

53 బజాతివరిజ్ నెగ్గి టిండి సీజి సరద కిబ్బిస్తాన్. మని వరిజ్ వహి కీదానె పొస్తాన్.

54-55 మా అనిరిజ్ ‘కనికారం తోరిస్తు’ ఇజి ఒట్టు కితి వజి వాండ్రు కితాన్. వన్నిజ్ సేవ కిని ఇస్తాయేలు లోకాజ్ కనికారం ఆజి సాయం కితాన్. అబహమ్ముజ్ వన్ని కుటుమ్ది వరిజ్ విజెరిజ్ ఎలాకాలం కనికారం తోరిస్తు ఇజి ఒట్టు కితాన్. అయాక వాండ్రు ఒడిబితాన్”, ఇజి మరియ వెప్తాద్.

56 అది డగ్రు మూండ్రి నెలెజ్ దాక ఎలిసబెతు బాన్ మహాదె దని ఇండ్రో మరజి సొహద్.

బాప్తినం సీని యోహాను పుట్టినాన్.

57 నెలెజ్ నిండ్రితివలె, ఎలిసబెతుజ్ ఒరెన్ కొడోడి పుట్టాన్.

58 ప్రబు దన్నిముస్సు కణక పెప్తా బేస్తాన్ ఇజి పడోకాదికార్ని కూలెజ్ వెహరె, దన్నివెట నండో సరద ఆతార్.

59 కొడోడి పుట్టి ఎనిమిది దినమ్దు వన్నిజ్ సునతి కిదెజ్ కూడితార్. కొడోడిజ్ అప్పాసి పేరు నన్నిక ఇడోదెజ్ వారు ఒడిబితార్.

60 నస్తివలె అయ్సినీ, “అహు పొని! వన్నిజ్ యోహాను ఇజి పేరు ఇడోదెజ్”, ఇజి వెప్తాద్.

61 అందెజె వారు, “మీ కూలెజ్ లోఇ ఎయెరిజ్బా నిన్ని పేరు నిల్లెద్”, ఇజి దనిజ్ వెప్తార్.

62 వినిజ్ ఇన్ని పేరు ఇడోదెజ్ అప్పాసి కోరిజినాన్ ఇజి నెస్టెజ్ వారు కియు సయన్ కిజి జెక్యెజ్ వెనబాతాన్.

63 నస్తివలె వాండ్రు ఉండ్రె రాసిని బల్ల లొస్తాండ్రె, “విన్ని పేరు యోహాను”, ఇజి రాస్తాన్. వారు విజెరి నండో బమ్మ ఆతార్.

64 వెటనె, వన్నిజ్ వర్గిదెజ్ వెయు వాతాద్. దేవుణుదిజ్ పొగిడిజి వర్గిదెజ్ మొదోల్స్తాన్.

65 పడోకాదికార్ విజెరి గొప్ప తియెల్ ఆతార్. యూదయ దేసెమ్ది గొరోజ్ ప్రాంతం విజు లోకుర్ విజెరి యా జర్గితి సజతిజి వందిజ్ వర్గిజి మహార్.

66 యాక వెహికార్ విజెరిబా దని వందిజ్ ఒడిబిజి, “యా కొడోడి ఎలాగ మప్తాకాన్ ఆనానెలెనో”, ఇజి వెప్తాన్. ప్రబు సత్తు వన్నివెట మహాద్ ఇజి వారు నెస్తార్.

జెకరియ పొగిడిజి పార్జినాన్

67 నస్తివలె వన్ని అప్పాసి జెకరియ, దేవుణు అత్తుదాన్ నిండ్రిజి, దేవుణు వెప్తాజ్ మని సజతిజి వందిజ్ ఈహు వెప్తాన్.

68 “ఇస్రాయేలు లోకురి దేవుణుడికి పొగిడిజనాల్. ఎందనిజ్ ఇహిజ, వాండ్రు వన్ని లోకురిజ్ డిఃబిన్ని వందిజ్ వాత మనాన్.

69 ఒరెన్ సత్తు మని మజి గొప్పజ రక్సిన్నివన్నిజ్ మా వందిజ్ సిత మనాన్. అయ వాండ్రు వన్ని పణి మణిసి ఆతి దావీదు కుటుమీదు మనికాండ్రె.

70-71 సీన దినమకాజ్ ముజాలె, దేవుణు వన్ని బాణిజ్ వాతి ప్రవక్తెజవెట ఒట్టు కిత మనాన్. ఒట్టు ఇనిక ఇహిజ, “మా పగతివరి బాణిజ్ మజి రక్సిన్నుఇజ. “మజి దూసిన్ని వరిబాణిజ్ రక్సిన్ను”, ఇజ. అయా ఒట్టువజనె, మజి రక్సిన్ని వన్నిజ్ సితాన్.

72 మరి వాండ్రు వెహ్సాన్, “మా అనిరిజ్ ఒట్టు కితి వజ కనికారం తోరిన్ను ఇజ. వన్ని వందిజ్ కేట ఆతి బప్పమానం ఒడఃబిన ఇజ.

73-74 మా బుబ్బు ఆతి అబ్రాహము వెట ఒట్టు కితాన్, మా పగ ఆతివరి బాణిజ్ మజి తప్సిన్ను ఇజ, తియెల్ సిల్లెండ వన్నిజ్ సేవ కిదెజ్ మజి సాయం కిన ఇజ.

75 మరి, మాటు దేవుణుడికి కేట ఆతి లోకుర్ వజ సీతి నిజాయితిదాన్ మా బత్తు విజి వన్ని ఎద్రు మండ్రెజ్ మజి తయారీ కిన ఇజ”, వెహ్సాన్.

76 మరి, నా కొడః సీను విజి దన్నిజ్ అతికారం మన్ని దేవుణు ప్రవక్త ఇజ కూకెఅలి. ఎందానిజ్ ఇహిజ, సీను ముజాలె సానీసి ప్రబుజ్ లోకుడగ్రు వాదెజ్ సరి నెగెణ్ కినిలె.

77 నీ వన్ని లోకాజ్ వెహ్సాలె, “దేవుణు వరి పాపముకు సెమిసి వరిజ్ రక్సిన్నాన్లె”, ఇజ.

78 మా దేవుణు నండో కనికారం మనికాన్. వాండ్రు దేవుణు మంజిని బాడ్డిదాన్ పొద్దు సాని లెకెండ రక్సిన్ని వన్నిజ్ తపిన్నాన్లె.

79 ఎందానిజ్ ఇహిజ, సీకటిదు మని వరిజ్ సావు బత్తుదు మని వరిజ్ జాయ్ సీదెజ్. మజి సమాదనం దాన్ నడిపిన్లె. దిని వందిజ్ వాండ్రు రక్సిన్ని వన్నిజ్ తపిన్నాన్లె”, ఇజ జెకరియ వెహ్సాన్.

80 కొడః పిరితాన్. దేవుణు అత్తు సత్తు దాన్ పిరితాన్. వాండ్రు ఇస్రాయేలు లోకురిజ్ తోర్ని దాక యెరూసలేమీదిజ్ వెల్లి బీడిఃము బూమీదు ఒరెండ్రె బత్తితాన్.

2

1 అయ కాలమీదు రోప మగవంతు అడిఃగి మన్నివిజి లోకురిజ్ జమబంది లెకెజ్ రాన్లెజ్ ఇజ కయినరు అయగుస్తు ఉండ్రె ఆద్ర సితాన్.

2 కురినియ ఇని ఒరెన్ సీరియ రాన్లెండ్రె సుడఃజి మహివలె యా మొదోహీ జమబంది లెకెజ్ రాన్లెజ్.

3 విజెరె వరి వరి పట్టుమకాజ్ పేర్కు రాసె ఆదెజ్ సాహార్.

4 అయలెకెండ్రె యోసేపు ఇనికాన్ ఒరెన్బా సాహార్. వీండ్రు దావీదు కుటుమీదికాన్. దావీదు పట్టుం బేల్లెహము. అందెజె వాండ్రు గలిలయ ఇని ప్రాంతమీది నజరేతు ఇని పట్టుం దాన్, యూదయ ప్రాంతమీదు మని బేల్లెహము ఇని పట్టుమీదు సాహార్.

5 వన్నిజ్ వెన్బాతి మహీ మరియ వెట జమబంది రాసె ఆదెజ్ సాహార్. అయావలె దన్నిజ్ నెలెజ్ నిండ్రెతె మహి.

6 వారు అబె మహివలె దనిజ్ నోపిజ్ వాతె.

7 అది దని తోల్ సుర్ కొడఃదిజ్ ఏరుకాబాతాద్. వరిజ్ మండ్రెజ్ లార్జి ఇలు దోహకెతాద్. దోహకెతిజ్ పుట్టి కొడఃదిజ్ కనిబాణిజ్ సుటిస్తారె, కొడ్డిజ సాలాది డోణిద్ త్రెహార్.

గొరెజ్ గవడుజ దేవుణు దూత నెగ్గికబ్బు వెహ్సాన్

8 నన్సీవలె, అయ ప్రాంతమీదు నెగెండార్ గొరెజ్ గవడుజ్ వరి గొరెజ, మడిఃజ మంద కితారె రెయ్తు కాపుకిజ మహార్.

9 అయావలె ఒరెన్ దేవుణు దూత వరిజ్ తోరె ఆతాన్. ప్రబు జాయ్ వరి సుటులం వాతాద్. వారు నండ్రెతియెల్ ఆతారె.

10 అయావలె దూత వరిజ్, “మీరు తియెల్ ఆమాల్. లోకురిజ్ విజెరిజ్ నండ్రె సర్ద కిబిన్ని నెగ్గి కబ్బు నాను వెహ్సా.

11 నేండ్రు దావీదు పట్టుమీదు మిజి రక్సిన్నికాన్ ఒరెన్ పుట్ట మనాన్. వాండ్రు ప్రబు ఆతి క్రిస్తు.

12 యాకదె నాను మీజె వెహ్లాదనిజ్ గుర్తు “ఒరెన్ బయిదిజ్ కసెలిజాణిజ్ సుటిస్తారె, సాలాది డోణిది త్రెప్తి మునిక సూణిదెర్”, ఇజి వెహ్లాన్.

13-14 వెటనె, దేవుణు మంజిని బాడిది నంణొ దూతెజ్ అయ దూతవెటె కూడితె. కూడితారె, “విజు దన్నుజ్ అతికారం మన్ని దేవుణుదిజ్ పొగిడిజెనాట్. యా లోకముదు వాండ్రు ఇన్టం కిని లోకురిజ్ సమాదనం మునీద్’ ఇజి దేవుణుదిజ్ పొగిడిజె మహార్.

15 దూతెజ్ వరిజ్ డిజెస్తారె, దేవుణు మంజిని బాడిడు సాహార్. సాహి వెనుక గొర్రెజ్ గవ్డుజ్, “మాటు బేత్తెహిముదు సాన్సి, ప్రబు మజి వెహ్పిస్తి యా జర్లితి సజతిజ సూణాట్”, ఇజి ఒరెన్దిజ్ ఒరెన్ వర్లితార్.

16 వారు బేగి సాహారె, మరియామెజ్, యోసేపుజ్, డోణిదు త్రెప్తి మని కొణొదిజ్ సుడతారె.

17 వారు వన్నుజ్ సుడతారె, యా కొణొ వందిజ్ వరిజ్ వెహ్తి మాటెజ్ విజెరిజ్ వెహ్తార్.

18 గొర్రెజ్ గవ్డుజ్ వెహ్తికెజ్ వెహికార్ విజెరె నంణొ బమ్మ ఆతార్.

19 గాని మరియ జర్లితి సజతిజ విజు గర్భముదు ఇడ్డి దన్నువందిజ్ ఎత్తుకిజ మహద్.

20 గవ్డుజ్ వరిజ్ వెహ్తికెజ్, వారు సుడతికెజ్ విజు వన్యా వందిజ్ దేవుణుదిజ్ గవరం సీజి వన్నుజ్ నంణొ పొగిడిజె మహ్తా సాహార్. దేవుణు దూత వరిజ్ వెహ్తి వజనె విజు జర్లితె.

21 పుట్టి ఎనిమిది రోస్సు ఆతిజ్, బయిజ్ సునతి కితార్. అయావలె వారు వన్నుజ్ యేసు ఇజి పేరు ఇట్టార్. పాత డిసెంపెండ ముజాలె దేవుణు దూత వెహ్తి పేరునె ఇట్టార్.

22 దేవుణు మోసెజ్ సీతి రూలుజ్దు మన్నివజ సుబ్రరమ్వందిజ్ పూజెజ్ కిదెజ్ దినం ఆతాద్. అయావలె యోసేపుని మరియ బయిజ్ దేవుణుదిజ్ ఒవజెహ్తెజ్, యెరూసలేముదు ఒత్తార్.

23 ఎందానిజ్ ఇహిజ, మోసె రాస్టెజ్ ప్రబు వెహ్తి రూలుదు మనాద్, “విజు తొలిత పుట్టి కొణొదిజ్ దేవుణు వందిజ్ కెటె ఇడెదిజ్*.”

24 మరి, మోసె రాస్టెజ్ ప్రబు వెహ్తి రూలుదు మని వజ, “జత గువండెజ్నో రుండి పార పొటి పిలెకుజ్నో పూజ సీదెజ్†”, ఇజి. అయావజ ఒత్తార్.

25 అయావలె, సుమెయోను ఇనికాన్ ఒరెన్ యెరూసలేముదు మహాన్. వీండ్రు సీతి నిజయేతి మనికాన్. దేవుణుదిజ్ తియెల్ ఆతికాన్. ఇస్రాయేలు లోకాజ్ రక్కిన్ని వన్ని వందిజ్ ఎద్రు సుడెజె మహాన్. దేవుణు ఆత్మ వన్ని వెటె మహాన్.

26 ప్రబు ఏర్పాటు కితి పొక్తి క్రీస్తుజ్ తొవండ, నీను సాజలె’, ఇజి దేవుణు ఆత్మ వన్నుజ్ వెహ్తి మహాన్.

27 దేవుణు వన్నుజ్ నడెపిస్తివజ వీండ్రు దేవుణు గుడిడు సాహాన్. నస్తివలె, దేవుణు మోసెజ్ సీత్తి రూలుదు మని లెకెండె కిదెజ్ అయేసి అపొసిర్ కొణొ ఆతి యేసుజ్ తత్తార్.

28 అయావలె సుమెయోను కొణొదిజ్ కికాణిజ్ పెహ్తాండ్రె దేవుణుదిజ్ పొగిడిజె ఈహు వెహ్తాన్.

29 “ప్రబువా, నీను వెహ్తి మాటెజ్ వజ నాను వన్నుజ్ సుడతె. అందెజె నీ వణి మణిని ఆతి నజి ఏలు సమాదనం దాన్ కూక్కి ఒఅ.

30-31 ఎందానిజ్ ఇహిజ, లోకుర్ విజెరె సుడెదిజ్ నీను తయార్ కితి రక్కిన్నివన్నుజ్నా కణకాణిజ్ నాను సుడతె మన్ను.

32 వాండ్రు ఇస్రాయేలు ఆజి వరిజ్ దేవుణు సరిదు నడెపిస్టెజ్ జాయ్లెకెండె ఆనాన్లె. నీ ఇస్రాయేలు లోకాజ్ గొప్ప గవరం వాండ్రు కల్లిస్నాన్లె.

33 అయావలె వాండ్రు కొణొ వందిజ్ వెహ్తి మాటెజ్ వెహారె అయేసి అపొసిర్ నంణొ బమ్మ ఆతార్.

34-35 సుమెయోను వరిజ్ దీవిస్తాండ్రె, వన్ని అయేసి ఆతి మరియెజ్, “ఇస్రాయేలు లోకుర్ నంణొండార్ నాసనం ఆనివందిజ్, నంణొండార్ బత్తిని వందిజ్ దేవుణు వినిజె ఏర్పాటు కితాన్. వీండ్రు దేవుణు ఏర్పాటు కితి ఉండ్రె గుర్తు. లోకుర్ అయాక నెక్కు పొక్తార్. ఆహె, వారు మన్నుదు విని వందిజ్ ఒడెబితికెజ్ వెల్లి ఆనె. అయాక నీను సూణివెలె కూడం గుత్తి సాహి లెకెండె నీ మన్నుదు దుకం వానాద్లె”, ఇజి వెహ్తాన్.

36-37 నస్తివలె వనుయెలు గాడ్లి ఆతి అన్ను ఇని ఉండ్రె ప్రవక్త మహద్. అది ఆనిరు ఇని జాతిదు మనికాద్. అది పెండ్రె ఆజి ఏడు వంటిజ్ మాని వెటె బత్తితాద్. ఎనబయేనాల్లి వంటిజ్ దాక ముండ మొప్ప

* 2:23 2:23 నిగ్గుము 13:2,12. † 2:24 2:24 లేవి 12:8.

మహాద్. అది నండొ డొక్క ఆతాద్. దేవుణు గుడిః దాన్ ఎన్నిజ్బా డిఃన్ఎండ, రెయు పొగాల్ ఉపాన్దాన్ పార్లనమ్దాన్ దేవుణుదిజ్ పొగిడిఃజి మాడిఃని మహాద్.

38 ఆ గడిఃయదునె, అది దేవుణు గుడిఃదు యోసేపు, మరియు, యేసుబాన్ సాహదె దేవుణుదిజ్ పొగిడిఃతాద్. యెరూసలేమ్ది లోకుర్ రోము అతికారిజ అడిఃగి మహాద్. వారు వరిజ్ డిఃబిన్సి ఒరెన్ వన్నిజ్ ఎర్దు సుడఃజి మహాద్. ఆహె ఎర్దు సుడఃజి మహె వరివెట కొడఃవందిజ్ వెప్తాద్.

39 యోసేపుని మరియు మోసె రాస్తిజ్ ప్రబు వెప్తి రూలుజ్దు కిడెజ్ వెప్తి మనికెజ్ విజు కితార్. కితి వెనుక, మహ్తార్ గలీలయదు మని నజరేతు ఇని వరి పట్టుమ్దు సోహార్.

40 కొడః సత్తు దాన్ పిరితాన్. వన్నిజ్ నండొ బుద్ది మనాద్. దేవుణు వన్నిజ్ దిపినినె మహాన్.

యేసు పెద్దలిజవెట వర్గిజినాన్.

41 ఏంటు ఏంటు యేసు అయేసి అపొసిర్ యెరూసలేమ్దు పన్ను † పండొయ్దిజ్ సొన్ని మహాద్.

42 వారు ఏంటు సొన్ని మహె అలవాటువజ, యేసుజ్ పన్నెండొ పంటిజ్ మహెవలె పండొయ్దిజ్ సోహార్.

43 పండొయ్ వీజితిజ్, వారు మర్జి వాజి మహాద్. గాని కొడః ఆతి యేసు యెరూసలేమ్దు నిహన్. వన్ని అయేసి అపొసిర్ అయోక నెన్ఎతార్.

44 పిండ్తు మంద లోఇ మనాన్ ఇజి ఒడఃబిజి, ఉండ్రీ రోజు వారు నడిఃజి వాతార్. వెనుక వారు వరి కూలెజబాన్ నెల్లు ఆతి వరిబాన్ వన్నిజ్ రెబాజినార్.

45 వాండ్రు తోరెజతిజ్, వన్నిజ్ రెబాజి యెరూసలేమ్దు మర్జి వాతార్.

46 మూండ్రీ దినమ్కు వెనుక, వాండ్రు, దేవుణు గుడిఃదు బోద్ కినివరి నడిఃయి బున్తిక సుడఃతార్. వాండ్రు వరి మూటెజ్ వెంజి, వరిజ్ మరి వెన్బాజి మహాన్.

47 వన్ని మూటెజ్ వెహికార్ విజెర్, వాండ్రు మహె వెప్తి మూటెజ్ వందిజ్, వన్ని బుద్ది వందిజ్ నండొ బమ్మ ఆతార్.

48 వన్ని అయేసి అపొసిర్ వన్నిజ్ సుడఃతిజ్ నండొ బమ్మ ఆతార్. వన్ని అయేసి ఈహు వెప్తాద్ “నా మరిన్, నీను ఎందనిజ్ మజి ఈహు కితి? ఇదిలో నీ బుబ్బని నాను నండొ బాద్ ఆజి నిజి రెబాజి వాతాప్”, ఇజి వెప్తాద్.

49 దనిజ్ వాండ్రు, “మీరు నజి ఎందనిజ్ రెబాతిదెర్. నాను నా బుబ్బు పణిదు మండ్రెజ్వలె ఇజి మీరు నెన్ఇదెరా?”, ఇజి వెప్తాన్.

50 గాని వాండ్రు వరిజ్ వెహె మూటెజ్ వారు అర్దం కిపితార్.

51 వెనుక వాండ్రు వరివెట సోతాండ్రె నజరేతు వాతాన్. అబ్బి వరిజ్ లోజిజి మహాన్. వన్ని అయేసి యా జర్గిజిని విజు సజతిజ్ దని మన్నుదు ఇడ్డి మహాద్.

52 యేసు బుద్దిదు, వయుసుదు పిరితాన్. దేవుణు, లోకుర్ మరి మరియు వన్నిజ్ ప్రేమిని మహాద్. వన్ని మున్ను నర్ద ఆజి మహాద్.

3

1 పొంతి పిలాతు ఇనికాన్యూదయ రాస్త్వం ఏలుబడిః కిజి మహాన్. హేరోదు గలీలయ రాస్త్వమ్దిజ్ అతికారి. హేరోదుజ్ తంబెరెసిఅతి పిలుప్పు ఇతూరియని త్రకోనీతి రాస్త్వమ్కాజ్ అతికారి. అబిలేనే రాస్త్వమ్కాజ్ లుసానియ అతికారి. అయావలె తిబెరియ కయినరు ఇనికాని విరిజ్ ఏజెర్ మున్ను రాజు. వాండ్రు పదిహేను పంటెజాణిజ్ విరిజ్ ఏలుబడిః కిజినె వాజినాన్.

2 అయావలె, అన్నని కయవ పుజెరిజ మున్ను పెరి పుజెరి. అయావలె బీడిమ్ బూమిదు, జెకరియ మరియు ఆతి యోహాను వెట దేవుణు వర్గితాన్.

3 అందెజి వాండ్రు, “మీరు పాపమ్కు డిఃని బాప్తిసం లాగి ఆదు. దేవుణు మీ పాపమ్కు నెమిస్సాన్”, ఇజి యొద్దాను గడ్డ వడఃకారు మన్ని ప్రాంతం విజు సొన్నిబోదిసి మహాన్.

4 యెనయ ప్రవక్త రాస్తివెలె విన్నివందిజ్ ఈహు వెహెన్సాన్. “బీడిమ్ బూమిదు ఒరెన్ ఈహు డేల్ని వెహెన్సాన్. “ప్రబుజ్ లోకుడర్దు వాదెజ్ సరినెగెన్ కితి. వన్నిజ్ నడిఃదెజ్ సరితినాజ్ కిదు.

† 2:41 2:41 పులాజ్ సిల్లి రొట్టెతయార్ కిజి తిని పండొయెన్ వన్ను పండొయె

5 విజు గాతెజ్ నిండ్రీన్ అ. విజు గొరొకని మెటెజ్ బయలు కిత. వెకొ సరిజ్ తినానికెజ్ కిత. కరుకు సరిజ్ నున్నజ్ తికెజ్ కిత.

6 అయావలె విజేరె, దేవుణు వరిజ్ రక్కిన్ని దన్నివందిజ్ నూణారలె*”, ఇజి. ఆహె రాస్తిమహి లెకెండ్ యోహాను బోదిస్తాన్.

7 యోహాను వన్నిడగు బాప్తిసం లాగెఅదెజ్ వాజిని మంద లోకురిజ్ ఈహు వెప్తాన్ “మీరు వినం మన్నిసరాన్ లెకెండ్ మన్నికిదెరె, దేవుణుబాణిజ్ కోపం వాజినాదె ఇజి నమ్మిజి మీరు వాతిదెరా? సిల్లెదె. వన్ని కొపమదాన్ తప్రెఅదెజ్ ఇజి మీరువాతిదెరా? నిజమే అయలెకెండ్ ఇజి నాను ఒడిబిదెజ్ సిల్లెదె.

8 మీ పాపమకు ఒవుకొణ్ణెజి డిసి సీజి దన్నిజ్ తగితి వణిజ్ కిజి తోరిస్తు. “మాపు అబ్రాహము తెగ్గాతికావ”, ఇజి మీరు మీ మన్నుదు వర్తిమాత్. ఎందానిజ్ ఇహిజ, యా పణుకుబాణిజ్ అబహముజ్ కొణ్ణెరిజ్ తయారె కిదెజ్ దేవుణు అట్టాన్”, ఇజి నాను మిజి వెప్పిన్.

9 దేవుణు మరెక మొదొలెకత్తి వినీరెదెజ్ కియుదు గొడెలి అస్తి వన్నిజ్ పొలిత మనాన్. నెగ్గి పట్టు అన్ ఇ మరెకాజ్ విజు కత్తి సినుద్ వినీరనాన్”, ఇజి వెప్తాన్.

10 అయావలె లోకురె విజేరె, “అహిజ మాపు ఇనిక కిదెజ్?”, ఇజి వెన్ బాతార.

11 యోహాను వెప్తాన్, “రుండి సొకెజ్ మన్నికాన్ ఉండ్రీ సిలివన్నిజ్ సీదెజ్. అయలెకెండ్ టిండి మన్నికాన్ సిల్లివన్నిజ్ సీదెజ్”, ఇజి.

12 పన్ను వెరెనికారె బాప్తిసం లాగె అదెజ్ వాతార. వారు, “ఓ బోదికినికె, మాపు ఇనిక కిదెజ్?”, ఇజి వెన్ బాతార.

13 దనిజ్ వాండ్రు, “మిజి ఎసా లొస్సెజ్ ఆడ్ర సిత మనాదొ, నసా లొస్సు. నండొ లొస్సాట్”, ఇజి వెప్తాన్.

14 నస్తివలె సెగెండారె ఉండ్రు కినికార, “మాపు ఇనిక కిదెజ్?”, ఇజి వెన్ బాతార. అందెజి వాండ్రు, “బెద్దిసి ఎయెబాన్ డబ్బు డిదిసాట్. అనయం వెప్పి డబ్బు లొస్సాట్. మీ జితం దానె సర్దు ఆదు”, ఇజి వెప్తాన్.

15 వీండ్రు క్రీస్తును ఇజి యోహాను వందిజ్ లోకురె విజెరె వరి మన్నుదు ఒడిబితార. వారు ఆన దాన్ క్రీస్తుజ్ ఎద్రు నుడెజి మహార.

16 అయావలె యోహాను వరిజ్ విజెరిజ్ వెప్తాన్, “నాను మిజి ఏరుదాన్ బాప్తిసం సీజిన. నజి మిస్తి నండొ పెరికాన్ మరి ఒరిన్ వాజినాన్. వన్ని జొడ్డు బేలెటు కుతెజ్ నాను ఏవటిలికాన్ అఎ. వాండ్రు మిజి దేవుణు అత్తుదాన్ సినుదాన్ బాప్తిసం సీనారె.

17 వాండ్రు గాలి ఇడెని సేపా కీదు అస్తి మనాద్. వాండ్రు వన్నికలమదిజ్ సుబ్బురం కిజి, గింజెజ్ కొటు కిజి గాలి ఇడెజినాన్. గింజెజ్ గాదిద్ ఇడ్తాన్. పొటుదిజ్ నమ్మి ఇ సినుదు సురనాన్.

18 యా మాటెజ్ అవిండ, మరి నండొ సజతిజ్ వెప్పి లోకురిజ్ పణిసి వెప్తాన్. సువార్త బోదిసి వెప్తాన్.

19 వాండ్రు హేరోదు ఇని అతికారిజ్ వెప్తాన్, వన్ని కొణెసి హేరోదియవెటె హేరోదు పాపం కిత్తాన్ ఇజి. మరి, హేరోదు కితి విజు తప్పుజుబా వెప్తాన్.

20 అందెజి వాండ్రు యోహానుజ్ జెలిదు ఇట్టాన్. ఆహె హేరోదు కిత్తి విజు తప్పుజువెటె యోహానుజ్ జెలిదు ఇడిస్తి తప్పబా కూడితాద్.

యేసు బాప్తిసం లాగెఅజినాన్

21 యోహానుజ్ జెలిదు ఇడ్చి ముజాల, ఉండ్రీ రోజు లోకురె విజెరె బాప్తిసం లాగె ఆతార. అయావలె యేసు బా బాప్తిసం లాగె ఆతారన్.

22 వాండ్రు పార్చనం కిజి మహివలె, అగాసం రెయ్ అతాదె దేవుణు అత్తు ఉండ్రీ పార పొటిజ్ మూర్తి లెకెండ్ డిగెజి వన్ని మున్ను వాతాద్. అయావలె, “నీనె నాను ప్రేమిస్తి నా మరిన్. నీ వందిజ్ నాను నండొ సరెద అజిన”, ఇజి పరలోమదాన్ ఉండ్రీ జాటు వాతాద్.

23 యేసు వన్ని సేవపణి మొదొల్లివెలె వన్నిజ్ డగ్రుదిజ్ ముప్పుయ్ వంటెజ్ వయసు మహాన్. వీండ్రు యోసేపు మరీనెనె ఇజి ఒడిబిజి మహార. యోసేపు పొలి మరిసి

24 పొలి మత్తతు మరిసి మత్తతు లేవి మరిసి లేవి మెల్కి మరిసి మెల్కి యన్న మరిసి యన్న యోసేపు మరిసి

* 3:6 3:6 యెసయ 40:3-5.

- 25 యోసేపు మత్తతియ మరిసి మత్తతియ ఆమోసు మరిసి ఆమోసు నాహోము మరిసి నాహోము ఎస్తికి మరిసి ఎస్తికి నగ్గయ మరిసి
- 26 నగ్గయ మయతు మరిసి మయతు మత్తతియ మరిసి మత్తతియ సిమియ మరిసి సిమియ యేనిక మరిసి యేనిక యోదా మరిసి
- 27 యోదా యోహాన మరిసి యోహాన రేపా మరిసి రేపా జెరుబాబెలు మరిసి జెరుబాబెలు సయిల్తీయెలు మరిసి సయిల్తీయెలు నేరి మరిసి
- 28 నేరి మెల్కి మరిసి మెల్కి అది మరిసి అది కోసాము మరిసి కోసాము ఎల్కదాము మరిసి ఎల్కదాము ఏరు మరిసి
- 29 ఏరు యోహానవ మరిసి యోహానవ ఎలియెజెరు మరిసి ఎలియెజరు యోరియ మరిసి యోరియ మత్తతు మరిసి మత్తతు లేవి మరిసి
- 30 లేవి సిమొను మరిసి సిమొను యూద మరిసి యూద యోసేపు మరిసి యోసేపు యోనాము మరిసి యోనాము ఎల్కాకిము మరిసి
- 31 ఎల్కాకిము మెలెయా మరిసి మెలెయా మేన్నా మరిసి మేన్నా మత్తత మరిసి మత్తత నాతాసు మరిసి నాతాసు దావీదు మరిసి
- 32 దావీదు, యెసయ మరిసి. యెసయ ఓబెదు మరిసి ఓబెదు బోయసు మరిసి బోయసు సల్కను మరిసి సల్కను నయస్సోసు మరిసి
- 33 నయస్సోసు అమ్మినాదబు మరిసి అమ్మినాదబు అరాము మరిసి అరాము ఎస్రోము మరిసి ఎస్రోము పెరెసు మరిసి పెరెసు యూదా మరిసి
- 34 యూదా యాకోబు మరిసి యాకోబు ఇసాకు మరిసి ఇసాకు అబ్రాహాము మరిసి అబ్రాహాము తేరహా మరిసి తేరహా నాహోరు మరిసి
- 35 నాహోరు సేరుగు మరిసి సేరుగు రయూకు మరిసి రయూకు పెలెగు మరిసి పెలెగు హెబెరు మరిసి హెబెరు సేలహా మరిసి
- 36 సేలహా కెయినాను మరిసి కెయినాను అర్పక్రదు మరిసి అర్పక్రదు సేము మరిసి సేము నోపహా మరిసి నోపహా లెమెకు మరిసి
- 37 లెమెకు మెతునెలె మరిసి మెతునెలె హనోకు మరిసి హనోకు యెరుదు మరిసి యెరుదు మహాలెలు మరిసి మహాలెలు కెయినాను మరిసి
- 38 కెయినాను ఎసోసు మరిసి ఎసోసు సేతు మరిసి సేతు ఆదాము మరిసి ఆదాము దేవుణు మరిసి.

4

యేసుజ్జీ వరిసి కిజినాన్

- 1 యేసు దేవుణు అత్తూదాన్ పూర్తి నిండ్రితాండ్రె, యోర్దాన్ గడ్డదాన్ మర్రజి వాతాన్.
- 2 నలవయ రోస్సు దేవుణు అత్తూ వన్నిజ్ బీడిమ్ బూమిదు నడిపిస్తాన్. అబె, నయతాను వన్నిజ్ వరిసి కిదెజ్ సుడ్డితాన్. వాండ్రు అయా రోస్కాజ్ ఇనికబా ఉణెఎండ మహాన్, కడఁవెరిదు వన్నిజ్ బజ కట్టాద్.
- 3 అయావలె సయ్తాన్, “నీను దేవుణు మరిసి ఇహిజ, యా వణుకు టిండి ఆని లెకెండ వెహాఅ”, ఇజి వెహ్తాన్.
- 4 అందెజ్ యేసు, “లోకు బత్తిజినిక టిండిదానె ఆవిద్*”, ఇజి దేవుణు మాటదు రాస్త మనాద్”, ఇహాన్.
- 5-6 అయావలె నయతాన్ వన్నిజ్ ఎత్తు మని బాన్ ఒతండ్రె, లోకమదు మని విజు దేసెమ్కు జామె తోర్స్తాన్. “యా లోకమది అతికారం సంసారం, విజు నాను నిజీ సీన. ఎందనిజ్ ఇహిజ అయాకెజ్ విజు నజీన దేవుణు ఒవజెప్త మనాన్. నజీ ఇస్టం ఆతి ఎయెరిజ్బా సీదెజ్ నజీ అక్కు మనాద్.
- 7 అందెజ్ సీను నజీ పొగడిజి మాడిస్తిజ, యాకెజ్ విజు నీవి ఆన”, ఇహాన్.
- 8 నస్తవలె యేసు, “నీను నీ దేవుణు ఆతి ప్రబుజ్నె పొగడిజి మాడిసి, వన్నిజ్ సేవకిదెజ్† ఇజి దేవుణు మాటదు రాస్త మనాద్”, ఇజి మర్రజి వెహ్తాన్.
- 9 వెన్నా వన్నిజ్ యెరూసలెమదు కూక్ ఒత్తాండ్రె, దేవుణుగుడిఁ కోసాదు నిల్వ్తాండ్రె, “నీను దేవుణు మరిసి ఇహిజ ఇబ్బెణిజ్ అడిఁగి డాట్అ.

* 4:4 4:4 ద్వితీ 8:3. † 4:8 4:8 ద్వితీ 6:13.

10-11 ఎందానిజ్ ఇహిబ, “నీజి నెగ్రెండ కాపాడెదెజ్ నీ వందిజ్ వన్ని దూతారిజ్ దేవుణు ఆడ్ర నీనాన్. నీ పాదం పణుకుదు తగ్గెండ వారు నిజి వరి కికాణిజ్ పెర్న అస్సార్*”, ఇజి దేవుణు మాటదు రాస్త మనాద్”, ఇజి వన్నిజ్ వెహ్సాన్

12 అందెజె యేసు, “నీ దేవుణుఆతి ప్రబుజ్, పరిస కిడెజ్ ఆవ్దెక్”, ఇజి దేవుణు మాటదు రాస్త మనాద్”, ఇజి మర్జి వెహ్సాన్.

13 నయ్తాన్ విజు పరీసెజ్ వీస్తాండ్రె సెగం కాలం వన్నిజ్ డిజెస్తసాహ మహాన్.

యేసు గలీలయదు వన్ని సేవణి మొదొల్నినాన్

14 యేసు దేవుణు ఆత్మ సత్తుదాన్ గలీలయ ప్రాంతమదు మర్జి సాహాన్. అయా ప్రాంతం విజు వన్ని వందిజ్ మాటిజ్ నెద్రితె.

15 వాండ్రు యూదురి మీటిజ్ ఇల్కాజ్ నేరీపిస్తాన్. విజెరె వన్నిజ్ పొగిడితార్.

యేసుజ్ నజరేతుదాన్ పేరీజనార్

16 వెనుక, వాండ్రు పిరితి వన్ని పట్టుమదు సాహాన్. అయాక నజరెతు. వన్ని అలవాటు వజ విస్తాంతి దినమదు యూదురి మీటిజ్ ఇండ్రె సాహాండ్రె దేవుణు మాట నద్విదెజ్ ఇజి నిహాన్.

17 మీటిజ్ ఇండ్రెణి పణిమణిసి వన్నిజ్ యెసయ ప్రవక్త రాస్త వుస్తకం సితాన్. వాండ్రు అయాక రెక్కిజ్ ఈహు రాస్త మనికెజ్ వన్నిజ్ దొహ్కాద్.

18-19 “ప్రబు పొక్కి దేవుణు ఆత్మ నావెట మనాన్. అందెజె వాండ్రు బీద ఆతి వరిజ్ నువార్త వెహ్సాజ్ నజి ఏరీపాటు కితాన్. తోహా ఆతి వరిజ్, “మిజి విడుదల వాతాద్”, ఇజి వెహ్సాజ్, గుడ్డి వరిజ్, “మీ కణుకుజ్ తోరనె”, ఇజి వెహ్సాజ్, నల్లితి వరిజ్ డిజిపిస్తాజ్, దేవుణు వన్ని లోకురిజ్ రక్సిస్సికాలం వాతాద్ ఇజి వెహ్సాజ్ వాండ్రు నజి పొక్త మనాన్”, ఇజి రాస్త మనికెజ్ వన్నిజ్ దొహ్కాద్.

20 యాకెజ్ నద్విజి, వుస్తకం మూక్తాండ్రె పణిమణిజ్ మహ్తా సితండ్రె బస్తాన్. మీటిజ్ ఇండ్రె మహికార్ విజెరె వన్నిజ్ డిట బేస్తార్.

21 వాండ్రు వరిజ్, “ఏలు నాను నద్వెతి దేవుణు మాటిజ్ మీరు వెహివెలెనె అయాక పూర్తి ఆతె”, ఇజి వెహ్సాజ్.

22 వారు విజెరె వన్ని వందిజ్ నెగ్గికెజ్ వెహ్సార్. వన్ని వెయ్దాన్ వాతి నెగ్గి మాటిజు బమ్మ ఆజి, “ఏండ్రు యోసిపు మరిసి గదె?”, ఇజి వెహ్సార్.

23 యేసు వరిజ్ వెహ్సాన్, “ఓ గురు, నిజి నీనె నెగెణ్ కిబ్బె అఅ’, ఇని బుద్ది మాట మీరు తవ్వెండ నజి వెహ్సాదెర్. మరి, మీరు నజి, ‘నీను కపర్నహొము ఇని పట్టుమదు కిత్తి పణిజ్ మాపు వెహవ్. అయా పణిజ్ ఇబ్బె నీ సొంత పట్టుమదుబా కిత’, ఇజి వెహ్సాదెర్.

24 ఎమేణి ప్రవక్తె బా సొంత పట్టుమదు లోకుర్ గవరం సెవర్, ఇజి నిజం నాను మీ వెట వెహ్సాన.

25 వెండ్రు, ఏలియ దినమకాజ్, ఇస్తాయేలు దేసమదు మూండ్రె పంటిజ్ ఆరు నెలిజ్ దాక పీరు రఎండ మహాద్. గొప్పు కరు వాతివలె, అబె నండో రాండి బోదెక్ మహా ఇనిక నిజమన.

26 గాని, దేవుణు ఏలియెజ్ వరి ఎయెర్బానబా పొక్ఎతాన్. సీడిను ప్రాంతమది సారెపాతు ఇని నాటోణి రాండి బోదెలిబానె పొక్తాన్.

27 అయాలెకండ్రె, ఏలియా ప్రవక్త కాలమదు, ఇస్తాయేలు దేసమదు నండ్రెండ్రె పెరికన్టం దాన్ మహార్. గాని వారు ఎయెర్బా నెగెణ్ అవెతార్. సిరియ దేసమదు మని నయమాన్ ఒరెండ్రె నెగెణ్ ఆతాన్”, ఇజి నాను మిజి వెహ్సాన. ఇజి యేసు వెహ్సాన్.

28 యా మాటిజ్ వెహివలె, యూదురి మీటిజ్ ఇండ్రె మహికార్ విజెరె వెరి కోపం ఆతార్

29 వారు నిహారె, పట్టుమదాన్ వన్నిజ్ పేర్తార్. వారు వన్నిజ్ మెటుదు ఒతార్. వరి పట్టుం అయా మెటుద్నె తయార్ కిత మనాద్. గడియ బుర్ కిజి వన్నిజ్ అర్పెజ్ ఇజి ఒతార్.

30 గాని మంది నడిమిజానె, వన్నిసరి వాండ్రు సాహాన్.

* 4:10-11 4:10-11 కీర్తన 91:11-12. § 4:12 4:12 ద్వితీ 6:16. * 4:18-19 4:18-19 యెసయ 61:1-2.

యేసు దెయిమ్మదిక్ పేరజనాన్

31 వెన్నా వాండ్రు గలిలియతి కపెర్నహుము ఇని పట్టమదు వాతాన్. విస్తాంతి దినమదు యూదురి మీటిక్ ఇండ్రై బస్తాండై లోకురిక్ నేరపిసి మహాన్.

32 వాండ్రు నెన్పిస్తి మాటిక్ వెహరి, లోకుర్ నండో బమ్మ ఆతార్. ఎందనిక్ ఇహిజ, నండో అతికారం దాన్ వాండ్రు వెహ్లాన్.

33-34 యూదురి మీటిక్ ఇండ్రై, ఒరెన్ దెయం అస్తికాన్ మహాన్. వాండ్రు, “నజరెతు వాండ్రు ఆతి యేసువా, మా వెట నిజి ఇని పణి? మజి నాననం కిదెక్ వాతిదా? నీను ఎయిదో ఇజి నాను నెన్ను. నీను దేవుణు బాణిక్ వాతి నెగ్గి వాండ్రు”, ఇజి డటం గగోల్ ఆజి వెహ్లాన్.

35 అందెజి యేసు, “అలెజి మనఅ. వినిజ్ డిసి వెల్లి రఅ”, ఇజి డటం అయా దెయిమ్మదిక్ వెహ్లాన్. నస్తివలె అయా దెయం, అది అస్తి వన్నిక్, పరి విజెరె నడియె అరిప్తాదె వన్నిక్ ఇని నస్టం కిఎండ డిస్ట సాహాద్.

36 అయావలె లోకుర్ విజెరె నండో బమ్మ ఆతార్. “అబ్బు, యాక ఎసాహి మాట. వీండ్రు దేవుణు సత్తుదాన్, అతికారమదాన్ సాన్అ ఇజి దెయిమ్మాక్ వెహ్సినాన్. అవి డిసి సాన్సినె”, ఇజి ఒరెన్దిక్ ఒరెన్ వర్గితార్.

37 వన్ని వందిక్ మాటిక్ అయా ప్రాంతమదు విజు నెద్రితె.

యేసు నండొండారిక్ నెగెండ్ కిజినాన్

38 యేసు యూదురి మీటిక్ ఇండ్రైణాక్ నిజితండై, సిమొను వన్ని ఇండ్రై సాహాన్. అయావలె వన్ని మీమసి నండో నోబు దాన్ మహాద్. దనిక్ నెగెణ్ కిఅ ఇజి వారు బతిమాలతార్.

39 అందెజి వాండ్రు దని డగ్గు సాహాండై, “నోబు సాన్అ”, ఇజి డటం వెహ్లాన్. డటం వెహ్లాన్ నోబు దనిక్ డిస్ట సాహాద్. వెటనె అది నిజితాదె, పరిక్ ముర్యాద కితాద్.

40 షాదు అర్చి మహాద్. అయావలె లోకుర్ నండో రకమ్కాణిక్ బాద ఆజి మహి పరిక్ విజెరిక్ వన్ని డగ్గు తతార్. కస్టమ్దాన్ మహి పరి విజెరె మున్ను కికు ఇడ్డి పరిక్ నెగెణ్ కితాన్.

41 యాకదె అవిండ, నండో దెయిమ్మకు, నినె దేవుణు మరిసి, ఇజి గగోల్ ఆజి నండొండారిక్ డిస్ట సాహా. వాండ్రు అలెజి మండ్రు ఇజి వన్నాక్ డటం వెహ్లాన్. వాండ్రు క్రీస్తు ఇజి దెయిమ్మకు నెస్త మహా. అందెజి వాండ్రు వన్నాక్ వర్గిఎండ కితాన్.

42 పెందాల్నై వాండ్రు సోతాండై బీడిహమ్ బూమిదు సాహాన్. లోకుర్ వన్నిక్ రెబాజి వాతార్. వన్నిక్ సుడెజిక్ వాండ్రు పరిక్ డిసి సోన్ఎండ, వన్నిక్ ఆప్ కిదెక్ సుడెజితార్.

43 గాని వాండ్రు, “నాను మహి పట్టుమాకాక్ బా దేవుణు ఏలుబడి కిని కాలం వందిక్ సువార్త వెహ్లాన్వలె. దిని వందిక్ దేవుణు నజి పోక్లాన్”, ఇజి పరిక్ వెహ్లాన్.

44 వెన్నా వాండ్రు యూదయ దేసమదు మని యూదురి మీటిక్ ఇల్లాక్ బోదిసి మహాన్.

5

యేసు సిసూరిక్ కూక్సినాన్

1 ఉండ్రి రోజు, యేసు గనెసరెతు సెరుడగ్గు నిహమహాన్. నండో లోకుర్ దేవుణు మాటిక్ వెండ్రై నెకెఆజి వన్ని మున్ను అర్చి మహార్.

2 నస్తివలె జాలెరిజు సెరు దరిద్ డిస్తి మహి రుండి డోణిక్ వాండ్రు సుడెజితాన్. అయా జాలెరిజు పరి వల్లైక్ నోరెజి మహార్.

3 వాండ్రు దని లోజి ఉండ్రి డోణిద్ ఎక్తాన్. ఆక సిమొనుతి. ఎక్తాండై దరిదాన్ కండెక్ నెక్తు ఇజి వన్నిక్ వెహ్లాన్. వాండ్రు డోణిద్ బస్తాండై నండో లోకాక్ నెస్సినీ మహాన్.

4 వాండ్రు వెహ్సా వీజితివలె, సిమోనుక్, “ఏరు నిరి మని బాన్ డోణి నడిపిన్అ. మొయెక్ అస్టెక్ మీ వల్లైక్ పిస్తిర్”, ఇహాన్.

5 అందెజి సిమొను, “ఓ బోదకినికి, రెయు విజు మాపు అరల ఆతామ్. గాని మజి ఇనికబా దోహ్లాత్. అహిజ్బా నీను వెహ్సినీ మాట వజి వల్లైక్ పోక్లా”, ఇజి వన్నిక్ వెహ్లాన్.

6 వారు అయాలెకిండే కిత్తార్. నండో మొయెజ్ అస్తార్. వరివల్లెజ్ కింజిని వజ ఆతె.

7 అయావలె వారు వేరి డోణిడీ మని, వరి జత్త కూడజి పణికిని వరిజ్, “వాజి మజి తోడు కిదు”, ఇజి కియు సయన కిత్తార్. వారు వాతార, రుండి డోణిజ్ మొయెజ్ నిస్తార్. డోణిజ్ ముడుగ్గిలెకిండే ఆతె.

8 సీమోను ఇని పేతురు యాక సుడతాండ్రె, యేసు కాల్కు ఎద్దు ముణుకుజ్ ఊరితండ్రె, “ప్రబువా, నజి డిసి సోనెఅ, నాను పాపం కితికాన్”, ఇజి వెప్తాన్.

9 ఎందానిజ్ ఇహిజ, వాండ్రుని వన్నివెలి మనికార్ విజెరి వారు అస్తి యా మొయెజ్ కొట్టు సుడతారె నండో బమ్మ అతార్.

10 అయలెకిండెనె, సీమోనువెలి కూడజి పణి కిని యాకోబు ని యోహానుబా బమ్మ అతార్. వారు జెబదయ మరిసిర్. అందెజె యేసు, “తియెల్అమా. నిసా కాలం నీసు మొయెజ్ అస్తి పణికితి. ఏలు లోకాజ్ నా సిసూరికిదెజ్ నెన్పిస్తాలె”, ఇజి సీమోనుజ్ వెప్తాన్.

11 వారు వరి డోణిజ్ సెరు ఒడ్డుదు తత్తారె, విజు డిస్తార్. వన్నివెలి సోహార్.

కుస్తురోగం ఆతివన్నిజ్ నెగెండే కిజినాన్

12 యేసు ఉండ్రీ పట్టుమ్దు మహివలె కస్తురోగం* ఇనిపెరి జబ్బు లాపుఅతి ఒరెన్ అబ్బె మహాన్. వాండ్రు యేసుజ్ సుడతెవెలె ముణుకుజ్ ఊరిజి మాడిస్తాండ్రె, “ప్రబువా, నాను నెగెండే ఆదెజ్ ఇజి నిజి మన్ను మహిజ నజి నెగెణ్ కిదెజ్ అట్టి”, ఇజి బతిమాల్తాన్.

13 అందెజె యేసు వన్నికియు సోప్పి వన్నిజ్ ముట్టి, “నజి మన్ను మనాద్, నీసు నెగెణ్ ఆత”, ఇజి వెప్తాన్. వెలినె వన్నిజ్ మహి అయా కస్తురోగం వన్నిజ్ డిస్తాద్.

14 యేసు వన్నిజ్, “ఎయె వెలిబా ఇనికబా వెప్తా. గాని నీసు తినాజ్ సాన్ని నీ ఒడోల్ పుజెరిజ్ తోరిన్అ. నీసు నెగెణ్ ఆతి వందెజ్ మోసె ముజాలె ఆడ్రసితి వజ దేవుణుదిజ్ సంత సిఅ. ఆహె నీసు నెగెణ్ ఆతి ఇజి లోకురిజ్ తోరిన్అ”, ఇజి కనితం వెప్తా పోక్తాన్.

15 గాని వన్ని వందెజ్ మాటెజ్ మరి ఒద్, నాహ్కాజ్ విజు సెద్రితె. అందెజె నండో లోకుర్ వన్నిమాటెజ్ వెండ్రెజ్, వరి కస్తుమ్కాణిజ్ నెగెణ్ ఆదెజ్ ఇజి వన్నిడగ్గు కూడజి వాజి మహార్.

16 గాని వాండ్రు, నడిమి నడిమి పార్దనం కిదెజ్ ఇజి ఎయెర్ సిల్లి బాడిడు సాన్ని మనాన్.

కిక్కు కాల్కు అర్దివన్నిజ్ నెగెండే కిజినాన్.

17 ఉండ్రీ నాండిజ్, యేసు ఉండ్రీ ఇండ్రెజిసి బోదిసి మహాన్. గలీలయ, యూద దేసమ్దు మన్ని విజు నాహ్కాణిజ్, యెరూసలెమ్దాన్ వాతి పరిసయరుని యూదురి రాలు నెస్సిన్సికార్ అబ్బె బని వెంజి మహార్. కస్తుమ్దు మన్నివరిజ్ నెగెణ్ కిదెజ్ దేవుణుసిత్తి సత్తు వన్నివెలి మనాద్.

18 నస్తివలె, కిక్కు కాల్కు అర్ది పక్కువాయు ఇని జబ్బుది వన్నిజ్, నెగెండోర్ ఉండ్రీ సాపాద్ పిండిత తత్తారె. లోఇబని యేసు ఎద్దు ఇదెజ్ నండో అరెల ఆజి మహార్.

19 అబ్బె మందలోకుర్ మహిజ్, వన్నిజ్ యేసు డగ్గు ఒతెజ్ అటెవతార్. అందెజె వారు వన్నిజ్ ఇల్లు మున్ను ఒతార్. ఒతారె, రేకం బోర్ కిత్తారె సాపదాన్ ముంద నడిమి యేసు ఎద్దు డిస్తార్.

20 యేసు వన్నిమున్ను మన్ని వరి నమకం సుడతాండ్రె, “కూలాయెన్, నీ పాపమ్కు నాను సెమిస్త మన్ను”, ఇజి వన్నిజ్ వెప్తాన్.

21 అయావలె పరిసయరు ని యూదురి రూలుజ్ నెస్సిన్సికార్ వరి లోఇ ఈహు వర్గితార్. “పిండ్రు ఎయెన్? నాను నీ పాపమ్కు సెమిస్త మన్ను ఇజి వెప్పి దేవుణు వెలి సమానం ఆజి దేవుణుదిజ్ దూసిస్తాన్. దేవుణు ఒరెండ్రె పాపమ్కు సెమిస్సికాన్ గదె”, ఇజి.

22 వారు ఒడెబితిక యేసుజ్ తెలితాద్. వాండ్రు వరిజ్, “ఎందనిజ్ మీరు అహు మీ మన్నుదు ఒడెబిజినిదెర్?

* 5:12 5:12 కిక్కుజ్ పాదమ్కాజ్ డెన్కెజ్ తెవ్జె సాని పెరిజబ్బుని ముజాలె కుస్తురోగం జబ్బు వాతిబాన్ ముట్టిజ వారు నెన్పిర్ ముజాలె కుస్తురోగం మన్నికార్ నాటో మండ్రెజ్ అక్కుసిల్లెద్ వారు పట్టుం వెల్లి మండ్రెజ్ వారు సుబ్బరం ఆకారె మటిలె అతికారెఇజి ఒడెబినార్ అందెజె, వారుపుజెరిజె డగ్గు సాస్సిసెగెండే అతార్ ఇజి పుజెరిజె వెప్తాజాన్ నాటో వాదిజ్ అనాద్. అయవలె వారు సుబ్బరం అతమనార్ ఇజి నమకం

23 యా జబ్బుది వన్నిజ్ నీ పాపముకు నాను సెమిస్త మన్న ఇజి వెహ్పాక సులునా? నీను నిజ్జి నడియ ఇజి వెహ్పాక సులునా?

24 లోకు మరిసి ఆతి నజీ లోకు పాపముకు సెమిస్తజ్ బూమి మున్ను అతికారం మనాద్ ఇజి మీరు నెస్సెజ్ వలె ఇజి వెహ్పాండ్రె, అయా కికు కాల్యు అర్ది పక్కువాయు వన్నిజ్, “నాను నిజీ వెహ్పాన, నిజ్జి సాప అసి ఇండ్రో సాన్ అ”, ఇజి వెహ్పాన్.

25 వెటెనె వాండ్రు విజెరె ముజాలె నిజీతండ్రె, వాండ్రు గూర్తి మని సాప నిక్తాండ్రె దేవుణుదిజ్ పొగ్డిజి ఇండ్రో సాహాన్.

26 వారు విజెరె నండ్రో బమ్మ ఆతారె, దేవుణుదిజ్ పొగ్డిజితారె. వారు దేవుణుదిజ్ నండ్రో తియెల్ ఆజి, “అబ్బ! మాటు నేండ్రు నండ్రో బమ్మ ఆతి పణిజ్ నుడతాట్”, ఇజి వెహ్పాన్.

లేవి ఇన్ని ఒరెన్ వన్నిజ్ కూక్కినాన్

27 యాక కిత్తి వెన్నా, యేసు సోతాండ్రె, లేవి ఇని ఒరెన్ పన్ను పెర్నివన్నిజ్ నుడతాన్. వాండ్రు పన్ను పెర్ని వరి అపినుదు బస్త మహాన్. యేసు వన్నిజ్, “నీను నా సిసూడు అఅ. నా వెటె రఅ”, ఇజి వెహ్పాన్.

28 లేవి విజు డిస్తాండ్రె, నిజ్జి వన్ని వెటె సాహాన్.

29 వెనుక లేవి యేసు వందిజ్ వన్ని ఇండ్రో ఉండ్రీ పెరి విందు కితాన్. పన్ను పెర్నికారన్ మరి నండ్రోడార్ వరి వెటె ఉండ్రీ బస్తాన్.

30 అయావలె పరిసయేరు ని వరి జటుద్ మని యూదురి రూలుజ్ నెస్పిస్సికార్ యేసు సిసూరిజ్, “ఎందనిజ్ మీరు పన్ను పెర్నివరివెటె, మరి సెఇ వరివెటె ఉణిజి తింజినిదెర్”, ఇజి మెరొ ఆతారె.

31 అందెజి యేసు వరిజ్, “నెగెండ సిల్లి వరిజి డాక్టరు కావాలి. నెగెండ మన్నివరిజ్ ఎందనిజ్లు మరి డాక్టరు.

32 నాను పాపం కిజిని వరిజ్ కూక్కి, వరి పాపముకు వారు ఒమ్మకొడిజి డిసిపిసిని వందిజ్ వాత మన్న. మాపు నీతినిజాయితి మనికాప్ ఇజి ఒడెబిని వరిజ్ కూక్కె రవి”, ఇజి వెహ్పాన్.

ఉపాస్ వందిజ్ యేసుజ్ వెన్ బాజినార్

33 అయావలె, పరిసయేరుని వరి జటుద్ మని యూదురి రూలు నెస్పిస్సికార్ వన్నిజ్, “యోహాను సిసూర్ డిసిడిస్ ఎండ ఉపాస్ కిజి పార్లనం కిజినార్. అయలెకెండెన్ పరిసయురు సిసూర్ బా. గాని నీ సిసూర్ ఉణిజి తింజి మంజినార్”, ఇజి వెహ్పాన్.

34 అందెజి యేసు, “పెండ్లి దజడః పెండ్లి కూలెజవెటె మన్నివెలె వారు ఉపాస్ కిజినారా?

35 పెండ్లి దజడఃజ్ వరి నడిమిహాన్ ఒని రోస్సు వాలెలె. అయావలె వారు ఉపాస్ అయా రోస్కాజ్ మంజినార్”, ఇజి వెహ్పాన్.

36 వాండ్రు వరిజ్ కతవజ ఉండ్రీ నెస్పిస్తాన్. “ఎయెన్ బా కొత్త సొక్కుదాన్ ఉండ్రీ ముక్కు కిసి పడాఃయి దనిజ్ పొక్ ఎన్. అయాలెకెండె కితిజ, వాండ్రు కొత్త సొక్కు కిసిపిస్తాన్. కింజితి కొత్త ముక్కు పడాఃయి దనిజ్ తగ్గిపిద్.

37 మరి, ఎయెన్ బా కొత్త ద్రాక్కుకల్లు పడాఃయి తోలు సన్నిదు వాక్కిన్. అయాలెకెండె వాండ్రు వాక్కిజి కొత్త ద్రాక్కుకల్లు పొబువాజి అయా తోలు సన్ని పెడెల్ నాద్. ద్రాక్కుకల్లు విజు వాజ్ సనానాద్. సన్నిపాడానాద్.

38 అందెజి కొత్త ద్రాక్కుకల్లు కొత్త తోలు సన్నిదు వాక్కిజ్ వలె.

39 ఎయెన్ బా పడాఃయి ద్రాక్కుకల్లు ఉటివెనుక కొత్తక కోరిఎన్. ఎందనిజ్ ఇపొజి, ‘పడాఃయి కెగ్గిక’, ఇజి వెహ్పాన్”.

6

1 ఉండ్రీ విస్తాంతి దినమ్దు యేసుని వన్ని సిసూర్ పంట గుడ్డెదాన్ సొన్ని మహార్. అయావలె వన్ని సిసూర్ సెరెక్ తెహ్పారె, వరికిదాన్ సులుసి, తింజి మహార్.

2 నన్నివలె నెగెండార్ పరిసయేరు, “ఎందనిజ్ మీరు దేవుణు మోసెజి సీతి రూలుజ్ తప్పినిపణి విస్తాంతి దినమ్దు కిజినిదెర్?”, ఇజి వెన్ బాతారె.

3 అయావలె యేసు, “దావీదురాజుని వన్నివెట మహికార్, బజ కట్టివెలె, ఇనిక కితాండ్రొ ఇజ మీరు దేవుణుమాటదు ఎనెజ్బా నద్విఇతిదెరా?

4 వాండ్రు ఇనిక కితాన్ ఇహిజ, దేవుణుగుడిఁదు డుగితాండ్రె దేవుణు ఎద్రు ఇడ్డి రొట్టెజ్ లాగితండ్రె తిహాన్. పుజెరిజ్ తప్ప మరి ఎయెరబా అయాకెజ్ తిండ్రెజ్ ఆవిద్. గాని వాండ్రు తిహాండ్రె వన్నివెట మన్నివరిజ్బా సిత్తాన్.

5 అందెజె లోకుమరిసి ఆతి నజి విజు వన్యాజ్ మున్ను అతికారం మనాద్. మరి, విస్తాంతి దినమదు ఇనిక కిదెజ్ ఇజ లోకాజ్ వెస్తెజ్బా అతికారం మనాద్”, ఇజ వరిజ్ వెప్తాన్.

6 ఉండ్రీ నాండిజ్ విస్తాంతి దినమదు, యూదురి మీటిజ్ కిని ఇండ్రొ సోహండ్రె, నెస్సిసి మహాన్. అబ్బె ఉణెరె కియు అర్దికాన్ ఒరెన్ మహాన్.

7 పరినయరు ని యూదురి రూలుజ్ నెస్సిస్సికార్, యేసుజ్ ఇన్ని దనిజ్బా నేరం మొప్పెజ్ ఇజ నుడెజు మహార్. అందెజె, యేసు యా జబుది వన్నిజ్ విస్తాంతి దినమదు నెగెణ్ కినాండ్రొ ఇజ బాగ నుడెజు మహార్.

8 అహిజ, యేసు వారు ఒడెఃబిజనిక నెస్తాండ్రె, కియు అర్ది వన్నిజ్, “నీను వాజి విజెరె నడిఃమి నిల్అ”, ఇజ వెప్తాన్. అయావలె వాండ్రు నిజితండ్రె అబ్బెనిహాన్.

9 అయావలె యేసు వరిజ్”, నాను మిజి వెన్బాజను, దేవుణు మోసెజ్ సీతి రూలుజ్ వజ, విస్తాంతి దినమదు నెగ్గి పణిజ్ కిదెజా, సెఇ పణిజ్పణి కిదెజా? పాణమదిజ్ నిల్పెజా, పాణమదిజ్ అర్దిపెజా?”, ఇజ వెన్బాతాన్.

10 వెన్బాతాండ్రె వరిజ్ విజెరిజ్ బస్తాండ్రె, అయా కియు అర్ది వన్నిజ్, “నీ కియు నపల్అ”, ఇజ వెప్తాన్. వాండ్రు ఆహా కితాన్. వన్ని కియు నెగెణ్ ఆతాద్.

11 అయావలె వారు వెర్రి కోపమ్దాన్ నిండ్రెతారె, యేసుజ్ ఇనిక కిదెజ్ ఆనాద్ ఇజ ఒరెన్దిజ్ ఒరెన్ వర్దితార్.

పన్నెండు మణిసిర్ సిసూర్

12 ఆ దినమ్కాజ్ ఉండ్రీ నాండిజ్ యేసు పార్దనం కిదెజ్ ఇజ గొరొత్ సోహాన్. సోహాండ్రె ఆ రెయ్తా విజు దేవుణుదిజ్ పార్దనం కిత్తాన్.

13 పెందాల్ అతివెలె వాండ్రు వన్ని సిసూర్జ కూక్తాండ్రె, వరిలోఇ పన్నెండు మణిరిజ్ ఏరపాటు కిత్తాన్. వరిజ్ అపొస్తుడు ఇజ కూక్తాన్.

14-16 వీరు ఎయెర్ ఇహిజ, పేతురు ఇజి వాండ్రు పేరు ఇడ్డి సిమెను, వన్ని తంబెర్ని ఆతి ఆండ్రెయ, యాకోబు, యోహాను, పిలిపు, బర్దలోమాయి, మత్తాయి, తోమా, అల్పాయి మరిసి ఆతి యాకోబు, యూదయ దేసం వందిజ్ ఉసార్ ఆజిని సిమోను*, యాకోబుజ్ మరిసి ఆతి యూద, ఇస్కరియొతు యూద. యా ఇస్కరియొతు యుదనె, వెన్యా యేసుజ్ యూదురు అతికారిజ కీదు ఒవజెప్తికాన్.

17 వాండ్రు యా పన్నెండు మణిసిర్ సిసూర్వెట డిఃగిజి వాతండ్రె, ఉండ్రీ బయిలుదు నిహాన్. వన్ని సిసూరు నండొండార్, యూదయ దేసమదు మని విజు నాహ్కణికార్, యెరూసలెమ్దాన్, నమదరం పడఃకామ్మని తూరు, సీదోను పట్టుమ ప్రాంతమ్కాజ్వాతి నండొ లోకుర్ అబె మహార్. వారు వన్ని మాటజ్ వెండ్రెజ్, వరిజ్ మన్ని కష్టమ్కు సోపె అదెజ్ ఇజి వాతార్.

18 దెయమ్కు అన్ని నండొ బాద్ ఆజి మహికార్ నెగెణ్ ఆతార్.

19 దేవుణు సత్తు వన్నిబాణిజ్ వాజి విజెరె నెగెణ్ ఆజి మహార్. అందెజె లోకు విజెరె వన్నిజ్ ముట్టెజ్ ఇజి ఆన ఆతార్.

20 అయావలె వాండ్రు వన్ని సిసూర్జ నుడెఃతాండ్రె, ఈహు వెహ్నినాన్. “బీదదికార్ ఆతి మీరు గొప్ప వారు. ఎందనిజ్ ఇహిజ, దేవుణు మిజి ఏలుబడిః కిజినాన్.

21 ఏలు బజ సాజిని మీరు గొప్ప వారు. ఎందానిజ్ ఇహిజ, దేవుణు మిజి కావాలికిజ్ మీ మన్ను నిండ్రు సీనాన్. యేలు అడఃబాజిని మీరు గొప్ప వారు. ఎందనిజ్ ఇహిజ, మీరు సిక్విదెర్లె.

* 6:14-16 6:14-16 రోమది ఏలుబడిఃదాన్ యూదయ దేసమదిజ్ విడుదల కిదెజ్ ఉసార్దాన్ నుడిజిని యూదయ నజం మనాద్. అయానజమ్దికాన్ ఒరెన్ సిమోను

22 లోకు మరిసి అతి నజీ నమిత్తి వందిజ్ లోకుర్ మిజి దూసిసి కేట కినార్. నిందెజ్ మొప్పి నీను సెజక ఇజి వెహ్పొ నెక్కు పొక్కార్. అయావలె మీరు గొప్పు వారు.

23 నిన్ని కస్తమేకు వానివలె సరద ఆజి డాట్తు. ఎందనిజ్ ఇహిజ, దేవుణు మంజిని బాడిదు మిజి మన్ని వలెతమేకు గొప్పు నండో మనె. యా లెకెండెనె, మిజి బాద కిజిని విరి అనిసిర్, వరి కాలమేదు మహి ప్రవక్తెజి బాద్ద కిత్తార్.

24 గాని, ఓ ఆస్తిమనికిదెరా, అబాయా మిజి ఎసా గొప్పు బాదెజ్ వానెలె. ఎందానిజ్ ఇహిజ, మిజి విజి సుకుం దొహ్క మనాద్.

25 ఏలు పొట పంజు ఉణిజినికిదెరె, అబాయా మిజి ఎసా గొప్పు బాదెజ్ వానెలె. మీరు బజి సానిదెరెలె. యేలు సిక్కినికిదెరె. అబాయా మిజి ఎసా గొప్పు బాదెజ్ వానెలె. మీరు దుకం కిజి అడజిబానిదెరెలె.

26 లోకు విజెర మీ వందిజ్ నెగ్గికెజ్ వెహ్పొ వెలె, అబాయా మిజి ఎసా గొప్పు బాదెజ్ వానెలె. ఎందానిజ్ అయలెకెండెనె వరి అనిసిర్ అబద్దం వర్గిని ప్రవక్తెజిబా కిత్తార్.

ప్రేమ వందిజ్ వెహ్పొనాన్

27 నా మాటెజ్ వెంజిని మిజి నాను వెహ్పొన, మీ పగాతివరిజ్ ప్రేమిస్తు. మిజి దూసిస్సివరిజ్ నెగ్గికెజ్ కిదు.

28 మిజి సాయెవ్ సీని వరిజ్, “దేవుణు మిజి నెగ్గికెజ్ సిపిన్”, ఇజి దీవిస్తు. మిజి బాదెజ్ కిని వరి వందిజ్ పార్దనం కిదు.

29 ఎయెనబా మిజి ఉండ్రె లెపాద్ డెఱితిజి, మరి ఉండ్రె లెప బా తోరిస్తు. ఎయెనబా మీరు వ్డెఱితి మని సాల్య ఒతిజి, వన్నిజ్ మీ సొక్కబా సిఅ.

30 మిజి లొన్సువరిజ్ విజెరిజ్ సీదు. మీ సొంతతిక పెర్రి ఒసిని వరిజ్ ఆక మరి లొస్కాట్.

31 లోకుర్ మిజి ఎలాగ కిదెజ్ ఇజి మీరు కోరిజినిదెరొ అయాలెకెండె మీరు వరిజ్ కిదు.

32 మిజి ప్రేమిస్సివరిజె మీరు ప్రేమిస్తిజి, దేవుణు మిజి ఇనాయం సీనాన్ ఇజి ఒడిఱిజినిదెరా?. పాపం కినికార్బా వరిజ్ ప్రేమిస్సి వరిజ్ ప్రేమిస్సార్.

33 మిజి నెగ్గికెజ్ కినివరిజె మీరు నెగ్గికెజ్ కితిజి, దేవుణు మిజి ఇనాయం సీనాన్ ఇజి ఒడిఱిజినిదెరా? పాపం కినికార్బా అహా కిజినార్.

34 అప్పు మరజి సీనార్ ఇజి నెస్సివరిజె మీరు సితిజి, దేవుణు మిజి ఇనాయం సీనాన్ ఇజి ఒడిఱిజినిదెరా? పాపం కినికార్బా అహా కిజినార్. వారు సితికెజ్ విజి మరజి సీనార్ ఇజి ఒడిఱిజి పాపం కిజిని వరిజ్ సీజినార్.

35 గాని మీరు మీ పగ అతి వరిజ్ ప్రేమిస్తు. వరిజ్ నెగ్గికెజ్ కిదు. మరజి సీనార్ ఇజి ఆన సిల్లెండ, అప్పు సీదు. అయావలె మిజి నండో ఇనాయమేకు ఆనెలె. మీరు విజు దనిజ్ అతికారం మని దేవుణు మరిసిర్ అనిదెరె. ఇహిజ, మీరు వాండ్రు కినిలెకెండె కినిదెరె. ఎందనిజ్ ఇహిజ, దేవుణు మేలుదిజ్ నెన్ ఇవరిజ్ బా సెఇ వణిజ్ కిని వరిజ్ బా దరు తోరిస్సాన్.

36 మీ బుబ్బు అతి దేవుణు ఎలాగ కనికారం ఆతికాండ్రొ అయావజి మీరుబా మండ్రు.

తీర్పు కిదెజ్ ఆవిద్

37 ఒరెన్ వన్ని మున్సు వెహ్కాట్. అయ లెకెండె దేవుణు మీ మున్సు వెహ్ఎన్. లోకు కిని వన్కాజ్ మీరు తీర్పు కిమాట్. అయాలెకెండె మీ మున్సు దేవుణు తీర్పు కిఎన్. లోకుర్ మిజి బాదెజ్ కితిజి, మీరు మరజి కివిండ వరిజ్ డిఱిస్తు. అయాలెకెండె దేవుణు మిజి డిఱిస్సాన్లె.

38 మహి వరిజ్ సీదు. దేవుణు మిజి సీనాన్లె. మిజి నండో సీనాన్లె. తిగ్జి, కుదిలిసి, వజ్జి సాని లెకెండె మీ ఒడిఱిద్ సీనాన్లె. మీరు కొలిజి సితివజనె మిజి దొహ్కాద్లె.

39 నస్సివలె వాండ్రు కత వజి యాక నెన్ పిస్సాన్. అయాక ఇనిక ఇహిజ, “ఒరెన్ గుడ్డి వన్నిజ్ మరి ఒరెన్ గుడ్డి వాండ్రు సరి తోరిస్సెజ్ అట్నాండ్రా? తోరిస్తిజి, వారు రిఎరబా గాతదు అర్పార్గదె?

40 సద్వినికాన్ నెన్ పిన్ ని వన్నిమున్సు వెరికాన్ ఆవిన్. గాని సదు పూర్తి నెస్సికాన్ ఎయెనబా వన్నిజ్ నెన్ పిస్తి వన్నివజి మంజినాన్.

41 మీ కణకాదు మన్ని తూలం నన్నిక నుడేవిండ మీ తంబెరిజ కణకాద్ మన్ని కాసరాదిజ్ ఎందానిజ్ బేసిని?

42 నీ కణకాదు మన్ని తూలం నన్నిక లాగింద, మీ తంబెరిజ్, 'ఓ తంబెరి నీ కణకాదు మన్ని కసరాదిజ్ లాగిన', ఇజ ఎలాగ వెహ్లాజ్ ఆనాద్. వేసం కినికిదెర, మీ సొంత కణకాదు మన్ని తూలం ననిక ముజాలె లాగిదు. అయావలె మీ తంబెరిజ కణకాద్ మన్ని ఇజిరి కసరాదిజ్ నెగిండ్ సుడిజి లాగిదెజ్ అట్టి.

43 నెగ్గి మరాత్ నెజ పట్టు అనీఉ. అయాలెకిండ్ నెజ మరాత్ నెగ్గి పట్టు అనీఉ.

44 విజు మరెకాజ్ బా పట్టు సుడిజి నెస్తెజ్ ఆనాద్. ఎయెరబా బొడె: పట్టు సాప్పు తువెజాణిజ్ కొయివెర. అయాలెకిండ్ ద్రాక్కు పట్టు బా సాప్పు లటదాన్ కొయివెర.

45 నెగ్గి మన్ను మన్నివన్నిజ్ కూలిజ్ కొట్టు కిత్తి మన్నిలెకిండ్ వన్ని మన్నుదు నెగ్గికిజె మంజినె. అందెజె వన్ని వెయిదాన్ నెగ్గి మాటిజ్ వానె. నెజ మన్ను మన్నివన్నిజ్ నెకెకిజె మంజినె. అందెజె వన్ని వెయిదాన్ నెజ మాటిజ్ వానె.

46 నాను వెహ్లా మాటిజ్ వజ మీరు కివిండ మరి మీరు ఎందనిజ్ ప్రబువా, ప్రబువా ఇజి నజీ కూక్కినిదెర్?

47 నా డగ్గువాజి నా మాటిజ్ వెంజి అయావజ కినికాన్ ఎయెరిజ్ పొలిత మనాంత్రి ఇజి నాను నెన్ పిసిన.

48 వాండ్రు పునాది నిరీడ్ కార్సి నట్టుమున్ను పునాది కితాంత్రి ఇల్లు తొహ్ని వన్ని లెకిండ్ మనాన్. పెరి గడ్డ వాతాద్. ఇల్లుదిజ్ పెరి గడ్డ డెయితిజ్ బా అది అరవతాద్. ఎందనిజ్ ఇహిజ, అది నెగ్గెండ్ తొహ్ అత మనాద్.

49 గాని నా మాటిజ్ వెంజిబా అయావజ కికాన్, బూమి మున్ను పునాది పొక్ ఎండ ఇల్లు తొహ్ని వన్ని లెకిండ్ మనాన్. పెరిగడ్డ డెయితిజ్ నెజెవె అయా ఇల్లు అర్తాద్. ఇల్లు పూర్తి పాడాతాద్.

7

1 వాండ్రు వెహ్లాజ్ మన్నిమాటిజ్ విజు లోకురిజ్ వెన్ పిసి వీస్తాంత్రి, కపెర్నూము ఇన్ని పట్టుమదు వాతాన్.

2 అబ్బె రోమ నయనమిదిజ్ నదాతివతి* ఒరెన్ మహాన్. అతికారిజ్ నంణో ఇస్తం ఆతి ఒరెన్ వెట్టివణి కినికాన్ వన్నిజ్ మహాన్. వాండ్రు జబు లావు అతాదె సాదెజ్ డగ్గు అత మహాన్.

3 అయా అతికారి యేసు వందిజ్ వెహంత్రి, నెగిండార్ యూదుర్ పెద్దెలిజ వన్ని డగ్గు పొక్తార్. ఎందనిజ్ ఇహిజ, వాండ్రు వాజి వన్ని వెటి పణి కిని వన్నిజ్ నెగెణ్ కిదిజ్ ఇజి.

4-5 వారు వన్ని డగ్గు వాతారె, "యా అతికారి మా లోకాజ్ నంణో ప్రేమిస్తాంత్రి మజీ మీటిజ్ కిదిజ్ ఇజి ఇల్లు తొహ్ని నీతాన్. అందెజె నీను వాజి వన్ని వెటి పణిమణిసిజ్ నెగెణ్ కిదిజ్ వాండ్రు తగ్గికాన్", ఇజి మరి మరి బతిమాల్తార్.

6 అందెజె యేసు పరివెట సొహాన్. వాండ్రు ఇల్లు డగ్గు వాతాన్. అయావలె నతాదివ కూలిజ, "మీరు యేసు బాన్ సొన్ని ఈహు వెహ్తు, "ప్రబువా, నీను వందమా. నా ఇంత్రి నీను వాదిజ్ నాను ఏవటితికాన్ ఆవ్.

7 గాని నెగెణ్ అత ఇన్ని నీ మాటదాన్ నా వెట్టిపణి మణిసి నెగిండ్ ఆనాన్లె, ఇజి నాను నెసిన.

8 ఎందానిజ్ ఇహిజ, నా మున్ను అతికారం మనికార్ మనార్. నా అడిగి ఉడ్డం కినికార్ మనార్. నాను ఒరెన్ వన్నిజ్ సొన్ల ఇహిజ సొనాన్. మరి ఒరెన్ వన్నిజ్ రల ఇహిజ, వానాన్. నా పణిమణిసిజ్ యాక కిల ఇహిజ కినాన్", ఇజి వెహ్లాంత్రి పొక్తార్.

9 యేసు యా మాటిజ్ వెహంత్రి, వన్ని వందిజ్ బమ్మ ఆతాన్. వాండ్రు వన్ని వెట వాతిమన్ని లోకుదరిజ్ ముహ్లాంత్రి, "అబ్బె, ఇస్తాయెలు లోకుర్ లొఇబా విన్నిజ్ మన్ని నమకం లెకిండ్, నమకం మని ఒరెన్ వన్నిజ్ బా నాను నుడేవత ఇజి మీ వెట నాను వెహ్నిన", ఇజి వెహ్లాన్.

10 వన్నిబాన్ వాతివరిజ్ యేసు ముహ్లా పొక్తాన్. వారు ఇంత్రి సొహారె, నెగెణ్ ఆతి వెటిపణి మణిసిజ్ నుడేతార్.

సాతి వన్నిజ్ బత్తిస్తాన్

* 7:2 7:2 వంద విధైం కినివరిజ్ నడిపిసినికాన్.

11 యాక కితి వెన్నా, యేసు నాయి ఇని పట్టుమీదు సొన్ని మహాన్. వన్ని సినూర్ ని మంద లోకు వన్నివెట కుండేజి సొన్ని మహాన్.

12 వాండ్రు పట్టుం వెల్గు డగ్రు వాతివెలి సాతికాన్ ఒరెన్ వన్నిజ్ సోప్తారె, సెగొండార్ పిండిజి ఒని మహాన్. సాతికాన్ అయేసిజ్ ఒరెండ్రె మరిసి. అది ముండ బోదెలి. పట్టుమీది మంద లోకుర్ దన్నివెట మహాన్.

13 ప్రబు ముండ బోదెల్దిజ్ సుండేతివెలి, వన్ని పాణం నొతాద్. అడేబామా', ఇజి దన్నిజ్ వెప్తాన్.

14 వాండ్రు డగ్రు వాతండ్రె, జజాద్ ముట్టిజ్, పిండిజి ఒని మహికార్ నిహార్. యేసు సాతి వన్నిజ్, “ఒ దబడే, నాను నిజి వెప్పిన, నిజ్ అ ఇజి”, ఇజి వెప్తాన్.

15 అయావలి సాతికాన్ నిజ్ జి బస్తాండ్రె, వర్గిదెజ్ మొదొల్స్తాన్. యేసు, వన్నిజ్ అయేసిజ్ ఒవజెప్తాన్.

16 వారు విజెరి బమ్మ అజి తియెల్ ఆతార్. “ఒరెన్ పెరి ప్రవక్త మా నడిమి వాతాన్. వన్ని లోకురిజ్ సాయం కిదెజ్ దేవుణు వాతాన్”, ఇజి వెప్తారె దేవుణుదిజ్ పొగిడితార్.

17 యేసు వందిజ్ యా మాటిజ్ యూదయ దేసెం ని డగ్రు మని ప్రాంతమకాజ్ విజా సెద్రితె.

యేసుని యోహాను సినూరు వర్గిజనార్.

18-19 బాప్తినం సీని యోహానుజ్ సినూర్ యా జర్గితి పణిజి వందిజ్ యోహానుజ్ వెప్తార్. నస్తవలి వాండ్రు వరి లోఇహాన్ రిపెర్ సినూర్ జి కుక్తాండ్రె, “వానికి సీనెనా? సిలిజ, మాపు మరి ఒరెన్ వందిజ్ ఎద్రు సుండేదెజా?”, ఇజి ప్రబుజ్ వెన్బాదెజ్ యేసుడగ్రు పోక్తాన్.

20 వారు యేసుడగ్రు వాతారె, “సీనెనా వాజినికి? సిలిజ మాపు మరి ఒరెన్ వన్నిజ్ ఎద్రు సుండేదెజా? ఇజి వెన్బాదెజ్ బాప్తినం సీని యోహాను మజి నీ డగ్రు పోక్తాన్”, ఇహార్.

21 అయావలిసె, యేసు జబ్బుదివరిజ్ బాదదాన్ మన్ని వరిజ్, దెయమకు అస్తి వరిజ్ నండొండారిజ్ నెగెణ్ కితాన్. నండొ గుడ్డిది వరిజ్ సూణిలెకెండొ కితాన్.

22 అందెజె వాండ్రు వన్నిడగ్రు వాతివరిజ్, “గుడ్డిదికార్ సుండే ఆజినార్. సొటదికార్ నడిజినార్. కన్నుమదికార్ ఇని పెరిజబ్బు మన్నికార్ నెగెణ్ ఆజినార్. బొయిరదికార్ వెంజినార్. సాతికార్ నిజెఆజినార్. బీదాతివరిజ్ సువార్త వెహెఅజినాద్. ఇజి యాలెకెండొ మీరు సుండేతికెజ్, వెంజినికెజ్ మర్చి సొన్ని యోహానుజ్ వెప్తారు.

23 నా మున్ను నమకు డిసెంఎండ మంజినికాన్ దేవుణు సీని దీవనమకు మంజినికాన్ అనాలి”, ఇజి వరిజ్ వెప్తాన్.

24 యోహాను సినూర్ సొహి వెనుక, యేసు యోహాను వందిజ్ మంద లోకు వెట ఈహు వెప్తాజ్ మొదొల్స్తాన్. “ఇనిక సుండేదెజ్ మీరు బీడిమ్బూమి ప్రాంతమదు సొహిదెర్? గాలిదిజ్ కద్దిజిని గడ్డిదిజ్ సుండేదెజా?”

25 సిల్లిజ, మరి ఇనిక సుండేదెజ్ సొహిదెర్? మెతాని సొక్కెజ్ తోడిగితి మని ఒరెన్ వన్నిజ్ సుండేదెజా? సిల్లి, నండొ దర మన్ని సొక్కెజ్ తోడిగిజి, సుకు బత్తినికార్ రాజారి ఇల్కాజ్ మంజినార్.

26 అపాజి, మీరు ఇనిక సుండేదెజ్ సొహిదెర్? ఒరెన్ ప్రవక్తేనా? ఒబ, ఒరెన్ ప్రవక్త మున్ను పెరివన్నిజ్ సుండేదెజ్ సొహిదెర్ ఇజి నాను మిజి వెప్పిన

27 విన్నివందిజ్ దేవుణు మాటదు ఈహు రాస్త మనాద్, “ఇదిలో, నాను నా కబ్రుతనివన్నిజ్ నీ ముజాల పోక్తిన వాండ్రు నీ ముజాల నీ సరి నెగెణ్ కినాన్†”.

28 బోదెకాజ్ పుట్టి వరిలొఇ యోహాను ఇంక పెరికాన్ మరి ఎయెన్బా సెలెన్. గాని దేవుణు ఏలుబడికి కిని లోకుర్ లొఇ తగిని కొటికాన్ యోహాను మున్ను పెరికాన్ ఇజి నాను మిజి వెప్పిన”.

29 యేసు వెప్తాకెజ్ వెహారె లోకుర్ విజెరి పన్ను పెర్నికార్బా దేవుణు కిజినిక విజా నాయమ్దానె కిజినాన్ ఇజి లోకుర్ ఎద్రు ఒప్పుకొటార్. ఎందనిజ్ ఇహిజ, వారు యోహాను బాణిజ్ బాప్తినం లాగె ఆత మహాన్.

30 గాని పరిసయెరుని యూదురి రూలు నెస్పిస్సికార్ యోహాను సీని బాప్తినం లాగె అవెతార్. వారు వరి వందిజ్ దేవుణు ఎతు కితి సజతి నెక్క పోక్తార్.

31 యా తరమేది లోకాజ్ నాను ఇన్ని దని దనటాన్ పోల్సి వెప్తాజ్? వారు ఇని దనిజ్ పోలిత మనార్?

32 వారు, సతాదు బసి మంజి పెండ్లి ఇంట్లో ని సాతి ఇంట్లో జర్జిని దని వందిజ్ ఎత్తు కిజి కర్రజిని కొడ్డోరిజ్ పొలిత మనాద్. అయా కొడ్డోరి ఒరెనదిజ్ ఒరెన్ కూకె ఆజి ఈహు కర్రజినినార్. “మూపు పిరుడిః ఊహ్వాన్ గాని మీరు కర్రజిఇతిదెర్. మూపు సాతి ఇంట్లోః పాటిజ్ పార్టాప్ గాని మీరు అడఃబాఇతిదెర్”.

33 ఎదానిజ్ ఇహిజ, బాప్తినం సీని యోహాను మాముల్ బోజనం ఉణిజి, ద్రాక్కు కడు ఉణెఎండ వాతాన్. అందెజి మీరు, “వినిజ్ దెయం అస్తాద్”, ఇజి వెప్పినిదెర్.

34 లోకు మరిసిఆతి నాను ఉణిజి తింజి వాజినాన్. అందెజి మీరు ఇదోలీ వీండ్లు టిండి కకురితికాన్, సోస్టికాన్, పన్ను పెర్నివరిజ్ పాపం కినివరిజ్ కూలాయెన్ ఇజి వెప్పినిదెర్.

35 గాని దేవుణుబాణిజ్ వాతి గెణం మనికార్ అయా గెణం నిజమాతిక ఇజి వరి విజా నెగ్గి పణిబాణిజ్ రుజుప్ కిజినార్.

పాపం కిత్తి బోదెల్ దిజ్ సెమిసినాన్

36 పరిసయ్యరు లోజ ఒరెన్ వన్నివెట బోజనం కిదెజి యేసుజ్ కూక్తాన్. అందెజి యేసు పరిసయ్యరు ఇంట్లో సాహాండ్రె, వన్ని వెట బోజెనమీదిజ్ బస్త మహాన్.

37 ఆ నాటో పాపం కిజి మహి ఉండ్రె బోదెలి మహాద్. యేసు పరిసయ్యరు ఇంట్లో బోజెనమీదిజ్ బస్త మహాన్ ఇజి నెస్తాదె, నూనాజ్ పణుకుదాన్* తయార్ కితి ఉండ్రె సీసాదు నెగ్గి వాసనం సీని నూన తత్తాద్.

38 యేసు, కాల్యు వెన్యా మహ్తాండ్రె బస్త మహాన్కాక అది వెనక వన్ని పాదమక డగ్గు నిహాద్. నిహాదె అడఃబాజి మహాద్. అది దన్ని కణెరదాన్ వన్ని పాదమకాజ్ ఊత్తాదె దని కొప్పుదాన్ తేలతాద్. వన్ని పాదమకాజ్ ముదు కితాదె వాసనం సీని జటమామసి నూనె రాస్తాద్.

39 వన్నిజ్ కూక్తి పరీసయ్య వాండ్రు యాక సుడఃతాండ్రె, వీండ్లు నిజం ఇక ఒరెన్ ప్రవక్త ఇహిజ, వినిజ్ ముట్టి బోదెలి ఎయిదో ఎలాగ మర్తికాదో ఇజి నెస్తాన్ మరి. ఎందనిజ్ ఇహిజ, ఇది పాపం కినికాద్, ఇజి మన్నుదు ఒడిఃబితాన్.

40 అందెజి యేసు, “ఓ సెమోను నీవెట ఉండ్రె మాట వెప్తాజ్ మనాద్”, ఇజి వన్ని వెట వెప్తాజ్, “బోదెకినికి వెహాఅ”, ఇహాన్.

41 అయావలి యేసు”, ఒరెన్ అప్పు సీతి వన్నిజ్ రిఎర్ అప్పు లొస్టికార్ మహార్. వరి లోఇ ఒరెన్ అయ్యదు వందెజ్ వెండి రుపాయిజు మరి ఒరెన్ యాబయి వెండి రుపాయిజు సీదెజ్ మనాద్.

42 అప్పు తిరస్టెజ్ వరిజ్ డబ్బు సిల్లెద్. అందెజి వరిజ్ రివిరిజ్ బా డబ్బు లోన్ ఎండ డిఃస్తాన్. ఏలు, విరి లోఇ ఎయెన్ వన్నిజ్ నండ్లె ప్రేమిస్సాన్? ఇజి వెనబాతాన్.

43 అందెజి సెమోను, “వాండ్రు ఎయెరిజ్ నండ్లె సితండ్రె, లోన్ ఎండ డిఃస్త సితాండ్రె వాండ్రె నండ్లె ప్రేమిస్సాన్, ఇజి నాను ఒడిఃబిజన”, ఇహాన్. అందెజి యేసు, “నీను నెగండె ఎత్తు కితిదె వెప్తా”, ఇహాన్.

44 ఇహాండ్రె, ఆ బోదెల్ దరెల్ సుడఃజి సెమోనుజ్ ఈహు వెప్తాన్. “యా బోదెల్ దిజ్ నీను సుడఃజిని గదె. నాను నీ ఇంట్లో వాత. నీను నా పాదమక ఊరపాదెజ్ ఏరు సిఇతి. గాని ఇది దని కణెరదాన్ నా పాదమక ఊత్తాదె, దని కొప్పుదాన్ తేలతాద్.

45 నీను నజి ముదు కిజి డగ్గు కిఇతి. గాని ఇది నాను వాతి బాణిజ్ అసీ నా పాదమక ముదు కిజినె మనాద్.

46 నీను నా బురాదు నూనె రాన్ ఇతి. గాని ఇది నా పాదమకాజ్ వాసనం సీని నూనె రాస్తాద్.

47 అది నండ్లె ప్రేమిస్సాద్. అందెజి దని నండ్లె పాపమక దేవుణు సెమిస్సాన్, ఇజి నాను నీ వెట వెప్పిన్. ఎయెరిజ్ దేవుణు తక్కు సెమిస్స మనాండ్రె, వాండ్రు తక్కునె ప్రేమిస్సాన్”.

48 మరి యేసుదనిజ్, “దేవుణు నీ పాపమక సెమిస్స మనాన్”, ఇజి వెప్తాన్.

49 వన్ని వెట ఉండెజ్ బస్తి మహికార్, “పాపమక సెమిస్స మన్ను ఇజి వెప్తాజ్ వీండ్లు ఎయెన్?”, ఇజి ఒరెనదిజ్ ఒరెన్ వర్గిజి మహార్.

50 అందెజి యేసు, “నీను నా మున్ను నమకం ఇడ్డి. అందెజి నీ పాపమకాణిజ్ దేవుణు రక్తిస్సాన్ ఇజి ఆ బోదెల్ దిజ్ వెప్తాన్.

* 7:37 7:37 యా నూనాజ్ పణుకు పేరు అలబాస్తరు ఇజి యా పణుకు నండ్లె కరీదితిక తెల్లాజ్ మంజినాద్ యాక గీసి లోకుర్ పునజ్ తయార్ కిజినార్.

8

యేసు విత్తు వందిజ్ వెప్పొని కత

1 సెగం రోస్సు, సాహి వెనుక, యేసు, దేవుణు కిని ఏలుబడిః వందిజ్ సువార్త పట్టుమ్కాజ్ నాహ్కజ్ బోదెసి వెప్పొ వాజి మహాన్.

2-3 పన్నెండు మణిసి సినూరు వన్ని వెట మహార్. దెయం బాణిజ్, కస్టుమ్కాణిజ్ నెగెణ్ ఆతి సెగెండెక్ బోదెక్బా వన్ని వెట మహా. వన్కా లొఇ ఏడు దెయమ్కాణిజ్ యేసు డిఃసెప్పి మగ్గదలెనె ఇని మరియ, హెరోద్ ఇండ్రో ఎజమాని పణి కిజి మహి కూజ ఇని వన్ని అల్ని యెహూన, సుసనయ, మరి నండో బోదెక్బా మహా. వన్కాజ్ కల్లితి మన్ని లొఇ అవికు, యేసువన్ని సినూర్ వందిజ్ కర్చు కిజి మహార్.

4 విజా పట్టుమ్కాణిజ్ లోకుర్ యేసుడగ్గు వాజి మంద ఆతివెలె, వాండ్రు ఉండ్రీ కత వజి ఈహు నెన్పిస్తాన్.

5 “ఒరెన్ రయతు వాండ్రు విత్తు వితెజ్ సాహాన్. వాండ్రు విత్తు విత్తి మహిజ్ సెగం సరి పడఃకాద్ అర్తె. అర్తి విత్కాజ్ మట్టి సొన్ని మహార్. ఆగానమది పొటిజ్బా వాతెనె పెప్టా తిపా.

6 మరి సెగం సటు ముస్సు మన్ని డులిదు అర్తె. నేరితె గాని తడిః సిల్లెండ ఆతిజ్ సాతె.

7 మరి సెగం సాప్పు తప్పజ్ నడిఃమి అర్తె. సాప్పు తువెజ్వెట పిరితె గాని వన్కాజ్ తిగితె.

8 మరి సెగం నెగ్గి బూమిదు అర్తె. ఆకెజ్ పిరితెనె పంట నెగెండ పండితాద్. నండో జణి ఆతాద్. విత్తి విత్తుదిజ్వంత వంతుజ్లెకెండ ఆతె. యేసు యా మాటెజ్ వెప్పొ, ‘రుండి గిబిజాణిజ్ వెంజి అయావజి నడిఃదు’”, ఇజి వెప్టాన్.

9 వెనుక వన్నిసినూర్ యా కతవజి నెన్పిస్తి దనిజ్ అర్దం ఇనిక ఇజి వెన్బాతార్.

10 వెన్బాతిజ్ వాండ్రు, “దేవుణు కిని ఏలుబడిః వందిజ్ డాఃజితి మహి సజతిజ్ దేవుణు మిజి తెలివి కిత మనాన్. గాని మహికార్ దేవుణు మాటదు వెప్టా లెకెండ, ‘సుడఃజినార్ గాని తోవెర్, వెంజినార్ గాని అర్దం కివెర్*’. అందెజి వరిజ్ కతవజి నాను నెన్పిసిన.

11 యా కతవజి నెన్పిస్తి దనిజ్ అర్దం ఇనిక ఇహిజ, విత్తు ఇహిజ దేవుణు మాట.

12 విత్తు అర్తిసరి పడఃకాద్ పొలితికార్ ఎయెర్ ఇహిజ, దేవుణు మాట వెనికార్. గాని వారు దేవుణుదిజ్ నమిజి, వాండ్రు వరిజ్ రక్సెన్ఎండ మంజిని వందిజ్ నయతాను వాజి వరి మన్నుదు మన్ని దేవుణు మాట పెర్రి బనాన్.

13 విత్తు అర్తి సట్టుముస్సు మని డుల్లిదిజ్ పొలితికార్ ఎయెర్ ఇహిజ, దేవుణు మాట వెనివెలె సర్దదాన్ మన్నుదు ఇడ్కార్. గాని వెల్లె లొఇ సొని లెకెండ దేవుణు మాట వరి మన్ను లొఇ సాన్ఎద్. వారు సెగం కాలం నమినార్ గాని కస్టం వానివలె డిఃస్సార్.

14 విత్తు అర్తి సాప్పు తప్పజ్ నడిఃమి పొలితికార్ ఎయెర్ ఇహిజ, దేవుణు మాట వెంజి నమకం బా ఇడ్సార్. గాని వారు ఆహి బత్తుజి సొనివలె బత్తువందిజ్ మన్ని విసారం, సంసారం, సుకం వందిజ్ ఒడఃబినార్. యాకెజ్ వరి నమకం తిగిజి పొక్కినె. వరి బత్తుదాన్ ఇన్ని లాబంబా సిల్లెద్.

15 విత్తు అర్తి నెగ్గి బూమిదిజ్ పొలితికార్ ఎయెర్ ఇహిజ, దేవుణు మాట వెనికార్. వారు వరిజ్ తగ్గి నెగ్గి మన్నుదు దేవుణు మాట ఇడ్సార్. కస్టంకు వాతిజ, వారు అయాకెజ్ ఒరిసి నమకమ్దాన్ పిరినార్.

దీవ వందిజ్ వెప్పొనాన్.

16 ఎయెన్బా దీవ కసిని వెన్కా తబల మూక్కినో, మంసం అడ్కినో ఇడెవన్. గాని లొఇ వానివరిజ్ జాయి తోరెదెజ్ ఇజి దీవ కంతూదునె ఇడ్సార్.

17 డాఃజితిక ఇనికబా వెల్లి ఆనాద్. ముస్సిక ఇనికబా తోరెఅజి వెల్లితనె.

18 అందెజి మీరు వెంజనికెజ్ అర్దం కిజి మండ్రు. ఎందనిజ్ ఇహిజ, నా బాణిజ్వెంజి అర్దం కిజిని వన్నిజ్ దేవుణు మరి తెలివి కినాన్. గాని వెంజి అర్దం కిజివన్నిజ్వాండ్రు అర్దం కిత మన ఇజి ఒడఃబితికెజ్బా లాగ్నాన్.

* 8:10 8:10 మొనరు 6:9.

19 నన్నీవలె యేసు అయ్యేసిని తంబెరిసిర్ వన్నీజ్ సుడేదెజ్ వాతార్. గాని లోకుర్ నండో మహిజ్ వన్నీ డగ్గు సొండ్రెజ్ అట్వితార్.

20 అయావలె ఒరెన్, “నీ యాయ ని తంబెరిజు నిజి సుడేదెజ్ కోరిజి వెల్లి నిహ మనార్”, ఇజి వన్నీజ్ వెహ్లాన్.

21 వెహ్లాజ్ యేసు, “దేవుణు మాటెజ్ వెంజి అయావజ నడినికారె నా యాయ నా తంబెరిజు”, ఇజి వెహ్లాన్.

యేసు పెరిగాలి తుపాన్దిజ్ ఆవ్కిజినాన్

22 నన్నీవలె ఉండ్రీ నాండిజ్ యేసు వన్నీసిసూర్జ, “గనెనరెతు ఇన్ని సెరు అతాహ పడక సానాట్”, ఇజి వెహ్లాన్. అందెజె వారు ఉండ్రీ డోణిదు ఎక్కారె సొహార్.

23 వారు సొన్ని మహిజ్, యేసు నిర్దు కితాన్. అయావలె పెరి గాలి తుపాన్సిర్దు ముస్సు వాతాదె, డోణిదు ఏరు నిండ్రీజినాద్. వారు పెరి ప్రమాదమీదు మనార్.

24 అయావలె సిసూరు వన్నీ డగ్గు సొహారె, “ప్రబువా, ప్రబువా మాపు సానా సొనావలె”, ఇజి వన్నీజ్ నిక్కారె. వాండ్రు నిజితండ్రె పెరిగాలి ఉల్లాలుజుదిజ్, “పలక అదు”, ఇజి డటం వెహ్లాన్. పెరిగాలి అణస్తాద్. విజు అలెతె.

25 అయావలె వాండ్రు, “ఎందనిజ్ మిజి నా ముస్సు నమకం సిల్లెద్?”, ఇజి వరిజ్ వెన్బాతాన్. వారు బమ్మఅజి తియెల్దాన్, “వీండ్రు గాలిదిజ్ ఏరుదిజ్ అణస్తూ ఇజి ఆడ్ర వెహ్లాజ్ అవి లోజిజినె. వీండ్రు ఎయెండ్రో”, ఇజి ఒరెన్వెట ఒరెన్ వర్గితార్.

దెయమ్కు అస్తివన్నీజ్ నెగెండ్ కిజినాన్.

26 వారు గరసినియ ఇని లోకురి ప్రాంతమీదు వాతార్. అయా ప్రాంతం గలిలయ ప్రాంతమీదిజ్ ఎద్దు మనాద్.

27 వాండ్రు సెరుగటుద్ డిగితివెలె, ఆ పట్టుమీదికాన్ ఒరెన్ యేసుడగ్గు వాతాన్. వాండ్రు దెయమ్కు అస్తికాన్. నండో కాలమ్కాణిజ్ సొక్కెజ్ తోడిగిఎండ, ఇండ్రో మన్ఎండ, దూకిజాజ్ మహాన్.

28 వాండ్రు యేసుజ్ సుడేతాండ్రె డటం డేల్చీ వన్నీ పాదమక ఎద్దు ముణుకుజ్ ఉరితాన్. ఉరితండ్రె, “విజు దనిజ్ అతికారం మన్నీ దేవుణు మరిసి ఆతి యేసు, నా వెట నిజి ఇన్ని పణి, నజి బాద కిమ ఇజి నిజి బతిమాల్చిన”, ఇజి డేల్చీ వెహ్లాన్.

29 ఎందానిజ్ ఇహిజ, యేసు, వినీజ్ డిసి వెల్లి సొన్అ ఇజి ఆ దెయమ్దిజ్ ఆడ్ర సిత మహాన్. అది వన్నీజ్ నండో సుట్టు అసి మహాద్. అందెజె వన్నీజ్ గొలుస్కాణిజ్ కాల్యాజ్ కికాజ్ తోహ్ని కాప్ కిని వరిజ్ ఇహ్లాద్. గాని వాండ్రు గొలుస్కాజ్ తెప్ప, దెయమ్కు వన్నీజ్ బీడిమ్బూమిదు ఉలుప్పి మహా.

30 యేసు వన్నీజ్, “నీ పేరు ఇనిక?” , ఇజి వెన్బాతాన్. నండో దెయమ్కు వన్నీ లోజ మహిజ్ వాండ్రు, “సేన”, ఇజి వెహ్లాన్.

31 మజి దర్బదు పోక్మా ఇజి మరి మరి బతిమాల్తె.

32 నన్నీవలె నండో పండ్రీజ్ మంద గొరోణ్ సెల్కాదు మెయిజి మహా. అందెజె వన్నా లోజ సొండ్రెజ్ మజి సెల్కా సిదా”, ఇజి వన్నీజ్ బతిమాల్తె. అందెజె వాండ్రు సెల్కా సితాన్.

33 అయావలె దెయమ్కు వన్నీజ్ డిస్సెనె పండ్రీజ్ లోజ సాహా. ఆ పండ్రీజ్ మంద గొరోత్దాన్ ఉహ్కాక్కి వాజి సెర్దుదు అర్తెనె సాతె.

34 పండ్రీజ్మేప్పి మహికార్ జగ్గితి దనిజ్ సుడేతారె ఉహ్కాక్కి సొన్ని ఆ పట్టుమీది వరిజ్, పట్టుమీది వల్సెజ మని వరిజ్ జగ్గితికెజ్ వెహ్లాన్.

35 లోకుర్ యా జగ్గితికెజ్ సుడేదెజ్ సొహార్. వారు యేసు డగ్గు వాతిజ్ దెయమ్కు డిస్సి సొహికాన్ సొక్కెజ్ తోడిగిజి నెగ్గె బుద్దిదాన్ యేసు పాదమక అడిగి బస్తి మహి సుడేతారె. సుడేతారె తియెల్ అతారె.

36 యాక సుడేతికారె దెయం అస్తికాన్ ఎలాగ నెగెణ్ అతాన్ ఇజి మరి లోకురిజ్ వెహ్లాన్.

† 8:27 8:27 అయి కాలమ్దు మొడః సట్టు పణుకుదు దొలున్సి సొలమ్దు ఇడేజి పెరి పణుకుయదాన్ మూక్కి మహాన్.

37-38 అయావలె గరసినియ లోకురి ప్రాంతమడు మన్ని లోకుర్ విజెరె, నండో తియెల్ ఆతార్. అందెజె, “మజి డిసి సాన్అ”, ఇజి యేసుజ్ వెప్తార్. అందెజె యేసు డోణి ఎక్తాండ్రె మరజి సాన్ని మహిజ్, దెయమకు డిస్సి సాహికాన్, “నాను బా నీ వెట వానా”, ఇజి బతిమాల్తాన్.

39 గాని యేసు, “నీను మరజి ఇండ్రో సాన్అ. దేవుణు నీ వందిజ్ కిత్తి గొప్పు పణి విజు వెహాఅ”, ఇజి వెప్తాండ్రె పోక్తాన్. వాండ్రు సాహండ్రె యేసు వన్నివందిజ్ కిత్తి గొప్పు పణి పట్టుం విజు వెప్తాన్.

యేసు సాతి అయిలిజ్ నిక్కినాన్, జబ్బుఆతి మహిబోదెల్దిజ్ నెగెణ్ కిజినాన్

40 యేసు మరజి వాతివెలె, నండో లోకుర్ వన్నిజ్ ఎద్రు సుడెజిజి మహర్. అందెజె వారు వన్నిజ్ డగ్రు కిత్తార్.

41-42 నస్తివలె, యూదురి మీటిజ్ ఇండ్రోణి అతికారి యాయిరు ఇనికాన్ యేసు పాదం ముస్సు అర్తాండ్రె, “నజి ఒరెదె గాలు. అది సాదెజ్ డగ్రు ఆత మనాద్. దనిజ్ డగ్రు వనెండు పంటిజ్. అందెజె నీను నా ఇండ్రో రఅ”, ఇజి బతిమాల్తాన్. వాండ్రు సాన్ని మహిజ్ నండో లోకుర్ వన్ని ముస్సు నెకె ఆజి అర్ని మహర్.

43 అయావలె ఉండ్రె బోదెలి పనెండు పంటిజాణిజ్ వెల్లి అని జబుదాన్ బాద ఆజి మహద్. ఎయెరబా దనిజ్ నెగెణ్ కిదెజ్ అటవతార్.

44 యేసు వెన్కాజ్ వాతాదె, వాండ్రు తోడిగితిమన్ని వన్నినిరీ సొక్కది నెంగుదిజ్ ముట్టాద్. ముట్టి వెటనె దనిజ్ వాజి మహి నల అణస్తాద్.

45 యేసు, “నజి ముట్టికాన్ ఎయెన?””, ఇజి వెనబాతాన్. విజెరె, “మాపు నెన్ఎవ్”, ఇజి వెప్తార్. అయావలె పేతురు, “బోదకినికిదా, నండో లోకుర్ కూడితారె నీ ముస్సు అర్నినార్ గదె”, ఇజి వెప్తాన్.

46 గాని యేసు, “నజి ఎయెండ్రో ముట్టాన్. నా లోఇదాన్ దేవుణు సత్తు వెల్లి సోసి సాని లెకెండె నజి తెలిజినాద్”, ఇజి వెప్తాన్.

47 అయావలె అది యేసుజ్ డాజిజి సాండ్రెజ్ అటవ ఇజి నెస్తాది వణక్కి వాతాది వన్ని పాదం ఎద్రు ముణుకుజ్ ఊరజి వజితాద్. నాను ఎందనిజ్ వన్నిజ్ ముట్ట ఎలాగ వెటనె నెగెణ్ ఆత ఇనిక విజెరె ఎద్రు అది వెప్తాద్.

48 అందెజె యేసు”, గాలు, నీను నా ముస్సు నమకం ఇడ్డి. అందెజె నీను నెగెన్ఆతి. నమాదనమదాన్ సాన్అ”, ఇజి దనిజ్ వెప్తాన్.

49 యేసువర్గిజి మహివలెనె, యాయెరు ఇండ్రోణికాన్ ఒరెన్ వాతండ్రె, “నీ గాలు సాతాద్. బోదకినివన్నిజ్ మరి వందిస్సు”, ఇజి వన్నిజ్ వెప్తాన్.

50 యేసు అయా మాట వెహండ్రె, “తియెల్ ఆమ. నా ముస్సు నమకం ఉండ్రె ఇడెఃఅ. అది నెగెణ్ ఆనాద్”, ఇజి యాయిరుజ్ వెప్తాన్.

51 యాయిరు ఇండ్రో వాతివెలె, పేతురు, యాకోబు, యోహాను ఇని వరిజ్ ని ఇజ్జి దని అయిని అప్పొసిరిజ్ లోఇ ఒతాన్. గాని మహివరిజ్ లోఇ సాండ్రెజ్ సరి సిమితాన్.

52 విజెరె దన్ని వందిజ్ గుండెజి డెయెం ఆజి, అడెబాజి మహర్. యేసు వరిజ్, “అడెబామాట్, అది నిద్ర కిజినాద్ గాని సాఎద్”, ఇజి వెప్తాన్.

53 అది సాతాద్ ఇజి వారు నెస్తి మహర్. అందెజె యేసుజ్ సెకాల్ కిత్తార్.

54 అహిజ, యేసు దన్నికిదు అస్తాండ్రె, “ఇజ్జి బయి నిజ్అ”, ఇజి వెప్తాన్.

55 దనిజ్ వాణం మరజి వాతిజ్ అది నిజితాద్. అయావలె వాండ్రు దనిజ్ బోజనం సీదు ఇజి ఆడ్ర సితాన్.

56 దని అయేసి అహిని నండో బమ్మ ఆతార్. గాని వాండ్రు యాక ఎయెరిజ్ బా వెప్పట్ ఇజి వరిజ్ ఆడ్ర సితాన్.

9

సిసూరిజ్ పణి ఒపజిప్పినాన్

1 యేసు వన్నెండు మణిని సిసూరిజ్ కూక్కి కుడుఃస్తాండ్రె విజు దెయమకాజ్ పేరెదెజ్, కస్టమ్కాజ్ నెగెణ్ కిదెజ్ వరిజ్ సత్తుని అతికారం సిత్తాన్.

2 వాండ్రు, “దేవుణు ఎలుబడిః కిన్నాన్ ఇజి నువార్త బోదిస్తైజ్, కష్టమ్కాణిజ్ మహి వరిజ్ నెగెణ్ కిదిజ్”, ఇజి వరిజ్ పోక్తాన్.

3 మరి వాండ్రు వెప్తాన్, “మీరు పయాణం వందిజ్ కిదు డుడ్డు గాని, నన్ని గాని రొట్టె గాని, డబ్బు గాని రుండి సొక్కైజ్ గాని ఇనికబా ఒత్తైజ్ అవిద్.

4 మీరు ఎయె ఇండ్రొ సొనిదెరో, అయా పట్టుం డిఃస్సిదాక బానె మండ్రు.

5 మిజి ఎయెరో డగ్రు కివీండు మహిజ ఆ పట్టుమ్దాన్ డిఃసి సొనివలె మీ పాదమ్కాణి డుల్లిబాన్ దుల్తప్పు. దేవుణు మాట వారు నెక్క పొక్తిజ్ దేవుణు వరిజ్ కోపం ఆతాన్ ఇజి తోరిస్తైజ్ ఆపా డుల్లి దులుప్పు”, ఇజి వరిజ్ వెప్తాన్.

6 అందెజి వారు సోతారె, నాహ్యజ్ విజి బూలాజి, నువార్త బోదిసి, ఎంబెబా కష్టమ్దాన్ మహి వరిజ్ నెగెణ్ కిజి మహార.

7-8 గలీలయ ములుదిజ్ రాజు ఆతి హేరోదు యేసుని వన్నిసినూరు కిత్తి పణిజ్ వందిజ్ వెహివెలె అసల అర్లం ఆవెండ మహాన్. ఎందనిజ్ ఇహిజ, సెగెండారో యోహాను సాతండ్రె మరీజి నిజితాన్ ఇజి, సెగెండారో ఏలియ ప్రవక్త తోరె ఆతాన్ ఇజి మరి సెగెండారో పూర్బా కాలమ్దు మహి ఒరెన్ ప్రవక్త నిజిత వాతాన్ ఇజి యేసు వందిజ్ వర్గిజి మహార.

9 అయావలె హేరోదు, “నాను యోహాను బుర్ర డెఃయిస్త గదె. మరి ఎయి వందిజ్ యా నజతిజ్ నాను వెంజిన్? వాండ్రు ఎయెన్?”, ఇజి వన్నిజ్ నుడెదెజ్ ఆస ఆతాన్.

అయ్దు వెలు లోకాజ్ బజి తిర్పినాన్.

10 అపొస్తుడు మరీజి వాతారె, వారు కితి పణిజ్ విజి యేసుజ్ వెప్తార. వాండ్రు వరిజ్ వెట కుక్కాండ్రె, బత్తయదు ఇని పట్టుమ్దు కేట సాహార.

11 గాని మంద లోకుర ఆక నెస్తారె, వన్ని వెన్కా వాజి మహార. వాండ్రు వరిజ్ డగ్రు కితాండ్రె దేవుణు ఏలుబడిః వందిజ్ వరిజ్ వెప్తార. కష్టమ్దు మహి వరిజ్ నెగెణ్ కిత్తాన్.

12 పొర్దు డిఃగిజి మహివలె, పన్నెండు మణిసి సినూర్ వాతారె, “మాటు ఎయెరో మన్ఇ బాడిఃద్ మనాల్. అందెజి యా లోకురిజ్ మండ్రెజ్ బాడిః, ఉండెజ్ టిండి, దోహాక్కిని వజి పడఃకాద్ మన్ని నాహ్యజ్ వలెనజి పోక్తా”, ఇహార.

13 యాక వెహండ్రె, యేసు, “మీరె వరిజ్ తిండ్రెజ్ ఇనికబా సీదు”, ఇజి వెప్తాన్. వెప్తాజ్ వారు, “మాబాన్ అయ్దు రొట్టెజ్, రుండి మెయెజ్ మనె. నినా మంద లోకుదిజ్ బోజనం కొండెజ్ మాపు అట్టాపా?”, ఇజి వెప్తార.

14 (వాతి మని లోకుర లోఇ మొగకొడెఃరెనె డగ్రు అయ్దు వెలుజ్ మనార) వాండ్రు, “యాబయి మణిసిరె యాబయి మణిసిరె వరన్ బసె కిదు”, ఇజి వన్ని సినూర్జి వెప్తాన్.

15 వారు ఆపా కిజి విజెరిజ్ బసె కిత్తార.

16 నన్నివలె వాండ్రు అయ్దు రొట్టెజ్ని రుండి మెయెజ్ అస్తాండ్రె, ఆగసం దరోట్ బేసి, వన్కాజ్ వందిజ్ దేవుణుదిజ్ వందనం వెప్తాన్. అయాకెజ్ ముకెజ్ కితాండ్రె లోకురిజ్ సీబాజి సీదు ఇజి వన్ని సినూర్జి సితాన్.

17 వారు విజెరె పొట పంజు తిహార. తిహి వెనుక మిగిలితి ముకెజ్ పనెండు గంపెజ్ సినూరు కెప్తార.

18 ఉండ్రె నాండిజ్ యేసు ఒరెండ్రె పొర్లనం కిజి మహాన్. వన్ని సినూర్ వన్ని డగ్రు మహార. అయావలె వాండ్రు, “నాను ఎయెన్ ఇజి లోకుర వర్గిజినార?”, ఇజి వరిజ్ వెన్బాతాన్.

19 వారు, “బాప్టిసం సీని యోహాను ఇజి సెగెండారో వెప్పినార. సెగెండారో ఏలియ ప్రవక్త ఇజినార. మరి సెగెండారో పూర్బా కాలమ్దు సాతి ప్రవక్తెజ్ లోఇ ఒరెన్ మరీజి నిజితాన్ ఇజి వర్గిజినార”, ఇజి వన్నిజ్ వెప్తార.

20 “అహిజ, మీరు నాను ఎయెన్ ఇజి వెప్పినిదెర?”, ఇజి వరిజ్ వెన్బాతిజ్, పేతురు, “దేవుణు ఏరెపాటు కితి పొక్తి క్రిస్తు”, ఇజి వెప్తాన్.

21 యాక ఎయెవెట వెహ్యట్ ఇజి కనితం వరిజ్ ఆడ్ర సితాన్.

22 మరి, “లోకు మరిసి అతి నాను నండో కస్తమకు ఓరిస్తాజ్‌వలె. యూద పెద్దెల్‌జ, పెరి పుజెరిబు, యూదురి రూలు నెస్తిస్తికార్ నజీ వెల్లి కినార్. లోకుర్ నజీ సప్పారలె. సాజి మూండ్రె దినమ్‌కాజ్ దేవుణు నజీ నిక్‌నాన్‌లె”, ఇజి వెప్తాన్.

23 మరి వాండ్రు వరిజ్ విజెరిజ్ ఈహు వెప్తాన్. “ఎయెన్‌బా నా వెట వాదెజ్ ఇహిజ, వాండ్రు వన్ని సొంత ఇస్తమకు డిసి, వన్నిజ్ వాని కస్తమకు రోజు ఓరిసి సాదెజ్‌బా తయార్ అజి నా వెట వాదెజ్.

24 ఎయెన్‌బా వన్ని సొంత పాణమ్‌దిజ్ కాపాడెదిజ్ సుడెతిజ, వన్నిజ్ ఎల్లకాలం దేవుణు వెట బత్కిని బత్కు దోహాక్‌ఎదె. గాని ఎయెన్‌బా నా వందిజ్ వన్ని పాణం సితిజ, వన్నిజ్ ఎల్లకాలం దేవుణు వెట బత్కిని బత్కు దోహాక్‌ఎదె.

25 ఒరెన్ వాండ్రు, వాండ్రు కోరితి విజు, యా లోకుమ్‌ది సంసారం సుకం విజు దోహాకె అజి, వన్నిజ్ ఎలాకాలం దేవుణు వెట బత్కిని బత్కు దోహాక్‌ఎండ మహిజ, ఇన్ని లాబం?

26 నా వందిజ్ నా మాట వందిజ్ సిగు ఆని ఎంబె వన్నిజ్‌బా నాను నెన్న ఇజి వెప్తాజ్ లోకు మరిసి అతి నానుబా సిగు ఆన. నాను దేవుణు జాయ్‌దు ఒడెబిదిజ్ అట్‌ఇ నని సోకుదాన్ వానా. అయావలె నా బుబ్బుదిని, దూతెజది జాయ్ ఒడెబిదిజ్ అట్‌ఇ సోకుబా నా వెట మంజినాద్. అయావలె నా వందిజ్ నా మాట వందిజ్ సిగు అతి వన్ని వందిజ్ నానుబా సిగు ఆన.

27 నాను మిజి నిజం వెప్సిన్, “ఇబ్బి నిహి మన్ని వరి లోఇ నెగెండార్, దేవుణు వన్ని లోకురిజ్ ఏలుబడిజ్ కిజినిక సూణిదాక సాఎర్”.

యేసుజ్ మూర్తి మారిసినాద్.

28 యా మాటిజ్ వెప్తి డగ్రు ఉండ్రె వారం వెన్కా, వాండ్రు, పేతురు, యాకోబు, యోహాను ఇన్ని వరిజ్ వెట్టు కూక్తాండ్రె, పార్లనం కిదిజ్ ఉండ్రె గొరొత్ ఎక్తార్.

29 వాండ్రు పార్లనం కిజి మహివలె వన్ని మొకమ్‌ది మూర్తి మారితాద్. వన్ని సొకెజ్ తెలాజ్ అతె, జిగి జిగి మెరిసి మహా.

30-31 అయావలె, దేవుణు మంజిని బాడ్డిదాన్ రిఎర్ వన్ని వెట వర్గిజ మహార్. దేవుణు బాణిజ్ వాతి జాయ్ వరి సుటులం మహాద్. వారు మోసా, ఏలియ ఇనికార్. యేసు యెరూసలెమ్‌దు సాజి, ఆహా దేవుణు ఎత్తు కితిక బేగి పూర్తి కిని వందిజ్ వర్గితార్.

32 పేతురు ని వన్ని వెట మహికార్ బాగ నిద్ర కితార్. తెలి అతి మహిజ్ వారు యేసుజ్ మని దేవుణు జాయ్‌దిజ్ వన్ని వెట నిహి మని రిఎరిజ్‌బా సుడెతార్.

33 ఆ రిఎర్ వన్ని బణిజ్ సొన్ని మహిజ్, పేతురు యేసుజ్, “బాబు, మాటు ఇబ్బి మనిక గొప్ప నెగెద్. అందెజి నిజి ఉండ్రె మోసాజ్ ఉండ్రె ఏలియెజ్ ఉండ్రె మండ్రెజ్ మూండ్రె గుడుఃనిజ్ తోహానాప్.*

34 వాండ్రు ఆహా వర్గి మహిజ్ మొసాప్ వాతాదె వరిజ్ పిడెగితాద్. వారు మొసాప్ లోఇ సోహివలె సిసూరు తియెల్ అతార్.

35 అయావలె, “పీండ్రు నాను ఏర్‌పాటు కితి నా మదిను. విని మాటిజ్ వెండ్రు”, ఇజి ఉండ్రె జాటు మొసాప్‌దాన్ వాతాద్.

36 అయా జాటు వాతి వెనుక యేసుజ్‌నె తోరితాద్. సిసూరు సుడెతి వన్నాజ్ ఉండ్రె దనిజ్‌బా అయా దినమ్‌కాజ్ మహి ఎయెరిజ్‌బా వెహాఎండ అల్లత మహార్.

దెయం అస్తి ఒరెన్ కొడెదిజ్ నెగెణ్ కిజినాన్

37 మప్ప నాండిజ్, వారు ఆ గొరొణ్ డిగిజి వాతివలె నండో లోకుర్ వన్నిజ్ ఎద్రు వాతార్.

38 అయావలె ఆ మంద లోకు లోఇ ఒరెన్, “ఓ బోదకినికి, నా మరిసిజ్ కనికారం తోరినె అజి నాను నిజి బతిమాల్లిన. వాండ్రు నజీ ఒరెండ్రె మరిసి.

39 ఉండ్రె దెయం వన్నిజ్ అస్నాద్. వెటనె వాండ్రు డెడిఃస్నాన్. వెయ్‌దాన్ పంపుల్ వాజి అది వన్నిజ్ గజగజ వణికిసి అర్‌ప్పాద్. వన్నిజ్ నండో బాద కిజి వందిసిని డిఃస్నాద్.

40 దనిజ్ సాన్‌పిస్తెజ్ నీ సిసూరజ బతిమాల్‌త గాని వారు కిదిజ్ అట్‌వతార్”, ఇజి మొరొ కిత్తాన్.

* 9:33 9:33 వాండ్రు వెప్తిక ఇనికదె వన్నిజ్ తెలివెద్

41 అందెజె యేసు, “యా తరమ్మదు మనికిదెరా, మీరు తప్పు సరిదు నడవె ఆజనికిదెర్. నమకం సిలికిదెర్. ఎసోడె రోస్సు, మీవెలె మంజన? మీరు కినికెజ్ ఎసా ఓరిస్తెజ్?”, ఇజి వెప్తాండ్రె, “నీ మరినిజ్ ఇబ్బె తగ్ అ”, ఇజి వన్నిజ్ వెప్తాన్.

42 ఆ కొడోజి వాజిమహివలె వన్నిజ్ అసి మహి దెయం వన్నిజ్ అరీప్తాదె గజి గజి వణకిస్తాద్. అయావలె యేసు ఆ దెయంమదిజ్ సాన్ అజి డటిసి వెప్తాన్. కొడోజిదిజ్ నెగెజ్ కితాండ్రె అపాసిజ్ ఒపజెప్తాన్.

43 లోకుర్ యా జర్గితక సుడోతారె, దేవుణు గొప్పు సత్తు మనికాన్ ఇజి నండో బమ్మ ఆతార్.

44 యేసు కితి వణి వందిజ్ లోకుర్ విజెరె బమ్మ ఆజి మహివలె, వాండ్రు ఈహు వన్ని సిసూరిజ్ వెప్తాన్. “నాను యేలు వెప్పిని మాటోజ్ బాగ వెంజి పోన్ ఎండ మండ్రు. లోకు మరిసి ఆతి నాను లోకు కీదు ఒపజెవె ఆనాలె”, ఇజి.

45 గాని వాండ్రు వెప్తా మాటోజ్ వరిజ్ అర్దం ఆవెతాద్. దేవుణు ఆక డాప్తాన్. ఎండనిజ్ ఇహిజి వారు అర్దం కిపిండ మండ్రెజ్. ఆ మాటలె వందిజ్ వన్నిజ్ వెన్ బాదెజ్ వారు తియెల్ ఆతార్.

పెరికాన్ ఎయెన్ ఇజి గోడజి రేప్పినార్

46 సిసూరు లోఇ ఎయెన్ పెరికాండ్రో ఇజి ఉండ్రె ఇజ్జి గోడబ వాతాద్.

47 యేసు వరి మన్నుదు మన్ని అలోసన నెస్తాండ్రె ఒరెన్ ఇజ్జి కొడోజిదిజ్ అస్తాండ్రె వన్ని వడోకాద్ నిల్ ప్తాన్.

48 నిల్ ప్తె వెన్యా వాండ్రు వరిజ్, “ఎయెన్ బా యా ఇజ్జి కొడోజిదిజ్ నా ముస్సు నమకం ఇడ్డికాన్ ఇజి ఒడిబిజి డగ్రు కితిజి, నజి డగ్రు కితి వజి. నజి డగ్రు కితికాన్ నజి పోక్తి దేవుణు డగ్రు కితి వజి. మీ లోఇ ఎయెన్ తగిజి మంజి నాండ్రో వాండ్రె పెరికాన్”, ఇజి వెప్తాన్.

49 అయావలె యోహాను, “బోదకినికి, నీ సత్తుదాన్ దెయమ్ కాజ్ పోక్తి మహి ఒరెన్ వన్నిజ్ మాపు సుడోతావ్. వాండ్రు మా వెలె మనికాన్ ఆవెన్. అందెజె మాపు వన్నిజ్ అడ్డు కితావ్”, ఇజి వెప్తాన్.

50 అందెజె యేసు, “వన్నిజ్ అడ్డు కిమాట్. ఎండనిజ్ ఇహిజి, మీ ముస్సు పగ సిలికాన్ మీ దరిజ్ మనికానె”, ఇజి వన్నిజ్ వెప్తాన్.

యెరూసలెమ్మదు పయాణం కిజినాన్

51 యేసు పరలోకమ్మదు సాండ్రెజ్ దినమ్మకుడగ్రు ఆతివెలె వాండ్రు మన్ను పూర్తి నమకం కిజి యెరూసలెమ్మదు సాండ్రెజ్ సోతాన్.

52 వాండ్రు వన్నిజ్ మండ్రెజ్ బాడ్డి: తయారె కిదిజ్ ఇజి సెగెండారిజ్ ముజాల్ పోక్తాన్. వారు దని వందిజ్ సమరియ ఇనన్ని దేసెమది ఉండ్రె నాటో వాతార్.

53 గాని నాటోణికార్ వన్నిజ్ డగ్రు కితితార్. ఎండనిజ్ ఇహిజి వాండ్రు యెరూసలెమ్మదు మన్ని దేవుణు గుడిడు సాని ఒరెన్ యూద వాండ్రు.

54 సిసూరజి లోఇ యాకోబు, యోహాను ఇనికార్ యాక సుడోతారె, “ప్రబువా, యా లోకురిజ్ నానసం కిదిజ్ ఆగాసం దాన్ మాపు సిను తపిస్తెజ్ నిజి ఇస్టమ్ నెనా?”, ఇజి వెన్ బాతార్.

55 యేసు వరి దరోట్ మప్తాండ్రె వరిజ్ గటిజి వెప్తాన్.

56 నస్తెవలె వారు మరి ఉండ్రె నాటో సాహార్.

57 వారు సరిదాన్ సాన్ని మహివలె, ఒరెన్, “నీను ఎంబె సాహిజ్ బా నాను నీ వెలె వానా”, ఇజి వన్ని వెలె వెప్తాన్.

58 అందెజె యేసు, “నక్కెజి మండ్రెజ్ బొరోజ్ మన్నె. ఆగాసమది పొటిజి మండ్రెజ్ గూడుకు మనె. గాని లోకు మరిసి ఆతి నజి బుర్ర అడ్డు కిదిజ్ బాడి సిల్లెద్”, ఇజి మరజి వెప్తాన్.

59 వాండ్రు మరి ఒరెన్ వన్నిజ్, “నా వెలె రఅ”, ఇజి వెప్తాన్. అయావలె అయా వాండ్రు, “ప్రబువా, ముజాల్ నాను సాన్ని నా బుబ్బెజ్ ముసి వానా”, ఇజి వెప్తాన్.

60 అందెజె యేసు, “సాతికార్ వరి సాతివరిజ్ ముస్తెజ్. గాని నీను సాన్ని దేవుణు ఏలుబడి వందిజ్ బోదెన్ అ”, ఇజి వెప్తాన్.

61 మరి ఒరెన్, “ప్రబువా, నీ వెలె నాను వానా. గాని నాను ముజాల్ మరజి సాన్ని నా ఇండ్రెణి వరిజ్ వెప్పి వాన”, ఇజి వెప్తాన్.

62 అందెజి యేసు, “మేడిః ముస్సుక్కియు ఇడ్డి వెన్కా మరజి బేస్సాన్ ఎయెన్బా దేవుణు ఏలుబడిః కినివరి లోఇ ఎందనిజ్ పణిదిజ్ రఇకాన్”, ఇజి వెప్తాన్.

10

డబయ్ మణిసి సిసూరిజ్ సువార్త వందిజ్ పోక్కినాన్.

1 యాక జర్తితి వెనుక, ప్రబు మరి డబయ్ మణిసి సిసూరిజ్ ఏర్పాటు కితాన్. వాండ్రు సొని విజి పట్టుమకాజ్ విజి బాడిఃదు వన్ని ముజల రిఎరిజ్ రిఎరిజ్ పోక్కినాన్.

2 పోక్కి, వాండ్రు వరిజ్ ఈహు వెప్తాన్, “కొయ్దెజ్ మన్నిపంట లెకెండో లోకుర్ నండెండోర్ మన్నె. గాని తక్కునె కొయ్నికార్ తక్కునె అందెజి వన్ని పంట కొయ్నివందిజ్ పణికిని వరిజ్ పోక్అ, ఇజి కోత్త ఏజుమానిజ్ బతిమాలేదు ఇజి వెప్తాన్.

3 మీరు సొండ్రు! ఇదిలో, కార్నుకుడిఃజు నడిఃమి గొరె పిల్లెకాజ్ పోక్తిలెకెండో నాను మిజి పోక్కినాన్.

4 మీరు సన్ని గాని, డబ్బుజ్ ఇడ్డి సన్ని గాని, సన్నిదు మరి ఉండ్రీ జత జోడేకు గాని ఒతెజ్ ఆవద్. మీరు సద్దు ఎయెరిజ్ నెగెణ్ మనిదా ఇజి నిల్చి వర్గిజి, సమయం పాడు కిదు.

5 మీరు ఎయె ఇండ్రో బా సొనివలె, “యా ఇండ్రో మంజిని వరిజ్ నమాదనం కల్లిపిద్ ఇజి ముజాల వెప్తా.

6 నమాదనం కోరిజినికాన్ ఒరిన్ బాన్ మహిజు, మీ నమాదనం వన్ని ముస్సుక్కి మంజినాద్. సిలిజు, మర్జిజి మీ బానె వానాద్.

7 వారు ఇనిక సితిజ్ బా ఉణిజి తింజి బానె మండ్రు. ఎందనిజ్ ఇహిజు, పణి కిని వన్నిజ్ వన్నిజ్ కావాలస్తికెదో హొక్కెజ్ తగ్గికాన్. ఇల్లు ఇల్లు బూలమాట్.

8 మరి మీరు ఎమేణి పట్టుమదు సొనివలె వారు మిజి డగ్రు కిజి ఇనిక సితిజి ఆకదె ఉండు.

9 బాన్ మని కన్మమది వరిజ్ నెగెణ్ కిదు. దేవుణు ఏలుబడిః కిని కాలం మీ డగ్రు వాత మనాద్ ఇజి వరిజ్ వెప్తా.

10-11 గాని మీరు ఎమేణి పట్టుమదుబా సొనివెలె వారు మిజి డగ్రు కివిండ మహిజు, అయా పట్టుమది వీదిజు సొన్ని, “మా పాదమకాజ్ కన్మ మన్ని మీ పట్టుమది డుల్లిబా ఇబ్బె దుల్లిప్పి సొన్సినాన్. ఎందనిజ్ ఇహిజు, దేవుణు మీ ముస్సుక్కి కోపం ఆత మనాన్ ఇజి తోరిస్తెజ్. గాని ఒణిఃబిదు ఏలుబడిః కిని కాలం డగ్రు ఆత మనాద్ ఇజి తవ్విండ నెస్సు”, ఇజి వెప్తా.

12 నాను మిజి వెప్సాన్, దేవుణు తీర్పు కిని దినమదు యా పట్టుమది వరిజ్ సిక్కు మరి నండో మంజినాద్. సొదోమదు పట్టుమదు మహి లోకురిజ్ ససా మన్వద్.

13 ఓ కొరాజి పట్టుమదు మనికిదెరా, అబాయా మిజి ఎసా పెరి కన్మమకు వానెలె. ఓ బెత్సెయ్యుదు పట్టుమదు మనికిదెరా, అబాయా మిజి ఎసా గొప్ప పెరి కన్మమకు వానెలె. ఎందనిజ్ ఇహిజు, మీ నడిఃమి కితి బమ్మాతి గొప్ప పణిజ్ తూరు సిదోను ఇని పట్టుమకాజ్ కినిక ఇహిజు, వారు పూర్బమ్మదునె బస్త గరండెజ్ తోవా ఆజి, నీరు వాకె ఆజి, పాపమకు డిఃస్టాప్ ఇజి తోరిస్తారో మరి.

14 దేవుణు తీర్పు కినివలె మీ పట్టుమకాజ్ సిక్కు, తూరు సిదోను పట్టుమకాజ్ నండో మంజినాద్లె.

15 కపర్నహోము పట్టుమదు మనికిదెరా, ఆగాసం దాక గొప్ప పెరికాప్ ఇజి ఒణిఃబిజినిదెరా? సిల్లె, దేవుణు మిజి వాండ్రు మంజిని బాడిఃదాన్ అరిప్పాన్లె. ఇహిజు, దేవుణు మిజి నాసనం కినాన్లె.

16 మరి యేసు వన్ని సిసూరిజ్, “మీ మాట వెనికాన్ నా మాట వెనాన్. మీ మాటదిజ్ నెక్కు పోక్కినాన్, నా మాటదిజ్ నెక్కు పోక్కినాన్. నా మాటదిజ్ నెక్కు పోక్కినాన్, నజి పోక్కి వన్నిజ్ నెక్కు పోక్కినాన్”, ఇజి వెప్తాన్.

17 డబయ్ మణిసి సిసూరు సర్దాన్ మర్జి వాతారె, “ప్రబువా, దెయ్మకుబా, నీ అతికారం దాన్ సొండ్రు ఇజి మాపు ఆడ్ర సిజినివలె మిజి లోబడిఃజెనె”, ఇజి వెప్తాన్.

18 సన్తివలె యేసు, “ఒఒ, సయ్తాను మిరిస్తి లెకెండో వన్ని అతికారం సిల్లెండో ఆగాసమదాన్ అర్తిక నాను నుడఃత

19 సారన్కాజ్ సోర్కుపిజి మట్టెజి మిజి అతికారం సిత మన్ను. సయ్తాను సత్తుదిజ్ గెలిస్తెజ్ మిజి అతికారం సిత మన్ను. సయ్తాను మిజి ఇనికబా కిదెజ్ అట్వన్.

20 దెయముకు మిజి లోబడిజెనె ఇజి సరద లావు ఆము. గాని దేవుణు మీ పేరు వాండ్లు ముజిని బాడిడు రాస్త మనాన్ ఇజి నండో సరద ఆదు”, ఇజి వెహ్సాన్

21 అయావలె యేసు, దేవుణు ఆత్మదాన్ నండో సరద ఆజి, “ఓ బా, నీనె ఆగాసమ్దిజ్ బూమిదిజ్ ప్రబు. నాను నిజి పొగిడిజెన. ఎందనిజ్ ఇహిజ, గెణం మని వరిజ్, సదు మని వరిజ్, యా నిజమాతి సజతి డాప్తిదె, ఇజ్రి కొడెజ్ లెకెండ్ మని వరిజ్ తోరిస్తి. ఒబ బా, అయ లెకెండ్ కిదెజి నిజి ఇస్తం ఆతాద్.

22 నా బుబ్బు నజి విజి సజతిజ్ నా కీదు ఒపజెప్త మనాన్. మరిసి ఎయెండ్రో ఇజి అప్పొసినె నెస్సాన్. మరి ఎయెన్బా నెన్ఎన్. అప్పొసి ఎయెండ్రో ఇజి మరిసి ని అప్పొసిజ్ తెలివి కిదెజ్ మరిసి ఎర్లితకారె నెస్సార్. మరి ఎయెన్బా నెన్ఎన్”, ఇజి వెహ్సాన్.

23-24 వాండ్లు సిసూర్ దరోజ్ ముహ్తండ్రె, “దేవుణు వందిజ్ వాండ్లు కిని ఏలుబడిజ్ వందిజ్ మీరు సుడేతి గొప్పు సజతిజ్ సుడేదెజ్ అట్టి మీరు అంతు నిల్లి సరద ముజినికార్. ఎందనిజ్ ఇహిజ, నండో ప్రవక్తరు, రాజురుబ్బు మీరు సుడేజినికెజ్, సుడేదెజ్ ఇజి ఆస ఆతార్ గాని సుడేదెజ్ అట్ఎతార్. మీరు వెహికెజ్ వెండ్రెజ్ ఇజి ఆస ఆతార్ గాని అట్ఎతార్”, ఇజి వన్ని సిసూరిజ్ నె వెహ్సాన్.

పడకాదికాన్ ఎయెన్ ఇనివందిజ్ యేసు వెహ్సాన్

25 ఉండ్రె నాండిజ్, యూదురు రూలు నెన్పిస్సాన్ ఒరెన్ నిజ్జి, “ఓ బోదకినికి, ఎలాకాలం దేవుణు వెట బత్కిని బత్కు దొవ్క నాను ఇనిక కిదెజ్?”, ఇజి యేసుజ్ పరిక్కు కిజి వెన్బాతాన్.

26 అందెజె వాండ్లు, యూదురి రూలుదు ఇనిక రాస్త మనాద్. బాన్ ఇనిక సద్విజిని?”, ఇజి వెహ్సాన్.

27 వాండ్లు, “నీ ప్రబుఆతి దేవుణుదిజ్ నీ పూర్తి మన్నుదాన్, నీ పూర్తి పాణమదాన్, నీ పూర్తి సత్తుదాన్, నీ పూర్తి బుద్ధిదాన్ ప్రేమిస్తెజ్”. మరి, “నిజి నీను ప్రేమిసిని లెకెండ్ మహివరిజ్ ప్రేమిన్ఆ ఇజి రాస్త మనాద్”, ఇజి వెహ్సాన్.

28 అందెజె యేసు, “నీను నెగెణ్ వెహ్సా. ఆహె కిఆ. అయావలె నీను ఎలాకాలం దేవుణు వెట బత్కినిలె”, ఇజి వన్ని వెట వెహ్సాన్.

29 అయావలె అయా యూదురి రూలు నెన్పిస్సాన్ నీతి నిజాయితి మనికాన్ నాను ఇజి తోరె ఆదెజ్ ఈపా వెన్బాతాన్, “నా పడకాదికాన్ ఎయెన్?” ఇజి.

30 అందెజె యేసు ఈపా మహ్సి వెహ్సాన్. “ఒరెన్ యెరుసలెమదాన్ డిగిజి యెరికొ పట్టుమ్దు సొనివెలె నెగెండార్ డొజారి వన్నిజ్ అస్తార్. అస్తార్, వాండ్లు తోడిగితి మహికెజ్ లాగితార్. వన్నిజ్ ఇజ్రి పాణం ఇట్టారె డెయితారె డిస్త సాహార్.

31 యావలె ఒరెన్ యూదురి పుజెరి ఆ సరిదాన్ సొండ్రెజ్ పణి తాక్తాద్. వాండ్లు వన్నిజ్ సుడేతాండ్రె పడకదాన్ సాహాన్.

32 అయా లెకెండ్నె, లేవి* ఒరెన్ ఆ సరిదాన్నె సాహాన్. గాని వాండ్లుబా సుడేతాండ్రె పడకదాన్ ఎరెలిజి సాహాన్.

33-34 అయా సరిదాన్నె ఒరెన్ సమరియ వాండ్లు పయాణం కిజి మహాన్. వాండ్లు అర్తి మని వన్నిజ్ సుడేతాండ్రె వన్ని పాణం నొతాద్. వన్ని డగ్రు సాహాండ్రె ఒలివ ఇని నూనె, డ్రాక్కుట్లు వాక్తాండ్రె వన్ని గాయమ్కాజ్ తోహ్కాన్. వాండ్లు వన్ని సొంత గాడెది మున్ను ఎక్కిస్తాండ్రె ఉండ్రె లారిజి ఇండ్రె సాహాన్. వన్నిజ్ నెగెణ్ సుడేతాన్.

35 మహ్సి నాండిజ్ వాండ్లు రుండి వెండి రుపాయిజ్ లాగితండ్రె లారిజి సవ్కారిజ్ సితాన్. సితండ్రె, “వినిజ్ నెగ్రెండ్ సుడేతా. వినివందిజ్ మరి కర్సు ఆతి మహిజ నాను మరెజి వానివలె అయా డబ్బు నిజి సీన”, ఇజి వన్ని వెట వెహ్తాండ్రె సాహాన్.

36 యా కత వెహ్సి వీస్తి వెనుక, యేసు వన్నిజ్, “డొజారి అస్తి వన్నిజ్ యా మువెర్ లొఇ ఎయెన్ పడకాదికాన్ ఆనాన్, ఇజి నీను వెహ్తా”, ఇజి వెన్బాతాన్.

37 యూదురి రూలు నెన్పిస్సాన్, “వన్ని మున్ను పాణం నొత్తికాండ్రె, వన్ని పడకాదికాన్”, ఇహాన్. అందెజె యేసు, “నీను సొన్ని యా లెకెండ్నె కిఆ”, ఇజి వెహ్సాన్.

మార్త మరియ

* 10:32 10:32 దేవుణుగుడిదు లోజు సేవ కిని లేవి జాతిదు మన్నికాండ్రె లేవి ఇనికాన్.

38 యేసు ని వచ్చి సీసురు పయనం కిజి సొన్ని మహార్. ఉండ్రీ నాటో సూహార్. అబ్బె మార్త ఇన్ని ఉండ్రీ బోదెలి దన్ని ఇండ్రో వన్నిజ్ డగ్రు కిత్తాద్.

39 దనిజ్ మరియ ఇన్ని ఉండ్రీ తజీసి మనాద్. అది ప్రబు పాదమక డగ్రు బస్తాదె వన్ని బోద వెంజి మహార్.

40 మార్త విజు పణి వందెజ్ నండో బాద ఆజి వన్ని డగ్రు వాతాద్. వాతాదె, “ప్రబువా, నాను ఒరెనె పణి కిదెజ్ నా తజీ డిఃస్త మనాద్. నిజీ బాద సిల్లెదా? నజీ తోడూః కిఅ ఇజి దనిజ్ వెహోఅ”, ఇజి వెహోద్.

41-42 అందెజె యేసు, “మార్త, నీను నండో పణిజ వందెజ్ విసారిసి బాద ఆజిని. గాని ముకెలమతిక ఉండ్రె. మరియ అయా నెగ్గి దనిజ్ కోరితాద్. దన్నిబాణిజ్ ఎయెనబా అయొక లాగ్గి ఒతెజ్ అట్ఎన్”, ఇజి వెహోన్.

11

యేసు పార్లనం నెన్పిస్సాన్

1 ఉండ్రీ నాండిజ్ యేసు ఉండ్రీ బాడిఃదు పార్లనం కిజి మహాన్. వాండ్రు పార్లనం వీస్తి వెన్కా, వన్ని సీసూర్ లోఇ ఒరెన్, “ప్రబువా, యోహూను వన్ని సీసూరిజ్ పార్లనం నెన్పిస్సాన్. అయాలెకెండ మజిబా పార్లనం నెస్సినఅ”, ఇజి వన్నిజ్ వెహోన్.

2 అందెజె యేసు వరిజ్, మీరు పార్లనం కినివెలె ఈహు వెహూ. “మున్ను మన్ని మా బుబ్బు, లోకుర్ విజెరె నీ పేరు గొప్ప నెగ్గిక ఇజి గవరం సిపిర్. నీను లోకుర్ విజెరిజ్ ఏలుబడిః కిపిన్.

3 రోజు రోజు కావాలిస్తి టిండి మజి సిదా.

4 మజి పాపమక కితి వరిజ్ మాపు సెమిస్తి పజి నీను మా పాపం నెమిన్అ. తప్పు కిబిస్సినెఇ అనెజ్ మాలోఇ రెవిండ మజి ఇడోఅ”, ఇజి వెహోన్.

5-6 మరి యేసు వరివెట ఈహు వెహోన్. “మీ లోఇ ఒరెన్ వన్నిజ్ ఒరెన్ కూలాయెన్ మనాన్. నీను మదరెయతు వన్నిబాన్ సొన్ని, ‘ఓ కూలవాండ్రు, నజీ మూండ్రీ రొట్టెజ్ బదలు సిదా. ఎందనిజ్ ఇహిజ, మరి ఒరెన్ కూలాయెన్ పయాణం కిజిని సరిదాన్ నా బాన్ వాత మనాన్. వన్నిజ్ సీదెజ్ నాబాన్ ఇనికబా సిల్లెద్”, ఇజి వెహోన్.

7 అయావలె వాండ్రు లోఇహాన్, “నజీ బాద కిమ. నెహాల కెహ్తా మనాద్. నా ఇజ్జి కొడోఃర్ నా వెట నిద్ర కిజినార్. నిజ్జి సీదెజ్ నాను అట్ఎ”, ఇజి వెహానండ్రా?

8 నాను మిజి వెహోన్, వన్నిజ్ నిజ్జి సీదెజ్ ఇస్టం సీలిజ్బా వాండ్రు నిజ్జి సీనాన్. ఎందనిజ్ ఇహిజ, వాండ్రు కూలాయెన్ ఇజి ఒడిఃబిజి అచు కిపిన్. గాని సిగు డిస్తాండ్రె ఏక ఏక లోసినాన్ ఇజి ఒడిఃబిజి నిజ్ కావలస్తిక విజి సీనాన్.

9 అందెజె నాను మిజి వెహోన్, మీరు ఇనిక లోస్సిదెరో, అక్క దేవుణు మిజి సీనాన్. ఇనిక మీరు రెబాజినిదెరో అక దేవుణు మిజి సీనాన్. కొత్తు, మీ వందెజ్ దేవుణు సేహ్లా రెనాన్.

10 ఎందానిజ్ ఇహిజ, లోస్సి విజెరిజ్ దోహోక్సె. రెబాని వన్నిజ్ తోర ఆజినాద్, కొత్తని వన్నివందెజ్ సేహ్లా రే ఆనాద్.

11 మీ లోఇ అప్సాని ఆతికాన్ ఎయెనబా, వన్ని మరిసి మెయ లోస్తిజ, సరాన్ సీనాండ్రా?

12 కొరు గుడ్డు లోస్తిజ, సారకుప్పి సీనాండ్రా?

13 అహిజ, మీరు నెఇకిదెర్ అతిజ్బా, మీ కొడోఃరిజ్ నెగ్గి ఇనాయమక సీదెజ్ నెస్సిదెర్. అహిజ, మున్ను మన్ని మీ బుబ్బు వన్నిజ్ లోస్సి వరిజ్ ఎసానో దేవుణు ఆత్మ సీనాన్”.

యేసు బయిల్జెబెలు

14 యేసు ఒరెన్ వన్ని బాణిజ్ గుల్ల దెయమదిజ్ పేరిజి మహాన్. ఆ దెయం డిఃస్తి సొహి వెన్కా, గుల్ల ఆతి మహికాన్ వగ్గితాన్. ఆక నుడతారె లోకుర్ విజెరె బమ్మ ఆతారె.

15 గాని వరి లోఇ నెగొండార్, “దెయమకాజ్ నెయ్ కి ఆతి బయిల్జెబెలు సత్తుదాన్ వీండ్రు దెయమకాజ్ పేరిజినాన్ ఇజి వగ్గితారె.

16 మరి సెగొండార్ వన్నిజ్ పరిస కిడెజ్ నుడఃతార్. దేవుణునె వినిజ్పోక్త మనాన్ ఇజ రుజుప్ కిడెజ్ ఉండ్రీ గుర్తు లెకెండ్ ఉండ్రీ బమ్మ అని పణికిజ తోరిన్ అ ఇజ వెహ్తార్.

17 వాండ్రు వరి ఆలోసన నెస్తాండ్రె వరి వెట ఈహు వెహ్తాన్, “ఎమేణి దేనమ్దికార్బా వరిజ్ వారి జటిజ్ ఆజి కేట ఆతిజ పాడాఃనాద్. ఆపా, ఉండ్రీ కుటుమ్దికార్బా వరిజ్ వారి జటిజ్ ఆజి కేటఆతిజ, ఆ కుటుం నిల్వద్.

18 అయాలెకెండ్ సయ్తాను దెయమ్కుబా వరిజ్ వారి జటిజ్ ఆజి కేట ఆతిజ, సయ్తాను వరి ముస్సు కిని ఏలుబడిః ఎలాగ నిల్నాద్? సయ్తాను సత్తుదాన్ నాను దెయమ్కాజ్ పేరజిన ఇజ మీరు వెహ్సినిదెర్ గద్.

19 అహిజ, మీ సొంత లోకుర్ ఇన్ని దని దనటాన్ దెయమ్కాజ్ పేరజినార్. అందెజి మీ సొంత లోకుర్నె మీరు తప్పిదెర్ ఇజి రుజుప్ కిజినార్.

20 నాను దేవుణు సత్తుదాన్ దెయమ్కాజ్ పేర్త మన్నుఇహిజ దేవుణు ఏలుబడిః కినిక మీడగు వాతమనాన్ ఇజి రుజుప్ ఆజినాద్.

21 విజు అయుదమ్కు తోడిఃగిజి ఒరెన్ సత్తుమనికాన్ వన్నిఇల్లు అస్తి విజు కావ్ కితిజ, ఇనికబా సొరిసాన్వద్.

22 గాని వినిజ్ మిస్తి నండో సత్తు మనికాన్ ఒరెన్ వినిజ్ అస్తాండ్రె విని ముస్సు గెలిస్తిజ, వీండ్రు నమ్మితి అయుదమ్కు విజు వాండ్రు లాగ్గి, విని అస్తి సీబాన సీనాన్.

23 నా దరిజ్ మన్ఇకాన్ నజి పగాతికాన్. నా వెట మంద కిఇకాన్, సెర్సిస్సాన్.

24 ఉండ్రీ దెయం ఒరెన్ వన్నిజ్ డిఃస్తి సొహి వెనుక, దనిజ్ మండ్రెజ్ బాడ్డి రెబాజి బయిలుదు బూలాజినాద్. గాని ఎంబెబా దనిజ్ బాడ్డి దోహాక్ ఇతిజ్, “నాను డిఃస్తి వాతి నా ఇండ్రో మరజి సొనాలె”, ఇజి వెహ్తాద్.

25 మరజి వాతిజ్ అది డిఃస్తివాతికాన్ నెగెండ్ సిపాజి సుబ్బుర్ కిజి ఇల్లు లెకెండ్, నెగెణ్ మనాన్ ఇజి నెస్తాద్.

26 నస్తివలె అది మర్రి సొన్ని దనిజ్ ఇంక సెఇకెజ్ ఆతి మరి ఏడు దెయమ్కాజ్ కూక్కు తనాద్, అవిక్ వన్ని లోఇ సొన్ని అబ్బి కినె. అయవలె వన్ని గతి ముందాహి దన్నిజ్ ముస్సు క్షణ్ణ మనాద్.

27 యేసు యా మాటిజ్ వెహ్సి మహివలె, ఆ మంద లోఇ మన్ని ఉండ్రీ బోదెలి, “నిజి కాన్సి పోసకితి నీ యాయ అంతు సిల్లి నర్ద మంజినికాద్”, ఇజి డటం వెహ్తాద్.

28 అయవలె వాండ్రు, “నిజుమెనె, గాని దేవుణు మాట వెంజి అయావజ నడిని విజెరెబా అంతు సిల్లి నర్ద మంజినికార్”, ఇజి వెహ్తాన్.

29 లోకుర్ మరి నండో కూడిఃతి మహివలె, వాండ్రు ఈహు వెహ్తాన్. “యా తరమ్దికార్ నండో సెఇకార్. వారు ఉండ్రీ గుర్తు లెకెండ్ ఉండ్రీ బమ్మ అని పణి కి అ ఇజి వెనబాజినార్. గాని దేవుణు ప్రవక్త ఆతి ఓనెజ్ జర్దిదిక ఆవండ, మరి ఇన్ని గుర్తుబా వరిజ్ తోరెవద్.

30 నినవె పట్టుమ్దివరిజ్ ఓన ఎలాగ ఉండ్రీ గుర్తు మహండ్రో అయాలెకెండ్ లోకు మరిసెఱితి నాను యా తరమ్దివరిజ్ ఉండ్రీ గుర్తు మనాన్.

31 ఆక్కురి దినమ్ది తీర్పుదు, దనిణ్ దేసెమ్ది రాణి యా తరమ్ది లోకుర్ వెట నిజ్నాదె వరి ముస్సు నేరం మొప్పాద్. ఎందనిజ్ ఇహిజ, సొలోవెహున వెహ్సిని గెణం మన్ని మాటిజ్ వెండ్రెజ్ బూమి కొసాదు మన్ని దని దేసెమ్దాన్ అది వాతాద్. ఏలు సొలోమొనుజ్ మిస్తి పెరికాన్ ఇబ్బె మనాన్.

32 కడఃవేరి దినమ్ది తీర్పు, నినివె పట్టుమ్ది లోకుర్ యా తరమ్ది లోకుర్ వెట నిల్నారె, వరి ముస్సు నేరం మొప్పాద్. ఎందనిజ్ ఇహిజ, ఓన వెహ్తా బోదె వెహరె, వారు పాపమ్కు డిఃసి ఒప్పుకోటార్. ఏలు ఓనెజ్ మిస్తి పెరికాన్ ఇబ్బె మనాన్.

ఒడోల్ది దీవవందిజ్ వెహ్సినాన్

33 ఎయెర్బా దీవ కనిసి వెనుక డాఃప్పినో, తూము ముసినో ఇడెవర్. గాని లోఇ వానివరిజ్ జాయి తోరెదెజ్ ఇజి దీవ కంతూదుద్నె ముస్సునె ఇడ్వార్.

34 నీ ఒడోలేది దీవ లెకెండె నీ కణుకు. నీ కణుకు నెగ్రెండ మనివలె, నిజీ విజు నుడోడెజ్ ఆనాద్. అయాకెజ్ సెకెజ్ అతిజ, నిజీ నుడోడెజ్ అటేజ.

35 అందెజ్ సీకటు మన్ఎండ, నాను నెస్సెస్సి నిజమాతి సజతిజ్ అతి జాయి మీ మన్నుదు మండ్రెజ్ నుడోడు.

36 అందెజ్ మన్ను పూర్తి అయా జాయిదాన్ నిడ్రింతి మహిజ, అయాక నాను నెన్పిస్తి వజ, నెగ్రెండ మీరు బత్తిజనిదెర్ ఇజ తోర్నాద్. ఉండ్రె పెరి జాయి నీ మున్ను, డెయితిజ ఎలాగ మంజినాద్, అయాలెకెండె అయా జాయి నాను నెన్పిస్తి వజ మీరు బత్తిజనిదెర్ ఇజ తోర్నాద్.

37 యేసు వర్గిజ వీస్తి వెనక ఒరెన్ పరిసయు వాండ్రు, వన్ని వెట ఉండెజ్ రల, ఇజ కూక్నాన్. అందెజ్ వాండ్రు లోఇ సాహండ్రె ఉండెజ్ బస్తాన్.

38 ఉణి ముజాల వాండ్రు యూదురిజ్ మన్ని అలవాటు వజ కియు నోరబావితాన్ ఇజ నెస్తాండ్రె, ఆ పరిసయు వాండ్రు బమ్మఅతాన్.

39 అందెజ్ ప్రబు ఈహు వెహ్సాన్, “పరిసయురుజాండె, లోకుర్ మున్నుహాన్ మిడిస్తి ఇడ్డి గిన్నెజ్ని సాడువెజ్ లెకెండె మన్నికిదెర్? మీరు మిజిబా వెల్లిహాన్ నుడిజ నెగ్గిపరి లెకెండె తోరె ఆజినిదెర్. గాని మీ మన్ను సెజ బుద్దిజాణిజ్, కకుర్తిదాన్ కూడితి ఆసదాన్ నిండ్రెతె మన్నె.

40 బుద్ది సీలికిదెరా, ఒడోలే తయార్ కిత్తి దేవుణునె మీ మన్నుదు మన్ని ఆలోసనమ్కు నెసినికాన్

41 మీరు కనికారం ఆజ, మిజి కల్గితి మన్ని లోఇహాన్ సీల్లి వరిజ్ దాన సీదు. అయావలె దేవుణు ఎద్రు నెగ్గికిదెర్ ఆనిదెర్.

42 పరిసయురుజాండె, అబాయా, మిజి ఎసానో కస్టమ్కు వానెలె. ఎందానిజ్ ఇహిజ, పుదిన, నదాప, విజు కునెజ్, విజు దనిజ్బా దనం బాగం సీజినిదెర్. గాని మీరు లోకురిజ్ నాయం కిజదెర్. దేవుణుదిజ్ ప్రేమిన్ఇదెర్. రుండిబా ఉండ్రెలెకెండె కిజ మంజినిక ఇహిజ ఒద్దె నెగ్రెండె మహద్ మరి.

43 పరిసయురుజాండె, అబాయా మిజి ఎసానో కస్టమ్కు వానెలె. ఎందానిజ్ ఇహిజ, యూదురి మీటిజ్ ఇల్కాజ్ ముకెలమాతి బాడిమ బస్తాజ్ మీరు ఆస ఆనిదెర్. నతెజ నడిమి పెరికార్ ఇజ మాడెసి ఆదెజ్ క్కొరిజినిదెర్.

44 పరిసయురుజాండె, అబాయా, మిజి ఎసానో కస్టమ్కు వానెలె. ఎందానిజ్ ఇహిజ, మీరు తోరెఇ దూకిలెకెండె మంజినిదెర్. లోకుర్ దూకి ఇజ నెన్ఎండ వన్నా మున్ను, నడిజినార్.

45 అయావలె యూదురి రూలు నెన్పిస్సాన్ ఒరెన్, “బోదకినికి, నీను యా లెకెండె వెహ్సా మజిబా దునలాడిజిని”, ఇజ వెహ్సాన్.

46 అందెజ్ యేసు, యూదురు రూలు నెస్సెస్సికిదెరా, అబాయా మిజి ఎసానో కస్టమ్కు వానెలె. ఎందానిజ్ ఇహిజ, లోకుర్ కిదెజ్ నసా కస్టం మన్ని యూదురి రూలుజ్, అలవాటుజ్ వారు కిదెజ్ ఇజ వెహ్సానిదెర్. గాని మీరు వరిజ్ ఉండ్రె డెడెజ్స్స, దాన్బా తోడు: కిజదెర్.

47 యూదురి రూలు నెస్సెస్సికిదెరా, అబాయా మిజి ఎసానో కస్టమ్కు వానెలె. ఎందానిజ్ ఇహిజ, మీ అనిరిజ్ సప్తి ప్రవక్తరి, దూకిజ్ మున్ను మీరు గుండమ్కు పెరజిన్దెర్.

48 అయావలె వారు కితివణివెట మీరు కూడితి మనిదెర్ ఇజ రుజుప్ కిజినిదెర్. సాక్సెర్లెకెండె మనిదెర్ వారు ప్రవక్తరిజ్ సప్తార్. మీరు పరి గుండమ్కు పెరజినిదెర్.

49 అందెజ్, దేవుణు వన్ని గెణమ్దాన్, ‘నాను పరి నడిమి ప్రవక్తజ, అహిస్తుడుజ పోక్కు. పరి లోఇ నెగొండారిజ్ వారు సప్తార్లె. మరి నెగొండారిజ్ మాలెజ్ కిసార్లె.

50-51 యా లోకం పుట్టి బాణిజ్ మొదొల్ని లోకుర్ సప్తి విజు ప్రవక్తరి నల్ల వందిజ్ యా తరమ్ది లోకురిజ్ సిక్కు వానాద్. ఇహిజ, ఏబేలు నల దాన్ మొదొల్ని జెకరియ నల దాక. జెక్రయెజ్ నంద సుర్ని మాలి పీటని దేవుణు వందిజ్ కేటఅతి గది, దినిజ్ నడిమి నె సప్తార్. వరిజ్ విజెరిజ్ సప్తికెజ్ విజు యా తరమ్దిపరి పణి నె ఇజ నాను నిజం మీవెట వెహ్సాన్.

52 యూదురి రూలు నెస్సెస్సికిదెరా, అబాయా, మిజి ఎసానో కస్టమ్కు వానెలె. ఎందానిజ్ ఇహిజ, దేవుణు వందిజ్ మన్ని గెణమ్దు నడిమిని సేహాలది తాలం మీరు అసినిదెర్. మీరు దేవుణుదిజ్ టెటాజ్ నెన్ఇదెర్. దేవుణుదిజ్ నెస్తాజ్ ఆస మన్ని వరిజ్ మీరు అడ్డు కిజినిదెర్.

53-54 వాండ్రు అబెదాన్ సోపా వెనుక, పరీసయరు యూదురి రూలు నెస్తిస్సికార్ నండో కోపమ్దాన్ వన్నిముస్సు నేరం మొష్టార్. వన్ని వెయ్దాన్ వాని మాటేజ లోఇ తప్పజ్ అస్తైజ్ ఇజి నండో సజతిజ వందిజ్ ప్రస్సైజ్ వెనబాజి మహార్.

12

1 నస్తివలె వెయుజ్వెయుజ్ లోకుర్ కూడేజి వాతార్. ఒరెనిదిజ్ ఒరెన్ మట్టె ఆజి మహార్. అయావలె యేసు ముజాలె వన్ని సిసూర్ వెట ఈహు వర్గిదెజ్ మొదోల్స్తాన్. “మాపు నెగ్గెవ్ ఇజి పరిసయరు తోరె ఆని వేసం, పులూని దూరు లెకెండో మనాద్. అందెజి జాగర్త మండ్రు.

2 డాష్టిక మన్నికెజ్ విజు తోరెఆనెలె. నెన్విండో ముస్సు మన్నికెజ్ విజు నెసె ఆనెలె.

3 అందెజి మీరు సీకటుదు వర్గితికెజ్ జాయిదు వెనార్. ఇహిజ, డాడేజి వర్గితికెజ్ విజెరి వెనార్లె. మీరు గదిజ, గిబ్బిదు వర్గితికె మెడెజి ముస్సు సాట్నార్లె.

4 నా కూలెజాతి మీ వెట వెస్సిన్, ఒడోల్దిజ్ సప్తి వెనుక మరి ఇనికబా కిదెజ్ అట్ఇ వరిజ్ తియెల్ ఆమాట్.

5 గాని మీరు ఎయెరిజ్ తియెల్ ఆదెజ్ ఇజి నాను నెన్పిన్సు. ఒడోల్దిజ్ సప్తి వెనుక, ఎలాకాలం మంజిని బాడిడు పొకెజ్ అతికారం మన్ని వన్నిజ్ తియెల్ ఆదు. నిజమె నాను వెస్సిన్, వన్నిజ్ తియెలాదు.

6 అయదు పంట పొటిజ రుండి కానుదిజ్ పోర్నార్ గదె? గాని వన్కాలొజ్ ఉండ్రె దనిజ్బా దేవుణు పోన్వెన్.

7 మీ బురాది కొప్పు విజుబా దేవుణు లెక్కిన్ మనాన్. తియెలామాట్. మీరు నండో పంట పొటిజ మిస్తి విలువ మన్నికిదెర్.

8 నాను మిజి వెస్సిన్, లోకుర్ ముజాలెనజి ఒప్పుకోణి ఎయెవన్నిజ్బా లోకుమరిన్ ఆతి నాను దేవుణు దూతెజి ఎద్దు ఒప్పుకోణా.

9 గాని లోకుర్ ఎద్దు సజి నెన్వె ఇన్ని వన్నిజ్ దేవుణు దూతెజి ఎద్దు నాను బా నెన్వె ఇజి వెమ్మా.

10 లోకుమరిన్ఆతి నా ముస్సు ఎయెన్బా పడేఇ మాట వర్గితిజ, దేవుణు వన్నిజ్ సెమిస్సాన్. గాని దేవుణు ఆత్మదిజ్ దూసిస్సి ఎయెరిజ్బా దేవుణు సెమిన్వెన్.

11 వారు మిజి యూదురి మీటిజ్ ఇల్కాణిజ్ యూదురి అతికారిజి ఎద్దునో, వెద్దల్జి ఎద్దునో ఒనార్. అయావలె ఎలాగ మరజి వెష్టాజ్, ఇనిక వెష్టాజ్, ఇనిక వర్గిదెజ్ ఇజి బెజిఆమాట్.

12 ఎందానిజ్ ఇహిజ, మీరు వర్గిదెజ్ మనిక అయా గడియెన్ దేవుణు ఆత్మ మిజి నెన్పిస్సాన్.

ఆస్తివన్ని బుద్దిసిల్లి వన్నివందిజ్ నెన్పిసిని కత

13 అయావలె ఆ మందలోఇ ఒరెన్, “బోదకినికిదా, నా బుబ్బ గణెస్తి దనిజ్ సజి వానివంతు సీబాజి సిఅ ఇజి నా అన్యెజ్ వెహోఅ”, ఇజి వెష్టాన్.

14 అయావలె యేసు, “ఒరె, మీ ముస్సు తీర్పు కిని వన్ని వజనో, సీబాజి సీని వన్ని వజనో సజి ఎయెన్ నిల్స్తాన్?” ఇజి వెష్టాన్.

15 మరి వరిజ్ వెష్టాన్, “జాగర్త మండ్రు. ఇని దనిజ్బా లావుఅసెజ్ ఆమాట్. ఎందనిజ్ ఇహిజ, ఎసా ఆస్తిమన్నికాన్ ఆతిజ్బా, వన్ని ఆస్తిలోఇ వన్ని బత్తు ఆవిద్. ఇహిజ ఆస్తివన్నిజ్ నిజమాతి బత్తు సివిద్.

16 మరి వాండ్రు వరిజ్ కతపజి ఈహు నెన్పిస్సాన్. “ఒరెన్ ఆస్తి మనివన్నిజ్ బూమిదు నండో పంట పండితాద్.

17 అయావలె వాండ్రు, ‘నా గింజి ఇడదెజ్ నజి బాడ్డి సాల్ఎద్. అందెజి ఇనిక కిదెజ్?’, ఇజి వన్నిమన్సుదు వాండ్రు ఒడిబితాన్.

18 ఒడిబితాండ్రె, ‘నాను ఈహుకిన. నా గాదిజ్ లాగ్గి వెరికెజ్ కిన్. అబె నా గింజిజ్, మహి సామానమ్కుజ్ విజు ఇడ్డు’, ఇజి వెష్టాన్.

19 మరి నాను, నా వెట ఈహు వెప్పా, ‘సజి నండో పంటిజ్ వందిజ్ నండో ఆస్తి కుడుజ్వు మన్సు. సుకం ఆఅ. ఉణెఅ, తిన్అ, నరద్ ఆజి మన్అ’, ఇజి.

20 గాని దేవుణు వచ్చినట్లు, ఓ బుద్ధి సీలికి, యా రెయునె నీ పాణం లోనిన. అయావలె నీ వందిజ్ ఇడ్డి మనికెజ్ ఎయెరిజ్ ఆనెలె? ఇజ

21 సొంత బత్తు వందిజ్ ఆస్తి కుడుఱ్ఱి ఎయెరిజ్ బా యా లెకెండ్ వానాద్. గాని, దేవుణు ఎద్దు, దేవుణుదిజ్ ఇస్టం ఆనివజ వాండ్రు ఆస్తిమనికాన్ ఆపిన్”.

ఇని దనిజ్ బా విసారిస్కాట్.

22 మరి, యేసు వచ్చి సీసూర్ వెటె ఈహు వెప్పినాన్, “అందెజె, నాను మిజి వెప్పిన, మీరు ఇనిక ఉండెజ్ ఇజ పాణం వందిజ్ విసారిస్కాట్. ఇనిక తోడెగిదెజ్ ఇజ ఒడెజ్ లవందిజ్ విసారిస్కాట్.

23 ఎందానిజ్ ఇహెజ, టిండి మున్కు పాణం ముకెలమతిక. సొక్కెజ్ మున్కు ఒడెజ్ ల ముకెలమతిక.

24 కాకెజ వందిజ్ నుడెదు. అవి ఏతెఉ, కొయిఉ, వన్కాజ్ గాదినొ గప్పెజ్ నొ సిల్లు. గాని దేవుణు వన్కాజ్ తిండి సీజనాన్. అహెజ పొటిజ మున్కు మీరు ఎసొ విలువ మనికెదెర్.

25-26 మీ లొఇ ఎయెన్ బా విసారిసి వచ్చి బత్తుదిజ్ ఉండ్రీ గంటబా కుడుఱ్ఱి మీ వయసు పిరిపైజ్ అట్ నెదెర్? అట్ ఇదెర్. యా ఇజ్ పణికిదిజ్ మీరు అట్ ఇదెర్ ఇహెజ మరి ఎందనిజ్ మహి పెరి నజతిజ వందిజ్ విసారిస్కెదెర్.

27 పూజదిజ్ నుడెదు. అవి కస్టబడిఉ. సొక కెదెజ్ నూలుజ్ తయార్ కిఉ. ఆజ్ బవిజ్ ఆస్తి కలిగితి మచ్చి సొలోమెన్ రాజు యా ఉండ్రీ పూజలెకెండ్ సొకు మచ్చి ఉండ్రీ సొక్కె తోడిగివెతాన్ ఇజ నాను మిజి వెప్పిన.

28 నేండ్రు మంజి విగెహెజ్ సిసూదు విసిర్చి మడిజు మంజిని గడ్డిదిజ్ యా లెకెండ్ దేవుణు సొకు సితాన్, ఇహెజ ఇజిరి నమకం మచ్చి కెదెరా మరి ఒద్దె నెగెండ సొకెజ్ మిజి సొక్కె తోడిగిన్ పివెండ్రా?

29 ఇనిక ఉండెజ్, ఇనిక తిండ్రెజ్ ఇచ్చి దనిజ్ ఎత్తు కిజి విసారిస్కాట్.

30 ఎందనిజ్ ఇహెజ, దేవుణుదిజ్ నెన్ ఇకారెనె విన్కు వందిజ్ రెబాజనార్. మిజి యాకెజ్ కావాలె ఇజి మీ బుబ్బాతి దేవుణు నెస్కాన్.

31 గాని దేవుణు మిజి ఏలుబడి: కిసాన్ ఇజి ఆసఆదు. అయావలె దేవుణు మిజి కావాలిస్తెకెజ్ విజు సీనాన్.

32 ఇజిరిమంద తియెల్ అమాట్. దేవుణు, వచ్చి బత్తుదు రాజులెకెండ్ ఇట్టి వరిజ్ నెగ్గెకెజ్ సీదెజ్ మీ బుబ్బు ఇస్టం ఆత మనాన్.

33 మిజి కల్లితి మనికెజ్ పొర్చి బీదవరిజ్ సీదు. అయావలె మీరు దేవుణు మంజిని బాడిదు మీ వందిజ్ ఆస్తి గణెస్కెదెర్. అబ్బె డొజారి రపిన్. కరి తిన్ ఏద్. అందెజె మీ ఆస్తి తకు ఆపిద్.

34 ఎందనిజ్ ఇహెజ, మీ ఆస్తి ఎంబె మనాదొ, అబెనె మీ మున్కుబా మంజినాద్.

35-36 ఎస్తివలెబా పణికిదిజ్ నడుఱ్ఱి ము తొహె ఆజి, తయార్ ఆజి మండ్రు. మీ దివెజ్ ఎస్తివలెబా కసిని మండ్రు. పెండ్రీ విందుదాన్ ఇండ్రొ వాజిని ఎజుమానిజ్ ఎద్దు నుడెజి మంజిని పణిమణిసిర్ పొలిసి మండ్రు. ఎజుమాని విందుదాన్ వాజి సేప్టా కొత్తివెలె వెటెనె సేప్టా వాండ్రు రేనాన్. నచ్చివరిజ్ పొలిసి మండ్రు.

37 ఎజుమాని వాతివెలె, వచ్చి వందిజ్ తెలి మంజి ఎద్దు నుడెజి మంజిని పణిమణిసిరికె నెగెద్. నిజమె నాను వెప్పిన, ఎజుమాని, నడుఱ్ఱి ము తొహె ఆజి, బోజెనమేదిజ్ వాతి వరిజ్ బనె కిజి వరిజ్ తిండి సీనాన్.

38 మదరెయితునొ కోడి: జామ్ నొ ఎజుమాని వాతివెలె, వచ్చి వందిజ్ ఎద్దు నుడెజి తెలి మంజిని వచ్చిజ్ నెగెద్.

39 ఎమేజి గడి: యదు డొజారి వానాన్ ఇజి ఇండ్రొ: జి ఏజుమాని నెస్తిజి వాండ్రు తెలి మంజి వచ్చి ఇల్లు బొరొ కివెండ్రు నుణాన్ ఇజి మీరు నెస్సు.

40 మీరు నా వందిజ్ ఎద్దు నుడెజి గడ్డి: యాదు, లోకు మరిసి ఆతి నాను వాన. అందెజె మీరు బా తయార్ ఆజి మండ్రెజ్ వెలె.

41 అయావలె పేతురు, “ప్రబువా, యా కతవజ మజినె నెన్ పిస్సిదా, విజెరిజ్ నెన్ పిస్సిదా?”, ఇజి యేసుజ్ వెన్ బాతాన్.

42 అందెజె యేసు, “నమకం మని, బుద్ధిమని గొత్తి మణిసి ఎయెన్? ఎయెన్ ఇహిజ, ఇండ్రోణి మహి గొత్తియారిజ్ సరిఅతి గడ్డియా సుడేజి వరి కార్డుమజ వరిజ్ దోహక మన్ని తుడి సామనమకు సిదెజ్ ఇజ ఎజమాని వరిమున్ను, వీరపాటు కిత్తికాండ్రె.

43 ఎజమాని మరజి వానివలె వెహ్తావజి వణికితి వన్నిజ్ నెగద.

44 అయి ఎజమాని వన్నిజ్ కల్లితి మన్ని విజి దనిమున్ను, అతికారం మని వన్నిలెకెండ్ వన్నిజ్ కినాన్, ఇజి నాను నిజం వెహ్సాన్.

45-46 గాని, ఉండ్రీ వేల యా గొతియయెన్, ‘నా ఎజమాని వాదెజ్ అల్సెం ఆజినాన్’ ఇజి వన్నిమున్నుదు ఒడిబిజి, మహి గొతియారిజ్ గొతియాణికాజ్ డెయిజినాన్. వాండ్రు ఉణిజి, తింజి సోస్త మహాన్. ఆహె మహిజ్, వాండ్రు ఎద్రు సుడేగ దినమదు నెన్ ఇ గడియాదు వన్ని ఎజమాని వానాన్. అయావలె వాండ్రు వన్నిజ్ కత్తి దేవుణుదిజ్ నమ ఇ వరివెట వరి వందెజ్ తయారె కిత్తిమన్ని బాడ్డిదు పొక్కాన్.

47 ఎజమాని ఇష్టమకు నెనిబా అయావజి కిఎండ తయారాజి మన్ఎండ మన్ని గొతియ వన్నిజ్ నండో సిక్కిసినాన్.

48 ఎజమాని ఇష్టమకు నెన్ఎండ, సిక్కిదిజ్ తగితి పణిజ్ కితి వరిజ్ కండెక్ సిక్కినె సినాన్. ఎయెరిజ్ దేవుణు నండో సిత్త మనాండ్రొ వన్నిబాణిజ్ నండో లొస్సాన్. ఎయెన్ బాన్ దేవుణు మరి నండో ఒవజెప్ప మనాండ్రొ, వన్నిబాణిజ్ నండోనె లొస్సాన్.

49 సిసు లెకెండ్ మన్ని దేవుణు సిని సిక్కియా లోకమదు తత్తెజ్ నాను వాతమన. ఆక విజెరిజ్ సురనాద్. ఏలునె సురుదెజ్ మొదోల్సెజి బాగ మంజినాద్, ఇజి ఆన ఆజన.

50 కన్టం ఇని ఉండ్రీ బాప్తిసంబా లాగిఆదెజ్ మనాద్. ఆక్క పూర్తి కినిదాక నజి నండో విసారం మంజినాద్లె.

51 యా లోకమదు సమాదనం తత్తెజ్ నాను వాతమన్న ఇజి మీరు ఒడిబిజినిదెరా? సిల్లె, కేటకిదెజ్ నె వాత మన్న.

52 ఏలుదాన్ అయదుగురు మంజిని ఉండ్రీ కుటుం వరిజ్ వారి కేట ఆనారలె. మువీర్ ఉండ్రీ వడేశాద్ రివిర్ మరి ఉండ్రీ వడేశాద్.

53 వారు కేట ఆనారలె. అప్సాని మరిసిజ్ ని, మరిసి అప్సాని జ్ ని, అయిసి గాల్పిజ్ ని, గాడ్పి దని అయ్ సిజ్ ని, మీమ్ సి దన్ని కొడెసిజ్ ని, కొడెసి దన్ని మీమ్ సిజ్ ని పడిఎండ మంజినాద్లె.

54 అయావలె వాండ్రు మందలోకుదిజ్ ఈహు వెహ్సాన్, “పడేశుటదాన్ మొసాప్ వాతిక సుడేతిజి పిర్లు వానాద్లె, ఇజి మీరు వెహ్సాదెర్. ఆహె జర్గినాద్.

55 దనిణదాన్ గాలి వాతిజి గొప్పఎండ కినాద్ ఇజి వెహ్సాదెర్. ఆహె జర్గినాద్.

56 వేసం కినికిదెరా, మీరు బూమిదు ఆగానమదు జర్గినికెజ్ సుడేజి గుర్లు అస్సెజ్ నెస్సిదెర్. మరి ఎందానిజ్ యా కాలమదు జర్గినికెజ్ గుర్లు అస్సెజ్ మీరు అట్ఎండ మంజినిదెర్?

57 ఎమేణిక నాయం ఇజి మిజి మీరె తర్పు కిదెజ్ అట్ ఇదెరా?

58 మీ మున్ను నేరం మొప్పవన్నివెట లాయిరి కోర్టుదు సొస్సి మహివలె సర్లు వన్ని వెట రాజినం ఆదెజ్ సుడేదు. సిలిజ, వాండ్రు మిజి తీర్పు కిని వన్ని డగ్రు ఈడిసి ఒనాన్. తీర్పు కినికాన్ జమాన్జ ఒవజెప్పాన్. వాండ్రు మిజి జెలిదు ఇడ్సాన్.

59 తీర్పు కినికాన్ లొస్సి డబ్బు విజి సినిదాక జెలిదాన్ వెల్లి వాదెజ్ అట్ ఇదెర్ ఇజి నాను మిజి వెహ్సాన్.

13

పాపం డిసిసిదు, సిల్లిజ నాసనం వానాద్

1 అయావలె బాన్ మహికార సెగొండారె యేసుజ్, గలిలియాతి సెగొండారె వరిజ్ వెహ్సార్. ఇనిక వెహ్సార్ ఇహిజ, గలిలియాతికార పూజ కిజి మహివలె, పిలాతు వరిజ్ నపిస్తాన్. అయావలె పూజసిత్తి నలని లోకురన్లల కూడితాద్.

2 అందెజె యేసు వరిజ్, “వరిజ్ సప్తారె యా లెకెండ్ నండో బాదెజ్ కితారె. అందెజె వారు మహి గలిలియాతి వరి విజెరి ఇకం నండో పాపం కితికార ఇజి మీరు ఒడిబిజినిదెరా?

3 సిల్లెద్ ఇజ మీవెట వెహ్సిన. గాని మీరు పాపమకు డిసిసీదు. సిల్లిజ, మీరు విజదెరెబా అయాలెకెండ్ నాసనం ఆనిదెర్.

4 మరి సుడేదు, సిలోయొము ఇని పట్టుమ్దు నిరిండ్ తొప్తిమన్ని గుడిః అర్తిజ్, యెరూసలెమ్దు బత్తిజి మహికార్ వద్దెనిమితి మణిసి సాతార్. వారు బత్తిజిని వరి ఇంక నండొ సెఇకార్ ఇజ మీరు ఒడిఃబిజినెదెరా?

5 సిల్లె ఇజ నాను మీ వెట వెహ్సిన. గాని మీరు పాపం డిసిసీదు. సిల్లిజ, మీరుబా అయాలెకెండ్ నాసనం ఆనిదెర్.

6 మరి వాండ్రు కతవజ ఈహు నెన్పిస్తాన్. ఒరెన్ వన్నిజ్ ద్రాక్కు బోట మనాద్. అబ్బె వాండ్రు బొడెమరాన్ ఉండ్రీ ఉణుస్తాన్. వాండ్రు దన్నిపట్టు రెబాతివెలె ఇనికబా దోహోక్వతాద్.

7 అందెజె వాండ్రు, 'ఇదిలో నాను మూండ్రీ పంటజాణిజ్ యా మరాతి పట్టుజ్ రెబాజి వాజిన. గాని ఇనిక బా దోహోక్వతాద్. దినిజ్ కత్తి విసిరెఅ. దిన్నిదనాట్ యా బూమి ఎందనిజ్ పాడాడెజ్?', ఇజ బోట కాప్కిని వన్నివెట వెహ్సన్.

8 అందెజె వాండ్రు, "బాబు యా ఉండ్రీ ఏంటు మనిద్. నాను సుటులం కార్సి గతం పొక్కి నూణాట్.

9 అక్కవట్టు అన్విజ నెగెద్, అన్ఇజ కత్తి విసిరెఅ", ఇజ వెహ్సన్.

విస్త్రాంతిదినమ్దు నడుఃము వజితి ఉండ్రీ బోదెలిదిజ్నెగెణ్కెజినాన్

10 ఉండ్రీ విస్త్రాంతిదినమ్దు, యేసు ఉండ్రీ యూదురి మీటిజ్ ఇండ్రో బోద కిజి మహాన్.

11 అబె వద్దెనిమితి పంటజాణిజ్ నడుఃము వక్కి దెయం అన్వి ఉండ్రీ బోదెలి మహాద్. దన్ని నడుఃము వజితిజ్, అనల నెగెణ్ నిల్దెజ్ అట్వెద్.

12 యేసు దనిజ్ సుడేఃతాండ్రె, "రఅ", ఇజ డగ్రు కూక్తాన్. మరి, "బీబి, నిజి మన్ని కష్టమ్కాణిజ్ నాను డిసిసీవు", ఇజ దనిజ్ వెహ్సన్.

13 మరి దనిమున్ను వన్ని కికు ఇట్టాన్. వెటనె అది నెగెణ్ నిహదె, దేవుణుదిజ్ పొగిడిఃతాద్.

14 విస్త్రాంతి దినమ్దు యేసు నెగెణ్ కితిజ్, యూదురి మీటిజ్ఇండ్రోణి అతికారి నండొ కోపం ఆతాన్. ఆతాండ్రె, లోకురిజ్వపణి కిదెజ్ ఆరు దినమ్కు మనె. అందెజె మీరు ఆ దినమ్క లొఇ వాజి నెగెణ్ ఆదు. విస్త్రాంతి దినమ్దు రమాట్", ఇజ వెహ్సన్.

15 అందెజె యేసు, "ఒ వేసం కినికిదెరా, మీ లొఇ విజదెరెబా మీ డాఃసదిజ్, మీ గాడేదెదిజ్ విస్త్రాంతి దినమ్దు సాలాదాన్, డిసిసి ఒసి ఏరు సీజనిదెర్ గదె?

16 అహిజ, అబ్రాహముజ్ తెగ్రతి యా బోదెలిదిజ్ వద్దెనిమితి పంటజ్ సయ్తాను తొప్తా ఇట్టా మనాన్. విస్త్రాంతి దినమ్దు దనిజ్ తొహోక్కి బాణిజ్ డిసిసీస్తాజ్ కూడేవదా?", ఇజ వరిజ్ వెహ్సన్.

17 వాండ్రు యా మాటిజ్ వెహ్సెవలె వన్ని పగాతికార్ విజెరె సిగు ఆతారె, మొకొం డిప్తారె. గాని లోకుర్ విజెరె వాండ్రు కితి గొప్ప పెరిపణిజ్ వందిజ్ సర్ల ఆతారె.

18 మరి యేసు వన్ని లోకురిజ్, "దేవుణు వన్ని లోకురిజ్ కిని ఏలుబడిః ఇన్ని దనిజ్ పోలిత మనాద్. ఇనిదనివెట నాను పోలిస్సు?

19 అక్కసర్సు గింజదిజ్ పోలిత మనాద్. ఒరెన్ ఆక ఒతండ్రె వన్ని బోటాదు ఉణుస్తాన్. ఆక పిరిసి మరాన్ ఆతాద్. ఆగాసం మున్ను ఎగ్రిజిని పోటిజ్ దనికొమెజ మున్ను గూడుక్ తొహోక్తా", ఇజ వెహ్సన్.

20 మరి వెహ్సినాన్, "దేవుణు వన్ని లోకురిజ్ కిని ఏలుబడిః ఇని దని వెట పోలిత మనాద్?

21 అక్క పులెని దూరుదిజ్ పోలిత మనాద్. ఉండ్రీ బోదెలి అక్కబతాద్ మరి నండొ దూరు వెట కలప్తాద్. వాక్తి దూరుదిజ్బా పులాజ్ కితాద్.

ఇహ్సూ సరి

22 యేసు యెరూసలెమ్దు సొండ్రెజ్ ఇజ పయాణం కిజి మహివలె సరి పడఃకాద్ మన్ని నాహ్కజ్ పట్టుమ్కాజ్ బోదెని మహాన్.

23 అయాలె ఒరెన్, "ప్రబువా, సెగొండారె దేవుణు సిక్కుదాన్ తప్పె ఆనారా?", ఇజ వెన్బాతాన్.

24 అందెజె వాండ్రు వరిజ్, "ఇహ్సూ దారెబందరం దాన్ డుగిదెజ్ నండొ కష్టబడిడు. ఎందనిజ్ ఇహిజ, నండొండారె సొండ్రెజ్ సుడేఃజినారె. గాని వారు సొండ్రెజ్ అట్వెర్ ఇజ మీ వెట వెహ్సిన.

25 ఇండ్లోని ఎజుమాని నిజ్జి సేప్లా కెహ్లాతి వెన్యా మీరు వెల్లినిల్ని, సేప్లా కొత్తి “బాబు, మజి సేప్లా రేఅ”, ఇజి వెహ్సానిదెర్. అయావలె వాండ్రు, “మీరు ఎమేణికిదెరో నాను మిజి నెన్వి”, ఇజి వెహ్సాన్.

26 అందెజి మీరు, “ని వెట మూపు ఉణిజి, తింజి మహువ్. నీను మా వీదిజి బోదెన్సిగద”, ఇజి వెహ్సానిదెర్.

27 గాని వాండ్రు, “మీరు ఎమేణికిదెరో, మిజి నాను నెన్వి. నెఇవణి కిని మీరు విజెదె, నా బాణిజ్డిసి సొండ్రు”, ఇజి వెహ్సాన్”, ఇజి వెహ్సాన్.

28 మరి వాండ్రు, “అబ్రాహము, ఇస్సాకు, యాకొబురిజ్ విజెరో ప్రవక్తరు దేవుణు మంజిని బాడిఁదు వాండ్రు ఏలుబడిఁ కినివెలె మంజినిక సుడఁజినిదెర్. గాని వాండ్రు మిజి వెల్లి కినాన్. అయావలె, మీరు అడఁబాజి, పల్కు కొహ్లాక్కి ఎలాకాలం సిను మంజిని బాడ్డిదు మంజినిదెర్.

29 మరి, దేవుణు మంజిని బాడిఁదు వాండ్రు ఏలుబడిఁ కినివలె, తూర్పుదాన్ పడఁమటదాన్, ఉస్సున్దాన్, దసిణదాన్ నండో యూదురు ఆఇకార్ వాజి వింతుదు బస్సార్.

30 ఇదిలో, పెరికావ్ ఇజి ఒడఁబిలికార్ ఇజ్జకార్ ఆనార్. తగిజి మహికార్ ముజాలే ఆనార్”, ఇజి వెహ్సాన్.

యేసుయెరునలేంవందిజ్ దూకమాజినాన్

31 అయావలెనె, సెగండార్ పరిసయరు వాతారె, “నీను ఇబ్బెణిజ్ సోసి సోన్అ. హెరోదు నిజి నెప్తెజ్ సుడఁజినాన్”, ఇజి యేసుజ్ వెహ్సాన్.

32 అందెజి వాండ్రు, “మీరు సొన్సి ఆ పాడు కిని నక్కవెట ఈహు వెహ్టు. “నాను నేండ్రు, విగహిజ్, దెయమకాజ్ పేరిజి, కస్టమ్దివరిజ్ నెగెణ్ కిజి, ముఎహి, దినమ్దు పూర్తి కిన్.

33 గాని నాను నేండ్రు, విగహిజ్, ముఎహిజ్ నా సరిదు నాను సొండ్రెజ్వెలె. ఎందానిజ్ ఇహిజ, ప్రవక్త యెరునలేమ్దిజ్ వెల్లి సాదెజ్ అవన్.

34 ఓ యెరునలేమ్దు మనికిదెరా, మీరు ప్రవక్తరిజ్ నెప్తిదెర్. మీ డగ్రు దేవుణు పొక్తి వరిజ్ పణకాణిజ్ డెయితిదెర్. కొరు దన్నిపెల్లెకాజ్ దన్నిరెక్కెజ్ అడిఁగి ఎలాగ ఇహ్లాదో, అయావజి మిజి డగ్రు కిదెజ్ ఎసొడ సుట్టు నాను ఆన ఆత, గాని నిజి ఇస్టం సిల్లెండ మహాద్.

35 ఇదిలో, దేవుణు వన్ని గుడిఁడిసి సోనాన్లె. ప్రబు సిత్తి అతికారమ్దాన్ వాతికాన్ పొగ్డెఁఆనికాన్* ఇజి మీరు వెహ్సాదాక మీరు నజి తోఇదెర్ ఇజి మీ వెట వెహ్సాన్.

14

యేసు పరిసయ ఇండ్రో బోజెనమ్దిజ్ సోన్సినాన్

1 ఉండ్రీ విస్త్రాంతి దినమ్దు, యేసు పరిసయరు అతికారిజ ఒరెన్ వన్ని ఇండ్రో బోజెనమ్దిజ్ సోహాన్. అయావలె యేసు ఇనిక కిసాండ్రో ఇజి వారు బాగసుడఁజి మహార.

2 నస్తివలె కిక్కుకాల్కు వాస్తికాన్ ఒరెన్ వన్ని ఎద్రు మహాన్.

3 యేసు”, విస్త్రాంతి దినమ్దు నెగెణ్ కినిక మీ యూదురిజ్ రూలుజ్ తప్పికాదా నీలికాదా?”, ఇజి పరిసయరుజిని యూదురి రూలు నెన్పిన్సివరిజ్ వెన్బాతాన్.

4 గాని వారు అలెత మహార. అందెజి యేసు అయా జబుది వన్నిజ్ డగ్రు కూక్తాండ్రె, నెగెణ్ కితాండ్రె పొక్తాన్.

5 వెనుక వాండ్రు వరిజ్, “మీ లోఇ ఎయెది బా గాడఁది గాని కోడిఁ గాని విస్త్రాంతి దినమ్దు గుటాద్అర్తిజ, దన్నిజ్ వెటనె వెల్లి లాగిఇదెరా?”, ఇజి వెన్బాతాన్.

6 యా మాటెజ్ వారు మరజి వెహ్లాజ్ అబ్వితార్.

7 వాతి కూలెజ్, విందుదు ముకెలమాతి బాడిఁజ్ సుడఁజి బాన్ బస్తిక సుడఁజాన్. సుడఁజాండ్రె కతవజి ఈహు నెన్పిస్తాన్.

8-9 ఎయెన్బా పెండ్రీ విందుదిజ్ మిజి కూక్కివెలె, పెరికార్బస్సిబాడిదు బస్సాట్. ఉండ్రీ వేలా మిజి ఇంక పెరివన్నిజ్ వాండ్రు కూక్తాన్సు. వాండ్రు వాతిజ, మీ రివరిజ్ కూక్తికాన్ వాజి నిజి, “ఇదిలో, నీ బాడ్డిఁ వినిజ్ సిఅ”, ఇజి వెహ్సాన్. నస్తివలె మీరు సిగు ఆజి వెన్యాహి బాడిఁదు బస్సెజ్ సొనిదెర్.

* 13:35 13:35 క్రిస్ట 118:26.

10 అందెజె మిజీ ఎయెన్బా కూక్కిజ, మీరు సొన్ని వెన్నాహి బాడిఁదు బున్న. అయావలె మిజీ కూక్కికాన్ వాజి, “కూలాయెన్ నీను పెరికార్బన్ని బాడిఁదు సొన్ని బన్అ”, ఇజి వెహ్వాన్. అయావలె నీ వెట బన్తివరి ఎద్దు నిజీ గొప్పు గవేరం వానాద్.

11 వన్నిజ్ వాండ్రె పెరికాన్ ఇజి ఒడఁబిని ఎయె వన్నిజ్బా దేవుణు ఇజ్జికాన్ కిసాన్. వన్నిజ్ వాండ్రె ఇజ్జికాన్ ఇజి తగిజి ఒడఁబిని ఎయె వన్నిజ్బా దేవుణు పెరికాన్ కిసాన్.

12 మరి, యేసు వన్నిజ్ విందుదిజ్ కూక్కి వన్నివెట, “నీను విందు కిదెజ్ ఇహిజ, నీ కూలెజన్, నీ అన్నారెజ్, నీ నేస్తమకాజ్, నీ పడఁకాద్ మన్ని సంసారిజన్ కూక్కు. ఎందనిజ్ ఇహిజ, ఉండ్రె వేలా వారు నిజీ మరజి కూక్కార్. అయావలె నీను కిత్తిదన్నిజ్ వారు మరజి కిజినార్.

13 అందెజె నీను విందు కినివెలె, బీదాతి వరిజ్, నీరన్మదివరిజ్, సొటవరిజ్, గుడ్డివరిజ్ కూక్అ.

14 ఎందనిజ్ ఇహిజ, మిజీ మరజి సీదెజ్ వారు అట్ఎర. అందెజె దేవుణు మిజీ దీవిస్సాన్లె. దేవుణు తీర్పు కిని దినమ్దు నీతి మన్ని విజి లోకురివెట నీను సాజి మరజి నిజ్ని వెలె, నీను కితి నెగ్గి పణి వందిజ్ దేవుణు మిజీ మరజి సీనాన్.

పెరివిందు వందిజ్ వెహ్సినాన్

15 వన్ని వెట ఉండెజ్ బన్తిమహి వరిలోఇ ఒరెన్ యాక విహండ్రె, యేసుజ్, “దేవుణు ఏలుబడిఁ కినిక టెటాజ్ నూణివెలె, విందుద్ ఉణికాన్ అంతు నీల్లి నరద మంజినికాన్ ఆనాన్లె”, ఇజి వెహ్వాన్.

16-17 అందెజె యేసు ఈహు వెహ్వాన్. “ఒరెన్ విందు కిదెజ్ ఇజి వన్ని నండొ కూలెజ కబ్బుజ్ పొక్కార్. విందు తయారె ఆతిజ్, వన్ని పణిమణిసిజ్ కూక్కాండ్రె, “ఉండెజ్ రదు. విజి తయారె ఆతె ఇజి కబ్బు కిత్తివరిజ్ సొన్ని వెహ్అ”, ఇజి పొక్కాన్.

18 గాని కూలెజ్ ఉండ్రె లెకెండ్ పణిజ్ వెహ్సినా తప్పె ఆతార్. మొదొహికాన్, “నాను ఉండ్రె మడిఁజ్ కొట మన్ను. నాను అయక సొన్ని నుడఁదెజ్వెలె, నజీ సెమిన్అ ఇజి బతిమాలజన్”, ఇజి వెహ్వాన్.

19 మరి ఒరెన్, “నాను అయదు నర్పు డాసు కొట మన్ను. ఆకెజ్ నెగెణ్ మనెన్ సీలెన్ ఇజి నుడఁదెజ్ సొన్నిన్. నజీ సెమిన్అ, ఇజి బతిమాలజన్”, ఇజి వెహ్వాన్.

20 మరి ఒరెన్, “నాను ఏలు పెండ్లి ఆత మన్ను. అందెజె వాదెజ్ అట్ఏ”, ఇజి వెహ్వాన్.

21-22 పణిమణిసి మరజి వాతండ్రె, యా మాటెజ్ వన్ని ఎజుమానిజ్ వెహ్వాన్. అయావలె అయా ఇండ్రె ఎజుమాని కొపం ఆతండ్రె, “నీను పట్టుమక వీదిజ, నందిజ బేగి సొన్ని బీదాతి వరిజ్, నీరన్మది వరిజ్, సొటాది వరిజ్, గుడ్డి వరిజ్ కూక్కి తగ్అ”, ఇజి పణి మణిసిజ్ వెహ్వాన్. వాండ్రు, “బాబు నీను వెహ్సె లెకెండ్ కిత. గాని మరి నండొ బాడ్డి మనాద్”, ఇజి వెహ్వాన్.

23 అయావలె ఎజుమాని, “నా ఇల్లు నిండ్రెదెజ్, నీను నాహ్కా వీదిజ నందిజ సొన్ని లోకురిజ్ ఈడిఁసి తగ్అ”, ఇజి వన్ని పణిమణిసిజ్ వెహ్వాన్.

24 ఎందానిజ్ ఇహిజ, కూక్కి అయా కూలెజ లోఇ ఒరెన్బా ఆ టిండి రుసి నెన్ఎన్”, ఇజి మీ వెట వెహ్సినాన్.

సినుడుఆనికాన్ ఎలాగమండ్రెజ్ ఇజి వెహ్సినాన్

25 మంద లోకు వన్ని వెట సొన్ని మహివలె వరిదరిజ్ నుడఁజి వాండ్రు ఈహు వెహ్వాన్.

26 “ఎయెన్బా నా సినుడుఁ ఆదెజ్ ఇహిజ, నజీ ఇంక, వన్ని అయిసి అపొసిజ్ వన్ని ఆలు ని కొడెరిజ్, వన్ని అన్న తంబెరిజ్, వన్ని తజి బీబిజ్ మరి వన్ని సొంత పాణెమదిజ్బా నండొ ప్రేమిస్తెజ్ ఆవిద్. వాండ్రు నండొ ప్రేమిస్తెజ, నా సినుడుఁ ఆదెజ్ అట్ఎన్.

27 ఎయెన్బా కన్యమకు ఓరిసి సాదెజ్బా ఇన్టం ఆజి నా వెట వాతిజనె నా సినుడుఁ ఆనాన్.

28 మీ లోఇ ఎయెన్బా ఉండ్రె నిరీ గుడిఁ తోహ్తెజ్ఆన వాతిజ, వాండ్రు ముజాల బసి, దనిజ్ కర్పు ఎసా ఆనాద్ ఇజి లెక్కునూణాన్. పణి పూర్తి కిదెజ్ వన్ని కీదు మనిక ఆనాదొ, సొలెదొ ఇజి నూణాన్ గదె?

29-30 అయక తొవింద వాండ్రు పునాది పొక్కి, పూర్తి తోహ్తెజ్ అట్ఇతిజ, అక్కునూణికార్ విజెర, “పిండ్రు తోహ్తెజ్ మొదొల్స్తాన్ గాని పూర్తి కిదెజ్ అట్ఎతాన్”, ఇజి వన్నిజ్ కరాయి ఇనార్.

31 ఒరెన్ రాజు మరి ఒరెన్ రాజువెట ఉద్దం కిదెజ్ సొండ్రెజ్ ఇహిజు, వాండ్రు ముజాలె బస్తాండ్రె సుణాన్, ఇరువయి వేలుజ్ లోకుర్వెటె అయా రాజు వాజినాన్. వన్ని ముస్కు ఉద్దం కిదెజ్ నా పది వెయుజ్లోకుర్వెటె వెట నాను అట్యూనా, సిలెనా ఇజి.

32 అబ్ఇజు, అయా రాజు దూరం మనివెలెని నల్వణిజ్ పోక్కి సమాదనం కిదెజ్ వాండ్రు సుణాన్.

33 అయలెకెండెన, మీ లొఇ ఎయెర్బా వన్నిజ్ కల్లితికెజ్ డిసేఎండ మహిజు, నా సిసూడుః ఆవన్.

34 సోరు నెగ్గెకది, గాని దనిజ్ మన్ని రుసి సోహిజు, ఎలాగ మరి రుసి తపిస్తెజ్ ఆనాద్?

35 అయాక బూమిదిజ్బా గాని గత్తమ్దిజ్బా గాని పణిదిజ్ రవద్. అందెజె అయాక వెల్లి విసిర్తాద్. గిబ్లిజ్ ఒడేజి వెండ్రు. అయావజు నడిజి మండ్రు”, ఇజి వెప్తాన్.

15

మురుతి గొరె దోహ్కాన్

1 ఉండ్రీ నాండిజ్ పన్ను పెర్సికార్ని పాపం కిజనికార్ ఇజి యూదురు సుడేతికార్ విజెరె వన్ని బోద వెండ్రెజ్ వన్ని డగ్రు కూడిత మహార్.

2 పరిసయరుని యూదురి రూలుజ్ నెస్సిన్సికార్, “వీండ్రు పాపం కిజని వరిజ్ డగ్రు కిజి వరివెట కూడేజి బోజనం కిజినాన్”, ఇజి సణిజీతార్.

3 అందెజె వాండ్రు వరిజ్ కతవజు నెన్పిస్తాన్.

4 “ఉండ్రీ వేల మీ లొఇ ఒరెన్వన్నిజ్ వంద గొరెజ్ మనె. వన్కాలొఇ ఉండ్రీ గొరె మురుతిజు, వాండ్రు అయా తోమ్బయి తోమెది గొరెజు, అడివిదు డిసి మురుతి మని గొరెదోహ్కాదాక రెబానాన్గదె?

5-6 అది దోహ్కాత్వలె సర్ద అజి వన్ని గుంజమ్దు పిండిజి ఇండ్రొ తనాన్. మరి వన్ని కూలెజు పడకాతి వరిజ్ కూక్కి, “మురుతి మహి నా గొరె దోహ్కా. అందెజె నా వెట సర్ద అదు”, ఇజి వెప్తాన్.

7 అయా వజునె, తోమ్బయి తోమెది మణిసిర్ పాపం ఒప్పుకొండెజ్ అవునరం నీతి సీతి నిజాయతిదికార్ మనార్. వరి వందెజ్ కల్లిని సర్ద ముస్కు పాపమ్కు డిసి సీతి వన్ని వందెజ్ దేవుణు మంజిని బాడియ నండో సర్ద కల్లినాద్, ఇజి నాను మీ వెట వెప్తాన్”.

మురుతి రుపయి దోహ్కాన్.

8 “మరి, ఉండ్రీ బోదెల్దిజ్ పది వెండి రుపాయి మహె. వన్కాలొఇ ఉండ్రీ రుపాయి మురుతిజు, అది దివ కనిసి, ఇల్లు సిపాజి, అది దోహ్కాదాక నెగెండ రెబావిదా?

9 అక్కుదోహ్కాత్వలె దన్ని కూలెజాణిజ్, పడకాతి వన్కాజ్ కూక్కి, “నా మురుతి మహి రుపాయి దోహ్కాద్. అందెజె నా వెట సర్ద అదు”, ఇజి వెప్తాన్.

10 అయావజునె పాపమ్కు డిసి సీతి వన్ని వందెజ్ దేవుణు వన్ని దూతెజు ఎద్రు సర్ద అజినాన్ఇజి నాను మీ వెట వెప్తాన్”.

తప్పి సోహి మరిసి మరజి వాజినాన్

11 మరి వాండ్రు ఉండ్రీ వెప్తాన్, “ఒరెన్ వన్నిజ్ రిఎర్ మరిసిర్ మహార్.

12 కొరె మరిసి, “ఓ బా, నీను గణస్తి దన్నిలొఇ నజి వానివంతం సిదా”, ఇజి అపోసిజ్ లొస్తాన్. అందెజె అపోసి వన్ని అస్తి వరిజ్ సీబాత సిత్తాన్.

13 నెగం రొస్కు సోహి వెనుక, కొరె మరిసి వన్నిజ్ కల్లితికెజ్ విజు కుడుఃప్పి, నండో దూరం మన్ని దేనమ్దు సోహాన్. అబ్బె వాండ్రు నెఇ అలవాటుజు ఆతాండ్రె వన్ని అస్తివిజు పాడు కిత్తాన్.

14 విజు కర్కు కిత్తివెనుక, ఆ దేనమ్దు గొప్ప కరు వాతాద్. వన్నిజ్ ఇనిక బా దోహ్కావతాద్.

15 అందెజె వాండ్రు ఆ దేనమ్ది ఒరెన్ వన్ని డగ్రు పణికిదెజ్ సోహాన్. వాండ్రు పండ్రెజ్ మెప్తెజ్ వన్ని ముడిజు వన్నిజ్ పోక్తాన్.

16 పండ్రెజ్ తిని పొడుః తింబి బజు సాన్పిస్తెజ్ ఇజి ఆన అతాన్. గాని ఎయెర్బా వన్నిజ్ ఇనికబా సివితార్.

17 వన్నెజ్ బుద్ధి వాతివెలె వాండ్రు ఈహు ఒడిబితాన్, “నా బుబ్బు డగ్గు ఎసాండాలో పణిమణిసిర్ మనార్. వరిజ్ ఉండెజ్ అల్లెన నస్సా జావ దోహ్కాన్. ఇబ్బె నాను బజ సాజన.

18 నాను ఇబ్బె డిసి నా బుబ్బు డగ్గు సాన్సి, ‘ఓ బా, నాను దేవుణుదిజ్ పడెఱ ఇ పణి కిత. నీ ఎద్దు పాపం కిత.

19 నీ మరిన్ ఇజ కూకె ఆదెజ్ నాను ఏవటికాన్ ఆవ. నీ పణిమణిసి ఒరెన్ వన్నిలెకెండ నజీ నుడెఅ’, ఇజ నాను వెహ్నా”, ఇజ ఒడిబితాండ్రె అబెణిజ్ డిస్తాండ్రె వాజినాన్.

20 వాండ్రు దూరం మహివలెనె అప్పాసి వన్నిజ్ నుడెతాన్. వన్ని పాణం నోతాండ్రె ఉహ్కాన్ సాన్సి పొంబితాండ్రె ముదు కితాన్.

21 నస్సెవలె వాండ్రు అప్పాసిజ్, “ఓ బా, నాను దేవుణుదిజ్ పడెఱ ఇ పణి కిత. నీ ఎద్దు పాపం కిత. నీ మరిన్ ఇజ కూకె ఆదెజ్ నాను ఏవటికాన్ ఆవ”, ఇజ వెహ్నాన్.

22 గాని అప్పాసి వన్ని పణిమణిసిర్ కూక్తాండ్రె, “సాక్క బేగి తగిఅ. వినిజ్ తోడిఱిస్తు. బిందు ఇడెక్కిస్తు. పాదమోకాజ్జోడెకు తోడిఱిస్తు.

23 బలిస్తి దూడెఱ తసి ఒహ్కాన్. మాటు తింజి సర్ల ఆనాట్.

24 ఎందానిజ్ ఇహిజ, యా నా మరిన్ సాతి లెకెండ మహాన్. మరి ఏలు బల్లితాన్. మురుతి లెకెండ మహాన్. మరి యేలు దోహ్కాన్”, ఇజ వెహ్నాన్. వారు సర్ల ఆజి మహాన్.

25 అయావలె పెరిమరిసి మడిఱిజ సాహ మహాన్. వాండ్రు మడిఱిజాణిజ్ వాజి ఇల్లు డగ్గు వాతివెలె, బాజెజ్ డెయిజినిక, కర్జిజినిక వెహ్నాన్.

26 అందెజె వాండ్రు పణిమణిసిర్ లోఇ ఒరెన్ వన్నిజ్ కూక్తాండ్రె, ఇనిక జర్గిజినాన్, ఇజ వెన్బాతాన్.

27 అయా పణిమణిసి, “నీ తంబెరి వాతాన్. వాండ్రు నెగ్రిండ మరెజి వాతివందిజ్ నీ బుబ్బు బలన్తి దూడెఱ ఒహ్కాన్”, ఇజ వెహ్నాన్.

28 పెరి మరిసి కోపం ఆతండ్రె, లోఇ సాండ్రెజ్ కెవతాన్. అందెజె అప్పాసి వెల్లి వాతండ్రె, లోఇ రఅ, ఇజ వన్నిజ్ బతిమాలతాన్.

29 అయావలె వాండ్రు వన్ని అప్పాసి వెట, “ఇదిలో నిసాడు వంటిజాణిజ్ ఒరెన్ గొతియయెన్ లెకెండ పణి కిత. ఎనెజ్బా, నీ మాటెజ్ నాను లోజివిండ మన్విత. నా కూలెజ్వెట సర్ల ఆదెజ్ నీను నజి ఉండ్రె గొరై పిల్లబా సిఇతి.

30 గాని సాని బూలాని వరిజ్ నీజి నీ ఆన్తి విజు పాడు కిత్రె యా మరిసి వాతిజ్ బలన్తి దూడెఱ ఒహ్కాన్”, ఇజ వెహ్నాన్.

31 అందెజె అప్పాసి, “నా మర్రిన్, నీను ఎన్తివలెబా నా వెటనె మన్ని. నజి మనికెజ్ విజు నీవి.

32 మాటు విందు కిజి సరద ఆనిక నెగెద్. ఎందానిజ్ ఇహిజ, నీ యా తంబెరి సాతి లెకెండ మహాండ్రె, మరెజి నిజితాన్. మురుతి లెకెండ మహాండ్రె దోహ్కాన్”, ఇజ వన్ని వెట వెహ్నాన్.

16

తెలివి మన్ని పెరిగొత్తియవన్ని కత

1 మరి, యేసు వన్ని సిసూరెజ ఈహు వెహ్నాన్. ఒరెన్ సంసారం మన్ని వన్ని ఇండ్రెణి నజితిజ నూణి పెరి గొతియయెన్ ఒరెన్ మహాన్. యా గొతియయెన్ సామనమకు పాడు కిజినాన్ ఇజ నేరం మొప్పిక వెహ్నాన్.

2 అందెజె వన్నిజ్ కూకెపిస్తాండ్రె, “నీ వందిజ్ నాను వెంజిని యా మాట ఇనిక? ఇండ్రెణి పణిజి లెక్క తోర్నెఅ. ఎందానిజ్ ఇహిజ, నీను ఏలుదాన్ నా గొతియయెన్ ఆఇ”, ఇజ వన్నిజ్ వెహ్నాన్.

3 యాక వెహాండ్రె వాండ్రు ఈహు ఒడిబితాన్. “నా ఎజుమాని యా పణిదాన్ నజి లాగిజినాన్. అందెజె నాను ఇనిక కిదెజ్? కార్తెజ్ అట్వ. లోసి ఉండెజ్ సిగు వాజినాన్.

4 యా పణిదాన్ లాగ్గివెలె, లోకుర్ నజి డగ్గు కినిలెకెండ ఇనిక కిదెజ్ ఇజ నాను నెనిన.

5 అందెజె వాండ్రు వన్ని ఎజుమాని బాన్ అప్పు ఒతివరిజ్ ఒరెన్ ఒరెన్ వన్నిజ్ కూకెపిస్తాన్. “నీను నా ఎజుమాని బాణిజ్ ఎసా ఒతిమున్సి?”, ఇజ మొదోహి వన్నిజ్ వెన్బాతాన్.

6 వాండ్లు, “పంద కాయెజ్ నూనె”, ఇజ వెహ్లాన్. అందెజె వాండ్లు, “ఇదిలో నీ సీటి. బేగి బసి యాబయి కాయెజ్ ఇజి రాన్అ”, ఇజి వెహ్లాన్.

7 వెన్నాహివన్నుజ్, “నీను ఎసా ఒతిమన్ను?”; ఇజి వెన్బాతాన్. వాండ్లు, “పంద తూముజ్ గోదము”, ఇజి వెహ్లాన్. అయావలె వాండ్లు, “ఇదిలో నీ సీటి. ఎనబయి తూముజ్ ఇజి రాన్అ”, ఇజి వెహ్లాన్.

8 అనయం కిత్తి యా పెరి గొత్తియయెన్ తెలివందిజ్ ఎజుమాని పొగిడితాన్. ఎందానిజ్ ఇహిజు, వానికాలమది వన్ని బత్తు వందిజ్ వాండ్లు యా లెకెండ్ కితాన్. అందెజె యేసు, వెహ్లాన్, “దేవుణుదిజ్ నమిజి వాండ్లు వెహ్లా వజ నడిసివరి ముస్సు, అయా పెరి గొత్తియయెన్ లెకెండ్, యా లోకమది సజతిజు వందిజె ఒడేబినికార తెలిమనికార. వారు వరిలెకెండ్ మన్ని వరివెట కూడేజి పాడిజి మండ్రెజ్ తెలిమనికార.

9 మీరు యా లోకమదు బత్తిజిని మనివలె ఇబ్బె మిజి మనికెజ్ విజు దని వెట మీరు నెగ్రెండ తెలిదాన్ మండ్రెజ్ సుడేదు. ఎందనిజ్ ఇహిజు, మీరు మీ బత్తు ఇబ్బె డిస్సివలె దేవుణు మిజి వాండ్లు మంజిని బాడిదు ఎలాకాలం మండ్రెజ్ డగ్రు కిన్లె.

10 తక్కు దన్నిముస్సు నమకం మంజినికాన్ లావు దన్నిముస్సుబా నమకమదాన్ మంజిన్. తక్కు దన్నిముస్సు నమకం సిలికాన్, లావు దన్నిముస్సుబా నమకం మన్ఎన్.

11 అందెజె, మిజి మన్ని ఆస్తి నమకమదాన్ తోవండ మహిజు, నిజమాతి ఆస్తి ఎయెర్ మిజి ఒవజెహ్లాన్.

12 పడేకాతి వరి దన్నిముస్సు నమకమదాన్ తోవండ మహిజు, నీ సాంతదిక ఆతి నిజమాతి ఆస్తి ఎయెన్ మిజి సీనాన్.

13 ఎవేణి గొత్తియయెన్బా రిఎర్ యజమానరిజు వందిజ్ఉండ్రె లెకెండ్వణి కిడెజ్ అబ్ఎన్. వాండ్లు ఒరెన్ వన్నిజ్ ఇస్టం కివిండ మరి ఒరెన్ వన్నిజ్ ప్రేమిస్సాన్. సిలిజు, ఒరెన్ వన్ని మాట వెంజి నమకమదాన్ మంజిన్. మరి ఒరెన్ వన్నిజ్ దునలాడినాన్. అయలెకెండ్నె దేవుణుదిజ్ ని డబ్బుదిజ్ ఉండ్రె లెకెండ్నె నెవకిదిజ్ మీరు అబ్ఇదెర్”, ఇజి వెహ్లాన్.

14 డబ్బు అన మన్ని పరిసయేరు యా మాటజ్ విజు వెహారె, వన్నిజ్ వెక్సిన్.

15 వాండ్లు వరిజ్ ఈహు వెహ్లాన్, “లోకుర్ ముజాల మీరు నీతి నిజాయితి మనికిదెర్ ఇజి తోరిస్సిదెర్. గాని దేవుణు మీ మన్సుదికెజ్ నెస్సాన్. లోకుర్ ఎద్రు గొప్పు విలువ మనిక దేవుణుదిజ్ ఇస్టం నెల్లికాదె.

16 దేవుణు మోసెజ్ సెత్తి రూలుజ్ని ప్రవక్తరు రాస్తికెజ్ బాప్తిసం సీని యోహాను కాలం దాక బోదెసి మహార. అబెణిజ్ అసి దేవుణు, వన్నిలోకురిజ్ కిని ఏలుబడి: వందిజ్ సువార్త వెహా ఆజి మహాద్. దేవుణు కిని ఏలుబడిదు మండ్రెజ్లోకుర్నండో కన్టబడిజిన్.

17 ఆగనం బూమి సిల్లెండ ఆదిజ్సులునె, గాని దేవుణు సెతి రూలుబది ఉండ్రె గీతబా తప్పె సాన్ఏద్.

18 ఎయెన్బా వన్ని ఆల్విజ్ డిసి మరి ఉండ్రె బోదెల్దిజ్ ఇడ్డె: ఆతిజు, దని వెట వాండ్లు రంకు బూలాజిన్. మాసిజ్ డిస్సి దనిజ్ ఒరెన్ఇడె: ఆతిజు, వాండ్లు రంకు బూలాజిన్.

ఆస్తిమన్నికాన్ని లోసిఉణి లాజరు

19 ఒరెన్ ఆస్తిమన్నికాన్ మహాన్. వాండ్లు నండో కరిది సొక్సెజ్ తోడేగిజి విజు దినమ్కు సుకం ముస్సు మహాన్.

20 లాజరు ఇని లోసిఉణికాన్ ఒరెన్ మహాన్. వన్ని ఒడోల్కండి విజు పుట్టు మహా. ఆస్తిమన్ని వన్ని ఇండ్రోణి డేవాద్ వన్నిజ్ ఇట్టా మహార.

21 వన్ని బల్లదాన్ అర్థి జావ వరిజ్ ఉణిజి బజు సాన్ఏస్తిజ్ ఆనఆజి మహాన్. నుకుడిజ్బా వాజి వన్ని పుట్టు నాక్సి మహా.

22 లోస్సి ఉణికాన్ సాతాన్. దేవుణు దూతెజ్ వన్నిజ్ దేవుణు మంజిని బాడిదు అబ్రాహం పడేకాదు ఒతాన్. ఆస్తిమన్నికాన్బా సాతాన్. వన్నిజ్ ముస్సార.

23 వాండ్లు అయా లోకమదు బాదఆజెనె, బుర్ర పెర్జి ముస్సు బేస్సాన్. దూరం మన్ని అబ్రాహముజ్ని వన్నిపడేకాద్ మన్ని లాజరుజ్ సుడేతాన్.

24 అందెజె వాండ్లు, “బుబ్బు ఆతి అబ్రాహాము, నా మున్ను కనికారం తోరిన్త. నాను యా సినుదు నండో బాద అజిన. అందెజె లాజరు వాజి వన్ని డెస్కు ఏరుదు ముడుక్కి నా నాలిక సలెజ్ కిదెజ్ వన్నిజ్ పోకోత”, ఇజి డేల్ని వెప్సోన్.

25 అందెజె అబ్రాహాము, “మరిన్ నీను బల్బెత్తి కాలమ్దు సుకం మున్ను మహి. గాని లాజరు కష్టమ్దు మహాన్. ఏలు వాండ్లు ఇబ్బె సుకం దాన్ మనాన్. నీను కష్టమ్దు మన్ని.

26 యాకదె ఆవిండ, ఇబ్బెకోకార్ అబ్బె వాదెజ్ అటేవిండ, అబెకోకార్ ఇబ్బె వాదెజ్ అటేవిండ మజి నిజి నడిమి పెరిజోరె ఇట్టా మనాద్”, ఇజి వెప్సోన్.

27-28 అయావలె వాండ్లు, “అహిజ, ఓ బా, నజి అయేదుగురు దాదార్ మనార్. వారు బా యా కష్టమ్దు మన్నిబాడిదు రవిండ మండ్రెజ్ నా బుబ్బు ఇండ్రో లాజరుజ్ పోకోత. వాండ్లు సొన్ని వరిజ్ వెప్సోన్, ఇజి నాను నిజి బతిమాల్జిన”, ఇహాన్.

29 అందెజె అబ్రాహాము, “పరి డగ్రు మోసె రాస్తికెజ్, ప్రవక్తరు రాస్తికెజ్ మనె. వారు అయాకెజ్ వెంజి మండ్రెజ్”, ఇజి వన్నిజ్ వెప్సోన్.

30 వాండ్లు, “బుబ్బుత్తి అబ్రాహాము, ఆహె వారు కివెర. సాతికాన్ ఒరెన్ పరి డగ్రు సొన్ని వెప్సోజనె, వారు పాపమ్దు డిసి సీనార్”, ఇజి వెప్సోన్.

31 అందెజె వాండ్లు, “మోసె రాస్తి మనికెజ్ ప్రవక్తరు రాస్తికెజ్ వారు వెన్ఎండ మహిజ, సాతికాన్ మరజి నిజ్జె సొన్ని వెప్సోజబా వారు నమ్మివెర”, ఇజి వెప్సోన్.

17

1 యేసు వన్ని సిసూరజి ఈహు వెప్సోన్. “తప్పజ్ కిబిస్సి నజిజిజ్ తవ్వెండ వానెలె. గాని యా నజిజిజ్ ఎయెవెటె వానెనో వన్నిజ్ అబాయా, నండో బాద.

2 ఎయెన్బా నా మున్ను నమకం ఇడ్డి మన్ని యా కొడోః నన్ని ఒరెన్వన్నిజ్ తప్పకిబిస్సిజ్ సుడోఃతిజి పెరిసిక్కు వానాద్. దిన్నిమున్ను ఇజిరిసిక్కునె వన్ని మెడోదు జత్త పణుకు తొప్పి సందారమ్దు విసీరినిక. ఆకదె వన్నిజ్ నెగెద్.

3 అందెజె మీ వందిజ్ మీరి జాగర్ల మండ్రు. నీ తంబెరినో, ఎయెన్బా నిజి తప్పు కితిజి, వన్నిజ్ డటం బుద్ది వెహాల. వాండ్లు తప్పడిసి ఒప్పుకోటిజి వన్నిజ్ నెమిన్త.

4 ఉండ్రీ దినమ్దు ఏడు సుట్టు. వాండ్లు నిజి తప్పజ్ కిజి, ఏడు సుట్టు. నీ డగ్రు వాజి ‘నాను తప్పడిసి ఒప్పుకోడిజిన’, ఇజి వెప్సోజి నీను వన్నిజ్ నెమిన్త”.

5 నన్తివలె పన్నెండు మణిసి అపొస్తుడుజ, మజి నండో నమకం సిదా”, ఇజి ప్రబుజ్ లొస్తార్.

6 అందెజె వాండ్లు, “మిజి నెర్పుగింజి నన్తు నమకం మహిజ, యా మలబరి మరాతిజ్ సుడోఃజి, “వెలెజాణిజ్ పెరె ఆజి సందారమ్దు ఉణుసి ఆత”, ఇజి వెప్పి వెలె అది మిజి లోజినాద్.

7-8 ఉండ్రీ వేల, మీలోఇ ఒరెన్వన్నిజ్ డూదెజ్నో గొరెజి మేప్పజ్నో వెట్టివణి కినికాన్ ఒరెన్ మనాన్. వాండ్లు మడిజెదాన్ వాతిజ, “బేగి రత, వాజి ఉణత”, ఇజి వెప్పిదెదా? సిల్బె, గాని, ‘సుబ్బురం ఆజి వరత, నజి బాట సీజి ఉణితిని దాక మన్త. వెనుక నీను ఉణత’, ఇజి వెప్పిదెదె.

9 వన్నిజ్ ఒవజిప్పి పణి కితిజ్ ఎజుమాని వన్నిజ్ వందనమ్దు వెప్పంద్రో?

10 అందెజె మీరు బా మిజి ఒవజిప్పి పణిజ్ విజి కితి వెనుక, “మాటు పణిమణిసీర్. వందనమ్దు వెహె ఆదెజ్ అవనరం సిల్లెద్. మాటు కిదెజ్ మన్ని పణిసె కితాట్”, ఇజి వెప్సోజ్.

పది మణిసీర్ కుష్టురోగం మన్నికార్ నెగెణ్ ఆజినార్

11 యేసు యెరూసలెమ్దు సొన్ని మహివలె, సమరియ గలిలయ ముట్ట సరిఅడ్డుదాన్ సొన్ని మహాన్.

12-13 వాండ్లు ఉండ్రీ నాటో సొన్ని మహివలె పది మణిసి కుష్టురోగం మనికార్ వన్నిజ్ ఎద్దు వాతార్. వారు దూరం నిహారె, “యేసు ఎజుమాని, మా మున్ను కనికారం తోరిన్త”, ఇజి డెడిస్తార్.

14 వాండ్లు వరిజ్ సుడోఃతాండ్రె, “సొన్ని, మీరు నెగెణ్ అతిదెరె ఇజి పుజెరిజి తోరె ఆదు”, ఇజి వెప్సోన్. వారు సొన్ని మహిజ్ నెగెణ్ అతార్.

15 వరిలోఇ ఒరెన్, నెగెణ్ అత ఇజి నెస్తాన్. వాండ్లు డటం దేవుణుదిజ్ పొగిడిజి మరజి వాతాన్.

16 వాతాండ్రె యేసుజ్జ పాదమక మున్ను ముణుకుజ్జ్ ఊరజి మాడిఃస్తాండ్రె, వందనమకు వెహ్తాన్. వాండ్రు నమరియదికాన్.

17 అందెజె యేసు, “పది మణిసిర్ నెగెణ్ అతార్ గదె. ఆ తొమెది మణిసిర్ ఎంబె మనార్?”

18-19 ఎందానిజ్ వీండ్రు ఒరండ్రె దేవుణుదిజ్ పొగిడిఃదెజ్ మరజి వాతాన్. వీండ్రు యూదురిజ్ నెందఱకాన్. ఇస్రాయేలుదికార్ ఎందనిజ్ తోర అవతార్?” ఇజి వెహ్తాన్. వెహ్తాండ్రె, “నీసు నిజిజి సాన్అ. నీసు నా మున్ను నమకు ఇడ్డి అందెజె నెగెణ్ అతి”, ఇజి వన్నుజ్ వెహ్తాన్.

దేవుణు రాజువజి వానివందిజ్ వెహ్సానాన్

20 ఒర్రొండ్రు, దేవుణు ఏలుబడిః కినిక లోకుర ఎనెజ్ నూణార్ ఇజి పరిసయరు వన్నుజ్ వెనబాతార్. అందెజె వాండ్రు, “దేవుణు రాజువజి వాని ముజాల్ తోర్పి గుర్తు ఇనిక సిల్లెద్.

21 దేవుణు మిజి ఏలుబడిః కిజినిక ఇయేలె మొదొల్స్త మనాన్. అందెజె, ఇదిలో ఇబ్బె మనాద్, అదిలో అబ్బె మనాద్ ఇజి లోకుర వెహ్సా గుర్తు ఇనిక సిల్లెద్”, ఇజి వరిజ్ వెహ్తాన్.

22 మరి వాండ్రు వన్ను సిసూరజి వెహ్తాన్, “లోకు మరిసి అతి నాసు గొప్పు అతికారం దాన్ సోకుదాన్ మంజినిక కండెక్ టయం బా నుడఃదెజ్ ఇజి మీరు కోరిజిన రోన్ను వానెలె. గాని ఆ రోన్ను లొఇ ఉండ్రె రోజుబా మీరు తొఇదెర్.

23 లోకుర మిజి, “ఇదిలో ఇబ్బె మనాన్, అదిలో అబ్బె మనాన్”, ఇజి వెహ్తార్. గాని పరి వెట సొన్నాట్. పరి మాట అస్మాట్.

24 ఎందానిజ్ ఇహొజ, ఆగనమదు మెరిస్సివెలె ఉండ్రె పడఃకదాన్ మరి ఉండ్రె పడఃకాద్ జాయి తోర్పివజినె లోకు మరిసి అతి నాసు వానివలె మంజినాద్.

25 గాని ముజాల యా తరమదికార్ నజి నెక్కిపొక్కినార్. వాండ్రు నండొ ఇమ్నెజ్ ఒరిస్తెజ్వెలె.

26 నోహొహొ కాలమదు మహిలెకెండెనె లోకు మరిసిఅతి నాసు వాని ముజాల మంజినాద్.

27 నోహొహొ ఒడఃదు సానిదాక లోకుర ఉణిజి తింజి మహార్. పెండ్లి అజి పెండ్లిదిజ్ సీజి మహార్. నస్తివలె గడ్డె నిండ్రిజి, వరిజ్ విజెరిజ్ నాసనం కిత్తాద్.

28 లోతు కాలమదు మహిలెకెండెనె, నాసు వాని ముజాల మంజినాద్. లోకుర ఉణిజి, తింజి, కొడుజి పొర్పి మహార్. వల వాక్కి, ఉణుసి, ఇల్కు తొహ్సా మహార్.

29 లోతు సాదొమ డిఃస్తి సాహి నాండిజ్, ఆగనమదాన్ సిసు రంజకం పిరు లెకెండె వాజి వరిజ్ విజెరిజ్ నాసనం కిత్తాద్.

30 యా లెకెండెనె, లోకు మరిసి అతి నాసు వాని దినమదు జర్జిజి మంజినాద్.

31 నాసు వాని దినమదు, మీద్దె మున్ను మంజినికాన్ ఇండ్రొ మన్ని వన్ని సామనమకు ఒతెజ్ డిగ్దెజ్ అవద్. అయలెకెండెనె మడిజి మంజినికాన్ ఇనికబా ఒతెజ్ మరజి వాదెజ్ అవద్.

32 లోతు అలోసిజ్ ఒడఃబిదు. అది దేవుణు వెహ్సా మాట వెనెఇతిజ్ సొతాద్.

33 ఎయెనబా వన్ను సొంత పాణమదిజె కాపాడఃదెజ్ నుడఃతిజి వన్నుజ్ ఎలాకాలం దేవుణు వెట బత్కిని బత్కు దొహ్కవద్. ఎయెనబా నా వందిజ్ వన్ని పాణం సీతిజి, వాండ్రు ఎలాకాలం దేవుణు వెట బత్కిని బత్కు దొహ్కాద్.

34 నాసు మీ వెట వెహ్సాన, అయా పొదొయి రిఎర్ ఉండ్రె మన్నమదు గూర్నార్. ఒరెన్ వన్నుజ్ దేవుణు ఒనాన్. ఒరెన్ వన్నుజ్ డిఃస్సు సానాన్.

35 రుండి బొదెక్ కూడఃజి నూరజి మంజినె. ఉండ్రె దనిజ్ దేవుణు ఒనాన్. ఉండ్రె దనిజ్ డిఃస్సు సానాన్.

36 రిఎర్ మడిజి మంజినార్. ఒరెన్ వన్నుజ్ దేవుణు ఒనాన్. ఒరెన్ వన్నుజ్ డిఃస్సు సానాన్.

37 అయావలె సిసూరు, “ప్రబువా, ఎంబె యాక జర్జినాద్?” ఇజి వెనబాతార్. వెనబాతిజ్ వాండ్రు, “పీసుగు ఎంబె మంజినాద్ ఇజి నెస్తెజ్ డిగ్దెజ్ ఉండ్రె గుర్తు అనిలెకెండె, యేసు వానిక నెస్తెజ్ టిటాజ్ గుర్తుజ్ మన్నె.

1 వన్నీసినూర్ డిఃన్‌ఎండ ఎన్స్తవలెబా పార్దన కిజి మండ్రెజ్ ఇజి నేరపిస్తెజ్ యేసు వరిజ్ కతవజి ఈహు నెన్‌పిస్తాన్.

2 అక్కణినిక ఇహిజ, ఉండ్రీ పట్టుమదు ఒరెన్ నాయం కినికాన్ మహాన్. వాండ్రు దేవుణుదిజ్ తియెల్ అఇకాన్. లోకాజ్ లెనెం కిఇకాన్.

3 ఆ పట్టుమదు ఉండ్రీ రాండి బోదెల్ మహాద్. అది వన్నీ డగ్రు డిఃన్‌ఎండ వాజి, “నా మున్సు పగ ఆతికాన్ ఒరెన్ మనాన్. వాండ్రు నజీ సీదెజ్ మనిక సీనిలెకెండ్ సీను నాయం తీర్‌న్త”, ఇజి బతిమాలజి మహాద్.

4-5 వాండ్రు సెగం కాలం కెవితాన్. వెనుక వాండ్రు, “నాను దేవుణుదిజ్ తియెల్ అఇకాన్. లోకాజ్ లెనెం కిఇకాన్. గాని యా ముండ బోదెల్ డిఃన్‌ఎండ వాజి నజీ ఏక ఏక లోసీనాద్. అందెజి అది మరి మరి వాజి బాద కల్లిన్‌ఎండ దన్నెజ్ నాయం తీర్‌న్త”, ఇజి వన్నెజ్ వాండ్రె వెప్తాన్.

6 మరి యేసు వెప్తాన్, “విండ్రు, యా సీతి నిజాయితి సీలి నాయం కినికాన్ ఇనిక వెప్తాన్ ఇజి.

7 అహిజ, సీతి నిజాయితి మన్నీ దేవుణు, వాండ్రు ఏర్‌పాటు కితి వన్నీ లోకుర్ రెయు పాకాల్ వన్నెజ్ పార్దనం కితిజి, వాండ్రు వరిజ్ నాయం తీర్‌నెండ మంజినాండ్రా? వాండ్రు ఆల్‌నెం కినాండ్రా?

8 నాను మీ వెలు వెప్సిన, వాండ్రు బేగి నాయం తీర్‌స్తాన్. గాని లోకుర్ మరిసి ఆతి నాను మరజి వానివలె, నా మున్సు నమకం దాన్ మన్నీ వరిజ్ సుణానా?

పరిసయుని పన్నుపెర్సి వన్నీ కత

9 సెగెండార్ మాపు సీతి మనికాన్ ఇజి వరిజ్ వారె గర్ర ఆజి మహివరిజ్ దుసలాడెఃతికార్ మహార్. నన్నెవరిజ్ వాండ్రు కతవజి నెన్‌పిస్తాన్.

10 “రిఎర్ లోకుర్ పార్దనం కిదెజ్ ఇజి దేవుణు గుడిడు సాహార్. ఒరెన్ పరిసయు వాండ్రు ఒరెన్ పన్ను పెర్సికాన్.

11 పరిసయు వాండ్రు సాహండ్రె, వన్నీలోఇ వాండ్రు ఈహు పార్దనం కితాన్, “ఓ దేవుణు, నాను మహి లోకుర్ లెకెండ్ ఆవె. ఆనగొటుజు లెకెండ్, అనయం కిని వరిలెకెండ్, రంకు బూలాని వరి లెకెండ్ ఆవె. యా పన్ను పెర్సి వన్నీ లెకెండ్‌బా ఆవె. అందెజి నిజీ వందనమ్‌కు.

12 నాను వారమ్‌దిజ్ రుండు సొట్టు ఉపాన్ మంజిన. నజీ వాజిని విజి దన్నెలోఇబా నిజీ దెసం బాగం సీజిన”, ఇజి పార్దనం కితాన్.

13 గాని పన్ను పెర్సికాన్ దూరం నిహాన్. వాండ్రు ఆగాసం దరోట్‌బా బేన్‌ఎండ, వన్నీ గుండె కొత్తె ఆజి, “ఓ దేవుణు, నాను పాపం కితిక. నజీ కనికారం తోర్‌న్త”, ఇజి వెప్తాన్.

14 నాను మీ వెలు వెప్సిన, పరిసయు వన్నీ మున్సు విని పాపమ్‌కునె దేవుణు నెమిస్తాన్. వీండ్రు దేవుణు ముజాల సీతి నిజాయితి మనికాన్ ఇజి తీర్‌నె ఆతండ్రె ఇండ్రె సాహాన్. వన్నెజ్ వాండ్రె పెరికాన్ ఇజి ఒడెఃబినికాన్ ఎయెన్‌బా ఇజ్జికాన్ ఆనాన్. వన్నెజ్ వాండ్రె తగిజి ఇజ్జికాన్ ఇజి ఒడెఃబినికాన్ ఎయెన్‌బా పెరికాన్ ఆనాన్.

ఇజిరికొడెఃరిజ్ యేసుడగ్రు కిజినాన్

15 సెగెండార్, యేసుడగ్రు ఇజిరి బయిరిజ్‌బా తసి మహార్. వరిమున్సు వన్నెకికు ఇడెదెజ్ ఇజి తత్తార్. అక్క నుడెఃతారె సినూర్ వరిజ్ జటిజ్ ఆతార్.

16 గాని యేసు, కొడెఃరిజ్ వన్నీ డగ్రు కూక్తాన్. కూక్తాండ్రె, “యా ఇజ్జికొడెఃరిజ్ నా డగ్రు రపీర్. వరిజ్‌అడు కిమాట్. ఎండానిజ్ ఇహిజ, యా కొడెఃరిజ్ లెకెండ్ మనికారె దేవుణు ఏలుబడిః కినివెలె మంజినార్.

17 నిజమె, మీ వెలు వెప్సిన, ఇజ్జికొడెఃరిజ్ నమ్మిని వజి, దేవుణుదిజ్ నెమినికారె దేవుణు ఏలుబడిః మంజినార్. నమ్మిఇకారె మండ్రెజ్ అట్‌ఎర్”.

ఒరెన్ అస్తిమన్నెకాన్ యేసువెలు వర్గిజనాన్

18 ఒరెన్ అతికారి యేసుజ్ నుడెఃజి, “ఓ నెగ్గి బోదకినికి, ఎలకాలం దేవుణువెలు బత్తిని బత్తు దోహాకిద్‌ఇహిజ, నాను ఇనిక కిదెజ్?”, ఇజి వెన్‌బాతాన్.

19 అందెజి యేసు, “నాను నెగ్గికాన్ ఇజి ఎందనిజ్ సీను వెప్సిన దేవుణు ఒరెండ్రె నెగ్గికాన్. మరి ఎయెన్‌బా నెగ్గికాన్ ఆవెన్”, ఇజి వెప్తాన్.

20 మరి వచ్చిజ్, “రంకు బూలామా. లోకుదిజ్ నవ్మా. డోబ కిమ. అబద సాక్కి వెహ్మా. నీ యాయ బుబ్బెజ్ గవరమ్దాన్ నెగిండు నుడెఆ* ఇని మోసె సిత్తి ఆడ్రెజ్ నెనినిగదె”, ఇజి వెహ్మాన్.

21 వెహ్మాజ్ వాండ్రు, “ఇజివెలెహ్మాన్ అసి యా విజు వన్నాజ్ లోజిజిన వాజిన”, ఇజి వెహ్మాన్.

22 యేసు యాక వెహండ్రె వచ్చిజ్, “మరి ఉండ్రీ బా సీన్ కిదెజ్ మనాద్. నిజి కల్లితిమునికెజ్ విజు పొర్ని అయా డబ్బుజ్ బీద వరిజ్సీఅ. అయావలె దేవుణు మంజిని బాడిఃదు నిజి సంసారం మంజినాద్. మరి, నీను వాజి నా సినూడుః ఆఅ”, ఇజి వెహ్మాన్.

23 యా మాటెజ్ వెహ్మాజ్, వచ్చి మొకరి ఇజ్జక ఆతాద్. ఎందనిజ్ ఇహిజు, వాండ్రు నండో ఆస్తిమునికాన్.

24 యేసు వచ్చిజ్ సుడెఃజి, “ఆస్తిమునికార్ దేవుణు కిని ఏలుబడిఃదిజ్ అడిఃగి మండ్రెజ్ ఎసానో కప్పం.

25 ఒరెన్ సంసారం మనికాన్ దేవుణు కిని ఏలుబడిఃదిజ్ అడిఃగి మచ్చి దని మున్ను. ఉండ్రీ ఒంటి దొబాసం బోలోదాన్డుఃగదెజ్ సూలు ఆనాద్”, ఇజి వెహ్మాన్.

26 అయావలె యా మాటెజ్ వెహ్మాకార్, “అహిజు, దేవుణు రక్కిన్తి లెకెండ్ ఎయెర్ మండ్రెజ్ అట్నార్?”, ఇజి వెనబాతార్.

27 అందెజి యేసు, “లోకు కిదెజ్ అట్ఇక దేవుణు కిదెజ్ అట్నూన్”, ఇజి వెహ్మాన్.

28 నచ్చివలె పేతురు, “ఇదిలో, మాపు మజి కల్లితి మనికెజ్ విజు డిఃస్తాపె నీ వెట వాతాప్”, ఇజి వెహ్మాన్.

29-30 అందెజి యేసు, “ఒరెన్ వచ్చి మున్ను దేవుణు ఏలుబడిః కిదెజ్ ఇజి ఇల్లుదిజ్బా ఆల్లిజ్బా, దాద తంబెరిజ్బా అయిని అప్పొసిరిజ్బా కొడోఃకొదెజ్బా, డిఃస్తికాన్ ఎయెండ్రో వచ్చిజ్ యేలు మరి నండో కల్లినాద్. వాని కాలమ్దు వచ్చిజ్ ఎలాకాలం దేవుణు వెట బత్కిని బత్కుదు బా మంజినాద్, ఇజి కసితం నాను మీ వెట వెహ్మాన్”, ఇజి వెహ్మాన్.

యేసు వచ్చి సావందిజ్ సినూరిజ్ వెహ్మానాన్

31 యేసు వచ్చి వన్నాండు మణినిర్ సినూరిజ్ కూక్కి వరిజ్ ఈహు వెహ్మాన్. “ఇదిలో మాటు యెరూసలెమ్దు సొన్నినాద్. లోకు మరిని ఆతి నా వందిజ్ ప్రవక్తరు రాస్తి విజు మాటెజ్ అబ్బె పూర్ ఆనాద్.

32-33 యూదురు ఆఇ వరి కీదు నాను ఒవజెవె ఆస. వారు నజీ వెక్కిని సిగు లాగ్గి, నా మున్ను పూని కొరెడిఃజాణిజ్ డెఃయిజి నప్పార్. మూండ్రీ దినమ్కాజ్ నాను మరంజి నికెవె ఆనాలె.

34 గాని సినూరిజ్ యా మాటెజ్ లోఇ ఉండ్రీబా అర్లం ఆవితార్. దిన్ని అర్లం వరిజ్ డాఃజితాద్. వాండ్రు వెహ్మా నజతిజ్ వారు నెన్ఏతార్.

గుడ్డి వాండ్రు బేస్తెజ్ అట్సీనాన్

35 యేసు యెరికొ పట్టుమ్దిజ్ డగ్రు వాతివెలె, ఒరెన్ గుడ్డి వాండ్రు సరి పడఃకాద్ బసి లోని మహాన్.

36 సీన లోకుర్ అయా సరిదాన్ సొన్ని మహిక, వెహండ్రె, ఇనిక జర్గిజినాద్ ఇజి వెనబాతాన్.

37 వారు వచ్చిజ్, “నజెరెతు వాండ్రు ఆతి యేసు, సొన్సినాన్”, ఇజి వెహ్మాన్.

38 వాండ్రు, “ఓ దావీదు మరిని ఆతి యేసువా, నా మున్ను కనికారం తోరిన్అ”, ఇజి డటం డేల్స్తాన్.

39 ముజాలె సొన్ని మహికార్, “అలెఅ”, ఇజి వచ్చిజ్ కసితం వెహ్మాన్. గాని వాండ్రు మరి నండో దావీదు మరిని, నా మున్ను కనికారం ఆఅ”, ఇజి మరి ఒదె డటం డేల్స్తాన్.

40-41 యాక వెహండ్రె యేసు అబ్బె నిహాన్. “అయా గుడ్డి వచ్చిజ్ నా డగ్రు తగ్అ”, ఇజి వరిజ్ డటం వెహ్మాన్. వాండ్రు వాతిజ్, నాను నిజి ఇనిక కిదెజ్ ఇజి కోరిజిని?”, ఇజి వచ్చిజ్ వెనబాతాన్. దనిజ్ వాండ్రు, “ప్రబువా, నాను బేస్తెజ్ ఇజి ఆస ఆజిన”, ఇజి వెహ్మాన్.

42 అందెజి యేసు, “ఇదిలో నీను సూణిలె. నీను నా మున్ను నమకం ఇడ్డి. అందెజి నెగిణ్ ఆతి”, ఇజి వెహ్మాన్.

43 వెటసె వాండ్రు బేస్తెజ్ అట్నూన్. వాండ్రు దేవుణుదిజ్ పొగిడిఃజి యేసువెట సొహాన్. యాక సుడెఃతిజ్ లోకుర్ విజెరెబా దేవుణుదిజ్ పొగిడిఃతార్.

* 18:20 18:20 నిగ్గము 20:12-16, ద్విత్తి 5:16-20.

19

జకయ ఇని పన్ను పెర్చి వన్నీజ్ కూక్చినాన్

- 1 యేసు నడిజియెరికొ పట్టుమీదు వాతండై అయా సరిదాన్ సొన్ని మహాన్.
- 2 జకయ ఇన్ని ఒరెన్ అబ్బె మహాన్. వాండ్రు పన్ను పెర్చి వరిజ్ నెయెకి. వాండ్రు గొప్పు ఆస్తిమున్నుకాన్.
- 3 యేసుజ్ సుడెదెజ్ ఇజి వాండ్రు కోరితాన్. గాని నండొ లోకుర్ మహిజ్ వన్నీజ్ సుడెదెజ్ అబ్ ఎతాన్. ఎండనిజ్ ఇహిజ, వాండ్రు కురికాన్.
- 4 యేసు అయా సరిదాన్ నె వాజి మహిజ్, వాండ్రు ముజాల ఉహాక్చి సొన్ని ఉండ్రీ బొడ్డె మరాత్ ఎత్తాన్.
- 5 యేసు మరాన్ అడిగి వాతివెలె, మున్ను బేసి, “జకయ, బేగి డిగిజి రఅ. నేండ్రు నాను నీ ఇండ్రొ మండ్రెజ్ వెలె”, ఇజి వన్నీజ్ వెత్తాన్.
- 6 అందెజి వాండ్రు గజిబిజి డిగితాండ్రె వన్ను ఇండ్రొ కూక్ ఒతండ్రె సర్దదాన్ డగ్రు కిత్తాన్.
- 7 యాక సుడెతార, లోకుర్ విజెరె సణిజెతార్. “వీండ్రు, పాపం కిని వన్ను ఇండ్రొ కాల సొహాన్”, ఇజి.
- 8 అయావలె జకయ నిజితండ్రె, యేసుజ్ ఈహు వెత్తాన్. “ఇదిలో ప్రబువా, యేలు నా ఆస్తి లోఇ సగం బీదవరిజ్ నీజి. అనయమ్దాన్ ఎయె బాన్ బా ఇనిక లొస్తిజ, నాను దని నాల్లి వంతు మరజి సీన”, ఇజి వెత్తాన్.
- 9 యేసు వన్నీజ్, “నేండ్రు యా ఇండ్రొణి పరి పాపమ్ కు దేవుణు సెమిస్త మనాన్. ఎందానిజ్ ఇహిజ, విన్ని అనిసిఆతి అబ్రాహము దేవుణు మున్ను నమకం ఇడ్డి వజ, వీండ్రు బా నమకం ఇట్టాన్.
- 10 లోకు మరిసి ఆతి నాను పాడాజి సొని వరిజ్ రెబాజి రక్చిస్తెజ్ వాత్”, ఇజి వెత్తాన్.

పణిమణిసిర్ కత

- 11 లోకుర్ యాకెజ్ వెంజి మహార్. వాండ్రు యెరూసలెం డగ్రు ఆతాన్. దేవుణు రాజు వజ వెటనె వానాన్ లె ఇజి లోకుర్ బా ఒడెబితార్. అందెజి వాండ్రు కత వజ వరిజ్ ఈహు నెన్ పిస్తాన్.
- 12 ఒరెన్ రాజు వజ కుటుమదికాన్ వన్ను దేనమ్ దు రాజు ఆదెజ్ ఇజి ఉండ్రీ దూరం మని దేసెం సొహాన్. మరి, మరజి వాదెజ్ ఇజి సొహాన్.
- 13 సొని ముజాల, వన్ను పణిమణిసిర్ లోఇ పది మణిసిర్ కూక్చి ఒరెన్ ఒరెన్ వన్నీజ్ ఉండ్రీ మీనా* సిత్తాన్. సితాండ్రె, “నాను మరజి వాని దాక బేరం కిజి మండ్రు”, ఇజి వరిజ్ వెత్తాన్.
- 14 గాని వన్ను పట్టుమదికార్ వన్నీజ్ ఇస్తం సెలెతాద్. అందెజి వారు, “వీండ్రు మజి విలుబడి కిదెజ్ మజి ఇస్తం సెలెద్”, ఇజి వన్ను వెనక పెరి రాజుజ్ కల్లు పోక్తార్.
- 15 అహిజ్ బా, వాండ్రు రాజు ఆతాన్. మరజి వాతివెలె, వాండ్రు డబ్బు సెత్తి మణిసిర్, అయా డబుదాన్ బేరం కిజి ఇనిక గణస్తార్ ఇజి నెస్టెజ్ వరిజ్ కూక్చిస్తాన్.
- 16 వరిలోఇ మొదొహికాన్ వన్ను డగ్రు వాజి, “బాబు, నీను సెతి యాబయి రుపాయుజాణిజ్, అయ్ దు వందెజ్ రుపయిజు వాతె”, ఇజి వెత్తాన్.
- 17 వాండ్రు, “నెగ్గి పణిమణిసి నీను నెగెండ కితి. నీను ఇజ్రి పణిదు నమకం దాన్ మహి. అందెజి పది పట్టుమక మున్ను అతికారి ఆఅ”, ఇజి వెత్తాన్.
- 18 అయావలె మరి ఒరెన్ వాజి, “బాబు, నీను సెతి యాబయి రుపాయుజాణిజ్ రుండి వందెజ్ యాబయి రుపాయుజు వాతె”, ఇజి వెత్తాన్.
- 19 నీను బా అయ్ దు పట్టుమక మున్ను అతికారి ఆఅ”, ఇజి వెత్తాన్.
- 20-21 అయావలె మరి ఒరెన్ వాజి, “బాబు, ఇదిలో నీ డబ్బు. నీను నీది ఆకజ ఒనికి. నీను విత్ ఇకెజ్ కొయ్ జ ఒనికి. నీను గబి పాణం మనికి. అందెజి నిజి తియెల్ ఆజి యా డబ్బు రుమాలదు మూట తోహాక్ ఇట్టా మహా”, ఇజి వెత్తాన్.
- 22-23 అందెజి వాండ్రు వన్నీజ్ వెత్తాన్, “పణిదిజ్ రజి పణిమణిసి, నీ వెయెది సొంత మూటదిజ్ నె, నాను నిజి తిర్చు తిరసిన. నాను నాది ఆకదనిజ్ పెర్చి ఒనికాన్ ఇజి, నాను విత్ ఇకెజ్ కొయ్ జ ఒనికాన్ ఇజి నీను

* 19:13 19:13 ఉండ్రీ మీనా మూండ్రె నెలెజి పణిదిజ్ కాలి

నెన్ని గదె. నాను గటి పణం మనికాన్ ఇజి నీను నెన్ని. మరి ఎందనిజ్ నా డబ్బు బెంకుదు ఇడెఇతి? అహు ఇడ్డిక ఇహిజ, నాను మరజి వాతివెలె వడ్డిదాన్ దోహ్కాద్ మరి.

24 విన్నిబాన్ మన్నిడబ్బు లాగ్గి పది పట్టుమ్కాజ్ అతికారి ఆతి మొదోహివన్నెజ్ నీదు”, ఇజి పడకాద్ నిహి మహి వరిజ్ వెహ్సాన్.

25 వారు, “బాబు, వన్నిజ్ అయ్దు వందెజ్ రుపాయ్జు మన గదె”, ఇజి వెహ్సార్.

26 వెహ్సాజ్ వాండ్రు, “నమిదెజ్ తగ్గి వన్నిజ్ మరి నండో కల్లినాదెలె. గాని నమిదెజ్ తగ్గెజ్ వన్నిజ్ కల్లితి మన్ని కండెకబా లగ్గాన్, ఇజి నాను మీ వెట వెహ్సాన్.

27 మరి, నాను వరి మున్ను ఏలుబడిః కిదెజ్ ఇన్టం సిల్లి నా పగ ఆతి వరిజ్ ఇబ్బె తగ్గెల. వరిజ్ నా ఎద్దు కత్తు”, ఇజి వెహ్సాన్.

28 యేసు యా మాటిజ్ వెహ్సా వెనుక, యెరుసలం సొండ్రెజ్ వరి ముజాల సొన్నినాన్.

29-30 ఒలివ గోరోణ్ డగ్గు మన్ని బెత్సెనెగె, బెతానియ ఇని నాహ్కాజ్ డగ్గు వాతాన్. వాతివెలె వన్ని సిసూర్ లోఇ రివెరిజ్ కూక్కి, “మీ ఎద్దు మన్ని నాటో సొండ్రు. అబె సోహిజ సరి, తోహ్కాక్కి మని గాడెదె పిల్ల తోర్వాద్. దన్నిమున్ను ఎనెజ్బా ఎయెర్బా బన్ఎరె. దనిజ్ కుత్తి పేరజ్ తగాట్.

31 ఎయెనబా, “మీరు ఎందనిజ్ దనిజ్ కుత్సినెదెరె, ఇజి వెనబాతిజ, యాకెజ్ ప్రబుజ్ కావాలి, ఇజి వరిజ్ వెహ్సా”, ఇజి వెహ్సాండ్రె పోక్తాన్.

32 పోక్కి మనికార్ సొన్ని వాండ్రు వరిజ్ వెహ్సా లెకెండెనె సుడఃతార్.

33 వారు ఆ గాడెదె పిల్లదిజ్ కుత్తి మహిజ్, దన్ని ఎజుమాసూర్, “మీరు ఎందానిజ్ గాడెదె పిల్లదిజ్ కుత్తిన్దెరె”, ఇజి వెనబాతార్.

34 అందెజి వారు, “యాక ప్రబుజ్ కావాలి”, ఇజి వెహ్సార్.

35 వారు యేసుడగ్గు తత్తార్. తత్తారి, దన్నిమున్ను వరి పాతెజ్ పహ్తార్. యేసుజ్ దని మున్ను ఎక్కిస్తార్.

36 వాండ్రు సొన్ని మహిజ్, వరి పాతెజ్ సొన్సినె సర్దు పహ్తార్.

37 ఒలివ గోరోణ్ డిఃగ్గి వాని సర్దు వాతివెలె, వన్ని సిసూర్ ని వన్ని వెట మన్ని మంద లోకుర్ విజెరె దేవుణదిజ్ పొగిడిఃతార్. వారు సుడఃతి విజు గోప్పు వణిజి వందిజ్ సర్దూదాన్ దేవుణదిజ్ డటం పొగిడిఃతార్. వారు ఈహు పొగిడిఃతార్.

38 “దేవుణు సితి అతికారమ్దాన్ వాజిని రాజుజ్ పొగిడిః ఆనికాన్†. పరలోమీదు సమాదనం మనాద్. మున్ను మన్ని దేవుణు గోప్పు వెరికాన్”,

39 నన్నివలె ఆ మంద లోఇ మన్ని నెగొండార్ వరియరుజు, “ఓ బోదకినికి, నీ మంద సిసూర్ విజెరిజ్ అలెజి మండ్రు ఇజి డటం వెహ్సా”, ఇజి వెహ్సార్.

40 అందెజి వాండ్రు, “మీరు అల్లెత మహిజ, యా పణుకుజ్ డటం డేల్లి పొగిడిఃజినె ఇజి నాను మీ వెట వెహ్సాన్”, ఇజి వెహ్సాన్.

41-42 వాండ్రు యెరుసలం పట్టుం డగ్గు వాతండ్రె, పట్టుమ్దిజ్ సుడఃజి అబ్బె మన్ని లోకుర్ వందిజ్ అడఃబతాన్. అడఃబతాండ్రె ఈహు వెహ్సాన్, “మీరు యా దినమ్దు బా సమాదనం ఆని సజతిజ నెస్తిజ మిజి ఎసొనో మేలు మంజినాద్. గాని యేలు యాకెజ్ మీ కణకాజ్ తోరెంండ డాఃజిత మనె.

43-44 దేవుణు మిజి రక్కిస్తెజ్ మీ డగ్గు వాతి కాలం మీరు నెన్ఇదెరె. అందెజి మీ పగ్గెఆతికార్ మీ సుటులం కోట తోహ్కాక్కి వెల్లి సొన్ఎండ, లాపు అడ్డుజ్ కినార్. వారు మిజి, మీ పట్టుమ్దిజ్ పూర్తి నాసనం కినార్. వారు పణుకు మున్ను పణుకు మన్ఎండ పట్టుం పూర్తి నాసనం కిని కాలం వానాదెలె.

యేసు గుడిఃదాన్ సవ్కారిజ పేరజినాన్

45-46 యాకెజ్ వెహ్సాండ్రె, వాండ్రు దేవుణు గుడిఃదు సోహ్సాన్. అయావలె అబ్బె సవ్కారిజు పొర్ని మహార్. వరిజ్, “నా గుడిః పొర్తనం కిదెజ్ ఇడ్డి గుడిః‡ ఇజి దేవుణు మటదు రాస్త మనాద్. గాని మీరు డోజారి మంజిని సాలం‡ లెకెండె దనిజ్ కితిదెరె”, ఇజి వెహ్సాండ్రె వరిజ్ పేర్తాన్.

† 19:38 19:38 కీర్తన 118:26. ‡ 19:45-46 19:45-46 యెసయ 56:7. § 19:45-46 19:45-46 యిర్మీయ 7:11.

47 యేసు బోజా, గుడిడు బోదకిజి మహాన్. పెరిపుజెరిబు, యూదురి రూలుజ్ నెస్సిస్సికార్, లోకుర్ లొఇ మన్ని పెద్దెల్బు వన్నిజ్ సప్తెజ్ సుడేజి మహార్.

48 గాని లోకుర్ విజెరి వన్ని మాటెజ్ బాగ వెంజి వన్ని సుటులం మహిజ్, వన్నిజ్ సప్తెజ్ అట్వతార్.

20

యేసు అతికారం వందిజ్ వెన్బాజినార్

1 అయా దినమ్కలొఇ ఉండ్రె నాండెజ్, వాండ్రు దేవుణు గుడిడు లోకొజ్ నేరపెసి, సువార్త బోదెసి మహాన్. అయావలె పెరి పుజెరిబు ని యూదురి రూలుజ్ నెస్సిస్సికార్, పెద్దెల్బు వెట కూడేజి వన్ని ముస్సు వాతాద్.

2 నీసు ఇనిఅతికారమ్దాన్ యా పణిజ్ కిజిని? ఎయెన్ నిజి యా అతికారం సితాన్? మజి వెహాఅ”, ఇజి వన్నిజ్ వెన్బాతార్.

3 అందెజె వాండ్రు, “నాను బా మిజి ఉండ్రె మాట వెన్బానా.

4 బాప్తీసం సిదెజ్ అతికారం యోహానుజ్ ఎయె బాణిజ్ వాతాద్ దేవుణు బాణిజ్నా లోకు బాణిజ్నా నజి యేలు వెహు? ఇజి వెహ్నాన్.

5 వరిలొఇ వారు ఈహు వర్గితార్. దేవుణు బాణిజ్ వాతాద్ ఇజి మాటు వెప్తాజ, ఎందనిజ్ మీరు వన్నిజ్ నమ్ఇతిదెర్ ఇజి వాండ్రు వెన్బానాన్.

6 లోకుర్ బాణిజ్ ఇజి మాటు వెప్తాజ, లోకుర్ విజెరి మజి పణకాణిజ్ డెయినార్. ఎందనిజ్ ఇహిజ, యోహాను, ఒరెన్ దేవుణు ప్రవక్త ఇజి విజెరి పూర్తి నమ్మిజినార్.

7 అందెజె వారు, “అయాక ఎంబెణిజ్ వాతాద్ మజి తెలివెద్”, ఇజి వారు మర్జి వెహ్నార్.

8 అహిజ, ఎంబెణి అతికారమ్దాన్ నాను యా పణిజ్ కిజిని ఇజి నాను బా వెహాఎ”, ఇజి యేసు వరిజ్ వెహ్నాన్.

రయ్యుజ కత

9 మరి, వాండ్రు ఉండ్రె కత వజి లోకురిజ్ నెన్పిస్తాన్. “ఒరెన్ లోకు ద్రాక్కు బోట ఉణుస్తాన్. ఆ బోట నెగొండార్ రయ్యతూజ తనక సితాన్. సితండ్రె నండొ కాలం మండ్రెజ్ ఉండ్రె దూరం దేనిం సాహాన్.

10 పంట కొయెని కాలమ్దు వన్నిజ్ వాని పట్టుజ వంత లొసి తగల ఇజి ఒరెన్ గొతియ వన్నిజ్ రయ్యతూజ డగ్రు పొక్తాన్. అయా రయ్యతూజ వన్నిజ్ డెయితారె వహి కీదాన్ మర్జి పొక్తార్.

11 వాండ్రు మరి ఒరెన్ గొతియవన్నిజ్ పొక్తాన్. వారు వన్నిజ్బా డెయిజి, సిగు కితారె వహి కీదాన్ పొక్తార్.

12 మరి బా, ఒరెన్ వన్నిజ్ పొక్తాన్. వారు వన్నిజ్ గాయమ్కు ఆని లెకెండ్ డెయితారె వెల్లి విసిర్తార్.

13 అయావలె ద్రాక్కు బోట ఎజుమాని, “నాను ఇనిక కిదెజ్? నాను లాపు ప్రేమిస్సి నా సొంత మరిసిజ్ పొక్కు. వారు వన్నిజ్ గవరం సీనార్లెసు”, ఇజి ఒడేబితాండ్రె పొక్తాన్.

14 గాని పాలి ఆస్తి మన్నికార్ వన్నిజ్ సుడేజితారె, “విండ్రు యా బోటాదిజ్ అక్కు మనికాన్. యా బోట మాది ఆదిజ్ వన్నిజ్ సప్పాట్. రదు”, ఇజి వరి లొఇ వారు వర్గితార్.

15 అందెజె వారు వన్నిజ్ ద్రాక్కు బోటదాన్ వెల్లి పొక్తారె సప్తార్. అహిజ, ద్రాక్కు బోట ఎజుమాని వరిజ్ ఇనిక కిసాన్?

16 వాండ్రు వాజి, అయా రయ్యతూజ నప్పి మహి వరిజ్ బోట ఒపజెప్పాన్. లోకుర్ యాక వెహారె, “ఆ లెకెండ్ కిదెజ్ ఆవెద్”, ఇజి వెహ్నార్.

17 యేసు వరిజ్ డిటం బేసి ఈహు వెన్బాతాన్, “అహిజ, ఇల్లు తొప్పికార్ నెక్కి పొక్కి పణుకు మూలదిజ్ మూల పణుకు ఆతాద్* ఇజి దేవుణు మాటుదు రాస్తి మన్ని దన్ని అరదం ఇనిక?

18 అయా పణుకు ముస్సు అర్చి విజెరి ముకెజ్ ఆనార్. అయా పణుకు ఎయెన్ ముస్సు అర్చిజ, వాండ్రు సింద్సింద్ ఆనాన్”.

19 యూదురి రూలుజ్ నెస్సిస్సికార్, పెరి పుజెరిబు, మా వందిజ్నెన్ వీండ్రు కత వజి వెహ్నాన్ ఇజి నెస్తారె, వెటని వన్నిజ్ అస్తెజ్ సుడేజితార్. గాని లోకురిజ్ తియెల్ ఆతారె, అన్వతార్.

* 20:17 20:17 కీర్తన 118:22.

20 అందెజె వారు వచ్చిజ్ బాగ గురి కిజి మహార. ఎందానిజ్ ఇహిజ, వాండ్రు వెప్పిని మాట లొఇ ఇని దనిజ్ బా తప్ప అసి వచ్చిజ్ తొప్పి అతికారిజ బాన్ బవజెచ్చెజ్. దిని వందిజ్ వారు నండ్ండాదిజ్ పొక్కినార. యా నెగొండార మాపు నీతి నిజాయితి మనికావ్ ఇజి వేనం కినికార. నని వరిజ్ వచ్చి డగ్రు పొక్తార. వీరు సొన్ని వచ్చి మాటజిలొఇ తప్ప అస్తజ్ ఇజి.

21 వారు వాతార వచ్చిజ్, “ఓ బోదకినికి, నీను నిజమతిక వెప్పి బోదకిని ఇజి మాపు నెస్సావ్. నీను ఇజ్జికార పెరికార ఇజి తేడ తొఇకి. దేవుణుదిజ్ ఇస్తం ఆతి నిజమాతి బత్తు. వందిజ్ నీను నిజం నెప్పిన్చి ఇజి మాపు నెస్సావ్.

22 మాపు కయసరుజ్ పన్ను సీనికెజ్ నాయమ్నా? అనయమ్నా?”, ఇజి వచ్చిజ్ వెన్ బాతార.

23-24 వాండ్రు వరి నెఇ బుద్దిదిజ్ నెస్సాండ్రి వరిజ్, “ఉండ్రి దినారి కాసు తోరిస్తు. దిని మున్ను మన్ని బొమ్మ ఎయెది? రాస్సి మన్ని రాంత్ ఎయెది?”, ఇజి వెన్ బాతాన్. “కయసర్వి”, ఇహార వారు.

25 అందెజె వాండ్రు, “కయసరుది, కయసరుజ్ సీదు. దేవుణుది దేవుణుదిజ్ సీదు”, ఇజి వెప్పాన్.

26 వారు అబ్బె మంద ఎద్రు వాండ్రు వెప్పి మాటదు తప్ప అస్తజ్ అట్వతార. వాండ్రు మరజి వెప్పి మాటదిజ్ నండ్ం బమ్మ అతార అలెతార.

27 నచ్చివలె నెగొండార సదుకయరు యేసు డగ్రు వాతార. సాతి వెనుక మరజి నిజ్నిక సిల్లెద్ ఇజి వారు వెప్పినార. వారు వాతార ఈహు వెన్ బాతార.

28 ఓ బోదకినికి, ఒరెన్ కొడోర్ సిల్లెండ సాతిజి. వచ్చి తంబెర్చి ఒచ్చిజ్ ఇడ్డె ఆజి కొడోర్ ఇడ్డెదెజ్. ఆహె సాతి వచ్చి వందిజ్ కుటుం నిల్పెజ్, ఇజి మోసి మజి రాస్త సిత్తమనాన్.

29-31 యేలు సుడెఆ, ఉండ్రి కాలమదు, దాదతంబెర్సిన్, ఏడు గురు మహార. తోన్సుర్దికాన్ ఉండ్రి బోదెల్దిజ్ పెండ్లి ఆతాన్. కొడోర్ సిల్లెండ సాతాన్. సాతిజ్, నడిపి వాండ్రు దనిజ్ ఇడ్డె ఆతాన్. కొడోర్ సిల్లెండ సాతాన్. వెనుక కొర్గి నడిపి దనిజ్ ఇడ్డె ఆతాన్. కొడోర్ సిల్లెండ వాండ్రుబ సాతాన్. ఆహె ఏడు గురు బా కొడోర్ సిల్లెండ సాతార.

32 కడెవేరిదు ఆ బోదెల్ బా సాతాద్.

33 అందెజె సాతి వరిబాణిజ్ మరజి నిజ్ని వెలె, ఆ బోదెల్ ఎయెరిజ్ ఆల్చి ఆనాద్? ఆ ఏడు గురుదిజ్ బా అది ఆల్చి ఆత మహాద్ గదె?”, ఇజి వెన్ బాతార.

34 అందెజె యేసు వరిజ్ ఈహు వెప్పాన్, “యా లోకమ్ది లోకుర్ పెండ్లి ఆజనార. పెండ్లిదిజ్ సీజనార.

35 గాని సాతి వరిబాణిజ్ మరజి నిజ్జె పరలోకమ్దు మండ్రెజ్ తగ్గికార పెండ్లి ఆవిర్. పెండ్లిదిజ్ సీవిర్.

36 ఎంఆనిజ్ ఇహిజ, వారు మరి సావిర్. వారు దేవుణు దూతెజి పొలితికార. వారు సాపుదాన్ మరజి నిజ్నార. అందెజె వారు దేవుణు కొడోర్.

37-38 సాతికార నిజ్నార ఇజి మోసి నెగెండ రుజుప్ కిజినాన్. అట కచ్చి బాన్ మోసి సాహాన్. అబ్బె, ‘అబ్రాహము దేవుణు, ఇస్సాకు దేవుణు, యాకోబు దేవుణు ఇజి వాండ్రు దేవుణు ఆతి ప్రబు వందిజ్ వెప్పినాన్. అయాలె అబ్రాహము, ఇస్సాకు, యాకోబు బత్తిజనార ఇజి తోర్నాద్. వాండ్రు బత్తితి మన్ని వరిజ్న దేవుణు. సాతి వరిజ్ దేవుణు ఆవెన్. ఎందనిజ్ ఇహిజ, వచ్చి వెట కూడితి మనికార విజెరె బత్తిజనార.

39 నెగొండార, యూదురి రూలుజ్ నెప్పిన్చికార, “బోదకినికి, నీను నెగండ వెప్పి”, ఇజి వచ్చిజ్ వెచ్చార.

40 వెనుక వారు వచ్చిజ్ ఇనికబా వెన్ బాదెజ్ ఎయెరిజ్ బా దయరు సాల్వతార.

41 యేసు వరివెట ఈహు వెప్పాన్. “క్రీస్తు దావీదు తెగ్గాతికాన్ ఇజి ఎలాగ వారు వెప్పినార?

42-43 ‘నాను నీ వగాతి వరిజ్ నీ పాదమక అడిగి ఇడ్డిదాక, నీను నా ఉణెర్ పడకాదు బన్ ఆ’, ఇజి ప్రబు నా ప్రబు వెట వెప్పాన్+”, ఇజి కీర్తన పుస్తకమ్దు దావిదునె వెప్పినాన్.

44 దావిదునె వచ్చిజ్, “ప్రబు” ఇజి కూక్కినాన్. అయాలె వాండ్రు ఎలాగ దావీదు మరిసి ఆనాన్.

45-46 లోకుర్ విజెరె వెంజి మహివలె, యేసు వచ్చి సినూరిజ్ వెప్పాన్, “వీరు యూదురి రూలుజ్ నెప్పిన్చి వందిజ్ జాగర్త మండ్రు వారు నిరీ సొక తొడెగిజి బూలాదెజ్ ఇస్తం ఆతికార. సత నడిపిమె

† 20:42-43 20:42-43 క్రిస్త 110:1.

పెరికార్ ఇజ మాడె; ఆదెజ్ కోరిజినార్. యూదురి మీటిజ్ ఇంత్రో పెరికార్ బన్ని బాడిడు బస్తెజ్, విందుద్ నెగ్గి బాడిడు బస్తెజ్ కోరిజినార్.

47 వారు రాండి బోదెక్ ఇల్కాణికెజ్ అనయమ్దాన్ లాగ్జినార్. మహి వరి ఇంక నెగ్గికాప్ ఇజ తోరి ఆదెజ్ నిరి పార్దనం కిజినార్. దేవుణు వరిజ్ నండో సిక్కు సీనాన్”.

21

1 యేసు దేవుణు గుడిడు బస్తాండ్రె, సుటులం బేస్తాన్. అయావలె ఆస్తిమున్నికార్ సంత పెట్టెదు పెరి సంత అర్చసినిక సుడెతాన్.

2 ఇనిక సిల్లి ఉండ్రె రాండి బోదెలి సంత అర్చస్సిక బా సుడెతాన్. అది రుండి పయినెజ్ అరప్తాద్.

3 వాండ్రు వరిజ్, “నాను నిజం మీ వెట వెహ్సిన, యా ఇనిక సిలి రాండి బోదెలి మహి విజెరి మున్సు. లావు అరప్తాద్.

4 వారు విజెరి వరిజ్ కల్లితి మన్ని సంసారం బాణిజ్ అరప్తాద్. గాని అది దనిజ్ సిల్లి బాణిజ్ దనిజ్ బత్తిదెజ్ మనికెజ్ అరప్తాద్”, ఇజి వెప్తాన్.

5 అయావలె వన్ని సిసూరలోఇ సెగెండార్, అయా దేవుణు గుడి; వందిజ్ వర్గిజి మహార్. నెగ్గి పణుకుదాన్ తోహక్తిక యా గుడి; ఇజి వర్గితార్. సంద సిత్తి నెగ్గి ఇనాయమ్కు ఇబ్బె ఇడ్డె మనె. గొప్ప సోకు మనాద్”, ఇజి వర్గితార్.

6 అయావలె యేసు, “మీరు సుడెతికెజ్ పణుకు మున్సు. పణుకు మన్విండ అరె ఆని దినమ్కు వానెలె”, ఇజి వెప్తాన్.

7 అయావలె వారు, “ఓ బోదకినికి, యాకెజ్ ఎనెజ్ జర్గిజిని? యాక జర్గిని కాలం డగ్రు ఆతాద్ ఇజి తోరిస్సి గుర్తు ఇనిక?”; ఇజి వెనెబాతార్.

8 అందెజె వాండ్రు వెప్తాన్, “మీరు మొసెం కిబె ఆఎండ జాగర్త మండ్రు. ఎండనిజ్ ఇహిజి నండెండార్ నా పేరు అసి వానాలె. వారు, “నానె దేవుణు పోహ్క్తిస్త్రు ఇజి, కాలం డగ్రు ఆతాద్ ఇజి వెహ్సిన వానార్. వరి వెట సాన్కాట్.

9 మీరు విదెమ్కు వందిజ్, జటిజ్ వందిజ్ వెనివెలె తియెల్ ఆమాట్. యాక ముజాలె జర్గిదెజ్వెలె. గాని ఆక్కరె రోజు వెటనె రెజె.

10 మరి వాండ్రు వరిజ్ వెప్తాన్, “లోకుర్ మున్సు. లోకుర్, రాజెం మున్సు. రాజెం జటిజ్దిజ్ నిజ్నార్లె.

11 అబ్బె ఇబ్బె బూమి గొప్ప కర్ణినికెజ్ వానెలె. నండో దేసమ్దు కర్తుజ్, నండో లోకురిజ్ సెద్దిజి అస్సి కన్దమ్కు వానెలె. గొప్ప తియెల్ కల్లిస్సి గుర్తుజ్ ఆగాసమ్దు పుట్టెలె.

12 గాని యాకెజ్ జర్గిని ముజాలె, వారు మిజి అస్సారె, ఇమ్సెజ్ కినార్. వారు మిజి యూదురి మీటిజ్ ఇంత్రోని, జెలిరు ఒవజెప్పార్. రాజుజ ముజాలె, మహి అతికారిజ ముజాలె మిజి తనార్. యాకెజ్ విజి నా మున్సు. నమకం ఇడ్డి వందిజె జర్గినె.

13 అయావలె, యాకదె మీరు నా వందిజ్ సువార్త వెప్తాజ్ నెగ్గి సమయం.

14 వారు వెనెబానివెలె, వరిజ్ ఎలాగ మర్జి వెప్తాజ్ ఇజి ఒడెబిజి ముజాలె బాద ఆవి ఇజి తిరుమానం కిజి మన్అ.

15 ఎందానిజ్ ఇహిజి, మీ పగాతికార్ ఎయెర్బా మిజి ఎద్రిన్ఎండ మంజిని వజి మీరు వెప్తాజ్మాటెజ్, గెణం నాను మిజి సీన.

16 మిజి మీ అయిసి అపోసీర్బా దాదతంబెర్సిర్బా కూలెజ్బా అతికారిజబాన్ సిక్కు సిబిస్సెజ్ ఒవజెప్పార్. మీ లొఇ సెగెండారిజ్ వారు సప్పార్.

17 నా మున్సు. నమకం ఇడ్డి వందిజ్ విజెరి మీ మున్సు. పగదాన్మంజినార్.

18 గాని మీరు ఎలాకాలం బత్తినార్.

19 కన్దమ్కు ఓరిసి మండ్రు. అయావలె మీజి ఎలాకాలం దేవుణు వెట బత్తిని బత్తు. దోహ్క్తిదెర్.

20 యెరూసలెం పట్టుం సుటులం ఉద్దం కినికార్ కూడెజి మహిక, మీరు సుడెతిజి, దన్ని నానం డగ్రు ఆతాద్ ఇజి మీరు నెత్తెవెలె.

21 అయావలె నాసనం ఆవిండ మండ్రెజ్ యూదయ దేనమదు మన్నికార్ గొరొకాజ్ ఉహ్కైజ్వెలె. యెరూసలెం పట్టుం నడిమి మనికార్ వెల్లి ఉహ్కైజ్వెలె. యెరూసలెం పట్టుం వెల్లి మనికార్ లొక సొండ్రెజ్ ఆవద్.

22 ముజాలె రాస్తి మనికెజ్ పూర్తి అదెజె యా సిక్కు దినమకు.

23 ఆ దినమకాజ్ పొటాద్ మన్ని వన్యాజ్, పాలు ఉట్పిస్సి వన్యాజ్ గొప్పు క్షం. ఎండనిజ్ ఇహిజ, యూదయ దేసెం ముస్సు, నండొ కష్టమకు వానెలె. దేవుణు కోపం యా లోకుర్ ముస్సు వానాద్.

24 వారు కూర్తెజాణిజ్ సానారలె. సెగొండారిజ్ తోహ్కీ పయ్ దేసెమ్కాజ్ విజు ఒనారలె. దేవుణుదిజ్ నెన్ఇకారె యెరుసలెమ్దిజ్ ఏలుబడిః కిసారలె. వరి ఏలుబడిః అబ్బె పూర్తి అని కాలమదాక యెరూసలెం వరి అడిఃగి ఆనాద్.

25 పొద్దుదు, నెలదు, సుక్కెజదు బమ్మకిని గుర్తుజ్ తోరనెలె. సమ్దరమ్ది ఉల్కాజ్ గొప్పు గగల్ కిజి వరిజ్ తియెల్ కల్లిస్సె. అహా బూమిద్ మన్ని లోకుర్ విజెరె ఇనిక కిడెజ్ ఇజి అర్థం కివిండ మంజనార్.

26 ఆగసమదు మన్ని నండొ రకమ్కాణికిజ్ కద్లినె. అందెజె లోకమదు జర్గిని వన్యాజ్ వందిజ్ ఎత్తు కిజి తియెల్ అజి లోకుర్ సానార్.

27 అయావలె లోకు మరిసి అతి నాను మొసొపుదు వానిక వారు సూణార. గొప్పు అతికారం దాన్ గొప్పు జూయ్దాన్ కూడిఃతి సొకుదాన్ మొసొవ్దు వానిక వారు సూణార.

28 యాకెజ్ జర్గిదెజ్ మొదొల్స్సెవెలె నిల్చి బుర్ర పెరదు. ఎందానిజ్ ఇహిజ, మీ కష్టమ్కాణిజ్ విడుఃదల డగ్రు అజినాద్.

29 వాండ్రు వరిజ్ కతవజ నెన్పిస్తాన్. బొడెమరాతిజ్ని విజు మరెకాజ్ సుడెఃదు.

30 ఆకెజ్ సెగ్రిసినివెలె, జీలు కాలం డగ్రు అతాద్ ఇజి మీరె సుడెఃజి నెసినిదెర్.

31 అయా లెకెండె, మీరు యా సజతిజ్ జర్గినిక సూణివెలె, దేవుణు యా లోకమదిజ్ ఏలుబడిః కిజినిక డగ్రు అతాద్ ఇజి నెసినిదెర్.

32 యా సజతిజ్ జర్గినిదాక, యా తరమ్దికార సావిర్, ఇజి నాను మీ వెట కనితం వెహ్సిన.

33 ఆగాసం బూమి సిల్లెండ ఆనాద్. గాని నా మాటిజ్ ఎసెజ్బా అయాలెకెండె సొన్ఉ.

34 మీరు ఉణిజి తింజి మత్తుదాన్ మన్విండ యా లోకమది బత్తు, వందిజ్ విసారిన్ఎండ జాగర్త మండ్రు. సిల్లిజ, లోకుమరిసిఅతి నాను వాని దినం ఉరి వాతి లెకెండె వెటనె వానాద్. అందెజె జాగర్త మండ్రు.

35 యా లోకమదు బత్తిజిని లోకుర్ విజెరె ముస్సు, అయా దినం నెన్ఎండ వానాద్.

36 యా జర్గిదెజ్ మన్ని విజు వన్యాజ్ ఒరిసి మంజిని సత్తు వందిజ్, లోకు మరిసి అతి నా ముజాలె నిల్ని సత్తు వందిజ్ ఎస్సివలె బా పార్సం కిజి జగర్త మండ్రు.

37 యేసు రోజు దేవుణు గుడిఃదు వేడెక నెస్సిసి మహాన్. రెయ్క ఒలివ గొరొత్ మండ్రెజ్ సొస్సి మహాన్.

38 లోకుర్ విజెరె పెందాల్నె, వన్ని మాటిజ్ వెండ్రెజ్ దేవుణు గుడిఃదు వాజి మహాన్.

22

యేసుజ్ ఒపజెప్తెజ్ యూద ఒప్పుకొటాన్

1 వస్సు, ఇని పులాజ్ సిల్లి రొట్టెజ్ తయారకిని వండొయ డగ్రు అతాద్.

2 నస్సివలె పెరిపుజెరిబు, యూదురి రూలుజ్ నెస్సిస్సికార్ యేసుజ్ ఎలాగ సప్తెజ్ ఇజి ఉపాయి సుడెఃజి మహాన్. ఎందానిజ్ ఇహిజ, వారు లోకురిజ్ తియెల్ అజి మహాన్.

3 అయావలె, వస్సెండు మణిసి సిసూర్ లొక మన్ని ఇస్కరియొతు ఇని యూదెజ్ సయ్యూసు అస్తాన్.

4 వాండ్రు పెరి పుజెరిబ, అతికారిజ బాన్ సొహండ్రె ఎలాగ వన్నిజ్ వరికిదు ఒపజెప్తెజ్, ఇజి వరివెట వర్గితార్.

5 అందెజె వారు సర్ద అతారె, వన్నిజ్ డబ్బు సీనాప్ ఇజి ఒప్పుకొటార్.

6 వాండ్రు దనిజ్ ఒప్పుకొటాన్. మంద లోకుర్ సిల్లివెలె వన్నిజ్ వరిజ్ ఒపజెప్తెజ్ తవ్కాసం సుడెఃజి మహాన్.

7 పులాజ్ సిల్లి రొట్టెజ్ తయారీకిని పండొయి కిని దినం వాతాద్. ఆ దినమందు మెండ గొర్రె పిల్లెజ్ పూజ సీజి వస్సు బోజనం కిదెజ్.

8 అందెజె యేసు పేతురుజ్, యోహానుజ్, “మీరు సొన్ని, మాటు పస్సు బోజనం ఉండెజ్ తయారీ కిదు”, ఇజి వెప్తాండ్రె వరిజ్ పోక్కినాన్.

9 వారు, “మాపు ఎంబె తయారీ కిదెజ్ ఇజి నీను కోరిజిని?”, ఇజి వన్నిజ్ వెనబాతార.

10-11 అందెజె యేసు వరిజ్ ఈహు వెప్తాన్. “మీరు పట్టుమదు సొనివెలె, కుండారు ఏరు పిణ్ణెజి ఒరెన్ మీ ఎద్దు వానాన్. వాండ్రు సొని ఇండ్రొ వన్ని వెట సొండ్రు. సొన్ని ఆ ఇండ్రొణి యజమానిజ్, ఈహు వెప్తూ, ‘నాను నా సిసూర వెట పస్సుబోజనం కిదెజ్ గది ఎంబె మనాద్ ఇజి బోదిస్సికాన్ నిజి వెనబాజినాన్’, ఇజి.

12 అయావలె ఆ ఎజమాని విజు తయారీ కితి మేడః ముస్సు మన్ని పెరి గది ఉండ్రీ తోరిస్సాన్. అబ్బి మీరు తయారీ కిదు”, ఇజి వెప్తాన్.

13 వారు పట్టుమదు సొహారె, యేసు వరిజ్ వెప్తివజి విజు నుడఃతార. వారు పస్సుబోజనం తయారీ కితార.

14 పస్సుబోజనం కిదెజ్ టయం అతివెలె, వాండ్రు వన్ని వన్నెండు మణిసిరి అపొస్తులు వెట బోజెనమదిజ్ బస్తార.

15 అయావలె వాండ్రు వరిజ్, “నజి నప్పి ముజాల మీ వెట కూడఃజి యా పస్సు బోజనం ఉండెజ్ నండొ ఆస ఆత.

16 ఎందానిజ్ ఇపాజి, యా పస్సు బోజెనమదిజ్ గుర్తు దేవుణు రాజెమదు పూర్తి ఆనిదాక నాను మరి ఎనెజ్ బా ఉణెవి.

17 యేసు ద్రాక్కుకల్లు మన్ని గిన్న అసి దేవుణుదిజ్ వందనం కితాన్. కితాండ్రె, “లోసి, మీరు సీబాజి ఉండు.

18 ఎందానిజ్ ఇపాజి, ఏలుదాన్ దేవుణు లోకురిజ్ ఏలుబడిః కినిక నూణిదాక నాను మరి ద్రాక్కు పట్టు రనం ఉణెవి ఇజి లొన్ మి వెట వెప్సాన్”, ఇజి వెప్తాన్.

19 మరి వాండ్రు రొట్టెఅసి దేవుణుదిజ్ వందనం వెప్పి దనిజ్ ముకెజ్ కిజి వరిజ్ సితాన్. “ఇక మీ వందిజ్ సీజిని నా ఒడొలదిజ్ గుర్తు. నజి ఎత్తు కిదెజ్ యాక కిజి మండ్రు”, ఇజి వెప్తాన్.

20 అయలెకెండెనె, బోజనం అతి వెనా వాండ్రు వరిజ్ ద్రాక్కుకల్లు మన్ని గిన్న సితాన్. ‘యా గినెదు మనికెజ్ మీ పావమక వందిజ్ వాక్కిని నా నలదిజ్ గుర్తు. యాకదె నా నలదాన్ దేవుణు ఇడ్డి కొత్త బప్తమానం.

21 గాని నజి ఒపజెప్పికాన్ నావెట బోజెనమదిజ్ బస్త మనాన్.

22 దేవుణు ఏర్పాటు కితి వజి, లోకు మరిసి అతి నాను సొనాలె. గాని నజి ఒపజెప్పి వన్నిజ్ అబాయా గొప్పు కస్తం”, ఇజి వెప్తాన్.

23 వారు యా పణిజ్ వరి లోఇ ఎయెన్ కిసాన్ ఇజి వరి లోఇ వారి వర్తితార.

24 మరి, వరిలోఇ ఎయెన్ పెరికాన్ ఇజి ఉండ్రీ ఇజి గొడఃబ వాతాద్.

25 అందెజె యేసు వరిజ్, “దేవుణుదిజ్ నెన్ ఇ వరి రాజూర్ వరి ముస్సు నండొ అతికారం కిజినార. వరి ముస్సు అతికారమదు మనికార, ‘మాపు లోకురిజ్ కూలెజ్’, ఇజి అనువె అజినార.

26 గాని మీరు అయ లెకెండె మన్మాట్. మీలోఇ పెరికాన్ అతికాన్ తగిసి ఇజి వన్నిలెకెండె ఆదెజ్. నెయేకి సేవ కిని వన్ని లెకెండె ఆదెజ్.

27 నుడఃదు, ఎయెన్ పెరికాన్. విందుదు బస్సికాండ్రా, బాట కిజి సీనికాండ్రా? విందుదు బస్సికాండ్రె గదె? గాని నాను మీ నడిఃమి, సేవ కిని వన్ని లెకెండె మన్ను.

28 నా కస్తమదు మీరె నా వెట నమ్మకమదాన్ నిహి మహికెదెర్.

29 నా బుబ్బి వన్ని లోకురిజ్ ఏలుబడిః కిదెజ్ అతికారం నజి ఒపజెప్పి వజి, నాను మిజి అయా అతికారం ఒపజెప్పిన.

30 అందెజె నాను ఏలుబడిః కినివెలె నా విందుదు నా వెట ఉణిజి తినిదెర్. మీరు రాజూర్ బసి మంజిని సింహసనమకాజ్ బసి ఇసాయెలురి వన్నెండు తెగ్గతి వరిజ్ ఏలుబడిః కినిదెర్.

పేతురు యేసుజ్ నెన్ ఇజి వెప్సాన్ ఇజి యేసు వెప్సానాన్.

31 “ఓ సిమోన్, సిమోన్, ఇదిలో రయ్యు వాండ్రు గింజెజు జలిన్ని వజు, నీ లోక మన్ని నెగ్గికెక్ నెస్తెజ్ నయ్యూను నిజి పరిస కినాన్. దిన్నివందిజ్ సెల్వ దొహ్క మనాద్.

32 గాని సిమోన్, నీను నమకం డికినెండ మండ్రెజ్ నాను నీ వందిజ్ పార్దనం కిత మన్ను. నీను మరజి నా దరిజ్ వానివలె, మహి సిసూరిజ్ వరి నమకం పిరివ్అ”, ఇజి వెప్తాన్.

33 అయావలె సిమోను, “ప్రబువా, నీ వెట జెలిదు వాదెజ్, నీ వెట సాదెజ్బా నాను తయారనె”, ఇజి వెప్తాన్.

34 దన్నిజ్ యేసు, “పేతురు నాను వెప్పాన, నేండ్రు కొరు కెరియెండ ముజాల నీను నజి నెన్ఎ ఇజి ముసార వెప్పాలె”, ఇజి వెప్తాన్.

35 మరి, వాండ్రు వరిజ్ వెన్బాతాన్, “డబ్బు ఇడ్చి ససి, మరి ఉండ్రీ ససి, జోడ్కు సిల్లెండ నాను మిజి పొక్తివెలె, మిజి ఇనికబా తక్కు ఆతాదా?”, “సిల్లె”, ఇజి వారు వెప్తాన్.

36 “అహిజ, ఏలు, మిజి డబ్బు ఇడ్చి ససి మహిజ, ఆక ఒతెజ్. అయలెకెండెనె, మరి ఉండ్రీ ససి బా ఒతెజ్. మిజి ఉండ్రీ కూడం సిలిజ, మీ సొక పొర్చి ఉండ్రీ కూడం కొండెజ్.

37 ఎందానిజ్ ఇహిజ, ‘జెలిదు మన్ని వరి వెట వన్నిజ్ కుడుఃప్తార*’, ఇజి దేవుణు మాటదు రాస్త మనాద్. నాను వెప్పాన, అయా మాట నావెట పూర్తి ఆదెజ్వెలె. నిజమె నా వందిజ్ రాస్తి మనికెజ్ పూర్తి ఆజినాద్”, ఇజి వరిజ్ వెప్తాన్.

38 అయావలె సిసూర్, “ప్రబువా, ఇదిలో ఇబ్బె రుండి కూణమక మనె”, ఇజి వెప్తాన్. దనిజ్ వాండ్రు, “ఆకెజ్ ఆనె”, ఇజి వెప్తాన్.

యేసు ఒలివ గోరోత్ పార్దనం కిజినాన్

39 యేసు పట్టుం డిస్తాండ్రె వన్నిజ్ మన్ని అలవాటు లెకెండ ఒలివ గోరోత్ సాహాన్. వన్ని సిసూర్ వన్ని వెట సాహాన్.

40 అబ్బె సాహిజ్, వాండ్రు వరిజ్, “నయతాన్ సికుదు అరెపెండ పార్దనం కిదు”, ఇజి వెప్తాన్.

41 వాండ్రు వరి బాణిజ్ పణుకు విసిర్చి ససా దూరం సాహండ్రె, ముణుకుజ్ ఊరజి పార్దనం కిజినాన్.

42 “ఓ బా, నిజి ఇస్టం ఆతిజ యా కస్టమ్కు నా బణిజ్ లాగ్అ. అహిజ్బా నా ఇస్టం ఆపద్, నీ ఇస్టమ్నె ఆపద్”, ఇజి.

43 అయావలె దేవుణు మంజిని బాడ్డిః దాన్ ఉండ్రీ దేవుణు దూత వన్నిజ్ తోరె ఆతండ్రె, వన్నిజ్ ఓదరిస్తాన్.

44 వాండ్రు ఓరిస్టెజ్ అల్బ గొప్ప దుకమ్దు మహిజ్, మరి నండొ పార్దనం కితాన్. వన్ని రూణు నల బోటుజ్ లెకెండ బూమిదు అరై.

45 వాండ్రు పార్దనం కితి నిజితండ్రె, వెనుక సిసూర్ డగ్రు సాహాన్. సాహిజ్ వారు దుకం దాన్ నిద్ర కిజినిక సుడఃతాన్.

46 అందెజె వాండ్రు వరిజ్, “ఎందనిజ్ మీరు నిద్ర కిజినిదెర? నిజ్జి, నయ్యూను మిజి పరిస కిజి తప్పుదు అరెవ్విండ పార్దనం కిదు”, ఇజి వెప్తాన్.

యేసుజ్ అరెస్టు కిజినాన్

47 యేసు యా మాటిజ్ వెప్పా మహిజ్, నండొ జెనం వాతాద్. పనెండు సిసూర్ లోక మన్ని యూద ఇనికానె వరి ముజాల సాహాన్. వాండ్రు యేసుజ్ ముదు కిదెజ్ వన్ని డగ్రు వాతాన్.

48 అయావలె యేసు, “ఓ యూద, ముదు కిజినె, నీను లోకు మరిసి ఆతి నజి ఒపజెప్పిదా?”, ఇజి వన్నిజ్ వెన్బాతాన్.

49 యేసు వెట మహి సిసూర్ జగ్గినికెజ్ సుడఃతిజ్, వారు, “ప్రబువా, మాపు కూర్దదాన్ వరిజ్ కత్తెజ్?”, ఇజి వెన్బాతాన్.

50 వరి లోక ఒరెన్ విజు పుజెరిజ మున్ను పెరి పుజెరి పణిమణిసిజ్ ఉణెరె గిబ్బి తెవు కత్తాన్.

* 22:37 22:37 యెసయ 53:12.

51 గాని యేసు, “అలె కిదు”, ఇజ వెప్తాండ్రె, అయా పణిమణిసిజ్ గిబ్బిదిజ్ ముట్టాండ్రె వన్నిజ్ నెగెండ్ కిత్తాన్.

52 యేసు వన్నిజ్ అస్టెజ్ వాతి పెరి పుజెరిబు, దేవుణు గుడిః అతికారిబు పెద్దెల్జ వెట, “నాను డొజ వాండ్రునా? నజి అస్టెజ్ పెరి కూడఃమకు కొణెజ్ అసి మీరు వాతిదెర?

53 రోజా నాను మీ వెటనె ముజి గుడిఃదు నేరేప్పిన్ గదె. అయావలె మీరు నజి తోహాఇతిదెర. యాకదె నజి తోహాకైజ్ దేవుణు మిజి నిత్తి సమయం. ఏలు సర్హూన్ అతికారమదు మనాన్”, ఇజి వరిజ్ వెప్తాన్.

యేసుజ్ నెన్వ ఇజి పేతురు వెప్పినాన్

54 వారు వన్నిజ్ తోహాకారె, విజు పుజెరిజ మున్కు మన్ని పెరి పుజెరి అతి వన్ని ఇండ్రొ ఒతాన్. పేతురు దూరు దాన్ వెన్కా సొన్ని మహాన్.

55 వారు డేవ నడిఃమి, సిను ఎరేసి కూడఃజి బసి మహివలె, పేతురు వరి వెట బస్తాన్.

56 అయా ఇండ్రొణి పణిమణిసి ఉండ్రె, పేతురు సిను డగ్ర బస్తిక సుడఃతాద్. వాండ్రు ఎయెన్ ఇజి నెస్టెజ్ వన్నిజ్ డిటాజ్ బేస్తాద్. బేస్తాదె, “వీండ్రు బా వన్ని వెట మహాన్”, ఇజి అది వెప్తాద్.

57 అందెజె పేతురు, “ఓ బీ, నాను వన్నిజ్ నెన్వ”, ఇజి వెప్తాన్.

58 సణెం వెనుక మరి ఒరెన్ వన్నిజ్ సుడఃతాన్. “సిను బా వరి వెట మహికిదె”, ఇజి వెప్తాజ్, “బాబు, నాను వన్నిజ్ నెన్వ”, ఇహాన్.

59 డగ్రు ఉండ్రె గంట వెన్కా మరి ఒరెన్ కనితం వెప్తాన్, “నిజమె, వీండ్రు బా వన్ని వెట మహాన్. ఎండనిజ్ ఇహిజ, వీండ్రు గలిలియదికానె”, ఇజి.

60 దన్నిజ్ పేతురు, “ఓ బాబు, సిను వెప్పిక నజి తేలివద్”, ఇజి వెప్తాన్. వాండ్రు వెప్పిమహివలె వెటనె కొరు కెరెతాద్.

61 యేసు వెనుక ముప్తాండ్రె పేతురుజ్ డిఃటాజ్ బేస్తాన్. అయావలె ప్రబు వన్నిజ్, నేండ్రు కొరు కెరెని ముజాల సిను నజి నెన్వ ఇజి ముసారె వెప్పిలె ఇజి”, వెప్తి మాట పేతురు ఒడఃబితాన్.

62 వీండ్రు వెల్లి సొహండ్రె నండొ దుకం ఆజి అడఃబతాన్.

కాప్ కినికార్ యేసుజ్ వెక్రిసినార్

63 యేసుజ్ కాప్ కిజి మహికార్ వన్నిజ్ వెక్రిసి డెఃయిదిజ్ మొదొల్స్తార్.

64 వారు ని కణెకెజ కనెల్దాన్ తోహాకారె, “ఓ ప్రవక్త, వెహాల, ఎయెన్ నిజి డెఃయితాన్ ఇజి”, ఇజి వెన్బాతార్.

65 వారు వన్నిజ్ దూసిన్ని మరి నండొ మాటెజ్ వన్నిజ్ వెప్తాన్.

యేసుజ్ పిలాతుని హొరేదుజ్ ముజాల నిల్వార్.

66 పెందాలె అతివెలె, యూదురి పెద్దలుజ్, పెరి పుజెరిబు, యూదురి రూలుజ్ నెస్పిన్సికార్ విజెరె కూడిఃతార్. యేసుజ్ వరి ముజాల నిల్వార్.

67-68 వారు వన్నిజ్, “సిను క్రీస్తు నా, మజి వెహాల”, ఇజి వెన్బాతార్. అందెజె యేసు వరిజ్, “క్రీస్తు ఇజి నాను వెప్తిజ, మీరు నమిఇదెర. నాను మిజి వెన్బాతిజ మీరు మరేజి వెహాఇదెర.

69 గాని ఏలుదాన్, లోకుమరిసిఆతి నాను గొప్ప అతికారం మని దేవుణు ఉణెరె పడఃకాదు బన్నులె”, ఇజి వెప్తాన్.

70 అయావలె వారు విజెరె, “అహిజ, సిను దేవుణు మరిసినా?”, ఇజి వన్నిజ్ వెన్బాతార్. వెన్బాతిజ్ వాండ్రు, “మీరు వెప్తి లెకెండెనె, నానె దేవుణు మరిసి”, ఇజి వెప్తాన్.

71 అందెజె వారు, “ఎందానిజ్ మజి మరి రుజుప్ వెప్పికార్. వన్ని వెయ్దానె మాట వెహాట్”, ఇజి వెప్తార్.

1 అయావలె, యూదురు అతికారిబు విజెరె నిహారె, యూదురు దేను సుడఃజిని రోమ అతికారి అతి పిలాతు బాన్ వన్నిజ్ ఒత్తార్.

2 వారు, “వీండ్లు మా లోకుర్ నడిమి గొడబు రేప్పినాన్. రోమ రాజు ఆతి కయనరుజ్ వన్ను సీమాట్ ఇజి వెప్పినాన్. నానె క్రీస్తు అహిజ రాజు ఇజి వెప్పినాన్”, ఇజి వన్ను మున్ను నేరం మొస్తార్.

3 అందెజి పిలాతు యేనుజ్, “నీను యూదురిజ్ రాజునా?” ఇజి వెన్ బాతాన్. వెన్ బాతిజ్, “ఓబ, నీను వెప్పా వజనె”, ఇజి మరీజి వెప్తాన్.

4 పిలాతు పెరి పుజెరిజి వెట మంద లోకుర్ వెట, “విని మున్ను నజి, ఇని తప్పు బా తోరెవద్”, ఇజి వెప్తాన్.

5 గాని వారు, “ఏక ఏక వెప్తార్, “వీండ్లు యూదయ దేసెమది లోకుర్ విజెరిజ్ వన్ను మాట నెప్పిసి గొడబు రేప్పినాన్. యా పణి గలిలయదు మొదొల్ని ఇబ్బె దాక వాతాన్”, ఇజి.

6 యాక వెంజి, “వీండ్లు గలిలయదికాండ్రా”, ఇజి పిలాతు వెన్ బాతాన్.

7 యేను హేరోదు ఏలుబడికి కిని గలిలయ ముటదికాన్ ఇజి పిలాతు నెస్తాన్. అందెజి వాండ్రు వన్నుజ్ హెరోద్ బాన్ పోక్తాన్. అయావలె హెరోదు బా యెరూసలెమదు మహాన్.

8 హేరోదు యేనుజ్ సుడతెవెలె నండొ సరద్ ఆతాన్. ఎందనిజ్ ఇహిజ, యేను వందిజ్ నండొ వెహ మహాన్. నండొ కాలమదాన్ వన్నుజ్ సుడతెదెజ్ ఆన ఆజి మహాన్. యేను కిని బమ్మ అని పణిజి సుడతెదెజ్ కోరితాన్.

9 అందెజి వాండ్రు నండొ మాటజి వెన్ బాతాన్. గాని యేను ఇనికబా మరీజి వెహ్ వితాన్.

10 పెరి పుజెరిజు, యూదురి రూలుజ్ నెప్పిన్సికార్ బాన్ నిల్ని, వన్ను మున్ను డటిసి నేరం మొప్పి మహార్.

11 హేరోదుని వన్ను సయనమదికార్ వన్నుజ్ వెక్కిసి సెకాల్ కితార్. నండొ దర మన్ను గొప్ప ఉండ్రీ సొక తొడెగిన్ పిస్తాండ్రె పిలాతు డగ్రు మరీజి పోక్తాన్.

12 అయా రోజునె పిలాతుని హేరోదు కాలెజ్ ఆతార్. దిని ముజాలె వారు వగ్దాన్ మహార్.

13-14 అయావలె పిలాతు, పెరి పుజెరిజి, అతికారిజి, లోకాజ్ కూకెపిస్తాండ్రె వరిజ్, “లోకుర్ నడిమి గొడబు రేప్పినాన్ ఇజి వెప్పి వినిజ్ మీరు నా బాన్ తతిదెర్. మీ ఎద్రు నాను వినిజ్ వెన్ బాత. గాని మీరు వెప్పా నేరం ఇనికబా విని లొఇ నజి తోరెవిత.

15 అయలెకెండెనె, హెరోదుజ్ బా తోరెవతాన్. వాండ్రు వినిజ్ మా డగ్రు మరీజి పోక్తాన్. ఇదిలో వీండ్లు సాపుదిజ్ తగితి ఇన్ని పణి బా కివన్.

16 అందెజి నాను వినిజ్ సిక్కు సీజి డిన్ను సీన”, ఇజి వెప్తాన్.

17 (ఏంటు ఏంటు కిని పన్ను పండొయదిజ్ లోకు కోరిపాతి ఒరెన్ జెలిదు మన్ను వన్నుజ్ డిసి సిదెజ్ పిలాతుజ్ అలవాటు).

18 గాని లోకుర్ విజెర్, “నవ్ అ వన్నుజ్ బరబెజ్ మజి డిసి సిదా”, ఇజి ఉండ్రె లెకెండె డటం డేడిస్తార్.

19 బరబ్బు పట్టుమదు గొడబు రేపిస్తాండ్రె, సెగెండారిజ్ సప్తాన్. అందెజి వన్నుజ్ జెలిదు ఇట్లా మహార్.

20 యేనుజ్ డిస్తెజి కోరిజి పిలాతు మరి లోకురిజ్ నాను వన్నుజ్ డిస్తెజి? ఇజి వెన్ బాజినాన్.

21 గాని వారు, “వినిజ్ సిలువాదు కుటిజాణిజ్ డెయిజి నవ్ అ, సిలువాదు కుటిజాణిజ్ డెయిజి నవ్ అ”, ఇజి నండొ గగోల్ ఆతార్.

22 ముసారదిజ్ వాండ్రు వరిజ్, “ఎందానిజ్? ఇన్ని తప్పు వీండ్లు కితాన్? సాపుదిజ్ తగితి ఇన్ని తప్పు బా నాను విని లొఇ తొవిత. అందెజి నాను వినిజ్ సిక్కు సీజి డిన్ను సీన”, ఇజి వెప్తాన్

23 గాని వారు, “వినిజ్ నప్తెజ్ వెలె”, ఇజి మరి మరి డటం డేడిస్తార్”. ఆహె వరి గగోల్ గెలిస్తాద్.

24 అందెజి పిలాతు వారు వెప్పా వజి జర్గిపిద్ ఇజి తీర్పు సితాన్.

25 పిలాతు వారు లొస్తి వన్నుజ్ డిస్తె సితాన్. అయా వాండ్రు పట్టుమదు గొడబు రేవ్ తి వందిజ్ సెగెండారిజ్ నెప్పి వందిజ్ జెలిదు మహాన్. యేనుజ్ వారు కోరితివజి కిదెజ్ వరి కిదు ఒవజెప్తాన్.

యేనుజ్ సిలువాదు కుటిజాణిజ్ డెయిజినార్

26 వారు వన్నుజ్ ఒసి మహార్. అయావలె, మరి ఉండ్రీ దేసెమది కురినియ పట్టుమదికాన్ ఆతి సిమోన్ ఇనికాన్ ఒరెన్ యెరూసలెం పట్టుం వెల్లిదాన్ అయా సరి యెరూసలెం పట్టుమదు వాజి మహాన్. వారు వన్నుజ్ అస్తారె, యేనువెట, వన్ను వందిజ్ సిలువ పిండిదెజ్ వన్నుజ్ సితార్.

27 మంద లోకుర్ వన్ను వెన్కా వాజి మహార్. వరిలోఇ బోదెక్ వన్ను వందిజ్ గుండె కొత్తె ఆజి అడెబాజి వాజి మహె.

28 యేసు వరిద్దరికీ మరణి, “యెరుసలెమ్మది బీబికండె, మీరు నా వందిక అడఁబామాట్. మీ వందికన్ని మీ కొడొకొర్ వందిక అడఁబాదు.

29 ఎందానిక ఇహిజ వారు, “గొడ్డు బోదెకాజ్ బా పాలు ఉట్పిసెఇ వన్యాజ్ గొప్పు నెగెద్”, ఇజ వెప్పి దినమేమకు వానెలె.

30 అయావలె వారు, “మా ముస్సు అర్అ”, ఇజ గొరొకాజ్ వెటె, మజి వడఁగఱ”, ఇజ మెటెజ వెటె వెహ్సార్లె.

31 ఎందానిక ఇహిజ, “మరాన్* పసిక మనివెలె నిసా బాదెక కితిజ మరాన్ వహ్హజ మరి ఎసా బాద కినారొ”, ఇజ వెహ్సాన్.

32 మరి రిఎర్ డొజారిజబా వన్నివెటె సప్తెజ్ ఒసి మహార్.

33 వారు బుర్ర పిణికి ఇజ కూక్సి బాడిఁదు వాతారె. అబ్బె యేసుకే సిలువారు కుటిజాణిక్ డెయ్తారె. ఒరెన్ వన్నికే ఉణెర్ పడఁకాన్, మహి వన్నికే డెబర పడఁకాన్. సిలువ పొక్తారె.

34 అయావలె యేసు, “ఓ బా, మీరు కిజనిక ఇనిక ఇజ విరిక్ తెలివెద్. అందెజె విరిక్ సెమెన్అ”, ఇజ పార్దనం కితాన్. వారు వన్ని సొక్కెజ్ సీబె అదెజ్ సీటిక్ పొక్తారె.

35 లోకర నిహరె సుడఁజి మహివలె, అతికారమేదు మనికారె, “వీండ్రు మహి వరిక్ రక్కిస్తాన్. వీండ్రు క్రిస్తు ఇహిజ, వినికే వీండ్రె రక్కిసె అపిన్”, ఇజ వెప్పి వెక్కిస్తారె.

36-37 సయన్మదికారెబా వాతారె, వన్నికే సెకాల్ కితారె. వారు వన్నికే సేందుదిక ఉండ్రి ఉండెజె సెతారె, “నీను యూదురి రాజు ఇహిజ, నిజి నీనె రక్కిసె అఅ”, ఇజ వెప్పి సెకాల్ కితారె.

38 “వీండ్రు యూదురిక్ రాజు” ఇజ వన్ని ముస్సు మొప్పి నేరం బోర్డుదు రాసి సిలువారు ఇట్టారె.

39 సిలువారు డెయితి డొజారిజ లొఇ ఒరెన్, “నీను క్రిస్తుగదె. నిజి నీనె రక్కిసె అపిన్. మజి బా రక్కిసెఅ”, ఇజ వన్నికే దూసిస్తాన్.

40-41 గాని మహికాన్, “నీను దేవుణుదికే తియెల్ ఆఇదా? వన్నికే దొహ్కొక్కి సిక్కినె నిజి బా దొహ్కొక్కి మనాద్. నాయం దానె మజి సిక్కిస్తారె. ఎందనిక ఇహిజ, మాటు కితి మని పణిదికే తగితి సిక్కి సెతారె. గాని వీండ్రు ఇని తప్పు బా కిఎన్”, ఇజ వన్నికే గొల కితాన్.

42 మరి, “యేసు, నీను రాజు ఆజి మరణి వానివలె, సజి ఒడఁబిఅ”, ఇజ వెహ్సాన్.

43 అందెజె యేసు, “నిజమె నాను నీ వెటె వెప్పిన, నేండ్రు నీను నా వెటె పరలోకమేదు మంజినిలె”, ఇజ వెహ్సాన్.

యేసుసిలువ ముస్సు పాణం డిఁస్తాన్.

44-45 అయావలె సమయం వేడెఁ పన్నెండు గంటిజ అతాద్. మూండ్రు గంటిజదాక లోకం విజు సీకటి వాతాద్. పొదు జాయి సిఎతాద్. యెరుసలెం గుడిఁ తెర మహి పాత ముస్సుహాన్ అడ్లి దాక నడిఁమిహాన్ రుండ్లి ముకెక్ కింజితాద్.

46 యేసు, “ఓ బా, నా పాణం నీ కిదు ఒపజెప్పిన”, ఇజ వెహ్సాన్. యా లెకెండె వెహ్సాండ్రె వాండ్రు పాణం డిఁస్తాన్.

47 అయావలె సయన్మదివరి అతికారి, జర్గితిక సుడఁతండ్రె, “నిజమె వీండ్రు నీతినిజయిదికాండ్రె”, ఇజ వెప్పి దేవుణుదికే పొగిడిఁతాన్.

48 సుడఁజెక్ కూడిఁతి వాతి లోకర విజెరె జర్గితికేక్ సుడఁజి, గుండె కొత్తె ఆజి మరణి ఇండ్రో సొహాన్.

49 గాని వన్నికే నెల్వ అతికారె విజెరె, నెలవాతివరి లొఇ గలిలయదాన్ వన్ని వెటె వాతి బోదెకు, దూరం నిల్చి యాకెక్ సుడఁజి మహార్.

యేసుకే సమాది కిజినారె

50-51 అయావలె యోసేపు ఇనికాన్ ఒరెన్ మహాన్. వాండ్రు యూదయ దేసెమ్ది అరిమతియ ఇన్ని పట్టుమదికాన్ వాండ్రు సన్హద్రి సజమేదు మన్ని వరిలొఇ వెరికాన్ ఒరెన్. వాండ్రు సీతి నిజాయితి

* 23:31 23:31 యాక యూదురి ఉండ్రి మాటె. దిని అరదం ఇనిక ఇహిజ తప్పకిఇతి సజి వారు సిక్కి సీతిజ నండ్రి నెఇవరిక్ దేవుణు ఎస్సా సిక్కి సీనాన్.

మనిశాన్. యేసుజ్ నీలువారు డెయిజి సస్టెజ్ యూద పెద్దల్ బ కితి తిరుమానం ఒప్పుకోడెవిశాన్. దేవుణు ఏలుబడి తోరె అనివందిజ్ వాండ్రు ఎర్దు సుడెజి మహాన్.

52 వాండ్రు పిలాతు డగ్రు సాహండ్రె యేసు పీనుగు లొస్తాన్.

53 వాండ్రు, అయా పీనుగు నీలువ ముస్సుహాన్ డిష్టాండ్రె తెల్లాని పాతదాన్ సుటిసి నటు పణుకుదిజ్ దొల్స్సి దూకిదు ఇట్లాన్. అయా దూకిదు, ముజాలె ఎయెరిజ్ బా ఇడ్విరి.

54 అయా రోజు, విస్త్రాంతి దినం ముజాల మన్ని తయార్ కిని రోజు. విస్త్రాంతిదినం మొదొల్స్టెజ్ టయం డగ్రు అజినాద్.

55 యేసు వెట గలీలయదాన్ వాతి బోదెకు యోసేపు వెట సాహెనె, దూకి ని వన్నిజ్ ఇట్టిక సుడెజె.

56 వాండ్రు ఇండ్రొ మహారి, పీనుగుదిజ్ రాస్టెజ్ వాననం నూనె తయార్ కితార్. విస్త్రాంతి దినం మొదొల్స్టెజ్ యూదురి రూలుజ్ నమ్మిజి అవిక్ రొబితార్.

24

యేసు మర్జి నిజ్ జినాన్

1 వారమ్దిజ్ మొదొహి రోజు కోడిజామనె, బోదెకు అవి తయార్ కితి వాననం నూనెజ్ అస్తెనె దూకిదు సాహె.

2-3 అవిక్ అబ్బె వాతిజ్, దూకి మూక్తి పెరిపణుకు గూరబాతి మహిక సుడెజె. అవిక్ లోఇ డుగితిజ్ యేసు పీనుగు తోర్వితాద్.

4 దిన్ని వందిజ్ బమ్మ ఆజి నిహి మహివలె, మిరిస్సివజ తెలాని సాక్కెజ్ తోడిగితి రిఎరె మొగవారు వన్యా డగ్రు నిహార్.

5 అవిక్ నండొ తియెల్ ఆజి ముణుకుజ్ ఊరజి మాడిస్సె.

6 అయావలె అయా మొగవారు వన్యాజ్, “ఎందనిజ్ మీరు బత్తితి మన్నివన్నిజ్ సాతివరిబాన్ రెబాజన్ దెర? వాండ్రు ఇబ్బె సెలెన్. నిజిత మనాన్. మీ వెట గలీలయదు మహివలె వాండ్రు ఇనిక వెప్తాన్ ఇజి ఎత్తు కిదు.

7 ఇనిక వెప్తాన్ ఇహిజ, ‘లోకుమరిసి సెఇవరి కీదు ఒపజెపె ఆదెజ్ వెలె. నీలువారు పొకె ఆజి, వాండ్రు సాజి మూండ్రె రోస్కాజ్ నిజ్ నాన్ లె’, ఇజి”, ఇజి వెప్తార్.

8 అయావలె అవిక్ యేసువెప్తా మాట ఒడెబితె.

9 దూకిదాన్ మహెనె, అబె సుడెజితికెజ్ విజు పదకొండు మణిసి సిసూరిజ్ ని మహి వరిజ్ విజెరికె వెప్తా*.

10 అవిక్ ఎయెక్ ఇహిజ, మగ్రలెనె మరి, యోసన, యాకోబుజ్ అయిసి ఆతి మరియ, వన్యావరివెట మహి మరి సెగొండెక్ బోదెక్ ఇవికెన్ జర్గితికెజ్ అపొస్టుడురిజ్ వెప్తాకెజ్†.

11 గాని వారు బోదెక్ వెప్తా మాటిజ్ నమిఎతార్. ఎందానిజ్ ఇహిజ, ఆకెజ్ పంబర మాటిజ్ లెకెండె వారు ఒడెబితె.

12 అహిజ్ బా. పేతురు నిజితండ్రె, దూకిదు ఊహొక్సి సాహాన్. వజితి సుడెజితిజ్ పీనుగు సుటిస్సి తెల్లాని పాతెజ్ అర్ది మహికదె సుడెజాన్. వాండ్రు జర్గితికెజ్ వందిజ్ బమ్మ అజి ఇండ్రొ మర్జి సాహాన్.

యేసు రిఎరె సిసూరిజ్ తోరె అజినాన్

13 అయా రోజునె, సిసూరిలోఇ రిఎరె ఎమాయుఇని ఉండ్రె నాటొ సొన్ని మహార్. ఎమాయు యెరూసలెమ్దాన్ పదకొండు కిలో మీటర్ దూరం మనాద్.

14 వారు రిఎరె జర్గితి విజు వందిజ్ వర్గిజి మహార్.

15-16 వారు ఆహె వర్గిజి మహిజ్ యేసు వాండ్రె వాజి వరి వెట నడితాన్. వారు వన్నిజ్ సుడెజెతార్, గాని వన్నిజ్ గుర్తు అస్టెజ్ అటెవితార్.

* **24:9 24:9** యా వన్యవెర్సికార్ యూదురి దేనమ్దిజ్ బాదకిజిని రోమ ప్రబుత్వం వందిజ్ పణికినికార్ విరు యూదురికె వడిజెకార్ ఆకాదె ఆవండ మీరు నండొ వన్య లోసి యూదురికె బాద కినార్. ఆహె అనయమ్దానబా వారు అన్య గణిస్తానార్. వారు యూదురి రూలుజ్ లోజివెర అందెజి యూదురు వరిజ్ పానం కినికార్ ఇజి వన్యార్. † **24:10 24:10** యాక యూదురి ఉండ్రె మాట దిన్ని అరదం ఇనిక ఇహిజ తప్పకెజితి నజి వారు సిక్కినీతిజ నండొ సెఇవరికె దేవుణు ఎస్సా సిక్కి సీనాన్ ఇజి.

17 నన్నీవలె యేసు, “మీరు నడిజి వర్గజని యా మాటజ్ ఇనికెజ్”, ఇజి వరిజ్ వెన్బాతాన్. వారు దుకందాన్ మొకొ డిష్టా, కద్దిఎండ నిహార్.

18 వెనుక వరిలోఇ క్లెయొషా ఇనికాన్ ఒరెన్ యేసుజ్, “యెరూసలెమ్దు కూల వాతి వరి లోఇ మంజి, సాహి రోస్కాజ్ జర్గితికెజ్ నెన్ఇతికి నీను ఒరిదె”, ఇజి వెప్తాన్.

19 “ఇనికెజ్ జర్గితె?”, ఇజి వాండ్రు వెన్బాతాన్. దనిజ్ వారు ఈహు వెప్తార్. “నజరెతుదికాన్ యేసుజ్ జర్గితి నజతిజి వందిజ్ వర్గజనావ్. వాండ్రు ఒరెన్ ప్రవక్త. వాండ్రు కితి గొప్ప వణిజాణిజ్ వెప్తా గొప్ప నజతిజాణిజ్ దేవుణు వన్నిజ్ ఇస్టం ఆతాన్. లోకుర్ విజెరె బా వన్నిజ్ ఇస్టం ఆతారె నమ్మితార్.

20 మా పెరి పుజెరిజు, అతికారిజు, రోమ అతికారి కీదు సాపుదిజ్ సిక్సీదెజ్ వన్నిజ్ ఒపజెప్తార్. వారు వన్నిజ్ నీలువారు కుటిజాణిజ్ డెయిజి సప్తార్.

21 వీండ్రునె ఇస్రాయేలు లోకాజ్ డిన్పిస్కికాన్ ఇజి మాపు ఎద్రు సుడెజి మహావ్. యాకదె అఎండ, యా నజతి జర్గిజి నేహాన్ మూండ్రె దినమ్కు ఆతె.

22-23 మరి. మా లోఇ మన్ని సెగొండెక్ బోదెక్ మజి నండో బమ్మ కిటిస్తె. ఎలాగ ఇహిజ, కోడిజామ్నె దూకిదు సాహి గాని వన్కాజ్ వన్ని పీన్గు తోరెవతాద్. అచికు మరజి వాతెనె మజి ఈహు వెప్తా. దూతారె వన్కాజ్ తోరె ఆతారె, యేసు బత్రిత మనాన్ ఇజి వెప్తార్ ఇజి.

24 మా వెట మనికారె సెగొండారె దూకిదు సాహారె, బోదెక్ వెప్తా వజనె సుడెతారె. వన్నిజ్ వారు సుడెవితారె.

25-26 అయావలె వాండ్రు వరిజ్, “బుద్ది సిలికిదెరె, ప్రవక్తరు వెప్తా మాటజ్ విజి నమిదెజ్ మిజి నండో క్లస్టం ఆజినాద్. క్రీస్తు యా లెకెండ మాల్జెఓరిసి, దేవుణు మంజిని బాడిజు వన్నివెట అతికారమ్దు మండ్రెజ్గదె?”, ఇజి వెప్తాన్.

27 వాండ్రు దేవుణు మాటదు వన్ని వందిజ్ రాస్తి మన్ని దని అర్డం వరిజ్ వెప్తాన్. మోని రాస్తి పుస్తకమ్దాన్ మొదొల్లి ప్రవక్తరు విజెరె రాస్తి పుస్తకమ్ దాక మన్ని మటజి వెప్పి వాతాన్.

28 వారు సాస్సిని నారు డగ్రు అతిజ్, వాండ్రు వరిజ్ డిసి మరి దూరం సాస్సిని లెకెండ నడితాన్.

29 గాని వారు, “మా వెట మన్అ. పొద్దుఅజినాద్. సీకాట్ ఆతాద్”, ఇజి వెప్పి వన్నిజ్ మరి మరి వెప్తాన్. అందెజి వాండ్రు వరి వెట మండ్రెజ్ సాహాన్.

30 వాండ్రు వరి వెట ఉండెజ్ బస్తివెలె, రొటె అస్తాండ్రె దేవుణుదిజ్ వందనమ్కు వెప్పి దనిజ్ రుక్సి వరిజ్ సితాన్

31 వెటనె వారు వీండ్రు యేసు ఇజి గుర్తు అస్తారె. గాని వాండ్రు వరిజ్ తోరెండ ఆతాన్.

32 అయావలె వారు రిఎర్, “వాండ్రు సర్దు, మా వెట వర్గిజి, దేవుణు మాటజ్ మజి నెన్పిస్తివెలె, మా మన్నుదు నండో నర్ద వాతి లెకెండ ఆతాద్ గదె”, ఇజి ఒరెన్ వెట ఒరెన్ వర్గితాన్.

33-34 వెటనె వారు నిజితారె, యెరూసలెమ్దు సాహారె. అబె, వారు పదకొండు మణిసిరి సిసూర్ని వరి వెట మహికారె కూడిజి, “నిజమె, యేసు మరజి నిజితాన్. సిమొనుజ్తోరె ఆతాన్ ఇజి వర్గిజి మహిక సుడెతాన్.

35 అయావలె వారు రిఎర్, సర్దు జర్గితికెజ్ యేసు రొటె రుక్సివెలె వారు ఎలాగ గుర్తు అస్తారె దన్నివందిజ్ వెప్తార్.

సిసూర్ కూడితివెలె వరిజ్ తోరె ఆజినాన్

36 వారు వర్గిజి మహివలెనె యేసు వాండ్రె వరి నడిమి నిహండ్రె, “సమాదనం కల్లిపిద్”, ఇజి వెప్తాన్.

37 దూబ తోరెతాద్ ఇజి ఒడిబిజి వారు నండో తియెల్ ఆతారె.

38 నన్నీవలె వాండ్రు, “ఎందానిజ్ మీరు తియెల్ అజిన్దెరె? ఎందనిజ్ అనుమానమ్కు మీ మన్నుద్ వాజినె?

39 నానె వాండ్రు ఇజి నమిదెజ్ నా కిక్కాజ్ కాల్యాజ్ సుడెదు. ఎందానిజ్ ఇహిజ, నజి మన్ని లెకెండ దూబదిజ్ ఒడిల్ మన్ఉ.

40 యా మాటజ్ వెప్పి వాండ్రు వరిజ్ వన్ని కిక్కు కాల్యు తోరిస్తాన్.

41-43 అపొజ్బా వారు సర్దదాన్ బమ్మదాన్ ఇంక నమ్మిఎండ మహార్. అందెజె వాండ్రు వరిజ్, “తిండ్రెజ్ ఇనికబా మనాదా?”, ఇజి వెన్బాతిజ్, వారు ఉండ్రీ సుప్తా మొయి ముకెజ్ సితార్. వాండ్రు లొస్తాండ్రె వరి ఎర్దు తిహన్.

44 మరి వాండ్రు వరిజ్, “నాను మీ వెట మహివలె యాకెజ్ నె మీ వెట వెప్తా. ఇనిక ఇహిజు, మోసె రాస్తి పుస్తకమ్దు, ప్రవక్తరు రాస్తి పుస్తకమ్దు, కీర్తన పుస్తకమ్దు నా వందిజ్ రాస్తి మనికెజ్ విజు పూర్తి ఆదెజ్వెలె”, ఇజి.

45 వాండ్రు దేవుణు మాటెజ్ అర్దం కిదెజ్ వరిజ్ సాయం కిత్తాన్.

46-47 వాండ్రు వరిజ్ ఈహు వెప్తాన్. “యా మాటెజ్ రాస్త మనాద్. అయాక ఇనిక ఇహిజు, క్రీస్తు మాలెజ్ ఓరిసి, సాజి మూండ్రీ రోస్కాణిజ్ సావుదాన్ నిజ్నాన్లె. యెరూసలెమ్దు మొదొల్లి లోకాజ్ విజెరిజ్ వన్ని అతికారమ్దాన్ ‘పాపమ్కు ఒప్పుకొడెఃఅ’, దేవుణు నెమిస్సాన్”, ఇని మాట వెహె ఆనాద్లె.

48 మీరు సుడెఃతికెజ్ లోకాజ్ వెహెజ్.

49 నా బుబ్బు ఒట్టు కితి దేవుణు అత్తుదిజ్ నాను మిజి పోక్కు. గాని ముస్సుహాన్ సత్తు మీ ముస్సు వానిదాక మీరు యెరూసలెం పట్టుమ్దునె మండ్రు.

దేవుణు యేసుజ్ పలోకమ్దు ఒసినాన్

50 పట్టుం వెల్లి బెత్తానియ నారు డగ్రు దాక వాండ్రు వరిజ్ ఒత్తాన్. వాండ్రు కికు పెప్తాండె, వరిజ్ దీవిస్తాన్.

51 దీవిసి మహివలె వాండ్రు వరిజ్ డిస్తాన్. దేవుణు వన్నిజ్ వాండ్రు మంజిని బాడిడు ఒత్తాన్.

52-53 వారు వన్నిజ్ మాడిఃస్తారె, నండె సర్దదాన్ యెరూసలెమ్దు మరజి వాతార్. వారు డిసెన్ఎండ గుడిఃదు మంజి, దేవుణుదిజ్ పొగిడిఃజి మహార్.

యోహాను రాస్తీ సువార్త

నెల్ల కిటిసినిక

పన్నెండు మణిసిరి సిసూర్ లొఇ ఒరెనాతి యోహాను రాస్తీ పుస్తకమునె యాక. యేసు యా లోకముదు బత్తిజి మహివలె జర్గితి దన్నివందిజ్ కతవజ వాండ్లు వహ్సినాన్. యేసు ఎయెన్? వాండ్లు దేవుణు మరిసి, దేవుణు వెట మహికాన్, గాని వాండ్లు దేవుణునె. తయార్ కితక ఇనికబా వాండ్లు సిల్లెండ కల్లివితాద్. వాండ్రె దేవుణు మాట, లోకురి విజేరి పాపముకు సాన్పిస్తజ్ పూజ ఆతి మెండ గొరె పిల్ల లెకెండె వాండ్లు. ఎలాకాలం బత్తిని బత్తు సీని టిండి లెకెండె వాండ్లు. లోకముదిజ్ జాయి లెకెండె మనాన్. నెగ్గి గప్పడుఎన్ లెకెండె మనాన్, సాపుదాన్ మరజి నిజిత్తి బత్తు సీనికానె వాండ్లు ఇజి యేసు వందిజ్ యా పుస్తకముదు వెహ్సినాన్. యా సువార్త రాసి మహివలె, రోసు గవరమెంటుదు మన్నికార్ దేవుణుదిజ్ నమ్మితి వరిజ్ నండొ మాలెజ్ కిజి మహార్. అందెజి నమ్మితి వరిజ్ దయిరం సీదెజ్ యోహాను రాస్తీకాదె యా పుస్తకం.

యేసు క్రీస్తు దేవుణు వాక్యం

- 1 లోకం పుటిన్విండ ముజాలె, దేవుణు వందిజ్ వెహ్సినాని వాక్యం ఇనికాన్ ఒరెన్ మహాన్. వాండ్లు దేవుణు వెట మహాన్. వాండ్రె దేవుణు.
- 2 వాండ్లు లోకం పుటిన్విండ ముజాలె, దేవుణువెట మహాన్.
- 3 విజు వన్నివెట దేవుణు తయార్ కితాన్. కల్లితిమన్నిక ఇనికబా వాండ్లు సిల్లెండ కల్లివితాద్.
- 4 జీవు వన్నిబాన్ మనాద్. అయా జీవు లోకురిజ్ జాయి ఆత మనాద్.
- 5 జాయ్ సీకటిదు జాయ్ సీజినాద్. గాని సీకటిదుమన్నికార్ జాయ్దిజ్ నెన్వితార్.
- 6 దేవుణు బాణిజ్ పొక్తి ఒరెన్ మణిసి వాతాన్. వన్ని పేరు యోహాను.
- 7 వాండ్లు అయా జాయ్వందిజ్ సాస్యం వెహ్సెజ్ ఒరెన్ సాసిలెకెండె వాతాన్. ఎందానిజ్ ఇహిజు, విన్నిబోద వెంజి లోకురి విజెరి అయా జాయ్దిజ్ నమ్మిదెజ్ వాతాన్.
- 8 యోహాను అయా జాయ్ అవిన్. గాని అయా జాయ్వందిజ్ సాక్యం వెహ్సెజ్ వాతాన్.
- 9 అయా జాయ్నె నిజమాతి జాయ్. నిజమాతి జాయ్ లోకముదు వాజి లోకురిజ్ విజెరిజ్ జాయ్ సీజినాన్. వాక్యంనె నిజమాతి జాయ్.
- 10 వాండ్లు లోకముదు మహాన్. లోకముదు మనికెజ్ విజు వన్నివెటనె దేవుణు తయార్ కితాన్. గాని లోకురి వన్నిజ్ పొలిస్తజ్ అట్వితార్.
- 11 వాండ్లు వన్ని సొంత దేనముదు సాహాన్. గాని వన్ని సొంత యూదురి లోకురి వన్నిజ్ డగ్గు కివితార్.
- 12 వన్నిజ్ ఎసాండార్ డగ్గు కిత్రారొ, వారి వన్నిముస్సు నమకం ఇట్టికార్. నన్నివరిజ్ వన్నికొడోర్ అదెజ్ వాండ్లు అతికారం సితాన్.
- 13 వారు అప్పొసి వెట పుట్టికార్ అవిర్. ఒడోల్ అనదాన్ పుట్టికార్ అవిర్. వారు ఎత్తు కితివజ పుట్టికార్ అవిర్. దేవుణునె వరిజ్ వన్ని కొడోర్ ఇజి ఇట్టాన్.
- 14 వాక్యం ఇనికాన్ లోకు ఆతాండ్రె మా నడిమి బత్తితాన్. వాండ్లు మా ముస్సు వన్నిదయాదర్తం పూర్తి తోరిస్తాన్. వాండ్లు దేవుణు వందిజ్ నిజమాతికెజ్ పూర్తి తోరిస్తాన్. వాండ్లు ఎసా గొప్పపెరికాన్ ఇజి మాపు సుడోతాన్. బుబ్బు బాణిజ్ వాతి ఒరెండ్రె మరిసి ఆతి గొప్ప పెరివన్నిజ్ సుడోతాన్.
- 15 యోహాను వన్నివందిజ్ సాక్యం వెహ్సినాన్. వాండ్లు లోకురిజ్, “నా వెన్కా వానికాన్ నజి మిస్తికాన్. ఎందానిజ్ ఇహిజు, వాండ్లు నాను పుట్టివిండ ముజాలె మన్నికాన్ ఇజి నాను వెహ్సెకాన్ వీండ్రె”, ఇజి డటం డేల్లి వెహ్సాన్.
- 16 వన్ని పూర్తి దయాదర్మందాన్ వాండ్లు మజి విజెరిజ్ దీవిస్తాన్. కాలముకు గడోప్పి మహిజ్బా వాండ్లు మజి దీవిసిన్ ముజినాన్.

17 యూదురిజ్, రూలుజ్ మోసెవెట దేవుణు సితాన్. వన్ని దయా దర్మం ని వన్ని వందిజ్ నిజమాతి నజతిజ్ యేసు క్రీస్తు వెట వాతె.

18 ఎయెన్బా ఎనెజ్బా దేవుణుదిజ్తొవన్. గాని అప్పొని పడకాద్ మన్ని, దేవుణు వెట సమానం అతి, ఒరెండ్రె మరిసినె దేవుణు ఎయెన్ ఇజి మజి తెలివి కిబిస్తాన్.

యోహాను యేసు వందిజ్ వెప్పొని సొన్యం

19-20 యెరూసలెమ్దాన్ యూదురి పెద్దలిజు, యోహాను డగ్రు పుజెరిజు ని లేవి జాతిదు మన్ని వరిజ్ పోక్తార్. “నీను ఎయెన్ ఇజి వెహె ఆజని?”, ఇజి వెన్బాదెజ్ వరిజ్ పోక్తార్. నస్త్రెవలె యోహాను ఈహు వరిజ్ సాక్సి వెప్తాన్. “నాను క్రీస్తు ఆవి”, ఇజి నెగ్రెండ వప్తాన్.

21 అయావలె వారు, మరి నీను ఎయె? నీను ఏలియ ప్రవక్తనా? ఇజి వెన్బాతార్. “ఆవి”, ఇహాన్. “నీను మాపు ఎద్రు సూణి ప్రవక్తనా?”, ఇజి వెన్బాతిజ్, “ఆవి”, ఇహాన్.

22 అందెజె వారు, “నీను ఎయెన్? మజి పోక్తివరిజ్ మరిజి వెప్తాజ్ నీను ఉండ్రె జబాబు సిదా. నీ వందిజ్ నీను ఇన్నిక ఇజి వెహె ఆజని?”, ఇజి వెన్బాతార్.

23 దన్నిజ్ యోహాను యెసయ ప్రవక్త వెప్తాజ్ వప్తాన్. “ ‘ప్రబు వందిజ్ సరితినాజ్ కిదు, ఇజి బిడిమ్ బూమిదు డేలీసినెవన్ని లెకెండ* మన్న నాను”.

24-25 వన్ని డగ్రు వాతికార్ పరిసయెరు పోక్తికార్. అయావలె, అయా పరిసయెరుజు లోఇ నెగెండ్రార్ వన్నిజ్, “నీను క్రీస్తు ఆఇజు, ఏలియ ప్రవక్త ఆఇజు, మాపు ఎద్రు సూణి ప్రవక్త ఆఇజు, మరి ఎండనిజ్ నీను బాప్తిసం సీజని?”, ఇజి వెన్బాతార్.

26 దన్నిజ్ వాండ్రు, “నాను ఏరుదాన్ బాప్తిసం సీజని. గాని మరి ఒరెన్ మనాన్. వాండ్రు మీ నడిమి మనాన్. వన్నిజ్ మీరు పోలిన్ఇదెర్.

27 వాండ్రె నా వెన్యా వాజనికాన్. వన్ని జోడెకు బేల్టు కూతెజ్బా నాను ఏవటితికాన్ ఆవి”, ఇజి వెప్తాన్.

28 యెర్దాను ఇన్ని గడ్డ అతాహ పడకాద్ మన్ని బెతానియ ఇన్ని పట్టుమ్దు యాకెజ్ విజా జగ్గెతె. బానె యోహాను బాప్తిసం సీజి మహాన్.

29 మరీసనాండిజ్, యేసు వన్నిడగ్రు వాజనిక యోహాను సుడకతాన్. సుడకతండ్రె వాండ్రు, “ఇదిలో లోకురి పాపమ్క వందిజ్ పూజ ఆదిజ్దేవుణు పోక్తి వన్ని మెండ గొరె పిల్ల. వాండ్రు లోకురి పాపమ్కు సొస్సిస్తాన్”, ఇజి వెప్తాన్.

30 “నా వెన్యా ఒరెన్ వాజినాన్, వాండ్రు నజి ఇక మిస్తాకాన్. ఎండనిజ్ ఇహిజు, వాండ్రు నాను పుటెఎండ ముజాల మన్నికాన్ ఇజి నాను ఎయె వందిజ్ వెప్తానొ వాండ్రె వీండ్రె’.

31 వీండ్రు ఎయెన్ ఇజి నానె నెన్వెత. గాని ఇస్త్రాయేలు లోకురిజ్ వీండ్రు ఎయెన్ ఇజి తెలివి కిని వందిజె నాను ఏరుదాన్ బాప్తిసం సీజి వాత”, ఇజి వెప్తాన్.

32 మరి వాండ్రు నెస్తిక ఈహు సాక్సి వెప్తాన్: “దేవుణు అత్తు ఉండ్రె పారపొటి లెకెండ ఆగానమ్దాన్ డిజిగజి వాజి వన్నిమున్ను మంజనిక నాను సుడకత.

33 నానుబా వన్నిజ్ నెన్వెండ మహా. గాని ఏరుదాన్ బాప్తిసం సీజి ఇజి నజి వెప్తా పోక్తి దేవుణునె నజి వెప్తాన్, ‘దేవుణు అత్తు డిజిగజి ఎయెర్ మున్ను మంజనిక నీను సూణిదొ వాండ్రె దేవుణు అత్తుదాన్ బాప్తిసం సీనాన్’, ఇజి.

34 వెప్తా లెకెండ వినిజ్ జగ్గెతిక నాను సుడకత. అందెజె నాను వెప్పొన, ‘వీండ్రె దేవుణు మరిసి ఇజి’.

యేసు మొదొహి సిసూర్

35 మరీసనాండిజ్, మరి, యోహాను వన్ని రిఎర్ సిసూర్ వెట నిహ మహాన్.

36 అయావలె యేసు అయా సరి సొస్సి మహిజ్, వన్నిజ్ డిటం సుడకజి, ‘ఇదిలో, పూజ ఆదిజ్ దేవుణు పోక్తి వన్ని మెండ గొరె పిల్ల’, ఇజి వెప్తాన్.

37 అయా రిఎర్ సిసూర్ వాండ్రు వెప్తాక వెహారె, యేసు వెన్యా సాహార్.

* 1:23 1:23 యెసయ 40:3.

38 యేసు మువ్తాండ్రె, వారు వెన్నా వాజనిక సుడుతాన్. సుడతాండ్రె వరిజ్, “మీరు ఇనిక రెబాజినిదెరె?”, ఇజి వెన్బాతాన్. వారు వన్నిజ్, “రబ్బి, ఇహిజ బోదిస్సాన్, నీను ఎంబె మంజిని?”, ఇజి వెన్బాతార్.

39 వాండ్రు, “రదు, వాజి సుడోడు”, ఇహాన్. అందెజి వారు సొహారె, వాండ్రు మంజినిబాన్ సుడతాన్. అయా రోజు వారు వన్నివెట మహార్. అయావలె రమారమి పొగల్నాల్లి గంటిజ్ ఆత మహార్.

40 సిమోన్ పేతురు తంబెర్ని ఆతి అంద్రెయి ఇన్నికానె యోహాను వెప్తాక వెంజి యేసువెట సొహి రివిర్ లోఇ ఒరెన్.

41 వాండ్రు వెటనె, వన్నిఅన్నసి సిమోనుజ్ రెబాతాండ్రె, “మాపు మెసయేజ్ నుడతావ్”, ఇజి వెప్తాన్.

42 వెప్తాండ్రె వన్నిజ్ యేసు డగ్రు తతాన్. యేసు సిమోనుజ్ సుడోజి, “నీను యోహాను మరిసి ఆతి సిమోను. నీను కేవ ఇజి కూకె అనిలె”, ఇజి వెప్తాన్. (గ్రీకు బాసదు అయా మాట పేతురు ఇజి రాస్త మనాద్. దని అర్థం ఇన్నిక ఇహిజ నటు ఇజి).

యేసుపిలిపుజ్ నతనయేలుజ్ కూక్సినాన్

43 మహ్నా నాండిజ్, గలీలయ ముటదు సొండ్రెజ్ ఇజి యేసు ఒడోబితాన్. అయావలె, వాండ్రు పిలిపుజ్ దసూల్ ఆతాతాండ్రె వన్నిజ్, “నా వెట వాజి నా నీసూడుజ్ ఆఅ”, ఇజి వెప్తాన్.

44 పిలిపు బెత్నయ్యె ఇని పట్టుమ్దికాన్. పిలిపు, అంద్రెయి, పేతురు మీరు ఉండ్రె పట్టుమ్దికార్.

45 పిలిపు నతనయేలు ఇని వన్నిజ్ రెబాతాండ్రె వన్నిజ్, “మోసి రాస్సి సీతి రూలుదు వాండ్రు రాస్సి మన్ని వన్నిజ్, ప్రవక్తరు బా రాస్సి మన్ని వన్నిజ్ మాపు దసూల్ ఆతావ్. వాండ్రు నజరెతుదికాన్ ఆతి యేసు. యోసేపు మరిసి”, ఇజి వెప్తాన్.

46 అందెజి నతనయేలు వన్నిజ్, “నెగ్గెకెజ్ ఇనికబా నజరేతుదాన్ వానాదా?”, ఇజి వెన్బాతాన్. వన్నిజ్ పిలిపు, “వాజి సుడోజు”, ఇహాన్.

47 యేసు నతనయేలు వన్ని డగ్రు వాజనిక సుడోతండ్రె, “ఇవిలోన్ నిజమాతి ఇస్రాయేలుదికాన్ వాజినాన్. విని లోఇ ఇన్ని సెఇకెజ్బా సిల్లు”, ఇజి వన్ని వందిజ్ వెప్తాన్.

48 అయావలె నతనయేలు వన్నిజ్, “నీను ఎలాగ నజీ నెస్సి?”, ఇజి వెన్బాతిజ్ యేసు, “పిలిపు నిజీ కూక్విండ ముజాలె, నీను బోడెమరాన్ అడిగి మనిక నాను సుడోత”, ఇహాన్.

49 నతనయేలు, “బోదిస్సికి, నీను దేవుణు మరిసి. నీను ఇస్రాయేలు లోకురి రాజు”, ఇహాన్.

50 అందెజి యేసు వన్నిజ్, “నీను బోడెమరాన్ అడిగి మంజినిక నాను సుడోత ఇజి నాను వెప్తాజ్నె నీను నమిజిని. దినిజ్ ఇంక మిస్సి నండో పెరి పణిజ్ నీను సూణిలె”, ఇజి వెప్తాన్.

51 వాండ్రు వన్నిజ్, “నాను నిజం వెహ్సిన, ఆగాసం రెయ్ ఆజి దేవుణు దూతెజ్ లోకుమరిసిఆతి నా డగ్రు ఎక్సి సొనిక డిగిజి వానిక నీను సూణిలె”, ఇజి వెప్తాన్.

2

యేసు కితి మొదోహి బమ్మ ఆతి పణి

1 రుండి దినమ్కు సొహి వెన్నా, గలీలయ ముటది కానా ఇని పట్టుమ్దు ఉండ్రె పెండ్లి జర్గితాద్.

2 యేసు అయేసిబాన్ మహార్. యేసుజ్ని వన్ని సిసూర్జబా ఆ పెండ్లిదు కూకార్.

3 ద్రాక్కుకల్లు వీజితివెలె, యేసు అయేసి వన్నిజ్, “ద్రాక్కుకల్లు వీజితాద్”, ఇజి వెప్తాద్.

4 అయావలె యేసు, “ఓ యా, దిని వందిజ్ నీను నజీ ఎండనిజ్ పణిని? నాను ఎయెన్ ఇజి తోరె అడెజ్ దేవుణు నా వందిజ్ ఏర్పాటు కితి వేలా ఇంక రవెదె”, ఇజి వెప్తాన్.

5 యేసు అయేసి పణికినివరిజ్, “వాండ్రు మిజి ఇన్నిక వెప్తాజ్బా మీరు కిదు”, ఇజి వెప్తాద్.

6 దేవుణుదిజ్ ఇస్సం ఆత్తివజి మండ్రెజ్ యూదురు సుబ్బరం ఆనార్. సుబ్బరం అనివందిజ్ వారు నోర్బానార్. అయాక వరి ఉండ్రె ఆసారం. ఆహా నోర్బాని దన్నివందిజ్ పణుకుదాన్ తయార్ కితి గోలమ్కు మహా. డగ్రు తొబయ్దాన్ నూటి మువంయ్ లీటర్ ఏరు అన్నె. నన్ని గోలమ్కు ఆరుబాన్ మహా.

7 యేసు, “అయా గోలమ్కాజ్ ఏరు నిహాతు”, ఇజి పణికిని వరిజ్ వెప్తాన్. వారు నిండ్రు నిచ్చార్.

8 అయావలె వాండ్రు వరిజ్, “ముడుక్కి నవ్దెరి బాన్ ఒతు”, ఇజి వెహ్లాన్. వారు అయా లెకెండ్ కితార్.

9 నవ్దెరి యెలు ద్రాక్కు కడు ఆతి ఏరు రుసి నుడెతాన్. అయా ద్రాక్కుకల్లు ఎమేణిజ్ వాతాదొ ఇజి ఆ ఏరు ముడుక్కి ఒతి పణికిని వరిజె తెలినా ద్గాని నవ్దెరిజ్ తెలివెద. వాండ్రు పెండ్లి మరిసిజ్ కూక్తాన్.

10 కూక్తాండ్రె వన్నిజ్, “విజెరి కూలెజ నెగ్గి ద్రాక్కుకల్లు ముందాలె సీనార్. లావు ఉటి వెన్యా అడ్డెబెడ్డెదిక సీనార్. గాని నీను ఏలుదాక నెగ్గి ద్రాక్కుకల్లునె ఇడ్డె మన్ని”, ఇజి వెహ్లాన్.

11 యాకాదె యేసు కితి మొదొహి బమ్మ ఆతి పణి. యాక గలీలయ ముటది కానా ఇన్ని పట్టుమీదు జర్గితాద్. అయా లెకెండ్ కిజి, యేసు వాండ్రు గొప్పవెరికాన్ ఇజి తోరిస్తాన్. వన్ని సినూర్ వన్ని మున్ను నమకం ఇట్టార్.

12 దిని వెన్యా వాండ్రు వన్ని అయిసి, తంబెర్సిర్, సినూర్ వెట కపర్నహముదు సాహాన్. అబ్బె సెగం దినమేకు మహార్.

యేసు దేవుణుగుడిదాన్ బేరం కినివరిజ్ వెల్లి పొక్కినాన్

13 యూదురి పన్ను పండొయి కిడెజ్ కాలం డగ్గు ఆతాద్. అందెజె యేసు యెరూసలెమీదు సాహాన్.

14 బాన్ దేవుణుగుడిది అరుజుదు బేరం కిజిని వరిజ్ వాండ్రు నుడెతాన్. కొడ్డిజ్, గొరెజ్, పూజ కిని వందిజ్ పారపొటిజ్ పొర్ని వరిజ్ నుడెతాన్. పయు దేసెమేది డబ్బుజ్ మరిసి యూదురి కానుజ్ సీజిని బేరం కిని వరిజ్బా నుడెతాన్.

15 అయావలె వాండ్రు నానుదాన్ కొండ కితాండ్రె, కొడ్డిజు, గొరెజు వెట వరిజ్ విజెరిజ్ అరుజుదాన్ పేర్తాన్. డబ్బుమరిసి బేరం కినివరి డబ్బు విజు సెద్దిస్తాండ్రె, వరిబల్లెజ్ ముహ్లాన్.

16 పార పొటిజ్ పొర్ని వరివెట, “విన్యాజ్ ఇబ్బెణిజ్ ఒతు. నా బుబ్బు ఇల్లు సత్తలెకెండ్ కిమాట్”, ఇజి వెహ్లాన్.

17 నన్సివలె వన్నిసినూర్, “ఓ దేవుణు, నీ ఇల్లువందిజ్ నజీమన్ని గొప్ప ఆన, ఉండ్రీ సినులెకెండ్ నా లొఇ కన్నాద్*”, ఇజి దేవుణు మాటదు రాస్తి మనిక వారు ఒడెబితార్.

18 అయావలె యూదురు, యా పణిజ్కిడిజ్ నిజీ ఇని అతికారం మనాద్? ఉండ్రీ బమ్మ ఆని పణికిజి మజీ తోరిసి అయాక రుజుప్ కితా, ఇజి వన్నిజ్ వెహ్లాన్.

19 “యా గుడిః డెయిజి అర్పు. మూండ్రీ రోస్కాజ్ నాను మరి తొహ్నా”, ఇజి యేసు వరిజ్ వెహ్లాన్.

20 దన్నిజ్ యూదురు, “యా గుడిః తొహ్నాజ్ నలవయ్ ఆరు పంటిజ్ ఆతాద్. నీను మూండ్రీ రోస్కాణిజ్ తొహ్నాదా?”, ఇహార్.

21 గాని దేవుణుగుడిః వందిజ్ వెహ్లావలె వన్ని ఒడెలె వందిజె వెహ్లాన్.

22 వాండ్రు సాతాండ్రె మరీజి నిజీతివెనుక, యా లెకెండ్ మాట వాండ్రు వెహ్లాన్ ఇజి సినూరు ఒడెబితార్. అందెజె దేవుణు మాట వారు నమ్మితార్. యేసు వెహ్లా మాటబా నమ్మితార్.

23 యేసు పన్నుపండొయిదిజ్ యెరూసలెమీదు మహివలె, వాండ్రు కితి బమ్మ ఆతి పణిజ్ నుడెతారె, నండొండార్ వన్నిజ్ నమ్మితార్.

24 గాని వాండ్రు వరిజ్ వన్నిజె బవజివతాన్. ఎందనిజ్ ఇహిజు, వాండ్రు విజెరిజ్ నెస్తాన్.

25 ఎయెర్బా వన్నిజ్ లొకుర్ వందిజ్ వెహ్లాజ్ అవ్నరం సిల్లెద్. ఎందానిజ్ ఇహిజు, వరి మున్నుదు మన్ని ఆలోసనమేకు వాండ్రు నెసినాన్.

3

యేసు నికొదిముజ్ నెన్పిస్తాన్

1 యుదురిజ్ అతికారి ఆతి నికొదెము ఇనికాన్ ఒరెన్ మహాన్. వాండ్రు పరిసయిరుజు లొఇ ఒరెన్.

2 వాండ్రు ఉండ్రీ పొదొయ్, యేసుడగ్గు వాతాన్. వాతాండ్రె, “ఓ బోదకిసికి, నీను దేవుణు పొక్తి ఒరెన్ నెన్పిస్తాన్ ఇజి మాపు నెసినావ్. దేవుణు ఒరెన్ వన్నివెట సిల్లెండ మహిజు, నీను కిజిని బమ్మఆతి పణిజ్ కిడిజ్ ఎయెన్బా అట్వెన్”, ఇజి వెహ్లాన్.

* 2:17 2:17 కీర్తన 69:9.

3 అందెజె యేసు వన్నివెటె ఈహు వెహ్సాన్: “నాను నిజమన వెహ్సాన్, ఒరెన్ మరి కొతాజ్ పుట్టిజనె, దేవుణు ఏలుబడిడు మంజినాన్”.

4 అయావలె నికోదెము, “పిరితిలోకు ఒరెన్ ఎలాగ మరి కొతాజ్ పుట్టాన్. వాండ్రు అయిసి పొటాద్ సొన్ని మరి ఉండ్రీ నుట్టు పుట్టిజ్ అట్ఎన్”, ఇజి వెహ్సాన్.

5 యేసు వెహ్సాన్, “నాను నిజన్ వెహ్సాన్, ఒరెన్ బాప్తీసం లాగె అఎండ మహిజ, దేవుణు అత్త బాణిజ్ కొత్త బత్తు దొహ్కెండ మహిజ, వాండ్రు దేవుణు ఏలుబడిడు మన్ఎన్.

6 యాయ బుబ్బరెవెటెన్ కొడోరె కాసినార్. గాని దేవుణు అత్త వెటెన దేవుణు కొడోరె ఆనార్.

7 “నీను మరి కొతాజ్ పుట్టిజ్ వెలె”, ఇజి నాను వెహ్సా మూటదిజ్ నీను బమ్మ అమా.

8 “గాలి దన్నిజ్ ఇస్టమాతి బాడిద్ డెయ్యాద్. నీను దన్నిజాటు వెని గాని అది ఎంబెణిజ్ వాజినాద్, ఎంబె సొన్నినాద్, ఇజి నిజి తెలిఎద్. అయలెకెండెనె, దేవుణు అత్త ఒరెన్ వన్నిజ్ కొత్త బత్తు సీదెజ్ వన్నిజ్ ఇస్టమాతివజ విజు కినాన్. వాండ్రు అయాక ఎలాగ కినాన్ ఇజి తెలిఎద్”.

9 “యాక ఎలాగ జర్గినాద్?”, ఇజి నికోదెము యేసుజ్ వెన్బాతాన్.

10 దనిజ్ యేసు, “ఇస్రాయేలుడు మన్ని బోదెసిని వరిలో ఇ తగమాతికి ఒరెన్ నీను గదె? యాకెజ్ నీను నెన్ ఇదా?”

11 నాను నిజం వెహ్సాన్, మాపు నెన్తికెజె వెహ్సానావ్, నుడెతికెజె వెహ్సానావ్. గాని మీరు అయాకెజ్ నమ్మిఇదెర్.

12 యా బూమిడు జర్గిని దన్నివందిజ్ నాను మిజి వెహ్సా మన్ను. గాని మీరు నమిఇ. అహిజ, నాను దేవుణు మంజిని బాడిడు మన్ని సజతిజ వందిజ్ వెహ్సాజ, మరి మీరు ఎలాగ నమ్మినిదెర్?

13 ఎయెన్బా ఎనెజిబా దేవుణు మంజిని బాడిడు సొన్ఎతార్. దేవుణు మంజిని బాడ్డిజ దాన్ డిగితి వాతి లోకుమరిసి అతి నాను అఎండ మరి ఎయెన్బా దేవుణు మంజిని బాడిడు సొన్ఎతాన్.

14-15 బీడిమ్బూమిడు మోసె కంసుదాన్ తయార్ కితి సరొందెజ్ పెహ్సా లెకెండె, లోకు మరిసి అతి నాను పెరె ఆనాలె. నా మున్ను నమకం ఇడ్లి వరిజ్ విజెరిజ్ ఎలాకాలం బత్తుని బత్తు దొహ్కెవందిజె నాను పెరె అదెజ్ వెలె.

16 దేవుణు లోకుర్ విజెరిజ్ ఎసానో ప్రేమిస్తాన్. అందెజె వాండ్రు వన్ని ఒరెండ్రె ఒరెన్ మరిసిజ్ సాదెజ్ సితాన్. వన్నిజ్ నమనికార్ ఎలాకాలం సేనుడు మన్ఎండ, ఎలాకాలం దేవుణు వెటె మంజిని వందిజ్ వాండ్రు మరిసిజ్ సితాన్.

17 దేవుణు లోకురిజ్ తీర్పు సీజి సిక్కు సీని వందిజ్ అఎద్, వాండ్రు వన్ని మరిసిజ్ లోకమ్దు పొక్తిక. గాని వాండ్రు వరిజ్ ఎల్లకాలం మన్ని సిక్కుదాన్ గెల్పెన్తివందిజె పొక్తాన్.

18 మరిసిజ్ నమ్మిని ఎయెరిజ్బా తీర్పు సీజి సిక్కు సీనిక సిల్లెద్. గాని వన్నిజ్ నమిఇ వరిజ్ ఏలునె దేవుణు తీర్పు సీజి సిక్కు సిత మనాద్. ఎందనిజ్ ఇహిజ, దేవుణు ఒరెండ్రె మరిసిజ్ వారు నమ్మివెతార్.

19 జాయ్ లోకమ్దు వాతమనాద్. గాని లోకుర్ జాయ్దిజ్ ప్రెమిన్ఎండ సీకట్దిజ్ ప్రేమిస్తాన్. ఎందనిజ్ ఇహిజ, వారు సెఇ పణిజ్ కిజినార్. యాక నుడెజెనె, లోకురిజ్ దేవుణు తీర్పు సీజి సిక్కు సీనాన్.

20 సెఇ పణిజ్ కిజినికార్ విజెరె జాయ్దిజ్ ఇస్టం కివెర్. వారు జాయ్దు రెపిర్. ఎందనిజ్ ఇహిజ, వరి సెఇ పణిజ్ విజు జాయ్దు తోర్నె ఇజి తియెల్ అజినార్.

21 గాని నిజమాతి పణిజ్ కినికాన్ ఎయెన్బా జాయ్దు వాజినాన్. ఎందనిజ్ ఇహిజ, వారు కిజిని పణిజ్ విజు దేవుణుదిజ్ లోజిజె కిజినార్ ఇజి జాయ్వెల్లి తోర్నాద్”, ఇజి వెహ్సాన్.

బాప్తీసం సీని యోహాను యేనువందిజ్ సాసి వెహ్సానాన్.

22 వెనుక, యేసుని, వన్నిసినూర్ యూదయస్తాతమ్దు సొహార్. బాన్ వాండ్రు వరివెటె సగం కాలం గడప్పి, లోకురిజ్ బాప్తీసం సీబిని మహాన్.

23 నలిముడగ్గు అయిని ఇన్ని బాడిడు యోహాను బాప్తీసం సీజి మహాన్. ఎందనిజ్ ఇహిజ, బాన్ నండో ఏరు మహా. లోకుర్ వన్ని డగ్గు సొన్ని బాప్తీసం లాగె అజి మహార్.

24 యాక యోహానుజ్ జెలిదు ఒఇ ముజాల జర్గితాద్.

25 యోహాను సిసూర్ని ఒరెన్ యూద వాండ్రు సుబ్రం అని యూదురు రూలు వందిజ్ వెప్పొ గొడఃబ ఆతార్.

26 వారు యోహానుడగ్రు వాతార్, “బోదకినికి, యొర్దాను గడ్డ అతాలీని వెట ఒరెన్ మహాన్ గదె. నీను వన్ని వందిజ్ వెప్తొ మన్ని. ఇవిలోన్ వాండ్రు విలు బాప్తీసం సీజనాన్. లోకుర్ విజెర వన్నిడగ్రు సాసిసినార్”, ఇజి వెప్తార్.

27 అందెజె యోహాను వెప్తార్, “దేవుణు ఇష్టం కితివజనె ఒరెన్ వన్నిబత్తుదు విజు జగ్గిజనాద్.

28 “నాను క్రిస్తు ఆవి. గాని వన్నిజ్ ఇంక ముజాల దేవుణు నజీ పోక్తాన్”, ఇజి నాను వెప్తొక మీరు వెహిదెర్.

29 పెండ్లి అని వన్నిదినె పెండ్లి బోదలి. పెండ్లి దజడః కూలయెన్ వన్నిడగ్రు మంజి వాండ్రు వెప్తొకెజ్ వెంజినాన్. వెప్సొనికెజ్ వెంజనికాదె కూలయెన్ వన్ని నరద. పెండ్లి దజడః కూలయెన్ పెండ్లి దజడఃవెట నరద అని లెకెండ్ నా నరద క్రిస్తువెట పూర్తి ఆజినాద్.

30 వాండ్రు పెరికాన్ ఆదెజ్వలె. నాను ఇజ్జికాన్ ఆదెజ్.

31 పరలోకమదాన్ వాజనికాన్ విజెరి మున్ను పెరికాన్. యా లోకమదాన్ వాజనికాన్ యా లోకమదాని. వాండ్రు లోకమది నజతిజ వందిజ్ వెప్సొనాన్. పరలోకమదాన్ వాజనికాన్ విజెరి మున్ను పెరికాన్.

32 వాండ్రు సుడఃతిజ వనకవందిజ్ వెహి వన్కా వందిజ్ వెప్సొనాన్. గాని నెగొండార్ వాండ్రు వెప్సొనికెజ్ డగ్రు కినార్.

33 వన్నిమాట వెంజనికాన్ దేవుణు వెప్సొనికెజ్ నిజం ఇజి ముద్ద పొక ఆజినాన్.

34 దేవుణు పోక్తాన్ దేవుణు మాటనె వగ్గిజనాన్. ఎందనిజ్ ఇహిజ, దేవుణు వన్ని ఆత్మ అంతు సిల్లెండ్ వన్నిజ్ సీజనాన్.

35 అప్సొని మరిసిజ్ ప్రేమిసొన్నాన్. అందెజె వాండ్రు వన్నిజ్ విజుదనిజ్ అతికారం సిత్త మనాన్.

36 మరిసి మున్ను సమకం ఇడ్డి మన్నివన్నిజ్ ఎలాకాలం దేవుణువెట బత్సొని బత్తు మనాద్. గాని వన్నిజ్ లోజ్ ఇ వన్నిజ్ ఎలాకాలం బత్సొని బత్తు సిల్లెద్. గాని దేవుణు సిక్ వన్ని మున్ను ఎలాకాలం మనాద్.

4

యేసు సమరియ దేసెమది బోదెలివెట వగ్గిజనాన్

1-2 యోహాను ఇంక యేసు నండొండారిజ్ వన్ని వెట కుడుప్పినాన్, వరిజ్ బాప్తీసం సీజనాన్ ఇజి పరిసయరు వెహార్. (నిజం ఇన్నిక ఇహిజ, యేసు ఎయెరిజ్బా బాప్తీసం సివితాన్. వన్ని సిసూర్నె సెతార్)

3 ఆహా పరిసయరు వగ్గిజనార్ ఇజి యేసునెస్తాండ్రె, వాండ్రు యూదయ ప్రాంతం డిస్తాండ్రె గలీలయ ముటదు మరి మహ్తా సోహాన్.

4 వాండ్రు సమరియ దేసెమదాజె సొండ్రెజ్ సరి మనాద్.

5 అందెజె వాండ్రు సమరియ దేసెమదు మన్ని సుకారు ఇన్ని పట్టుమదు వాతాన్. అయా పట్టుం, పూర్బమదు బత్సొజి మహి యాకోబు వన్ని మరిసి యొసెపుజ్ సిత్తి మన్ని బామిడగ్రు మన్నికాద్.

6 యాకోబు కారిస్తి నూతి బాన్ మహాద్. యేసు పయిణం కిజి వందితాండ్రె అయా నూతి డగ్రు బస్తాన్. నస్తవలె, మదెనం.

7 అయావలె సమరియాతి బోదెలి ఉండ్రె ఏరు ఒతెజ్ బాన్ వాతాద్. యేసు దని వెట, “ఏహా కట్సినాద్. ఏరు బుకెండ్ సిదా”, ఇహాన్.

8 (వన్ని సిసూర్ టిండి కొండెజ్ పట్టుమదు సోహా మహార్)

9 అయా బోదెలి వన్నిజ్, “నీను యూద వాండ్రు. నాను సమరియ బోదెలి. అబాయా, నీను నజీ ఏరు లొస్సిదా”, ఇహాద్. (ఎందనిజ్ ఇహిజ, యూదురు సమరియతి వరి వెట కూడఃజి మన్ఏర్)

10 అందెజె యేసు, “నీను దేవుణు సీనిక నెస్సి మంజనిక ఇహిజ, నిజి ఏరు లొస్సికాన్ ఎయెన్ ఇజి నెస్సిమంజనికిహిజ, నీను వన్నిజ్ దేవుణు సీనిక వెన్బాతి మరి. వాండ్రు నిజి ఎలాకాలం బత్సొన్పిస్సి ఏరు సెతాన్ మరి”, ఇజి వెప్తార్.

11 అయా బోదెలి వన్నిజ్, “బాబు నూతి నిరీక మనాద్. ఏరు లాగ్దెజ్ నిజి డొక్కు ఇన్నిక సిల్లెద్. మరి ఎలాగ నీను బత్కిన్పిన్సి ఏరు లాగ్తి?

12 మా అనిగోగ్గో యాకోబు యా నూతి మజి సితాన్. వాండ్రు, వన్ని మురిసిర్, వన్ని కోడ్డిజ్, గొర్రెజ్ విజు యా నూతిది ఏరు ఉణిజి మహార్. నీను వన్నిజ్ మిస్సికిదా?”, ఇజి వెహ్లాద్.

13-14 అందెజె యేసు, “యా ఏరు ఉణి విజెరికెబా మరి ఏమ్మి కట్యాద్. గాని నాను సీని ఏరు ఉణివరిజ్ఎనెజ్బా ఏహ్ కట్వద్. నాను సీని ఏరు బూమిదాన్ సోసిని ఊట ఏరు లెకెండ్ వన్ని లొఇ ముజినె. అయాక వన్నిజ్ ఎలాకాలం దేవుణు వెట బత్కిని బత్కు సీజనాద్”, ఇజి వెహ్లాన్.

15 నన్సివలె అది, “బాబు యా ఏరు నజి సిదా. అయావలె ఎనెజ్బా ఏహ్ కట్వద్. ఇబ్బె వాజి ఏరు లాగ్తి ఒతెజ్ నజి అవ్సరం సిల్లెద్”, ఇజి వెహ్లాద్.

16 యేసు దనిజ్, “సొన్ని నీ మాసిజ్ ఇబ్బె కూక్కి తగ్గఅ”, ఇజి వెహ్లాన్.

17 దన్నిజ్ అది, “నజి మాసి సిలెన్”, ఇహాద్. అందెజె యేసు, “నజి మాసి సిలెన్ ఇజి నీను వెహ్లిమాట నిజమ్నె.

18 నిజి అయ్దుగురు మాసిర్ మహార్. ఏలు నీ వెట ముజినికాన్ నీ మాసి ఆవిన్. నీను నిజమ్నె వెహ్లి”, ఇహాన్.

19 అయావలె అది వెహ్లాద్, “బాబు నీను ఒరెన్ ప్రవక్త ఇజి నాను నెస్సాన్.

20 మా సమరియది అనిగోగ్గో యా గొర్రెతనె దేవుణుదిజ్ పొగిడిజి మాడిస్తార్. గాని యూదురు ఆతి మీరు, దేవుణుదిజ్ పొగిడిజి మాడిస్తెజ్ మన్ని బాడ్డి యెరూసలెం ఇజి వెహ్సినిదెర్”.

21 అందెజె యేసు, “బీబి, యెరుసలెమ్దుబా, యా గొర్రెతబా బుబ్బె ఆతి దేవుణుదిజ్ మీరు పొగిడిజి మాడిసెనె ఉండ్రి కాలం వాజినాద్. నీను నా మాట నమ్మిఅ.

22 ఎలాగ మర్తి వన్నిజ్ పొగిడిజి మాడిసెనెదెర్ ఇజి మిజి తెలివిద్. గాని యూదురు ఆతి మజి తెలివి, ఎలాగ మర్తి వన్నిజ్ మాపు పొగిడిజి మాడిస్తావ్ ఇజి. ఎందానిజ్ ఇహిజ, యూదురు బాణెజి, లోకురిజ్ రక్సిస్సికాన్ వాజినాన్.

23 దేవుణు ఆత్మసత్తుదాన్ లోకుర్ బుబ్బెజ్, వరి మన్ను పూర్తి నిజం పొగిడిజి మాడిసెని ఉండ్రి కాలం వాజినాద్. అయాక ఏలున మనాద్. ఆహె పొగిడిజి మాడిసెని వరిజె దేవుణుదిజ్ ఇష్టం.

24 దేవుణు, ఆత్మనె. అందెజె వన్నిజ్ పొగిడిజి మాడిస్సికార్ వన్ని ఆత్మ సత్తుదాన్, నిజం ఇక వన్నిజ్ పొగిడిజి మాడిస్తెజ్వెలె”, ఇజి వెహ్లాన్.

25 అయా బోదెల్ వన్నిజ్, “క్రీస్తు ఇజి కూకె ఆని మిసియ వానాన్ ఇజి నాను నెస్సు. వాండ్రు వానివలె మజి విజు వన్నా వందిజ్ టెటాజ్ వెహ్లాన్”, ఇజి వెహ్లాద్.

26 అయావలె యేసు, “నీవెట వర్గిజిని నాను వాండ్రి”, ఇజి వెహ్లాన్.

27 అయావలెని వన్ని సిసూర్ మర్జి వాతార్. వాండ్రు అయా బోదెల్ వెట వర్గిజినిక సుడెతార్ నండ్రి బమ్మె ఆతార్. గాని నిజి ఇన్నిక కావాలి ఇజి బా, నీను ఎందనిజ్ దన్నివెట వర్గిజిని ఇజబా ఎయెర్బా వెన్బావతార్.

28-29 అయా బోదెల్ దని కుండె డిస్తాదె పట్టుం సాహాద్. సాహాద్, బాన్ మహి లోకురిజ్, “నాను కితి విజు వన్నా వందిజ్ నజి వెహ్లి ఒరెన్ వన్నిజ్ మీరు వాజి సుడెదు. వీండ్రు క్రీస్తు ఆవిండ్లా?”, ఇజి వెహ్లాద్.

30 వారు పట్టుమదాన్ సోతార్ వన్నిడగ్గు వాజి మహార్.

31-32 అయావలె వన్ని సిసూరు, “మెష్టరు ఇనికబా ఉణామె”, ఇజి వన్నిజ్ బతిమాలితార్. ‘మిజి తెలిఇ బోజనం నజి ఉండెజ్ మనాద్”, ఇజి వాండ్రు వరిజ్ వెహ్లాన్.

33 “వన్నిజ్ బోజనం ఎయెన్బా తతాండ్లా?”, ఇజి ఒరెనదిజ్ ఒరెన్ సిసూర్ వర్గితార్.

34 యేసు వరిజ్, “నజి పొక్తాన్ నజి వెహ్లి పణి పూర్తి కినికాదె నా బోజనం లెకెండ్ మనాద్.

35 ‘నాల్లి నెల్లెజ్ మనాద్ పంట కొయెని కాలం’, ఇజి మీరు వెహ్సిదెర్గదె. నాను మిజి వెహ్సిన్, మీ కణుకు పెర్తి ముడిజు సుడెదు. ఆకెజ్ సోపాతెనె పండితె మన్నె.

36 నా మాటెజ్ వెండ్రెజ్ తయార్ ఆతి మన్ని యా లోకురిజ్ సుడెఅ. కొయిదెజ్ సోపాతి మన్ని ముడిజు లెకెండ్ మనార్. వరిజ్ ఎలాకాలం దేవుణు వెట బత్కిని బత్కు డొహ్కాద్ ఇజి నా డగ్గు తని వన్నిజ్ లాబం

మూనాద్. విత్తికాన్ ని కొయినికాన్ రిఎర్ కూడజి సరద ఆని లెకెండ వీండ్లు ని విని ముజాల లోకురిజ్ నువార్ల వెప్టికార్ రిఎర్ కూడజి సరద ఆనార్.

37 'విత్తికాన్ ఒరెన్. కొయినికాన్ మరి ఒరెన్', ఇజి వెప్పిక నిజమెన్.

38 మహికార్ కన్నబడిజి పణి కితార్. మీరు కిఇతిదెర్. వారు కన్నపడిజి కితి పణిది లాబం లాగదెజ్ నాను మిజి పోక్కిన.

నండొ సమరియదికార్ యేసుజ్ నమిజినార్.

39 "నాను కితి విజు వన్కా వందిజ్ వాండ్రు నజి వెప్టాన్", ఇజి అయా బోదెలి మాట వెహారె, అయా పట్టుమీది నండొ సమరియదికార్ యేసుజ్ నమ్మితార్.

40 అందెజి సమరియదికార్ వన్ని డగ్రు వాతారె, "మా డగ్రు మన్అ ఇజి వన్నిజ్ బతిమాలితార్. అందెజి వాండ్రు అబె రుండి రోస్సు మహాన్.

41 వన్ని మాట వెహారె, మరి నండొండార్ వన్నిజ్ నమ్మితార్.

42 వారు అయా బోదెల్దిజ్, "నీను వెప్టి దనిదాన్ ఆఎద్ మాపు యేలు నమిజినక. గాని విని మాటిజ్ మాపు వెహావ్. నిజమె, వీండ్రె లోకురిజ్ పాపమ్కాజ్ రక్సిన్కాన్ ఇజి మాపు నెసినావ్. అందెజి మాపు వినిజ్ నమ్మిజినావ్", ఇహార్.

యేసు అతికారి మరిసిజ్ నెగెణ్ కిజినాన్

43 రుండి రోస్సు బాన్ మహి వెన్కా, యేసు సమరియదాన్ గలీలయ ప్రాంతమీదు సాహాన్.

44 (యేసునె వెప్టా మహాన్, "ఒరెన్ ప్రవక్తెజ్ వన్నిసొంత ప్రాంతమీదు ఎయెర్బా గవేరం సిఎర్", ఇజి)

45 వాండ్రు గలీలయదు వాతివలె, గలీలయదికార్ వన్నిజ్ డగ్రు కితార్. ఎందనిజ్ఇహిజు, వారుబా పన్ను వండొయిదిజ్ యెరూసలెమీదు సాహ మహారె, వాండ్రు అబ్బె కితి విజు పణిజ్ సుడెత మహార్.

46 వాండ్రు గలీలయది కానా ఇన్ని పట్టుమీదు మరి వాతాన్. బానె వాండ్రు ఏరుదిజ్ ద్రాక్కు కడు కితాన్. అబ్బె ఒరెన్ గవర్మెంటు అతికారి మహాన్. వన్ని మరిసి కపర్నహముదు కన్నం అర్దు మహాన్.

47 యేసు యుదయదాన్ గలీలయదు వాతాన్ ఇజి వెహివెలె వాండ్రు యేసు డగ్రు వాతాన్. వాతండ్రె, "నా మరిన్ సాదెజ్ డగ్రు ఆత మనాన్. అందెజి నీను వాజి వన్నిజ్ నెగెణ్ కిఆ", ఇజి వన్నిజ్ బతిమాలితాన్.

48 యేసువన్నిజ్, "నండొ బమ్మాని గుర్తుజ్ సుడెతిజునె మీరు నమినిదెర్", ఇజి వెప్టాన్.

49 అయా అతికారి, "బాబు, నా మరిన్ సాని ముజాల రఅ", ఇజి వెప్టాన్.

50 దన్నిజ్ యేసు వన్నిజ్, "సాన్అ. నీ మరిన్ బత్కినాన్", ఇజి వెప్టాన్. వాండ్రు యేసు వెప్టిమాట నమితాండ్రె సాహాన్.

51 వాండ్రు సాన్ని మహివలె వన్ని ఇండ్రొణి పణి మణిసిర్ వన్ని ఎర్దు వాతారె, "నీ మరిన్ బత్కిత మనాన్", ఇహార్.

52 ఎసాడు గంటెజ్ వన్నిమరిసి నెగెణ్ ఆతాన్ ఇజి వరిజ్ వెన్బాతిజ్ వారు, "ఇవీన్ ఒంటి గంటదిజ్ నోబు డిఃస్లాద్", ఇజి వెప్టాన్.

53 నీ మరిన్ బత్కినాన్ ఇజి యేసు వెప్టి ఆ టయిమీదునె, వన్నిమరిన్ నెగెణ్ ఆతాన్ ఇజి బుబ్బు నెస్తాన్. అందెజి వాండ్రు వన్ని కుటుమిదికార్ యేసుజ్ నమ్మితార్.

54 యాకది యేసు యుదయదాన్ గలీలయదు వాతి వెసుక కిత్తి మరి ఉండ్రె బమ్మాతి పణి.

5

1 వెన్కా యూదుర్జి పండొయ్ ఉండ్రె వాతాద్. అందెజి యేసు యెరూసలెమీదు సాహాన్.

2 యెరూసలెం సుటులం తొవ్కా కిటదు గొరెజ్ సాని గోరెజె ఉండ్రె మనాద్. దన్నిడగ్రు ఉండ్రె సెరు మనాద్. దన్ని పేరు ఎబ్రి బానదు బెదెస్త ఇజి. దన్నిజ్ అయేదు అరుబుజ్ సురులం మన్నె.

3-4 అయా అరుబుజు మందెజ్ మందెజ్ కస్టమ్కాణికార్ గూర్త మహార్. గుడ్డిదికార్, సాటాదికార్, కిక్కుకాల్కు అర్తికార్ బాన్ మహార్. ఎస్సివలెనొ ఉండ్రె సుటు దేవుణు దూత ఒరెన్ అయా సెర్దుడు డిగ్గెజి ఏరుదిజ్ కడ్డిసినాన్. అయావలె ఎయెన్ ముజాల ఏరుదు డిగ్గెనాండ్రె, వాండ్రు ఎలాగ మర్రి జబ్బు అతికాన్ ఆతిజిబా నెగెణ్ ఆనాన్. యా కస్టమ్కాణికార్ ఏరు కడ్డిని దన్నిజ్ ఎర్దుసుడెజు మహార్.

5 వరి లోక ఒరెన్ మహాన్. వాండ్రు ముప్పుయెనిమిది పంటజాణిజ్ కస్టమ్దాన్ మహాన్.

6 యేసు వన్నిజ్ సుడతాన్. వాండ్రు నండో పంటజాణిజ్ కస్టమ్దాన్ మనాన్ ఇజ నెస్తాండ్రె, వన్నిజ్, “నీసు నెగెణ్ ఆదెజ్ కోరిజినిదా?” , ఇజ వెనబాతాన్.

7 వెనబాతిజ్ అయా కస్టమ్దికాన్, “బాబు, ఏరు కడ్డిసినివలె నజీ సెరుదు డిషెజ్, ఎయెనబా నజీ సిల్లెన్. నాను డిగ్గెన్ ఇనిజ్, నజీ ఇంక ముజాలా మరి ఒరెన్ డిగ్గెజినాన్”, ఇజ వెహ్హాన్.

8 యేసు వన్నిజ్, “నీసు నిజ్జి నీ సాప అసి నడితా”, ఇజ వెహ్హాన్.

9 వెటనె వాండ్రు నెగెణ్ ఆతండ్రె వన్ని సాప నిక్తాండ్రె నడితాన్. యాక విస్త్రాంతి దినమ్దు జర్జితాద్.

10 అందెజె యూదురు నెగెణ్ అతి వన్నిజ్, “నేండ్రు విస్త్రాంతి దినం గదె. నీసు సాపెజ్ నిక్కి ఒతెజ్ ఆవద్. ఎందనిజ్ ఇహిజ, మోసి సితి రూలుజ్దు వెహ్హినాద్, ఇన్ని పణిబా విస్త్రాంతి దినమ్దు కిదెజ్ ఆవద్ ఇజ”, ఇజ వెహ్హాన్.

11 దన్నిజ్ వాండ్రు, “నజీ నెగెణ్ కితికాన్, ‘నీ సాప నిక్కి నిడితా’, ఇజ నజీ వెహ్హాన్”, ఇహాన్.

12 అందెజె వారు, “నీ సాపెజ్ నిక్కి నడితా ఇజ నిజీ వెహ్హికాన్ ఎయెన్?” , ఇజ వెనబాతాన్.

13 నెగెణ్ కితికాన్ ఎయెన్ ఇజ వన్నిజ్ తెలివెతాద్. ఎందనిజ్ ఇహిజ, అబ్బె మందలోకుర కూడిత మహాన్. యేసు వరి లోకహాన్ తప్పె ఆతండ్రె సాహాన్.

14 వెనుక యేసు వన్నిజ్ దేవుణు గుడిడు సుడతాన్. సుడతండ్రె వన్నిజ్, “సుడతా, నీసు ఏలు నెగెణ్ అతి. ఏలుదాన్ పాపమ్కు కిము. సితిజ నిజీ మరి బాదెజ్ లాపు వానె”, ఇహాన్.

15 వాండ్రు సాహండ్రె వన్నిజ్ నెగెణ్ కితికాన్ యేసు ఇజ యూదురిజ్ వెహ్హాన్.

16 అందెజె యా పణిజ్ యేసు విస్త్రాంతిదినమ్దు కితిజ్ యూదురు వన్నిజ్ నండో మాలెజ్ కిత్తార్.

17 గాని యేసు వరిజ్, “నా బుబ్బు ఎస్తివలెబా నెగ్గి పణిజ్ మహి వరి వందెజ్ కిజినె మంజినాన్. నానుబా కిజినె”, ఇజ వెహ్హాన్.

18 యా లెకెండె యేసు వెహ్హిజ్, యూదురు వన్నిజ్ నప్పెజ్ మరి నండో సుడతార్. ఎందనిజ్ ఇహిజ, వాండ్రు విస్త్రాంతిదినమ్ది రూలుజ్ తప్పికాద్ ఆవండ, దేవుణు వన్ని సొంత బుబ్బు ఇజబా వెహ్హినాన్. అయాలెకెండె, వాండ్రు దేవుణు వెట సమానం అతికాన్ ఇజ వెహె ఆజినాన్. అందెజె యేసుజ్ నప్పెజ్ మరి నండో సుడతార్.

19 యేసు వరిజ్ ఈహు మరెజ వెహ్హాన్. “నాను మిజీ నిజం వెహ్హిన, మరిసి అతి నాను ఇనికబా నా సొంత నత్తుదాన్ కిదెజ్ అటెవెన్. నా బుబ్బు ఇన్ని ఇనికెజ్ కిజినెజ్ సుడతానాన్, అయాలెకె నాను బా కిజిన. బుబ్బు కిజినెకెజ్ మరిసి బా కిజినాన్.

20 ఎందనిజ్ ఇహిజ, అపొసి మరిసిజ్ ప్రేమిస్సాన్. వాండ్రు కిజినెకెజ్ విజు మరిసిజ్ తోరిస్సాన్. వాండ్రు వన్నిజ్ దినిజ్ మిస్తి మరి నండో పెరి పణిజ్ తోరిస్సాన్. అయాలెకె సుడతాజ్ మీరు విజెరి నండో బమ్మ ఆనిదెర్.

21 అప్పొసి ఎలాగ సాతివరిజ్ నిక్కి, వరిజ్ బత్కిసి నాండ్రె అయ లెకెండె, మరిసిబా బత్కిసి నాన్. వన్నిజ్ ఇస్టం మన్ని వరిజ్ బత్కిస్సాన్.

22-23 అప్పొసి ఎయెరిజ్ బా, వారు తీర్పు కివెన్. గాని విజెరిజ్ తీర్పు కిదెజ్ మరిసిజ్ అతికారం విజు ఒపజెప్ప మనాన్. అపొసిజ్ గవరం సీనిలెకెండె విజెరి మరిసిజ్ గవరం సీదెజ్ నె యా అతికారం ఒపజెప్ప మనాన్. మరిసిజ్ గవరం సికాన్ ఎయెనబా, వన్నిజ్ పోక్కి అపొసిజ్ గవరం సివెన్.

24 నాను మిజీ నిజం వెహ్హిన, నా మాట వెంజి, నజీ పోక్కి వన్నిజ్ నమ్మిజినివన్నిజ్ ఎలాకాలం దేవుణు వెట బత్కిని బత్కు మనాద్. వన్నిజ్ నాను తీర్పుసివ. వన్నిజ్ ఎలాకాలం మన్ని సిక్కి సిల్లెద్. గాని వాండ్రు ఎలాకాలం దేవుణు వెట బత్కినాన్.

25 సాతి లెకెండె మనికార్ దేవుణు మరిసి అతి నాను వెహ్హి మాటెజ్ వెని కాలం వాజినాద్. అయాలెకె ఏలునె వాత మనాద్. నా మాటెజ్ వెంజి, అయ లెకెండె కినికార్ బత్కినార్, ఇజ నాను మిజీ నిజమనె వెహ్హిన.

26 ఎందనిజ్ ఇహిజ, నా బుబ్బు బాణిజె బత్కు వానాద్. వాండ్రు విజెరి బత్కిసిని లెకెండె, నాను లోకురిజ్ బత్కిస్సెజ్ నజీ అతికారం సిత మనాన్.

27 మరి లోకురిజ్ తీర్పు సిదెజ్ వాండ్రు నజీ అతికారం సిత మనాన్. ఎందనిజ్ ఇహిజ, నాను లోకు మరసి.

28 దిన్నివందిజ్ బమ్మ ఆమాట్. ఎందానిజ్ ఇహిజ, దూకిదు మనికార్ విజెరె నా మాటెజ్ వెని కాలం ఉండ్రీ వాజినాద్.

29 వారు దూకిదాన్ వెల్లి వానార్. నెగ్గి పణిజ్ కితికార్ నిజ్జె మరి ఎల్లకాలం దేవుణు వెట బత్కినార్. సెఇ పణిజ్ కితికార్ నిజ్జె సిక్కు పొందినార్.

30 నా సొంత సత్తుదాన్ ఇనికబా కిదెజ్ నాను అటవ్. దేవుణు వెహ్తి వజనె నాను తీర్పు సీజిన. అందెజె నాను తీర్పు సీజె సిక్కు సీనిక నాయం ఆత్తిక. ఎందానిజ్ ఇహిజ, నాను నజీ ఇన్టం ఆతి వజ కివ, నజీ పోక్తి వన్నిజ్ ఇన్టం ఆతివజనె కిజిన.

31 నా వందిజ్ నానె వెహ్తిజ, నాను వెహ్తిని వన్కాజ్ పేరు సిల్లెద్.

32 గాని నా వందిజ్ మరి ఒరెన్ సాక్కి వెహ్తినాన్. వాండ్రు నా బుబ్బు. వాండ్రు నా వందిజ్ వెహ్తిని సాక్కి నిజం ఇజ నాను నెసిన.

33 మీరు యోహాను డగ్గు సెగెండారిజ్ పోక్తిదెర్. వాండ్రు నా వందిజ్ నిజమాతి సాక్కి వెహ్తిన

34 లోకురె నా వందిజ్ వెహ్తిని సాక్కి నజీ అవుసరం సిల్లెద్. గాని మీరు యోహాను వెహ్తి మాటెజ్ నమిజి దేవుణు మిజి రక్కిసైజ్, నాను వాండ్రు వెహ్తి దని వందిజ్ వెహ్తిన.

35 ఉండ్రీ దీవ కసి జాయ్ సీజినెలెకెండ్ యోహాను నిజమాతికెజ్ నెన్పిస్తాన్. సెగం కాలం వన్ని మాటెజ్ వెంజి మీరు సర్ద ఆతిదెర్.

36 నాను కిజినె పణిజ్ యోహాను వెహ్తి సాక్కి ఇంక గొప్పు పెరి సాక్కినె. ఎందనిజ్ ఇహిజ, నాను పూర్తి కిదెజ్ బుబ్బు నజీ ఒవజెప్తికెజె నాను కిజినె పణిజ్. అయా పణిజ్ బుబ్బు నజీ పోక్తి మనాన్ ఇజ రుజువ్ కిజినె.

37-38 మరి, నజీ పోక్తి బుబ్బునె నా వందిజ్ నిజమాతికెజ్ వెహ్తినాన్. మీరు వన్నిజ్ ఎసెజ్ బా వెన్ ఇతిదెర్. వన్ని రూపు ఎసెజ్ బా తో ఇతిదెర్. వన్ని మాటెజ్ మీ మన్నుదు ఇడె ఇతిదెర్. ఎందనిజ్ ఇహిజ, వాండ్రు పోక్తి నజీ మీరు నమిఇదెర్.

39-40 మీరు దేవుణు మాట బాగ సర్దవిజనిదెర్. ఎందనిజ్ ఇహిజ, అయాక మిజి ఎలాకాలం దేవుణు వెట బత్కిని బత్తు. సీనాద్ ఇజ ఒడెబిజనిదెర్. అయా మాటెజ్ నా వందిజె వెహ్తినె. గాని దేవుణు వెట ఎలాకాలం బత్కిని బత్తు. వందిజ్ నా డగ్గు రెఇదెర్.

41 లోకురె పొగ్డిజెజినికెజ్ నాను కోరివి.

42 గాని మీరు ఎలాగ మర్తికిదెర్ ఇజ నాను నెన్ను. మీరు దేవుణుదిజ్ నిజం ప్రేమిన్ ఇకిదెర్ ఇజి నాను నెన్ను.

43 నా బుబ్బు సీత్తి అతికారమదాన్ నాను వాత మన్ను. గాని మీరు నజీ డగ్గు కిఇదెర్. మరి ఒరెన్, వన్ని సొంత అతికారమదాన్ వాతిజ, మీరు వన్నిజ్ డగ్గు కినిదెర్.

44 లోకురె పొగ్డిజెదెజ్ ఇజి మీరు కోరిజనిదెర్. ఒరెండ్రె దేవుణు అతికాన్ మిజి పొగ్డిజెదెజ్ మీరు కోరెఇదెర్. మరి మీరు ఎలాగ నజీ నమ్మినిదెర్?

45 నాను బుబ్బు డగ్గు నేరం మోప్పాన్ ఇజి మీరు ఒడెబిమాట్. మీరు ఆస దాన్ ఎద్రు నుడెతి మోసినె మీ మున్ను నేరం మోప్పాన్.

46 మీరు మోసెజ్ నమ్మినికిదెర్, నజీబా నమ్మితార్ మరి. ఎందానిజ్ ఇహిజ, మోసె నా వందిజ్ రాన్త మనాన్.

47 మీరు వాండ్రు రాన్తి మనికెజ్ నమ్మిఇదెర్. మరి ఎలాగ నాను వెహ్తినె నమ్మినిదెర్?''.

6

యేసు అయదు వేయు మొగ్గకొడెరిజ్ బోజనం సీజినాన్

1 దన్నివెనుక యేసు గలిలయ సమదరం డాట్టి అతాహ ఒడ్డుద్ సాహాన్. తిబెరియ సమదరం ఇజిబా ఇనార్.

2 క్కమ్దాన్ మహి వరిజ్ వాండ్రు నెగెణ్ కితి బమ్మ అతి పణిజ లోకురె నుడెతార్. అందెజె మంద లోకురె వన్ని వెట వాతార్.

- 3 యేసు అబెణి గోరోజ్ సెల్కాదు ఎక్రాండ్రె వన్ని సిసూర్ వెట బన్త మహాన్.
- 4 నస్తివలె యూదురు కిని పన్సు ఇని పండోయ్ డగ్రు ఆత మహాద్.
- 5 యేసు కణక పెహ్లా బేస్తిజ్, మంద లోకుర్ వన్ని డగ్రు వాజినిక సుడేతాన్. “వీరు ఉండెజ్ బోజనం ఎలాగ కొండెజ్ ఆనాప్?”, ఇజి పిలిపుజ్ వెన్బాతాన్.
- 6 ఇనిక కిడెజ్ ఇజి యేసు నెస్సాన్ గాని పిలిపుజ్ వన్నిమున్సు నమకం మనాదా ఇజి సుడేదెజె వాండ్రు అయూ లెకెండె వెన్బాతాన్.
- 7 అందెజె పిలిపు, “వరి లోఇ ఒరెన్ ఒరెన్ కండెక్ కండెక్ ఉండెజ్బా రుండి వందెజ్ వెండి రుపాయుజాణి బోజనం కొటిజ్బా సాలేఎద్”, ఇజి వన్నిజ్ వెహ్తాన్.
- 8 అయావలె వన్ని సిసూర్ లోఇ ఒరెన్ ఆతి ఆంద్రెయ ఇనికాన్ యేసుజ్ వెహ్తాన్. వీండ్రు సిమోన్ పేతురుజ్ తంబెర్చి.
- 9 వాండ్రు ఇన్నిక వెహ్తాన్ ఇహిజ, ‘ఇబ్బె ఒరెన్ ఇజ్జె కొణెజ్ మనాన్. వన్నిబాన్ అయ్దు యావల రొట్టెజ్, రుండి మొయెజ్ మనె. గాని నిసా మందదిజ్ యాకెజ్ సాలేఉ”, ఇజి వెహ్తాన్.
- 10 అయావలె యేసు, “యా లోకాజ్ బనె కిదు”, ఇజి వెహ్తాన్. అయా బాడిడు నండో గడ్డి మనాద్. అందెజె మొగ్గకొణెర్ బస్తార్. వారి డగ్రు అయ్దు వెయ్యుజ్ మహార్.
- 11 యేసు అయా రొట్టెజ్ అస్తాండ్రె, దేవుణుదిజ్ వందనమక మెహ్తాండ్రె, బస్తి వరిజ్ సీబాజె సితాన్. అయాలెకెండె మొయెజ్బా. వరిజ్ కావాలస్తి నసా సీబాత సితాన్.
- 12 వారు పొటపంజు తిహి వెనుక, “ఇన్నిక పాడు ఆవిండ, మిగిలితికెజ్ కొటు కిదు”, ఇజి సిసూర్జె వెహ్తాన్.
- 13 అందెజె మిగిలితికెజ్ సిసూర్ కెహ్తార్. లోకుర్ తిహి వెన్యా మన్ని అయ్దు యావల రొట్టెజాణి ముకెజ్ కొటు కితారె, పన్నెండు గప్పెజ్ నిహ్తార్.
- 14 యేసు కిత్తి యా బమ్మాతి పణి సుడేతారె, “నిజమె, లోకమదు వాని ప్రవక్త వీండ్రె”, ఇజి వెహ్తార్.
- 15 యా లోకుర్ వాజి, కెక కెక నజే రాజు కినార్ ఇజి యేసు నెస్తాన్. అందెజె వాండ్రు బాణిజ్ డిస్తాండ్రె ఒరెండ్రె మరి గోరోజ్ సాహాన్.

యేసు సమ్దరం మున్సు నడిజినాన్

- 16-17 పొద్దు ఆతివెలె, వన్నిసిసూర్ డిగితారె, సమ్దరం ఒడ్డుదు వాతార్. అబ్బె వారు ఉండ్రె డోణిదు ఎక్తారె, సమ్దరం డాట్టి, కపర్నహముదు సాండ్రెజ్ ఇజి సోతార్. అయావలె సీకాట్ ఆతాద్. యేసు వరి డగ్రు ఇంక రవిండ మహాన్.
- 18 నస్తివలె వెరి గాలి ఉండ్రె వాతాద్. నందారమ్దు లాపు ఉల్కెజ్ నిజిత్.
- 19 వారు రమారమి మూండ్రె నాల్లి మయలు నడిపిస్తార్. అయావలె యేసు నందారం ఏరు మున్సు నడిజె డోణి డగ్రు వాజినిక సుడేతారె. అయాక సుడేతారె, వారు నండో తియెల్ ఆతార్.
- 20 గాని వాండ్రు, “నానె, తియెల్ అమాట్”, ఇజి వరిజ్ వెహ్తాన్.
- 21 అందెజె వారు వన్నిజ్ డోణిదు ఎకిస్తెజ్ ఇస్టం ఆతార్ గాని వెటనె వారు సాండ్రెజ్ సరి సోతి మన్ని గటుదు అందితార్.
- 22 సిసూరు డోణి ఎక్కి సొని ముజాల నిహి మహి సమ్దరం ఒడ్డుదు మంద లోకుర్ మహార్. మహ్న నాండిజ్ వారు నెస్తార్, అబ్బె ఉండ్రె డోణినె మహాద్. యేసు వన్ని సిసూర్ వెట అయా డోణి ఎక్కి సొనివతాన్. సిసూర్నె ఎక్త సాహార్ ఇజి.
- 23 నస్తివలె, తిబెరియదాన్ మరి డోణిజ్ వాతె. యేసు రొట్టెజ వందెజ్ దేవుణుదిజ్ వందనమక మెహ్తాన్. వెహ్తి వెన్యా లోకుర్ అయాక తిహార్. వారు రొట్టెజ్ తిహి బాడ్డిజ్ డగ్రు అయా డోణిజ్ వాతె.
- 24 యేసుని వన్ని సిసూర్ బాన్ సిల్లెర్ ఇజి మంద నెస్తార్. ఆహా నెస్తివెలె, వారు డోణిజ్ ఎక్తారె, వన్నిజ్ రెబాజె కపర్నహముదు సాహార్.
- 25 వారు యేసుజ్ అతాహ ఒడ్డుదు సుడేతారె, “బోదకినికిదా, నీను ఎన్కాండె ఇబ్బె వాతి?”, ఇజి వన్నిజ్ వెన్బాతార్.
- 26 దన్నిజ్ యేసు వెహ్తాన్, “నాను మీ వెట నిజం వెహ్తాన్, మీరు పొట పంజు రొట్టెజ్ తిహిదెర్. అందెజె మీరు నజే రెబానిదెర్. గాని నాను కితి బమ్మ ఆతి పణి అర్దం నెస్తి వందెజ్ ఆవిద్ రెబాజినిక.

27 పాదాఃజి సాని టిండి వందిజ్ కస్టబడఃమాట్. గాని ఎలాకాలం దేవుణు వెట బత్కిని బత్కు సీని నిజమాతి టిండి వందిజ్ కస్టబడఃదు. లోకు మరిసి అయా టిండి మిజి సీనాన్. ఎందనిజ్ ఇహిజ అయా టిండి సీదెజ్ వన్నిజ్ బుబ్బు అతి దేవుణు అతికారం సిత మనాన్.

28 వారు వన్నిజ్, “మాపు దేవుణు పణికిదెజ్ ఇహిజ, ఇన్నిక కిదెజ్ వెలె?”, ఇజ వెన్ బాతార్.

29 యేసు వరిజ్, “దేవుణు పోక్తి వన్నిమున్కు నమకం ఇడఃజి మంజినికాదె దేవుణు సేవ పణి”, ఇజ వెప్తాన్.

30 అందెజి వారు, “అహిజ, నీను ఇని బమ్మాని పణికినిలె? అయాక నుడఃజి నీ మున్కు నమకం ఇడఃదెజ్ నీను ఇనిక కినిలె?

31 మోసి వెట మహి మా అనిగోగోర్ బీడిమ్ బూమిద్ మన్కు ఇని బోజనం ఉటార్. దేవుణు మాటదు రాస్త మనాద్, ‘వారు ఉండెజ్ దేవుణు మంజిని బాడ్డిదాన్ వాండ్రు బోజనం సితాన్ ఇజ’”, ఇజ వెప్తాన్.

32 అందెజి యేసు వరిజ్ వెప్తాన్, “నాను మిజి నిజం వెప్పిన, దేవుణు మంజిని బాడ్డిదాన్ బోజనం మిజి సితాన్ మోసి అవెన్, గాని నా బుబ్బునె సితాన్. వాండ్రె మిజి దేవుణు మంజిని బాడ్డిదాన్ నిజమాతి బోజనం సీజినికాన్.

33 దేవుణు సీజిని బోజనం ఇన్నిక ఇహిజ, వాండ్రు మంజిని బాడ్డిదాన్ డిఃగితి వాతి, యా లోకమ్ ది లోకురిజ్ ఎలాకాలం దేవుణు వెట బత్కిని బత్కు సీజినికాన్.”

34 అహిజ, ప్రబువా, యా బోజనం ఎలాకాలం మజి సీజి మన్ అ”, ఇజ వారు వన్నిజ్ వెప్తార్.

35 అందెజి యేసు వరిజ్ ఈహు వెప్తాన్, “ఎలాకాలం దేవుణు వెట బత్కిదెజ్ లోకురిజ్ బత్కినిపిస్సి టిండి నాన్. నా డగ్రు వాజినికాన్ ఎనిజ్ బా బజ సావెన్, నజి నమ్మినికాన్ ఎనిజ్ బా ఏప్పి సావెన్.

36 నాను మిజి వెప్తా లెకెండ్, మీరు నజి నుడఃతి మనిదెర్, గాని నజి నమిఇదెర్.

37 బుబ్బు నజి ఒవజెప్తి లోకుర్ విజెర్ నా డగ్రు వానార్. నా డగ్రు వాని ఎయెరిజ్ బా నాను వెల్లె నెక్కి పోక్మ్.

38 ఎందానిజ్ ఇహిజ, నాను నజి ఇన్టం వాతి లెకెండ్ కిదెజ్ అవద్, దేవుణు మంజిని బాడ్డిదాన్ డిఃగితి వాతిక. గాని నజి పోక్తి వన్నిజ్ ఇన్టం వాతి లెకెండ్ కిదెజ్ డిగిత వాత్.

39 నజి పోక్తి దేవుణు, నా బాణిజ్ ఇన్నిక కోరిజనాన్ ఇహిజ, వాండ్రు నజి ఒవజెప్తి పరి లోఇ ఎయెరిజ్ బా నాను డిఃసెజ్ అవద్. గాని వరిజ్ నాను మరి వాని కడఃవెరి దినమ్ దు ఎలాకాలం బత్కిన్జెజి. యాకదె వాండ్రు నా బాణిజ్ కోరిజనాన్.

40 నా బుబ్బు కోరిజనిక ఇన్నిక ఇహిజ, నాను దేవుణు మరిసి ఇజ నెసి నజి నమ్మిని ఎయెరిజ్ బా ఎలాకాలం దేవుణు వెట బత్కిని బత్కు మండ్రెజ్ ఇజ. మరి నాను మరిజి వానివలె నాను వరిజ్ సావుదాన్ బత్కిన్జెజి ఇజ. యాకదె నా బుబ్బు నా బాణిజ్ కోరిజనాన్.

41 యూదురు యేసువందిజ్ మొరో ఆతార్. దేవుణు మంజిని బాడ్డిదాన్ డిఃగితి వాతి టిండి నాన్, ఇజ వాండ్రు వెప్తాన్. దిని వందిజ్ వారు మొరో ఆతార్.

42 వారు, “వీండ్రు యోసేపు మరిన్ అతి యేసు గదె? విని అయిసి అప్పానిరిజ్ మాటు నెన్నాట్ గదె? మరి ‘నాను దేవుణు మంజిని బాడ్డిదాన్ డిఃగిత వాత్’, ఇజ వీండ్రు ఎలాగ వెప్పినాన్”, ఇజ పర్గెనార్.

43 అందెజి యేసు, “మీ లోఇ మీరు మొరో ఆమాట్.

44 నజి పోక్తి బుబ్బు ఎయెరిజ్ బా నా డగ్రు నడిపెన్ ఒండ మహిజ, వారు నా డగ్రు వాదెజ్ అట్ వెర్. నాను వన్నిజ్ కడఃవెరి దినమ్ దు నాను వానివలె సావుదాన్ బత్కిన్జెజి.

45 ప్రవక్తరు దేవుణు మాటదు ముజాలె రాస్త మనాద్, ‘దేవుణునె లోకురిజ్ విజెరిజ్ నెన్ పిస్సాన్’, ఇజ. బుబ్బు వెప్తి మాట వెంజి, అయాకెజ్ వన్ని బాణిజ్ నెస్తికార్ నాడగ్రు వానార్.

46 దేవుణు బాణిజ్ వాతికాన్ ఆవండ మరి ఎయెన్ బా బుబ్బెజ్ తోవన్. వాండ్రు ఒరిండ్రె బుబ్బెజ్ నుడఃత మనాన్.

47 నాను మీ వెట నిజమ్ నెప్పిన, నా మున్కు నమకం ఇడ్డివన్నిజ్ ఎలాకాలం దేవుణు వెట బత్కిని బత్కు మనాద్.

48 ఎలాకాలం దేవుణు వెట బత్కిదెజ్ లోకురిజ్ బత్కినిపిస్సి టిండి నాన్.

49 మీ అనిరు బీడిమ్బూమిదు మన్న ఇన్ని బోజనం ఉటార్. గాని వారు సాతార్.

50 గాని యా టిండి ఎయెర్ ఉటిజ్బా వారు సావర్. సాఇ నని టిండిన దేవుణు మంజని బాడ్డిదాన్ డిగితి వాతిక.

51 నాన దేవుణు మంజని బాడ్డిదాన్ డిగితి వాతి ఎలాకాలం దేవుణు వెట బత్కిని బత్కు సీని టిండి. ఎయెన్బా యా టిండి తిహిజ, వాండ్రు ఎలాకాలం బత్కినాన్. నా సొంత ఒడోల్ నాను సీని టిండి. యా లోకమ్దికార్ ఎలాకాలం బత్కిదెజె నాను అయక సీజన”.

52 యేసు వెహ్తా వెహరె, అయావలె యూదురు వారె వరి లొఇ ఉండ్రీ గొడబె రేజీతాద్. “ఏని ఒడోల్ లెలాగ మాటు తిండ్రెజ్ మజీ సీనాన్”, ఇజి వర్గితార్.

53 అందెజె యేసు వరిజ్ వెహ్తాన్, “నిజమె నాను మీ వెట వెహ్తాన్, లోకుమరిసి ఆతి నా ఒడోల్ మీరు తిన్ఎండ మహిజ, నా నల మీరు ఉణెఎండ మహిజ, మీరు ఎలాకాలం బత్కిఇదెర్.

54 నా ఒడోల్ తిని ఎయెరిజ్బా, నా నల ఉణి ఎయెరిజ్బా ఎలాకాలం దేవుణు వెట బత్కిని బత్కు మనాద్. నాను వన్నిజ్ కడెవెరి దిన్మదు నాను వానివలె సాపుదాన్ ఎలాకాలం బత్కిస్నాలె.

55 ఎందానిజ్ ఇహిజ, నా ఒడోల్, నా నల యాకెజె తిండ్రెజ్ ఉండెజ్ మనికెజ్. యాకెజె నిజమాటి టిండి.

56 నా ఒడోల్ తినికాన్, నా నల ఉణికాన్, నా వెట కూడోజి మంజినాన్. నాను వన్ని వెట కూడోజి మంజిన.

57 లోకురె విజెరిజ్ బత్కిదెజ్ పాణం సీజని బుబ్బు నజీ పోక్త మనాన్. వాండ్రు నజీ బత్కు సీజినాన్. అయాలెకెండె ఎయెన్బా నా ఒడోల్ తిహిజ, నాను వన్నిజ్ ఎలాకాలం దేవుణు వెట బత్కిని బత్కు సీన్.

58 నాన దేవుణు మంజని బాడ్డిదాన్ డిగితి వాతి టిండి. మీ అనిరిజ్ ఉటి మన్న ఇన్ని బోజనంలెకెండె అవెద్ యాక. వారు ఉటార్ సాతార్. గాని యా టిండి తినికాన్ ఎయెన్బా ఎలాకాలం బత్కినాన్.

59 కవెర్నహముదు మన్ని యూదురి మీటిజ్ ఇండ్రె నేరెపిసి మహివలె వాండ్రు యా మాటిజ్ వెహ్తాన్.

60 వన్ని సినూర్ సంఠెండార్ యా మాటిజ్ వెహరె, “యా మాటిజ్ గొప్ప కష్టం ఆతికెజ్. ఎయెన్దనిజ్ అర్థం కినాన్?”, ఇజి వర్గితార్.

61 వన్ని మాటిజి వందిజ్ వన్ని సినూర్ మొరొ అజినార్ ఇజి యేసు నెస్సాండ్రె వరిజ్, “యా మాటిజ్ మిజీ బాద కిజినెనా?”, ఇజి వెన్బాతాన్.

62 “అహిజ, లోకు మరిసి ఆతి నాను, ముజాల నాను మహి బాడిడు ఎక్కి సొనిక మీరు నూణివలె, మీరు ఇన్నిక ఒడోబినిదెరో?

63 దేవుణు ఆత్మనె, ఎలాకాలం దేవుణు వెట బత్కిని బత్కు సీజినాన్. లోకురె అయక సీదెజ్ అట్ఎర్. నాను మిజీ వెహ్తాన్ మాటిజ్వెట, దేవుణు ఆత్మ మీ మున్ను వాజినాన్. దేవుణు ఆత్మ మిజీ బత్కు సీజినాన్”, ఇజి వెహ్తాన్.

64 “గాని మీ లొఇ నెగెండార్ నాను వెహ్తా మాటిజ్ నమ్మిఇకార్ మనార్”. సినూర్ లొఇ ఎయెన్ వాండ్రు వెహ్తా మాటిజ్ నమ్మివర్, ఎయెన్ వన్నిజ్ ఒపజెహ్సాన్ ఇజి యేసు మొదోహనె నెస్స మహాన్. అందెజె వాండ్రు ఆహె వెహ్తాన్.

65 యేసు మరి వెహ్తానాన్, “మీ లొఇ నెగెండార్ నమ్మిఇదెర్. అందెజె నాను మీ వెట వెహ్తా మన్ను బుబ్బు సరి సిఎండ మహిజ, ఎయెన్బా నా డగ్రు వాదెజ్ అట్ఎన్”, ఇజి.

66 దిన్ని వెనుక, వన్ని సినూర్ లొఇ సంఠెండార్ వన్నిజ్ డిస్తారె వన్నివెట మరి సొన్ఎతార్.

67 నస్సెవలె యేసు పన్నెండ మణిసి సినూరిజ్, “మీరు బా నజీ డిసి సొండ్రెజ్ కోరిజినిదెరా?”, ఇజి వెన్బాతాన్.

68 అందెజె సిమోన్ పేతురు, “ప్రబువా, ఎయెర్బాన్ మాపు సొండ్రెజ్? నీ మాటిజ్నె ఎలాకాలం దేవుణు వెట బత్కిని బత్కు వందిజ్ వెహ్తాన్.

69 మాపు ఏలు నమ్మిజినావ్, మాపు నెస్సావ్, నీనె దేవుణు బాణిజ్ వాతికాన్ ఇజి”, ఇజి వెహ్తాన్.

70 అందెజె యేసు, మిజీ పన్నెండ మణిసి సినూరిజ్ ఏర్పాటు కితిక నానె గదె. గాని మీ లొఇ ఒరెన్, నయ్హానుజ్ మన్ని బుద్ది ననికాన్ మనాన్”, ఇజి వెహ్తాన్.

71 వాండ్రు ఇస్కరియోతు సిమోన్ మరిసి యూద వందిజ్ వెహ్తాన్. యూద సిసూర్ లోఇ ఒరెన్ ఆతిజ్ బా వాండ్రు యేసుజ్ వెన్కా ఒపజిప్పాన్లె.

7

యేసు తంబెర్సిర్ వన్నిజ్ నమ్మివర్

1 వెనుక, యేసు గలీలయ దేసమ్దున మంజి నాహ్కజ్ బూలాజి మహాన్. వాండ్రు యూదయ దేసమ్దు ముండ్రెజ్ కెపితాన్. ఎందానిజ్ ఇహిజ, యూదురు వన్నిజ్ నవ్తజ్ సుడేజి మహార.

2 నస్తివలె, యూదురి ఉండ్రీ పండోయ్ డగ్గు ఆతాద్. అయా పండోయ్ పేరునె గుడుస పండోయ్* ఇజి.

3 పండోయ్ డగ్గు ఆతిజ్, యేసు తంబెర్సిర్ వన్నిజ్, “ఇబ్బెణిజ్ నీసు యూదయ దేసమ్దు సొన్ఆ. ఎందానిజ్ ఇహిజ, నీ సిసూర్ ఆతికారో నీసు కిజిని బమ్మ ఆతి వణిజ్ సుడేదిజ్”, ఇజి వెహ్తాన్.

4 “పెరికాన్ ఆదిజ్ కోరిజినికాన్ ఎయెన్బా డాప్పి వన్ని పణి కిఎన్. విజెరె ఎద్దునె కిసాన్. నీసు యా బమ్మాని పణిజ్ కిజిని ఇహిజ, నిజి నీనె లోకమ్ది లోకుర్ ఎద్దు తోరె ఆదిజ్ మరి. యా గలీలయదికారో ఉండ్రె ఆవండ”, ఇజి వెహ్తాన్.

5 వన్ని తంబెర్సిర్బా వన్నిజ్ నమిఎతార.

6 అందెజి యేసు వరిజ్, “నాను పండోయిదిజ్ సొండ్రెజ్ నమయం ఇంక రవిదె. గాని మిజి ఎస్తివలెబా సొండ్రెజ్ ఆనాద్.

7 యా లోకమ్దు మన్ని దేవుణుదిజ్ దూసిస్సికారో మిజి దూసిన్ఎర్. ఎందానిజ్ ఇహిజ, మీరు బా వరి వెట మనిదెర్. గాని వారు నజి దూసిస్సారె. ఎందానిజ్ ఇహిజ, వారు నెఇకెజ్ కిజినారో ఇజి నాను వెప్పాన్.

8 మీరు పండోయిదిజ్ సొండ్రు. నాను ఏలు సొన్వి. ఎందానిజ్ ఇహిజ, నాను సొండ్రెజ్ నమయం పూర్తి రవిదె”, ఇజి వెహ్తాన్.

9 యాక వెహ్తాండ్రె వాండ్రు గలీలయదు మహాన్.

యేసు గుడుజన పండోయిదిజ్ సొన్సినాన్

10 వన్ని తంబెర్సిర్ పండోయిదిజ్ సొహి వెన్కా, వాండ్రు బా సొహాన్. లోకుర్ విజెరె వన్నిజ్ నెన్ఇ లెకెండ్ వాండ్రు డాజిజి సొహాన్.

11 గాని పండోయ్దు, యూదురు వన్నిజ్ రెబాజి, “అయా వాండ్రు ఒంబోపిన్”, ఇజి వెన్బాజి మహార.

12 లోకుర్ లోఇ వన్ని వందిజ్ నండో మొరొ ఆతార. నెగొండారో వాండ్రు నెగ్గికాన్ ఇజి, మరి నెగొండార, నిల్లె వాండ్రు లోకురిజ్ మొసెం కిజినికాన్ ఇజి మొరొ ఆతార.

13 గాని యూదురిజ్ తియెలాజి, ఎయెర్బా వన్ని వందిజ్ డటం వెహ్ఎతార.

యేసు పండోయ్దు నెన్పిస్సాన్

14 పండోయి దినమ్కు నెగం ఆతాద్. అయావలె వాండ్రు దేవుణు గుడిది అరుజుదు సొహండ్రె అబె మన్ని లోకురిజ్ నెర్పినిసాన్.

15 అందెజి యూదురు నండో బమ్మ ఆతారె, “వీండ్రు బడిడు సొన్పి నద్విఇతికాన్ గదె? మరి ఎలాగ వీండ్రు నిసా నెన్ మనాన్?”, ఇజి వర్గితార.

16 నస్తివలె యేసు వెహ్తాన్, “నాను నేర్పిస్సి మాట నా సొంత మాట ఆవద్. గాని అయాక నజి పొక్తి వన్ని బాజిజ్ వాజినాద్.

17 దేవుణు ఇస్టం కిదిజ్ కోరిజినికాన్ ఎయెన్బా, నాను నేర్పిస్సి మాట దేవుణు బాజిజ్ వాజినాద్, నా సొంత ఆతికారం దాన్ నాను నేర్పిస్సినికాద్ ఇజి నెస్సాన్.

18 సొంత ఆతికారమ్దాన్ నెన్పిస్సినికాన్ ఎయెన్బా వన్నిజ్ గవరం వాదిజె నెన్పిస్సాన్. గాని వన్నిజ్ పొక్తి వన్నిజ్ గవరం వాదిజ్ ఇజి కోరిజినికాన్ నిజామాతికాన్. వన్ని లోఇ ఇనితప్పబా సిల్లెద్.

* 7:2 7:2 అయా పండోయ్ కాలమ్దు లొడ్బాణిజ్ గుడిన తొప్పొరిబానె మంజనార. వరి అన్నిసెర్ ఇన్యెలు లోకుర్ నలపయ్ పంజిజ్ పయన్ కిజి మహివలె గుడుజసాదు మహిదన్నివందిజ్ ఎత్తుకిజి యూదురు యా పండోయ్ కిజినార.

19 దేవుణు మోసెజ్ సిత్తి రూలుజ్ వాండ్రు మిజి సితాన్ గదె? గాని మీ లోజు ఒరెన్బా ఆ రూలుజు వజ నడఁజెదెర్. మీరు ఎందానిజ్ నజి సప్తజ్ నుడఁజెనిదెర్?” ఇజ వెప్తాన్.

20 అయావలె మందలోకుర్, “నిజి దెయం అస్తాద్. ఎయెర్ నిజి సప్తజ్ నుడఁజెనార్?” ఇజ మర్జి వెప్తాన్.

21 యేసు వరిజ్ వెప్తాన్, “నాను బమ్మాతి ఉండ్రీ పణి కిత. మీరు విజెదెర్ నండో బమ్మ అతిదెర్.

22 మీరు సునతి కిడెజ్ ఇజి మోసె మిజి రూలు సిత మనాన్. అందెజె మీరు కొడోదిజ్ విస్త్రాంతి దినమదు సునతి కిజెనిదెర్. నుడఁదు, మోసె అవన్ సునతి మొదోల్స్తికాన్, మీ అనిర్నె అయాక మొదోల్స్తార్.

23 విస్త్రాంతిదినమదు ఒరెన్ కొడోదిజ్ సునతి కిజెనిదెర్. ఎందానిజ్ ఇహొజ, మోసెజ్ దేవుణు సిత్తి రూలుజ్ తప్పెజ్ అవదెజె. అహొజ, నాను ఒరెన్ లోకుదిజ్ విస్త్రాంతి దినమదు పూర్తి నెగెజ్ కితి వందిజ్ మీరు ఎందానిజ్నా ముస్సు కోపం ఆజెనిదెర్?

24 మీరు ముస్సు తోర్జెని దన్నివందిజ్ నుడఁజె తీర్పు కిమాట్. గాని నిజమాతికెజ్ నుడఁజె తీర్పు కిదు.

యేసు నిజం క్రీస్తునా ఇజి వెన్బాజెనార్

25 నస్తవలె సెగొండార్ యెరుసలెమ్దికార్, “వినిజె గదె అతికారిజు సప్తజ్ నుడఁజెనార్.

26 ఇవెలోన్ వీండ్రు దయెరమ్దాన్ విజెర్ ఎద్రు వర్గిజెనాన్. గాని వారు వన్నిజ్ ఇనికబా ఇన్ఎర్. వీండ్రు క్రీస్తు ఇజి అతికారిజు నిజమె ఒప్పకొటారా?

27 క్రీస్తు వానివలె, వాండ్రు ఎమేణికాన్ ఇజి ఎయెర్బా నెన్ఎర్. గాని వీండ్రు ఎంబెణికాన్ ఇజి మాపు నెస్సామ్”, ఇజి వర్గితార్.

28-29 అందెజె యేసు గుడిజె అరుజుదు నేర్పిసి మహివలె, ఈహు డటం వెప్తాన్. “నాను ఎయెన్, ఎమేణికాన్ ఇజి మీరు నిజం నెస్సిదెరా? నాను నా సొంత ఇస్టందాన్ వాతికాన్ అవ. గాని నజి పోక్తాన్ ఒరెన్ మనాన్. వాండ్రు నిజమాతి దేవుణు. మీరు వన్నిజ్ నెన్ఇదెర్. గాని నాను వన్నిజ్ నెన్ను. ఎందనిజ్ ఇహొజ, నాను వన్ని బాణిజ్ వాత మన్ను. వాండ్రె నజి పోక్తాన్”, ఇజి.

30 యాకెజ్ వెహారె, వారు వన్నిజ్ అస్టెజ్ నుడఁజెతార్. గాని ఎయెన్బా వన్నిజ్ అన్ఎతార్. ఎందానిజ్ ఇహొజ, వాండ్రు అస్టెజ్ దేవుణు ఏర్పాటు కితి సమయం రెవెదె.

31 అహొజ్బా లోకుర్ లోజు నండొండార్ వన్ని ముస్సు నమకం ఇట్టార్. వారు, “వీండ్రు నండో బమ్మాని పణిజ్ కిత్తాన్. లోకురిజ్ రక్సిస్తెజ్ దేవుణు ఏర్పాటు కితి పోక్తి క్రీస్తు వానివలె, విని ముస్సు మరి నండో బమ్మాని పణిజ్ వాండ్రు కినాండ్రా?”, ఇజి వెప్తాన్.

32 లోకుర్ యేసు వందిజ్ అయాకెజ్ మొరొ ఆజెనికెజ్ పరిసయిరు వెహార్. నస్తవలె పెరి పుజెరిజు ని పరిసయిరు వన్నిజ్ తోప్పి ఒతెజ్ దేవుణు గుడిజెది జమాన్జ పోక్తార్.

33 అందెజె యేసు, “నాను మీ వెటె సెగం కాలమెన్ మంజెని. వెన్కా నాను నజి పోక్తి వన్ని డగ్రు సొన్సిన.

34 మీరు నజి రెబానిదెర్. గాని తొఇదెర్. నాను మన్ని బాన్ మీరు వాదెజ్ అట్ఇదెర్”, ఇజి వెప్తాన్.

35-36 నస్తవలె యూదురు అతికారుజు, ఒరెన్వెటె ఒరెన్, “వీండ్రు మజి తోర్ఎండ ఎంబె సొండ్రెజ్ నుడఁజెనాన్? వాండ్రు, సెగొండార్ యూదురు మా బాణిజ్ నెద్రెజి బత్తుజెని గ్రెకు పట్టుమ్కాజ్ సొనాండ్రా? వాండ్రు యూదురు ఆజె వరిజ్ నేర్పిస్తాండ్రా? వాండ్రు వెప్పానాన్, “మీరు నజి రెబానిదెర్. గాని తొఇదెర్. నాను మన్ని బాన్ మీరు వాదెజ్ అట్ఇదెర్” ఇజి. ఎందానిజ్ వాండ్రు ఆహొ వెప్పానాన్?”, ఇజి వర్గితార్.

37 పండోయ కడెవెరి రోజు వాతాద్. కడెవెరి రోజునె ముకెలమాతి దినం. అయా నాండెజ్ యేసు నిహండ్రె ఈహు డటం వెప్తాన్. “విప్పి కట్టికాన్ ఎయెన్బా నా డగ్రు రత. నాను వన్నిజ్ ఉండెజ్ సీన్.

38 దేవుణు మాటదు వెప్తివజ, “నా ముస్సు నమకం ఇడ్డి ఎయెర్ గర్బం దాన్బా, నిజమాతి బత్తు సీని ఏరు సోని సొనెలె. అయాక ఉండ్రీ ఉటె సోని సొని లెకెండె సొనెలె.

39 ఇబ్బె యేసు నిజమాతి బత్తు సీని ఏరు ఇజి వెప్తిక దేవుణు ఆత్మ వందిజె. యా దేవుణు ఆత్మ, యేసు ముస్సు నమకం ఇడ్డి వరిజ్, యేసుజ్ దేవుణు మంజెని బాడిడు ఒతి వెన్కా దోహొక్తాన్లె. గాని యేసు యాక వెప్తివలె, దేవుణు వన్ని ఆత్మ వన్నిజ్ నమ్మితి వరిజ్ సివండ్రె. ఎందానిజ్ ఇహొజ, దేవుణు యేసుజ్ వన్ని వెటె వన్ని గొప్ప జాయదు మండ్రెజ్ దేవుణు మంజెని బాడిడు ఒవిండ్రె.

40 వన్ని మాటజ్ వెహారె, లోకుర్ లోఇ నెగొండార్, “నిజమె, వీండ్రె మాపు ఎద్రు సుడజ్జిజి మహి ప్రవక్త”, ఇజి వెహార్.

41 మరి నెగొండార్, “సిల్లె వీండ్రె క్రీస్తు”, ఇహార్. గాని నెగొండార్, “క్రీస్తు ఎలాగ గలీలయదాన్ వానాన్?

42 క్రీస్తు దావీదు రాజు కుటుమ్దాన్, దావీదు బత్తిజి మహి పట్టుమాతి బెల్లెహామ్దాన్ వానాన్, ఇజి దేవుణు మాటదు మనాద్ గదె”, ఇహార్.

43 ఆహె వన్ని వందిజ్ లోకుర్ ఎర్లితార్.

44 నెగొండార్ వన్నిజ్ అస్తాజ్ కోరితార్. గాని ఎయెర్బా వన్నిజ్ అన్ఎతార్.

45 అందెజి యేసుజ్ అస్తాజ్ వాతి దేవుణు గుడిడి జమానుజు మర్జి పెరి పుజెరిజి ని పరిసయురుజు బాన్ సాహార్. వారు జమాన్జ, “మీరు ఎందానిజ్ వన్నిజ్ అసి తెఇదెర్?”, ఇజి వెన్బాతార్.

46 దన్నిజ్ వారు, “వీండ్రు వెహ్తి మాటజ్ లెకెండ్ ఎయెర్బా ఎనెజ్బా వెహ్ఎర్”, ఇహార్.

47 పరిసయురుజు, “మీరు బా మొసం ఆత్తిదెరా?

48 అతికారిజి లోఇనో పరిసయురుజు లోఇనో ఎయెర్బా వన్నిజ్ నమితాండ్రా?

49 గాని యా మంద లోకుర్ దేవుణు మోసెజ్ సిత్తి రూలుజ్ నెన్ఎర్. అందెజి వరిజ్ దేవుణు సాయెజ్ సీనాన్”, ఇజి వెహార్.

50 నికొడిమెన్ ఇనికాన్ ఒరెన్ ముజాల యేసు డగ్రు సాహ మహాన్. వాండ్రు పరిసయురుజు లోఇ మన్నికాన్.

51 నన్వివలె నికొడెము, “మా యూదురి రూలుజు వజు, ఒరెన్ వాండ్రు వెహ్నినికెజ్ మాపు ముజాల వెంజి, వాండ్రు కితికెజ్ నెన్సి వెన్కనె వన్ని ముస్సు తీర్పు కిడెజ్ ఆనాద్”, ఇజి వెహ్హాన్.

52 అందెజి వారు, “నీను బా గలీలయదాన్ వాతికాండ్రా? నీను దేవుణు మాట బాగ నద్విఅ. ఒరెన్ ప్రవక్తబా గలీలయదాన్ సోపిన్, ఇజి నీను నన్వివలె నెన్సిలె”, ఇజి వెహ్హార్.

53 వెనుక వారు విజెరి పరిపరి ఇల్కాజ్ సాహార్.

8

రంకు బూలాజి మహి బోదెల్దిజ్ యేసుడగ్రు తసినార్

1 గాని యేసు ఒలివ గొరోత్* సాహాన్.

2 జాయ్ అతివెలె మరి వాండ్రు దేవుణు గుడిడి అరుజుదు వాతాన్. లోకుర్ విజెరి వాజి వన్నిడగ్రు కూడితార్. వాండ్రు బస్తాండ్రె వరిజ్ నెన్పిసినాన్.

3-4 నన్వివలె పరిసయురుని యూదురి రూలుజ్ నెస్సిస్తికార్ ఉండ్రీ బోదెల్దిజ్ తతార్. అది, రంకు బూలాజి మహివలె వారు దన్నిజ్ అస్తార్. వారు దన్నిజ్ మంద ఎద్రు నిల్వారె యేసుజ్, “బోదకినికీదా, యా బోదెల్ రంకు బూలాజి మహివలె, మాపు అస్తావ్.

5 మోసె మజి రూలు సితివెలె మజి ఆడ్ర వెహ్హాన్, “ఆహె బూలాని వన్కాజ్ పణకాణిజ్ డెయిజి నప్తెజ్” ఇజి. గాని నీను ఇనిక వెహ్నిని”, ఇజి వెన్బాతార్.

6 వన్ని ముస్సు, నేరం మోప్తెజ్ ఇజి వన్నిజ్సికుదు అర్పెజ్ అహు వెన్బాతార్. గాని యేసువజితాండ్రె బూమిదు వన్ని డెఱ్ఱుదాన్రాసి మహాన్.

7 వారు మరిమరి వెన్బాజి మహిజ్, వాండ్రు బుర్ పెహ్తాండ్రె వరిజ్, “మీ లోఇ సాపం కికాన్ ముజాల దన్నిజ్ పణకుదాన్ డెయేదు”, ఇజి వెహ్హాన్.

8 వెహ్తాండ్రె వాండ్రు మరి వజిజి, బూమిదు రాసి మహాన్.

9 గాని వారు యా మాటజ్ వెహారె, ఒరెన్ వెన్కా ఒరెన్ డిక్స సాహార్. ముజాలె పెరికార్ సాహార్. వెన్కా ఇజ్జికార్. ఆహె విజెరి సాహార్. యేసుని అయా బోదెల్ని బాన్ మహార్. అది నిహిమహిబానె మహాద్.

10 యేసు బుర్ పెహ్తాండ్రె, దనిజ్, “వారు ఎంబె మనార్? ఎయెర్బా, నిజి తీర్పు సిజి సిక్కు సిఎరా?”, ఇజి వెన్బాతాన్.

* 8:1-8:1 అయా గొరోత్ ఒలివ మరిక్ నంజొ ముస్సె అందెజి ఒలివ గొరోన్ ఇనార్

11 “సిల్వే బాబు”, ఇహోద్ అది. అందెజె యేసు, “అహిజ, నానుబా, నిజీ తీర్పు సీజి సిక్స సివ. సాన్ అ. వలుదాన్ మరి పాపం కిమా”, ఇహోన్.

యేసు లోకమది లోకురిజ్ జాయ్

12 మరి, యేసు లోకురిజ్ వెప్పొనాన్, “నానె లోకమది లోకురిజ్ జాయ్. నా సిసూ ఆనికాన్ ఎయెన్ బా సీకటుదు మన్ ఎన్. గాని వన్నిజ్ బత్తు నీని జాయ్ మంజినాద్’.

13 నస్తవలె పరిసయరు వన్నిజ్, “నీనె నీ వందిజ్ సాక్సి వెప్పొని, మరి ఎయెర్ బా అయాక నిజం ఇజి వెహ్ ఎండ. అందెజె నీ సాక్సమదిజ్ నిజం సిల్లెద్”, ఇజి వెప్టార్.

14 అందెజె యేసు వెప్టార్, “నానె నా వందిజ్ సాక్సి వెప్పొన. అహిజ్ బా నాను వెప్టి సాక్సి నిజమనె. ఎందానిజ్ ఇహిజ, నాను ఎమెణాజ్ వాత, ఎంబె సాన్ సిస ఇజి నాను నెన్పు. గాని మీరు నెన్ ఇదెర్ నాను ఎమెణాజ్ వాత ఎంబె సాన్ సిస ఇజి.

15 మీరు లోకుర్ సుడెజినికెజ్ సుడెజి తీర్పు సీజినిదెర్. గాని నాను అయాలెకెండె ఎయెర్ బా తీర్పు సివ.

16 నాను తీర్పు సిజిజ్ బా నాను సిత్తి తీర్పు నిజమనె. ఎందానిజ్ ఇహిజ, నాను ఒరెనె ఆవ తీర్పు సీజిన. నజీ పోక్తి బుబ్బు నా వెట మనాన్.

17 దేవుణు మోసెజ్ సిత్తి మీ రూలుజ్ దు రాస్త మనాద్, ‘రివీర్ వెప్పొని సాని ఉండ్రె లెకెండె మహిజ, అయూక నిజం ఇజి’.

18 నానె నా వందిజ్ సాక్సి వెప్పొన. మరి నజీ పోక్తి నా బుబ్బు బా నా వందిజ్ సాని వెప్పొనాన్”.

19 నస్తవలె వారు వన్నిజ్, “ఎంబె నీ బుబ్బు మనాన్?”, ఇజి వెన్ బాతార్. దన్నిజ్ యేసు”, మీరు నజీ నెన్ ఇదెర్. నా బుబ్బెజ్ నెన్ ఇదెర్. మీరు నజీ నెస్సికిహిజ, నా బుబ్బెజ్ బా నెస్సిదెర్ మరి”, ఇజి వెప్టార్.

20 వాండ్రు యా మాటిజ్ దేవుణు గుడిజుదు సంత ఆర్ ప్పి పెటిజ్ ఇడ్పిబాన్ మంజి నెన్ పిసి మహిపలె వెప్టార్. గాని ఎయెన్ బా వన్నిజ్ అన్ ఏతార్. ఎందానిజ్ ఇహిజ, వన్నిజ్ అస్తజ్ దేవుణు ఎత్తు కిత్తి నమయం రెవెద్.

21 మరి యేసు వరిజ్, “నాను సానాలె. మీరు నజీ రెబానిదెర్. మీరు పాపమకు కిజి మంజినె సానిదెర్. నాను సాని బాడిజుదు మీరు వాదెజ్ అట్ ఇదెర్”, ఇజి వెప్టార్.

22 అందెజె యూదురు ఒరెన్ వెట ఒరెన్, “వన్నిజ్ వాండ్రె నపె ఆనాండ్రా? వాండ్రు వెప్పొనాన్ గదె నాను సాని బాడిజుదు మీరు వాదెజ్ అట్ ఇదెర్ ఇజి’, ఇజి వర్గితార్.

23 యేసు వరిజ్ ఈహు వెప్టార్: “మీరు ఇబ్బె యా లోకమదికిదెర్. గాని నాను మున్పు దేవుణు మంజినె బాడిదికాన్. మీరు యా లోకమదికిదెర్. నాను ఇబ్బెణికాన్ ఆవ.

24 నాను మిజీ వెప్టా వన్ను మీరు పాపం కిజి మంజినె సానిదెర్ ఇజి. నాను ఎయెన్ ఇజి వెప్పొనానో, నానె వాండ్రు ఇజి మీరు నమ్మిఎండ మహిజ, మీరు నిజమనె పాపమదు మంజినె సానిదెర్”.

25 వారు వన్నిజ్, “నీను ఎయెన్?”, ఇజి వెన్ బాతార్. ‘నాను ఎయెన్ ఇజి మొదోహానె వెప్టా మనానో, నానె వాండ్రు’, ఇహోన్.

26 యేసు మరి వెప్టార్ “మీ వందిజ్ నండె వెహెజ్ నజీ మనాద్. మీ మున్పు, నండె తీర్పుజ్ బా మనాద్. గాని నజీ పోక్తాన్ నిజామాతికాన్. వాండ్రు నజీ వెప్టి నజితిజ్ నెనాను లోకమది లోకురిజ్ వెప్పొన.

27 వాండ్రు దేవుణు మంజినె బాడిజుదు మన్ని వన్ని బుబ్బు వందిజె వరిజ్ వెప్పొనాన్ ఇజి వారు అర్థం కివతార్.

28 అందెజె యేసు వరిజ్, “మీరు లోకు మరిసి ఆతి నజీ సిలువాదు సప్పివెలె, మీరు నస్సిదెర్, నాను ఎయెన్ ఇజి. మరి, నాను నా సొంత అతికారం దాన్ ఇనికబా కివ. గాని నా బుబ్బు నజీ నెన్ పిస్తివజనె నాను వెప్పొన, ఇజి మీరు నెస్సిదెర్.

29 నజీ పోక్తాన్ నజీ తోడూ మంజినాన్. వాండ్రు నజీ ఒరెన్ వన్నిజ్ డిజి ఎతాన్. ఎందానిజ్ ఇహిజ వన్నిజ్ ఇస్టం వాతికెజె నాను ఎస్తివలెబా కిజిన”, ఇజి వెప్టార్.

30 వాండ్రు యా మాటిజ్ వెప్టివలె నండెండార్ వన్ని మున్పు నమకం ఇడ్డార్.

అబ్రాహము కొడోర్

31 వన్ని మున్ను, నమకం ఇడ్డి యూదురిజ్ వాండ్రు వెహ్లాన్, “నాను వెహ్లా మాటెజ్ లోజీజె మహిజ, మీరు నిజమనె నా సిసూర్ అనిదెర్.

32 నస్తివలె మీరు దేవుణు వందిజ్ నిజమాతికెజ్ నెస్సిదెర్. అయాక మిజి పాపమ్కాణిజ్ డీన్పిస్నాద్”.

33 వారు వన్నిజ్, “మాపు అబ్రాహము తెగ్గదు పుట్టికావ్. మాపు ఎనెజిబా ఎయె అడిగి వెట్టిపణి మణిసిర్ లెకెండ్ మన్ఎవె. నస్తివలె ‘మీరు డిజెబె అనిదెర్’, ఇజి ఎలాగ వెహ్లాన్”, ఇజి వెహ్లాన్.

34 అందెజె యేసు, “ఒరెన్ వెట్టిపణి కినికాన్, ఎలాగ తోహె ఆతి మన్ని వజి ఎజమాని అడిగి మంజి నాండ్రో, అయాలెకెండ్ పాపం కిని విజెరె పాపమ్దిజ్ అడిగి తోహె ఆతి లెకెండ్ మంజినాన్.

35 ఒరెన్ వెట్టిపణి కినికాన్ అక్కు మన్ని వన్ని లెకెండ్ ఎలాకాలం అయా ఇండ్రో మండ్రెజ్ అల్ఎవన్. గాని అయా ఇండ్రోణి మరిసిజ్ ఎలాకాలం అయా ఇండ్రో అక్కు మంజినాద్.

36 అందెజె దేవుణు మరిసి మిజి తోహె ఆతి బాణిజ్ డీన్పిస్సిజ, మీరు నిజమనె డిజెబెఅనిదెర్.

37 నాను నెన్ను మీరు అబ్రాహము తెగ్గతికిదెర్ ఇజి. గాని మీరు నజి సప్తెజ్ సుడేజినిదెర్. ఎందానిజ్ ఇహిజ నాను వెహ్లాన్ మాటెజ్ మిజి పడిఊ.

38 నా బుబ్బు నజి తోరిస్తికెజ్ నాను వెహ్లాన్. గాని మీరు మీ బుబ్బు వెహ్లానికెజ్ కిజినిదెర్”, ఇజి వెహ్లాన్.

39 నస్తివలె వారు, “అబ్రాహమునె మా బుబ్బు”, ఇజి వెహ్లాన్.

40 “మీరు అబ్రాహము కొణెర్ ఇహిజ, మీరు అబ్రాహము కితి పణిజ్నె కితిదెర్ మరి. దేవుణు బాణిజ్ నాను వెహికెజి మిజి వెహ్లాజె నాను ఎనెజిబా సుడేత. గాని మీరు నజి సప్తెజ్ సుడేజినిదెర్. అబ్రాహము యా లెకెండ్ ఇనికబా కిఎన్.

41 మీ బుబ్బు కిజినికెజి మీరు బా కిజినిదెర్”, ఇజి వెహ్లాన్. అయావలె వారు, “మాపు అపొస్సి వెట పుట్టికావె. దేవుణు ఒరెండ్రె మా బుబ్బు”, ఇహోర్.

42 అందెజె యేసు వరిజ్ ఈహు వెహ్లాన్: “దేవుణునె మీ బుబ్బు ఇహిజ, మీరు నజి ప్రేమిస్సిదెర్ మరి. ఎందానిజ్ ఇహిజ, నాను దేవుణు బాణిజ్ వాత. నాను యేలు ఇబ్బె మన్ను. నాను నా సొంత ఇస్టమ్దాన్ రెవిత. గాని వాండ్రు నజి పోక్తాన్.

43 ఎందానిజ్ నాను వెహ్లాని మాటెజ్ మీరు అర్థం కిఇదెర్? ఎందానిజ్ ఇహిజ, నాను వెహ్లాని మాటెజ్ వెండ్రెజ్ మీరు కెఇదెర్.

44 మీ బుబ్బు నయతానె. మీరు వన్ని కొణెర్. మీరు వన్నిజ్ ఇస్టం అతికెజ్ కిదెజ్ కోరిజినిదెర్. మొదోహాన్ అసి వాండ్రు సప్సికాన్. వాండ్రు నిజమాతి బాడిదు నిల్ఎవన్. ఎందానిజ్ ఇహిజ, వన్ని లోఇ నిజమాతికెజ్ సిల్లు. వాండ్రు అబద్దం వర్ధినివలె, వన్ని సొంత బుద్దిదాజె వర్ధిజినాన్. ఎందానిజ్ ఇహిజ, వాండ్రు అబద్దం వర్ధినికాన్. అబద్దం వర్ధిని వరి అపొసి.

45 గాని నాను దేవుణు వందిజ్ నిజమాతికెజ్ వెహ్లాన్. అందెజె మీరు నజి నెన్ఇదెర్.

46 మీ లోఇ ఎయెన్బా నాను తపు కితికాన్ ఇజి రుజువ్ కిదెజ్ అల్నాండ్రో? నాను నిజమాతికెజ్ వెహ్లాజ, ఎందానిజ్ మీరు నజి నమిఇదెర్.

47 దేవుణు కొణెర్ ఆతికార్ వన్ని మాటెజ్ వెనార్. మీరు దేవుణు కొణెర్ ఆఇదెర్. అందెజె నా మాటెజ్ వెన్ఇదెర్”.

48 నస్తివలె యూదురు వన్నిజ్, “నీను సమరియదికి, నిజి దెయం అస్తాద్ ఇజి మాపు వెహ్లాని మాటదు తపు ఇనికబా మనాదా?”, ఇహోర్.

49 నజి దెయం అన్ఎద్. నాను నా బుబ్బెజ్ గవ్ఠం సీజిన. గాని మీరు నజి కరాయి ఇజినిదెర్.

50 నాను నా వందిజ్ గవ్ఠం అన్ఎ ఆదెజ్ సుడేఎ. గాని అయాకెజ్ సుడేజినాన్ ఒరెన్ మనాన్. వాండ్రె నా వందిజ్ నాయమ్దాన్ తీర్పు సీజినికాన్.

51 నా మాటెజ్ వజి బత్కినికాన్ ఎయెన్బా సాఎన్, ఇజి నాను నిజం మీ వెట వెహ్లాన్”, ఇజి మర్జి వెహ్లాన్.

52 అయావలె యూదురు, “ఏలు మాపు నెస్సావ్ నీను దెయం అస్తికి ఇజి. అబ్రాహము సాతాన్. అయా లెకెండ్ ప్రవక్తరుబా సాతార్. గాని నీను వెహ్లాని, ‘నా మాటెజ్ వజి బత్కిజినికాన్ ఎయెన్బా సాఎన్’, ఇజి.

53 నీను మా బుబ్బు అతి అబ్రాహాము ఇంక పెరికిదా? వాండ్లు సాతాన్. అయా లెకిండ్ ప్రవక్తరు బా సాతార్. నీను ఎయెన్ ఇజి నీను సుడేబిజిని?”, ఇజి వెహ్తార్.

54 అందెజి యేసు, “నానె నజీ పొగడిఃతిజి దనిజ్ విలువ సిల్లెద్. గాని నజీ పొగడిఃనికాన్నా బుబ్బునె. వన్నిజె మీరు, మా దేవుణు ఇజి వెహ్సినిదెర్.

55 మీరు వన్నిజ్ నెన్ఇదెర్. గాని నాను వన్నిజ్ నెన్ను. నాను వన్నిజ్ నెన్ఇ ఇజి వెహ్సిజ, మీ లెకిండ్ ఒరెన్ అబడ్డం వర్గినికాన్ ఆత మరి. గాని నాను వన్నిజ్ నెన్ను. వన్నిమాటజి వజి బత్తిజిన్.

56 మీ బుబ్బుతి అబ్రాహాము, నాను వాని దినం సుడేదెజ్ అట్లు ఇజి సర్ద అతాన్. వాండ్లు అయా దినం సుడేతాండ్రె సర్ద అతాన్”, ఇజి వెహ్తార్.

57 నిజి విలు యాబయ్ పంటిజ్బా సిల్లు. నీను అబహాముజ్ సుడేతిదా?”, ఇజి యూదురు వన్నిజ్ వెహ్తార్.

58 అందెజి యేసు, “అబ్రాహాము పుట్విండ ముజాలె నాను మన్ను ఇజి నిజం మీ వెట వెహ్సిన్”, ఇజి వెహ్తార్.

59 యాక వెహిజ్, వారు వన్నిజ్ డెయ్దెజ్ పణుకు పెహ్తార్. గాని వాండ్లు డాజిఃతాండ్రె గుడిఃదాన్ సాహాన్.

9

పుట్టివలెహన్ అసి గుడ్డి అతివన్నిజ్ నెగెండ్ కిజినాన్

1 యేసు సొన్ని మహివలె, పుట్టిబాణిజ్ అసి గుడ్డి అతి ఒరెన్వన్నిజ్ సుడేతాన్.

2 నస్తివలె వన్నిసిసూర్ వన్నిజ్, “బోదకినికి, ఎయెర్ పాపం కితిజ్ వీండ్లు గుడ్డిదాన్ పుట్టాన్? వీండ్లునా విన్ని అయెసి అప్పొసిర్నా?”, ఇజి వెన్బాతార్.

3 అందెజి యేసు, “వీండ్లు పాపం కితిజ్ ఆవిద్, విన్ని అయెసి అప్పొసిర్ పాపం కితిజ్ ఆవిద్. గాని దేవుణు ఒరెండ్రె కిదెజ్ అట్టి పణి వినిలోఇ సుడేదెజి వీండ్లు గుడ్డి ఆతాండ్రె పుట్టాన్.

4 వేడె మనివలె, మాటు నజీ పొక్తివన్ని పణి కిదెజ్వలె. సీకట్ బేగి ఆనాద్. అయావలె ఎయెర్బా ఇనికబా కిదెజ్ అట్విర్.

5 నాను యా లోకమ్దు మనివలె, యా లోకమ్దివరిజ్ జాయ్లెకిండ్ మన్”, ఇజి వెహ్తార్.

6 వెహ్తార్డ్రె, వాండ్లు బూమిదు పూస్తాన్. వన్ని పూసవలిదాన్ కండెక్ బుర్ద కితాండ్రె, అయా బుర్ద గుడిః వన్ని కణకెజి మున్ను రాస్తాన్.

7 రాస్తాండ్రె, “నీను సొన్ని సిలోయొము ఇన్ని గుమ్మిదు కణుకు నొరె ఆఅ”, ఇజి వెహ్తార్. (సిలోయొము ఇన్ని మాటదిజ్ పొక్తికాన్ ఇజిన్ అర్దం) వాండ్లు సాహాండ్రె నొరె ఆతాన్. వన్ని కణుకు నెగెణ్ఆతె. వాండ్లు మరెజి వాతాన్.

8 అయావలె వన్ని పడేకాదికార్ని వాండ్లు ముజాలె లొన్సానిక సుడిఃతి మహికార్ వెన్బాతార్, “వీండ్లు అబ్బె బసి లొసి మహికాన్గదె”, ఇజి.

9 సెగెండార్, “వీండ్రె”, ఇజి. మరి సెగెండార్, “సిలె, వినిలెకిండ్ మన్ని మరి ఒరెనె”, ఇహార్. గాని వాండ్లు, “నానె లొన్సాజి మహికాన్”, ఇజి వెహ్తార్.

10 అయావలె వారు, “నీ కణుకు ఎలాగ రెకె ఆతె?”, ఇజి వెన్బాతార్.

11 అందెజి వాండ్లు, “యేసు ఇజి కూక్కి ఒరెన్బుర్ద కితాండ్రె నా కణకెజి మున్ను రాస్తాన్. సిలోయొము ఇన్ని గుమ్మిదు సొన్ని నొరె ఆఅ, ఇహాన్. అందెజి నాను సొన్ని నొరె ఆత్తిజ్నాను సుడేదెజ్ అట్ట”, ఇహాన్.

12 “ఎంబె మనాన్ అయా వాండ్లు”, ఇజి వారు వెన్బాతార్. “ఏమె నాను నెన్ఏ”, ఇహాన్ వాండ్లు.

13 ముజాలె గుడ్డిదాన్ మహివన్నిజ్ వారు పరిసయరుజు డగ్రు త్తార్.

14 ఉండ్రె విస్తాంతి నాండిజె, యేసు బుర్ద కితాండ్రె అయా వన్ని కణుకు నెగెణ్ కితాన్.

15 పరిసయరు బా నీను ఎలాగ బేన్సిజ్ అట్టి ఇజి వెన్బాతార్. వాండ్లు, “అయా వాండ్లు నా కణుకు మున్ను బుర్ద రాస్తాన్. నాను నొరెబాత. విలు నాను బేసిన”, ఇహాన్.

16 అందెజె సెగొండార్ పరిసయరు, “యా వాండ్రు దేవుణు బాణిజ్ వాతికాన్ అవెన్. ఎందానిజ్ ఇహిజు, విస్తాంతిదినమదు అహు కిజి వాండ్రు రూలుజ్ తప్పినాన్”, ఇహార్. గాని మరి సెగొండార్, “ఒరెన్ పాపం కిజినికాన్ ఎలాగ నిసా బమ్మాని పణిజ్ కిదెజ్ అట్టాన్”, ఇహార్. ఆహె వారు కేటిజ్ ఆతార్.

17 అందెజె పరిసయరు మరి అయా గుడిదాన్ మహి వన్నిజ్, “వాండ్రు నీ కణుకునె రేక్తాన్. అందెజె నీను వన్ని వందెజ్ ఇన్నిక వెప్పిని”, ఇజి వెన్ బాతార్. దనిజ్ వాండ్రు, “వాండ్రు ఒరెన్ ప్రవక్త”, ఇహార్.

18 యా యూదురు అదికారిజు, వీండ్రు గుడిదాన్ మహాన్. వీండ్రు ఏలు రెకె ఆతండ్రె బేసి నాన్ ఇజి నమ్మివితార్. అందెజె వారు వన్ని అయిసి అపొసిజ్ రప్పిస్తార్.

19 రప్పిస్తార్ పరిజ్, “వీండ్రు మీ మరిన్ నా? వీండ్రునా గుడిదాన్ పుట్టాన్ ఇజి మీరు వెప్పినిదెర్. అహిజు, ఏలు వాండ్రు ఎలాగ బేసి నాన్?”, ఇజి పరిజ్ వెన్ బాతార్. అహు వెన్ బాని దాక, వాండ్రు గుడిదాన్ మహాన్. వాండ్రు నెగెణ్ ఆతండ్రె బేసి నాన్ ఇజి నమ్మివితార్.

20 వన్ని అయిసి అపొసిర్ వెప్టార్, “వీండ్రు మా మరిన్, ఇజి మాపు నెస్సావ్. వీండ్రు గుడిదాన్ పుట్టాన్ ఇజి బా నెస్సావ్.

21 గాని ఏలు వాండ్రు ఎలాగ బేసి నాన్ ఎయెన్ వన్ని కణుకు రెక్తాన్ ఇన్నిక మాపు నెన్ ఎవ్. వాండ్రు బుద్ది వాతికాన్ గదె. వన్నిజ్ వెన్ బాదు. వాండ్రు వన్నిజ్ జర్గితిక వెప్టాన్”, ఇజి వెప్టార్.

22 వన్ని అయిసి అపొసిర్ ఆహె వెప్టార్. ఎందానిజ్ ఇహిజు వారు యూదురి అదికారిజు తియెల్ ఆతార్. యా యూదురు ఉండ్రె తిరుమానం కిత మహార్. ఎయెన్ బా యేసు క్రీస్తు ఇజి ఒప్పుకోటిజు వన్నిజ్ యూదురి మీటిజ్ ఇండ్రె దాన్ వెల్లి కిదెజ్ ఇజి.

23 అందెజె వన్ని అయెసి అపొసిర్, వాండ్రు బుద్ది వాతికాన్ గదె, వన్నిజ్ వెన్ బాదు”, ఇజి వెప్టార్.

24 అందెజె యూదురు అతికారిజు మరిబా గుడిదాన్ మహి వన్నిజ్ కూకప్పిస్తార్. కూకప్పిస్తారె, “నీను దేవుణుదిజ్ పొగిడిజి వెహ్ అ. నిజి నెగెణ్ కితాన్ ఇజి నీను వెప్పిని యా వాండ్రు పాపం కిజినికాన్ ఇజి మాపు నెసి నావ్”, ఇహార్.

25 నన్దివలె వాండ్రు, “వాండ్రు పాపం కిజినికాన్ సెలెనో ఇజి నాను నెన్ ఏ. ఉండ్రె నాను నెన్ను. నాను గుడిదాన్ మహ. ఏలు నాను బేసి న”, ఇజి వెప్టాన్.

26 వారు వన్నిజ్, “వాండ్రు నిజి ఇనిక కితాన్? వాండ్రు ఎలాగ నీ కణుకు రెక్తాన్?”, ఇజి వెన్ బాతార్.

27 అందెజె వాండ్రు, నాను ముజాలె మిజి వెప్టా మన. గాని మీరు విన ఇదెర్. ఎందానిజ్ మీరు మరిబా విండ్రెజ్? మీరుబా వన్ని సీసూర్ ఆదెజ్ కోరిజినిదెరా?”, ఇజి వెప్టాన్.

28 “నీను బా వన్ని సీసూనె. మాపు మోసె సీసూర్ జు.

29 దేవుణు మోసెవెటె వర్గితాన్ ఇజి మాపు నెసి నావ్. గాని అయా వాండ్రు ఎమేణికాన్ ఇజి మాపు నెన్ ఏవ్”, ఇజి వారు వన్నిజ్ నండ్రె దూసిస్తార్.

30 అందెజె వాండ్రు ఈహు వెప్టాన్, “అబ్బు గొప్పు పణి యాక! వాండ్రు ఎమేణికాన్ ఇజి మీరు నెన్ ఇదెర్ గాని వాండ్రు నా కణుకు రెక్తాన్.

31 దేవుణు పాపం కినివరి మెరొ విన ఏవ్ ఇజి మాటు నెస్సావ్. వన్నిజ్ గవ్వరం సీజి వన్నిజ్ ఇన్జం ఆతి పణిజ్ కిని వరి మెరొ వాండ్రు వినాన్.

32 యూరు పొటలొ ఇహునె గుడిదాన్ మహి వన్ని కణుకు ఎయెన్ బా ఎనెజ్ బా రెక్తిక విన ఏవ్.

33 నా కణుకు రెక్తి యా వాండ్రు దేవుణు బాణిజ్ వాతికాన్ ఆవీన్ ఇహిజు నజి నెగెణ్ కిదెజ్ అటెవితాన్ మరి”.

34 దన్నిజ్ వారు, “నీను పాపమదానె పుట్టికి. ఏలు మజి నెన్ పిన్తెజ్ వాజినిదా?”, ఇజి వెప్టార్ వన్నిజ్ వెల్లి కితార్.

35 అయా గుడ్డిదాన్ మహి వన్నిజ్ పరిసయరు వెల్లి కితార్ ఇజి యేసు విహాన్. వాండ్రు వన్నిజ్ సుడెతివెలె, “నీను లోకు మరిసిజ్ నమిజినిదా?”, ఇజి వెన్ బాతాన్.

36 వెన్ బాతిజ్ వాండ్రు, “బాబు నాను వన్నిజ్ నమిదెజ్ వాండ్రు ఎయెన్ ఇజి నజి వెహ్ అ”, ఇహార్.

37 అయావలె ఏలు, “నీను యేలు వన్నిజ్ సుడెతి మన్ని. వాండ్రె నీ వెటె వర్గిజినికాన్”, ఇజి వెప్టాన్.

38 నన్దివలె వాండ్రు, “ప్రబువా, నాను నిజి నమిజి న”, ఇహండ్రె యేసు పాదవ్ కాజ్ ముణుకుజ్ ఊరిజి మాడిస్తాన్.

39 అందెజె యేసు, “నాను లోకురిజ్కేట కిదెజె వాత మన. గుడివారు బేస్తెజ్ బేస్సికార్ గుడిః ఆదెజ్ నాను వాత మన”, ఇహాన్.

40 నస్తివలె వన్నిడగ్రు నిహి మహి సెగొండార్ పరిసయరు వాండ్రు వెహ్నినిక విహర్. విహర్, “ఇనిక? మాపు బా గుడిదికాపా?”, ఇజి వెనబాతార్.

41 అందెజె యేసు, “మీరు గుడిఃదికిదెర్ ఇహిజు, దేవుణు మీ పాపమకు లెక్క కివితాన్ మరి. గాని ‘మాపు సుడఃజినావ్’ ఇజి మీరు వెహ్నినిదెర్. అందెజె మీ లోక పాపమకు నిహె మన”, ఇజి వెహ్సార్.

10

1 “గొరెజి సాలదు, సరిదాన్ డుగ్విండ, ఆఇ సరిదాన్ డుగ్నికాన్ డొజారి కజరి ఆత మనాన్.

2 గాని సరిదాన్ డుగ్నికాన్ గొరెజ్ గవుడుయెన్.

3 సాలదిజ్ రెయ్క కాన్కినికాన్, వన్నివందిజ్ సేఫ్లా రేనాన్. గొరెజ్ వన్నికంటం వెన్నె. వాండ్రు వన్నిసొంత గొరెజి మీరు అసి కూక్చి వన్యాజ్ వెల్లి సోప్పాన్.

4 వన్ని సొంతవనకాజ్ విజు వెల్లి సోప్తి వెనుక, గొరెజి ముజాల వాండ్రు నడిఃనాన్. గొరెజ్ వన్ని కంటం నెన్నె. అందెజె అవి వన్నివెట సొనె.

5 గాని నెన్ఇవన్ని కంటం అవి నెన్ఉ. అందెజె వన్నివెట సొన్విండ, అవి వన్నిబాణిజ్ ఉహ్వాప్తె, ఇజి నాను నిజం మీవెట వెహ్నిన.

6 యేసు అబ్బె నిహిమహివరిజ్ కతవజి యాక నెన్పిస్తాన్. గాని వారు వాండ్రు వెహ్నినిదనిజ్ అర్దం కివితార్.

7 అందెజె వాండ్రు మరి వరివెట ఈహు వెహ్సాన్: “నాను నిజం మీవెట వెహ్నిన, నానె గొరెజ్ సరిలెకిండ మన్నె.

8 నా ముజాల వాతికార్ విజెరెబా డొజారి కజరి ఆత మనార్. గాని గొరెజ్ వరిజ్ వినఉతె.

9 నాను దేవుణుడగ్రు సొండ్రెజ్ సరిలెకిండ మన్నె. నా వెట డుగ్నికాన్ ఎయెన్బా నెగ్రెండ మంజినాన్. వాండ్రు లోక సొన్ని వెల్లి వాజి మేత మేజి మంజినాన్.

10 డొజారి డొజి కిదెజ్నో, సప్తెజ్నో పాడు కిదెజ్నో వానాన్. మరి ఇన్నిదనిజ్బా రెవన్. నాను నజి వెనివరిజ్ దేవుణువెట ఎలాకాలం బత్కిని బత్కు సీని వందిజె వాత మన్నె. అయాక పూర్తి సీని వందిజె వాత మన్.

11 నాను గొరెజి నెగ్గి గవుడుయెన్. నెగ్గి గవుడుయెన్ గొరెజి వందిజ్ వన్ని పాణం సీనాన్.

12 జితం వందిజ్ గొరెజ్ అడిజినికాన్ గవుడుయెన్ ఆవిన్. అక్కజ్ వన్ని సొంతగొరెజ్ ఆఉ. అందెజె దుమాలగొండి వాజినిక సుడఃజి గొరెజిడిఃసి ఉహ్వాక్యాన్. అయావలె దుమాలగొండి వన్యాజ్ అసి నెద్రిస్తాద్.

13 వాండ్రు జితం వందిజ్ అడిజినాన్. గొరెజి మున్ను వన్నిజ్ బాజత సిల్లెద్. అందెజె వాండ్రు డిఃన్ను ఉహ్వాక్యాన్.

14-15 నాను గొరెజి నెగ్గి గవుడుయెన్. బుబ్బు నజి ఎలాగ నెసినాండ్రె, నాను బుబ్బుజ్ ఎలాగ నెసినాన్, అయావజి నాను గొరెజి నెసిన. నా గొరెజ్ నజి నెసినె. నాను గొరెజివందిజ్ నా పాణం సీజన.

16 యా మందదు మనికెజ్ అవిండ, మరి సెగం గొరెజి నజి మన్నె. వన్యాజ్బా నాను పేరజి తత్తెజ్వెలె. అవి నా కంటం వినె. అయావలె మంద ఉండ్రె ఆనాద్. గవుడుయెన్ ఒరెన్ ఆనాన్.

17 నాను మరజి బత్కినివందిజె, నా పాణం సీజన. అందెజె నా బుబ్బు నజి ప్రేమిస్తాన్.

18 ఎయెన్బా నా పాణం నా బాణిజ్ లాగ్విన్. నా సొంత ఇస్టమదానె నా పాణం సీజన. నా పాణం సీదెజ్ నజి అతికారం మనాద్. మరజి లాగె అదెజ్బా నజి అతికారం మనాద్. యా లెకిండ కిదెజ్ ఇజినె నా బుబ్బు నజి ఆడ్ర సిత్తమనాన్”.

19 వాండ్రు వెహ్ని యా మాటెజివందిజె, యూదురు లోక ఉండ్రె ఇజి గొడఃబ పుట్టాద్

20 వరి లోక సంఠెండార్, “వీండ్రు దెయం అస్తికాన్, వెరి వాండ్రు, విన్నిమాట ఎందానిజ్ వెంజినిదెర్”, ఇజి వెహ్సార్.

21 మరి సెగొండార్, “దెయం అస్తికాన్ ఒరెన్ యాలెకిండ వర్గివిన్. దెయం గుడిఃదివరిజ్ నెగెండ కిదెజ్ అట్టాద్?”, ఇజి వెహ్సార్.

యూదురు యేసుజ్ నమ్మివీర.

22 అయావలె పిన్నికాలం. యెరూసలెమ్దు యూదురు దేవుణుగుడిడు బని ఆతి దినంవందిజ్ ఎత్తుకిని పండొయ్ కిజినారో*.

23 నన్దివలె యేసు, దేవుణుగుడిడు మన్ని సొలోమోను అరుబు ఇజి కూకె ఆని అరుబుదు బూలాజి మహాన్.

24 అయావలె యూదురు వన్ని సుటులం ఆతారె, “ఎసోడ్ రోస్కు నీను మజి టెటాజ్ వెమోవిండ, అనుమానమకు ఇడజిని? నీను క్రీస్తు ఇహిజ, మజి తినాజ్ వెమోఅ”, ఇహోర్.

25 అందెజె యేసు, నాను మీవెట వెప్తా. గాని మీరు నమ్మిఇదెర్. నా బుబ్బు సత్తుదాన్ నాను బమ్మాని పణిజ్ కిజిన. అయా పణిజ్ నావందిజ్ సోని వెహిసినె.

26 గాని మీరు నమ్మిఇదెర్. ఎందానిజ్ ఇహిజ, మీరు నా గొర్రెజ్ ఆఇదెర్.

27 నా గొర్రెజ్ నా కంటం వెంజినె. నాను వన్కాజ్ నెసిన. అవి నావెట వాజినె.

28 నాను వన్కాజ్ ఎలాకాలం దేవుణువెట బత్తిజిని బత్కు సీజిన. అవి ఎసెజ్బా నానం ఆఉ. వన్కాజ్ ఎయెన్బా నా కీదాన్ ఒత్తెజ్ అట్విన్.

29 వనకాజ్ నజి సత్తి నా బుబ్బు విజెరిజ్ ఇంక పెరికాన్. అందెజె ఎయెన్బా వనకాజ్ బుబ్బుకీదాన్ డొజి కిజి ఒత్తెజ్ అట్విన్.

30 నానుని నా బుబ్బు, ఉండ్రె ఆత మనాప్”, ఇజి వెప్తాన్.

31 నన్దివలె, యూదురు వన్నిజ్ మరి డెయిదెజ్ ఇజి పణుకు పెప్తార్.

32 గాని యేసు వరిజ్, “నా బుబ్బు సత్తుదాన్ నండో బమ్మ ఆని పణిజ్ కిజి మిజి తోరిస్తు మన్ను. వనకలోఇ ఎమేణి పణి వందిజ్ నజి మీరు పణుకుజాణిజ్ డెయినిదెర్?” ఇజి వెప్తాన్.

33 అందెజె యూదురు, “మాపు పణుకుజాణిజ్ డెయిజినిక నీను కిత్తి ఇని నెగ్గి పణిజ్ వందిజ్ ఆవిదె. గాని నీను ఒరెన్ లోకుఆజి మంజి, నాను దేవుణు ఇజి వెమో ఆజి దేవుణుదిజ్ దూసిస్సివందిజె మాపు పణుకుజాణిజ్ డెయినాప్”, ఇజి వెప్తార్.

34 అందెజె వాండ్రు వరిజ్ ఈహు వెప్తాన్, “మీరు దేవుణుజు’ ఇజి దేవుణునె వెప్తాన్†, ఇజి దేవుణు మాటదు రాస్త మనాద్ గదె?

35 దేవుణు మాటదు వెహిసినెకె ఎసెజ్బా తప్ఉ. దేవుణు మాట సత్తి లోకురిజ్, ‘దేవుణుజు’, ఇజి దేవుణు కూక్సినాన్.

36 బుబ్బుతి దేవుణునె నజి వన్ని వందిజ్ కేట కితాండ్రె యా లోకమ్దు పోక్తాన్. అహిజ, ‘నానె దేవుణుమరిసి’ ఇజి నాను వెహిసినె దేవుణుదిజ్ దూసిస్సాన్ ఇజి మీరు ఎలాగ వెహిసినెదెర్.

37 నాను నా బుబ్బు వెప్తి పణికివండ మహిజ, నజి నమ్మిమాట్.

38 గాని నాను కిత్తి అయా పణిజ్ నమ్మిదు. నజి నమఇజ్బా అయా పణిజ్ నమ్మిదు. ఎందానిజ్ ఇహిజ, బుబ్బు నావెట కూడెజి మంజినాన్. నాను బుబ్బువెట కూడెజి మంజిన, ఇజి మీరు నెసి అర్దం కిజి మండ్రెజ్”.

39 యాకెజ్ విహారె, మరి వారు వన్నిజ్ అన్విజ్ సుడెజ్తారె. గాని వాండ్రు పరి కీదాన్ తప్తె ఆతాండ్రె సోహాన్.

40 వాండ్రు యొర్దాను గడ్డ అతాహ పడెకాద్ మన్ని ఉండ్రె బాడిడు మరిబా సోహాన్. బానె యోహాను బాప్తినం సీజి మహాన్. వాండ్రు బాన్ మహాన్.

41 నండోడారె వన్నిడగ్రు వాతారె. వారు, “యోహాను ఇని బమ్మాని పణిబాన్ కివితాన్. గాని విని వందిజ్ యోహాను వెప్తి నజితిజ్ విజు నిజమనె”, ఇజి వెప్తార్.

42 అబ్బె నండోడారె యేసుమున్ను నమకం ఇడ్తారె.

* 10:22 10:22 యెరూసలెం గుడి ముజాల నానం కిత్తార్ అయాక మరి త్తొవ్ర గుడిదు పార్దనం కిడెజ్ పూజిజ్ కిడెజ్ మొదెల్తొవ్ర. అయాకాలం ఒడెబిజి యూదురు కిని పండొయ్ యా గుడిదు బని ఆతి దినం వందిజ్ ఎత్తుకిని పండొయ్. † 10:34 10:34 కిర్దన 82:6.

11

సాతి లాజరుజ్జీనిక్కినాన్

1-3 బెతానియ ఇన్ని నాటో లాజరు ఇన్నికాన్ ఒరెన్మనాన్. వన్ని బీబీకెన్ మార్త మరియ ఇనికెజ్. యా మరియనె యేసు పాదమకాజ్ అతరు ఇన్ని వాసన నూనె వాక్తాదె, దన్నికొప్పుదాన్ తోతాద్. ఉండ్రీ నాండిజ్ లాజరుజ్జీ జబ్బు వాతాద్. నీరసం లావు ఆతిజ్, వన్ని బీబీసిక్ యేసుడగ్రు కబ్బు పోక్త, ‘ప్రబువా, నీను లావు ప్రేమ కిజిని నీకూలాయెన్ నీరసం ఆత మనాన్’, ఇజి.

4 యేసు యా కబ్బు విహండ్రె, “వాండ్రు సావీన్. సానివందిజ్ వాతిక ఆవీద్ యా నీరసం. గాని దేవుణు గొప్పు పెరికాన్ ఇజి లోకురిజ్ తోరిస్తాజ్. ఎందానిజ్ ఇహిజు, దిన్నిదటాన్ దేవుణు మరినె గొప్పుపెరికాన్ ఇజి తోరె ఆదెజ్”, ఇజి వెప్తాన్.

5 యేసు మార్తెజ్, దన్నితజీసి మరియెజ్, లాజరుజ్జీ లావు ప్రేమిస్తాన్.

6 గాని లాజరు నీరసం లావు అతాన్ ఇజి కబ్బు విహిజ్బా వాండ్రు బేగి సాన్వీతాన్. వాండ్రు మహి బాన్మరి రుండి లోన్బుబా మహాన్.

7 వెనుక వాండ్రు వన్ని సినూరిజు, “రదు, మాటు యూదయ దేసమదు మరీజు సానాట్”, ఇజి వెప్తాన్.

8 అయావలె వారు, “బోదకినికి, యూదురు నిజి పణకాణిజ్ డెయెదెజ్ నెగం లోన్బు ముజాలె నుడెతార గదె. మరిబా నీను అబ్బె సాండ్రెజ్ నుడెజినిదా?”, ఇహార్.

9 అందెజి యేసు, “వేడకాజ్ వన్నెండు గంటిజ్ మనె. సిలె? అందెజి ఒరెన్ వేడె బూలాతిజు, వాండ్రు తోరె ఇడెజి అరెన్. ఎందానిజ్ ఇహిజు, వాండ్రు యా లోకమది జాయి నుడెజినాన్.

10 గాని వాండ్రు రెయతు బూలాతిజు, వాండ్రు తోరె ఇడెజి అర్నాన్. ఎందనిజ్ ఇహిజు, వన్ని లోఇ జాయి సిల్లెద్”, ఇజి వెప్తాన్.

11 యాక వాండ్రె, మరి సినూరిజ్ వెహ్పానాన్, “మా కూలాయెన్ ఆతి లాజరు నిద్రకిజినాన్. వన్నిజ్ నిద్రెజ్ నాను బాన్ సాన్నిన.

12 వన్ని సినూరు, “ప్రబువా, వాండ్రు నిద్రకిజినాన్ ఇహిజు, వాండ్రు నెగెణ్ ఆనాన్లె”, ఇహార్.

13 లాజరు సాత మనాన్ ఇజి యేసు వెప్తాన్. గాని వన్నిసినూర్ మాములె నిద్రవందిజ్ వాండ్రు వెహ్పానాన్ ఇజి ఒడెజిబితార్.

14-15 అందెజి వాండ్రు వరిజ్ తినాజ్ వెప్తాన్, “లాజరు సాతాన్. అయావలె నాను వన్నివెట మన్విత. అందెజి నాను మీ వందిజ్ సర్ల ఆజిన. ఎందానిజ్ ఇహిజు, మీరు నజి నమ్మినిదెర్లె. అందెజి రదు, వన్ని బాన్సానాట్”, ఇజి వెప్తాన్.

16 నస్తివలె దిదుము ఇజి కూకె ఆని తోమా మహి సినూరిజ్, “రదు మాటు బా సానాట్. వన్నివెట సాదెజ్సానాట్”, ఇహార్.

17 యేసు వాతివలె, లాజరుజ్జీ సమాది కిజి నాల్లి దినమకు ఆతె ఇజి నెస్తాన్.

18-19 బెతానియ యెరూసలెమదాన్ ఎంజు ఇంసుమింసు రుండి మయలుజ్ దూరం మన్నె. నండెండార్ మార్తెజ్ మరియెజ్ ఒదిస్తాజ్ వాత మహార్. వరి తంబెర్ని సాతి వందిజ్, వారు ఒదిస్తాజ్ వాతార్.

20 యేసువాజినాన్ ఇజి వెప్తా మూట విహదె, మార్త ఎప్పు సాహద్. వన్నిజ్ నుడెదెజ్ అది సాహద్. గాని మరియ ఇండ్రె బస్స మహాద్.

21 నస్తివలె మార్త యేసుజ్, “ప్రబువా, నీను ఇబ్బె మంజినిక ఇహిజు, నా తంబెరి సావతాన్మరి.

22 గాని ఏలుబా నీను దేవుణుదిజ్ ఇనిక లొస్తిజ్బా వాండ్రు నిజి సీనాన్ ఇజి నాను నెన్న”, ఇజి వెప్తాద్.

23 అందెజి యేసు, “నీ తంబెర్ని మరీజు నిజ్నాన్లె”, ఇజి వెప్తాన్.

24 అయావలె అది, “యా లోకమదిజ్ కడెవెరి దినమదు, వాండ్రు మరి బత్సినాన్లె ఇజి నాను నెన్న”, ఇహాద్.

25-26 అందెజి యేసు దనిజ్ ఈహు వెప్తాన్, “నానె సాతి వరిజ్ నిక్కికాన్. వరిజ్ మరి బత్సె సీనికాన్ నానె. నజి నమ్మినికాన్ ఎయెన్బా వాండ్రు సాతిజ్బా మరి బత్సినాన్. నజి నమ్మిజి బత్సెజిని ఎయెన్బా ఎనెజ్బా సావీన్. నీను యాకెజ్ నమిజినిదా?”.

27 అయావలె అది, “ఒబ, నాను నమిజిన, నీనె దేవుణు మరిని ఆతి క్రీస్తు ఇజి. నీనె యా లోకమదు వాదెజ్మన్నికాన్ఇజి దేవుణు వెప్తాకి”, ఇజి వెప్తాద్.

28 యాకెజ్ వెహ్లాదె, అది మరజి సాహదె, దన్నితజి మరియెజ్కూక్తాదె, “బోద్నిక్సాన్ఇబ్బె మనాన్. నిజి కూక్సినాన్”, ఇజి గిబ్బి డగ్రు వెహ్లాద్.

29 మరియ యాక విహిజ్, అది గజిబిజి నిజితాదె, వన్ని డగ్రు సాహద్.

30 అయావలె యేసు ఇంక ఆ నాటో రెండ్తె. మార్త వన్నిజ్ దనూల్అత్తి బాడిదెనె మహాన్.

31 మార్తెజ్ ఓదరిసి దనివెటె ఇండ్రో మహి యూదురు అది గజిబిజి నిజ్జెజ్ సాన్సినిక సుడేతివలె, అది అడేబదెజ్ దూకిదు సాన్సినాన్సు ఇజి దన్నివెనుక సాహార్.

32 యేసు మన్ని బాడిడు మరియ వాతాదె, వన్నిజ్సుడేతాదె, వన్ని పాదమ్కాజ్ అర్తాద్. అర్తాదె, “ప్రబువా, నీను ఇబ్బె ముంజనిక ఇహిజ, నా తంబెరి సాంపానామరి”, ఇహాద్.

33 అది అడేబాజినిక యేసు సుడేతాన్. దని వెటె వాతి యూదురు బా అడేబాజినిక సుడేతాన్. అయావలె వాండ్రు మన్నుదు బాద అతాండ్రె మొక్కిం డిజ్పాన్.

34 “వన్నిజ్ఎంబె ఇడ్డి మన్నిదెర్?” , ఇజి వరిజ్ వెన్బాతాన్. “వాజి సుడేఅ ప్రబువా”, ఇహార్ వారు.

35 యేసు కనీర్డిజ్పాన్

36 అయావలె యూదురు, “సుడేదు వాండ్రు ఎసా వన్నిజ్ప్రేమిస్తాన్”, ఇజి వెహ్లాద్.

37 గాని వరి లొఇ సెగెండార్, “పిండ్రు గుడిజి వరిజ్ నెగెజ్కితాన్. మరి ఎండనిజ్లాజరు సావీండ కిదెజ్అట్ఎతాన్”, ఇజి వర్గితార్.

38 అయావలె యేసు నండ్రో బాద అతాండ్రె దూకిదు వాతాన్. అయాక ఉండ్రె సాలం. దన్నిముజుల ఉండ్రె పెరి పణుకు ఇడ్డ మహార్.

39 యేసు, “అయా పణుకు లాగ్దు”, ఇజి వెహ్లాన్. నస్తివలె సాతివన్ని బీబ్సి మార్త వన్నిజ్, “ప్రబువా, వినిజ్ముసి నాల్లి రోస్కు అజినాద్. అందెజె గొప్ప కంపు ఏలు ముంజినాదె”, ఇజి వెహ్లాద్

40 అందెజె యేసు దనిజ్, “నీను నమ్మితిజ, దేవుణు గొప్ప పెరికాన్ ఇజి నీను నూణిలె ఇజి నాను నిజి వెహ్లా గదె?”, ఇజి వెహ్లాన్.

41 అందెజె వారు పణుకు లాగితార్. యేసు కణుకు ముస్కు బస్తాండ్రె, “ఓ బా నీను నా పార్లనం వెంజినిజ్నిజి వందనమ్కు.

42 నీను ఎస్తివలె బా నజి వెంజినిలె ఇజి నాను నెన్ను. గాని ఇబ్బె నిల్లి మంజిని యా లోకుర్వందిజ్ నాను నిజి వందనమ్కు వెహ్లా మన. ఎందానిజ్ ఇహిజ, నీనె నజి పోక్సి మన్నికాన్ఇజి వారు నమిదెజ్”, ఇజి పార్లనం కితాన్.

43 పార్లనం కితాండ్రె, వాండ్రు, “లాజరు వెల్లి రఅ”, ఇజి డేల్లి డటం వెహ్లాన్.

44 అయావలె లాజరు వెల్లి వాతాన్. వన్ని కికు కాల్కు పాతెజాణిజ్సుటిస్త మహార్. వన్ని మొక్కిం రూమాలదాన్ తొహ్కాత మహాద్. యేసు వరిజ్, “వన్నిజ్సుటిస్త మన్నికెజ్లాగ్దు. వన్నిజ్ నడినిలెకెండ్ కిదు”, ఇహాన్.

యేసుజ్సప్తెజ్ సుడేజినార్

45 అందెజె మరియెజ్ సుడేదెజ్ వాతి యూదురు లొఇ నండ్రెండార్, యేసు కితిక సుడేతారె, వన్ని ముస్కు నమకం ఇట్టార్.

46 గాని వరి లొఇ సెగెండార్ పరిసయురుజ డగ్రు సాన్సి, యేసు కితిక వరిజ్ వెహ్లాద్.

47 నస్తివలె పెరి పుజెరిజు నీ పరిసయురు, పెద్దలజి కూకిప్సారె, “వాండ్రు గొప్ప బమ్మ ఆని పణిజ్ కిజినాన్? అందెజె మాటు ఇన్నిక కిదెజ్?

48 మాటు వన్నిజ్ యా లెకెండ్ పణి కిదెజ్ సరి సితిజ, లోకుర్ విజెరె వన్నిజ్ నమినార్. రోమాదికార్ వానారె, మా గుడిజి, యూదురు అతి మజి విజు నాననం కినార్”, ఇజి వర్గితార్.

49-50 నస్తివలె వరి లొఇ కయపా ఇన్నికాన్ ఒరెన్ మహాన్. వాండ్రు అయా ఏంటు విజు పుజెరిజు ముస్కు పెరి పుజెరి. వాండ్రు వరిజ్, “మీరు ఇనికబా నెన్ఇతిదెర్. రోమాదికార్ మా గుడిజి, యూదురు అతి మజి పూర్తి నాననం కినిదని ముస్కు లోకుర్ వందిజి ఒరెన్ వాండ్రు సానికాది మిజి నెగెద్ ఇజి మీరు నెన్ఇదెరా?”, ఇహాన్.

51-52 వాండ్లు వెహ్సిని దని అర్థం వాండ్రె నెన్ఎతాన్. గాని వాండ్లు ఆ ఏంటు విజు వుజెరిజు మున్ను పెరి వుజెరి. అందెజె యేసు యూదురు వందిజ్ సానాన్లె ఇజి, యూదురు వందిజె ఆవీండ, నెద్దితి మన్ని దేవుణు కొడోరిజ్ కుడూప్పి తసి వరిజ్ ఉండ్రె లోకురికిదెజ్. దినివందిజ్ యేసు సానాన్లె ఇజి వాండ్లు ఎత కిజి జర్గిణ ముజాలె వెహ్సన్.

53 అందెజె అయా నాండిజ్అసి వన్నిజ్సప్తెజ్ వారు సుడేజి మహోర్.

54 అందెజె యేసు విజెరి వన్నిజ్ నెన్పాలెకెండ బూలావెతాన్. గాని వాండ్లు ఎయెర్ మన్ఇ బాడిః డర్దు మన్ని ఉండ్రె ప్రాంతమదు సాహోన్. అయా ప్రాంతమదు మన్ని ఎప్రయెం ఇన్ని ఉండ్రె పట్టుమదు వన్ని సిసూర్ వెట వాండ్లు మహోన్.

55 యూదురి వస్కపండ్రెయ్ డర్దు వాతివలె, నండో ప్రాంతమకాణిజ్ నండోడార్ యెరూసలెమదు సాహోర్. పండ్రెయ్ ముజాలె విజెరి సుబ్బరుం మనిక ఉండ్రె ఆసారం. అందెజె, వారు సుబ్బరుం మన్నివందిజ్ వారు యెరూసలెమదు వాతార్.

56 వారు యేసుజ్ రెబాజినె మహోర్. వారు దేవుణు గుడిః అరుజుదు నిహి మహివలె, ఒరెన్ వెట ఒరెన్, “ఇన్నిక ఒడేబిజెని? వాండ్లు పండ్రెయ్దిజ్ వానాండ్రా, సీలెనా?”, ఇజి వర్గితార్.

57 గాని పెరి వుజెరిజు ని పరిసయరు ఉండ్రె ఆడ్ర సిత మనార్. ఎయెనిబా యేసు ఎంబె మనాన్ ఇజి నెస్తిజ, వాండ్లు వరిజ్వెహ్సెజ్. ఎందానిజ్ ఇహిజ, వన్నిజ్ అర్దు క్షిదెజ్.

12

1 వస్కపండ్రెయ్ మెదొల్స్తెజ్ ఆరు దినమకు మనె. అయావలె, యేసు లాజరు మన్ని బెతానియ ఇని పట్టుమదు సాహోన్. యా లాజరుజ్నె యేసుసాపుదాన్ బత్తిస్తాన్.

2 అబ్బె వారు యేసువందిజ్ ఉండ్రె వింతు తయార్ కిత్తార్. మార్తనె వింతుదు నవదరణి. బోజనమదిజ్ బస్తి మహివరివెట లాజరుబా యేసువెట బస్తాన్.

3 నస్తివలె, మరియు ఉండ్రె సీసాదు మన్ని వాసన నూనె లాగితాదె, యేసు పాదమకాజ్ వాక్తాదె దనికొప్పుదాన్ వన్ని పాదమకు తెలితాద్. యా వాసన నూనె, నండో కరీద్తిక. యాక జటమాని ఇని ఉండ్రె మొకదానె, తయార్ కిత్తిక. అది వాసన నూనె వాక్తివెలె, అయా ఇల్లు విజు నెగ్గి వాసనందాన్ నిండ్రితాద్.

4-5 అయావలె వన్ని సిసూర్ లోఇ ఒరెన్ఆతి ఇస్కరియొతు యూద, “ఎందానిజ్ యా వాసనం నూనె మూండ్రె వందిజ్ వెండి రుపాయెజు పొర్ని అయా డబ్బు బీదాతి వరిజ్ సిఇతి?”, ఇజి వెహ్సన్. యా ఇస్కరియొతు యుదనె, వెన్కా యేసుజ్ యుదురి అదికారిజ కీదు ఒపజెప్పిక్తాన్.

6 ఏలు వాండ్లు యా లెకెండ వెహ్సెక, బీదాతివరిజ్ నెగిండ సుడేజిని ఇజి అవిద్ గాని వాండ్లు డోజి వాండ్లు. వరి సేవవణి వందిజ్ లోకుర్ సీజని డబ్బు ఇడ్చి నస్తి వీండ్రె అన్ మనాన్. వాండ్లు వన్కాలోఇహోన్ వన్ని సాంత కర్పు వందిజ్ డోజి కిజి మహోన్. అందెజె వాండ్లు ఆహ వెహ్సన్.

7 అందెజె యేసు, “దనిజ్బాద కిమాట్. నజీ సమాది కిని దినమదాక అయోక దని బాన్మన్నిద్.

8 బీదకెకార్ ఎస్తివలెబా మీ వెట మంజినార్. గాని నాసు ఎలకాలం మీ వెట మన్ఎ”, ఇజి వెహ్సన్.

9 అహిజ, యూదురిజ లోఇ మంద లోకుర్, యేసు బెతానియదు మనాన్ ఇజి నెస్టార్ అబె వాతార్. వారు యేసుజ్ సుడేదెజిఇజినె ఆవీండ, వాండ్లు సాపుదాన్బత్తిస్తి లాజరుజ్ సుడేదెజిబా వాతార్.

10-11 అందెజె పెరి వుజెరిజు, లాజరుజ్బా సప్తెజ్ ఇజి ఆలోసనం కిత్తార్. ఎందానిజ్ ఇహిజ, వన్నిజ్ జర్గితి దనివందిజ్ సుడేజి యూదురు నండోడార్, వరి పెద్దలెజ డిఃసి యేసుమున్ను నమకం ఇడేజి మహోర్.

12 మర్సనాండిజ్, వస్క పండ్రెయ్దిజ్ యెరుసలెం పట్టుమదు వాతి మందలోకుర్ యేసు యెరూసలెమదు వాజినాన్ ఇజి వెహోర్.

13 అందెజె వారు ఈత మటిజ్ అస్టార్, పట్టుమదాన్ వెల్లి సాహోర్. వన్నిజ్ ఎర్దు సాన్ని, “ఓసన్న ప్రలు సిత్రె అతికారమదాన్ వాజని వన్నిజ్ పొగిడిఃపిద్. ఇస్టాయెలు లోకురిజ్ ఏలుబడిః కినిరాజుజ్ పొగిడిఃపిద్”, ఇజి డటం డేల్ని వెహ్సర్.

14-15 “ఓ సియోను గాలీసి*, తియెలామాట్. ఇవిలోన్ మీ రాజు గాడఁదె పిల్ల మున్ను, ఎక్క బస్తాండ్రె వాజినాన్†”, ఇజ దేవుణు మాటుదు రాస్తి మన్నిలెకెండె, యేను ఉండ్రె గాడఁదె పిల్లదిజ్ నుడఁతాండ్రె దనిమున్ను బస్తాండ్రె వాజినాన్.

16 అయావలె వన్నిసిసూర్ యా జగ్గితి వన్యాజ్ అరదం కివితార్. గాని వెనుకయేను సాజి, మరి బత్కిజి, దేవుణు మంజిని బాడిదు వన్ని వెట గొప్పు జాయ్దు మండ్రెజ్ దేవుణు వన్నిజ్ ఒతివెలెనె, యా జగ్గితి సజతిజ్ వన్నివందిజ్ దేవుణు మాటుదు ముజాలె రాస్త మనాద్ ఇజి అయాక వన్నిజ్ జగ్గితాద్ ఇజి వారు అర్దం కితార్.

17 అహిజ, యేను లాజరుజ్ దూకిదాన్ కూక్కి సావుదాన్ మరి బత్కిస్తివలె వన్ని వెట మహి లోకురనె, లాజరుజ్ జగ్గితిక సాటిసిసూర్.

18 యా లోకుర వెప్తి మాట విహారె, మంద లోకురవన్నిజ్ ఎద్దు సాన్సిసూర్. ఎందానిజ్ ఇహిజ, వాండ్రు బమ్మాతి గొప్పు పణిజ్ కిత్రాన్ ఇజి వెహార్.

19 అయావలె పరిసయ్దురుజు వరిజ్ వారె, “ఇదిలో, నండో లోకుర వన్ని వెన్యా సాన్సిసూర్. మాటు కిజినికెజ్ ఇనికబా, వన్ని వెట సాన్ఎండ వరిజ్ ఆవకిజ్”, ఇజి వర్గితార్.

యేను వన్నిసావు వందిజ్ వర్గిజినాన్

20 నస్తివలె, పస్కు పండ్రెయ్ కినివలె దేవుణుదిజ్ పొగిడిజి మాడిస్టెజ్ యెరుసలెమ్దు వాతి వరి లోఇ సెగెండార్ యూదురు ఆకారం మహార్.

21 వారు గలిలయ ప్రాంతమ్ది బెత్సయిద పట్టమ్ది పిలిపు డగ్రు వాతారె, “బాబు మాపు యేనుజ్ నుడఁదిజ్ ఆస అజినావ్”, ఇజి వెహార్.

22 పిలిపుజ్ వెప్తిజ్, వాండ్రు అంద్రెయెజ్ వెహ్హాన్. వీరు రివర్ కూడ్డి యేనుజ్ వరి ఆస వెహ్హార్.

23-24 అందెజె యేను వరివెట ఈహు వెహ్హినాన్. “లోకు మరిసి ఆతి నజి దేవుణు వన్ని వెట వన్ని జాయిదు మండ్రెజ్ వాండ్రు మంజిని బాడిదు ఒని దినమ్కు డగ్రు ఆతె మనె. నాను నిజం వెహ్హినాన్ ‘ఉండ్రె గోదము గిడ బూమిదు అర్చి సాఎండ మహిజ, అది అయె లెకెండ మంజినాద్. గాని ఆ గిడ సాతిజ నండో గిడెజ్ ఆసె.

25 ఎయెన్బా వన్ని సొంత పాణమ్దిజ్ లావు ప్రేమిస్తిజ, వాండ్రు వన్ని పాణం ఎలాకాలం దేవుణు వెట బత్కిని బత్కుదు మన్ఎండ అయాక పాడు కిజినాన్. గాని ఎయెన్బా యా లోకమ్దు బత్కినివలె, వన్ని సొంత పాణమ్దిజ్ లావు ప్రేమిన్ఎండ మహిజ, వాండ్రు ఎలాకాలం బత్కిని బత్కు వందిజ్ వన్ని పాణం కాపాడిజినాన్.

26 ఎయెన్బా నజి సేవ కితిజ, వాండ్రు నా సిసూ అదెజ్ వలె. నాను ఎంబె మంజినానో, అబె నజి సేవ కినికాన్బా మంజినాన్. నజి సేవ కిని వన్నిజ్ నా బుబ్బు గవరం సీనాన్”.

27 మరిబా వాండ్రు వెహ్హినాన్, “ఏలు నా పాణం బాద ఆజిన. నాను ఇన్నిక ఇండ్రెజ్? ఓ బా, నజి వాని కస్టమ్దాన్ నజి తప్రినె, ఇజి వెహ్హెజా? సిలె. ఎందానిజ్ ఇహిజ, యా కస్టమ్కు ఓరిస్సి వందిజె నాను వాత మన.

28 ఓ బా, సీను గొప్పు వెరికి ఇజి లోకురిజ్ తోరె ఆల”, ఇజి వెహ్హాన్. అయావలె అగానమ్దాన్ ఉండ్రె జాటు వాతాద్. “నాను గొప్పు వెరికాన్ ఇజి సీను కితి పణిజాణిజ్ తోరె ఆత మన. సీను సాజి మరి బత్కినివలె నాను మరి అయాక తోరె ఆస”, ఇజి జాటుదు దేవుణు వర్గితాన్.

29 నస్తివలె అబె నిహి మహి లోకుర అయాక విహారె, అయా జాటు అగానమ్దు దీడితిక ఇజి వెహ్హార్. గాని మరి సెగెండార్, “దేవుణు మంజిని బాడిదాన్ దేవుణు దూత ఒరెన్ వన్ని వెట వర్గితాన్”, ఇహార్.

30 అందెజె యేను, “ఏలు మీరు జాటుదాన్ విహి మాటిజ్ నజి దేవుణు పోక్తాన్ ఇజి మీరు నెస్టెజ్ మీ వందిజె వాతె. నా వందిజ్ ఆవది.

31 ఇయెలె, దేవుణు యా లోకమ్ది లోకురిజ్ తిర్చు సీని సమయం. ఇయెలె లోకమ్ది అతికారి ఆతి నయ్హానుజ్ వన్ని అతికారమ్దాన్ దేవుణు వెల్లి నెక్కి సమయం.

* 12:14-15 12:14-15 జేకు 9:9 † 12:14-15 12:14-15 సియెను గాలీసి ఇజి ఇబ్బి వెహ్హినిక యెరుసలెమ్దు మన్ని వరిజె.

32 నజీ బూమి మున్నుహాన్ సిలువాదు ఎకిస్తివలె, విజు దేసెమ్కాణి లోకురిజ్, నాను నా డగ్రు తపిస్సాలె”, ఇజి వెప్సాన్.

33 వన్నిజ్ ఎలాగ నప్పారెల ఇజి లోకురిజ్ తోరిస్టెజ్ వాండ్రు యా మాటజ్ జిర్రిని ముజాలె వెప్సాన్.

34 అయావలె మంద లోకుర్ వన్నిజ్, “దేవుణు మాటదు మాపు నద్ విజినాప్ గదె క్రీస్తు ఎలాకాలం బత్తి నాన్లె ఇజి. మరి నీను ఎలాగ వెప్పాని, లోకు మరిసి ఆతి నిజి సిలువాదు ఎకిస్టెజ్ వలె ఇజి. అహిజ, నీను వెప్పాని లోకు మరిసి ఎలాగ మర్కాన్.

35 అందెజె యేసు, “వాండ్రె జాయి ఇజి వన్ని వందిజె వరిజ్ ఈహు వెప్పానాన్: “జాయి ఆతి నాను మీ వెట సెగం కాలమ్ నె మంజినలె. అందెజె సీకట్ వాని ముజాల, జాయ్ ఆతి నాను మనివలె మీరు నజీ ఇష్టం ఆని వజ నడిఁదు. సీకట్ దు నడిఁనికాన్ వాండ్రు ఎంబె సాన్ సీనాండ్రొ ఇజి వాండ్రు నెన్ ఎన్.

36 అందెజె మీరు జాయ్ దు బత్తిజిని నా కొణ్డోర్ అందెజ్, జాయి ఆతి నాను మీ వెట మనివలె నజీ నమ్మిదు. వాండ్రు యా మాటజ్ వెప్సాండ్రె వరిబాణిజ్ సాహండ్రె వరిజ్ తోరింండ డాజిజ మహాన్.

37 వాండ్రు నిసా గొప్ప బమ్మాతి వణిజ్ వరిఎద్రు కితిజ్ బా యూదురు లొఇ నండొ లోకుర్ వన్నిజ్ నమిఎతార్.

38 ప్రబువా మాపు వెప్సా మాటజ్ ఎయెర్ నమ్మిత్తార్? ఎయెరిజ్ దేవుణు వన్నిసత్తు తోరిస్తాన్?’, ఇజి యెసయ ప్రవక్త వెప్సా మాట పూర్తి ఆని వందిజె వారు నమ్మిఎతార్.

39-40 యెసయ ప్రవక్త మరి ఈహు వెప్సా మనాన్, ‘వారు వరి కణకాణిజ్ తోవిండ మండ్రెజ్ దేవుణు వరి కణకు గుడిఁ కిత్తాన్. వారు వరిదాన్ అర్థం కివిండ మండ్రెజ్ దేవుణు వరి మున్నుసు గటి కిత్తాన్. వరిజ్ నెగెణ్ కిదెజ్ వారు నా డగ్రు రివిండ మండ్రెజ్ నాను అయా లెకెండొ కిత’, ఇజి. అందెజె వారు యేసుజ్ నీ నమ్మిదెజ్ అట్ విండ ఆతార్.

41 యెసయ ఎందానిజ్ యా లెకెండొ వెప్సాన్ ఇహిజ, యేసు గొప్ప పెరికాన్ ఇజి వాండ్రు నుడత మహాన్. వాండ్రు వెప్సా మాటజ్ యేసు వందిజె వెప్పానె.

42 గాని యూదురు అదికారిజ లొఇ నండొండార్ యేసు మున్ను నమకం ఇట్టార్. గాని పరిసయరు వరిజ్ ఇన్నిక కినార్ ఇజి తియెల్ ఆజి వారు యేసుజ్ నమ్మిజినాప్ ఇజి లోకుర్ ఎద్రు వెహ్ ఎతార్. వరిజ్ యూదురి మీటిజ్ ఇండ్రెణిజ్ వెల్లి కినార్ ఇజి తియెల్ ఆతార్.

43 ఎందానిజ్ ఇహిజ, వారు దేవుణు వరిజ్ పొగిడిఁ దని మున్ను లోకుర్ వరిజ్ పొగిడిఁదెజ్ ఇజి నండొ కోరితార్.

44 మరి యేసు ఈహు డటం వెప్పానాన్, “నా మున్ను నమకం ఇడ్డికాన్ ఎయెనబా నజిని ఆవిండ, నజి పొక్తి వన్నిజ్ బా నమిజినాన్.

45 నజీ నుడఁజినికాన్ ఎయెనబ నజి పొక్తి వన్నిజ్ బా నుడఁజినాన్.

46 నజీ నమ్మినికాన్ ఎయెనబా సీకట్ దు బత్తి ఎండ మంజిని వందిజె నాను జాయి లెకెండొ లోకమ్ దు వాత మన్న.

47 నా మాటజ్ వెంజి అయావజ కిఇవన్నిజ్, తీర్పు సీజినాను సిక్కి సివి. ఎందానిజ్ ఇహిజ, ఆహా తీర్పు సీజి సిక్కి సీదెజ్ ఆవిద్ నాను అయా లోకమ్ దాన్ వాతిక. గాని లోకురిజ్ రక్కిన్ని వందిజె వాత.

48 నజీ నెక్కి పొక్కి నా మాటజ్ వజ కిఇవన్నిజ్, వాండ్రు కిఇకాదె వన్నిజ్ ఎలాకాలం మున్ని సిక్కి సీనాద్. నాను వెప్సా మాటజ్ నె ఆకార్ దినమ్ దు నాను మరజి వానివలె వన్నిజ్ తీర్పు సీనాద్.

49 ఎందనిజ్ ఇహిజ, నాను నా సొంత అతికారమ్ దాన్ వెప్సాక ఆవిద్. గాని నజీ పొక్తి నా బుబ్బనె, నాను ఇన్నిక వెప్సాజ్, ఎలాగ వెప్సాజ్ ఇజి ఆడ్ర సిత మనాన్.

50 వాండ్రు వెప్సా ఆడ్రెజ్ లోజిజినికాన్ ఎలాకాలం బత్తి నాన్. అందెజె నా బుబ్బ నజీ వెహ్ అ ఇజి వెప్సాకెజ్ నె నాను వెప్పానె.

13

యేసు వన్నిసినూరిజ్ పాదమ్ కు నొరజినాన్

1 నన్నీవలె, పన్ను పండ్లొమ్మ కిని ముజాహి దినం. యా లోకం డిహి బుబ్బు డగ్గు సొండ్రెజ్ టయం ఆతాద్ ఇజి యేసు నెస్తాన్. వాండ్రు ఎస్తివలెబా వన్ని మున్ను నమకం ఇడ్రివరిజ్ ప్రేమిసి మహాన్. వాండ్రు సొనిదాక ప్రేమిసి నె మహాన్.

2 యేసుని వన్ని సిసూరు పొదొమ్ బోజనమ్దిజ్ బస్త మహాల్. సిమెసు మరిసి ఆతి ఇన్నురియెతు యూద మన్నుదు సయ్యూసు ముజాలె ఉండ్రి ఆలోసన పుట్టిస్త మహాన్, యేసుజ్ నెఇవరి కీదు ఒవజెప్తెజ్ ఇజి.

3 బుబ్బు వన్నిజ్ విజు దనిమున్ను అతికారం ఒవజెప్తు మహాన్, ఇజి యేసు నెస్తాన్. వాండ్రు దేవుణుబాణిజ్ వాత మహాన్, దేవుణుడగ్గు సొన్నినాన్ ఇజిబా నెస్తాన్.

4 అందెజె వాండ్రు బీజనమ్దిజ్ బస్తి మహిబాణిజ్ నిజీతాండ్రి, వాండ్రు పిడేగితి మన్ని సొల్గు లాగితాండ్రి ఉండ్రి తువాలె నడుముదు తొహి ఆతాన్.

5 తొహిండ్రి, ఉండ్రి పల్లెమ్దు ఏరు వాక్తాండ్రి వన్ని సిసూర్ పాదమ్కు నొరజి వన్ని నడుముదు తొహితి మహి తువాలేదాన్ వరి పాదమ్కు తేరిజనాన్.

6 ఆహె, వాండ్రు సిమెసు పెతురుడగ్గు వాతివలె, వాండ్రు, “ప్రబువా, నీసు నా పాదమ్కు నొరదెజ్ నుడేజినిదా?”, ఇజి వెనబాతాన్.

7 అందెజె యేసు, “నాను ఇనిక కిజన ఇజి ఏలు నీసు నెనెఇ గాని వెనుక నీసు అర్దం నెస్తిలె”, ఇజి వన్నిజ్ వెప్తాన్.

8 అయావలె పేతురు, “సిల్లె, నీసు నా పాదమ్కు ఎనెజ్బా నొరదెజ్ ఆవిద్”, ఇజి వెప్తాన్. దనిజ్ యేసు, “నాను నీ పాదమ్కు నొరెవిండమహిజ, నీసు నా సిసూడు ఆఇ”, ఇజి వెప్తాన్.

9 అయావలె సిమోన్ పేతురు, “అహిజె ప్రబువా, నా పాదమ్కునె ఆవిండ నా కికు, నా బుర్రబా నొరెఅ”, ఇజి వెప్తాన్.

10 అందెజె యేసు, “ఏరుకాబతి వన్నిజ్ వన్నిబుడొల్ విజు నొరదెజ్ అవనరం సిల్లెద్. వన్ని పాదమ్కునె నొరదెజ్. ఎందానిజ్ ఇహిజ, పాదమ్కునె వెటనె డుల్లిఅనె. నా సిసూర్ ఆత్తి మీరు విజెదె సుబ్రురం ఆతిదెర్. గాని ఒరెన్ ఆవిన్”, ఇజి వెప్తాన్.

11 వన్నిజ్ నెఇవరి కీదు ఒవజెప్తికాన్ ఎయెన్ ఇజి వాండ్రు నెని మహాన్. అందెజె ‘మీరు విజెరె సుబ్రురం ఆత్తికిదెర్ ఆఇదెర్’, ఇజి వాండ్రు వెప్తాన్.

12 వరి పాదమ్కు నొరజి వీస్తి వెన్కా, వాండ్రు లాగితి ఇడ్రి వన్ని సొల్గు వ్డేగితాండ్రి, బోజనమ్దిజ్ బస్తిమహి బాడిడు సొహాన్. సొహాండ్రి వాండ్రు వరిజ్ వెనబాతాన్, “నాను ఏలు మిజి కితివణిది అర్దం మిజి తెలినాదా?”

13 మీరు నజి కూక్కివలె, ‘ఓ బోదకినికి’ ఇజి నొ, ‘ఓ ప్రబువా’ ఇజి నొ కూక్కిసినిదెర్. నాను బోదకినికానె. ప్రబునె. అందెజె మీరు కూక్కినిక తప్ప సిల్లెద్.

14 ఏలు మీ ప్రబు ఆతి, బోదకినికి ఆతి నాను నీ పాదమ్కు నొరత మన్ను. అందెజె మీరుబా ఒరెన్ మరి ఒరెన్ వన్ని పాదమ్కు నొరదెజ్.

15 నాను మిజి కితిలెకెండే మీరు బా కిని వందిజ్, అయా వణి ఎలాగ కిదెజ్ ఇజి నాను మిజి తొరిస్త మన్ను.

16 నాను నిజం వెహ్సిన్, ఎవేణి వణి మన్నిసి బా వన్ని ఎజుమాని మున్ను పెరికాన్ ఆవిన్. అయి లెకెండే ఎవేణి కబ్బు తనికాన్ బా వన్నిజ్ పొక్కి వన్ని మున్ను పెరికాన్ ఆవిన్.

17 మీరు ఏలు యా నిజమాతి నజతిజ్ నెస్తిదెర్. అందెజె మీరు అయా లెకెండే కితిజి మీరు గొప్ప వారు”.

యేసు వన్నిజ్ నెఇవరికిదు ఒవజెప్తి దనివందిజ్ జగ్గినిముజాలె వెహ్సినాన్

18 “మీరు పాపమ్కాణిజ్ నొరె ఆత్తిదెర్ ఇజి నాను వెహ్సినిక మీ విజెరె వందిజ్ ఆవిద్. నాను ఏరెపాటు కితికార్ ఎలాగ మర్రికార్ ఇజి నాను నెస్తి. గాని, ‘నా వెట బోజనం ఉణిజి మహికాన్ నజి పడేఇకాన్ ఆతాన్’, ఇజి దేవుణు మాటదు రాస్తి మన్ని మాట పూర్తి అదెజ్ నాను యా లెకెండే కిత్త.

19 అయాక జగ్గినివలె, నానె మెనయ ఇజి మీరు నమినివందిజె, అయాక జగ్గిని ముజాలె, యెలె నాను వెహ్సిన్.

20 నాను నిజం వెప్పిన, ఎయెన్బా నాను పోక్కివన్నిజ్డగ్రు కితిజ, వాండ్రు నజీ డగ్రు కితి లెకెండ. ఎయెన్బా నజీ డగ్రు కితిజ, నజీ పోక్కి వన్నిజ్డగ్రు కితి లెకెండ”, ఇహాన్.

21 యేసు యాక వెప్పివలె వన్ని మున్నుదు బాద ఆతండ్రె, “నాను నిజం వెప్పిన, మీ లోఇ ఒరెన్ నజీ సెఇవరి కీదు ఒపజెప్పాన్లె”, ఇజి వెప్హాన్.

22 అయావలె వన్ని సిసూర్ ఎయెన్వందిజ్ వాండ్రు ఈహు వెప్హాన్ ఇజి అర్దం ఆఇతిజ్ ఒరెన్ మొకొం ఒరెన్సుడె; ఆజినార్.

23 బోజనమందిజ్ బన్ని మహివలె, సిసూర్ లోఇ యేసు నండొ ప్రేమిస్తి సిసూ వన్ని డగ్రునె బోజనమందిజ్ బన్స మహాన్.

24 సిహాన్ పేతురు వన్నిజ్ నయన కిజి, “ఎయెన్ వందిజ్ వాండ్రు వర్గిజనాన్ఇజి వన్నిజ్ వెన్బాల”, ఇజి వెప్హాన్.

25 అందెజె అయా సిసూడు; యేసుజ్ రోన్పె ఆజి, “ప్రబువా, వాండ్రు ఎయెన్?”, ఇజి వెన్బాలాన్.

26 అందెజె యేసు, “నాను యా లోటె ముక పులాదు ముడుక్కి ఎయెన్సిసూనొ వాండ్రె నజీ ఒపజెప్పికాన్”, ఇజి వెప్హాన్. వెప్హండ్రె ముక పులాదు ముడుక్కి సిమొసు మరిసి ఆతి ఇస్కరియొతు యుదెజ్ సిత్తాన్.

27 యూద అయా రొట్టెముక్క తిహి వెటనె నయతాసు వన్ని లోఇ డుగితాండ్రె వన్ని మున్ను అతికారం కితాన్. అయావలె యేసు, “నీసు కిదెజ్ ఒడెబిజనిక బేగి కిత”, ఇజి వెప్హాన్.

28 గాని బోజనమందిజ్ బన్నివరి లోఇ ఎయెరిజ్బా ఎండానిజ్ యేసు ఆహ వెప్హాన్ ఇజి అర్దం ఆవితాద్.

29 వరి కరెనవందిజ్ మన్ని డబ్బు విజి యూద కీదునె మనె. అందెజె పండెయందిజ్ కావాలిస్తికెజ్, సాన్ని కొల్ల ఇజిసు, సిలిజ బీదాతివరిజ్ డబ్బు సిఅ ఇజి వెప్పినాన్సు ఇజి సిసూర్ సెగొండార్ ఒడిబితార్.

30 యూద ఆ రొట్టెముక్క తిహివెటనె వెల్లి సాహాన్. అక్క రెయు.

31 వాండ్రు సాహి వెన్కా యేసు ఈహు వెప్హాన్, “లోకు మరిసి ఆతి నాను ఎసా గొప్ప పెరికాన్ ఇజి లోకుర్ ఏలునూణార్లె. దేవుణు ఎసా గొప్ప పెరికాన్ ఇజి నా వెట నూణార్లె.

32 దేవుణు గొప్ప పెరికాన్ ఇజి లోకు మరిసి వెట తోరె ఆతిజ, లోకు మరిసి గొప్ప పెరికాన్ ఇజి దేవుణునె తోరిస్సాన్. అయాక వెటనె తోరిస్సాన్.

33 నాను ప్రేమిస్తికిదెరా, కండెక్ నమయమనె నాను మీ వెట మంజన. మీరు నజీ రెబానిదెర్, గాని యూదురు అదికారిజ నాను వెప్పి లెకెండ, “నాను సాని బాడిడు మీరు వాదెజ్ అట్ఇదెర్” ఇజి ఏలు మీవెట వెప్పిన.

34 నాను కొత్త ఆడ్ర మిజి సీజన. మీరు ఒరెన్ మరి ఒరెన్ వన్ని వెట ప్రేమిన్అ, ఇజి. నాను మిజి ప్రేమిస్తిలెకెండ మీరు బా ఒరెన్ వన్ని వెట ఒరెన్ ప్రేమిస్తిజ్వలె.

35 మీరు ఒరెన్ వన్ని వెట ఒరెన్ ప్రేమిస్తిజ, మీరు నా సిసూర్ ఇజి లోకుర్ విజెరె నెస్సార్.

36 అయావలె సిహాన్ పేతురు, “ప్రబువా, నీసు ఎంబె సాన్సిని?”, ఇజి వెన్బాలాన్. వెన్బాతిజ్ యేసు, “నాను ఏలు సాని బాడిడు నీసు ఏలు వాదెజ్అట్ఇ. గాని వెన్కా వానిలె”, ఇజి వెప్హాన్

37 అందెజె పేతురు, “ప్రబువా, ఎండానిజ్ నాను ఏలు మీ వెట వాదెజ్ అట్ఇ. నీ వందిజ్ సాదెజ్బా నాను తయార్నె”, ఇజి వెప్హాన్.

38 అందెజె యేసు, “నా వందిజ్ సాదెజ్బా నీను నిజం తయార్నెనా? కొరు కెరెని ముజాలె, ‘నీను నజి నెన్వ’ ఇజి ముసార్ వెప్పాలె”, ఇజి వెప్హాన్.

14

యేసు వన్ని సిసూరిజ్ దయరం సీజనాన్

1 యేసు మరిబా వన్ని సిసూరిజ్ వెప్పినాన్, “మీ మున్నుదు తియెల్ ఆజి బాద ఆమాట్. దేవుణు మున్ను నమకం ఇడ్డిదెర్. నా మున్నుబా నమకం ఇడ్డెదు.

2 వరలోకమదు నా బుబ్బు ఇండ్రొ నండొ గదిజ్మనె. అయ లెకెండ సిల్లెండ మహిజ, నాను మిజి వెప్హ మరి. మిజి ఉండ్రె బాడి; తయార్కిదెజ్ నాను అబ్బి సాన్సిన్.

3 నాను సొన్ని మిజి ఉండ్రీ బాడ్డి తయార్ కితి వెనుక, నాను మరజవాజి నావెట నాను మంజినిబాన్ మీరుబా మండ్రేక్, కూక్కు ఒనాలె.

4 నాను సొన్నిని బాడిఁదు సొండ్రేక్ సరి మీరు నెస్సిదెర్”, ఇజి వెప్తాన్.

బుబ్బుడగ్రు సొండ్రేక్ నానెసరి ఇజి వెప్సిన్

5 అయావలె తోమా వన్నిక్, “ప్రబువా, నీను ఎంబె సొన్నిని ఇజి మాపు నెన్వీవ్. అందెజె సరి మాపు ఎలాగ నెస్సెక్ ఆనావ్?”, ఇజి వెప్తాన్.

6 అందెజె యేసు వన్నిక్, “నానె బుబ్బు డగ్రు సొండ్రేక్ సరి. నానె బుబ్బు వందిక్ నిజమాతికెక్ తోరిసి నెన్పిస్సాన్. నానె ఎలాకాలం దేవుణు వెట బత్తిని బత్తు నీనికాన్. నా వెటనె లోకుర్ విజెరె బుబ్బుడగ్రు సొనార్.

7 నాను ఎయెన్ ఇజి మీరు నెస్సి మహిదెర్ ఇహిజ, నా బుబ్బు ఎయెన్ ఇజిబా మీరు నెస్సిదెర్ మరి. ఏలుదాన్ మీరు వన్నిక్ నెస్సి మనిదెర్, సుడిఁతి మనిదెర్”, ఇజి వెప్తాన్.

8 నన్సవలె పిలిపు, “ప్రబువా, బుబ్బుక్ మజి తోరిన్ అ. ఆకాదె మజి సాలు”, ఇజి వన్నిక్ వెప్తాన్.

9 అందెజె యేసు వన్నిక్, నాను నిసొ కాలం మీ వెట మహా. మహిజబా నీను నజి నెన్ ఇదా పిలిపు? నజి నెడిఁతికాన్ ఎయెన్ బా నా బుబ్బుక్ సుడిఁత మనాన్. అయావలె బుబ్బుక్ మజి తోరిన్ అ ఇజి ఎలాగ నీను వెప్తాక్ అట్ నీని?

10 నాను నా బుబ్బు వెట కూడిఁత మన. బుబ్బు నా వెట కూడిఁత మనాన్ ఇజి నీను నమ్ ఇదా? నాను మీ వెట వెప్సిని మాటెక్ నా సొంత మాటెక్ ఆఱ. గాని నా వెట కూడిఁతి మన్ని బుబ్బు బాణిక్ వాతికెక్ అయాకెక్. వాండ్రు వన్ని పణిక్ నావెట కిటినినాన్.

11 నాను నా బుబ్బు వెట కూడిఁత మన, బుబ్బు నా వెట కూడిఁత మనాన్ ఇజి నాను వెప్సినిక మీరు నమ్మిరు. నీలిజ, నాను కిజిని విజు బమ్మ అని పణిజ సుడిఁజి అయాక నమ్మిరు.

12 నాను నా బుబ్బు డగ్రు సొన్నిన. అందెజె నజి నిజం నమ్మితికాన్, నాను కిజిని బమ్మ అని పణిక్ వాండ్రు బా కినాన్. ఒబ, దనిజింక లాపు పణిక్ వాండ్రు కినాన్ ఇజి మీ వెట నిజం ఇక వెప్సిన్.

13 నా ఇస్మదిక్ కూడిఁతి మన్ని ఇనికబా మీరు లొస్తిజ, నాను అయాక కిన్. బుబ్బు గొప్ప పెరికాన్ ఇజి లోకురిక్ తోరిస్తిజ, మరిసి అతి నాను అయాక కిన్.

14 నా ఇస్మదిక్ కూడిఁతి మన్ని ఇనికబా మీరు లొస్తిజ, నాను అయాక కిన్.

15 మీరు నజి ప్రేమిస్తిజ, నా ఆడ్రేక్ మీరు వెనిదెర్.

16 నాను బుబ్బుక్ లొస్సు. మీ వెట ఎలాకాలం మండ్రేక్ మరి ఒరెన్ తోడుఁ మంజిని వన్నిక్ బుబ్బు మిజి నీనాన్.

17 వాండ్రు దేవుణు బాణిక్ నిజమాతికెక్ వెప్సిని దేవుణు ఆత్మ. క్రీస్తుక్ నమ్మిఇకార్ ఒరెన్ తోడుఁ మంజిని వన్ని వజి వన్నిక్ డగ్రు కిడెక్ అట్ వీర్. ఎండనిక్ ఇహిజ, వారు వన్నిక్ రెబావీర్. వన్నిక్ నెన్ ఎర్. గాని మీరు వన్నిక్ నెస్సిదెర్. ఎండనిక్ ఇహిజ, వాండ్రు మీ వెట మంజినాన్. మీ లొక మంజినాన్.

18 నాను మిజి డిసి సొనివలె, మిజి దిక్కు నీలి వరి లెకెండ్ డిన్ ఎ. నాను మరజ మీ డగ్రు వానాలె.

19 సెగం కాలం వెన్కా, నజి నమ్మిఇకార్ నజి మరి తో ఎర్ లె. గాని మీరు నజి నూణిదెర్. నాను బత్తిజిన. అందెజె మీరుబా బత్తినిదెర్.

20 నాను నా బుబ్బువెట కూడిఁత మన్ని, మీరు నా వెట కూడిఁతి మనిదెర్. నాను మీ వెట కూడిఁత మన ఇజి దేవుణు ఆత్మ మీ నడిఁమి మండ్రేక్ వాని దినమదు మీరు నెస్సిదెర్.

21 నా ఆడ్రేక్ వెంజి అయావజి కినికానె నజి ప్రేమిస్తికాన్. నజి ప్రేమిస్తి వన్నిక్ నా బుబ్బు ప్రేమిస్సాన్. నాను వన్నిక్ ప్రేమిసి వన్నిక్ తోరి అన్”, ఇజి యేసు వెప్తాన్.

22 నన్సవలె ఇస్కరియొతు యూద ఆగ మరి ఒరెన్ యుద, “ప్రబువా నీను లోకురిక్ విజెరెక్ తోరి అవిండ, ఎలాగ నీను మజి తోరి అనిలె?”, ఇజి వెన్ బాతాన్.

23 అందెజె యేసు, “ఒరెన్ నజి ప్రేమిస్తిజ, వాండ్రు నా మాటెక్ వినాన్. అయావలె నా బుబ్బు వన్నిక్ ప్రేమిస్సాన్. నా బుబ్బుని నాను వన్నిడగ్రు వాజి వన్నివెట మంజినావ్.

24 నజీ ప్రేమిన్ ఇకాన్, నా మాటెజ్ విన్ ఏవ్. మీరు వెంజిని యా మాటెజ్ నా సొంత మాటెజ్ ఆడ. నజీ పోక్తి నా బుబ్బువిని.

25 నాను మీవెట మంజిని యా మాటెజ్ వెప్తా మన్ను.

26 నా బుబ్బు, నా బదులు తోడుః మంజిని వన్నుజ్ ఇహిజ, దేవుణు అత్తుదిజ్ పోక్తివెలె, వాండ్రు మిజి దేవుణు వందిజ్ విజు నజతిజ్ నెన్ పిస్సాన్. నాను మిజి వెప్తా విజు వన్నాజ్ ఎత్తు కిబిసి మంజినాన్.

27 నాను మిజి డిసి సొన్ సిన్. గాని మీరు సమాదనమ్ దాన్ మంజిని దెరెలె. అయా సమాదనం నా బాణిజ్ వాజినాద్. నజీ నమ్మి ఇ లోకురిజ్ మన్ను సమాదనం ననికాద్ అవిద్ నా బాణిజ్ వాజనికాద్. మీ మన్నుదు వినారిసి బాద ఆమాట్. మీరు తియెల్ ఆమాట్.

28 'నాను సొన్ సిన్. మరెజ్ మీ డగ్రు వానాలె', ఇజి నాను వెప్తా మాట మీరు విహిదెర్. నా బుబ్బు నజీ ఇంక పెరికాన్. అందెజ్ మీరు నజీ నిజం ప్రేమిస్తిజ, వీండ్రు బుబ్బు డగ్రు సొన్ సిన్ నాన్ ఇజి సరద ఆజినిదెర్.

29 యాకెజ్ జగ్గినివలె, నాను వెప్తాకెజ్ నిజం ఇజి మీరు నమ్మిని వందిజె, అయాకెజ్ జగ్గిని ముజాల, ఇయెలె నాను మిజి వెప్తా మన్ను.

30 మరి నండ్ సమయం మీ వెట వర్గిదెజ్ నాను అట్ ఏలె. ఎండానిజ్ ఇహిజ, యా లోకమ్ ది అతికారి అతి సయ్యూను వాజినాన్. నా మున్ను వన్నుజ్ ఇన్ని అతికారం సిల్లెద్.

31 గాని, నాను నా బుబ్బుజ్ ప్రేమిస్తి. అందెజ్ వాండ్రు వెప్సినికెజ్ విజు అయావజ నాను కిజి న ఇజి లోకమ్ దికార్ నెస్టెజ్ వలె. రదు, ఇబ్బెణిజ్ సొనాట్", ఇజి వెప్తాన్.

15

1 నాను నిజమాతి ద్రాక్కుబడ్డదిజ్ మొదోల్. నా బుబ్బు పణికినికాన్.

2 నా వెట కూడిఃతి మన్ను పట్టు అన్ ఇ విజు కొనెజ్ వాండ్రు కత్ నాన్. పట్టు అన్ ని విజు కొనెజ్, మరి నండ్ పట్టు అన్నివందిజ్ తెప్పాన్.

3 నాను మీవెట వెప్తా మాటెజ్, మీ పాపమ్ కాణిజ్ నుబ్బరం కిత్రె మనె.

4 నాను మీ వెట కూడిఃజి మంజినిలెకండ్ మీరు నా వెట కూడిఃజి మండ్రు. ఇన్ని కొనెజ్ బా బడ్డుదు మన్ ఏండ్ మహిజ, అవి పట్టు అన్ ఉ. పట్టు అస్టెజ్ ఇహిజ, అవి బడ్డుదు మండ్రెజ్ వలె. అయాలెకండ్, నావెట కూడిఃతి మహిజనె, మీరు పట్టు అన్నిదెర్.

5 నాను ద్రాక్కుబడ్డఉదిజ్ మొదోల్. మీరు కొనెజ్. ఎయెన్ బా నా వెట కూడిఃజి మంజి, నాను వన్ను వెట కూడిఃతి మహిజ, వాండ్రు నండ్ పట్టు అస్సాన్. నాను సిల్లెండ్, నజీ ఇస్టం ఆతి నెగ్గికెజ్ ఇనికెజ్ బా మీరు కిదెజ్ అట్ ఇదెర్.

6 వెల్లి వినీర్తి ఉండ్రి కొన వప్తా లెకండ్, నా వెట కూడిఃజి మన్ ఇకాన్ మనాన్. వాండ్రు వెల్లి ఆజి వహ్సాన్. నన్ని కొనెజ, లోకుర్ కుంబ కిజి సుర్ నార్. ఆకెజ్ వెయెనె.

7 మీరు నావెట కూడిఃజి మంజి నాను వెప్తాక మీ లోఇ మహిజ, ఇనికబా మీరు దేవుణుదిజ్ లోస్టు. వాండ్రు అయాక మీజి సీనాన్.

8 మీరు నండ్ పట్టు అని ఆహె నా సిసూర్ ఇజి తోర్ అతిజ, నా బుబ్బు గొప్ప పెరికాన్ ఇజి లోకురిజ్ తోర్ పినిదెర్.

9 నా బుబ్బు నజీ ప్రేమిస్తి లెకండ్, నాను మిజి ప్రేమిస్తి. నాను మిజి ప్రేమిస్తి వందిజ్, నా వెట కూడిఃజి మండ్రు.

10 నాను నా బుబ్బు వెప్తా ఆడ్రెజ్ లోజిత మన. వాండ్రు నజీ ప్రేమిస్సాన్. అయాలెకండ్ మీరు నాను వెప్తా ఆడ్రెజ్ లోజితిజ, నాను మిజి ప్రేమిసిని మంజిన.

11 నజీ మన్ను సరద మీజి బా మండ్రెజ్, మీ సరద పూర్తి ఆదెజ్, ముజాలె వెప్తా యా మటెజ్ నాను మిజి వెప్తా మన్ను.

12 నాను మిజి ప్రేమిసివజ, మీరు ఒరెన్ వన్ను వెట ఒరెన్ ప్రేమిసి మండ్రు ఇజి నె ఆడ్ర.

13 ఒరెన్ వన్ను కూలెజ వందిజ్ వన్ను సొంత పాణం సీనికాదె నండ్ ప్రేమ. దిని ఇంక మిస్తి మరి ప్రేమ సిల్లెద్.

14 నాను ఆడ్ర సీతిక మీరు కితిజ, మీరు నా కూలెజె.

15 ఒరెన్ పణికినికాన్, వన్ని ఎజుమాని కిని పణిజ్ నెన్ఎన్. అందెజె నాను మరి ఎనెజ్ మిజి పణికినికార్ ఇజి కూర్వ, గాని కూలెజ్ ఇజి కూక్త మన. ఎందనిజ్ ఇహిజ, నాను నా బుబ్బ బాణిజ్ విహికెజ్ విజు మిజి వెహ్తా మన్న.

16 మీరు నజి ఏర్పాటు కిఇదెర్. గాని నాను మిజి ఏర్పాటు కిత్త. పట్టు అస్సిపజ, మీరు సొన్ని లోకురిజ్ సువార్త వెహ్తా దేవుణు దెర్బల్ మహ్సి తని వందిజె నాను మిజి ఏర్పాటు కితానె పోక్కిన. మీరు అస్సి పట్టు ఎలాకాలం మంజినాద్. అయావలె మీరు నా ఇష్టమిదిజ్ కూడితి మన్ని ఇనికబా బుబ్బెజ్ లోస్సిజ, వాండ్రు సినాన్.

17 మీరు ఒరెన్ వన్నివెట ఒరెన్ ప్రేమిస్తెజ్ ఇజెనె నాను సీజని ఆడ్ర.

18 యా లోకమదు మన్ని దేవుణుదిజ్ దూసిస్సికార్, మిజి దూసిస్సిజ, మీరు ఒడిజిబిదు వారు మిజి దూసిస్సి ముజాలె నజి దూసిస్తార్ ఇజి.

19 మీరు యా లోకమదు మన్ని దేవుణుదిజ్ దూసిస్సి వరిలోఇ మన్నికిదెర్ ఇహిజ, వరి సొంత లోకుర్వజ వారు మిజి ప్రేమిస్తార్ మరి. గాని నాను వరి లెకెండ మీరు మనిఎండ, మిజి ఎర్లిస్త. అయావలె, మీరు వరి లోఇ మన్నికిదెర్ ఆఇదెర్. అందెజె వారు మిజి దూసిసినార్.

20 ఏమెణి పణిమణిసిబా వన్ని ఎజుమాని మున్సు పెరికాన్ ఆవన్*, ఇజి నాను వెహ్తా మాట మీరు ఎత్తు కిదు. వారు నజి హిమ్మెజ్ కితార్ ఇహిజ, మిజి బా హిమ్మెజ్ కినార్. వారు నా మాటెజ్ లోజితార్ ఇహిజ, మీ మాటెజ్ లోజినార్.

21 మీరు నజి నమ్మితి వందిజ్ వారు యా లెకెండ విజు మిజి కినార్. ఎందనిజ్ ఇహిజ, వారు నజి పోక్తి వన్నిజ్ నెన్ఏర్.

22 నాను వాజి దేవుణు వందిజ్ నిజమాతికెజ్ వరిజ్ వెహ్ఎండ మంజనిక ఇహిజ, వారు పాపమ్కు కితార్ ఇజి దేవుణు వరిజ్ సుడెఁవితాన్ మరి. అహిజ, ఏలు వారు వరి పాపమ్కాణిజ్ తప్త ఆదెజ్ అఠ్ఏర్. ఎందనిజ్ ఇహిజ, నాను వరిజ్ వెహ్తా మన్న.

23 నజి దూసిస్సికాన్నా బుబ్బెజ్ దూసిసినాన్.

24 ఎయెన్బా కిఇ బమ్మాని పణిజ్ నాను వరి నడిమి కిఏండ మంజనిక ఇహిజ, వారు పాపమ్కు కితార్ ఇజి దేవుణు వరిజ్ సుడెఁవితాన్ మరి. గాని ఏలు వారు యా బమ్మ అని పణిజ్ సుడెఁత మనార్. అహిజ్బా, నజి ని నా బుబ్బెజ్ వారు దూసిస్త మనార్.

25 'ఇని కారణంబా సిల్లెండ వారు నజి దూసిస్తార్', ఇజి దేవుణు మాటదు రాస్సి మన్ని మాట పూర్తి అదెజె యా లెకెండ వారు కిజినార్.

26 నాను మీ డగ్రు తోడుఁ మంజని వన్నిజ్ ఇహిజ, దేవుణుబాణిజ్ నిజమాతికెజ్ వెహ్తా తోరిస్సి దేవుణు ఆత్మెజ్ పోక్కు. వాండ్రు బుబ్బ బాణిజ్ మీ డగ్రు వానాన్. అయావలె నా వందిజ్ విజు వాండ్రు వెహ్తాన్.

27 నాను సేవ మొదోల్సి బాణిజ్ మీరు నావెట మనిదెర్. అందెజె మీరు బా నా వందిజ్ విజెరిజ్ వెహ్తాజ్వలె.

16

1 "మిజి ఇమ్నెజ్ కినివలె, మీరు నమకం దాన్డిఁన్ఏండ మంజని వందిజె, మిజి దూసిస్సికార్ కిని నజుతిజ వందిజ్ నాను వెహ్తా.

2 వారు మిజి యూదురి మీటిజ్ ఇల్కాణిజ్వెల్లి కినార్. మిజి సమ్మికాన్ఎయెన్బా, వాండ్రు దేవుణుదిజ్ సర్త కిజిన ఇజి ఒడిజిబిని కాలం వాజినె.

3 వారు నన్నికెజ్ కినార్. ఎందనిజ్ ఇహిజ, బుబ్బెజ్నో నజినో నెన్ఏర్.

4 అయ కాలం వానివలె, నాను దినివందిజ్ వెహ్తా మన ఇజి మీరు ఎత్తుకిని వందిజ్ నాను యాక మీ వెట వెహ్తా మన. నాను యాకెజ్ ముజాలె మిజి వెహ్తాజ్సీలె. ఎందనిజ్ ఇహిజ, నాను మీవెట మహ్".

దేవుణు ఆత్మ కిని పణిజ్

* 15:20 15:20 13:16 సుడెఁదు

5 “ఏలు నాను నజీ పోక్తి వన్ని డగ్రు సొన్నిన. గాని మీ లోఇ ఎయెన్బా, ‘నీను ఎంబె సొన్నిని?’, ఇజ నజీ వెన్బాఇదెర్”.

6 నాను యా సజతిక్ మిజి వెప్తి మనిక్, మీ మన్నును దుకమ్దాన్ నిండ్రిత మనాద్.

7 గాని నాను నిజం మీ వెట వెప్సిన్, మిజి మేలు వాని వందిజె నాను సొన్నిన. నాను సొన్విండ మహిజ, తోడు: మంజనికాన్ మీ డగ్రు రెవిన్. గాని నాను సొహిజ, నాను వన్నిక్ మీ డగ్రు పోక్తు.

8 వాండ్రు వాజి, దేవుణుడిక్ నమ్మిఇవరిక్ పాపం ఇహిజ ఇన్నిక ఇజి, నాను నీతి నిజాయితి మన్నికాన్ ఇజి, దేవుణు సీని ఎలాకాలం మన్ని సిక్ ఇన్నిక ఇజి కనితం వెప్సి తోరిస్సాన్.

9 వారు పాపం కిత్తమనార్ ఇజి వాండ్రు కనితం వెప్సి తోరిస్సాన్. ఎందానిక్ ఇహిజ, వారు నజీ నమ్మివర్.

10 నాను నీతి నిజాయితి మన్నికాన్ ఇజి వాండ్రు కనితం వెప్సి తోరిస్సాన్. ఎందనిక్ ఇహిజ, నాను నా బుబ్బు డగ్రు సొన్సిన. మీరు నజీ మరి తొఇదెర్.

11 దేవుణు సీని ఎలాకాలం మన్ని సిక్ ఇన్నిక ఇజి వరిక్ కనితం వెప్సి తోరిస్సాన్. ఎందానిక్ ఇహిజ, దేవుణుడిక్ నమిఇ వరి మున్సు. అతికారం కిని సయ్తానుక్, దేవుణు ఎలాకాలం మన్ని సిక్ సిత్రమనాన్.

12 ‘నజీ మరి నండొ మిజి వెప్తి మనాద్, గాని ఏలు మీరు నసొ అర్తం కిదెక్ అబ్ ఇదెర్.

13 గాని దేవుణు వందిక్ నిజమాతికెక్ నెన్పిస్సి దేవుణు ఆత్మ వానివలె, వాండ్రు దేవుణు బాణిక్ వాజిని విజు నిజమాతికెక్ మీరు నెన్తెక్ మిజి నడిపిసినాన్. వాండ్రు వన్ని సొంతదిక ఇనికబా వెహ్ ఎన్. గాని బుబ్బు వెప్సినికెక్ వెంజి మిజి వెహ్సాన్. వాండ్రు జర్గిని వన్యాక్ వందిక్ మిజి వెహ్సాన్.

14 నాను వెప్సిని నిజమాతికెక్ వెంజి, అయాక మిజి వెహ్సాన్. అయ లెకెండ్ నాను గొప్ప పెరికాన్ ఇజి మిజి తోరిస్సాన్.

15 బుబ్బెక్ మన్నికెక్ విజి నాదినె. అందెజె నాను వెహ్సా, నాను వెప్సిని నిజమాతికెక్ వాండ్రు వెంజి, అయాక మిజి వెహ్సాన్ ఇజి.

16 సెగం రోన్సు వెన్యా, నాను సొన. మీరు నజీ మరి తొఇదెర్. మరి సెగం రోన్సు వెన్యా, మీరు నజీ నూణిదెర్”.

17 వన్ని సినూర్ లోఇ సెగెండార్ ఒరెన్ వెట ఒరెన్ ఈహు వెహ్సాన్, “సెగం కాలం వెన్యా మీరు నజీ తొఇదెర్. మరి సెగం కాలం వెన్యా మీరు నజీ నూణిదెర్. నాను నా బుబ్బు డగ్రు సొన్సిన. అందెజె మీరు నజీ తొఇదెర్”, ఇజి వాండ్రు వెప్సిని తరదం అర్తం ఇనిక? ఇజి.

18 “ ‘సెగం కాలం’ ఇజి వాండ్రు వెప్సిని దని అర్తం ఇనిక? వాండ్రు వెప్సిని దనిక్ మజి అర్తం రెవిండ ఆజినాద్”, ఇజి మరి వర్గిజెనె మహార్.

19 దినివందిక్ వారు వన్నిక్ వెన్బాదెక్ కోరిజినార్ ఇజి యేను నెస్తాండ్రె, ఈహు వరిక్ వెప్సినాన్, “‘సెగం కాలం వెన్యా మీరు నజీ తొఇదెర్. మరి సెగం కాలం వెన్యా మీరు నజీ నూణిదెర్’, ఇజి నాను వెప్తి దని అర్తం ఇన్నిక ఇజినా మీరు ఒరెనిదిక్ ఒరెన్ వెన్బాజినిదెర్?”

20 మీరు దుకం కిజి అడఃబానిదెర్ గాని దేవుణుడిక్ దూసిస్సికార్ సరద ఆనార్. మీరు దుకం కినిదెర్ గాని మీ దుకం వెనుక సరదమనాద్ ఇజి నాను మీ వెట నిజం వెప్సిన్.

21 ఉండ్రె బోదెలి ఏరుఈబదిక్ నోపిదిక్ అడఃబానాద్. ఎందానిక్ ఇహిజ, దనిక్ నెగెండ్ అదెక్ కాలం ఆతాద్. గాని దన్నికొడె: పుట్టిజ, లోకమ్దు ఒరెన్ పుట్టాన్ ఇజి సరదదాన్ అయా బాదెక్ అది ఎత్తు కివిద్.

22 అయాలెకెండ్ మిజి బా. మీరు ఏలు దుకం ఆనిదెర్. గాని నాను మరజి వానివలె మిజి మరి నూణ. అయావలె మీరు సరద ఆనిదెర్. అయా సరద ఎయెన్బా మీ బాణిక్ లాగ్ దెక్ అబ్ ఎన్.

23 నాను నిజితి సొహి వెన్యా, మీరు ఇనికబా నెన్తెక్ నజి వెన్బాఇదెర్. ఎందానిక్ ఇహిజ, దేవుణు ఆత్మ మిజి నెన్పిస్సాన్. నా ఇష్టమిదిక్ కూడితి మన్నికెక్ ఇన్నికబా మీరు బుబ్బెక్ లొస్తిజ, వాండ్రు అయాక సీనాన్, ఇజి నాను నిజం మీ వెట వెప్సిన్.

24 ఏలుదాక నా ఇష్టమిదిక్ కూడితి మన్నికెక్ ఇన్నికబా లొన్ ఇతిదెర్. మీ సరద పూర్తి ఆని వందిక్ లొస్సు. మిజి దొహ్సానాద్.

25 నాను మిజి కతవజి యా సజతిక్ నెన్పిస్సి మన. గాని కతవజి నెన్పిన్ విండ, బుబ్బు వందిక్ మిజి టెట అర్తం ఆనిలెకెండ్ వెప్సి కాలం వాజినాద్.

26 అయా కాలమ్దు, నా ఇస్టమ్దిజ్ కూడితి మన్నికెజ్ మీరు లొన్సిదెర్. మీరు లొన్సికెజ్ వరిజ్ సిఅ ఇజి బుబ్బెజ్ వెహ్న ఇజి నాను వెహ్వి.

27 ఎందానిజ్ ఇహిజ, బుబ్బునె మిజి నండో ప్రేమిస్సాన్. మీరు నజి ప్రేమిస్సిదెర్. నాను బుబ్బు బాణిజ్వాత ఇజి మీరు నమిజినిదెర్. అందెజె వాండ్రు మిజి నండో ప్రేమిస్సాన్.

28 నాను బుబ్బు బాణిజె యా లోకమ్దు వాత. ఏలు నాను యా లోకం డిసి మర్జి బుబ్బు డగ్రు సొన్సిన”.

29 నస్తివలె వన్ని సిసూర్, “ఇదిలో, వానివలె నీను కత లెకెండ్ ఆవండ, అర్థం ఆని లెకెండ్ వెహ్సిని.

30 నీను విజు నెస్సికి ఇజి ఏలు మాపు నెసినావ్. ఎయెర్బా నిజి వెసబాఎండ ముజాలె, వారు ఒడెబిజినికెజ్ నీను నెసిని ఇజి మాపు నెసినావ్. అందెజె నీను దేవుణు బణిజ్వాతికి ఇజి మాపు నమ్మిజినావ్”, ఇజి వెహ్హర్.

31 అందెజె యేసు, “మీరు ఏలు నమిజినిదెరా?

32 ఇదిలో, మీరు మీ ఇల్లాజ్సెద్రిజె సొని కాలం వాజినాద్. అయాక ఏలె వాత మనాద్. మీరు నజి డిసి సొనిదెర్లె. నాను ఒరెనె ఆన. గాని నాను ఒరెనె ఆవ. నా బుబ్బు నావెట మనాన్.

33 మీరు నా వెట కూడితి మన్నిదెర్. అందెజె మీరు సమాదనం దాన్ మండ్రెజ్ నాను యా నజతిజ్ మిజి వెహ్నా మన. యా లోకమ్దు మిజి కస్టమ్కు బాదెజ్మనె. గాని దయెర్మ్దాన్ మండ్రు. నాను యా లోకమ్దు మన్ని దేవుణుదిజ్ దూసిస్సివరిజ్ గెలస్త మన్ను.

17

యేసు వన్నివందిజ్ పార్దనం కిజినాన్

1 యా మాటెజ్వెహ్సి వీస్టాండ్రె, యేసు మున్ను పరలోకం దరోట్బేసి ఈహు పార్దనం కిజినాన్. “ఓ బా, నాను సాదెజ్ నీను ఏర్పాటుకితి కాలండగ్రు ఆత మనాద్. నీను గొప్పపెరికి ఇజి నీ మరిన్ఆత్రి నాను తోరిస్సి వందిజ్ని మరిన్ఆత్రి నాను గొప్పపెరికాన్ ఇజి నీను తోరిన్ఆ.

2 నీను నజి సీతిలోకుర్ విజెరిజ్ ఎలాకాలం దేవుణువెట బత్రినిబత్తు. నాను సీనివందిజ్, నీను లోకుర్ విజెరె మున్ను, నజి అతికారం సిత్తి.

3 ఒరెండ్రె నిజమాతి దేవుణుఆతి నిజిని, నీను యా లోకమ్దు షొక్తి యేసు క్రీస్తుజ్ నెస్సిజనె ఎలాకాలం దేవుణువెట బత్రినిబత్తు, మనాద్.

4 నాను కిదెజ్ ఇజి నీను నజి సీత్తి పణివిజు నాను పూర్తి కిజి నీను గొప్పపెరికి ఇజి బూమిమున్ను, నాను తోరిస్త.

5 ఏలు ఓ బా, లోకం నీను పుటిస్సి ముజాల నివెట నాను మహివలె నజి గవరం కితిలెకెండ్, ఏలు నీ ఎద్దు నజి గవరం కిఅ.

యేసు సిసూర్వందిజ్ పార్దనం కిజినాన్.

6 నీను నజి సీతివరిజ్ నాను నీ వందిజ్ వెహ్సి తోరిసి నెస్సిస్త. వీరు దేవుణుదిజ్ దూసిస్సి ననికార్ ఆవిర్. వీరు నీ వారు. నీను వరిజ్ నజి సీతి. నీ మాటెజు వారు లోజెతార్.

7 నీను నజి సీతి విజు నీబాణిజె వాతెమనె ఇజి ఏలు వారు నెస్టార్.

8 ఎందానిజ్ ఇహిజ, నీను నజి సీతి మాటెజ్నాను వరిజ్సిత. వారు అయకెజ్ నమ్మితార్. నాను నీ బాణిజ్వాతికాన్ ఇజి వారు అనుమానం సిల్లెండ నెస్టార్. నీనె నజిషొక్తి ఇజి వారు నమ్మిత మనార్.

9 నాను యా సిసూర్వందిజ్ పార్దనం కిజిన. యా లోకమ్ది లోకుర్ విజెరెవందిజ్ నాను పార్దనం కివి. గాని నీను నజి సీతి విరివందిజ్ పార్దనం కిజిన. ఎందానిజ్ ఇహిజ, వీరు నీ వారు.

10 నా వారు విజెరె నీ వారు. నీ వారువిజెరె నా వారు. అయలెకెండ్ వారు బత్రినారె, నాను గొప్పపెరికాన్ ఇజి వారు తోరిసినార్.

11 ఏలు నాను నీ డగ్రు వాజిన. నాను మరి యా లోకమ్దు మన్వ. గాని వీరు ఇబ్బె ముజినార్. ఓ నెగ్గి బుబ్బు, మాటు ఉండ్రె ఆతి లెకెండ్ వీరుబా ఉండ్రె ఆదిజ్, నీను నజి సీతి నత్తుదాన్ వరిజ్ కాపాడెఅ.

12 నాను యా లోకమేదు వరి వెట మహివలె, నీను నజీ సీతి నత్తుదాన్ వరిజ్ కాపాడత. నాను వరిజ్ నెగ్రెండ తప్పిని మహా. వరి లోఇ ఎలాకాలం నానం అదెజ్ మన్నికాన్ అవండ, మహికార్ విజెరె ఎలాకాలం నానం అవతార్. దేవుణు మాటదు రాస్తి మనికెజ్ పూర్తి అదెజ్ యాకెజ్ విజు జర్గిదెజ్ వలె.

13 నాను ఏలు నీ డగ్గు వాజిన. నజీ మన్ని నరద వరి మన్నుదుబా నింత్తు మంజిని వందిజె, నాను యా లోకమేదు మన్నివలెని యా సజతిజ్ వెప్పిన.

14 నాను వరిజ్ నీ మాటెజ్ సిత మన్ను. యా లోకమేదు మన్ని దేవుణుదిజ్ దూసిస్సికార్ వరిజ్ దూసిస్టార్. ఎండానిజ్ ఇహిజు, నాను లోకమేదికాన్ అజలెకెండ, వారు బా లోకమేదికార్ అవెర.

15 నీను వరిజ్ యా లోకమేదాన్ ఒఅ ఇజ నాను పార్దనం కివి గాని సయ్యూను బాణిజ్ వరిజ్ కాపాడత ఇజని పార్దనం కిజిన.

16 నాను లోకమేదికాన్ అజలెకెండ, వారు బా లోకమేదికార్ అవెర.

17 నీ నిజమాతి మాటెజ్ నెన్ పిసి, వారు దేవుణువందిజ్ కేట అతిలెకెండ వరిజ్ ఇడత. నీ మాటెజ్ నిజమాతి మాటెజ్.

18 నీను నజీ యా లోకమేదు పోక్తి లెకెండ, నాను వరిజ్ లోకమేదు పోక్తిన.

19 నిజమాతి మాట నెసి వారు వరిజె నీ కీదు ఒపజెప్పిని వందిజ్, నాను వరి వందిజ్ నీ కీదు ఒపజెపె అజిన.

యేసు దేవుణుదిజ్ నమ్మితివరిజ్ విజెరెవందిజ్ పార్దనం కిజినాన్

20-21 ఓ బా, నాను కిజిని పార్దనం వరి వందిజె అవి. వరి మాటెజ్ వెంజి నమ్మిదెజ్ మన్ని వరిజ్ విజెరె వందిజ్ నాను పార్దనం కిజిన. ఎండానిజ్ ఇహిజు, నీను నా వెట కూడత మంజిని లెకెండ, నాను నీ వెట కూడత మంజిని లెకెండ వారు విజెరె ఉండ్రె అదెజ్. నీను నజీ పోక్తి మన్ని ఇజి లోకమేది లోకుర విజెరె నమ్మినివందిజ్ వారు మావెట కూడత మనీర.

22 నాను పెరికాన్ ఇజి నీను నజీ గవరం నాను వరిజ్ సిత మన. మాటు ఉండ్రె అతి లెకెండ వారుబా ఒండ్రె అదెజె నాను సిత.

23 వారు పూర్తి ఉండ్రె అనివందిజ్ నాను వరివెట కూడత మన. నీను నా వెట కూడితి మన్ని, నీను నజీ పోక్తి ఇజి, నీను నజీ ప్రేమిస్సి లెకెండవరిజ్ బా ప్రేమిస్సి ఇజి లోకుర విజెరె నెస్సి వందిజ్ వారు ఉండ్రె అదెజ్.

24 ఓ బా, నీను వరిజ్ నజీ సీతి. అందెజె నాను మంజిని బాన్ వారుబా మండ్రెజ్ ఇజి నాను కోరిజిన. ఎండానిజ్ ఇహిజు, నాను గొప్ప పెరికాన్ ఇజి నీను నజీ సీతి గవరం వారు సుడతెజె. లోకం పుటినివండ ముజాల, నీను నజీ ప్రేమిస్సి. అందెజె నీను నజీ అయా గవరం సీతి.

25 సీతి నిజాయితి మన్ని బుబ్బు, లోకమేది లోకుర నిజె నెన్ ఎవెర. గాని నాను నెన్ను. నీను నజీ పోక్తి ఇజి వీరు నెస్సినార్.

26 నాను వరి వెట కూడత మంజిని వందిజ్, నీను నజీ ప్రేమిస్సి లెకెండ, వారు బా మహివరిజ్ ప్రేమిస్సివందిజ్ నాను నీ వందిజ్ వరిజ్ నెన్ పిస్త మన. నెన్ పిసి నె మంజిన.

18

యేసుజ్ అరెస్టు కిజినార్

1 యేసు పార్దనం వీస్తి వెన్యా, వన్ని సిస్టూరెవెట సోతాండ్రె, కెట్రోనిజిని జోరెడాట్టి సోహాన్. అబ్బె ఉండ్రె టోట మహాద్. వాండ్రుని వన్నిసిస్టూరె అయా టోటాదు సోహాన్.

2 నండ్రె సుట్టు యేసుని వన్నిసిస్టూరె అబ్బె కూడత మహాల్. అందెజె యేసు అయా టోటాదు మంజినాన్ లె ఇజి యూద నెస్సినాన్. వీండ్రె యేసుజ్ యుదురి అదికారిజు కీదు ఒపజెప్పికాన్.

3 అందెజె యూద అబె వాతాన్. పెరి పుజెరిజు పరిసయేరు పోక్తి నెగొండార్ దేవుణు గుడిడి జమాజ్ ణు, మరి రోమ సయేనమేది నెగొండార్ బా వన్ని వెట కూక్త తత్తాన్. వారు సిను బొద్దు, లాండెరిజు, కూణమకు అస్త మహాల్.

4 యేసు వన్ని మున్ను వానికెజ్ విజు నెనినె, వాండ్రు సోతాండ్రె వరిజ్, “వీరు ఎయెరిజ్ రెబానిదెర?”, ఇజి వెన్ బాతాన్.

5 దన్నిజ్ వారు, “నజరేతుది యేసుజ్”, ఇహోర్. అందెజె వాండ్రు, “వాండ్రు నానె”, ఇజి వెహ్సాన్. అయావలె యేసుజ్ ఒవజెప్పి యూద వరి వెట నిహ మహాన్.

6 ‘వాండ్రు నానె’, ఇజి యేసు వరిజ్ వెహ్సావలె, వారు వెన్యా గునె ఆజి బూమిదు అర్ధార్.

7 మరి వాండ్రు వరిజ్ వెన్బాతాన్, “మీరు ఎయెరిజ్ రెబానిదెర్?”, ఇజి. “నజరేతుది యేసుజ్”, ఇహోర్ వారు.

8 అందెజె యేసు, “నాను మిజి వెహ్సాగదె, వాండ్రు నానె ఇజి. మీరు నజి రెబానిదెర్ ఇహిజ, నా సిసూర్ ఆత్తి విరిజ్ పోక్తు”, ఇజి వెహ్సాన్.

9 వారు సిసూరిజ్ పోక్తిజ్, ‘నీను నజి సితి వరి లోఇ ఒరెన్ వన్నిజ్బా నాను పాడుకివీ’ ఇజి వాండ్రు ముజాలె వెహ్సా మాటెజ్ పూర్తి ఆతె.

10 సిమోన్ పేతురు డగ్రు ఉండ్రీ కూడం మహాద్. నస్తివలె వాండ్రు అయాక లాగితండ్రె, విజు పుజెరిజి ముస్సు పెరిపుజెరి పణిమన్నిసిజ్ ఉణెర్గిబి కత్తాన్. అయా పణిమన్నిసి పేరు మల్కు.

11 యేసు పేతురుజ్, “నీ కూడం దన్నిఒరదు ఇడోఅ. నాను ఓరిస్టెజ్ నా బుబ్బి వర్పాటుకితి స్రమెజ్ నాను ఓరిస్టెజ్ అఎదెఇజి నీను ఒడోబిజినిదా?”, ఇజి వెహ్సాన్.

యేసుజ్ అన్న ముజాల ఒసిసూర్

12-13 నస్తివలె రోమ నయనమేదికార్, వరి అతికారి, జమాసూర్ యేసుజ్ అస్తారె తోహ్సాతార్. వారు వన్నిజ్ తోహ్సాతార్, ముజాల, అన్న ఇని వన్నిడగ్రు ఒతార్. వాండ్రు అయా ఏంటు విజు పుజెరిజి ముస్సు పెరి పుజెరి ఆతి కయపెజ్ మామేసి.

14 యా కయపన, ‘లోకుర్ విజెరె వందిజ్ ఒరెన్ సానికాదె నెగెద్’ ఇజి యూదురి అతికారిజ్ బుద్ది వెహ్సా మహాన్.

పేతురు యేసుజ్ నెన్వి ఇజి వెహ్సానాన్

15 సిమోన్ పేతురు ని మరి ఒరెన్ సిసూ యేసు వెన్యా సాహార్. అయా సిసూ, విజు పుజెరిజి ముస్సు పెరిపుజెరిజ్ నెల్గు ఆతికాన్. అందెజె వాండ్రు యేసువెట పెరిపుజెరి ఇండ్రోజి డేవాదు సాహాన్.

16 పేతురు గప్పుని వెల్లి నిహమహాన్. పెరిపుజెరిజ్ నెల్గు ఆతి అయా సిసూ మర్జి వాతండ్రె, గవ్ నిడగ్రు నిల్లి మంజిని అయేలిదిజ్ వెహ్సాండ్రె, పేతురుజ్ లోఇ కూక్ట ఒతాన్.

17 అయావలె అయా అయేలి పేతురువెట, “నీనుబా వన్ని సిసూర్ లోఇ ఒరిగదె?”, ఇజి వెన్బాతాన్. దన్నిజ్ వాండ్రు, “నాను ఆవి?”, ఇహోర్.

18 అయావలె గొప్ప పిని మహాద్. అందెజె అతికారిజుని పణిమన్నిసిరేసిను ఎరెన్ దన్ని సుటులం నిల్సికాయజి మహోర్. పేతురుబా వరివెట నిహండ్రె, సిను కాయజి మహాన్.

పెరి పుజెరి యేసుజ్ వెన్బాజి నాన్

19 అయావలె, విజు పుజెరిజి ముస్సు మన్ని పెరిపుజెరి యేసుజ్ వన్నిసిసూర్ వందిజ్ వాండ్రు నెన్పిన్సి బోద వందిజ్ వెన్బాజి మహాన్.

20 అందెజె యేసు, “నాను లోకుర్ విజెరె ఎద్దునె వెహ్సామన. యూదురు విజెరె కూడ్డి వాజి మంజిని, యూదురి మీటిజ్ ఇల్గాజ్ ని దేపుణుగుడిదు ఎస్తివలెబా నేర్పిసి మహా. నాను ఇనికలా డోజసాటు వెహ్సావత.

21 మరి ఎందానిజ్ నజి వెన్బాజిని? నా మాట విహివరిజ్ వెన్బాఅ. నాను వెహ్సాకెజ్ వర్గితికెజ్ వారు నెస్సార్”, ఇజి వెహ్సాన్.

22 యేసు యాకెజ్ వెహ్సాజ్, అబ్బె నిహిమహి అతికారిజి లోఇ ఒరెన్ యేసుజ్ ఉండ్రీ లెవడెయి తాండ్రె, “యాలెకండ విజు పుజెరిజి ముస్సు మన్ని పెరిపుజెరిజ్ మర్జి వెహ్సాని?”, ఇజి వెహ్సాన్.

23 అయావలె యేసు, “నాను తప్ప ఇన్నిక వెహ్సాజి, అయాక నజి వెహ్సాఅ. గాని నాను నిజం వెహ్సాజి, ఎందనిజ్ నజి డెయిజిని?”, ఇజి వెహ్సాన్.

24 అందెజె అన్న వన్నిజ్ తోహ్సా డోసనె విజు పుజెరిజి ముస్సు పెరిపుజెరి కయపడగ్రు పోక్తాన్.

యేసుజ్ నెన్వి ఇజి పేతురు మరి వెహ్సానాన్

25 పేతురు సిను కాంయజి నిహ మహాన్. అయావలె మహికార్వన్నిజ్, “నీనుబా వన్ని సిసూర్లోఇ ఒరిగదె?”, ఇజి వెన్బాతార్. గాని పేతురు, “నాను ఆవు”, ఇజి కెప్పతాన్.

26 నస్త్వలె పేతురు గిబ్బి తెవ్కతి పణిమన్నిసి బంతుకులు ఒరెన్ అబ్బి మహాన్. వాండ్రు విజు పుజెరిజు ముస్సు మన్ని పెరి పెరి పుజెరి పణిమన్నిసిలోఇ ఒరెన్. వాండ్రు, “నిజి వన్నివెట టోటాదు నాను సుడేశతగదె?”, ఇహాన్.

27 మరిబా, “నాను నెన్వి”, ఇజి వెప్తాన్. వెటనె కొరు కెరెతాద్.

యేసుజీపిలాతు ముజాల ఒసినార్

28 వెన్కా యూదురు యేసుజీ కయప బాణిజరోమా గవర్నరు మన్ని పెరి ఇండ్రో ఒతార్. అయావలె పెందాల్అతాద్. యూదురు ఆఇ వన్ని ఇండ్రో డుగ్జి మయల ఆనాప్ఇజి ఒడిబిజి వారు గవర్నరు మన్ని ఇండ్రో డుగ్గివతార్. ఎందానిజ్ఇహిజ, వారు పస్కు బోజనం ఉండెజ్నుబమ్క మండ్రెజ్వలె. అయాక ఉండ్రె ఆసారం.

29 అందెజి గవర్నరు ఆతి పిలాతు, వెల్లి వరిడగ్రు వాతండ్రె, విని ముస్సు ఇనిఇని నేరమ్కు మెప్పినిదెర్?”, ఇజి వెన్బాతాన్.

30 అయావలె వారు, “పిండ్రు తపు కిఇకాన్ ఇహిజ, నీ బాన్తెఎతాప్మరి”, ఇజి మరజి వెప్తాన్.

31 పిలాతు వరిజ్, “మీరె వన్నిజ్ఒసి, మీ యూదురి రూలుదు మన్ని వజ తీర్పు సీదు”, ఇహాన్. దనిజ్వారు, “ఎయెరిజ్బా సప్తెజ్మజి అక్కుసిల్లెద్”, ఇహాన్.

32 యేసుపెలాగ మర్తి సాపు సానాన్ఇజి వాండ్రు వెప్తి మాటజ్ పూర్తి అందెజ్ యాక జగ్గితాద్.

33 పిలాతు వన్ని ఇండ్రో మరజి సాహండ్రె, యేసుజీ కూక్కిస్తాండ్రె వన్నిజ్, “నీను యుదురిజ్రాజునా?”, ఇజి వెన్బాతాన్.

34 అందెజి యేసు, “నీలోఇహాన్ వాతి మాటనా, మహికార్నా వందిజ్నిజి వెప్తారా?”, ఇజి వెన్బాతాన్.

35 అయావలె పిలాతు, “నాను యూద్ వాండ్రనా? నీ సొంత లోకురెని నీ సొంత పెరిపుజెరిజు నిజి నాబాన్ ఒపజెప్తార్. నీను ఇన్నిక కితి?”, ఇజి వెప్తాన్.

36 అందెజి యేసు, “నా అతికారం యా లోకమ్ది రాజురిజ్ మన్ని అతికారం లెకెండ మన్నిక ఆవిద్. నన్నిఅతికారం నజి మహిజ, యూదురు నజి అరెష్టు కివీండ నా సిసూర్ అడ్డు కిత్తార్ మరి. గాని నాను యా లోకమ్ది రాజు ఆవు”, ఇజి వెప్తాన్.

37 “అహిజ, నీను ఒరెన్రాజునా?”, ఇజి పిలాతు వెప్తాన్. అందెజి యేసు, “నాను రాజు ఇజి నీను వెప్పిని. నిజమాతి మాటజ్వెప్పి వందిజె నాను పుట్టానె యా లోకమ్దు వాత. నీజమాతికెజ్ కోరిజనికాన్ నాను వెప్పిని మాటజ్ వినాన్”, ఇజి వెప్తాన్.

38 అయావలె పిలాతు, “నిజమాతి మాటజ్ఇన్నికెజ్?”, ఇజి వెన్బాతాన్. వెన్బాతాండ్రె వాండ్రు వెల్లి యూదురు బాన్సాహండ్రె, “వనిజ్తీర్పు సీదెజ్విని లోఇ ఇన్ని నేరంబా తోర్విద్.

39 గాని మీ అలవాటులెకెండ్రె, ఏంటుఏంటు పస్కు పండోయ్ కాలమ్దు, “కయదు మన్ని ఒరెన్వన్నిజ్మజి డిసిసి పోకఅ”, ఇజి మీరు లోస్సిదెర్. అందెజి యుదురిజ్రాజుజ్ నాను డిసిసి సీదెజ్ మీరు కోరిజనిదెరా?”, ఇజి వెన్బాతాన్.

40 అయావలె వారు, “పోని! వినిజ్పోని. బరబెజ్డిసి సిదా మజి”, ఇజి డెల్లి మరజి వెప్తాన్. యా బరబ్బి ఒరెన్ కకారి.

19

1 అందెజి పిలాతు, “యేసుజీ ఒసి కొరడెజ్జాణిజ్ డెయదు”, ఇజి నయనమ్దివరిజ్ వెప్తాన్.

2-3 నయనమ్దికారె సాప్కాణిజ్ టోపి తయారె కిత్తారె వన్ని బురాదు తోడిగిస్తార్. వారు వన్నిజ్నండ్రె ఎరాని నరి సొక్క తోడిగిస్తారె, వన్నిడగ్రు సొన్ని, “యూదురిజ్ రాజు నిజి జెయము”, ఇజి వెక్కిని వెప్తాన్. వారు వన్ని లెపాదు డెయ్యార్.

4 మరి ఉండ్రీనుటబా, పిలాతు వన్ని ఇండ్రోణిజ్ వెల్లి వాతాండ్రె, మంద యూదురిజ్ “ఇదిలో, వన్ని లోఇ ఇనితప్పబా నజి తోర్విద్ ఇజి మీరు నెస్టెజ్నాను వన్నిజ్వెల్లి మీ డగ్రు తపిన్న”, ఇజి వెప్తాన్.

5 అందెజె యేసుజ్ సాప్పాణి బోపి ని ఎరాని సొక్క తోడెగిస్తారె వెల్లి తతార. అయావలె పిలాతు వరజ్, “ఇవిలోన్ వాండ్రు”, ఇజి వెప్తాన్.

6 పెరిపుజెరిబుని దేవుణు గుడిది జమాజ్ణలు వన్నిజ్ నుడిజెతారె, “వన్నిజ్ సిలువాదు కుటిజాణిజ్ డెయిజి నవ్త, సిలువాదు కుటిజాణిజ్ డెయిజి నవ్త”, ఇజి డెడిజెస్తారె. గాని పిలాతు, “విని లొఇ నజి ఇన్ని తవు బా తోరెవద్. అందెజె మీరి వన్నిజ్ బసి, సిలువాదు డెయిజి నస్త్రు”, ఇహోన్.

7 అయావలె వారు, “మజి మా యూదురి రూలుజ్ మనాద్. అయా రూలుజ్ వజి వీండ్రు సాదెజ్ వలె. ఎందానిజ్ ఇహిజి, వీండ్రు, “నానె దేవుణు మరిసి ఇజి వెప్తాన్”, ఇహోన్.

8 పిలాతు యా మాటెజ్ విహిజ్ మరి ఒదె తియెల్ అతాన్.

9 వాండ్రు మరి వన్ని ఇండ్రె డుగితాండ్రె యేసుజ్, నీను ఎంబెణిజ్ వాతికి? ఇజి వెన్ బాతాన్. గాని యేసు మరజి ఇనికబా వెహ్ అతాన్.

10 అందెజె పిలాతు, “నీను నా వెట వర్గెదా? నిజి సిలువాదు కుటిజాణిజ్ డెయిజి నస్త్రెజ్ బా నజి అతికారం మనాద్. విడుదల కిదెజ్ బా అతికారం మనాద్ ఇజి నీను నెన్ ఇదా?”, ఇహోన్.

11 అందెజె యేసు, “నా ముస్సు దేవుణు నిజి అతికారం సీతిజ్ నె, నిజి అతికారం మనాద్. అందెజె నజి నీ బాన్ ఒవజెప్తాన్ నిజి ఇంక లావు పాపం కిత్తాన్”, ఇజి వెప్తాన్.

12 యా మాట విహండ్రె పిలాతు యేసుజ్ విడుదల కిదెజ్ నుడిజెతాన్. గాని యూదురు, “నీను వినిజ్ డెసి సీతిజ, నీను కయెనరు రాజుజ్ కులవాండ్రు ఆఇ. రాజు ఇజి వన్నిజ్ వాండ్రె వెహ్ ఆనికాన్ ఎయెనబా కయెనరుజ్ పగ అతికాన్”, ఇజి మరి డటం డెల్ స్తారె.

13 పిలాతు యా మాటెజ్ విహిజెలె, వాండ్రు యేసుజ్ వెల్లి తతాన్. తతాండ్రె నాయం తిరస్సికాన్ బన్ని కురెసిదు బస్తాండ్రె యేసుజ్ సిలువాదు డెయెల ఇజి తీర్పు సీతాన్. అయా కురెసి వణకాణిజ్ తయారె కితి బాడిజి ఇజి కూక్కి బాడిడు మనాద్. అయా బాడిజ్ ఎల్లి బానదు గబత ఇనారె.

14 నస్తివలె పస్సువండ్రెయె నడిమి మన్ని విస్తాంతిదినం ముజాల మన్ని తయారె ఆని రోజు. పెందాల్ ఆరు గంటెజ్ అతాద్. అయావలె పిలాతు, “ఇవిలోన్ మీ రాజు”, ఇజి యుదురిజ్ వెప్తాన్.

15 అందెజె వారు, “నవ్త వన్నిజ్, నవ్త వన్నిజ్, సిలువాదు వన్నిజ్ కుటిజాణిజ్ డెయిజి నవ్త”, ఇజి డెడిజెస్తారె. “నాను మీ రాజుజ్ సిలువాదు కుటిజాణిజ్ డెయిజి నస్త్రెజా?”, ఇజి పిలాతు వెన్ బాతాన్. అయావలె పెరి పుజెరిబు, “కయెనరు ఒరెండ్రె మా రాజు. మరి ఎమెణి రాజు మజి సీల్లెన్”, ఇజి వెప్తాన్.

16 అందెజె పిలాతు యేసుజ్ సిలువాదు డెయిజి నస్త్రెజ్ వరజి ఒవజెప్తాన్. వారు వన్నిజ్ ఒతారె.

యేసుజ్ సిలువాదు పొక్కినారె

17 యేసు వన్ని సొంత సిలువ పిండిజి, పట్టుం వెల్లి వాతండ్రె బుర్రె పిణికి ఇజి కూకె ఆని బాడిడు వాతాన్. ఎల్లి బానదు దన్నిజ్ గోల్ గోత ఇనారె.

18 అబ్బె నయెనమదికారె వన్నిజ్ సిలువాదు కుటిజాణిజ్ డెయెతారె. వారు రివీరి లోకురిజ్ బా వన్నిజెటె సిలువాదు కుటిజాణిజ్ డెయెతారె. యేసుజ్ నడిమి ఇట్టాన్. ఒరెన్ వన్నిజ్ ఉణెరి పడెకాద్. ఒరెన్ డెబరు పడెకాద్. ఆహె సిలువాదు డెయ్యారె.

19 పిలాతుబా ఉండ్రె బోరెడు తయారె కిబిస్తాండ్రె, సిలువాదు తొహ్మత ఇట్టాన్. అయా బోరెడుదు, ‘నజరెతుదికాన్ అతి యేసు. యూదురిజ్ రాజు’, ఇజి రాసి ఇట్టాన్.

20 ఎల్లి, గ్రీకు, రోమ యా మూండ్రె బానిజాణిజ్ బోరెడుదు ఆహె రాస్త్రు మహోర్. యేసు ప్రబుజ్ సిలువాదు డెయిజి బాడ్డిజి పట్టుం డగ్రు మనాద్. అందెజె నండెండారె యూదురు అయాక నదవిత్తారె.

21 నస్తివలె యూదురిజి పెరి పుజెరిబు పిలాతుజ్, “యూదురిజ్ రాజు ఇజి రాస్త్రు. గాని ‘నానె యూదురిజ్ రాజు’, ఇజి వీండ్రు వెప్తాన్ ఇజి రాన్ అ”, ఇహోన్.

22 అందెజె పిలాతు, “నాను రాస్తి మన్నికదె మన్నిద్. మరి మారిన్ వ”, ఇహోన్.

23 నయెనమదికారె యేసుజ్ సిలువాదు కుటిజాణిజ్ డెయిజి వలె వన్ని సొక్కెజ్ లాగితారె. వాండ్రు వేడ్ గితి మహె సాల్ వదిజ్ నాల్లి ముకెజ్ కిస్తారె, ఉండ్రె ముక ఒరెన్ వన్నిజ్ ఆహె సిబె అతారె. పాదమదాక మంజిని ఉండ్రె నిరి సొక్కబ మహోద్. అయాక కుటు సీలిక. ముస్సుహోన్ అల్లి దాక కుటు సిల్లెండ ఉండ్రె లెకెండ గుత మహోద్.

24 ఒరెన్ మరి ఒరెన్ వెట, “అయాక కిస్మాట్. ఎయెరిజ్ అయాక వానాద్ ఇజి సీటి పొక్సి నూణాట్”, ఇజి వర్గితార్. ‘నా సాల్పు వారు సిబె ఆతార్. నా నిరీ సొక వరిజ్ సీటి పొక్టార్*’, ఇజి దేవుణు మాటదు రాస్తి మనికెజ్ పూర్తి ఆని వందిజ్ యాక జర్గితాద్. నయనమ్దికార్ అయాలెకెండె క్షితార్.

25 నస్తివలె, యేసుజ్ డెయేతి సిలువ డగ్గు వన్ని అయిసి, వన్ని కొగ్రి అయిసి, క్లొపా ఇన్ని వన్ని ఆల్ని మరియ, మగదలెనె మరియ ఇనికెజ్ నిపా మపా.

26 యేసువన్ని అయేసిని వాండ్రు నండొ ప్రేమిస్తి సిసూ, డగ్గునిహి మహిక సుడెతాండ్రె అయేసిజ్, “ఓ యా, నేండ్రుహాన్ వీండ్రె నీ మరిన్ లెకెండె మంజినాన్లె”, ఇజి వెప్తాన్.

27 మరి సిసూడుజ్, “ఇదిలో నీ యాయ”, ఇజి వెప్తాన్. నాండిహాన్ అయా సిసూ దనిజ్ వన్ని ఇండ్రె కూక్ బతాన్.

యేసు సాజినాన్

28 వెన్కా, బుబ్బు బవజెప్పి పణిజ్ విజి ఏలు పూర్తిఆతె, ఇజి ఏలు నెస్టాన్. నెస్టాండ్రె, కీర్తన పుస్తకమ్దు రాస్తి మన్ని మాటిజ్ పూర్తి ఆని వందిజ్ ‘నజి ఏప్కా కట్సినాద్’, ఇజి వెప్తాన్.

29 అయావలె అబె నండొ సేందు ద్రాక్కు కడు మన్ని ఉండ్రె డొకు మహాద్. నయ్యమ్దికార్ ఉండ్రె దూది ననిక అయా సేందు ద్రాక్కుకల్లుదు ముడుకీతారె, అయాక ఇసాపు మరాతి కొమాదు తొప్తారె, వన్ని వెయదు సితార్.

30 వాండ్రు అయాక ఉటాండ్రె, “నా పణిజ్ పూర్తి ఆతాద్”, ఇజి వెప్తాండ్రె, బుర్ర వక్సి పాణం డెస్టాన్.

31 నస్తివలె, అయా రోజు విప్రాంతిదినం ముజాల మన్ని తయార్ ఆని రోజు. మహ్న నాండిజ్ విప్రాంతి దినం. యా దినం ముకెలమాతిక. ఎందానిజ్ ఇహిజ, యూదురి పస్కు వండ్రెయి అయనాండిజె మొదోలీసినాద్. నాండిజ్ మొడ సిలువాదు మండ్రెజ్ వరిజ్ ఇస్టం సిల్లెద్. అందెజె యూదురు పిలాతుజ్, సిలువాదు పొక్తి వరి కాల్కు రుజు డెయేజి వరిజ్ బేగి నపిసి, వరి పీనుగు సిలువెజాణిజ్ డెస్టెజ్ నెల్పు లొస్టార్.

32 పిలాతు సెలవ సిత్తిజ్, నయనమ్దికార్ వాతారె, యేసువెట సిలువాదు డెయేజి మొదోహి వన్ని కాల్కు రుజు డెయేతార్. వెన్కా మహి వన్ని కాల్కు బా రుజు డెయేతార్.

33 గాని యేసుడగ్గు వాతిజ్, వాండ్రు ముజాలె సాతాన్ ఇజి వారు నెస్టార్. అందెజె వారు వన్ని కాల్కు రుజు డెయేవితార్.

34 గాని నయ్యమ్దివరి లొఇ ఒరెన్ బలెందాన్ ఉండ్రె వడెకాదు గుతాన్. గుతిజ్ వెటనె, ఏరు నల సొతె.

35 మీరుబా నమినివందిజ్, యాక జర్గితవలె సుడెతికాన్ దనివందిజ్ వెప్తాన్. వాండ్రు వెప్తాక నిజమెనె. వాండ్రు నిజం వెప్సినాన్ ఇజి వాండ్రు నెస్టాన్.

36-37 ‘వన్ని డుముక లొఇ ఉండ్రె బా రుజ్ విద్†’, ఇజి, మరి, ‘వారు గుతివన్నిజ్ వారు నూణార్‡’, ఇజి రాస్తి మన్ని దేవుణు మాటిజ్ పూర్తి ఆని వందిజె యా సజతిజ్ జర్గితె.

యేసుజ్ నమాది కిజినార్

38 యోసేపు ఇనికాన్ ఒరెన్ మహాన్. వాండ్రు అరిమతియ ఇని పట్టుమ్దికాన్. వాండ్రు యేసు సిసూ ఒరెన్. గాని వాండ్రు అయాక ఎయెరిజ్ బా వెహివితాన్. ఎందానిజ్ ఇహిజ, వాండ్రు యూదురిజ్ తియెల్ ఆతార్. వెన్కా వాండ్రు యేసు పీనుగు సిలువదాన్ డెస్టి నమాది కిదెజ్ పిలాతుజ్ నెల్వ లొస్టాన్. నెల్పు సితెజ్ వాండ్రు వాతండ్రె మొడెజ్ బతాన్.

39 నికొదిమె ఇన్నికాన్ ఒరెన్ బా వన్ని వెట సాహాన్. యా నికొదిమెనె, ముజాలె, యేసుజ్ రెయేతు సాస్తి సుడెతికాన్. వాండ్రు డగ్గు ముప్పుయె నాల్లి కె. జి, బోలము కలప్తి అగరు ఇన్ని మొడెజ్ నెల్వండ ఇడ్డి మాయమ్కు తత్తాన్

40 వారు రివీర్, యేసు పీనుగు బతారె, మాయమ్కు రాసి తెలాని పాతెజాణ్ సుట్టిస్తారె. యూదురు నమాది కిని ముజాలె, పీనుగుతయార్ కిని అలవాటు లెకెండె ఈహు క్షితార్.

* 19:24 19:24 క్షిప్ర 22:18. † 19:36-37 19:36-37 జికో 12:10. ‡ 19:36-37 19:36-37 నల్పు 12:46, క్షిప్ర 34:20.

41 యేసుజ్జీ సిలువాదు డెయితి బాడిఁడు ఉండ్రీ టోట మనాద్. అబ్బె పణుకుదు దొలిస్త్రీ ఉండ్రీ కొత్తదూకి మహాద్. అబ్బె ఎయెరిజ్జీబా ఎనెజ్జీబా ఇడఁవెర.

42 అయా రోజు యూదురి విస్త్రాంతిదినం ముజాల మన్ని తయారెఆని రోజు. మరి, అయా దూకిడగ్రు మహాద్. అందెజె వారు యేసుజ్జీ అబ్బె ఇట్టార్.

20

1 వారమదిజ్జీ మొదొహి రోజు పెందాల్, సీకట్మనబునె మగ్గలనె మరియ పీసుగు నూనెజ్జీ రాస్తాజ్జీ దూకిదు సాహాద్. అది వాతిజ్జీ, పీసుగుఇడ్జీ సమాదిదిజ్జీ మూక్తి పణుకు లాగితిక సుడఁతాద్.

2 అందెజె అది ఉహ్యోజి సొన్సి, యేసు నండొ ప్రేమిస్త్రీ సిసూ బాన్, సిమోన్ పేతురుబాన్ వాతాదె పరిజ్జీ, “ప్రబుజ్జీ సమాదిదాన్ వారు ఒతార్. వన్నిజ్జీ ఎంబె ఇడ్డారొ ఇజి మాపు నెన్వీవ్”, ఇజి వెప్తాద్. (మరియవెట మరి నెగొండెబోదెక్బా మహా)

3 అందెజె పేతురుని, అయా సిసూ సోతారె సమాదిదు సాహోర్.

4 వారు రివెర్ ఉహ్యోజి సొన్సి మహోర్. గాని అయా సిసూ పేతురుజ్జీ ఇంక బేగి ఉహ్యోతాండ్రె సమాది ముజాల వాతాన్.

5 వాండ్రు వజ్జీజి సుడఁతిజ్జీ, తెలాని పాతెజ్జీ అబె అర్త మహిక సుడఁతాన్. వాండ్రు లోఇ డుఁగ్వితాన్.

6-7 నస్త్రీవలె సిమోన్ పేతురు వన్ని వెన్కా వాతండ్రె లోఇ డుగితాన్. వాండ్రు తెలాని పతెజ్జీఅర్తి మహిక సుడఁతాన్. యేసు బుర్త సుట్టిస్త్రీ మహి పన్సెబా అబ్బె అర్త మహిక సుడఁతాన్. అయా పన్సె, తెలాని పాతవెట కూడఁవిండ సుట్టిస్త్రీడఁసనె వేరె మహాద్.

8 వెనుక ముజాల సమాదిదు వాతి సిసూబా డుగితాన్. వాండ్రు పాతెజ్జీ అర్తి మహిక సుడఁతాండ్రె, యేసు మరజి నిజితాన్ ఇజి నమ్మితాన్.

9 యేసు సాతి పరిబాణిజ్జీ తవ్విండ మరజి నిజ్జీనాలె ఇజి దేవుణు మాటదు రాస్త్రీ మన్ని మాటదిజ్జీ వారు ఇంక అర్తం కివెర.

10 సిసూర్ పరి ఇల్కాజ్జీ మరజి సాహోర్.

యేసు మగ్గలనె మరియెజ్జీ తోరె ఆజినాన్

11 మరియ మరి సమాదిదు వాత మహాద్. అది వెల్లినిహాదె, అడఁబాజి మహాద్. అడఁబాజినె అది వజ్జీజి సమాది లోఇ సుడఁతాద్.

12 అయావలె, తెలాని పాతెజ్జీ పొరపాతి రివెర్ దేవుణు దూతెజి అది సుడఁతాద్. యేసు పీసుగుమహి బాడిఁడు బస్త్ర మహోర్. పాదమక దరిజ్జీ ఒరెన్ బస్త్ర మహోన్. బుర్త గాడిద్ ఒరెన్ బస్త్ర మహోన్.

13 వారు మరియెజ్జీ, “ఓ బీ ఎందానిజ్జీ నీను అడఁబాజిని?”, ఇజి వెన్బాతార్. అందెజె అది, “నా ప్రబు మొడఁ ఎయెరో పెప్తా ఒతార్. ఎంబె ఇడ్డారొ నజీ తెలివెద్”, ఇజి వెప్తాద్.

14 యా మాటజ్జీ వెప్తాదె, వెన్కా మరజి బేస్తాద్. బేస్త్రీజ్జీ యేసు అబ్బె నిహి మహిక సుడఁతాద్. గాని వన్నిజ్జీ గుర్తు అన్వితాద్.

15 అయావలె యేసు, “ఓ బీ, ఎందానిజ్జీ నీను అడఁబాజిని? ఎయెరిజ్జీరెబాజిని?”, ఇజి వెన్బాతాన్. విండ్రు అయా టోటాదు పణి కినికాన్సు ఇజి ఒడిబిజి, “బాబు, నీను వన్ని పీసుగుపిండితి ఒతి మహిజ, ఎంబె ఇడ్జీ మన్నిదో నజీ వెహా. నాను సొన్సి వన్నిజ్జీపెర్న ఒనాలె”, ఇజి వెప్తాద్.

16 నస్త్రీవలె యేసు దన్నిజ్జీ, “మరియ”, ఇజి కూక్తాద్. వెటనె అది మరజి వన్ని దరిజ్జీ మహ్తాద్. వాండ్రు యేసు ఇజి గుర్తు అస్తాదె ఎత్రి బాన్దు, “రెబుని”, ఇజి కూక్తాద్. దని అర్తం బోదొస్సికాన్ ఇజి.

17 అయావలె యేసు, “నాను నా బుబ్బడగ్రు ఇంక మరజి సొన్విసె. అందెజె నజీఅసి మన్మా. గాని నీను నా సిసూర్ డగ్రు సొన్సి వరిజ్జీ, “నాను నా బుబ్బడగ్రు మరజి సొన్సిన. వాండ్రునె నా బుబ్బు మీ బుబ్బు. వాండ్రె నా దేవుణు మీ దేవుణు”, ఇజి వెహా”, ఇజి వెప్తాన్.

18 అందెజె మగ్గలనె మరియ సిసూర్ డగ్రు వాతాదె, “ప్రబుజ్జీసుడఁత”, ఇజి వెప్తాద్. మరి ప్రబు దన్నిజ్జీ వెప్తాకెజ్జీబా వెప్తాద్.

యేసు వన్ని సిసూర్జీ తోరె ఆజినాన్

19 అయా ఆదివారమనె, పొదొయ్ సిసూరకూడితారె, నేళ్ళా కెప్పొ బుస్త మహార. ఎందానిజ్ ఇహిజ, వారు యుదురిజ్ తియెలెఆతార. యూదురు వరిజ్అదికారుజ ఒపజెప్పారె ఇజి. నన్సివలె యేసు వాతండ్రె వరినడిమి నిహండ్రె, “సమాదనం కల్లిపిద్”, ఇజి వెప్తాన్.

20 యాక వెప్తాండ్రె, సిలువాదు డెయ్మ ఆతివెలె వన్ని కికాజ్, వన్ని వడకాద్ వాతి గాయమకు వాండ్రు వరిజ్ తోరిస్తాన్. ప్రబుజ్సుడతారె సిసూర నండ్రె సరద ఆతార.

21-22 మరి బా యేసువరిజ్, “మిజి సమాదనం కల్లిపిద్. నా బుబ్బు వన్ని మాట బోదిస్తెజ్ నజి యా లోకమ్దు పోక్తి వజ నాను మిజి పోక్తిన్”, ఇజి వెప్తాండ్రె, వరి ముస్కు తూబితాన్. తూబితాండ్రె, వరిజ్, “దేవుణు అత్తుదిజ్ మీ మన్గుదు ఇడెడు.

23 మీరు ఎయిపాపమకు సెమిస్సిదెరె, వరి పాపమకు సెమిస్త మన. ఎయిపాపమకు మీరు సెమిసెఇదెరె, అయకెజ్ సెమిసి మన్ఉ”, ఇజి వెప్తాన్.

యేసుతోమెజ్తొరె ఆజినాన్

24 యేసు సిసూరజ్ తోరె ఆతివలె, పన్నెండ్రు మన్నిసీర సిసూరలోఇ మన్ని దిదుము ఇన్ని తోమా సిల్లెండ్రు మహాన్.

25 అందెజె మహి సిసూర, “మాపు ప్రబుజ్సుడతావ్ ఇజి వెప్తాజ్, వాండ్రు, “నాను వన్ని కికాజ్ కుంటిజాణిజ్ డెయ్మతి గాయమది మసదిజ్తొఎండ, అయా మనదు ముట్విండ, వన్ని వడకాదు నాను కియు ఇడెవిండ, వాండ్రు నిజిత మనాన్ ఇజి నమిఎ”, ఇహాన్.

26 ఉండ్రె వారం వెన్కా వన్ని సిసూరవిజెరె మరిబా కూడితారె, ఉండ్రె ఇండ్రె మహార. తోమాబా వరివెట మహాన్. సెళ్ళా కెపా ఆత మహాద్. గాని యేసు వాతండ్రె వరినడిమి నిహండ్రె, “సమాదనం కల్లిపిద్”, ఇజి వెప్తాన్.

27 మరి తోమెజ్, “నీ డెస్సు ఇబ్బె ఇడెఅ. నా కికాజ్ సుడెఅ. నీ కియు సాప్పి నా వడకాద్ మన్ని గాయమదు ఇడెఅ. అనుమానం సిల్లెండ్రు నమిఅ”, ఇజి వెప్తాన్.

28 అయావలె తోమా, “నీనె నా ప్రబు. నీనె నా దేవుణు”, ఇజి వెప్తాన్.

29 అందెజె యేసు వన్నిజ్, “నీను నజి సుడెతిజ్ నిజితమనాన్ ఇజి నమ్మితి. నజి తొవిండ నమ్మితికారె గొప్ప వారు”, ఇజి వెప్తాన్.

30 యేసు వన్నిసిసూరజు నడిమి, మరి నండ్రె బమ్మాని పణిజ్ కితాన్. అయకెజ్ యా పుస్తకమ్దు రాన్ఉ.

31 గాని, యేసు క్రీస్తు ఇజి, వాండ్రు దేవుణుమరిసి ఇజి మీరు నమ్మినివందిజ్, వన్ని ముస్కు మన్ని మీ నమకమదాన్ మిజి ఎలాకాలం దేవుణువెట బత్తిని బత్తు దొప్పివందిజ్ యాకెజ్ రాస్త మన్నె.

21

1 దిని వెనుక, యేసు తిబెరియ సమ్దరం డగ్రు మరి వన్ని సిసూరజ్ తోరె ఆజినాన్. వాండ్రు ఈహు తోరె ఆతార.

2 సిమోన్ పేతురు, దిదిమ ఇజి కుకెఆని తోమా, గలిలయ ప్రాంతమది కానా ఇన్ని పట్టుమది నతనయేలు, జెబెదదు మరిసీరెఆతి యాకోబు యోహాను, మరి రివీర్ సిసూర కూడిత మహార.

3 సిమోన్ పేతురు, “నాను మెయెజ్ అన్జెసాన్సిన”, ఇజి వరిజ్ వెప్తాన్. అయావలె వారు, “మాపు బా నీ వెట వానావ్”, ఇహార. అందెజె వారు సాహారె, ఉండ్రె డోణి ఎక్టారె సాహారె. గాని ఆ రెయితు ఇనికబా అన్వితార.

4 పొద్దు సోని మహివలె, యేసు సమ్దరం దరీదు నిహాన్. గాని వన్ని సిసూర యేసుఇజి గుర్తు అన్వితార.

5 అందెజె వాండ్రు వరిజ్, “తంబెరిజాండె, మెయెజ్ ఇన్నికబా అన్విదెరా?”, ఇజి వెన్బాతాన్. వారు, “సిల్లెద్”, ఇజి వన్నిజ్ వెప్తాన్.

6 నన్సివలె వాండ్రు, “డోణి ఉణెరె పడకాదు మీ వలెజ్పొక్తు. మిజి దొమ్కానె”, ఇజి వెప్తాన్. వారు అయ లెకెండ్రె కితార. మెయెజ్ నండ్రె అర్తె. వల లాగ్దెజ్ అజ్వితార.

7 అయావలె, యేసు నండొ ప్రేమిస్తి సినూ, “వాండ్రు ప్రబు”, ఇజి పేతురుజ్ వెప్తాన్. “వాండ్రు ప్రబు”, ఇజి అయా సినూ వెప్తా మాట విహి వెటనె, సిమోన్ పేతురు వాండ్రు లాగితి ఇడ్డి సాల్వ వడ్డిగితాండ్రె, నమ్దరమ్దు డాట్టాన్.

8 వారు గటుదాన్ ఎంజు మెంసు నూరు మూరెజ్ నె దూరం మనార. అందెజి మహి సిసూర్ మెయెజ్ మన్సి వల లాగిజినె డోణిదు వాతార.

9 వారు డిఁగిజి వాతిజ్ గటుదు, సినూ డిఁప్పుజ్ దనిముస్కు మెయెజ్ రొటెజ్ తోరితె.

10 యేసు వరిజ్, “మీరు ఏలు అస్తి మహి సెగం మెయెజ్ అగాట్”, ఇజి వెప్తాన్.

11 సిమోన్ పేతురు డోణి ఎక్తాండ్రె వల గటుదు లాగితాన్. అబె నూటి యాబయి మూండ్రీ పెరి మెయెజ్ వలదు నిండ్రెత మహె. గాని నిసా మహిజ్ బా వల కింజ్ వితాద్.

12 యేసు వరిజ్, “రదు తిండ్రు”, ఇజి వెప్తాన్. వాండ్రు ప్రబు ఇజి వరిజ్ తేలితార. అందెజి, నీను ఎయి ఇజి వన్నిజ్ వెన్ బాదెజ్ సిసూర్ లోఇ ఎయెన్ వన్నిజ్ బా దయరం నిల్లెతాద్.

13 యేసు వాతాండ్రె, రొట్టెజ్ లాగితాండ్రె వరిజ్ సీబాత సితాన్. అయె లెకెండ్ మెయెజ్ బా సిత్తాన్.

14 యేసు సాతి వరిబాణిజ్ బత్తితి వెన్యా, దినివెట ఏలు ముసార సిసూర్ జ తోరె అత్తాన్.

15 వారు తిహి వెన్యా, యేసు సిమెన్ పేతురుజ్, “యోహాను మరిసి అతి సిమెను, నీను మహి సిసూర్ జ ఇంక నీను నండొ నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్ను ఇజి నీను నెస్సి”, ఇజి వాండ్రు వెప్తాన్. అందెజి యేసు, “నా గొరె పిలెకాజ్ మెవ్ అ”, ఇజి వెప్తాన్.

16 మరిబా యేసు వన్నిజ్, “యోహాను మరిసి అతి సిమెను, నీను నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్ను ఇజి నీను నెస్సి”, ఇజి రిజి వెప్తాన్. అందెజి యేసు, “నా గొరెజ్ అడిఁఅ”, ఇజి వెప్తాన్.

17 “యోహాను మరిసి అతి సిమెను, నజి ప్రేమిస్తిదా?”, ఇజి ముసార వెన్ బాతాన్. నీను నజి ప్రేమిస్తిదా ఇజి ముసార దిజ్ వెన్ బాతిజ్, పేతురు బాద అతాన్. “ప్రబు నీను విజి నెస్సికి. నాను నిజి ప్రేమిస్ను ఇజి నీను నెస్సి”, ఇజి పేతురు వెప్తాన్. అందెజి యేసు, “నా గొరెజ్ మెవ్ అ”, ఇజి వెప్తాన్.

18 “నాను నిజం నీవెట వెప్పాన్, నీను దజడఁ మనివలె, నీను తయార అజి నీ ఇన్ఱం అతి బాడిఁదు సాహి. గాని నీను డొక అనివెలె, నీకికు నీను సాప్పి. మరి ఎయెన్ బా నిజి తోప్పా నిజి ఇన్ఱం నిల్లె బాడిఁదు పిండిజి ఒనాన్”, ఇజి వెప్తాన్.

19 పేతురు ఎలాగమర్తి సాపు సాజి దేవుణు గొప్పపెరికాన్ ఇజి తోరిస్సాండ్రె, దనివందిజ్ వాండ్రు యా మాటెజ్ వెప్తాన్. వెన్యా వన్నిజ్, “నా సినూ అజి రఅ”, ఇజి వెప్తాన్.

20 పేతురు వెనుక మహ్తాండ్రె, యేసు నండొ ప్రేమిస్తి సినూ, వరి వెన్యా వాజనిక నుడతాన్. (యా సినూనె పస్కు బోజనం తిహివలె యేసు గుంజమ్దు ఒరిగితాండ్రె, “ప్రబువా, నిజి అదికారిజి కీదు ఒవజిప్పికాన్ ఎయెన్”, ఇజి వెన్ బాతికాన్).

21 పేతురు వన్నిజ్ నుడతాండ్రె, “ప్రబువా, వినిజ్ ఇన్నిక జర్ధినాద్?”, ఇజి వెన్ బాతాన్.

22 అందెజి యేసు, “నాను మరెజి వానిదాక వాండ్రు బత్తిదెజ్ నజి ఇన్ఱం అతిజ, నిజి ఇన్నిక? నీను నా సినూ అజి వెన్యా వాదెజ్ వలె”, ఇజి వెప్తాన్.

23 యేసు అయెలెకెండ్ వెప్తాజ్, యా సినూ సావీన్ ఇజి ఉండ్రీ మాట మహి వరి నడిఁమి నెద్రిస్తాద్. గాని వాండ్రు సావీన్ ఇజి యేసు వెపావితాన్. నాను వానిదాక వాండ్రు బత్తిదెజ్ నజి ఇన్ఱం అతిజ, నిజి ఇన్నిక?”, ఇజి వాండ్రు వెప్తాన్.

24 యా నజతిజి వందిజ్ వెప్తాకాన్ యా సినూనె. వీండ్రె అయాకెజ్ రాస్త ఇట్టాన్. వాండ్రు వెప్తాకెజి నిజం ఇజి మాపు నెనినావ్.

25 యేసు మరి నండొ నజతిజ్ కితాన్. అయాకెజ్ విజి రాసి ఇడ్ దెజ్ ఇహిజ, రాసిని వుస్తకమ్కు అస్తెజ్ యా లోకమ్దు మన్ని బాడ్డి సాల్ వద్ ఇజి నాను ఒడ్ కీస్త ఇజి.

అపొస్తురు కిత్తి పణిజ్

నెల్వ కిబిసినిక

లూక సువార్త రాస్తిమహి లూకనె యా పుస్తకం రాస్తాన్. లూక ఒరెన్ డాక్టరు. క్రీస్తు సకం 60-63 నడిమి యాక రాస్త మనాద్ ఇజి వెప్పినార్. క్రీస్తు సాజి నిజితి వెన్కా మొదోహి 30 వంటిజ్ లొఇ జర్గితికెజ్ ఇబ్బి రాస్తి మన్నె. లూక సువార్తదు యేసుక్రీస్తు కిత్తి గొప్ప పణిజ వందిజ్ లూక రాస్తాన్. వెనుక, యేసుక్రీస్తు పరలోకమదు సాహి వెనుక దేవుణు అత్తు వాతండ్రె వన్ని అపొస్తురు వెట గొప్ప బమ్మాతి పణిజ్ కిత్తాన్. యూదయదేసెమదాన్ అంతియొకయూదు, బాణిజ్ రోమపట్టు దాక యేసుక్రీస్తు వందిజ్ సువార్త సాటిస్తారె అపొస్తురు అయ కాలమదు కిత్తి పణిజ వందిజ్ ఇబ్బి రాస్త మనాద్.

దేవుణు యేసుజ్ పరలోకమదు ఒత్తాన్

1-2 నా ప్రయమాతి దెయొపిలె, నాను ముందాల రాస్తి పుస్తకమదు, దేవుణు యేసుజ్ పరలోకమదు ఒనెండ యేసు కిత్తి విజు పణిజ వందిజ్, యేసు నెన్పిస్తి విజు మాటెజవందిజ్ రాస్త మనాద్. దేవుణు యేసుజ్ పరలోకమదు ఒనిముందాల యేసు, వాండ్రు ఏర్పాటు కిత్తి అపొస్తురుజ్ వారు కిని పణి వందిజ్ దేవుణు అత్తు సత్తుదాన్ ఆడ్ర సిత్తాన్.

3 యేసు కన్వమ్కు ఓరిసి సాతి వెనుక నిజితండ్రె, నాను బత్తిత్త ఇజి అపొస్తురు అనుమానం సిల్లెండ నమ్మిదెజ్ యేసు వరిజ్ తోరె ఆత్తాన్. నలవయ రోస్కాజ్ నండో నుట్టు, యేసు అపొస్తురుజ్ తోరె ఆతండ్రె దేవుణు ఏలుబడి వందిజ్ వర్తిత్తాన్.

4 వారు కూడేజి వాతివలె యేసు ఈహు ఆడ్ర సిత్తాన్, “యెరూసలేం పట్టు డిసి సొన్కాట్. నా బుబ్బు మిజి సీనా ఇజి ఒట్టు కిత్తి వన్ని అత్తు ఇని ఇనాయమ్వందిజ్ నాను ముందాలె వెప్తాగదె. దన్నివందిజ్ కావ్ కిజి మండ్రు.

5 యోహాను ఏరుదాన్ బాప్తిసం సిత్తాన్. గాని సెగం రోస్కు సాహిజ దేవుణు మిజి వన్ని అత్తుదాన్ బాప్తిసం సీనాన్”, ఇహాన్.

6 అపొస్తురు యేసు వెట కూడేజి వాతారె వెన్బాతారె, “ప్రబువా, ఏలునె మా ఇస్తాయేలు లోకాజ్ మా దేసెమది ఏలుబడి వరిజి సీనిలెనా?”*

7 యేసు వెప్తాన్, “కాలం వందిజ్ నా బుబ్బానె ఏర్పాటు కిత్తాన్. అక్కెజ్ విజు నా బుబ్బాతి దేవుణు అతికారమదు మనాద్. యాకెజ్ విజు ఎసెజ్ జర్గినాద్ ఇజి మీరు నెన్కెజ్ అవ్సరం సిల్లెద్.

8 అపొజ, దేవుణు అత్తు మీ ముస్కు, వానివలె మీరు సత్తు ఆనిదెరె. అయావలె మీరు యెరూసలేమదు, యూదయ దేసెం విజు, సమరియ దేసెం విజు, లోకం విజుబాన్ నా వందిజ్ వెప్పి నా సాసిరె ఆనిదెరె”.

9 యా మాటెజ వెప్తండ్రె వారు సుడేజిమహిజ్ దేవుణు యేసుజ్ పరలోకమదు ఒత్తాన్. అయావలె ఉండ్రె మొసావ్ వాతాద్ అడ్డు కిత్తిజ్ వారు యేసుజ్ తోరెవిండ ఆత్తారె.

10 యేసు ఆగాసం ముస్కు సొస్తి మహిజ్ వారు ఆగాసం దరోట్కొ డిటం బేసి మహారె. అయావలె వెటనె తెల్లని పాతెజ్ పొరపాతిమహి రిఎరె దూతారె వరి డగ్రు నిహారె.

11 “ఒ గలీలయాదికిదెరా, మీరు ఎండనిజ్ ఆగాసం దరోట్ సుడేజినిదెరె? మీ డగ్రుహాన్ దేవుణు పరలోకమదు యేసుజ్ ఒత్తాన్. ఎలాగ సాహండ్రె అయావజనె మరెజి వానాలె”, ఇజి వారు వరిజ్ వెప్తారె.

త్రియెజ్ అపొస్తురు వెట కూడేజిజ్ ఏర్పాటు కిత్తారె

12 వెనుక అపొస్తురు ఒలివ మరెక్ మన్ని గొరొతాణ్ యెరూసలేం పట్టుమదు మప్తా సాహారె. (ఒలివ మరెక్ మన్ని గొరొన్ యెరూసలేం పట్టు డగ్రునె. ఉండ్రె కిలో మీటరె దూరం మనాద్)

* 1:6 1:6 అయ కాలమదు ఇస్తాయేలు లోకరి దేసెం రోమాదికారె ఏలుబడి కిజి ముహారె.

13 వారు యెరూసలేమ్‌ను సాహారం వారు మహి మేడజ్ గదిదు ఎక్టార్. వారు ఎయెర్ ఎయెర్ ఇహిజ, పేతురు, యోహాను, యాకోబు, అంద్రెయ, పిలిపు, తోమా, బర్తొలోమయ, మత్తయి, అలీవయ మరిసి ఆతి యాకోబు, జలోతె[†] ఇని మరి ఉండ్రి పేరు మహి సీమోను, యాకోబు మరిసి ఆతి యూద ఇనికార్.

14 వారు విజేర కూడితారె ఉండ్రి మున్నుదాన్ డిజిన్‌విండ పార్దనం కిజి ముహార్. వరివెట సెగొండెక్ అయెలికొడొకేహ వాతె మహె. యేసు యూయ ఆతి మరియ, వన్ని తంబెరెసిరీబా అబ్బె ముహార్.

15 సెగం రొన్ను సాహి వెనుక డగ్రు డగ్రు నూట ఇరవయ మణిసిరీ యేసుజ్ నమ్మితికార్ కూడిత ముహార్. పేతురు వరినడిమి నిహండ్రి ఈహు వెప్టోన్,

16 “తంబెరిజాండె, దేవుణు మాటదు రాన్సి మహిక తవ్‌విండ జర్గితాద్. దేవుణు ఆత్మ సత్తుదాన్ దావీదు రాజు యూద వందిజ్ ముందాల్ని వెప్టోకాద్ జర్గితాద్. యా యూద యేసుజ్ అన్నెజ్ వాతివరిజ్ సరి తోరిస్తాన్.

17 వాండ్రు మా లొణ ఒరెన్. ఎందనిజ్ ఇహిజ మాపు అపొస్తరు వెట కూడేజి పణి కిదెజ్ యేసు వన్నిజ్ ఏరపాటు కిత్తాన్”.

18 (యా యూద మొసెం పణిదాన్ సంపాదిన్సి డబ్బుజాణ్ బూమి కొటాన్. అబ్బె గడియబుర కితాండ్రి అర్థాండ్రి సాతాన్. అయావలె పొట బదెజ్ ఆజి వస్కిజ్ విజు వెల్లె సోతె.

19 యెరూసలేమ్‌దికార్ విజేరె యా సజతిజ్ వెహారె నెస్తారె. అందెజె యూద అర్గిసాతి యా బూమిదిజ్ వరి బాసాదు అక్కెల్లెమ ఇజి వెప్టోర్. దన్ని అర్దం ఇనిక ఇహిజ, ‘ఒరెన్ లొకుదిజ్ సప్తి వందిజ్ దొప్టి డబ్బుదాన్ కొటి బూమి’ ఇజి అర్దం).

20 పేతురు మరి వెప్టోన్, “కిర్దనం పుస్తకమ్‌దు ముందాల్ని ఈహు రాస్త మనాద్: వన్ని ఇల్లు ఎయెన్‌బా మన్‌విండ ఆపెన్, దన్ని లొణ ఎయెన్‌బా బత్రిఎండ ఆపెన్”. ఈహుబా రాస్త మనాద్: అపొస్తడు[‡] వజి వాండ్రు కిత్తి పణి మరి ఒరెన్ లాగ ఆపెన్.

21-22 అందెజె మాపు పదకొండు మణిసిరీ అపొస్తరు వెట కూడేజి మండ్రిజ్ మరి ఒరెన్ వన్నిజ్ ఏరపాటు కిదెజ్‌వలె. యోహాను యేసుప్రబుజ్ బాప్తీసం నిత్తి బాణిజ్ అసి యేసుప్రబు పరలోకమ్‌దు సానిదాక మా నడిమిసె కూడేజిపాడేజి మా వెట మహికాన్ ఒరెన్ వన్నిజ్ అవ్‌సరం. ఎందనిజ్ ఇహిజ యేసు సాతి వరిబాణిజ్ మరజి బత్రితాన్ ఇజి వాండ్రుబా మా వెట సాని మండ్రిజ్.

23 అందెజె కూడేజి వాతి మహికార్ రిఎరి పేరకు వెప్టోర్. ఒరెన్ యోసేపు (వన్నిజ్ యుస్తు, బర్సబ ఇని పేర్పుబా మహె) మరి ఒరెన్ మత్తియ.

24-25 అయావలె వారు ఈహు పార్దనం కిత్తారె, “ప్రబువా, విజెరి మన్నుదు మన్ని విజు ఆలోసనమ్‌కు నీసు నెసిని. యూద, వన్నిజ్ తగితి బాడ్డిదు సాహాన్. వాండ్రు డిసిసాహి పణి, ఇహిజ సజమదిజ్ నడేపిసి సేవకిని పణి సీదెజ్ వన్నిజ్ బదులు యా రిఎరి లొణ ఎయెజ్ నీసు ఏరపాటు కిత్తి ఇజి మజి తోరిన్‌అ”.

26 వెనుక వారు సీటిజ్ పొక్టార్. అయావలె మత్తియ ఇని పేరుదాన్ సీటి వాతాద్. అందెజె మత్తియెజ్‌బా పదకొండు మణిసిరీ అపొస్తరు వెట లెక్క కల్‌ప్టోర్.

2

పెంతెకొన్ను పండొయే నాండిజ్ దేవుణు ఆత్మ వాజినాద్

1 పెంతెకొన్ను ఇని పండొయే నాండిజ్ యేసుజ్ నమ్మితికార్ విజేరెకూడేజి ఉండ్రి ఉండ్రి ముహార్.

2 వెటనె ఆగానమ్‌దాన్ ఉండ్రి జాటు వాతాద్. అయ జాటు, పెరి గాలి వానివజి జాటుదాన్ వాతాదె వారు బస్సిమహి ఇండ్రి నిండ్రితాద్.

3 వారు సుడొతిజ్ సిసుబొద్దు లెకెండ తోర్గిక ఉండ్రి వాతాదె ఒరెన్ ఒరెన్ మున్ను ఉండ్రి ఉండ్రి కొనెజ్ డికితె.

4 విజేరె మున్ను దేవుణు ఆత్మ సత్తు వాతిజ్ వారు, వరిజ్ నెణ బానిజ్ వర్గిదెజ్ మొదొల్స్తారె. దేవుణు ఆత్మనె నెణ బాన్ వర్గిదెజ్ వరిజ్ సత్తు నిత్తాన్.

† 1:13 1:13 జలోతె ఇహిజ పటుదల మన్నికాన్ ఇజి అర్దం ఆజి పోకి అతికార్

‡ 1:20 1:20 అపొస్తరు. సజమదిజ్ సుడొజి నడిపిన్సిజ్ ఏరపాటు

5 అయావలె విజు దేనమ్కాణిజ్ వాతిమహి బక్తిమన్ని యూదురు యెరూసలేం పట్టుమీదు మహార.

6 యూదురు మంద లోకుర్ యా జాటు వాతిబాన్ కూడితార. వారు వర్గినిక వీరు వన్ని వన్ని సొంత బాసెజాణిజ్ వెహారె యా కూడిజె వాతి మహి యూదురు బమ్మ అతార. “వీరు మాటు వర్గిని బాసెజ్ వర్గిజనార్ కొట”, ఇజ వెహార.

7 అయావలె వాతి మహికార్ విజెరె ఒదె బమ్మ అతార ఒరెన్ వెట ఒరెన్ వెహార, “యాక ఎలాగ? వీరు విజెరె గలీలయాదికార్ ఆవిరా?

8 గాని మాపు పుట్టిమహి నాహ్మణి ఆఇ ఆఇ బాసెజ్ యా గలీలయాదికార్ వర్గిజనార్. యాక మాపు వెంజినాన్.

9-11 పార్తియికు, మదియికు, ఎలామియికు, మెసాపాతేమియ, యూదయ, కపదొకియ, పొంతు, ఆసియ, ప్రగియ, పంపులియ, అయ్గుపు, కురేనె డగ్గు మన్ని లిబియ, రోమ దేనమ్దాన్ కాల వాతికార్ (యూదురు, యూదమతం నమ్మితి యూదురు ఆఇకార్) క్రేతియరు, అరిబియరు, దేవుణు కిత్తి గొప్ప పణిజ్ మాటు విజెటి పుట్టి బాసాదు వెహికార్ వెంజినాన్.

12 ఒడిబితిజ మన్ను కూడివిద. యాక ఇనిక ఆనాద్లెన్”, ఇజ వారు విజెరె పంబ్ర అతార ఒరెన్ వెట ఒరెన్ వర్గితార్.

13 నెగెండార్ వీరు తియాజ్ ద్రాక్కు రసం ఉటార సోస్త మనార్ ఇజ వరిజ్ సెకాల్ కిత్తార్.

పేతురు కూడిజె వాతి లోకుర్ వెట వెహినాన్.

14 అయావలె పదకొండు మణిసిరె అపొస్తరు వెట మహి పేతురు నిజితండ్రె అబ్బె కూడిజె వాతి లోకుర్ వెట డటం వెహాన్, “యెరూసలేమీదు బత్తిజిని మా సొంత లోకుర్ అతి యూదయ లోకాండె, నాను వెహికార్ నెగెండ వెండ్రు. వీరు విరిజ్ నెన్స ఇ బాసెజ్ వర్గితిక మీరు వెహిదెర.

15 మీరు ఒడిబిని లెకెండ వీరు సోస్తికార్ ఆవిర. పొద్దు సోసి ఏలు అంబెలి వేడిబా ఆవిద.*

16 గాని దేవుణు మాటజ్ వెహి యోవెల్ ప్రవక్త ముజాలె వెహికడ మీరు నుడిజెనిదెర.

17 యోవెల్ ప్రవక్త ఇనిక వెహాన్ ఇహిజ ఆకార్ దినమ్కాజ్ నాను ఇనిక కిన్ ఇజ దేవుణు వెహినాన్. విజు లోకాజ్ నా అత్తుదిజ్ సీన. మీ మరిసిరె, మీ గాడ్సేక్, ప్రవక్తరు లెకెండ దేవుణు మాటజ్ వర్గినారె. మీ దజ్డెజ్ దేవుణు బాణిజ్ వాని దర్గునమ్కు† నూణార్. మీ డొక్టారబా దేవుణు బాణిజ్ వాని కలెజ్ నూణారె.

18 అయ ఆకార్ దినమ్కాజ్ నా మున్ను నమకం ఇణెతి పణి మణిసిరికబా విజెరిజ్, అయ్లి కొడెకాజ్, మెగ్గ కొడెకాజ్ నా అత్తు సీనా. వారు విజెరె దేవుణు మాటజ్ వెహారె.

19 ఆగానం మున్ను విజెరె నూణి వజ నాను గొప్ప బమ్మాతి పణిజ్ తోరిన్సు. యా బూమి మున్ను ఎయెరబా తొణ పణి నాను కిన్. నల, సిను, కర్మిగొయి బూమి మున్ను వానె.

20 ప్రబు మరజి వాని అయ గొప్ప బమ్మాని దినం వాని ముజాలె పొద్దు సీకట్ ఆనాద్లె. నెల నల లెకెండ ఎరాజ్ ఆనాద్లె.

21 అయావలె ఎయెరబా దేవుణు పేరు అసి వన్ని మున్ను నమకం ఇట్టిజ వరిజ్ విజెరిజ్, దేవుణు, తీర్పుదాన్ గెలిపెస్నాలె.

22 పేతురు మరి వెహాన్, “ఇసాయేలు లోకాండె, నెగెండ వెండ్రు. నజరేతు వాండ్రు అతి యేసు అతికారం దేవుణు బాణిజ్ వాతిక ఇజ దేవుణు రుజుప్ కిత్తాన్. ఎలాగ ఇహిజ, యేసు వెట మీ లోణ కిత్తి గొప్ప పణిజ్, ఎయెర కిడిజ్ అల్స ఇ బమ్మాతి పణిజ్ రుజుప్ కిత్తాన్. యాక విజు మీరు నెసినిదెర.

23 యా యేసుజ్, ఒరెన్ మణిసి మీ డగ్గు ఒవజెహాన్. యా నజతి దేవుణు ముందాల్తు నెహాన్. యాక దేవుణు ముందాల్తు ఏరపాటు కిత్తి నజతి. మీరు యేసుజ్ నెజవరి దర్గుదాన్ అస్తిదెరె సీలువ మున్ను డెయేజి సస్తిదెర.

* 2:15 2:15 యూదురు పండెయ వేడెయ పెందాల్తు ఉణెవెర. పార్గనం వీజితి వెనక తొమ్మిది గంట వెనకాన ఉణార † 2:17 2:17 దర్గునమ్కు. దేవుణుబాణిజ్ వాని మాటజ్ బొమ్మెక్ కలాదు నుడిజె లెకెండ తెలివి మహివలె నూణి

24 గాని దేవుణులు యేసును సాపుదాన్ తప్పిని బట్టిస్తానని. నండో మాలెజ్ ఆజి సాతాన్ గాని దేవుణులు వన్నిజ్ సాపుదు డిసినవతాన్. యేసుజ్ ఎలాకాలం తోప్పి ఇడోదెజ్ సాపుదిజ్ అటవంద ఆతాద్.

25 యేసు మాటిజ్ దావీదురాజు ముందాల్పై ఈహు వెప్టోన్ నాను దేవుణుదిజ్ ఎల్లకాలం నా డగ్రు సుడోజి మహా. దేవుణు నా ఉణెర్ పడోజ్ మనాన్. అందెజె నాను మన్నుదు మాలెజ్ ఆవి.

26 అందెజె నా మన్నుదు నాను గొప్ప సర్ల ఆజిన. నాను సర్ల ఆజి వర్లిజిన. నాను నా ఒణెలో దేవుణుదిజ్ ఒపజెప్ప. ఎందనిజ్ ఇహిజ ఒణెలో సాతి వెనుక మరి బట్టిన ఇజి నాను నెనిన.

27 ఎందనిజ్ ఇహిజ నీను నా పాణమదిజ్ డిసినఇ. నమ్మిదెజ్ తగ్గికాన్ ఆతి నీ సేవ కినివన్ని పీనుగు సబ్జి సాండ్రెజ్ సరి సిఇ.

28 నీను నజి ఎలాకాలం బట్టిని సరి తోరిస్తి. నీను నా వెట మహిజ్ నాను గొప్ప సర్ల ఆజిన”.

29 “నా తంబెరిజాండె, నాను దయరమదాన్ వెప్పాన, మా అనిగొగొ ఆతి దావీదురాజు సాతండ్రె వన్నిజ్ ముస్తార్. వన్నిజ్ ముస్తి బాడ్డి ఎంబె మనాద్ ఇజి విలుబా మాటు నెనినాట్.

30 గాని దావీదురాజు దేవుణు ప్రవక్త. దేవుణు వన్ని పేరు అని వాండ్రె దావీదురాజు వెట ఒట్టు పొక్తాన్. అక్క ఇనిక ఇహిజ, దావీదురాజు కుటుమదాన్ ఒరెన్ వన్నిజ్ దావీదురాజు లెకెండ్ రాజు కిన ఇజి. యాక దావీదురాజు నెస్ట మహాన్.

31 దేవుణు యేసుక్రీస్తుజ్ సాతి వరి బాణిజ్ డిసినవన్ ఇజి, యేసుక్రీస్తు పీనుగు సబ్జి సాన్వద్ ఇజి దావీదురాజు ముందాల్పై నెస్తాన్. ముందాల్పై నెస్తాండ్రె, యేసు సాతి వెనుక మరి మరజి నిజ్నాన్లె ఇజి ముందాల్పై దావీదురాజు వెప్టోన్.

32 యా యేసుజ్ దేవుణు మరజి బట్టిస్తాన్. దన్నిజ్ మాపు విజెపె సాసిర్.

33 అహిజ దేవుణు యేసుజ్ వన్ని ఉణెర్ పడోకాద్ బన్పిని వన్నిజ్ ఇంక మిస్తి గవరం ఏలు సిత్తాన్. దేవుణు సీనా ఇజి ఒట్టు కిత్తి వన్ని ఆత్మ యేసుజ్ సిత్తాన్. ఏలు మీరు సుడోజినికెజ్ వెంజినికెజ్ యేసు మజి సీనా ఇజి వెప్టా దేవుణు ఆత్మనె.

34-35 దావీదురాజు వెప్టాక వన్ని వందిజె ఆవద్. దావీదురాజు పరలోకమదు సాన్వన్. గాని వాండ్రు ఈహు వెప్టోన్, నాను నిజి పడోఇ వరిజ్ నీ పాదమకాజ్ ముణుకుజ్ ఉణెరిజ మాడిసెప్పిన్సిదాక నీను నా ఉణెర్ పడోకాదు బని మనల ఇజి దేవుణు నా ప్రబు వెట వెప్టోన్.

36 పేతురు మరి వెప్టోన్, “ఇస్తాయేలు కుటుమదికార్ ఆతి మాటు విజెటి యాక అనుమానం సిల్లెండ నెస్సెజ్ వలె. మీరు సిలువాద్ సప్తి యేసుజ్ దేవుణు ప్రబువజ, క్రీస్తువజి వీరపాటు కిత్తాన్”.

37 యాక వెహోర్ లోకుర్ వరి మన్నుదు నండో బాద్ ఆజి పేతురుజ్ మరి అపొస్తురుజ్ వెన్బాతార్, “దాదారండె, ఏలు మాపు ఇనిక కిదెజ్ అట్టామ్?”.

38 అయావలె పేతురు వెప్టోన్, “మీ పాపమకు విజు ఒప్పుకోడోజి డిసినిజి, దేవుణుదిజ్ లోజిజినావ్ ఇజి విజెరిజ్ తోరిస్సెజ్ యేసు, క్రీస్తు ఇజి, వాండ్రు, మీ ప్రబు ఇజి తోరిస్సెజ్ బాప్తీసం లాగి ఆదు. అయావలె మీ పాపమకు నోరె ఆనె. దేవుణు సీనా ఇజి ఒట్టు కిత్తి దేవుణు ఆత్మ నిజి దోహాక్కాద్లె.

39 దేవుణు సీనా ఇజి ఒట్టు కిత్తి యా దేవుణు ఆత్మ మిజి, మీ కొణెరిజ్, దూరమది వరిజ్ విజెరిజ్ దేవుణు సీనాన్. వన్ని మున్ను నమ్మిదెజ్ దేవుణు కూక్కి వరిజ్ విజెరిజ్ దేవుణు ఆత్మ సీనాన్”.

40 మరి నండో నండో మాటిజాన్ పేతురు వరిజ్ గటిజ వెప్టోన్. దేవుణుదిజ్ డిసిన సాని యా సెఇ లోకాజ్ వాని తీర్పుదాన్ మీరు గెల్పి సాండ్రెజ్ ఇజి పేతురు వరిజ్ మరి మరి వెప్టోన్.

41 పేతురు వెప్టా మాటిజ్ నమ్మిత్తికార్ బాప్తీసం లాగి ఆతార్. అయా రోజు రమరమి మూండ్రె వేలు లోకుర్ యేసుజ్ నమ్మిత్తి వరివెట కూడితార్.

నమ్మిత్తికార్ కూడోజి మంజినార్

42 వారు అపొస్తురు నెన్పిస్తి మాటిజ్ డిసినవండ మహార్. వారు యేసుజ్ నమ్మిత్తికార్ కూడోజి మంజిని బాన్ డిసినవండ కూడోజి వాతార్ ప్రబు వీరపాటు కిత్తి బోజినం †కిజి మహార్. డిసినవండ పార్లనం కిజి మహార్.

† 2:42 2:42 యేసుప్రబు సాపు వందిజ్ గుర్తు కిదెజ్ మన్ని బోజినం

43 అపొస్తలుడు దేవుణులు సత్తుదాన్ నండో బమ్మాని పణిజ్ బమ్మాని గుర్తుజ్ కిత్తార్. అయావలె విజేరె నండో బమ్మ అత్తార్.

44 యేసుజ్ నమ్మితికార్ విజేరె ఉండ్రె మున్ను ముంజి వరిజ్ కల్లితి మహిక విజి విజేరె వందిజ్ కర్కు కిత్తార్.

45 అక్కాదె ఆవిండ వారు పరి అస్తిజ్ పొర్ని ఎయెజ్ ఎయెజ్ అవ్సరం మనాదో వరిజ్ సిత్తార్.

46 రోజు తవ్విండ వారు యెరూసలేమ్దు మున్ను దేవుణు గుడిది డేవారు కూడజి వాజి మహార్. వారు విజేరె ఇల్లుదిజ్ తవ్విండ కూడజి వాతారె సర్ద ఆజి బోజనం కిజి మహార్. ఎయెజ్బా అవ్సరం మున్ను వరిజ్ వారు సర్దదాన్ సీజి మహార్.

47 వారు దేవుణుదిజ్ స్తుతి కిజి మహార్. బాన్ మహికార్ విజేరె యా యేసుజ్ నమ్మితి వరి వందిజ్ 'వీరు ఎసానో నెగ్గికార్' ఇజి వెప్తార్. రోజురోజు యేసుప్రబు మున్ను నమకం ఇడజితి వరి లెక్క వాండ్రు నండో కిత్తాన్.

3

నడిదెజ్ అట్టె సొట వన్నిజ్ పేతురు నెగెండ కిత్తాన్.

1 ఒర్పొండు వేలె మూండ్రె గంటిజ్ టయమ్దు, లోకుర దేవుణు గుడిదు పార్దనం కిని టయమ్దు పేతురు, యోహాను, రిఎర్ కూడజి దేవుణు గుడిదు సొన్ని మహార్.

2 పుట్టి బాణిజ్ అసి నడిదెజ్ అట్టె బెర్నె సొట వాండ్రు అబ్బె దేవుణు గుడి: లోక సొని సరిపడజి కాద్ డబ్బు లోసి మహాన్. దేవుణు గుడిది డేవారు సొని అయ సరి పేరు నుందరం ఇహార్. అయ సొట వన్నిజ్ వన్ని లోకుర రోజు పిండిజి తసి అయ వడజి కాద్ ఇడజి మహార్.

3 పేతురు యోహాను దేవుణు గుడిదు సొని సరి డగ్రు వాటిజ్ అయ సొట వాండ్రు డబ్బుజ్ లొస్తాన్.

4 లొస్తాజ్, పేతురు వన్నిజ్ డీటం బేస్తాన్. యోహానుబా వన్నిజ్ డీటం బేస్తాన్. పేతురు వన్నివెట, "నీను మా దరోట్టె బేసె" ఇహాన్.

5 అందెజి సొట వాండ్రు, వీరు ఇనికబా సీనార్ ఇజి ఒడిబిజి వరి దరోట్టె బేస్తాన్.

6 గాని పేతురు, "నిజి సీదెజ్ నా బాన్ డబ్బుజ్ సిల్లు. గాని నా బాన్ మనిక నాను నిజి సీనా. నజరెతుదికాన్ యేసుక్రీస్తు అతికారమ్దాన్ నీను నడిఅ", ఇహాన్.

7 పేతురు అయ సొట వన్నిజ్ ఉణికిదు అస్తాండ్రె నిక్తాన్. వెటనె వన్ని పాదమ్మకు కణిక కాల్కు సత్తు అతె.

8 వాండ్రు లిట్టె నిజితండ్రె నడితాన్. పేతురు యోహాను వెట దేవుణు గుడి: డేవారు నడిజి సొహండ్రె డాట్టి దేవుణుదిజ్ స్తుతి కిత్తాన్.

9 వీండ్రు నడిసినిక, దేవుణుదిజ్ స్తుతి కినిక విజేరె నుడతార్.

10 దేవుణు గుడిదు సొని నుందరం ఇని సరిడగ్రు బసి డబ్బు లొసి మహి అయ సొట వాండ్రు వీండ్రె ఇజి వారు గుర్తు అస్తార్. వన్నిజ్ జగ్గితిక నుడతార్ వారు విజేరె గొప్ప బమ్మ అత్తార్.

దేవుణు గుడిదు మున్ను లోకుర వెట పేతురు వర్గిజినాన్

11 పేతురు, యోహానుని అయ నెగెండ అతికాన్ దేవుణు గుడిదు మున్ను సొలోమోను ఇని అరబుదు మహార్. ఆ నెగెండ అతికాన్ పేతురుజ్ యోహానుజ్ గటిజి కిక్కాజ్ అసి మహాన్. అబ్బె మహికార్ జగ్గితిక నుడతార్ గొప్ప బమ్మ అత్తారె పేతురు యోహానుని నెగెండ అతి సొట వాండ్రు మహిబాన్ ఉమ్మాసి వాతార్.

12 లోకుర విజేరె కూడజి వానిక నుడతండ్రె పేతురు వరిజ్ వెనబాతాన్, "ఇస్తాయెలు లోకాండె, ఇబ్బె జగ్గితిక నుడతార్ మీరు ఎందనిజ్ బమ్మ అజినిదెర? మీరు ఎందనిజ్ మజి బేసినిదెర? మా సొంత సత్తుదాన్, మా బక్తిదాన్ వీండ్రు నడిదెజ్ కిత్తావ్ ఇజి మీరు ఒడిబిజినిదెరా?

13 మా అనిగొగొరె అతి అబ్రాహం, ఇసానుకు, యాకోబు పార్దనం కిత్తి దేవుణు, యా సొట వన్నిజ్ నెగెండ కిజి వన్ని సేవ కినికాన్ అతి యేసుజ్ నండో మర్యాద సిత్తాన్. గాని మీరు యా యేసుజ్ సప్తజ్ ఒపజెప్పిదెర. పిలాతు యేసుజ్ డిసినిదెజ్ ఒడిబిత్తిజ్బా మీరు పోని ఇహిదెర.

14 పాపం సిల్లి సీతినిజియ్యమన్ని వన్నిజ్ మీరు పోని ఇజి వెప్తాదెర. లోకాజ్ సప్పి ఒర్నె వన్నిజ్ మీరు డిసినిదు ఇజి వెప్తాదెర.

15 విజు దన్నిజ్ బత్తు, సిత్తి వన్నిజ్ మీరు సప్తిదెర. గాని దేవుణు వన్నిజ్ మరజి నిక్తాన్. యా సజతి వందిజ్ మాపు విజెవె సాసిర్.

16 యేసు సత్తుదాన్ నె యా సొట వాండ్రు సత్తుఅతాన్. మీరు విజెదెర ఏలు సుడజినిక యేసు పేరుదు ఇడ్డి నమకమ్దానె వాతాద్. యేసు మున్సు ఇడ్డి నమకమ్దానె వన్నిజ్ సత్తు వాతాద్”.

17 “ఏలు నా తంబెరిజాండె, మీరుని, మీ వెద్దెలుజ్, యేసుజ్ కిత్తిక మీరు ఇనిక కిజినిదెరొ ఇజి నెన్ ఏండ కిత్తిదెరొ ఇజి నాను నెన్సు.

18 దేవుణు నండొ పంటిజ్ ముందాల్తొ విజేరె ప్రవక్తర్ వెట ‘వన్ని క్రీస్తు కస్టమ్కు ఓరిస్సాలె’ ఇజి వెప్తా మహాన్. దేవుణు ముందాల్తొ వెప్తావజనె ఈహు జర్తితాద్.

19-20 దేవుణు మీ పాపమ్కు నెమిన్సి వందిజ్ మీరు మీ పాపమ్కు ఒప్పుకోడజి డిసిసిజి దేవుణు డగ్రు మరజి రదు. దేవుణు మీ ఆత్మదిజ్ నెగ్గి పాణం సీని వందిజ్, దేవుణు మీ వందిజ్ ఏర్పాటు కిత్తి క్రీస్తు ఆతి యేసుజ్ మీ డగ్రు పొక్కి వందిజ్ దేవుణు డగ్రు మరజి రదు.

21 దేవుణు ముందాల్తొ వాండ్రు పొక్కి ప్రవక్తర్ వెట వెప్తావజ దేవుణు విజు దన్నిజ్ కొత్తాక లెకెండ కినిదాక యేసు పరలోకమ్దు మండ్రెజ్ వలె.

22 దేవుణు - ప్రవక్తరు లొజ ఒరెన్ మోసె ఇనికాన్ ఈహు వెప్తాన్: “ప్రబు ఆతి మీ దేవుణు, నా లెకెండ ఒరెన్ ప్రవక్తజ్ మీ లోకుర్ లొఇహాన్ పుటిస్సాలె. వాండ్రు వెప్తాక విజు మీరు నెగ్రెండ వెంజి లొజెదెజ్ వలె.

23 ఎయెర్బా ఆ ప్రవక్త వెప్తాక వెంజి లొజిఏండ మహిజ వాండ్రు దేవుణు లోకుర్ వెట మన్ ఏండ పూర్తి పాడాఃనా సానాన్.

24 సముయేలు ప్రవక్త, వన్ని వెనుక వాతి ప్రవక్తరు విజేరె యా దినమ్కాజ్ వందిజ్ దేవుణు సిత్తి మాటిజ్ ముందాల్తొ వెప్తా మహాన్.

25 దేవుణు ప్రవక్తర్ వెట కిత్తి ఒట్టు మీ వందిజె. దేవుణు మీ అనిగొగోరు వెట కిత్తి ఒట్టు మీ వందిజె. మీ అనిగొగొ ఆతి అబ్రాహాం వెట దేవుణు కిత్తి ఒట్టు ఇనిక ఇహిజ, మీ తెగాది వన్ని బాణిజ్ యా లోకమ్దు మన్ని విజేరిజ్ నాను దీవిన్సు.

26 అందెజి దేవుణు వన్ని సేవ కిని క్రీస్తుజ్ ఏర్పాటు కితాండ్రె ముందాల మీబానె పొక్తాన్. ఎండనిజ్ పొక్తాన్ ఇహిజ మీ సెఇ పణిజాణ్ మజి డిసిసి దేవుణుబాన్ మరజి తీని మిజి దీవిన్దెజ్ వన్నిజ్ పొక్తాన్”, ఇజి పేతురు వెప్తాన్.

4

పేతురుజ్ యోహానుజ్ అస్తార

1 పేతురు యోహాను లోకుర్ వెట వర్తిజి మహిజ్ పుజేరిజు, సదుకెయరు, దేవుణు గుడిఃదు మన్ని జమాన్జ అతికారి పేతురు యోహాను బాన్ వాతార్.

2 అపొస్తురు నెన్ పిసినిక వెహారె వారు కోపం ఆతార్. ఎండనిజ్ ఇహిజ యేసు సాజి మరజి బత్తితాన్ ఇజి వెప్తొ సాతికార్ మరి బత్తినార్ ఇజి వారు రుజుప్ కితార్.

3 వారు పేతురుజ్ యోహానుజ్ తొప్తా ఒతారె మహ్నా నాండిజ్ పెందాల్ దాక జెలిదు ఇట్టార్. ఎండనిజ్ ఇహిజ అయావలె పొదొయ్ ఆత మహాద్.

4 గాని వారు నెన్ పిసినిక వెహికార్ నండొ లోకుర్ యేసుజ్ నమ్మిత్తి. యేసుజ్ నమ్మిత్తి వరి లెక్క ఏలు రమరమి అయదు వేలు ఆతాద్.

5 మహ్నా నాండిజ్ యూద అతికారిజ్, యూద పెద్దెలుబు, యూదురి రూలు నెస్పిసినికార్ వీరు విజేరె యెరుగలేమ్దు కూడిత వాతార్.

6 విజేరె పుజేరిజ మున్సు పెరి పుజేరి ఆతి అనయు, కయవయు, పెరి పుజేరి కుటుమ్దికార్ యోహాను, అలెక్సంతరు ఇనికార్, మరి సెగెండార్ మొగకోడోర్ బాన్ కూడిత వాతార్.

7 వారు పేతురుజ్ యోహానుజ్ వరి ముందాల నిల్పారె వెన్బాతార్, “మీరు ఎమేణి సత్తుదాన్, ఎయె పేరుదాన్ ఇక కిత్తిదెరొ?”.

8-9 అయావలె దేవుణు అత్తు సత్తు పేతురు మున్ను వాతాద్. అయ సత్తుదాన్ నె పేతురు వెహ్సాన్: “లోకాజ్ అతికారిజాండె, పెద్దెలుజాండె, యా సొట వన్నిజ్ కిత్తి నెగ్గి వణి వందిజ్ వాండ్రు ఎయె సత్తుదాన్ నెగెండె ఆతాన్ ఇజి మీరు మజీ నేండ్రు కరాయి ఇజినిదెర్.

10 దిన్ని వందిజ్ మాపు వెహ్సాజ్ ఇహిజ, మీరు విజిదెరి, ఇస్రాయేలు లోకుర్ విజెరి యాక నెన్జెజ్ వలె. మీరు సిలువారు డెయేజి సప్తి యేసుక్రీస్తుజ్ దేవుణు మర్జి బత్తిస్తాన్. సాతి బత్తితి నజరేతు వాండ్రు ఆతి యేసుక్రీస్తు సత్తుదాన్ నె వీండ్రు పూర్తి నెగెండె ఆజి మీ నడిమిదు మనాన్.

11 యా యేసుక్రీస్తు వందిజ్ ఈహు రాస్త మనాద్. అక్క ఇనిక ఇహిజ, ఇల్లు తోహ్ని మీరు నెక్తిపాక్తి పణుకునె మూలదిజ్ మూలపణుకు ఆతాద్.

12 యేసునె మిజి వాజిని సిక్కుదాన్ గెల్పెన్జెజ్ అట్నాన్. ఎండనిజ్ ఇహిజ యా లోకమదు లోకాజ్ వాని సిక్కుదాన్ వరిజ్ గెల్పెన్జెజ్ మరి ఎయెరి పేరుబా దేవుణు సివితాన్. యేసు పేరునె సిత్తాన్.

13 పేతురు యోహాను తియెల్ ఆవిండ నెగ్గెండె వర్జిని మాటిజ్ వెంజి సన్హద్రిం సజమ్దికార్ బమ్మ అతార్. ‘వీరు ఇనికబా నెన్ఇకార్, పెరి సదుపు సద్విఇకార్’ ఇజి నెస్తారి బమ్మ అతార్. పేతురు యోహాను యేసు వెట కూడేజి మహికార్ ఇజి వారు నెస్తార్.

14 గాని ఆ నెగెండె అతికాన్ పేతురు యోహాను వెట నిల్పి మహిజ్ ఇనికబా మర్జి వెహ్సాజ్ సన్హద్రిం సజమ్దికార్ అట్వెతార్.

15 అందెజి వారు పేతురుజ్ యోహానుజ్ నెగెండె అతి వన్నిజ్ సజమ్ లోఇహాన్ వెల్లి పోక్తారె వరి లోఇ వారి వర్జితార్.

16 “విరిజ్ ఇనిక కిదెజ్? వీరు కిత్తి బమ్మాని వణి వందిజ్ యెరూసలేమ్దికార్ విజెరి నెసినార్. అక్క జర్గిపెతాద్ ఇజి మాటు వెహ్సాజ్ అట్వెట్.

17 యేసు పేరు అని ఎయెన్ వెటబా ఎనెజ్బా ఇనికబా వెహ్సాజ్ ఇజి మాటు విరిజ్ గటిజ వెహ్సాజ్. యా సజతి మహికార్బా నెన్విండె మండ్రెజ్” ఇహార్.

18 అయావలె వారు పేతురుజ్ యోహానుజ్ లోఇ కూక్తారె, “ఎనెజ్బా యేసు పేరు అని వెహ్సాజ్. యేసు పేరు అని బోదిస్సాట్”, ఇజి ఆడ్ర సిత్తార్.

19 గాని పేతురు యోహాను ఈహు వెహ్సార్, “ఏలు మీరి వెహ్సా, దేవుణుదిజ్ లోబడేదెజా మిజి లోజిదెజా? దేవుణు సుడేతిజి ఎవేణిక సరియొతిక?

20 మాపు ఇహిజ, మాపు సుడేతి దన్ని - వందిజ్ మాపు వెహి దన్ని వందిజ్ వెహి - విండె మండ్రెజ్ అట్వెప్”.

21 పేతురుజ్ నె యోహానుజ్ ఎలాగ సిక్కు సీదెజ్ ఇజి వారు నెన్విత్తార్. ఎండనిజ్ ఇహిజ దేవుణు కిత్తి గొప్ప వణి వందిజ్ లోకుర్ విజెరి దేవుణుదిజ్ స్తుతి కిజి మహార్. అందెజి సజమ్దికార్ పేతురుజ్ యోహానుజ్ ‘యేసు పేరు అని వెహ్సాజ్ ఆవిద్’ ఇజి గటిజ మరి బెద్రిసి వెహ్సారి డిజిస్తార్.

22 దేవుణు వన్ని సత్తుదాన్ బమ్మాతి వణి కిజి నెగెండె కిత్తి యా సొట వన్నిజ్ వయెసు నలపయె వంటిజ్ ఎక్కునె మహాద్.

నమ్మితి వరి పార్దనం

23 పేతురు యోహాను డిజి అతి వెటనె నమ్మిత్తి వరి డగ్గు సాహర్. సాహరె పెరి పుజెరిజు, పెద్దెలుజు వరి వెట వెహ్సాక విజి వెహ్సార్.

24 పేతురు యోహాను వెహ్సాక వెహరె వారు విజెరి కూడితారె ఉండ్రె మున్నుదాన్ దేవుణుదిజ్ ఈహు పార్దనం కిత్తార్, “విజి దన్నిజ్ ప్రబు అతి దేవుణు, నీనె ఆగాసం, బూమి, సమ్దరం, వనక లోఇ మన్ని విజి దన్నిజ్ పుటిస్తి.

25 దేవుణు, నీ సేవ కినికాన్ అతి మా అనిగొగొ దావీదురాజు వెహ్సాక నీ అత్తు సత్తుదాన్ నీనె వెహిపిస్తి. అక్క ఇనిక ఇహిజ, యా యూదురు ఆఇకార్ ఎండనిజ్ కోపం ఆజినార్. యా లోకుర్ ఎండనిజ్ ఇని దన్నిజ్ వణిదిజ్ రెవెకెజ్ ఒడిబిజినార్?

26 బూ లోకమది రాజార్, అతికారి లోకుర్, ప్రబు అతి దేవుణు వెట, దేవుణు ఏర్పాటు కిత్తి క్రీస్తు వెట ఎద్రిస్సాజ్ కూడేజి వాజినార్.

27 ఆహా హేరోదు, పొంతి పిలాతు, యూదురు, యూదురు ఆఇ లోకుర్ వెట యా పట్టుమీదు కూడిత మహార్. వారు నీను వీర్పాటు కిత్తి పాపం సిల్లి నీ సేవ కినికాన్ ఆతి యేనుజ్ నప్తజ్ ఒడఃబిజి మహార్.

28 దేవుణు, నీ సత్తుదాన్, నీ ఇస్టమ్దాన్ ఇనిక జర్లినాదీల ఇజి ముందాల్నీ నీను వీర్పాటు కిత్తిదో అయాలెకెండె వారు కిత్తార్.

29 ఏలు ప్రబువా, వారు మజి బద్దిసిని దన్నిజ్ నుడఃఅ. మీ సేవ కినికార్ ఆతి మాపు నండో దయ్ రమ్దాన్ నీ మాటెజ్ బోదెన్జెజ్ మజి సత్తు సిదా.

30 కస్టమ్కు మన్ని వరిజ్ నెగెండో కిజి మీ సత్తు తోరిన్అ. మీ బాణిజ్ వాతి నమ్మిదెజ్ తగ్గుకాన్ ఆతి మీ సేవ కినికాన్ ఆతి యేను పేరుదాన్ గొప్పు బమ్మాతి పణిజ్ బమ్మాతి గుర్తుజ్ కిఅ”.

31 వారు పార్లనం కిత్తి వెనుక వారు కూడఃజి మహీ బాడ్డి కద్దితాద్. అయావలె దేవుణు ఆత్మ సత్తు వరి మున్సు వాతాద్. వారు దయ్ రమ్దాన్ దేవుణు మాటెజ్ వెప్తార్.

నమ్మితికార్ వరి ఆస్తి అపొస్తురుబాన్ తతార్

32 నమ్మితికార్ విజేరె ఉండ్రె మన్సు ఆజి ఎయెన్బా సరినె వన్నిజ్ మన్నిదన్ని - బాణిజ్ ఇనికలా నాదినె ఇజి ఆవిద్ ఇజి వరిజ్ మన్నిక విజెరె వందిజ్ కర్సు కిత్తార్.

33 దేవుణు సత్తుదాన్ బమ్మాతి పణిజ్ కిజి అపొస్తురు ప్రబు ఆతి యేను, సాతివరి - బాణిజ్ మరజి బత్తితాన్ ఇజి సాసి వెప్పి మహార్. దేవుణు దయాదర్తం వరి మున్సు నండో మహద్.

34-35 బూమిజ్ ఇల్లు కల్లితి మహికార్ విజెరె అక్కెజ్ పొర్లి కల్లితి డబ్బు అపొస్తురు డగ్గు తతార్. విజేరిజ్ వరివరి అవ్ సరం సుడఃజి సీబాజి సితార్. అందెజె వరి లోఇ ఎయెన్బా సరి అవ్ సరం వాతిజ తక్కు సిల్లెండ ఆతాద్.

36 కుప్ర దేసమ్మదు పుట్టి లేవి కుటుమ్దికాన్ ఆతి యోసేపు ఇని ఒరెన్ మహాన్. వన్నిజ్ అపొస్తురు బర్లుబ ఇజి కూక్కి మహార్. (వన్ని పేరు అర్దం ఇనిక ఇహిజ సాయం కినికాన్ ఇజి)

37 వాండ్రు వన్నిజ్ మహీ బూమి ఉండ్రె పొర్లి అయ డబ్బు అపొస్తురు డగ్గు తతాన్.

5

అననియ, సపీర

1 అయావలె అననియ ఇని ఒరెన్ మహాన్. వన్ని ఆల్లి పేరు సపీర. వారుబా ఉండ్రె బూమి పొర్తార్.

2 పొర్తారె మాసి సెగం ఇట్టండ్రె మిగ్లితి డబ్బు అపొస్తురు డగ్గు ఒతాన్. యాక విజా ఆల్లిబా నెస్తాద్.

3 అయావలె పేతురు అననియెజ్, “నీ బూమి పొర్లి డబ్బుజాణి సెగం డాఃప్తి దేవుణు ఆత్మదిజ్ ఎందనిజ్ మొసెం కిత్తి? నన్ని మొసెం పణి కిదెజ్ నీను ఎందనిజ్ నీ మన్సుదిజ్ సయూనుజ్ ఒపజెప్తి?

4 బూమి నీ బాన్ మహివలె నీదినెగదె. అక్క పొర్లివలెబా ఆ డబ్బు నీ సొంతనె గదె. నిన్ని పణి కిదెజ్ ఎందనిజ్ నీ మన్సుదు ఒడిబిత్తి? నీను లోకు వెట ఆవిద్, దేవుణు వెటనె అబద్దం వర్గితి”, ఇజి వెప్తాన్.

5 అననియ యా మాటెజ్ వెపావెటనె అర్తాండ్రె పాణం డిఃస్తాన్. యాక వెహికార్ విజేరె తియెల్ ఆతార్.

6 ద్జడఃయెరె వాతారె పీసుగుదిజ్ పాతెజ్ సుటిస్తారె, పిండిజి ఒతారె ముస్తారె.

7 రమరవి మూండ్రె గంటెజ్ వెన్కా వన్ని ఆల్లి జర్గితిక నెన్విండో లోఇ వాతాద్.

8 పేతురు దన్ని వెట, “మీరు యా బూమి నిస్సా డబ్బుదిజె పొర్లిదెరా, వెహాఅ”, ఇహాన్. వెన్బాతిజ్ అది, “నిస్సాదిజె పొర్తావ్”, ఇహాద్.

9 పేతురు దన్ని వెట, “మీరు రిజదెర్ కూడఃజి దేవుణు ఆత్మదిజ్ తప్పు వెప్తాదెర్. దేవుణు ఆత్మదిజ్ తప్పు వెప్పి మొసెం కిదెజ్ మీరు ఎందనిజ్ ఒడిబిత్తిదెర్? ఇదిలో నీ మాసిజ్ ముస్తికార్ ఇప్పి మనార్. వారు నిజిబా పిండిజి ఒనార్”, ఇహాన్.

10 వెటనె అది పేతురు పాదం డగ్గు అర్తాదె పాణం డిఃస్తాద్. అయ ద్జడఃయెరె లోఇ వాతారె అది సాతాద్ ఇజి సుడఃతారె దన్నిజ్ పిండిత ఒతార్. ఒతారె మాసి డగ్గు ముస్తారె.

11 దేవుణు సజమ్మదు మహికార్ విజెరె, యా మాటెజ్ వెహికార్ విజేరె గొప్పు తియెల్ ఆతార్.

అపొస్తురు నండో లోకాజ్ నెగెండో కిత్తార్

12 అపొస్తురు లోకుర నడిమి నండో బమ్మాతి పణిజ్ బమ్మాతి గుర్తుజ్ కిత్తార్. నమ్మిత్తికార్ విజేర ఉండ్రె మన్సు ఆజి దేవుణు గుడిడు మన్ని సొలోమోసు అరుజు ఇని బాడ్డిదు కూడేజి వాజి మహార్.

13 ‘యా నమ్మిత్తికార్ ఎస్సానొ నెగ్గికార్’ ఇజి లోకుర వెహ్తార్. అహిజ్ బా మరి ఎయెరబా నమ్మిత్తికార్ వెలు కూడేదెజ్ తియెల్ ఆతార్.

14 గాని నండో లోకుర, మొగ్గకోడోర, అయ్లికోడోక్ యేసుజ్ నమ్మిత్తార నమ్మిత్తి వరివెలు కూడితార్.

15 అందెజి అపొస్తురు కిత్తి గొప్ప పణిజ్ సుడేతార కన్టం మన్ని వరిజ్ సాప మున్సు. మన్సుమ్ మున్సు. పేతురు నడిజి వాని సరిపడేకాదు తతార్. ఎందనిజ్ ఇహిజి పేతురు అయ సరి వానివలె వన్ని నీడేబా తాక్తిజి నెగిండ ఆనార్ ఇజి.

16 యెరూసలేమ్దు సురుల మన్ని నాహ్మణిజ్ బా నండో లోకుర బాన్ వాతార్. వరి లొఇ కన్టమ్కు అతివరిజ్, దెయమ్ కాణిజ్ మాలెజ్ అతివరిజ్ అబె తసి మహార్. విజేర నెగిండ ఆతార్.

యూదురి అతికారిజు అపొస్తురిజ్ మాలెజ్ కిత్తార్

17 నస్తివలె విజేరె పుజేరిజి మున్సు. పెరి పుజేరి, వన్ని వెలు కూడితి మహికార్ విజేరె, ఇహిజి, సదుకెయరు ఇని పార్తి లొఇ నెగిండోర అపొస్తురు వెలు గొప్ప గోన ఆతార్.

18 వారు అపొస్తురుజ్ అస్తారె పట్టమ్దు మన్ని జెలిదు ఇట్టార్.

19 గాని దేవుణు దూత పొదోయ్ వాతండ్రె జెలిది సేహ్లాజ్ రేతాండ్రె వరిజ్ వెల్లి తతాన్.

20 వెల్లి తతాండ్రె దూత, “మీరు దేవుణు గుడిః డేవారు సొన్ని లోకాజ్ విజెరిజ్ యా కొత్త బత్తువందిజ్ పూర్తి వెహ్తూ” ఇహాన్.

21 వారు జాయ్ అని డగ్రు దేవుణు గుడిః డేవారు సొహారె దూత వెహ్తి వజి లోకాజ్ బోదిస్సెజ్ మొదోల్స్తార్. వెనుక, విజేరె పుజేరిజి మున్సు. పెరి పుజేరి, వన్నివెలు మహికార్ వాతారె నన్ హద్రి సజమ్దు మహి యూదవెద్దెలుజి విజెరిజ్ కూక్కి మీటిజ్ కిత్తార్. మీటిజ్దు కూడితారె జెలిదు మన్ని అపొస్తురుజ్ వరిబాన్ తత్తెజ్ జమాన్జి పొర్తార్.

22-23 గాని వారు జెలిదు సొన్ని సుడేతిజ్ పేతురుని యోహాను లొఇ సిల్లెర్. వారు మహ్తా వాతారె వెహ్తార్, “మాపు సొన్ని సుడేతిజ్ జెలిదు సేహ్లాజ్ తాలం అర్పె మహా, కాప్ కినికార్ సేహ్లాజి ముందాలెనె నిహా మహార్. గాని మాప్ సొన్ని సేహ్లాజ్ రేనివలె లొఇ వారు సిల్లెర్”.

24 మీరు వెహ్తిక వెహారె పెరి పుజేరిజు, దేవుణు గుడిఃది జమాన్జి అతికారి గొప్ప బమ్మ ఆతారె, ‘ఇక ఇనిక ఆనాద్లెనొ’ ఇజి ఒడిఃబిత్తార్.

25 అయావలె ఒరన్ వాతండ్రె, “ఇదిలో మీరు జెలిదు ఇడ్డిమహి లోకుర ఏలు దేవుణు గుడిఃదు నిహారె లోకాజ్ బోదిసినార్”, ఇజి వెహ్తార్.

26 వెహ్తిజ్, అతికారి జమానుజి వెలు సొహాండ్రె అపొస్తురుజ్ కూక్త తతార్. ‘లోకు మజి పణుకుజాణిజ్ డెయెనారెలెను’ ఇజి తియెల్ ఆతారె అపొస్తురుజ్ ఒపిసి కూక్త తతార్.

27 వరిజ్ కూక్త తతారె నన్ హద్రిం సజం నడిమి నిల్స్తార్. నిల్స్తారె విజేరె పుజేరిజి మున్సు. పెరి పుజేరి వరివెలు వెన్బితాన్:

28 “యా యేసు పేరు అసి బోదెన్యాట్’ ఇజి మాపు మిజి డటం బెద్రిసి వెహ్తాప్ గదె. గాని మీరు యెరూసలేమ్దు విజి మీ బోద్ సాట్టిదెర్. సాతి వన్ని వందిజ్ మాప్ వన్నిజ్ సప్తామ్ ఇజి మీరు మా మున్సు. తప్పు ఇడేదెజ్ సుడేజినిదెర్”, ఇహాన్.

29 దన్నిజ్ పేతురు మరి అపొస్తురు, “లోకాజ్ ఆవిద్, దేవుణుదిజి మాపు లొజెదెజ్ గదె?

30 మీరు యేసుజ్ నిలువారు డెయెజి సప్తిదెర్. గాని మా అనిగొగొరి వలెహాన్ అసి మన్ని దేవుణు, వన్నిజ్ సాతి వరి బాణిజి నిక్తాన్.

31 యా యేసుజ్ రాజి మరిసి వజి, విజెరిజ్ రక్కిసిని వన్ని వజి దేవుణు గొప్ప మర్యాద సితండ్రె వన్ని ఉణెరె పడేకాదు బన్పిస్తాన్. ఎందనిజ్ ఇహిజి ఇస్తాయేలు లోకుర వరి పాపమ్కు డిసి దేవుణుదిజ్ లొజెదెజ్. వరి పాపమ్కు నొరె ఆదెజ్ సరి సిదెజ్ ఇజి దేవుణు వన్ని ఉణెరె పడేకాదు యేసుజ్ బన్పిస్తాన్.

32 యా సజతిజి వందిజ్ మాపు సానిర్. దేవుణుదిజ్ లొజెని వరిజ్ దేవుణు సిని వన్ని ఆత్మబా యా సజతిజి వందిజ్ సాని”, ఇజి వెహ్తార్.

33 అపొస్తలురు వెస్ట్రాక వెంజి విజేరె పుజేరిజ మున్ను పెరి పుజేరి, వన్నివెట మహికార్ కోపం ఆతార 'వరిజ్ నప్పావ్' ఇజి ఒడిబితార.

34 అయావలె నజమ్దు మహి పరిసయరు లొక ఒరెన్ గమాలియేలు ఇనికాన్ సన్హద్రిం నజమ్దు నిహండ్రె వెప్టాన్, "వీరు నణెం నజమ్దాన్ వెల్లిని మనీర్". గమాలియేలు ఎయెన్ ఇహిజ యూదురి రూలుజ్ నెన్నిసిని వరిలొక ఒరెన్. లోకుర విజేరె వన్నిజ్ మర్యాద సీజి మహార్.

35 అపొస్తలురుజ్ వెల్లి పొక్కారె గమాలియేలు నజమ్ది లోకాజ్ ఈహు వెప్టాన్, "ఇస్రాయేలు లోకాండె, యా లోకాజ్ మీరు ఇనిక కిదెజ్ ఇజి ఒడిబిజినిదెరో జాగర్ల మండ్రు.

36 సెగం పంటిజ్ ముండాల దూద ఇనికాన్ ఒరెన్ నిజితండ్రె నాను గొప్పువాండ్రు ఇజి వెప్టాన్. రమరమి నాల్లి వందెజ్ లోకుర వన్నివెట కూడితార. ఎయెరో వన్నిజ్ సప్టార్. వన్నివెట కూడితి మహికార్ విజేరె సెద్రితారె వరి పణి ఇని దన్నిజ్ రెవండ్రా సాహోద్.

37 వెనుక, లోకుర లెక్క నుడిని జనాబా దినమ్కాజ్ గలీలయ వాండ్రు అతి యూద ఇనికాన్ ఒరెన్ నిజిత్రాన్. మంద లోకుర వన్నివెట కూడితారె వారు ఏలుబడి: కినివరి మున్ను ఎద్రిస్తార. వన్నిజ్బా ఎయెరో సప్టార్. వన్నివెట కూడితి మహికార్ విజేరె సెద్రిత సాహోద్.

38 అందెజె, నాను ఇనిక వెస్పాన్ ఇహిజ, విరిజ్ ఇనికబా కిమాట్. విరిజ్ డిసిసిఅ. ఎందనిజ్ ఇహిజ విరి ఆలోసనమ్కు, విరి పణిజు లోకువలెహాన్ వాతిక ఇహిజ అది ఇనిదన్ని పణిదిజ్ రెవండ్రా సానాద్.

39 గాని ఇక్క దేవుణు బాణిజ్ వాతిక ఇహిజ విరిజ్ అడ్డు కిదెజ్ మీరు అటోఇదెర్. అక్కాదె ఆవండ మీరు దేవుణు వెట టంటిజ్ ఆతికార ఇజి మిజి తెలినాద్".

40 నజమ్దికార్ గమాలియేలు వెప్టా మాటదిజ్ ఒప్పుకోటార్. వారు అపొస్తలురుజ్ కూక్పిసి వరిజ్ కొండ్రాదాన్ డెయేబిసి యేసు పేరు అని ఎనెజిబా బోదిస్సాట్ ఇజి డటం వెప్పి వరిజ్ డిస్తార.

41 యేసు పేరు వందిజ్ మాలిజ్ ఓరిస్టెజ్ తగితికార్ ఆతి వందిజ్ అపొస్తలురు డెయేబి దెబ్బ తిహిజ్బా సర్ల ఆజి అబెణిజ్ సాహోద్.

42 రోజు అపొస్తలురు దేవుణు గుడి: డేవాదు, లోకురి ఇల్కాజ్ బోదిసి మహోర్. యేసు దేవుణు పోక్తి క్రిస్తునె ఇజి నెగ్గిమాట వారు తవ్వందో బోదిసి మహోర్.

6

అపొస్తలురు ఏడుగురు మొగ వరిజ్ ఏర్పాటు కిత్రార్

1 యేసుప్రబుజ్ నమ్మితికార్ ఆ కాలమ్దు నండో లోకుర ఆజి వాతార. అయావలె ముండ మణిసిరిజ్ బోజనం సీని దన్నిలొక, మా ముండ మణిసిరిజ్ బోజనం సివీర్ ఇజి గ్రికు బాన వర్గిని యూదురు ఏల్లి బాన వర్గిని యూదురు మున్ను మొరో ఆతార.

2 అయావలె వన్నిండ మణిసిరి అపొస్తలురు నమ్మితి వరిజ్ విజెరిజ్ కూక్తరె వెప్టాన్, "మాపు బోజనం సీబాజి సీని వందిజ్ దేవుణు మాట నెస్పిస్తెజ్ డిసి సీనిక తగివద్.

3 తంబెరిజాండె, అందెజె ఏడుగురు మొగ వరిజ్ ఏర్పాటు కిదు. మీ లొక దేవుణు ఆత్మ నిండ్రెతి మన్ని, గెణం నిండ్రెతి మన్ని విజేరె ఒప్పుకోటి మని ఏడుగురు మొగ వరిజ్ ఏర్పాటు కిదు, మాపు వరిజ్ యా పణి ఒపజెప్పావ్.

4 అహిజ మాపు పార్దనం కిదెజ్, దేవుణు - మాట నెస్పిస్తెజ్ కేట మంజినావ్", ఇహోర్.

5-6 అపొస్తలురి మాటిజ్ అబ్బి కూడితి మహి లోకాజ్ విజెరిజ్ ఇస్సం ఆతాద్. అందెజె దేవుణు మున్ను పూర్తి నమకం ఇడెజి దేవుణు ఆత్మ నత్తు పూర్తి నిండ్రెతి మహి స్తెపాను, పిలిపు, ప్రొకొరు, నికనోరు, తిమోను, పర్ననసు, యూద మతమ్దు కూడితి అంతియొకియ దేసెమ్దికాన్ నికోలాసు ఇని ఏడుగురు మొగవరిజ్, నమ్మితికార్ అపొస్తలురి ముండాల తతార. అపొస్తలురు పార్దనం కిత్రారె వరి మున్ను కిక్కు ఇడెజి వరిజ్ అయా పణి కిదెజ్ ఆతికారం సితార.

7 అందెజె మరి నండో లోకుర దేవుణు మాటిజ్ నమ్మితార. యెరూసలేమ్దు మన్ని నమ్మితి వరి లెక్క నండో ఆజి వాతాద్. నండోండో పుజేరిజు యేసుప్రబు మున్ను నమకం ఇత్తూర్.

లోకుర్ సైపానుజ్ అస్తార్

8 వరి లోజ ఒరెన్, సైపాను ఇనికాన్, దేవుణు దయదర్శముదాన్ దేవుణు అత్తు సత్తుదాన్ నిండితాండ్రె లోకుర్ నడిమి గొప్ప బమ్మాని పణిజ్ బమ్మాని గుర్తుజ్ కిజి మహాన్.

9 గాని, కురెనియ పట్టుమదికార్ యూదురు, అలెక్సాన్త్రీయు పట్టుమదికార్ యూదురు, (వీరు లిబెర్తి ఇని యూదురు మీటిజ్ ఇండ్రోణి గుంపుదికార్) మరి కిలికియ దేసమదాన్ వాతి యూదురు, ఆసియ దేసమదాన్ వాతి యూదురు వాతారె సైపాను వెట తర్కిస్తార్.

10 గాని వాండ్రు వెప్తి మాటిజు ఎద్రిస్తోజ్ వారు అట్ఎండ్రాతార్. ఎందనిజ్ ఇహిజు దేవుణు బాణిజ్ వాతి గెణమదాన్, దేవుణు అత్తు సత్తుదాన్ సైపాను వరివెట వర్గితాన్.

11 అయావలె వారు, 'వీండ్రు మోసె మున్సు, దేవుణు మున్సు దూసినిసి మాటిజ్ వర్గినిక మాప్ వెహాప్' ఇజి వెప్తిజ్ సెగొండార్ లోకాజ్ ఎయెర్ నెన్విండ సుత్రిస్తార్ కూడుజ్పారె.

12 కూడుజ్పారె, లోకాజ్, పెద్దెల్జు, యూదురి రూలు నెస్పినిసికార్ విజెరిజ్ రేప్టారె వన్ని మున్సు వాతార్. వాతారె సైపానుజ్ అస్తారె యూద పెద్దెల్జు నన్హద్రిం ఇని పెరి నజమదు తతార్. బానె అబద్ధం సాసి వెప్తి వరిజ్ నిల్పారె.

13 వారు ఈహు వెప్టార్, "వీండ్రు ఎస్తివలెబా దేవుణుదిజ్ కేట కిత్తి యా దేవుణు గుడిదిజ్, మోసె సిత్తి రూలుజు వెత్తెకం వర్గిజినాన్.

14 యా నజరేతు వాండ్రు అతి యేసు యా దేవుణు గుడిజ్ పాడు కినాన్, మాటు ఎలాగ నడిదెజ్ ఇజి మోసె మా అనిగొగొరిజ్ సిత్తి మాటిజ్ మారిస్తాన్ ఇజి వీండ్రు వెప్తిక మాపు వెహాప్".

15 నన్హద్రిం నజమదికార్ సైపాను మొకొం డిటం సుడేజు మహిజ్ వన్ని మొకొం దేవుణు దూత మొకొం లెకెండ్రె జాయ్ తోర్కిక వారు సుడేతార్.

7

సైపాను నన్హద్రిం నజమదు మన్ని వరివెట వర్గిజినాన్

1 అయావలె విజెరె పుజేరిజు మున్సు వెరి పుజేరి సైపానుజ్ వెన్బాతాన్, "యా మాటిజ్ నిజమా? వీరు వెప్తి లెకెండ్రె నీను వెప్తిదా సిల్లాదా?".

2 దన్నిజ్ సైపాను వెప్తిక ఇనిక ఇహిజు, "తంబెరిజాండ్రె, బుబ్బరాండ్రె, వెండ్రు, మా అనిగొగొ అతి అబ్రాహం ఆరోసు ఇని పట్టుమదు బత్తిఎండ్రె ముండాల, మెసాపొతెమియ ఇని దేసమదు బత్తిజు మహాన్. అయావలె నండ్రె జాయ్ మన్ని దేవుణు వన్నిజ్ తోరె అతాన్.

3 దేవుణు అబ్రాహం వెట ఈహు వెప్టార్, 'నీను నీ దేసెం డిసి, నీ సొంత లోకాజ్ డిసి నాను నిజి తోరిసిని దేసెం సొన్అ'.

4 అయావలె వాండ్రు కల్దియుజ్ బత్తితి మహి మెసాపొతెమియ దేసెం డిసి ఆరోసు పట్టుమదు సొన్ని బత్తితాన్. వన్ని బుబ్బ సాతి వెనుక అబెణిజ్ మీరు ఏలు బత్తిజిని యా దేసమదు బత్తిదెజ్ దేవుణు వన్నిజ్ కూక్త తతాన్.

5 అయావలె దేవుణు వన్నిజ్ ఉండ్రీ ముక బూమిబా అక్కు సివితాన్, యా దేసమదు. గాని అయావలె అబ్రాహముజ్ కొడోరె సిల్లితిజ్బా దేవుణు వన్ని వెట ఉండ్రీ మాట సిత్తాన్. అక్కు ఇనిక ఇహిజు, 'నిజి, నీ పొటిజాణి వరిజ్ విజెరిజ్ యా బూమి అనాద్'.

6 దేవుణు వన్ని వెట, 'నీ పొటిజాణికార్ అజ దేసమదు సొనారె బానె అకారె లెకెండ్రె మనార్. అయ దేసమదికార్ నీ లోకాజ్ నాల్లి వందెజ్ వంటిజ్ వెట్టిపణి కిజిని వరిలెకెండ్రె పణి కిలిసి వరిజ్ లోజిజు మంజని పజ ఇడేజి మాలెజ్ కినార్'.

7 గాని వారు ఎమేణి దేసమదు పణి కిజినారె అయ దేసమది వరిజ్ నాను తీర్పు తీరిసి సిన్ సీనాలె. వెనుక వారు ఆ దేసెం డిసి వాజి యా బాడ్డిదు మంజి నజి పొగడిజు మాడిస్సార్లె ఇజి వెప్తి మహాన్.

8 దేవుణు అబ్రాహం వెట 'విజెరి కుటుమ్కాజ్ పుట్టి మొగ్గ కొడోరిజ్ సునతి కిదెజ్ వలె', ఇజి వెప్టార్. అందెజి అబ్రాహం, వన్ని మరిసి ఇనాకు పుట్టి ఏడు రోస్సు వెనుక మహ్న నాండిజ్, ఇహిజు, ఎనిమిది

రోస్నాజ్ సునతి కిత్తాన్. ఇస్సాకు, వన్ని మరసి యాకోబుజ్ సునతి కిత్తాన్. యాకోబు వన్ని పన్నెండు మంది మరసిరిజ్ సునతి కిత్తాన్. యా పనెండు మందినె ఇస్సాయేలుది పనెండు కుటుమది అనిగిగోరె ఆతారె.

9-10 యా పన్నెండు మంది అనిగిగోరె వరి లోఇ తంబెరి ఆతి యోసేపు ముస్సు గోస ఆతారె వన్నిజ్ గొత్తి పణి కిదెజ్ పొరారె. ఆహె యోసేపు అయ్యగుప్పు దేసమదు గొత్తి పణి కిత్తాన్. గాని దేవుణు వన్ని వెట మహండ్రె వన్నిజ్ వాతి విజు మాలెజాణిజ్ తప్పిస్తాన్. దేవుణు వన్నిజ్ గెణం సిత్తిజ్ అయ్యగుప్పు రాజు ఆతి పరో యోసేపు ముస్సు, దయ తోరిస్తాన్. పరో రాజు యోసేపుజ్ అయ్యగుప్పు దేసమదిజ్ నడిపిసిని వన్నిలెకెండ నిల్స్తాన్. పరో రాజుజ్ కల్లితి మహి విజు వనకాజ్ ముస్సు, నడిపిసిని వన్నిలెకెండ కిత్తాన్.

11 అయావలె అయ్యగుప్పు దేసమదు విజు, మా అనిగిగోరె బత్తిజు మహి కనాను దేసమదు విజు పెరి కరు వాతాద్. కరు వాతిజ్ నండో మాలెజ్ వాతె. మా అనిగిగోరె ఆతి పరిజ్ తిండి దోహ్కావండ ఆతాద్.

12 అయావలె, అయ్యగుప్పు దేసమదు తిండి మనాద్ ఇజి యాకోబు వెహాన్. వెహండ్రె వన్ని మరసిరిజ్, ఇహిజు, మా అనిగిగోరెజ్ ముందాల్పై ఉండ్రె సుటు బాన్ పోక్తాన్.

13 వారు మరి ఉండ్రె సుటు సొహిజ్, యోసేపు, వన్ని దాదారిజ్ వాండ్రు ఎయెన్ ఇజి నెల్వ కిబె ఆతాన్. అయావలె యోసేపు కుటుమది పరి వందిజ్ పరో రాజు నెస్తాన్.

14 వెనుక యోసేపు వన్ని బుబ్బు ఆతి యాకోబుజ్ వన్ని సొంత లోకాజ్ విజెరిజ్ అయ్యగుప్పు దేసమదు రదు ఇజి కల్లు పోక్తాన్. వారు మొత్తం డబయ్ అయ్యదుగురు మహారె.

15 అయావలె యాకోబు, వన్నివెట మహికారె విజెరి అయ్యగుప్పు దేసం సొహారె. వారు అబ్బె బత్తిత్తారె. వెనుక యాకోబు, మహి అనిగిగోరు బాన్ సాతారె.

16 వెనుక పరి డుముక్ నెకెం ఇని పట్టుమదు మరజి తత్తారె, ముందాల అబ్రాహాం హామోరు మరసిరి బాణిజ్ కొటి దూకి లోఇ ముస్తారె*.

17 దేవుణు అబ్రాహాముజ్ ముందాల్పై సిత్తి మాట వజ జర్గిదెజ్ డర్పు ఆజి వాతాద్. అయావలె మా లోకు అయ్యగుప్పు దేసమదు నండో లోకు ఆజి వాతారె.

18 అయావలె, యోసేపు ఎయెన్ ఇజి నెన్ ఇ ఒరెన్ రాజు అయ్యగుప్పు దేసమదిజ్ ఏలుబడి కిదెజ్ మొదోల్స్తాన్.

19 యా రాజు మా లోకాజ్ మాయ మాటిజ్ వెప్పి మొసెం కిత్తాన్. గొప్ప మాలెజ్ కిత్తాన్. మొగ్గకొణెరి పుట్టిజు పరిజ్ నప్పెజ్ వెటనె గడ్డదు విసిరెజ్ వలె ఇజి యా రాజు ఆడ్ర సిత్తాన్. ఎందనిజ్ ఇహిజు వారు సాజి సొండ్రెజ్.

20 ఆ కాలమదు మోసె ఇనికాన్ ఒరెన్ పుట్టాన్. వాండ్రు సుడెదెజ్ గొప్ప నెగ్గికాన్. వాండ్రు మూండ్రె నెలెజ్ దాక వన్ని బుబ్బు ఇండ్రె పిరితాన్.

21 మూండ్రె నెలెజ్ వెనుక వన్నిజ్ ఇండ్రె వెల్లి సోప్పి గడ్డ ఒడ్డుదు ఇట్టారె. అయావలె పరో రాజు గాల్పి వాతాదె కొణెదెజ్ లాగితాదె దన్ని మరసి లెకెండ పోస కిబిస్తాన్.

22 మోసెజ్ అయ్యగుప్పు పరి విజు తెలివి నెన్పిస్తాన్. వాండ్రు, వర్గిని మాటిజు లోఇ బాగ వర్గిదెజ్ అట్టాన్. కిని పణిజు లోఇ నెగ్రెండ కిదెజ్ అట్టాన్.

23 మోసెజ్ నలవయ్ పంటెజ్ ఆతివలె నా సొంత లోకురె ఆతి ఇస్సాయేలురె బాన్ సాన్ ఇజి బుద్ది పుట్టాద్.

24 వాండ్రు సొహిజ్ అయ్యగుప్పుదికాన్ ఒరెన్, ఒరెన్ ఇస్సాయేలు వన్నిజ్ మాలెజ్ కిజి మహిజు సుడెజాన్. సుడెజతండ్రె, ఇస్సాయేలు వన్నిజ్ గెల్పిస్తెజ్ ఇజి అయ్యగుప్పు వన్నిజ్ సప్తాన్. ఆహె నాయం తీరిస్తాన్.

25 ఇస్సాయేలు లోకాజ్ పరి బాదెజాణిజ్ డిబిస్తెజ్ దేవుణు నజి పోక్తాన్ ఇజి మోసె ఒడిబితాన్. గాని వారు అర్థం కిపితారె.

26 మహ్సా నాండిజ్ మోసె ఇస్సాయేలు లోకాజ్ సుడెజు సొహాన్. రిఎరె ఇస్సాయేలు లోకురె టంటెజ్ ఆజి మహిజ్ మోసె వరిజ్ సుడెజతండ్రె, 'ఒరె ఒరె బాబు, మీరు తంబెరి రిజదెరెగదె? మీరు ఎందనిజ్ ఒరెన్ వన్ని ముస్సు, ఒరెన్ టంటెజ్ ఆజినిదెరె' ఇజి వెప్తాండ్రె వారు రిఎరిజ్ కూడుప్పెజ్ ఇజి సుడెజాన్.

* 7:16 7:16 అయ కాలమదు అయ్యగుప్పు దేసమదికారె పినుగుదిజ్ నూనె రాసి పాత లోఇ ఇద్దారె, నబ్విండ మండ్రెజ్

27-28 గాని ఆ ఇ వన్ని మున్ను అనయం కినికాన్ వెహ్లాన్, 'మా మున్ను అతికారి వజ మండ్రెజ్, తీర్పు తీర్పి వన్నివజ మండ్రెజ్ నిజి ఎయెన్ ఏర్పాటు కిత్తాన్? నీను ఇఎన్ అయా అయ్గుప్పు వన్నిజ్ నప్పిలెకెండ నజీబా సప్తెజ్ ఇజి నుడేజినిదా ఇజి వెహ్లాన్ మోసెజ్ నెక్తపొక్తాన్.

29 యాక వెహ్లాన్ మోసె తియెల్ అతాన్. వెటెన అయ్గుప్పు దేసెం డిసి సోహాన్. మిద్ద్యాను ఇని దేసమ్దు సోహాన్డె అఇకాన్ లెకెండ బత్తిత్తాన్. బానె వెండ్లి అతండ్రి రిఎర్ కొడేరిజ్ ఇట్టాన్.

30 నలవయ్ వంటెజ్ వెనుక, సినాయి ఇని పెరి గొరొన్ డగ్గు మన్ని బిడిమ్ బూమిదు మహిజ్, ఒరెన్ దేవుణు దూత మోసెజ్ తోరె అతాన్. యా దూత వెయ్జి మహి తుప్పెజి నడిమి ఉండ్రి నీను కొణ లొఇ తోరె అతాన్.

31 మోసె అక్క నుడేతిజ్ బమ్మ అతాన్. బమ్మ అతండ్రి నెగ్రిండ నుడేదెజ్ తుప్ప డగ్గు సోహాన్. డగ్గు సోహిజ్ దేవుణు మాట ఈహు వెహ్లాన్,

32 'నాను నీ అనిగొగొర్ అతి అబ్రాహాం, ఇస్సాకు, యాకోబు ఇని వరి దేవుణు'. యాక వెహ్లాన్ మోసె తియెల్ అజి వణక్తాన్. నుడేదెజ్ బా అటమ్తాన్.

33 దేవుణు మరి వెహ్లాన్, 'నీ జోడ్డు కుత్తి ఇడేఅ. నీను నిహిమన్ని బాడ్డి దేవుణుదిజ్ కేట అతి బాడ్డి'.

34 అయ్గుప్పు దేసమ్దు మన్ని నా లోకాజ్ మాలెజ్ నాను నెగ్రిండ నుడేత. వారు అడేబానిక వెహ. అందెజె నాను వరిజ్ డిబిన్జ్ డిగిత వాత. ఏలు రఅ నిజి నాను అయ్గుప్పు దేసెం పొక్కు ఇజి వన్నివెట వెహ్లాన్.

35 'మా మున్ను అతికారి వజ మండ్రెజ్ తగ్గు తెప్పికాన్ వజ మండ్రెజ్ నిజి ఎయెర్ ఏర్పాటు కిత్తాన్' ఇజి వెప్పి ఇస్రాయేలు లోకుర్, ముందాల నెక్కి పొక్కి యా మోసెజ్ నె, దేవుణు అతికారి వజ, తప్పినికాన్ వజ వరిబాన్ పొక్తాన్. వెయ్జి మహి తుప్ప లొఇ తోరె అతి దేవుణు దూత సాయమ్దాన్ మోసెజ్ దేవుణునె పొక్తాన్.

36 అయ్గుప్పు దేసమ్దు బమ్మ వణిజ్ కిజి మోసె ఇస్రాయేలురిజ్ తప్పిస్త తతాన్. ఎర్రజ్ సమ్దరంబానె, మరి వారు నలవయ్ వంటెజ్ నడిజి సోహిమహి బిడిమ్ బూమిదుబా మోసె బమ్మాని వణిజ్ బమ్మాని గుర్తుజ్ కిత్తాన్.

37 యా మోసెనె ఇస్రాయేలురు వెట, 'దేవుణు నజి పొక్కి లెకెండ మీబాణిజి ఒరెన్ ప్రవక్తెజ్ మీబాన్ పొక్తాన్', ఇహాన్.

38 బిడిమ్ బూమిదు సజం కూడితి మహి ఇస్రాయేలు లోకుర్ వెట మహికాన్ యా మోసెనె. మా అనిగొగొర్ వెట మహికాన్ వీండ్రి. సీనాయి గొరొతు దేవుణు దూత విన్నివెటెన వర్గితాన్. మజి సీదెజ్ దేవుణు బాణిజ్ ఎల్లకాలం బత్తిని మాటెజ్ తత్తికాన్ వీండ్రి.

39 గాని యా మోసెజ్ మా అనిగొగొర్ లోజిజి మన్ ఏండ్ నెక్తపొక్తాన్. మరెజి అయ్గుప్పు దేసమ్దు సోహిజి నెగ్గెద ఇజి వారు కోరెతాన్.

40 అయ్గుప్పు దేసమ్దాన్ మజి కూక్కి తత్తి యా మోసె ఇనిక అతాండ్రి మజి తెలివిద. అందెజె మరెజి అయ్గుప్పు దేసమ్దు సొండ్రెజ్ మజి ముందాల నడిదెజ్ దెయమ్కు తయారొ కిజి నిదా ఇజి మోసె అన్నని అతి ఆరోసు వెట వెహ్లాన్.

41 అయావలి వారు ఉండ్రి దూడే లెకెండ బొమ్మ తయారొ కిత్తెర్ పూజ కిత్తాన్. వరి కిక్కాణిజ్ తయారొ కిత్తి దన్నిమున్ను వారు నండ్ సర్ అతాన్.

42 గాని దేవుణు కోపం అతండ్రి మొకొం వెనుక మహ్లాన్. ఆగానమ్దు మన్నికెజ్ నుడేదెజ్, నెల పొద్దు సుక్కెజ్ విజి దన్నిజ్ పూజ కిదెజ్ వరిజ్ డిస్స సిత్తాన్. ప్రవక్తరు ముందాల్పె రాస్సిమహిక దిని వందిజె. అక్క ఇనిక ఇహిజి "ఇస్రాయేలు లోకాండ్, మీరు బిడిమ్ బూమిదు నల్వయ్ వంటెజ్ నడిసి సొన్ని మహివలె పూజ కిత్తిక నజీనె అవిద.

43 మీరు పూజ కిసాల్ ఇజి తయారొ కిత్తి మొలూకు రొంపయు ఇని సుక్కెజాణి దెయమ్కాజె గూడాఝరమ్దు పిండిజి ఒసి మహిదెర్. వనకాజె పూజ కిత్తిదెర్. అందెజె బబులోసు దేసెం అతాల్ మిజి తొప్పి ఒతెజ్ నాను సరి సీనాలె.

44 మా అనిగోగోర్ బిడిఃమ్ బూమిదు సాన్ని మహివలె సాసి గూడారం వరివెట మహాద్. దేవుణు మోసానీజ్ తోరిన్సి లెకెండె మోసె యా సాసి గూడారం †తయార్ కిత్తాన్.

45 మరి లావు పంటిజ్ వెనక యెహోసువ ఇనికాన్ అయ టయమ్దు యా సాసి గూడారం పిండిత ఒతండ్రె మా అనిగోగోరిజ్ నడిపిస్తాన్. అయవలె ఇస్తాయెలు లోకాజ్ సీనా ఇజి దేవుణు వెప్తి దేసమ్దు వారు సోహార్. దేవుణు వరివెట మహాజ్ బానె మహి యూదురు ఆజ లోకుర్ వెట ఉద్దం కిత్తార, గెల్స్తారె ఆ దేసెం సొంతం కిత్తార. బానెబా మా అనిగోగోర్ యా సాసి గూడారం పిండిత ఒత్తార. దావీదురాజు వరిజ్ ఏలుబడిః కిత్తి కాలమ్దాక యా సాసి గూడారం బానె మహాద్.

46 దావీదురాజు ఇహిజ దేవుణు వెప్తి వజ నడిఃతికాన్. దేవుణు దయ వన్ని ముస్సు లావు మహాద్. అహిజ్ మా అనిగోగో ఆతి యాకోబు పార్దనం కిత్తి యా దేవుణుదిజ్ ఎలాకాలం మండ్రెజ్ ఉండ్రె గుడిః తోహ్లాజ్ దావీదు రాజు వెనబాతిజ్బా దేవుణు సరి సిపితాన్.

47 గాని దావీదురాజు మరిసి ఆతి సొలోమునుజ్ దేవుణు గుడిః తోహ్లాజ్ సరి సిత్తాన్.

48 అహిజ్బా విజెరిజ్ ఇక గొప్పు వెరి దేవుణు, లోకు కిక్కాణిజ్ తయార్ కిత్తి బాడ్డిదు మనవన్.

49 దేవుణు మాటిజ్ ప్రవక్త ఈహు వెప్తినాన్: “పరలోకం నాను బనిని సిమసనం‡. బూమి నా పాదమ్కు ఇడ్డి పీట. నాను మండ్రెజ్ ఉండ్రె గుడిః తోహ్లాజ్ మీరు అబ్బెదెర్.

50 ఎందనిజ్ ఇహిజ, పరలోకం, బూమి, దన్ని లోజ మన్నికెజ్ విజ నానె పుటిస్త”.

51 మూర్గుం బుద్ది మన్నికిదెరా, దేవుణు మాటిజ్ ఒప్పుకోటావ్ ఇజ మీరు సునతి కిత్తిదెర్ గాని దేవుణు మాటిజ్ గిబ్బిజాణి వెంజబా సరినె వెనక లెకెండె మంజనిదెర్. వెహిజ్బా సరినె మన్నుదు ఇడఃవిండ లోజెఇదెర్. మీ అనిగోగోర్ లెకెండె మీరుబా ఎనెజ్బా సరినె దేవుణు అత్తిదిజ్ నెక్కిపొక్కినిదెర్.

52 మీ అనిగోగోర్ ప్రవక్తరిజ్ విజెరిజ్ గొప్పు మాలెజ్ కిత్తార. దేవుణు పొక్కు ఇజి వెప్తి ఆ నీతి వాండ్రు వందిజ్ ముందాలై వెప్తి ప్రవక్తరిజ్బా మీ అనిగోగోర్ సప్తార. ఏలు ఆ నీతి వన్నిజ్ మీరు ఒవజెప్తిదెర్. వన్నిజ్ సప్తిదెర్.

53 దేవుణు వన్ని దూతవెట మిజి సిత్తి రూలుజ్ మిజి దోహ్లాకె గాని మీరు దన్నిజ్ లోజెఇతిదెర్”.

స్టెపానుజ్ పణుకుజాణిజ్ డెయేజినార్

54 యా మాటిజ్ వెహారె వారు గొప్పు కోపం అత్తారె స్టెపానుజ్ సుడఃజి పల్కు కోహ్లాకార.

55 గాని స్టెపాను దేవుణు అత్తి సత్తు పూర్తి నిండ్రెజి ఆగాసం దరోటో సుడఃతాన్. సుడఃతిజ్ దేవుణు గొప్పు జాయ్ సుడఃతాన్. యేసుప్రబు దేవుణు ఉణెర్ వడఃక నిహి మహిక సుడఃతాన్.

56 “సుడఃత, ఆగాసం రె ఆతి మహిక, లోకు మరిసి ఆతి యేసు దేవుణు ఉణెర్ వడఃక నిహిమహిక నాను సుడఃజన”, ఇజి స్టెపాను వెప్తాన్.

57 గాని యా మాటిజ్ వెహారె వెటనె వారు గిబ్బిజ్ మూకె అత్తారె డటం గగోలాజి విజెరె ఉండ్రె ఆజి వన్ని ముస్సు వాత్తార.

58 పట్టుమ్దాన్ వెల్లి లాగిత ఒత్తారె వన్నిజ్ పణుకుజాణి డెయేజి సప్తెజ్ మొదోల్స్తార. పణుకుజ్ విసిర్ని సాసి లోకుర్ వరి సొక్కెజ్ ముందాల సవులు ఇని ఒరిన్ దజడాఃయెన్ పాదమ్కాజ్ డగ్రు తత్తారె ఇట్టార.

59 వారు స్టెపానుజ్ పణుకుజాణిజ్ డెయేజి మహిజ్ స్టెపాను, “యేసుప్రబువా నా పాణమ్దిజ్ ఏలు ని డగ్రు కూడువ్అ”, ఇజి పార్దనం కిత్తాన్.

60 వెనుక స్టెపాను ముణుకుజ్ ఊరిజి, “ప్రబుక, వీరు కిజిని యా పాపం విరి ముస్సు మోప్పు”, ఇజి డటం డేల్స్తాన్. యా మాట వెహ్లాండ్రె వాండ్రు పాణం డిఃస్తాన్. స్టెపానుజ్ సప్తిక సవులు ఒప్పుకోటాన్.

8

దేవుణుదిజ్ నమ్మితి వరిజ్ సవులు పాడుః కిజినాన్

† 7:44 7:44 సాసి గూడారం. దేవుణు ఇబ్బి మనాన్ ఇజి లోకాజ్ వెప్తి మహి గూడారం ‡ 7:49 7:49 సిమసనం. తీరపు కిడెజ్ రాజుర్ బనిని కుర్చి

1 ఆ దేనమ్మాకాజ్ యెరూసలేమ్దు మహి దేవుణు సజమ్దిజ్ గొప్ప మాలెజ్ ఆజి మహాద్. అపొస్తలుడు అవండ మహి నమ్మితకారె విజేరె యూదయ సమరియ దేనమ్మాకాజ్ నెద్రిత సాహార్.

2 బక్తి కల్లితి నమ్మితొ లోకుర నైపానుజ్ నమాది కితారె వన్ని వందిజ్ గొప్ప దుకుం ఆజి అడజబాతార్.

3 నస్తివలె నప్పలు ఇనికాన్ యేనువ్రబు మున్ను నమకం ఇడ్డిమహి వరి నమకం పాడుః కిదెజ్ నుడఃతాన్. ఇల్లాజ్ ఇల్లాజ్ డుఃగజ మొగ్గకొడొరిజ్ అయ్లికొడొకాజ్ ఈడిఃసి ఒసి జెలిదు ఇడఃజి, వాండ్రు సజమ్దిజ్ పాడుః కిదెజ్ మొదొల్స్తాన్.

సమరియ దేనమ్దు సువార్త సాటిస్తార్

4 అయావలె నెద్రితి సాహి సజమ్దికార్ సువార్త సాటిసి విజు బాడ్డిజ విజెరిజ్ వెన్పిసి బూలాతార్.

5 అయావలె అపొస్తలుడు ఏరపాటు కిత్తివరి లోఇ ఒరెన్ పిలిపు ఇనికాన్ సమరియ పట్టుమ్దు సాహాన్. అబ్బె యేను, క్రీస్తు* ఇజి బొద్దిస్తాన్.

6 పిలిపు వెప్తి మాటెజ్ లోకుర విజెరె నెగ్రెండ వెహారె వాండ్రు కిత్తి బమ్మాని గుర్తుజ్ నుడఃతాన్.

7 కిక్కు కాల్యు సాతికార్, సాబువారు నండొండార్ అబ్బె వాతారె నెగ్రెండ ఆతార్. నండొండార్ లోకుర దెయం అస్తి మహికార్ అబ్బె మహార్. దెయమ్కు నండొ గగోలాజి వరిజ్ డిస్తె సాహె.

8 అందెజె సమరియ పట్టుమ్దు నండొ సర్ల కల్లితాద్.

గార్లి పణి కిని సిమోను

9 సమరియ పట్టుమ్దు సిమోను ఇని ఒరెన్ మహాన్. సిమోను ఆ పట్టుమ్దు నెగం పంటెజ్ గార్లి విదె కిజి నాను ఒరెన్ గొప్ప వాండ్రు ఇజి వెప్పి మహాన్. అబ్బె మహి లోకాజ్ సిమోను బమ్మ కిబిసి మహాన్.

10 అయ పట్టుమ్దు మహికార్ ఇజిరికార్ పెరికార్ విజేరె వీండ్రు 'దేవుణు గొప్ప సత్తు ఇనికాన్' ఇజి వెప్పి వన్ని మున్ను నమకం ఇడఃతాన్.

11 నండొ కాలం సిమోను గార్లి పణి కిజి లోకాజ్ బమ్మ కిబిసి మహాన్. అందెజె వారు సిమోనుజ్ నమ్మితార్.

12 గాని దేవుణు ఏలుబడిః వందిజ్, యేనుక్రీస్తు వందిజ్ పిలిపు పట్టుమ్ది లోకాజ్ సాటిస్తెజ్ యా సువార్త వెహికార్. నమ్మితారె మొగ్గకొడొరి, అయ్లికొడొకాజ్ బాప్తీసం లాగె ఆతార్.

13 అయావలె సిమోనుబా నమ్మిజి బాప్తీసం పొందితాండ్రె పిలిపుజ్ డిఃనవిండ వన్నివెటెనె మహాన్. పిలిపు కిని బమ్మాని గుర్తుజ్, బమ్మాని పణిజ్ నుడఃజి సిమోను గొప్ప బమ్మ ఆతాన్.

14 యేను ప్రబు వందిజ్ వెప్తి సువార్త సమరియ దేనమ్దికార్ ఒప్పకొటార్ ఇజి యెరూసలేమ్దు మన్ని అపొస్తలుడు వెహార్. వెహారె పేతురుజ్ యోహానుజ్ వరి డగ్రు పోక్తార్

15 వీరు వాతారె సమరియ పట్టుమ్దు నమ్మితి వరి మున్ను దేవుణు ఆత్మ సత్తు వాదెజ్ ఇజి పార్లనం కిత్తార్.

16 ఎందనిజ్ ఇహిజ అబ్బెణి దాక దేవుణు ఆత్మ సత్తు వరి ఎయేరి మున్నుబా రెవిండ మహాద్. వారు ప్రబువాతి యేను పేరుదాన్ బాప్తీసం ఉండ్రెనె లాగె ఆజి మహార్.

17 అయావలె పేతురు, యోహాను వరి మున్ను కిక్కు ఇడ్డిజ దేవుణు ఆత్మ సత్తు వరి మున్ను వాతాద్.

18-19 అపొస్తలుడు లోకుర మున్ను కిక్కు ఇట్టి వలె వారు దేవుణు ఆత్మదాన్ నిండ్రెజినార్ ఇజి సిమోను నుడఃతాన్. నుడఃతండ్రె, "నాను ఎయేన్ మున్ను కిక్కు ఇడ్డానొ, వాండ్రు దేవుణు ఆత్మ సత్తుదాన్ నిండ్రెని వజి యా అతికారం నజిబా సిదా", ఇజి వెప్పి వరి ముందాల డబ్బు ఇడ్డాన్.

20 అయావలె పేతురు, "నీను డబ్బు నీజి దేవుణు వరం సంపాదనం కిని ఇజి ఒడిఃబిత్తిదా? నీ డబ్బు నీ వెట నాననం అపిద్.

21 నీ అలోసనం దేవుణు నుడఃతిజ్ సరి అతిక ఆవిద్. అందెజె మాపు కిని పణిదు నీజి ఇని వంతు సిల్లెద్.

* 8:5 8:5 క్రీస్తు (మెనయ) ఇహిజ దేవుణు ఏరపాటు కిత్తి పోక్తాన్ ఇజి అర్లం

22 అందెజె యా సెజ ఆలోసనమ్మకు డిసిసిజి దేవుణు డగ్రు వాజి పార్లనం కిదు. నీను ఒడిజిబిత్తి ఆలోసనమ్ వందిజ్ దేవుణు నిజి నెమిస్సాన్సు.

23 నీ మన్నుడు నండో గోన నిండ్రిత మనాద్ ఇజి నాను నెస్సాన్. అక్కాదె ఆవండ నీ పాపమ్మకు నిజి తోహ్తా మన్నె ఇజి నాను నెస్సాన్”, ఇజి పేతురు వెహ్తాన్.

24 దన్నిజ్ సిమోను, “నీను వెహ్తాకెజ్ ఇనికబా నా మున్ను, రెవిండ మీరు నావందిజ్ యేసుప్రబుజ్ పార్లనం కిదు”, ఇజి పేతురుజ్ యోహానుజ్ వెహ్తాన్.

25 వెనుక పేతురు, యోహాను సాని వెహ్తాన్, యేసుప్రబు సువార్త సాటిసి, యెరూసలేమ్దు మహ్తా వాతార్. వాని సరి సమరియదు మహి నండో నాహ్కాజ్ సువార్త సాటిసి వాతార్.

పిలిపు అయ్యయిపియది వన్నిజ్ బాప్తీసం సిత్తాన్

26 అయావలె, ఒరెన్ దేవుణు దూత పిలిపుజ్ వెహ్తాన్, “నీను దసిణం దరోబ్ సాన్సి యెరూసలేమ్దుదాన్ గాజ ఇని పట్టుం సాని బిడిమ్మ బూమిదు సాన్అ”, ఇజి వెహ్తాన్.

27-28 అందెజె పిలిపు సోతాండ్రె సోహాన్. సాన్సి మహిజ్ ఒరెన్ అయ్యయిపియదికాన్ రదం[†] మున్ను సాన్సినాన్. వాండ్రు అయ్యయిపియ దేనెమ్ది రాణి కందెకబాన్ ముకెలమతి పణి కినికాన్ ఒరెన్. ఇని పణి ఇహిజ దేనెమ్ది డబ్బు నడిపిసిని దన్ని మున్ను వీండ్రు మంత్రి. వీండ్రు యెరూసలేమ్దు పార్లనం కిదెజ్ సాహండ్రె మరజి సాన్సినాన్. సాన్సి మహిజ్ వీండ్రు రదమ్దు బసి యెనయ ప్రవక్త రాన్సి పుస్తకం సద్విజినాన్.

29 అయావలె దేవుణు ఆత్మ పిలిపుజ్, “నీను రదం డగ్రు సాన్సి దన్ని వెట నడిజి సాన్అ”, ఇజి వెహ్తాన్.

30 పిలిపు రదం డగ్రు ఉహ్కాన్సి సోహిజ్ అయా అయ్యయిపియదికాన్ యెనయ ప్రవక్త రాన్సి పుస్తకం సద్విజినాన్. పిలిపు అక్క వెహ్తాన్. వెహండ్రె, “నీను సద్విజనిక అర్థం కిజినదా?”, ఇజి వెన్బాతాన్.

31 వెన్బాతిజ్, “ఎలాగ అర్థం కిన్? ఎయెన్బా నజి అర్థం వెహ్విండ మహిజ ఎలాగ అర్థం కిన్? రదమ్ మున్ను ఎక్కి నా వెట బన్అ. దన్ని అర్థం వెహ్సి సిదా” ఇహాన్, అయ అయ్యయిపియదికాన్. అందెజె పిలిపు రదం ఎక్కి వన్ని డగ్రు బస్సాన్.

32 అయ అయ్యయిపియదికాన్ సద్విజి మహి మాటెజ్ ఇనికెజ్ ఇహిజ “సప్తెజి ఒని గొరె వజి వన్నిజ్ ఒతార్. బుడూస్సుజ్ కత్తిసినివలె అలెజి మంజిని మెండగొరెపిల్ల వజి అలేత మహాన్. వాండ్రు ఇనికబా ఇన్అతాన్.

33 వారు వన్నిజ్ సిగు కిత్తార్. వన్నిజ్ నాయం దోహ్కవిండాత సోహాద్. వన్ని పొటెజాణి వరి వందిజ్ ఎయెరబా వెహ్విండ ఆనార్. ఎండనిజ్ ఇహిజ, వన్ని పాణమ్దిజ్ బూమి మున్నుహాన్ లాగితార్”.

34 అయ అయ్యయిపియదికాన్ ఈహు వెన్బాతాన్, “ప్రవక్త ఎయె వందిజ్ ఈహు వెహ్సినాన్? వన్ని వందిజెనా, మరి ఒరెన్ వందిజె? దయ కిజి వెహ్అ”.

35 అందెజె పిలిపు అయ అయ్యయిపియదికాన్ సద్విజి మహి యెనయ ప్రవక్త రాన్సి పుస్తకమ్దు మహి మాటెదాన్ మొదొల్ని యేసుప్రబు వందిజ్ సువార్త వెహ్తాన్.

36 ఆహ వారు సాన్సి మహిజ్ ఏరు మహి ఉండ్రీ బాడ్డిదు వాతార్. అయ అయ్యయిపియదికాన్ వెహ్తాన్, “ఇబ్బె ఏరు మన్నె. నాను బాప్తీసం లాగి ఆదెజ్ ఇనికబా అడ్డు మనాదా?”.

37 దన్నిజ్ పిలిపు, “నీను మన్ను పూర్తి యేసుప్రబుజ్ నమ్మిత్తిజి బాప్తీసం లాగి ఆదెజ్ ఇని అడ్డుబా సిల్లెద్”, ఇహాన్. అందెజె వాండ్రు, “ఒఒ, యేసుక్రీస్తు దేవుణు మరిసి ఇజి నాను నమ్మిజన”, ఇహాన్.

38 అయావలె, “రదం నిల్వెఅ”, ఇజి అయ్యయిపియదికాన్ ఆడ్ర సిత్తాన్. రదం నిల్వెండ్రె వాండ్రు, పిలిపు, రివెర డిజిగిజి ఏరుదు డిజిగితార్. పిలిపు అయ్యయిపియది వన్నిజ్ బాప్తీసం సిత్తాన్.

39 వారు ఏరు లోఇహాన్ వెల్లె పాతిజ్ వెటనె దేవుణు అత్మ పిలిపుజ్ కూక్ ఒతాన్. అయ్యయిపియదికాన్ పిలిపుజ్ మరి సుడెవితాన్. గాని వాండ్రు సరద ఆజి వన్ని సరినె సోహాన్.

40 పిలిపు సుడెవితెజ్ అజ్జెతు పట్టుమ్దు మన్న ఇజి నెస్సాన్. అబ్బెణిజ్ సోని వాండ్రు సోహి సరిదు మహి విజి పట్టుమ్కాజ్ యేసు ప్రబు వందిజ్ సువార్త వెహ్సి కయెసరియ ఇని పట్టుమ్దాక వాతాన్.

† 8:27-28 8:27-28 రదం ఇహిజ గుర్తూకాజ్ ఉండ్రీ బంబి పూటూర్

9

సవులు యేసుప్రబుజ్ నమ్మిత్తాన్

1-2 అయావలె సవులు ఇనికాన్ యేసుప్రబు మున్సు, నమ్మిత్తి వరిజ్ బెద్దిసి మహాన్. వరిజ్ మాలెజ్ కిజి మహాన్. వాండ్లు విజెరె పుజేరిజి మున్సు, పెరి పుజేరిబాన్ సాహాండ్రె దమన్సు, పట్టుమ్దు మన్ని యూదురి మీటిజ్ ఇల్లాణి పెద్దెలెజి సీదెజ్ ఉత్తమ్కు లొస్తాన్. ఇని ఉత్తమ్కు ఇహిజి, దమన్సు, పట్టుమ్దు యేసుప్రబు మున్సు, నమకం ఇడ్డికార్ ఎయెరిబా మహిజి, మొగ్గకొడోర్ గాని అయెలికొడోజ్ గాని వరిజ్ తొప్పి ఒసి యెరూసలేం పట్టుమ్దు తతజ్ సవులుజ్ అతికారం మనాద్ ఇజి వెప్పిని ఉత్తమ్కు.

3 విజెరె పుజేరిజి మున్సు, పెరి పుజేరి సిత్తి ఉత్తమ్కు అస్తాండ్రె సవులు దమన్సు, పట్టుమ్దు సాండ్రెజ్ సొత్తాన్. దమన్సు, పట్టుం డగ్రు వాజి మహిజ్ గదెం ఆగనమ్దాన్ ఉండ్రి గొప్ప జాయ్ వన్ని సురులం డెయెతాద్.

4 అయావలె సవులు బూమిదు అర్తాన్. అర్తిజ్, “సవులు, సవులు, నీను ఎందనిజ్ నజి మాలెజ్ కిజిని”, ఇజి వన్ని వెట వెప్పి ఉండ్రి మాట వెహాన్.

5 “ప్రబు, నీను ఎలు”, ఇజి సవులు వెన్బాతాన్. “నీను మాలెజ్ కిజిని యేసునె నాను.

6 ఏలు నిజిజి పట్టుమ్దు సాన్అ. నీను ఇనిక కిదెజ్ ఇజి ఒరెన్ నిజి వెహ్మానాలె”, ఇజి మాట వెహ్మాన్.

7 సవులు వెట సొన్సి మహికార్ జాటు వెహార్ గాని ఎయెరికెబా తోరెవితార్. వారు అల్లెత నిహ మహార్.

8 సవులు బూమిదాన్ నిజిత్తాండ్రె బేస్తాన్ గాని కణకు తోరెవండ ఆతె. అందెజి వారు వన్నిజ్ కికాజ్ అస్తాం దమన్సు, పట్టుమ్దు నడెప్పిసి ఒతార్.

9 వాండ్లు మూండ్రి రొన్సు కణకు తోరెవండ మహాన్. ఇనికబా తిన్వండ ఉణెవండ మహాన్.

10 దమన్సు, పట్టుమ్దు యేసుప్రబు సిసూడుః ఒరెన్ అననియ ఇనికాన్ మహాన్. యేసుప్రబు వన్నిజ్ దర్గనమ్దు తోరె ఆతండ్రె, “అననియ”, ఇజి కూక్తాన్. కూక్తిజ్ అననియ, “ప్రబువా నాను ఇబ్బె మన్న”, ఇహాన్.

11 యేసుప్రబు వన్నివెట, “నీను తినాజ్ ఇజి కూక్తి సరిదు సాన్అ. బానె యూద ఇని వన్ని ఇండ్రి సొన్సి తార్పు పట్టుమ్దికాన్ సవులు ఇని వన్ని వందిజ్ వెన్బాఅ. సవులు పార్గనం కిజి మంజినాన్. ఉండ్రి దర్గనమ్దు సవులు ఇనిక సుడెతాన్ ఇహిజి,

12 అననియ ఇనికాన్ ఒరెన్ వాతండ్రె వన్ని కణెకెజ్ నెగెండె కిజి మరి సూణి లెకెండె ఆదెజి వన్ని బురాదు కిక్కు ఇడ్డివజి సుడెతాన్”, ఇజి వెహ్మాన్.

13 దన్నిజ్ అననియ వెహ్మాన్, “ప్రబు వీండ్లు యెరూసలేమ్దు నిజి కేట ఆతి వరిజ్ ఎసాన్సొ మాలెజ్ కిత్తాన్ ఇజి వన్ని వందిజ్ నాను నండో వెహ మహా.

14 ఇబ్బె యా పట్టుమ్దు నీ మున్సు, నమకం ఇడ్డి వరిజ్ తొప్పి ఒసి యెరూసలేమ్దు ఒతెజ్ వన్నిజ్ అతికారం నీని ఉత్తమ్కు పెరి పుజేరిజి బాణిజ్ అస్తాండ్రె వాత మహాన్”.

15 యేసుప్రబు అననియ వెట, “నీను సాన్అ. యూదురు ఆఇ లోకుర్ నడిమి, రాజురిజి నడిమి, ఇస్తాయేలు లోకాజ్ నడెమి నా వందిజ్ వెహ్మాజ్ నాను వన్నిజ్ ఏరెపాటు కిత మన్న.

16 నా వందిజ్ వాండ్లు ఎసానొ మాలెజ్ అనాన్ ఇజి నాను వన్నిజ్ తోరెన్ను”, ఇహాన్.

17 అందెజి అననియ అయ ఇండ్రి సాహాండ్రె సవులు మున్సు, కిక్కు ఇట్టాన్. “సవులునా, నీను వాతి సరిదు నిజి తోరె ఆతి ప్రబు అతి యేసు నజి పొక్త మనాన్. నీను మరి సూణి వందిజ్ దేవుణు అత్తు నత్తు నీ మున్సు, వాని వందిజ్ నజి పొక్త మనాన్”, ఇజి సవులు వెట వెహ్మాన్.

18 అయావలె వన్ని కణకాణిజ్ పొరొజ్ నన్నికెజ్ రాల్లిజ్ సుడెదెజ్ అట్టాన్. సవులు నిజితండ్రె బాప్టిసం లాగె ఆతాన్.

19 వెనుక బోజనం కితాండ్రె నత్తు ఆతాన్.

సవులు దమన్సు, పట్టుమ్దు, యెరూసలేం పట్టుమ్దు యేసుప్రబు వందిజ్ వెప్పినాన్.

సవులు దమన్సు, పట్టుమ్దు మహి యేసుప్రబు సిసూర్ వెట నెగం దినమ్కు మహాన్.

20 యూదురి మీటిజ్ ఇల్లాజ్ తిన్నాజ్ సాహాండ్రె యేసునె దేవుణు మరిసి ఇజి యేసుప్రబు వందిజ్ బోదిస్సెజ్ మొదొలెస్తాన్.

21 అక్క వెహికార్ విజేరె నండొ బమ్మ అతార్. యెరూసలేమ్దు యేసుప్రబుజ్ నమ్మితి వరిజ్ పాడుః కిజి మహికాన్ వీండ్రెగదె. యేసుప్రబుజ్ నమ్మితి వరిజ్ తొప్పి పెరి పుజేరిర డగ్రు కూక్కి ఒతెజ్ ఇబ్బెబా వీండ్రు వాత మనాన్ ఇజి వెహ్తార్.

22 అహికాబా పవులు మరి నండొ సత్తుదాన్ బోదిసి మహాన్. యేసునె దేవుణు పోక్కి క్రీస్తు ఇజి రుజువ్ కిత్రాండ్రె దమస్కు పట్టుమ్దు మహి యూదురుజ్ గాబ్ర కిత్రాన్.

23 నండొ రొస్కు సాహి వెనుక సవులుజ్ నప్పెజ్ ఇజి యూదురు ఆలోసనం కిత్రాన్.

24 గాని వరి ఆలోసనం సవులుజ్ తెలితాద్. వన్నిజ్ నప్పెజ్ వారు రెయువేల పూర్తి పట్టుం వెల్లి సాని సేప్టా* బాన్ సుడెజి కాత మహాన్.

25 గాని వన్ని సిసూర్ రయ్యు వన్నిజ్ ఒతారె ఉండ్రె గంపదు బనె కితారె పట్టుం సురుల మన్ని గోడెదు మన్ని ఉండ్రె కిటికి బోరొదాన్ వన్నిజ్ అడిగి డిహ్తార్.

26 సవులు యెరూసలేమ్దు సాహిజ్ సిసూర్ వెట కూడెదెజ్ సుడెతాన్. గాని వాండ్రు సిసూర్ లొఇ ఒరెన్ ఆవీన్ ఇజి వారు ఒడిబితారె వన్నిజ్ వరివెట కూడుప్పెజ్ తియెల్ అతార్.

27 గాని బరబ్బు ఇనికాన్ వన్నిజ్ అపొస్తురుబాన్ కూక్కి ఒతాన్. సవులు దమస్కు పట్టుమ్దు సాహి సరిదు ఎలాగ యేసుప్రబు వన్నిజ్ తోరె ఆతాన్ ఇజి, ఎలాగ యేసుప్రబు వన్నివెట వర్గితాన్ ఇజి, వెనుక సవులు ఎలాగ దమస్కు పట్టుమ్దు తియెల్ సిల్లెండ యేసుప్రబు వందిజ్ బోదిస్తాన్ ఇజి బరబ్బు అపొస్తురు వెట వెహ్తాన్.

28 అయావలె అపొస్తురు సవులుజ్ కూడుప్పెజ్ వాండ్రు వరివెట కూడిత మహాన్. వరివెట కూడితాండ్రె యెరూసలేమ్దు విజి బాడ్డిదు సాన్ని తియెల్ సిల్లెండ యేసుప్రబు వందిజ్ బోదిస్తెజ్ మొదొల్తాన్.

29 గ్రీకు బాస వర్గిని యూదురు వెట వర్గితాండ్రె తర్కిస్తాన్. అందెజి వారు సవులుజ్ నప్పెజ్ సుడెతాన్.

30 యాక తెలితారె సిసూర్ వన్నిజ్ డిగు మన్ని కయనరియాదు ఒతారె తార్పు పట్టుం పోక్తార్.

31 అయ కాలమ్దు యూదయ, గలిలయ, సమరియ దేసమ్కాజ్ మహి దేవుణు సజం తియెల్ సిల్లెండ సమదానమ్దాన్ మహాన్. సజం దేవుణుదిజ్ లోజెజి దేవుణు అత్తు సాయమ్దాన్ సత్తు ఆజి వాతె. నమ్మితికార్ నండొండారె ఆజి వాతార్.

పేతురు లుదదు యోపాదు బమ్మితి పణిజ్ కిత్రాన్

32 అయావలె పేతురు నాహ్కునాహ్కు, పట్టుమ్కుపట్టుమ్కు సాన్ని లుద ఇని నాబొ దేవుణుదిజ్ కేట ఆతి వరిజ్ సుడిః సాహాన్.

33 బానె ఒరెన్ అయనెయ ఇనికాన్ ఎనిమిది పంటెజాణ్ అసి నిజ్దిజ్ అట్ఇ వన్నిజ్ సుడెతాన్. వాండ్రు కిక్కు కాల్పు అర్తికాన్.

34 పేతురు వన్నిజ్ సుడెజి, "అయనెయ, యేసుక్రీస్తు నిజి నెగండ కిజినాన్. నిజెజి, నీ మంసం నీనె పెర్తి ఉండ్రె పడెకాద్ ఇడెఅ" ఇహాన్.

35 వెటనె అయనెయ నిజెత్తాన్. లుదా నాబొదు, సారోసు దేసమ్దు మహికార్ విజేరె, వన్నిజ్ జర్గితిక సుడెతారె యేసుప్రబుజ్ నమ్మితార్.

36 అయావలె యోప ఇని పట్టుమ్దు తబిత ఇని ఉండ్రె అయిల్ కొణెః మహాద్. అదిబా యేసుప్రబు సిసూ. గ్రీకు బాసాదు దన్నిపేరు దొర్క్. దొర్క్ ఇహిజి డుపి ఇజి అర్దం. అది ఎనెజ్బా నెగ్గి పణి కిజి మహాద్. సిల్లి వరిజ్ సాయం కిజి మహాద్.

37 గాని అది అయావలె ఉండ్రె కస్టం అస్తాదె సాతాద్. వారు పీసుగుదిజ్ ఏరు వడిఃస్తారె మేడః ముస్కు మన్ని గదిదు తెర్వితార్.

38 లుద పట్టుం యోప పట్టుం డగ్రు మహాద్. పేతురు అబ్బె మనాన్ ఇజి యోపాదు మన్ని సిసూర్ వెహారె రివెర్ మణిసిరిజ్ పోక్కి, "దయ కిజి వెటనె రఅ", ఇజి కబ్బు పోక్తార్.

* 9:24 9:24 సేప్టా. దమస్కు పట్టుం సురుల పెరి గోడ్డె తొస్తా మహాద్. గోడాదు పట్టుం వెల్లి సాని సేప్టాజ్ మహి. బానె పట్టుం కావ్ కినికార్ కావ్ కిజి మహాద్

39 పేతురు నిజీతండ్రి వరివెటబ యోపాదు సోహాన్. వారు వన్నిజ్ మేడఃగది లోఱ ఒత్తార్. అబ్బె ముండ మణిసిక్ అడఃబాజి, దొర్ల వరివెటబ మహివలె గుత్తిన్ సొక్కజ్ పాతెజ్ తోరిసి వన్ని సురుల నిహ.

40 పేతురు విజిరిజ్ వెల్లి పోక్తాండ్రి ముణుకుజ్ ఊరజి పార్లనం కిత్తాన్. పీనుగుదిజ్ సుడఃజి, “తబిత, నిజ్అ” ఇహాన్. అయావలె అది బేస్తాది పేతురుజ్ సుడఃజి నిజీత బస్తాద్.

41 పేతురు దన్నిజ్ కిక్కాజ్ అస్తాండ్రి నిక్తాన్. నమ్మితి వరిజ్, ముండ మణిసికాజ్ కూక్సి అది బత్తిత్తాద్ ఇజి వరిజ్ ఒపజెప్తాన్.

42 యాక యోపాదు మనికార్ విజిరె నెస్తారె నండొండార్ యేసుప్రబు మున్సు నమకం ఇట్టార్.

43 పేతురు యోపాదు సీమోసు ఇని ఒరెన్ తోల్కు పొర్ని వన్నిబాన్ యోప పట్టుమదు నండొ దినమకు బత్తిత్తాన్.

10

పేతురు కొర్నేలియెజ్ సువార్ల వెప్పినాన్

1 అయావలె కయ్సరియ ఇని పట్టుమదు, ఉద్దం కినివరి లోఱ కొర్నేలి ఇని ఒరెన్ నదాతిపతి* మహాన్. వాండ్రు, వన్ని అడ్డి మహి ఉద్దం కినికార్ ఇటలి దేసెమ్దాన్ వాతి మహి గుంపుదికార్ ఇజి కూకె ఆతమహార్.

2 కొర్నేలి, వన్ని ఇండ్రెణికార్, బక్తి మనికార్. వారు దేవుణుదిజ్ తియెల్ అతికార్. వాండ్రు సిల్లి వరిజ్ వన్నిజ్ మనిక సెడ్డినె సీజి మహాన్. దేవుణుదిజ్ ఎస్తివలెబా పార్లనం కినికార్.

3 ఒర్నొండు మదెనం రమరమి మూండ్రి గంటజి, దేవుణు బాణిజ్ వాతి ఒరెన్ దూత వన్నిబాన్ నిహండ్రి, “కొర్నేలి”, ఇజి కూక్తాన్. కూక్తిజ్ యా దూతెజ్ టటాజ్ సుడఃతాన్.

4 కొర్నేలి గొప్ప తియెల్ ఆతండ్రి, “ప్రబు, ఇనిక?” ఇహాన్. దూత వెప్తాన్, “సీను దేవుణుదిజ్ కిత్తి పార్లనమకు, సిల్లి వరిజ్ సీని దానం విజి దేవుణు సుడఃతండ్రి నీ వందిజ్ ఒడిబిజినాన్.

5 ఏలు యోప ఇని పట్టుమదు లోకాజ్ పోక్సి పేతురు ఇజి కూకె ఆని సీమోసు ఇని వన్నిజ్ కూక్సిన్అ.

6 వాండ్రు నమదరం డర్గు మన్ని సీమోసు ఇని తోల్కు తయార్ కినికాన్ ఒరెన్ వన్ని ఇండ్రె బత్తిజినాన్”.

7 యాక వెప్పి దూత సోహిజ్, కొర్నేలి వన్ని పణి మణిసిర్ రివిరిజ్ కూకెప్పిస్తాన్. ఎస్తివలెబా వన్నివెటబ కూడఃజి మంజిని బక్తి మన్ని ఒరెన్ ఉద్దం కిని వన్నిజ్బా కూకెప్పిస్తాన్.

8 జగ్గితిక విజి వరివెటబ వెప్తాండ్రి వరిజ్ యోప పట్టుమదు పోక్తాన్.

పేతురు సుడఃతి దర్లనం

9 మర్గునాండిజ్ వారు సొన్ని యోప పట్టుం డర్గు ఆత్తార్. అయావలె మదెనం ఆత్తాద్. పేతురు పార్లనం కిదెజ్ మేడః† మున్సు ఎక్తాన్.

10 పేతురు గొప్ప బజి కట్టిజ్ ఇనికబా ఉండెజ్ కోరిత్తాన్. బోజనం తయారాజి మహిజ్ వాండ్రు ఉండ్రి దర్లనం సుడఃతాన్.

11 అక్క ఇనిక ఇహిజి ఆగానం రే ఆజి నాల్లి నెంగుజి అసిమహి పెరి దుపాటి ననిక ఉండ్రి బూమిదు డిపె ఆతిలెకెండ్ సుడఃతాన్.

12 దన్ని లోఱ బూమి మున్సు మన్ని నాల్లి కాల్కు మన్ని విజి రకం జంతుజ్, బూమి మున్సు ఊజి బూలానికెజ్, ఆగనమ్ మున్సు, ఎగ్రిని పోటిజ్ మహా.

13 అయావలె, “పేతురు, నిజ్అ, నప్పి తిన్అ”, ఇజి, ఉండ్రి మాట పేతురు వెహాన్.

14 దన్నిజ్ పేతురు, “సిల్లి ప్రబువా, తిండ్రెజ్ ఆఇకెజ్ ఎసెజ్బా నాను తిన్ఎ”, ఇజి వెప్తాన్‡.

15 వెప్తాజ్, మాట మరి వాతాద్, “దేవుణు నెగ్గిక ఇజి ఇడ్డికెజ్ నీను సెవిద్ ఇజి ఎర్రిన్సు”.

16 ఈహు మూండ్రి సుట్టు జర్గితాద్. వెటనె ఆ దుపాటిన్నిక ఆగానమదు మరజి పెరె ఆత్తాద్.

17 దర్లనమదు సుడఃతి దన్ని అర్దం ఇనికాదొ ఇజి పేతురు గొప్పజి ఒడిబిజి మహాన్. అయావలె కొర్నేలి పోక్తి లోతుర్ సీమోసు ఇల్లు ఎమేణిక ఇజి వెన్బాజి నెస్తారె వన్ని ఇల్లు ముందాల వాత్తార్.

* 10:1 10:1 వంద మంది విదెం కినివరిజ్ నడిప్పి లోమ అతికార్. † 10:9 10:9 మేడ మున్సు బాన్ మహి ఇల్కాజ్ మున్సు మేడెజ్ మన్నె. ఎక్సి సొన్ని బస్తెజ్ ఆనాద్ ‡ 10:14 10:14 యూదురుజ్ తిండ్రెజ్ ఆఇకెజ్ నెంగం మన్నె, అక్కెజ్ తిన్ఎర్

18 “పేతురు ఇజి కూకె ఆని సీమోను ఇబ్బె మనాండ్రా, సిల్వెండ్రా”, ఇజి పేరు అస్తారె డేడిసిస్తార్.

19 పేతురు దర్లనమ్దు నుడేతి దన్ని పందిజ్ ఒడిబిజి మహివలెన దేవుణు అత్తు వన్నివెట వెహ్సాన్, “సీమోను, మువర్ లోకుర్ నిజి రెబాజినార్.

20 నీను నిజ్జిజి అడ్డి డిగ్జి సాన్అ. అనుమానం ఆవండ వరివెట సాన్అ. ఎందనిజ్ ఇహిజ నానె వరిజ్ పోక్త”.

21 పేతురు డిగ్జి సాహండ్రె, “మీరు నజినె రెబాజనిదెర్. ఎందనిజ్ వాతిదెర్?”, ఇహ్సాన్.

22 దన్నిజ్ వారు, “నదాతిపతి అతి కొర్నెలి మజి పోక్తాన్. వాండ్రు సీతి నిజాయతి మన్నికాన్. దేవుణుదిజ్ తియెలాజి మన్నికాన్. వాండ్రు గొప్ప నెగ్గికాన్ ఇజి యూదురు విజెర్ వెహ్సాన్. ఒరెన్ దేవుణు దూత వన్నిజ్ తోర్ ఆతండ్రె, “పేతురుజ్ నీ ఇండ్రె కూక్సి తని వన్ని మాటిజ్ వెన్అ” ఇహ్సాన్”, ఇజి వెహ్సార్.

23 అయావలె పేతురు వరిజ్ ఇండ్రె తతాండ్రె, “నేండ్రు మా బాన్ మండ్రు”, ఇహ్సాన్.

పేతురు కొర్నెలి ఇండ్రె సాన్నినాన్.

మహ్న నాండిజ్ పేతురు నిజితండ్రె వరివెట పయనం ఆతాన్. యోసాదికార్ నెగ్గెండార్ యేసుప్రబుజ్ నమ్మితికార్ వరివెట సాహర్.

24 ఉండ్రె రోజు పయనం ఆతారె మహ్న నాండిజ్ వారు కయెనరియాదు అందితారె. కొర్నెలి వన్ని కుటుమ్ది వరిజ్ వన్ని డగ్గుహి కూడేజి ఇండ్రె కూడుస్తాండ్రె పేతురు వందిజ్ కాన్ కిజి మహ్సాన్.

25 పేతురు ఇండ్రె వాతిజ్ కొర్నెలి సాహండ్రె వన్ని పాదమ్కాజ్ అర్థాండ్రె వన్నిజ్ మాడిస్తాన్.

26 గాని పేతురు వన్నిజ్ నిక్తాండ్రె, “నిజ్అ, నానుబా నీ నన్ని లోకునె” ఇహ్సాన్.

27 కొర్నెలి వెట వరిజి పేతురు లోఇ సాహిజ్ మంద లోకుర్ బాన్ కూడేజిమహిజ్ నుడేతాన్.

28 పేతురు వరి వెట వెహ్సాన్. “మా యూదురి రూలు వజి ఇహిజ యూదురు ఆఇ లోకుర్ వెట కూడేజి క ఆవద్. వరివెట మంజినిక ఆవద్. ఇక్క మీరు నెనినిదెర్గదె. గాని లోకాజ్ ఎయెరిజ్బా తక్కుదికార్ ఇజి ఇండ్రెజ్ ఆవద్ ఇజి దేవుణు నజి తోర్ని మనాన్.

29 అందెజి నజి కూకెస్పిజ్ నాను అడ్డు వెహ్విండ వాత. నజి ఎందనిజ్ కూకెస్పిదెర్. ఏలు వెహ్అ”, ఇహ్సాన్.

30 అయావలె కొర్నెలి వెహ్సాన్, “నాల్లి దినమ్కు ముందాల యా గడియూదునె నాను మదెనం మూండ్రె గంటిజి ఇండ్రె పార్లనం కిజి మహ. వెటనె మెర్నిని నన్ని పాతెజ్ పొర్నాతి మన్ని ఒరెన్ నా ఎద్దు నిహ్సాన్.

31 “కొర్నెలి, దేవుణు నీ పార్లనమ్కు వెహ్సాన్. సిల్లి వరిజ్ నెడ్డినె సిత్తికెజ్ దేవుణు నుడేతాన్.

32 యోసాదు కబ్బు పోక్సి పేతురు ఇజి కూకె ఆని సీమోనుజ్ కూక్సిఅ. వాండ్రు సమ్దరం డగ్గు తోల్కు తయారె కినికాన్ ఒరెన్ సీమోను ఇని వన్ని ఇండ్రె బత్తిజినాన్.

33 అందెజి వెటనె నిజి కబ్బు పోక్త. నీను వాతికాదె నెగెద్. ఏలు మాపు విజివె దేవుణు డగ్గు వాతావ్. మా వెట వెహ్సాజ్ దేవుణు నిజి అడ్రె సిత్తి విజి మాటిజ్ వెండ్రెజ్ మాపు వాతావ్.

34 దన్నిజ్ పేతురు వెహ్సాన్, “దేవుణు విజిరిజ్ ఉండ్రె లెకెండ్ నుడేజినాన్, ఇజి ఏలు నాను నిజమ్నె నెన్నా.

35 ఎమేణి జాతి ఇహిజ్బా దేవుణుదిజ్ తియెలాజి, సీతి నిజాతిదాన్ నడితిజి దేవుణు వన్నిజ్ ఒప్పుకోణాన్.

36 యేసు క్రీస్తు విజిరిజ్ ప్రబు. దేవుణు వెట లోకాజ్ కూల తొహ్సెన్జెజ్ వాండ్రు యేనుజ్ పోక్తాన్. యేసువలెహ్సాన్ ఇస్తాయెలు లోకాజ్ నమదనం వాతాద్ ఇజి దేవుణు నువార్ల పోక్తాన్.

37 యోహాను దేవుణు మాటిజ్ బోదిని బాప్తిసం సిత్తి వెనుక గలీలయాదాన్ మొదొల్ని యూదయ దేనమ్దు విజి ఇనిక జర్జితాద్ ఇజి మీరు నెనినిదెర్.

38 యాక ఇనిక ఇహిజ, దేవుణు, నజెరెతు వాండ్రు అతి యేనుజ్ దేవుణు అత్తు నత్తు సీజి ఏర్పాటు కిత్తాన్. వాండ్రు సాన్ని నెగ్గి పణిజ్ కితాండ్రె నయ్సాన్ లోకురిజ్ కిజిని బాదెజాణిజ్ డిబిస్తాన్. దేవుణు వన్నివెట మహిజానె వాండ్రు అక్కెజ్ విజి కిదెజ్ అట్టాన్.

39 వాండ్రు యూదురి దేనమ్దుని, యెరూసలేమ్దుని, కిత్తి విజి వనకాజ్ మాపు సాసిర్. యూదురు వన్నిజ్ నీలువారు డెయ్సారె నస్తార్.

40 గాని మూండ్రి రోమ్నాజ్ దేవుణు వన్నిజ్ సాతి వరిబాణిజ్ నిక్తాండ్రై మజి తోరిస్తాన్.

41 విజేరి లోకాజ్ వాండ్రు తోరి అవితాన్. దేవుణు ముజాలె ఏర్పాటు కిత్తి సాసిర్, ఇహిజు, మజినె వాండ్రు తోరి అతాన్. సాతి వరిబాణిజ్ నిజితి వెన్యా మాపె వన్నివెటె తింజి ఉణిజి మహావ్.

42 సాతి వరిజ్, బత్కిజిని వరిజ్ తీర్పు సిదెజ్ దేవుణు యేసుజె ఏర్పాటు కిత్తాన్ ఇజి సాసి వెప్పి సువార్త సాటిస్తెజ్ యేసుప్రబు మజి అడ్డ సిత్తాన్.

43 ప్రవక్తరు విజేరి వన్ని వందిజ్ ఇని సాసి వెహ్టార్ ఇహిజు, వన్ని ముస్సు, నమకం ఇడ్చి విజిరి పాపం దేవుణు వన్ని వందిజ్ సెమిస్తాన్లై ఇజి.

యూదురు ఆఇ వరిజ్ దేవుణు అత్తు సత్తు, దోహ్కసినాద్.

44 పేతురు యా మాటెజ్ వెప్పి మహిజ్నె, వన్నిమాటెజ్ వెంజి మహివరి ముస్సు దేవుణు అత్తు వాతాద్.

45 పేతురు వెటె వాతి మహి నమ్మిత్తికారి యూదురు, యాక సుడెఃతారె బమ్మ అతార. “యూదురు ఆఇ వరిజ్బా దేవుణు అత్తు సత్తు ఇని ఇనాయం దేవుణు సీజినాన్”, ఇజి బమ్మ అతార.

46 ఎందనిజ్ ఇహిజు దేవుణు అత్తు సత్తు వరి ముస్సు, వాతిజ్ వారు ఆఇ బాసెజ్ వర్గిజి దేవుణు ఎసానో పెరికాన్ ఇజి స్తుతి కినిక వీరు వెహర్.

అయావలె పేతురు వెహ్టాన్,

47 “మజి దేవుణు అత్తు దోహ్కెక్కి లెకెండ్ విరిజ్బా దోహ్కాద్. ఏలు వీరు ఏరుదు బాప్తిసం లాగి ఆదెజ్ ఇహిజు ఎయెర్బా అడ్డు కిదెజ్ అట్టారా?”.

48 అందెజె యేసుక్రీస్తు పేరు అని ఏరుదు బాప్తిసం లాగి ఆదెజ్ పేతురు వరిజ్ అడ్డ సిత్తాన్. వెనుక, సెగం రోస్సు మా వెటె మన్అ ఇజి వారు పేతురుజ్ వెహ్టార్.

11

పేతురు జర్గితికెజ్ వెప్పినాన్.

1 యూదురు ఆఇ లోకుర్బా దేవుణు - మాటెజ్ నమ్మిత్తార్ ఇజి యూదయ దేసమ్దు మన్ని నమ్మిత్తికారిని, అపొస్తరు వెహర్.

2-3 అందెజె పేతురు ఎక్కు యెరూసలేమ్దు సాహివలె బానె మహి సునతి కిబె అతి యూదురు, వన్నివెటె తర్కిస్తార్. “నీను సునతి కిఇ లోకుర్ వెటె కూడితి మహి, వరివెటె ఉణిజి మహి”, ఇజి వన్ని ముస్సు తర్కిస్తార్.

4 అయావలె పేతురు, జర్గితికెజ్ విజు మొదోహాన్ అని వరివెటె వెహ్టాన్.

5 “నాను యోప పట్టుమ్దు మహివలె ఒర్నెండ్ పార్దనం కిజి మహిజ్ ఉండ్రై దర్దనం సుడెఃత. ఇనిక సుడెఃత ఇహిజు, ఆగాసం రే ఆజి నాల్లి సెంగుజి అనిమహి పెరి దుపాటి ననిక ఉండ్రై బూమిదు డిఃవె అతిలెకెండ్ నా డగ్రు డిఃగిజి వాతాద్.

6 అక్క నెగ్గెండ్ సుడెఃతిజ్ దన్ని లోఇ నాల్లి కాల్యు మన్ని జంతుజ్, అడిఃవి జంతుజ్, బూమి ముస్సు, డిఃజి బూలానికెజ్, ఆగాసం ముస్సు ఎగ్రిని పొటిజ్ నజి తోరితె.

7 అయావలె, ‘పేతురు నిజ్అ. సప్పి తిన్అ’, ఇజి ఉండ్రై మాట వెహ.

8 దన్నిజ్ నాను, ‘సిల్లె ప్రబు, సెవద్ ఇజి ఇడ్చెకెజ్ ఇనికెజ్బా నాను ఎనెజ్బా తిన్అ’ ఇహ.

9 ఆగాసమ్దాన్ మాట మరి వాతాద్, ‘దేవుణు నెగ్గిక ఇజి వెహ్టాకెజ్ నీను ఏరిస్సు’.

10 ఈహూ మూండ్రి సుట్టు, వాతాద్. ఆక్కరదిజ్ అక్కెజ్ విజు ఆగసమ్దు మర్జి పెరి ఆతె.

11 యాక జర్గితి వెటెన కయ్యరియదాన్ కొర్నెలి పోక్తి ముఎర్ లోకుర్ నజి రెబాజి నాను మహి ఇల్లు డగ్రు వాతాద్.

12 అయావలె దేవుణు అత్తు, ‘నీను ఇని అనుమానం సిల్లెండ్ వరివెటె సాన్అ’ ఇహాన్. వీరు ఆరుగురు నమ్మిత్తికారిబా నావెటె వాతార. వాతారె మాపు కొర్నెలి ఇండ్రై సాహావ్.

13-14 కొర్నేలి ఇంట్లో సాహిజ్, దేవుణు దూత వచ్చివెట వెహ్నికెజ్ విజు వెహ్సన్. 'నీను యోపాదు లోకాజ్ పోక్కి పేతురు ఇజ కూకె ఆని సీమోనుజ్ కూక్కిన్. వాండ్లు వానాండ్రె నీను, నీ కుటుమ్దికార్ విజేరె పాపం కిత్తి దచ్చి సిక్కుదాన్ ఎలాగ గెలిస్తాజ్ అనాద్ ఇజి వెహ్సనాన్' ఇజి వెహ్నికెజ్ విజు కొర్నేలి మజి వెహ్సన్.

15 నాను వరివెట వర్దిదెజ్ మొదొల్స్తాజ్, మా మున్ను దేవుణు అత్మ తొలిత ఎలాగ వాతాదొ అయావజునె వరి మున్నుబా వాతాద్.

16 అయావలె నజి ప్రబు మాటెజ్ గుర్తు వాతాద్. ఇనిక ఇహిజు, 'యోహాను ఏరుదాన్ బాప్తిసం సిత్తాన్. గాని మీరు దేవుణు అత్మదాన్ బాప్తిసం లాగె ఆనిదెరె' ఇజి.

17 అహిజు మాపు ప్రబు ఆతి యేసుక్రీస్తు మున్ను నమకం ఇట్టి వలె దేవుణు మజి సిత్తి ఇనాయమ్నెనె వరిజ్బా సిత్తాన్. దేవుణుదిజ్ అడ్డు కిదెజ్ నాను ఎపటిదికానా?''.

18 యాక వెహారె వారు మరి ఇని అడ్డుబా వెహ్వితార్. "నీజుమనె, యూదురు ఆఇ వరిజ్బా వరి పాపమ్కు డిసిసిజి దేవుణుదిజ్ లోజిజి ఎలాకాలం బత్కిదెజ్ దేవుణు సరి సీజినాన్", ఇజి వెహ్ని వారు దేవుణుదిజ్ స్తుతి కిత్తార్.

అంతియొకయాదు నమ్మితి వరిజ్ క్రీస్తు లోకు ఇజి పేరు వాతాద్.

19 సైపానుజ్ నప్పివెనుక యేసుప్రబు మున్ను, నమ్మితి వరిజ్ లాపు మాలెజ్ వాతిజ్ వారు సెద్రిత సాహార. సెద్రితికార్ సెగొండార్ పెనికె, కుప్ర, అంతియొకీయి ఇని దేసమ్దాక సాహారె యూదురిజ్ ఉండ్రెనె దేవుణు మాటెజ్ వెహ్సార్.

20 గాని వరి లోఇ సెగొండార్ కుప్రదికార్, కురేనియదికార్ మహార. వారు సొన్ని అంతియొకయాదు మన్ని గ్రీకు బాస వర్గిని వరిజ్బా యేసు ప్రబు వందిజ్ సువార్త వెహ్సార్.

21 ప్రబు నత్తు వరివెట మహాద్. అందెజె మంద లోకు దేవుణు మాట నమ్మిత్తారె ప్రబు మున్ను, నమకం ఇట్టార్.

22 యెరూసలేమ్దు మన్ని సజుమ్దికార్ యాక వెహారె బర్నబెజ్ అంతియొకయాదు పోక్తార్.

23 బర్నబు వాతండ్రె దేవుణు దయ వరి మున్ను. వాతాద్ ఇజి సుడెతాండ్రె సర్ల ఆతాన్. దేవుణు మున్ను ఉండ్రె మన్నుదాన్ నమ్మిదు ఇజి వాండ్లు వరిజ్ దయరం వెహ్సన్.

24 బర్నబు దేవుణు అత్మ నత్తుదాన్, నమకమ్దాన్ నిండ్రెతికాన్, నెగ్గికాన్. వాండ్లు దేవుణు మాటెజ్ బోదిస్సిజ్ మంద లోకురె యేసుప్రబు మున్ను, నమకం ఇట్టార్.

25 వెనుక బర్నబు సవులుజ్ రెబాజి తార్పు వట్టుం సాహాన్.

26 సవులుజ్ రెబాజి దొహ్క్తిజ్ వచ్చిజ్ అంతియొకయాదు తతాన్. వారు రిఎరె ఉండ్రె ఏండు బానె మహి సజుమ్దికార్ వెట కూడితారె మంద లోకాజ్ దేవుణు మాటెజ్ బోదిస్తార్. అంతియొకయాదునె, నమ్మితి వరిజ్ క్రీస్తు లోకు ఇజి పేరు తొలిత ఇడెజ్ ఆత మహాద్.

27 యా కాలమ్దు ప్రవక్తరు సెగొండార్ యెరూసలేమ్దాన్ అంతియొకయదు వాతార్.

28 వరి లోఇ అగబు ఇనికాన్ ఒరెన్ దేవుణు అత్మదాన్ నిండ్రెతాండ్రె రోమరాజు ఏలుబడికి కిని దేసమ్కాజ్ విజు ఉండ్రె పెరి కరు వానాద్ వలె ఇజి వెహ్సన్. (క్లవుదియ ఇని రాజు ఏలుబడికి కిత్తి కాలమ్దు యా కరు వాతాద్)

29 అయావలె నమ్మితికారె విజేరె యూదయదు బత్కిని నమ్మిని వరిజ్ సాయం పోక్తెజ్ ఒడిజితార్. మాపు ఎసా సీనాపొ ససా సీనావ్ ఇజి వారు ఒడిజితార్.

30 వరి సాయమ్కు వారు బర్నబుని, సవులు వెట పెద్దెలుజుబాన్ పోక్తార్.

12

పేతురు జెలిదాన్ గెలిస్తాన్.

1 అయి కాలమ్దు హేరోదు రాజు సజుమ్ది వరిజ్ సెగొండారిజ్ మాలెజ్ కిదెజ్ మొదొల్స్తాన్.

2 యోహానుజ్ దాద్ ఆతి యాకోబుజ్ కుర్దాన్ సపిస్తాన్.

3 యీ సజతి యూదురిజ్ ఇస్సం అతాద్ ఇజి నెస్సాండ్రె హేరోదు రాజు పేతురుజ్ బా తోహ్ని ఇడేదెజ్ ఆడ్రె సెత్తాన్. యూదురి పులాజ్ అజ రొటెజ్ తిని వండోయ్ దినమ్ కాజ్ యాక జర్జిత్తాద్.

4 పేతురుజ్ అరెస్టు కితారె వన్నిజ్ జేలిదు ఇట్టారె. జెలిదు ఇట్టారె వన్నిజ్ కావ్ కిజి మండ్రెజ్ వదహారు మణిసిరె జమానుజు ఒవజెప్తాన్. ఉండ్రె సుటు నాలేరె మణిసిరె కాపు మంజినారె. వస్కు పండోయ్ వెన్కా లోకాజ్ నడిమి తసి పేతురుజ్ తీరపు తీరిస్సెజ్ హేరోదు రాజు ఒడితాన్.

5 ఆహా పేతురు జెలిదు మహాన్. గాని సజమదికారె వన్ని వందిజ్ గటిజు దేవుణుదిజ్ పార్దనం కిజి మహాన్.

6 మురసనాండిజ్ పేతురుజ్ తీరపు తీరిస్సెజ్ వెల్లి తన ఇజి హేరోదు రాజు ఒడిబిత మహాన్. అయి పొదోయ్ పేతురు రిఎరె జమానుజు నడిమి రుండి గోల్స్కాణిజ్ తోహా అజి నిద్ర కిజి మహాన్. రిఎరె జమానుజ్ వెల్లి కాపు మహాన్.

7 అయావలి వెటనె ఒరెన్ దేవుణు దూత తోరె అతాన్. ఆ గది లోఇ జాయ్ నన్ని వెల్లెరె వాతాద్. దూత పేతురుజ్ వడకాదు డెయ్ జి బేగి నిజిత అజి వెహ్ని నిక్తాన్. వన్ని కిక్కాణిజ్ గోల్స్కు ఊడెజి అర్తె.

8 దూత వన్నివెట, “సిను నడుముదు తోహా అజి జోడ్కు తోడిగె అ”, ఇహాన్. పేతురు అక్సెజ్ తోహ్నిజ్ దూత, “సి పాత పిడిగ్గి నా వెనుక రె అ”, ఇహాన్.

9 పేతురు దూత వెనుక సాహండ్రె జెలిదాన్ వెల్లి వాతాన్. గాని జర్జినిక నిజమె అవిదో ఇజి పేతురు నెన్వితాన్. యాక విజు దర్చనమదు సుడెజిస ఇజి ఒడిబితాన్.

10 వారు ముందాల కావ్ కిని వరిజ్ డాట్టి వెనుకాది వరిజ్ బా డాట్టి పట్టుం సాని ఇనుము గవుని డర్చు వాతారె. వాతిజ్ అదిని రే అతాద్. వారు సోసి వాజి ఉండ్రె వీది డాట్టిసాహి వెటనె దూత వన్నిజ్ డిసెన్ సాహాన్.

11 అయావలి, జర్జితికెజ్ విజు నిజమె ఇజి పేతురు తెలి అతాన్. దేవుణు వన్ని దూతెజ్ పోక్తాండ్రె నజి హేరోదు రాజు బాణిజ్ డిబిస్తాన్. యూదురు నజి ఇనిక కిదెజ్ ఒడిబితారె దన్ని లోఇహాన్ బా డిబిస్తాన్ ఇజి విలు నాను నిజం నెస్సా ఇజి ఒడిబితాన్.

12 యాక నెస్సాండ్రె పేతురు, మార్కు ఇజి కూకె ఆని యోహానుజ్ అయ్సి ఆతి మరియి ఇండ్రె సాహాన్. బాన్ మంద లోకురె కూడిత మహారె పార్దనం కిజి మహాన్.

13 పేతురు వెల్లి మహి సేప్లాదు కొత్తాన్. ఎయెన్ ఇజి వెండ్రెజ్ రోద ఇని పణి మణిసిబాన్ సాహాద్.

14 అది పేతురు కంటం గుర్తు అస్తాదె గొప్పు నర్త అతాద్. సేప్లా రేవిండ ఉహ్ క్వి సాహాదె, “పేతురు సేప్లా డర్చు నిహా మనాన్”, ఇజి మహి వరిజ్ వెహ్చాద్.

15 వారు, “నిజి వెరి మనాద్” ఇహాన్. గాని అది మరి మరి వెహ్చాజ్ వారు, “అహిజు వన్ని దూత వాతాద్” ఇహాన్.

16 గాని పేతురు సేప్లాదిజ్ కొత్తి మహాన్. వారు సాన్ని సేప్లా రేతిజ్ పేతురుజ్ సుడెతారె గొప్పు బమ్మ అతారె.

17 మీరు జమ్సన మండ్రు ఇజి పేతురు వరిజ్ కియి సయన్ కితాండ్రె, దేవుణు వన్నిజ్ ఎలాగ జెలి లోఇహాన్ వెల్లి తత్తాన్ ఇజి వరిజ్ విజు వెహ్చాన్. యాక యాకోబుజిని మహి సమ్మితి వరిజ్ వెహ్చు ఇహండ్రె మరి ఉండ్రె బాడ్డిదు సాహాన్.

18 పెందాహిజ్ జేలిదు మహి జమాణుణు గొప్పు గాబ్ర అతారె. పేతురు ఇనిక అతాండ్రె ఎంబె సాహండ్రె ఇజి వారు గొప్పు గాబ్ర అతారె.

19 పేతురుజ్ రెబాజి దోహ్ కెస్సిజ్ హేరోదు రాజు ఆడ్రె సెత్తాన్. గాని వారు ఎసా రెబాతిజ్ బా తోరెవితాన్. అందెజ్ హేరోదు రాజు కావ్ కిజి మహి జమాన్ జు మరి మరి యా సజతి వందిజ్ వెన్ బాజి పేతురు గెలస్త సాహాన్ కాక వరి ముస్కు తీరపు కితాండ్రె వరిజ్ నప్తెజ్ ఆడ్రె సెత్తాన్.

హేరోదు రాజు సాతాన్.

హేరోదు రాజు యూదయదాన్ కయ్ సరియూదు సాహండ్రె బాన్ సెగం కాలం బత్తితాన్.

20 హేరోదు రాజు తారు పట్టుమిది వరి ముస్కు, సీదోను పట్టుమిదివరి ముస్కు గొప్పు కోవం కల్లిజి మహాన్. అందెజ్ వారు ఉండ్రె ముస్కుదాన్ వాతారె రాజు ఇండ్రెజి అతికారె ఆతి ఒరెన్ బ్లాస్టు ఇని వన్నిజ్

వరి పడఁకాదు కూడుఁపూర్, రాజు వరి మున్ను నమదనం ఆదెజ్ ఇజి. ఎందనిజ్ ఇహిజ రాజు దేనమదానె వరిజ్ వంట దొహ్కొ మహాద్.

21 ఏర్పాటు కిత్తి రోజు, హేరోదు రాజు, రాజుర్ తోడఁగిని సొక్కెజ్ పొర్పాతాండ్రై రాజు కుర్చిదు బస్తాండ్రై వాతివరివెట మీటిజ్దు వర్తితాన్.

22 అక్క వెహార్ లోకుర్, వీండ్రు ఒరెన్ దేవుణు లెకెండ వెప్పొన్నాన్, లోకు లెకెండ ఆవిన ఇజి గగోల్ కిత్తార్.

23 రాజు యాక వెహిజ్ దేవుణుదిజ్ స్తుతి కిఎతాన్. వెటనె దేవుణు దూత వన్నిజ్ ఉండ్రై క్షం పుటిస్సిజ్ వాండ్రు పిడుకు ఆజి సొతాన్.

24 గాని దేవుణు సువార్త మరి మంద లోకు వెహార్కాక దేవుణు మున్ను నమకం ఇట్టార్.

25 బర్చబని సపులు యెరూసలేమ్దు సొన్ని వరి పణిజ్ వీస్తారె మార్కు ఇజి కూకె ఆని యొహానుజ్ కూడుఁపూర్ యెరూసలేమ్దాన్ మరజి వాతార్.

13

బర్చబెజ్ని సపులుజ్ సువార్త సొటిస్సిజ్ దేవుణు నజమదికార్ ఏర్పాటు కిత్తార్.

1 అంతియొకయాదు మహి నజమదు, సెగెండార్ ప్రవక్తరు, మరి సెగెండార్ దేవుణు మాటిజ్ బోదిసినికార్ మహార్. వారు ఎయెర్ ఇహిజ, బర్చబ, నిగెర్ ఇజి కూకె ఆని సిమెయోను, కురేనదికాన్ లాకీయ, హేరోదు అంతిపాన్*.

2 వీరు దేవుణుదిజ్ పార్లనం కిజి ఉపాన్ కిజి మహివలె దేవుణు అత్మ వెహ్సాన్, “బర్చబెజ్ని సపులుజ్ నాను కూకె పణి వందిజ్ మీరు ఏర్పాటు కిదు”.

3 వెహ్సాజ్, నజం ఉపాన్ మంజి పార్లనం కితారె వరి మున్ను కిక్కు ఇట్టారె, దేవుణు వెహ్సా పణి వందిజ్ పోక్తార్.

బర్చబని సపులు కుప్త ఇని ద్విప్పుదు సొహార్.

4 దేవుణు అత్మ పోక్తిజ్ బర్చబని సపులు డిఁగు నమదరం డగ్రు మన్ని నెలాకిన ఇని పట్టుం సొహారె ఓడఁదు ఎక్కారె కుప్త ఇని ద్విప్పుదు† సొహార్.

5 వారు నలామి ఇని పట్టుదు సొహారె బాన్ మహి యూదురి మీటిజ్ కిని ఇల్కాజ్ సొహారె దేవుణు మాటిజ్ సొటిసి మహార్. మార్కు ఇజి కూకె ఆని యొహాను వరివెట వరిజ్ తోడు లెకెండ మహాన్.

6 వారు అయ ద్విప్పు విజి పయనం కితారె పాపు ఇని పట్టుదు వాతార్. బానె వారు బర్యేను ఇజి కూకె ఆని ఒరెన్ యూద వన్నిజ్ సుడఁతార్. వాండ్రు ఒరెన్ సెట్టికాన్. వాండ్రు అబద్దం మాటిజ్ వెప్పొ ప్రవక్త. దేవుణు మాటిజ్ వెప్పొ ప్రవక్త ఇజి నాటినినాన్ గాని ఆవిన.

7 వాండ్రు రోమ గవర్నరు అతి సెర్లివపులు వెట మహికాన్. అయ రోమ గవర్నరు ఇహిజ వాండ్రు తెలివి మన్నికాన్. వాండ్రు దేవుణు మాటిజ్ వెనా ఇజి బర్చబెజ్ని సపులుజ్ కూకెపిస్తాన్.

8 గాని అయ సెట్టికాన్ వరిజ్ అడ్డు కిత్తాన్. (గ్రీకు బానదు వన్ని పేరు ఎలియ) రోమ గవర్నరు అతి సెర్లివపులు యేసుప్రబు మున్ను నమకం ఇడఁవిండాదెజ్ సుడఁతాన్, యూ గార్డి విది కినికాన్.

9-10 అయావలె సపులు (వన్నిజ్ పపులు ఇని పేరుబా మహాద్) దేవుణు అత్మదాన్ నిండ్రైతాండ్రై ఎలిమేజ్ తినాజ్ నుడఁజి వెహ్సాన్, “నీను సర్వూన్ పొటాదికాన్, నీతి నిజాయితి అతి విజి దన్నిజ్ పడఁఇకి. నీను పూర్తి సెఇజి, గొప్ప మొసెం కినికి. నీజమాతి దేవుణు మాటిజ్ నిజం ఆఇకెజ్ ఇజి తోరిసిని.

11 ఇదిలో, దేవుణు ఏరు నిజి తీర్పు సీజి సిక్కు సీజినాన్. నీను సెగం కాలం గుడ్డి ఆజి పొడ్డుదిజ్ సుడఁజెజ్ అట్వెండ ఆనిలె” వెటనె వాండ్రు గుడ్డి ఆతాన్. గోయ్ నన్ని గాండుదాన్ వన్ని కెకెకెజ్ సీకటి ఆతె. ఎయెర్బా కికాజ్ అని బెర్చయ్ కిబిన్నాం ఇజి అతాల్ ఇతాల్ బూలాజి మహాన్.

12 అయ రోమ గవర్నరు జర్గితక సుడఁతివలె యేసుప్రబు మున్ను నమకం ఇడ్డాన్. ఎందనిజ్ ఇహిజ యేసుప్రబు - వందిజ్ బోద వెంజి బమ్మ ఆతాన్.

* 13:1 13:1 హేరోదు అంతిపాన్. మార్కు సువార్తదు బాప్తీసం సీని యొహానుజ్ జెలిదు ఇడ్డి వెనుక వన్నిజ్ సప్తెజ్ అడ్డ సెత్తి హేరోదు రాజు వీండ్రై. (మార్కు 6:14-28) రాజు వెట కూడఁజి పిరితి మనయేను, సపులు ఇనికార్ † 13:4 13:4 ద్విప్పు. సురుల నమదరం మన్ని ఇజిరి దేసెం

పవులుని బర్లుబ పిసిదియ దేసమీదు మన్ని అంతియొకయాదు సువార్త వెప్పిసాన్

13 వెనుక పవులుని వన్నివెట మహికార్ ఓడః ఎక్కారె పాపుదాన్ వంపులియాదు మన్ని పెర్గ ఇని వట్టుం సాహార్. బానె యోహాను వరిజ్ డిఃస్తారె యెరూసలేమీదు మరణి సాహాన్.

14 వారు పెర్గు పట్టుమీదాన్ సోత్తారె పిసిదియ దేసమీదు మన్ని అంతియొకయాదు సాహార్. బానె వారు విస్త్రాంతి దినమీదు యూదురి మీటిజ్ ఇండ్రో సాహారి బస్తారె.

15 మోసె సెత్తి రూలుదాన్, ప్రవక్తరు రాస్తి మాటెజదాన్ సెగం సదవితి వెనుక మీటిజ్ ఇండ్రోణి అతికారిజు పవులుని బర్లుబ వెట. “దాదారండె, లోకాజ్ బోదిస్తెజ్ ఇని మాటెజబా మహిజ వెప్టు” ఇహార్.

16 అయావలె పవులు నిజితండ్రె విజెరె అలెజి మండ్రు ఇజి కియు సయన కిస్తాండ్రె వరివెట వెప్టాన్, “ఇస్త్రాయేలు లోకాండె, దేవుణుదిజ్ తియెల్ ఆని యూదురు ఆజ లోకాండె, నా మాట వెండ్రు.

17 మా ఇస్త్రాయేలు లోకు పార్లనం కిని దేవుణు, మా అనిగొగొరిజ్, వన్ని లోకుర్ ఇజి మండ్రెజ్ ఏర్పాటు కిస్తాన్. వారు అయగ్రుపు దేసమీదు ఆజదేసమీదివరిలెకెండె మహివలె వరిజ్ నండో లోకు ఎల్పిస్తాన్. వెనుక గొప్పసత్తుదాన్ వరిజ్ అబ్బెణాన్ గెల్పిసి తత్తాన్.

18 రహారమి నలవయ్ వంటిజ్ వారు బిడిమ్ బూమిదు సొస్సి మహివలె దేవుణు వరిజ్ ఒరిసి మహాన్.

19 కనాను దేసమీదు మహి ఏడు జాతిజాణి వరిజ్ విదెం కిజి గెల్పిస్తాండ్రె వరిజ్ పాడు కిజి వరి దేసం వన్ని లోకాజ్ అక్కు లెకెండె సిత్తాన్.

20 యాకెజ్ విజు నాల్లి వందెజ్ యబాయ్ వంటిజాణి జర్గితె.

వెనుక సముయేలు ఇని ప్రవక్త వాతి కాలమీదాక వరిజ్ ఏలుబడిః కిదెజ్ తీర్పు తీరిస్సి నెయ్కు లోకాజ్ దేవుణు ఏర్పాటు కిస్తాన్.

21 దస్సి వెనుక ఇస్త్రాయేలు లోకుర్ ‘మజి ఉండ్రె రాజుజ్ ఏర్పాటు కిత’ ఇజి వెప్టాజ్ దేవుణు వరిజ్ బెన్యమిను కుటుమీదికాన్ కిను మరిసి ఆతి సవులుజ్ నలవయ్ వంటిజ్ ఏలుబడిః కిదెజ్ ఏర్పాటు కిస్తాన్.

22 వెనుక సవులుజ్ లాగితాండ్రె దావీదుజ్ రాజువజి దేవుణు ఏర్పాటు కిస్తాన్. దావీదు వందిజ్ దేవుణు ఇని సాసి వెప్టాన్ ఇహిజ, ‘యెసెయి మరిసి ఆతి దావీదు ఇహిజ నాను ఒడిఃబిని లెకెండె ఒడిఃబిజినాన్. నాను ఇస్టం ఆనికెజ్ వాండ్రు ఇస్టం ఆజినాన్. వాండ్రు ఇనిక కిదెజ్ ఇజి నాను కోరిజినాన్ అక్కుజ్ వాండ్రు కినాన్’.

23 యా దావీదు పొటిజాణిజె మా అనిగొగొరి వెట దేవుణు ఒట్టుకిత్తి లెకెండె ఇస్త్రాయేలు లోకాజ్ తప్పిస్సికాన్ ఆతి యేసుజ్ పుటిస్తాన్.

24 యేసు వాని ముందాల యోహాను ఇస్త్రాయేలు లోకాజ్ బోదిస్తాన్. ఇనిక ఇహిజ ‘విజెరె పావమకు బప్పుకోడెఃజి డిఃసిసిజి బాప్తీసం లాగె ఆదెజ్’ ఇజి.

25 యోహాను వన్ని వణి వీస్సివలె లోకాజ్ వెప్టాన్, ‘నాను ఎయెన్ ఇజి మీరు ఒడిఃబిజినిదెర్? మీరు ఒడిఃబిజినికాన్ ఆవన్ నాను. మీరు ఎర్దు సుడెఃజి మహికాన్ వెన్కా వాజినాన్. వన్ని జోడ్కుబెట్టు కూతెజబా నాను ఏవటిదిక అవ’.

26 తంబెరిజాండె, అబ్రాహం కుటుమీదికెదిరా, దేవుణుదిజ్ తియెల్ ఆనికెదిరా, దేవుణు లోకాజ్ ఎలాగ గెల్పిస్తానె ఇజి కబ్బు దేవుణు మజి విజెరిజె పోక్తాన్.

27 ఎండనిజ్ ఇహిజ యెరూసలేమీదు మహికార్, వరి అతికారి లోకుర్, యేసు, దేవుణు పోక్తాన్ ఇజి గుర్తు ఆన్వితార్. విజు విస్త్రాంతి దినమీదు వారు ప్రవక్తరు రాస్తి మాటెజ్ సదవితార్ గాని అర్లం కివితార్. గాని ప్రవక్తరు ముందాల్పి వెప్టా అయ మాటెజ్ వజి జర్పిస్తారె. ఎలాగ ఇహిజ యేసుజ్ సప్తెజ్ వారు తీర్పు కిత్తారె.

28 యేసుజ్ తీర్పు కిని వన్నిడగ్రు తసి సావుదిజ్ తగితి తప్పు ఇనికబా కివితాన్ ఇజి సుడెఃతిజ్బా గాని విన్నిజ్ సిలువ డెయెజి సప్పు ఇజి వారు ఏలాతుజ్ బతిమాలితార్.

29 యేసుజ్ యూదురు ఇనికెజ్ ఇనికెజ్ కినారె ఇజి ప్రవక్తరు రాస్తి మహికెజ్ విజు వారు కిత్తి వెనుక వన్ని సిసూర్ వన్ని పీనుగుదిజ్ సిలువదాన్ డిప్టారె నట్టుపణుకుదు దొలిస్సి సాలమ్ లొఇ ఇడ్డారె.

30 గాని దేవుణు యేసుజ్ సాతి వరిబాణిజ్ నిక్తాన్.

31 గలీలయదాన్ యెరూసలేముడు వన్నివెట సొన్ని మహి వరిజ్ యేసు నండో రోస్సు తోర ఆతాన్. వారు ఏలు మాటు ఇస్తాయేలు లోకాజ్ నడిమి యేసుజ్ సాసిర్.

32-33 ఏలు మాపు మిజి సువార్త వెప్పినావ్. అయ సువార్త ఇనిక ఇహిజ దేవుణు యేసుజ్ సాతి వరిబాణిజ్ నిక్తాన్. యాక మా అనిగోగోర్ వెట దేవుణు కిత్తి ఒట్టు. వరిజ్ కిత్తి ఒట్టు వరి పొటణాణికార్ ఆతి మా వందిజ్ ఏలు జర్జితాద్. “నీను నా మరిన్, నేండ్రు నాను నీ బుబ్బు ఆత మన్న”, ఇజి కిర్తన రుండిదు రాస్తి మనిక దిన్నివందిజ్.

34 దేవుణు వన్నిజ్ సాతి వరిబాణిజ్ నిక్తాన్. వన్ని పీనుగు సబ్విద్ ఇజి వన్నివందిజ్ దేవుణు మాటాదు ఈహు రాస్త మనాద్. “దావీదుజ్ సీనా ఇజి ఒట్టు కిత్తి నెగ్గి దీవెనమకు నాను మిజి తవ్విండ సీనా”.

35 కిర్తన పుక్తకముడు మరి రాస్త మనాద్. అక్క ఇనిక ఇహిజ “నీను పొక్తివన్ని పీనుగు సబ్బజ్ సొండ్రెజ్ నీను సరి సిజ”.

36 అహిజ దావీదురాజు దేవుణు ఏర్పాటు కిత్తి వజ వన్ని తరమది వరిజ్ నేవ కిజి వీస్తాండ్రె సాత సొహాన్. వన్ని అనిగోగోరిబాన్ వన్నిజ్బా ముస్తార్. వన్ని పీనుగు సబిత సొహాద్.

37 గాని సాతి వరిబాణిజ్ దేవుణు నిక్తి యా యేసు పీనుగు సబ్బజ్ సొన్వితాద్.

38 అందెజ్ తందెరిజాండె, మిజి వెప్పిని సువార్త యాకాదె. పాపమకు సెవిస్తెజ్ యేసు అట్నాన్. యాక మీరు నెగ్గండ నెస్తెజ్ ఇజి నాను ఆన ఆజిన.

39 మోసా సిత్తి రూలుజ్ ఒరెన్ వన్నిజ్ వన్ని పాపమకాణ్ డిజిబిస్తెజ్ అట్జ్. గాని యేసు ముస్సు, నమకుం ఇడ్డి వరిజ్ వరి పాపమకాణ్ యేసు పూర్తి డిజిబిస్తాన్.

40 ప్రవక్తరు వెప్తివజ మిజి రెవిండ సుడోదు. వారు ఇనిక వెప్టార్ ఇహిజ.

41 “సుడోదు, వెక్తిసినికిదెరా, మీరు బమ్మ నిదెరెలె గాని పాడాజి సొనిదెరె. ఎండనిజ్ ఇహిజ మీ కాలముడు నాను ఉండ్రె బమ్మాని పణి కిన. గాని అయ పణి వందిజ్ ఎయెరెబా వెప్టిజ్బా మీరు నమ్మడెర్”.

42 వపులుని బర్బుబ యూదురి మీటిజ్ ఇండ్రెణిజ్ సొత్తిజ్, “వాని విస్తాంతి దినముడు వాజి యా మాటెజ్ మజి మరి వెప్పి సిదాట్”, ఇజి బాని కూడితి మహికార్ వరిజ్ బతిమాల్తార్.

43 మీటిజ్ ఆతి వెనుక నండెండార్ యూదురు, నండెండార్ యూద మతముడు కూడితి యూదురు ఆఇ బక్తి వన్నికార్ పపులుని బర్బుబ వెట సొహార్. పపులు, బర్బుబ వరివెట వర్జితార్. దేవుణు మిజి తోరిస్సి దయాదర్మముదిజ్ డిజిన్విండ ఎలాకాలం నడిమి ఇజి పపులుని బర్బుబ వరిజ్ ఉసార్ కిడిస్తార్.

44 మరి వాతి విస్తాంతి దినముడు పట్టుముదికార్ విజెరె సొహి లెకెండె ముంద లోకుర్ దేవుణు మాట వెండ్రెజ్ ఇజి యూదురు మీటిజ్ కిని ఇండ్రె కూడిజి వాతార్.

45 పపులు వెప్పి మాటెజ్ వెండ్రెజ్ ముంద లోకుర్ కూడిజినార్ ఇజి సుడోతారె యూదురు గోన ఆతార్. వారు పపులు వెప్తి మాటెజ్ మరెజి వెప్టారె వన్నిజ్ దూసలాడితార్.

46 అయావలె పపులు, బర్బుబ తియెల్ అవిండ వెప్టార్, “దేవుణు మాట ముందాల మిజి వెప్టిజ్వలె. అందెజ్ మాపు ముందాల మిజి వెప్టిజ్. గాని మీరు, ఎలాకాలం బత్కిని బత్తు దోహొక్కికావ్ అవ్ ఇజి మిజి మీరె నెక్కి పొక్తిదెరె తీర్పు కిజనిదెరె కక మాపు మిజి డిజిసి యూదురు ఆఇ లోకుర్ బాన్ సొన్నినావ్.

47 దేవుణు మజి సిత్తి ఆత్ర ఇనిక ఇహిజ, ‘యూదురు ఆఇ వరిజ్ ఉండ్రె జాయ్ వజి మిజి ఇట్టా మన్న. ఎండనిజ్ ఇహిజ యా లోకముడు మన్ని విజు లోకాజ్, వరి పాపమకాణ్ వాని సిక్కుదాన్ గెలిపిస్తెజ్’ ఇజి వెప్టి మనాన్.

48 యూదురు ఆఇ లోకుర్ విజెరె యా మాటెజ్ వహారె సర్త ఆతార్. దేవుణు మాటెజ్ ఎస్సాన్ నెగ్గెకెజ్ ఇజి వారు వెప్టార్. ఎలాకాలం బత్కిని బత్తుదిజ్ ఏర్పాటు ఆతికార్ విజెరె దేవుణు మాటెజ్ సమ్మితార్.

49 దేవుణు మాట అయ దేనముడు విజు సాటి ఆతాద్.

50 గాని యూదురు ఆ పట్టుముడు బక్తి వన్ని పల్లుబుడి మనికెజ్ ఆతి అయెలి కొడెక వెట, పెరికార్ ఆతి మొగవరి వెట వర్జిజ్ కోపం రేప్టారె పపులు ముస్సు, బర్బుబ ముస్సు. మాలెజ్ కితారె వరిజ్ అయా పట్టుముదాన్ నెక్తి పొక్టార్.

51 అందెజ పవులుని బర్లుబ, వరి కాల్యాణి దూల్లి అయ పట్టుమిది వరి ఎర్లు దుల్ప్సార్. ఎందనిజ్ ఇహిజ వారు దేవుణు మాట నెక్కిపోక్కిజ్ వరిజ్ వాని సిక్స వారె తప్పిస్తార్ ఇజ సాసి లెకెండ్ మండ్రెజ్ ఇజ. వెనుక వారు ఇకోనియ ఇని పట్టుమదు సాహార్.

52 అంతియోకయాదు మన్ని సిసూర్ ఎసానొ సర్ల ఆతూర్. దేవుణు ఆత్మ వరి ముస్సు పూర్తి వాతూద్.

14

పవులు, బర్లుబ ఇకొనియాదు సువార్ల వెప్పిసార్

1 పవులుని బర్లుబ కూడఃజి ఇకొనియాదు సాహారె అంతియోకయాదు కిత్తిలెకెండ్ యూదురు మీటిజ్ కిని ఇండ్రి సాహార్. వారు నెగ్రెండ్ బోద వెప్సాజ్ నంణెండార్ యూదురు, నంణెండార్ యూదురు ఆఇకారబా నమ్మితూర్.

2 గాని నమ్మిఇకార యూదురు, యూదురు ఆఇ వరిజ్ రేప్సారె అపొస్టురుజ ముస్సు కోపం పుట్టిస్తార్.

3 గాని పవులు, బర్లుబ నంణెం రోస్సు బానె మహార్. యేసువందిజ్ దయరమ్దాన్ వర్గితూర్. వారు ప్రబు దయాదరమ్ వందిజ్ వెప్సా మాటిజ్ నిజం ఇజ ప్రబు విజెరిజ్ తోరిస్తూన్. ఎలాగ ఇహిజ బమ్మాతి పణిజ్ బమ్మాతి గుర్తుజ్ కిడెజ్ పవులుజ్ బర్లుబెజ్ సత్తు సిత్తూన్.

4 అయ పట్టుమదు మహి లోకుర్ రుండి గుంపుజ్ ఆతూర్. నెగెండార్ యూదురు పడఃకాద్, మరి నెగెండార్ అపొస్టురి పడఃకాద్.

5 అయావలె నెగెండార్ యూదురు ఆఇకార, మరి నెగెండార్ యూదురు, యూదురి అతికారిజు వెట కూడఃజి అపొస్టురుజ్ అసి వరిజ్ సిగు కిజి పణుకుజాణిజ్ డెయెజి సప్తెజ్వలె ఇజ ఒడిబిజి మహార్.

6-7 అపొస్టురు అయ సజతి నెస్తారె లుకయెనియాదు మహి లున్త్ర, దెరెబ ఇని పట్టుమకాణ్, వన్యా సురుల మన్ని దేసమ్కాజ్ ఉహ్కాసి సాహారె అబ్బి సువార్ల సాటిస్తూన్.

లున్త్ర దెరెబ ఇని పట్టుమకాజ్ సాన్సిసార్

8 లున్త్ర ఇని పట్టుమదు, నడిదెజ్ అట్టణ సాట వాండ్రు ఒరెన్ మహాన్. వాండ్రు పుట్టిబాణిజ్ మొదొల్లి సాటాదికాన్ అతండ్రె ఎసెజ్బా నడిదెజ్ అట్టెండ్ బసి నె మంజినాన్.

9 పవులు బోదిసి మహిజ్ వాండ్రు వెంజి మహాన్. పవులు వన్నిజ్ సుడఃతిజ్ నెగెండ్ ఆన ఇజ వన్నిజ్ నమకం పుట్టినాద్ ఇజ నెస్తూన్.

10 అయావలె పవులు వన్నిజ్, “నిజ్అ, నీ పాదమ్కు బూమిదు మొప్పి నిల్అ”, ఇజ డటం వెప్సాజ్ అయ సాటాదికాన్ లిట్టి నిజ్తండ్రె డాట్టిజ్ మొదొల్లిస్తూన్.

11 పవులు కిత్తి బమ్మాతి పణి సుడఃతారె బాన్ మహి లోకుర్ లుకోనియ బాసాదు గగోలాతూర్. “దెయమ్కు లోకు లెకెండ్ ఆతెనె మాడగ్రు డిఃగోజి వాతె”, ఇజ డటం గగోలాతూర్.

12 బర్లుబెజ్ బ్రుహాన్పతి ఇజ పేరు ఇట్టూర్. నంణెం బోద వెప్సా వందిజ్ పవులు హెర్లు ఇజ పేరు ఇట్టూర్.

13 పట్టుం వెల్లి మహి బ్రుహాన్పతి గుడిది పుజేరి వాతండ్రె డాఃకుజ్, పూబుదండెజ్ అన్యాండ్రె పట్టుం వెల్లి మహి సేష్టా డగ్రు తత్తూన్. మంద లోకు కూడఃజి వాతారె పూజ కిసాట్ ఇజ అయ పుజేరిని, కూడితి మహి లోకుర్ ఒడిబిత్తూర్.

14 బర్లుబని పవులు యాక నెస్తారె వారు కిని పణిదిజ్ ఒప్పొకోడఃఎవ్ ఇజ తోరిసిని వందిజ్ వరి సాక్కెజ్ పాతెజ్ కిస్తారె లోకురి నడిమిదు ఉహ్కాసి సాహారె డటం వెప్సూర్.

15 “తంబెరిజాండె, మీరు ఎందనిజ్ ఈహు కిజినిదెర్? మాపుబా మీ నన్ని లోకునె. మీరు యా పణిదిజ్ రెఇకెజ్ డిఃసిసీజ ఆగాసం, బూమి, సమ్దరం, బాన్ మన్ని విజు వనకాజ్ పుట్టిస్తె బత్తిజి మంజిని దేవుణుదిజ్ నమ్మిదు ఇజ మిజి సువార్ల వెప్పిసూవ్.

16 గడ్డిఃస్తి కాలమ్దు విజు జాతిజ్ వరిజ్ వరిజ్ ఇస్టమాతి వన్యాజ్ పొగిడిజి మాడిఃస్టెజ్ దేవుణు డిఃస్త సిత్తూన్.

17 అహిజబా దేవుణు ఆగాసమ్దాన్ మిజి పిరు, ఎమేణివేల పంట అయావలె కనికారం ఆజి సీజినాన్. తక్కు సిల్లెండ్ బోజనం సీజినాన్. మీ మన్సుదిజ్ సర్ల కిబిసి పొన్ కిజినాన్. ఈహు వాండ్రు ఎలాగ మప్సా దేవుణు ఇజ లోకాజ్ తోరిస్తూన్”.

18 అపొస్తురు యాలెకెండే వెహ్తాజ్ బా వారు విరిజ్ పూజ కిమింద ఆదెజ్ ఇజి లోకురిజ్ అడ్డు కిదెజ్ గొప్ప కన్ఠం ఆతాద్.

19 అయావలె అంతియొకయదాన్, ఇకొనియదాన్ సెగొండార్ యూదురు వాతారె వరి మాటెజాణిజ్ నండో లోకాజ్ వరి పడెకాదు కూడుస్తారె. కూడుస్తారె, పవులు మున్ను, పవలుకుజ్ డెయ్యారె. వాండ్రు సాతాన్ ఇజి ఒడిబిత్తారె పట్టుం వెల్లి వన్నిజ్ ఈడ్డిస్తారె బానె డిజిస్తారె.

20 గాని సిసూర్ వన్ని సురుల కూడితి మహివలె పవులు నిజెతండ్రె పట్టుమ్ లొఇ మరజి సాహాన్. ముహ్న నాండిజ్ పవులు, బర్చబ కూడితారె దెరెబ ఇని పట్టుమ్దు సాహార్.

పవులుని బర్చబ సిరియాదు మన్ని అంతియొకయాదు మరజి సాహార్

21 పవులుని బర్చబ దెరెబ ఇని పట్టుమ్దు సువార్ బోదిస్తారె. నండో లోకురె యేనుప్రబుజ్ నమ్మితారె. వెనుక పవులుని బర్చబ, లున్త్ర, ఇకొనియ, అంతియొకయాదు మరజి వాతారె.

22 వాతారె, ఎమేణి పట్టుమ్ది వరిజ్ బానె సిసూరిజ్ ఉసారె కిబిస్తారె. “మీ నమకం డిజిన్విండ మండ్రు. మాటు నండో మాలెజ్ ఓరిసి దేవుణు రాజెమ్దు సాండ్రెజ్ వలె”, ఇజి మరి మరి పణిసి వెహ్తారె.

23 పవులు, బర్చబ విజు సజమ్కాజ్ పెద్దలెజి వీరపాటు కితారె ఉసాన్ మంజి పార్లనం కిజి, వారు నమ్మితి దేవుణుదిజ్ వరిజ్ ఒవజెస్తారె.

24 వెనుక పిసిదియ దేసెం డాట్టారె పంపులియాదు వాతారె.

25 పెర్ ఇనిబాన్ దేవుణు మాటెజ్ బోదిసి వెనుక అతలియ పట్టుమ్దు డిజిగజి సాహార్.

26 అబ్బెణిజ్ ఒడె: ఎత్తారె వారు మొదోహి సొత్తి సాహి అంతియొకయాదు మరజి వాతారె. యా అంతియొకయాదునె దేవుణు పణివందిజ్, వన్ని దయాదర్చమ్దిజ్ ఒవజెవె ఆతారె. ఆయ పణి వీస్తారె ఏలు బానె మరజి వాతారె.

27 మరజి వాతారె సజమ్ది వరిజ్ విజెరిజ్ కూడుస్తారె, దేవుణు వరి వెటనె కిత్తి పణిజ్ విజు వెహ్తారె. యూదురు ఆఇకారె దేవుణుదిజ్ నమ్మిదెజ్ వాండ్రు ఎలాగ సరి సిత్తాన్ ఇజి వెహ్తారె.

28 వారు నండో కాలం బానె మంజి సిసూరి వెట బత్తిత్తారె.

15

అపొస్తురు, పెద్దెలుజు ఆలోసనం కిదెజ్ యెరూసలేమ్దు కూడెజి వాతారె

1 సెగొండార్ యూదయ దేసెమ్దికారె అంతియొకయాదు వాతారె. వారు అబ్బె మన్ని లోకాజ్ ఈహు నెస్పిస్తాజ్ మొదోలెస్తారె. ఇనిక ఇహిజ మోసె సిత్తి రూలు వజి సునతి కిబె ఆవిండ మహిజ మీరు సిక్లదాన్ గెలిన్జెజ్ అటెఇదెరె ఇజి నెన్పిస్తారె.

2 పవులుని బర్చబ యా సజతి వందిజ్ కూడితారె యూదయ దేసెమ్ది వరివెట నండో వరిజి ఆహె తర్కిస్తారె. అందెజి యా మాటెజి వందిజ్ పవులు, బర్చబ, వరివెట అంతియొకయ దేసెమ్దు మన్ని మరి సెగొండార్ ఎక్కు యెరూసలేమ్దు సాన్ని అబ్బె మన్ని అపొస్తురుజి, పెద్దెలెజి డగ్రు సాండ్రెజ్ వలె ఇజి తీర్మానం ఆతారె.

3 ఆహె ఆయ సజమ్ది లోకురె వరిజ్ పోక్తారె. వారు పినెకె, సమరియ ఇని దేసెమ్క సరి సాహారె బానె మహి వరివెట యూదురు ఆఇకారె దేవుణు దెరోట్ మహ్త వాతారె దేవుణుదిజ్ నమ్మిజనారె ఇజి విజు వెహ్తారె సాహార్. అబ్బె మహి నమ్మితికారె యాక వెహారె గొప్ప సర్త్ర ఆతారె.

4 వారు యెరూసలేమ్దు వాతివలె సజమ్దికారె, పెద్దెలుజు, అపొస్తురు విజెరె వరిజ్ గవరం సీజి బనె కిత్తారె. దేవుణు వరివెట కిత్తి పణిజి వందిజ్ విజు వారు వెహ్తారె.

5 గాని బాన్ పరిసయరు ఇని జటుదు మహి నమ్మితికారె సెగొండార్ నిజెజి వెహ్తారె, “నమ్మిత్తి వరి లొఇ యూదురు ఆఇ లోకురె సునతి కిబె ఆదెజ్ వలె. మోసె సిత్తి రూలుదు మన్ని అడ్డెజి విజు వారు ఒప్పుకోడెజి ఆహె కిదెజ్వలె ఇజి మాటు వరిజ్ వెహ్తాజ్వలె”, ఇజి వెహ్తారె.

6 అయావలె అపొస్తురు, పెద్దెలుజు యా సజతి వందిజ్ ఆలోసనం కిదెజ్ కూడెజి వాతారె.

7 నండో తర్కిసి వెనుక పేతురు నిజీతంద్రె వరివెట ఈహు వెప్తాన్. “తంబెరిజాండె, సెగం కాలమ్కాక్ ముందాల్తై* యూదురు ఆఇ లోకాక్ సువార్త వెప్తాక్ మీ నడిమిహాన్ దేవుణు నజీ వీర్పాటు కిత్తాన్ ఇజి మీరు నెనినిదెర్. ఎందనిజ్ ఇహిజ వారుబా దేవుణు మాట వెంజి దేవుణుదిజ్ నమ్మిదెజ్.

8 లోకు ఒడిబినికెజ్ విజు నెనిని దేవుణు, దేవుణుదిజ్ నమ్మితి యూదురు ఆఇ లోకాజ్బా వన్నిబాన్ కూడుప్పాన్ ఇజి తోరిస్తాన్. ఎలాగ తోరిస్తాన్ ఇహిజ మజి సిత్తివజనె యూదురు ఆఇ లోకాజ్బా దేవుణు వన్ని అత్తు సిత్తాన్.

9 యూదురు ఆతి మజిని ఆఇ లోకుర్ ఆతి వరిజ్ ఇని తేడ సిల్లెండ దేవుణు ఉండ్రె వజనె కిత్తాన్. ఎలాగ ఇహిజ వారు నమ్మితిజ్ వరి మన్నుదు మన్ని పాపమ్కు విజు లాగితంద్రె సుబరం కిత్తాన్.

10 అహిజ, మాపు గాని, మా అనిగొగొర్ గాని పిండిదెజ్ అటేజ బరుదిజ్ ఎందనిజ్ యా నమ్మితి వరి మున్ను మొప్పినిదెర్? అహా మీరు కిత్తిజ మీరు దేవుణుదిజ్ కోపం రేప్పినిదెర్.

11 గాని ప్రబు ఆతి యేసు దయాదర్మమ్దానె మాటు గెల్లిస్తమనాట్ ఇజి మాటు నమ్మిజినాట్. అయావజనె వారుబా గెలస్త మనార్”, ఇహాన్.

12 ఆఇ జాతి లోకుర్ నడిమి దేవుణు వరివెట కిత్తి గొప్పు బమ్మాతి వణిజ వందిజ్ గొప్పు బమ్మాతి గుర్తుజ వందిజ్ పవులు, బర్బుబ వెప్తాజ్, అబ్బై మహి లోకుర్ విజేరె జమ్న అలెతారె వెహార్.

13 వారు వెప్తా వీస్సి వెనుక యాకోబు ఈహు వెప్తాన్. “తంబెరిజాండె, నా మాట నెగ్గెండ వెండ్రు.

14 ఆఇ జాతి లోకుర్ వెట దేవుణు ముందాల్తై దయ తోరిస్తాన్. అక్క ఎలాగ ఇహిజ వరి బాణిజ్ ఉండ్రె జటు వన్ని సొంత లోకు వజి వీర్పాటు కిదెజ్ దేవుణు వరిజ్ దయ తోరిస్తాన్. అక్క విజు పేతురు యెలె వెప్తా మనాన్.

15 ప్రవక్తరు ముందాల్తై వెప్తాకెజ్ యాకదె. ఇని తేడ సిల్లెద్. వారు ముందాల్తై వెప్తా మాట ఇనిక ఇహిజ.

16 “దిన్ని వెనుక నాను మర్జి వాజి దావీదురాజుది అర్రి సాహి ఇల్లు తొప్పా. లాగ్టి వీసీరిజి దన్నిజ్ నాను మర్జి తొప్పి దన్నిజ్ నాను ముందాల్తై మహిలెకెండ కిస.

17-18 అయావలె ఆఇ జాతి లోకుర్ విజేరె నజీ రెబానార్లె. ఆఇ జాతి లోకుర్ బాణిజ్ నా పేరు అస్తెజ్ నాను వీర్పాటు కిత్తికార్ విజేరె నజీ రెబానార్లె ఇజి దేవుణునె వెప్పానాన్”, “యాక నండో కాలమ్కాక్ ముందాల్తై దేవుణు వెప్తా మనాన్”.

19 యాకోబు మరి వెప్తాన్, “నా మన్నుదు ఇనిక ఇహిజ, దేవుణు దరోట్ మహి వాతి ఆఇ జాతి లోకురిజ్ మాటు మాలెజ్ కినిక అవద్.

20 మాటు వరిజ్ ఉండ్రె ఉత్తం రాసి పోక్తెజ్. అబ్బై ఇనిక రాస్తెజ్ ఇహిజ, బొమ్మెజ పూజ సిత్తి కండ తినిక అవద్. అక్క సెఇక. సాని బూలానిక అవద్. గొత్తిక పిడికిన్ సప్తిక తినిక అవద్. నల తినిక అవద్. యాక విజు డిసిసిదెజ్. అక్కెజ. మరి ఇనిక సిల్లెద్.

21 ఎందనిజ్ ఇహిజ యాక విజు రాస్తిమని మోసె సిత్తి రూలుజ్ ప్రతి విస్తాంతి దిసమ్దు, నండో కాలమ్కాణిజ్† యూదురు మీటిజ్ కిని కెల్లాజ్ నదివిజి ముంజినాద్. మోసె వెప్తా మాటెజ్ విజు చట్టుమ్దు బోదిసి ముంజినాద్, అందెజి వన్కాజ్ విజు వారు లోబడ్డెదెజ్”, ఇజి వెప్తాన్.

అపొస్తరు ఉండ్రె ఉత్తం రాస్త పోక్తార్

22 అయావలె అపొస్తరు, పెద్దెలుజు, నజమ్దికార్ విజేరె కూడితారె నమ్మిత్తి వరిలోఇహాన్ సెగొండారిజ్ వీర్పాటు కిజి పవులుని బర్బుబవెట అంతియొకయాదు పోక్తెజ్ ఇజి తెగిస్తార్. వారు బర్బుబ ఇని మరి ఉండ్రె పేరు మన్ని యూద్ వన్నిజ్, సీలెజ్ వీర్పాటు కిత్తార్. యూదని, సీలె రిఎర్. అయ నజమ్దు ముకెలమతికార్.

23 వరివెట నజమ్దికార్ ఉండ్రె ఉత్తం రాస్త పోక్తార్. అబ్బై ఇనిక రాస్త మనాద్ ఇహిజ, ‘మీ దాద్సీర్ ఆతి అపొస్తరు, పెద్దెలుజు, అంతియొకయాదు, సిరియాదు, కిలికియాదు మన్ని దేవుణుదిజ్ నమ్మిత్తి యూదురు ఆఇ జాతిజి విజేరిజ్ వందనమ్కు పోక్కినార్.

* 15:7 15:7 యూదురు ఆఇవరివెట సాన్ని సువార్త వెప్తాజ్ దేవుణు పేతురువెట వెప్తా కతవందిజ్ అపొస్తరు కిత్తి వణిజ్ 10:1-1; 1:18. దు నద్విదు. † 15:21 15:21 నండో కాలం ఇహిజ, రమరమి 200 పంటిణిజ్ 300 పంటిజ్ దాక.

24 సెగొండార్ మా డగ్రుహాన్ సాహార వరి బోదదాన్ మజి మాలెజ్ కిత్రార్, మీ మున్నుజ విజు బాద కిత్రార్ ఇజి మాపు నెస్తావ్. గాని వరిజ్ మాపు పోక్వితావ్, ఇని అతికారంబా సివితావ్.

25-26 అందెజె, మా యేసు ప్రబు వందిజ్ పాణం సాపుదిజ్ ఒవజెప్తి మా ప్రియమాతి బర్చబ, పవులు ఇని వరివెట మా డగ్రుహాన్ సెగొండార్జి మీ బాన్ పోక్నావ్ ఇజి మాపు ఉండ్రె మన్ను ఆత మనావ్.

27 అందెజె మాపు యూద, సీల ఇని రిఎరిజ్ పోక్కినావ్. వారు వాజి మాపు రాస్తి మాటన వెప్పార్దె.

28-29 మీజి అవనరం ఆతి ఆడ్రెజ్ ఇనికెజ్ ఇహిజ, దెయమకాజ్ పూజ కిత్తికెజ్ తిన్యాట్. నల తిన్యాట్. గొత్తిక పిడికిన్ సప్తివనకాజ్ తిన్యాట్. సాని బూలాదెజ్ ఆవద్. యా పణిజ్ కివిండ మీరు దూరం మహిజ మిజినె నెగెద్. మీజి అవనరం ఆతి యా ఆడ్రెజ్ ఆవిండ మరి నండొ ఆడ్రెజ్ వెప్పి మీ మున్ను బరు ఇడ్కిక ఆవద్ ఇజి దేవుణు అత్తని, మాపు ఉండ్రె మన్ను ఆజినావ్. మీజి మా వందనమ్మకు.

30 అయావలె సజమ్దికార సెల్వ సిత్తిజ్ వారు సొత్తారె డిఃగు అంతియొకయూదు వాతార్. బానె నమ్మితి వరిజ్ విజెరిజ్ కూడుప్తారె ఉత్తం సితార్.

31 వారు అయ ఉత్తం సద్వితారె డటం సర్ల ఆతార్. ఎందనిజ్ ఇహిజ అయ ఉత్తం వరిజ్ దయరం కిత్రార్.

32 యూద, సీల రిఎర్ దేవుణు మాటెజ్ వెప్పికార్. అందెజె వారు దేవుణు మాటెజ్ నండొ వెప్పి అబ్బె మహి దాద్దిరిజ్ తంబెరిసిరిజ్ దయరం వెప్పి ఇడ్తార్. అక్క వెంజి వరి మన్నుదు బలం ఆతార్.

33-34 వారు అబ్బె సెగం రోస్సు గడఃప్తార్. వెనుక, బానె మహి నమ్మితికార వరిజ్ యెరూసలేమ్దు వరిజ్ పోక్కి వరిబాన్ మర్జి పోక్తార్. “దేవుణు సమదనం మీబాన్ నునీద్”, ఇహారె పోక్తార్.

35 గాని పవులుని బర్చబ అంతియొకయూదు మహారె మరి నండొ లోకర్ వెట దేవుణు మాటెజ్ బోదిసి నువార్త వెప్పి మహారె.

మార్కు వందిజ్ పవులుని బర్చబ గొడఃబ ఆతారె

36 సెగం రోస్సు ఆతి వెనుక పవులు బర్చబెజ్, “ఏలు సానాటె మాటు దేవుణు మాట వెప్తి విజు పట్టుమ్కాజ్ మన్ని తంబెరిజు విజెరె ఎలాగ మనారె ఇజి నూణ సానాట్ ఇజి వెప్తాన్.

37 అయావలె మార్కు ఇజి ఆజ పేరు మన్ని యోహానుజ్ వరివెట కూక్కి ఒతెజ్ బర్చబ ఇస్తం ఆతాన్.

38 గాని మార్కుజ్ వరివెట ఒతెజ్ ఆవద్ ఇజి పవులు వెప్తాన్. ఎందనిజ్ ఇహిజ మార్కు ముందాల వరివెట పణిదిజ్ సాహిజ్ వూర్చి టయం మన్విండ పంపులియదు వరిజ్ డిఃస్త సాహాన్.

39 మార్కు వందిజ్ పవులుని బర్చబ నండొ గొడఃబ ఆతారె రియాజ సాహారె. బర్చబ మార్కుజ్ వెట ఒతండ్రె ఓడః ఎక్కి కూప్త ఇని ద్విప్పుదు సాహారె.

40 గాని పవులు సీలెజ్ కూక్కి ఒతాన్. బాన్ మహి తంబెరిజు వారు రిఎరిజ్ దేవుణు దయాదర్ మమ్మదిజ్ ఒవజెప్తారె వరిజ్ పోక్తార్.

41 వారు సొత్తారె సిరియ కిలికియ పట్టుమ్కాజ్ మన్ని సజమ్కాజ్ సాహారె. బానె దేవుణు మున్ను నమకం ఇడ్డివరి నమకం సత్తు కిబిస్తారె.

16

పవులుని సీల వెట తిమోతి కూడఃజినాన్

1 పవులు, సీల వెట దెరెబ, లునత్త ఇని పట్టుమ్కాజ్ వాతాన్. అబ్బె తిమోతి ఇనికాన్ ఒరన్ యేసుప్రబుజ్ నమ్మిత్తికాన్ మహాన్. వన్ని అయసీబా నమకం ఇత్తా మహాద్. అది యూద జాతిదికాద్. వన్ని బుబ్బ ఆజ జాతిదికాన్. వాండ్రు గ్రిసు దేసెమ్దికాన్.

2 తిమోతి వందిజ్ లునత్తదు, ఇకొనియూదు నమ్మితికారె వాండ్రు గొప్ప పేరు మన్నికాన్, ఇజి పొగడితారె.

3 తిమోతిజ్ వన్నివెట ఒతెజ్ ఇజి పవులు ఆస ఆతండ్రె వన్నిజ్ సునతి కిబిస్తాన్. ఎందనిజ్ ఇహిజ వన్ని బుబ్బ ఆజ జాతిదికాన్ ఇజి అబ్బె మహి యూదురు విజెరె నెస్త మహారె.

4 వారు పట్టుమ్కాణిజ్ సొన్ని మహిజ్, యేసుప్రబుజ్ నమ్మితికారె ఎలాగ నడిదెజ్ ఇజి యెరూసలేమ్దు మన్ని అపొస్తరు, పెద్దెలుజు ఏర్పాటు కిత్తి ఆడ్రెజ్ బోదిస్తారె అక్కెజ్ లోజెదిజ్ ఇజి వెప్తార్.

5 ఆహా నజమీదు మన్నివరి నమకం లావు పిరితాద్. వరి లెక్క రోజు రోజు లావు ఆజి మహాద్.

పవులు మసిదోనియ దేసెమ్ది వన్నిజ్ దర్సనమ్దు సుడఃజినాన్

6 ఆసియ ప్రాంతమ్దు దేవుణు మాటజ్ వెప్పిక ఆవద్ ఇజి దేవుణు ఆత్మ వరిజ్ అడ్డు కిత్తిజ్ వారు పుగియ, గలతీయ దేసెమ్కాణిజ్ సాహార్.

7 అయావలె ముసియ బెతనియ డగ్గు వాతారె బెతనియ సాండ్రెజ్ ఇజి సుడఃతారె. గాని బాన్ సాండ్రెజ్ యేసుప్రబు ఆత్మ వరిజ్ సరి సివితాన్.

8 అందెజి వారు ముసియ ప్రాంతం డాట్టారె డిఃగు నమ్దరం డగ్గు మని త్రోయ ఇని పట్టుమ్దు సాహార్.

9 అయ పొదోయ పవులు, బాన్ మహిజ్, ఉండ్రీ దర్సనం సుడఃతాన్. అక్క ఇనిక ఇహిజ మసిదోనియ దేసెమ్దికాన్ ఒరెన్ నిల్లి, “నీను మసిదోనియాదు వాజి మజి సాయం కిఆ”, ఇజి బతిమాలితి వజ దర్సనం సుడఃతాన్.

10 పవులు అయా దర్సనం వాతిజ్, మాపు వెటనె మసిదోనియ సాండ్రెజ్ తయారె ఆతావ్. ఎందనిజ్ ఇహిజ, మసిదోనియాది వరిజ్ దేవుణు సువార్త వెప్పి వందిజ్ దేవుణు మజి కూక్త మనాన్ ఇజి మాపు నెస్తావ్.

లుదియ యేసుప్రబుజ్ నమ్మిజినాద్

11 మాపు త్రోయ పట్టుమ్దాన్ ఓడః ఎక్రావె తినాజ్ సమొత్త ఇని ద్వీపుదు సాహావ్. మహ్నా నాండిజ్ నెయపోలి ఇని పట్టుమ్దు అందితావ్.

12 అబ్బాణిజ్ పిలిప్పి ఇని పట్టుం వాతావ్. మసిదోనియ దేసెమ్దు పిలిప్పి పట్టుం ఉండ్రీ ముకెలమాతి పట్టుం. అక్క నండొండారె రోమాదికారె బత్తిజి మహి పట్టుం. మాపు నెగం రోస్సు ఆ పట్టుమ్దు మహావ్.

13 విస్త్రాంత దిసెమ్దు మాపు పట్టుం వెల్లి వాతావె గడ్డ ఒడ్డు దరోజ్ యూదురు పార్దనం కిని బాడ్డి మనాద్ను ఇజి వాతావ్. వాతిజ్, బాన్ బస్తావె కూడఃజి వాతి మహి అయలి కొడొకవెట వర్గిదెజ్ మొదొల్స్తావ్.

14 అయావలె లుదియ ఇని ఉండ్రీ అయలి కొడొః వెంజి మహాద్. అది తుయతయర పట్టుమ్దికాద్. అది లావు దరది ఊద రంగుది పాతెజ్ పొర్పికాద్. అది దేవుణుదిజ్ పార్దనం కినికాద్. దేవుణు మాటజ్ అర్దం కిదిజ్ దేవుణు బుద్ది సిత్తిజ్ అది పవులు వెప్పి మాటజ్ మన్నుదు ఇడఃతాదె అయావజనె నడిఃతాద్.

15 అది, దన్ని ఇండ్రొణికారె, విజెరె బాప్తినం లాగె ఆతారె. వెనుక అది, “నాను దేవుణుదిజ్ పూర్తి నమ్మిజిన ఇజి మీరు ఒప్పుకొటిజ నా ఇండ్రొ వాజి మండ్రు”, ఇజి మజి బతిమాలితాద్.

పవులుజ్ సీలెజ్ జెలిలో ఇడ్తారె

16 ఒరెండు మాపు పార్దనం కిని బాడ్డిదు సాన్ని మహిజ్ ఉండ్రీ వెట్టివణి కిని ఇజిరి అయలి మా ఎర్దు వాతాద్. దన్నిజ్ పుతోన్* ఇని దెయం అన్త మహాద్. అది జాతకం వెప్పి దన్ని ఎజుమాసురిజ్ నండొ డబ్బు గణపిస్తాద్.

17 అది పవులుని మజి వెనుక వాజి డటం గగోల్ ఆజి వెప్పాద్, “యా లోకరె, విజెరిజ్ ఇంక పెరి దేవుణుదిజ్ నేవ కినికారె. దేవుణు ఎలాగ మిజి గెల్పిస్తానె ఇజి మీరు వెప్పార్లె” ఇహాద్.

18 నండొ రోస్సు అది ఆహా కిజి మహిజ్, పవులు మన్నుదు గొప్పు బాద ఆతండ్రె అయ దెయంమదిజ్ “నీను యా ఇజిరి దన్నిజ్ డిఃసి సాన్అ ఇజి యేసుక్రీస్తు అతికారమ్దాన్ వెహసిన్”, ఇజి వెప్పాన్. వెటనె అయ దెయం అయలిదిజ్ డిఃస్త సాహాద్.

19 గాని దన్ని ఎజుమానిరు వరిజ్ వాని డబ్బు విజు సాహా ఇజి సుడఃతారె పవులు సీలెజ్ పట్టుం నడిఃమి, అతికారిజ డగ్గు ఊడిఃసి తతారె.

20-21 క్రోర్దు నడిఃపినిని వరిబాన్ తతారె, “వీరు యూదురు. వీరు బోదిసిని అలవాటుజ్ మజి వడఃకెకెజ్. మాటు రోమాదికాట్. మాటు అక్కెజ్ ఒప్పుకొణిక ఆవద్, అయావజనె నడిఃనిక ఆవద్. మా పట్టుమ్దు వీరు గొప్పు కలిబిలి కిజినార్”, ఇజి వెప్పార్.

* **16:16 16:16** పుతోన్ ఇని దెయం యా అయలిదిజ్ వాని కాలమ్దు జగ్గిని నజతిజవందిజ్ నెస్పిని మహాద్. అక్క వెప్పిజ్ లోకరె దన్నిజ్ డబ్బు నీజ మహాద్

22 అయావలె బాన్ కూడితి మహి లోకుర్ విజేరె పవులుజ్ని, సీలెజ్ ఎర్దు వాతారె నిండ మొస్తారె గగోల్ ఆతార. వరి సొక్కెజ్ లాగజి వరిజి డెయ్యూ ఇజి కోర్టు నడిపిసినికార ఆర్దు సితార.

23 వారు లావు దెబ్బెజ్ డెయ్యూరె పవులు సీలెజ్ జెలి లొఇ ఇర్తార. “వరిజి జాగర్డు నుడెడు”, ఇజి జేలి ఎజుమానిజ్ ఆర్దు సితార.

24 అయ ఆర్దు వాతిజ్ జెలి ఎజుమాని వరిజి జేలిదు లొఇ మన్ని గదిదు వరి కాల్యాజ్ డుకేజి లొఇ తొస్తొండ్రె ఇర్తూన్.

25 రమారమి మదరయ్తు పవులుని సీల దేవుణుదిజ్ పార్దనం కిజి పాటెజ్ పార్ది మహార్. వీరు పారజి మహిజ్ జెలిదు తొహె ఆతి మహికార విజేరె వెంజి మహార్.

26 అయావలె వెటనె బూమి విజి డటం కర్దితాది అయ జేలి పునాదిజ్ విజి కర్దితె. వెటనె సేప్లాజ్ విజి రే ఆతె. జెలిదు మహివరి విజెరి కట్టు. ఊడితె.

27 అయ జేలి ఎజుమాని తెలి ఆతండ్రె జెలిది సేప్లాజ్ విజి రే ఆతిమనిక నుడెతూన్. నుడెతండ్రె జెలిదు మహికార ఉహ్క సొహార్ ఇజి ఒడిబిజి కుర్దు లాగితండ్రె వన్నిజ్ వాండ్రె గుత్తె ఆజి సాదెజ్ తయార ఆతూన్.

28 అయావలె పవులు, “నీను ఇని కూనిబా కిబె ఆమ. మాప్ విజెమె ఇబ్బెనె మనాప్”, ఇజి డటం గగోల్ ఆజి వెప్తూన్.

29 అయ జేలి ఎజుమాని, దీవ తగల ఇజి వెప్సి లొఇ ఉహ్క వాతాండ్రె వణిక్కి పవులు సీలారె పాదమ్కాజ్ డగ్గు అర్తూన్.

30 వాండ్రు పవులుజ్ని సీలెజ్ వెల్లి తతాండ్రె వెన్బాతూన్, “బాబురాండె, నాను తప్పె ఆదెజ్ ఇహిజి ఏలు ఇనిక కిదిజ్?”.

31 “యేసుప్రబు ముస్సు నమకం ఇట్టిజ, అయావలె నీను నీ ఇండ్రొణికార విజెరె తప్పె ఆనిదెర్”, ఇజి పవులు సీల వెప్తూన్.

32 పవులుని సీల వన్నిజ్, వన్ని ఇండ్రొణి వరిజ్ యేసుప్రబు వందిజ్ నువార్త వెప్తూన్.

33 ఆ పొదొయ్ అయా గడియూదునె వాండ్రు పవులుని సీలెజ్ ఒతాండ్రె వరి దెబ్బెజ్ నొప్తూన్. వెటనె వాండ్రు, వన్ని ఇండ్రొణికార విజేరె బాప్తినం లాగి ఆతూన్.

34 వాండ్రు పవులుజ్ని సీలెజ్ వన్ని ఇండ్రొ కూక్కి తసి బోజనం సిత్తూన్. దేవుణు ముస్సు నమకం ఇట్టి వందిజ్ వాండ్రు వన్ని ఇండ్రొణికార విజేరె నండొ సర్దు ఆతూన్.

35 పెందల కోర్టు నడిపిసినికార, “అయ లొకాజ్ డిస్తు”, ఇజి ఆర్దు సితారె జమానిజ్ జెలి ఎజుమానిబాన్ పొక్తూన్.

36 జేలి ఎజుమాని అయ మాటెజ్ పవులు వెప్తూన్. “మిజి డిస్తు ఇజి కోర్టు నడిపిసినికార ఆర్దు పొక్తూ మనార్. మీరు ఏలు జమన సొండ్రు”, ఇజి వెప్తూన్.

37 గాని పవులు, “మాపు వర్దిదెజ్ అవకానం సివిండ వారు తీర్పు కిజి విజేరె ముందాల డెయ్యూర్. మాపు రోమాదిజ్ అక్కు మనికాప్ ఇహిజిబా మజి జెలిదు ఇర్తూర్. ఏలు మజి ఎయెర్బా నెన్విండ పొక్తూజ్ నుడెజినార్. మాపు ఒప్విప్. వారి వాజి మజి వెల్లి తసి పొక్తూజ్”, ఇజి జమానుజ్ వెప్తూన్.

38 యా మాటెజ్ అయ జమానుజ్ కోర్టు నడిపిసిని వరిజ్ వెప్తూర్. పవులుని సీల రోమాదిజ్ అక్కు మనికార ఇజి వెహారె వారు తియెల్ ఆతూర్.

39 అయ కోర్టు నడిపిసినికార వాతారె పవులుజ్, సీలెజ్ నెమ లొస్తారె జెలిదాన్ వెల్లి కూక్కి తత్తూర్ ‘పట్టుం డిసి సొండ్రు’ ఇజి వరిజ్ వెప్సి పొక్తూర్.

40 వారు జెలిదాన్ వెల్లి వాతారె లుదియబాన్ సొహార్. అబ్బె నమ్మిత్తివరి వెట వర్దిజి వరిజ్ ఆదరిస్తారె వరి నమకందిజ్ నత్తు కిబిసి దయెర్మ ముస్సు మండ్రు ఇజి వెప్తూర్. వెనుక వారు బాణిజ్ సొత్త సొహార్.

1 అయావలె పవులుని సీల పిలిప్పి పట్టుమదాన్ సోత్తారె అంపిపొలి, అపొలోనియ పట్టుమకు డాట్టి దెసలోనిక* ఇని పట్టుమదు వాతార్. అబ్బె యూదురు మీటిజ్ కిని ఇల్లు ఉండ్రీ మహాద్.

2 పవులు, వాండ్రు ఒజ అతి లెకెండ యూదురి మీటిజ్ కిని ఇండ్రీ సోహాన్. సోహాండ్రె, బానె మహి వరివెట మూండ్రీ విస్త్రాంతి దినమ్మకు దేవుణు మాట వెప్పిమహాన్. ఇనిక ఇహిజ,

3 “క్రీస్తు ఇనికాన్ మాలెజ్ ఆజ సానాల్లె. సాజి మరజి నిజ్నానాలె” ఇజ ప్రవక్తరు రాస్తిక దేవుణు మాటాదు మనాద్. అయ లెకెండ జర్గిదెజె. నాను మి వెట సాటిసి వెప్పియా యేసుప్రబునె క్రీస్తు”. యా మాటెజాణిజ్ నదివిజి వెప్పి సిత్రాన్.

4 యూదురు - లోఇహాన్ సెగొండార్ పవులు వెప్పి మాటెజ్ ఒప్పుకోటారె పవులుని సీల వెట కూడితార్. బక్తి మన్ని గ్రీకు జాతిదికార్ సంఠొండార్, ముకెలమాతి అయలికొడొక్ సంఠొండెకా వరివెట కూడితార్.

5 అహిజ యూదురు గోస ఆతార్. గోస ఆతారె ఇని పణి సిల్లెండ తిరిగిని సెజ లోకాజ్ సర్దుహాన్ కూడుస్తారె మందెజ్ ఆజి పట్టుమదు కలిబిలి కిజి యాసోను ఇని వన్ని ఇండ్రీ సోహాన్. ఇండ్రీణి సేప్లాదిజ్ డెయేత పొక్తారె పవులుని సీలెజ్ లోకుర నడిమి అసి తనాట్ ఇజ లోఇ డుగితార్.

6 గాని పవులుజ్ని సీలెజ్ తోరెవితార్కాక యాసోనుజ్ మరి నమ్మితి వరిజ్ సెగొండారిజ్ పట్టుం అతికారిజి డగ్రు లాగిత తతార్. “వీరు, యా లోకం విజు కలిబిలి కినికార్, ఇబ్బెవా వాత మనార్.

7 విరిజ్ యా యాసోను వన్ని ఇండ్రీ ఇట్టా మహాన్. వీరు విజేరె యేసు ఇజి మరి ఒరెన్ రాజు మనాన్ ఇజి వెప్పి కయసరు రూబుజి లోజిఏండ నడిసినార్”, ఇజి డటం గగోలాజి వెప్తార్.

8 యాక వెహారె లోకుర, పట్టుం అతికారిజు గొప్ప కలిబిలి ఆతార్.

9 అతికారిజు యాసోను బాణిజ్, అయ నమ్మితి వరి బాణిజ్ డబ్బు తోప్పిస్తారె వరిజ్ డిస్త సితార్.

పవులు బెరెయాదు సోహాన్

10 సీకటి అతిజ్ వెటనె నమ్మితికార్ పవులుజ్, సీలెజ్ బెరెయ ఇని బాడ్డిదు పోక్తార్. వారు బానె వాతారె యూదురు మీటిజ్ కిని ఇండ్రీ సోహాన్.

11 బెరెయాదు మహికార్ తెసలోనికదు మహి వరిలెకెండ ఆవిర్. వారు గొప్ప ఆసదాన్ దేవుణు మాటెజ్ వెహారె వనక వందిజ్ ఒడిబిజి మహార్. పవులుని సీల వెప్పి మహి సజతిజ్ నిజమెనెనో అవిదొ ఇజి వారు రోజు దేవుణు మాటాదు సుడేజి నదివిజి మహార్.

12 అందెజె వరి లోఇ సంఠొండార్ యూదురు నమ్మితార్. సంఠొండార్ గ్రీకు జాతిది వరి లోఇ పల్కుబడిజి మన్ని అయలి కొడొకేని మొగకొడొరె నమ్మితార్.

13 గాని బెరెయాదుబా పవులు దేవుణు మాటెజ్ సాటిసినాన్ ఇజి తెసలోనికదు మన్ని యూదురు నెస్తారె బాణిజ్ వాతారె బెరెయా లోకాజ్ కోపం పుటిస్తారె కలిబిలి కితార్.

14 అయావలె నమ్మితికార్ పవులుజ్ వెటనె సమ్దరం డగ్రు సాన్అ ఇజి పోక్తార్. గాని సీలని, తిమోతి బెరెయాదునె నిహ మహార్.

15 పవులుజ్ పోక్తెజ్ సోహికార్ ఏదెన్ను† పట్టుమదాకానె ఒతార్. సీల, తిమోతి వెటనె నా బాన్ రద్దు ఇజి కబ్రు సితండ్రె పవులు వరిజ్ మప్పి పోక్తార్.

పవులు ఏదెన్ను పట్టుమదు సోహాన్

16 పవులు ఏదెన్ను పట్టుమదు సీలెజ్ తిమోతిజ్ ఎద్దు సుడేజి మహాన్. మహిజ్ అయ పట్టుమదు వారు మాడిస్సి మహి దెయమ్కాణి బొమ్మెజ్ ‡సండో మహిజ్ అక్కెజ్ సుడేజి మన్నుదు నండో బాద ఆతాన్.

17 అయావలె యూదురు మీటిజ్ కిని ఇండ్రీ సోహాండ్రె యూదురు వెట, బక్తి మన్ని యూదురు ఆఇ వరివెట పవులు వాదిస్తాన్. రోజు రోజు సత సహ్య కూడిజి వాతి వరివెట వాదిసి మహాన్.

* 17:1 17:1 దెసలోనిక పట్టుం మసిదోనియ దేసమ్దు మహాద్. రోమదేసమ్దిజ్ రాజదాని ఆతాద్ యా పట్టుం. నండో ఆస్తి మహాద్ బాన్. సంఠొండార్ రోమ లోకురెన్ యూదురు బాన్ బత్తిజి మహార్ † 17:15 17:15 ఏలు ఏదెన్ను పట్టుం గ్రీకు దేసమ్ది ముకెలమాతి పట్టుం ‡ 17:16 17:16 యా బొమ్మెజ్ అయ పట్టుమదికార్ మాడిస్సిమహి దెయమ్కెలెకెండ తోరెత్త

18 అబ్బె లావు నదవితతి మన్నికార్ ఎపికూరియ జటుదికార్ నెగొండార్¹⁸ స్ట్రోయికుల లోకుర్ లొజ నెగొండార్ మహార్. వారు పవులు వెట వాదిస్తార్. నెగొండార్, యా బడాకి ఇనిక వెప్పొనాన్ ఇజి వెప్టార్. యేనుస్త్రబు వందిజ్, సాతికార్ మరజి నిజ్ని వందిజ్ పవులు నెస్సిన్జిజ్ అబ్బె మరి నెగొండార్ వీండ్రు ఆజ దెయమ్కాజ్ వందిజ్ వెప్పొనాన్ ఇజి వెప్టార్.

19 వారు పవులు అరియొపగు ఇని న్ద్రుదు లాగిత తత్తారె, “నీను వెప్పొని యా కొత్త మాట ఎలాగ మర్రికాదో, మాపుబా నెస్సెజ్ ఆనాదా?

20 నీను నెగొ కొత్త మాటజ్ వెప్పొని. అక్కెజ్ మాపు ఎనెజ్బా వెన్ఇకెజ్. వన్నా అర్తం ఇనికాదో ఇజి నెస్సెజ్ మాపు కోరిజినావ్”, ఇజి వెప్టార్.

21 ఆ ఏదెన్ను పట్టుమదికార్ విజేరె, అబ్బె బత్తిజి మహి ఏదెన్ను పట్టుమదికార్ ఆఇకాబా ఇనికాదో ఉండ్రి కొత్త మాట విని వందిజ్, వర్షిని వందిజ్ లావు ఇస్టమాజి వరి సమయం విజు బానె గడెప్పి మహార్.

22 అయావలె పవులు అరియొపగు న్ద్రుదు నిహండ్రె ఈహు వెప్టాన్, “ఏదెన్ను పట్టుమదికెదిరా, మీరు విజు వణిజి లొజ గొప్ప బక్తి మన్నికిదెర్ ఇజి నజి తోరిజినాద్.

23 ఎందనిజ్ ఇహిజు నాను బూలాజి బూలాజి మీ బొమ్మెజు నెగ్రెండ్ సుడెజి మహిజ్ ఉండ్రి మాటె పీట సుడెజత. దన్ని మున్ను, ‘నెన్ఇ దెయమ్దిజ్’ ఇజి రాస్త్ర మనాద్. అందెజి మీరు నెన్ఏండ్ ఇని దన్నిజ్ మాడిసినిదెరో దన్ని వందిజ్ నాను మిజి బోదెసిన్”, ఇజి వెప్టాన్.

24 పవులు మరి వెప్టాన్, “యా బూ లోకమ్దిజ్, దన్ని లొజ మన్ని విజువ నకాజ్, దేవుణునె పుటిస్తాన్. అయ దేవుణునె పరలోకమ్దిజ్, బూమిదిజ్ ప్రబు ఆత మనాన్. అయ దేవుణు లోకు తొప్టా గుడిదు బత్తిఎన్.

25 దేవుణునె విజు లోకాజ్ బత్తు, పాణం, విజు సీజినాన్. దేవుణుదిజ్ ఇనికబా తక్కు ఆఏండ్ మన్ఏద్. అందెజి లోకు వన్నిజ్ ఇనికబా సీదెజ్ అవ్సరం సిల్లెద్.

26 దేవుణు ఒరెన్ వన్ని వెట విజు జాతి లోకాజ్ పుటిస్తాన్. ఎందనిజ్ ఇహిజు యా బూలోకం మున్ను, విజుబాన్ బత్తిని వందిజ్ పుటిస్తాన్. వారు ఎంబె బత్తిదెజ్ ఇజి, ఎమేణి కాలమ్దు బత్తిదెజ్ ఇజి దేవుణు ముందాల్పా ఏర్పాటు కిత మనాన్.

27 ఎందనిజ్ ఇహిజు ఉండ్రి వేలా వారు నజి రెబాజి వానార్పు ఇజి ఇక్కెజ్ విజు దేవుణు ఏర్పాటు కితాన్. దేవుణు మా డగ్రుహాన్ దూరం మంజినికాన్ ఆఏన్.

28 మాటు దేవుణు వెటెన బత్తినాట్, దేవుణు వెటెన నడిసినాట్, దేవుణు వెటెన మంజినాట్. మీ లొజ పాటిజ్ రాస్సికార్ వెప్టావజ ‘మాటు దేవుణు కొడెరె’.

29 అందెజి మాటు దేవుణు కొడెరె ఆతిజ్, లోకు, వరి మన్నుదు మన్ని ఆలోసనం వజ, వారు నెస్సిమన్ని పణి వజ బజారమ్దాన్, వెండిదాన్, పణుకుజాణ్ తయార్ కిత బొమ్మెజు వజ దేవుణు మనాన్ ఇజి ఒడిబిదెజ్ ఆఏద్.

30 నస్తివలె మాటు నెన్ఏండ్ మహివలె దేవుణు అక్క సుడెజిత్తిబా సుడెజి లెకెండ్ డిజిస్తాన్. ఏలు ఇహిజు ఎంబెబా సరినె, విజేరె లోకుర్ వరి పాపమ్కు డిసిసిజి దేవుణుబాన్ రద్దు ఇజి దేవుణు ఆడ్ర సీజినాన్.

31 ఎందనిజ్ ఇహిజు, దేవుణు విజేరె లోకాజ్ నీతినిజయ్యుదాన్ తీర్పు కిదెజ్ ఉండ్రి రోజు ఏర్పాటు కిత మనాన్. అయా రోజు దేవుణు ఏర్పాటు కిత్తి ఒరెన్ లోకువెట తీర్పు తీరిస్తాన్. దేవుణు ఆ లోకుదిజ్ సావుదాన్ మరజి నిక్ర మనాన్. ఎందనిజ్ నిక్రాన్ ఇహిజు ఆ లోకుదిజ్ తీర్పు కిదెజ్ అతికారం మనాద్ ఇజి విజిజ్ రుజువ్ కిదెజ్”.

32 లోకు సాజి మరజి నిజ్ని వందిజ్ వెహారె వరి లొజ నెగొండార్ కరాజుతారె. గాని మరి నెగొండార్ “దన్ని వందిజ్ మరి వెహాఅ, వెనావ్”, ఇజి పవులుజ్ వెప్టార్.

33 ఆహె మహిజ్ పవులు వరిబాణిజ్ సాహాన్.

§ 17:18 17:18 ఎపికూరియ లోకుర్, స్ట్రోయికుల లోకుర్. మీరు గ్రీకుజాతిలొజ ఎక్కు నదవితతి లోకుర్. ఎపికూరియ లోకుర్ ఎపికురు ఇని ఒరెన్వన్ని బోదెజ్ వజ నడినికార్. వన్ని బోద ఇనిక ఇహిజు, ఒడెలోదిజ్ మన్నుదిజ్ సర్గ కిదెని బత్తిదెజె ఇజి మా బత్తుది ఉదెసం ఇజి. స్ట్రోయికుల లోకుర్ ఇహిజు జెన్ ఇనివన్ని బోదెజ్ వజ నడినికార్. బత్తుదు ఇనిక జగ్గితిజ్బా జర్గివెద్ ఇజి వాక్రు బోదిస్తాన్. బాగ ఆలోసనం కిజెనె వారు విజు సూణార్

34 అహాబ నెగొండార్ పవులు వెస్ట్రో మాటెజ్ నమ్మిత్తారె వన్ని వెట కూడితార్. పవులు వెట కూడితె మహి వరి లొఇ అరయొపగు సర్దుదికాన్ ఒరెన్ దియొనుసియు, దమరి ఇని ఉండ్రె అయ్లొ కొడొ, మరి నెగొండార్ మహార్.

18

పవులు కొరింతు పట్టమదు సువార్త వెప్పినాన్

1 వెనుక, పవులు ఏదెన్ను పట్టమదాన్ సొతాండ్రె కొరింతు ఇని పట్టుం సొహాన్. అయ కొరింతు పట్టమదు సొహాజ్ బానె పొంతు దేసెమ్దికాన్ అక్కుల ఇని ఒరెన్ యూదు వన్నిజ్ నీ వన్ని ఆల్సి ఆతి ప్రెస్సిలదిజ్ నుడతాన్.

2 యూదురు ఏజెరె రోమ పట్టుం డిసి సొండ్రెజ్ వలె ఇజి క్లవదియ ఇని రోమ పెరిరాజు ఆడ్ర సిత్తాన్. ఆడ్ర సిత్తిజ్ యా ఆల్సి మాసిరె ఇటలి దేసెం డిసెస్తారె కొరింతు పట్టమదు కొత్తాజ్ వాతార్. పవులు వరిజ్ నుడతాజ్ సొహాన్.

3 పవులు వరివెట బత్తిజి వరివెట కూడతాజి పణి కిత్తాన్. ఎందనిజ్ ఇహిజ వారుని పవులు టంబుజ్ గుత్తికార్.

4 ప్రతి విస్త్రాతి దినమ్దు పవులు యూదురు మీటిజ్ కిని ఇండ్రె సొహాండ్రె, యూదురు వెట, గ్రెసు వరివెట తర్కిసి వెప్పి వాండ్రు వెస్తాకెజ్ నిజం ఇజి ఒపిసి మహాన్.

5 సీలె తివెతి మసిదోనియదాన్ వాతారె పవులు వెట కూడితార్. అయావలె పవులు పూర్తి టయం దేవుణు మాటెజ్ బోదిసి మహాన్. యేసునె క్రీస్తు ఇజి యూదురుజి డటిసి సాని వెప్పి మహాన్.

6 పవులు వెస్ట్రో మాటెజ్ యూదురు నెక్కపాకారె పవులుజ్ దుసలాడితార్. అయావలె పవులు, “దేవుణు మిజి సిక్కినత్తిజి అక్క మీరె మీ మున్ను తపిసినిదెరె. దిన్ని వందిజ్ నా బాన్ తప్పు సిల్లెద్. ఇబ్బెహాన్ నాను యూదురు ఆజి వరిబాన్ సానానె దేవుణు మాటెజ్ నెస్సిస్సాలె”, ఇజి వెస్తాండ్రె, సొక్కెజు దూల్లి దుల్లెహాన్.

7 పవులు యూదురు మీటిజ్ కిని ఇండ్రెహాన్ సొత్తాండ్రె వడతాద్ మహి తీతియు యూస్తు ఇని వన్ని ఇండ్రె సొహాన్. తీతియు దేవుణుదిజ్ పార్లనం కినికాన్. వన్ని ఇల్లు యూదురు మీటిజ్ కిని ఇల్లు డగ్రునె మహాద్.

8 యూదురి మీటిజ్ ఇల్లు నడిపిసినికాన్ ఆతి క్రీస్తును, వన్ని ఇండ్రెణికార్ విజెరె యేసుప్రబుజ్ నమ్మిత్తార్. మరి కొరింతు పట్టమదికార్ నండెండార్ బా దేవుణు మాటె వహెరె నమ్మిత్తారె బాప్తీసం లాగె ఆతార్.

9 ఒరెనెండ్రె పొదెయ్, దర్సనమ్దు యేసుప్రబు, “నీను తియెల్ ఆవెండ్రె వర్గెల. అలెజి మన్ అ.

10 ఎందనిజ్ ఇహిజ నాను నీవెటెనె మంజిన. నీజి పాడు కిదెజ్ నీ మున్ను ఎయెన్ బారె పిన్. ఎందనిజ్ ఇహిజ యా పట్టమదు నాలొకురె నండెండార్ మనార్”, ఇజి పవులుజ్ వెప్తాన్.

11 అందెజి పవులు దేవుణు మాటెజ్ నెస్సిసి వరి నడిపి ఉండ్రె ఏండుని ఆరు నెలెజ్ దాక మహాన్.

12 గాని గలియోను ఇనికాన్ అయ అకాయ దేసెమ్దిజ్ ఏలుబడి కినికాన్ ఆతివలె యూదురు ఉండ్రె జటు ఆతారె పవులు మున్ను వాతార్. పవులుజ్ అస్తారె కోర్దురు ఒతార్.

13 వారు పవులు మున్ను పిరాద్ కిత్తార్. ఇనిక ఇహిజ, “దేవుణుదిజ్ ఎలాగ పార్లనం కిదెజ్ ఇజి మజి మన్ని రూలుదిజ్ ఎదిరిసివెప్పి వీండ్రు ఒపిసి మారిస్సిలెకెండ్రె వెప్పినాన్”

14 పవులు వర్గెదిజ్ నుడతాన్. అయావలె గలియోను యూదురిజ్ ఈహు వెప్తాన్, “యూదురాండ్రె, ఇక్క ఉండ్రె తప్పు పణి వందిజ్ ఇహిజ, ఉండ్రె నెఇ పణి వందిజ్ ఇహిజ నాను మీమాటెజ్ నెగ్రెండ్రె వెండ్రెజ్ ఆనాద్.

15 గాని ఇక్క ఇనికాదొ ఉండ్రె మాటెవందిజ్, పేర్కువందిజ్, మీ రూలుజ్ వందిజ్ తర్కిస్తెజ్ ఇహిజ మీరె పన్నిజ్ నుడతాదు. నిన్ని నజతిజి వందిజ్ తీర్పు తీర్సిజ్ నజి ఇస్సం సిల్లెద్”, ఇజి యూదురు వెట వెప్తాన్.

16 ఈహు వెప్తాండ్రె వరిజ్ కోర్దుదాన్ పేర్తాన్.

17 అయావలె విజెరె కూడితారె యూదురి మీటిజ్ ఇల్లు నడిపిసినికాన్ ఆతి సొస్టెనేసు ఇనివన్నిజ్ అస్తారె కోర్దు డగ్రు తత్తారె డెయ్యార్. అహిజ్ బా గలియోను యా నజతిజి వందిజ్ ఇనికబా ఇన్వెత్తాన్.

ప్రిస్కిలని అక్కల

18 పవులు దేవుణులవెట మొకిత మహాన్ కాక అక్క వీస్తివలె బుర్ర కత్తె ఆతాన్. కొరింతు పట్టుమదు మరి నండో రోస్సు ముజి వెనుక నమ్మిత్తివరిబాణిజ్ నెలవ లోస్తాండ్రె సాహాన్. కెంకెయాదు సాహార బుర్ర కత్తె ఆతాన్. బాణిజ్ ఓడః ఎక్తాండ్రె సిరియ ఇని దేసెమదిజ్ ప్రిస్కిల, అక్కల వెట సాహాన్.

19 వారు ఎపెసు పట్టుమదు వాతాన్. ప్రిస్కిల అకులరిజ్ డిసి పవులు సానివలె వీరు యా పట్టుమదునె ముజినార్. పవులు ఇహిజ ఒండ్రె బానె మహి యూదురి మీటిజ్ ఇండ్రె సాహాన్. సాహాండ్రె యూదురు వెట తర్కిసి వర్గిజ మహాన్.

20 నెగం రోస్సు మా వెట మన్ అ ఇజి యూదురు పవులు వెన్ బాతిజ్ పవులు కెపితాన్.

21 వరిజ్ డిసి సాహివలె, “దేవుణు ఇస్టుం ఇహిజ మీ డగ్గు మరజి వాన్”, ఇజి వెహ్తాండ్రె సోత్తాన్. ఓడః ఎక్తాండ్రె ఎపెసుదాన్ సాహాన్.

22 కయెనరియాదు అందితాండ్రె పవులు యెరూసలేం పట్టుమదు ఎక్త సాహాన్. బానె మహి నజమదివరిజ్ నుడిః సాహాన్. వెనుక అంతియొకయాదు సాహాన్.

23 బానె నెగం కాలం మహి వెనుక సోతాండ్రె గలతియ ప్రిగియ ఇని దేసెమకాణిజ్ వర్గు బూలాతాండ్రె నమ్మితి వరిజ్ నెస్తిస్తాన్. దేవుణుదిజ్ డిసివిండ నెగండ మండ్రు ఇజి వెహ్సి వరిజ్ దయెరం సిత్తాన్.

అపొలో ఇనికాన్

24 అయావలె అలక్కంత్రియదికాన్ అపొలో ఇని ఒరెన్ యూదవాండ్రు ఎపెసు పట్టుమదు వాతాన్. వాండ్రు గొప్పు నదవితికాన్. దేవుణు మాటదు రాస్తిమన్నికెజ్ విజు బాగ నెస్తిమనికాన్. దేవుణు మాట నెగండ వర్దిదెజ్ వాండ్రు అట్టాన్.

25 వాండ్రు యేసు ప్రబువందిజ్ నెగండ సుర్కుదాన్ నెన్ పిస్తాన్. ఎలాగ బత్తిదెజ్ ఇజి యేసుప్రబు నెన్ పిస్తి మాటిజ్ వాండ్రు నెస్తాన్. గాని యోహాను లోకాజ్ సిత్తి బాప్తీసం వందిజె వాండ్రు నెస్త మహాన్.

26 యూదురు మీటిజ్ కిని ఇండ్రె దయెరమదాన్ దేవుణు మాటిజ్ వర్గితాన్. ప్రిస్కిల అక్కల విన్ని మాటిజ్ వెహారె విన్నిజ్ వరి ఇండ్రె కూక్త ఒత్తార్. ఒత్తారె దేవుణు వరిజ్ సిత్తి సువార్త వందిజ్ వీండ్రు నెన్ ఇ వనకవందిజ్ వన్నిజ్ నెన్ పిస్తాన్.

27 వెనుక అపొలో అకాయ దేసెమదు సాండ్రెజ్ నుడఃతిజ్, ఎపెసుదు మన్ని నమ్మితికార్, నీసు సాన్ అ ఇజి వెహ్సి, అక్కాయాదు మహి నమ్మితివరిజ్, ‘విన్నిజ్ మీ వెట కూడుఃపు’ ఇజి ఉత్తం రాస్తార్. వాండ్రు అబ్బి సాహాండ్రె దేవుణు దయారధమ్దాన్ నమ్మితి వరిజ్ నండ్రె సాయం కిత్తాన్.

28 విజేరె కూడితి మహి బాడ్డిదు అపొలో యూదురువెట వాదిస్తాండ్రె వరి వాదం తప్పు ఇజి గటిజు వెహ్తాన్. యేసునె క్రీస్తు ఇజి దేవుణు మాటదు రాస్తికెజ్ వెహ్సి రుజువ కిత్తాన్.

19

పవులు ఎపెసు పట్టుమదు యేసువందిజ్ వెహ్సి నాన్

1 అపొలో కొరింతు పట్టుమదు మహివలె పవులు, ముస్సు మన్ని దేసెమది నాహాకాణిజ్ బూలాజి సువార్త వెహ్సి ఎపెసు పట్టుమదు వాతాన్. బాన్ నెగండ్రె సిసూరిజ్ నుడఃతాన్.

2 “మీరు నమ్మిత్తివలె దేవుణు ఆత్మ నత్తు మీ ముస్సు వాతాదా సిల్లెదా?”, ఇజి వరిజ్ వెన్ బాతాన్. వెన్ బాతిజ్ సిల్లెద్, దేవుణు ఆత్మ మనాద్ ఇజి మాప్ ఎనెజ్ బా నెన్ ఏవ్”, ఇజి వారు వెహ్తార్.

3 దన్నిజ్ పవులు, “మీరు ఎవేణి బాప్తీసం లాగె ఆతిదెరె”, ఇజి వెన్ బాతిజ్, “మాపు యోహాను సిత్తి నన్ని బాప్తీసం లాగె ఆతాప్” ఇహార్.

4 పవులు మరి వెహ్తాన్, “పాపమకు ఒప్పుకోడఃజి డిసివరిజె యోహాను బాప్తీసం సిత్తాన్. నా వెనుక వాని యేసు ముస్సు నమకం ఇడదు”, ఇజి వెహ్తాండ్రె బాప్తీసం సిత్తాన్.

5 యాక వెహారె వారు యేసుప్రబు పేరు అస్తారె బాప్తీసం లాగె ఆతాన్.

6 పవులు వరి ముస్సు కికు ఇడ్డిజ్ దేవుణు ఆత్మ వరి ముస్సు వాతాద్. వాతిజ్, వారు వరిజ్ నెన్ ఇ ఆఇ బాసెజ్ వర్గితార్. దేవుణుబాణిజ్ వాతి మాటిజ్ వెహ్తాజ్ మొదోల్స్తార్.

7 వారు డగ్గుడగ్గు వన్నెండు మణిసిర్ మొగకొడోర్ మహార్.

8 పవులు అయి ఎవెను పట్టుమీదు మన్ని యూదురి మీటిజ్ ఇండ్రో సోహండ్రో దేవుణు ఏలుబడిజి వందిజ్ తర్కిసి వర్తిజి వరిజ్ ఒప్పుకొడిసి దయరమ్దాన్ వర్తితాన్. ఆహె మూండ్రి నెలెజ్ బానె మహాన్.

9 గాని నెగెండార్ గర్త ఆజి అనల నమ్మివితార్. వారు పవులు వెహ్తా నూవార్త వందిజ్ విజెరి ముందాల దునలాడిజి వర్తితార్. అందెజె పవులు వరిజ్ డిసి నమ్మితి వరిజ్ వన్నివెట ఒత్తె రోజు రోజు తురాను ఇని ఒరెన్ వన్ని బడిజి ఇండ్రో నెన్సిన్త మహాన్.

10 రుండి పంటిజ్ దాక పవులు యాలెకెండ్ వెహ్సిసిత్తిమహిజ్ అయి ఆసియ ప్రాంతమీదు బత్తిజిని యూదురు, యూదురు ఆఇకార్, విజెరి దేవుణు మాట వెహ్.

11 దేవుణు పవులువెట ఒద్దె గొప్ప బమ్మాతి పణిజ్ జర్గిస్తాన్.

12 వన్ని తువాలిజ్, నడుముదు తొహ్ని కటు జబ్బు మన్నివరి డర్గు తత్తిజ్ వారు నెగెండ ఆతార్. దెయమ్మకు విజు డిస్సె సోహె.

13 అయావలె యూదురు లోఇ నెగెండార్ మోటిగురుజ్ బూలాజి దెయమ్మకాజ్ పేర్జి మహార్. దెయమ్మకాజ్ పేర్జెజ్ నెన్సికార్ వారు. వారు యేసుప్రబు పేరు అసి దెయమ్మకాజ్ పేర్జెజ్ సుడెతార్. “పవులు వెహ్సి యేసు నత్తుదాన్ వెహ్సిన్, నీను విన్నిజ్ డిసిసి సోన్అ ఇజి నాను ఆడ్ర సిజిన్”, ఇజి వారు దెయమ్మకాజ్ అన్సి వరిజ్ వెహ్సి మహార్.

14 స్కెవ ఇని ఒరెన్ యూదపెరిపుజెరి మరిసిర్ ఏడుగురు యా లెకెండ్ దెయమ్మకాజ్ పేర్దెజ్ సుడెజి మహార్.

15 గాని ఆ దెయం వరివెట, “నాను యేసుజ్ నెస్సా, పవులు నెసిన్, గాని మీరు ఎయిదెర్?”, ఇజి వెన్బాతాన్.

16 అయి దెయం అన్సిమహికాన్ వరిమున్సు ఎగ్రితాండ్రి విజెరిజ్ అడిగి అర్థాండ్రి గెలిస్తాన్. వరి పాతెజ్ కిన్సి విసిర్తాండ్రి గొప్ప దెబ్బెజ్ డెయ్యాన్. అందెజె వారు ఏడుగురు లోకుర్ డుమ్డ ఆతారి దెబ్బెజ్ తాక్తిజ్ అయి ఇండ్రోణిజ్ సోత్తారి ఉహ్కార్.

17 అయి ఎవెను పట్టుమీదు మహి విజెరి యూదురు, యూదురు ఆఇ జాతిదికార్ యాక వెహ్రి గొప్ప తియెలాతార్. యేసుప్రబు పేరుదిజ్ గొప్ప గవ్వరం సిత్తార్.

18 కొత్తజ్ నమ్మితికార్ నండ్రిందార్ వాతారి వారు కిత్తి సెఇ పణిజ్ విజు విజెరి ముందాల వెహ్రి ఒప్పుకొటార్.

19 కొత్తజ్ నమ్మితి నెట్టిపణికినికార్ నండ్రిందార్ మంత్రమీదు రాన్సిమని వరి పున్తకమ్మకు తత్తారి విజెరి ముందాల అక్కెజ్ సుర్తార్. వారు లెక్క సుడెతిజ్ వనక దర యబాయ్ వెయిజ్ వెండిరుపాయిజ్ *వాతె.

20 ఈహె దేవుణు - మాట విజుబాన్ సాటి ఆతాదె నండ్రిందార్ నమ్మితికార్ ఆతార్.

21 ఇక్కెజ్ విజు జర్గితి వెనుక పవులు మసిదోనియ అకాయ ఇని దేసమ్కాజ్ సొన్సి దేవుణు నజమ్కాజ్ సుడిజి సొన్సి వెనుక బాణిజ్ యెరూసలేం పట్టుమీదుబా సొండ్రిజ్వలె ఇజి ఒడిజిబిత్తాన్. వెనుక రోము పట్టుమీదుబా సొండ్రిజ్వలె ఇజి ఒడిజిబిత్తాన్.

22 వన్నివెట కూడిజి పణి కిజిమహి తిమోతి, ఎరాస్టు ఇనివరిజ్ మసిదోనియాదు పొక్తాండ్రి పవులు నెగెం కాలం ఆసియ ప్రాంతమీదు బత్తితాన్.

ఎవెను పట్టుమీదు గొడబ జర్గితాద్

23 అయి కాలమ్మదు యేసుప్రబు మున్సు లోకుర్ నమకం ఇట్టి వందిజ్ ఉండ్రి గొప్ప గొడబ వాతాద్.

24 ఇక్క ఎలాగ ఇహిజ, దెవెత్రి ఇని ఒరెన్ సరాబు మహాన్. వాండ్రు వెండిదాన్ అర్తెమి ఇని దెయమ్మదిజ్ ఇండ్రి ఇట్టి ఇజిరి గుడిజ్ తయార్ కినికాన్. యా దెవెత్రిజ్, వన్నివెట మహి సరాబురిజ్ విజెరిజ్ యా పణిదాన్ నండ్రి లాబం దోహ్కీ మహాద్.

25 యా దెవెత్రి యా పణికినివరిజ్, వరిలెకెండ్ ఆఇపణిజ్ కిని వరిజ్బా కూడువ్తాండ్రి ఈహు వెహ్సాన్, “బాబురాండ్రి, యా పణిదానె ఎక్కు అన్సి మజి వానాద్ ఇజి మీరు నెసినిదెర్గదె.

* 19:19 19:19 ఉండ్రి వెండి రుపాయి ఉండ్రి రోజుది కూలి † 19:24 19:24 ఇజిరి గుడిజ్ ఇహిజ అర్తెమి దెయమ్మది గుడిది ఇజిరి బొమ్మెజ్

26 గాని కికాణిజ్ తయారీ కినికెజ్ దెయమ్మకు ఆఱు ఇజి యా పవులు వెప్పి, ఎపెసు పట్టుమ్దు ఉండ్రె ఆవద్, ఆసియ ప్రాంతమ్దు విజుబాణిలెకెండ నండొండారిజ్ నమ్మిసి మహ్సాన్. ఇక మీరు నుడఃజినిదెర్. వెంజినిదెర్.

27 ఏలు గొప్పు ప్రమాదం ఆజినాద్. మా పణి వందిజ్ మున్ని నెగి పేరు పాడాఃనాద్దె. అక్కాదె ఆవండ పెరి దెయమాతి యా అర్తెమి దెయమ్మది గుడిఃబా ఎయెరిజ్బా అవ్సరం సిల్లెండ ఆనాద్. ఆసియ దేసమ్దికార్ విజేర్, బూలోకం విజు పూజ కిని యా అర్తెమి దెయమ్మది గొప్పు పేరు సిల్లెండ ఆనాద్లె”, ఇజి యా దెమెత్తి వరివెట వెహ్సాన్.

28 యాక వెహరె వారు గొప్పు కోపం ఆతారె, “ఎపెసుదికార్ పూజకిని అర్తెమి దెయం గొప్పు పెరి దెయం”, ఇజి గొప్పు గగోల్ ఆతారె.

29 అయ పట్టుమ్దు గొప్పు కలిబిలి ఆతాద్. వారు ఉండ్రె మన్ను ఆతారె పవులువెట బూలాజి మహి మసిదోని - యాదికార్ గాయి, అరిస్తరు. ఇని రివిరిజ్ అస్తారె అయ పట్టుమ్దు మున్ని పెరి సద్దుడు[‡] లాగిత ఒతారె.

30 మంద కూడిఃతి మహి అయ సద్దుడు సొండ్రెజ్ ఇజి పవులు ఒడిఃబడిఃబితాన్. గాని నమ్మితికార్ వన్నిజ్ సరి సిపితారె.

31 పవులు కూలయెర్ ఆతి అయ ఆసియ ప్రాంతమ్ది అతికారి లోకుర్ నెగొండారబా లోకుర్ కూడఃజివాతిమహిబాన్ సొన్మా ఇజి కల్లు పొక్తారె బతిమాలితారె.

32 అయ సద్దుడు గొప్పు కలిబిలి జర్గితాద్. నెగొండార అహు వెప్పి, మరి నెగొండార ఈహు వెప్పి గగోల్ ఆతారె. గాని వారు ఇని దన్నిజ్ కూడిఃత మనారొ ఇజి నండొ లోకుర్ నెన్వితారె.

33 యూదురు అలెకెండొర్ ఇనివన్నిజ్, విజెరి వందిజ్ నీన వర్గిల ఇజి లోకుర్ నడిఃబుహ్సాన్ ముందాల నిల్వారె. అలెజి మండ్రు ఇజి వాండ్రు కియు సాప్తాండ్రె ఉండ్రె మాట నెవ్నూ ఇజి నుడఃజి మహ్సాన్.

34 గాని వాండ్రు యూద్ వాండ్రు ఇజి నెస్తారె వారు రుండి గంటెజ్ దాక, ‘ఎపెసువరి అర్తెమి దెయం గొప్పు దెయం’ ఇజి ఉండ్రెలెకెండ గగోల్ ఆతారె.

35 అయావలె అయ పట్టుం కర్తం *వాతాండ్రె లోకాజ్ విజెరిజ్ గగోల్ ఆవండ మండ్రు ఇజి వెహ్సాన్. “ఎపెసు పట్టుమ్దికిదెరా, మాపు అర్తెమి పెరి దెయమ్మది గుడిఃదిజ్ కావ్ కినికావ్ ఇజి విజేర్ నెసినారగదె. ఆగాసమ్దాన్ అర్తి అర్తెమి దెయమ్మది పణుకుదిజ్బా కాపు కినికార్ మాపె ఇజి విజేర్ నెసినారగదె.

36 యా సజతిజి విజు ఎద్రిసినిక ఆవద్. అహిజి మీరు ఏలు అలెజి మండ్రెజ్ వలె. ఇనికబా గజిబిజి ఆజి కిదెజ్ ఆవద్.

37 మీరు యా లోకాజ్ లాగితి తత్తిదెర్. గాని మీరు గుడిఃజి డొజి కినికార్ ఆవర్. మా దెయమ్మదిజ్ దుసలాడఃవర్.

38 దెమెత్తిజ్, వన్నివెట కూడిఃతి మహి పణిమణిసిరిజ్ ఎయెన్ మున్నుబా నేరం మొప్పెజ్ ఇహిజి, కోర్టుజ్ నడిఃసినె, అతికారి లోకుర్ మనారె. బానె సొన్మి వారు ఒరెన్మున్ను, మరి ఒరెన్ నేరమ్మకు సిదెజ్.

39 గాని మరి ఇనివందిజ్ ఇనికబా తగ్గు మహిజి అక్క, రోజు జర్గిని సద్దుడు వర్గిజి తీర్పు తీర్సిజ్.

40 నేండ్రు జర్గితి గొడఃబవందిజ్ రోమ అతికారిజు మా మున్ను, కేసు పొక్తారొ ఇజి నాను తియాలాజిన. జర్గితి గొడఃబవందిజ్ వెప్తాజ్ ఇని మాటబా సిల్లెద్. ఎందానిజ్ ఇహిజి యావజి కూడఃజి గగోలాజి వర్గినిదన్నిజ్ వెప్తాజ్ అసల కారణం సిల్లెద్”, ఇజి వరివెట వెహ్సాన్[†].

41 వాండ్రు ఈహు వెప్పి కూడిఃతి మహి వరిజ్ విజెరిజ్ సొండ్రు ఇజి పొక్తాన్.

20

పవులు మసిదోనియ గ్రీసు దేసెమ్కాజ్ సాహాన్

[‡] 19:29 19:29 సద్దు ఇహిజి స్పీడియం లెకెండ మహ్సాద్. బానె లోకు కూడఃనార బేను కర్గినార. లోకు నురుల బసారె. ఇరువయలెయెయె లోకుర్ బెన్జెజ్ ఆనాద్ అయ సద్దుడు. కొడెవేలి నని గుండ్రాజ్ మనాద్ అయ సద్దు. గాని మేడః సిల్లెద్. ఎపెసు పట్టుం నడిఃమిద్ మహ్సాద్ యా సద్దు. **19:33 19:33** గొడఃబ కినికార్ మాపు యూదురు ఆవద్, పవులుని వన్నివెట మన్నికారె ఇజి వెప్తాజ్ నుడఃతాన్ * **19:35 19:35** ముకెలమాతి ఒరెన్ అతికారి [†] **19:40 19:40** ఎపెసు పట్టుమ్దు మున్ని లోకుర్వందిజ్ యా ముకెలమాతి అతికారి, రోమ అతికారిజు వెట వర్గినికాన్. లోకు గొడఃబ పుటిస్తెజి వరిజ్ వాని అపుకాసమ్మకు సిల్లెండ ఆనె

1 అయి గోడఃబ అణస్తి వెనుక పవులు నమ్మిత్తివరిజ్ కూక్పిస్తాండ్రె వరి నమకమ్దిజ్ నత్తు కిబిస్తాన్. దయరమ్మున్ను మండ్రు ఇజి వెప్పి నెల్గు లొస్తాండ్రె మసిదోనియదు సొండ్రెజ్ సొత్తాన్.

2 పవులు ఆ దేసం విజు బూలాజి నమ్మిత్తి వరిజ్ సుడఃజి సొహాన్. వరి నమకమ్దిజ్ నత్తు కిబిస్తాన్. వెనుక అకాయ ఇజి కూక్కి గ్రిసు దేసమ్దు వాతాన్

3 పవులు అబ్బి మూండ్రె నెలెజ్ మహాన్. ఓడః ఎక్కి సిరియాదు సొన ఇజి మహిజ్ యూదురు వన్నిజ్ సప్తైజ్ కుట్ర అజి మహో ఇజి వెహాన్. అక్కు నెస్తాండ్రె మసిదోనియదాన్ నడిఃజి సొన్ని అబ్బిణాన్ ఓడః ఎక్కి సొండ్రెజ్ ఒడిఃబితాన్.

4 పురు మరిసి ఆతి బెరెయ పట్టుమ్దికాన్ సొపత్తు ఇనికాన్, దెసలోనియదికార్ అరిస్తరక, సెకుందు ఇనికార్, దెరెబ పట్టుమ్దికాన్ గాయి ఇనికాన్, మరి తిమోతి, ఆసియ దేసమ్దికార్ ఆతి తుకికు, త్రోపిము ఇనికార్ పవులు వెట సొహోర్.

5 వీరు ముందాల్నా సొహారె త్రోయ ఇని పట్టుం మా వందిజ్ సుడఃజి మహో*.

6 పులాజ్ ఆఇ రొట్టజి పండోయ్ ఆతి వెనుక మాపు పిలిప్పి పట్టుం డిసి ఓడః ఎక్కి అయదు రోన్కాణ్ త్రోయ† పట్టుం వాతావ్. అబ్బి ముందాల సొహిమహిపరివెట ఏడు రొన్ను మహావ్.

పవులు సాతివన్నిజ్ నిక్తాన్

7 వారమ్ది మొదోహి రోజు ‡ప్రబు ఏరపాటు కిత్తి బోజనం తిండ్రెజ్ మాపు కూడిత వాతావ్. అయావలె పవులు మర్న నాండిజ్ సొనాలె ఇజి వరిజ్ నెస్తిస్తాన్. మదరెయ - దాక నండో మాటిజ్ వర్గిజి మహాన్.

8 మాపు కూడితి మహి మేడః గదిదు నండో దివెజ్ మహా.

9 అయావలె అయ్యకు ఇని ఒరెన్ దజడాయెన్ కిటికిదు బస్తాండ్రె వెంజిమహాన్. వెంజిమహిజ్ నిద్ర వాతాద్. పవులు లాపు సుట్టు నెస్తిస్తా మహిజ్ యా దజడాయెన్ నిద్ర లావాత్తిజ్ జోజితాండ్రె మూండ్రె అంత్రంకాణిజ్ అడిఃగి అర్తాన్. పెస్తా సుడఃతిజ్ సాత మహాన్.

10 గాని పవులు అడ్లి డిశిగితాండ్రె వన్ని మున్ను అర్ని వన్నిజ్ పొంబిజి అస్తాన్. “మీరు బాద ఆమాట్. వన్ని పాణం వన్నిలోఇనె మనాద్”, ఇజి వరివెట వెహాన్.

11 పవులు మరి మేడఃమున్ను సొహండ్రె రొటె రుక్కి వరివెట బోజనం కిత్తాన్. జాయానిదాక నండో మాటిజ్ వర్గిజి సొత్తాండ్రె సొహాన్.

12 వారు బత్తిత్తి మహి అయ దజడాజ్ ఇండ్రె తతార్ గొప్ప సర్ల అతార్.

పవులు ఎవెసు పట్టుమ్ది పెద్దెలుజువెట సెలవ లొస్తాండ్రె యెరుసలేమ్దు సొహాన్.

13 పవులు అసొసు ఇనిబాన్ నడిఃజి సొండ్రెజాతిజ్ మాపు వన్నిముందాల ఓడః ఎక్కి అసొసు సొహావ్. పవులుజ్ బానె ఓడఃదు ఎక్వావ్ ఇజి మాపు ఒడిఃబితావ్.

14 అసొసుదు పవులు మా వెట కూడితివలె మాపు వన్నిజ్ ఓడఃదు ఎక్కిస్తాపె మితులె ఇని బాడ్డిదు వాతావ్.

15 బాణిజ్ సొసి మహ్న నాండిజ్ కియొసు ఇని బాడ్డిజి ఎర్దు వాతావ్. మహ్న నాండిజ్ నెమొసు ఇనిబాన్ సొహాపె బాణిజ్ మహ్న నాండిజ్ మెలితె ఇని బాడ్డిదు వాతావ్.

16 వెంతెకోన్సు ఇని పండోయనాండిజ్ యెరుసలేమ్దు అందిదిజ్వలె ఇజి పవులు తొత్త ఆతాన్. ఆసియదు సొహిజి అలస్యం ఆనాద్ ఇజి ఎవెసు పట్టుమ్దు సొన్ఎండ్రె తినాజ్ సొండ్రెజ్ ఒడిఃబిడిఃబితాన్.

17 అందెజె పవులు మిలెతుదు అందితివలె ఎవెసు పట్టుమ్దు మన్ని నజమ్ది పెద్దెల్జి వన్నిబాన్ కూక్పిస్తాన్.

18 వారు వన్ని డగ్రు వాతిజ్ పవులు వరివెట ఈహు వెహాన్, “నాసు ఆసియదు వాతి మొదోల్ దినమ్కాజ్ ఎలాకాలం మీ నడిఃమి ఎలాగ బత్తిజి మహానో ఇజి మీరె నెస్తిదెరెగదె.

* 20:5 20:5 యా పుస్తకం రాన్మహి లాక పవులువెట వయనం కిదెజ్ మర్తి వాతాన్ † 20:6 20:6 మసిదోనియ దేసమ్దు మన్ని పిలిప్పి ఇనిబాణిజ్ ఓడః ఎక్తార్. గాలి వరి ఎర్దు డెయ్తిజ్ త్రోయ అందిదిజ్ అయదు రొన్ను ఆతి. సొహావలె రుంఢి రొన్నునె ఆతి మహా. 16:11 ‡ 20:7 20:7 యూదురి దినమకు లెక్కి కినిక ఎలాగ ఇహాజి సనివారం పొదెయ్ అరు గంటిజ్ కొత్త వారం మొదెల్లినాద్. లాక యా పుస్తకం రాన్మవలె యాలెకెంఢె లెక్కి కిత్తాన్ ఇజి బయ్బిల్వందిజ్ ఎక్కు నదు కిత్తకార్ నండెడాల్ వెప్పినార్

19 యూదురు నజీ సప్తైజ్ కుట్ట కిజి నజీ మాలెజ్ కిత్తార్ గాని నాసు గొప్పు వాండ్రు ఇజి ఒడిఃబివిండ కళెరు వాక్కి దేవుణు పణి కిజి ఎలాగ మహానో ఇజి నిజీనె తెలినాద.

20 సిక్కుదాన్ ఎలాగ గెలిస్తెజ్ ఇని వందిజ్ అవ్సరమాతిక ఇనికబా సరినె మీలోకుర్ నడిఃమి విజేరె కూడిఃతి మహి బాడ్డిదు నాసు సాట్టిన్. మీ ఇల్లాజ్ బా వాతానె మిజి నెన్సిన్.

21 పావమకు ఒప్పుకోడిఃజి డిఃసిసీజి, దేవుణుదిజ్ లోజీజి, మా ప్రబు ఆతి యేసుక్రీస్తు మున్సు, నమకం ఇడదు ఇజి నాసు యూదురిజ్ యూదురు ఆఇ వరిజ్ సాసి వెప్తా.

22 ఇదిలో, నాసు దేవుణు ఆత్మదిజ్ లోజీత్తానె యెరూసలేమ్దు సొన్నిన. అబ్బె నజీ ఇనిక జర్గినాడ్లెనో నజీ తెలివద్.

23 గాని విజి పట్టుమ్కాజ్ బా, నజీ మాలెజ్ వాజినె ఇజి, యెరూసలేమ్దు నజీ జెలిదు ఇడ్లార్లె ఇజి, దేవుణు ఆత్మ నజీ వెప్పినాన్.

24 గాని నా పాణమ్దిజ్ నాసు కండెజ్ బా విలువ సివి. ఎందానిజ్ ఇహిజ ప్రబు ఆతి యేసు నజీ సిత్తి పణి పూర్తి కిదెజె. అయ పణి ఇనిక ఇహిజ దేవుణు దయాదర్పమ్వందిజ్ మన్ని సువార్త వందిజ్ నాసు సాసి వెప్తాజ్.

25 నాసు బూలాజి దేవుణు ఏలుబడిః వందిజ్ మీ నడిఃమి వెప్తా గాని మీలోఇ ఎయిదెర్బా మరి నజీ తోఇదెర్లె ఇజి నాసు ఏలు నెస్సా.

26 గాని మీలోఇ ఎయిదెర్బా పాడాఃజి సాహిజ నా పూసి తెవిత్తాద్ ఇజి నేండ్రు మీరె సాసిర్ ఆనిదెర్లె.

27 దేవుణు ఇన్డం పూర్తి నాసు మిజి నెన్సిన్. ఇనికబా డాఃవ్పత.

28 దేవుణు వన్ని సొంత మరిసి నల సితండ్రె సజమ్దిజ్ నమ్పాదిస్తాన్. అయ సజమ్దిజ్ మీరు బాగ కావ్ కిదెజ్. దేవుణు ఆత్మ మిజి సజమ్దిజ్ నుడఃదెజ్ ఒపజెప్తాన్. అయ పణిలోఇ నెగ్రెండ నుడఃదు. మీవందిజ్ బా మీరు జాగర్ల నుడఃదు.

29 నాసు సాహి వెనుక క్రూరమాతి కార్నుకుడిఃజ్ నన్ని లోకుర్ మీలోఇ డుగ్నార్లె ఇజి నాసు నెస్సా. వారు నమ్మితి వరి మున్సు కనికారం తోరిన్విర్. సజమ్దిజ్ పాడు కిసార్.

30 మీలోఇహానె నెగొండార్, నమ్మితి వరిజ్ వెకొరి మాటెజ్ వెప్పా నెగ్గి సరిదాన్ లాగ్గి సెఇ సరిదు నడిఃపిసి, వరివెట కూక్కి ఒతెజ్ నూణార్లె.

31 అహిజ జాగర్ల మండ్రు. నాసు మూండ్రె వంటెజ్ దాక రెయుపొగలు కళెరు వాక్కి నమకమ్వందిజ్ విజెరిజ్, ఒరెన్ ఒరెన్ వన్నిజ్ డిఃన్విండ వెప్తా మన్సు. అక్క మీరు ఒడిఃబిజి జాగర్ల మండ్రు.

32 దేవుణుదిజ్ ని వన్ని దయాదర్పం తోరిన్సి మాటదిజ్ మిజి ఒపజెప్పిన. మీ నమకం నండ్రె కిదెజ్ అట్టి దేవుణు - మాటదిజ్ మిజి ఒపజెప్పిన. దేవుణుదిజ్ కేట ఆతి వరివెట మిజి అక్కు సీదెజ్ అట్టి దేవుణుమాటదిజ్ మిజి ఒపజెప్పిన.

33 నాసు ఎయె డబ్బుదిజ్, బజరమ్దిజ్, సొక్కెజ్ పాతెజ్ వందిజ్ ఆస ఆవత

34 నా అవ్సరమ్వందిజ్ గాని నావెట మహివరి అవ్సరమ్కు వందిజ్ గాని నా కికాజిణిజి పణి కిజి బత్తిత్త ఇజి మీరు నెసినిదెర్.

35 నాసు కిత్తి విజి పణిజాజ్ మిజి నెన్పిస్తిక ఇనిక ఇహిజ మీరు డటం పణి కిజి సిల్లి వరిజ్ సాయం కిదెజ్. దిన్ని వందిజ్ యేసుప్రబు నెన్పిస్తి మాట గుర్తు కిదెజ్. అక్క ఇనిక ఇహిజ సీనివన్ని సర్ల లొన్పివన్ని సర్ల ఇంక వెరిక.

36 పవులు ఈహు వెప్తాండ్రె ముణుకుజ్ ఊరొజి వారు విజెరె వెట పార్లనం కిత్తాన్.

37 వారు విజెరె పవులుజ్ పొంబితారె వన్నిజ్ ముద్దు కిజి లాపు అడఃబాతార్.

38 ఎందానిజ్ ఇహిజ, మీరు ఇబ్బెహాన్ నజీ నుడఃఇదెర్లె ఇజి పవులు వెప్తా అయ మాటవందిజి గొప్పు దుకం ఆతార్. వారు ఓడః ఎక్కి అందు పవులు ఇట్టా వాతార్.

1 మాపు వరిజ్ డిసిసోత్తి వెనుక ఓడః ఎక్రాపె తినాజ్ సొన్ని కోసు ఇనిబాన్ వాతావ్. ముహ్న నాండిజ్ రోదు ఇనిబాన్ వాతాపె బాణిజ్ పతరు ఇనిబాన్ వాతావ్.

2 బాన్ పెనికెదిజ్ సొని ఉండ్రీ ఓడః సుడఃతాపె, ఎక్రాపె సొహావ్.

3 సొహాపె కుప్త ఇని ద్విప్పు మా డేబ్ర పడఃకాద్ సుడఃతావ్ గాని దన్ని డేబ్ర పడఃకదాన్ తినాజ్ సిరియ దరోల్ సొహాపె, తూరు ఇనిబాన్ డిఃగితావ్. బాన్ డిఃవైజ్ ఓడఃదు సామనమ్ కు మహా.

4 బాన్ సిసూరిజ్ రెబాజి సుడఃతిజ్ వరివెట కూడితాపె ఏడు రోస్సు, బాన్ మహావ్. 'నీను యెరూసలేమ్ దు సొన్మా', ఇజి దేవుణు అత్తు వెప్తి లెకెండ్ పవులు వెప్తార్.

5-6 గాని బాణిజ్ సొండ్రెజ్ టయం ఆతివలె మాపు సొత్తాపె పయనం కితావ్. నమ్మితికార్ విజేరె, అయ్లికొడోక, కొడోక, మా వెట పట్టుం వెల్లిదాక ఇడః వాతార్. మాపు విజెవె నమ్దరం ఒడ్డుదు ముణుకుజ్ ఊరజి పార్దనం కితావె ఒరెన్ వెట ఒరెన్ సెలవ లొస్తావె ఓడః ఎక్రావ్. వారు వరి ఇండ్రీ మరజి సొహార్.

7 మాపు తూరుదాన్ సొత్తాపె తొలెమాయి ఇని పట్టుమ్ దు వాతావ్. బాన్ నమ్మితి తంబెరెసిరిజ్ సుడిః సొహాపె వరివెట ఉండ్రీ రోజు మహావ్.

8 ముహ్న నాండిజ్ సొత్తాపె కయనరియాదు వాతావ్. బాన్ సువార్త వెప్పిక్రాన్ పిలిపు ఇండ్రీ సొహాపె వన్ని ఇండ్రీ మహావ్. పిలిపు యెరూసలేమ్ దు మన్ని నజమ్ దు ఏరపాటు కిత్తి ఏడుగురు లొఇ ఒరెన్.

9 అయా పిలిపుజ్ నాల్లురు విడః అయ్లిక్ మహా. అవిక్ దేవుణుబాణిజ్ వాని మాటజ్ వెప్పిక్రెజ్.

10 మాపు నెగం రోస్సు, బాన్ మహివలె అగబు ఇని ఒరెన్ ప్రవక్త యూదయ ప్రాంతమ్ దాన్ బాన్ వాతాన్.

11 అగబు మాపు మన్నిబాన్ వాతాండ్రె పవులు నడుముదు తొప్తి మన్ని కటు కుతాన్. కుతాండ్రె, వన్ని కికాజ్ కాల్యాజ్ అగబు తొహా ఆతాన్. తొహా ఆతండ్రె, యా కటు ఎయెరెది ఇహిజి వన్నిజ్ యెరూసలేమ్ దు మన్ని యూదురు తొప్పి ఆఇ లోకాజ్ ఒపజెప్పార్లె ఇజి దేవుణు అత్తు వెప్పిక్రాన్ ఇజి యా అగబు వెప్పాన్.

12 యాక మాపు వెహావె మాపు, బాన్ మహి నమ్మితికార్, పవులు వెట, "యెరూ - నలేమ్ దు సొన్మా", ఇజి బతిమాళితావ్.

13 దన్నిజ్ పవులు, "మీరు ఎందనిజ్ అడఃబాజి నజి దుకం కిబిసినిదెరె? నా ప్రలు ఆతి యేనువందిజ్ తొహా అదిజి ఆవిద్, వన్ని వందిజ్ యెరూసలేమ్ దు సాదెజ్ బా నాను ఒప్పుకోడఃజన", ఇహాన్.

14 పవులు మా మాటజ్ ఒప్పుకోడఃఇతిజ్ మాపు అలెతావ్. దేవుణుదిజ్ ఇస్తమాతి వజి జర్గిపిద్ ఇహావ్.

15 అయ్ పట్టుమ్ దు నెగం రోస్సు, మహి వెనుక మాపు సామనమ్ కు విజి అస్తాపె ఎక్కు యెరూసలేం పట్టుమ్ దు సొండ్రెజ్ సొత్తావ్.

16 కయనరియదాన్ నెగెండార్ సిసూరి మా వెట వాతారె మాపు మండ్రెజ్ ఇజి ఒడిఃబిత్తి మ్మాసోను ఇండ్రీ మజి తతార్. మ్మాసోను కుప్తదికాన్. మొదోహాన్ అసి యేసుప్రబు సిసూడః ఆతికాన్.

పవులు యెరూసలేమ్ దు అందితాన్

17 మాపు యెరూసలేమ్ దు వాతిజ్ నమ్మిత్తి తంబెరెసిర్ మజి సర్దదాన్ మర్యాద్ కితార్.

18 మర్న నాండిజ్ పవులు మా వెట యాకోబు డర్గు సొహాన్. సజం పెద్దెలుబు విజేరె బాన్ మహార్.

19 పవులు వరిజ్ మాడిఃస్తాన్. వెనుక యూదురు ఆఇవరిలొఇ పవులు కిత్తి సువార్త పణిదాన్ దేవుణు జర్గిస్సికెజ్ విజి పూర్తి వెప్పాన్.

20 వారు ఇక్కిజ్ వెహారె దేవుణుదిజ్ స్తుతి కితార్. పవులు వెట వారు ఈహు వెప్తార్, "పవులునా, యూదురు లొఇ నమ్మితికార్ నండ్రె వెయుజ్ లోకుర్ మనార్ ఇజి నీను సుడఃజనిగదె. వారు విజేరె దేవుణు మోసాజ్ సిత్తి రూలుజ్ వందిజ్ నండ్రె పట్టుదు మనికార్.

21 ఇచ్చె మన్ని యూదురు విజేరె నీవందిజ్ ఉండ్రీ బోగట్ వెహా మనార్. అక్క ఇనిక ఇహిజి, మోసె వెప్పిక్రెజ్ విజి డిఃస్రెజ్ ఇజి నీను యూదురు ఆఇవరి లొఇ బత్తీని యూదురిజ్ నెస్సినిని ఇజి. వరి ఇజెరి కొడోకెరిజ్ సునతి కినిక ఆవిద్ ఇజి నీను నెస్సినిని ఇజి. మరి, యూదురు ఎలొగ నడిఃదెజ్ ఇజి మహి పదతిజ్ వజి నడిఃనిక ఆవిద్ ఇజి నీను నెస్సినిని ఇజి. వినకవందిజ్ బోగట్ వెహా మహావ్", ఇహార్.

22 "అహిజి మాటు ఇనిక కిదెజ్? నీను వాతివందిజ్ విజేరె తవ్విండ వెనార్.

23 అందెజె మాపు వెప్పొవజ నీను కిత. ఇనిక ఇహిజ మొకు నిల్పి మన్ని నాల్వర్ మొగావారు ఇబ్బెనె మనార్.

24 నీను వరిజ్ వెట కూక్కి ఒసి వారు మొకుబడిః సొన్నిసైజ్ వరివెట దేవుణు గుడిఃదు సొన్అ. వారు పూజ సీజె బుర్ర బోడి కిదెజ్ మన్ని కర్పు సీనె సిత. అహిజ నీవందిజ్ లోకుర్ వెహిమన్ని బోగల్ నిజం ఆవిద్ ఇజి విజేరె నెస్సార్. నీను మొసె సీత్తి రూలుజు లోజిజి నడిఃజనాన్ ఇజి విజేరె నెస్సార్.

25 అహిజ యూదురు ఆజ నమ్మితి వరిజ్ మాపు ఇనిక తీర్మానం కిజె రాస్త మనాద్ ఇహిజ, బొమ్మెజు పూజ కిత్తి వన్కాజ్ తీనిక ఆవిద్ ఇజి, నల తినిక ఆవిద్ ఇజి, మెడః పిడిఃక్కి నప్పి వనకాజ్ తినిక ఆవిద్ ఇజి. రంకు బూలానిక ఆవిద్ ఇజి". ఈహు నజమ్ది పెద్దెలుజు పవులు వెవ్వార్.

26 అందెజె పవులు, మప్పా నాండిజ్ అయ నాల్వరిజ్ వెట కూక్కి ఒతండ్రె వరివెట సుబ్బురం ఆతాన్. వారు సుబ్బురం ఆజి మంజిని కాలం ఎనెజ్ అందినాద్, వరి లోజి విజేరివందిజ్ ఎనెజ్ పూజ కిదెజ్, ఇక్కెజ్ వెప్పొవందిజ్ పవులు దేవుణు గుడిఃదు యూదురు లోజ మొగావారు మండ్రెజ్ మన్ని బాడ్డిదు సొహాన్.*

పవులు యూదురు అస్సార్

27 సుబ్బురం ఆజిమంజిని ఏడు రోస్కు డగ్గు ఆతాద్. అయావలి ఆసిందున్ వాతిమహి సెగొండార్ యూదురు, దేవుణు గుడిఃదు యూద మొగవరిజ్ మన్ని బాడ్డిఃదు పవులు సుడఃతారె, బానె మహి లోకాజ్ విజేరిజ్ కలిబిలి కితారె వన్నిజ్ అస్సార్.

28 "ఇస్సాయేలు లోకాండె, తోడుః కిదెజ్ రద్దు. మా లోకాజ్ పడఃఇకెజ్, మొసె సీత్తి రూలుజు పడఃఇకెజ్, యా దేవుణు గుడిఃదిజ్ పడఃఇకెజ్ విజు బాడ్డిజు సొన్ని లోకాజ్ విజేరిజ్ నెన్పిసినికాన్ వీండ్రె. అక్కాదె ఆవిండ, వీండ్రు యూదురు ఆజ వరిజ్ దేవుణు గుడిఃదు కూక్కి తతండ్రె దేవుణుదిజ్ కేట కిత్తి యా బాడ్డి మయ్పు కిత్తాన్", ఇజి నండ్ గగోలాతార్.

29 ఎందానిజ్ ఇహిజ, పట్టుమదు పవులు వెట యూదురు ఆజ ఎవెసుదికాన్ త్రోపిమును ఇని ఒరెన్ వన్నిజ్ ముందాత్తి వారు సుడఃత మహార్. వన్నిజ్ పవులు దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిఃదు తతాన్ ఇజి వారు ఒడిఃబితార్†.

30 పట్టుమదు మహి లోకుర్ విజేరె కలిబిలి ఆతార్. విజుబాణిజ్ లోకుర్ మందిజ్ మందిజ్ ఆజి ఉహ్కీ వాతారె పవులుజ్ అస్సారె దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిహాన్ వెల్లి లాగితార్. వెటనె యూదురి మొగ్గ వరిజ్ మండ్రెజ్ మన్ని బాడ్డిదు సొని సిఫ్హాజ్ కెహి ఆతె.

31 పవులుజ్ వారు నప్పెజ్ ఇజి సుడఃజిమహిజ్ యెరూసలేం పట్టుం విజు కలిబిలి ఆతాద్ ఇజి అబ్బె మహి రోమ సయనమ్ది పెరి అతికారిజ్ కబ్బు వాతాద్.

32 వెటనె అయ పెరి అతికారి సయనమ్దివరిజ్, సదాతివతివరిజ్ వెట ఒతండ్రె కూడిఃతి మహి లోకుర్ డగ్గు ఉహ్కీ వాతాన్. లోకుర్ అయ పెరి అతికారిజ్, వన్నివెట వాతి సయనమ్ది వరిజ్ సుడఃతిజ్ పవులుజ్ డెయ్డెజ్ డెస్సార్.

33 అయ పెరి అతికారి డగ్గు వాతండ్రె పవులు అస్సాన్. 'రుండి గొలుస్కాణిజ్ వన్నిజ్ తొవ్వు' ఇజి ఆడ్ర సిత్తాన్. వీండ్రు ఎయెన్? ఇనిక కిత్తాన్ ఇజి వెన్బాతాన్.

34 వెన్బాతిజ్ లోకుర్ సెగొండార్ ఈహు ఇజి, సెగొండార్ అహు ఇజి వెప్పొడేల్ని మహిజ్ గగోల్ లావాత్తిజ్ నిజం ఇనికాదొ ఇజి నెన్వీండ ఆతండ్రె 'బారి గోడఃలోజ వన్నిజ్ ఒతు' ఇజి ఆడ్ర సిత్తాన్.

35 పవులు పాపు అన్ను ముస్కు వాతివలి లోకుర్ ఒదె కొవమాజి లాగిదెజ్ నెక్కెజ్ కిత్తిజ్ సయనమ్దికార్ పవులుజ్ పిండితారె ఒతార్.

36 ఎందానిజ్ ఇహిజ, వన్నిజ్ సవ్అ ఇజి లోకుర్ విజేరె డటం గగోలాజి వెటసొహార్.

పవులు లోకుర్ వెట వర్గిజనాన్

* 21:26 21:26 యా బాడ్డిదు మొగవారి మంజనార్. అయ్లికొడెజ్ బాన్ సొండ్రెజ్ ఆవిద్ † 21:29 21:29 యూదురు ఆకారె దేవుణు గుడిః దేవారు సొండ్రెజ్ ఆవిద్. బాన్ యూద మొగకొడెజ్ సొండ్రెజ్ ఆనాద్ ఇజి రూలు మనార్

37 మొదటి పావు అన్నదాన్ ఎక్కి సొన్ని ఆకరి పావు అన్న దాక వారు సొహార్. సయనమడికార్ పవులు బారిగోడేలో ఇ ఒత్తే నుడేజి మహిజ్ పవులు అయ పెరి అతికారి వెట, నీ వెట ఉండ్రీ మాట వెహ్లాజ్ ఆనా ఇజి వెన్బాతాన్. అందెజి అయ అతికారి, “గ్రీకు బాన్ నీను నెసినిదా?”, ఇజి వెన్బాతాన్.

38 “యా దినమకాజ్ ముందాల్ని అతికారిజి ఎర్దువెప్పి లోకాజ్ నప్పి నాల్లి వెయి లోకాజ్ బిడిజ్ బూమిదు వెట కూక్కి ఒసి మహి అయగుప్తు దేసెమదికి నీను ఆఇదా?”, ఇజి పవులుజ్ వెన్బాతాన్.

39 దన్నిజ్ పవులు, “నాను కిలికియాదు మన్ని తార్పు పట్టుమడికాన్ యూద వాండ్రు. నాను అయ గొప్ప పట్టుమది లోకు. లోకుర్ వెట వర్గిదెజ్ నజి నెల్వి సిదా”, ఇజి బతిమాలితాన్.

40 పవులు నెలవ లొన్జిజ్ పెరి అతికారి సరి సిత్తాన్. అయావలె పవులు పావు అన్ను మున్ను నిహండ్రె లోకాజ్ అలెజి మండ్రు ఇజి కియు సయ్ కిత్తాన్. వారు అలెతి మహివలె పవులు యూదురి బాసాదు ఈహు వెహ్లాన్.†

22

1 “తంబెరిజాండె, బుబ్బారండె, నా లొఇ ఇని తప్పుబా సిల్లెద్ ఇజి మీరు నెసినివందిజ్ నాను వెప్పిని మాటెజ్ వెండ్రు”.

2 పవులు వరి సొంత బాసాదు వర్గినిక వెహ్రి వారు జమన్ అల్లెత మహార్. అయావలె పవులు ఈహు వెహ్లాన్.

3 “నాను కిలికియాదు మన్ని తార్పు పట్టుమడికాన్ యూద వాండ్రు. అహిజి యా పట్టుమదు గొప్ప పేరు పొందితి మేస్టర్ గమాలియెలు బాన్ మోసా మా అనిగొగొరిజ్ సిత్తి రూలుజి ఎలాగ లోబడెదెజ్ ఇజి నెగ్రిండ నెస్తానె పిరితా. మీరు విజిదెరె నేండ్రు ఎలాగ పటుదలదాన్ మన్నిదెర్ అయ వజనె నానుబా యా రూలుజ్ వందిజ్ పటుదలదాన్ మహా.

4 నాను యేసుప్రబు మున్ను నమ్మితి వరిజ్ మొగ్గకొడెరిజ్, అయిలి కొడెకాజ్ అసి తొప్పి జెలిదు ఇడెజి సానేండ మాల్జె కిత.

5 దన్ని వందిజ్, విజెరె పుజెరిజి మున్ను పెరి పుజెరి, పెద్దెలుబు విజెరె నజి సాని ఆత మనార్. దమున్ను పట్టుమదు మహి మా సొంత లోకురాతి యూదురు లొఇ మహి నమ్మితి వరిజ్బా అసి తొప్పి మాలెజ్ కిదెజ్ యెరూసలేమదు తతెజ్ ఇజి పుజెరిజి బాణిజ్ ఉత్తము. లొస్త ఒతానె దమున్ను పట్టుమదు మహి యూదురుబాన్ సొహా.

6 నాను వయనం కిజి దమున్ను పట్టుండ్రు సొన్ని మహిజ్, మదెనం వేడెదు, ఆగానమదాన్ వెటనె గొప్ప జాయ్ నా నుటులం డెయ్తాద్.

7 అయావలె నాను బూమి మున్ను అర్తానె, ‘సవులు, సవులు, నీను ఎందానిజ్ నజి మాలెజ్ కిజిని’, ఇజి నావెట ఉండ్రీ జాటు వాతిక వెహ్.

8 ‘ప్రబు, నీను ఎయి’ ఇజి నాను వెన్బాత. వెన్బాతిజ్ వాండ్రు ‘నీను మాలెజ్ కిజిని నజిరేతుదికాన్ ఆతి యేసునె నాను’, ఇజి నావెట వెహ్లాన్.

9 నావెట సొన్ని మహికార్ అయ జాయ్ నుడెత్తార్ గాని నావెట వర్గితిమహివన్ని జాటు నెన్వితార్.

10 అయావలె నాను, ‘ప్రబు నాను ఇనిక కిదెజ్’ ఇజి వెన్బాతిజ్, ‘నీను నిజిజి దమున్ను పట్టుం సొన్అ. అబ్బె నీను ఇని పణి కిదెజ్ ఇజి నీ వందిజ్ నాను ఏర్పాటు కిత్తికెజ్ విజి నిజి ఒరెన్ వెహ్లాన్లె’ ఇజి నావెట ప్రబు వెహ్లాన్.

11 అయ నుడెదెజ్ అట్ఇ నన్ని పెరి జాయ్ మహిజ్ నాను కణెకు తోరెదెజ్ అట్ఎండెత. నావెట మహికార్ నా కికు అసి నడిపిసి దమున్ను పట్టుమదు కూత్తతార్.

12 అయావలె మోసె సిత్తి రూలుజ్ లోజెజి, బక్తి మన్నికాన్ అననియ ఇనికాన్ ఒరెన్ బాన్ మహ్లాన్. అబ్బె మహి యూదురు విజెరె యా అననియ, ఒరెన్ పల్కుబడి మన్నికాన్ ఇజి వెప్పి మహ్లాన్. వాండ్రు నా డగ్రు వాతాన్.

† 21:40 21:40 యూదవరి బాన్ ఏత్రి బాన్. యూద పుజెరిబు నదెవెతి మహి దేవుణు మాటెజ్ ఏత్రి బాసాదునె లాస్త మహ్లాద్. వారు వర్గితి మాట అలామియ బాన్

13 డగ్రు వాతండ్రె నా డగ్రు నిహండ్రె, 'సవులునా, బేస్అ', ఇజి వెప్తాజ్ వెటనె నాను బేస్తానె వన్నిజ్ సుండేత.

14 అయావలె అయ అననియ వెప్తాన్, 'మా అనిగొరి దేవుణు నిజి ఏర్పాటు కిత మనాన్. దేవుణు నిజి ఇని పణి వందిజ్ ఏర్పాటు కిత్తాండ్రె అక్క నీను నెస్తాజ్. అందెజి నీను సుండేతిమహి, వెహిమహి సీతి నిజాయితి మన్నికాన్ నిజి ఏర్పాటు కిత్తాన్.

15 ఎండనిజ్ ఇహిజ, నీను సుండేతికెజ్, నీను వెహికెజ్, విజు లోకాజ్ సొన్ని వెప్తాజ్, వన్నివందిజ్ ఉండ్రె సాసీవజి నీను మంజిని.

16 ఏలు ఎండనిజ్ ఆలస్యమాజిని? నిజ్జి బాప్తానం లాగె ఆఅ. యేసు పేరు అసి, పార్లనం కిజి నీ పావమకాణ్ నొరె ఆఅ', ఇజి వెప్తాన్.

17 నాను యెరూసలేమ్దు మరజి వాతానె దేవుణు గుడిడు పార్లనం కిజి మహ. పార్లనం కిజి మహిజ్ ఎర్దునె ఉండ్రె దర్లనం సుండేత.

18 అయ దర్లనమ్దు నావెట, 'నీను యెరూసలేం డిసి గజిబిజి సొన్అ. ఎందానిజ్ ఇహిజ నావందిజ్ నీను వెప్తా సాసి వీరు ఒప్పుకోడేవర్', ఇజి వెప్తా మహిక నాను సుండేత.

19 ప్రబు అయ మాట వెప్తాజ్ నాను, 'నాను యూదురి మీటిజ్ ఇల్కాజ్ వరస సొన్ని మీ మున్సు. నమకం ఇట్టి వరిజ్ డెయేజి జెలిదు ఇట్టా ఇజి వారు విజెరె బాగ నెసినార్.

20 అక్కాడె ఆవిండ, నీవందిజ్ సాసి వెప్తా సైపానుజ్ నప్తివలె, నానుబా అక్క ఒప్పకొటానె వన్నిజ్ నప్తివరి సాల్వెజ్ కావ్కెజి మహగదె', ఇజి ప్రబు వెట వెప్తా.

21 గాని ప్రబు, 'నీను సొన్అ, దూరం మన్ని దేసమ్దు బత్తిని యూదురు ఆఇవరిబాన్ నాను నిజి పోక్కు' ఇజి నావెట వెప్తాన్'.

పవులు రోమదిజ్ అక్క ఆతికాన్

22 యా మాటదాక లోకుర్ పవులు వెంజి మహార్. గాని యాక వెప్తాజ్, "నిన్ని వన్నిజ్ ఇడ్కాట్. విన్నిజ్ నప్తు. వీండ్రు బత్తిదెజ్ ఆవిద", ఇజి వారు విజెరె డటం గగోలాత్తార్.

23 ఈహా వారు గగోలాజి వరి సాల్వెజ్ కిసి విసీర్తారె దూల్లి అసి ఎర్లిస్తార్.

24 అయావలె 'పవులుజి బారిగిడే లొక తగఅ' ఇజి రోమ సయనమ్ది పెరి అతికారి ఆడ్ర సిత్తాన్. లోకు పవులు మున్సు. ఎందానిజ్ ఈహు కోపం ఆతారె గగోల్ ఆతారె ఇజి నెన్ని వందిజ్ పవులుజ్ కొర్దూన్ డెయేదెజ్ అయ అతికారి ఆడ్ర సిత్తాన్.

25 గాని పవులు డెయేజి తొప్తాజ్ పవులు వన్ని డగ్రు మహి సదాతిపతివెట ఈహు వెన్బాతాన్, "రోమదిజ్ అక్క మన్నికాన్ అతి ఒరిన్ వన్నిజ్ తీర్పు సివండనె కొరెడెదాన్ డెయేజ్ రోమ రూలుజ్ వజి మిజ్ అతికారం మనాదా?"

26 అయ సతాతిపతి యాక వెహండ్రె రోమ సయనమ్ది పెరి అతికారిబాన్ సాహండ్రె ఈహు వెప్తాన్. "నీను ఇనిక కిడెజ్ సుండేజిని? ఎండ్రు రోమదిజ్ అక్క మన్నికాన్", ఇజి వెప్తాన్.

27 అయావలె అయ పెరి అతికారి పవులుబాన్ వాతండ్రె, "నీను రోమదిజ్ అక్క మన్నికిదెనా?", ఇజి వెన్బాతాన్. "ఒబ", పవులు ఇహాన్.

28 దన్నిజ్ అయ పెరి అతికారి, "లావు డబ్బు సిత్తానె యా రోమది అక్క నాను పొందిత", ఇహిజ్ పవులు, "నాను ఇహిజి పుట్టివలెహానె రోమదిజ్ అక్క మన్నికాన్" ఇహాన్.

29 అందెజి పవులు వెట డటిసి వెప్తాజ్ వాతికార్ వెటనె వన్నిజ్ డిస్త సిత్తార్. రోమదిజ్ అక్క మన్ని వన్నిజ్ గొలుస్కాణిజ్ తొహిస్స మహ ఇజి నెసి అయ రోమ సయనమ్ది పెరి అతికారి తియెలాతాన్.

పవులు యూద పెద్దెల్జి నడిమి వర్గజనాన్

30 మహ్సా నాండిజ్, పవులు మున్సు. యూదురు ఇని నేరం మొప్పాలో ఇజి నెస్టెజ్ అయ రోమ పెరి అతికారి ఆన ఆతాన్. అందెజి పవులు డిబిస్తాన్. పెరి పుజేరిజ్ని సంపాద్రి నజమదిజ్ కూకీస్సాండ్రె 'మీటిజ్ కినాట్' ఇజి ఆడ్ర సిత్తాన్. వారు కూడేజి వాతివలె పవులుజ్ వరి ముందాల నిల్వెన్.

23

1 పవులు సంహృది సజమ్దివరిజ్ తినాజ్ సుడఃజి ఈహు వెహ్సన్, “తంబెరిజాండె, గడిఃస్తి సాహి దినమ్మకు విజు నాను దేవుణు ఎర్దు నా గర్భం గదిన్విండ మహా”.

2 అయావలె విజేరె పుజేరిజు ముస్సు, పెరి పుజేరి ఆతి అననియ పవులు డగ్రు నిల్పిమహిపరివెట, “వన్ని వెయ్యు డెయ్అ”, ఇజ ఆడ్ర సిత్తాన్.

3 దన్నిజ్ పవులు, “నీను తెలాజ్ దూల్లి రాస్తి గోడ్జ్* నన్నికి. దేవుణు నిజి డెయ్నాన్. మోసా సిత్తి రూలుజ్ తగితివజ నజి తీర్పు కిదెజ్ నీను బస్తిమన్ని. గాని మోసా సిత్తి రూలుదిజ్ తగివిండ నజి డెయ్నాజ్ ఆడ్ర సిజినిదా?”, ఇహాన్.

4 పవులుడగ్రు నిహికార్, “నీను దేవుణు పెరి పుజేరిదిజ్ దుసలాడిఃజినిదా?”, ఇహాన్.

5 దన్నిజ్ పవులు, “తంబెరిజాండె, వాండ్రు విజేరె పుజేరిజు ముస్సు, పెరి పుజేరి ఇజి నాను నెన్విత. మీ లోకాజ్ ఏలుబడిః కినివరిజ్ దుసలాడిఃజినిక ఆవిద్ ఇజి దేవుణు మాటదు రాస్త మనాద్ గదె”, ఇహాన్.

6 యూద వెద్దెల్జ పెరి సజమ్లొఇ సెగొండార్ పరిసయరు, సెగొండార్ సదుకయరు ఇజి పవులు నెస్టాన్. నెస్టాండ్రె వెనుక పవులు డటం వెహ్సన్, “తంబెరిజాండె, నానుబా పరిసయ వాండ్రునె, పరిసయవన్నిజ్ పుట్టికాన్. దేవుణు సాతివరిజ్ నిక్సాన్ ఇజి నాను నమ్మిజిన. అక్క నాను ఎర్దు సుడఃజి మంజిన. దన్నివందిజ్ నాముస్సు, తప్పు మొప్పి తీర్పు కిజినార్”.

7 పవులు యాక వెహ్సావలె పరిసయరుజ సదుకయరుజ నడిఃమె గొడఃబ పుట్టాద్. గొడఃబ పుట్టాదె వారు రుండి జటుజ్ ఆతార్.

8 (ఎందానిజ్ ఇహిజ సాతికార్ మర్జి బత్రిఎర్, దూతార్ సిల్లు, దెయమ్మకు సిలు ఇజి సదుకయరు వెహ్సినార్. పరిసయరు ఇహిజ అక్కెజ్ విజు మన్నె ఇజి వెహ్సినార్).

9 అయావలె అబ్బి గొప్ప గగోల్ ఆతాద్. పరిసయరులొఇ సెగొండార్ దేవుణు మోసాజ్ సిత్తి రూలుజ్ నెస్తినినికార్ నిజిత్తారె, “మాపు సుడఃజి, యా లొకు ముస్సు, ఇని తప్పుబా తోర్విద్. ఒరెన్ దూత గాని ఉండ్రె తోర్దెజ్ అట్ఇకాద్ గాని వన్నివెట వర్గితాద్ను, ఇజి గొడఃబెజ్ ఆతార్.

10 వరి లొఇ గొడఃబ లావాత్తిజ్ వారు పవులు కిన్ను వీసీర్పార్లెను ఇజి తియెలాతాండ్రె అయ రోమ సయనమ్ది పెరి అతికారి సయనమ్ది వరిజ్ పొక్తాండ్రె పవులుజ్ వరి నడిఃమిహాన్ లాగ్గి బారిగొడః లొఇ తత్తెజ్ ఆడ్ర సిత్తాన్.

11 ఆ పొదొయ ప్రబు పవులు తోరె ఆతండ్రె, “దయరం ముస్సు మన్అ. నీను యెరూసలేమ్దు నావందిజ్ ఎలాగ సాని వెహ్సాద్ అయావజనె రోమ పట్టుమ్దుబా సాని వెహ్సా”, ఇజి వెహ్సాన్.

పవులు సప్తెజ్ యూదురు కుట్ర కిత్తార్

12 మర్చ నూడిజ్ పెందల సెగొండార్ యూదురు కూడిఃతారె, ‘మాటు పవులు సవ్విండ ఉండెజ్ తిండ్రెజ్ ఆవిద్’ ఇజి ఒట్టు కితారె పవులు సప్తెజ్ ఇజి పూర్తి తెగిస్తార్.

13 పవులుజ్ సప్తెజ్ ఆలోసనం కిత్తికార్ నల్వయ్ ముస్సు మొగావారు మహాన్.

14 వారు పెరి పుజేరిజుబాన్ పెద్దెలుజుబాన్ సాహారె వెహ్సార్, “మాపు పవులుజ్ సవ్విండ ఇనికబా తిన్వివ్ ఉణ్వివ్, ఇజి గటిజ ఒట్టు కిత మహావ్.

15 అందెజి మీరు, సంహృది సజమ్దికార్ విజేరె కూడఃజి రోమ సయనమ్ది పెరి అతికారి వన్నిజ్ కల్లు పొక్అ. అక్క ఇనిక ఇహిజ, పవులు మరి మాబాన్ రపెన్ ఇండ్రు. వన్నివెట మరి వర్గిజ వన్నివందిజ్ మాపు విజు నెస్టెజ్ ఇజి నాటిస్సాట్. వాండ్రు ఇబ్బె అందివిండనె మాపు వన్నిజ్ సప్తెజ్ తయారాజ మనావ్”.

16 గాని పవులుజ్ బణిజ ఆతికాన్ యాక నెస్టాండ్రె నెల్వ లొస్టాండ్రె బారిగొడః లొఇ సాస్తి పవులుజ్ వెహ్సాన్.

17 అయావలె పవులు నదాతివతిర్లొఇ ఒరెన్ వన్నిజ్ కూక్తాండ్రె, “యా ద్జడఃజి రోమ సయనమ్ది పెరి అతికారిబాన్ ఒఅ. పెరి అతికారి వెట వన్నిజ్ ఉండ్రె మాట వెహ్సాజ్ మనాద్” ఇహాన్.

* 23:3 23:3 పవులు కోపమాజి వెహ్సా మాటిజ్

18 వెప్రాజ్ అయ నతాతిపతి అయ దక్షడెజ్ పెరి అతికారిబాన్ ఒతాన్. ఒతండ్రె, “జెలిదు మన్ని పవులు నజీ కూక్రాండ్రె యా దక్షడెజ్ మీబాన్ ఒతెజ్ ఇజి వెప్రాన్. యా దక్షడెజ్ మీ వెటె ఇనికాదో వెహ్వాన్”, ఇజి వెప్రాన్.

19 అయ పెరి అతికారి అయ దక్షడెజ్ కీదు అస్తాండ్రె ఉండ్రి పడెకాద్ ఒతాన్. “నా వెటె వెప్రాజ్ ఇని మాట మనాద్?”, ఇజి వన్నిజ్ వెన్బాతాన్.

20 వెన్బాతిజ్ అయా దక్షడెజ్ యెన్, “విగెహిజ్ పవులుజ్ సంహద్రి నజం నడిమి తని వన్ని వందిజ్ మరి నెస్రెజ్ ఇజి నాటిని వన్నివెటె మరి వర్గిదెజ్ నిబాన్ సెలవ లొస్రెజ్ ఇజి యూదురు ఒప్పకొట మనార్.

21 గాని నీను వరిజ్ సరి సీమ. ఎందానిజ్ ఇహిజ నలవయ్ మణిసిరిజ్ ముస్సు మొగావారు, పవులు సవ్విండ్ మాటె ఉండెజ్ తిండ్రెజ్ ఆవిద్ ఇజి ఒట్టు కితారె వన్ని వందిజ్ సరిదు సుడెజినార్. వారు వన్నిజ్ సప్రెజ్ తయారాత మనార్. మీమాటదిజ్ కావ్కిజినార్” ఇహాన్.

22 యాక వెహ్ండ్రె అయ పెరి అతికారి, “నీను నజీ యాక వెప్రా ఇజి ఎయెజ్బా వెహ్”, ఇజి గటిజ వెప్రాండ్రె అయ దక్షడెజ్ యెనుజ్ పోక్రాన్.

23 వెనుక అయ పెరి అతికారి సదాతిపతిర్ లొఇ రిఎరిజ్ కూక్రాండ్రె, “యా పొదొయ్ తొమ్మిది గంటిజ కయ్సరియ దాక సొండ్రెజ్ తయార్ ఆదు. రుండి వందెజ్ సయ్యమ్దికార్, డబయ్మణిసిర్ గుర్తమ్దాన్ సొని సయ్నమ్దికార్, రుండి వందెజ్ బల్లెమ్క అస్తికార్ సొండ్రెజ్ వలె.

24 పవులుజ్ ఎకిసి ఒతెజ్ గుర్తమ్క సీదు. వన్నిజ్ గవర్నరు ఆతి పేలిక్కుబాన్ ఇని ప్రమాదం రెవిండ్ ఒతెజ్”, ఇజి వెప్రాన్.

25 అయ పెరి అతికారి ఈహె ఉండ్రి ఉత్తం రాస్తాన్,

26 “క్లవుదియ లూసియ ఆతి నాను గొప్ప పేరు మన్ని పేలిక్కు గవర్నరిజ్ వందనమ్క వెహ్సిన.

27 విన్నిజ్ యూదురు అస్తారె సప్రెజ్ సుడెజ్ నాను నా సయ్నమ్దివరివెటె వాతానె విన్నిజ్ గెలెపిస్త. ఎందనిజ్ ఇహిజ విండ్రు రోమదిజ్ అక్కుమన్నికాన్ ఇజి నాను నెస్త.

28 విని ముస్సు యూదురు ఎందనిజ్ నేరం మొప్పినార్ ఇజి నెస్రెజ్ నాను విన్నిజ్ యూదురి సంహద్రి నజమి నడిమి ఒత.

29 ఒతిజ్, యూదురి రూలుజలొఇ మన్ని ఇనికెజ్ వందిజ్ వారు విన్నిజ్ నేరం మొప్టార్ గాని, సప్రెజ్నొ, జెలిదు పోక్రెజ్నొ తగితి తప్పజ్ తొరెఉతె.

30 విన్నిజ్ సప్రెజ్ ఇజి యూదురు కుట్ర కిజినార్ ఇజి నాను నెస్రెనె వెటెనె విన్నిజ్ నీబాన్ పోక్కిన. విని ముస్సు నేరం మొప్టికార్బా నీబాన్ వాజి వన్ని ముస్సు మన్ని నేరమ్క విజు వెహ్జెజ్ నాను వరిజ్ ఆడ్ర సిత్త”.

31 అయ రోమ సయ్నమ్ది పెరి అతికారి ఆడ్ర సిత్తిలెకెండ్ సయ్నమ్దికార్ పవులు ఆ పొదొయ్నె అంతిపత్తి ఇని పట్టుమ్దాక కూక్ర ఒతార్.

32 మహ్నా నాండిజ్ వారు పవులు గుర్తమ్క అస్తి సయ్నమ్ది - వరివెటె పోక్కారె మహికార్ మరజి వాతార్.

33 వారు కయ్సరియదు అందితిజ్ అతికారి పోక్కి ఉత్తం గవర్నరిజ్ సితార్. పవులుజ్బా గవర్నరుబాన్ ఒపజెప్టార్.

34-35 గవర్నరు అయ ఉత్తం సద్వితాండ్రె పవులు వెటె, “నీను ఎవేణి ప్రాంతమ్దికి”, ఇజి వెన్బాతాన్. “కిలికియదికాన్”, ఇజి వెహ్జెజ్, “నీ ముస్సు నేరం మొప్టికార్ వానివలె నీ నజతి నూణ ఇజి వెహ్జెజ్. పవులు హేరోదు రాజు పెరిఇండ్రె ఇడెజ్ కావ్ కిజి మండ్రెజ్ ఆడ్ర సిత్తాన్.

24

పేలిక్కు గవర్నరుబాన్ పవులు నిల్వినాన్

1 అయ్దు రొస్సు సొహిజ్ విజేరె పుజేరిజ ముస్సు పెరి పుజేరి ఆతి అననియ, వన్నివెటె సెగెండార్ యూద వెడ్రెలుజు, త్తెర్ల ఇని ఒరిన్ తగ్గు వర్గినికాన్, డిజెగు మన్ని కయ్సరియాదు వాతార్. వాతారె పేలిక్కు గవర్నరుబాన్, పవులు వందిజ్ మొప్టి నేరమ్క వెహ్జెజ్.

2-3 పవులు ఒక కుక్కని కోర్టును నిల్పానా. అయావలె తెర్తుల ఇని తగ్గు వర్గినికాన్ పవులు వందిజ్ ఈహా నేరం మొప్పైజ్ మొదొల్స్తాన్. “పెరి పేరు మన్ని గవర్నరు అతి పేలిక్కు, నీను సంఠో కాలం ఏలుబడిః కిజినిజ్ మాపు సమదానమదాన్ మంజి - నావ్. మా జాతివందిజ్ మీరు బాగ కిత్తిజ్ మజి నెగ్గెండ బత్తిదెజ్ అవ్సరం అతికెజ్ విజు మన్నె. మాపు విజెవె మీరు కిత్తి యా నెగ్గి పణిదిజ్ ఒప్పుకొడఃజి నిజి వందనమకు వెప్పినావ్.

4 గాని నాను నీ పణిదిజ్ అడ్డు కివండ, మాపు ఎందానిజ్ మీబాన్ వాతాపా అయ నజతి వందిజ్ వర్గిన. దయ కిజి వెన్అ.

5 యా పవులు గొప్ప గొడబ కినికాన్. లోకం విజు యూదురి నడిఃమి గొడఃబెజ్ రేప్పికాన్. వీండ్రు నజరేతుది జటుదిజ్ నెయ్యి. యాక విజు మాపు నెనినావ్.

6-7 విండ్రు యెరూసలేమదు మన్ని దేవుణు గుడిఃదిజ్ మయ్య కిదెజ్బా సుడఃతాన్. అందెజి మాపు విన్నిజ్ అస్తావ్. గాని రోమ సంయనమది పెరి అతికారి లూసియ వాతండ్రి మాబాణిజ్ విన్నిజ్ లాగితాన్.

8 నీను విన్నిజ్ వెన్బాఅ. మాపు విన్నివందిజ్ వెప్పికెజ్ విజు నిజమె ఇజి నిజి నెప్పెజ్ ఆనాద్”.

9 తెర్తుల వెప్పి మాటిజ్ విజు నిజం ఇజి బానె వాతిమహి యూదురుబా ఒప్పుకోటార్.

10 పవులు వర్గిదెజ్ గవర్నరు సంయన కిత్తిజ్ పవులు వర్గిదెజ్ మొదొల్స్తాన్, “గవర్నర్ అతి పేలిక్కు, నీను సంఠో పంటిజ్ యా యూదురి లోకాజ్ నెగ్గెండ ఏలుబడిః కిజిమహి. అందెజి నాను దయరమదాన్ వెప్పినాన్.

11 నాను యెరూసలేమదు దేవుణు గుడిఃదు పార్దనం కిదెజ్ సాహిజ్ ఏలు పనెండు రోస్కునె అతి ఇజి విరిజ్ వెన్బాతిజి నీను నెప్పి.

12 దేవుణు గుడిః లొఇబా, యూదురి మీటిజ్ ఇండ్రిబా, పట్టుమదుబా నాను ఎయెన్ వెటబా లోకురిజ్ నెక్తి పొక్తిక, జటు కిజి రేప్పిక, ఇనికబా యూదురు సుడఃవీతార్.

13 ఏలు నావందిజ్ వీరు వెప్పికెజ్ నిజం ఇజి రుజువ్ కిదెజ్ వీరు అబ్విర్.

14 గాని నాను ఉండ్రి నిజం మాట వెప్పా. అక్క ఇనిక ఇహిజ. నిజం ఆవిద్ ఇజి వీరు వెప్పిన బోదవజి నాను నడిఃజిన. ఆహా నడిఃజి దేవుణు మొనిజ్ సీత్తి రూలుజ్ వజి విజు, ప్రవక్తరు రాస్తికెజ్ విజు నాను నమ్మిజి మా అనిగొగ్గర్ పొగ్డిఃజి మాడిఃస్తి దేవుణుదిజ్ పార్దనం కిజిన.

15 వీరు నమ్మినవజి నెగ్గికార్, సెఇకార్ విజెరె సాతి పరిబాణిజ్ మరణిజి నోన్ ఇజి నానుబా దేవుణుదిజ్ నమ్మిజి ఆనదాన్ ఎర్దు సుడఃజిన.

16 అందెజి నాను, దేవుణు ఎర్దుగాని, లోకుర్ ఎర్దుగాని నా గర్బం గదినవిండ మండ్రిజ్ సుడఃజిన.

17 సెగం పంటిజ్ సాహి వెనుక ఏలు నాను నా సొంత జాతిజ్ సాయం కిదెజ్, దేవుణు గుడిఃదు పూజి కిదెజ్ యెరూసలేమదు వాత.

18-19 దిన్ని వందిజ్ నాను దేవుణు గుడిఃదు సాహిమహిజ్, నుబ్బరం అతి వెనుకానె యూదురు నజి బాన్ సుడఃతార్. అయావలె నావెట మంద లోకుర్ ఎయెర్ సిల్లెతార్. ఇని గొడఃబ ఇర్గివీతాద్. గాని నాను బాన్ మహివలె అసియ దేనమదాన్ వాతిమహి సెగొండార్ యూదురు, బాన్ మహారె నా ముస్కు గొడఃబ ఆతార్. నా ముస్కు వరిజ్ ఇని నేరం మహిజి వారి వాజి నీ వెట వర్గిదెజ్.

20 సీలిజి నాను సంహద్రి నజమదు వర్గిజి మహిజ్ ఇని తప్పు వర్గిజి ఇజి వీరు వెపార్.

21 గాని ఉండ్రి మాట నాను వెప్పా. అక్క ఇనిక ఇహిజ, సాతి లోకుర్ మరణి బత్తి.నార్ ఇజి నమ్మినవందిజ్ వీరు నేండ్రు నజి తీర్పు కిజినిదెర్ ఇజి నాను బానె డటం వెప్తా మహా”.

22 పవులు వెప్పి బోదవందిజ్ గవర్నరాతి పేలిక్కు నెగ్గెండ నెప్ప మహాన్. అందెజి వాండ్రు, “రోమ సంయనమది పెరి అతికారి అతి లూసియ వానివలె తీర్మానం కిన్”, ఇజి వెప్తాండ్రి అయ నర్దు మీటిజ్ ముగిస్తాన్.

23 వెనుక పవులు జేలిదు ఇడ్జి వన్నిజ్ కాపు ఇడ్దెజ్ సదాతిపతిజ్ అడ్రి సిత్రాన్. వన్ని లోకుర్ వాజి వన్నిజ్ సుడఃజి వన్నిజ్ సాయం కిదెజ్ అడ్డు కిమాట్ ఇజి అడ్రి సిత్రాండ్రి వన్నిజ్ కండెక్ సరి సిత్రాన్.

24 సెగం రోస్కు సాహిజ్ పేలిక్కు వన్ని అల్లి అతి ధ్రుసీలవెట వాతాన్. అది యూదురి అయేలి కొడః. పేలిక్కు పవులు ఒక కుక్కనిస్తాన్. యెను క్రీస్తు ముస్కు వన్ని నమకంవందిజ్ పవులు వెప్పికెజ్ వెంజి మహాన్.

25 గాని పవులు సరియాతి పణి కిని వందిజ్, మన్నుదిజ్ అణెన ఆజి ఇడ్చివందిజ్, దేవుణు, లోకుర్ మున్ను కిని తీర్వపందిజ్ గటిజ వర్తితిజ్ పేలిక్కు తియెలాతాండ్రె, “ఆనె, ఏలు సాన్అ. మరి ఒర్పు టయం మహివలె కూకపిన్ను”, ఇజి వెప్తాండ్రె పోక్తాన్.

26 పవులు నజీ డబ్బు సీనాన్ను ఇజిబా పేలిక్కు ఒడిఃబడిఃబితాన్. అందెజె పవులు మాట మాటదిజ్ కూకపిస్తాండ్రె వన్నివెట వర్తితాన్.

27 రుండి వంటిజ్ సాహిజ్, పేలిక్కు వెనుక పోర్కియు పెస్తు ఇనికాన్ గవర్నరు ఆతాన్. పేలిక్కు యూదురిజ్ సర్ద కిబిస్తెజ్ పవులుజ్ జెలిదునె ఇట్టాన్.

25

పవులు పెస్తు ఎర్దు నిల్చినాన్.

1 పోర్కియు పెస్తు అయ ప్రాంతమందిజ్ గవర్నరు అజి మూండ్రె రోస్సు, సాహిజ్ వాండ్రు కయసరియాదాన్ ఎక్కి యెరూసలేమ్దు సాహాన్.

2 బానె పెరి వుజెరిబు యూదురి వెద్దెలుజు పవులు మున్ను, మహి తప్పుజవందిజ్ గవర్నరుజ్ వెప్తార్.

3 “దయ కిజి పవులు యెరూసలేమ్దు పోకాఅ”, ఇజి వారు గవర్నరుబాన్ నండ్రె సుట్టు. బతిమాలితార్. ఎందానిజ్ ఇహిజు పవులుజ్ సర్దు సప్పావ్ ఇజి వారు కుట్ర కిజి మహార్.

4 గాని గవర్నరు, “పవులు కయసరియాదు కావ్ ఇట్టా మనాద్. నాను వెటనె బానె సాన్సిన.

5 అందెజె మీలోఇ మన్ని పెరిలోకుర్ నావెట బానె సాండ్రెజ్. పవులు మున్ను, ఇని తప్పుబా మహిజు వీరు కోర్డుదు నేరమేకు తోరిస్తెజ్ ఆనాద్” ఇహాన్.

6 గవర్నరు వరివెట ఎనిమిదిని పది రోస్సునో మహి వెనుక, డిగు కయసరియాదు సాహాన్. మహ్నా నాండిజ్ కోర్డుదు సాహాండ్రె తీర్పు కిదెజ్ ఇజి, తీర్పు కినిబాన్ బస్తాన్. ‘పవులు కోర్డుదు తగాట’ ఇజి ఆడ్రె సిత్తాన్.

7 పవులు వాతిజ్ యెరూసలేమ్దాన్ డిఃగు వాతి యూదురు వన్ని సుటులం నిహారె వన్ని మున్ను, నండ్రె రకమది బల్మె అతి తప్పుజ్ మొప్తార్ గాని అక్కెజ్ నిజం ఇజి రుజువ్ కిదెజ్ వారు అటవితార్.

8 పవులు, “నాను యూదురు రూలుజ్ వందిజ్ గాని, యెరూసలేమ్దు మన్ని దేవుణు - గుడిఃవందిజ్ గాని, రోమ దేనెమందిజ్ ఏలుబడిః కిని కయసరువందిజ్ గాని ఇని తప్పుబా కివిత”, ఇజి వన్ని వందిజ్ వాండ్రె వెప్తాన్.

9 నాను నెగ్గెకాన్ ఇజి యూదురు ఒడిఃబిదెజ్ ఇజి గవర్నరు సుడిఃతాన్. అందెజె వాండ్రు పవులు వెట వెనెబాతాన్, “యెరూసలేమ్దు సాన్సి బానె నీ వందిజ్ వీరు వెప్పికెజ్ నిజమనో అబద్దమనో ఇజి నాను తీర్పు కిదెజ్ నీను ఒప్పుకోడిఃజినిదా?”

10 దన్నెజ్ పవులు, “రోమ రాజు అతి కయసరుది కోర్డుదు నిల్చిన. యా కోర్డుదునె నజీ తీర్పు కిదెజ్. యూదురిజ్ ఇని తప్పుబా నాను కివిత. అక్కు నీను నెగ్రెండ నెన్చిగదె.

11 నాను ఇని రూలుదిజ్బా తప్పిజు, సాపుదిజ్ తగితి పణి కిత ఇహిజు, సిక్కుదాన్ తప్తె ఆదెజ్ నాను సుడిఃవి. గాని నా మున్ను వీరు వెప్పికెజ్ నిజం ఆఱ ఇహిజు నజీ వరిజ్ ఒపజెప్తెజ్ ఎయెరిజ్బా అక్కు సిల్లెద్. నాను రోమ పెరి రాజు అతి కయసరుబాన్ సాండ్రెజ్ ఆజిన”, ఇహాన్.

12 అయావలె గవర్నరు వన్నివెటమహి లోకుర్ వెట వర్తితాండ్రె పవులుజ్, “నీను కయసరుబాన్ సాన్సి వెప్తాజ్ ఇజి వెప్తా. అందెజె కయసరుబాన్ సాన్అ”, ఇహాన్.

పెస్తు అగ్రివ రాజు వెట పవులువందిజ్ వెప్పినాన్

13 నెగం రోస్సు, సాహి వెనుక రాజు అతి అగ్రివ *వన్ని తజిసి అతి బెర్లిక్యమువెట కొత్త గవర్నరు అతి పోర్కియు పెస్తుజ్ మాడిఃస్టెజ్ కయసరియాదు వాతార్

14 వారు పెస్తువెట నండ్రె రోస్సు, మహార్. మహిజ్ పెస్తు పవులు వందిజ్ రాజు వెట వర్తితాన్, “గవర్నరు అతి పేలిక్కు పవులు ఇని ఒరెన్ వన్నిజ్ జెలిదు ఇడిఃస్తాన్.

* 25:13 25:13 యూదయదేనెమందిజ్ ఎక్కు మన్ని ప్రాంతమకాజ్ వీండ్రు రాజు

15 నాను యెరూసలేమ్‌ను సాహివలె, యూదురి పెరి పుజేరిబు, పెద్దలుబు విని మున్ను నేరమ్‌కు మొస్తారె సిక్కసీఅ ఇహార్.

16 దన్నిజ్ నాను వరివెట వెప్త, 'రోము అలవాటు ఇహిజ, నిందెజ్ మొప్పికార్ ఎయెన్ మున్ను తప్పు మొప్పారో, వాండ్రు వాజి వరి నడిఃమి వన్ని వందిజ్ వర్గిదెజ్ అవకాసం సివిండ ముందాల్పా తీర్పు కిదెజ్ ఆవద్' ఇజి.

17 అందెజె వారు నావెట ఇబ్బె వాతివలె నాను ఆలీసం ఆవిండ మర్చనాండిజ్‌నె సర్దు కూడ్డెప్తానె పవులు నాముందాల తప్పిస్త.

18 నేరమ్‌కు మొప్పికార్ నిహివలె నాను ఒడిఃబిత్తిలెకెండ వారు నేరమ్‌కు లోఇ ఉండ్రీ నేరంబా వన్ని మున్ను మొవ్‌వితార్.

19 ఇహిజ, వరి మతంవందిజ్, సాతి సాహి యేసు ఇని ఒరెన్‌వందిజ్ పవులు వెట గొడఃబ ఆతికాదె తోరితాద్. పవులు ఇహిజ యేసు బత్తిజినాన్ ఇజి వెప్పినాన్.

20 యా సజివందిజ్ మరి ఇనిక కిదెజ్ ఇజి నెన్‌విండాతానె నాను పవులు వెట, 'నీను యెరూసలేమ్‌ను సాన్సి బానె దిన్ని వందిజ్ తీర్పు తీరిసె అదెజ్ మున్ను ఆజినదా?', ఇజి వెన్‌బాత.

21 గాని పవులు, 'రోము రాజు ఆతి కయసరు నజీ తీర్పు కిదెజ్' ఇజి వెప్తాజ్ నాను వన్నిజ్ కయసరుబాన్ పోక్నేండ ఇబ్బె జెలిదునె ఇదెజ్ ఆడ్ర సిత్త'.

22 అగ్రివ రాజు పెస్తువెట, "అయ పవులు వెప్పికెజ్ వెండ్రెజ్ నాను ఇష్టమాజిన" ఇహిజ, "విగెహిజ్ నీను వెండ్రెజ్ ఆనాద్", ఇహాన్.

పవులు అగ్రివ రాజు ఎర్దు నిల్సినాన్

23 మహ్మ నాండిజ్ అగ్రివ రాజుని, వన్ని తజీసి ఆతి బెర్నికయము రాజు వర్గిని అతికారం ఇండ్రో వాతార్. వారు ఎసా గొప్ప పెరికార్ ఇజి తోరిసి కర్పు ఆతి రాజురి సాక్కెజ్ ఇదీకిజి, బజారం, వెండి ఇబ్బిజి రోము సయనమ్‌ది పెరి అతికారి లోకుర్ వెట, పట్టుమ్‌ది ముకెలమతివరివెట వాతార్. వాతారి పవులుజ్ తగ్‌అ ఇజి పెస్తు ఆడ్ర సిత్తిజ్ జమానుజ్ సాహారె పవులుజ్ వరి నడిఃమి తతార్.

24 అయావలె పెస్తు వెప్తాన్, "అగ్రివ రాజు, మాబాన్ కూడ్డెజి వాతిమహి విజు లోకాండె, మీరు యా పవులు సుడఃజినెదెర్. యెరూసలేమ్‌ను మరి ఇబ్బెబా యూదురు విజేరి వీండ్రు బత్‌కినిక ఆవిద్ ఇజి గగోలాతారె నావెట పిరాడ్ కితార్.

25 గాని సావుదిజ్ తగితిక ఇనికబా వీండ్రు కిఎతాన్ ఇజి నాను నెస్తానె రోము రాజుబాన్ సాండ్రెజ్ వీండ్రు వెప్తాజ్ రోము రాజుబాన్ సాన్సి తీర్పు ఆవిద్ ఇజి నాను తీర్మానం కిత.

26 గాని నాను రోము రాజుజ్ విన్నివందిజ్ ఇనిక రాన్సి పోక్తెజ్ ఇజి తోర్‌వెత్. తీర్పు కిదెజ్ తగితిక ఇనికబా విని మున్ను సిల్లెద్. అందెజె మీరు విజెరి నడిఃమిని, అగ్రివ రాజు, నీ నడిఃమిబా విన్నిజ్ తత్త మన్ను. మావు విన్నివెట వర్గితివెనుక ఇనికబా రాన్సెజ్ నెస్తాను.

27 తొప్పా అసి తీర్పు కిదెజ్ పోక్తివన్నిమున్ను ఇని నింద మోప్త మనాద్ ఇజి వెహ్‌విండ వన్నిజ్ కయసరుబాన్ పోక్తెజ్ ఆవిద్ ఇజి నాను నెస్తాన్".

26

1 అగ్రివ రాజు పవులుజ్ సుడఃజి, "ఏలు నీ వందిజ్ వర్గిదెజ్ నాను సరి సీజిన", ఇజి వెప్తాన్. అయావలె పవులు కియు సాప్తాండ్రె వన్ని వందిజ్ వాండ్రె ముదాయి ఇజి మొదోల్‌స్తాన్,

2 "అగ్రివ రాజు, యూదురు నా మున్ను మొప్తి నేరమ్‌కు నిజం ఆవిద్ ఇజి నావందిజ్ నీ ఎర్దు వర్గిదెజ్ నాను గొప్ప సర్ల ఆజిన.

3 ఎందానిజ్ ఇహిజ యూదురి అలవాటుజ్ విజు వరి గొడఃబెజ్ విజు నీను బాగ నెనిసికి. అందెజె దయ కిజి నా మాట ఓరిసి వెండ్రు.

4 ఇజెరివలెహాన్ అసి నాను ఎలాగ మామ ఇజి, నా సొంత లోకుర్ నడిఃమి, నా సొంత దేనమ్‌ను, యెరూసలేమ్‌నుబా, ఎలాగ బత్తిజి మామ ఇజి, యూదురు విజేరి బాగ నెసినార్.

5 మా మతమీదు వరిసయ్యరి జబుదికార్ ఉండ్రీ రూలుబా తవ్వించడ నీతి నిజాతిదాన్ నడిసాన్. వరి లొణ ఒరెన్వజ నాను బత్తిజి మహా ఇజి వారు నావందిజ్ సాని వెహైజ్ ఇహిజ, సాని వెహైజ్ అట్నాన్. ఎందనిజ్ ఇహిజ, వారు మొదొహన్ అసి నజి నెసినాన్.

6 ఏలు ఇహిజ, దేవుణు మా అనిగొగొర్ వెట, సీనా ఇజి కిత్తి ఒట్టుందిజ్ ఎద్రునుడేజి మహిదన్నివందిజ్ నజి తీర్పు కిజినాన్.

7 మా పన్నెండు తెగ్గదికార్ యా ఒట్టువందిజి ఎద్రు నుడేజి దేవుణుందిజ్ రెయు పొగల్ డిసేవించడ పార్లనం కిజి మంజినాన్. ఓ రాజు, నానుబా ఆసదాన్ ఎద్రు నుడేజి మంజినదన్నివందిజి యూదురు నా మున్ను నేరం మొప్పినాన్.

8 సాతివరిజ్ దేవుణు నిక్సాన్ ఇజి నమ్మిదెజ్ మాపు అట్ఎవ్ ఇజి మీరు ఎందనిజ్ వెప్పినదెర్?

9 నజరేతుదికాన్ యేనువందిజ్ వెప్పిమని విజు దన్నిజ్ నెక్కిపొక్కెజ్ నాను అట్టి పణి విజు కిదెజ్ వలె ఇజి నానుబా ముందాల ఒడిబిజి మహా.

10 అయావజనె నాను యెరూసలేమ్దు కిత. పెరి పుజేరిజ్ నజి అతికారం సిత్తిజ్ నాను దేవుణుందిజ్ కేట అతి నంఠిండాదిజ్ జెలిదు ఇట్టా. అక్కాదె ఆవండ, వరిజ్ సప్తెజ్ తీర్మానం అతిజ్ 'నానుబా ఒప్పుకోడేజిన', ఇజి వెహా.

11 నాను నంఠి నుట్టు యూదురి మీటిజ్ ఇల్కాజ్ ఇల్కాజ్ సొన్ని నమ్మితి వరిజ్ గొప్ప మాలెజ్ కిత. యేను మున్ను నమకం ఇడవవ్ ఇజి వారు వెప్పిదాక నాను బలవంతం కిత. అక్కాదె ఆవండ వరి మున్ను ఒదె కోపం అతానె, ఆఇ పట్టుమకాజ్ బా సొహని బానబా మాలెజ్ కిత'.

పవులు ఎలాగ యేనుప్రబుజ్ నమ్మితికాన్ అతాన్ ఇజి వెప్పినాన్

12 "అహా నాను ఒర్పు, పెరి పుజేరిజు సిత్తి అతికారమదాన్ ఆడ్రదాన్ దమన్ను పట్టుమదు సొన్ని మహా.

13 ఓ రాజు, మదెనెం అతివలె సర్దు సొన్ని మహివలె, అగాసమదాన్ వాతి పెరి జాయ్ నుడేత. అయ జాయ్ పొద్దు జాయ్ ఇంక పెరి జాయ్. అక్క నజి నుటులం, నావెట మహివరి నుటులం డెయ్తాదె.

14 మాపు విజెవె బూమిదు అర్దావ్. అయావలె, 'సవులు, సవులు, నీను నజి ఎందనిజ్ మాలెజ్ కిజిని? ముట్టు ఒడ్డుదాన్ గుతివలె మరజి వెనుక గుసె అతిజు నంఠి కస్టం తప్పిన్', ఇజి అరామియ బాసాదు వెప్పి మాట నాను వెహా.

15 'నీను ఎయి, ప్రబు', ఇజి నాను వెనబాతిజ్, 'నీను మాలెజ్ కిజిని యేను నానె' ఇజి ప్రబు నావెట వెహాన్.

16 'ఏలు నిజ్జి నిల్అ. నాను ఎందనిజ్ నిజి తోరె అత ఇహిజ, నావందిజ్ పణి కిదెజ్, నావందిజ్ నేండ్రు నుడేతికెజ్ విజెరిజ్ వెప్పి, వాని కాలమదు నాను నిజి తోరిప్పికెజ్ విజెరిజ్ వెప్పి నజి ఉండ్రీ సానివజ మండ్రెజ్ నిజి నాను ఏరిపాటు కిజిన.

17 ఇస్తాయేలు లోకాణిజ్ నిజి నాను గెల్పిన్సు. యూదురు ఆఇ లోకాణిజ్ గెల్పిన్సు. యూదురు ఆఇవరినడిసెమి నాను నిజి పొక్క.

18 ఎందనిజ్ నిజి పొక్కిన ఇహిజ, వారు సీకటిదాన్ జాయ్దు వాజి వరి కణెకెజ్ తోరె ఆదెజ్. వరిజ్ సయతాన్ సత్తుహాన్ దేవుణు దరోట్ మహైజ్. నా మున్ను నమకం ఇడేజి, వరి పాపమకు నోరె ఆదెజ్. నావందిజ్ కేట అతి వరివెట కూడేజి మండ్రెజ్. దిన్నివందిజి నిజి వరి నడిసెమి పొక్కిన' ఇజి ప్రబు నావెట వెహాన్.

19 అందెజి ఓ అగ్రిప రాజు, నాను అగాసమదాన్ వాతి అయ మాటెజు లోజెత్త.

20 లోజెత్తానె తొలిత దమన్ను పట్టుమదు, వెనుక యెరూసలేం పట్టుమదు, మరి యూదరు ప్రాంతం విజు, యూదురు ఆఇ వరిజ్ బా నెప్పిన్సు. ఇనిక నెప్పిన్సు ఇహిజ, విజెరి, పాపమకు డిసె దేవుణు దరోట్ మర్దు ఇజి. పాపమకు డిసెనిత్తిదన్నిజ్ తగితిలెకెండ్ నెగ్గి పణిజ్ కిదు ఇజి.

21 నాను ఈహా నెన్పిన్సి దన్నివందిజి యూదురు నజి యెరూసలేమ్దు మన్ని దేవుణు గుడిదు నుడేతారె నజి అస్తారె సప్తెజ్ నుడేతారె.

22 గాని గడఁగి సొహా కాలం విజు దేవుణు నజీ తోడుఁ మహాన్. అందెజె నాను ఏలు ఇచ్చె నిల్లి తక్కువరివెట, పెరివరివెట నిజం వెప్పొన. వాని కాలమదు ఇనికెజ్ జర్గినెలె ఇజ ప్రవక్తరుని, మోసె వెప్తాకెజె నానుబా వెప్పొన.

23 అక్కెజ్ ఇనికెజ్ ఇహిజ, క్రీస్తు నండొ మాలెజ్ అజ సాతాన్. సాతి వరిబాణిజ్ తోలిత నిజ్నాన్. నిజ్జె, యూదురిజ్, యూదురుఅఇవరిజ్ దేవుణు - దరోట్ సొండ్రెజ్ జాయ్ తోరిస్సాన్”.

24 పవులు ఈహె, వన్ని వందిజ్ వర్గజి మహిజ్ పెస్తు, “పవులు, నీను వెరి వాండ్రు. నండొ సదు కిత్తిజ్ అక్కు నిజీ వెరి కిబిసినాద్”, ఇజి డటం వెప్తాన్.

25 దన్నిజ్ పవులు, “గొప్ప పెరికాన్ ఆతి పెస్తు, నాను వెరి వాండ్రు ఆవి. నాను నెగ్గిబుద్దిదానె నిజం వెప్పొన”, ఇహాన్.

26 “రాజు యా నజతిజి వందిజ్ నెనినాన్. అందెజె వన్నివెట దిన్ని వందిజ్ నాను అడ్డు సిల్లెండ వర్గజన. దిన్ని వందిజ్ ఇనికబా వన్నిజ్ డాజ్జె మనిక సిల్లెద్. ఎందనిజ్ ఇహిజ, జర్గితికెజ్ విజు ఉండ్రీ మూల పడఁకాద్ జర్గివతాద్.

27 ఓ రాజు, ప్రవక్తరిమాటజ్ నీను నమ్మిజిని ఇజి నాను నెస్సాన్”.

28 దన్నిజ్ రాజు, “నిస్సానులువుదాన్ నజీ క్రీస్తు లోకు కెదెజ్ ఇజి నీను నజీ ఒపిసినిదా?”, ఇహాన్.

29 “సులువుదానో అలన్యమదానో నీను ఒరిదె ఆవి, నేండ్రు నజీ వెంజనికార్ విజెరె నా వజ ఆదెజ్ ఇజి నాను దేవుణుదిజ్ పార్దనం కిజన. గాని నా వజ గొల్స్కాణిజ్ తోహె ఆదెజ్ పార్దనం కివి”, ఇజి పవులు వెప్తాన్.

30 అయావలె రాజు, గవర్నరు, బెర్నిక, వరివెట బన్తి మహికార్ విజెరె నిజిత్తార్.

31 వారు వెల్లి వాతారె, “వీండ్రు సాపుదిజ్ గాని, తోహె ఆదెజ్ గాని తగితి పణి ఇనికబా కివితాన్”, ఇజి ఒరెన్ వెట ఒరెన్ వర్గితాన్.

32 “వీండ్రు ‘కయ్సరు రాజుబాన్ సొన’, ఇజి వెహవిండ మహాన్ ఇహిజ విన్నిజ్ డిఁస్సిసిత్తిక మరి”, ఇజి అగిప రాజు పెస్తుజ్ వెప్తాన్.

27

పవులు ఓడఁ ఎక్కి రోమ పట్టుం సొన్నినాన్

1 మాపు ఓడఁ ఎక్కి ఇటలి దేసెం సొండ్రెజ్ ఇజి ఆడ్ర వాతిజ్, పవులుజ్, మరి జెలిదు మహి సెగొండారిజ్ యూలి ఇని సదాతిపతిజ్ ఒపజెప్తార్. వాండ్రు రోమ సయ్నమలోఇ ఉండ్రీ గుంపు ఆతి అవ్గుస్తు ఇని గుంపుదికాన్.

2 మాపు అద్రమత్రియదాన్ వాతి ఉండ్రీ ఓడఁ ఎక్కాపె పయ్నం ఆతావ్. యా ఓడఁ ఆసియ ప్రాంతమదు సమదరం డగ్రు మహి పట్టుమకాజ్ సొనిక. దెసలోనిక పట్టుమదాన్ ఒరెన్ మసిదోని దేసెమదికాన్ అరిస్తర్కు ఇనికాన్ మావెట మహాన్.

3 మహ్ను నాడిజ్ నీదోను ఇనిబాన్ వాతావ్. సతాతిపతి ఆతి యూలి పవులు మున్సు దయ తోరిస్తాండ్రె పవులు వన్ని కూలబాబుర్బాన్ సొన్ని వారు వన్నిజ్ నెగ్గెండ సుడఁదెజ్ సెల్వ సిత్తాన్.

4 వెనుక బాణిజ్ సోతాపె కుప్త ఇని ద్వీపు ఓరమదాన్ గాలి తక్కు మహి బాడ్డిదు పయ్నం ఆతావ్. ఎందనిజ్ ఇహిజ ద్వీపుదాన్ గొప్ప గాలి సమదరం దరోట్ డెయ్జె మహాద్.

5 వెనుక మాపు కిలికియ, పంపులియ ఇని ప్రాంతమకాజ్ డగ్రు మహి సమదరం డాట్టాపె లుకియాదు మన్ని మూర ఇని పట్టుమదు వాతావ్.

6 బాన్ అలెక్సంత్రియదాన్ వాతి ఉండ్రీ ఓడఁ ఇటలి పట్టుం సొండ్రెజ్ తయారాత మనాద్ ఇజి రోమ సతాతిపతి సుడఁతాన్. సుడఁతండ్రె మజీ అయ ఓడఁదు ఎక్కిస్తాన్.

7 మాపు నండొ రోస్సు మెలేక పయ్నం కిత్తాపె గాలివందిజ్ మాలెజ్ అతాపె క్షీదు ఇని ద్వీపుదిజ్ ఎద్రు వాతావ్. గాలి మజీ ఎద్రు డెయ్తిజ్ అయా సరి మరి సొండ్రెజ్ అటవతావ్. అందెజె మాపు గాలి తక్కు డెయ్తిమహి బాడ్డిదాన్ సొహాపె సల్మీను ఇని బాడ్డి డాట్టి క్రేతు ద్వీపు ఓరదాన్ పయ్నం కిత్తావ్.

8 గాలి డెయ్‌టిక్ మాలేజ్ ఆజి, ఓరదాన్ పయనం కిత్తాపె నెగ్గిబాడ్డి ఇని కూక్కి జాగదు వాతావ్. దన్ని డగ్రు లునెయ పట్టుం మహాద్.

9 పయనం కిజినిక్ నండో రోస్సు ఆతె. యూదురి పండోయ్ ఆతి ఉపాసి రోజుబా గడఃన్ల సాహాద్. నమదరమ్దుడు ఓడఃదు సాండ్రెజ్ ప్రమాదమాని కాలం ఆత మహాద్. అందెజి పవులు వరిజ్ బుద్ది వెహ్సాన్.

10 “బాబురాండె, మాటు ఏలు సాన్ని మహిజ ఓడఃదిజ్‌ని ఇబ్బె మన్ని సామానమ్‌కాజ్, ప్పు నస్టమ్‌కు, మరి మా పాణమ్‌కాజ్‌బా నస్టమ్‌కు వానాద్, ఇజి నాను నెస్సా”.

11 గాని అయ రోమ సతాతిపతి పవులు వెహ్సా మాట అన్‌ఎండ, అయ ఓడః నడిఃపిసినివన్ని మాటేజ్‌ని అయ ఓడః ఎజుమాని మాటేజ్ అస్సాన్.

12 పిన్ని కాలమ్దు మండ్రెజ్ అయా బాడ్డి నెగ్గికాద్ అవిద్ ఇహిక్ బాణిక్ డిసి సోతెజ్ నండోడాద్ వెహ్సాద్. క్రేతుడు మన్ని పీనిక్కు ఇనిబాన్ అందిజి బానె పిన్ని కాలం గడఃప్పాల్ ఇజి వారు విజెర్ ఒడిఃబితార్. యా పినిక్కు పట్టుం దనిణె పడఃమర, ఉస్సన్ పడఃమర దరోట్ మొకొం మహ్తా మహాద్.

నమదరమ్దుడు ముసూర్ డెయ్‌జినాద్

13 దనిణె దరోటాన్ ఉండ్రీ ఇజిరి గాలి డెయ్‌టిక్ వారు సాండ్రెజ్ ఒడఃబిత్తిలెకెండ్ సానాట్ ఇజి ఒడిఃబితార్, ఓడఃది లంగరు* లాగితారె సోత్తార్. క్రేతు ఓర దానె సాన్ని మహాద్.

14 గాని నణెం వెనుక ఉస్సన్ తూర్పు దరోటాన్ ఊరకులోన్† ఇని పెరి గాలి ద్వీపుదాన్ గొప్పక్ డెయ్‌యాద్.

15 పెరి గాలి ఓడఃదిక్ డెయ్‌టిక్ గాలి ఎద్దు సాండ్రెజ్ అట్‌ఎండాతాద్. అందెజి మాపు గాలి ఎద్దు సాండ్రెజ్ అట్‌ఎండాతానె గాలి డెయ్‌తి మహి దరోట్టె ఓడః మహ్తాపె సాహావ్.

16 వెనుక కంద ఇని ఉండ్రీ ఇజిరి ద్వీపు ఓరదాన్ సాహివలె అయ గాలి మా ముస్సు డెయ్‌విండ అయ ద్వీపు మజి ముస్సాద్. నండో కస్టబాడితాపె ఇజిరి ఓడఃదిక్ ముస్సు లాగితావ్.

17 ముస్సు లాగితాపె నెగ్రెండ తోహ్ ఇత్తావ్. వెనుక పెరి ఓడఃదిక్ పెరి నాసుదాన్ నుటులం గటిజ తోహ్. మరి సుర్కిను ఇని ఇస్సు మెటు ముస్సు ఓడః డెయ్‌నాద్‌ను ఇజి తియెలాతారె ఓడః మెలేక్ సానీద్ ఇజి ఓడఃది సాప‡ డిఃప్టారె గాలి డెయ్‌నిదరోట్ సానీద్ ఇజి డిఃస్టార్.

18 అయ ముసూర్ డిఃవిండ డెయ్‌జి మహిక్ మహ్తా నాండిక్ వారు ఓడఃదు మహి బరుక్ నమదరమ్దుడు విసిర్లెజ్ మొదోల్‌స్టార్.

19 దన్ని మహ్తా నాండిక్ వారు ఓడః నడపిసిని నెగం సామనమ్‌కు వరి సాంత కికాణిక్ నమదరమ్దుడు విసిర్లార్.

20 నండో రోస్సు పొద్దు గాని సుక్కిక్ గాని తోర్‌విండ మహె. గాలి గొప్పజ డెయ్‌జి మహాద్. మా పాణమ్‌దిక్ ఎలాగ గెల్‌పెస్టెజ్, మాపు సానాస్సెను ఇజి తియెలాతావ్.

21 వారు నండో రోస్సు బోజనం కివిండ మహిక్ పవులు వరి నడిఃమి నిహండ్రె వెహ్సాన్, “బాబురాండె, మీరు నామాట వెంజిమంజినిక్ ఇహిజె నెగ్రెండ మహాద్ మరి. క్రేతుదాన్ సోవిండ మహిడాెర్ మరి. సోవిండ మంజినిక్ ఇహిజె, యా నస్టమ్‌కు కస్టమ్‌కు జగ్గివిండాతాద్ మరి.

22 ఏలు ఇహిజె దయరమ్‌దాన్ మండ్రు ఇజి నాను గటిజ వెహ్సాన్. ఎందానిక్ ఇహిజె మీలోఇ ఎయెన్‌బా సాజి సాన్‌ఇదెర్. గాని ఓడః ఉండ్రెనె పాడాన్ సానాద్.

23-24 ఎందానిక్ ఇహిజె, పొదోయ్ నాను, ఎయె వాండ్రునో, ఎమేణి దేవుణుదిక్ పార్లనం కిజిననో, అయ దేవుణు దూత నాబాన్ వాతండ్రె, ‘పవులు, తియెల్ ఆమ. నీను కయనరు రాజు ఎద్దు నిల్లెజ్‌వలె. దేవుణు కనికారమాతికాన్. నీవందిక్ ఇదిలో నీ వెటు మన్నివరి పాణమ్‌కు దేవుణు గెల్‌పెస్సాన్లై’ ఇజి వెహ్సాన్.

25 అందెజి బాబురాండె, దయరమ్‌దాన్ మండ్రు. ఎందనిక్ ఇహిజె దూత నావెటె వెహ్సావజ జగ్గినిద్ ఇజి నాను దేవుణు మాట నమ్మిజిన.

26 గాని మా ఓడః గాలిరు సాన్ని ఎంబెబా ఉండ్రీ ద్వీపుదు పాడానాద్”, ఇజి పవులు వరివెటె వెహ్సాన్.

* 27:13 27:13 బరుమన్ని వణకుదాన్ తయార కిత్తి. గెలుస్కాన్ తోహ్పి ఓడఃదు ఇద్దార్. నమదరమ్దుడు డిఃపిజ ఓడః బానె నిల్పాద్దె, సాన్‌విద్ † 27:14 27:14 ఊరకులోన్ ఇని తుపాన్ గాలి డెయ్‌జి ఓడః సాండ్రెజ్ గొప్ప కస్టమానాద్. అయ గాలి ఉస్సన్ తూర్పు దరోటాన్ డెయ్‌యాద్ ‡ 27:17 27:17 గాలి వాజె నెక్కి ఒనిదన్నిక్ ఓడఃదిక్ తెరలెకెండ్ తోహ్పిక్

27 పదనాల్గి రోస్సు అద్రియ ఇని సమ్దరమ్దు మాపు మున్నార్దిజ్ అబె ఇబ్బె బూలాజి మహామ్. మదరయ్తు అతిజ్ ఎంబెనో ఉండ్రి దేసమ్ డగ్రు వాజినామ్ ఇజి ఒడః నడిపిసినివరిజ్ ఉదెనమ్దు వాతాద్.

28 అందెజె వారు ఇజిరి బరుదిజ్ తాడు తోప్పి డిష్టారె ఎనా లోతు మనాద్ ఇజి సుడఃతార్. నూట ఇరవయ్ అడుగుజ్ లోతు మనాద్ ఇజి నెస్తార్. నెగం వెనుక మరి డిష్టారె తొంబయ్ అడుగుజ్ లోతు మనాద్ ఇజి నెస్తార్.

29 మా ఒడః ఒరదు మన్ని పణకుముస్సు తగ్గినాదో ఇజి తియెలాతారె వారు ఒడః వెనుకపడఃకదాన్ నాల్గి లంగరుజ్ డిష్టారె జాయ్ ఆనెండ్ పార్తనం కిజి మహామ్.

30 ఇహాజ్, ఒడః నడిపిక్కార్ ఒడః డిసి సొండ్రిజ్ సుడఃతార్. వారు ఒడః ముందాల్పడఃక మన్ని లంగరుజ్ డిష్టారె ఇజి నాటిసి ఒడఃదు మన్ని ఇజిరి ఒడః సమ్దరమ్దు డిష్టారె. ఇజిరి ఒడఃదు ఎక్కిసొండ్రిజ్ ఆలోసనం కిత్తార్.

31 పవులు అక్క నెస్తాండ్రి సదాతిపతివెట, “సయ్ నమ్దివరివెట, యా ఒడః నడిపిసినికార్ ఒడః డిసి సొనార్ ఇహిజ, మీరు తప్పె అదెజ్ అల్ ఇదెర్”, ఇహాన్.

32 అందెజె సయ్ నమ్దికార్ ఇజిరి ఒడః తోప్పిమహి నాను కుతారె సమ్దరమ్దు డిష్టారె సితార్.

33 కోడిజామ్దు పవులు విజెరె వెట వెహ్హాన్, “ఏలు బోజనం కిదు, మీరు బోజనం కివిండాజి పదినాల్గి రోస్సు ఆతె. నిస్సా రోస్సు మీరు మన్ను బాద ఆజి ఇనికబా ఉణెంపండ్ మహిదెర్.

34 అందెజె నాను బతిమాల్లిన్, బోజనం కిదు. ఎండనిజ్ ఇహిజ మీరు సావిండ్ మండ్రిజ్ వలె ఇహిజ బోజనం కిదెజ్ వలె. తియెలాహాల్. మీలో ఇ ఎయె బుర్రదాన్ బా ఉండ్రి కొప్పుబా రాలజ్ సొన్ ఏద్ ఇహాన్.

35 ఈహు వెహ్హా వెనుక పవులు రొట్టె అస్తాండ్రి వారు సుడఃజి మహివలె దేవుణుదిజ్ వందనమ్కు వెహ్హాండ్రి రొట్టె ముకెజ్ కితాండ్రి తిండ్రిజ్ మొదోల్స్తాన్.

36 వారు విజెరె దయరం ఆతారె బోజనం కిత్తార్.

37 అయ ఒడఃదు మాపు మొత్తం రుండివందెజ్ డబయ్ ఆరు - మంది మజిసిర్ మహామ్.

38 వారు పొటపంజా ఉటి వీస్తి వెనుక గొదుముజ్ సమ్దరమ్దు విసిర్తారె ఒడః సుల్కాజ్ కిత్తార్.

ఒడః బదెజ్ ఆజినాద్

39 పొద్దు సోత్తిజ్ వారు అందితి దేసం ఎంబెణి దేసం ఇజి నెన్ ఏతార్ గాని ఒడః ఉండ్రి ఇస్సు మన్ని పడఃకాద్ ఒతెజ్ తగితి ఉండ్రి నెగ్గి పడఃక సుడఃతారె బాన్ ఒనాల్ ఇజి ఒడిబితార్.

40 అందెజె ఒడః నడిపిసినికార్ లంగరుజ్ తోప్పిమహి నాస్సుజ్ కుతారె సమ్దరమ్దు డిష్టారె. ఒడః నడిపిస్సుకానుజ్ కిట్టుజ్ కుతారె. ముందాల్ పడఃకాదు మహి సాప ఎకిస్తారె గాల్ నెక్కి ఒనిలెకెండ్ ఒరదు నడిపిస్తారె.

41 గాని ఒడః ఏరులో ఇ మన్ని ఉండ్రి ఇస్సు మెటుదు డఃసి ఆతాదె ఒడః ముందాహిక ఇస్సాదు నాడితాద్. వెనుక పడఃకాదు పెరి ఉల్కెజ్ డెయ్ తిజ్ ఒడః బదెజ్ బదెజ్ ఆత సాహాద్.

42 జెలిదాన్ ఒసి మహి లోకుర్ సమ్దరమ్దు ఈత డెయ్ జి తప్పె ఆజి సొనార్ ఇజి తియెలాతారె వరిజ్ సప్తెజ్ సయ్ నమ్దికార్ ఆలోసనం కిత్తార్*.

43 గాని సతాతిపతి పవులు గిల్ పిస్సెజ్ ఒడఃబిజి సయ్ నమ్ది వరి ఆలోసనమ్దిజ్ సరి సివితాన్. ఈత డెయ్ జి నెస్సివారు ముందాల సమ్దరమ్దు డిగ్ జి గదెం డాట్టి ఈత డెయ్ జి ఒరదు సొండ్రి ఇజి ఆడ్రి సిత్తాన్.

44 మహివరిజ్ బల్లెజ్ నెక్కిజ్ ఒడఃది ముక్కిజ్ అసి ఒడ్డుదు సొండ్రిజ్ ఆడ్రి సిత్తాన్. ఈహా మాపు విజెపె గిల్స్తాపె ఒడ్డుదు అందితాప్.

28

మెలిత ద్వీపుదు అందిజినార్

§ 27:40 27:40 ఒడః తిర్ప్పి ఇజిరి మర లోకుర్ సప్తెజ్ ఇజి రోమ రూలు మహాద్

* 27:42 27:42 కయ్వువారు తప్పె అతిజి వరిజ్ కాన్ కిని సయ్ నమ్ది వరిజ్ వరి అతికారి

1 మాపు తప్పై ఆతి వెనుక అయా ద్వీపు పేరు మెలిత ఇజి నెస్టావ్.

2 అయ ద్వీపుదికార్ మజి కితి సాయం నిస్సా నసా ఆవిద్. వారు సిసు ఎర్తారె మజి విజేరిత్ కూడెస్టార్. ఎందానిజ్ ఇహిజ పిరు డెయ్జెజ్ మొదొల్స్తిజ్ పిన్సి కితాద్.

3 పవులు ఉండ్రీ కట రివెజ్ వెప్పా తతాండ్ర దొస్టాన్. అక్కు సిసుమున్సు అర్పివలె గొప్పు వినం మన్సి ఉండ్రీ సరాన్ వేడిదిజ్ వెహ్కాణ్ వెల్లి వాతాద్ పవులు కీదు కట్టాద్.

4 పవులు కీదు సరాన్ దూజ్జిమహిక అయ ద్వీపుదికార్ నుడెతిజ్ వారు ఒరెన్ వెట ఒరెన్ వర్గితార్, “నిజమనె, వీండ్రు లోకాజ్ నప్పికాండ్ర, ఏలు నుడెజ్, నమదరమ్దాన్ గెలిసి వాతాన్ గాని నాయం సీని దేవుణు విన్సిజ్ బత్తిదెజ్ సరి సిఎన్.

5 గాని పవులు అయ సరాన్దిజ్ సిసుమున్సు నుడెతిజ్ అది సిసుద్ అర్తాద్. పవులుజ్ ఇనికబా ఆవితాద్.

6 ఆ ద్వీపుదు మనికార్ పవులు ఉబినాన్, సిలిజ వెటనె సానాన్ ఇజి ఒడిబిజి నుడెజి మహార్. గాని వారు నుడెజిమహిక పవులు ఇనికబా ఆవితాద్. అందెజి వారు పరి మన్సు మారిస్తారె, ‘వీండ్రు ఒరెన్ దేవుణులెకెండ మన్సికాన్’ ఇజి వెస్తార్.

7 అయ ద్వీపుది నెయ్యి ఆతి పొప్పి ఇనివన్సిజ్ బానె డగ్రునె బూమిజ్ మహె. వాండ్రు మజి వన్సి కూలెజి వజి మర్యాద సితండ్రె మూండ్రీ రొన్సు వన్సి ఇండ్రె కూడుస్తాన్.

8 అయ నెయ్యి అప్పాసి నోబుదిజ్, మరి నెత్తెర్పొటదాన్ బాద ఆజి మహాన్. పవులు, వాండ్రు మహి గదిలోజి సాహండ్రె పాద్దనం కితాండ్రె వన్సి మున్సు కికు ఇడెజి వన్సిజ్ నెగెండ కితాన్.

9 ఇక జగ్గితిజ్ అయా ద్వీపుదు కన్టం అన్సిమహికార్ విజేరె బానె వాతారె నెగెండ ఆతారె.

10 వారు మజి నండె ఇనాయమ్కు సితారె నెగ్గి కితారె. వెనుక మాపు పయనమాతివలె మజి అవ్సరం మనికెజ్ విజి ఒడెదు తత్తారె ఇట్టార్.

పవులు మెలిత ద్వీపుదాన్ రోమ పట్టుం సొన్సినాన్

11 ముండ్రీ నెలెజ్ ఆతి వెనుక అలెక్సాన్త్రయదాన్ వాతి ఉండ్రీ ఒడెజి ఎత్తాపె పయనమాతావ్. అయ ఒడెజి పిన్సి కాలమ్దు మెలిత ద్వీపుదు మహాద్. కాస్తరు, పోలుక్కు ఇని జవల దెయమ్కాణి బొమ్మెజ్ ఆ ఒడెజి ముందాహిబాన్ మహాద్.

12 మాపు సురకూన్ ఇనిబాన్ వాతాపె బానె మూండ్రీ రొన్సు మహావ్.

13 బాణిజ్ పయనమాతాపె నుటులం తిర్వేజి రేగియు ఇనిబాన్ వాతావ్. ఉండ్రీ రోజు వెనుక దనిణ దరోబ్దాన్ గాలి డెయ్తిజ్ మహు నాండిజ్ పొతియిలి ఇనిబాన్ వాతావ్.

14 బానె నమ్మితి వరిజ్ నెగెండారిజ్ నుడెజి తావ్. ‘మాబాన్ వారం రొన్సు మండ్రు’ ఇజి వారు మజి బతిమాలితారె. దన్సివెనుక మాపు రోమ పట్టుమ్దు వాతావ్.

15 రోమాదు మహి నమ్మితికార్ మాపు రోమాదు వాజినావ్ ఇజి కబ్బు వెహారె నెగెండారె రోమ పట్టుమ్దాన్ అపియాదు* మహి సత దాక, మరి నెగెండారె మూండ్రీ సత్తమ్కు† మహి బాడ్డిదాక మజి కూక్కి ఒత్తెజ్ వాతారె. పవులు వరిజ్ నుడెతిజ్ దేవుణుదిజ్ స్తుతి కితాన్. వన్సిజ్ దయరం వాతాద్.

16 రోమ పట్టుమ్దు అందితిజ్ పవులుజ్, వన్సిజ్ కావ్కిని జమానివెట ఉండ్రీ అదు ఇండ్రె కేట మండ్రెజ్ నెలవ దొహ్కాద్.

పవులు రోమాదు మన్సి యూదురిజ్ దేవుణు మాట వెప్పినాన్

17 మూండ్రీ రొన్సు సాహి వెనుక పవులు బానె మహి యూద పెద్దెల్జి వన్సిబాన్ కూకపిస్తాన్. వారు కూడెజి వాతివలె పవులు వరివెట వెప్తాన్, “తంబెరిజాండె, మా లోకాజ్ పడెజి ఇకెజ్ గాని, మా అనిగొగెరి అలవాటుజి పడెజి ఇకెజ్ గాని ఇనికబా నాసు కివిత. ఇహిజ్ బా, నజి యెరుసలేమ్దు అస్తారె రోమవరిజ్ బపజెస్తారె.

* 28:15 28:15 అపియాదు మహి సత రోమ పట్టుమ్దాన్ అరువయ్తోమ్మిది కిలో మీటర్ దూరం మహె † 28:15 28:15 పయనం కినికార్ నిద్రదిజ్ సాని గదిజ్. మూండ్రీ సత్తమ్కు మహి బాడ్డి రోమ పట్టుమ్దాన్ యాబయ్ మూండ్రీ కిలో మీటర్ దూరం మహె

18 వారు నజీ గవర్నరుబాన్ తత్తారం నండా ప్రస్నూజ్ వెన్బాజి సుడేతివలె సావుదిజ్ తగితి తప్పు ఇనికబా నాను కివిత ఇజి తెలితాద్. అయావలె నజీ డిస్సెజ్ సుడేతార.

19 గాని నజీ డిస్సెజ్ యూదురు ఒప్పుకొడేవితార. అందెజె నా సొంత లోకుమున్ను నజీ ఇని మొరొ సిల్లిజ్బా కయెనరుబాన్ సొన్ని నావందిజ్ వెప్తాజ్ ఆత.

20 అందెజె నాను మిజి సుడేదిజ్ మీ వెట వర్దిదెజ్ మిజి కూకీప్పి. ఎందానిజ్ ఇహిజ ఇస్తాయేలు లోకు ఎయెవన్నివందిజ్ ఎర్దు సుడేజి మంజినారొ వన్నివందిజె నాను ఏలు యా గొలుస్కూణ్ తొహె ఆత మన్ను”, ఇజి వరివెట వెప్తాజ్.

21 దన్నిజ్ యూదురు, “యూదయ ప్రాంతమదు మన్ని మా లోకాణిజ్ మీవందిజ్ మజి ఇని ఉత్తమ్బా రెవితాద్. ఇబ్బె వాతి మా లోకు ఎయెర్బా మీ వందిజ్ ఇని సెఇ మాటబా వెహెవితార. నీను ఇనికాదొ తప్పు కిత్తి ఇజి మాపు వెన్వితాప్.

22 గాని యా నజితివందిజ్ మీ ఆలోసనం ఇనిక ఇజి వెండెజ్ మాపు ఆన ఆజినాప్. ఎందానిజ్ ఇహిజ నీను కూడితి మహి యా జటువందిజ్ విజెరె లోకుర పగదాన్ వెప్పినార ఇజి మాపు సెసినాప్”, ఇహార్.

23 అందెజె వారు పవులు వెట పలార్ రోజు కూడేదెజ్ వరపాటు కితారె పవులు బత్కినిబాన్ మంద ఆజి వాతార. పవులు పెందాహాన్ అని పొదొయదాక నెగ్గెండ వరిజ్ వెప్పి దేవుణు ఏలుబడి వందిజ్ వరివెట వెప్తాజ్. మోసె సిత్తి రూలుజ్ దాన్, ప్రవక్తరు రాస్తి మాటెజాణ్ యేసువందిజ్ తొరిసి, వాండ్రు వెప్పికెడె నిజమె ఇజి వెప్పి తొరిస్తాన్. వరిజ్ ఒప్పుకొడిస్సెజ్ సుడేతాన్.

24 పవులు వెప్తా మాటెజ్ సెగొండార్ నమ్మితార, మహికార్ నమ్మివితార.

25 వారు ఒరెన్ వెట మరి ఒరెన్ వర్దిజి నెక్త పొక్తారె ఉండ్రె మన్ను ఆదెజ్ అట్ఎండెతారె మరజి సొహార్. వారు మరజి సొని ముందాల పవులు వరివెట ఉండ్రె మాట వెప్తాజ్, “దేవుణు ఆత్మ యెసయ ప్రవక్త దాన్ మీ అనిగొగొరె వెట వెప్తా మాట నిజమె.

26 అక్క ఇనిక ఇహిజ, “నీను సొన్ని యా లోకాజ్ వెప్తూ. ‘మీరు బాగ వెంజినెదెర్ గాని అర్దం కిదెజ్ అట్ఇదెర్. బాగ్ సుడేజినెదెర్ గాని తొఇదెర్’.

27 ఎందానిజ్ ఇహిజ యా లోకురి మన్ను బేగి అర్దం కివెద్. వారు కణకెజ్ గిబ్బిజ్ మూక్త మనార్. సిల్లిజ్ వారు కణకాణ్ సుడేతారె మరి. మన్నుదు అర్దం కిత్తారె మరి. నా దరోట్ మప్తిజ నాను వరిజ్ నెగెండ కెన్”, ఇజి దేవుణు వెప్తాజ్.

28 అందెజె దేవుణు రక్కుణ సీనాన్ ఇని సువార్త యూదురు ఆఇ వరిజ్ సీజినాన్ ఇజి, వారు అయ మాట వెనార్, ఇజి మీరు నెస్సెజ్ వలె”.

29-30 రుండి పంటెజ్ వూర్తి పవులు ఉండ్రె ఇల్లు అదె లొస్తాండ్రె బత్కితాన్. వన్నిబాన్ వాతివరిజ్ విజెరిజ్ వాండ్రు డగ్రు కిత్తాన్.

31 దేవుణు ఏలుబడి వందిజ్, ప్రబు ఆతి యేసుక్రీస్తు వందిజ్ దయెరమదాన్, ఇని అడ్డు సిల్లెండ, నెస్సిస్తాన్.

అపొస్తుడు ఆతి పవులు రోమ పట్టమీదు మన్ని దేవుణు సజమ్దివరిజ్ రాస్తి ఉత్రం.

నెల్వ కిబిసిని

యా ఉత్రం రాస్తికాన్ ప్రబు ఆతి యేసుక్రీస్తుజ్ అపొస్తుడు ఆతి పవులు. రోమాదు మన్ని దేవుణుదిజ్ నమ్మిత్తివరిజ్ యా ఉత్రం రాస్తికాన్. రాస్తి కాలం క్రీస్తుయేసు యా లోకమ్దు వాజి సిలువాదు సాజి, మర్రి నిజ్జి పరలోకమ్దు సాహివెనుక 56 నమస్తం నడిఃమి (ఏ.డి 55-56) రాస్సు మంజిన. యా ఉత్రమ్దు ముకెలమాతిక ఇనిక ఇహిజ, క్రీస్తువందిజ్ వెప్పొ సువార్త. సువార్త ఇహిజ ఇనిక, సువార్త నమ్మిత్తివరిజ్ ఇనికెజ్ జర్గినె, వినకవందిజ్ రాసినాన్. మరి, దేవుణు లోకురిజ్ నీతినిజయ్యి మన్నికార్ ఇజి ఎలాగ ఇడ్డినాన్, ప్రబు ఆతి యేసుక్రీస్తువలెహాన్ ఎలాగ విడుదల వానాద్ నన్ని సజతిజ వందిజ్ రాసినాన్.

1 క్రీస్తుయేసుజ్ పణి కినికానాతి పవులు ఇని నాను యా ఉత్రం రాసిన. సువార్త వెవ్రాజ్ దేవుణు నజి అపొస్తుడుజ పజ నిల్త్రాన్.

2 సేన కాలమ్కు ముజాలె, ఇహిజ, యేసు ప్రబు యా లోకమ్దు వానెండ మహివలెనె, దేవుణు మాటెజ్ రాస్తి మహి ప్రవక్తరుబాన్ దేవుణు యా సువార్త వందిజ్ వెప్పొ ఇజి ఒవందం కిత్త మహాన్.

3 దేవుణు మరిసి వందిజె యా సువార్త. వీండ్రు లోకు వజ దావీదు రాజు తెగాదు పుట్టికాన్.

4 వీండ్రు దేవుణు వజ ఇహిజ, దేవుణు మరిసి ఇజి గొప్ప సత్తుదాన్ తోర ఆతాన్. ఎలాగ ఇహిజ, వాండ్రు సాతి వరిబాణిజ్ మర్జి నిజితాన్. వాండ్రు మా ప్రబు ఆతి యేసు క్రీస్తునె.

5 క్రీస్తు దయాదర్మమ్దాన్ అపొస్తుడు వజ దేవుణు నజి కూక్తాన్. ఎందానిజ్ ఇహిజ, విజు జాతిదికార్ క్రీస్తుముస్సు, నమకం ఇడ్డి, వన్నిజ్ మాడిసి, వన్నిజ్ లోజిజి మండ్రెజ ఇజి.

6 రోమ పట్టమీదు యేసు క్రీస్తుజ్ నమ్మిత్తికార్ ఆతి మీరుబా దేవుణు కూక్తి పరి లోఇ మన్నిదెర్.

7 దేవుణు ప్రేమ కిజి, వన్నిజ్ కేట ఆతి మిజి విజెరిజ్ నాను యా ఉత్రం రాసిన. బుబ్బాతి మా దేవుణుబాణిజ్, ప్రబు ఆతి యేసుక్రీస్తుబాణిజ్ కనికారమేని నిపాతి మిజి మనీద్ ఇజి నాను పార్దనం కిజిన.

రోమ పట్టమీదు మన్ని నమ్మిత్తివరిజ్ సొన్ని సుడెదెజ్ పవులు కోరిజినాన్

8 యా ఉత్రమ్దు తోలిత నాను మీరు విజిదెరి వందిజ్ దేవుణుదిజ్ వందనమ్కు వెప్పొన. యేసు ప్రబువలెహాన్ నమ్మిత్తి దన్నివందిజ్ రోమ దేసమ్దికార్ ఏలుబడిః కిని విజు బాడ్డిదు మన్ని లోకుర్ వెప్పొనార్.

9-10 నాను ఎస్తివలెబా పార్దనం కినివెలె మీ వందిజ్ వెప్పొని సువార్త పూర్తి మన్నుదాన్ నాను కిజిన ఇజి నెసిని దేవుణునె దిన్నిజ్ సాసి. గాని నాను ఎలాగ ఇహిజ్బా ఏలు వాజి మిజి సుడెదెజ్ దేవుణు సిత్తం ఆదెజ్ ఇజి పార్దనం కిజిన.

11 ఎందానిజ్ ఇహిజ, మిజి వాజి సుడెజి దేవుణు వందిజ్ బత్రిని బత్కుదు మిజి దయరం కిబిస్తెజ్ ఇజి ఆన ఆజిన.

12 ఎలాగ దయరం కిబిస్తెజ్ ఇహిజ మాటు ఒరెన్ వన్ని నమకమ్దాన్ మరి ఒరెన్ వన్నిజ్ దయరం వెవ్రాజ్వెలె.

13 నమ్మిత్తి తంబెరిజాండె, నాను నండొ సుట్కు మిజి సుడిః వాదెజ్ ఇజి ఆలోననం కిత్త ఇజి మీరు నెస్తిజ్వెలె. గాని అతోవండె అత. ఎందానిజ్ ఇహిజ, నండొ అడ్డుజ్ వాతె. మీ బాన్ వాజి మిజి సుడెఃతిజ మీ బాణిజ్ మజి గొప్ప లాబం వాని లెకెండె. ఎందానిజ్ ఇహిజ మీ నన్ని నండొ జాతిజ నడిఃమి నాను సొని లెకెండె మీ నడిఃమిబా నాను వాజి సువార్త వెవ్రాజె ఇజి. సువార్త వెంజి నమ్మిజి దేవుణు కొడోర్ ఆనార్.

14 యూదురు ఆ ఇ వరిజ్ విజేరిజ్ సువార్ల వెహైజ్ నాను ఉండ్రీ అప్పు మన్నికాన్. గ్రీకు బాస నెన్సి వరిజ్బా, నెన్స వరిజ్బా, పెరి సదువు మన్ని వరిజ్బా, సదువు సిల్లి వరిజ్బా వెహైజ్ సీదెజ్ ఇజ నజీ ఉండ్రీ అప్పు మనాద్.

15 అందెజె, రోమ పట్టమీదు మన్ని మిజీబా యా సువార్ల వెహైజ్ ఇజ నాను గొప్పు ఆస ఆత మన.

16 ఎందానిజ్ ఇహిజ, నాను సువార్ల వెహైజ్ సిగు ఆవి. యేసుక్రీస్తు మున్ను, నమకం ఇడ్చి విజేరిజ్ వరి పావమ్కాణిజ్ రక్సిన్లెజ్ యా సువార్లదిజ్ దేవుణుబాణిజ్ ఒద్దె సత్తు మనాద్. యా సువార్ల తొలిత యూదురిజ్ వెనుక ఆ ఇ జాతిజ సాటె ఆజినాద్.

17 యా సువార్లదు దేవుణు ఇనిక వెహైజ్ నాన్ ఇహిజ, లోకు కిత్తి తప్పు పణిజ వందిజ్ వారు సిక్కు పొందిదెజ్ అక్కర్ సిల్లెద్ ఇజనె. వారు యేసుప్రబు మున్ను, నమకం ఇడ్చి వందిజె సిక్కుదాన్ తప్తు ఆతార్. యాక ముందాల్ ఒరెన్ దేవుణు ప్రవక్త రాస్తి లెకెండెనె. “ఎయెర్ నీతినిజియ్యికాన్ ఇజి నాను ఇడ్చ మనాన్, వాండ్రు నా మున్ను, నమకం ఇడ్చి వందిజ్ ఎలాకాలం బత్తికాన్”.

దేవుణు లోకుర్ మున్ను, నండొ కోపం ఆజినాన్

18 దేవుణువందిజ్ మన్ను సిల్లి లోకాజ్ విజేరిజ్ సెఇపణి కిని విజేరిజ్ దేవుణు సిక్కు సీనాన్ ఇజి పరలోకమదాన్ తోరిస్త మనాన్. ఎందానిజ్ ఇహిజ, వరి సెఇ పణిదాన్ దేవుణు వందిజ్ నెన్సిమన్ని నిజమాతికెజ్ విజి వారు అడ్డు కిజినార్.

19 దేవుణు వందిజ్ నిజమాతికెజ్ అర్దం కిదెజ్ వారు అట్నార్. ఎందానిజ్ ఇహిజ, దేవుణు ఎలాగమర్తికాన్ ఇజి వాండ్రు విజేరిజ్ తోరిస్త మనాన్.

20 మాపు దేవుణుదిజ్ నెన్ఏవ్ ఇజి ఎయెన్బా వెహైజ్ వీలు సిల్లెద్. ఎందానిజ్ ఇహిజ, దేవుణు ఎలాగ మర్తికాన్ ఇజి మాటు సుడెదెజ్ సిల్లి, గాని వాండ్రు లోకం తయార్ కిత్తిబాణిజ్ అసి లోకమీదు తయార్ కిత్తి వనకబాణిజ్ వాండ్రు ఎలాగ మర్తికాన్ ఇజి ఎలాకాలం మన్ని వన్ని పెరిసత్తు ఎలాగమర్తిక ఇజి మాటు సుడెజినాల్. అందెజె దేవుణుదిజ్ నెన్ఏవ్ ఇజి ఎయెన్బా వెహైజ్ వీలు సిల్లెద్.

21 యూదురు ఆ ఇ కార్, దేవుణు ఎలాగ మర్తికాన్ ఇజి నెన్సిజ్బా దేవుణు ఇజి మాడిసెంఎర్, వాండ్రు కిత్తి దన్నివందిజ్ వందనమకు వెహిపర్. నస్తివలె వారు దేవుణు వందిజ్ అర్దం కిదెజ్ అట్ఏండ ఆతార్. వరి ఆలోసనమకు సెఇకెజ్ ఆతె.

22 వారు బుద్ది మన్నికార్ ఇజి వెహె ఆజి బుద్ది సిల్లి పణిజ్ కిత్తార్.

23 ఎలాకాలం మంజిని దేవుణుదిజ్ పొగడిజనగవేరం సిఏండ బొమ్మెజి పొగడిజి గవేరం సిత్తార్. సబ్బిసాని లోకులెకెండె, పొటిజ్ లెకెండె, జమతుజ్ లెకెండె, మరి బూమి మున్ను, ఊజి బూలాని వనకాజ్ లెకెండె తోర్చి బొమ్మెజి తయార్ కిత్తారె వనకాజ్ పొగడిజి గవేరం సిత్తార్.

24 అందెజె వారు, కిదెజ్ ఆ ఇ ఆసెజ్ వరి మున్నుదు పుట్టి లెకెండె కిదెజ్, దేవుణు వరిజ్ సరి సిత్తాన్. ఇనిక ఇహిజ వారు వరిజె సుగు, అతి సెఇ పణిజ్ కిత్తార్.

25 ఎందానిజ్ ఇహిజ, సువూతి దేవుణు వందిజ్, నిజమందిజ్ డిస్తారె నిజం ఆ ఇ దన్నిజ్ ఇత్తార్. విజి దన్నిజ్ పుటిస్తికాన్ ఆతి ఒరెండ్రె దేవుణుదిజ్, మాడిసె వన్నిజ్ లోజెఏండె, దేవుణు పుటిస్తి వనకాజ్ మాడిస్తారె, వనకాజ్ లోజెత్తార్. గాని పుటిస్తికెజ్ విజి అయ దేవుణుదిజె ఎన్సివలెబా మాడిస్తెజ్ వెలె.

26 అందెజె సిగు ఆతి ఒడెలో ఆసెజి వందిజ్ దేవుణు వరిజ్ ఒపజెప్తాన్. అందెజె వరిలో ఇ అయెలోకొడెకె మాసీరిజ్ సాన్ఏండె అయెలోకొడెకాజ్ దరోట్ ఒడెలో ఆస ఆజి మహ్తా.

27 అయావజనె యూదురు ఆ ఇ వరి లో ఇ మొగకొడెకెర్ ఆల్పికాజ్ ఇడెఏండె మొగకొడెకెర్ దరోట్ ఏక ఉత్పత్త ఆజి మహ్తార్. వారు మొగకొడెకెర్ వెటె సిగు ఆతి పణిజ్ కిత్తార్. అయ ఒద్దె తప్పు ఆతి పణిజ్ వరిజ్ తగితి సక్కు ఆజి వరిమున్ను, వాతాద్.

28 వారు దేవుణుదిజ్ నెక్కుప్తారె వన్ని వందిజ్ నెన్సిమన్ని నిజమాతికెజ్ విజి డిస్తెసిత్తార్. నస్తివలె వరి సెఇ బుద్దిదు నడిదెజ్ ఇజి దేవుణు వరిజ్ డిస్తెసిత్తాన్. అందెజె సరి ఆ ఇ పణిజ్ కిదెజ్ వరి బుద్ది మహ్తాద్.

29 విజి రకమ్కాణి సెఇ పణిజ్ కిదెజ్ వారు ఏక ఒడెబినార్. ఇనికెజ్ ఇహిజ, మహి వరిజ్ సెడ్డ కిదెజ్, మహివరిజ్ మన్నికెజ్ మజి దొహెకెజ్ ఇజి సెఇ ఆస ఆదెజ్, ఎలాగబా మహివరిజ్ సెఇకె కిదెజ్, మహిపరి వెటె గోన ఆదెజ్, సెడ్డెజ్, గొడెబ కిదెస్సెజ్, మొసెం కిదెజ్, మహివరివందిజ్ సెఇకెజ్ వెహైజ్, సాండి వెహైజ్.

30 నండ్లో లోకుర్ మహిపరివందిజ్ తప్పుజ్ వెప్పొనార్. నండ్ండార్ దేవుణు ఎర్దు వెత్తేకం కిజనార్, ఆజవరిజ్ సిగు కిబిస్తార్, గర్ర ఆజనార్, పొజిజనికార్ ఆజనార్, మరి రెకరకమది కొత్త సెజపణిజ్ ఎలాగ కిదెజ్ ఇజ సుడజనార్, వరి కొడొర అయసి అప్పొసిరిజ్ లోజివర్.

31 వారు అర్దం కిదెజ్ అబ్బిర్. ఒవందం కిత్తిలెకెండ కివర్. నండ్ండార్ వరి సొంత ఇండ్రోణివరిజ్ నెగెండ తోవర్. నండ్ండార్ కనికారం సిల్లికార్ ఆజనార్.

32 నిన్ని పణిజ్ కనివరిజ్ సప్తజ్ వలె ఇజ దేవుణు వెప్తా మనాన్ ఇజ నెస్తిజబా వారు నిన్ని సెజ పణిజ్ నె కిజ మంజనార్. అక్కాదె అవిండ నిన్ని సెజ పణిజ్ కినివరిజ్ వారు డర్దు కిజనార్.

2

దేవుణు సరియాతి తీర్పు తీరిస్తాన్

1 మహికార్ తప్పు కినికార్ ఇజ మీరు వెప్పొ వరిమున్ను తీర్పు తీరిసినిదెరా? ఆసా వెప్తాజ మీరు మిజినె తప్పు కినికిదెర్ ఇజ వెప్పొనిదెర్. మాపు తప్పు కిజకావ్, ఇజ వెప్తాజ్ మీరు అబ్బిదెర్. ఎందానిజ్ ఇహిజ, మీరుబా వరిలెకెండ తప్పు కినికిదెర్.

2 తప్పు కిని యూదురు ఆజవరిజ్ దేవుణు తీర్పు తీరిస్సివలె వరిజ్ సరియాతి తీర్పు తీరిస్తాన్ ఇజ మాటు నెసినాట్.

3 అందెజ్ ఆజ లోకుర్ పాపం కినికార్ ఇజ వెప్పొని మీరు అయ పాపమకునె కిజ మహిజ దేవుణు తీర్పుదాన్ తప్పె ఆజదెర్ ఇజ నెస్తిజ్వెలె.

4 దేవుణు మీవెట వన్ని గొప్ప విలువాతి దయ, కనికారం తోరిసినాన్. అక్క మీరు ఇజిరి కణకదాన్ సుడజనిదెరా? దేవుణు మీవెట తోరిసని కనికారం మీరు పాపమకు ఒప్పుకొడెజి డిసిసిని వందిజ్ ఇజ మీరు నెన్ ఇదెరా?

5 గాని మీరు మీ మన్నుదు గొప్ప గర్ర ఆజ పాపమకు ఒప్పుకొడెజి డిసిసివిండ మహిజ దేవుణు తీర్పు కిని రోజారు మీ మున్ను సిక్కు నండ్ కుంబ కిజనిదెర్. దేవుణు విజ లోకురిజ్ ఉండ్రె లెకెండ తీర్పు కిని దినమదు మిజిబా తీర్పు కినాన్.

6 దేవుణు ఒరెన్ ఒరెన్ వన్నిజ్ వారు కిత్తి పణిజ తగితిక మర్తి సినాన్లె*

7 దేవుణుబాణిజ్ జాయ్ని గవరం, సాపు సిల్లి బత్తు దొహ్కెజ్ ఇజ డిసిసివిండ నెగ్గి పణిజ్ కిజ మహివరిజ్ దేవుణు ఎలాకాలం బత్తిని బత్తు సినాన్.

8 గాని నజీ నానె నెగెండ మండ్రెజ్ ఇజ సుడజని వరిజ్, దేవుణు వెప్పొని నిజమాతి మాటదిజ్ డర్దు కివిండ ఒడ్డె సెజపణిజ్ కినివరిజ్, దేవుణుబాణిజ్ గొప్ప కోపం వానాద్.

9 పాపం కిజనె మంజని ఒరెన్ ఒరెన్ వన్నిజ్ బాదెజ్ వానె. కస్టమకు వానె. నన్ని కస్టమకు యూదురుజ్ మొదొల్లినె. వెనుక యూదురు ఆజ వరిజ్ వానె.

10 గాని నెగ్గి పణిజ్ కినివరిజ్ దేవుణు వన్ని గొప్ప జాయ్ని గవరం, సాంతి సినాన్. ముందాల యూదురిజ్ వెనుక యూదురు ఆజ వరిజ్ సినాన్.

11 ఎందానిజ్ ఇహిజ, దేవుణు లోకాజ్ తీర్పు కినివలె తేడ తొవిండ తీర్పు కినానె.

12 విజెర్ లోకుర్ పాపం కిత్తిజ్ విజెర్జ్ నక్కు వానాద్. దేవుణు మోసెజ్ సిత్తి రూలుజ్ వందిజ్ యూదురు ఆజకార్ నెన్ ఏతార్. అందెజ్ “మీరు ఎందానిజ్ రూలుజ్ లోజిజితిదెర్?”, ఇజ వరివెట వెహ్విన్. దేవుణు మోసెజ్ సిత్తి రూలుజ్ నెస్తి యూదురుజ్ సిక్కుసిదెజ్ దేవుణు తీర్పు కినాన్. ఎందానిజ్ ఇహిజ వారు రూలుజ్ లోజివతార్.

13 సిత్తినిజయ్నాకాన్* ఎయెన్ ఇహిజ, దేవుణు రూలుజ్ వెహికాన్ అవన్, అయ రూలుజ్ లోజిత్తికాండ్రె.

14 దేవుణు యూదురిజ్ సిత్తి రూలుజ్ యూదురు ఆజవరిజ్ సివితాన్. అహిజబా వారు అయ రూలుజ్ వజ బత్తిత్తిజ్, అయ రూలుజ్ వారు నెస్తిమనార్ ఇజ మాటు నెసినాట్. అయ రూలుజ్ వరిజ్ సిల్లు గాని మన్నిలెకెండ వారు నడిజనార్.

* 2:6 2:6 కిర్తన 62:12; సామెత 24:12. * 2:13 2:13 దేవుణు మున్ను నమకం ఇత్తి మన్ని పాపమకు దేవుణు మాయిప్పికాన్.

15 అయ రూలుజ్ వరి మన్సుదు ఇడె ఆతె మన్నె ఇజి వరి పణిజాణ్ తోరిసినార్. ఒరెన్ నెగ్గి పణిజ్ కిత్తిజ్ బా సెఇ పణిజ్ కిత్తిజ్ బా అక్కజ్ నెగ్గికెజ్, సెఇకెజ్ ఇజి వన్నె మన్సుదు నెసినాన్. అహె దేవుణు సత్తి రూలుజ్ వన్నె బుద్దిదు మన్నె.

16 లోకుర్ వరి మన్సుదు ఎయెరిజ్ నెన్ ఏండ ఇడ్డిమన్నె ఆలోసనముకు వందిజ్ బా, దేవుణు తీర్పు కిని రోజుదు తీర్పు సీనాన్. యేసు క్రీస్తు వెట యాకెజ్ విజు జర్గిజెని ఇజి నాసు వెప్పిని సువార్తదు మనాద్.

దేవుణు మోసెజ్ సత్తి రూలుజ్ వజ నడినికావ్ ఇజి వెప్పిని యూదురువందిజ్

17 ఏలు యూదురు ఆతి మిజి ఉండ్రీ మాట నాసు వెప్పా. మాపు యూదుర్ ఇజి మీరు వెప్పినిదెర్. దేవుణు మోసెజ్ సత్తి రూలుజ్ వజ నడినికావ్, అందెజె దేవుణు తీర్పుదాన్ తప్పె ఆదెజ్ ఆనావ్, ఇజి మీరు ఒడిబిజినిదెర్. దేవుణు కొడెర్ ఇజి పొగ్డె ఆజినిదెర్.

18 దేవుణుదిజ్ ఇన్సుమాతిక ఇనిక ఇజి మీరు నెన్సిదెర్. దేవుణు రూలుజు వందిజ్ నెగెండ నెన్సిజ్, డగ్రు కిదెజ్ విజు దన్నెజ్ మిన్సి విలువాతికెజ్ ఇనికెజ్ ఇజి మీరు నెసినెదెర్.

19 గుడ్డివరిజ్ సరి తోరిసి నడిపిసిని వరిలెకెండ, యూదురు ఆజవరిజ్ సరియాతి సరి వెప్పె నడెప్పెనెజ్ అట్నూవ్ ఇజి మీరు వెప్పినిదెర్. సీకటిదు నడిసిని వరిజ్ జాయ్ తోరిసిని వరిలెకెండ మీ మాటిజాణిజ్ యూదురు ఆజవరిజ్ దేవుణు సరి తోరిసినిదెర్ ఇజి వెప్పినిదెర్.

20 బుద్ది సెల్లివరిజ్, యూదురు ఆజవరిజ్ నెన్సిన్జెజ్ అట్నూవ్ ఇజి మీరు ఒడిబిజినిదెర్. కొడెర్ లెకెండ మన్నెవరిజ్, ఇహిజు దేవుణు వందిజ్ నిజమాతికెజ్ నెన్ ఇ వరిజ్ నెన్సిన్జెజ్ అట్టికావ్ ఇజి ఒడిబిజినిదెర్. ఎందానిజ్ ఇహిజు, రాస్తిమన్నె దేవుణు మాటదు మన్నె విజు వనకాజ్ ఇంక ఒద్దె విలువాతి గెణం మరి నిజమాతి మాట మీబాన్ మనాద్ గదె.

21 మహివరిజ్ నెస్సిసిని మీరు, మిజి మీరె నేర్పె ఆజదెరా? డెజి కిమాట్ ఇజి గటిజు వెప్పిని మీరు డెజి పణి కిజినిదెరా?

22 రంకు బూలాదెజ్ ఆవీద్ ఇజి వెప్పిని మీరు రంకు బూలాజినిదెరా? దెయ్ మకాజ్ డిస్సి సత్తి మీరు దెయ్ మక గుడిదికెజ్ డెజి కిజినిదెరా?

23 దేవుణు రూలుజ్ మాబాన్ మన్నె ఇజి వెప్పిని మీరు అయా రూలుజు లోజి ఏండ దేవుణుదిజ్ సిగు తప్పిసినిదెర్.

24 “మీరు ఈహు కిత్తిజ్ దేవుణు పేరు యూదురు ఆఇకార్ దూసిసినార్”, ఇజి దేవుణు మాటదు రాస్తి మన్నెక, మీ వందిజ్ బా రాస్తి లెకెండెనె.

25 దేవుణు మోసెజ్ సత్తి రూలుజ్ వజ మీరు నడిజినిదెర్ ఇహిజు మీరు సునతి ఆతి వందిజ్ మిజి లాబం మనాద్. గాని దేవుణు సత్తి రూలుజు మీరు లోజి ఇతిజు మీరు దేవుణు లోకుర్ ఇజి తోరిన్జెజ్ సునతి కిబె ఆఇ యూదురు ఆజవరిలెకెండ మీరు.

26 అయావజనె, సునతి కిబె ఆఇతిజుబా దేవుణు సత్తి రూలుజు వజ నడిని యూదురు ఆఇకార్ వన్నె సొంతలోకుర్ లెకెండ వాండ్రు ఇడ్నాన్ గదె.

27 సునతి కిబె ఆఇకార్ గాని దేవుణు రూలుజు లోజిని మిజి తీర్పు కినార్. ఎలాగ ఇహిజు, మిజి రూలుజు విజు రాస్తి మహిజ్ బా, సునతి కిబె ఆతిజ్ బా అయా రూలుజు లోజి ఇతిజ్ యూదురు ఆఇకార్ మిజి తీర్పు కినార్.

28 దేవుణు లోకుర్ ఇజి తోరిన్జెజ్ ఇనికాదో అలవాటుజ్ లెకెండ కినికాన్, నిజమాతి యూద వాండ్రు ఆవీన్. దేవుణు లోకుర్ ఇజి తోరిన్జెజ్ మీ ఒడిబిదెజ్ ఇనికాదో కిత్తిజు దేవుణు ఒప్పకొణాన్ ఇజి ఒడిబిమాట్.

29 గాని, నిజమాతి యూద వాండ్రు ఎయెన్ ఇహిజు, మన్ను మారిన్సికాండ్రె నిజమాతి యూద వాండ్రు. దేవుణు ఆత్మదాన్ మన్ను మారిన్సికార్ దేవుణు లోకుర్. దేవుణు లోకుర్ ఆదెజ్ ఇజి మరి ఇనికబా కిదెజ్ ఆవీద్. నన్నె వరిజ్ లోకుర్ పొగ్డె ఇతిజ్ గాని దేవుణు వరిజ్ పొగ్డెనాన్.

3

దేవుణు నమ్మిదెజ్ తగ్గికాన్.

* 2:24 2:24 మెసయ 52:5; మెహె 36:22.

1 అహిజ, యూద వాండ్లు ఇజి ఇని లాబం మనాద్? నునతి కిబె ఆతికాన్ ఇజి ఇని లాబం మనాద్ ఇజి మీరు వెప్పిదెర్ను?

2 దన్నిజ్ నాను వెప్పిని విజు నజుతిజులోఇబా గొప్ప లాబుమ్నె! ఎలాగ ఇహిజ, దేవుణు వాండ్లు కిత్తిమన్ని ఒవందమకు మన్ని వన్ని మాటెజ్, ముజాల మా అనిగొగొరుజ్నె సిత్తాన్.

3 అహిజ, యూదురు నండెండార్ దేవుణుదిజ్ నమ్మిదెజ్ తగ్గికార్ ఆవతార్. వారు నమ్మిదెజ్ తగ్గికార్ ఆఇతిజ్, దేవుణు వాండ్లు వెప్పిలెకెండ కివిన ఇజి వెప్పినిదెరా?

4 నాను వెప్పి, ఆహి ఇండ్రెజ్ ఆవిద్. దేవుణు వెప్పిలెకెండ వాండ్లు కినాన్. లోకుర్ దేవుణు వెట వెప్పిలెకెండ కిఎండ అబద్దం వెప్పికార్ ఆతిజ్బా, దేవుణు నిజమనె వెప్పాన్. దావిదు రాజు దన్నివందిజ్ కీర్తన పుస్తకముదు ఈహు రాస్త మనాన్. దేవుణు ఈహు వెప్పాన్, “నీను వర్గినివలె నీ మాటెజ్ నిజమాతికెజ్ ఇజి లోకుర్ వెప్పార్. లోకు నీ ముస్సు నేరం మొప్పెజ్ సుడఃజినివలె వారు గెల్లిస్తెజ్ అటేవండానార్లే*.

5 మాటు తప్పు కినివలె దేవుణు మా పాపమకు సెమిసి వాండ్లు నీతినిజయ్లు మన్నికాన్ ఇజి ఒద్దె తోరిసినాన్. అందెజె మాటు తప్పుజ్ కిత్తివందిజ్, మజి సిక్చ సిత్తిజు దేవుణు నాయం కినికాన్ ఆవన్ ఇజి వెప్పికార్ మనార్.

6 ఆహి ఇండ్రెజ్ ఆవిద్. ఎందానిజ్ ఇహిజ దేవుణు నాయం కినికాన్ ఆవన్ ఇహిజ, విజేరె లోకాజ్ తీర్పు కిదెజ్ మన్ని అతికారం ఎలాగ మంజినాద్.

7 ఎయెన్బా, “నాను తప్పు వెప్పా”, ఇజి వెప్పాన్పు. గాని నాను తప్పు వెప్పా ఇహిజ దేవుణు నిజమనె వెప్పినాన్ ఇజి తోరిజినాద్. అందెజె లోకుర్ దేవుణుదిజ్ పొడఃజినార్. అహిజ దేవుణుదిజ్ పొగ్డు వానివలె నాను తప్పు కిత్తిదన్నిజ్ దేవుణు నజి తీర్పు నీజి సిక్చ సీదెజ్ ఆవిద్ ఇజి మీరు వెప్పిదెర్ను.

8 అయాలెకెండ వెప్పాక నిజం ఇహిజ, దేవుణు పొగ్డః ఆవన్ ఇజి మాటు పాపం కిజి మండ్రెజ్నా? నానుబా ఈహు వెప్పిన ఇజి సెగెండార్ తప్పు మొప్పినార్. ఈహు వెప్పివరిజ్ దేవుణు తీర్పు తీరిసి తగితి సిక్చ సీనాన్.

దేవుణు ఎర్లు నిజమాతికాన్ ఎయెన్బా సిల్లెన్.

9 అహిజ ఏలు ఇనిక వెప్పాట్? మాటు యూదురు, యూదురు ఆఇవరిజ్ ఇంక పెరికాటా? అవేల్. యూదురిజ్ని యూదురు ఆఇవరిజ్ విజేరిజ్ దేవుణు తీర్పు కినాన్ ఇజి నాను వెప్పాగదె. ఎందానిజ్ ఇహిజ, పాపం విజేరిజ్ అడిగి ఇడ్డినాద్.

10 దేవుణు మాటదుబా దిన్ని వందిజ్ రాస్తమనాద్. ఇనిక ఇహిజ, “ఎయెన్బా నీతి మన్నికాన్ ఆవన్, నీతిమన్నికాన్ ఒరెన్బా సిల్లెన్”.

11 నరియాతి ఇనిక ఇజి అర్థం కినికాన్ ఒరెన్బా సిల్లెన్. దేవుణుదిజ్ నెప్పెజ్ ఇజి రెబానికానబా సిల్లెన్.

12 విజేరె ఉండ్రెలెకెండ నెఇవణిజ్ కినికార్ ఆతారె దేవుణుబాణిజ్ ముత్తా సొహార్. నరియాతి వణి కినికార్ ఎయెర్బా సిల్లెర్. ఒరెన్బా సిల్లెన్*,”

13 “లోకుర్ మాటెజ్ ఎలాగ మన్యె ఇహిజ, పీనుగుదిజ్ మూస్తి వెనుక మర్రి లాగితిజు ఎలాగ కంపు డెయూనాదొ, అయాలెకెండెన్. మాటెబాణిజ్ మొసం కిజినార్*. సరసి విసం లోకాజ్ ఎలాగ పాడః కినాదొ అయాలెకెండెన్ వారు మాటెబాణిజ్ పాడః కినార్”*.

14 “వారు ఆఇవరిజ్ సయివ్ కిజిని మంజినార్. ఆఇవరిజ్ దూసిసినార్.”*

15 లోకాజ్ సప్పెజ్ వరిజ్ సులునె వానాద్.

16 వారు సొనిబాన్ విజు నాననం కిజినార్, లోకాజ్ గొప్ప కస్తమకు తపిసినార్.

17 ఆఇవరి వెట సమాదనమ్దాన్ బుత్తిదెజ్ ఎనెజ్బా నెన్వర్.”*

18 వరి మన్పుదు దేవుణు ఇహిజ ఇని తియెల్ సిల్లికార్.

* 3:4 3:4 కీర్తన 51:4. * 3:12 3:12 కీర్తన 14:1-3; 53:1-3. * 3:13 3:13 కీర్తన 5:9. * 3:13 3:13 కీర్తన 140:3.

* 3:14 3:14 కీర్తన 10:7. * 3:17 3:17 యెసయ 59:7,8.

19 దేవుణు మాటాడు రాస్తిమన్నికైజ్ విజు దేవుణు ఎయెరిజ్ వన్ని రూలుజ్ సిత్తాండ్రో వరివందిజ్ ఇజి మాటు నెసినాట్. అందెజె యూదురు గాని యూదురు ఆఇకార్ గాని మా పాపమక వందిజ్ దేవుణు ఎర్దు ఇనికబా వెహ్విండ మంజినాట్. విజెరె తప్పుకిత్తికార్ ఇజి దేవుణు వెహ్విన్.

20 దేవుణు మోసెజ్ సిత్తి రూలుజ్ వజ కిత్తిదన్నివందిజ్ దేవుణు ఎయెరిజ్బా నీతినిజయ్వికాన్ ఇజి వెహ్విన్. ఎందానిజ్ ఇహిజ దేవుణు రూలుజ్ నెస్తిమహిజ్బా మాటు ఎస్సానో తప్పుజ్ కిత్తికాట్ ఇజి నెస్త మనాట్.

క్రీస్తుమున్ను నమకం ఇడ్డికాండ్రె నీతిమన్నికాన్ ఆనాన్.

21 గాని లోకుర దేవుణు ఎర్దు ఎలాగ నీతినిజయ్వికార్ అదెజ్ అట్టూర్ ఇజి దేవుణు ఏలు మరి ఉండ్రె సుటు తోరిస్త మనాన్. మోసెజ్ సిత్తి రూలుజ్ లోజిత్తివలెహాన్ అవద్. గాని దిన్నివందిజ్ మోసెజ్ సిత్తి రూలుదు మరి ఒరెన్ దేవుణు ప్రవక్తరు రాస్తి మాటజ్ లోఇబా తోరిస్త మహద్.

22 యేసుక్రీస్తు మున్ను నమకం ఇడ్డివరి పాపమక విజు దేవుణు మాయిప్తాన్. దేవుణు సుడేతిజ్ యూదురుని యూదురు ఆఇకార్ ఇజి తెడే ఇనిక సిల్లెద్. ఎయెరె నమ్మిజినారో దేవుణు వరి పాపమక విజు మాయప్తాన్. వారు నీతి నిజయ్వి మన్నికారె.

23 ఎందానిజ్ ఇహిజ, విజేరె పాపం కిత్తార దేవుణు తయారో కిత్తిమన్ని గొప్ప జాయ్ పొందిదెజ్ అట్విండ్రాత్.

24 గాని క్రీస్తుయేసు మా వందిజ్ సాతిజ్, అయ సావుదాన్ మాటు కిత్తి పాపమక వందిజ్ వాని సిక్కుదాన్ దేవుణు మజ్ డిబిస్తాన్. ఎలాగ ఇహిజ, తప్పు కిత్తికార్ ఇహిజ్బా, అయ తప్పుజ్ నాను సెమిస్త మన్న ఇజి దయాదర్మమదాన్ ఉండ్రె ఇనాయం లెకెండే సిడెనె సీజినాన్.

25 లోకురి పాపమక వందిజ్ వాని సిక్కు వన్ని మున్ను తపిసి, వన్ని సావుదాన్ లోకురి పాపమక వరి నమకమదాన్ దేవుణు సెమిసిని వందిజ్ యేసుక్రీస్తుజ్ పోక్తాన్. ఎందానిజ్ ఈహు కిత్తాన్ ఇహిజ, దేవుణు నీతినిజయ్వి మన్నికాన్ ఇజి తోరిస్తెజె. ఎందానిజ్ ఇహిజ యేసు వాని ముందాల లోకురె పాపం కిత్తిమహివలె దేవుణు అక్కెజ్ ఓరిసి మహాన్. పాపం కిత్తివలె సిక్కు సివితాన్.

26 గాని దేవుణు అయ పాపమక పోన్వన్. యేసు అక్కెజ్ విజు వన్నిమున్ను ఒత్తాండ్రె వరివందిజ్ సాతాన్. దేవుణు నీతిమన్నికాన్ ఇజి ఈహు తోరిస్తాన్. యేసు మున్ను నమకం ఇడ్డికార్ నీతినిజయ్వికార్ ఇజి ఇడ్డారె.

27 అందెజె ఏలు, మోసె సిత్తి రూలుజ్ లోజిత్తిజ్ నీతిమన్నికాట్ అతాట్ ఇజి పొగిడిదెజ్ అట్విట్, యేసుక్రీస్తుజ్ నమ్మితిజానె మాటు కిత్తి పాపమక విజు దేవుణు మాయిప్తాన్ ఇజి దేవుణు వహ్సాన్. అయావజనె మాటు నీతి మన్నికాట్ ఆనాట్.

28 రూలుజ్ లోజిత్తిజ్ అవద్, యేసుక్రీస్తుజ్ నమ్మితిజానె పాపమక విజు మాయివె ఆజి నీతి మన్నికార్ అతార ఇజి దేవుణు వెహ్సాన్. యాక మాటు నెసినాట్.

29 దేవుణు, వహి యూదురిజ్నె దేవుణు అవన్గదె, వహి జాతిది వరిజ్బా దేవుణుగదె. ఒబ మహి జాతిదివరిజ్బా దేవుణునె.

30 ఒండ్రె దేవుణునె మనాన్. వాండ్రు యూదురిజ్ని యూదురు ఆఇ వరిజ్ని విజేరిజ్ వరి నమకం వందిజ్ పాపమక విజు మాయిప్పి, నీతి మన్నికార్ అతార ఇజి వెహ్సాన్.

31 అహిజ క్రీస్తు మున్ను నమకం ఇడ్డిజ్ దేవుణు ఎర్దు నీతి మన్నికార్ ఇజి దేవుణు వెహ్విజ, రూలుజ్ విలువ సిల్లెద్ ఇజి ఒడేబినిదెరెసు. సిల్లె, రూలుజ్ విలువ సిల్లికెజ్ అడ. యేసుక్రీస్తు మున్ను నమకం ఇడ్డి మహిజ్ అయ రూలుజ్ మరి మరి లోజిదెజె.

4

నమకమదాన్ అబ్రహాం నీతి నిజయ్వి మన్నికాన్ అతాన్

1 అహిజ గొప్ప పేరు మన్ని మా అనిగొగొ అతి అబ్రాహాము నీతిమన్నికాన్ ఇజి దేవుణు వెహ్వి వందిజ్ ఇనిక వెహ్విజ్?

2 వాండ్రు కిత్తి నెగ్గి పణిజ వందిజ్ దేవుణు వన్నుజ్ నీతి నిజయ్యిక్ అజి ఇడ్డిజ దన్నివందిజ్ లోకురు వెట పొగిడిఃదెజ్ అట్నాన్ గాని దేవుణుబాన్ పొగిడః ఆదెజ్ అట్విన్.

3 ఎందానిజ్ ఇహిజ దేవుణు మాటారు ఇనిక రాస్త మనాద్ ఇహిజ, “దేవుణు అబ్రాహము వెట కిత్తి ఒవందం వాండ్రు నమ్మిత్తాన్. అందెజె వాండ్రు నీతినిజయ్యిక్ అజి దేవుణు ఒప్పుకోటాన్”^{*}.

4 ఒరెన్ పణి కిత్తిదన్నిజ్ కూలి దోహక్కిజ అయక ఇనాయం అవిద్ గదె. అక్క వన్ని కూలిన్. నీతినిజయ్యిక్ అదెజ్ ఇహిజబా అయాలెకెడ్చె.

5 గాని, తప్పు కిత్తివన్ని తప్పుజ్ దేవుణు మాయిప్పి నీతినిజయ్యి మన్నిక్ అజి ఇడ్నాన్. నమ్మిని వన్ని నమకమ్దాన్, వాండ్రు నీతినిజయ్యిక్ అజి దేవుణు ఇడ్నాన్. గాని, వన్ని పణిజాణిజ్ నీతినిజయ్యిక్ అవిన్.

6 దిన్నివందిజ్ దావీదురాజబా కీర్తన పుస్తకమ్దు రాస్త మనాన్. ఇనిక ఇహిజ, నమకం ఇడ్డివందిజ్ నీతినిజయ్యిక్ అజి దేవుణు ఇడ్డికార్ గొప్పు సర్ల అతికార్. పరి పణివందిజ్ అవిద్, నమకం వందిజె.

7 పావం కిత్తిదన్నిజ్ దోహక్కి సిమ వందిజ్ వారు సర్ల అనికార్. ఎందానిజ్ ఇహిజ, పరి తప్పుజ్ మరి ఎత్తు కిఎ ఇజ దేవుణు తీర్తనం కిత్తాన్.

8 ఎయెర్ది పాపమకాజ్ దేవుణు లెక్క తోవిండ్రి వాండ్రు సర్ల అతికాన్.^{*}

9 పాపమకాజ్ దేవుణు నెమ్మిన్ దిన్నివందిజ్ మన్ని సర్ల సునతి అతి యూదురిజ్నె అవిద్. సునతి కిబెఅజ యూదురు అజ పరిజబా మనాద్. అబ్రహం దేవుణు దేవుణుదిజ్ నమ్మిత్తాన్. అందెజె వాండ్రు నీతినిజయ్యి మన్నిక్ అజి దేవుణు ఒప్పుకోటాన్ ఇజ మాటు నెనినాట్గదె.

10 ఎన్నివలె దేవుణు అబ్రహం వందిజ్ యాలెకెండె వెహ్సాన్? సునతి కిబె అవిండ ముజాల్నా? సునతి కిబె అతి వెనకానా? అబ్రహం నీతిమన్నిక్ అజి ఎన్నివలె దేవుణు వెహ్సాన్ ఇహిజ, సునతి కిబె అని ముందాల్నె అబ్రహం నీతిమన్నిక్ అజి దేవుణు వెహ్సాన్.

11 వెనుక అబ్రహం సునతి కిబె అత్తాన్. ఎందానిజ్ ఇహిజ దేవుణు మున్ను, నమకం ఇడ్డి వందిజ్ వాండ్రు నీతి మన్నిక్ అత్తాన్ ఇజి గుర్తు వందిజె. సునతి కిబె అవిండ మహివలె దేవుణుదిజ్ నమ్మిత్తివరి పావం దేవుణు మాయిప్తాన్. నన్నివరిజ్ బుబ్బులెకెండె దేవుణు అబ్రాహముజ్ ఇడ్నాన్.

12 అయవజనె నమకం ఇడ్డి సునతి కిబె అతిపరిజబా అబ్రహం బుబ్బు లెకెండెనె. సునతి కిబె అవిండ మహివలె నమకం ఇడ్డి బుబ్బు అబ్రహం లెకెండె వారు. వారుబా అయ నమకమ్నె ఇడ్నార్.

13 దేవుణు అబ్రహం వెట ఉండ్రె ఒట్టు కిత్తాన్. ఇనిక ఇహిజ, అబ్రహామ్జిన్ వన్ని కొడః కొకారిజ్ యా లోకమ్దిజ్ నీన ఇజ. యా ఒట్టు అబ్రాహముజ్ ఎలాగ దోహక్కాద్ ఇహిజ దేవుణు సత్తి విజ రూలుజ్ వాండ్రు లోజిత్తి వందిజ్ అవిద్. దేవుణు మున్ను, నమకం ఇట్టివెలె నీతినిజయ్యిక్ అత్తాన్ కాక యా ఒట్టు దేవుణు బాణిజ్ దోహక్కాద్.

14 రూలుజ్ లోజిత్తి పరిజె, దేవుణు సత్తి ఒట్టు దోహక్కాద్ ఇహిజ, దేవుణు మున్ను ఇడ్డి నమకమ్దిజ్ ఇని విలువ సిల్దె. ఆహ అతిజ దేవుణు సత్తి అయ ఒట్టుబా విలువ సిల్దెండ మనాద్.

15 రూలుజ్ మన్నె ఇహిజ లోక వనకాజ్ లోజివిండ సిక్ తవిసినార్. ఎంబె రూలుజ్ మహిజబా లోకుర్ వనకాజ్ లోజివిర్.

16 నమకం ఇడ్డి రూలుజ్ లోజిత్తి యూదురునె అవిద్ అబ్రహంలెకెండె దేవుణు మున్ను, నమకం ఇడ్డిపరిజ్ విజెరిజ్ యా ఒట్టు దోహక్కాద్. దేవుణు మున్ను, నమకం ఇడ్డిపరిజ్ అబ్రహం ఒరెన్ బుబ్బువజనె.

17 “నాను నిజె నండో జతిజ బుబ్బు లెకెండె ఏర్నాటు కిత్త మన్ను”, ఇజ దేవుణు అబ్రహం వెట కిత్తి ఒట్టు దేవుణు మాటారు రాస్త మనాద్. సాతిపరిజ్ బత్తు సీజనాన్. వన్ని మాటాదాన్ నిల్లివనకాజ్ మన్నిలెకెండె కూక్కినాన్, యా దేవుణు. వన్నిజె అబ్రహం నమ్మిత్తాన్. దేవుణు ఎర్దు, యా ఒట్టువలెహాన్ మజె విజెరిజ్ అబ్రహం బుబ్బులెకెండె అత్తాన్.

18 దేవుణు అబ్రాహముజ్ వెహ్సా మాటెజ్ జర్గిదెజ్ కస్తమాతికెజ్ గాని అక్కెజ్ జర్గిన్ ఇజనె నమ్మిజె ఎర్దునుడఃజి మహాన్. అందెజె నండో జాతిజ బుబ్బువజ అని ఇజ దేవుణు వెహ్సా మాటెజ్లెకెండె వాండ్రు

^{*} 4:3 4:3 అది 15:6. ^{*} 4:8 4:8 కీర్తన 32:1,2.

ఆతాన్. నీ కొడోకొర్ అగసమ్దు మన్ని లెక్క కిదెజ్ అట్ఇ నస్సా సుక్కెజ్లెకెండ్ సంఠెంఠార్ ఆనార్లె ఇజ దేవుణు వెహ్తా మాటలెకెండ్ జర్గితాద్.

19 అబ్రాహముజ్ డర్గు డర్గు వంద వంటిజ్ ఆత మహాద్. “నాను నిస్సా డొక్ర ఆత. నా ఆల్ని సారాయిబా కొడోకొర్ ఇడ్జెజ్ అట్వీద్”, ఇజ ఒడోబీజి మహాన్. అహిజ్బా దేవుణు వెహ్తా మాటెజ్ అబ్రహాం ఇని అనుమానం సిల్లెండ్ నమ్మిత్తాన్.

20 వన్ని నమకం డీన్వితాన్. దేవుణు కిత్తి ఒట్టు వందిజ్ అనుమానం ఆవిత్తాన్. దేవుణు వెహ్తాలెకెండ్ జర్గినాద్లె ఇజ నమ్మిత్తాండ్ దేవుణుదిజ్ పొగ్డితాన్.

21 దేవుణు ఒవందం కిత్తిలెకెండ్ కిదెజ్ అట్వాన్ ఇజ పూర్తి నమ్మిత్తాన్.

22 అందెజె దేవుణు మాటరు రాస్త మనాద్, “అబ్రహాం దేవుణుదిజ్ నమ్మిత్తాన్. అందెజె దేవుణు వన్నిజ్ నీతినిజయ్యి మన్నికాన్ ఇజ ఇడ్డాన్”, ఇజ

23 నీతినిజయ్యుకాన్ ఇజ ఇడె ఆతాన్”, ఇజ దేవుణు మాటారు రాస్తి మన్నిక అబ్రహాం ఒరెన్ వందిజె ఆవద్.

24 మా వందిజ్బా నీతినిజయ్యి మన్నుకార్ ఇజ దేవుణు ఇడ్జ మనాన్ ఇజ రాస్త మనాద్. సాతివరిబాణిజ్ యేసుక్రీస్తుజ్ నిక్కి దేవుణు ముస్సు. నమకం ఇడ్జి మా వందిజ్బా నీతినిజయ్యుకార్ ఇజ రాసె ఆతమనాద్.

25 మా సెఇ వణిజి వందిజె యేసు క్రీస్తుజ్ సప్టార్. సాతివరిబాణిజ్ దేవుణు వన్నిజ్ నిక్కిజ్, మా పాపమకం విజు సెమిస్తాండ్ మజి దేవుణు వెట కూడిత్తికార్ ఇజ ఇడ్డాన్.

5

దేవుణు వెట మజి సాంతి సమదనమ్ని సర్ల ఆజినాట్

1 మా ప్రలు ఆతి క్రీస్తు మావందిజ్ సాతాన్ ఇజ మాటు నమ్మిత్తిజ్, మాటు దేవుణు వెట కూడిజి ముజినాట్. అందెజె దేవుణు వెట సాంతి సమదనం వాత మనాద్.

2 యేసుక్రీస్తు మా వందిజ్ సాతిజ్ ఏలు దేవుణు మజి తోరిస్తి దయాదర్దుం మాటు నెస్త మనాట్. దేవుణు ఎస్సానో గొప్పవాండ్రు ఇజ నెస్తాటి వన్ని గొప్ప జాయదు మాటుబా ముజినాట్ల ఇజ ఎద్దుసుడోజి ముజినెలొఇ సర్ల ఆజినాట్.

3 అక్కాడె ఆవండ, క్రీస్తుముస్సు నమకం ఇడ్జి వందిజ్ వాని కస్టమకలొఇ సర్లదాన్ ముజినాట్. ఎందానిజ్ ఇహిజ, అయ కస్టమకం వాతిజ్ అక్కెజ్ ఎలాగ బరిస్తిజ్ ఇజ మాటు నెస్తెజ్ ఆనాద్.

4 కస్టమకం వానివలె అక్కెజ్ బరిస్తిజి మాటు నెగ్గి గుణమకం మన్నికార్ ఇజ దేవుణు మా వందిజ్ ఒప్ప కొడోజినాన్. నెగ్గి గుణమకం మన్నికార్ ఇజ ఒప్పుకొటిజి మాటు ఆనదాన్ ఎద్దుసుడోజి ముజినాట్.

5 దిన్ని వందిజ్ మాటు ఎద్దు సుడోజి మన్నిజ్ అక్క నిజమనె జర్గినాద్ ఇజ సుడోజినాట్. ఎందానిజ్ ఇహిజ దేవుణు మజి ప్రేమినాన్ ఇజ మా మన్నుదు మాటు నెగ్గెండ్ నెస్తాట్. మజి సీత్తి మన్ని దేవుణు ఆత్మదానె దేవుణు మా ముస్సు మన్ని ప్రేమ వందిజ్ నెసినాట్.

6 ఎలాగ ఇహిజ, మాటు ఇనికబా కిదెజ్ అట్వండ మహివలె దేవుణు ఏర్పాటు కిత్తి కాలమ్దు, దేవుణు వందిజ్ బక్కిసిల్లి వరివందిజ్ క్రీస్తు సాతాన్.

7 నీతినిజయ్యి మన్ని వన్నివందిజ్ ఒరెన్ సాదెజ్ ఇహిజ కస్టం. నెగ్గికాన్ ఆతివన్నివందిజ్ ఒరెన్ సానాన్సు.

8 గాని దేవుణు మజి ఎస్సానో ప్రేమినాన్ ఇజ తోరిస్తాన్. ఎలాగ ఇహిజ మాటు దేవుణు వేట వెత్తేకమ్దాన్ ఆఇసరి నడిసి మహివలెనె క్రీస్తు మా వందిజ్ సాతాన్.

9 అందెజె, క్రీస్తు మా వందిజ్ సాతిజ్ మాటు నీతిమన్నికాట్ ఇజ దేవుణు ఇడ్జిమన్నిక నిజమె. అహిజ, ఎలాకాలం ముజిని సిక్కుదాన్ మాటు క్రీస్తువెట తప్రె ఆనాట్ ఇజ మన్నిక ఒడ్జి నిజమాతిక.

10 ఎందానిజ్ ఇహిజ, మాటు దేవుణు వెట పగ అన్ని మహివలె దేవుణు మరిసి మా వందిజ్ సాతాండ్ దె మజి దేవుణు వెట కూడుస్తాన్. అహిజ ఏలు దేవుణు వెట మాటు కూడితాట్ ఇహిజ, మరి నండో మజి గెల్చిన్జెజ్ క్రీస్తు అట్వాన్ ఇజ మాటు నెసినాట్. వాండ్రు మరజి నిజిత్తిజ్నె యా గెలుపు మజి వాతాద్.

11 అక్కాదె అవద్, మా ప్రబు ఆతి యేసుక్రీస్తు మా వందిజ్ సాతి వందిజ్ని మా వందిజ్ కిత్తి పణి వందిజ్ నర్ల ఇజనాట్. యేసుక్రీస్తు బాణిజ్ మాటు దేవుణువెలె సమదనం మన్నికాట్ అతాట్.

ఆదాముని క్రీస్తు

12 ఏలు నాను ఉండ్రీ వెహ్లా, ఒరెన్ లోకు, ఇహిజ ఆదాం పాపం కిత్తిజ్ పాపం యా లోకముదు డూగితాద్. పాపం కిత్తిజ్ ఆదాం సాతాన్. అందెజె యా లోకముదు విజేరె సాజనార్. విజేరె పాపం కిత్తిజ్ విజేరె సాజనార్.

13 దేవుణు మోసవెట రూలుజ్ సివిండ మహివలె లోకురె పాపం కిజ మహార్. గాని వారు కిత్తి తప్పుజు లెక్క సుండేవితాన్. ఎందానిజ్ ఇహిజ రూలుజ్ సిల్లెండ మహాద్కాక రూలుజ్ తప్తార్ ఇజి ఇన్విన్.

14 గాని ఆదాం బత్తితి మహి కాలమ్దాన్ మోసె కాలమ్దాక బత్తిజి మహికార్ సాతార్. ఎందానిజ్ ఇహిజ ఆదాం కిత్తి పాపం లెకెండ వారు కిపితార్ గాని వారుబా పాపం కిత్తార్. ఆదాముని వెనుక వాతి క్రీస్తు ఉండ్రెలెకెండ్రె. ఎలాగ ఇహిజ ఆదాం కిత్తి పణిని క్రీస్తు కిత్తి పణి విజేరిజ్ కూడిత వాతాద్.

15 గాని రిఎర్బా ఉండ్రె లెకెండ్రె అవర్. దేవుణు సెడినె సిత్తి ఇనాయం తతాన్. మరి ఒరెన్ విజేరిజ్ సావు తతాన్. గాని యేసు క్రీస్తు వన్ని దయాదర్మమదాన్ తత్తి ఇనాయం ఒద్దె పెరికాదె. దేవుణు విజేరిజ్ సెడినె సిత్తి వన్ని దయాదర్మమెన్ అయ ఇనాయం.

16 ఆదాం కిత్తి పాపమదాన్ వతిదన్నిజ్ క్రీస్తు సెడినె సిత్తి ఇనాయమదిజ్ లోఇ మరి ఉండ్రీ తేడ మనాద్. ఇనిక ఇహిజ, ఆదాం ఉండ్రీ పాపం కితిజ్ దేవుణుబాణిజ్ తీర్పు తతాన్. గాని క్రీస్తు దేవుణుబాణిజ్ తత్తి ఇనాయం అయాలెకెండ్రె అవద్. సెడినె దోహక్తి అయ ఇనాయం ఇనిక ఇహిజ దేవుణు లోకురిజ్ నీతినిజయ్యికార్ ఇజి ఇడ్డికదె. నీతినిజయ్యికార్ ఇజి దేవుణు లోకురిజ్ ఇడ్డిని అయ ఇనాయం వాతిజ్, లోకురె కిత్తి విజు పాపమక వందిజ్ “మీ పాపమకు విజు నాను మాయిప్పు”, ఇజి దేవుణు వెహండ్రె పరిజ్ నీతినిజయ్యికార్ ఇజి ఇడ్డాన్.

17 ఒరెన్ లోకు తప్పు కిత్తిజ్ లోకురె విజేరె సాజనారె, సావు లోకురిజ్ ఏలుబడి: కిజనాద్. గాని మరి ఉండ్రీ ఒద్దె నిజమె, ఇనిక ఇహిజ, యేసు క్రీస్తు ఇని మరి ఒరెన్ కిత్తి పణిదాన్, దేవుణు బాణిజ్ గొప్పు దయాదర్మమని సెడినె దోహక్తి నీతినిజయ్యి ఇనికెజ్ వాతిజ్ అక్కెజ్ మా బత్తుదు ఏలుబడి: కిజనె.

18 ఆహె ఒరెన్ వన్ని తప్పదాన్ దేవుణు బాణిజ్ తీర్పు వాతి లెకెండ్రె, మరి ఒరెన్ వన్ని నీతి పణిదాన్ విజేరె తీర్పుదాన్ తప్ప అదెజ్ అటూర్. యా నీతి పణి, వరిజ్ ఎలాకాలం బత్తిని బత్తు తతాద్.

19 ఎలాగ ఇహిజ ఒరెన్ లోకు దేవుణుదిజ్ లోజివిండ మహివలె ఎలాగ లోకురె విజేరె తప్ప కిత్తికార్ అతారె, అయాలెకెండ్రెనె మరి ఒరెన్ లోకు దేవుణుదిజ్ లోజితిజ్ దేవుణు లోకురిజ్ నీతినిజయ్యి మన్నికార్ ఇజి ఇడ్డాన్.

20 దేవుణు రూలుజ్ లోకురిజ్ వాతివెలె తప్పజ్ నండో కిజనాజ్ ఇజి లోకర్ నెస్తార్. గాని తప్పజ్ నండో అతివెలె దేవుణుది గొప్పు దయాదర్మమబా దన్నిజ్ ఇంక నండో పిరిజి వాతాద్.

21 పాపం నండో అజి వాతివలె లోకురె సావుదిజ్ తగిజి వాతార్. గాని ఏలు దేవుణు లోకురిజ్ నీతినిజయ్యి మన్నికార్ ఇజి ఇడ్డిజ్ గొప్పు దయాదర్మం లోకురె మున్ను. ఏలుబడి: కిజనాద్. ఎందానిజ్ ఇహిజ మా ప్రబు ఆతి యేసుక్రీస్తు కిత్తి పణిదాన్ ఎలాకాలం బత్తిని బత్తు వాదెజ్ ఇజి.

6

పాపం వందిజ్ సాతికాట్గాని క్రీస్తువెట బత్తినికాట్.

1 అహిజ, ఏలు ఇనిక వెహ్లాట్? మాటు పాపం కిత్తివెలె దేవుణు గొప్పు దయాదర్మం తోరిస్తాన్ ఇహిజ ఏలు మరి నండో దయాదర్మం తోరిస్తెజ్ ఇజి మరి నండో పాపమకు కిజనె మండ్రెజనా?

2 అవిద్, మాటు పాపం కిజనె మండ్రెజ్ అవిద్. ఎందానిజ్ ఇహిజ, పాపం కిదిజ్ అస మాటు డి:స్తాట్. నన్ని అనెజ్ డి:స్సిజ్ పాపం కిజనె మండ్రెజ్ అట్విట్టె.

3 యేసు క్రీస్తు వెట కూడెదిజ్ ఇజి బాప్తిసం పొందినివలె మాటుబా వన్నివెట సాతాట్ ఇజి విజేరిజ్ వెహ్లానాట్. ఇక్క మిరు నెస్తెజ్ వలె.

4 అందెజె క్రీస్తు సాతి వెనుక బూమి లోఇ వన్నీ పీనుగు ఎలాగ మూస అతాదో, అయాలెకెండెనె బాప్తిసం పొందితివెలె మాటుబా వన్నీవెటె మూసె అతి లెకెండె అతాట్. ఎలాగ ఇహిజ, పాపం కిదెజ్ మన్నీ ఆనవందిజ్ బత్తిదెజ్ అట్విండె అజినాట్. బుబ్బాతి దేవుణుది గొప్పు జాయ్ మన్నీ సత్తుదాన్ యేసుప్రబు ఎలాగ సావుదాన్ మర్రి నీజీతాండ్రో అయాలెకెండె మాటుబా ఉండ్రీ కొత్త బత్తుదు మండ్రెజ్ అట్నాట్.

5 మాటు మా వడాయ్ బత్తు, డిసినీజె యేసుక్రీస్తు వెటె వన్నీ సావుదు కూడితాట్ ఇహిజ యేసుక్రీస్తు సావుదాన్ మర్రి నిజీత్తి లెకెండె మాటుబా తవ్విండె ఉండ్రీ కొత్త బత్తుదు వన్నీవెటె కూడెజె మంజినాట్.

6 ఒరెన్ ఎజమాని అడిగి పణికినికాన్ లోజీజె మంజనిలెకెండె, మాటు పాపం కిదెజ్ మన్నీ ఆనదిజ్ లోజీజె మండ్రెజ్ అవిద్. అందెజె యేసుక్రీస్తు సిలువాదు సాతివెలె పాపం కిదెజ్ మన్నీ మా ఆనెజబా అయ సిలువాదు సప్తి లెకెండెనె. యాక మాటు గుర్తు కినాట్.

7 సాతిసాహికాన్ పాపం కిదెజ్ మన్నీ ఆనెజాణిజ్ డిబె అతికాన్గె. అయాలెకెండె మాటుబా డిబె అతాట్.

8 అహిజ, మాటు క్రీస్తు వెటె సాతి లెకెండె ఇహిజ, క్రీస్తు వెటె బత్తిత్తి లెకెండె మాటుబా వన్నీవెటె బత్తినాట్ ఇజె సమ్మిజినాట్.

9 క్రీస్తు సాతిజ్ దేవుణు క్రీస్తుజ్ సాతి పరిబాణిజ్ మర్రి నిక్రాన్. వాండ్రు మరి సావిన్. అందెజె సావు వన్నీ మున్ను అతికారం కిదెజ్ అట్విండె ఇజె మాటు నెసినాట్.

10 క్రీస్తు సాతివెలె లోకురి పాపమక వందిజ్ ఉండ్రె నుటునె సాతాన్. గాని మర్రి బత్తిత్తివెలె దేవుణు వందిజ్ బత్తిజినాన్.

11 అయాలెకెండె మీరుబా పాపం కిదెజ్ మన్నీ ఆనదిజ్ సాతికార్ ఇజె మిజీ ఇడ్డు. మరి యేసుక్రీస్తు వెటె కూడితి మహిజ్ దేవుణుదిజ్ ఇష్టమాతి బత్తు బత్తిజనిదెర్ ఇజె ఇడ్డు.

12 అందెజె, పాపం కిదెజ్ మన్నీ ఆనెజ్, సాజె సాని మీ ఒడోల్దు ఏలుబడి కిదెజ్ అవిద్. ఎందానిజ్ ఇహిజ, పాపం కిదెజ్ మన్నీ ఆనెజ్ వజె కిబిస్తెజె అక్క నుడెజెనాద్.

13 పాపం మీ మున్ను ఏలుబడి కిజె సెఇ పణిజ్ కిదెజ్ వాడూకొని ఆయుదమకలెకెండె మీ ఒడోల్దుది బాగమకాజ్ వాడూకొడెమాట్. గాని సావుదాన్ బత్తుదు వాతివరిలెకెండె మీ ఒడోల్దిజ్ దేవుణుదిజ్ ఒప్పుజెప్తెజ్. నస్తవలె మీ ఒడోల్లి బాగమక నీతినిజయ్తి మన్నీ పణిజ్ కిదెజ్ వాడూకొని ఆయుదమకలెకెండె అనె.

14 పాపం కిదెజ్ ఇజె ఆన మీ మున్ను ఏలుబడి కిదెజ్ అవిద్. ఎందానిజ్ ఇహిజ దేవుణు తీర్పుదాన్ తప్తె ఆదెజ్ ఏలు మోసె సెత్తి రూలుజె లోజీదెజ్ అవ్వనరం సెల్లెద్. గాని పాపం కివిండె మండ్రెజ్ ఏలు దేవుణు దయాదర్పం మీ మున్ను ఏలుబడి కిజినాద్.

నీతినిజయ్తి మన్నీ బత్తు బత్తిదెజ్ ఇజె మన్నీ ఆనదిజ్ మీరు వెటిపణి కినివరిలెకెండె లోజీజె మంజనిదెర్

15 ఏలు మాటు దేవుణు మోసెజ్ సెత్తి రూలుజె అడిగి మంజనిజ్, పాపం కిజె మండ్రెజా? అవిద్, ఎనెజ్బా అవిద్.

16 ఇనిక ఇహిజ యాక నిజం ఇజె మీరు నెసినెదెర్. ఎయెనబా వెటిపణి కినివన్నీ లెకెండె ఒరెన్ ఎజమానిజ్ లోజీజె మండ్రెజ్ నూణివలె, అయ ఎజమానిజ్ వెటిపణి కినికాన్ అజినాన్గె. పాపమందిజ్ లోజీత్తిజె సావు తపిసినెదెర్. దేవుణుదిజ్ లోజీదెజ్ ఒప్పుకొటిజె దేవుణు మిజీ నీతినిజయ్తికార్ ఇజె ఇడ్డాన్.

17 ముందాల్ మీరు ఇష్టం అతి వజె పాపం కిజె, పాపం కిదెజ్ మన్నీ ఆన ఇని ఎజమానిజ్ వెటిపణి కినికార్ లెకెండె మహెదెర్. గాని వెనుక మిజీ దేవుణు వందిజ్ నెస్సిన్ దన్నివందిజ్ మీరు పూర్తి మన్నుదాన్ నెస్సిదన్నిజ్ లోజీత్తి మన్నెదెర్. దిన్నివందిజ్ నాను దేవుణుదిజ్ వందనమక వెస్సిన్.

18 పాపం కిదెజ్ మన్నీ ఆనెజాణిజ్ దేవుణు మిజీ డిబిస్తి దన్నిజ్ నాను దేవుణుదిజ్ వందనమక వెస్సిన్. దేవుణు ఎద్దు నీతినిజయ్తి మన్నీ బత్తు బత్తిదెజ్ ఇజె మన్నీ ఆనదిజ్ మీరు వెటిపణి కినివరిలెకెండె లోజీజె మన్నీ దన్నిజ్బా నాను దేవుణుదిజ్ వందనమక వెస్సిన్.

19 దేవుణు వందిజ్ నిజమాతికెజ్ అర్థం కిబిస్సెజ్ ఇజ నాను అర్థం కిబిసిని మాటెజ్ వెహ్సిన్. ఏలుదాక మీరు వెటిపణి కినివరి లెకెండ్ మీ ఒణెఱ్ది బాగమ్కు సెఇపణిజ్ కిదెజ్ మరి ఒద్దె సెఇకెజ్ కిజి, పాపం కిదెజ్ మన్ని ఆసెజ్ లోజిత్తి మహెదెర్. ఏలు దేవుణుదిజ్ కేట ఆతివరిలెకెండ్ నీతినిజయ్ పణిజ్ కిజి దేవుణుదిజ్ వెటిపణి కినికార్ లెకెండ్ మీ ఒణెఱ్దిజ్ నడిఱిస్సు.

20 మిజి ఇస్సం ఆతివజ బత్తిజి పాపం కిదెజ్ మన్ని ఆసెజి లోజిజి మహివలె మీరు నీతినిజయ్దాన్ బత్తిదెజ్ ఇజి ఎయెర్బా మిజి డటం వెహ్ఎత్తార్.

21 గాని ఏలు మిజి సిగు తపిసిని నన్ని బత్తు మిజి ఇని లాబం తెవ్తాద్. ఆయ బత్తుదాన్ దేవుణుబాణిజ్ దూరం మండ్రెజ్నె ఆతాద్. నన్ని బత్తు దేవుణు ఇనిక తనాద్ ఇహిజి సావునె తనాద్.

22 గాని ఏలు పాపం కిదెజ్ మన్ని ఆస మీ మున్కు ఏలుబడిఱి కివిండ్ మీరు దన్ని మున్కు గెలిస్తిదెర్. దేవుణుదిజ్ వెటిపణి కినికార్ లెకెండ్ ఆతిదెర్. నన్ని బత్తుదాన్ వాతి ఉండ్రి పండులెకెండ్ మీరు దేవుణుదిజ్ కేట ఆతి లోకుర్ ఆతిదెర్. నస్తివలె ఎలాకాలం బత్తిని బత్తు దోహ్కాద్.

23 పాపమదిజ్ లోజిజి మహివరిజ్ దోహ్కాత్తి కూలి ఎలాకాలం మన్ని సావు. గాని మా ప్రబు ఆతి క్రీస్తుజ్ నమ్మితివరిజి ఎలాకాలం బత్తిని బత్తు దేవుణు నెడినె సీనాన్.

7

ఆలు మాసిర్ నడిఱిమి మన్ని రూలుజ్

1 యేసుప్రబుజ్ నమ్మితి మా తంబెరిజాండ్, రూలుజి వందిజ్ నెసినివరి వెట నాను యాక వెహ్సిన్. ఇనిక ఇహిజి ఒరెన్ లోకు బత్తిజి మహివలె ఉండ్రెనె రూలుజి లోజిజి మండ్రెజ్గదె.

2 ఎలాగ ఇహిజి, పెండ్లి ఆతివందిజ్ మన్ని రూలుజి సుండఱిజి, ఉండ్రి అయ్లి కొణెఱ్ దన్ని మాసివెట మంజనాద్గదె. గాని మాసి సాతసాహ్సా ఇహిజి అది వన్నిజ్ పెండ్లి ఆతిలెకెండ్ మండ్రెజ్ అవ్నరం సిల్లెద్గదె. అది మాసివెట మండ్రెజ్ ఇజి మన్ని రూలుజిబాణిజ్ డిబె ఆతాద్.

3 రూలువజి సుండఱిజి, మాసి బత్తిజి మహివలె మరి ఒరెన్ వెట అది సాహిజి, అది రంకు బూలానికాద్ ఇనార్. గాని మాసి సాతిజి పెండ్లి ఆతి మన్ని రూలుదిజ్ లోజిజి మండ్రెజ్ అవ్నరం సిల్లెద్. వెనుక మరి ఒరెన్ వన్నిజ్ పెండ్లి ఆతిజి అది రంకు బూలానికాద్ ఇజి ఇన్వర్.

4 అయాలెకెండ్నె మా తంబెరిజాండ్, యేసుప్రబు వెట మీరుబా సాతిలెకెండ్ ఆతిదెర్. అందెజి దేవుణు మోసెజ్ సిత్తి రూలుజ్ లోజినిబాణిజ్ మీరు డిఱె ఆతిదెర్. మాసి సాతికాద్ మరి ఒరెన్ వన్నిజ్ పెండ్లి ఆతిలెకెండ్ ఏలు మీరు, సాతివరిబాణిజ్ దేవుణు నిక్తి క్రీస్తువెట కూడిఱిదెర్. ఎందానిజ్ ఇహిజి, మా బత్తుదాన్ దేవుణువందిజ్ నెగ్గి పట్టు పండెదెజ్ ఇజి.

5 ఒణెఱ్ది సెఇ ఆసెజ్ వజి కిదెజ్ ఆస ఆని మన్కు మజి అడిజిమహివలె పాపం కిబిస్సెజ్ తగితి ఆసెజ్ మా ఒణెఱ్ది బాగమ్కాజ్ ఏలుబడిఱి కిజి మహె. దేవుణు మోసెజ్ సిత్తి రూలుజ్ మాటు నెస్తివలె యా ఆసెజ్ పిరితిజ్ పాపం కిజి మాటు సావు తపిసిని పట్టు పండిస్తాట్.

6 గాని ఏలు యేసుప్రబు వెట సాతిలెకెండ్ మహిజి రూలుజి వెటిపణి కినిదన్నిదటాన్ డిఱె ఆతాట్. రాస్తిమహి అయ రూలుజి ఏలు మాటు వెటిపణి కినికార్ ఆవట్. ఏలు మాటు దేవుణు ఆత్మదిజ్ వెటిపణి కినివరివజి ఉండ్రి కొత్త బత్తిజినాట్.

దేవుణు మోసెజ్ సిత్తి రూలుజ్

7 ఏలు మాటు ఇనిక వెహ్కట్? దేవుణు మోసెజ్ సిత్తి రూలుజ్ పాపం కిదెజ్ మన్ని ఆసెజ్ వుటిసినాద్. అందెజి అయ రూలుజ్ సెఇకెజ్ ఇజి వెహ్కట్? అట్వట్, ఆహు వెహ్కెజ్ అవద్. గాని పాపం కిజిన్ ఇజి నాను ఎలాగ నెస్తి ఇహిజి, దేవుణు మోసెజ్ సిత్తి రూలుజాణిజ్నె నెస్తిమన్కు. ఎలాగ ఇహిజి, ఆఇవరిజ్ మన్ని వనకాజ్ వందిజ్ ఆస ఆమాట్ ఇజి మోసి సిత్తి రూలుదు వెహ్విండ్ మంజనిక ఇహిజి, అక్క దేవుణు ఎద్దు పాపమ్కు ఇజి నెన్వెతా మరి.

8 ఆజ వరిజ్ మన్ని వనకాజ్ వందిజ్ ఆన ఆమాట్ ఇజ రూలు మహిజ్ నె, నన్ని ఆనెజ్ వుట్టిజ్ నాను వనకవందిజ్ ఆన ఆత. పాపం కిమాట్ ఇజ రూలుజ్ సిల్లెండ మంజినిక ఇహిజ పాపం కిదెజ్ మన్ని ఆన మా మున్ను ఏలుబడి: కివిద్.

9 రూలుజ్ నెన్ ఏండ్ మహివలె నాను ఇని బాద్ సిల్లెండ బత్తిజ మహా గాని రూలుజ్ నెస్తి వెనక నాను తప్త ఇజ నెస్త. దేవుణుబాణిజ్ దూరం ఆత ఇజ నెస్త.

10 రూలుజ్ లోజితిజ్ ఎలాకాలం బత్తిని బత్తు వానాద్ ఇజ నాను ఒడోబిత్త గాని అయ రూలుజాణిజ్ నా సాపుదిజ్ తీర్పు వాత ఇజ నెస్త మన్ను.

11 ఎలాకాలం బత్తిని బత్తు వానాద్ ఇజ నాను మొసెం కిబె ఆత. అయ రూలుజ్ నాను తప్తానె సాపుదిజ్ తీర్పు తత్త.

12 అందెజ్ దేవుణు మొసెజ్ సిత్తి రూలుజ్ దేవుణుబాణిజ్ వాతికెజ్. లోకుర్ ఎలాగ నడిదెజ్ ఇజ మన్ని ఆడ్రెజ్ నీతినిజర్పుకెజ్, నెగ్గికెజ్.

13 అహిజ, దేవుణు మొసెజ్ సిత్తి రూలుజ్ నెగ్గికెజ్ గాని నజీ సాపుదిజ్ తీర్పు తత్త ఇజ వెప్తాజా? ఆవిద్, ఆహు ఆవిద్. రూలుజ్ నెగ్గికెజ్ గాని పాపం కిదెజ్ నజీ మన్ని ఆన యా రూలుజాణిజ్ ఒద్దె పెరిక ఆజి తోరె ఆతాదె నాను దేవుణుబాణిజ్ దూరం ఆత. రూలుజ్ ఎందానిజ్ సిత్తాన్ ఇహిజ పాపం కిదెజ్ మన్ని మా మన్ను తోరెస్తెజె. రూలుజ్ వజ బత్తిదెజ్ అట్ ఏండ్, మాటు పాపం కినికాట్ ఇజ తోరెస్తెజె ఇక్కెజ్ పణిదిజ్ వాతె. ఆహా మాటు ఎస్సానో పాపం కినికాట్ ఇజ నెస్తెజె యా రూలుజ్ పణిదిజ్ వాతె.

14 దేవుణు మొసెజ్ సిత్తి రూలుజ్ దేవుణు ఆత్మదాన్ వాతికెజ్ ఇజ మాటు విజిటి నెసినాట్. గాని నాను ఇహిజ నావందిజె ఎత్తు కిజిని మన్నుదాన్ మన్ను. పాపం కిదెజ్ మన్ని ఆసదిజ్ ఒరెన్ వెటిపణి కినివన్నెలెకెండ్ లోజిజి మంజిన.

15 ఎలాగ ఇహిజ, నాను కినికెజ్ ఎందానిజ్ ఆహె కిజిన ఇజ నాను అర్దం కివి. కిన ఇజ నండ్ సుట్టు ఒడోబినికెజ్ కివిండ్ ఆజిన. కిదెజ్ ఇస్టం సిల్లికెజ్ నండ్ సుట్టు కిజిన.

16 కిదెజ్ ఇస్టం సిల్లి సెఇకెజ్ నాను కినివెలె ఉండ్రీ నెసిన. ఇనిక ఇహిజ దేవుణు రూలుజ్ నెగ్గికెజ్ నె ఇజ నెసిన.

17 అందెజె, కిదెజ్ ఇస్టం సిల్లి సెఇకెజ్ నాను కినివెలె, అక్క నాను ఆవి, నా లోఇ మన్ని పాపమ్ నె అక్కెజ్ కిబిసినె.

18 ఒడోలేది సెఇ ఆసెజ్ వందిజ్ ఎత్తు కిని నా మన్నులోఇ నెగ్గికెజ్ ఇనికెజ్ సిల్లు ఇజ నాను నెసిన. ఎలాగ ఇహిజ, నెగ్గికెజ్ కిదెజ్ ఇస్టం మనాద్ గాని కిదెజ్ అట్ ఏవి.

19 కిన ఇజ ఒడోబిత్తి నెగ్గి పణిజ్ నాను కివి. కిదెజ్ ఆవిద్ ఇజ ఒడోబిత్తి సెఇ పణిజ్ కిజిన. కిత్తిజ

20 కిదెజ్ ఆవిద్ ఇజ ఒడోబిత్తి సెఇ పణిజ్ కిత్తిజ అక్క కినిక నాను ఆవి. నా లోఇ మన్ని పాపమ్ నె అక్కెజ్ కిబిసినె.

21 అహిజ, ఇనిక జర్గిజినాద్ ఇహిజ నాను ఇనికాదో ఉండ్రీ నెగ్గి కిదెజ్ ఇజ సుడోతిజ్ సెఇకదె కిజిన.

22 ఎందానిజ్ ఇహిజ దేవుణు రూలుజ్ వందిజ్ నాలొఇ గొప్ప నర్ద ఆజిన.

23 గాని మరి ఉండ్రీ సత్తు నా లొఇ ఏలుబడి: కినిక నాను సుడోజిన. నాను కిన ఇజ సుడోజిని దన్నెజ్ అయ సత్తు నావెటె కాట్లాడజినాద్. పాపం కిదెజ్ నా ఒడోల్లి బాగమ్ క లొఇ మన్ని ఆసెజ్ అడిగి నజీ ఇడ్డెజ్ అయ సత్తు సుడోజి మంజినాద్. అందెజె గెల్లిస్తెజ్ అట్ ఏండ్ జిన.

24 ఒబ, ఒబ దిన్నివందిజ్ మన్నుదు గొప్ప కస్టమాతి మణిసి నాను. సాపుదిజ్ తీర్పు వాతి యా ఒడోలేదాన్ నజీ డిస్సికాన్ ఎయెన్ బా మంజినిక ఇహిజ బాగ మహాద్ మరి.

25 మా ప్రబు ఆతి యేసు క్రీస్తు వెటెన మజి అయ విడుదల వానాద్. దిన్ని వందిజ్ నాను దేవుణుదిజ్ వందనమ్ కు వెప్పిన. అహిజ దేవుణు సిత్తి రూలుజ్ లోజిదెజ్ సుడోజిన. గాని ఒడోలేది సెఇ ఆసెజ్ కిదెజ్ ఆన ఆని నా మన్ను నజీ అడిజి దన్ని అడిగి నజీ ఇడ్డినాద్. అందెజె నాను ఏలుబా పాపమ్ దిజ్ వెటిపణి కినికాన్ లెకెండ్.

8

దేవుణు అత్యు నడిపిసిని బత్తు.

1 అందెజె ఏలు యేసుక్రీస్తు మున్ను నమకం ఇడ్డి దేవుణు ఎద్రు నీతినిజయ్యూర్ అతివరిజ్ సిక్కు సిల్లెద్.

2 ఎందానిజ్ ఇహిజ, యేసుక్రీస్తుదాన్ వాతి కొత్త బత్తు బత్తిదెజ్ దేవుణు వన్ని అత్తు మజి సిత్ర మనాన్. అయ అత్తు నత్తుదాన్ పాపం కిదెజ్ మన్ని ఆనదాన్ మాటు డిబె అత మనాట్. అహె సావుని సిక్కు తపిసిని పాపం కిదెజ్ మన్ని ఆసెజాణిజ్ నాను డిబె అత మన్ను.

3 మాటు ఒడోల్ది సెజ అసెజాణిజ్ మహిజ్ పాపమదాన్ గెల్పిస్తెజ్ దేవుణు సిత్ర రూలుజ్ అట్వండ మహద్. ఎందానిజ్ ఇహిజ, ఒడోల్ది సెజ అసెజ్ అడ్డు కిత్రాద్. గాని దేవుణు మజి డిబెస్తాన్. ఎలాగ ఇహిజ, మా పాపమకాజ్ వందిజ్ వన్ని సొంత మరిసిజ్ యా లోకమదు పోక్రాండ్రె, ఒడోల్ది సెజ అసెజ్ మా మున్ను ఏలుబడి: కినిదన్నదటాన్ మజి డిబెస్తాన్. వన్ని మరిసి మా లెకెండ ఒడోల్దాన్ పుట్టాండ్రె మా పాపమకాజ్ వందిజ్ సాతాన్.

4 అందెజె ఏలు దేవుణు నత్తుదాన్ దేవుణు రూలుజ లోజెదెజ్ అట్టూద్. ఒడోల్ది సెజ అసెజ్ లోజెదెజ్ అక్కర్ సిల్లెద్. ఏలు దేవుణు అత్తుదిజ్ ఇన్టం ఆతి లెకెండ బత్తిదెజ్ అట్టూట్.

5 ఒడోల్ది సెజ అసెజ్ లోజెజి బత్తినికార్ దన్ని వందిజె ఎత్తు కిజి మంజినార్. గాని దేవుణు అత్తుదిజ్ లోజెజి నడిసెకార్ దేవుణు అత్తుదిజ్ తగిత్తికెజ్ ఒడోబినార్.

6 పాపం కిదెజ్ ఒడోల్టు మన్ని సెజ అసెజ్ ఏలుబడి: కిని మన్ను మన్నికార్ దేవుణుబాణిజ్ దూరం ఆనారె సానార్. గాని దేవుణు అత్తుదిజ్ ఇన్టం ఆతిలెకెండ బత్తినికార్ దేవుణువెట బత్తినార్ వరిలోజ సొంతి నమదనం మంజినాద్.

7 ఒడోల్ది సెజ అసెజ్ ఏలుబడి: కిని మన్ను మన్నికార్ దేవుణువెట కుట్ర మన్నికార్. వారు దేవుణు రూలుజ్ లోజెజకార్. లోజెదెజ్ అట్వర్.

8 అందెజె ఒడోల్ది సెజ అసెజ్ ఏలుబడి: కిని మన్ను మన్నికార్ దేవుణుదిజ్ ఇన్టం ఆతివజ నడిదెజ్ అట్వర్.

9 దేవుణు అత్తు మీ లోజ మహిజ అయ అత్తుదిజ్ లోజెజి మండ్రెజ్ అట్టిదెర్. ఒడోల్ది సెజ అసెజ్ వందిజ్ లోజెజి మండ్రెజ్ ఎత్తు కిని మన్నుదిజ్ లోజెజి మండ్రెజ్ అక్కర్ సిల్లెద్. క్రీస్తుబాణిజ్ వాజిని అత్తు సిల్లికాన్, క్రీస్తుజ్ సెందితికాన్ ఆవెన్.

10 గాని మీ లోజ క్రీస్తుబాణిజ్ వాజిని అత్తు మహిజ మీ ఒడోల్ పాపమదాన్ సానాద్ గాని మీ అత్తు బత్తినాద్. ఎందానిజ్ ఇహిజ దేవుణు మీ పాపమక విజు మాయిస్తాండ్రె నీతి మన్నికార్ ఇజి ఇడ్డు మనాన్.

11 సాతివరిబాణిజ్ యేసుజ్ మరి బత్తిన్తి దేవుణు అత్తు మీలోజ బత్తుజిమహిజ, సాతివరిబాణిజ్ క్రీస్తుజ్ మరి బత్తిన్తి దేవుణు సాజెసాని మీ ఒడోల్దిజ్బా బత్తిస్సాన్. మీలోజ మన్ని దేవుణు అత్తుదాన్ యాక కినాన్.

12 అందెజె తంబెరిజాండ్రె, మాటు ఉండ్రె దన్నిజ్ లోజెజి మండ్రెజ్ బాజిత మన్నికాట్ గాని అక్క ఒడోల్ది సెజ అసెజ్ లోజెనిక ఆవద్.

13 ఎందానిజ్ ఇహిజ, మీ ఒడోల్ది సెజ అసెజాణిజ్ ఏలుబడి: కిబె ఆని మన్ను వెహిలెకెండ నడితిజ మీరు సాన సానార్. గాని దేవుణు అత్తుదాన్ మీ మన్నుదు మన్ని సెజ అసెజ్ లాగ్వికొజి ఎలాకాలం బత్తినిదెర్.

14 దేవుణు అత్తు నడిపిసిని వజ నడిసెకార్ దేవుణు కొడోరె.

15 ఎందానిజ్ ఇహిజ, దేవుణు మజి సిత్ర అత్తు మజి తియెల్ తపిసి వెటి పణిమణిసిర్ లెకెండ ముందాల్ మహివజ సిక్కు వానాద్ ఇజి తియెలాజి మండ్రెజ్ ఇడ్వెన్. గాని మజి దేవుణు కొడోర్ ఇజి ఇడ్డు మనాన్. అందెజె మాటు ఏలు దేవుణుదిజ్ అబ్బ ఇజి కూక్తెజ్ ఆనాద్.

16 మాటు దేవుణు కొడోరెనె ఇజి దేవుణు అత్తు మా అత్తువెట కూడితాండ్రె నిజం వెహిన్నాన్ ఇజి మాటు నెసినాట్.

17 మాటు దేవుణు కొఱ్ఱోర్ కాక దేవుణు వన్న కొఱ్ఱోరిజ్ ఇడ్డిమన్నొ అస్సిదిజ్ అక్కు మజి వానాద్. దేవుణు క్రీస్తుజ్ ఇడ్డిమన్నొ అక్కుజ్ బా క్రీస్తువెట మజి దోహ్వాక్తొ. ఎలాగ ఇహిజ మాటు క్రీస్తువెట వన్నొ గొప్ప గవ్వరం దోహ్వాక్తెజ్ ఇహిజ వన్నొవెట కస్టమ్కబూ బరిన్తెజ్వలె.

వాని కాలమ్దు తోర్ని సొకు

18 యా కాలమ్దు మజి వాని కస్టమ్కు సుడతిజ అక్కెజ్ ఏపటిదిక్కెజ్ ఆఉ ఇజ నాను ఒడోబిజన. గాని వాని కాలమ్దు దేవుణు మజి తోరిసిని సొకు దిన్నిజ్ ఇంక ఎస్సొ గొప్ప పెరిక.

19 దేవుణు కొఱ్ఱోర్ ఎయెర్ ఇజ దేవుణు తోరిస్సి కాలం వందిజ్ దేవుణు తయార్ కిత్తికెజ్ విజు ఆసదాన్ ఎద్దుసుడోజి మంజినె.

20 ఎందానిజ్ ఇహిజ దేవుణు తయార్ కిత్తికెజ్ విజు పణిదిజ్ రెవిండ సిక్కు సీజ ఇడ్డాన్. ఎలాగ ఇహిజ అక్కెజ్ కిత్తిక అవిద్. ఉండ్రి దన్ని వందిజ్ వారు ఎద్దుసుడోజి మండ్రెజ్ ఇజ దేవుణునె అక్కు జర్పిస్తాన్.

21 ఇనిక ఎద్దుసుడోజి మంజినె ఇహిజ, దేవుణు తయార్ కిత్తికెజ్ విజు ఏలు పాడోజి సొని దన్నిజ్ అడిగి ఆత మన్నె గాని దన్నిబాణిజ్ దేవుణు డోబిస్సి దన్నిజ్ ఎద్దుసుడోజి మంజినె. వన్నొ కొఱ్ఱోరిజ్ తగితి లెకెండ్ గొప్ప జాయ్ కల్లితి మన్నొ విడుడల సిసాన్ ఇజ ఎద్దుసుడోజినె.

22 ఏలుదాక, ఏరుకాబాని ఆయెలికొఱ్ఱో నొప్పిదాన్ అడోబానిలెకెండ్, దేవుణు తయార్ కిత్తికెజ్ విజు ఉండ్రిలెకెండ్ మొరొ ఆజి మంజినె.

23 దేవుణు తయార్ కిత్తికెజ్ విజునె ఆఉ, దేవుణు ఆత్మ దోహ్వాక్తి మాటుబూ అడోబాజి మంజినాట్. మా లొఇ మన్నొ దేవుణు ఆత్మ ఇహిజ తొలిత దోహ్వాక్తి ఉండ్రి ఇనాయం లెకెండ్. వెనుక వాని పూర్తి ఇనాయమ్దిజ్, ఇహిజ దేవుణు వన్నొ కొఱ్ఱోరిజ్ ఇడ్డిమన్నొ గొప్ప అక్కువందిజ్ మాటు ఎద్దుసుడోజి మంజినాట్. నస్సివలె మా ఒడోబి కస్టమ్దాన్ డోబె అనాద్దె.

24 దేవుణు మజి రక్సిస్తిబాణిజ్ అసి మాటు మజి వాని జాయ్ కల్లితిమన్నొ విడుడలవందిజ్ ఎద్దు సుడోజి మంజినాట్. ఎద్దుసుడోజి మంజనిక సుడోజాన్ ఇహిజ ఒరిన్ దన్నివందిజ్ ఎద్దుసుడోజి మండ్రెజ్ అక్కర్ సిల్లెద్గె. ఎందానిజ్ ఇహిజ సుడోతి వెనుక దన్నివందిజ్ మరి ఎద్దుసుడోజి మన్వన్గె.

25 గాని మాటు సుడోజి దన్నివందిజ్ ఎద్దుసుడోజి మహిజ్, దన్నివందిజ్ ఒరిసి మంజినాట్.

26 అయావజనె మా లొఇమన్నొ ఆత్మ వందితిమన్నొవలె దేవుణుఆత్మ మజి సత్తు సీజనాన్. ఎలాగ పార్లనం కిదెజ్ ఇజ నెన్విండ మాటిబాణిజ్ వెప్తాజ్ అట్ఇనన్నొ గువె ఆనివలె దేవుణు ఆత్మనె మా వందిజ్ పార్లనం కిజినాన్.

27 మా మన్నుదు ఇనిక ఇజ దేవుణు సూణాండ్రె, దేవుణు ఆత్మ వెస్పిక అర్లం కిజినాన్. అక్కు ఇనిక ఇహిజ దేవుణు ఆత్మ దేవుణు వెట ఎలాగ పార్లనం కిదెజ్ ఇజ దేవుణు ఆస ఆజినాండ్రో అయావజ దేవుణు ఆత్మ వరివందిజ్ పార్లనం కిజినాన్.

విజువనకాజ్ మున్ను గొప్పజ గెలిస్తాట్

28 దేవుణుదిజ్ ప్రేమిసినివరిజ్ వాండ్రు వీరపాటు కిత్తిదన్నిజ్ ఎర్లిస్సివరిజ్, విజు నెగెండ్ జర్పిసిసాన్ ఇజ మాటు నెసిసాట్.

29 దేవుణు ముందాల్నె వన్నిజ్ నమ్మిని వరిజ్ నెస్తాండ్రె వరిజ్ ఎర్లిస్తాన్. వన్నొ మరిసిలెకెండ్ ఆనార్ ఇజ దేవుణు వరిజ్ కేట ఇడ్డాన్. ఆహె కిత్తిజ్ క్రీస్తు దేవుణుదిజ్ పెరిమరిసి లెకెండ్ ఆనాన్. దేవుణు కొఱ్ఱోరాతి మాటు యేసుజ్ తంబెరుబు లెకెండ్ ఆనాట్.

30 ఎయెర్ దేవుణుదిజ్ నమ్మినార్ ఇజ దేవుణు ముందాల్నె నెస్తాన్. వరిజ్ దేవుణు కూక్తాన్. దేవుణు కూక్తిజ్ వన్నిడగ్గు సొహివరిజ్ వరి పాపముకు విజు నెమ్మిస్తాండ్రె దేవుణు వెట కూడిత్తికార్ ఇజ ఇడ్డాన్. కూడుప్పి వరిజ్ వన్నొ గొప్ప జాయ్ సిత్తాన్.

దేవుణు ప్రేమ

31 ఏలు దన్నివందిజ్ మాటు ఇనిక వెహ్వాట్. దేవుణు మా దరిజ్ మహిజ మా ఎద్దు ఎయెర్బా నిల్వీర్ ఇజనె వెప్తాజ్.

32 దేవుణు వన్నీ సొంత మరిసిజ్ సివిండ అవితాన్. గాని గొప్ప కష్టమాతి సావుదిజ్ ఒపజెప్తాన్. క్రీస్తుజ్ మజీ సత్తి దేవుణు, మాటు వన్నీ వందిజ్ బత్తిదెజ్ మజీ కావాలిస్తికెజ్ విజు సివింద్రా? నిజం సీనాన్.

33 దేవుణు ఎర్రిస్తివరి మున్ను తప్పుజ్ మొప్పి వరి మున్ను గెలిస్తెజ్ ఎయెర్బా అట్విర్. ఎందానిజ్ ఇహిజు, దేవుణున మా పాపమకు సెమిసి మజీ వన్నీ వెట కూడుంట్ట మనాన్.

34 మజీ సిక్కు సీదెజ్ ఇజ ఎయెన్బా తీర్పు తీరిస్తెజ్ అట్విర్. మజీ సిక్కు సీదెజ్ ఇజ యేసు తీర్పు సీనాంద్రా? సీల్తెన్. ఎందానిజ్ ఇహిజు, మా వందిజ్ సాతి యేసుజ్ దేవుణు వన్నీ ఉజెర్ వడకాదు బసయి కితాంద్రె గొప్ప గవరం సిజ్తాన్. ఏలు క్రీస్తునె మా వందిజ్ దేవుణుబాన్ బతిమాల్తినాన్

35 క్రీస్తుజ్ మా మున్ను మన్నీ ప్రేమదిజ్ అడ్డు కిదెజ్ ఇనిదన్నిజ్బా అట్విద్. ప్రమెజ్ వాతిజ్బా గాని, కష్టమకు వాతిజ్బా గాని, మాలెజ్ వాతిజ్బా గాని, కరు వాతిజ్బా గాని, పొర్నాదెజ్ సొక్కెజ్ సీలితిజ్బా గాని, ఇని ప్రమాదమకు వాతిజ్బా గాని, మజీ సప్తిజ్బా గాని క్రీస్తు ప్రేమ ఎసెజ్బా డిసేంండ మంజినాద్.

36 యాకెజ్ విజు దావీదు రాజు రాస్తి లెకెండ్ మన్నె, “మాపు మీ లోకుర్ ఆత్మాన్ కాక ఆఇకార్ ఎసెజ్బా మజీ సప్తిజ్ ఇజ సుడెజినార్. గొర్రెజ్ కత్తికార్ వనకాజ్ కొయ్దెజ్ సుడెనిలెకెండ్ మజీ సప్తిజ్ సుడెజినార్”.

37 యాకెజ్ విజు జర్రితిజ్బా మాటు క్రీస్తు ప్రేమదాన్ విజు వనకాజ్ మున్ను గొప్పజు గెలిసినాట్.

38-39 యాక నాను గటిజు నమ్మిజున. ఇనిక ఇహిజు, సావు అతిజ్బా గాని, బత్తు అతిజ్బా గాని, దేవుణు దూతార్ అతిజ్బా గాని, దెయ్మక సత్తుజ్ అతిజ్బా గాని, ఏలు జర్రినికెజ్ అతిజ్బా గాని, వాని కాలమ్దు జర్రినికెజ్ అతిజ్బా గాని, ఏలుబడి కినికార్ అతిజ్బా గాని, పెరి ఎత్తుదు మన్నుకెజ్ అతిజ్బా గాని, పెరి జోరెదు మన్నుకెజ్ అతిజ్బా గాని, మరి ఇనికబా గాని దేవుణుదిజ్ మా మున్ను మన్నీ ప్రేమదిజ్ అడ్డు కిదెజ్ వనకాజ్ అట్ఉ మా ప్రబు అతి యేసుక్రీస్తు మా వందిజ్ కిత్తి గొప్ప పెరి పణిజాణిజ్ దేవుణు వన్నీ ప్రేమ తోరిస్తాన్.

9

యూదురు వందిజ్ పవులు విసారిసినాన్

1-2 ఏలు నాను ఉండ్రీ వెహ్పు, అక్క నిజమనె. అబద్దం అవిద్. నాను వెహ్పిక నిజమ ఇజి క్రీస్తు నెసీనాన్. నాను వెహ్పిక అబద్దం అవిద్. నా సొంత జాతి అతి యూదురు వందిజ్ నా మన్నుదు గొప్ప బాద ఆజున. డిసేంండ దుకం ఆజున. నాను వెహ్పిక నిజమనె ఇజి నా మన్నుని దేవుణు అత్త సాసీ వెహ్పినార్.

3 నా సొంత జాతి అతి యూదురు, క్రీస్తుజ్ నమ్మిదెజ్ ఇజి నాను ఆస ఆజున. అక్క జర్రిదెజ్ దేవుణు బాణిజ్ నా మున్ను నయివ్ వాతిజ్బా, క్రీస్తుబాణిజ్ నజీ ఎర్రిస్తిజ్బా పరవ సీల్లెద్ ఇజి ఒడెబిజున.

4 వారు ఇస్రాయేలుదికార్, వన్నీ సొంత లోకుర్ ఇజి దేవుణు ఇడ్డికార్. దేవుణు వన్నీ గొప్ప గుణమ్దాన్ ఎయెర్ సీల్లి బాడ్డిదు నడిపిస్తికార్. దేవుణు వరి వెటన ఒపుమానమకు కిత్తాన్. దేవుణుదిజ్ ఎలాగ మాడిస్తెజ్ ఇజి వరిజె వెహ్సన్. వరిజె దేవుణు సీన ఇజి ఒపుమానమకు కిత్త మనాన్.

5 వరి అనిగొగెరు అతి అబ్రహం, ఇస్సాకు, యాకోబు ఇనికార్ ఇస్రాయేలు లోకుర్ లోఇ గొప్ప పేరు పొండికార్. దేవుణు పోక్కు ఇజి ఒపుమానమకు కిత్తి రాజు యా యూదు జాతిలోఇనె లోకు వజ పుట్టాన్. విజేరిమున్ను ఏలుబడి కిని దేవుణు ఎసెజ్బా పొగిడె; ఆజు మసీన్.

6 అహిజు, దేవుణు ఇస్రాయేలు లోకురిజ్ వెహ్పికెజ్ జర్రివితాద్ ఇజి ఇండ్రెజ్ అవిద్. ఎందానిజ్ ఇహిజు, ఇస్రాయేలు లోకుర్ ఇజి వెహ్ ఆనికార్ విజేర్ దేవుణుదిజ్ సరియాతి సొంత లోకుర్ అవిర్.

7 అబ్రాహం పొటాదికార్ విజేర్ వన్నీ తెగాదు పుట్టికార్ ఇజి దేవుణు ఇడ్విన్. ఎందానిజ్ ఇహిజు “సీ కొడె; అతి ఇస్సాకువెలెహన్ వానికార్ సీ జాతి ఆనార్”*, ఇజి దేవుణు అబ్రహం వెట వెహ్ మనాన్.

8 ఎలాగ ఇహిజు, అబ్రాహం తెగాదు పుట్టికార్ విజేర్ దేవుణు కొడెర్ అవిర్. గాని దేవుణు అబ్రహముజ్ సత్తి ఒపుమానం నమ్మితిజ్ దేవుణు కొడెర్ అబ్రాహముజ్ సరియాతి తెగాదికార్ ఇజి దేవుణు ఇడ్నాన్.

* 8:36 8:36 కీర్తన 44:22. * 9:7 9:7 అది 21:12.

9 దేవుణు అబ్రహాం వెట కిత్తి ఒప్పుమానం ఇక్కాదె. “కాలెహిజ్ యా సమయమేదు నాను వాన. నస్త్రవలె నీ ఆల్ని ఒరెన్ కొడోః ఇడ్వార్లె”[✱].

10 అక్కాదె ఆవిద్, రిబెక పొటాదివరిజ్ ఒరెండ్రె అప్పొని, ఎయెన్ ఇహిజ మా అనిగోగో ఆతి ఇస్సాకు.

11-13 ఇస్సాకు ఆల్ని రిబెక పాత డిస్సి మహివలె, దేవుణు దన్నివెట వెప్తాన్. జవల మరిసిరి పుట్విండ మహివలెనె, వారు తప్పు గాని నెగ్గిక గాని కివిండ మహివలెనె దేవుణు దన్నిజ్ వెప్తాన్, “పెరికాన్ ఇజిరి వన్నిజ్ అడిగి మంజినాన్లె”,[✱] ఇజి దేవుణు యాక వెప్తా నండ్రె పంటిజ్ వెనుక ఒరెన్ దేవుణు ప్రవక్త దేవుణు వెప్తా మాట వెప్తాన్. “యాకోబుజ్ నాను ప్రేమినిన, ఏసాపు నజి పడిఃఇకాన్”[✱]. ఇజి. ఎందానిజ్ ఇహిజ, వన్ని లోకుర్ వందిజ్ దేవుణుదిజ్ ఉండ్రె ఉదెసం మహాద్. అయాలెకెండ్రె వాండ్రు నడఃపిస్సాన్. లోకుర్ కిని పణిజాణిజ్ ఆవిద్. దేవుణు ఏర్పాటుదానె విజు జర్గిజనె. దేవుణు ఏర్పాటు కినికెజ్ లోకుర్ ఒడఃబినిలెకెండ్రె ఆవిద్.

14 అహిజ, దేవుణు కొడోఃర్ ఎయెర్ ఇజి దేవుణు ఏర్పాటు కిత్తిదన్ని లోఇ దేవుణు తేడ నూణికాన్ ఇజి ఒడఃబినిదెరెను. సిర్లె, దేవుణు అనెయం కినికాన్ ఆవిన్.

15 ఎలాగ ఇహిజ, దేవుణు మోసెవెట ఈహు వెప్తాన్. “ఎయెన్ ముస్సు దయ తోరిస్తెజ్ నాను ఇస్టం ఆజినాన్ వన్నిముస్సు దయ తోరిస్సు. ఎయెన్ ముస్సు కనికారమాదెజ్ ఇజి ఇస్టం ఆజినాన్ వన్ని ముస్సు కనికారం ఆజిన్”[✱].

16 అండెజ్, యాక లోకు ఆసదానె గాని వన్నిపణిజాణిజ్ గాని దోహక్తిక ఆవిద్. దేవుణు దయదానె యాక జర్గిజనాద్.

17 దేవుణు మాటదు ఈహు మనాద్. దేవుణు పరోరాజు వెట ఇనిక వెప్తాన్ ఇహిజ, నాను ఎస్సానో సత్తు మన్నికాన్ ఇజి నీ వెలెహాన్ విజుబాణి లోకుర్ వెండ్రెజ్ నె నిజి రాజువజ ఇడ్ మన్సు”[✱] ఇజి.

18 అహిజ ఎయెన్ ముస్సు దయ తోరిస్తెజ్ దేవుణు ఇస్టం ఆనాండ్రె వన్నిముస్సు దయ తోరిస్సాన్. ఎయె ముస్సు గర్త కిబిస్తెజ్ ఇస్టం ఆనాండ్రె వన్ని ముస్సు గర్త కిబిస్సాన్.

దేవుణు విజు జర్గిసినాన్

19 ఏలు మీరు మరి వెప్పాదెర్పు. దేవుణు ఇస్టమ్దిజ్ ఎయెన్బా ఎద్రిస్తెజ్ అట్విన్గదె. మరి దేవుణు ఇస్టం వజ లోకుర్ కిదెజ్ ఇజి విజు జర్గిస్సీవలె, తప్పు కిత్తార్ ఇజి లోకుర్ వందిజ్ దేవుణు ఎలాగ వెప్తాజనాన్?

20 గాని దేవుణు ఎద్రు వర్గిదెజ్ లోకు నీను ఎయి?. “తయార్ కిత్తి వన్నివెట, తయార్ కిబె ఆతికెజ్ ఎందానిజ్ నజి ఈహు తయార్ కిత్తి ఇజి వెన్బాదెజ్ ఆనాదా?”

21 కుండెజ్ తయార్ కినివన్నిజ్ ఉండ్రె ముదదాన్ రుండి రెకమది కుండెజ్ తయార్ కిదెజ్ అక్కు మనాద్గదె?. ఉండ్రె కుండ లోకుర్ సుడఃజి ఇక్క ఎస్సా నెగ్గిక ఇజి వహ్వివందిజె మరి ఉండ్రె కుండ మాముల్ పణిదిజ్ ఇడ్పి వందిజ్.

22 దేవుణుదిజ్బా లోకుర్వెట ఇస్టమాతి వజ కిదెజ్ అక్కు మనాద్. పాపం కిని వరి వెట వన్ని నండ్రె కోపమ్దాన్ వాని గొప్పు సత్తు తోరిస్తెజ్ ఆన ఆజినాన్. గాని వరివెట దేవుణు వెటనె కోపం ఆవిండ మహిజ, నాననం వందిజ్ ఇడె ఆతి మన్ని పరి వెట కోపం ఆవిండ ఒర్పుదాన్ మంజినాన్.

23 ఎందానిజ్ ఇహిజ, వన్ని గొప్పు దయ దోహక్తి మజి, వన్ని గొప్పు జాయ్ వందిజ్ తయార్ కిత్తివరిజ్ దేవుణు వన్ని గొప్పు జాయ్ తోరిస్తెజ్ ఆహె కిత్తాన్ ఇహిజ మాటు ఇనిక వెప్పోట్?

24 ఏర్పాటు కిబె ఆతి మాటు ఎయెర్ ఇహిజ, యూదురిని యూదురు ఆఇజాతికార్బా.

25 యూదురు ఆఇ జాతిదివరిజ్ ఎద్రిసినివందిజ్ హుసెయ ప్రవక్త వెట దేవుణు ఈహు వెప్తాన్. “నా లోకు ఆఇ వరిజ్ ఏలు నా లోకుర్ ఇజి కూక్కు. నాను ముందాల ప్రేమ తోరిన్ ఇ వరిజ్ నాను ప్రేమినిసికార్ ఇజి కూక్కు”[✱].

26 దేవుణు ఆఇ జాతిదివరి వందిజ్ వెప్తా మాటెజ్ హుసెయ మరి వెప్తాన్. “మీరు మా లోకుర్ ఆఇదెర్ ఇజి నాను వెప్తాబాన్, బత్కిని దేవుణు కొడోఃర్ ఇజి మీరు పేరు ఇడె ఆనిదెర్”[✱]

✱ 9:9 9:9 ఆది 18:10,14. ✱ 9:11-13 9:11-13 ఆది 25:23. ✱ 9:11-13 9:11-13 మలా 1:2,3. ✱ 9:15 9:15 నిర్గమ 33:19. ✱ 9:17 9:17 నిర్గమ 9:16. ✱ 9:25 9:25 హోసెయ 2:23. ✱ 9:26 9:26 హోసెయ 1:10.

27 యెసయ ప్రవక్త ఇస్రాయేలు లోకుర వందిజ్ ఇనిక వెప్నోన్ ఇహిజ, “ఇస్రాయేలు సమ్దరం ఒడ్డుదు మన్ని ఇన్సు లెకెండ, లెక్క కిదెజ్ అబ్ ఇ నస్సా లోకుర ఆతిజ్ బా, వరిలో ఇ ఉండ్రె ఇజరి గుంపుదిజ్ నె దేవుణు రక్కిస్సాన్.

28 ఎందానిజ్ ఇహిజ దేవుణు అల్నయం ఆవిండ యా లోకం మున్సు తీర్పు కినాండ్రె వన్ని పణి వెటనె పూర్తి కినాన్ లె[✠]”,

29 దేవుణు కనికారం తోరిన్ ఇజ్ ఎయెన్ బా సిక్కుదాన్ తప్పై ఆవిన. యెసయ ప్రవక్త ముందాల్ వెప్నాలెకెండ, “విజు దన్నిజ్ అతికారం మన్ని దేవుణు మా కొడోకొక్కారిజ్ ఇడేవిండ పూర్తి సప్తాన్ ఇహిజ, మాటుబా సాదోము గొమెుర పట్టుమది వరిలెకెండ పూర్తి పాడాత మహాట్ ను[✠]”. దేవుణు అయ పట్టుమదు మహిపరిజ్ పూర్తి విజేరిజ్ సప్తాన్.

యూదురు గెలిస్తెజ్ అట్విండ ఆజినార్

30 అహిజ, ఏలు ఇనిక వెప్నాజ్? దేవుణు వరిజ్ నీతినిజయ్ మన్నికార్ ఇజ ఇడ్డెజ్ యూదురు ఆఇకార్ సుడేవితార్ గాని దేవుణు వరిజ్ నీతినిజయ్ మన్నికార్ ఇజ ఇడ్డాన్. క్రీస్తు మున్సు నమకం ఇడ్డిజ్ నీతినిజయ్ మన్నికార్ ఇజ ఇడ్డాన్.

31 గాని ఇస్రాయేలు లోకుర ఇహిజ దేవుణు మోసెజ్ సిత్తి రూలుజ్ లోజితిజ్ నీతి మన్నికార్ ఆనార్ ఇజ నండ్రె సుడేతార్ గాని అట్విండ ఆతార్.

32 ఎందానిజ్ ఇహిజ వారు దేవుణు మున్సు నమకం ఇడేవితార్. గాని వరి పనిజాణిజ్ నీతినిజయ్ కార్ ఆనార్ ఇజ నంబ సుడేతార్. అందెజె దేవుణు క్రీస్తు ఇజ ఎర్లిసి వన్ని మున్సు అడ్డు అతి వణుకు మున్సు అర్పిలెకెండ వారు తోరో ఒడిజి అర్పార్.

33 యాక ప్రవక్త రాస్తి లెకెండ వనాద్. “సుడేదు, నాను సియెన్దు ఉండ్రె పణకు నిల్పిన్. అక్క అడ్డు ఆనాది లోకాజ్ తోరో ఒడిజి అర్ప్పాద్. గాని వన్ని మున్సు నమకం ఇడ్డికాన్ సిగు ఆవిన[✠].”

10

1 తంబెరిజాండె, నా సొంత జాతి అతి యూదురిజ్ దేవుణు రక్కిస్సెజ్ ఇజ నాను గొప్ప ఆన ఆజి పార్లనం కిజిన.

2 వారు దేవుణు వందిజ్ గొప్ప ఉసార్దాన్ మన్నికార్ గాని దేవుణుదిజ్ పూర్తి నెన్విర్ ఇజ వరివందిజ్ నాను వెప్పిన.

3 ఎందానిజ్ ఇహిజ, దేవుణు లోకురిజ్ ఎలాగ నీతినిజయ్ కార్ ఇజ ఇడ్డాన్ ఇజ వారు అర్లం కివిర్. నీతినిజయ్ కార్ ఇజ దేవుణు ఇడ్డివందిజ్ లోకు ఎలాగ నడిదెజ్ ఇజ దేవుణు తోరిస్తి నర్లు నడివిండ నీతినిజయ్ కార్ ఆదిజ్ ఇజి వారు వరి సొంత రూలుజ్ ఇడ్డార్.

4 క్రీస్తు వాతిజ్ ఏలు దేవుణు మోసెజ్ సిత్తి రూలుజ్ లోకాజ్ దేవుణుబాన్ కూడువేవిద్. క్రీస్తుమున్సు నమకం ఇడ్డికార్ విజేరిజ్ దేవుణు వన్నిబాన్ కూడుప్పాన్.

విజేరి వందిజ్ ఉండ్రె కొత సరి

5 దేవుణు మోసెజ్ సిత్తి రూలుజాణిజ్ నీతినిజయ్ మన్నికాన్ ఆదిజ్ సుడేజిని వన్ని వందిజ్ మోసెబా రాస్ మనాన్. ఇనిక ఇహిజ “రూలుజ్ వజ నడిదెజ్ ఆన ఆనికాన్ వనకదటాన్ బత్తిదెజ్ వలె[✠]”

6 గాని నమకం ఇడ్డివందిజ్ నీతినిజయ్ మన్నికార్ ఇజ దేవుణు ఇడ్డిదన్ని వందిజ్ మన్ని మాటాదు మాటు ఇని ఇనికెజ్ ఆవిద్ ఇజి వెప్నా మనాద్. ఇనికెజ్ ఇహిజ “రక్కుణ దొహ్కాద్ ఇజి పరలోకముదు ఎక్కి క్రీస్తుజ్ అడిగి తత్తెజ్ ఎయెన్ సొనాన్ ఇజి మీ మన్సుదు వెప్నాజ్ ఆవిద్”.

7 అయాలెకెండ సాతివరిబాన్ అయాలోకముదు సొస్తి క్రీస్తుజ్ బాణిజ్ తత్తెజ్ ఎయెన్ సొనాన్ ఇజి మీ మన్సుదు వెప్నాజ్ ఆవిద్.

✠ 9:28 9:28 యెసయ 10:22,23. ✠ 9:29 9:29 యెసయ 1:9. ✠ 9:33 9:33 యెసయ 8:14; 28:16. ✠ 10:5 10:5 తేవి 18:5.

8 గాని అయ మాట ఇనిక వెప్పినాద? ఇనిక వెప్పినాద ఇహిజ, “దేవుణు మాట ఉగ్రున మనాద. అయ మాటోజ్ మీ వెయదునె మన్నె, వెహైజ్ ఆనిదెరె. మీ మన్నుదు మన్నె, ఒడ్కుబిదెజ్ ఆనిదెరె”^{*} మాటు సాటిసిని యా మాట క్రీస్తు మున్ను నమకం ఇడ్డు ఇజినె.

9 అయ మాట ఇనిక ఇహిజ, యేసునె ప్రబు ఇజె ఎయెన్బా లోకుర ముందాల వెహైజ, అక్కాదె ఆవిద, యేసుజ్ సాతివరిబాణిజ్ దేవుణు నిక్రాన్ ఇజి ఎయెన్బా వన్ని గర్బుమదు నమ్మిత్తిజ దేవుణు వన్నిజ్ రక్కిస్సాన్.

10 ఇనిక ఇహిజ, మీ మన్నుదు నమ్మిత్తిజ దేవుణు మిజి వన్నిబాన్ కూడుఃస్సాన్. అక్కదె ఆవిద, యేసు నీ ప్రబు ఇజి లోకుర ముందాల వెహైజ దేవుణు నిజి రక్కిస్సాన్లె.

11 దేవుణు మాటదు ఇనిక రాస్త మనాద ఇహిజ, క్రీస్తు మున్ను నమకం ఇడ్కికాన్ ఎయెన్బా సిగు ఆవిన్.

12 యూదురుజ్ గాని ఆఇజాతిది వరిజ్ గాని దేవుణు ఉండ్రెలెకెండ నూణాన్. వాండ్రు ఒరెండ్రె విజెరిజ్ ప్రబు అతిజ్, వన్నిజ్ లొన్సివరిజ్ విజెరిజ్ వాండ్రు నండో దీవిస్సాన్.

13 యాక ఒరెన్ ప్రవక్త వెహైలెకెండ, “నజి రక్కిన్అ ఇజి దేవుణు వెట వెప్పివరిజ్ విజెరిజ్ దేవుణు రక్కిస్సాన్”^{*}.

14 గాని యూదురు వందిజ్ నెగొండార్ వెప్పినార్ను. క్రీస్తుమున్ను నమకం సిల్లిజ “నజి రక్కిన్అ”, ఇజి క్రీస్తు వెట ఎలాగ ఇనార్? క్రీస్తువందిజ్ వెండ్రెజ్ ఇహిజ వెన్ఇకార్ ఎలాగ వన్నిజ్ నమ్మినార్? ఎయెరిజ్బా క్రీస్తువందిజ్ నెస్సిన్విండ మహిజ వారు ఎలాగ వెనార్?

15 ఎయెరిజ్బా దేవుణు పోక్విండ మహిజ సాటిస్సికార్ ఎలాగ సొనార్. దన్నివందిజె దేవుణు మాటారు ఈహు రాస్త మనాద. “దేవుణు సువార్త వెహైజ్ సొస్సినిక ఎస్సా గొప్ప నెగ్గిక”^{*}.

16 దన్నిజ్ నాను వెప్పిన. క్రీస్తువందిజ్ వెహైజ్ దేవుణు లోకాజ్ పోక్రాన్ గాని విజెరె సువార్తదిజ్ లొజివితార్. దిన్నివందిజ్ యెసయ ప్రవక్త ఇనిక వెహైజ్ ఇహిజ, “ప్రబు, మాపు వెహై మాటోజ్ ఎయెర్బా వెన్వితార్”^{*}, ఇజి.

17 అహిజ క్రీస్తువందిజ్ విహైజానె నమకం ఇడ్వార్. ఎయెర్బా సువార్త సాటిస్తిజానె క్రీస్తు వందిజ్ వెండ్రెజ్ ఆనాద.

18 గాని నాను వెన్బాజిన, “యూదురు సువార్త వెన్విరా?”, “నిజమె వెహార్”, ఇజి వెహ్న. కీర్తనదు రాస్తి మన్ని లెకెండ, దేవుణు వందిజ్ వారు వెహైక లోకమదు విజ బాడ్డిజ మన్నికార్ వెహార్. అందిదెజ్ అటోణ బాడ్డిదుబా దేవుణు వందిజ్ మాటోజ్ అందితె మన్నె”^{*}.

19 మరి ఉండ్రె ప్రస్స వెన్బాన, “సువార్త వందిజ్ యూదురు అర్థం కితారా? నెగొండార్ అర్థం కితార్ గదె. దేవుణు ఇస్రాయేలు లోకాజ్ దిన్నివందిజ్ వెహైక మోసె వెహైన్, “యూదురు ఆఇజాతిది వరివెట మిజి గోన కిబిస్సాలె. అర్థం కిదెజ్ అటోణ వరిజ్ నాను దీవిస్సాలె”^{*}

20 యెసయ ప్రవక్తబా దిన్నివందిజ్ గటిజ రాస్త మనాన్, “నజి రెబాఇవరిజ్ నాను దోహ్కచ్చ. నజి వెన్బాఇవరిజ్ నాను తోర ఆన్”^{*}.

21 గాని ఇస్రాయేలు లోకుర వందిజ్ దేవుణు ఇనిక వెహైజ్ ఇజి యెసయ రాస్సాన్, “నా మాటదిజ్ లొజివిండ నా వెట ఎద్రిసిని నా లోకు వందిజ్, వారు మర్జి వానిదాక నాను ఎద్రునుడేజి మంజిన”^{*}.

11

యూదురిజ్ దేవుణు దయ తోరిస్సాన్.

1 అహిజ నాను వెన్బాజిన, దేవుణు వన్ని సొంత లోకుర ఆతి యూదురిజ్ డింస్సె సిత్రాండ్రా? సిల్లెన్, ఎస్సెజ్బా డింస్విన్. ఎలాగ ఇహిజ నానుబా యూదువాండ్రునె. అబ్రహాం తెగాదు పుట్టి బెన్యామిను కులమదు పుట్ట మన్ను. గాని దేవుణు నజి డింస్విత్తాన్.

^{*} 10:8 10:8 ద్వితీ 30:14. ^{*} 10:13 10:13 యెవెలు 2:32. ^{*} 10:15 10:15 యెసయ 52:7. ^{*} 10:16 10:16 యెసయ 53:1. ^{*} 10:18 10:18 కీర్తన 19:4. ^{*} 10:19 10:19 ద్వితీ 32:21. ^{*} 10:20 10:20 యెసయ 65:1. ^{*} 10:21 10:21 యెసయ 65:2.

2 సీల్ల దేవుణు ముందాల్ న కూక్కి వన్ని లోకుర్ ఇజి కేటక్తి వరిజ్ నెక్కిపొక్వతాన్. ఏలియ ప్రవక్త దేవుణువెట మొరొ అతాన్ ఇజి దేవుణు మాటాదు రాస్తిమన్నిక గుర్తు కిజినిదెర్గదె. వాండ్రు ఇస్రాయేలు లోకుర్ వందిజ్ ఇనిక వెప్తాన్ ఇహొజ,

3 “ప్రబువా నిజి మహి ప్రవక్తరిజ్ విజ్జెరిజ్ వారు సప్తార్. నిజి సంత సుర్ది సీని మాలి పీటెజ్ వారు డెయ్య పొక్తార్. నిజి నమ్మిని వరి లొక నాను ఒరెనె మిగిలిత మన్ను. ఏలు నజిబా సప్తెజ్ సుడెజినార్”.

4 గాని దేవుణు వన్నిజ్ ఇనిక వెప్తాన్ ఇజి గుర్తు మన్నిదెరా?. “నీను ఒరిదె ఆక బయాల ఇని దెయమదిజ్ మాడిసెన ఏడు వెయిజ్ లోకురిజ్ నావందిజ్ నాను కేట ఇడ్త మన్ను”.

5 అయాలెకెండె యా కాలమ్దబా దేవుణు యూదురి లొక ఉండ్ర్ ఇజిరి గుంపుదిజ్ కేట ఇడ్తాన్. వన్ని దయాదర్మమదానె వరిజ్ కేట ఇడ్తాన్.

6 లోకుర్, వారు కిత్తి నెగ్గి పణిజ్ వందిజ్ అవిద్ గాని, దేవుణు దయాదర్మమదానె వన్నిమున్ను, నమకం ఇడ్తెజ్ అట్టార్. ఎందానిజ్ ఇహొజ వారు కిత్తి నెగ్గి పణిజ్ వందిజ్ దేవుణు వరిజ్ ఎర్దిస్తాన్ ఇహొజ, వన్ని గొప్ప దయ నెడినె దొహ్కొక్కిక అవిద్గదె.

7 అందెజి ఇనిక జర్గితాద్ ఇహొజ, ఇస్రాయేలులోకుర్ నండొండార్ నండొ ఆనదాన్ రెబాతిక వరిజ్ దొహ్కొవ్తాద్. దేవుణు ఎర్దిస్తి ఇడ్తి ఇజిరి గుంపుదివరిజె అక్క దొహ్కొద్. మిగిలిత్తికార్ దేవుణు వందిజ్ ఇనికబా సెన్తెజ్ అట్టెక లెకెండె దేవుణు కిత్తాన్.

8 దిన్నివందిజ్ దేవుణు మాటాదు రాస్త మనాద్. ఇనిక ఇహొజ, దేవుణు వరిమున్ను నిర్తి కినివరి మన్నువజి కిత్తాన్. వరిజ్ కణుకెజ్ మహా గాని సుడెనిదన్నిజ్ అర్దం కివిర్. వరిజ్ గిబ్బిజ్ మహా గాని వెహొదన్నిజ్ అర్దం కివిర్”*

9-10 దిన్నివందిజ్ దావీదు రాజుబా వెప్తా మనాన్. వన్ని మున్ను, పగాతి వరివందిజ్ ఈహు వెప్తాన్ “వారు సర్త ఆనివలె కిని పణిజ్ వరిజ్ ఉరి లెకెండె అపిద్. నెగెండె ముజినావ్ ఇజి ఒడెబినివలె వెటనె వరి మున్ను, నానసం రపిద్. దేవుణు వందిజ్ నిజమాతిక నెనవందె ఆనివందిజ్ వరి మన్ను సీకటి ఆజి సాసిద్. వారు గొప్ప బరుదాన్ వజ్నిలెకెండె అపిద్”.*

టోటాదు పిరిజిని ఒలివ మరాతు అడివిది కొమెజ్ అంతు తొవ్తాన్.

11 అహొజ, నాను వెనబాజిన, యూదురు క్రిస్తుజ్ నెక్కిపొక్కిజ్ దేవుణు బాణిజ్ తెగు సాహార్ ఇజి వెప్తాజ్నా? అవిద్ ఎస్సెజ్నా అపిద్. గాని వారు క్రిస్తు మున్ను, నమకం ఇడెఇతిజ్, క్రిస్తుజ్ నమ్మితిజ్ వాని అయ రక్సణ దేవుణు యూదురు ఆకవరిజ్ సిత్తాన్. మజి వానిక వరిజ్ దొహ్కొద్దా ఇజి యూదురు గోస అదెజ్వలె ఇజి యాక జర్గితాదా?

12 యూదురు క్రిస్తుజ్ నెక్కి పొక్కివలె యూదురు ఆకజాతిదివరిజ్ దీవన దొహ్కొద్ ఇహొజ, వరిజ్ వాతి నస్తం ఆకవరిజ్ లాబం అతాద్ ఇహొజ, దేవుణు ఎర్దిస్తి ఇడ్తి యూదురు దేవుణుబాన్ మర్ది వానివలె, యా లొకమ్ది విజు జాతిదివరిజ్ మరి ఎస్సానొ గొప్ప లాబమ్కు వానె!

13 ఏలు యూదురు ఆక మిజి నాను వెహొనె. యూదురు ఆకవరిజ్ అపొస్తుడు వజి దేవుణు నజి ఇడ్తెజ్ దన్నివందిజ్ గొప్పజ గవరం దొహ్కొక్త మన్ను.

14 దేవుణు నజి ఒపజెప్తి యా పణి కిజి ఎలాగబా నా సొంత జాతి అతి యుదురిజ్ గోస పుట్టిన్జె ఇజి నాను సుడెజిన. ఎందానిజ్ ఇహొజ మిజి దేవుణు దీవిస్తిలెకెండె వరిజ్ దొహ్కొక్తె ఇజి వారుబా ఆన అతిజ దేవుణు వరిలొక నెగెండారిజ్బా రక్కిస్సాన్.

15 దేవుణు మా సొంత లోకుర్ అతి యూదురు నండొండార్ నెక్కి పొక్కివలె యా లొకమ్దు మన్ని ఆకజాతిది వరిజ్ నండొండారిజ్ వన్నిబాన్ కూడుఃప్తాన్, అహొజ దేవుణు యూదురుజ్ వన్నిబాన్ కూడుఃప్తివలె ఇనిక వానాద్? సాపుదాన్ బత్తునె వానాద్.

16 ఉండ్ర్ దూరు ముదదాన్ తొలిత సుప్తాక దేవుణుదిజ్ సీనిక ఇహొజ అయ ముద విజు దేవుణుదిజ్ సిత్తి లెకెండె. అయవజినె యూదురు దేవుణు లోకురె. ఎందానిజ్ ఇహొజ, వరి అనిగొగొరుబా దేవుణు లోకురె.

* 11:3 11:31 రాజు 19:10,14. * 11:4 11:41 రాజు 19:18. * 11:8 11:8 ద్విత్తి 29:4; యెనయ 29:10. * 11:9-10 11:9-10 క్రిస్తవ 69:22,23.

ఉండ్రి మరాతి వెల నెగ్గి ఇహిజ అయ మరాతి కొమెజ్ బా నెగ్గెజ్ నె. అయావజనె, యూదురి అనిగొగొరు దేవుణు లొకరకాక వరి కొడొ కొక్రాదికారబా దేవుణు లొకురి.

17 టొటూదు మన్ని నెగ్గి ఒలివ మరాతి కొమెజ్ సెగం రుక్కిపొక్కిలెకెండ్ దేవుణు యూదురి సెగొండారిజ్ నెక్కు పొక్తాన్. అడివిది ఒలివ మరాతి ఉండ్రి కొమలెకెండ్ యూదురు ఆజ మిజి టొటూదు మన్ని నెగ్గి ఒలివ మరాతు కూడుఘాన్. అయ నెగ్గి ఒలివ మరాతు కూడుఘిజ్ కొమెజ్, అయ మరాతి వెలెజాణిజ్ కన లాగ్గి సత్తు అనివజ మిజిబా యూదురుజ్ దేవుణు సిత్తి దీవన దొవొక్కు మనాద్.

18 మరాతాన్ కొమెజ్ కొయజి విసిర్పిలెకెండ్ దేవుణు యూదురిజ్ నెక్కు పొక్తాన్ గాని యూదురు ఆజ మీరు గర్త అనిక ఆవిద్. మాపు వరిజ్ ఇంక పెరికావ్ ఇజి మీరు గర్త ఆతిజ యాక గుర్తు కిదెజ్. ఇనిక ఇహిజ వెలెజ్ బత్కినిక కొమెజాణిజ్ ఆవిద్. వెలెజదానె మీరు బత్కిజనిదెర్.

19 మజి కూడుఘెజ్ నె దేవుణు యూదురిజ్ నెక్కు పొక్తాన్ ఇజి మీలొజ ఒరెన్ వెహ్సాన్సు.

20 యాక నిజమె గాని, ఉండ్రి వెహ్సా. యూదురు క్రీస్తు ముస్సు నమకం ఇడెజ వందిజి దేవుణు వరిజ్ నెక్కు పొక్తాన్. మీరు క్రీస్తుముస్సు నమకం ఇడ్తి వందిజ్ నె గటిజ నిల్పినిదెర్. అందెజి గర్త ఆమాట్. జాగర్త మండ్రు.

21 ఎందానిజ్ ఇహిజ మరాతి కొమెజ్ ఇహిజ యుదురిజ్ దేవుణు నెక్కిపొక్తి లెకెండ్, మీరు నిల్వెండ్ మహిజ మిజిబా తవ్విండ్ నెక్కు పొక్తాన్.

22 యాక గుర్తు కిదు. దేవుణు కనికారమదాన్ మనాన్. వాండ్రు కొవమదాన్ బా మనాన్. వన్నిజ్ నెక్కిపొక్తి యూదురువెట దేవుణు కొవమదాన్ మనాన్. గాని యూదురు ఆజ మిజి దేవుణు కనికారం తొరిసినాన్. గాని దేవుణు తొరిసి కనికారం మీరు నమ్మిత్తిజ్ నె మిజి కనికారం తొరిసినాన్. సిల్లిజ మిజిబా కత్తు విసిర్పాన్.

23 యూదురు క్రీస్తుముస్సు నమకం ఇట్టిజ మరాతు కొమెజ్ మరి అంతు తొహ్సాలెకెండ్ దేవుణు వరిజ్ మరి వన్నిబాన్ కూడుఘాన్. ఎందానిజ్ ఇహిజ వరిజ్ కూడుఘెజ్ అట్టాన్.

24 యూదుర ఆజ మీరు అడఃవిదాన్ తత్తి ఉండ్రి ఒలివ మరాతి కొమ లెకెండ్. టొటూదు పిరిజిని ఒలివ మరాతు యా అడఃవిది కొమెజ్ దేవుణు అంతు తొహ్సాన్. యాక మాముల్ జర్గిదెజ్ కన్సం. అహిజ కత్తువిసిర్పి టొటమొక్యాది కొమెజ్ మరి అయ మరాతు అంతు తొహ్సాజ్ ఎస్సాన్ సులు. అయా లెకెండ్ నెక్కి పొక్తి యూదురిజ్ మరి వన్నిబాన్ కూడుఘెజ్ దేవుణుదిజ్ ఇని అడ్డు సిల్లెద్.

దేవుణు యూదురుజ్ రక్కిస్సాన్

25 నాను ప్రేమిసిని తంబెరిజాండె, ఏలు ఉండ్రి డాజితి మన్ని గొప్పు సజతి మీరు నెస్సెజ్ ఇజి నాను వెహ్సాన్. నాను ఎందానిజ్ వెహ్సాన్ ఇహిజ దేవుణు మిజి కూడుఘివందిజ్ యూదురిజ్ ఇంక తెలిమన్నికావ్ ఇజి మీరు గర్త ఆవిండ్ మండ్రెజ్ ఇజినె. ఇనిక ఇహిజ యూదురు ఆజ జాతిదివరి లొఇహాన్ దేవుణుబాన్ వాదెజ్ ఇజి వాండ్రు కేట కిత్తి సస్సాండార్ వన్నిబాన్ కూడుఘె ఆనిపాక యూదురు దేవుణుదిజ్ నమ్మిండ్ వరిలొఇ నండొండారి మస్సు వాండ్రు గటి కిసాన్.

26-27 యూదురు ఆజవరి లెక్కు పూర్తి అతి వెనుక, దేవుణు యూదురుజ్ రక్కిస్సాన్. దేవుణు ప్రవక్త ఒరెన్ రాస్తిలెకెండ్ అక్కు జర్గినాద్. ఎలాగ ఇహిజ, "లొకురిజ్ రక్కిస్సాన్, దేవుణు లొకురి బాణిజ్ వానాన్. నస్సెవలె వాండ్రు మా లొకాజ్ వరి పాపం కిత్తి వందిజ్ ఎత్తుకిని బాణిజ్ డిజిబిస్సాన్. నాను ఒప్పమానం కిత్తిలెకెండ్ వరి పాపమకు నాను లాగ్గు"✱.

28 యూదురు సువార్త నెక్కి పొక్తిజ్ దేవుణు వరిజ్, వన్నిజ్ వడిజిఇవరివజ ఇడ్డారె. గాని, వారు దేవుణు ఎర్గిస్తి లొకురి కాక దేవుణు వరిజ్ ప్రేమిసిని మనాన్. ఎందానిజ్ ఇహిజ వన్ని అనిగొగొరు వెట వాండ్రు ఒట్టు కత్తి దస్సివందిజె,

29 దేవుణు యూదురిజ్ ఏలుబా ప్రేమిసినాన్. ఎందానిజ్ ఇహిజ దేవుణు ఎస్సెజ్ బా వెహ్సాలెకెండ్ కిసాన్. వన్ని లొకురి ఇజి కూక్తి వరిజ్ ఎస్సెవలెబా ప్రేమిస్సాన్. వరిజ్ ఎస్సెజ్ బా దీవిస్సాన్.

30 యూదురు ఆజ మీరు ముందాల దేవుణుదిజ్ లొజివిండ్ మహిదెర్. గాని యూదురు దేవుణుదిజ్ లొజివిండ్ ఆతిజ్ దేవుణు కనికారం మిజి వాతాద్.

✱ 11:26-27 11:26-27 యెసయ 59:20,21; 27:9; యెర్మియా 31:33,34.

31 అయావజనె, యూదురు దేవుణుదిజ్ లోజీవండ ఆతిజ్ మిజి ఏలు కనికారం తోరిస్తెలెకెండ వరిజ్బా దేవుణు మరి కనికారం తోరిస్తాన్.

32 విజేరెవెట కనికారం తోరిస్తెజ్ ఇజ దేవుణు విజేరిజ్ వారు లోజీవండ ఆతి మన్నిదన్ని లోఇనె డిఃస్త సిత్తాన్.

33 దేవుణు బుద్ది, గెణం ఎస్సానో గొప్ప పెరిక కొటి. వాండ్రు తీర్గునం కిత్తికెజ్ ఎయెనబా అర్లం కెదెజ్ అట్విన. వాండ్రు కిని వణి వందిజ్ ఎయెనబా అర్లం వెప్తాజ్ అట్విన.

34-35 ప్రవక్త దేవుణు మాటడు రాస్తిలెకెండ మనాద్ యాక. ఎలాగ ఇహిజ, “దేవుణు ఒడఃబినికెజ్ ఎయెజ్బా తెలివీద్. దేవుణు ఇని ఇనికెజ్ కిదెజ్ ఇజి వన్నిజ్ బుద్ది వెప్తాజ్ ఎయెజ్బా అట్విన*.” “ఎయెనబా దేవుణుదిజ్ ఇనికబా సీదెజ్ సిల్లెద్. అందెజె దేవుణు ఎయెరిజ్బా మర్రి సీదెజ్ అక్కర్ సిల్లెద్*”.

36 యాక నిజం ఇజి మాటు నెసినాట్. ఎందానిజ్ ఇహిజ, దేవుణు విజు తయారొ కిత్తాన్. అక్కెజ్ విజు మన్నె. వాండ్రు సిత్తి సత్తుదాన్ అక్కెజ్ బత్తిజెన. దేవుణుదిజ్ పొగడిదెజ్నె అక్కెజ్ మన్నె. విజేరె లోకుర దేవుణుదిజ్ ఎస్సివలెబా గొప్ప గవరం సీజ మనీద్. ఆమెన్.

12

కొత్త బత్తు.

1 అందెజె మా తంబెరిజాండె, నాను మీవెట బతి మల్లిన, దేవుణు మిజి నిస్సా దయ తోరిస్తెవందిజ్ మీరు మిజినె దేవుణుదిజ్ పూజ లెకెండ సీదు. అయ పూజ బత్తిజి మంజిని వజ మండ్రెజ్వలె, దేవుణుదిజ్ కేట ఆతివజ దేవుణుదిజ్ ఇస్టం ఆతివజ మండ్రెజ్వలె. దేవుణుదిజ్ సీదెజ్ తగితి పొగడిఃజి మాడిఃసినిక ఇక్కాదె

2 యా లోకమడికార్ బత్తిని వజ దేవుణుదిజ్ వడిఃవిండ బత్తిదెజ్ ఆవద్. గాని మీ బత్తు ఆనివందిజ్, మీ మన్ను పూర్తి కొత్తాజ్ కిదెజ్ దేవుణుదిజ్ సరి సీదు. ఆహొ కిత్తిజ మీరు ఇనిక కిదెజ్ ఇజి దేవుణు కొరిజినాండ్రో అక్క ఎమేణిక ఇజి నెసి ఒప్పుకొండెజ్ ఆనిదెర్. దేవుణు మీ వందిజ్ కొరిజినిక నెగ్గికాదె, వన్నిజ్ ఇస్టం ఆతికాదె, ఇని తక్కు సిల్లికాదె.

3 దేవుణు నజి, వన్ని గొప్ప దయదాన్ నజి అపొస్తుడు వజ ఇడ్తాన్. అందెజె నాను మిజి విజెదెరిజ్ వెప్పిన. నాను ఎలాగ మర్రికాన్ ఇజి ఒరెన్ ఒరెన్ ఒడఃబినివలె మీరు మన్నిదన్నిజ్ ఇంక నండొ మనాద్ ఇజి మీ వందిజ్ ఒడఃబిమాట్. గాని దేవుణు మిజి సిత్తి నమకమడిజ్ తగితివజ మిజి మీరె సరిఆతి వజ కొల్ల కిదు.

4 ఉండ్రీ ఒడఃలీదు కాల్కు కిక్కు ఇజి రక రకమడి బాగమకు మనె, వనక వనక పణిజ్ వేరె వేరె మన్నె.

5 అయావజనె, మాటుబా నండొండార్ గాని క్రీస్తు వెట కూల తొప్పాజ్ మాటు ఉండ్రె లెకెండ మనాట్. మాటు ఉండ్రె ఒడఃలీదుజ్ సిందితికాట్. ఒరెన్ మరి ఒరెన్ వన్నివందిజ్ మనాన్.

6 దేవుణు వన్ని గొప్ప దయ మజి సిత్తిజ్ నండొ రకమడి వరమకు* సిత్తాన్. యా వరమకు మాటు నెగెండ వాడుకొండెజ్. దేవుణు సిత్తి మాటిజ్ వెప్తాజ్ అట్ట ఇహిజ అక దేవుణు నీవెట వెప్తాన్ ఇజి నీను నమ్మిత్తి వజ వెప్తాజ్.

7 మహివరిజ్ అవసరం ఆతికెజ్ కిజి సీదెజ్నా మీ వరం ఇహిజ, అక్క కిదెజ్ దేవుణు మాటిజ్ నెస్సిసి సీదెజ్నా మీ వరం ఇహిజ నెస్సి సీదెజ్.

8 మహివరిజ్ దయరం వెప్తాజ్నా మీ వరం ఇహిజ దయరం వెప్తాజ్. సీబాజి సినిక మీ వరం ఇహిజ అక్క కల్లి సిల్లి మన్నుదాన్ సీదెజ్. నజమడిజ్ నడిఃపినినికాన్ బాగ నడిఃపిన్జివెలె. బాద్ ఆతివరిజ్ కనికారం తోరిస్సికాన్, సర్దదాన్ కనికారం తోరిస్తెజ్వెలె.

ఎలాగ ప్రేమకిదెజ్

* 11:34-35 11:34-35 యెనయ 40:13. * 11:34-35 11:34-35 యొయ 41:11. * 12:6 12:6 వరమకు ఇహిజ ఉండ్రీ వణికిదెజ్ దేవుణు నీని ఇనాయం

9 మీరు మహివరిజ్ కల్లి సిల్లెండ పేమిస్తెజ్. దేవుణుదిజ్ పడిజె వనకబాణిజ్ దూరం మండ్రెజ్. అక్కెజ్ బద్దె డిజెస్తెజ్. దేవుణుదిజ్ ఇస్తం ఆతి వనకాజ్ డగ్గు కిదు.

10 సొంత ఇండ్రెణివరి లెకెండ ఒరెన్ మరి ఒరెన్ వన్నెజ్ నండొ ప్రేమిస్తెజ్. మర్యాద సిని దన్నెలోజ ఒరెన్, మరి ఒరెన్ వన్నెజ్ వాండ్రు నజి ఇంక పెరికాన్ ఇజి మర్యాద సీజి మండ్రెజ్.

11 దేవుణుది సెందితి సజతిజ లొఇ ఉసార్ ఆజి మండ్రు. బండెజ్ ఆమాట్. ప్రబు పణి లొఇ దేవుణు అత్తుదాన్ ఉసార్ ఆజి పణికిదు.

12 దేవుణు మీ వందిజ్ గొప్పు నజతిజ్ కినాన్ ఇజి ఎర్దు సుడజెజి సర్దదాన్ మండ్రు. కస్తం వానివలె ఓరిసి మండ్రు. పార్దనం కిదెజ్ మన్ని సజతిజ వందిజ్ డిజెన్విండ పార్దనం కిదు.

13 దేవుణుదిజ్ నమ్మిత్తి వరిజ్ ఎయెరిజ్బా ఇనికబా అవ్సరం ఆతిజ వరిజ్ కావాలిస్తెకెజ్ సీదెజ్. దూరమదాన్ వాజిని వరిజ్ ఇండ్రె కూక్కి మిజి మన్నిబాణిజ్ సీజి మర్యాద కిదు.

14 మిజి బాద కినివరి మున్ను కనికారం తోరిన్ల ఇజి దేవుణుదిజ్ పార్దనం కిదెజ్. ఒబ వరిజ్ దీవిస్తెజ్ ఇజి దేవుణుదిజ్ వెహు వరిజ్ సయివ్ సిల ఇజి వెహ్లాట్.

15 సర్ద అని వరివెట సర్ద ఆజి మండ్రు. దుకం ఆతి వరివెట వరి దుకమ్దు కూడజెజి మండ్రు.

16 ఒరెన్ మరి ఒరెన్వెట ఉండ్రె మన్ను ఆజి మండ్రు. గర్ద ఆమాట్. తకుదివరి వెట కూడజెజి మండ్రెజ్ మన్ను అదు. నానె గొప్పు బుద్ది మన్నికాన్ ఇజి ఒడజెబిమాట్.

17 మిజి సెఇక కినివరిజ్ మర్ది సెఇకెజ్ కిమాట్. నెగ్గిక ఇజి విజేరి ఒప్పుకొడెని పణిజెన్ కిదెజ్.

18 విజేరి వెట సమదనమ్దాన్ మండ్రెజ్ ఒద్దె నెగిండ సుడెదు.

19 నాను ప్రేమిసిని కూలెజండ, మిజి ఎయెన్బా సెఇక కిత్తిజ వన్నెజ్ మర్ది సెఇక కిమాట్. గాని దేవుణు వన్నెజ్ సిక్కు సీదెజ్ డిజెసిదు. దేవుణు మాటదు దన్నివందిజ్ రాస్త మనాద్. ఇనిక ఇహిజ, “లోకు కిత్తి సెఇ పణి వందిజ్ నీను కోవం తీరిస్తా. అక్కు నానె తీరిస్త. నిజి సెఇక కిత్తివన్నెజ్ నాను సిక్కు సీన్”, ఇజి దేవుణు వెహ్సినాన్*.

20 గాని మరి మీరు ఇనిక కిదెజ్ ఇహిజ; నిజి పగాతి వన్నెజ్ బజ కట్టిజ వన్నెజ్ ఉండెజ్ సిల. వన్నెజ్ ఎహ్కె కట్టిజ, ఏరు సిల. నస్తవలె వాండ్రు సిగు ఆనాండ్రె వన్నె కోవం డిజెస్తాన్”,* ఇజి రాస్త మనాద్.

21 మరి ఒరెన్ కిత్తి సెఇ పణిదిజ్ తగితి పణి మీరు కిమాట్. గాని మీరు వరిజ్ కిని నెగ్గిపణిజాణిజ్ వరి సెఇ పణిదిజ్ గెలిస్తెజ్.

13

ఏలుబడి: కినివరిజ్ లొజెదు.

1 విజేరి ఏలుబడి: కినివరిజ్ లొజెజి మండ్రెజ్వలె. ఎందానిజ్ ఇహిజ, ఏలుబడి: కినివరిజ్ అతికారం దేవుణునె సీజినాన్. వరిజ్ ఏర్పాటు కిత్తికాన్ దేవుణునె.

2 అందెజి ఏలుబడి: కినివరిజ్ లొజెఇకార్ దేవుణు ఏర్పాటు కిత్తిదన్నిజ్ ఎద్రిసినార్. వరిజ్ తగితి తీర్పుదొహ్కాద్.

3 నెగ్గి పణిజ్ కినివరిజ్ ఆవిద్, సెఇ పణిజ్ కినివరిజె ఏలుబడి: కినికార్ తియెల్ తపిస్తార్. అందెజె ఎయెన్బా ఏలుబడి: కినివరిజ్ తియెల్ సిల్లెండ మండ్రెజ్ ఇహిజ, నెగ్గి పణిజ్ కిజి మండ్రెజ్. నస్తవలె ఏలుబడి: కినికార్ మీ వందిజ్ నెగ్గికెజ్ వెహ్నార్.

4 ఎందానిజ్ ఇహిజ మీ నడివి మిజు నెగెండ జర్దిదెజ్ ఇజి పణికినికారె వీరు. దేవుణుదిజ్ పణికిదెజ్ దేవుణు ఏర్పాటు కిత్తికారె వీరు. మీ లొఇ ఎయెన్బా తప్పు కిత్తిజ వాండ్రు తియెల్ ఆదెజె. ఎందానిజ్ ఇహిజ తప్పు కిత్తివరిజ్ సిక్కు సీదెజ్ విరిజ్ అతికారం మనాద్. దేవుణు ఏర్పాటు కిత్తిజ్ దేవుణు వందిజ్ పణికినికారె లెకెండ, వారు తప్పు కినివరిజ్ సిక్కు సీనార్.

5 అందెజె అతికారి లోకాజ్ లొజెజి మండ్రెజ్ వలె. సిక్కుదాన్ తప్ర ఆదెజ్ ఉండ్రె ఆవిద్, లొజెజి మంజినిక సరి అతికదె ఇజి నెహ్బా లొజెదెజ్ వలె.

* 12:19 12:19 ద్విత్తి 32:35. * 12:20 12:20 సామెత 25:21,22.

6 ఏలుబడికి కినికార్ దేవుణుడి వణికిజనార్. వారు ఆయ ఏలుబడికి కినిపణి వందికి కాలం విజు గడఁప్పినార్. అందెజి మీరు వరి వందికి పన్నుబా తోప్పినానిదెర్.

7 ఎయెరిక్బా ఇనికబా సీదెక్ ఇహిజ అక్కెక్ సీదెక్. ఎంబెబా పన్ను తొప్పాక్ మహిజ బాన్ పన్ను తొప్పాక్. ఎయెరిక్ మర్యూద సీదెక్ ఇహిజ వరిక్ మర్యూద సీదెక్. ఎయెరిక్ గవరం సీదెక్ ఇహిజ వరిక్ గవరం సీదెక్.

ప్రబు మర్రి వాజిని కాలం డగ్రు ఆత మనాద్

8 ఎయెర్బాన్బా అప్పు తీరినఎండ ఇడమాట్. ఎసెక్బా ఒరెన్ మరి ఒరెన్ వెట ప్రేమిస్సికాదె అప్పు లెకెండ మనీద్. మహివరిక్ ప్రేమిస్సికాన్ దేవుణ రూలుజ పూర్తి లోజినాన్.

9 దేవుణ రూలుజ లోఇ ప్రకరకమ్వి రూలుజ్ మనె. వనకలోఇ సెగం ఇనికెక్ ఇహిజ, “రంకు బులాదెక్ ఆవీద్. లోకాక్ సప్టెక్ ఆవీద్. డోజ కిదెక్ ఆవీద్. ఆఇవరిక్ ముస్సికెక్ నజీ కావాలి ఇజి సెఇ ఆన ఆదెక్ ఆవీద్” గాని యా రూలుజ్ విజు కూడుఁప్పిజ, యాకాదె, “నీను నిజి ప్రేమిన్అ⁶”, ఇజినె.

10 మహి వరిక్ ప్రేమిస్సిజ వరిక్ ఇని తప్పుబా నీను కిఇ గదె. అందెజి మహివరిక్ ప్రేమిసినికాన్ దేవుణ రూలుజ విజు వనకాక్ పూర్తి లోజినాన్.

11 నాను వెప్పాలెకెండ మీరు కిజి మండ్రెక్ వలె. ఎందానిక్ ఇహిజ, మాటు బత్తిని యా కాలం నండో ముకెలవూతి కాలం ఇజి మీరు నెనినిదెర్. ప్రబు మర్రి వాజి మజి రక్కినిని కాలం డగ్రు ఆత మనాద్ కాక నిద్రదాన్ నిజిజ తెలి ఆతివరి వజ జాగర్త మండ్రు. తొలిత మాటు నమ్మిత్తి మహి కాలమ్దిక్ ఇంక ఆయ నమయం డగ్రు ఆత మనాద్.

12 రెయు అందిజి వాజినిలెకెండ మా బత్తుబా అందిజి వాజినాద్. క్రీస్తు మర్రి వాని కాలం డగ్రు ఆత మనాద్. అందెజి సెకటిదు కిని సెఇ వణిక్ విజు డిసి సీదెక్. వేడెక విదెమ్దిక్ సానికాన్ దన్నిక్ కావాలిస్సికెక్ తోడఁగిజి విదెమ్దిక్ తయార్ అనిలెకెండ, సెఇ వనకాక్ ఎద్రిస్టెక్ తయార్ ఆజి మండ్రు.

13 సీకటుదు కిని సెఇ వణిక్ డిసి సీజి మాటు జాయ్దు నడిసి మండ్రెక్. కల్లు విందుజ సాస్సి ఉణిజి సాస్టాక్ ఆవీద్. మెుగ కొడోర్ గాని అయ్లి కొడోర్ గాని రంకు బులాదెక్ ఆవీద్, టంటెక్ ఆదెక్ ఆవీద్, గోన ఆదెక్ ఆవీద్.

14 మరి ఎలాగ మండ్రెక్ ఇహిజ, మహి లోకురిక్ తోర్నివజి మీరు ప్రబు ఆతి యేసుక్రీస్తు లెకెండ మండ్రు. మీ ఒడోల్లి సెఇ ఆసెన వజ కిజి సర్ల ఆదెక్ ఇజి ఒడోబిజి మంజిని మన్నుదాన్ మన్నాట్.

14

అనుమానం ఆని నమ్మిత్తికార్ వందిక్

1 ఇని ఇనికెక్ కిదెక్ దేవుణ సరి సీనాండ్రో ఇజి అనుమానం ఆని నమ్మిత్తికార్ మనార్. వారు నమ్మిత్తి దిన్నివందిక్ పూర్తి అర్థం కిఇకార్ గాని వరిక్ డగ్రు కిదు. గాని నమ్మిత్తికార్ ఇని ఇనికెక్ కిదెక్ ఆనాద్ ఇజి ఒడోబిని దన్నిలోఇ తేడ వానివలె వరివెట వాదిస్సాట్.

2 విజు తిండ్రెక్ ఆనాద్ ఇజి ఒరెన్ నమ్మిజినాన్. మరి ఒరెన్ కునెన్ తింజినాన్. ఎందానిక్ ఇహిజ, వారు నమ్మిత్తి దిన్నివందిక్ పూర్తి అర్థం ఇంక కివీన్.

3 విజు తినికాన్, విజు తినిఇ వన్నిక్ తక్కుదికాన్ ఇజి సుడెదెక్ ఆవీద్. విజు తిండ్రెక్ ఆవీద్ ఇజి ఒడోబినికాన్ విజు తినికార్ తప్పు కిజినార్ ఇజి వెప్పాక్ ఆవీద్. ఎందానిక్ ఇహిజ దేవుణ వరిక్ డగ్రు కిత్త మనాన్.

4 మరి ఒరెన్ ఎజమానిక్ వన్ని పణిమణిసి కినికెక్ సరియాతికెన్సో, ఆఇకెన్సో ఇజి వెప్పాక్ తగిత్తికార్ మీరు ఆఇదెర్. వాండ్రు కిని పణిక్ నెగ్గికెన్సో సెఇకెన్సో ఇజి వన్ని ఎజమానినె వెప్పాన్. అయావజినె నమ్మిత్తికాన్ కినిపణిజ వందిక్ దేవుణనె తీర్పు కిజి సరిఆతికదో ఆవీదో ఇజి వెప్పాన్. ఎందానిక్ ఇహిజ సరిఆతిక కిదెక్ దేవుణ వన్నిక్ సత్తు సినాన్లె.

* 13:9 13:9 నిళ్లు 20:13-15,17.

5 నెగ్గెండార్, ఉండ్రీ రోజు మహి రోస్కాళ్ ఇంక నెగ్గి రోజు ఇజ ఒడోబిజనార్. మరి ఒరెన్ విజు రోస్కు ఉండ్రె లెకెండో సుడోజనాన్. ఒరెన్ ఒరెన్ వన్నెజ్ వాండ్రె వన్ని మన్నుదు ఒడోబినిక ఎండొనిజ్ ఆహు ఒడోబిజనాన్ ఇజ బోటాజ్ నెసి తిరమానం కిడెజ్వెలె.

6 ఉండ్రీ రోజు నెగ్గి రోజు ఇజ ఇడ్వికాన్ అక్క ప్రబు వందిజ్ ఇడ్డినాన్. విజు తినికాన్ ప్రబుజ్ వమదనమ్కు వెప్పి ప్రబుజ్ గవరం సిడెజ్ ఇజ తింజనాన్. విజు తినికాన్ తిని వనక వందిజ్ ప్రబుజ్ వందనమ్కు వెప్పి ప్రబుజ్ గవరం సిడెజ్ ఇజ విజు తిన్ఎండ మంజినాన్.

7 మా లొఇ ఎయెరబా వన్నెజె సర్ద కిబిస్తెజ్ ఇజ బత్తిఎన్. వన్నె వందిజె సర్ద కిబిస్తెజ్ ఇజ సాఎన్.

8 ఎండొనిజ్ ఇహిజ మాటు బత్తినివెలె ప్రబుజ్ ఇస్టం కిబిస్సి లెకెండో బత్తిడెజ్. సానివల ప్రబుజ్ ఇస్టం కిబిస్సి లెకెండో సాడెజ్వలె. అందెజె మాటు బత్తితిజ్బా సాతిజ్బా ప్రబుజ్ సిందితికాబి.

9 దినివందిజె సాతి వరిజ్ని బత్తిని వరిజ్ విజెరిజ్ ప్రబు లెకెండో మండ్రెజ్ క్రిస్తు సాజ మర్రి బత్తితాన్.

10 అహిజ, ఎయెరబా మరి ఒరెన్ వన్నెజ్ తీర్పు తీరిస్తెజ్ అవద్. ఎయెరబా తకుదికాన్ ఇజ సుడోడెజ్ అవద్. ఎండొనిజ్ ఇహిజ మాటు విజెబి తప్పు కితికాబో, సరి ఆతిక కితికాబో ఇజ దేవుణు తీర్పు కిడెజ్ వన్ని ఎర్దు నిల్వాజ్.

11 దినివందిజ్ మాటు ఎలాగ నెసినాబ్ ఇహిజ, ప్రబు వెప్తి మాటెజ్ ఈహు రాస్త మనాద్. ఇనిక ఇహిజ, “నాను ఒద్దె నిజం వెప్పిన, నానె దేవుణు ఇజ లోకుర్ విజెరి నా ఎర్దు ముణుకుజ్ ఊర్వార్. నానె దేవుణు ఇజ లోకుర్ విజెరి ఎర్దు వెహ్సార్”.

12 అహిజ, ఒరెన్ ఒరెన్ కిత్తి దన్నివందిజ్ దేవుణు ఎర్దు లెక్క ఒవజెప్తెజ్ వలె. దేవుణు తీర్పు తీరిస్సాన్.

13 అందెజె అఇవరిజ్ తీర్పు తీరిసినిక డిసెసిసినాబ్. అక్కాదె అఎండ, మరి ఒరెన్ నమ్మిత్తి వన్నెజ్ తప్పు సరిదు నడిసెసిని ఇనికబా కిడెజ్ అవద్ ఇజ మీ మన్నుదు ఒప్పుకోండు.

14 నాను యేనుప్రబు వెట కూడితిజ్ ఉండ్రీ నిజం నెసిన. ఇనిక ఇహిజ, తిండ్రెజ్ అవద్ ఇజ దేవుణు వెప్తి తిండి ఇనికబా సిల్దెద్. గాని ఇనికాదె ఉండ్రీ తినిక అవద్ ఇజ ఎయెరబా ఒడోబిత్తిజ అక్క వాండ్రు తినిక తప్పు.

15 నీను ఇనికదె ఉండ్రీ తిని దన్నిదాన్ మరి ఒరెన్ నమ్మిత్తికాన్ మన్నుదు బాద ఆతిజ నీను వన్నెమున్ను ప్రేమ తోరిక. నీను తినిదన్నిదటాన్ మరి ఒరెన్ నమ్మిత్తి వన్ని నమకమ్దిజ్ పాడు కిమా.

16 నెగ్గెకెజ్ ఇజ ఒడోబిజ నీను కినికెజ్, మరి ఒరెన్ నమ్మిత్తి వన్ని నమ్మిత్తి పాపం కిబిస్తెజ్ తగితికెజ్ ఇహిజ అక్కెజ్ నెఇకెజ్ ఇజ వారు వెహ్సార్. అందెజె నెగ్గెక ఇహిజ్బా కిమా.

17 దేవుణు ఎలుబడి కినిదన్నెజ్ లోజెజి మండ్రెజ్ ఇహిజ, ఇనికెజ్ తిండ్రెజ్ ఉండ్రెజ్ ఇజ రూలుజ్ అఉ. గాని దేవుణు ఎలుబడిదిజ్ ఎలాగ లోజెదిజ్ ఇహిజ, అత్తు సత్తుదాన్ దేవుణుదిజ్ ఇస్టం అతి వజ కిడెజ్, లోకుర్ వెట సమదనమ్దాన్ మండ్రెజ్, మన్ను లొఇ సర్ద నిండ్రెజి మండ్రెజ్.

18 యా లెకెండో క్రిస్తుజ్ లోజెనికాన్ దేవుణుదిజ్ ఇస్టం కిబిస్సాన్. లోకుర్ వన్నెజ్ నెగ్గికాన్ ఇజ వెహ్సార్.

19 అందెజె మాటు ఒరెన్ మరి ఒరెన్ వన్నివెట సమదనమ్దాన్ మండ్రెజ్ సుడోడెజ్ వలె. మాటు ఒరెన్ మరి ఒరెన్ వన్నెజ్ నమకమ్దు నత్తు కిబిస్తెజ్ సుడోడెజ్ వలె.

20 ఇని తిండిబా తిండ్రెజ్ అనాద్ ఇజ ఒడోబిజ, దేవుణు కిత్తి పణిజ్ పాడో కిమా దేవుణు సుడోతిజ్ విజు రకమది బోజనమ్కుబా తిండ్రెజ్ అనికెజ్ గాని, నీను తినిక, తిండ్రెజ్ అఇకెబో ఇజ మరిఒరెన్ వన్నెజ్ తప్పు కిబిస్తిజ అక్క తినిక తప్పునె.

21 కండ తింజ గాని ద్రాక్క కల్లు ఉణిజి గాని, మరి నన్నిపణిజ్ ఇనికెజ్ గాని కిత్తిజ అక్క మరి ఒరెన్ నమ్మిత్తి వన్నెజ్ తప్పు కిబిస్తెజ్ కూడితిజ అక్కెజ్ డిసెస్సికాదె నెగ్గెక.

22 నిన్ని నజతిజ వందిజ్ నీను సమినికెజ్ నీను అఇవరిజ్ వెప్తెజ్ పోని. నిన్ని నజతిజ్ నీనుని దేవుణు నెస్తిజ అనె. ఉండ్రీ పణికిత్తి వెనుక, సరి ఆతిక కితానో, సిలిజ తప్పు కితానో ఇజ అనుమానం అఎండ మహిజ నీను దేవుణుబాణిజ్ సర్ద తసిని.

23 గాని ఉండ్రీ తినిక దేవుణు ఎర్దు సరిఆతికదో అవద్ ఇజ అనుమానం అనికాన్, అక్క తిహిజ తప్పు కిత్తాన్ ఇజ తిర్పు వానాద్. ఎండొనిజ్ ఇహిజ, తిండ్రెజ్ అఇక ఇజ ఇడ్డిక వాండ్రు తిహాన్. మాటు ఇనిక కిత్తిజ్బా దేవుణు ఎర్దు సరి ఆతిక కిత ఇజ నమకం సిల్లిజ అక తప్పునె.

15

1 ఇనిఇనికెళ్ల సరిఅతికెళ్ల కిదెళ్ల అనె ఇజి మన్నుదు బాగ నెసిని నమ్మిత్తికాట్ అతి మాటు మజి ఇస్టం అతికెళ్ల ఉండ్రెని కిజి మండ్రెళ్ల అవద్. గాని అనుమానం అతివరిళ్ల మాటు బరిస్టెళ్ల వలె.

2 మరి ఒరెన్ నమకమ్దు పిరినివందిళ్ల మా లొఇ ఒరెన్ ఒరెన్ వన్నిళ్ల నెగ్గికెళ్ల కిజి స్టర్ కిబిస్టెళ్ల.

3 క్రీస్తు కిత్తి లెకెండ్ మాటు కినాట్. క్రీస్తు వన్ని స్టర్ల ఉండ్రె వందిళ్లన తొంండ దేవుణుదిళ్ల ఇస్టం అతిలెకెండ్ కిత్తాన్. క్రీస్తు పుస్తకమ్దు రాస్తి లెకెండ్, "లోకుర్ నిజి నింద కిత్తివెలె, అయ నింద నజి వెస్తా లెకెండ్", ఇజి క్రీస్తు దేవుణుదిళ్ల వెహ్సన్.

4 దేవుణు మాటుదు ముందాలొ రాస్తి మన్నికెళ్ల విజా మజి నెస్సిస్టెజె రాసె అత మనాద్. ఎందానిళ్ల ఇహిజ, మాటు ఓర్పుదాన్ మంజి దేవుణు మాటెళ్ల మజి ఉసార్ కిబిసి, మాటు అసదాన్ ఎద్రు సుడేజి మండ్రెళ్ల వలె.

5-6 మజి ఓర్పుని ఉసార్ కిబిస్సిక దేవుణు ఉండ్రె మన్ను అజి మండ్రెళ్ల సాయం కిపిన్. ఇహిజ యేసు క్రీస్తు వజి మండ్రు. నస్తివలె మా ప్రబు అతి యేసు క్రీస్తుళ్ల బుబ్బు అతి దేవుణుదిళ్ల ఉండ్రె మన్ను అజి ఉండ్రె లెకెండ్ పొగడిదెళ్ల అనిదెర్.

7 అహిజ క్రీస్తు మిజి డర్గు కిత్తి లెకెండ్ మీరు ఒరెన్ మరి ఒరెన్ వన్నిళ్ల డర్గు కిదు. ఎందానిళ్ల ఇహిజ అహు కిత్తిజి లోకుర్ దేవుణుదిళ్ల పొగడినార్.

8 నాను ఇనిక వెహ్సన్ ఇహిజ, దేవుణు నమ్మిదెళ్ల తగ్గికాన్ ఇజి, ఇహిజి వాండ్రు, మాటు యూదురి అనిగొగొరికెళ్ల కిత్తి ఒటు లెకెండ్ నిజం కినాన్ ఇజి తొరిస్టెళ్ల ఇజి క్రీస్తు యూదురిళ్ల పణి మణిసి అత మహ్సన్.

9 అక్కాదె అవదు, యూదురు అజజాతిదికార్ దేవుణు తొరిస్తి గొప్ప కనికారం వందిళ్ల దేవుణుదిళ్ల పొగడిదెళ్ల ఇజిబా క్రీస్తు యూదురిళ్ల పణిమణిసి అతమహ్సన్. ఎలాగ ఇహిజ, "అందెజె నాను యూదురు అజి లోకుర్ నడిమి నిజి పొగడిజి. నిజి పొగడిజి పాటెళ్ల పార్కు", ఇజి రాస్తి మన్నె.

10-11 ఈహుబా రాస్తి మనాద్, "యూదురు అజజాతిదికార్ అతికిదెరా మీరు దేవుణు లోకుర్ వెట స్టర్ల ఆదు"*. మరి ఉండ్రెబాన్ ఈహు రాస్తి మనాద్. "యూదురు అజజాతికార్ అతికిదెరా, మీరు ప్రబుళ్ల పొగడిదు. విజెరె లోకుర్ వన్నిళ్ల పొగడిదు"*

12 మరి యెనయ ప్రవక్త ఈహె వెహ్సానాన్, "యెస్సుయి తెగాదికాన్ ఒరెన్ వానాలె. యూదురు అజవరిళ్ల ఏలుబడి కినికాన్ వానాన్. వన్నిజె వారు అసదాన్ ఎద్రు సుడేజి మంజినార్"*.

13 ఎద్రు సుడేజి మండ్రెళ్ల మిజి అటిసిని దేవుణుదిళ్ల, మీరు నమ్మిజి మంజినిదెర్ కాక మీ లొఇ స్టర్లని సమదనం నిండ్రెపిన్. ఎందానిళ్ల ఇహిజ, అసదాన్ ఎద్రు సుడేజి మంజిని లొఇ దేవుణు అత్తు నత్తు మిజి మరి నండొ పిరిప్వెళ్ల ఇజి.

దేవుణు సువార్ల యూదురు అజకార్బా వెంజినార్

14 నమ్మిత్తి తంబెరిజాండె, మీరు ఒరెన్ మరి ఒరెన్ వెట నెగెండ మంజినిదెర్ ఇజి నాను నెసిన్. మీరు బాగ నెస్టెళ్ల ఇజి దేవుణు సుడేజినికెళ్ల విజా మీరు నెస్సిదెర్ ఇజి నాను నెసిన్. ఒరెన్ మరి ఒరెన్ వన్నిళ్ల బుద్ది వెహ్సా నెస్సిస్టెళ్ల అట్టిదెర్ ఇజి నాను మీ వందిళ్ల నిజం నెసిన్.

15-16 గాని నాను యా ఉత్తమ్దు నెగం సజతిజి వందిళ్ల మిజి ఎత్తు కిబిస్సివలె దయరమ్దాన్ వెహ్సా. ఎందానిళ్ల ఇహిజ, యేసుక్రీస్తుళ్ల ఉండ్రె పణిమణి లెకెండ్ యూదురు అజి జాతిది వరి నడిమి మండ్రెళ్ల ఇజిని దేవుణు వన్ని గొప్ప దయాదర్శం నా మున్ను, తొరిస్టాన్. దేవుణు అత్తు వరిళ్ల కేటకిజి దేవుణుదిళ్ల నీదెళ్ల తగితి ఉండ్రె పూజి లెకెండ్ వరిళ్ల తయార్ కినికాదె నా పణి. దన్నివందిజి ఒరెన్ పుజెరి లెకెండ్ నాను వరిళ్ల సువార్ల వెహ్సాన.

17 అందెజె, నాను క్రీస్తుయేసు వెట కూడేజి మన్నిళ్ల, దేవుణుదిళ్ల కిని సేవ పణివందిళ్ల పొగడిజి.

18 యూదురు అజకార్ దేవుణుదిళ్ల లొజిని వందిళ్ల క్రీస్తు నా వెట కిత్తి పణిళ్ల ఉండ్రె వందిజె నాను దయరమ్దాన్ వెహ్సాన. నాను నా మాటెజాణిళ్ల, నా పణిజాణిళ్ల దేవుణుదిళ్ల లొజిదెళ్ల వరిళ్ల నడపిస్ట.

* 15:3 15:3 క్రీస్తు 69:9. * 15:9 15:9 2సము 22:50; క్రీస్తు 18:49. * 15:10-11 15:10-11 ద్విత్తి 32:43.
* 15:10-11 15:10-11 క్రీస్తు 117:1. * 15:12 15:12 యెనయ 11:10.

19 బహుశా పనికిరానిదేవుని దేవుని అత్యున్నతంగా నడపిస్తా. ఆహా యెరూసలేం పట్టు మొదటి అయిన నుట్టు పడక మన్ని పట్టుకు విజయ ఇలాంటి ఇని పట్టు దాక విజయ బాడ్డికి సాన్ని నాను క్రీస్తు వందీక నువార వూర్తి సాటిస్తా మన్న.

20 క్రీస్తు వందీక సాటి ఆ ఇ బానె నువార సాటిస్తా ఇజనె నజి ఉండ్రీ ఆన. ఎందానిక ఇహిజ, మరి ఒరెన్ నువార కినిబాన్ సాన్ని వన్ని పణి లాగ్గెజ్ అవద్ ఇజనె నా మన్న.

21 గాని నాను ఇనిక కిత్ర ఇహిజ, దేవుని మాటదు రాస్తిమన్ని లెకెండ్ కిత్ర, “వన్నివందీక ఎనిజ్ బా వెహె ఆఇకార్ వన్నివందీక నిజం అతిక సూణార్. వన్నివందీక ఎనిజ్ బా వెహె ఆఇకార్ వన్నివందీక అర్థం కిసార్”.

22 యా పణికిజ మహిజ్ నాను మీబాన్ వాదెజ్ నండో అడ్డు అత మహద్.

పవులు రోమవట్టణం సాండ్రెజ్ ఒడోబిజనాన్

23-24 గాని ఏలు యా ప్రాంతమకాజ్ మన్ని పణిజ్ వీజితె. నండో పంటిజ్ అన్నిబా మీబాన్ వాజి మిజి నుండోదెజ్ ఆన అతిజ్ బా, ఏలు వాదెజ్ ఎర్దు నుండోజన. నాను స్థాయిను దేసం సాని సరిదాన్, మిజి వాజి నుండోజి నణం మీ వెట మంజి సర్ద అదెజ్ ఆన అజిన. బాణిజ్ సానివెలె మీబాణిజ్ సాయం దోహకైజ్ ఇజి నుండోజిన.

25 గాని, ఏలు యెరూసలేమదు మన్ని దేవునిదిక్ నమ్మిత్తి వరిజ్ డబ్బు ఒత్తెజ్ యెరూసలేమదు సాన్నిన.

26 ఎలాగ ఇహిజ యెరూసలేమదు మన్ని నమ్మిత్తి వరి లొక డబ్బు సిల్లివరిజ్ సంద సీదెజ్ మాసిదోనియ ప్రాంతమదు మన్ని నమ్మిత్తికార్ని ఆకాయ ప్రాంతమదు మన్ని నమ్మిత్తికార్ వారె ఆజి ఇష్టం ఆతార్.

27 ఒజ, వారు సీదెజ్ ఇష్టం ఆతారె సీజినార్. నిజమె, యూదురు ఆఇకార్ యెరూసలేమదు మన్ని దేవుని లోకురిజ్ సాయం కిదెజ్. ఎందానిక ఇహిజ, యూదురు ఆఇవరిజ్ ఉండ్రీ అప్పు మనాద్. ఎలాగ ఇహిజ, దేవుని యూదురిజ్ సిల్లి దీవనమ్మక ఆఇ జాతిదివరిజ్ బాట వాతాద్. అందెజె యూదురిజ్ తక్కు అతిక యూదురు ఆఇకార్ వరిజ్ మన్నివనక లొకహాన్ బాట కిజి సీదెజ్.

28 యా పణి వీజిత ఇహిజ, వరిజ్ సీదెజ్ మన్ని డబ్బు వూర్తి వరిజ్ తవ్వెండ సిల్లి వెనుక నాను యెరూసలేం పట్టుమదాన్ స్థాయిను సాని సరిదు మీబాన్ వానా.

29 నాను మీబాన్ వానివలె క్రీస్తుబాణిజ్ మజి విజెరిజ్ గొప్ప పెరి దీవనమ్మక దోహకై ఇజి నాను నెసిన.

30 ఏలు తంబెరిజాండె, ప్రలు అతి యెనుక్రీస్తు మున్ను మన్ని నమ్మకం మన్నిదన్నివందీక, దేవుని అత్యు మిజి సిల్లి దన్నివందీక, మీరు నా వందీక గట్టిజి పార్దనం కిదు ఇజి నాను బతిమాల్లిన.

31 యూదయ దేసమదు యెనుప్రలుజ్ నమ్మిత్తి యూదురు బాణిజ్ నజి ఇని ప్రమాదం రెవండ మండ్రెజ్ పార్దనం కిదు.

32 మరి దేవుని సిత్రం అతిజి నాను సర్దదాన్ వాజి మీబాన్ రోమదెజ్ ఇజిబా పార్దనం కిదు.

33 మజి నమదనం సీని దేవుని మిజి తోడు మనీన్.

16

రోమ పట్టుమదు సెగొండార్ నమ్మిత్తి వరిజ్ పవులు వందనమ్మక వెహిసాన్.

1 కెక్రెయూదు మన్ని దేవుని నజమదు సేవ కిదెజ్ ఏర్పాటు అతి పిబె ఇని మా బీబి వందీక నాను వెహిసాన్. అది గొప్ప నెగ్గికాద్.

2 దేవునిదిక్ నమ్మిత్తి దన్నిజ్, నమ్మిత్తికార్ కిదెజ్ తగితి లెకెండ్ డగ్గు కిదు. దన్నిజ్ కావాస్తిక ఇనికబా మీబాన్ మహిజ, మీబాణిజ్ సీజి మండ్రు. ఎందానిక ఇహిజ, అది నండోండారిజ్ మరి నజిబా సాయం కిజి మహద్.

3 క్రీస్తు వందీక మా వెట కూడోజి పణికిత్తి మహి ప్రీస్తిలాదిజ్ని దన్ని మాసి అకులాదిజ్ బా మా వందనమ్మక వెహ్టా.

☆ 15:21 15:21 యెసయ 52:15.

4 వారు నా పాణం వందిజ్ వరి పాణమ్కు సిదెజ్ తయార్ ఆతికార్. నాను ఒరెనె ఆవి, యూదురు ఆఇవరి సజమ్కు విజు వారు కిత్తి దన్ని వందిజ్ వందనమ్కు వెప్పొనార్.

5 మరి వరి ఇండ్రొ మన్ని నమ్మిత్తివరిజ్బా వందనమ్కు వెప్తూ ఆసియ ప్రాంతమ్దు తొలిత క్రీస్తు మున్ను నమకు ఇడ్డి, నాను ప్రేమిసిని ఎపాయినెటుజ్ వందనమ్కు వెప్తూ.

6 మీ వందిజ్ నండొ కన్జబాడేజి పణి కిత్తి మరియెజ్ వందనమ్కు.

7 నావెట జేలిదు మహి, నా సొంత లోకుర్ యూదురు ఆతి అండ్రొనికుని, యూనియాకు వందనమ్కు వెప్పొన. వారు అప్పొస్తురు నడివి పెరికార్ ఇజి విజేరె నెసినార్. నజి ఇంక ముందాల్ వారు క్రీస్తు లోకు ఆతికార్.

8 ప్రబు వందిజ్ నాను నండొ ప్రేమిసిని అంప్లియతుజ్ వందనమ్కు.

9 క్రీస్తు వందిజ్ మా వెట పణి కిత్తి ఉర్బానుజ్ వందనమ్కు. నాను నండొ ప్రేమిసిని స్టాకుజ్ వందనమ్కు.

10 క్రీస్తు మున్ను నిజమాతి నమకు ఇడ్డాన్ ఇజి రుజుప్ కిత్తి మన్ని అవెలుజ్ వందనమ్కు. అరిస్తోబులు ఇండ్రొణి వరిజ్ వందనమ్కు.

11 నా సొంత లోకు యూద వాండ్రు ఆతి హెరొదియెనుజ్ వందనమ్కు.

నర్సిను ఇండ్రొణి వరి లోఇ ప్రబు ఆతి క్రీస్తుజ్ సెందితి వరిజ్ వందనమ్కు.

12 క్రీస్తు వందిజ్ కన్జబాడేజి పణికినికెజ్ ఆతి త్రుపయానుజ్ని త్రపొసానుజ్ వందనమ్కు.

నాను నండొ ప్రేమిసిని పెర్సినుజ్ వందనమ్కు. అది ప్రబు వందిజ్ నండొ కన్జబాడేజి పణి కితామహద్.

13 ప్రబు వందిజ్ గొప్ప నెగ్గెకాన్ ఇజి కేట ఆతి రుపనుజ్ వందనమ్కు. వన్ని అయ్సిజ్ వందనమ్కు. అది నజిబా యాయ పజనె.

14 అనున్క్రీస్తుజ్, ఫ్లెగొముజ్, హెర్మెకునుజ్, పత్రోబుజ్, హెర్మెకునుజ్, వరి వెట మన్ని నమ్మితి వరిజ్ వందనమ్కు.

15 పిలోగునుజ్, యూలియాకుజ్, నెర్యాతునుజ్, వన్ని తజిసిజ్, ఒలంపాకుజ్ వరివెట మన్ని నమ్మితి వరిజ్ వందనమ్కు.

16 నమ్మితి వరిజ్ తగితి లెకెండ ఒరెన్ మరి ఒరెన్ వన్నిజ్ ముదు కిజి వందనమ్కు వెప్తూ. యా బాడ్డిదు క్రీస్తుజ్ నమ్మితి సజమ్కాణికార్ మిజి వందనమ్కు వెప్పొనార్.

17 నమ్మితి తంబెరిజాండె, మీరు నెన్సి మన్ని బోదదిజ్ డిస్సిసి దన్నిజ్ వెత్రేకం ఆతి బోద నెన్సిసి ఆఇ గుంపుజ్ కిదెజ్ ఇజి వెప్పొకార్ మనార్. వరి వందిజ్ జాగర్త మండ్రు. నన్ని వరి బాణిజ్ దూరం మండ్రు ఇజి నాను బతిమాల్లి వెప్పొన.

18 నన్నికార్ మా ప్రబు ఆతి క్రీస్తుజ్ పణి కినికార్ ఆవిర్. గాని వారు వరిజ్ ఇన్జం ఆతి దన్నివందిజి బత్తిజినార్. నెగ్గి మాటెజ్ వెప్పొవజి బడాఱియి మాటెజ్ వెప్పొ వీరు మొసెం కిజినార్. వారు సెఇలోకు ఇజి నెన్సికార్ వరి మాటెజాణ్ మొసెం కిజి ఆనార్.

19 మీరు దేవుణు మాటదిజ్ లొజిత్తి మన్నికార్ ఇజి విజేరె నెస్సార్. అండెజి మీ వందిజ్ నాను సర్ల ఆజిన. గాని మీరు నెగ్గెక ఇనిక ఇజి నెన్సి దన్నిలోఇ బుద్ధి కల్లిజి మండ్రు. సెఇ వనకవెట కూడేవిండ దన్నివందిజ్ కల్తెసిల్లెండ మండ్రు ఇజి నాను ఆస ఆజిన.

20 సమదనం సిని దేవుణు, సయ్యాను సత్తు పాడుఱికిజి వనిజ్ మీ కాల్యాజ్ అడగి బేగినె సిదులు మటిస్సాండ్రె ఇడ్డాన్. ప్రబు ఆతి యేసుబాణిజ్ దయాదర్శం మిజి తోడు మనిద్.

21 మా వెట కూడేజి పణికిని తిమోతి మిజి వందనమ్కు వెప్పొనాన్. నా సొంత లోకుర్ యూదురు ఆతి లూకియ, యాసోసు, సొసి పత్తు ఇనికార్ వందనమ్కు వెప్పొనార్.

22 పవులు వెప్పొ సిత్తిజ్ యా ఉత్తం రాసిని తెర్రియు ఇని నాను ప్రబు వందిజ్ వందనమ్కు వెప్పొన.

23 సజమ్దు కూడేజిని వరిజ్ విజేరిజ్ని నజిని నెగెండ సూణి గాయియు మిజి వందనమ్కు వెప్పొనాన్. యా పట్టుమ్దు పెర్సి డబ్బుజ్ లెక్క సుడేజి అస్సికాన్ ఎరస్తు, నమ్మిత్తికాన్ ఆతి క్వార్తును మిజి వందనమ్కు వెప్పొనార్.

24 మా ప్రభు ఆతి యేసు క్రీస్తుబాణిజ్ వన్ని దయాదర్శం మీబాన్ మనిద్.

25-26 మీ నమకమ్దు మిజి గటిజ నిల్పెజ్ దేవుణు అట్టాన్. నాను యేసుప్రభు వందిజ్ సువార్త సాటిసినివలె యాకదె వెహ్సిన. నండొ కాలం దేవుణు డాప్తి ఇడ్డి మహి నిజమాతి మాట ఏలు దేవుణు వెహ్తా మనాన్. ఏలు అయ నిజమాతి సువార్త మాటు సాటిస్తిజ్ ప్రవక్తరు రాస్తి మాటదానె క్రీస్తు వందిజ్ విజెరె నెసినార్. ఎలాకాలం మన్ని దేవుణు ఆగ్గుదాన్ యా సువార్త విజు లోకాజ్ నెస్సిసినాన్. ఎందానిజ్ ఇహొజ విజెరె లోకుర్ నమ్మిజి లోజీదెజ్ ఇజి.

27 విజు వనకాజ్ నెసిని ఒరెండ్రె దేవుణుదిజ్, క్రీస్తుయేసుదాన్ ఎలాకాలం లోకుర్ పొగడిజి మనిర్. ఆమెన్.

అపొస్తుడు ఆతి పవులు కొరింతి పట్టమదు మని నమ్మిత్తి వరి సజమదిజ్ రాస్తి మొదోహి ఉత్తం

నెల్వ కిబిసినిక

ఇక్క అపొస్తుడు ఆతి పవులు కొరింతి పట్టమదు మన్ని దేవుణు సజమదిజ్ రాస్తి మొదోహి ఉత్తం. పవులున ఇక్క రాస్తికాన్ ఇజి యా ఉత్తమనె రుజుప్ సీజినాద్. 1:1,16,21. దేవుణు సజమదు మన్ని విజు సజతిజ్ వందిజ్, నమ్మిత్తి వరి నడిమి మన్ని గొడబెజ్ వందిజ్, దేవుణుదిజ్ పొగ్డిజి మాడిన్ని వందిజ్, దేవుణు పణి వందిజ్ సీని వందిజ్, నమ్మిత్తికార్ జటు ఆజిని వందిజ్, సజమదు మన్ని బోద్క్ ఎలాగ మండ్రెజ్ ప్రబు ఏర్పాటు కిత్తి బోజనం వందిజ్, పెండ్లి వందిజ్, మరి యాలెకెండ మన్ని నండో సజతిజ్ వందిజ్ ఎలాగ కిదెజ్ ఇజి యా ఉత్తమదాన్ పవులు కొరింతి సజమది వరిజ్ వెప్పినాన్. యా ఉత్తమదు రాస్తిమన్ని సజతిజి వందిజ్ సుడోతిజి అయా కాలమదు మని సజమదిజ్నె ఆవండ యా కాలమదు మన్ని సజమకాజ్బా యాక ముకెలమాతి ఉండ్రి ఉత్తం. అక్కడె ఆవండ నమ్మిత్తి వన్నిజ్ మన్ని ప్రేమ వందిజ్, సాత్తికార్ మరజి నిజ్ని వందిజ్ రాస్తి సజతిజ్ ఎలాకాలమదు మన్ని నమ్మిత్తి వరి వందిజ్ రాస్తిక్కాదె. యా ఉత్తం యేసుక్రీస్తు సాజి మరజి నిజితి వనుక యాబ్బయ్ ఏడునో యాబ్బయ్ ఆరునో పంటిజ్ వెనుక రాసి ఆత్త మనాద్ ఇజి విజెరె నమ్మిజినార్. పవులుని వన్ని జటుదికార్ వారు రుండి సుట్టు, సువార్ సాటిన్జ్ సాస్తి మహివలె (A.D. 50) కొరింతి పట్టమదు అందితార్. డర్సు 18 నెల్లెజ్ మంజి సువార్ పణి కిజి మహిజ్ బాన్ దేవుణు సజం తయారాతాద్. (అపొస్తురు కిత్తి పణిజ్ 18:1-8). పవులు ఎవెను పట్టమదు మహివలె, బాణిజ్ యా ఉత్తం రాస్తపోక్తాన్. యా ఉత్తం నెగెండ నద్దొజి నెసి మహిజి దేవుణు సజం ఎలాగ మండ్రెజ్ ఇజి సజమదిజ్ నడిపిసిని వరిజ్, నమ్మిత్తి వరిజ్ నెగెండ అర్దమానాద్.

మొదోల్

- 1 దేవుణు ఇస్తుమాతి పజ, క్రీస్తుయేసుజ్ అపొస్తుడు లెకెండ, వాండ్రు కూక్తి మని పవులు ఇని నాను కొరింతి పట్టమదు మని దేవుణు సజమదిజ్ రాసిని ఉత్తం. మా తంబెరి ఆతి సాస్తినెను నా వెట మనాన్.
- 2 మీరు లోకమదు విజుబాన్ మని వరిజ్ని మజి ప్రబు ఆతి యేసుక్రీస్తు పేరు అసి పొగ్డిజి మాడిన్ని వరి వెట మీరుబా కూడ్లి మంజినిదెర్. అందెజె మీరు ప్రబు ఆతి యేసుక్రీస్తు వెట కూడిజి దేవుణు వందిజ్ కేట ఆతికిదెర్ని దేవుణుదిజ్ నెందితికిదెర్ ఆజి మండ్రెజ్ ఇజి కూకె ఆతి మనిదెర్.
- 3 మా బుబ్బాతి దేవుణుని ప్రబు ఆతి యేసు క్రీస్తు దయా దర్మమదాన్ మీరు నిపాతి మండ్రెజ్ సాయం కిప్పిన్.
- 4 క్రీస్తుయేసుదాన్ మిజి దేవుణు సితిమని వన్ని దయా దర్మం వందిజ్ నాను ఎప్పివలెబా మీ వందిజ్ దేవుణుదిజ్ వందనమకు వెప్పిన.
- 5 అపొజ, మీరు విజు సజతిజి వందిజ్, ఇహిజ, మీరు వర్గిజిని విజు మాటెజి లోఇ, మిజి మని గెణమదు, క్రీస్తు వెట మని సంమదమదు మీరు దేవుణు సీజిని మేలుజ్ విజు కలితి మని కిదెర్ ఆజినిదెర్.
- 6 ఎందనిజ్ ఇహిజ క్రీస్తు వందిజ్ మాపు వెప్తా మని సాస్యం వందిజ్ ఇని అనుమానమబా సిల్లెండ మీ మన్నుజి మీరు గటిజి గుర్తు అస్సిదెర్.
- 7 అందెజె, దేవుణు ఆత్మ సీజిని వరమకాజ్ లోఇ ఇని దనిజ్బా తకు సిల్లెండ, మా ప్రబు ఆతి యేసు క్రీస్తు తోరె అని దినం వందిజ్ గొప్ప ఆనదాన్ ఎర్దు సుడోజి మంజినిదెర్.
- 8 మా ప్రబు ఆతి క్రీస్తు యేసు తీర్పు సీని దినమదు మీరు ఇని తపు సిల్లెండ మనికిదెర్ ఇజి తోరె ఆదెజ్ దేవుణు మిజి నత్తు సీజి ఆకార్దాక కాప్ కినాన్లె.
- 9 వన్ని మురిన్ ఆతి, మా ప్రబుమాతి యేసుక్రీస్తు వెట కూడిజి మండ్రెజ్ మిజి కూక్తి మని దేవుణు నమ్మిదెజ్ తగ్గికాన్.

దేవుణు సజమదు నమ్మిత్తికార్ కేట ఆజని వందిజ్

10 తంబెరిజాండె, అందెజి మీ లోఱ ఇని కేట అవిండ మండ్రెజ్ ఇజి, మీరు విజెదెరె, ఒరెన్ మరి ఒరెన్ వెట ఉండ్రె మన్ను ఆజి మండ్రెజ్. మరి మీరు విజెదెరె ఒడెబినిబాన్, మీ మన్నుడు పూర్తి ఉండ్రె ఆజి మండ్రెజ్ ఇజి మా ప్రబు ఆతి యేసుక్రీస్తు బాణిజ్ నజి దొవ్కొత్తి అతికారమ్దాన్ నాను మిజి ఇతిమాల్లిన్.

11 ఎందనిజ్ ఇహిజు మా తంబెరిజాండె, మీ లోఱ గొడెబెజ్ మన్నె ఇజి క్లొయె ఇండ్రెణికార్ సెగొండార్ నజి కబ్బు తత మనార్.

12 నాను వెప్పొనిక ఇనిక ఇహిజు, ఒరెన్, “నాను పవులుజ్ సెందితికాన్”, ఇజినాన్గె, మరి ఒరెన్, “నాను అపొలుజ్ సెందితికన్”, ఇజినాన్గె. మరి ఒరెన్, “నాను కేపెజ్ సెందితికాన్”, ఇజినాన్గె, మరి ఒరెన్, “నాను క్రీస్తుజ్ సెందితికాన్”, ఇజి వెవె ఆజనిదెరెగె.

13 క్రీస్తు ఎయెరె వందిజ్ బాటెజ్ అవితాన్. పవులు ఇని నాను మీ వందిజ్ సిలువారు సావత. మీరు పవులు ఇని నా పేరుదాన్ బాప్తిసం లాగె ఆతిదెరె.

14 క్రీస్తుని గాయియుకు, వారు రిఎరె అవిండ మరి ఎయెరిజ్ బా నాను బాప్తిసం సివత. దన్ని వందిజ్ నాను దేవుణుదిజ్ వందనమకు వెప్పొన్.

15 అందెజి నా పేరుదాన్ మీరు బాప్తిసం లాగె ఆతిదెరె ఇజి వెప్పొజ్ ఎయెరిజ్ బా అక్కు సిల్లెది.

16 స్తేహాను ఇండ్రెణి వరిజ్ బా నాను బాప్తిసం సితమన. అక్కాదె అవిండ మరి ఎయెరిజ్ బా బాప్తిసం సిత్రిక నజి ఎత్తు సిల్లెది.

17 ఎందనిజ్ ఇహిజు, సువార్ వెప్పొజ్ నె క్రీస్తు నజి పొక్తాన్. గాని బాప్తిసం సీదిజ్ ఇజి నజి పొక్వితాన్. అందెజి క్రీస్తు సిలువారు సాతి సావుది సత్తు తకు ఆదెజ్ అవిదె ఇజి నాను సువార్ సాటిస్సిక యా లోకమ్ది లోకురి గెణమ్దాన్ కూడితి మాటెబాణిజ్ అవిదె.

దేవుణు గెణమ్ని సత్తు ఆతిమన్నె క్రీస్తు

18 నాసనమాజి సాని వరిజ్ క్రీస్తు సిలువారు సాతి వందిజ్ వెప్పొని సువార్ బుద్ది సిల్లి పణి కిత్తి వందిజ్ వెప్పొని మాటెజ్ లెకెండ తోరిజెనె గాని దేవుణు రక్కిన్తి మని మజి యాక దేవుణు సత్తు.

19 అందెజి, “వారు గెణం మనికార్గె! వరి గెణం నాను పొడెకెనాలె. వారు బుద్ది మనికార్గె! వరి బుద్ది నాను పణిదిజ్ రెండె కినాలె”, ఇజి దేవుణు మాటదు రాస్త మనార్.

20 బుద్ది మన్నికాన్ ఇజి ఒడెబితి మని వన్ని బుద్ది ఇనిక అత మనార్? గొప్ప సదువు మనికాన్ ఇజి ఒడెబితి మని వన్ని సదువు ఇనిక అత మనార్? యా లోకమ్ది పండిత్ ఇజి ఒడెబితి మనికాన్ ఇనిక అత మనార్? యా లోకమ్ది విజు గెణం దేవుణు బుద్ది సీలి పణి లెకెండ పణిదిజ్ రెజ లెకెండ కివితాండ్రా?

21 దేవుణు సీలి గెణమ్దాన్, లోకమ్దిజ్ సెందితి వరిజ్, వరి గెణమ్దాన్ దేవుణుదిజ్ నెన్జెజ్ అట్విండ మహిజ్, లోకమ్దిజ్ సెందితి వరిజ్ బుద్ది సిల్లి పణి ఇజి తోరె ఆతి సువార్ సాటిసి, నమ్మిజని వరిజ్ రక్కిన్జెజ్ దేవుణు ఇన్సం ఆతాన్.

22 యూదురు అతికార్ బమ్మాతి పణిజ్ కొరిజెనార్. గ్రీసు దేసెమ్దికార్ గెణమ్దిజ్ రెబాజెనార్.

23 గాని మాపు క్రీస్తు మా పాపమ్క వందిజ్ సిలువారు సాతి సావు వందిజ్ సువార్ సాటిసినావ్. ఇక్క యూదురిజ్ అడ్డు లెకెండ తోరిజెనె. మరి యూదురు ఆజి వరిజ్ బుద్ది సీలి పణి లెకెండ తోరిజెనె.

24 గాని యూదురిజ్ని యూదురు ఆజి వరిజ్, అహిజు రక్కిన్జెజ్ ఇజి దేవుణు కూక్తి మని విజెరిజ్, క్రీస్తు, దేవుణు సత్తు అత మనాన్. క్రీస్తు, దేవుణు గెణం అత మనాన్.

25 ఎందనిజ్ ఇహిజు, దేవుణు బుద్ది సీలి పణి ఇజి లోకురె ఒడెబినిక లోకురి బుద్దిదిజ్ ఇంక బుద్ది మనిక. దేవుణు సత్తు సిల్లి పణి ఇజి లోకురె ఒడెబినిక లోకురి సత్తుదిజ్ ఇంక బలం మనిక.

26 తంబెరిజాండె, దేవుణు మిజి కూక్తి మహివలె మీరు ఎలాగ కూకె ఆతి మనిదెరె ఇజి ఒడెబిదు. లోకమ్దు మన్నికార్ ఒడెబిని లెకెండ ఇహిజు, మీ లోఱ బుద్ది మనికార్ లావు నండొండార్ సిల్లెరె, గొప్ప వారు లావు నండొండార్ సిల్లెరె, వెరి కుటుమ్దికార్ లావు నండొండార్ సిల్లెరె.

27 వారు బుద్ధి సిలికార్గ! గాని లోకమీదు మని బుద్ధిమని వరిజ్ సిగు కిదెజ్, దేవుణు బుద్ధి సిలి వన్నాజ్ ఎర్లిస్తాన్. వారు సత్తు సిలికార్గ! గాని లోకమీదు మని సత్తుమని వరిజ్ సిగు కిదెజ్ దేవుణు సత్తు సిలివనకాజ్ ఎర్లిస్తాన్.

28 యా లోకమీదు ఇనికాదొ అతిమని వన్నాజ్, అక్కెజ్ ఇనికెజ్ ఆడ ఇజి తోరిస్తెజ్ ఇజి ఏకం అడిగి మని వనకాజ్ ని ఇన్టం కిజ వన్నాజ్, ఇనికబా ఆజ వన్నాజ్ దేవుణు ఎర్లిస్తాన్.

29 అందెజి ఎయెన్బా దేవుణు ఎర్లు ఇనిదని వందిజ్ బా పోగ్డె; ఆదెజ్ ఆట్ ఎన్.

30 వన్ని వెటెనె మీరు మా వందిజ్ దేవుణు బాణిజ్ వాతి మని గెణమాతి మన్ని క్రీస్తుయేసు వెటె కూడిజి మంజినిదెర్. అహిజ, వన్ని వెటెనె మాటు నీతి నిజాయితి మనికాట్ ఆతాట్, దేవుణు వందిజ్ కేటె అతికాట్ ఆతాట్, విడువదల పొందితికాట్ ఆతాట్.

31 అందెజి దేవుణు మాటదు రాస్తి మని లెకెండ. “పోగ్డె; అనికాన్ ప్రబు కిత్తి వన్నా వందిజ్ పోగ్డె; ఆదెజ్ వలె”.

2

1 తంబెరిజాండె దేవుణు వందిజ్ సాస్యం మీ నడఃమి సాటిస్తెజ్ ఇజి మీ డర్లు నాను వాతివలె నెగెండ వర్లిదెజ్ అట్టి వన్ని లెకెండెనో, గొప్ప వెరి బుద్ధి మని వన్ని లెకెండెనో మీ డర్లు రెవెజ్.

2 అందెజి నాను మీ నడఃమి మహివెలె, యెనుక్రీస్తు వందిజ్ ని వాండ్రు సిలువాదు సాతి సాపు వందిజ్ నె ఆవండ మెరి ఇనికబా నెన్ ఇ వన్ని లెకెండె మండ్రెజ్ ఇజి నాను నిర్లం కిత.

3 నాను మీ నడఃమి వాతివలె నా సత్తు మున్ను ఆదారం ఆవండ, సత్తు సిల్లివవన్ని లెకెండె తియెల్ దాన్, ఎసోనో వణక్కి వాత.

4 నాను మీ వెటె వర్లితి మాట వెప్టామని సువార్త, లోకు బుద్ధిదాన్ కూడితి మని తియాని మాటెజాణిజ్ ఆవతాద్. గాని మిజ్ తోర్ ఆదెజ్ ఇజి దేవుణు ఆత్మ సత్తుదాన్ కిజిని పణిజాణిజె తోరిస్త మనాద్.

5 ఎందనిజ్ ఇహిజ, దేవుణు మున్ను మిజి మని నమకం లోకు బుద్ధి మున్ను ఆదారం ఆవండ, దేవుణు సత్తు మున్నునె ఆదారం ఆదెజ్ ఇజి.

దేవుణు ఆత్మ బాణిజ్ దొహ్ క్కి గెణం.

6 దేవుణు మున్ను మని నమకమీదు పిరితివరి నడఃమి బుద్ధిదాన్ కూడితి మని మాటెజాణిజ్ వర్లిజినావ్. గాని అక్క యా లోకమీదు మని యా తరమీది వరి బుద్ధి ఆవద్. మెరి సిల్లెండ ఆజి సొన్నిని యా లోకమీది అతికారిజ బుద్ధి ననికబా ఆవద్.

7 ఆక్కాదె ఆవండ, దేవుణుదిజ్ డాజితి మని గెణం వందిజ్ వర్లిజినావ్. డాపె అతి మహి యా గెణం, మాటుబా వన్నిజ్ మని గొప్ప గవీరమీదు కూడిజి మండ్రెజ్ ఇజి లోకం పుట్ ఎండ ముందాల్పా దేవుణు మా వందిజ్ కేటె కిత్తి ఇడ్డి మహిజ.

8 యా తరమీది అతికారిజ ఎయెరిజ్ బ యాక అర్లం కిదెజ్ అట్ ఎండాతార్. ఎందనిజ్ ఇహిజ, వారు అర్లం కిజి నెని మంజినిక ఇహిజ గొప్ప గవీరమీదిజ్ ప్రబు అతి వన్నిజ్ సిలువాదు డెయెజి సవ్ ఎతార్ మెరి.

9 అందెజి దేవుణు మాటదు రాస్తి మన్ని లెకెండె, “దేవుణు వన్నిజ్ ప్రేమిసిని వరి వందిజ్ ఇనికెజ్ తయార్ కిత ఇట్టామనాండ్రె ఇజి ఎయెర్ బా వరి కణకెజాణిజ్ సుడెదెజ్ సిల్లెద్, ఎయెర్ బా వరి గిబిజాణిజ్ వెండ్రెజ్ సిల్లెద్. ఎయెర్ బా వరి మన్నుదు ఎసెజ్ బా ఒడఃబిదెజ్ సిల్లెద్”.

10 గాని దేవుణు వన్ని ఆత్మదాన్ అయాకెజ్ మజి తెలియ కిత మనాన్. దేవుణు ఆత్మ విజు దనిజ్ రెబాజినాన్. దేవుణు లోక మని డాజితి మని సజతిజ్ బా రెబాజి తోరిసి నాన్

11 ఒరెన్ వన్ని మన్నుదు ఒడఃబినికెజ్ విజు వన్ని లోక మని వన్ని ఆత్మనె ఆవండ మెరి ఎయెర్ బా నెన్ ఎర్. అయా లెకెండెనె దేవుణు మన్నుదు మనికెజ్ వన్ని ఆత్మదిజ్ నె ఆవండ మెరి ఎయెరిజ్ బా తెలివెద్.

12 దేవుణు బాణిజ్ మజి సెడ్డినె సితిమని వన్నాజ్ అర్లం కిజి నెన్ జెజ్, మజి దొహ్ క్కి మని ఆత్మ లోకమీది వరి లెకెండె ఒడఃబిని నని ఆత్మ ఆవద్. దేవుణు బాణిజ్ వాతిమని దేవుణు ఆత్మనె మజి దొహ్ క్క మనాద్.

13 మాపు వర్గిజని యా మాటెజ్ లోకు బుద్దిదాన్ నెన్పిన్సి మాటెజ్ ఆఱు. గాని దేవుణు అత్తు నెన్పిన్సి మాటెజాణిజ్, దేవుణు అత్తుదిజ్ సెందితి నిజమాతి నజతిజ్, దేవుణు అత్తుదిజ్ సెందితి మాటెజాణిజ్ మాపు వర్గిజనావ్.

14 దేవుణు అత్తు సిలికాన్ దేవుణు అత్తుబాణిజ్ వాని నజతిజు డర్దు కివన్. ఎందనిజ్ ఇహిజు అయాకెజ్ వన్నిజు బుద్ది సిల్లి పణిజ్ లెకెండ్ తోరిజని. వన్యాజ్ అర్దుం కిదెజ్ ఇహిజు దేవుణు అత్తుదానె అర్దుం కిది ఆదెజ్. దేవుణు అత్తు వన్ని లోణ సిల్లితిజ్, వన్యాజ్ అర్దుం కిదెజ్ వాండ్రు అట్వన్.

15 దేవుణు అత్తు లోణ మనికాన్ విజు వన్యాజ్ అక్కెజ్ ఎలాగ మర్దికెజ్ ఇజు నెన్సిజ్ అట్వాన్. గాని వన్ని లోణ ఇనికెజ్ మన్నె ఇజు ఎయెంబా నెన్సిజ్ అట్వన్.

16 దేవుణు మాటదు రాసె ఆతి మని లెకెండ్, “ప్రబుజ్ బుద్ది వెన్సిజ్ ఇజు వన్ని మున్నుదు మనికెజ్ నెన్సిమనికాన్ ఎయెన్ మనాన్?”. గాని మజి క్రీస్తుజ్ మని నని మున్ను మన్నె.

3

నజమీదు నమ్మిత్తికార్ కేట అజని వందిజ్

1 తంబెరిజాండె, క్రీస్తుజ్ లోజిజు నడిజని వరి వెట వర్గిని లెకెండ్ నాను మీ వెట వర్గిదెజ్ అట్వత. గాని ఒణ్డెలీది ఆనెజ్ లోజిజు నడిజు వరివెట వర్గిని లెకెండ్ నాను మీ వెట వర్గిత. ఎందనిజ్ ఇహిజు, మీరు క్రీస్తు వెట కూడితి మహిదెర్ గాని క్రీస్తుజ్ సెందితి నజతిజ్ లోజిజని దని లోణ ఏలుబా మీరు లేత కొణ్డెర్ లెకెండ్ నె మనిదెర్.

2 లేత కొణ్డెర్ పాలు సీని లెకెండ్ ఇజురి నజతిజ్ నాను మిజి నెన్సిన్సు. పెరికార్ ఉణి మాముల్ బోజనం నని గటిమని ఇనికబా నాను మిజి నెన్సిన్వత. నిజమె ఏలుబా మీరు దనిజ్ తగ్గికిదెర్ ఆవెర్, మీరు లేత కొణ్డెర్ లెకెండ్ నె మనిదెర్.

3 ఏలుబా మీరు యేసుక్రీస్తుజ్ లోజిజు నడిజని వరి లెకెండ్ ఆఇదెర్. ఎందనిజ్ ఇహిజు మీ నడిమి గోస అనికెజ్, గొణ్డెజ్ మహిజ్ మీరు యేసుక్రీస్తుజ్ లోజిజు నడిజని వరి లెకెండ్ ఆఇదెర్. క్రీస్తు మున్ను నమకం మన్ ఇవలె లెకెండ్ నె మీరు విజు నజతిజ్ కిజనిదెర్.

4 ఎందనిజ్ ఇహిజు ఒరెన్, “నాను వవులుజ్ సెందితికాన్”, ఇజు, మరి ఒరెన్, “నాను అపొలుజ్ సెందితికాన్”, ఇజు మరి ఒరెన్, యాలెకెండ్ వెహ్నినివలె మీరు క్రీస్తు మున్ను నమకం ఇణ్డెజు మాముల్ లోకుర్ లెకెండ్ ఆఇదెర్?

5 అపొలు ఎయెన్? వవులు ఎయెన్? వహి పణి కినికారెగదె? ఒరెన్ ఒరెన్ వన్నిజ్ ప్రబు ఒవనప్పి లెకెండ్ వారు కిత్తి పణిజాణిజ్ మీరు దేవుణుదిజ్ నమ్మిత్తిదెర్.

6 నాను గింజు ఉణున్సు, అపొలు దనిజ్ ఏరు వడిన్సాన్, గాని దనిజ్ పిరిప్తికాన్ దేవుణునె.

7 అందెజె ఉణున్సికాన్ గాని ఏరు వడిన్సికాన్ గాని ఇనిక ఆవెర్. గాని దనిజ్ పిరిప్తికాన్ దేవుణు ఒరెండ్.

8 ఉణున్సి వన్నిజ్ నె ఏరు వడిన్సి వన్నిజ్ ఉండ్రె ఉదెనమన్ మహాద్. ఒరెన్ ఒరెన్ వన్నిజ్, వరి సొంత పణిదిజ్ తగితి జితం దొహ్కాన్.

9 మాపు దేవుణు వెట కూణ్డెజు పణి కినికావ్. మీరు దేవుణు మడిజ్ లెకెండ్ ఆతి మనిదెర్. దేవుణు ఇల్లు లెకెండ్ ఆతి మనిదెర్.

10 దేవుణు నా మున్ను తోరిన్సి మన్ని ద్రయా దర్మమదాన్, నెగెండ ఇల్లు తోహ్కెజ్ నెన్సివన్ని లెకెండ్ నాను పునాది పొక్త మన. మరి ఒరెన్ దని మున్ను ఇల్లు తోహ్నిని వన్ని లెకెండ్ తోహ్నినాన్. ఒరెన్ ఒరెన్ ఎలాగ దని మున్ను తోహ్నినాండ్రె ఇజు వాండ్రు జాగర్ల సుణ్డెజ్ వలె.

11 అహిజు పొక్తిమని పునాది ఆవిండ మరి ఉండ్రె పునాది పొక్తెజ్ ఎయెంబా అట్వన్.

12 ఒరెన్ యా పునాది మున్ను తోహ్నివలె బజారమదాన్ తోహ్నిన్సు, సిల్లిజు వెండిదాన్ తోహ్నిన్సు, సిల్లిజు నండ్ కరితి రంగు పణాణిజ్ తోహ్నిన్సు, సిల్లిజు మరాన్దాన్ తోహ్నిన్సు, సిల్లిజు గడిదాన్ తోహ్నిన్సు, సిల్లిజు అకుజాణిజ్ తోహ్నిన్సు.

13 ఒరెన్ ఒరెన్ కిత్తి పణిజ్ ఎలాగ మర్దిక ఇజు యేసుక్రీస్తు తీర్పు తీరిన్సి దినమీదు తోరి ఆనె. అయ పణిజ్ డాజ్ ఎండ తోర్పె. అయా పణిజ్ సిను వెటనె తోరి ఆనె. ఒరెన్ ఒరెన్ కిత్తి మని పణి ఎలాగ మర్దికాద్ ఇజు సినునె వరిన కినాద్.

14 ఒరెన్ అయ వునాది మున్ను తొప్పై మని పణి సిసుదిళ్ గలిసి నిల్చి మహిజ వాండ్రు జీతం లొనె ఆనాన్.

15 ఒరెన్ కిత్తి పణి సిసుదాన్ వెతిజ వన్నిళ్ నష్టం వానాద్. గాని వాండ్రు తప్పై ఆనాన్. గాని సిసుకొనెజ నడిమిహాన్ తప్పై ఆతి లెకెండ తప్పై ఆనాన్లె.

16 మీరు దేవుణు గుడిః అతికిదెర్ ఇజ మీరు నెన్ ఇదెరా? మరి దేవుణు అత్తు మీ లొఇ బత్తిజనాన్ ఇజ మీరు నెన్ ఇదెరా?

17 ఎయెన్ బా దేవుణు గుడిఃదిళ్ పాడెఃకిత్తిజ దేవుణు వన్నిళ్ పాడెఃకినాన్. ఎండనిజ ఇహిజ అయ గుడిః దేవుణుదిళ్ నెందితిక. అయ గుడిః అతి మనికిదెర్ మీరె.

18 మీజ మీరె మొసెం కిబె ఆదెజ్ ఆవెద్. మీ లొఇ ఎయెన్ బా యా తరమదిళ్ తగ్గి గెణం మనికాన్ వాండ్రె ఇజ ఒడిఃబిజ మహిజ, గెణం మనికాన్ ఆదెజ్ ఇజ వన్నిళ్ వాండ్రె యా లోకమది వజ బుద్ది సిలి వన్ని లెకెండ ఆపిన్.

19 ఎండనిజ ఇహిజ యా లోకమది గెణం దేవుణు ఎర్దు పణిదిళ్ రెఇకాదె. ఎండనిజ ఇహిజ, “గెణం మనికార్ ఇజ ఒడిఃబిని వరిజ్ దేవుణు వరి గెణమదాన్ ఒడిఃస్సాన్”, ఇజ దేవుణు మాటదు రాస్తా మనాద్.

20 మరి, “బుద్ది మని వరి ఆలోననమ్కు పణిదిళ్ రెఇకెజ్ ఇజ ప్రబు నెసి నాన్”, ఇజ దేవుణు మాటదు రాస్తా మనాద్.

21 అందెజ్ ఎయెన్ బా లోకు పేరు అని నాను వన్నిళ్ నెందితికాన్ ఇజ పొజిదెజ్ ఆవెద్. మీరు నెగెండ మండ్రెజ్ ఇజ విజా సజతిజ్ దేవుణు మిజి సిత మనాన్.

22 పప్పులు అతిజ్ బా, అపాలు అతిజ్ బా, కేప అతిజ్ బా మీరు నెగెండ మండ్రెజ్ ఇజ దేవుణు ఏర్పాటు కిత్తికావ్. లోకమదు మనికెజ్ విజా, పాణం అతిజ్ బా, సాపు అతిజ్ బా, యా కాలమదు జర్జినికెజ్ అతిజ్ బా, వాని కాలమదు జర్జిదిజ్ మనికెజ్ అతిజ్ బా విజా మీరు నెగెండ మండ్రెజ్ ఇజ దేవుణు సిలికెజ్.

23 మీరు క్రీస్తుజ్ నెందితికిదెర్. క్రీస్తు దేవుణుదిళ్ నెందితికాన్.

4

క్రీస్తుజ్ అపొస్తరు అతికార్

1 అందెజ్ క్రీస్తుజ్ పణి కినికార్ ఇజ లోకుర్ మజి సుడెదెజ్ వలె. దేవుణుది డాజితి మని సజతిజ్ లోకురిజ్ నెస్పిస్తెజ్ ఒవజెవె అతికార్ ఇజ వారు మజి సుడెదెజ్ వలె.

2 అక్కాదె ఆవెండ ఉండ్రె పణిదిజ్ ఒవజెవె అతి మనికాన్ అయ పణిదు నమ్మకమాతికాన్ ఇజ తోరె ఆదెజ్ వలె.

3 మీరు గాని లోకురి కోర్పుబగాని నజి ఒవజెవె అతి మని పణి నాను నెగెండ కిజినెన్ సిలెనె ఇజ సుడెఃజిని దనిజ్ నాను లస్యం కివె. నజి నానెబా అయ లెకెండ నా పణిదిజ్ సుడెఃదెజ్ సిల్లె.

4 నా గర్బం నజి గదెన్ ఎండ బాగెనె మనాద్. అయ లెకెండ మహిజ్ బ నాను ఇని తప్పై సిలికాన్ ఇజ వెహె ఆదెజ్ అట్వె. నజి తీర్పు సినికాన్ ప్రబునె.

5 అందెజ్ ఏర్పాటు కిత్తి మని గడియె రెండె ఇనిదనిజ్ బా తీర్పు తీరిస్తెజ్ ఆవెద్. ప్రబు వాని డాక కావ్ కిదెజ్. సీకటుదు డాజితి మని విజా తప్పై పణిజ్ వాండ్రు వెల్లి జాయదు తనాన్లె. లోకురి మున్నుదు మహి విజా ఉదెసమ్కాజ్ వెల్లి తనాన్లె. అయ్యావలె ఒరెన్ ఒరెన్ వన్నిళ్ వాండ్రు కిత్తి పణిదిజ్, తగ్గి లెకెండ దేవుణు బాణిజ్ పొగ్గెడెః ఆనాన్లె.

6 తంబెరిజాండె, “రాస్తి మహి దనిజ్ జవ డాట్టి సొండ్రెజ్ ఆవెద్”, ఇజ రాస్తి మని మాటదిజ్ అర్థం మీరు మజి సుడెఃజి నెస్సెజ్ వలె. యాలెకెండెనె నా వందిజ్ ని అపొలొ వందిజ్ నాను మిజ వెస్తా మహా. అయాలెకెండ మీరు ఒరెన్ వన్ని పేరు అని పొజిదెజ్ ఆవెద్.

7 మహి వరిజ్ ఇంక మిజి గొప్ప వెరికార్ కిత్తికాన్ ఎయెన్? మిజి కలిగితి మని బుద్దిని గెణం లొఇ దేవుణు బాణిజ్ దొహెక్తికెన్ ఆవెండ మరి ఇనికెజ్ మన్నె? అక్కెజ్ మిజి దేవుణు బాణిజ్ దొహెక్తి వెనుక, అక్కెజ్ దొహెక్తికెజ్ ఆఉ, అక్కెజ్ మీరు గణస్తి మని లెకెండ పొజిజినిదెర్.

8 ఏలు మీరు ఇనికబా తకు సిల్లెండ మిజి కావాలిస్తెకెజ్ విజా మనికిదెర్ అతిదెర్ గె! ఏలు మీరు ఆస్తి మనికిదెర్ అతిదెర్ గె! మజి డిఃస్తి సిలిదెర్ మీరు దేవుణు వెతు ఏలుబడిః కినికిదెర్ అతిదెర్ గె! ముపుబా మీ

వెట దేవుణు వెట ఏలుబడిః కినికావ్ ఆని లెకెండ మీరు నిజమె మీరు అజిమంజినిక ఇహిజ ఎసానో నెగెద్ ఇజి నాను ఎసానో కోరింజి.

9 ముజి అయా లెకెండ సిల్లెద్. జంతుజ వెట విద్దెం కిజి నుడఃజి మంజిని వరి ముందాల సాదెజ్ ఇజి సావుదిజ్ తగితి సిక్కు దోహాక్తి మని వరి లెకెండ దేవుణు ముజి అహొస్తురు లొఇ కడఃవేరిదికార్ లెకెండ కిత మనాన్ ఇజి నజి తోరిజినాద్. లోకమ్దు మనికార్ విజెరె, మరి దేవుణు దూతెజ్ విజు కణ్కు నవ్వంండ బేసిని లెకెండ మాపు ఇడః ఆత మనావ్ ఇజి నజి తోరిజినాద్.

10 మాపు క్రీస్తు వందిజ్ బుద్ది సిలికావ్ గాని మీరు క్రీస్తు లొఇ బుద్ది మనికిదెరిగి! మాపు నీరమ్మదికావ్ గి మీరు సత్తు మనికిదెరిగి! మీరు తగమాతికిదెరిగి మపు సిగు లాగె అతికావ్ గి!

11 ఏలు యా గడిఃయారుబా బజ ఏహ్మిదికావ్. గుడెజ్ తోహె అతికావ్. ముటిజాణిజ్ గుదె అతికావ్. మండ్రెజ్ ఇల్లుబా సిలికావ్.

12 మా సొంత కికాణిజ్ కణ్కుబాడఃజి పణి కినికావ్. ముజి సయివ్ సీని వరిజ్ మిజి నెగెండ మనిద్ ఇజి వెహ్మినావ్. ముజి హిమ్మెజ్ కినివలె అత్కెజ్ ఓరిసినావ్.

13 దూసె అనివలె సార్లిదాన్ వర్గిజినావ్. ఏలు యా గడిఃయారుబా మాపు యా లోకమ్దిజ్ కనర లెకెండ మనావ్. విజెరె ఎద్రు వెంటు లెకెండ మనావ్.

14 నాను ప్రేమిసిని నా కొడోరి ఇజి మిజి సారిసి సరిసి వెహ్మె లెకెండెనె యా మాటెజ్ రాసిన, గాని మిజి సిగు కిదెజ్ ఇజి ఆవద్.

15 క్రీస్తు వందిజ్ మిజి నూణికార్ పదివెయుజ్ లోకర్ మహిజ్బా, మిజి అహొస్రిరి సంఠెండార్ సిల్లెర్. ఎందనిజ్ ఇహిజ క్రీస్తుయేసు వందిజ్ నాను వెహ్మె సువార్దదాన్ నానె మిజి కాన్.

16 అందెజి నజి పోలిసి యేసుక్రీస్తుజ్ లోజిజి నడిఃదెజ్ ఇజి మిజి బతిమాల్లిన్.

17 దిని వందిజ్ ప్రబు ఎద్రు నమ్మకమాతికావ్ ఆతి, నాను ప్రేమిసిని నా మరిన్ ఆతి తిమోతిజ్ మీ డగ్రు పోక్కిన్. విజు బాడ్జిజి విజు దేవుణు నజిమ్కాజ్ నాను నెన్పిన్ దినిజ్ తగితి లెకెండ క్రీస్తుయేసుజ్ నాను ఎలాగ లోజిజి నడిఃజి ఇజి వాండ్రు మిజి ఎత్తు కిబిస్వార్లె.

18 మీ లొఇ నెగెండార్ నాను మీ డగ్రు రెవ ఇజి ఉబె ఆత మనార్.

19 ప్రబు సితం ఇహిజ నాను మీ డగ్రు బేగి వాన్. అయావలె ఉబె ఆతిమని వరి మాటెజ్ నె ఆవండ, వరిజ్ ఎసో సత్తు మనాద్ ఇజిబా నాను నూణె.

20 ఇనిక ఇహిజ, దేవుణు ఏలుబడిః ఇహిజ వర్గిని మాటెజాణిజ్ నె ఆవద్, సత్తుదాన్ మనాద్.

21 మీరు ఇనిక కోరింజినిదెరి? నాను మీ డగ్రు వానివలె మిజి దిదిదెజ్ డుడ్డు ఆసి వాదెజా, సిల్లిజి ప్రేమ తోరిసిని వన్ని లెకెండ వాదెజ్?

5

రంకు బూలాని వన్నిజ్ మీ బాణిజ్ వెల్లి పోక్కు

1 రంకు బూలానిక మీ లొఇ మనాద్ ఇజి నజి నిజమె కబ్బు వాతాద్. మీ లొఇ ఒరెన్, వన్ని కొగ్రి అయ్సిజ్ ఇడః ఆతాన్ గె. ననిక నమ్మిఇ వరి లొఇబా జర్గిఇక.

2 మరి, యాక మీ నడిఃమి మంజి మీరు పొజిజినిదెరి! గాని అయాలెకెండ ఆవండ, మీరు ఎసానో దుకం అజి నన్ని పణి కిత్తి వన్నిజ్ మీ నడిఃమిహాన్ వెల్లి పోక్కి మండ్రెజ్, అయాలెకెండ మండ్రెజ్ గదె?

3 నాను ఒడోల్ వందిజ్ మీ బాణిజ్ దూరం మన్న, గాని అత్తుదాన్ నాను మీ వెటనె మన్న. నాను మీ వెట మన్ని లెకెండెనె నిన్ని పణి కిత్తి వన్ని మున్ను. తీర్పు తీరస్త మన్న.

4 మా ప్రబు ఆతి యేసు పేరుదాన్ మీరు కూడఃజి వానివలె, మా ప్రబు ఆతి యేసుక్రీస్తు సత్తు మీ నడిఃమి మంజినాద్. నానుబా మీ వెట మన్న ఇజి మీరు ఒడిఃబిదు.

5 అయావలె మీరు యా లెకెండ కిదు. నయ్యూనుజ్ లోజిజి మన్ని వరి వెట మండ్రెజ్ ఇజి వన్నిజ్ మీ నడిఃమిహాన్ వెల్లి పోక్కు. అబ్బె వన్ని ఒడోల్ కన్మదిజ్ ఒవజెమె ఆనాద్లె. అయావలె వాండ్రు పాపం ఒప్పుకోడఃజి డిఃసిసిజి, యేసుప్రబు యా లోకమ్దిజ్ తీర్పు తీరిసిని దిన్మదు వన్ని అత్తు తవె ఆనాద్లె.

6 మీరు పొజిజనిక బాగ సిల్లెద్. పులాని దూరు కండెక్ అతిజ్జబా పులాజ్ సిల్లి దూరుదు కలప్తిజ, దూరు విజు పులాజ్ ఆనాద్ ఇజ మీరు నెసినిదెర్. నెఇకెజ్ మీ నడిఃమి మహిజ అయలెకెండె నున్విదా?

7 అందెజె నిజమె పులాని దూరు లెకెండ మన్ని వన్నిజ్ మీ నడిఃమిహాన్ దూరం కిదు ఇజ నాను మిజి గటిజ వెహ్సిన. అయావలె మీరు పులాజ్ సిల్లి నెగ్గి దూరు లెకెండ మనిదెర్. నిజమె మీరు పులాజ్ సిల్లి కొత్త దూరు నన్నికిదెర్, ఎందనిజ్ ఇహిజ వన్ను వండొయ్దిజ్ నప్పి గొరెపిల్లె లెకెండ యెనుప్రబు మా వందిజ్ పూజ ఆత మనాన్.

8 అందెజె పులాజ్ మన్ని పడాఃయి దూరుదాన్ పిటం నుర్తి మాటు వండొయ్ కిమాట్. ఇహిజ, ముజాల మహి నెఇ అలవాటుజ్, ముజాల కిజ మహి నెఇ పణిజాణిజ్ మాటు వండొయ్ కిమాట్. నాను వెహ్సనిక ఇనిక ఇహిజ, మాటు నిజం మన్నికాట్ని నమ్మిదెజ్ తగ్గికాట్ ఆజి మంజినాట్. అయాలెకెండ మాటు వండొయ్ కిమాట్.

9 రంకు బూలాని వరి వెట కూడఃజ మన్మాట్ ఇజ మిజి రాన్సి ఉత్తమదు రాన్సు మన్ను.

10 యా లోకమ్దు మన్ని రంకు బూలాని వరివెటనో, లోబం కిని వరివెటనో, డొజ కిని వరివెటనో, బొమ్మెజ మాడిఃసిని వరివెటనో మీరు ఎనెజ్బా కూడఃదెజ్ అవద్ ఇజ దన్నిజ్ అర్థం సిల్లెద్. అయాలెకెండ మండ్రెజ్ ఇహిజ మీరు యా లోకం డిఃసి సాండ్రెజ్ గదె?

11 నాను మిజి రాన్సి మన్ని దన్నిజ్ అర్థం ఇనిక ఇహిజ, నమ్మిత్తికాన్ ఇజ కూకె అతికాన్ ఎయెన్బా రంకు బూలానికాన్ అతిజనో, లోబం కినికాన్ అతిజనో, బొమ్మెజ్ మాడిఃసినికాన్ అతిజనో, నెఇ మాటజ్ వర్గినికాన్ అతిజనో, కడు ఉణికాన్ అతిజనో, ఇల్లు డెయ్జ డొజ కినికాన్ అతిజనో, నన్ని వన్ని వెట కూడఃజ మండ్రెజ్ అవద్. వన్ని వెట బొజనమ్బా కిదెజ్ అవద్.

12 దేవుణు సజమ్దిజ్ వెల్లి మన్ని నమ్మిఇకార్ అతి వరి మున్ను తీర్పు తీరిసినిక, నా పణి అవద్. సజమ్దు మన్ని వరి మున్ను మీరు తీర్పు కిఇదెరా?

13 సజమ్దిజ్ వెల్లి మన్ని వరిజ్ దేవుణునె తీర్పు తీరిసికాన్. అందెజె, “అయ నెఇ వన్నిజ్ మీ నడిఃమిహాన్ వెల్లి పొక్కు”.

6

నమ్మిత్తి వరి నడిఃమి గొడఃబెజ్ మహిజ

1 మీ లొఇ ఒరెన్ మరి ఒరెన్ వన్ని వెట గొడఃబు మహిజ, దేవుణుదిజ్ నెందితివరి ఎర్దు రెంపడ, వాండ్రు ఎందనిజ్ నమ్మిఇ వరి ఎర్దు తీర్పు వందిజ్ సాన్సినాన్?

2 దేవుణుదిజ్ నెందితికార్ యా లోకమ్దిజ్ తీర్పు తిరిసినార్లె ఇజ మీరు నెన్ఇదెరా? మీరు యా లోకమ్దిజ్ తీర్పు తీరిసినికిదెర్ అతిదెర్. అయ లెకెండ మహివలె మీ లొఇ మని గొడఃబెజ్ వందిజ్ తీర్పు తీరిస్తెజ్ మీరు అట్ఇతిదెరా?

3 మాటు దేవుణు దూతరిజ్ తీర్పు తిరిసినికాట్ ఇజ మీరు నెన్ఇదెరా? అహిజ యా లోకమ్దిజ్ నెందితి సజతిజ వందిజ్, మరి తీరిస్తెజ్ అట్టికాట్.

4 అందెజె నని గొడఃబెజ్ మీ నడిఃమి మహిజ, వనకాజ్ తీర్పు తీరిస్తెజ్ ఎందనిజ్ మీరు సజమ్దు ఇనికబా ఆఇవరి ఎర్దు తీర్పు వందిజ్ బన్సిదెర్?

5 మీరు సిగు ఆదెజ్ ఇజి నె ఇక్క నాను వెహ్సిన. దేవుణుదిజ్ నమ్మిత్తి వరి లొఇ మని గొడఃబెజ్ తీరిస్తెజ్ అట్టికాన్ ఎయెన్బా మీ నడిఃమి సిల్లెండ్రా?

6 గాని ఒరెన్ నమ్మిత్తికాన్ మరి ఒరెన్ నమ్మిత్తి వన్ని వెట గొడఃబెజ్ ఆజి కోర్దుదు సాన్సినెర్. అక్కాదె అపెండ తీర్పు వందిజ్ నమ్మిఇ వరి ఎర్దు తగుదిజ్ బనయి కిజినిదెర్.

7 మీ నడిఃమి ఎయెరిజ్బా ఒరెన్ వెట కోర్దు కిత్తి మని గొడఃబెజ్ మన్ను ఇహిజ మీరు పూర్తి అడిగి అర్తి మనిదెర్. కోర్దు కిని దనిజ్ ఇంక మీ వెట కిత్తి తప బరిసినికాదె నెగెద్. కోర్దు కిని దనిజ్ ఇంక డొజ కిజి ఒతిక డిఃసినికాదె నెగెద్.

8 గాని మీరె మొసెం కిజినిదెర్, తపు కిజినిదెర్. యాక నమ్మిత్తి కూలెజ వెటనె మీరు కిజినిదెర్.

9 సజ పణిజ్ కినికార్ దేవుణు ఎలుబడిడు మండ్రెజ్ అబ్ఎర్ ఇజి మీరు నెన్ఇదెరా? మీరు ఒడోబినిబాన్ తవు కిమాట్. రంకు బూలానికార్, బోమ్మెజ మాడిసినికార్, సాని బూలానికార్, మొగవరి వెట కూడ్ని మొగ్గకొడోర్,

10 డోజి కినికార్, లోబం కినికార్, ఎస్తివలెబా కడు ఉణిజి సోసి మంజినికార్, దూసలాడిజినికార్, ఇల్లు డెయ్జి డోజి కినికార్, నినికార్ ఎయెర్బా దేవుణు ఎలుబడిడు మండ్రెజ్ అక్కు మనికార్ ఆవర్.

11 మీ లోఇ సెగెండార్ యా లెకెండెనె మహిదెర్. గాని మీ పాపమ్కాణిజ్ నోర్ ఆజి సుబరం ఆతికిదెర్. మా ప్రబు ఆతి యెనుక్రీస్తు పేరుదాన్ని, మా దేవుణు ఆత్మదాన్ నీతినిజాయ్తిమునికార్ ఆతికిదెర్. మరి ఎలు దేవుణు వందిజ్ కేట ఆతికిదెర్.

రంకు బూలానిక

12 “ఇనిక కిదెజ్బా మజి అక్కు మనాద్, ఇని అడ్డు సిల్లెద్”, ఇజి మీరు వెప్పినిదెర్. గాని విజి పణిదిజ్ వానికెజ్ ఆఉ ఇజి నాను వెప్పిన, “ఇనిక కిదెజ్బా సజి అక్కు మనాద్, ఇని అడ్డు సిల్లెద్”. అహిజ్బా నాను కిని దని లోఇ ఇనికబా నజి ఉండ్రె అలవాటు లెకెండె మండ్రెజ్ నాను సరి సిఎ. ఎందనిజ్ ఇహిజి అయక సిల్లెండ బత్కిదెజ్ ఇజి ఉండ్రె అలవాటుదిజ్ అణజిజి మన్ఎ.

13 “తిండి పొటదిజ్ సర్ల వందిజ్ని పొట తిండి ఊణి వందిజ్నె తయార్ కిత మనాద్”, ఇజి మీ లోఇ సెగెండార్ వెప్పినిదెర్. గాని వాని కాలమ్దు పొట గాని తిండి గాని అక్కర్ సిల్లెద్. అందెజి దేవుణు రుండి వనకాజ్ సిల్లెండ కిన్సాలె”, ఇజి నాను వెప్పిన. ఒడోజ్ రంకు బూలాని వందిజ్ ఆవద్ ఇజి నాను గటిజి వెప్పిన. గాని మా ఒడోజ్ ప్రబు వందిజ్ పణి కిదెజ్నె. ఒడోజ్ వందిజ్ సూణికాన్ ప్రబునె.

14 దేవుణు వాని కాలమ్దు మా ఒడోలుజు సాతి వరిబాణిజ్ వన్ని సత్తుదాన్ నిక్కాన్లె. అయావలె సాతి వరిబాణిజ్ ప్రబుజ్ నిక్రి లెకెండె మజిబా నిక్కాన్.

15 మీ ఒడోజ్ క్రీస్తు ఒడోజ్ ఆతి దేవుణు సజమ్దు మని నమ్మిత్తి వరి వెట కూడితి మనికెజ్ ఇజి మీరు నెన్ఇదెరా? అయాలెకెండె మహిజి ఎయెర్బా క్రీస్తు వెట కూడితి మని వన్ని ఒడోజ్ ఉండ్రె సాని దనివెట కుడుఃప్తిజి అయక తగ్గాదా? ఆవద్, వాండ్రు ఎసెజ్బా అయక కిదెజ్ ఆవద్.

16 సాని దనివెట కూడిసికాన్ దని వెట కూడిజి ఉండ్రె ఒడోజ్ ఆతి లెకెండె మనాద్, ఇజి మీరు నెన్ఇదెరా?. “వారు రివెర్ ఉండ్రె ఒడోజ్ అన మంజినార్”, ఇజి దేవుణు మాటదు రాస్త మనాద్.

17 గాని వన్నిజ్ వాండ్రె ప్రబు వెట కుడుఃవె ఆతి మనికాన్, వాండ్రు ఒడిబిని దని లోఇ ప్రబు ఆత్మ వెట ఉండ్రె ఆజి మంజినాన్.

18 రంకు బూలావండ దని బాణిజ్ దూరం ఉహ్కీ మండ్రు. లోకుర్ కిజిని విజి పాపమ్కు ఒడోజ్దిజ్ వెల్లి మనికెజ్నె. గాని రంకు బూలానికాన్ వన్ని సొంత ఒడోజ్దిజ్ వెత్రికం కిజినాన్.

19 దేవుణు బాణిజ్ మిజి టోహ్కీ మని మీ లోఇ మని దేవుణు ఆత్మ మంజిని గుడిసె మీ ఒడోజ్ ఇజి మీరు నెన్ఇదెరా? అందెజి మీరు మీ సొంత ఆజెదెర్.

20 మీరు గొప్పు కరిదాన్ కొలె ఆతి మహికిదెర్. అందెజి మీ ఒడోజ్దాన్ దేవుణుదిజ్ గవర్ం సీదు.

7

పెండ్లి వందిజ్ వెప్పిక

1 మీరు రాస్తిమని సజతిజి వందిజ్ ఎలు నాను వెప్పిన. పెండ్లి ఆవండ మంజినిక మొగ్గ కొడోడిజ్ నెగెద్.

2 గాని రంకు బూలానిక లావ్ మనిజ్ ఒరెన్ ఒరెన్ వన్నిజ్ సొంత బోదెలి మండ్రెజ్. విజి బోదెకాజ్ వరి సొంత మాని మండ్రెజ్ వలె.

3 మాని ఆల్ని వందిజ్ కిదెజ్ మనికెజ్ విజి కిజి మండ్రెజ్ వలె. అల్నిబా మాని వందిజ్ అయాలెకెండెనె మండ్రెజ్ వలె.

4 ఆల్ని ఒడోజ్ దనిజి సొంతం ఆవండ దని మానిజ్బా నెందితిక. అయాలెకెండెనె మాని ఒడోజ్ వన్నిజి సొంతం ఆవండ వన్ని ఆల్నిజ్బా నెందితిక.

5 పార్లమెంట్ కిని వందొక్క మిజి సమయం దోహాన్ని వందొక్కనె అవండ, రిఎర్ కూడొజి ఒప్పెండ మీరు కేట కేట మండ్రెజ్ అవద్. గాని మీ ఆనెజ అణెస్సె ఆజి మండ్రెజ్ అట్టెండ మనిజ్, సర్వూను మిజి తప్ప కిబిని అర్పైజ్ సరి సిఎండ ఉండ్రెబాని కూడొజి మండ్రు.

6 మిజి యాలెకెండ కిడెజ్ అనాద్ ఇజి యాక నాను వెప్పొన, గాని ఉండ్రె ఆడ్ర లెకెండ అవద్.

7 విజెరె నాను మని లెకెండ పెండ్లి అవండ మహిజ బాగ్ మనాద్ ఇజి ఆస ఆజిన. గాని ఒరెన్ ఒరెన్ వన్నిజ్ దేవుణు బాణిజ్ ఉండ్రె ఉండ్రె వరం దోహాక్త మనాద్. ఒరెన్ వన్నిజ్ యా వరం, మరి ఒరెన్ వన్నిజ్ మరి ఉండ్రె వరం.

8 ఏలు పెండ్లి ఆజి వరి వెటని రాండి బోదెకాజ్ నాను వెప్పొనిక ఇనిక ఇహిజ, నాను మంజని లెకెండ పెండ్లి అవండ మంజనికాదె వరిజ్ నెగెద్.

9 గాని వరి ఆనెజ అణెస్సె ఆజి మండ్రెజ్ అట్టెర్ ఇహిజ వారు పెండ్లి ఆడెజ్ వలి. ఎండనిజ్ ఇహిజ మన్నుదు ఉత్పుత్ ఆజి సిసుదాన్ వెయెని లెకెండ మనిదనిజ్ ఇంక పెండ్లి ఆనిక నెగెద్.

10 పెండ్లి ఆతి వరిజ్ నాను సీజని ఆడ్ర, నానె అవద్ దేవుణు సిజని ఆడ్ర ఇనిక ఇహిజ, అల్పి, దని మాసిజ్ డిసి సొండ్రెజ్ అవద్.

11 అది మాసిజ్ డిసి సొహిజ మరి ఉండ్రె పెండ్లి ఆడెజ్ అవద్. మరి పెండ్లి అవండ మండ్రెజ్ ఇన్టం సిల్లెద్ ఇహిజ, దని మాసి వెట రాజినం ఆజి సమాదనం ఆజి మండ్రెజ్ వలి. మరి ఒరెన్ మాసి వన్ని అల్పిజ్ డిసి సీడెజ్ అవద్ ఇజిబా వన్ని ఆడ్ర మనాద్.

12 మహి వరిజ్ నాను వెప్పొనిక ఇనిక ఇహిజ, ప్రబు అవెన్ నానె, నమ్మితికాన్ ఆతి ఒరెన్ వన్ని అల్పి నమ్మితికాన్ ఇహిజ్ బా, అది వన్ని వెటనె బత్కినాద్ ఇహిజ వాండ్రు దనిజ్ డిసి సీడెజ్ అవద్.

13 మరి, ఉండ్రె నమ్మితికాన్ ఆతి బోదెల్దిజ్, మాసి నమ్మితికాన్ ఇహిజ్ బా దని వెటనె వాండ్రు బత్కినాన్ ఇహిజ అది వన్నిజ్ డిసి సీడెజ్ అవద్.

14 ఎండనిజ్ ఇహిజ నమ్మితికాన్ ఆతి మాసి నమ్మితికాన్ ఆతి వన్ని అల్పి వెట దేవుణు వందొక్క కేట ఆతికాన్ కిబె ఆత మనాన్. అయా లెకెండనె నమ్మితికాన్ ఆతి అల్పి నమ్మితికాన్ ఆతి దని మాసి వెట దేవుణు వందొక్క కేట ఆతికాన్ కిబె ఆత మనాన్. యా లెకెండ సిల్లెండ మహిజ మీ పొటాద్ పుట్టి కొడొర్, దేవుణుదిజ్ నమ్మితి వరి కొడొర్ లెకెండ మంజనార్, గాని ఏలు దేవుణు వందొక్క ఆతికార్.

15 గాని అల్పి మాసిర్ లొఇ నమ్మితికాన్ ఆతి మాసి గాని నమ్మితికాన్ ఆతి అల్పి గాని డిసి సీడెజ్ ఇజి ఆస ఆతిజి ఆహె కిపెర్. అయాలెకెండ జర్గినివలి, నమ్మితికాన్ నమ్మితి దనిజ్ గాని నమ్మితికాన్ నమ్మితి వన్నిజ్ గాని కూడొజి మనె అజి బలవంతం కిడెజ్ అవద్. సమాదనమదాన్ బత్కిదెజ్ ఇజినె దేవుణు మిజి కూక్త మనాన్.

16 ఓ, బోదెలి నీ మాసిజ్ దేవుణు రక్కిన్సి లెకెండ కిడెజ్ అట్టిదొ సిల్లెద్దొ ఇజి నీను ఎలాగ నెన్సి? ఓ, మొగకొడొ నీ అల్పిజ్ దేవుణు రక్కిన్సి లెకెండ కిడెజ్ అట్టిదొ సిల్లెద్దొ ఇజి నీను ఎలాగ నెన్సి?

17 ఒరెన్ ఒరెన్ ఎలాగ బత్కిదెజ్ ఇజి దేవుణు ఒపనెప్ప మనాండ్రొ అయాలెకెండ మండ్రెజ్ వలి. ఎలాగ మండ్రెజ్ ఇజి దేవుణు కూక్త మనాండ్రొ దనిజ్ తగితి లెకెండ వారు మండ్రెజ్ వలి. ఇక్కడె విజి సజమకాజ్ నాను సీతి మని రూలు.

18 ఎయెన్ బా దేవుణు వన్నిజ్ కూక్తివలి సునతి కిబె ఆతికాన్ ఇహిజ వాండ్రు సునతి కిబె ఆతి లెకెండనె మండ్రెజ్ వలి. అయొక మారిస్సెజ్ సుడెడెజ్ అవద్. మరి ఒరెన్ దేవుణు వన్నిజ్ కూక్తి వలి సునతి కిబె ఆజికాన్ ఇహిజ వాండ్రు సునతి కిబె ఆడెజ్ సుడెడెజ్ అవద్.

19 సునతి కిబె ఆతికాన్ ఇనిక సిల్లెద్. సునతి కిబె ఆజికాన్ ఇనిక సిల్లెద్. దేవుణు ఆగ్నేజి లొజిజి నడిసికాదె ముకెలమతిక.

20 ఒరెన్ వన్నిజ్ ఎలాగ మహివలి దేవుణు వన్నిజ్ కూక్త మనాండ్రొ అయాలెకెండనె వాండ్రు మండ్రెజ్ వలి.

21 నీను వెట్టివణి కిజి మహిజ కూకె ఆతిజి దని వందొక్క బాద అమ. అబెణిజ్ విడుదల ఆడెజ్ నిజి అక్కు మనాద్ ఇహిజ ఆహె కిల.

22 ఒరెన్ వెట్టివణి కినికాన్ ఆతి మహిజ్ దేవుణు మున్ను, నమకం ఇట్టాన్ ఇహిజ వాండ్రు దేవుణుదిజ్ సెందితికాన్ నీ పాపమకాజ్ ఏడువదల ఆతి లెకెండ ఆజినాన్. అయలెకెండెనె అక్క, మనికాన్ దేవుణు మున్ను, నమకం ఇట్టాన్ ఇహిజ వాండ్రు క్రీస్తు వందిజ్ వెట్టివణి కినికాన్ లెకెండ ఆజినాన్.

23 నండో విలువదాన్ కొతి అతికార్ మీరు, అందెజ్ లోకురి బుద్దిదిజ్ వెట్టివణి కినివరి లెకెండ ఆమాజ్.

24 నమ్మిత్తికిదెర్ ఆతి మా తంబెరిజాండె, ఒరెన్ ఒరెన్ ఎలాగ మండ్రెజ్ ఇజ దేవుణు ఇట్ట మనాండ్రో అయాలెకెండ మండ్రెజ్ వలె. ఎలాగ మహివలె దేవుణు కూక్త మనాండ్రో అయలెకెండెనె దేవుణు వందిజ్ బత్తిదెజ్ వలె.

25 ఏలు విడ్డి అయలిక వందిజ్ నజి ప్రబు బాణిజ్ ఇని ఆడ్ర సిల్లెద్. గాని దేవుణు కనికారమదాన్ నమ్మిదెజ్ తగ్గికాన్ ఇజ నజి ఒడెబిజిని వందిజ్ నాను ఒడెబినికెజ్ వెప్పిన.

26 యా లోకమదు ఏలుమని కన్ఘమకు సుడెతిజ ఎయెన్బా వాండ్రు మని లెకెండెనె మహిజ నెగెద్ ఇజ నాను ఒడెబిజిన.

27 నీను పెండ్లి ఆతి మనిదా? అహిజ డిసి సీదెజ్ సుడెమా. పెండ్లి ఆవిండ మహిజ పెండ్లి ఆదెజ్ సుడెమా.

28 నీను పెండ్లి అతిజ పాపం ఆఎద్. విడిఅయలి పెండ్లి అతిజ పాపం ఆఎద్. గాని పెండ్లి ఆతి వరిజ్ యా బత్తుదు నండో కన్ఘమకు మంజినె. అయాలెకె మిజి రెవిండ మండ్రెజ్ ఇజినె నాను కోరిజిన.

29 తంబెరిజాండె, నాను వెప్పినిక ఇనిక ఇహిజ ఏర్నాటు కిత్తిమని సమయం ఆదెజ్ కాలం కండెనె మనాద్. అల్నిక్ మనికార్ విలుదాన్ అల్నిక్ సీలివరి లెకెండ బత్తికిదెజ్.

30 అడెబనికార్ అడెబజ వరి లెకెండ మండ్రెజ్ వలె, సర్ల అనికార్ సర్ల ఆకెకార్ లెకెండ మండ్రెజ్ వలె, కొణికార్ మాపు కొటిక మా వందిజ్ ఇడె ఆనికావ్ అవివ్ ఇజ మండ్రెజ్ వలె.

31 యా లోకమదు మనికెజ్ వాడెబనికార్ వనక వందిజ్ మని ఆనదాన్ మున్ను నిండ్రెజ్ మండ్రెజ్ ఆఎద్. యా లోకం ఏలు మని లెకెండ ఎస్తివలెబా మన్ఎండ, సిల్లెండ ఆనాద్లె.

32 మీరు విసారిసి మంజని వరి లెకెండ మండ్రెజ్ ఆవిద్ ఇజ నాను కోరిజిన. పెండ్లి ఆకెకాన్ ఎలాగ ప్రబుజ్ సర్ల కిదెజ్ అట్టు ఇజ ప్రబుజ్ సెందితి సజతిజ్ వందిజ్ ఒడెబిజి మంజినాన్.

33 పెండ్లి అతికాన్ ఎలాగ అల్నిక్ సర్ల కిదెజ్ అట్టు ఇజ యా లోకమదిజ్ సెందితి సజతిజ్ వందిజ్ ఒడెబిజి మంజినాన్.

34 వాండ్రు రుండి దరోటు లాగ ఆజినాన్. అయాలెకెండెనె పెండ్లి ఆకె బోదెలి గాని ఉండ్రె విడ్డి అయలి గాని దేవుణుదిజ్ సెందితి సజతిజ్ వందిజ్ ఎత్తు కిజి మంజినాద్. పూర్తి అత్తుదాన్ పూర్తి ఒడెబిల్దాన్ దేవుణు వందిజ్ కేట మండ్రెజ్ ఇజి అది ఒడెబిజినాద్. గాని పెండ్లి అతికాద్ మాసిజ్ ఎలాగ సర్ల కిదెజ్ అట్టు ఇజ యా లోకమదిజ్ సెందితి వన్నా వందిజ్ ఒడెబిజి మంజినాద్.

35 మీరు నెగెండ మండ్రెజ్ ఇజినె నాను వెప్పిన, మిజి అడ్డు కిదెజ్ ఇజి సిల్లెద్. మీరు ఇతల్ అతాల్ ఆవిండ దేవుణు దరోట్ నెగెండ మంజి బత్తికిదెజ్ ఇజి వెప్పిన.

36 ఎయెన్బా, వన్ని వందిజ్ పేరు కిత్తి అయలిదిజ్ పెండ్లి కివిండ మంజి, దనిజ్ సిగు కిబిస్సాన్ ఇజి వన్నిజ్ తోరితిజ, దనిజ్ వయసు డాట్టినాద్ ఇజి ఒడెబిజి దనివెట పెండ్లి ఆదెజ్ వలె ఇజి ఒడెబితిజి వాండ్రు కోరిజిన లెకెండ కిదెజ్ వలె. వాండ్రు కినిక పాపం ఆఎద్. వారు పెండ్లి ఆదెజ్ వలె.

37 ఎయెన్బా పెండ్లి ఆదెజ్ ఇని బలవంతం సిల్లెండ, వన్నిజ్ వాండ్రె వన్ని గర్బం గదిన్ఎండ పూర్తి అణసె ఆదెజ్ అట్టాన్ ఇజి అయ అయలి వెట నాను పెండ్లి ఆఎ ఇజి, అయా సజతి వందిజ్ వన్ని మున్నుదు గటిజ తీర్వం కిత్తాన్ ఇహిజ, వాండ్రు కిని తీర్వంమబా నెగ్గికాదె.

38 అందెజ్ వన్నిజ్ పేరు కిత్తి అయలిదిజ్ పెండ్లి కినికాన్ నెగ్గిక కిజినాన్. అయాలెకెండ పెండ్లి ఆకెకాన్ మరి ఒదె నెగ్గిక కిజినాన్.

39 మాసి బత్తితి మనిదాక అల్ని వన్ని వెట మండ్రెజ్ వలె. వాండ్రు సాతిజ దనిజ్ ఇన్ఘమాతి వన్ని వెట పెండ్లి ఆదెజ్ ఆనాద్ గాని వాండ్రు ప్రబుజ్ సెందితికాన్ ఆజి మండ్రెజ్ వలె.

40 అది రాండిణి లెకెండెనె మహిజ ఒదె సర్లదాన్ మండ్రెజ్ ఆనాద్ ఇజి నాను ఒడెబిజిన, నజిబా దేవుణు అత్తు మంజి నాను ఒడెబిని దని లొఇ నజి నడిపిస్సాన్ ఇజి నాను ఒడెబిజిన.

8

బోమ్మెజు పూజ సీతిమని బోజనం వందిజ్

1 ఏలు బోమ్మెజు పూజ సీతి బోజనం వందిజ్ వెప్పిన. మాటు విజెటి గెణం మనికాట్ ఇజి నెసినాట్. గాని అయా లెకెండ్ మని గెణం పొజిస్సినాద్. గాని మా లిజ ఒరెన్ వన్నిజ్ మరి ఒరెన్ వెట ప్రేమ మహిజ దేవుణు మున్ను మని నమకమ్దు పిరిప్తెజ్ అట్టాట్.

2 ఎయెన్బా, నాను ఇనికాదొ నెస్సికాన్ ఇజి ఒడేబితిజ, వాండ్రు నెస్సిజ్ మని లెకెండ్ ఇనికబా నెస్సికాన్ అవెన్.

3 గాని దేవుణుదిజ్ ప్రేమిసిని వన్నిజ్ దేవుణుదిజ్ నెందితి వన్ని లెకెండ్ వాండ్రు సుణాన్.

4 అందెజి బోమ్మెజు పూజ సీతికెజ్ తిని వందిజ్ వెప్పిన. ఉండ్రె బోమ్మె ఇహిజి యా లోకమ్దు ఇనికబా అజక ఇజి మాటు నెసినాట్. మరి దేవుణు ఒరెండ్రె మనాన్ మరి ఒరెన్ దేవుణు సీల్లెన్ ఇజి మాటు నెస్త మనాట్.

5 దేవుణు ఇజి కూకె అనికెజ్ ఇజి నండొ మహిజ్బా, నిజమె ప్రబుని దేవుణు ఇజి కూకె అనికెజ్ నండొ మన్నె. అగానమ్దు గాని బూమి మున్ను. గాని దేవుణు ఇజి పేరు కూకె అనికెజ్ నండొ మన్నె.

6 గాని మజి ఒరెండ్రె దేవుణు మనాన్, వాండ్రు మా బుబ్బు. వన్ని బాణిజె మనికెజ్ విజు కల్లితె. వన్ని వందిజ్ మాటు బత్తిజినాట్. మజి యేసు క్రీస్తు ఒరెండ్రె మా ప్రబు అతికాన్. మనికెజ్ విజు వన్ని వెటనె తయార్ అతె. వన్ని వెటనె మాటు బత్తినాట్.

7 గాని యాక విజెరె నెన్ఎర. దేవుణుదిజ్ నమ్మిత్తికార్ నెగొండార్ ఏలుబా బోమ్మెజ్ నిజమె దేవుణు ఇజి ఒడేబిజినార్. అందెజె వారు నని బోజనం కినివలె, నిజమె అక బోమ్మెజు పూజ సీతికెజ్ ఇజి ఒడేబిజినార్. యాలెకెండ్ ఒడేబిజినె వారు ఉణార్. అందెజె వారు నని బోజనం కిత్తార్ ఇహిజ, వారు పాపం కిత్తార్ ఇజి వరి గర్బం గదిసి మంజినాద్.

8 గాని ఉణి బోజనమ్దాన్ మాటు దేవుణుదిజ్ డగ్రు అదెజ్ అట్ఎట్. మాటు ఉణెఎండ మహిజ ఇనికాదొ గొప్ప విలువాతిక మజి నెస్తం అవెద్. మాటు ఉటిజ ఇనికాదొ గొప్ప విలువాతిక మజి లాబమ్బా మన్ఎద్.

9 అహిజ ఇనికబా కిదెజ్ నిజి మని అక్కుదాన్, మన్నుదు దయరం సిల్లి వరిజ్ తొ ఇడ్డి లెకెండ్ మండ్రెజ్ అవెద్.

10 ఎందనిజ్ ఇహిజ, యా గెణం మని నీను, బోమ్మెజు మని గుడిదు బోజనం కిజి మంజినిక, మన్నుదు దయరం సిలికాన్ ఒరెన్ సుడేతిజ, బోమ్మెజు పూజ సీతికెజ్ తిండ్రెజ్ వాండ్రు దయరం తవె అనాన్. అయాలెకెండ్ కిజి వన్ని గర్బం వన్నిజ్ గదిసి మంజినాద్.

11 ఎందనిజ్ ఇహిజ, యా మన్నుదు దయరం సిలి వన్ని వందిజ్బా క్రీస్తు సాత మనాన్. గాని, “నజి గెణం మనాద్”, ఇజి తోరె అజిని నీను కిజిని పణిజాణిజ్ నీను వన్నిజ్ పాపం కిబిస్సి, మరి వన్నిజ్ పాడే కిజిని.

12 యా లెకెండ్ మీరు, గర్బం గదిసిని, దయరం సిల్లి తంబెరిజ పడిఎండ పాపం కిజినిదెర్. ఎందనిజ్ ఇహిజ, నీను కిజిని పణిజ్ సుడేతిజ తప్ప ఇజి ఒడేబినికెజ్, వన్ని గర్బం గదిసినికెజ్ వాండ్రుబా కిజి మంజినాన్. యా లెకెండ్ మీరు క్రీస్తుజ్ పడిఇ పాపం కిజినిదెర్.

13 అందెజె నాను ఉణిజిని దనిదటాజ్ నా తంబెరి ఒరెన్ తప్పి సాన్సికాన్ ఇహిజ, నా తంబెరి తప్పి సాన్ఎండ మండ్రెజ్ ఇజి నాను ఎనెజ్బా నన్ని కండ తిన్ఏ.

9

అపొస్తుడు అతి వన్నిజ్ మన్ని అక్కుజ్

1 నాను అక్కు మనికాన్ అవినా? నాను అపొస్తుడు అవినా? మా ప్రబు అతి యేనుజ్ తోవినా? మీరు, ప్రబు వందిజ్ నాను కిత్తి పణిదిజ్ వంట అజెదెరా?

2 నాను అపొస్తుడు ఇజి మహికార్ ఒడేబిఎండ మహిజ్బా, నిజమె మీ వందిజ్ నాను అపొస్తుడుని. నాను ప్రబు వందిజ్ అపొస్తుడు ఇని దనిజ్ రుజుప్ మీరె.

3 నా మున్ను తీర్పు కిని వరిజ్ ఎర్దు నాను నా వందిజ్ వెప్పొనిక యాక.

4 మాపు దేవుణు మాటజ్ నెన్పిన్సి వరిబాన్ లొసి ఉండెజ్ తిండ్రెజ్ మజి అక్కు సిల్లెదా?

5 మహి అప్పొస్తురుజ్ లెకెండెన్, ప్రబు తంబెరిబు ఆతివరి లెకెండెన్, వేతురు లెకెండెన్ నమ్మిత్తికాద్ ఆతి అల్పి వెట బుల్లెయ్ కిదెజ్ మజి అక్కు సిల్లెదా?

6 దేవుణు పణి కిజిని మహివరి లెకెండె, మాపు దేవుణు పణి కినివలె నజిని బర్దుబెజ్ తిండి వందిజ్ పణి కిఎండ ఉణిజి తిండ్రెజ్ అక్కు మనాద్.

7 వన్ని సొంత డబ్బు కర్పు కిజి ఎయెన్బా నయన్మదు పణి కిసాంద్రా? ద్రాక్కు బోట ఉణుసి దని పట్టు తిన్ఇకాన్ ఎయెన్బా మనాంద్రా? గొర్రెజ పోన్ కిజి వన్యా పాలు ఉణిఇకాన్ ఎయెన్బా మనాంద్రా? ఎయెన్బా మన్ఎర్.

8 యా మాటజ్ నాను లోకమ్దిజ్ సెందితి వరి వజనె వెహెవ. దేవుణు సత్తి రూలుదుబా యా లెకెండెనె వెప్పొనాద్.

9 “కలమ్దు మటిసిని డాఃసు మూతుదు కిమా తోహమాట్”, ఇజి మోసె వెట దేవుణు సత్తి రూలుదు రాస్ట మనాద్. దేవుణు డాఃకు వందిజ్నెన్ విసారిస్సాంద్రా?

10 నిజుమ్, యాక మా వందిజ్బా వెహెవతాంద్రా? మా వందిజ్ వెప్పొకెజె. ఎందనిజ్ ఇహిజు, పంట పంటితిజు, ఉండెజ్ అనాద్ ఇజి ఉండ్రె ఆసదాన్ డూనికాన్ డూజినాన్. మటిసినికాన్బా అయ ఆసదాన్ మటిసినికాన్.

11 మీ వందిజ్ అత్తుదిజ్ సెందితికెజ్ మాపు మీ నడిఃమి వితామ్ ఇహిజు, అందెజి మీ బాణిజ్ మా ఒడొల్దిజ్ కావాలిన్సికెజ్ మాపు లొసె ఆతిజు ఆక పెరి నజతినా?

12 మీ బాణిజ్ సాయం లొసె ఆదెజ్ మహి వరిజ్ అతికారం మనాద్ ఇహిజు, మజి వరిజ్ ఇంక ఒద్దె అక్కు సిల్లెదా? గాని మాపు యా అతికారమ్దిజ్ వాడెదెజ్ సిల్లెద్. అక్కాదె అఎండ క్రీస్తు సువార్దదిజ్ ఇని అడ్డుబా రెఎండ మండ్రెజ్ ఇజి విజు వన్యాజ్ బరిస్తాప్.

13 దేవుణు గుడిఃదు పణి కిజిని వరిజ్ దేవుణు గుడిఃదాన్ బోజనం దొహక్కాద్. పూజు సీని మార్లె పీటదు పణి కిజిని వరిజ్ పూజు సత్తి వన్యా లొఇహాన్ వంతు మనాద్ ఇజి మీరు నెన్ఇదెరా?

14 అయా లెకెండెనె సువార్ద వెప్పొని వరిజ్ బత్కుదిజ్ కావాలిన్సికెజ్ సువార్దదానె దొహక్కెజ్ ఇజి ప్రబు ఆడ్ర సిత్రా మనాన్.

15 గాని నాను ఇహిజు యా అతికారం లొఇ ఇనికబా వాడెఃఎత. మీరు యా లెకెండె నజి కినిదెర్లె ఇని ఆసదాన్ ఇక రాన్ఎత. నాను పొగడెః ఆజి వెప్పొ యా మాటజ్ ఎయెన్బా ఇని అర్దం సిల్లెండ కిని దనిజ్ ఇంక నాను సాతిజానె నెగెద్.

16 అహిజు, నాను సువార్ద సాటిసిని ఇజి పొగడెః ఆదెజ్ నజి అక్కు సిల్లెద్. ఎందనిజ్ ఇహిజు సువార్ద సాటిస్సెజ్ ఇజి ఉండ్రె బలవంతం నా లొఇ మనాద్. సువార్ద సాటిన్ఎండ మహిజు నజి బాద్.

17 నా సొంత ఇస్టమ్దాన్ నాను సువార్ద సాటిస్సిజు నజి జీతం దొహక్కాద్. నా సొంత ఇస్టమ్దాన్ ఆవిండ కిత్తిజు, నాను కిదెజ్ ఇజి నజి ఒప్పజెవె ఆతి పణి కిజిని ఇజి ఆజినాద్.

18 అహిజు నజి దొహక్కీ జీతం ఇనిక? సువార్ద సాటిసినివలె, నాను సువార్ద సాటిసిని వరిజ్ మని అతికారమ్దాన్ ఇనికబా నా వందిజ్ గణెస్సెజ్ నుడఃఎండ, నెడ్డిని కిదెజ్ వలె. అక్కాదె నజి దొహక్కీ ఇనాయం.

19 నాను ఎయెరిజ్బా అడిగి మనికాన్ ఆవిండ విజు దనిజ్ అక్కు మనికాన్. గాని, నజి అట్టి నసాండారిజ్ దేవుణు దరిజ్ కలపైజ్ ఇజి నానె నజి విజెరె వందిజ్ వెట్టిపణి కిని వన్ని లెకెండె కిబె అత.

20 యూదురిజ్ దేవుణు దరిజ్ కలపైజ్ ఇజి నాను వరి వందిజ్ యూదురు లోకు లెకెండె అత. నాను మోసె రాస్తి రూలుజు అడిగి మన్ఇకాన్ ఆతిజ్బా మోసె రాస్తి రూలుజ్ లోజిని వరిజ్ దేవుణు దరిజ్ కలపైజ్ ఇజి వరివందిజ్ మోసె రాస్తి రూలుజ్ లోజితి వన్ని లెకెండె అత మన.

21 దేవుణు మోసె సతి రూలుజ్ లోజిఇ వరిజ్ దేవుణు దరిజ్ కుడుఃపైజ్ ఇజి నాను వరి లెకెండె అత. దేవుణు మోసె వెట సతి రూలుజ్ నాను లోజిఎ ఇజి నాను వెహెవ, గాని క్రీస్తు సత్తి రూలుజ్ లోజిజి మంజిని.

22 సత్తు సీలి వరిజ్ దేవుణు దరిజ్ కుడుఃపైజ్ ఇజి నాను సత్తు సీలి వన్ని లెకెండె అత. ఎలాగ అతిజ్బా నెగొండారిజ్ దేవుణు రక్సిన్సి లెకెండె కిదెజ్ ఇజి నాను విజెరె వందిజ్ ననివరి లెకెండె అత మన.

23 ఎందనిజ్ ఇహిజ దేవుణు బాణిజ్ వాజిని దినముక వందిజ్ సువార్డు సాటిసిని నజీబా వంతు మండ్రెజ్ ఇజి యాకెజ్ విజు నాను సువార్డు వందిజ్ కిజిన.

24 వందిం పోటిదు ఉహ్వాక్కి వందిమ్దు ఉహ్వాక్కినార్ విజెర ఉహ్వాక్కినార్ గాని ఒరెన్ వన్నిజె ఇనాయం దోహ్వాక్కి ఇజి మీరు నెన్ఇదిరా? అందెజె ఇనాయం దోహ్వాక్కి ఇజెనె మీరు వందిమ్దు ఉహ్వాక్కు.

25 వందిమ్దు పోటి అనికార్ విజెర దనివందిజ్ ఒజ ఆజి తయార్ ఆజినార్. సాణెం మంజి పాడె ఆజి సాన్సిని టోపె దోహ్వాక్కి వందిజ్ యాకెజ్ విజు కిజినార్. గాని మజి ఎలాకాలం మంజిని టోపెన దోహ్వాక్కి.

26 అందెజె నాను గురి సుడెంండ ఉహ్వాక్కికాన్ ఆవ. నాను ముటి అని గాలిదిజ్ డెయేని నని వన్ని లెకెండ్ ఆవ.

27 గాని మహి వరిజ్ సువార్డు సాటిసి వెనుక, ఇనాయం దోహ్వాక్కి వన్ని లెకెండ్ నజీ నాని కివెండ మండ్రెజ్ ఇజి నా ఒడొలేదిజ్ నెగెండ అడ్డిజి, నజీ వెట్టివణి కిని వన్ని లెకెండ్ కిజిన.

10

ఇస్రాయేలు లోకురిజ్ సుడెజి నెస్టెజ్ మన్నికెజ్.

1 తంబెరిజాండె, మా అని గోగర్ ఆతి యూదరు విజెర మోసె వెట మహివలె ఇనిక జగ్గిత మనాద్ మీరు నెగెండ నెసి మండ్రెజ్ ఇజి నాను ఆన ఆజిన. దేవుణు వరివెట మనాన్ ఇజి ఉండ్రీ గుర్తు లెకెండ్ దేవుణు వరి మున్సు ఇడ్డి మని మొసాప్ అడిగి వారు నడిత మహార్. ఎరాని సమ్దారం ఇని సమ్దారం నడిమిహాన్ వారు విజెర వస్తా బూమిదాన్ అతాహ వడక నడిత సాహార్.

2 వారు విజెర మోసె వెట మొసాప్ అడిగి మంజి సమ్దారం నడిమిహాన్ వస్తా బూమిదాన్ నడిజి మహిజ్, మోసె వెట బాప్తినం లాగె ఆతి లెకెండ్ అతార్. ఎందనిజ్ ఇహిజ వారు మోసెజ్ వరిజ్ నెయ్యి లెకెండ్ వారు ఒప్పుకోటార్.

3 విజెర దేవుణు సెతి ఉండ్రె బోజనమనె ఉటార్.

4 వారు విజెర సట్టుదాన్ దేవుణు రప్పిన్ ఉండ్రె ఏరునె ఉటార్. అయ సటు క్రీస్తుజ్ గుర్తు లెకెండ్ నె మనాద్. ఎందనిజ్ ఇహిజ వాండ్రు ఇనికబా తకు సెల్లెండ వరిజ్ కావాలిన్కెజ్ విజు సీజి నిజమె వరి వెట నడిజి మహన్.

5 అయా లెకెండ్ మహిజ్బా, వరి లొఇ నండోడారిజ్ దేవుణు ఇష్టం ఆవిండ ఆతాన్. అందెజె ఎయెర్బా మన్ఇ అయా అడివిదు వరిజ్ సప్త సిపీరతాన్.

6 ఇక్కెజ్ విజు మాటు నెస్టెజ్ ఇజి మజి ఉండ్రీ గుర్తు లెకెండ్ వరిజ్ జగ్గితె మన్నె. వారు సెఇ వసకాజ్ వందిజ్ ఆన ఆతి లెకెండ్ మాపు ఆన ఆవిండ జాగర్డు మండ్రెజ్ ఇజి.

7 వరి లొఇ నెగెండార్ లెకెండ్ బొమ్మెజు మాడిసినికార్ అమాట్. “లోకుర్ తిండ్రెజ్ ఉండెజ్ బస్తార్, కర్ణెదెజ్ నీజితార్”, ఇజి వరి వందిజ్ దేవుణు మాటుదు రాస్త మనాద్.

8 వరి లొఇ నెగెండార్ కిత్తి మహి లెకెండ్ మాటు రంకు బూలమాట్. ఉండ్రె రోజుదు ననికార్ ఇరువయేముండ్రీ వెయిజ్ లోకుర్ సాతార్.

9 వరి లొఇ నెగెండార్ కిత్తి మహి లెకెండ్ మాటు ప్రబుజ్ వరినె కిదెజ్ ఆవెద్. ననికార్ సరాన్ వెట సాతార్.

10 వరి లొఇ నెగెండార్ దేవుణు మున్సు, సణిజితార్. వారు నాననం కినికాన్ ఆతి దేవుణు దూత వెట సాతార్. మాటు దేవుణు మున్సు, సణిజితార్ ఆవెద్.

11 మహివరిజ్ తోరెదెజ్ ఉండ్రీ గుర్తు లెకెండ్ యాకెజ్ వరిజ్ జగ్గితె. యా తరమ్ది ఆకర్ దినమ్దు బత్తిజిని మజి బుద్ది వాదెజ్ ఇజి గెవతం కిత్తి మని లెకెండ్ రాని ఇడె ఆత మనాద్.

12 అందెజె ఎయెన్బా దేవుణు మున్సు, మని నమకమ్దు నాను గటిజ నిల్పిన ఇజి ఒడెబితిజు, వాండ్రు వెటెన పాపమ్దు అరెండె జాగర్డు మండ్రెజ్ వలె.

13 మాములుక లోకురిజ్ వాజిని పరిక్నేనె ఆవిండ మరి పెరికెజ్ ఇనికెజ్బా మిజి రవుతె. దేవుణు నమ్మకమాతికాన్. అందెజె ఓరిస్తెజ్ అట్టి దనిజ్ ఇంక పెరిక ఇనికబా మిజి వాదెజ్ వాండ్రు ఒవ్విన్. అక్కాది ఆవిండ వాజిని పరిక్నేనె నిల్పి మండ్రెజ్ పరిక్నే వెట తప్పె అదెజ్ ఉండ్రీ సరిబా తోరెస్సాన్లె.

దెయింక వండ్రెయేని ప్రబు ఏర్పాటు కిత్తి బోజనం

14 అందెజె నజీ ఇస్సమాతి తంబెరిజాండె, బోమ్మెజ మాడిసిని బాణిజ్ దూరం ఉహ్కీ మండ్రు.

15 మీరు నెగ్గి బుద్ది మనికిదెర్ ఇజనె నాను వర్గజన. నాను వెప్పొని సజతిజ మీరె అర్దం కిజె సుడేదు.

16 మాటు విజెటి కూడేజి వానివలె, మాటు దేవుణుల ఏర్పాటు కిత్తి బోజనం ఉణువలె, దేవుణుదిజ్ వందనమ్మకు వెప్పొ గినాదిక ఉణిజి, మాటు ఉండ్రె రొటి రుక్కి తినివలె క్రీస్తు నలదాన్ మజీ వాజిని నెగ్గి వన్యాజ్ కూడేజి మంజినికాల్ అజినాల్.

17 రొటి ఉండ్రెనె, అయ ఉండ్రె రొటిదునె మాటు విజెటి కూడేజి తింజినాల్. అందెజె నండొండార్ అతి మాటు ఉండ్రె ఒడోల్ అత మనాద్.

18 ఇస్రాయేలు లోకురిజ్ సుడేదు, దేవుణుదిజ్ సంద సుర్పి బాడ్డిదు సంద సీని వన్యాజ్ తినికార్, దనివెట కూడేజి మంజినికార్ అందె?

19 అందెజె బోమ్మెజ పూజ సీతి వనకాజ్ లోఇ ఇనికబా మనాద్ ఇజనో, బోమ్మెజ లోఇ ఇనికబా మనాద్ ఇజనో నాను వెప్పొనానా?

20 సిల్దెద్. గాని దేవుణు లోకుర ఇకకార్ పూజెజ్ సీనివలె దేవుణుదిజ్ పూజ సీనినార్ ఇజి వారు ఒడేబిజినార్. గాని నిజమె వారు దెయమ్కాజ్ వూజ సీజినార్. అందెజె మీరు దెయమ్క వెట కూడేజి మంజినిక నజీ ఇస్సం సిల్దెద్.

21 మీరు ప్రబు గినాదాన్ ఉణిజి మరి దెయమ్క గినదాన్బా ఉండెజ్ అల్ ఇదెర్. ప్రబు ఏర్పాటు కిత్తి బోజమమ్దుని దెయమ్క బోజనమ్దుబా ఒర్పె కూడేజి మండ్రెజ్ అల్ ఇదెర్.

22 దేవుణుదిజ్ నెందితి గవరం తగ్గి లెకెండె వన్సిజ్ సీదెజ్ వలె. అయా లెకెండె కిఎండె ప్రబు కోపం రేప్పిన్జె మాటు పణి కిజినాటా? మాటు వన్సిజ్ ఇంక సత్తు మనికాటా? నమ్మిత్తి వన్సిజ్ మని అక్కుజ్

23 “విజు వన్యా వందిజ్ నజీ అక్కు మనాద్”, గాని విజు పణిదిజ్ వానికెజ్ అఉ. “విజు వనక వందిజ్ నజీ అక్కు మనాద్”, గాని విజు నెగెండె పిరిప్పికెజ్ అఉ.

24 ఎయెన్బా నజీ నానె నెగెండె మండ్రెజ్ ఇజి తొవండె మహికార్బా నెగెండె మండ్రెజ్ ఇజి సుడేదెజ్ వలె.

25 మీ గర్బం మిజీ గదిన్ఎండె మహిజ సతాదు పొర్పి ఇని కండబా తిండ్రు.

26 ఎందనిజ్ ఇపాజ, “యా బూమి ప్రబుదినె, దని ముస్సు మనికెజ్ విజు వన్సివినె”, ఇజి దేవుణు మాటదు రాస్త మనాద్.

27 ఒరెన్ నమ్మిఇకాన్ మిజీ విందుదిజ్ కూక్కి తనివలె, మిజీ ఆన మహిజ సొండ్రు. గాని గర్బం గదిన్ఎండె, మి ఎద్రు ఇడ్డికెజ్ ఇనికబా వెన్బాఎండె తిండ్రు.

28 గాని ఎయెన్బా, “యాక బోమ్మెజ పూజ సీతి దనిబాణిక”, ఇజి వెప్తిజ, వెప్తి వన్సి వందిజ్ మి గర్బం గదిసిని వందిజ్ అక తిన్యాత్.

29 గర్బం గదిసిని వందిజ్ ఇజి వెప్పొ వలె అక్కు నీది ఆవెద్, వెప్తివన్సి వందిజ్ వెప్పొన. విజు వన్యా వందిజ్ మిజీ మని అక్కుదిజ్ మరి ఒరెన్ వన్సి గర్బమదు మని ఆలోసనమ్దాన్ ఎందనిజ్ మాపు తీర్పు కిబె ఆదెజ్?

30 నాను అయా బోజనం వందిజ్ దేవుణుదిజ్ వందనమ్మకు వెప్పొ ఉటిజ, దేవుణుదిజ్ వందనమ్మకు వెప్పొ ఉటి బోజనం వందిజ్ ఎందనిజ్ నాను దూని ఆదెజ్ వలె.

31 అందెజె మీరు ఉటిజబా, తిహిజబా, ఇనిక కిత్తిజబా విజు దేవుణుదిజ్ గొప్ప పేరు వాని లెకెండెనె కిదు.

32 యూదురిజ్ గాని, యూదురు ఇజవ వరిజ్ గాని, దేవుణు సజమ్ది వరిజ్ గాని తొరొడ్డి లెకెండె ఇనికబా కిఎండె మండ్రు.

33 నండొండార్ జి దేవుణు రక్కిన్జె ఇజ, నాను నజీ నానె నెగెండె మండ్రెజ్ ఇజి తొవ. గాని మహికార్బా నెగెన్ మండ్రెజ్ ఇజి విజు వన్యా లోఇ విజెరిజ్ సర్ద కిబిన్సి లెకెండె నాను మంజిన. మీరుబా నాను కిజిని లెకెండె కిజి మండ్రు.

1 నాను క్రీస్తుజ్ఞ పోలిసి నడిసినె లెకెండ మీరు నజీ పోలిసి నడిసెడు.

2 నాను మిజీ నెన్పిన్ బోదదిజ్ డిన్ఎండ లోజిజి నడిజినిదెర్ ఇజి, మరి విజు సజతిజి వందిజ్ నజీ ఎత్తు కిజిని వందిజ్ నాను మిజీ పొగ్డిజి.

3 ఏలు మీరు ఇక్కెజ్ నిజం నెన్జెజ్ ఇజి కోరిజి. ఒరెన్ వన్నిజ్ బుర్ర క్రీస్తు, ఉండ్రీ బోదెలిదిజ్ బుర్ర మొగకొడొజ్. క్రీస్తుజ్ బుర్ర దేవుణు ఇజి మీరు నెసి మండ్రెజ్.

4 ఎమేణి మొగకొడొజ్ పార్దనం కినివలెనో, దేవుణు ప్రవక్త లెకెండ వర్గిని వలెనో వన్ని బుర్రుడు టుకుర్ ఇడ్డి మహిజి వాండ్రు వన్ని నెయ్యి క్రీస్తుజ్ గవరం సొన్నిసాన్.

5 మరి ఎమేణి బోదెల్బా పార్దనం కనివలెనో, దేవుణు ప్రవక్త లెకెండ వెప్పవలెనో బుర్రుడు టుకుర్ ఇడ్డెండ మహివలె అది దని బుర్ర బోడికి కిబె ఆతి లెకెండ సిగు లాగి ఆజినాద్.

6 ఉండ్రీ బోదెలి బుర్రుడు టుకుర్ ఇడ్డెండ మహిజి అది దని బుర్రది కొప్పు కత్తిస్తెజ్ వలె. కొప్పు కత్తిస్తెజ్నో బోడి బుర్ర ఆదెజ్నో సిగు ఆతిజి అది బుర్రుడు టుకుర్ ఇడ్డెండవలె.

7 మొగకొడొజ్ బుర్రుడు టుకుర్ ఇడ్డెండ అక్కర్ సిల్లెద్. ఎండనిజ్ ఇహిజి దేవుణు, వన్ని గవరం తొరిస్తెజ్ ఇజి మొగవన్నిజ్ వన్ని మూర్తి లెకెండ తయారో కిత మనాన్. గాని బోదెలి బుర్రుడు టుకుర్ ఇడ్డెండ వలె. ఎండనిజ్ ఇహిజి బోదెలి దని మాసిజ్ గవరం తొరిసినాద్.

8 ఎండనిజ్ ఇహిజి బోదెలి మొగకొడొజ్ బాణిజ్ తయారో కిబె ఆత మనాద్, గాని మొగకొడొజ్ బోదెలి బాణిజ్ తయారో కిబె ఆపితాన్.

9 అక్కాదె ఆవండ, దేవుణు బోదెలి వందిజ్ మొగకొడొజ్ తయారో కివెతాన్, గాని మొగకొడొజ్ వందిజ్నె బోదెలిదిజ్ తయారో కిత్తాన్.

10 అందెజి యా సజతి వందిజ్నె దేవుణు దూతారో వందిజ్ అతికారమందిజ్ అడిగి మని దనిజ్ గుర్తు లెకెండ బోదెలి బుర్రుడు టుకుర్ ఇడ్డెండ వలె.

11 గాని ప్రబు వెట కూడితి మని బత్తుడు బోదెలి మొగకొడొజ్ వెట సమందం సిల్లెండ మనెవద్. మొగకొడొజ్ బోదెలి వెట సమందం సిల్లెండ మనెవన్.

12 మొగకొడొజ్ బాణిజ్ బోదెలి వాతి లెకెండెనె బోదెలి బాణిజ్ మొగకొడొజ్ పుట్టినాన్. గాని విజు దేవుణు బాణిజ్నె వాజినె.

13 ఉండ్రీ బోదెలి బుర్రుడు టుకుర్ ఇడ్డెండ దేవుణుదిజ్ పార్దనం కిదెజ్ తగ్నాదా? మీరి ఒడిబిదు.

14 మొగకొడొజ్ వన్ని బుర్రది కొప్పు పిరిప్పి మహిజి అక్క వన్నిజ్ సిగు ఇజి ఎయెర్బా వెహెండ మిజీ మీరి నెస్సిదెర్ గదె.

15 గాని ఉండ్రీ బోదెలిదిజ్ బుర్రుది కొప్పు పిరితి మహిజి అక్క దనిజ్ ఉండ్రీ పేరు మని లెకెండెనె, ఉండ్రీ పాత నెగు లెకెండెనె.

16 దిన్ని వందిజ్ ఎయెర్బా గొడెబ రిప్పిజి ఇక్కాదె ఆవండ మా లొఇ వేరి అలవాటు ఇనికబా సిల్లెద్. దేవుణు సజమదుబా సిల్లెద్.

ప్రబు ఏర్పాటు కిత్తి బోజనం వందిజ్.

17 మరి ఏలు నాను వెప్పాని మాటదు మీరు నెగ్గికార్ ఇజి నాను మిజీ పొగ్డిజి. ఇనిక ఇహిజి మీరు నెగ్గిదని వందిజ్నె కూడెజి వాజినిదెర్ గాని నెగ్గి దన్నిజ్ ఇంక అక్క సెఇక కిజినాద్.

18 మొదొహి సజతి ఇనిక ఇహిజి దేవుణు సజం లెకెండ మీరు కూడెజి వానివలె మీ లొఇ గుంపుజ్ మన్నె ఇజి నాను వెహమన. యాక కండెక్ నిజమెనె ఇజి నాను సమ్మిజి.

19 దేవుణు ఎర్దు నెగ్గికార్ ఎయెర్ ఇజి తోర ఆదెజ్ మీ లొఇ బేదమకు తవ్వెండ మంజినె.

20 మీరు విజిదెర్ కూడెజి వానివలె మీరు ఉణిక ప్రబు ఏర్పాటు కిత్తి బోజనం ఆవద్.

21 ఎండనిజ్ ఇహిజి, బోజనం కినివలె ఎయెర్ వందిజ్బా కావకివండ ఒరెన్ ఒరెన్ ముజుల బోజనం కిజినాన్. ఒరెన్ బజి నానాన్ మరి ఒరెన్ సొని మంజినాన్.

22 ఆహె ఉండెజ్ తిండ్రెజ్ మిజీ ఇల్లు సిలునా? మరి దేవుణు సజమందిజ్ ఇజిరి కణక సుడెజి ఇనిక సిల్లి వరిజ్ మీరు సిగు కిజినిదెరా? నాను మీ వెట ఇనిక వెప్తాజ్? దిన్ని వందిజ్ నాను మిజీ పొగ్డిదెజ్నా? కసితం నాను పొగ్డిజి.

23-24 ప్రభు బాణిజ్ నజీ దోహాకీక నాను మిజీ ఒపజెప్పిక ఇనిక ఇహిజ, ప్రబువాతి యేను వాండ్లు ఒపజెవె ఆతి పొదోయ్, ఉండ్రి రోజి పెర్రి దేవుణుదిజ్ వందనమకు వెప్పి దనిజ్ ముక్కెజ్ కిజి, “ఇక్క మీ వందిజ్ సీజని నా ఒడోల్. నజీ ఎత్తు కిజి యా లెకండ్ కిజి మండ్లు”, ఇజి వెప్సాన్.

25 అయా లెకండ్ న బోజనం కిత్తి వెనుక వాండ్లు ద్రాసకాలు మని గిన్ను పెర్రి, “యా గిన్ను నా నలదాన్ కిజిని కొత్త ఒపుమానం, మీరు యా గిన్నుదిక ఉణి ఎస్తివలెబా నజీ ఎత్తు కిజి యా లెకండ్ కిజి మండ్లు”, ఇజి వెప్సాన్.

26 అందెజె మీరు యా రొట్టె తింజి యా గినాది ద్రాసకాలు ఉణి ఎస్తివలెబా ప్రబు మరజి వానిదాక వన్ని సాపుదిజ్ సాటిసీనిదెర్.

27 అందెజె ఎయెన్ బా తగ్గికాన్ ఆవిండ ప్రబు ఏర్పాటు కిత్తి బోజనమదు రొట్టె తింజి గినాదిక ఉటిజ, వాండ్లు ప్రబు ఒడోల్ దిజ్ వన్ని నలదిజ్ పడిఎండ పాపం కినికాన్ ఆజినాన్.

28 అందెజె రొట్టెని గినాదిక ఉణి ముజాల్ ఒరెన్ ఒరెన్ వన్నిజ్ వాండ్రె నాను తగ్గికాండ్రా ఇజి నుడెజి ఆదెజ్ వలె.

29 గాని ఎయెన్ బా యాక ప్రబు ఒడోల్ ఇజి నిజం నెన్ ఎండ ఉణి తినికాన్ వన్ని మున్ను వాండ్రె సిక్కు తపె ఆని వందిజ్ ఉణిజి తింజినాన్.

30 అందెజె మీ లోఇ నండ్రిండార్ సత్తు సిల్లికాన్ ని జబుజ్ మనికార్ ఆతార్. నండ్రిండార్ సాత సాహార్.

31 గాని మజి మాటె నెగెన్ సుడెజి ఆతాట్ ఇహిజ దేవుణు తీర్పుదు రెఎండ తప్తె ఆతాట్ మరి.

32 మాటు ప్రబు బాణిజ్ తీర్పు తీర్పె ఆతాట్ ఇహిజ, యా లోకమది వరిజ్ సీని సిక్కుదు రెఎండ ప్రబు మజి బుద్ది వెప్పి సిక్కుదాన్ దిదిజినాన్.

33 అందెజె నా తంబెరిజాండె, మీరు కూడెజి వాజి బోజనం కినివలె మహివరి వందిజ్ కావ్ కిదు.

34 మీరు కూడెజి వాజినిక సిక్కుదిజ్ గురి ఆవిండ మండ్రెజ్ ఇజి ఎయెరిజిబా బజి కట్టిజి వాండ్లు వన్ని ఇండ్రెన్ బోజనం కిదిజ్ వలె. నాను వానివలె మరి మని సజతిజి వందిజ్ వెప్పాలె.

12

దేవుణు ఆత్మ సీని వరమకు.

1 తంబెరిజాండె, దేవుణు ఆత్మ సీజని వరమకాజ్ వందిజ్ మీరు నెగెండ నెసి మండ్రెజ్ ఇజి నాను కోరిజన.

2 దేవుణుదిజ్ నమ్మిఎండ మహివలె, ఇనికాదో ఉండ్రి సత్తుదాన్ ఎయెండ్రో మిజి నడిపిస్తి మహి లెకండ్ మీరు సొన్ని వర్గి ఇ బోప్పెజి మాడిసి మహిదెర్ ఇజి మీరు నెస్సిదెర్.

3 అందెజె, నాను మిజి వెప్పినిక ఇనిక ఇహిజ, దేవుణు ఆత్మదాన్ వర్గిజినికాన్ ఎయెన్ బా, “యేను సయెవ్ పొందితికాన్”, ఇజి వెప్సాజ్ నో, దేవుణు ఆత్మదాన్ ఆవిండ “యేను, ప్రబు ఆత మనాన్”, ఇజి వెప్సాజ్ నో అట్ ఎవ్.

4 దేవుణు ఆత్మ సీజని వరమకు నండ్రి రకమకు మన్నె. గాని అయా ఉండ్రె దేవుణు ఆత్మనె విజు వరమకు సీజినాన్.

5 మరి దేవుణు వందిజ్ కిదిజ్ అట్టి పణిజ్ నండ్రి రకమకు మన్నె, గాని ఒరెండ్రె ప్రబు వందిజ్ మాటు విజెటి పణి కిజినాట్.

6 జర్రిని సజతిజ్ నండ్రి రకమదికెజ్ మన్నె. గాని విజు వన్నా లోఇ, మరి విజెర్ లోఇ పణి కినికాన్ ఒరెండ్రె దేవుణునె.

7 విజెరెజ్ పణిదిజ్ వాని వందిజ్ ఇజి ఒరెన్ ఒరెన్ వన్ని వెట దేవుణు ఆత్మ కిజిని పణిజ్ తోరె ఆజినె.

8 ఎలాగ ఇహిజ, ఒరెన్ వన్నిజ్ దేవుణు ఆత్మదాన్ బుద్ది మని మాటిజ్ వెప్సాజ్ వరం సీజినాన్. మరి ఒరెన్ వన్నిజ్ గెణం మని మాటిజ్ వర్గిదిజ్ అయా దేవుణు ఆత్మనె వరం సీజినాన్.

9 మరి ఒరెన్ వన్నిజ్ అయా ఆత్మనె దేవుణు మున్ను నమకం సీజినాన్. మరి ఒరెన్ వన్నిజ్ అయా దేవుణు ఆత్మనె జబుజాణి వరిజ్ నెగెండ్రె కిదిజ్ వరం సీజినాన్.

10 మరి ఒరెన్ వన్నిజ్ బమూతి పణిజ్ సత్తుని, మరి ఒరెన్ వన్నిజ్ దేవుణు బాణిజ్ వాజిని మాటిజ్ వన్ని ప్రవక్త లెకండ్ వెప్సాజ్, మరి ఒరెన్ వన్నిజ్ ఆత్మజ్ ఎలాగ మర్రికెజ్ ఇజి నెస్సెజ్, మరి ఒరెన్ వన్నిజ్ ఆఇ ఆఇ బానిజ్ వర్గిదిజ్, మరి ఒరెన్ వన్నిజ్ బానిజి అర్థం కిజి నెస్సెజ్ దేవుణు ఆత్మ వరమకు సీజినాన్.

11 అయి ఉండ్రె దేవుణు అత్తునె వన్నిజ్ ఇస్టమాతి వజు ఒరెన్ ఒరెన్ వన్నిజ్ వరమ్కు సీబాజి సీజి యా పణిజ్ విజు కిజినాన్.

ఉండ్రె ఒడోలీని నండో బాగమ్కు.

12 ఒడోల్ ఉండ్రెనె, గాని నండో బాగమ్కు కూడోజి తయారీ అత మనాద్. నండో బాగమ్కు కూడోతికాదె గాని అవి కూడోజి ఉండ్రె ఒడోల్ అతి లెకెండెనె క్రిస్తుబా మనాన్.

13 ఎలాగ ఇహోజ, యూదురు అతిజ్బా, యూదురు అఇకారీ అతిజ్బా, వెటి పణి కినికాన్ అతిజ్బా, అక్కు మనికాన్ అతిజ్బా మాటు విజెటి ఉండ్రె ఒడోల్దు ఉండ్రె అత్తుదానె బాప్తీసం లాగి అతాట్. అయి ఉండ్రె దేవుణు అత్తుదానె మా మన్నుజ దేవుణు మజి సిత మనాన్.

14 ఒడోల్ ఇహోజ నండో బాగమ్కాణిజ్ తయారీ అతిక. ఉండ్రె బాగమ్దాన్ తయారీ అతిక అవిద్.

15 అందెజె, “నాను కియు అవి, అందెజె నాను ఒడోల్దు మనిక అవి”, ఇజి పాదం వెప్తాజ, అక్కు ఒడోల్దు మంజినిక అవిండ అజినాదా?

16 మరి, “నాను కణక అవి, అందెజె నాను ఒడోల్దు మనిక అవి”, ఇజి గిబ్బి వెప్తాజ, అక్కు ఒడోల్దు మంజినిక అవిండ అజినాదా?

17 ఒడోల్ విజు ఉండ్రె కణకానె అతిజ, ఎలాగ విండ్రెజ్ అనాద్? ఒడోల్ విజు గిబ్బి ఉండ్రె అతిజ, వాసనం నూణిక ఎంబె మంజినాద్?

18 గాని ఉండ్రె ఉండ్రె బాగం ఎలాగ మండ్రెజ్నో, అయా లెకెండె దేవుణు వన్నిజ్ ఇస్టమాతి లెకెండె ఒడోల్దు ఇట్టా మనాన్.

19 అకెజ్ విజు ఉండ్రె బాగం అతిజ ఒడోల్ ఎంబె?

20 అకెజ్ మని లెకెండె నండో బాగమ్కు మన్నె గాని ఒడోల్ ఉండ్రె.

21 అందెజె, కణక కియుదిజ్, “నీను నజి అక్కర్ సిల్లెద్”, ఇజి వెప్తాజ్ అట్విద్. బుర్ర పాదమ్కాజ్, “మీరు నజి అక్కర్ సిల్లెద్”, ఇజి వెప్తాజ్ అట్విద్.

22 అక్కాద్ అవిండ, ఒడోల్దు కూడోతి మని సత్తు తకు అతి బాగమ్కాజ్, అక్కెజ్ మండ్రెజ్ అక్కర్ సిల్లెద్ ఇజి డిస్సిస్ట్రెజ్ అట్విద్.

23 ఒడోల్దు ఎమెణి బాగమ్కాజ్ గవరం సిల్లికెజ్ ఇజి మాటు ఒడోబిజి నాటో వన్నాజ్ మరి నండో గవరం మని లెకెండె తయారీ కిజినాట్. నుడోదెజ్ సొకు తోరిక బాగమ్కాజ్ ఒడ్డె అందం వాని లెకెండె కిజినాట్.

24 ఒడోల్దు మని అందం మని బాగమ్కాజ్ మరి నెగెండె నుడోదెజ్ అక్కర్ సిల్లెద్. గాని దేవుణు విజు బాగమ్కాజ్ కుడుఱి ఒడోల్దు ఇట్టివలె, మర్యాద తకు మని వనకాజ్ లావ్ మర్యాద సితాన్.

25 అందెజె ఒడోల్దు గొడోబెజ్ మనవిండ విజు బాగమ్కు ఉండ్రె మరి ఉండ్రె బాగం వందిజ్ నెగెండె నుడోజి మంజినె.

26 ఉండ్రె బాగమ్దు కస్టం వాతిజ, బాగమ్కు విజు కూడోజి దని వెట కస్టమ్దు మంజినె. ఉండ్రె బాగమ్దిజ్ గవరం దోహక్కి వలె, బాగమ్కు విజు దనివెట కూడోజి నర్త అనె.

27 ఏలు, మీరు క్రిస్తు ఒడోల్ అతి మనిదెర్. ఒరెన్ ఒరెన్ ఉండ్రె బాగం అత మనాద్.

28 మరి దేవుణు నజుమ్దు ముజ్జాల నెగెండోరిజ్ అపొస్తురు ఇజి, వెనుక మరి నెగెండోరిజ్ దేవుణు ప్రవక్తరు ఇజి, దని వెనుక నెగెండోరిజ్ దేవుణు మాటజ్ నెస్పిసనికారీ ఇజి, దని వెనుక నెగెండోరిజ్ బమ్మాతి పణిజ్ కినికారీ ఇజి, దని వెనుక మనికారీ ఇజి, నెగెండోరిజ్ మహి వరిజ్ సాయం కినికారీ ఇజి, మరి నెగెండోరిజ్ నడిపిస్సికారీ ఇజి, మరి నెగెండోరిజ్ అఇ అఇ బాసెజ్ వర్షినికారీ ఇజి ఏర్పాటు కిత మనాన్.

29 విజెరె అపొస్తురునా? విజెరె దేవుణు ప్రవక్తరునా? విజెరె దేవుణు మాటజ్ నెస్పిసనికారీనా? విజెరె బమ్మాతి పణిజ్ కినికారీ?

30 విజెరె జబుజాణి వరిజ్ నెగెండె కిదిజ్ వరం మనికారీ? విజెరె అఇ బాసెజాణిజ్ వర్షిజినారీ? విజెరె అయి బాసెజ అర్థం కిజి వెస్పినారీ?

31 గాని వరమ్కు లొఇ గొప్ప వెరి వన్నా వందిజ్ అన అజి మండ్రు. ఏలు నాను మిజి గొప్ప నెగ్గి సరి తోరిసినాలె.

13

విజు దనిజ్ పెరిక ప్రేమ

1 నాను లోకుర్ వర్గిణిని విజు బాసెజాణిజ్ వర్గిణిజ్ బా, దేవుణు దూతార్ వర్గిని బాసెజాణిజ్ వర్గిణిజ్ బా, నాను ప్రేమ సిల్లికాన్ ఇహిజు పణిదిజ్ రెజ కంసు, సిల్లిజు టిజ్ టిజ్ పలక్కి తాలిబిలెజ్ లెకెండెన్.

2 నాను దేవుణు ప్రవక్త లెకెండె వరం మనికాన్ ఆతిజ్ బా, డాజితి మని విజు సజతిజ్ నెస్సెజ్ అట్టికాన్ ఆతిజ్ బా, విజు గెణం మనికాన్ ఆతిజ్ బా, గొరొకాజ్ బస్సిసిని నమకం మనికాన్ ఆతిజ్ బా ప్రేమ సిల్లికాన్ ఇహిజు నాను పణిదిజ్ రెజక.

3 నజి కల్గితి మనికెజ్ విజు బీద వరిజ్ సిత్తిజ్ బా, సినుదు సుర్దెజ్ నా ఒడొలె ఒవజ్ ప్పిజ్ బా, ప్రేమ సిల్లికాన్ ఇహిజు నాను కినిక పణిదిజ్ రెజక.

4 ప్రేమ మనికాన్ నండె ఒరిసి నాన్. వాండ్రు మహి వరి ముస్కు దయ మనికాన్ ఆనాన్. వాండ్రు గోన ఆవెన్. వాండ్రు పొజిజినికాన్ ఆవెన్. వాండ్రు గర్త ఆవెన్.

5 ప్రేమ మనికాన్ మర్యాద సిల్లెండె మనికాన్ ఆవెన్. వాండ్రు నజి నానె నెగెండె మండ్రెజ్ ఇజి ఒడొబినికాన్ ఆవెన్. వాండ్రు బేగి కోపం ఆవెన్. వాండ్రు వన్ని వెట కిత్తిమని సెఇ వన్యా వందిజ్ మున్నుదు ఇడొజి మన్వెన్.

6 ప్రేమ మనికాన్ సెఇ వన్యా వందిజ్ సర్ద ఆవిండ, నిజమాతి వన్యా వందిజ్ సర్త ఆజినాన్.

7 ప్రేమ మనికాన్ ఎస్సివలెబా సణిజిఎండె విజు సెమిస్సాన్. వాండ్రు ఎస్సివలెబా మహివరి వందిజ్ నెగ్గెకెజ్ నమ్మిజి మంజినాన్. వాండ్రు ఎస్సివలెబా ఆనదాన్ ఎర్దు సుడొజి మంజినాన్. వాండ్రు ఎస్సివలెబా డిజిఎండె ఒరిసి మంజినాన్.

8 ప్రేమ ఎలాకాలం మంజినాద్. దేవుణు ప్రవక్త లెకెండె వెప్రాజ్ మని వరం ఎలాకాలం మన్వెద్. ఆఇ ఆఇ బాసెజ్ బా వర్గినికబా ఎలాకాలం మన్ఉలె. గెణమ్ బా సిల్లెండె ఆనాద్.

9 ఎందనిజ్ ఇహిజు ఏలు మాటు సెగమ్ నెస్ట మనాట్. సెగమ్ నె దేవుణు ప్రవక్త లెకెండె వెప్పినాట్.

10 గాని పూర్తి ఆతిక వానివలె పూర్తి ఆఇక నిల్లెండె ఆనాద్.

11 నాను ఇజిరికాన్ మహివలె ఇజిరి వన్ని లెకెండె వర్గిత. ఇజిరి వన్ని లెకెండె ఒడొబిజ్. ఇజిరి వన్ని లెకెండె ఆలోసనం కిత. పెరికాన్ ఆతివలె ఇజిరికాన్ మహివలె మని పణిజ్ డిజిస్ట సిత్త.

12 ఏలు అడ్డమదు సుడొబి లెకెండె ఉండ్రీ బొమ్మనె సుడొజినాట్. నస్సివలె మొకొం నిండ్రు సూణాట్. ఏలు సెగమ్ నెస్సాట్, నస్సివలె దేవుణు నజి ఏలు నెస్సిమని లెకెండె పూర్తి నెస్సాట్ లె.

13 అహిజు దేవుణు ముస్కు మని నమకం, ఆనదాన్ ఎర్దు సుడొజి మంజినిక, ప్రేమ యా మూండ్రీబా నిల్పి మంజినె. గాని వినుక లొఇ గొప్ప నెగ్గెకె ప్రేమనె.

14

దేవుణు ఆత్మ సీని వరమ్ కు.

1 మీ బత్తుదు ప్రేమనె ముజాల మనిద్. దేవుణు ఆత్మ సీని వరమ్ కాజ్ వందిజ్ ఆన ఆజి మండ్రు. దేవుణు ప్రవక్తరు ఆదెజ్ ఆన ఆదు.

2 ఎందనిజ్ ఇహిజు, ఆఇ బాసెజు వర్గినికాన్ లోకుర్ వెట ఆవిండ దేవుణు వెటనె వర్గిణినాన్. నిజమె లోకు ఎయెంబా వాండ్రు వర్గినికెజ్ అర్తం కిదెజ్ అట్వెన్. గాని వాండ్రు వన్ని ఆత్మదాన్ దేవుణుదిజ్ సెందితి డాజితి మని సజతిజ్ వర్గిణినాన్.

3 గాని, దేవుణు ప్రవక్తరు లెకెండె వర్గినికాన్ లోకుర్ వెటనె వర్గిణినాన్. లోకుర్ మున్నుదు సత్తు మనికార్ ఆదెజ్, వరిజ్ దయరం వెప్రాజ్, మరి ఒదరిస్సెజ్ ఇజి.

4 ఆఇ బాసెజ్ వర్గిణినికాన్ వన్నిజ్ వాండ్రె దయరం కిబె ఆజినాన్. గాని దేవుణు ప్రవక్తరు లెకెండె వర్గినికాన్ సజమదు మని వరిజ్ ఉసార్ కిజినాన్.

5 మీరు విజెదెరె ఆఇ బాసెజాణిజ్ వర్గినికిదెరె ఆదెజ్ ఇజి నాను కోరిజిన. గాని దేవుణు ప్రవక్తరు లెకెండె ఆదెజ్ ఇజి లావ్ ఆన ఆజిన. ఆఇ బాసెజాణిజ్ వర్గినికాన్, సజమదిజ్ దయరం వెప్రాజ్ ఇజి ఆఇ బాసెజాణిజ్ వర్గిని మాటిజు అర్తం కిజి వెవ్ఎండె మహిజు, దేవుణు ప్రవక్తరు వన్నిజ్ ఇంక పెరికాన్ ఆజినాన్.

6 తంబెరిజాండె, నాను మీ డగ్గు వాజి, దేవుణుది డాఃజితి మని సజతిజ్ దేవుణు తోరిస్తికెజ్నో, గెణం మాటెజ్నో, దేవుణు ప్రవక్త లెకెండ దేవుణు సిత్తి మాటెజ్నో మీ వెట వర్గిఎండ, ఆజ బాసెజాణిజ్ వర్గిజ మహిజ నా వెట మీజి ఇని లాబం వానాద్?

7 అయా లెకెండెనె, పలక్కివలె సెవుడుః వాజిని పాణం సిల్లి వస్తుజ్ అతి, టొయ్ల గాని పిరుడిః గాని పలక్కివలె ఇని తేడ సిల్లెండ ఉండ్రె లెకెండ పలక్కి మహిజ, ఊక్తి మనిక ఇనిక, పలక్కి మనిక ఇనిక ఇజి ఎలాగ నెస్తెజ్ ఆనాద్?

8 విదెమ్దిజ్ సొండ్రెజ్ ఇజి సయ్నమ్ది వరిజ్ కూక్తెజ్ జోడు బాంగ పలక్కివలె వరిజ్ అర్దమానిలెకెండె నెగెండ జాటు సెఎండ మహిజ, విదెమ్దిజ్ సొండ్రెజ్ సయ్నమ్దికార్ తయార్ ఆనారా?

9 అయాలెకెండెనె మీరుబా వెయుదాన్ నెగెండ వర్గిఎండ మహిజ, మీరు ఇనిక వర్గిజనిదెర్ ఇజి వినికార్ ఎలాగ అర్దం కిదెజ్ అట్నార్? మీరు గాలి వెటనె వర్గినికిదెర్ ఆజినిదెర్.

10 యా లోకమ్దు నండో బాసెజ్ మన్నె ఇని దనిజ్ ఇని అనుమానం సిల్లెద్. గాని వన్కా లోజ ఉండ్రెబా అర్దం సిల్లిక అవద్.

11 ఒరెన్ వర్గిని మాటెజ నాను అర్దం కిదెజ్ అట్ఎండ మహిజ, నాను వర్గిని వన్నిజ్ ఆజ దేనెమ్ది వన్ని లెకెండె ఆనాలె. వర్గినికాన్ నజిబా ఆజ దేనెమ్ది వన్ని లెకెండె మంజినాన్.

12 మీజిబా అయాలెకెండెనె మంజినాద్. మీరు దేవుణు ఆత్మ సీజిని వరమ్కాజ్ వందిజ్ నండో ఆస ఆజి మంజినికిదెర్. అందెజె సజమ్దిజ్ పిరిప్పి వందిజ్ అయా వరమ్కాజ్ నండో పజి కిదు.

13 అందెజె దిన్ని వందిజ్, ఆజ బాసదాన్ వర్గినికాన్, బాసెజ అర్దం కిజి వెస్తాజ్ అట్టి లెకెండె పార్దనం కిదెజ్ వలె.

14 అహిజ, నాను ఆజ బాసదాన్ పార్దనం కిజి మహిజ, నా ఆత్మ పార్దనం కిజినాద్. గాని నా గర్భం కాలి మంజినాద్.

15 అందెజె నాను ఇనిక కిదెజ్ వలె? నాను నా ఆత్మదాన్ పార్దనం కిన. గాని నా మన్నుదాన్బా నాను పార్దనం కినాలె. నాను నా ఆత్మదాన్ పాటెజ్ పార్పు. గాని నా మన్నుదాన్బా పాటెజ్ పార్పాలె.

16 మీరు మీ ఆత్మదాన్ దేవుణుదిజ్ పాగిడిఃజి మహిజ, మీరు దేవుణుదిజ్ వందనమ్కు వెప్పినిదెర్. మీరు వర్గిని మాటెజ అర్దం కిదెజ్ అట్ఇకాన్ ఒరెన్, మీరు వెప్పిని వందనమ్దిజ్, ఎలాగ మీ వెట కూడిఃజి, “అమెన్” వెస్తాజ్ అట్నాన్.

17 మీరు ఇహిజ ఒద్దె నెగెండ దేవుణుదిజ్ వందనమ్కు వెప్పినిదెర్. గాని ఆఇకాన్ దయరం కిబె ఆదెజ్ అట్ఎన్.

18 నాను మీజి విజెరిజ్ ఇక నెగెండ ఆజ బాసెజాణిజ్ వర్గిజని వందిజ్ దేవుణుదిజ్ వందనమ్కు వెప్పిన.

19 గాని సజమ్దు ఆజ బాసెజాణిజ్ పది వెయుజ్ మాటెజ్ వర్గిని దనిజ్ ఇక మహివరిజ్ నెప్పిన్ని లెకెండె బుద్దిదాన్ కూడిఃతి అయ్దు మాటెజ్నె నాను వెన్నా.

20 తంబెరిజాండె, మీరు ఇజెరి కొడోజ్ ఒడ్ఃబిని లెకెండ ఒడ్ఃబిజి మంజనిక డిసి సీదు. సెజ వన్కా వందిజ్ లేత కొడోజ్ లెకెండె మండ్రు. గాని ఒడ్ఃబినిబాన్ పెరికిదెర్ ఆదు.

21 “ఆజ బాసెజ్ వర్గిజని ఆజ దేనెమ్ది లోకుర్ నా వందిజ్ విరి వెట వర్గితిజ్బా వారు గిబిజ్ ఒడ్ఃజి నా మటెజ్ వినవెర్”, ఇజి ప్రబు వెప్పినాన్ ఇజి దేవుణు మాటదు రస్త మనాద్.

22 అందెజె ఆజ బాసెజ్ వర్గినిక, నమ్మిజ వరిజ్ దేవుణు సత్తుదిజ్ ఉండ్రె గుర్తు లెకెండెనె మనాద్ ఇజి మాటు దేవుణు మాటదాన్ నెస్నాట్. నమ్మిత్తి వరిజ్ అవద్. గాని దేవుణు ప్రవక్తరు వెప్పిని మాటెజ్, నమ్మిత్తి వరి వందిజ్ రుజువ్ అజిని గాని నమ్మిజ వరివందిజ్ అవద్.

23 అందెజె సజమ్దు మనికార్ విజెరి కూడిఃజి వానివలె విజెరి ఆజ బాసెజాణిజ్ వర్గిజ మహిజ, యాక అర్దం కిదెజ్ అట్ఇకానో, నమ్మిజకానో లోజ వాతిజ, మీరు బుద్ది నెగెండ సిల్లెండ ఆజి వర్గిజనిదెర్ ఇజి వారు వెహొపారా?

24 గాని ఒరెన్ నమ్మిఇకాన్ గాని దిన్ని వందిజ్ నెన్ఇకాన్ గాని లొఱ వాతిజ, విజిదెర దేవుణు ప్రవక్తరు లెకెండ్ వెప్పి మహిజ, వెని మాటెజాణిజ్ వాండ్రు కిత్తి మని తప్పుజ వందిజ్ ఎత్తు కిజ వన్ని మన్నుదు ఒడిఃబిజ బవుకొణాన్. మీరు వెప్పిని మాటెజాణిజ్ వన్నిజ్ వాండ్రె తీర్పు కివి ఆనాన్లె.

25 మరి వన్ని మన్నుదు డాఃజితి మనికెజ్ విజు వెల్లి తోర్పు. అయావలె, “నిజమె దేవుణు మీ వెట మనాన్”, ఇజ బమ్మ ఆజి వాండ్రు ముణుకుజ్ ఊరెజి దేవుణుదిజ్ పొగిడిఃజి మాడిఃస్నాన్లె.

దేవుణుదిజ్ పొగిడిఃజి మాడిఃస్నిక ఎలాగ మండ్రెజ్.

26 అహిజ తంబెరిజాండె, మాటు ఇనిక వెప్తాజ్? మీరు కూడిఃజి వానివలె, ఒరెన్, ఉండ్రె పాటిజ్ పార్డెజ్ వలె ఇజనాన్. మరి ఒరెన్ బుద్ది మాటెజ్ నెస్పిస్తాజ్ వలె ఇజనాన్. మరి ఒరెన్ డాఃజితి మనిక దేవుణు తోరిస్తికెజ్ వెప్తాజ్ వలె ఇజనాన్, మరి ఒరెన్ ఆజి బానిజాణిజ్ వర్గిదెజ్ వలె ఇజనాన్, మరి ఒరెన్ బానిదిజ్ అర్లం వెప్తాజ్ వలె ఇజనాన్, యాకెజ్ విజు సజమదు మని వరిజ్ దయరం వాని వందిజ్ కిదెజ్వలె.

27 ఆజి బానిజ వర్గినికార ఒరెనొ రివిరెన్ వర్గిదెజ్ వలె. రివిరెజ్ మిస్సిజ ముఎర వర్గిదెజ్ వలె. గాని విజెరి ఒర్పె వర్గిఎండ, ఒరెన్ ఒరెన్ వర్గిదెజ్ వలె. ఎయెరబా దనిజ్ అర్లం వెప్తాజ్ వలె.

28 ఆజి బానిజ వర్గిని దనిజ్ అర్లం కిజి వెప్పికాన్ సిల్లెండ మహిజ, ఆజి బానిజాణిజ్ వర్గినికాన్ సజమదు పల్లక మండ్రెజ్. వాండ్రు వన్ని మన్నుదు వర్గిజి దేవుణు వెట వర్గిదెజ్ వలె.

29 దేవుణు ప్రవక్తరు లెకెండ్ వర్గినికారబా రివిరెనొ, ముఎరెనొ వర్గిదెజ్ ఆనాద్. మహికార వెప్పి దనిజ్ నెగెండ వెంజి, ఇనిక వెప్పినార ఇజి జాగర్త సుడిఃదెజ్వలె.

30 డర్పు బస్తిమని మరి ఒరెన్ దేవుణు ప్రవక్తెజ్ ఇనికాబా దేవుణు బాణిజ్ తోరి ఆతిజ, ముజాల వర్గిజి మంజినికాన్ పలక మండ్రెజ్ వలె.

31 విజెరిజ్ నెస్పిసిని వందిజ్, విజెరిజ్ దయరం వెప్పి వందిజ్, మీరు విజిదెర ఒరెన్ వన్ని వెనుక మరి ఒరెన్ దేవుణు బాణిజ్ వాజిని మాటెజ్ దేవుణు అత్మ నడిఃపిన్ని లెకెండ్ వర్గిదెజ్ ఆనాద్.

32 ప్రవక్తరు లొఱ మని వరి అత్మ ప్రవక్తరిజ్ లొజిజి మంజినాద్.

33 ఎందనిజ్ ఇహిజ దేవుణు సమాదానమదిజ్ దేవుణునె గాని గగోలిదిజ్ దేవుణు అవెన్.

34 విజు దేవుణు సజమకాజ్ మని లెకెండ్, సజమదు పొగిడిఃజి మాడిఃస్నివలె, బోదెక్ గగోల్ ఆజి వర్గిజి మండ్రెజ్ అవెద్, పలక మండ్రెజ్ వలె. సజమదు అవిక వర్గిదెజ్ అవెద్. గాని మోసా రాస్సి రూలుదు వెప్పి మని లెకెండ్ అవిక అఱిజిజి మండ్రెజ్.

35 వరిజ్ ఇనికబా నెస్పెజ్ ఇహిజ, ఇండ్రె వన్కా వన్కా మూనిరిజ్ వెన్బాదెజ్ వలె. సజమదు బోదెలి వర్గిజి మంజినిక దనిజ్ సిగు.

36 మీరు ఇనిక ఒడిఃబిజనిదెర? దేవుణు మాటెజ్ మీరె రాస్సి తయారె కిత్తిదెరా? అక్క మిజినె అక్క దొవ్క మనాదా?

37 ఎయెనబా వాండ్రు దేవుణు ప్రవక్త ఇజి ఒడిఃబిజనాన్ ఇహిజ, దేవుణు అత్మ సిత్తి వరమకు మనికాన్ ఇజి ఒడిఃబిజి మహిజబా, వాండ్రు నాను మిజి రాస్సి మనికెజ్ ప్రబుబాణిజ్ వాతి అడ్రెజ్ ఇజి తవ్వెండ ఒప్పుకొండిజ్ వలె.

38 ఎయెనబా యాక నెక్కి పొక్కిజ, వన్నిజ్ వాండ్రె నెక్కి పొక్కి ఆనాన్లె.

39 అందెజి నా తంబెరిజాండె, దేవుణు ప్రవక్తరు అదెజ్ ఆస ఆజి మండ్రు. గాని ఆజి బానిజాణిజ్ వర్గిని వరిజ్ అడ్డు కిమాట్.

40 గాని విజుబా నెగెండ మర్యాదదాన్ తగ్గి లెకెండ్ కిదెజ్ వలె.

15

క్రీస్తు సాతి వరిబాణిజ్ మర్తి నిజితి వందిజ్.

1 తంబెరిజాండె, నాను మీ నడిఃమి సాటిస్సి సువార్త వందిజ్ మరి మిజి ఎత్తు కిబిస్సెజ్ ఇజి నాను కోరిజన. మీరు డర్పు కిజి నమ్మిత్తి అయ సువార్త, దన్నిజ్ తగితి లెకెండ్ మండ్రెజ్ ఇజి నిరెణం కిత్తిదెర.

2 నాను మిజీ వెప్తా మని అయా సువార్తదానె దేవుణు మిజీ రక్తిస్తు మనాన్. అందెజె నాను వెప్తా మని మాటెజ్, మీరు నెగెండ అసి అయాలెకెండెనె మండ్రెజ్. సిల్లెండ మహిజ మీరు దేవుణు మున్ను ఇట్టి నమకం నిజం ఆవిండ మంజినాద్.

3 దేవణు బాణిజ్ నజీ దొవ్కెక్తి మన్నిక, నాను మిజీ ఒప్పుజెప్తి మని వన్నా లొణ గొప్పు ముకెలమతిక ఇనిక ఇహిజ, ముజాల దేవుణు మాటదు రాస్తి మహిక పూర్తి కిత్తి లెకెండ, క్రీస్తు మా పాపమక వందిజ్ సాతాన్.

4 ముజాల దేవుణు మాటదు రాస్తి మహిక పూర్తి కిత్తి లెకెండెనె మూసె ఆతండ్రె మూండ్రె రోస్కాణిజ్ మర్జి నీకె ఆతాన్.

5 ముజాల పేత్తుజ్ని* వెనుక వన్ని సిసుర్ ఆతి వనెండు మన్సిరిజ్ తోరె ఆతాన్.

6 దన్ని వెనుక అయదు వందెజ మిస్తి నమ్మిత్తి తంబెరిజ ఒర్ని తోరె ఆతాన్. వరి లొణ సెగెండార సాత సాహార ఇహిజ్బా నండెండార ఏలుబా బత్తిజినార.

7 వెనుక వాండ్రు యాకోబుజ్ని అహిస్తురుజ్ విజెరిజ్ తోరె ఆతాన్.

8 విజెరిజ్ తోరె ఆతి వెనుక, కడెవేరిదు, నెగెండ పుట్ఇకానాతి నజీబా తోరె ఆతాన్.

9 అహిస్తురు లొణ విజెరిజ్ ఇంక పీన్కోడెః నానె. అహిస్తుడు ఇజి కూకె ఆదెజ్బా నాను తగితిక ఆవె. ఎందనిజ్ ఇహిజ నాను దేవుణు సజమేది వరిజ్ హిమనెజ్ కిత మన్ను.

10 ఏలు నాను ఇనిక ఆత మనానో, అక్క దేవుణు నజీ తోరిస్తి దయాదర్మమదానె ఆత మన్ను. అహిజ వాండ్రు నా మున్ను దయా దర్మం తోరిస్తిక దర్మమేదిజ్ సిత్తి లెకెండ ఆవెతాద్. విజెరిజ్ ఇంక నండ్రె కన్నబాడెజి నాను పణి కిత మన. గాని కన్నబాడెఃతిక నాను ఆవె, నజీ తోడెః మహి దేవుణు దయాదర్మమనె.

11 అందెజె నాను ఆతిజ్బా, వారు ఆతిజ్బా ఇక్కాదె మాపు సాటిన్త మనాన్.

సాతికార మరజి నీజ్ని వందిజ్.

12 గాని, క్రీస్తు సాతి వరి బాణిజ్ నీకె ఆత మనాన్ ఇజి సాటి ఆతి మహిజ్, సాతి వరి బాణిజ్ మరజి నీజ్నికె సిల్లెద్ ఇజి మీ లొణ సెగెండార ఎలాగ వెప్పినార?

13 సాతి వరిబాణిజ్ మరజి నీజ్నికె సిల్లెద్ ఇహిజ క్రీస్తుబా మరజి నీజ్నికె తాన్.

14 క్రీస్తు సాతి వరిబాణిజ్ మరజి నీజ్నికె తాన్ ఇహిజ మాపు సాటినిని సువార్త పణిదిజ్ రెఇక. మీరు దేవుణుదిజ్ నమ్మిత్తికబా పణిదిజ్ రెఇక.

15 అక్కాదె ఆవిండ, మాపు దేవుణు వందిజ్ అబద్దం వెప్పి సాసిర్ ఇజి తోరె ఆజినాద్. ఎందనిజ్ ఇహిజ దేవుణు సాతి వరిబాణిజ్ క్రీస్తుజ్ నిక్క మనాన్ ఇజి మాపు దేవుణు వందిజ్ సాసి వెప్తా మనావ్. సాతికార మర్జి నిజె ఆవెర ఇహిజ, దేవుణు క్రీస్తుజ్బా నిక్వెతాన్.

16 దేవుణు సాతి వరిజ్ మర్జి బత్తినిఎన్ ఇహిజ అయాలెకెండెనె దేవుణు క్రీస్తుజ్బా మరజి బత్తినిఎతాన్.

17 క్రీస్తు మర్జి నిజె ఆవెతాన్ ఇహిజ మీరు నమకం ఇడెఃతిక పణిదిజ్ రెఇక. మీరు ఏలుబా మీ పాపమక వందిజ్ దేవుణు సీని సిక్కదిజ్ తగ్గికిదెరె.

18 అక్కాదె ఆవిండ క్రీస్తుజ్ నమ్మిజి సాతికారబా నాననం ఆత సాహార.

19 యా బత్తుదునె వాండ్రు మజీ సాయం కినాన్, సాతిసాహి వెనుక సిల్లెద్ ఇజినె మాటు క్రీస్తు మున్ను ఆనదాన్ ఎర్దు సుడెఃజి మంజినికాట్ ఇహిజ, మా బత్తు విజెరిజ్ ఇంక హినమాతి బత్తు బత్తిజినాట్.

20 గాని, సాతి వరిబాణిజ్ తోలిత పండితి పంట లెకెండ, క్రీస్తు నిజమె సాతి వరిబాణిజ్ మర్జి నిజిత మనాన్.

21 ఇనిక ఇహిజ ఒరెన్ లోకు వెటనె సాపు వాతాద్. అయాలెకెండెనె సాతి వరిబాణిజ్ మర్జి నిజె ఆనికబా ఒరెన్ వన్ని వెటనె వాతాద్.

22 ఆదము వెట విజెరె ఎలాగ సాజినారో, అయాలెకెండెనె క్రీస్తు వెట విజెరె పాణం మనికార ఆనారె.

23 గాని ఒరెన్ ఒరెన్ వన్ని వర్నాదునె పాణం మనికార ఆనాన్. తోలిత పండితి పంట క్రీస్తు. వెనుక క్రీస్తు వానివలె వన్నిజ్ సెందితికార పాణం మనికార ఆనారె.

* 15:5 15:5 పేతురుజ్ కేప ఇజబా పేరు మనాన్.

24 దని వెనుక వాండ్లు యీ లోకముడు మని విజు సెజ సత్తుజ్ని, విజు అతికారముకాజ్, విజు సత్తుజు మాయిప్పి పోక్కి, వన్ని బుబ్బాతి దేవుణు ఏలుబడిః కిని వందిజ్ విజు ఒపజెప్పాన్లె. నస్తివలె విజు దన్నిజ్ అక్కర్ ఆనాద్లె.

25 ఎందనిజ్ ఇహిజు వన్నిజ్ పగాతి విజెరిజ్, వన్ని పాదముకు అడిఃగి దేవుణు ఇఢిఃనిదాక క్రిస్తు ఏలుబడిః కిజ మండ్రెజ్ వలె.

26 లోకురిజ్ విజెరిజ్ పగాతి సాపుదిజ్, కడఃవేరిదు వాండ్లు నానసం కినాన్లె.

27 దేవుణు, “విజు వనకాజ్ వన్ని పాదముకు అడ్డి ఇట్టాన్”, ఇజ దేవుణు మాటదు రాస్తు మనాద్. “విజు వన్యాజ్”, క్రిస్తు పాదముకు అడిఃగి ఇట్టా మనాన్ ఇజ వెప్పి వలె, విజు వనకాజ్ విని పాదముకు అడిఃగి ఇడ్డి మనికాన్ ఆతి దేవుణు అయ విజు వనకాజ్ వెట వన్నిజ్ వాండ్రె క్రిస్తు పాదముకు అడిఃగి ఇఢిః ఆఎన్ ఇజ టేట తోరజనాద్.

28 వాండ్లు యీ లెకెండ్ కిత్తి వెనుక, మరిన్ విజు వనకాజ్ వన్ని పాదముకు అడిఃగి ఇట్టి మనికాన్ ఆతి దేవుణుదిజ్, వన్నిజ్ వాండ్రె అణజిజి మంజినాన్లె. ఎందనిజ్ ఇహిజు దేవుణు ఒరండ్రె అయ విజు వన్యాజ్ ముస్కు అతికారం మనికాన్ ఆదెజ్ వలె.

29 సాతికారం మర్రి నీజ్నిక సిల్వెద్ ఇహిజు, సెగెండార్ కిని లెకెండ్ సాతి వరి వందిజ్ బాప్తిసం లాగి ఆని దనిజ్ ఇని అర్థం మనాద్? సాతికారం నిజె ఆఎర్ ఇహిజు ఎందనిజ్ లోకుర్ వరి వందిజ్ బాప్తిసం లాగి ఆదెజ్?

30 మరి సాతికారం మర్రి నీజ్నార్ ఇజి మాపు నమ్మివ్వి ఇహిజు ఎందనిజ్ సాపు తప్పిన్ని ప్రమాదముకాజ్ మాపు గురి ఆదెజ్.

31 తంబెరిజాండ్రె, ప్రబు ఆతి క్రిస్తు యేసుక్రిస్తు వెట మీరు కూడిఃతి వందిజ్ నాను నిజం ఎసా సర్ద ఆజినాన్ అయాలెకెండ్నె ఎస్తివలెబా నాను సవె ఆదెజ్బా అక్క మనద్ ఇజ నాను మిజి నిజం వెప్పిన్.

32 యీ లోకముదిజ్ సెందితి సజతిజ్ వందిజ్నె నాను ఎపెసి పట్టుముడు అడిఃవి జంతుజు వెట విద్దె కితానా? సాతికారం మర్రి నిజె ఆఎర్ ఇహిజు సజి ఇని లాబం మనాద్? సాతికారం మర్రి నీజ్ఎర్ ఇహిజు, “విగిహిజ్ సానాట్, అందెజె ఉణాట్ తినాట్”, ఇజ ఆకారం వెప్తిలెకెండ్నె మాటుబా కిదెజ్ వలె.

33 మీరు మెసెం కివె ఆజి తపు సరిదు సాన్యాట్. “సెజ వరివెట కూడిఃజి మనిజ్, సెగ్గి అలవాటుజ్ మనికారంబా పాడిః ఆజినార్”.

34 సెగ్గి బుద్ధి మనికిదెర్ లెకెండ్ మీరు మప్పి సాన్ని పాపం కిఎండ సీతినిజాయిదాన్ మండ్రు. ఎందనిజ్ ఇహిజు మీ లోక సెగెండార్ దేవుణు వందిజ్ నెన్ఎర్. మిజి సిగు కిదెజ్ ఇజిని ఇక్క నాను వెప్పిన్.

సాతికారం మర్రి నీజ్నివలె మంజిని ఒడొల్

35 సెగెండార్ యీ లెకెండ్ వెన్బానార్లెను, “సాతికారం ఎలాగ మర్రి నికె ఆనార్? ఎలాగ మర్రి ఒడొల్దాన్ వారు వానార్?”.

36 బుద్ధి సీలికిదెరా మీరు విత్తు విత్తువలె, అయ విత్తి విత్తు సబితిజాన్ దని బాణిజ్ మొక నేర్దినాద్.

37 సీను వితిక కూలిజ్గాని, మరి ఎమెణి విత్తుబగాని వహి విత్తునె విత్తిని. విత్తుక విత్తునె గాని నేర్దిన మొక్క ఒడొల్ ఆవద్గదె.

38 గాని దేవుణు వాండ్లు నిరణెం కిత్తి లెకెండ్ దనిజ్ ఉండ్రె ఒడొల్సీజినాన్. విత్తిమన్ని విజు రకముది విత్తుజు వనక వనక ఒడొల్ సీజినాన్.

39 కంట విజు ఉండ్రె ననిక అవద్. లోకు కంట ఉండ్రె రకం మనాద్. జంతు కంట మరి ఉండ్రె రకం, పొటి కంట మరి ఉండ్రె రకం, మొయ కంట ఉండ్రె రకం.

40 అయాలెకెండ్నె ఆగానముది వనకాజ్ని, బూమిదు మని వన్యాజ్ తేడ మంజినాద్, ఉండ్రె సనికెజ్ ఆఉ. విజు అంతం మనికెజ్ గాని వనక అంతం ఉండ్రె లెకెండ్ మన్వద్.

41 ఎలాగ ఇహిజు, పొద్దుది అందం ఉండ్రె రకం, నెలాది అందం మరి ఉండ్రె రకం, సుక్కెజు అందం మరి ఉండ్రె రకం. ఉండ్రె సుక్కెది అందం మరి ఉండ్రె సుక్కెది అందముదిజ్ తేడ మనాద్.

42 అందెజె సాతికారం మర్రి నిజె ఆనివలె అయాలెకెండ్నె మంజినాద్. బూమిదు మూసె ఆతి మని పీనుగు సబ్జి సానిక. గాని సబ్జి సానిక ఉండ్రె ఒడొల్దాన్ వారు నికె ఆనార్లె.

43 మూసె ఆతి పీనుగు సుడెదెజ్ బాగ సిల్లిక. సత్తు సిల్లిక. గాని నికె ఆజని ఒడోల్ అంతమని సత్తు మంజనిక ఆనాద్.

44 మూసె ఆజని పీనుగు యా లోకమ్దు బత్తిదెజ్ తగ్నాద్. గాని నికె ఆజని ఒడోల్ దేవుణు మంజని బాడిదు బత్తిదెజ్ తగ్గి. యా లోకమ్దు బత్తిదెజ్ తగ్గి ఉండ్రీ ఒడోల్ మనాద్ ఇహిజ దేవుణు మంజని బాడిదు బత్తిదెజ్ తగ్గి ఉండ్రీ ఒడోల్ బా మంజనాద్.

45 అందెజ్, “తొలిత లోకు ఆతి ఆదము బత్తిజని జీవు ఆతాద్”, ఇజ దేవుణు మాటదు రాస్త మనాద్. కడెవేరి ఆదము ఆతి క్రీస్తు సాణం సీజని ఆత్మ ఆతాన్.

46 పరలోకమ్దు బత్తిదెజ్ తగితి ఒడోల్ ముజాల రెవతాద్. యా లోకమ్దు బత్తిదెజ్ తగితి ఒడోల్ నె ముజాల వాతాద్. వెనుక పరలోకమ్దు బత్తిదెజ్ తగితి ఒడోల్ వానాద్.

47 తొలిత ఆదము యా బూమి దూలిదాన్ తయార్ ఆత మనాన్. వెనుకాహి ఆదము ఆతి క్రీస్తు దేవుణు మంజని బాడిదాన్ వాతాన్.

48 బూమిది దూలిదాన్ తయార్ ఆతి వన్ని బాణిజ్ పుట్టి మాటు వన్ని లెకెందెనె మంజనాట్. దేవుణు మంజని బాడిదాన్ వాతి వన్ని వెట కూడితికార్ దేవుణు మంజని బాడిదు బత్తిదెజ్ తగ్గికార్ ఆనార్లె.

49 ఏలు మాటు ఎలాగ బూమిదాన్ తయార్ ఆతి వన్ని మూర్తి లెకెందె మనాట్, అయా లెకెందెనె దేవుణు మంజని బాడిదాన్ వాతి వన్ని క్రీస్తు మూర్తి లెకెందె తయార్ ఆనాట్లె.

50 తంబెరికాండె, కండాని నలదాన్ తయార్ ఆతిమని యా ఒడోల్దాన్ మాటు దేవుణు కిజని ఏలుబడిదు సాన్సి మండ్రెజ్ అట్వెట్ ఇజ నాను మిజి కనితం వెహిన్. ఎందనిజ్ ఇహిజ సావు మని యా ఒడోల్కు సావు మనిగ బాడిదు మండ్రెజ్ అట్వెట్. అక్కె క్కొత్తాజి కిజి ఆదెజ్ వలె.

51 గిబ్బిజ్ ఒడోజి విండ్రు, నాను దేవుణుది డాజితి మని ఉండ్రీ సజతి మిజి తెలియ కిజన. మాటు విజెటి సావెట్. మాటు విజెటి మార్నాట్.

52 నచెమేదు, అహిజ ఉండ్రీ కణక రెవ డెయ్జి పెర్ని ముజాలె, కడెవెరిది పెరి జోడుబంగ పలక్కిజ సరి అక్క జర్గినాద్. జోడు బాంగ పలక్కివలె సాతికార్ సావు మనిగ ఒడోల్దాన్ నికె ఆనార్. ఏలుదాక బత్తిజని మాపు క్కొత్తాజి కిజి ఆతి ఒడోల్దాన్ మార్నాట్లె.

53 సబ్జి సాన్సిని మా యా ఒడోలుజు ఎసెజ్బా సబ్జి సాన్గ ఒడోలుజ్ లెకెందె మార్నెలె. నిజమె, సావు వాజని యా మా ఒడోలుజ్, సావు సిలి ఒడోలుజ్ లెకెందె క్కొత్తాజి మార్నెలె.

54 సబ్జి సాని మా ఒడోలుజ్, ఎసెజ్బా సబ్జి సాన్గ ఒడోలుజ్ లెకెందె మార్నెజ్ వలె. సావు వాజని మా యా ఒడోలుజ్, సావు సిల్లి ఒడోల్ లెకెందె మార్నెజ్ వలె. నస్తివలె దేవుణు మాటదు రాస్తి యా మాటెజ్ నిజం అనాద్, “సావు మున్సు పూర్తి గెలిస్తె వందిజ్, సావు మరి మనివెద్. సావు డిజె ఆతి లెకెందె వీజితాద్”.

55 “సావు మా మున్సు మరి గెలిస్తెజ్ అట్నాదా? మజి గుత్తెజ్ ఇజి సావుదిజ్ మరి సాప్పు మనాదా?”, ఇజి దిన్సి వందిజ్ దేవుణు మాటదు రాస్తి మనిక, నస్తివలె పూర్తి ఆనాద్.

56 సావు తపిసిని సాంపు పాపం. మాటు దేవుణు రూలుజు లోజిఎండ మంజనిక, మజి ఓడిస్తెజ్ పాపమేదిజ్ సత్తు ఆజనాద్.

57 మా ప్రబువాతి యేసుక్రీస్తుదాన్ మజి పాపమేదిజ్ని సావు మున్సు గెల్పిస్తె మన్ని దేవుణుదిజ్ వందనమకు.

58 అందెజ్, నాను ప్రేమిసిని తంబెరికాండె, ఇనికబా మిజి కధ్నిఎండ గటిజి నిల్పి మండ్రు. ఎస్తివలెబా దేవుణు వందిజ్ కష్టబాడోజి పణి కిదు. ఎందనిజ్ ఇహిజ ప్రబు వేట కూడోజి మీరు కష్టబాడోజి కిజని పణిజ్, ఎసెజ్బా పణిదిజ్ రెండోజి మనిఉ ఇజి నెని ఎస్తివలెబా పణి కిజి మండ్రు.

16

సమ్మిత్తి వరి వందిజ్ డబ్బు కుడుప్పిని వందిజ్ వెహిన్సిక.

1 దేవుణుదిజ్ సమ్మిత్తి వరి వందిజ్ డబ్బు కుడుప్పిని వందిజ్ ఇహిజ నాను గలాతియదు మని దేవుణు సజమకాజ్ వెహి మని లెకెందె మీరుబా కిదు.

2 నాను వానివలె, అయావలెనె కుడుఃపైజ్ తోఎండ, విజు ఆదివారమ్కాజ్ మీ లోఇ ఒరెన్ ఒరెన్ వన్నిజ్ దొహ్కాక్కిని దని బాణిజ్ ఉంఠ్రి వంతు కేట ఇణ్ణెజి వన్నిబాన్ కుడుఃప్పి ముండ్రెజ్ వలె.

3 అహోజ నాను వానివలె, మీరు తగ్గికార్ ఇజి ఎయెరిజ్ ఎర్లిసినిదెరో, వరిజ్ ఉత్తమ్కు రాసి సీజి మీరు కుడుఃప్పిని డబ్బు వరి కీడు యెరూసలెమ్దు పోక్కాట్.

4 నానుబా సోహోజ బాగ మంజినాద్ ఇజి తోరె అతిజ వారు నా వెట వానాల్లె.

5 అహోజ ఏలు నాను మాసిదోనియాదు సొన్ని అబ్బె మని దేవుణుడిజ్ నమ్మిత్తి వరిజ్ నెస్సిని ముండ్రెజ్ ఇజి ఒడిఃబిజిన. మాసిదోనియాదు సోహో వెనుక నాను మీ డగ్రు వాన.

6 నస్తివలె మీ డగ్రు నెగం రోన్సు ముండ్రెజ్ ఆనాద్ ఇజి, సిల్లిజి పణి కాలం విజు మీ బానె గడఃప్పా. ఎందనిజ్ ఇహోజ, అయావలె నాను ఎమేణి దరిజ్ సొండ్రెజ్నో, అయా పయనమ్దు నజి సాయం కిదెజ్ మీరు అట్టిదెర్.

7 ఏలు పయనమ్దు మీ డగ్రు వాజి మిజి దసూల్ ఆజి సొండ్రెజ్ నజి ఇస్టం సిల్లిద్. ప్రబుజ్ ఇస్టం ఇహోజ మీ డగ్రు నెగం కాలం ముండ్రెజ్ ఇజి ఆస ఆజిన.

8 గాని పెంతుక్కోస్తు* పండోయ్దాక ఇబ్బె ఎపెసి పట్టుమ్దునె నాను మంజినలె.

9 ఎందనిజ్ ఇహోజ, ఇబ్బె నెగండ సువార్త పణి జర్నిని లెకెండ్, తగ్గి నెగ్గి అవ్కాసం నజి దొహ్కాక్కు మనాద్. నజి ఎర్లిసినికారబా మనార్.

10 తిమోతాతి మీ డగ్రు వాతిజ, ఇని దనిజ్బా తియెల్అవండ మీ వెట మంజిని లెకెండ్ వన్నిజ్ నుణ్ణెజి ముంఠ్రి. ఎందనిజ్ ఇహోజ, నాను కిజిని లెకెండ్నె వాంఠ్రిబా ప్రబు పణి కిజినాన్.

11 ఎయెన్బా వన్నిజ్ ఇజిరి కణక నుణ్ణెదెజ్ అవెద్. వాంఠ్రి మర్రి నా డగ్రు వాదెజ్ వన్ని మన్నుదు సొర్లిదాన్ వన్నిజ్ పొక్కు. మహి తంబెరిజి వెట వాంఠ్రి వానాల్లె ఇజి నాను ఎర్దు నుణ్ణెజిన.

12 ఏలు తంబెరి ఆతి అపాలో వందిజ్ వెహ్కాక్ ఇమిక ఇహోజ, మహి తంబెరిజి వెట మీ డగ్రు సొండ్రెజ్ ఇజి నాను వన్నిజ్ బతిమాళిత గాని ఏలు వాదెజ్ వన్నిజ్ ఇస్టం సిల్లితాద్. గాని మరి ఎనెజిబా వాంఠ్రి అవ్కాసం దొహ్కాక్కివలె మీ డగ్రు వానాల్లె.

13 మీరు జాగర్త ముంఠ్రి. దేవుణు మున్ను మని నమకమ్దు గణిజి ముంఠ్రి. దయరమ్దాన్ ముంఠ్రి. సత్తుదాన్ ముంఠ్రి.

14 మీరు కిజిని పణిజ్ విజు ప్రేమదాన్ కిదు.

15-16 అక్కాయ ప్రాంతమ్దు తోలిత దేవుణుడిజ్ నమ్మిత్తికార్ సైపాసు ఇండ్రోణికార్ ఇజి మీరు నెస్సిదెర్గదె? దేవుణుడిజ్ నమ్మిత్తి వరి వందిజ్ పణి సాయం కిదెజ్ వరిజ్ వారి ఒపజెవె ఆత మనార్ ఇజిబా మీరు నెసినిదెర్. అందెజి తంబెరిజాండె, మీరు నిని వరిజ్ అణిజిజి ముంఠ్రి. అక్కాదె అవండ పణిదిజ్ కూణ్ణెజి వాని వరిజ్ని కన్నబాణ్ణెజి పణి కిజిని వరిజ్బా అణిజిజి ముండ్రెజ్ ఇజి నాను మీజి బతిమాల్లిన్.

17 మీరు వాదెజ్ అట్ఎండ మహోజబా, సైపాసుని పొర్మానాతు, అక్కాయికు ఇనికార్ వాతివలె నాను సర్త ఆత. ఎందనిజ్ ఇహోజ, మీ బాన్ నజి సీదెజ్ సిల్లితికెజ్ మీరు నజి సితార్.

18 నా మన్నుదిజ్, మీ మన్నుదిజ్ వారు సర్త కిత్తార్. ననికార్ గవరమ్దిజ్ తగ్గికార్.

19 ఆసియాదు మన్ని సజమ్కాణికార్ మీరు నెగెండ్ మనిదెరా ఇజి వెన్బాజినర్. అక్కూల, ప్రిస్కీల ఇనకార్ని వరి ఇండ్రో కూణ్ణెజి వాజిని నమ్మిత్తి వరి సజమ్బా ప్రబు పేరుదాన్ మీరు నెగెండ్ మనిదెరా ఇజి వెన్బాజినార్.

20 నమ్మిత్తి తంబెరిజ్ విజెర్త మీరు నెగెండ్ మనిదెరా ఇజినార్. దేవుణు వెట కూణ్ణెజి మన్ని వరిజ్ మీ ప్రేమ తోర్లిస్తు. నెగ్గి మన్నుదాన్ ఒరెన్ మరి ఒరెన్ వన్నిజ్ పొంబిజి వందనమ్కు వెప్తు.

21 పవులు ఇని నాను నా కియుదానె యా వందనమ్కు రాసిన్.

22 ఎయెన్బా ప్రబుజ్ ప్రేమిన్ఎండ మహోజ సయివ్ వన్ని మున్ను రపిద్. యేను ప్రబు వాజినాన్. రఱ ప్రబువా.

* 16:8 16:8 పదాయ ప్రవాణమ్దు ఇక్కు వారమ్క వండోయ్, మరి వంతు కొంబు వండోయ్ ఇజి వెహ్ ఆజినాద్. (నిర్గమ 34:22, 23:16) వెజెర్ వెట కూణ్ణెజి యా వండోయ్ కిదెజ్ ఇజి ఇస్టాయ్లు లోకుర్ యెరుసలెమ్దు మంద వాజి మహో. పెంతెక్కోస్తు ఇహోజ యాబయ్ ఇజి అర్థం. యాక్ వన్ను వండోయ్ ఆతి వెనుక యాబయ్ రోన్సు ఆనివలె ఆజినాద్.

23 ప్రబువాతి యేసుక్రీస్తు దయదర్శం మిజి తోడూః ఆజి మనీద్.

24 క్రీస్తుయేసు వెట కూడిఃతి మన్ని మీరు విజిదెరె వెట నా ప్రేమ మనీద్. ఆమెన్.

అపొస్తుడు ఆతి పవులు కొరింతి పట్టుమదు మని దేవుణు సజుమది వరిజ్ రాస్తి రుండి ఉత్తం

నెల్లు కిబిసినిక

ఇక్క అపొస్తుడు ఆతి పవులు కొరింతి సజుమది వరిజ్ రాస్తిమన్నిరుండి ఉత్తం. యా ఉత్తమదు పవులు వన్ని వందిజ్, మరి వాండ్లు ఎలాగ సువార్త పణి కిత్తాన్, మరి అయావల వన్నిజ్ ఇని ఇనికెజ్ జర్గితె ఇజ యా ఉత్తమదు లావ్ వెస్సానాన్. కొరింతి పట్టుమదు మన్ని దేవుణు సజుమదికార్ సెగిండార్, ఆఇవరి బోద వెంజి పవులు అపొస్తుడు ఆవన్ ఇజి వెహార్. దన్ని వందిజ్ జవాబ్ వెహాలెకెండ్ యా ఉత్తమదు నండ్ సజుతిజ్ రాస్తి మనాద్. దేవుణు ఇస్టమాతి వజి యేనుస్తబునె వన్నిజ్ అపొస్తుడు లెకెండ్ ఇడ్డాన్ ఇజి రుజువ్ కిజినాన్. వాండ్లు కిత్తి పణిదునె, వెహ్తి మాటదునె, వన్ని బత్తుదునె, ఇనికబా తప్పు మహిజ తోరిస్తి ఇజి వరిజ్ వెనబాజినాన్. నన్ని వరి వెట మొకొం నుడేజి వర్గిదెజ్ తయారాజి వాజినాన్ ఇజి వెహ్తి ఉత్తం ముగిసినాన్.

యేనుక్రీస్తు సాజ మరజి నిజితి వెనుక యాబ్బుయ్ ఆరునె యాబ్బుయ్ ఏడునె పంటిజ్ వెనుక యా ఉత్తం రాస్తిన్ ఇజి దిన్ని వందిజ్ నెస్తికార్ నమ్మిజినార్. పవులు మాసిదోనియదు మహివల బాణిజ్ యా ఉత్తం రాస్తి పోక్తాన్ ఇజిబా వారు నమ్మిజినార్.

1 దేవుణు ఇస్టమాతి వజి యేను క్రీస్తుజ్ అపొస్తుడు ఆతి పవులుని మా తంబెరి ఆతి మోతితి కొరింతి పట్టుమదు మని దేవుణు సజుమది వరిజ్ని అక్కాయ ప్రాంతమదు మని దేవుణుదిజ్ నమ్మితి వరిజ్ విజెరిజ్ రాసిని ఉత్తం.

2 మా బుబ్బాతి దేవుణు బాణిజ్ని ప్రబువాతి యేనుక్రీస్తు బాణిజ్ దయాదర్మమని నమాదనం మిజి మనిద్.

ఓదరిసిని దేవుణు

3 ఎస్తివలెబా మా మున్కు కనికారం మనికాన్ ఆతి బుబ్బు, ఎస్తివలెబా మజి ఓదరిసిని దేవుణు ఆతి, మా ప్రబు ఆతి యేనుక్రీస్తుజ్ బుబ్బు ఆతి దేవుణు పొగిడె; ఆపిన్.

4 ఎందనిజ్ ఇహిజ, విజు కస్టమకాజ్ దేవుణు మజి ఓదరిసిని ఓదర్పుదాన్ ఎలాగ మర్తి కస్టమదు మని వరిజ్బా ఓదరిస్తిజ్ మాపు సత్తుమనికావ్ ఆదెజ్ ఇజి వాండ్లు మా విజు కస్టమకాజ్ మజి ఓదరిసినాన్.

5 క్రీస్తు వెట కస్టమకు మా బత్తుదు ఎలాగ లావ్ఆజినెనె, అయాలెకెండ్నె క్రీస్తు వెట ఓదర్పుబా మా బత్తుదు నిండ్రేజి పొజిజి వాజినాద్.

6 మాపు కస్టమదు మనావ్ ఇహిజ అక్క మిజి దేవుణు బాణిజ్ ఓదర్పు దోహ్కెజ్ ఇజిని దేవుణు మిజి రక్నిస్తిజ్ ఇజినె మాపు కస్టమదు మనావ్. దేవుణు మజి ఓదరిస్తి మనిక మిజి ఓదర్పు దోహ్కెజ్ ఇజినె. ఎందనిజ్ ఇహిజ, మజి వాతిమని లెకెండ్ కస్టమకు మిజి వానివల, అయాలెకెండ్ మీరు డిసెన్ఎండ ఓరిసినివలె అయ ఓదర్పు ఎలాగ మర్తిక ఇజి మీరు నెసినిదెర్.

7 మజి వాతిమని కస్టమకాజ్ మీరు ఎలాగ మా వెట కూడేజి మంజినిదెర్, అయాలెకెండ్నె మా వెట ఓదర్పుదుబా కూడేజి మంజినిదెర్ ఇజి మాపు నెసినావ్. అందెజి మీ వందిజ్ మాపు ఆసదాన్ ఎర్దు సూణిక కర్లిఎండ మంజినాద్.

8 తంబెరిజెండా, ఆనియ ప్రాంతమదు మాపు ఓరిస్తిమని కస్టమకు మీరు నెన్ఎండ మండ్రెజ్ ఆవీద్ ఇజి మాపు కొరిజినావ్. మాపు సానావ్ఫెను ఇజి ఒడిబితావ్. మజి ఓరిస్తిజ్ అల్తెనని నసా కస్టమకు మజి వాతె.

9 నిజమె సాపుదిజ్ సిక్కు మజి దోహ్కె మనాద్ ఇజి మాపు ఒడిబితావ్. గాని మాపు, మా మున్కునె ఆదారం ఆవండ, సాతి వరిజ్ నిక్కి దేవుణు మున్కునె ఆదారం ఆదెజ్ ఇజినె ఇక్కెజ్ విజి మజి జర్గితె.

10-11 మీరుబా మా వెట కూడఁజి పార్దనం కిజి సాయం కిత్తిజ్, దేవుణు గొప్పు పెరి సావు నని కన్దం కాణిజ్ మజి తప్పిస్తాన్. మరి వాని కాలమ్దుబా తప్పినినాన్లె. వాండ్రు మరి ఎన్దివలెబా మజి తప్పిని మంజినాన్లె ఇజి వన్ని వందిజ్ నే మాపు ఆసదాన్ ఎర్దు సుడఁజి మంజినామ్. నంఠెండార్ పార్దనం కిత్తిజ్, దేవుణు బాణిజ్ అయ పార్దనమ్క వందిజ్ మజి కనికారం దొహ్కొత్తి వందిజ్, నంఠెండార్ మా వందిజ్ దేవుణుదిజ్ వందనమ్కు వెప్పాల్లె.

12 మా గర్బం వెప్పొని సాన్యం ఇనిక ఇహిజ, యా లోకమ్దు మని బత్తుదుబా, మరి మీవెట మన్ని విజి నజతిజ లోఇబా గర్బం గదిన్ఎండ దేవుణు సిత్తిమని నెగ్గి మన్నుదాన్, లోకమ్దు మన్ని వరి బుద్దిదాన్ ఆవిండ దేవుణు దయాదర్మమది సత్తుదాన్ బత్తితామ్. దిన్ని వందిజ్ మాపు పొగిడిజనామ్.

13 నదవిదెజ్నో, పూర్తి అర్దం కిదెజ్ అట్ఇ మాటెజ్నో మాపు మిజి రాన్సెజ్ సిల్లె.

14 ఏలు మీరు మజి సెగం నెన్సి మనిదెర్. గాని ప్రబు ఆతి యేను మర్తి వాని దినమ్దు మాపు మీ వందిజ్ పొగిడిజి వెహ్నామ్లె. అయాలెకెండ మా వందిజ్ పొగిడిజి వెహ్నాజ్ అట్టిలెకెండ మీరుబా నజి పూర్తి నెన్సిదెర్లె ఇజి మాపు ఆసదాన్ ఎర్దు సుడఁజి మంజినామ్.

15 యాలెకెండ మా మన్నుదు నమకం తవ్ఎండ మన్నిజ్, మిజి రుండి వంతుజ్ లాబం మండ్రెజ్ ఇజి ముజాల మీ డగ్గు వాదెజ్ ఇజి నజి ఉండ్రి ఉదెసం మహాద్.

16 ముజాల మీ డగ్గు వాజి మాసిదోనియ సాండ్రెజ్ ఇజి, మరి మాసిదోనియదాన్ మర్తి మీ డగ్గు వాజి, మీరె యూదయ దేసెం సాండ్రెజ్ మజి పొక్కిదెర్ ఇజి నాను ఒడిజిబిత.

17 యాలెకెండ కిదెజ్ ఇజి నాను ఒడిజిబితవలె, యాక ఇజిరి సజతి ఇజి నాను ఒడిజిబితానా?. “ఒబ” ఇజి వెప్పొ వెటన “ఆవిద్, ఆవిద్” ఇజి వెహ్నాజ్ యాకెజ్ నాను లోకమ్దిజ్ సెందితి లెకెండ కిజినానా?

18 దేవుణు నమ్మిదెజ్ తగ్గికాన్ ఇజి మన్ని లెకెండెనె, మాపు మిజి వెహ్నా మని మాటెజ్ ఎన్దివలెబా ‘ఒబ’ ఇజినె మంజినె, “ఆవిద్” ఇజి వెప్పొకెజ్ ఆఉ.

19 ఎందనిజ్ ఇహిజ, నావెట, సిలువాను వెట, తిమోతి వెట మీ నడిమి సాటి ఆతి మని దేవుణు మరిసి ఆతి యేనుక్రీస్తు ‘ఒబ’ ఇజినో ‘ఆవిద్’ ఇజినో అవతాన్. గాని వన్ని వెట అక్క, ఎన్దివలెబా ‘ఒబ’ ఇజినె మంజినాద్.

20 దేవుణు సితి ప్రమాణమ్కు ఎస్సాడు అతిజ్బా, అక్కెజ్ విజి క్రీస్తు వెట ‘ఒబ’ ఇజినె మన్నె. అందెజె దేవుణు గొప్పు పెరికాన్ ఇజి తోర్ అదెజ్ ఇజి క్రీస్తు వెట ‘అమెన్’ ఇజి మాటు వెప్పొనాట్.

21-22 మీ వెట మజిబా క్రీస్తు వెట కూడఁజి గటిజి నిల్పి మంజనికాన్ దేవుణునె. బుర్దదాన్ నూనె వాక్కి కేట కిత్తి లెకెండ ఏర్పాటు కిత్తికాన్ దేవుణునె. వన్ని సాంతం ఇజి మా మున్ను ముద్ర పొక్కి, వెనుక మజి దొహ్కెజ్ మని మేలుజి వందిజ్ రుజువ్ లెకెండ వన్ని ఆత్మ ఇని బయాన్ మా మన్నుజి మజి సిత మనాన్.

23 మీ మున్ను కనికారం మనిజ్ నాను మరి కొరింతి పట్టుమ్దు రెవత, ఇని దనిజ్ దేవుణునె సాక్కి.

24 అందెజె మీరు దేవుణు మున్ను నమకం ఇడ్డి దనిజ్ మీ మున్ను అతికారం మనికామ్ ఇజి ఆవిమ్ గాని సర్ద వందిజ్ మీ వెట కూడఁజి పణికినికామ్ లెకెండెనె. ఎందనిజ్ ఇహిజ దేవుణు మున్ను మని నమకమ్దాన్ మీరు గటిజి నిల్పి మంజినెదెర్.

2

1 అందెజె మరి ఉండ్రి నుటు దుకమ్దాన్ మీ డగ్గు రెవ ఇజి నా మన్నుదు నానె నిర్ణెం కిత.

2 ఎందనిజ్ ఇహిజ, నాను మిజి దుకం తప్పిన్ ఇహిజ, నా వెట దుకం అతికారాతి మీరు ఆవిండ ఎయెర్ నజి సర్ద కిబిస్తార్?

3 ఎందనిజ్ యా సజతిజ్ నాను మిజి రాన్సె ఇహిజ, నాను వానివలె, నజి సర్ద కిబిస్తెజ్ మని వరివెట నజి దుకం రెవండ మండ్రెజ్ వలె ఇజి రాన్సె. మరి నజి మని సర్దాదు మీరుబా నావెట సర్ద ఆనిదెర్లె ఇజి మీ వందిజ్ నా మన్నుదు నమకం ఇట్టా మన.

4 మీరు దుకం ఆదెజ్ ఇజి ఆవిద్, గాని మిజి నాను ఎసానో ప్రేమిసినె ఇజి మీరు నెన్సెజ్ ఇజినె, నంఠె దుకమ్దాన్ మన్నుదు బాద ఆజి, ఎసానో కెరెరు వాక్కి మిజి రాన్సె మన.

తప్పు కిత్తి వరిజ్ నెమిన్సి వందిజ్

5 ఎయెన్బా దుకం కిబిస్తాన్ ఇహిజ, నజీన లావ్ అవండ, వాండ్రు మిజి విజెరిజ్ కండెక్ దుకం కిబిస్త మనాన్. అందెజె నజీ దుకం కిబిస్తి వందిజ్ నాను గటిజ వెహైజ్ అవిద్గదె?

6 వన్నిజ్ మీ లోఇ నండొండార్ వెట సీతి సిక్కు సరి ఆనాద్.

7 అందెజె మీరు వన్నిజ్ సెమిసి ఒదరిస్తెజ్ వలె. ఎందనిజ్ ఇహిజ వాండ్రు మరి నండొ దుకమ్దు మడుఁగిజి మని లెకెండ మండ్రెజ్ అవిద్ ఇజె.

8 అందెజె వన్నిజ్ మీరు ప్రేమిసినిదెర్ ఇజె మరి వన్నిజ్ మీరు తోరిస్తెజ్ వలె ఇజె నాను బతిమాల్లిస.

9 మీరు విజు దనిజ్ లోజిజి తగ్విక్రిదెర్ లెకెండ మంజినిదెరా ఇజె నెస్తెజ్నె నాను మిజి రాస్త మస.

10 మీరు ఎయెరిజ్బా సెమిస్తిజి నానుబా వన్నిజ్ సెమిసిస. మరి ఇనిదని వందిజ్బా సెమిస్తెజ్ ఇహిజ, మీ వందిజ్ అక్కబా క్రీస్తు ఎద్రు నాను సెమిస్త మస.

11 ఎందనిజ్ ఇహిజ, నయ్నాను మా ముస్కు గెలిస్తెజ్ అవిద్ ఇజె నాను సెమిస్త మస్సు. మరి వన్ని సెఇ పణిజి వందిజ్ మాటు నెన్ఇకాట్ అవట్గదె?

కొత్త ఒప్పుమానం వందిజ్ సాటిస్వికార్.

12 క్రీస్తు సువార్త సాటిస్విజ్ నాను త్రోయ పట్టుమ్దు వాతివలె అబ్బె నెగ్గి అవ్కాసం దేవుణు నజీ సీతాన్.

13 గాని నా తంబెర్ ఆతి తీతుజ్ తొవండ నా మస్సుదు నిపాతి సిల్లెండ ఆతిజ్, వరిజ్ నాను సొన్నిస ఇజె వెస్సి అబ్బెణిజ్ మాసిదొనియ సొండ్రెజ్ సోత.

14 గాని మాపు దేవుణుదిజ్ వందనమ్కు వెస్సిసావ్. ఎందనిజ్ ఇహిజ, క్రీస్తు వెట కూడితి మజి దేవుణు ఎస్తివలెబా గెలిస్తి వరి సర్లదాన్ నడిపిసిసాన్. ఉండ్రీ నెగ్గి వాసనం లెకెండ విజుబాన్ మాపు సాటిస్వి సువార్తదాన్ క్రీస్తు వందిజ్ విజెరె నెస్తిలెకెండ వాండ్రు కిబిస్తాన్.

15 దేవుణు రక్కిస్తి వరి నడిపి, పాడాఁజి సొన్నిని వరి నడిపి మాపు దేవుణుదిజ్ క్రీస్తుది నెగ్గి వాసనం లెకెండ ఆత మనావ్.

16 పాడాఁజి సొన్నిని వరిజ్ మాపు సాతి ఒడొలేద్ కంపు లెకెండ మనావ్. దేవుణు రక్కిస్తి వరిజ్ బత్తు సీజిని నెగ్గి వాసనం లెకెండ మనావ్. నిని పణిదిజ్ తగ్వికాన్ ఎయెన్ మనాన్?

17 మహి నండొండార్ లెకెండ, లాబం రపిద్ ఇజె దేవుణు మాటదిజ్ బేరం కినికాప అవవ్. దేవుణు బాణిజ్ పోకె ఆతివరి లెకెండ క్రీస్తు వెట కూడిఁజి నీతినిజాయ్దాన్ దేవుణు ఎద్రు మాపు వర్గిజనావ్.

3

1 మరి మజి మాపె మర్రి పొగడిఁజి వెహైజ్ మొదొల్నిసాపా? సెగొండారిజ్ అవ్సరం మని లెకెండ మీబాణిజ్నో, మిజి తోరిస్తెజ్ ఇజెనో, కీదు పొక్కిని నెల్వ కిబిస్తి ఉత్తమ్కు మజి మండ్రెజ్నా?

2 మా మస్సుజి రాని ఆతిమని లోకుర్ విజెరె నెసి సద్దిజిని ఉత్తమ్కు మీరి.

3 పణకుదాన్ తయార్ కిత్తి బల్లెజి ముస్కు గీస్తి మనిక అవిద్, మరి సిరదాన్ రాస్తిక అవిద్, గాని లోకురి మస్సు ఇని మెతాని బల్లెజి ముస్కు, మాపు కిత్తి సువార్త పణిదాన్ బత్తిజిని దేవుణు ఆత్మదాన్, రాని ఆతిమని క్రీస్తుబాణిజ్ వాతి మని ఉండ్రీ ఉత్తమ్నె మీరు ఇజె మీరి తోరిసినిదెర్.

4 క్రీస్తు వెట దేవుణు ఎద్రు మా మస్సుదు నసొన్ నమకం మనాద్.

5 మాపు కిజిని పణిజ్ విజు మా సత్తుదాన్ మాపె కిజనావ్, ఇజె ఒడ్బెదిజ్ మా లోఇ ఇనికబా సిల్లెద్. యాకెజ్ కిదెజ్ మని సత్తు దేవుణు బాణిజ్నె వాతాద్.

6 వాండ్రె మజి కొత్త ఒప్పుమానమ్దిజ్ నెగొండ పణికినికార్ ఇజె ఇట్ట మనాన్. కొత్త ఒప్పుమానం ఇహిజ అసరమ్దాన్ రాస్తిక అవిద్, బత్తిజిని దేవుణు ఆత్మదాన్ వాతిక. ఎందనిజ్ ఇహిజ అసరమ్దాన్ రాని ఆతి ప్రమాణం సాపు తపిసిసాద్. ఆత్మదాన్ వాతి ప్రమాణం పాణం సీజనాద్.

కొత్త ఒప్పుమానం ఇని గొప్పు పెరి నజతి.

7 పణకు బల్లెజి ముస్కు అసరమ్దాన్ రాని ఆతిమని సాపు తపిస్తి ప్రమాణం నసొన్ గొప్పు పెరిక మహాద్.

8 ఇహిజ, మోన మొకొ తగిజి సొన్నిని జాయ్దాన్ మహిజ్బా, ఇస్రాయేలు లోకుర్ వన్ని మొకొమ్దు తినాజ్ బెస్తిజ్ అట్ఇ లెకెండ గొప్పు పెరి జాయ్దాన్ మహాన్. అక్క అయాలెకెండ పెరిక మహాద్ ఇహిజ, దేవుణు ఆత్మదాన్ మని పణిజ్ దన్నిజ్ ఇంక ఎస్సొనో గొప్పు పెరిక అవిదా?

9 లోకురిజ్ తీర్పు తీరిసి సిక్కు సీని పణి నస్సా గొప్పు పెరిక మహాద్ ఇహిజ, లోకురిజ్ నీతి నిజాయతిదికార్ కిజిని యా పణి, దనిజ్ ఇక ఒద్దె పెరిక మంజినాద్.

10 ఏలు మనిక ఒదె గొప్పు పెరిక ఆతిజ్ ఆతిజ్, దినిజ్ పోలిసి సుడఃతిజ, ముజాల గొప్పు పెరిక మహి దనిజ్ ఏలు ఇనిక సిల్లెండ ఆతాద్.

11 అనరమ్దాన్ రాసె ఆతి, కండెక్ కాలం మహి యా ప్రమాణం యాలెకండ గొప్పు పెరిక వాతాద్ ఇహిజ, ఎస్తివలెబా మంజిని యా కొత్త ప్రమాణం మరి ఒదె గొప్పు పెరిక మంజినాద్.

12 మాపు యాలెకండ ఆసదాన్ ఎద్దు సుడఃజి మంజినాట్. అందెజె మా మన్నుదు దయరమ్దాన్ మనావ్.

13 మాపు మోసె లెకండ ఆవీవ్. ఎందనిజ్ ఇహిజ ఇస్తాయేలు లోకుర్ వన్ని మొకొమ్దు మని తగిజి సొని జాయ్దిజ్ బేన్ఎండ మోసె వన్ని మొకొమ్దు టుకుర్ ఇట్టాన్.

14 గాని వరి మన్ను గుడిః ఆత మహాద్. అందెజె ఏలుబా వారు పడఃయి ఒప్పుమానం నద్విజినివలె వరి మన్నుజ మున్ను, అయా టుకుర్ ఏలుబా లాగె ఆవీండ అయా లెకండెన్ మనాద్. ఎందనిజ్ ఇహిజ క్రీస్తు వెటనె అక్క లాగె ఆజినాద్.

15 ఏలుదాక మోసె రాస్తి మనికెజ్ వారు నద్విజిని వలె వరి మన్నుజ మున్ను, ఉండ్రీ టుకుర్ మని లెకండెన్ మనాద్.

16 గాని ఎయెన్బా ఎస్తివలెబా ప్రబువాతి యేసుక్రీస్తు దరిజ్ మప్తిజ వన్ని బాణిజ్ టుకుర్ లాగె ఆజినాద్.

17 ప్రబు ఇహిజ దేవుణు ఆత్మనె. ప్రబు ఆత్మ మజీ విడఃతల కిజినాద్.

18 మాటు విజెటె టుకుర్ మన్ ఇ మొకొమ్దాన్, ఆదమ్దాన్ జాయ్ తోరితి లెకండె, ప్రబు జాయ్ తోరిసినాట్. ఆత్మ ఆతి ప్రబుబాణిజ్ వాని జాయ్దాన్ మరి ఒద్దె జాయ్ ఆజి వన్ని మూర్తి లెకండె ఆజి మంజినాట్లె.

4

ఒడోల్ ఇని ఇస్కా కుండ లొఇ మన్ని ఆస్తి

1 దేవుణు కనికారమ్దానె మాపు దేవుణు పణిదు మనావ్. అందెజె మాపు మన్నుదు దయరం సిల్లెండ ఆవీవ్.

2 మాపు సిగు లాగ్ని డాఃజిజి కిజిమహి పణిజ్ డిఃస్తి సిత్రావ్. మాపు మోసెం కిదెజ్ ఇజి సుడఃఎవ్. మాపు దేవుణు మాట మని లెకండె దనిజ్ మారిన్ఎండ వెప్పినావ్. మాపు మోసెం కిదెజ్ ఇజి సుడఃఎవ్. మాపు దేవుణు మాట మన్ని లెకండె మారిన్ఎండ వెప్పినావ్. అక్కాదె ఆవీండ నిజమాతికెజ్ విజెరిజ్ నెసిని లెకండె వరి గర్భమ్దిజ్ ఎద్దు మజి మాపె నెగెండ దేవుణు ఎద్దు బత్తిజినావ్.

3 మాపు వెప్పిని సువార్త డాఃజె ఆతి మహిజ, అక్క పాడాఃజి సొన్నిని వరిజె డాఃజె ఆత మనాద్.

4 దేవుణు మూర్తి ఆతిమని క్రీస్తు జాయ్ ఆతి సువార్తదిజ్ జాయ్, వరిజ్ తోరిఎండ మంజిని వందిజ్ యా తరమ్దిజ్ అతికారి ఆతి నెతూసు నమకం సిల్లికార్ ఆతివరి మన్నుది కణకెజ్ గుడ్డి కిటిస్తాన్.

5-6 “సీకటిదాన్ జాయ్ ఆవీద్”, ఇజి వెప్పె దేవుణునె, క్రీస్తు మొకొమ్దు మని జాయ్ దేవుణు గెణమ్ది జాయ్ మజీ మండ్రెజ్ ఇజి వన్ని జాయ్ మా మన్నుజ జాయ్ సీని లెకండె మజీ సిత్ర మనాన్. అందెజె మజీ మాపె ఆజి సువార్త సాటిన్ఎవ్. గాని యేసుక్రీస్తు ప్రబు ఇజి ఒడఃబిజి, మాపు యేసు వందిజ్ మిజీ పణి కినికావ్ ఇజి సువార్త సాటిసినావ్.

7 అహిజ విజి దన్నిజ్ మిస్తి యా నత్తు మాది ఆవీద్, గాని దేవుణు బాణిజ్ వాతిక ఇజి తోరి ఆదెజ్ ఇజి యా నెగ్గి ఆస్తి మా ఒడోల్ ఇని ఇస్కా కుండెజ్ లొఇ మజీ దోహ్క్త మనాద్.

8 విజి దరిజాణిజ్ గటిజి సేపె ఆజనికావ్ గాని పెడఃహికావ్ ఆవీవ్. ఇనిక కిదెజ్నొ ఇజి తెల్లిఎండ ఆతికావ్ గాని ఇన్ని ఆస సిల్లికావ్ ఆవీవ్.

9 హిమ్సెజ్ కిబె ఆజినావ్ గాని డిఃసి సిబె ఆతికావ్ ఆవీవ్. డెయె ఆజి అడిఃగి అర్తికావ్ గాని నానసం ఆజనికావ్ ఆవీవ్.

10 మాపు ఎస్తివలెబా మా ఒడోల్దు యేసు సాపుదిజ్ బరిసినావ్, ఎందనిజ్ ఇహిజ యేసు బత్తుబా మా ఒడోల్దాన్ తోరి ఆదెజ్ వలె ఇజి.

11 ఏలు బత్రిజనికావ్ ఆతి మాపు ఎస్తివలెబా యేసు వందిజ్ సావుదిజ్ ఒవజెవె ఆజినావ్. ఎందనిజ్ ఇహిజ నాననం అజి సాని మా ఒడోలేదు యేసు బత్తు తోరె ఆదెజ్ వలె.

12 అందెజె సావు మా లోఇ వణి కిజినాద్ గాని మీ లోఇ పాణం వణి కిజినాద్.

13 “నాను నమ్మిత మన్ను. అందెజె నాను వర్గిత మన్ను”, ఇజి దేవుణు మాటుదు రాస్త మనాద్. అయాలెకెండ్ మన్ని మన్నుదాన్ మాపుబా నమ్మిత మనావ్, అందెజె వర్గిజినావ్.

14 ఇనిక ఇహిజ, ప్రబు ఆతి యేసుజ్ సాతి వరిబాణిజ్ నిక్రికాన్, యేసు వెట మజిబా నిక్రి మీవెట వన్ని ఎద్రు నిల్పాన్ ఇజి మాటు నెసినాట్.

15 దేవుణు దయా దర్తం మరి ఒద్దె నండెండారిజ్ అందిజి సార్నివలె, నండె పార్లనమ్మకు కిజి, మరి వందనమ్మకు వెప్పి వారు దేవుణుదిజ్ గవరం సీనారలె. యాకెజ్ విజి మీ వందిజ్ నె.

16 అందెజె మాపు మన్నుదు దయరం నిల్లికావ్ ఆవవ్. వెల్లి తోరె ఆజిని మా ఒడోలే పాడాజె సాస్సినాద్ గాని మా మన్నుదు మాపు రోజు రోజుదిజ్ కొత్త నత్తు మనికావ్ ఆజినావ్.

17 మాపు ఒరిసిని యా సాణెం మంజిని ఇజిరి కన్లమ్మకు, మజి వనకాజ్ విజి మిస్తిక ఆతి ఎలాకాలం మంజిని గవరం దోహ్కీని.

18 అందెజె మాపు తోరిజిని వనక మున్ను, మన్ను ఇడోవండ, తోరి వనక వందిజ్ నె ఎద్రు నుడోజినావ్. ఎందనిజ్ ఇహిజ తోరికెజ్ నెగం కాలమనె మంజిని, తోరికెజ్ ఎలాకాలం మంజినికెజ్.

5

1 యా బూమి మున్ను, మాపు బత్రిజిని గుడారం* లెకెండ్ మని మా ఒడోలే ఎస్తివలె నాననం ఆతి సాహిజ్బా, మా వందిజ్ దేవుణు మంజిని బాడిడు లోకు కిక్కిణిజ్ తోహ్కా ఆవండ, దేవుణు తయారీ కిత్తి మన్ని ఎలాకాలం మంజిని ఉండ్రీ ఇల్లు మంజినాద్ ఇజి మాపు నెస్సావ్.

2 వరలోకమ్దు మన్ని ఇల్లు లెకెండ్ మన్ని ఒడోలేదు మండ్రెజ్ ఇజి ఆనదాన్ యా గుడారం ఆతి ఒడోలేదు మాపు ములుజిజెనె మంజినావ్.

3 మాపు అబ్బె ఒడోలే మన్ని వరి లెకెండ్ మన్నిజ్ మా ఆత్తు డుమ్డ లెకెండ్ తోరవవ్.

4 గుడారమాతి యా ఒడోలేదాన్ మన్నివలె మాటు ములుజిజె బరు పిండెజిని వరిలెకెండ్ మంజినావ్. యా ఒడోలే డిసి సీదెజ్ ఇజి సిల్లెద్. గాని దేవుణు మంజిని బాడిడు మని ఒడోలేదు మండ్రెజ్ ఇజి ఆన ఆజినావ్. అందెజె సావు మన్ని యా ఒడోలే ఎసెజ్బా సావు నిల్లి పాణం మని ఒడోలే లెకెండ్ మార్దాలె.

5 వన్ని ఆత్తుదిజ్ బయాన్ లెకెండ్ మజి సితిమనికాన్ ఆతి దేవుణునె దిన్ని వందిజ్ మజి తయారీ కిత్త మనాన్.

6 అందెజె మాపు ఎస్తివలెబా మన్నుదు దయరం మనికావ్. మాపు యా ఒడోలేదు ఇబ్బె బత్రిజిని దాక ప్రబు బాణిజ్ దూరం మనావ్ ఇజి నెసినాట్.

7 మాపు దేవుణు మున్ను మని నమకమ్దానె బత్రిజినావ్. కణెకెజ్ తోర్డిని వన్నిక దటాజ్ ఆవద్.

8 యా ఒడోలేదు బత్రిని దన్నిజ్ ఇంక, యాక డిసి సీజి ప్రబు వెట మంజినికాదె మజి ఒదె ఇస్టం, దిన్ని వందిజ్ మజి మన్నుదు దయరం మనాద్, ఇజి నాను వెప్పిన్.

9 అందెజె, మా ఒడోలేదు ఇబ్బె బత్రిజి మహిజ్బా, యాక డిసి సీజి ప్రబు వెట మహిజ్బా వన్నిజ్ ఇస్టమాతి లెకెండ్ మండ్రెజ్ ఇజి మాపు గురి నుడోజినావ్.

10 ఎందనిజ్ ఇహిజ ఒరెన్ ఒరెన్ యా ఒడోలేదాన్ మహివలె కిత్తి వణిజ్ వందిజ్, అయాకెజ్ నెగ్గికెజ్ ఆతిజ్బా, నెకెకెజ్ ఆతిజ్బా దన్నిజ్ తగితి లెకెండ్ దోహ్కీని వందిజ్ మాటు విజెటి క్రిస్తు నాయం తీరిన్ని బాడిడు తోరె ఆదెజ్ వలె.

మహి వరిజ్ దేవుణు వెట కూల తోహ్కీన్ని వణి

11 అందెజె దేవుణుదిజ్ ఎస్సానో తియెలాజి మండ్రెజ్ ఇజి నెసినె, మహి వరిజ్ అయాలెకెండ్ మండ్రు ఇజి బుద్ది వెప్పినావ్. మాపు ఎలాగ మర్తకావ్ ఇజి దేవుణు నెసినాన్. మీ గర్తం ఎద్రు మీరుబా మజి నెసినెదెరి ఇజి మాపు ఆన ఆజినావ్.

* 5:1 5:1 ఇల్లు, గుడున ఇజిబా ఒడోబిదెజ్ ఆనాద్

12 మరి మాపు మీ ఎద్దు మా వందిజ్ పొగడిజి వెహైజ్ ఇజి సుడెవివ్, గాని మా వందిజ్ పొగడిజి మిజి ఉండ్ర్తి అవ్కానం సీజినావ్. ఎందనిజ్ ఇహిజ మన్నుదు మనికెజ్ నెనవిండ, వెల్లి తొర్నికెజ్ సుడెజి పొగడిజి వర్గిజిని వరివెట మర్రి వెహైజ్ మీరు అట్టికిదెర్ ఆదెజ్ ఇజినె.

13 మాపు వెరిదికావ్ లెకెండ మనావ్ ఇహిజ అక్క దేవుణు వందిజ్నె. నెగ్గి బుద్ది మనికావ్ ఇహిజ అక్క మీ వందిజ్నె.

14 క్రీస్తు ప్రేమ మజి బలవంతం కిజి నడిపెసినాద్. ఎందనిజ్ ఇహిజ విజెర వందిజ్ ఒరెన్ సాతాన్ అందెజి విజెర సాతారొ ఇజి ఇని అనుమానం సిల్లెండ నెసినావ్.

15 మరి, వాండ్రు విజెర వందిజ్ సాతాన్ ఇజి బత్తిజినికారొ ఏలుదాన్ వరి వందిజ్నె బత్తివిండ వరి వందిజ్ సాజి మర్రి నిజితి వన్ని వందిజ్నె బత్తిదెజ్ ఇజి నెసినావ్.

16 అందెజి ఏలుదాన్ మాపు ఎయెర్ వందిజ్బా యా లోకమ్దు మనికారొ ఒడిబిని లెకెండ ఒడిబివ్. క్రీస్తుజ్ వందిజ్బా ముజాల యా లెకెండనె ఒడిబితావ్ గాని ఏలుదాన్ వన్ని వందిజ్ అయాలెకెండ ఒడిబివ్.

17 అందెజి, ఎయెన్బా క్రీస్తు వెట కూడితిజ, వాండ్రు కొత్తాజ్ తయారొ అజినాన్. పడాఁయికెజ్ విజు సాహ, ఇదిలో విజు కొత్తాకెజ్ ఆతె.

18 యాకెజ్ విజు దేవుణు బాణిజ్నె ఆతె. దేవుణు వెట పగాతికాల్ మజి క్రీస్తు వెట, దేవుణు మజి వన్నిజ్ కూలెజ్ లెకెండ కిత్తాన్. మరి మహికారొ దేవుణు వెట వన్నిజ్ కూలెజ్ లెకెండ తయారొ కిని వణిబా మజి ఒపజెప్తాన్.

19 అహిజ, దేవుణు లోకురి పాపమ్కు విజు వరి మున్నునె మొవవిండ, లోకమ్దు మని వరిజ్ క్రీస్తు వెట వన్నిజ్ కూలెజ్ లెకెండ కిత్తాన్. మహి వరిజ్ దేవుణు వెట కూలెజ్ లెకెండ కిబిన్ని అయ మటెజ్ మజి ఒపజెప్తాన్.

20 అందెజి మాపు క్రీస్తుజ్ బోగలు వెప్పికావ్. దేవుణు మా వెట మిజి బతిమాలజిని లెకెండ వర్గిజినాన్. మీరు దేవుణు వెట పగాతికిదెర్ లెకెండ మన్విండ వన్నివెట రాజినమాజి వన్నిజ్ కూలెజ్ లెకెండ మండ్రు ఇజి మాపు క్రీస్తు వందిజ్ మిజి బతిమాలజినావ్.

21 మాటు క్రీస్తు వెట దేవుణు ఎద్దు నీతినిజాయ్ మనికాల్ ఆదెజ్ ఇజి దేవుణు ఇని పాపం సిల్లెకాన్ ఆతి క్రీస్తుజ్ మా వందిజ్ పాపం ఆదెజ్ ఇట్టాన్.

6

1 దేవుణు వెట జత కూడిజి పణికినికావ్ ఇజి మపు మిజి బతిమాల్జినిక ఇనిక ఇహిజ, దేవుణుబాణిజ్ మిజి దొహెక్తి మన్ని వన్ని దయా దర్శం వణిదిజ్ రెఇదని లెకెండ మీరు కిదెజ్ అవెద్.

2 “నీను మొరొ ఆతిక తగితి సమయమ్దు నాను వెహమన్ను. రక్సిన్లెజ్ మన్ని రోజుదు నాను మిజి సాయం కిత మన్ను ఇజి వాండ్రు వెప్పినాన్”, ఇజి దేవుణు మాటదు రాన్ మనాద్. అందెజి నాను వెప్పినాన్, ఇక్కాదె దేవుణుది తగితి సమయం. ఇక్కాదె దేవుణు రెసెసిని రోజు.

పవులుజ్ వాతి కష్టమ్కు

3 ఎయెరికెబ ఇని తొరొ ఇడెవిండ మపు కిజిని విజు పణిదు ఎలాగ మర్రి నిందబా రెవిండ మాపు సుడెజినావ్.

4 విజు వన్కా లొఇ దేవుణు వందిజ్ పణి కినికావ్ ఇజి మజి మాపె తొరిసినావ్. ఎలగ ఇహిజ కష్టమ్కు విజు గొప్పజి ఒరిసినిబాన్, స్రమెజి లొఇ బాద్ ఆనిబాన్, దుకమ్దు,

5 డెయె ఆనిబాన్, జెలిదు మన్నిబాన్, మహికారొ గొడెబ ఆనిబాన్, కష్టబాడెజి పణి కినిబాన్, నిద్ర సిల్లి రెయ్కాజ్, బజ ఆతివలె, దేవుణు వందిజ్ పణికినికావ్ ఇజి మజి మాపె తొరిసినావ్.

6 మాపు ఇని తప్పుబా సిల్లెండ మహావ్. అద్రం కిజి నెసెసినిబాన్, ఒరిసినిబాన్, దయ ఆనిబాన్, దేవుణు ఆత్మ వెట, కల్లి సిల్లి ప్రేమదాన్,

7 నిజమాతి మాటెజ్ వర్గిని దన్ని లొఇ, దేవుణు సత్తు లొఇ, ఉణిర్ డెబ్బ కిక్కాణిజ్ నీతి నిజాయతి ఇని ఆయుదమ్కు అస్సిబాన్,

8 మర్యాద సిత్తిబాన్, సిగు ఆతిబాన్, పోగడెః ఆనిబాన్, సెజ మటెజ్ వెమో ఆనిబాన్ దేవుణు వందిజ్ పణికినికావ్ ఇజి మజి మావె తోరినినావ్. నిజమాతికెజ్ మావ్ వర్గిజనావ్ గాని అబద్ధం వర్గినికావ్ ఇజి లోకర్ మజి ఒడెఃబిజనార్.

9 విజెరె బాగ నెస్తికార్ గాని ఎయెర్బా నెన్ఇ వరిలెకెండ్ మనావ్. సాజిని వరిలెకెండ్ మహిజ్బా మాపు బత్తిజనావ్. డెయె ఆజినావ్ గాని సపె ఆవివ్.

10 దుకమ్దాన్ మన్నికావ్ గని ఎస్తివలెబా సర్త మన్నికావ్. బీదాదికావ్ గాని నండొండొరికెజ్ ఆస్తి మన్నికార్ కిజనావ్. ఇనికబా సిల్లికావ్ గాని విజు మన్నికావ్.

11 కొరింఠి పట్టుమదికిదెరా, ఇనికబా డావ్ఎండ మా మన్నుదు మన్నికెజ్ విజు మీవెట మూపు వర్గిత మనావ్.

12 మాపు మీ వందిజ్ ప్రేమదాన్ కిక్కు సాప్పినావ్. మీరు మూక్తి కిక్కుబా మా వందిజ్ సావ్ఇదెర్.

13 మీరు నా కొడొఱి ఇజి మిజి యా లెకెండ్ వెప్పిన. మాపు మీ వందిజ్ కిత్తి లెకెండ్ మీరుబా మా వందిజ్ కిదు. మా వందిజ్ మీ ప్రేమ తోరిస్తు.

నమ్మిఇ వరి వెట జత్త కూడెఃదెజ్ ఆవిద్.

14 నమ్మిఇ వరివెట మీరు జత్త కూడెఃజి మన్మాట్. నీతి నిజాతిమనికార్ని సెఇకార్ ఎలాగ కుడెఃజి మండ్రెజ్ అట్టు? జాయ్ని సీకటి ఎలాగ ఉండ్రెబాన్ కుడెఃజి మండ్రెజ్ అట్టు?

15 క్రీస్తుజ్ పగాతికాన్ ఆతి బెలియాలుదిజ్* క్రీస్తు వెట ఇని పొత్తు మనాద్. నమ్మితి వరిజ్ నమ్మిఇ వరిజ్ ఇని పొత్తు మనాద్?

16 దేవుణు గుడిఃదిజ్ బొమ్మెజి వెట ఇని పొత్తు మనాద్? మాపు బత్తిజిని దేవుణుది గుడిః ఆత మనావ్. అహిజ దేవుణు వెస్తి లెకెండ్నె, “నాను వరివెట బత్తిజి వరివెట నడిఃన. నాను వరిజ్ దేవుణు ఆజి ముజినావ్లె. వారు నా లోకర్ ఆన ముజినార్”.

17 “అందెజె వరి బాణిజ్ వెల్లి వాజి కేట మండ్రు”, ఇజి ప్రబు వెప్పినాన్. “సుబారం సిల్లి ఇని దనిజ్బా ముట్మాట్, నాను మిజి డర్గు కిన్”,

18 “నాను మిజి బుబ్బు ఆన ముజిన, మరి మీరు నజి మరిసిర్ గాల్చిక్ ఆనిదెర్లె”, ఇజి విజు సత్తుజ్ మనికాన్ ఆతి ప్రబు వెప్పినాన్”.

7

1 నజి ఇస్సమాతి తంబెరిజాండె, దేవుణు మజి యాలెకెండ్ ప్రమాణమ్కు సిత్త మనాన్. అందెజె ఒడొఱిదెజ్ని ఆత్మదిజ్ సెఇకెజ్ కిజిని విజు వనక బాణిజ్ దూరం ముజి మజి మాటె సుబారం కిజి, దేవుణుదిజ్ గొప్ప మర్యాద సీజి, పూర్తి నెగ్గికాట్ ఆజి ముజినాట్.

2 మీ మన్నుజి మజి బాడ్డి సిదాట్. మాపు ఎయెరిజ్బా ఇని తప్పబా కింతావ్. ఎయెరిజ్బా పాడెః కింతావ్. ఎయెరిజ్బా ఇనికబా మోసాం కిజి లాగ్గి ఆంతావ్.

3 మీరు తప్ప కిత్తిదెర్ ఇజి మీ మున్ను తప్ప మోప్తెజ్ ఇజి నాను ఇక వెహ్వి. ఎందనిజ్ ఇహిజ, నాను ముజాల వెస్తి మన్ని లెకెండ్ మీరు మజి నండొ డర్గుహికిదెర్. అందెజె మాపు బత్తితిజ్బా మీ వెటని, సాతిజ్బా మీ వెటని ఎస్తివలెబా ముజినావ్.

4 మీ వందిజ్ నా మన్నుదు నండొ దయరం మనాద్. మీ వందిజ్ నాను గొప్ప పోగడిఃజిన. నాను ఓదర్పుదాన్ నిండ్రిత మన్ను. నజి నండొ కన్లమ్కు వాతె గాని నాను గొప్ప ఓదర్పుదాన్ మన్ను.

5 మాపు మాసిదొనియాదు వాతి వెననుకబా కండెకబా రోమ్దిజ్ అటవ్తావ్. విజు దరిజాణిజ్ మజి కన్లమ్కుని మహె. వెల్లిహాన్ గొడెఃబెజ్, మా లోఇ ఇహిజ తియెల్దాన్ మహావ్.

6 గాని ఇని ఆన సిల్లెండ అడిఃగి అర్తి వరిజ్ ఓదసిసిని దేవుణు, తీతు వాతిజ్ వన్నివెట మజి ఓదరిస్తాన్.

7 వాండ్రు వాతి దని వెటని ఆవండ, మీరు వన్నిజ్ ఓదరిస్తి దనివెటా దేవుణు మజి ఓదరిస్తాన్. నా వందిజ్ మీ మన్నుదు మని ప్రేమ వందిజ్, మీరు నా వందిజ్ నండొ దుకం ఆతి వందిజ్, మరి నా వందిజ్ మీ మన్నుదు ఎస్సా ఆన మనాద్ ఇజి వాండ్రు నజి వెహ్చాన్. అందెజె నాను మరి ఒదె గొప్ప సర్ద ఆత.

* 6:15 6:15 బెలుయాల్ ఇహిజ నయ్యాసు

8 నాను మిజీ రాస్తి ఉత్తమదాన్ మీరు దుకం ఆతిజ్ బా, నజీ దని వందిజ్ విసారం సిల్లెద్. అయ ఉత్తం మిజీ సగం రొన్ను దుకం కిబిస్తాద్ ఇజి నెస్తానె విసారం అన్న.

9 గాని నాను ఏలు దని వందిజ్ సర్దదాన్ మన. మీరు దుకం ఆతి వందిజ్ ఆవిద్, గాని మీరు అయ దుకమ్దాన్ దేవుణు ఎర్దు మీ తవుజ్ ఒవుకొడెజి మారు మన్ను పొందితిదెర్ ఇజి నాను సర్దదాన్ మన. దేవుణు ఇస్సమాతి వజనె మీరు దుకం ఆతిదెర్, అందెజె దనివెలు మిజీ ఇనికబా నస్సం రెఎత.

10 దేవుణు ఇస్సమాతి వజ వాజిని దుకమ్దాన్, దేవుణు మిజీ రక్సిన్ని లెకెండ్ మీ లొఇ మారు మన్ను పుటిసినాద్. అయ మరు మన్ను దుకం పుటిసివిద్. లొకమ్దిజ్ నెందితి దుకం సాపు తపిసినాద్.

11 దేవుణు ఇస్సమాతి వజ వాతి యా దుకమ్దాన్ మీరు ఎసానొ జాగర్ద మనికిదెర్ ఆతిదెర్. మరి మీరు కల్లి సిలికిదెర్ ఇజి తోరెస్సెజ్ ఎసానొ ఆస, తప్పు పణి వందిజ్ ఎసానొ కోపం రెపిస్తాద్. మరి, దేవుణు వందిజ్ ఎసానొ తియెల్, దేవుణు వందిజ్ ఎసానొ ప్రేమ, దేవుణు వందిజ్ పణి కిదెజ్ మన్నుదు ఎసానొ ఆస, నయం జర్లిజె మండ్రెజ్ ఇజి ఎసానొ ఆస, మీ లొఇ పుటిస్తాద్. యా విజు సజతిజ వందిజ్ మీరు నెగ్గికిదెర్ ఇజి రుజువ్ కిబె ఆతె.

12 అందెజె, నాను మిజీ ఉత్తం రాస్తిక అయ సెఇ పణి కిత్తి వన్ని వందిజ్ ఆవిద్. వాండ్రు కిత్తి పణిదాన్ దుకం ఆతి వన్ని వందిజ్ బా ఆవిద్. గాని మా వందిజ్ మీ మన్నుదు ఎసానొ ఆస అజినిదెర్ ఇజి దేవుణు ఎర్దు మీరు నిజం నెస్సెజ్ ఇజినె నాను రాస్తి.

13 యా విజు వన్నా వందిజ్ మాపు ఉసారొ కిబె ఆతావ్. అక్కాదె ఆవిండ, మీరు తీతు మన్ను సలాజ్ కిత్తి వందిజ్ వాండ్రు సర్దదాన్ మనికబా నుడెజి మాపు మరి ఒద్దె సర్ద ఆతావ్.

14 నాను మీ వందిజ్ తీతు ఎర్దు పొగడిజె వెష్టి వందిజ్ మీరు నజీ సిగు కెఇతిదెర్. మాపు మిజీ వెష్టి విజు మాటెజ్ ఎలాగ నిజమాతికెజ్, అయాలెకెండ్ నె మీ వందిజ్ తీతు వెలు పొగడిజె వెష్టికెజ్ బా నిజం ఇజి తోరె ఆతె.

15 మీరు విజెదెరె వన్నిజ్ లొజిజి, ఎసానొ తియెలాజి అజి, వణకుదాన్ వన్నిజ్ డగ్గు కిత్తిదెర్. అక్క ఎత్తు కినివలె మీ వందిజ్ వన్ని మన్నుదు మని ప్రేమ మరి ఒద్దె పిరిజినాద్.

16 మరి మీ వందిజ్ మన్నుదు పూర్తి దయరమ్దాన్ మండ్రెజ్ అనాద్ ఇజి నాను సర్ద మన్ను.

8

దేవుణుదిజ్ నంత సీని వందిజ్

1 తంబెరిజాండె, మాసిదోనియాదు మన్ని దేవుణు సజమ్కాజ్ దేవుణు తోరిస్తి మన్ని వన్ని దయా దర్మం వందిజ్ మీరు నెసి మండ్రెజ్ ఇజి మాపు కోరిజినావ్.

2 వరిజ్ వాతి గొప్పు పెరి కస్టమ్కాణిజ్ వారు వరిస కిబె ఆతార్ గాని ఒద్దె సర్ద అజి మహార్. వారు గొప్పు బీదదికార్ ఆతి మహిజ్ బా దేవుణు వందిజ్ నండె సీదెజ్ అక్క వరిజ్ అడ్డు కివీతాద్.

3 నాను వరి వందిజ్ వెస్సాని సాస్యం ఇనిక ఇహిజ, వరిజ్ ఎసా సీదెజ్ అట్వారొ అయాలెకెండ్ నె వారు సిత్తార్, నిజమె వరిజ్ సీదెజ్ అట్టి దనిజ్ ఇంక లావ్ నె సిత్తార్. వరి సాంత ఇస్సమదాన్ సిత్తార్.

4 నమ్మిత్తి వరి వందిజ్ కిజిని యా సాయమ్దు వరి వంతుజ్ కూడుప్పైజె ఇజి వరిజ్ అవ్కాసం సీదెజ్ వారు మజ్ నండె బతిమాలితార్.

5 వారు కిత్తిక మాపు ఒడిబితి లెకెండ్ బా ఆవితాద్. ముజాల వరిజ్ వారి ప్రబుదిజ్ సిత్తార్. వెనుక దేవుణు ఇస్సమాతి వజ వరిజ్ వారి మజిబా సిత్తార్.

6 అందెజె తీతు మీ లొఇ మొదొల్స్తి లెకెండ్, కనికారమ్దాన్ కిజిని యా పణి పూర్తి కిదెజ్ ఇజి మాపు వన్నిజ్ ఉసారొ కిబిస్తావ్.

7 మీరు విజు వన్నా లొఇ ముజాల మనికిదెర్. అహిజ దేవుణు మున్ను మని నమకమ్దు, మాటెజి వర్నిని దని లొఇ, గెణమ్దు, మహివరిజ్ సాయం కిదెజ్ మన్ని ఆసాదు, మా వందిజ్ మన్ని ప్రేమాదు ముజాల మన్ని లెకెండ్ నమ్మిత్తి వరి వందిజ్ సీని కనికారమ్దాన్ కిజిని యా పణిదుబా మీరు ముజాల మండ్రెజ్ వలె.

8 ఇక్క నాను మిజి ఉండ్రి ఆడ్ర సిత్తి లెకెండ్ వెహావి, గాని సీదెజ్ ఇజ మహివరిజ్ మన్ని ఆసందిజ్ పోలిసి నుండేతిజ, మీ మన్నుదు మని ప్రేమ ఎన్నొ నిజమాతిక ఇజ నెన్నెజ్ ఇజ నాను వెహ్.

9 మీరు మా ప్రబు ఆతి యేసుక్రీస్తు దయాదర్శమేదిజ్ నెన్నిదెరగదె? వాండ్రు గొప్పు ఆస్తి మన్నికాన్ గాని వాండ్రు మీ వందిజ్ బీదవాండ్రు ఆతాన్. ఎందనిజ్ ఇహిజ, మీరు ఆస్తి మన్నికిదెర ఆదెజ్ ఇజ వన్నిజ్ వాండ్రె బీదవాండ్రు కిబె ఆతాన్.

10 యా సజతిజ వందిజ్ మీరు యా లెకెండ్ కిత్తిజ బాగ మనాద్ ఇజ నాను ఒడిఃబిజిన. నీరొండు, యా లెకెండ్ కిదెజ్ ఆస మనికిదెర ఆవండ్, సీదెజ్ బా మీరె ముజాహికిదెర.

11 అందెజె, మీరు సీదెజ్ ఎలాగ ఆస ఆజనిదెరొ, దనిజ్ తగితి లెకెండ్, ఇహిజ మిజి కల్లితి మనిదనిజ్ తగితి లెకెండ్ సీజి యా పణి పూర్తి కిదు.

12 ఒరెన్ వన్నిజ్ సీదెజ్ ఇజ మన్ను మహిజ, అట్నీ దన్నిజ్ ఇంక మిస్తి ఆవద్, గాని వన్నిజ్ మని దన్నిజ్ తగితి లెకెండ్ సిత్తిజ, అక్క దేవుణుదిజ్ ఇస్టమాతిక ఆజినాద్.

13 మహి వరిజ్ సులు ఆజిమంజి మిజి లావ్ బరు మండ్రెజ్ ఇజ ఆవద్ గాని విజెరిజ్ ఉండ్రె లెకెండ్ బరు మన్నిద్ ఇజెనె మాపు కోరిజినావ్.

14 ఏలు మిజి లావ్ మనిక వరిజ్ అవ్ సరమ్క వందిజ్ సిత్తిజ, వరిజ్ లావ్ మన్నివలె మీ అవ్ సరం వందిజ్ మర్ది సీనారలె. అయాలెకెండ్ నె విజెరిజ్ ఉండ్రె లెకెండ్ మంజినాద్.

15 "లావ్ పెహ్తా వన్నిజ్ ఇనిక మిగిల్లివతాద్. తక్కు పెహ్తా వన్నిజ్ సాల్ వండ్ ఆవతాద్".* ఇజ దేవుణు మాటదు రాస్తి మన్ని లెకెండ్ నె.

16 మీ వందిజ్ మా మన్నుదు మన్ని ఆస లెకెండ్ నె, దేవుణు తీతు మన్నుదుబా ఆస సిత్తి వందిజ్ నాను దేవుణుదిజ్ వందనమ్కు వెహ్సిన.

17 తీతు మాపు వెహ్తాక విహాన్. అక్కాదె ఆవండ్ వన్నిజ్ వాండ్రె ఆజి గొప్పు సర్దదాన్ మీ డర్పు వాజినాన్.

18 సువార్త పణిదు విజు సజమ్కాజ్ వన్ని పణి వందిజ్ పేరు మనికాన్ ఆతి మరి ఒరెన్ తంబెరిబా వన్ని వెట పోక్కినావ్.

19 అక్కాదె ఆవండ్, ప్రబుజ్ పేరు వాదెజ్ ఇజని మహి వరిజ్ సాయం కిదెజ్ మా మన్నుదు మన్ని ఆస తోరిస్సెజ్ ఇజని మాపు కనికారమ్దాన్ కిజిని యా పణి కిజినావ్. యా సంత అని మాపు సొనివలె, మా వెట వాదెజ్ ఇజ విజు సజమ్కు కూడఃజి యా తంబెరిజ్ నె ఎర్లిస్త మనార.

20 విజు సజమ్కు కూడఃజి లోబం కివండ్ సిత్తి యా నందదాన్ మాపు పణి కిత్తి వందిజ్ ఎయెర్ బా మా మున్ను ఇని తప్పబా వెహ్ వండ్ గొప్పు జాగర్దదాన్ మనావ్.

21 అందెజె ప్రబు ఎద్రునె ఆవండ్ లోకురి విజెరి ఎద్రుబా సరి ఆతికెజ్ కిదెజ్ జాగర్ద మనావ్.

22 అక్కాదె ఆవండ్, వరివెట మరి ఒరెన్ తంబెరిజ్ బా పోక్కినావ్. నండొ పణిజాణిజ్ నండొ సుట్టు వన్నిజ్ వరిన కిజి వన్ని మన్నుది ఆస నెన్న మనావ్. ఏలు మీ వందిజ్ వన్ని మన్నుదు మని గొప్పు దయరమ్దాన్ ఆస ఒద్దె పిరిజినాద్ ఇజ మరి నెనినావ్.

23 తీతు ఇహిజ, నా వెట మహికాన్, మీ నడిఃమి నా వెట జత కూడ్డి పణి కిత్తికాన్. వన్ని వెట వాజిని యా కూల్జె ఇహిజ, ఉండ్రి ఉండ్రి సజమ్కాణిజ్ వాతికార్. క్రీస్తుజ్ నెగ్గి పేరు తపిసినికార్.

24 అందెజె విజు సజమ్క ఎద్రు తోర్ని లెకెండ్, వరిజ్ మీ ప్రేమ, మరి మీ వందిజ్ మాపు పొగిడిజిని దని వందిజ్ రుజువ్ కిజి తోరిస్త.

9

1 నవ్వుత్తి వరి వందిజ్ కిజిని యా పణి వందిజ్ నాను మిజి రాస్సెజ్ అక్కర్ సిల్లెద్.

* **8:15 8:15** నిర్ణయకాండం 16:8 ఇస్రాయేలు లోకుర్ అయ్యెప్పు దేసమ్దాన్ కనాను దేసం సొన్ని మహివలె, వారు బిడిఃజ్ బూమిదు 40 వంటిజ్ మహివలె మన్నునె వరిజ్ ముకెలమతి తిండి ఆత మహాద్. బిడిఃజ్ బూమిదు మహివలె వరిజ్ సరిఆతి తిండి సిల్లెద్ ఇజ వారు దేవుణు వెట నణెజిత్తార్. దేవుణు ఆగసమ్దాన్ వరిజ్ మన్ను సిత్రాన్. రోజు పెందల మన్ను వారు మన్నికాన్, ఇజెరి బెల్లమలెకెండ్ బూమిదు అర్పు మహాద్. రోజు రోజుదిజ్ సరి ఆతిక అయ రోజును దేవుణు వరిజ్ సీజి మహాన్. వారు కనాను దేసం అందిజి బాజాక తిండి తినిదాక దేవుణు వరిజ్ మన్ను సీజి మహాన్. (యెహోసువ 5:12)

2 సాయం కిదెజ్ మీ మున్నుడు మని ఆస నాను నెనిన. అందెజె అక్కాయదికార్ ఆతి మీరు దేవుణు వందిజ్ సీదెజ్ ఇజ నీరుండార్ తయార్దాన్ మనిదెర్ ఇజ మీ వందిజ్ మాసిదోనియాది వరివెట పొగ్డిజెజె వెప్పొ మహావ్. మీ మున్నుడు మని ఆసదిజ్ నెస్తారె వరి లొఇ నండొండార్ సీదెజ్ ఇజ ఉసార్ ఆజినార్.

3 మాపు మీ వందిజ్ పొగ్డిజెజె వెప్పొకెజ్ అర్థం సిల్లెకెజ్ ఆదిజ్ ఆవిద్ ఇజ ఏలు యా తంబెరిజ పోక్కిన. నాను వెప్పొ పజ సాయం సీజ పొక్కెజ్ తయార్ ఆజి మండ్రు.

4 ఉండ్రీ వెలా మాసిదోనియాదికార్ ఒరెన్ మా వెట వాతిజ, మీరు తయార్ అవిండ మనిక సుడెతిజ, మీ మున్ను మజి మని యా నమకం వందిజ్ అయావలె మజి సిగు వానాద్, మీరుబా సిగు ఆనిదెర్.

5 అందెజె, మీరు సీనావ్ ఇజ వెప్పొ మనిక లోబం కివీండ ముజాలె తయార్ కిజి మండ్రెజ్ ఇజ యా తంబెరిజ మూజాలెనె మీ డగ్రు సొండ్రు ఇజ వెప్పొ పొక్కెజ్ ఇజ నాను ఒడిబిత. అపొజి మీరు సీనా ఇజ వెప్పొ మనిక లోబమదాన్ సీని లెకెండ్ మన్వీండ పూర్తి మున్నుదాన్ సీని సంత లెకెండ్ మంజినార్.

దేవుణుదిజ్ లోబం కివీండ సర్దదాన్ సీదెజ్ ఇజ వెప్పొనాన్.

6 తక్కు విత్తికాన్ తక్కునె పంట కొయ్యాన్. నండొ విత్తికాన్ నండొ పంట కొయ్యాన్. ఇజ గెవతం కిజి మండ్రు.

7 ఒరెన్ ఒరెన్, ఎస్సా సీన ఇజ వన్ని మున్నుడు నిర్ణెం కిత్తిలెకెండ్నె సీదెజ్. అక్క సణజిఎండ, బలవంతమదాన్ ఆవిండ సీదెజ్ వలె. ఎందనిజ్ ఇపొజి సర్దదాన్ సీని వరిజ్ దేవుణు ప్రేమిసినాన్.

8 ఎస్సివలెబా మిజి కావాలిన్తి దన్నిజ్ ఇంక లావ్ మండ్రెజ్ని, మరి విజ నెగ్గి పణిజి వందిజ్ లావ్ సీదెజ్ మిజి మండ్రెజ్, వన్ని దయాదర్శమదాన్ సీజని దేవుణు ఇంక మరి ఒద్దె మిజి సీదెజ్ అట్టికాన్.

9 దిన్ని వందిజ్ దేవుణు మాటదు యాలెకెండ్ రాస్త్ర మనాద్. “వాండ్రు దోసదాన్ కెప్పొ విరివిత్తి ఇనాయమకు బీదాది వరిజ్ సీజినాన్. వన్ని నీతి నిజాయితి ఎలాకాలం మంజినిక”.

10 విత్తి వన్నిజ్ విత్తుని ఉండెజ్ తిండి సీని దేవుణు సీజినాన్. మిజి మా వాండ్రు విత్తెజ్ విత్తు సీజి, మీరు విత్తికెజ్ నెగెండ్ పిరిప్పి లావ్ కిజి, మీరు కిజిని నీతి నిజాయితి పణిజ్బా లావ్ కిబిస్సాన్.

11 విజు సజతిజ లొఇ మీరు లావ్ మన్నికిదెర్ కిబె ఆనిదెర్లె. అందెజె ఎస్సివలెబా మహి వరి వందిజ్ లావ్ సీదెజ్ మీరు అట్టిదెర్. మీరు మజి సీజని దనిదటాజ్ మాపు మహివరిజ్ సీనివలె మా వెట దేవుణుదిజ్ వందనమకు వెవె ఆనాదెల్.

12 యా పణివెట నమ్మిత్తి వరి అవ్సరమకు తీరిసినికాదె ఆవిండ దేవుణు వందిజ్ వెప్పొని వందనమకు మరి ఒద్దె లావ్ ఆజినె.

13 యా పణిజాణిజ్ మీరు తగ్గికిదెర్ ఇజ రుజువ్ కిజినిదెర్. అందెజె మీరు క్రీస్తు సువార్దదిజ్ ఒప్పుకొటి లోజిత్తి వందిజ్, మిజి కల్లితి మన్నికెజ్ వరిజ్ని మహి వరిజ్ విజెరిజ్ లోబం కివీండ సీదెజ్ తయార్ ఆతి వందిజ్ వారు విజెరె దేవుణుదిజ్ పొగ్డిజెనార్లె.

14 వరిజ్ సాయం కిదెజ్ దేవుణు మీ మున్ను తోరిన్తి విజు దనిజ్ మిస్తి వన్ని దయా దర్శం వందిజ్, మీ వందిజ్ పార్దనం కినివలె, మిజి సుడెదెజ్ మున్నుడు ఆసదాన్ మంజినార్.

15 వెప్పొజ్ అట్టెనన్తి వరం సిత్తి దేవుణుదిజ్ వందనమకు!

10

1 ఏలు పవులు ఇని నాను బతిమాల్లిన. మీ వెట మనివలె నిపాతి మనికాన్ లెకెండ్ గాని మీ బాణిజ్ దూరం మనివలె గటిజ మనికాన్ ఇజ మీరు ఒడిబిజిని నాను, క్రీస్తుజ్ మని సార్దిదాన్ సొంతిదాన్ మిజి బతిమాల్లిన.

2 మాపు లోకమదిజ్ సెందితి వరి లెకెండ్ నడిసినావ్ ఇజ మీ లొఇ నెగెండార్ మా వందిజ్ వెప్పొనిదెర్. ననివరి వెట నాను ఒడిబిని లెకెండ్ తెగిజ నండొ గటిజ వర్దిదెజ్ అట్టు. గాని నాను వానివలె గటిజ వర్దిఎండ మంజిని లెకెండ్ మీరు మండ్రు ఇజ నాను మిజి బతిమాల్లిన.

3 యా లోకమదునె మపు బత్తిజినావ్ గాని లోకమది వరి లెకెండ్ విదెం కినికావ్ ఆవివ్.

4 మాపు విదెం కిని ఆయుదమకు యా లోకమదిజ్ సెందితి ననికెజ్ అఉ. గాని సెఇ వన్కా వెరి ఎత్తుమని కోటెజ అర్పెజె దేవుణు బాణిజ్ వాతిమని సత్తుమని ఆయుదమకు ఆక్కెజ్.

5 మాపు, దేవుణు వందిళ్ నెన్ఎండ మండ్రెళ్ అడ్డు కినిలెకెండ మన్నుదాన్ రేజ్జి వాజిని విజు వన్కాళ్ అడ్డిజ ఆరిప్పి, విజు ఆలోననమ్కాళ్ అని క్రీస్తుళ్ లోజీని లెకెండ కిజినావ్.

6 మీరు పూర్తి లోజీజి మంజినికిదెర్ ఆనిదాక, లోజీవిండ మన్ని విజు వన్కా వందిళ్ మిజి సిక్స సీదెళ్ తయార్ ఆత మనావ్.

7 మీరు వెల్లి మన్ని వనకాళ్నె సుడజినిదెర్. ఎయెన్బా వాండ్రు క్రీస్తుళ్ సెందితికాన్ ఇజ ఒడజిబిజి మహిజ, వాండ్రు ఎలాగ క్రీస్తుళ్ సెందితికాన్ ఆజి మంజినాండ్రె, అయాలెకెండెనె మాపుబా క్రీస్తుళ్ సెందితికావ్ ఇజ వాండ్రు ఒడజిబిదెళ్ వలె.

8 మీ బత్తు నాననం కిదెళ్ ఇజ సిల్లెద్ గాని దన్నిళ్ నెగెండ పిరిప్పెళ్ ఇజ ప్రబు మజి అతికారం సిత్త మనాన్. అయ అతికారం వందిళ్ నండ్రె పొగడిజి వెస్టిజ్బా నాను సిగు అవి.

9 నాను మిజి రాసిని ఉత్తమదాన్ మిజి తియెల్నిని వన్ని లెకెండ మండ్రెళ్ అవిద్ ఇజ కోరిజిన.

10 “వన్ని ఉత్తమకు గొప్ప అర్థం మన్ని మాటెళ్ మన్నికెళ్, సత్తుదాన్ కూడితికెళ్ గాని వాండ్రు మా నడిమి మనివలె సత్తు సిల్లి వన్ని లెకెండ మనాన్. వర్గజిని మాటెళ్ ఇని అర్థం సిల్లికెళ్ మన్నె”, ఇజ ఎయెరో వెస్టిన్సార్గె.

11 యాలెకెండ వెస్టిన్సార్కర్ యాక నెస్టెళ్. ఇనిక ఇహిజ మాపు దూరం మనివలె రాసిని ఉత్తమదు మన్ని మాటెళ్ ఎలాగ మర్తికెళ్నె, అయాలెకెండెనె మీ నడిమి మాపు మన్నివలె మాపు కిని పణిజ్బా మంజినె.

12 వరిజ్ వారి పొగడె: ఆజిని సెగెండార్ లెకెండ మాపుబా మనావ్ ఇజనె, మాపు వరిజ్ సమానం అతికావ్ ఇజనె వెస్టెళ్. ఎండనిజ్ ఇహిజ, వారు మహి వరి వెట విజు సజతిజ లోఇ సమానం మనానా ఇజ పోలిసి సుడజినినార్. అయాక బుద్ది సిల్లి పణినె.

13 గాని మజి అక్కు మనిదనిజ్ ఇంక మాపు వగడె: అవివ్. దేవుణు మా వందిళ్ కేట కిత్తి మన్ని పణిదిజ్ జవ డాటెవిండ దన్ని లోఇనె పొగడిజినావ్. మాపు మీ నడిమి కిజిని పణిబా దన్ని లోఇ మనాద్.

14 మాపు క్రీస్తు వందిళ్ సువార్త సాటిసి మీ డగ్రు వాతివలె దేవుణు మజి ఒవజెప్పి మన్ని దనిజ్ జవ డాట్టి సానికావ్ అవెతావ్. ఎండనిజ్ ఇహిజ మీరు దన్ని లోఇనె మన్నిదెర్. మావె క్రీస్తు సువార్త ముజాల మీ నడిమి సాటిస్తావ్.

15 మహికార్ కన్నబాడె:జి కిత్తి దన్ని లోఇ వంతు మనికావ్ ఇజి మాపు పొగడివివ్. గాని దేవుణు మున్ను మన్ని మీ నమకం పిరిజి వానివలె మీ నడిమి మాపు కిజిని సువార్త పణి మరి ఒద్దె పెరిక ఆజి సర్నాద్ ఇజి మాపు ఆస ఆజినావ్.

16 మీ అతాల మని నాక్కజ్బా సువార్త సాటిస్తెళ్ ఇహిజ అట్టావ్. అయాలెకెండె కిజి ఒరెన్ వన్నిజ్ ఒవజెవె అతిమని ప్రాంతమదు కిబె అతి పణి వందిళ్ మజి మావె పొగడె: అవివ్.

17 గాని దేవుణు మాటదు రాస్తి మన్ని లెకెండ, “పొగడె: ఆజినికాన్ ప్రబు కిత్తి వనకాళ్ వందిజ్నె పొగడె: అదెళ్ వలె”.

18 వన్నిజ్ వాండ్రె పొగడె: ఆనికాన్ తగ్గికాన్ అవిన్, తగ్గికాన్ ఇజి దేవుణు వెహ్పికాండ్రె తగ్గికాన్ ఆజినావ్.

11

1 నా బుద్ది సిల్లి పణిజ్ మీరు కండెక్ ఒరిసినిదెర్ ఇజి నాను ఆస ఆజిన, నిజమె ఏలుబా మీరు ఒరిసినిదెర్.

2 మీ వందిళ్ దేవుణు మన్నుదు మన్ని ఆస వజినె నానుబా మీ వందిళ్ అయాలెకెండెనె సత్తు మన్ని ఆసదాన్ మంజిన. ఎండనిజ్ ఇహిజ, ఒరెన్ దజడె: వందిళ్ నాను మిజి ప్రదానం కిత్త మన్ను. అహిజ, క్రీస్తు వందిళ్ నాను మిజి ఇని కల్లిసిల్లి ఉండ్రె విడిజిబోదెలి లెకెండ వన్నిజ్ ఒవజెప్ప మన్ను.

3 గాని సరాన్ వన్ని సెఇ ఆలోననమ్దాన్ అవ్వెళ్ మోసెం కిత్తి లెకెండ, మీ మన్నుబా తప్ప బోదెజాణిజ్ మోసెం కిబె ఆజి, మీరు క్రీస్తు మున్ను మిజి మన్ని ఇని కల్లిసిల్లి ప్రేమ డిసి సిజి, వన్ని బాణిజ్ దూరం ఆనిదెర్లె, ఇజి నాను తియెల్ ఆజిన.

4 ఎండనిజ్ ఇహిజ, ఎయెన్బా మీ డగ్రు వాజి మాపు సాటిస్తి యేసుజ్ అవిండ మరి ఒరెన్ యేసుజ్ సాటస్తిజ, మరి మా వెట మీరు పొందితి మని దేవుణు అత్తు అవిండ మరి ఉండ్రె అత్తు పొందితిజ, అక్కాదె

ఆవిండ మాపు వెప్తా సువార్త ఆవిండ మరి ఉండ్రీ సువార్త డగ్రు కిత్తిజ, నులుగ మీరు వన్యాజ్ లోజిజి వరిజ్ ఒరిసినిదెర్.

5 అయ గొప్ప పేరు పొందితికార్ ఆతి అపొస్తురు ఇంక నాను ఒద్దె తక్కుదికాన్ ఆవి ఇజి నాను ఒండేబిజిన.

6 నాను నెగెన్ వరిదెజ్ నెన్ఇకాన్ ఆతిజిబా, గాని నాను గెణం సిల్లిక ఆవి. మిజి విజేరిజ్ విజు పణిజాణిజ్, విజు మాటిజాణిజ్ మాపు అయ గెణం వందిజ్ రుజువ్ కిజ తోరిస్త మనావ్.

7 మీ బాణిజ్ ఇనికబా లొన్విండ దేవుణు సువార్త మీ నడిమి సాటిసి, మీరు పెరికిదెర్ ఆదెజ్ ఇజి నజి నానె తగి ఆతివలె నాను పాపం కిత్తానా?

8 మీ నడిమి దేవుణు పణికిదెజ్ మహి సజమ్కాణిజ్ వరి డబ్బుజ్ డోజ కిత్తి లెకెండ వరి బాణిజ్ కూల్లి లొనె ఆత.

9 నాను మీ నడిమి మహివలె, ఇనికబా అవ్నరం ఆతిజిబా, నాను ఎయెరిజ్ బా ఇనికబా లొన్వింత. మాసిదోనియదాన్ వాతి తంబెరిజ్ నా అవ్నరమ్కాజ్ వందిజ్ సిత్తార్. మీ బాణిజ్ ఇనికబా లొన్విండ, నాను మిజి ఉండ్రీ బరు లెకెండ మన్విండ జాగర్తదాన్ మహి లెకెండెనె వాని కాలమ్దబా మంజిన.

10 క్రీస్తుజ్ మని నిజం నా లొఇ మన్నిజ్ అక్కాయ ప్రాంతమ్దు మనికార్ ఎయెరిబా నాను యా లెకెండ పొగడిజి వెప్పాని దనిజ్ అడ్డు కిదెజ్ అట్వెర్.

11 ఎండనిజ్ నాను అయాలెకెండ మహ ఇహిజ, మిజి ప్రేమినిఇ వందిజ్ ఆవిద. నాను మిజి ఎన్నా ప్రేమినిస ఇజ దేవుణు నెసినాన్.

12 గాని ఏలు కిజిని లెకెండెనె నాను దేవుణు పణి కిజి మంజిన, అందెజి మాపు కిజిని లెకెండెనె వారుబా దేవుణు పణి కిజినార్ ఇజి వెప్తాజ్ ఇజి ఆనె ఆజిని వరిజ్ మా వెట పొగడి: ఆదెజ్ అక్కు సిల్లెండ మన్వింద ఇజి.

13 వారు నన్నికార్, క్రీస్తుజ్ అపొస్తురు లెకెండ వేసం పొకె ఆజి తోరి ఆతిమని మోసం పణిజ్ కిజిని మిజి మోసం కిత్తి డోజ అపొస్తురు.

14 దన్ని వందిజ్ బమ్మ ఆదెజ్ అక్కర్ సిల్లెద్. నయ్యూసుబా జాయ్ మని దూత లెకెండ వేసం పొకె ఆనాన్.

15 అందెజి నయ్యూసు వందిజ్ పణి కినికార్, వారు వరిజ్ వారి నీతి నిజాయితి పణిజ్ కినివరి లెకెండ వేసం పొకె ఆతిజి అక్క పెరిక ఆవిద. వారు కిజిని పణిజ తగితి లెకెండెనె ఆకార్దిజ్ వరిజ్ జర్గినాదె.

పవులు వన్నిజ్ వాతి కన్యమ్కాజ్ వందిజ్ పొగడి:జినాన్.

16 నాను బుద్ది సిల్లికాన్ ఇజి ఎయెన్బా ఒండేబిదెజ్ ఆవిద ఇజి నాను మరి మిజి వెప్పాన్. నాను బుద్ది సిల్లికాన్ ఇజి మీరు ఒండేబిత్తిజి ఆపా ఒండేబిదు. అందెజి నానుబా కండెక్ పొగడి: ఆదెజ్ అట్టు.

17 యాలెకెండ నా మన్సుదు దయరం ఆజి పొగడి:జినివలె, అక్క ప్రబు మాటిజ్ వరితి లెకెండ ఆవి, ఉండ్రీ బుద్ది సిల్లివన్ని లెకెండ వర్గజిన.

18 నండొండార్ యా లోకమ్దిజ్ నందితి వరి లెకెండ పొణిజినార్, అందెజి నానుబా అయాలెకెండెనె పొణిజిన.

19 మీరు గొప్ప బుద్ది మన్నికిదెర్గె. మీరు బుద్ది సిల్లివరిజ్ సర్దదాన్ డగ్రు కిజినిదెర్.

20 ఒరెన్ మిజి వెట్టిపణి కిని వన్ని లెకెండ కిత్తిజిబా, ఒరెన్ మోసం కిజి మిజి మన్నికెజ్ విజు లొనె ఆతిజిబా, ఒరెన్ మిజి మోసం కిజి వన్నిజ్ లాబం తప్పిజిబా, మీ మొకొమ్దు డెయిజిబా మీరు వన్నిజ్ ఒరిసినిదెర్.

21 అయాలెకెండ వారు కిత్తి లెకెండ కిదెజ్ మాపు సత్తు మనికావ్ అవ్ ఇజి నాను సిగు ఆజి వెప్పాన్. గాని ఎయెన్బా ఇనిదన్ని వందిజిబా పొగడి: ఆదెజ్ అక్కు మాదా ఇహిజ, నజిబా అయాలెకెండ పొగడి: ఆదెజ్ అక్కు మనాద. నాను ఒరెన్ బుద్ది సిల్లి వన్ని లెకెండెనె వర్గజిన.

22 వారు ఎల్లివారునా? నానుబా ఎల్లి వాండ్రునె. వారు ఇస్రాయేలుదికారా? నానుబా ఇస్రాయేలుదికానె. వారు అబ్రాహాము కుటుమ్దికార్రా? నానుబా నన్నికాండ్రె.

23 వారు క్రీస్తు వందిజ్ పణి కినికారా? నాను వెరి వన్ని లెకెండ వర్గజిన. నాను క్రీస్తు వందిజ్ మరి ఒద్దె పణి కిత్త మన్న. నాను నండొ కన్యబాడే:జి పణి కిత్తమన్న. నండొ నుట్టు జెలిదు మహ. కొర్డిజాణిజ్ నండొ నుట్టు గొప్ప డెయె ఆత. నండొ నుట్టు సావుదిజ్ డగ్రు ఆత.

24 యూదురు లోకర్ బాణిజ్ అయదు నుట్టు, ఉండ్రీ తక్కు నలవయ్ దెబ్బెజ్ తిహ.

25 మూండ్రి సుట్టు, డుడ్డుదాన్ డెయె ఆత. ఉండ్రి సుటు పణకాణిక్ డెయె ఆత. మూండ్రి సుట్టు, సందరమ్మదు పయనం కిజి మహిజ్ ఒడెజ్ పెడెహిజ్ బాద ఆత. ఉండ్రి రెయు పొగోల్ సందరమ్మదు ఏరుదు మహ

26 ఎస్తివలెబా నాను పయనం కిజి మహిజ్ నండ్రి సుట్టు, పయనమ్మదు పెరి గడ్డెజాణిక్ ప్రమాదమ్మకు వాతె. డోజారిజు వెట ప్రమాదమ్మకు వాతె. మా సొంత జాతిదికారాతి యూదురి వెట ప్రమాదమ్మకు వాతె. పట్టుమ్మదు ప్రమాదమ్మకు వాతె. అడివిదు ప్రమాదమ్మకు వాతె. సందరమ్మదు ప్రమాదమ్మకు వాతె. డోజ తంబెరిజ వెట ప్రమాదమ్మకు వాతె.

27 నాను నండ్రి కన్యమ్దాన్ ప్రమోజాణిక్ పణిక్ కిజి, రెయ్య నిద్ర సిల్లెండ మహ. ఏక, ఏక తిండి సిల్లెండ బజి ఎమ్మిదాన్ మహ. ఒడెల్దు సొక్కెజ్ సిల్లెండ పిన్నిదు నిగసాణె మహ.

28 యాకెజె ఆవిండ విజు దేవుణు సజమ్కాజ్ వందిక్ ఎలాగ ఆనెనో ఇజి రోజు మన్నుదు ఒడెబిజి మహ.

29 సత్తు సిల్లికాన్ ఎయెన్ మనాన్? నానుబా సత్తు సిల్లికాన్ ఆవనా? ఎయెన్ పాపమ్మదు తోరోడె ఆజినానా? నజీ మన్నుదుబా కోపం రెజె ఆవిదా?

30 నాను పొగ్డె ఆదిజ్వలె ఇహిజి నజీ మన్ని సత్తు సిల్లి వన్కా వందిజ్నె నాను పొగ్డినాలె.

31 నాను వర్గిజనిక అబద్దం ఆవిద్ ఇనిదన్నిజ్ ఎస్తివలెబా పొగ్డె; ఆజిని మా ప్రబువాతి యేసుజ్ బుబ్బాతి దేవుణునె నెసినాన్.

32 దమన్ను పట్టుమ్మదు నాను మహివలె, రాజు ఆతి అరెత అడిగి మన్నికానాతి అదికారి నజీ అస్సెజ్ ఇజి దమన్ను పట్టుం విజు కాపు ఇడ్డాన్.

33 సస్తివలె పట్టుమ్మది కోట గోడూదు మన్ని కిటికి బోరోదాన్, గంపదు డిపె ఆతానె వన్ని కియుదాన్ తప్తె ఆత.

12

1 పొగ్డిజి వర్గిజె ఇహిజి మరి నండ్రి మన్నె. వమ్మి దన్నిజ్ ఇని లాబం సిల్లిజ్బా దేవుణు బాణిక్ తోరె ఆతి కలెజి వందిజ్, డాజెతి మన్నికెజ్ దేవుణు తోరిస్తి వందిజ్ నాను వెప్పా.

2 క్రీస్తుజ్ నెందితికాన్ ఒరెన్ వన్నిజ్ నాను నెసిన. పదనాల్లి పంటిజ్ ముజాల వాండ్రు మూండ్రి ఆగాసం దాక పెరి ఆతాన్. ఒడెల్దుదాన్ పెరి అతాండ్రె, ఒడెల్ సిల్లెండ పెరి అతాండ్రె ఇజి నాను నెన్వి. అక్క దేవుణునె నెసినాన్.

3 పరదీసు ఇని దేవుణు మంజిని బాడిదాక పెరి ఆతి ఒరెన్ వన్నిజ్ నాను నెసిన. వాండ్రు ఒడెల్దుదాన్ పెరి అతాండ్రె, ఒడెల్ సిల్లెండ పెరి అతాండ్రె ఇజి నాను నెన్వి. అయ్యాక దేవుణు నెస్సాన్.

4 అబ్బి వర్గిదెజ్ అట్టెనన్ను సజతిజ్ వెహాన్. లోకు ఎయెన్బా వన్ని వెయుదాన్ అయ మాటిజ్ వర్గిదెజ్ అక్క సిల్లెద్.

5 నని ఒరెన్ వన్నిజ్ పొగ్డిజి నాను వర్గిన గాని నజీ నానె పొగ్డె; ఆవి. నాను పొగ్డె; ఆదిజ్ ఇహిజి నజీ మన్ని సత్తు సిల్లి వన్కా వందిజ్నె పొగ్డె; ఆన.

6 నాను పొగ్డిదెజ్ ఇజి ఒడెబిత్తిజు, నిజం మనికెజ్నె వెప్పా. అందెజె నాను బుద్ది సిల్లికాన్ ఆవి. ఎందనిజ్ ఇహిజి నాను కిత్తికెజ్ సుడెజిన్, నాను వర్గినికెజ్ వెంజిన్, నాను మన్ని దనిజ్ ఇంక ఒద్దె పెరికాన్ ఇజి నా వందిజ్ ఎయెన్బా ఒడెబివిండ మండ్రెజ్ ఇజి నాను పొగ్డివి.

7 దేవుణుది డాజెతి మన్ని గొప్పు పెరి సజతిజ్ నజీ తోరె ఆతి వందిజ్, నజీ నానె పెరిక ఇజి ఉజె ఆవిండ మండ్రెజ్ ఇజి నజీ బాద కిదెజ్ ఇజి నా ఒడెల్దుదు ఉండ్రి సొంపు ఇడ్డె; ఆతి లెకెండ్ ఒరెన్ సయ్యూసు దూత నా డగ్గు పోకె ఆత మనాన్.

8 అయ్యాక నా ఒడెల్దుదాన్ లగ్జి విసిర్అ ఇజి నాను ప్రబు వెట మూండ్రి సుట్టు బతిమాలిత.

9 గాని వాండ్రు నజీ, “నా దయ దయం నిజీ ఆనాద్, సత్తు సిల్లిబాన్ నా సత్తు పూర్తి సత్తు మనిక ఆజినాద్”, ఇజి వెహాన్. అయ్యావలె నజీ సత్తు సిల్లి వన్కా వందిజ్ మరి ఒద్దె సర్దదాన్ పొగ్డినాలె అందెజె క్రీస్తు సత్తు నా మున్ను నిల్లి మంజినాద్.

10 ఎన్నివలె నాను సత్తు సిల్లికానో, నన్నివలె నాను సత్తుదికానో అజినాన. అందెజె క్రీస్తు వందిజ్ నజీ మన్ని సత్తుసిల్లి వనక వందిజ్, నిందెజ వందిజ్, కర్ణమకు వాతి వందిజ్, హిమ్నిజ వందిజ్, న్రమెజ వందిజ్ నాను సర్వ అజిన.

11 నాను బుద్దిసిల్లి వన్నిలెకెండ్ మన, అయా లెకెండ్ మండ్రెజ్ ఇజి మీరె నజీ బలవంతం కిత్తిదెర్. నాను తగ్గికానో ఇజి మీ బాణిజ్ వెవె ఆదెజ్ నజీ అక్క మనాద్. ఎందనిజ్ ఇహిజ, నాను ఎపటిదికానో అజిజ్బా, మీ గొప్పు పేరు పొందితి అపొస్తురు ఇంక తక్కుదికానో అవి.

12 నాను ఎస్సానో ఓర్బుదాన్ మీ నడిమి తోరిన్సి మన్ని బమ్మాతి పణిజ్, ఎసెజ్బా తొక పణిజ్, బమ్మాని గొప్పు పణిజ్ నాను అపొస్తుడు ఇని దన్నిజ్ రుజువ్ కిజినె.

13 ఇనిదన్ని వందిజ్బా నాను మీ మున్సు ఆదారం అవిత. ఇక్కడె అవిండ మరి ఇని సజతిదుబా మీరు మహి సజమక ఎర్దు తక్కుదికిదెర్ అజతిదెర్. నాను కిత్తి యా తపు మీరు సెమిస్తు.

14 ఏలు మూండ్రి సుట్టు మీ డగ్రు వాదెజ్ ఇజి తయారాజన. నాను వాతివలె ఇనిదన్ని వందిజ్బా నాను మీ మున్సు ఆదారం అవి. ఎందనిజ్ ఇహిజ మీజీ కల్లితి మన్నికెజ్ ఇనికబా నజీ అవ్వసరం సిల్లెద్, గాని మీరె నజీ కావాలి. కొడోర్ అయసి అపొసిన్ వందిజ్ అవిద్, గాని అయసి అపొసిన్ కొడోర్ వందిజ్ అస్తి గణస్తెజ్గదె.

15 అందెజె నాను నజీ కల్లితి మన్నికెజ్ విజు మీ వందిజ్ కర్పు కిన. మరి నజీ నానె మీ వందిజ్ కర్పు కిబె ఆన. నాను మీజీ లాపు ప్రేమిస్తిజ మీరు నజీ తక్కు ప్రేమిసినిదెరా?

16 నాను ఇనిదన్ని వందిజ్బా మీ మున్సు ఆదారం అవి, అక్క నిజమె. గాని ఇనికాదో ఉండ్రీ ఉపాయకిజి మీజీ మొసెం కిజి లోసె ఆనాన్లె ఇజి ఎయెర్బా వెహ్సెర్లె.

17 నాను మీ డగ్రు పొక్తి ఎయెర్ వెటబా మీజీ మొసెం కిజి ఇనికబా లోనె ఆత మనానా?

18 మీ డగ్రు సొండ్రెజ్ ఇజి తీతుజ్ నాను బతిమాలిత. వన్నివెట మా తంబెరి ఒరెన్ వన్నిజ్బా పొక్త. తీతు మీజీ మొసెం కిజి ఇనికబా లోనె అతాండ్రా? మాపు ఉండ్రె మున్సుదాన్, ఉండ్రె లెకెండ్నె నడిమితావా?

19 మాపు నెగ్గికాన్ ఇజి మీ ఎర్దు తోరిన్సెజ్ ఇక్కెజ్ విజు మీవెట వర్గిజనాన్ ఇజి మీరు ఒడబిజినిదెరా? క్రీస్తుజ్ నెందితికిదెర్ ఇజి దేవుణు ఎర్దునె మాపు వర్గిజనాన్. మా తంబెరికాండె, మీరు మీ మున్సురు నెగెండ్ దేవుణు సత్తుదాన్ మండ్రెజ్ ఇజినె యాకెజ్ విజు మాపు కిత్తాన్.

20 నాను వానివలె మీరు నజీ ఇస్టమాతికిదెర్ లెకెండ్ మన్ఇదెర్ను, మరి మీజీ ఇస్టమాతి లెకెండ్ నానుబా మన్ఎను ఇజి నాను తియెలాజన. మరి మీ నడిమి జటిజ్, గోస అనికెజ్, కోపం అజి మంజినిక, గుంపుజ్ గుంపుజ్ అనికెజ్, దుసలాడెనికెజ్, గుసగుస వర్గినిక, పొజిజి ఉబె అనిక, గగోలి అనిక విజు మంజినెను ఇజి నాను ఒడిబిజిన.

21 మరి నాను మీ డగ్రు వానివలె మీ ఎర్దు దేవుణు నా బుర్త డిస్సిని లెకెండ్ కినాన్లెను ఇజి నాను తియెలాజన. మరి ముజాల వరిజ్ అలవాటు మహిలెకెండ్ సెఇ పణిజ్ కిజి, కేలార్ బూలాజి, రంకు బూలాజి విజెరె ముందాల సిగు అజి మంజిని వందిజ్ మరి వారు దుకమాజి పాపమకు ఒప్పుకోడెజి డిసిసివీండ మన్ని వందిజ్ నాను దుకం ఆనాలె ఇజి తియెలాజన.

13

1 ఏలు నాను మీ డగ్రు వానివలె ఇక కూడుఱ్వి మూండ్రీ సుట్టు ఆనె. దేవుణు మాటదు రాస్తిమని లెకెండ్, "రివెర్, మువెర్ సాసిరి మాటజ వెట విజు సజతిజ్ నిజమాతికెజ్ ఇజి రుజువ్ కిదెజ్వలె".

2 రుండి సుట్టు నాను వాతిజ్ మీవెట మహివలె నాను మీజీ బుద్ధి వెస్సె లెకెండ్నె వెస్సె మన. ఏలు మీబాణిజ్ దూరం మంజిబ వెస్సిన్. నాను మరీజి వానివలె ముందాహాన్ తపు కిత్తి వరిజ్బా నాను డిసెన్, వెనుక తపు కిత్తి విజెరిజ్ ఎయెరిజ్బా డిసెన్.

3 ఎందనిజ్ ఇహిజ క్రీస్తు నావెట వర్గిజనాన్ ఇని దనిజ్ రుజువ్ కిల ఇజి మీరు వెస్సినిదెర్ గదె? వాండ్రు మీ వెట సత్తు సిల్లికానో అవిన్, గాని మీ నడిమి గొప్పు సత్తుమన్నికాన్.

4 క్రీస్తు యా బూమి మున్సు మహివలె సత్తు సిల్లివన్ని లెకెండ్ సిలువ పొకె అతాన్, యాక నిజమనె. గాని దేవుణు సత్తుదాన్ ఏలు బత్తిజినాన్. అయాలెకెండ్నె వన్నివెట కూడెజి మాపుబా సత్తు సిల్లికాన్ గాని దేవుణు సత్తుదాన్ మీ వందిజ్ దేవుణు పణి కిదెజ్ క్రీస్తు వెట కూడెజి బత్తిజినాన్.

5 మీరు దేవుణు మున్ను నమకం మనికిదెరొ ఇజి మిజి మీరు పరిస కిబె ఆదు. యేసుక్రీస్తు మీ లొఇ మనాన్ ఇజి మీరు నెన్ఇదెరా? యేసుక్రీస్తు మీ లొఇ మనాన్ ఇజి నెన్ఇదెర్ ఇహిజ, నిజమె మీరు ఆర్తిమనికిదెర్.

6 మాపు అయా లెకెండ్ అర్తికావ్ అవిప్ ఇజి మీరు నిజం నెస్సిదెర్ ఇజి నా మన్నుదు నజి నమకం మనాద్.

7 మీరు ఇని సెఇ పణిజ్ కిఎండ మండ్రెజ్ వలె ఇజి దేవుణుదిజ్ పార్లనం కిజినావ్. మాపు పరిసెజు నిల్ని మంజునికావ్ ఇజి లోకుర్ ఎర్దు తోర ఆదెజ్ ఇజి సిల్లెద్. గాని మాపు వీజితికావ్ ఇజి తోరె ఆతిజిబా మీరు నిజమాతికెజ్ కిజి మండ్రెజ్ ఇజి కోరిజినావ్.

8 నిజమాతికెజ్ నె అవిండ, నిజమాతి దనిజ్ పడిఃఎండ ఇనికబా కిదెజ్ మాపు అట్ఎవ్.

9 మాపు సత్తు సిలికావ్ మనివలె, మీరు సత్తు మనికెదెర్ ఇజి మాపు సర్దదాన్ మనావ్. అక్కాదె అవిండ మీరు దేవుణు ఎర్దు ఇనికబా తకు సిల్లెండ విజు నెగెణ్ మనికిదెర్ ఆదెజ్ ఇజి మాపు పార్లనం కిజినావ్.

10 మిజి దేవుణు మున్ను మని నమకమ్దు పిరిప్తెజ్ నె ప్రబు నజి అతికారం సితాన్ గాని మిజి అర్పెజ్ ఇజి సిల్లెద్. అందెజె నాను మీ డగ్రు వానివలె ప్రబు నజి సితమని అతికారమ్దాన్ కోపమ్దాన్ గటిజ ఇనికబా కిఎండ మండ్రెజ్ ఇజినె మీ బాణిజ్ దూరం మంజి యా ఉత్తం రాసిన.

11 కడెఃవెరిదు, తంబెరిజాండె, మీరు సర్దదాన్ మండ్రు. మీరు మరి ఒద్దె నెగెణ్ మనికిదెర్ ఆదెజ్ ఇజి దేవుణుదిజ్ సర్ద కిదెజ్ మిజి ఆట్ని లెకెండ్ విజు సజతిజ్ కిదు. ఒదర్పుదాన్ మండ్రు. మా మాటిజ్ మీ మన్నుదు నాటిసి మండ్రు. విజిదెరె ఉండ్రె మన్నుదాన్ మండ్రు. సమాదానమ్దాన్ బత్కిదు. ప్రేమని సమాదనం మనికానాతి దేవుణు మీవెట మంజినాన్.

12 నెగ్గి మన్నుదాన్ ఒరెన్ మరి ఒరెన్ వన్నిజ్ పొంపిజి మాడిఃని మండ్రు.

13 ఇబ్బెణికార్ నమ్మిత్తికార్ విజెరె మీరు బాగ మనిదెరా ఇజి వెన్బాజినార్.

14 ప్రబువాతి యేసుక్రీస్తు దయా దర్మం, దేవుణు ప్రేమ, దేవుణు ఆత్మ మీవెట కూడెజి మంజునిక, మీ విజెదెరె వెట మనీద్.

అపొస్తుడు ఆతి పవులు గలాతీయ ముటాదు మని దేవుణు సజమ్కాక్ రాస్తి ఉత్తం

నెల్లు కిబిసినిక

అపొస్తుడు ఆతి పవులు గలాతీయ ముటాదు మని దేవుణు సజమ్కాక్ రాసిని ఉత్తరమ్నె యాక. గలాతీయ ముటాదు పవులునె సువార్త వెహ్లాన్. వీరు నెగ్రెండనె క్రీస్తుజ్ నమ్మిజి వాజి మహార్. నస్తివలె నెగొండార్ నమ్మితి యూదురు, క్రీస్తు మున్ను మని నమకమ్నె ఆవిండ, యూదురి రూలుజ్ లోజీజి, సునతిబా కిబె ఆదెజ్ వలె ఇజి తప్ప బోద వరిజ్ వెహ్లాన్. యా మాట వెహరి, విరి మన్ను అయా బోద దరోజ్ మహ్లాన్. దినిజ్ దిదిజి పవులు రాసిని ఉత్తరమ్నె యాక. ఒరెన్ సునతి కిబె ఆతిజ, దేవుణు ఎద్దు నీతి నిజాయితి మనికాన్ ఆవెన్. గాని యేసుప్రబు మున్ను, నమకం ఇట్టిజనె దేవుణు ఎద్దు నీతి నిజాయితి మనికాన్ ఆనాన్ ఇజి వెహ్లానాన్. మరి, మాటు క్రీస్తుజ్ నమ్మితివలె డిజె ఆతి మని పరి లెకెండె మనాట్, అక్కు మని పరి లెకెండె మనాట్. రూలుజి అడిగి మన్వెత్ ఇజి వెహ్లానాన్. మరి, ఒడోల్ది సెఇ ఆసెజ్ కిబిస్తి పణిజ్ ఇని ఇనికెజ్, దేవుణు ఆత్మ నడిః పిసిని వజి నడిఃకాన్ ఎలాగ మంజినాన్ ఇజి బా వెహ్లానాన్.

1-2 అపొస్తుడు ఆతి పవులు ఇని నాను, గలాతీయ ముటాదు మని దేవుణు సజమ్కాక్ రాసిని ఉత్తం. నెగొండార్ నజి అపొస్తుడు ఇజి ఏర్పాటు కిత్తిజ్ నాను అపొస్తుడు ఆవెత్. ఒరెన్ లోకు నజి అపొస్తుడు ఇజి పొక్తిజ్ నాను అపొస్తుడు ఆవెత్. గాని యేసు క్రీస్తుని బుబ్బాతి దేవుణు నజి అపొస్తుడు ఇజి ఏర్పాటు కిత్తి పొక్తిజ్నె నాను అపొస్తుడు ఆత. వాండ్రె యేసుక్రీస్తుజ్ సాపుదాన్ మరజి బత్కొస్తాన్. నానుని నా వెట ఇబ్బు మని దేవుణుదిజ్ నమ్మితి తంబెరిబు, అబ్బె మని సజమ్కాణి విజెరిజ్ వెనబాతి లెకెండె వెహ్లానాన్.

3 మా బుబ్బు ఆతి దేవుణుని ప్రబు ఆతి యేసుక్రీస్తు దయ దర్మమదాన్, మీరు నిపాతిదాన్ మండ్రెజ్ సాయం కిపిర్.

4 మాటు కిత్తి తప్ప పణిజ్ మజి తప్పిస్తెజ్, యా లోకమ్దు మని సెఇ బాణిజ్ డిఃస్సిస్తెజ్ క్రీస్తు మా పాపమ్క వందిజ్ వన్నిజ్ వాండ్రె ఒపజెవె ఆతండ్రె సాతాన్. మా బుబ్బు ఆతి దేవుణు ఎత్తు కిత్తి వజినె వాండ్రు యా లెకెండె మా వందిజ్ సాతాన్.

5 దేవుణుదిజ్ అంతు సిల్లెండె ఎలాకాలం గవరం మనీద్. ఆవెన్.

సువార్త ఉండ్రె. మరి ఉండ్రె సిల్లెద్.

6 నిజమాతి సువార్త నమ్మితి వెనుక నిసా బేగి మీరు దేవుణుదిజ్ డిఃసి సీజనిదెర్ ఇజి నాను నండో బమ్మ ఆజిన. క్రీస్తు దయ దర్మమదాన్ మిజి సీజని కొత్త బత్కుదిజ్నె, దేవుణు మిజి కూక్లాన్. వన్నిజ్ డిఃస్తిదెర్, సువార్త ఇజి పేరు వెహె ఆజిన తప్ప బోదదు మన్ను ఇడఃజనిదెర్ ఇజి నాను నండో బమ్మ ఆజిన.

7 నాను నిజం వెహ్లాన్, అయాక క్రీస్తు వందిజ్ తోరిసి నెస్పిసిని సువార్త ఆవెద్. గాని నెగొండార్ మిజి పంర్ కిబిసి, అయా సువార్త మారిస్తెజ్ సుడఃజినార్.

8 గాని అపొస్తురు ఆతి మాపునో, పరలోకమ్దాన్ వాతి దేవుణు దూతనో మరి ఎయెన్ ఆతిజ్బ, మాపు ముజాలె మిజి వెహ్లా సువార్త ఆవిండ, దినిజ్ వెత్రికం ఆతి సువార్త మిజి వెహ్లాజ, దేవుణు సాయిపు వన్ని మున్ను, ఎలాకాలం మనీద్.

9 మాపు ముజాలె మిజి వెహ్లా లెకెండె, ఏలు నాను మరి ఉండ్రె సుటుబా వెహ్లా న. మా బాణిజ్ మీరు వెంజి, నమ్మితి సువార్త ఆవిండ, దినిజ్ వెత్రికం ఆతి సువార్త మిజి ఎయెన్బా వెహ్లాజ, దేవుణు సాయిపు వన్ని మున్ను, మనీద్.

10 నాను యా లెకెండె వెహ్లా లోకుర్ బాణిజ్ మెపు కోరిజినానా? దేవుణు బాణిజ్ మెపు కోరిజినానా? లోకురిజ్ సర్ద కిదిజ్ సుడఃజినానా? లోకురిజ్ సర్ద కిబిస్తెజ్ నాను సుడఃజినె మహిజ, నాను క్రీస్తుజ్ నీవ కినికాన్ ఆవిండ మన.

దేవుణుని పవులుజ్ అపొస్తుడు ఇజి కూక్తాన్.

11 తంబెరిజాండె, నాను మిజి వెహ్తి సువార్త లోకు బాణిజ్ వాతిక ఆవెద ఇజి నాను మిజి వెహ్తిన.

12 అయ్యాక లోకు బాణిజ్ నజి దోహ్కొక్తిక ఆవెద. ఎయెనబా నజి నెన్పిన్సిక ఆవెద. గాని యేసు క్రీస్తునె యా సువార్త నజి తోరిసి నెన్పిస్తాన్.

13 ఒరెన్ యూద వాండ్రు కిజిని లెకెండె యూదురి మతమ్ది రూలుజ్ విజు లోజిజి పటుదలదాన్ అయ్యాకెజ్ కిజి నాను ఎలాగ బత్తిజి మహా ఇజి మీరు వెహి మనిదెర్. అయాలెకెండె దేవుణు సజమ్కాజ్ కనికారం సిల్లిండె నాను ఎసానో హిమ్మెజ్ కిజి, వరిజ్ నాననం కిదెజ్ సుడూత ఇజి మీరు వెహి మనిదెర్.

14 నా జతదు మని మహి యూదురిజ్ ఇంక యూద మతమ్ది రూలుజ్ విజు నాను తవ్వెండె కిత. నా అనిసిర్ నెన్పిన్సి అసారమ్కు పటుదలదాన్ కిదెజ్ నండో సుడూత.

15-16 గాని నాను నా యాయ పొటాదు పిండెం ఆతి మహివలె, దేవుణు నజి వన్ని వందిజ్ ఎర్లిస్తాన్. వన్ని దరు దర్మమదాన్ వన్నిజ్ సేవ కిదెజ్ నజి ఏర్పాటు కిత్తాన్. నాను యూదురు ఆఇ వరి నడిమి యేసు వందిజ్ సువార్త వెహ్తి వందిజ్ వన్ని మరిసిజ్ నజి తోరిసి నెన్పిన్సిక ఇజి వాండ్రు తిర్మామానం కిత్తాన్. ఆహె తిర్మానం కిత్తివలె నాను ఎయె వెటబా అలోసనం వెన్బావత.

17 నాను అపొస్తుడు అని ముజాల అపొస్తుడు ఆతి వరిజ్ సుడూదెజ్ యెరూసలెమ్దుబ సొన్వత. గాని వెటబె నాను అరిబిరు ముటదు సొహ. వెనుక నాను దమస్కు పట్టుమ్దు మరజి వాత.

18 దేవుణు వన్ని మరిసిజ్ నజి తోరిసి, మూండ్రె పంటిజ్ వెనుక, కేహ ఇజి కాకె అని పేతురు వెట నెల్వ అదెజ్ యెరూసలెమ్దు సొహ. అబ్బె వన్ని వెట రుండి వారమ్కు మహ.

19 వారి, ప్రబుజ్ ఎయెరిజ్బ సుడూవత. ప్రబుజ్ తంబెరి ఆతి యాకోబుజ్నె సుడూత.

20 నాను రాసినికెజ్ నిజమ్నె. అబద్దం ఆజ్. దిన్ని వందిజ్ దేవుణు నెసినాన్.

21 పేతురు వెట యెరూసలెమ్దు మహి వెనుక నాను సిరియ, కిలికియ ఇని ముటిజు సొహ.

22 నన్సివలె యూదయ ప్రాంతమ్దు మని దేవుణు సజమ్కాణికార్ నజి తోవండె మహార్.

23 గాని మహికార్ నా వందిజ్ వెహ్తి మనికెజ్నె వెహ మనార్. “మజి ముజాలె హిమ్మెజ్ కిజి మహికాన్, ఉండ్రె కాలమ్దు వాండ్రు నాననం కిదెజ్ సుడూతి మని సువార్త ఏలు వెహ్తినాన్”, ఇజి వెహ్తి మనికెజ్నె వెహ మనార్.

24 అందెజె నా వందిజ్ వారు దేవుణుదిజ్ పొగడితార్.

2

మహి అపొస్తురు వరి జతదు పవులుజ్ కుడుఃప్పినార్.

1 వతినాల్లి పంటిజ్ గడఃప్తి వెనుక, నాను యెరూసలెమ్దు మరి సొహ. బర్చబ నా వెట వాతాన్. తితుజ్బా మాపు వెట కూక్త బతావ్.

2 నాను సొండ్రెజ్ వలె ఇజి దేవుణు నజి తోరిసి వెహ్తాజ్నె నాను సొహ. అబ్బె పల్కుబడిః మని పెద్దలిజు కూడుప్తానె, యూదురు ఆఇ వరిజ్ నాను వెహ్తిన సువార్త ఇనిక ఇజి వరిజ్ వెహ్తా. ఎందన్నిజ్ ఇహిజు నాను వెహ్తినకెజ్ నిజం ఇజి వారు నెసిమండ్రెజ్. సిల్లిజు నాను ఏలు కిజిని సువార్త పణి, పణిడిజ్ రెవిండె ఆనాద్. యాలెకెండె వర్దిదెజ్ పల్కుబడిః మని పెద్దెలిజునె కుడుఃప్తి. మరి ఎయెరిజ్బ కూడుఃప్తి.

3 నా వెట వాతి తితు యూద వాండ్రు ఆవెన్. వాండ్రు గ్రెకు వాండ్రు. అందెజె వాండ్రు సునతి కిబె ఆఇకాన్. అహిజ్బా, వాండ్రు సునతి కిబె అదెజ్వలె ఇజి వారు కనితం వెహ్వితార్.

4 గాని నమ్మితికావ్ ఇజి వెహె అని నెగొండార్ తితు సునతి కిబె అదెజ్ వలె ఇజి వెహ్తోర్. వీరు గుట్టు నెన్సెజ్ ఇజి మా నడిమి డుగితార్, క్రీస్తుయేసు వెట కూడిఃతి మని దన్నిదటాన్ మజి వాతి విడుఃదలదిజ్ సుడూతార్. మాటు యూదురి రూలుజ్ లోజిదెజ్ వలె ఇజి వెహ్వివతార్.

5 వారు వెహ్తినన్సిజ్ నణెంబా లోజివతావ్. ఎందనిజ్ ఇహిజు నిజమాతి సువార్త మీ నడిమి నిల్లి మండ్రెజ్ ఇజి కోరితావ్.

6 గాని పల్కుబడిః మని పెద్దెలిజు, నాను వెహ్తిన సువార్త మారిన్సిజ్ ఇజినో, కందెకీబా దనివెట కుడుఃప్తెజ్ ఇజినో వెహ్వితార్. నజి వారు పలుకు బడిః మనికార్ అతిజ్బ అఇతిజ్బ నాను లెక్క కివత. దేవుణు ఇజికార్ పెరికార్ ఇజి తెడః తోవెన్.

7 గాని యూదురిజ్ సుహార్త వెహైజ్ దేవుణు పేతురుజ్ ఒవజెప్పి వజ, యూదురు ఆజ వరిజ్ సుహార్త వెహైజ్ నజి ఒవజెప్ప మనాన్ ఇజి వారు నెస్టార్.

8 ఇహిజ యూదురు నడిమి అపొస్తుడు ఆజి నేవ కిదెజ్ పేతురుజ్ సత్తు సీతి దేవుణునె యూదురు ఆజవరి నడిమి అపొస్తుడు ఆజి నేవ కిదెజ్ నజి సత్తు సీతాన్.

9 నీటకొహి లెకెండ్ మని పెరి వెద్దెలిజు ఆతి యాకోబు, పేతురు, యోహాను ఇనికార్ దేవుణు నజి యా పెరి వణి ఒవజెప్ప మనాన్ ఇజి నెస్తివలె బర్బుజ్జెని నజి వరి వెట జత కూడజి వణి కినికార్ ఇజి ఉండ్రి గుర్తు లెకెండ్ మా కికు వరి వెట కలవ్టార్. మాపు యూదురు ఆజ వరి నడిమి సుహార్త వెహైజ్ ఇజి వారు యూదురు నడిమి సుహార్త వెహైజ్ ఒప్పుకోటార్.

10 వరి నడిమి యెరూసలెమ్దు మని బీద వారు ఆతి నమ్మితి యూదురిజ్ మాపు సాయం కిదెజ్ ఇజినె వారు మా బాణిజ్ కోరితార్. నాను కిదెజ్ ఇజి నండో ఆన ఆతికాదె అయా సజతి.

పవులు పేతురుజ్ జటిజ్ ఆజినాన్.

11 కేహి ఇని పేతురు అంతియొకయు ఇని పట్టుమ్దు వాతివలె, ఎద్దునె నాను వన్నిజ్ జటిజ్ ఆత. ఎందనిజ్ ఇహిజ వాండ్తు కిత్తి వణి తపు.

12 యాకోబు వెట కూడితి మని నెగొండార్ నమ్మితి యూదురుజు అబ్బె వాని ముజాల వాండ్తు యూదురు ఆజ నమ్మితి వరి వెట కూడజి బోజనం కిజి మహాన్. గాని వారు వాతిజ్, పిండ్తు యూదురు ఆజ నమ్మితి వరివెట బోజనం కిండ్ వరి బాణిజ్ దూరం ఆతాన్. వాండ్తు యా లెకెండ్ కిత్తాన్. ఎందనిజ్ ఇహిజ మోసే సీతి రూలుజ్ లోజిదెజ్ వలె ఇజి డట్టం వెహిమ్మహి యూదురి గుంపుదిజ్ తియెల్ ఆతాన్.

13 అంతియొకయుదు మని మహి నమ్మితి యూదురు పేతురు వెట వాండ్తు ఆతి వేసమ్దు కూడితార్. వారు కిత్తిక నుడజి, బర్బుబ మొసెం ఆతండ్రె, వారు కిత్తి లెకెండ్ వాండ్తుబా కిత్తాన్.

14 నిజమాతి సుహార్తవు వెహి వజి వారు నడిగక నుడజితానె, అబ్బె మని నమ్మితి విజెరి ఎద్దు పేతురుజ్ జటిజ్ ఆత. నాను ఈహు వన్నిజ్ వెహ్ట, “ఓ పేతురు, నీను యూద వాండ్తు ఆజిబా, వరి లెకెండ్ బత్తి. యూదురు ఆజవరి లెకెండ్ బత్తిజిని. మరి యూదురు ఆజకార్ యూదురు లెకెండ్ మండ్రెజ్ వలె ఇజి ఎలాగ నీను డటం వెహైజ్ అజ్జెసిని”.

15 నాను మరి వరి విజెరిజ్ వెహిన్. మాటు యూదురు జాతిదు పుట్టికాట్. దేవుణు రూలుజ్ నెన్ఇకాట్ ఆవెట్.

16 గాని దేవుణు మోసెజ్ సీతి రూలుజ్ లోజిజి ఒరెన్ దేవుణు ఎద్దు సీతి నిజాయితి మనికాన్ ఆవెన్. గాని యేసుక్రీస్తు మున్ను నమకం ఇట్టిజనె సీతి నిజాయితి మనికాన్ ఆనాన్ ఇజి నెస్త మనాట్. అందెజి యూదురు ఆజకార్నె ఆవెండ, మాటుబా క్రీస్తు యేసుజ్ నమ్మితాట్. రూలుజ్ లోజిజి దేవుణు ఎద్దు సీతి నిజాయితి మనికాట్ ఆవెండ, క్రీస్తుజ్ నమ్మిజనె దేవుణు ఎద్దు సీతి నిజాయితి మనికాట్ ఆని వందిజి మాటు క్రీస్తు యేసుజ్ నమ్మితాట్. ఎందనిజ్ ఇహిజ, రూలుజ్ లోజిజి ఎయెన్బా దేవుణు ఎద్దు సీతి నిజాయితి మనికాన్ ఆవెన్ ఇ జి మాటు నెనినాట్.

17 క్రీస్తు యేసు వెట కూడితి మని దనితాన్ మాటు దేవుణు ఎద్దు సీతి నిజాయితి మనికాట్ ఆదెజ్ కోరినాట్. గాని మాటు యా లెకెండ్ ఆదెజ్ నూణివలె, యూదురు ఆజవరి లెకెండ్ పాపమ్దు మనాట్. అయావలె క్రీస్తునా మజి తపు కిబిసినికాన్? ఆవెన్.

18 రూలుజ్ లోజిజి ఒరెన్ దేవుణు ఎద్దు సీతి నిజాయితి మనికాన్ ఆవెన్ ఇజి నాను ముజలె తోరిస్త. నాను నెక్కిపోక్తి దన్ని దరోట్ మరి మహ్విజ రూలుజ్ తప్పి వన్ని లెకెండ్ నాను మన్ను ఇజి రుజుప్ కిజన.

19 యూదురి రూలుజ్ లోజిజి మహివలె, అయాకెజ్ కిజి, దేవుణు ఎద్దు సీతి నిజాయితి మనికాన్ ఆదెజ్ అట్వెన్ ఇజి నాను నెస్త. అందెజి దేవుణు వందిజ్ బత్తిదెజ్ యూదురి రూలుజ్ బాణిజ్ డిజె ఆత.

20 నాను క్రీస్తు వెట సిలువాదు కుటిబాణిజ్ డెయె ఆతి లెకెండ్ మన. నాను బత్తి. మహి లెకెండ్ మరి బత్తి. క్రీస్తునె నా మన్నుదు బత్తి. ఎలు నాను ఆవ నా మున్ను అతికారం కిజినాన్. గాని క్రీస్తు నా లోక మంజి నా మున్ను అతికారం కిజినాన్. నాను యా లోకమ్దు బత్తి. దేవుణు మరిసిజ్ నమ్మిజి బత్తి. వాండ్తు నజి ప్రేమిసి నా వందిజ్ వన్ని పాణం సీతాన్.

21 దేవుణులు దయ దర్శనం నాను నెక్కి పొక్వె. యూదురి రూలుజ్ లోజీజు ఒరెన్ నీతి నిజాయితి మనికాన్ ఆనాన్ ఇహిజు క్రీస్తు సాతి సావు అనవనరమ్నె.

3

యూదురి రూలుజ్నా క్రీస్తు మున్సు మని నమకమ్నా నిజమాతిక?

1 గలాతియ ముటాదు మని దేవుణుదిజ్ నమ్మితికిదెరా, ఎందనిజ్ మీరు బుద్ధి సలివరి లెకెండ మనిదెర్? ఎయెర్ మిజీ మొసెం కిత్తార్? యేసు క్రీస్తు మీ వందిజ్ సిలువాదు సాతిదని వందిజ్ నాను మీ కణకెజ్ నిండ్రు తోరిసి వెహ్త మన గదె?

2 “యూదురి రూలుజ్ లోజీజునిజ్ దేవుణు అత్తు మిజీ దోహ్క మనాదా? మాపు మిజీ వెహ్త సువార్త వెంజి నమ్మిత్తిజ్ గదె మిజీ దోహ్క మనాదా?”. యా ఉండ్రె నజతిన్ వెహ్త.

3 మీరు నిసా బుద్ధి సలికిదెరా? మీరు మీ కొత్త బత్తు, మొదోల్సివలె దేవుణు అత్తు నత్తుదాన్ మొదోల్సిదెర్. మరి ఎలు మీ సొంత నత్తుదాన్ మీ బత్తు హూర్తి కిదెజ్ నుడేజునిదెరా?

4 మీరు దేవుణుదిజ్ నమ్మితి వెనుక, నండో ఒరిస్తిదెర్. మీరు ఒరిస్తికెజ్ వణిదిజ్ రెకెజ్ అతెనా? మిజీ జరిగితికెజ్ వణిదిజ్ రెండో ఆఉతె ఇజి నాను ఆన ఆజిన.

5 అందెజి దేవుణు అత్తు మిజీ నండో సీజి గొప్ప నత్తు మని పెరి వణిజ్ మీ నడిమి కిజనిక, మీరు మోసె సీతి రూలుజ్ లోజీజునిజ్నా? ఆవద్. గాని మీరు సువార్త వెంజి నమ్మిజునిజ్నెన్ వాండ్రు మిజీ వన్ని అత్తు సీజీనాన్.

6 అబ్రాహము వందిజ్ దేవుణు మాటుదు రాస్తి మనిక నెస్తు, “వాండ్రు దేవుణుదిజ్ నమ్మిత్తాన్. అందెజి దేవుణు వన్నిజ్ నీతి నిజాయితి మనికాన్ ఇజి ఒప్పుకోటాన్”, ఇజి రాస్త మనాద్.

7 అందెజి దేవుణు మున్సు నమకం ఇట్టికారె, నిజమాతి అబ్రాహము కొడోర్ ఇజి నెస్తు.

8 సీన దిసమ్కాజ్ ముజాలె దేవుణు మాటుదు రాస్తమనాద్, యూదురు ఆకకార్ దేవుణు మున్సు నమకం ఇట్టిజ, వాండ్రు వరిజ్ నీతి నిజాయితి మనికార్ ఇజి డగ్గు కినాన్. వాండ్రు అబ్రాహముజ్, “లోకమ్ది లోకుర్ విజెరెజ్ నీ వెట నాను దీవిస్సు”, ఇజి అయాక జగ్గి ఇ ముజాలె సువార్త వెహ్తాన్.

9 అందెజి దేవుణు మున్సు నమకం ఇట్టి విజెరెజ్ అబ్రాహము వెట కూడుఃప్పి దీవిసిసాన్.

10 దేవుణు మోసెజ్ సీతి రూలుజ్ లోజీజు వన్ని ఎద్రు సీతి నిజాయితి మనికార్ అదెజ్ నుడేజుని విజెరె, దేవుణు సీతి సాయిపు అడిగి మంజినార్. ఎందనిజ్ ఇహిజు, దేవుణు మాటుదు రాస్త మనాద్, “మోసె రాస్తి పున్కమ్కాజ్ మని రూలుజ్ విజి ఎస్తివలెబా కిజి ఎయెన్బా దేవుణు సీతి సాయిపు అడిగి మంజినాన్”,

11 గాని నిజమె, ఒరెన్ విజు రూలుజ్ లోజీతిజ్బా దేవుణు ఎద్రు సీతి నిజాయితి మనికాన్ ఆవెన్. ఎందనిజ్ ఇహిజు, “ఎయెజ్ నీతి నిజాయితి మనికాన్ ఇజి నాను ఇట్టుమనెన్ వాండ్రు నా మున్సు నమ్మకం ఇట్టి వందిజ్ ఎలా కాలం బత్తినాన్”, ఇజి దేవుణు వెహ్తామనాన్ ఇజి దేవుణు మాటుదు మనాద్.

12 గాని దేవుణు సీతి రూలుజ్ లోజి అయాలెకెండ ఆవద్. ఎందనిజ్ ఇహిజు నమ్మకం మండ్రెజ్ వలె ఇజి రూలుజ్ వెహ్త. దేవుణు మాటుదు వెహ్తాక ఇనిక ఇహిజు, ‘రూలుజ్ నడిమిసిని వజు బత్తిదెజ్ కోరిజునికాన్ అయాకెజ్ ఎస్తివలెబ లోజీదెజ్ వలె’,

13 మోసె సీతి విజు రూలుజ్ లోజిజు వరి మున్సు వాజిని నయివుదాన్ క్రీస్తు మజి డిసెప్పిస్తాన్. ఎందనిజ్ ఇహిజు దేవుణు మాటుదు రాస్త మనాద్, “కోహిదు డెల్వె అజి సాని ఎయెన్బా దేవుణు సాయిపు మనికాండ్రె”.

14 క్రీస్తు యా లెకెండ అతండ్రె మజి డిసెప్పిస్తాన్. ఎందనిజ్ ఇహిజు, దేవుణు అబ్రాహముజ్ ఒట్టు కిత్తి దీవెనమ్కుదు యూదురు ఆజి వరిజ్ క్రీస్తు యేసు వెట దోహ్కె. మరి క్రీస్తు మున్సు మజి మని నమ్మకమ్దాన్, దేవుణు సీన ఇజి ఒట్టు కిత్తి వన్ని అత్తు మజి దోహ్కీ వందిజ్ క్రీస్తు యా లెకెండ సాయిపు మొవె అతండ్రె మజి సాయివుదాన్ డిసెప్పిస్తాన్.

15 తంబెరిజాండె, మాటు రోజు బత్తిజుని బత్తుదాన్ ఉండ్రె మాటు లాగ్గి వెహ్త. రిఎర్ ఉండ్రె నజతి వందిజ్ ఉండ్రె ఆజి ఉండ్రె ఒప్పుమానం కిత్తి మహిజు, ఎయెన్బా అయాక తప్పజ్నె, దనివెట ఇనికబా కుడుఃప్పెజ్నె అక్కు సెల్లెద్. అయాలెకెండ, దేవుణు మా వెట కిత్తి యా ఒప్పుమానమ్దా నిల్చి మంజినాద్.

16 దేవుణు అబ్రాహము వెట, మరి వన్ని తెగ్గదు పుట్టి వన్నివెట ఒట్టుజ్ కిత్తాన్. 'తెగ్గదు పుట్టి వరిజ్ ఇహిజ నండో లోకురిజ్', ఇజి దేవుణు మాటదు వెహావెద. గాని 'నీ తెగ్గదు పుట్టి వన్నిజ్' ఇజి వెహిన్నాద. ఇహిజ అయాక ఒరెన్ వనిజ్నె. వాండ్రె క్రీస్తు.

17 నాను వెహిన్ వాజినక ఇనిక ఇహిజ, దేవుణు ముజాలె అబ్రాహము వెట ఒట్టు కితాండ్రె అయాక కిదెజ్ ఇజి తీర్తానం కిత ఇట్టాన్. అందెజె నాల్లి వందెజ్ ముసాయ్ (430) పంటిజ్ వెనుక దేవుణు మోసెజ్ సీతి రూలుజ్ అబ్రాహము వెట కిత్తి ఒపుమానమ్దిజ్ తప్పిసి నన్దివలె కిత్తి తిరుమానమ్దిజ్ సిల్లెండ కిదెజ్ అట్ఉ.

18 దేవుణు సీన ఇజి ఒట్టు కిత్తి అక్కు, మాటు రూలుజి లోజితిజన దోహాక్వాద. ఇహిజి వాండ్రు కిత్తి ఒట్టుదాన్ మజి అయా అక్కు దోహాక్వెద. గాని దేవుణు అబ్రాహముజ్ సీన ఇజి ఒట్టు కిత్తిజ్ వాండ్రు వన్ని దయా దర్మమ్దాన్ సీతాన్.

19 అందెజె మరి ఎందనిజ్ దేవుణు మోసె వెట రూలుజ్ సీతాన్? ఎందనిజ్ ఇహిజ తప్పజ్ ఇని ఇనికెజ్ ఇజి తోర్నెజె రూలుజ్ సీతాన్. యా రూలుజ్ అబ్రాహము తెగ్గదు పుట్టికాన్ వానిదాక లోకురిజ్ నడిపిస్తెజె సీతాన్. ఒట్టుదు ఎయె వందెజ్ వెహ్ మనానో వాండ్రె వీండ్రు. దేవుణు వన్ని దూతెజ్ వెట మోసెజ్ రూలుజ్ సీతాన్. మోసె అయాక లోకురిజ్ సీతాన్. మోసెనె, దేవుణు లోకుర నడిపి ఒపిసిని వన్ని లెకెండ నిహ మనాన్.

20 రెవెర్ నడిపి నిల్లికాండ్రె ఒరెన్ ఒపిన్నికాన్. గాని ఒపిన్నికాన్ సిల్లెండనె దేవుణు అబ్రాహముజ్ ఒట్టు కిత్తాన్. ఎందనిజ్ ఇహిజ ఒరెండ్రె ఒట్టు కిత్తాన్ వాండ్రె దేవుణు.

21 అహిజ, దేవుణు అబ్రాహముజ్ ఒట్టు కిత్తి వెనుక, మోసెజ్ రూలుజ్ సీతివలె వాండ్రు కిత్తి ఒట్టుదిజ్ వెత్తెకమదికెజ్న రూలుజ్? సిల్లె ఆహా ఆవెద. రూలుజ్ లోకురిజ్ ఎల్లకాలం బత్తిదెజ్ బత్తిని బత్తు. సీదెజ్ అట్టు ఇహిజ, యా రూలుజ్ లోజిజి దేవుణు ఎద్దు సీతి నిజాయితి మనికార్ ఆతార్ మరి.

22 గాని దేవుణు మాట వెహిన్నాద, యా లోకమ్దు మని లోకుర్ విజెరె తోహా ఆతి వరిలెకెండ పాపం అడిగి మనార్ ఇజి. అందెజె దేవుణు ఒట్టు కిత్తికెజ్ దోహాక్వెజ్ ఇహిజ యేనుక్రీస్తు మున్ను. నమ్మకం ఇడ్దెజె దోహాక్వె.

23 క్రీస్తు రెవెండ మహి ముజాల, యా నమకం రెవెండ మహాద్. నన్దివలె మోసె సీతి రూలుజ్, ఒరెన్ జమాను కావ్ కిని లెకెండ, యూదురు ఆతి మజి తోహిన్ ఇడెజి కావ్ కిజి మహా. ఇహిజ యా రూలుజ్నెన మా మున్ను. అతికారం కిజి మహా. యాక, లోకుర్ క్రీస్తుజ్ నమ్మిదెజ్ అనాద్ ఇజి దేవుణు తోరిసిని కాలమ్దాన్నె మహాద్.

24 అందెజె క్రీస్తు రెవెండ మహివలె, యా యూదురి రూలుజ్నె, మజి సుడెజి నడిపిసీతె. ఎందనిజ్ ఇహిజ, క్రీస్తు వాతి వెనుక వన్నిజ్ నమ్మిజి దేవుణు ఎద్దు సీతి నిజాయితి అదెజ్ ఇజి వెహ్నాన్.

25 గాని ఏలు క్రీస్తుజ్ నమ్మిదెజ్ అట్టాట్. అందెజె రూలుజ్ మా మున్ను. అతికారం కిదెజ్ అట్ఉ.

దేవుణు కొడోరె

26 క్రీస్తు యేసు మున్ను. నమకం ఇట్టిదెర్. అందెజె మీరు విజెదెరె దేవుణు కొడోరె.

27 మీ లోఇ మని బాప్తీసం లాగె ఆతికార్ విజెరె క్రీస్తు వెట కూడితి మనిదెర్. అందెజె క్రీస్తు గుణమ్క మిజిబా మంజెనె.

28 అందెజె యూదురు ఇజినో, యూదురు ఆఇకార్ ఇజినో, వెట్టివణి కినికార్ ఇజినో, కిఇకార్ ఇజినో, మొకకొడో ఇజినో, అయ్లొకొడో ఇజినో అవెద్ ముకెలం మీరు విజెదెరె ఉండ్రె లోకుర్. ఎందనిజ్ ఇహిజ, మీరు క్రీస్తు యేసు వెట కూడితి మనిదెర్.

29 మీరు క్రీస్తు వెట కూడితి మనికెదెరె ఇహిజ, అబ్రాహము తెగ్గదు పుట్టికెదెరె. ఎందనిజ్ ఇహిజ క్రీస్తు అబ్రాహము తెగ్గదు పుట్టికాన్. మీరు దేవుణు అబ్రాహము వెట ఒట్టు కిత్తి దన్నిజ్ అక్కు. మనికెదెరె.

4

1 నాను వెహిన్నానిక ఇనిక ఇహిజ, ఒరెన్ వన్ని ఆన్దిదెజ్ అక్కు. మనికాన్ వన్ని కొడోరె. గాని అయా కొడో ఇజ్జికాన్ మనివలె, వాండ్రు ఒరెన్ వెట్టివణి కినివన్ని లెకెండ ఇనిదని మున్ను. బా అతికారం సిల్లెండ మనాన్. అయా కొడో అహిన్ ఆన్దిదెజ్ అక్కు. మనికాన్ ఆతిజ్బా ఇనిదని మున్ను. అతికారం సిల్లెండ మనాన్.

2 వన్నీ అప్పొని ఎత్తుకిత్తి వయసు వానిదాక, వాండ్లు వన్నీజ్ కోప కినివరి అడిగి, వన్నీ అస్తి నూణి పణి మణిసిర్ అడిగి మంజినాన్.

3 అయాలెకెండె మాటుబా క్రీస్తు యా లోకమ్దు వాని ముజాల, మాటుబా యా లోకమ్ది అలవాటుజ అడిగి మహాబ్.

4 గాని దేవుణు ఎత్తుకిత్తి తగతి సమయం వాతివలె వాండ్లు వన్నీ మరిసిజ్ పోక్తాన్. వాండ్లు ఉండ్రీ బోదెలి పొటా లోజహాన్ పుట్టాన్. వాండ్లు యూదురి రూలుజ్ విజు లోజిజి బత్తితాన్.

5 యూదురి రూలుజ్ లోజిజి దని అడిగి మహి మజి, దని బాణిజ్ డి: డి:పిన్ని వందిజ్, దేవుణు వన్నీ మరిసిజ్ పోక్తాన్. ఎందనిజ్ ఇహిజ మాటు పూర్తి అక్కు మని దేవుణు కొడోర్ అదిజ్ ఇజి,

6 మీరుని మాపు వన్నీ కొడోర్. అందెజె దేవుణు వన్నీ మరిసి అత్తదిజ్ మా మన్నుదు మండ్రెజ్ ఇజి పోక్తాన్. యా అత్తనె మా లోజహాన్ 'ఓబా', ఇజి కూక్కి మజి పార్దనం కిబిసినాన్.

7 అందెజె ఏలుదాన్ మీరు ఒరెన్ ఒరెన్ వెటి పణికిని వన్నీలెకెండె ఆఇదెర్. గాని మీరు ఒరెన్ ఒరెన్ దేవుణు కొడో: ఆతి మనిదెర్. అందెజె మీరు వన్నీ మరిసిరిర్ సీన ఇజి వాండ్లు ఒట్టు కిత్తి దన్నీజ్ విజు అక్కు మనికిదెర్.

8 ఉండ్రీ కాలమ్దు దేవుణుదిజ్ నెన్ ఇ ముజాల నిజం ఆఇ దేవుణుక అడిగి మహిదెర్.

9 గాని ఏలు మీరు దేవుణుదిజ్ నెస్తి మనిదెర్. మరి ఒది వాండ్లు మిజి నెస్తి మనాన్. మరి ఎందనిజ్ మీరు సత్తు సిలి పణిదిజ్ రెజ దెయమ్క దరోట్ మర్జనిదెర్. మరిబ దన్నీ అడిగి మండ్రెజ్ కోరిజనిదెరా?

10 మీరు నెగ్గి దినమ్కు ఇజి నెగ్గి నెలెజ్ ఇజి సర్ద ఆని కాలమ్కు ఇజి నెగ్గి ఏంటుజ్ ఇజి నూణిదెర్.

11 మీరు కిజిని వన్కాజ్ నాను నెని, మీ వందిజ్ బాద ఆజిన. నాను మీ నడిమి కన్బడిజి కిత్తి సేవ పణి, పణిదిజ్ రెఎండ ఆనాద్ ఇజి బాద ఆజిన.

12 అందెజె తంబెరిజాండె, నాను మిజి బత్తిమాల్లిస. మీరు నజి పోలిజ మండ్రు. ఎందనిజ్ ఇహిజ మోసె సితి రూలుజ బాణిజ్ డి:బె ఆతి యూదురు ఆఇ మీలెకెండె ఆతమన నాను. మీరు ఎస్తివలెబా నజి నెగ్గెండ సుడె:తి మనిదెర్.

13 నాను మిజి సువార్త తొలిత వెప్తివలె నాను ఎలాగ మాహ ఇజి మీరు నెస్తిదెర్. నాను నెగెండె సిల్లెండ కన్బం ఆర్తమహ.

14 నాను కన్బం ఆర్తివలె మీరు నండొ బాద ఆతిదెర్. గాని మీరు నజి ఇజి కణకదాన్ తొఇదెర్. నజి నెక్కి పోక్ఇతిదెర్. అహిజ దేవుణు పోక్తి ఒరెన్ దూత లెకెండె మీరు నజి డగ్రు కిత్తిదెర్. క్రీస్తుయేసుజ్ డగ్రు కిని లెకెండె నజి డగ్రు కిత్తిదెర్.

15 అయాలె మీరు గొప్ప సర్దదాన్ మహిదెర్. ఏలు మీ సర్ద విజు ఇనిక ఆతాద్? మీరు నా వందిజ్ ఇనికబా కిదెజ్ తయార్దాన్ మహిదెర్. మీ సొంత కణుకుబా లాగ్గి సీదెజ్ ఇజి నాను లోస్సిక ఇహిజ, అయకబా కిదెజ్ మీరు తయార్దాన్ మహిదెర్ ఇజి నాను మీ వందిజ్ నిజం వెహ్సిన.

16 ఏలు నాను మిజి నిజం వెహ్సనిజ్ మిజి వడె:ఇకాన్ అతానా?

17 యూదురి రూలుజ్ లోజిజెజ్ వలె ఇజి వెహ్సని వరి వెట మీరు కూడెదెజ్ ఇజి పటుదలదాన్ నండొ ఆస ఆజినార్. గాని వరి ఉదేసమ్కు నెగ్గెకెజ్ ఆఉ. మిజి మా బాణిజ్ దూరం కిబెస్సెజె వారు సుడె:జినార్. ఎందనిజ్ ఇహిజ మీరు వరివెట కూడె:జి, వారు మీ వందిజ్ పటుదలదాన్ ఆస ఆజిని లెకెండె, మీరు వరి వందిజ్ ఆస ఆజి మండ్రెజ్.

18 ఉదెసం నెగ్గెకె ఇహిజ పటుదలదాన్ మంజినిక నెగెది. ఎస్తివలెబా పటుదలదాన్ ఆహె మండ్రెజ్. నాను మీ వెట మని వలెనె ఆవండ, సిలివలెబా పటుదలదాన్ మండ్రెజ్.

19 నాను ప్రేమిస్సి లోకరండె, నాను మీ వందిజ్ మరిబా బాద ఆజిన. ఏరు ఈబదెజ్ నొప్పిదాన్ బాద ఆని ఉండ్రీ బోదెల్లెకెండె నాను మరిబా మీ వందిజ్ బాద ఆజిన. క్రీస్తు నని గుణమ్కు మిజి వానిదాక నాను బాద ఆజినె మంజిన.

20 ఏలు మీ నడిమి మంజె, మిజి సిపాతి వెహ్సెజ్ ఇజి నాను నండొ ఆస ఆజిన. ఎందనిజ్ ఇహిజ మీరు ఎందనిజ్ యా లెకెండె కిత్తిదెర్ ఇజి నాను గాబ్రు ఆజిన.

21 మోసా రాస్తి రూలుజ్ లోజెదెజ్ వలె ఇజ వెహ్నిని వరిజ్ నాను వెనబాజిన. మోసా రాస్తి పుస్తకమ్కాజ్ ఇనిక రాస్త మనాద్ ఇజ మీరు నెస్సిదెరా?

22 ఇనిక రాస్త మనాద్ ఇహిజ, అబ్రాహముజ్ రిఎర్ మరిసిర్ మహార్. ఒరెన్ వన్నిజ్ వెటి పణిమణిసి కాస్తాద్. మరి ఒరెన్ వన్నిజ్ వెట్టిపణి మణిసి ఆఇకాద్ కాస్తాద్.

23 వెట్టిపణి మణిసి వెట పుట్టికాన్ ఒడోల్ ఆనదాన్ పుట్టాన్. గాని వెట్టిపణి మణిసి ఆఇ దని వెట పుట్టికాన్, దేవుణు ఎత్తు కిజి అబ్రాహము వెట కిత్తి ఒట్టు వజ పుట్టాన్.

24 యా రుండి బోదెకాజ్ రుండి నజతిజ వెట పోలిసి వెహ్లాజ్ ఆనాద్. యా రుండి బోదెకు దేవుణు లోకుర్ వెట కిత్తి రుండి ఒపుమానమ్కు లెకెండ్ మన్నె. సీనాయి గోరోతు దేవుణు ఇస్రాయేలు లోకురిజ్ రూలుజ్ సితివలె, వరి వెట కిత్తి ఒపుమానం ఆగారుజ్ పోలిత మనాద్. ఆగారు వెట్టిపణి కొడోరిజ్ ఇట్టి లెకెండ్, యా ఒపుమానం లోకురిజ్ వెట్టిపణి మణిసిర్ లెకెండ్ కినాద్.

25 ఏలు అరెబియాదు మని సీనాయి గోరోతు సితి ఒపుమానం ఆగారుజ్ పోలిత మనాద్. వెట్టిపణి మణిసి ఆతి ఆగారు ని దని కొడోర్ లెకెండ్ మనార్. ఏలు యెరూసలెమ్ని బాన్ మని లోకుర్ ఎందనిజ్ ఇహిజ వారు అయా ఒపుమానమ్దు వెహ్నిని రూలుజు అడిగి మనార్.

26 గాని మున్ను మని యెరూసలెం వెట్టిపణి మణిసి ఆఇకాద్ ఆతి సారెజ్ పోలిత మనాద్. నమ్మితి మజి విజెరిజ్ అయేసిని సారె.

27 ఎందనిజ్ ఇహిజ దేవుణు మాటుదు వెహ్నినాద్, “కొడోర్ కాన్ఇ గొడ్డు బోదెలి నరద ఆల. ఏరు ఈబని వలె మని నొప్పి నెన్ఇకి, నీను గొప్ప నరద ఆజి డటం డెడిసింల. ఎందనిజ్ ఇహిజ, మాసి మని బోదెల్దిజ్ ఇంక మాసి డిస్సి బోదెల్దిజ్ నండ్ండార్ కొడోర్ మనార్”.

28 ఏలు తంబెరిజాండె, మీరు ఇన్నాకు లెకెండ్ మనిదెర్. ఎందనిజ్ ఇహిజ, దేవుణు అబ్రాహముజ్ సీన ఇజి కిత్తి ఒట్టు వజ మీరు పుట్టిదెర్.

29 నస్తివలె ఒడోల్ ఆనదాన్ పుట్టికాన్ దేవుణు ఆత్మదాన్ పుట్టి వన్నిజ్ మాలెజ్ కిత్తాన్. అయాలెకెండె ఏలుబా జర్గెజనాద్.

30 గాని దేవుణు మాటు ఇనిక దిన్ని వందిజ్ వెహ్నినాద్, ‘వెట్టిపణి బోదెల్దిజ్ దని కొడో వెట నెక్కి పొక్తు. ఎందనిజ్ ఇహిజ, వెట్టిపణి మణిసి పొటది కొడోదిజ్, వెట్టిపణి మణిసి ఆఇ దని పొటది కొడో వెట అప్పొని ఆస్తిదిజ్ అక్కు మండ్రెజ్ వీలు సిల్లెద్”,

31 అందెజి తంబెరిజాండె, మాటు వెట్టిపణి బోదెలి కొడోర్ ఆవెట్. గాని మాటు వెట్టిపణి మణిసి ఆఇ దని కొడోర్ నె.

5

1 క్రీస్తు మోసా సితి రూలుజు అడిగిదాన్ డిబిన్సివలె, దని అడిగి మన్ఎండ మంజిని వందిజె డిబిన్సాన్. అందెజి డిబె ఆతి వరిలెకెండ్ నెగ్రెండ నిల్లి మండ్రు. మీరు వెట్టిపణి మణిసి లెకెండ్ రూలుజు అడిగి మన్మాట్.

2 నావణిజ్ జాగర్ల విండ్రు. వపులు ఇని నాను మిజి వెహ్నిన. దేవుణు ఎద్రు సితి నిజాయితి మనికిదెర్ ఆదెజ్ మీరు సునతి కిబె ఆదెజ్ సుడోతిజ, క్రీస్తు మీ వందిజ్ ఆతిదని వందిజ్ ఇని విలువ సిల్లెద్.

3 సునతి కిబె ఆని విజెరిజ్ నాను మరిబా వెహ్నిన. మోసా సితి రూలుజ్ విజు మీరు పూర్తి లోజెదెజ్ వలె.

4 మోసా సితి రూలుజ్ లోజెజ, దేవుణు ఎద్రు సితి నిజాయితి మనికాన్ ఆదెజ్ నూణికాన్, క్రీస్తు బాణిజ్ పూర్తి దూరం ఆతాన్. దేవుణు దయా దర్మమదిజ్ నెక్కి పొక్తిదెర్.

5 గాని దేవుణు మజి సితి నిజాయితి మనికార్ ఇజి వన్ని ఎద్రు ఇడ్నాన్ ఇజి మాటు ఆస ఆజినాట్. మాటు ఎందనిజ్ యా లెకెండ్ ఆనదాన్ ఎద్రు సుడోజినాట్ ఇహిజ, దేవుణు మజి సితి నిజాయితి మనికార్ ఇజి ఇడ్నాన్ దేవుణు ఆత్మను మజి దయేరం సీజినాన్. ఎందనిజ్ ఇహిజ మాటు క్రీస్తు యేసు మున్ను నమకం ఇడోజినాట్.

6 ఎందనిజ్ ఇహిజ, క్రీస్తు యేసు వెట కూడితి మనాట్ ఇజి మాటు నెసాట్. ఒరెన్ సునతి కిబె ఆత మనాండ్రొ, సెలెనొ ఇజి దేవుణు తోవెన్. గాని దేవుణు సూణిక, ఒరెన్ క్రీస్తు మున్ను నమకం ఇట్టా మనాండ్రొ ఇజిని. మహి వరిజ్ ప్రేమిసిని క్రీస్తు మున్ను నమకం ఇట్టా మనాన్ ఇజి తోరిన్జెజ్.

7 మీరు నెగ్రెండని నమ్మిజ మహిదార్. మరి, ఎయెన్ మిజి మొసెం కిజి, నిజమాతి నువార్త లోజిఎండ అడు కిత్తాన్?

8 వన్నీ లోకుర్ అదెజ్ మిజి కూక్కి దేవుణు యా లెకెండ మిజి వెహాఎన్.

9 పులాని దూరు కండెక్ అతిజబా, కుండాద్ మని దూరు విజు పులాజ్ కినాద్. అయాలెకెండ ఉండ్రీ తవు బొదబ కినాద్.

10 మాటు ప్రబు వెట కూడిత మనాట్. అందెజి మహి బొదెజ మిరు లోజిఇదెర్ ఇజి నాను అనుమానం సిల్లెండ నమ్మిజన. మిజి పంబ్ర కిబిన్సికాన్, వాండ్రు ఎయెన్ అతిజబా దేవుణు వన్నీజ్ తగితి సిక్కు నీనాన్.

11 తంబెరిజాండె, సెగెండార్ వెహ్సినార్ దేవుణు కొడోఱస అదెజ్ ఇహిజ సునతి కిబె అదెజ్వలె ఇజి. నాను అయాలెకెండ వెహ్సె మంజనిక ఇహిజ, యూదురు నజి మాలెజ్ కిఎత్తార్మరి. సునతి కిబె అదెజ్వలె ఇజి నాను వెహ్సె మంజనిక ఇహిజ, సిలువారు క్రీస్తు సాతిసాపు వందిజ్ నాను వెహ్సె వలె వారు నా మున్నుకోపం అఎత్తార్మరి.

12 సునతి కిబె అదెజ్వలె ఇజి వెహ్సె మజి పంబ్ర కిబిన్సి యా లోకుర్, కొడోఱ ఇడెడెజ్ అట్ఱెవరి లెకెండ అపిర్ ఇజి నాను ఆన అజిన.

13 తంబెరిజాండె, డిజె అతి వరి లెకెండ దేవుణు మిజి కూక్కు మనాన్. మీరు ఇష్టం అతి సెఇకెజ్ కిదెజ్ అనాద్ ఇజి ఒడెబిమాట్. గాని మరి ఒరెన్ వన్నీజ్ ప్రేమిని సేవ కిదెజ్ మిజి అక్కు మనాద్.

14 మోసె సీతి రూలుజ్ విజు ఉండ్రె మాటాద్ కూడితె మన్నె. అయాక ఇనిక ఇహిజ, “నీను నిజి ప్రేమిన్సి లెకెండ, మహి వరిజ్ ప్రేమిన్ అ”, ఇజి.

15 గాని మీరు జంతుజు లెకెండ కటి అజి, ముకెజ్ లాగ్గి మహిజ, మీరు ఒరెన్ మరి ఒరెన్ వన్నీ బాణిజ్ పూర్తి నానం అనిదెర్ ఇజి జాగర్త సుడెఆదు.

దేవుణు అత్తు నడిపిసిని బత్తు.

16 అందెజి నాను మిజి వెహ్సెన, దేవుణు అత్తు మీ మున్నుదిజ్ వెహ్సె నడిపిసిని వజు నడిఱెదు. అయావలె మీ ఒడెలోది సెఇ అనెజ్ కిబిన్సి సెఇ వణిజ్ మీరు కిఎండ మంజనిదెర్.

17 మా ఒడెలోది సెఇ అనెజు పడిఎద్ దేవుణు అత్తు. దేవుణు అత్తుదిజ్ పడిఎద్ సెఇ అనెజ్. యా రుండి సెఇ అనెజ్ని దేవుణు అత్తు కూడెజి మన్ఱ. అందెజి మీరు ఎన్సివలెబా కిదెజ్ కోరిజినిక కిఎండ మండ్రెజ్ అట్టిదెర్.

18 గాని దేవుణు అత్తునె మిజి నడిపిసి మహిజ, మీరు మోసె సీతి రూలుజ్ లోజిజి దని అడిఱెగి మన్ఱదెర్.

19-21 ఒడెలోది సెఇ అనెజ్ కిబిన్సి వణిజ్ విజెరె నెన్సికెజె. అయాకెజ్ ఇని ఇనికెజ్ ఇహిజ, రంకు బూలానిక, కెలార్బూలానిక, సాని బూలానిక, బొమెజు మాడిసీక్కు, సెట్నిక, వగ అనిక, గొడబ అనిక, అఇవరి వన్నె వందిజ్ నండో ఆన అనిక, సాంత ఇష్టమ్కునె నూణిక, కేటిజ్ అనిక, మిజి పడెఱె వరి బాణిజ్ దూరం అనిక, మిజి కూడ్పి వరివెట కూడ్పి, గోస అనిక, సోస్సిక, ఉణిజి తింజి సోసి కర్ఱెజి సెఇ వణిజ్ కిజినిక. నాను ముజాలె మిజి డటం వెహ్సె లెకెండ మరి వెహ్సెన. నిని పణిజ్ కిజి బత్తినికార్ దేవుణు ఏలుబడి కిని లోకుర్ లోఱె మండ్రెజ్ అట్ఱెవర్.

22-23 గాని దేవుణు అత్తు వెహ్సె నడిపిసిని వన్నీజ్ నిని గుణమ్కు మంజని. అయాకెజ్ ఇని ఇనికెజ్ ఇహిజ, మహి వరిజ్ ప్రేమిన్సికాన్, సర్లదాన్ మంజినాన్, సాంతి సమాదనమ్దాన్ మంజినాన్, కీడు కిత్తిజబా అయాకెజ్ ఒరిసి మంజినాన్, కనికారం తోరిన్సికాన్, నెగ్గెకెజి కినాన్, నమ్మిదెజ్ తగ్గినాన్, సార్లదాన్ మంజినాన్, సోసెండ మంజినాన్. యా లెకెండ కిజి మంజనికార్, ఇని రూలుజబా తవ్ఱెవర్.

24 క్రీస్తుయెసు వెట కూడితి మనికార్, వరి పడెఱె బత్తు, వరి సెఇ అనెజ్ విజు, సిలువారు కుంటిజాణిజ్ డెయె అతి లెకెండ మనాద్. ఇహిజ వారు అయాకెజ్ పూర్తి డిస్సెన్సెత్తార్.

25 దేవుణు అత్తు మజి కొత్త బత్తు సీత మనాన్. అందెజి దేవుణు అత్తు వెహ్సె నడిపిసిని వజు మాటు బత్తిదెజ్.

26 మాటు గొప్ప పెరికాట్ ఇజి గర్త అఎండ మహి వరిజ్ కోపం రేపిన్ఎండ, గోస అజి సెఇకెజ్ కిఎండ ఒరెన్ మరి ఒరెన్ వన్నీ వెట మండ్రెజ్.

6

1 తంబెరిజాండె, మీ లోజు ఒరెన్ తప్ప కిత్తిజు, దేవుణు ఆత్మ నడిపిసిని వజ నడిజిని మీరు సార్లిదాన్ వన్ని తప్ప దిదిజి, నెగ్గి సరిదు తతెజ్. మరి అయాలెకెండ, మీరుబా పావముదు అరెండ జాగర్ల నుడెదెజ్.

2 మహి వరి బాదెజ్, కష్టముకు నెసి వరిజ్ సాయం కిదెజ్. యా లెకెండ కిజి క్రీస్తు వెహ్తా రూలుజ్ మీరు పూర్తి కిజినిదెర.

3 ఎయెన్బా వాండ్రు పెరికాన్ ఆఇతిజ్బా, గొప్ప పెరికాన్ ఇజి ఒడెబితిజు వన్నిజ్ వాండ్రె మొసెం కిబె ఆజినాన్.

4 విజెరె ఎయెన్ కిజినికెజ్ నెగ్గికెజ్నా నెఇకెజ్నా ఇజి వాండ్రె నుడె ఆదెజ్. అయావలె వాండ్రు కిజిని దనితాన్ వాండ్రు పొగడె ఆదెజ్ అట్నాన్. మహికార్ కిజిని దనిజ్ ఆవిండ, వాండ్రు కిజినిదాన్ నుడెజి పొగడె ఆదెజ్.

5 ఎందనిజ్ ఇహిజు, ఒరెన్ ఒరెన్ వన్నిజ్, వాండ్రు కిదెజ్ మని బాజిత మనాద్.

6 దేవుణు మాటు వెంజి నెసినికాన్ ఎయెన్బా వెహ్సి నెస్సిన్సి వన్నిజ్, వన్నిజ్ కల్గితి మని విజు నెగ్గి వన్యాజ్ లోజు వంతు సీదెజ్.

7 మిజి మీరె మొసెం ఆమాట్. దేవుణుదిజ్ సుత్రిసి అరెప్పెజ్ ఆనాద్ ఇజి ఒడెబిమాట్. నాను ఎందనిజ్ యాక వెహ్సిన్ ఇహిజు, విత్తికాన్ ఇనిక విత్తాండ్రె, అయా పంటున కొయినాన్.

8 ఒడెబిల్ది సెఇ ఆసెజు వజి కిజి బత్తిజునికాన్ నాసనం ఆనాన్. ఎందనిజ్ ఇహిజు వాండ్రు సెఇ ఆస వజి బత్తితాన్. గాని దేవుణు ఆత్మ వెహ్సి నడిపిసిని వజి నడిసికాన్ ఎలాకాలం దేవుణు వెట బత్తినాన్. ఎందనిజ్ ఇహిజు, వాండ్రు దేవుణు ఆత్మ వెహ్సి నడిపిసిని వజి బత్తితాన్.

9 నెగ్గి వణిజ్ కిదెజ్ విస్సిమాట్. ఎందనిజ్ ఇహిజు, మాటు విస్సిఎండ మహిజు, దేవుణు ఎత్తు కిత్తి సమయముదు మాటు కిత్తి దనిజ్ వాండ్రు వలితం సీనాన్.

10 అందెజు మహి వరివందిజ్ సాయం కిదెజ్ సమయం దొప్పివలె, మాటు విజెరిజ్ నెగ్గికెజ్ కిదెజ్. ముకెలం దేవుణుదిజ్, నమ్మితి వరివందిజ్ కిదెజ్.

సునతి ఆవిద్ కొత్త బత్తునె ముకెలం.

11 నాను యా మాట్జ్ నా సొంత కిదాన్ నె రాసిన్. ఎసొ పెరి అసరమ్కాణిజ్ రాసిన్ ఇజి నుడెదు.

12 మహి యూదురిజ్ నరెద కిబిస్తెజ్ సూణికారె, మీరు తవ్వెండ సునతి కిబె ఆదెజ్ వలె ఇజి మిజి డటుం వెహ్సిన్. వారు ఎందనిజ్ యా లెకెండ వెహ్సిన్ ఇహిజు, క్రీస్తు సిలువాదు సాతాన్ ఇజి నమ్మితిజునె దేవుణు రక్సిస్సాన్ ఇజి వెహ్సిని వలె లోకుర వరిజ్ మాలెజ్ కినార్. ఆహె వరి మున్సు మాలెజ్ రెండె మండ్రెజ్ నె సునతి కిబె ఆదెజ్ వలె ఇజి డటుం వెహ్సిన్.

13 సునతి కిబె ఆతికారెబా, మోసె సతి రూలుజ్ విజు లోజెఎర. గాని మిజి సునతి కిబిస్తెజ్ కోరిజినార్. ఎందనిజ్ ఇహిజు, వారు వెహ్సినిజ్ మీరు సునతి కిబె ఆతిదెర ఇజి మహి యూదురిజ్ వెహ్సి వరి నడిసిమి పొగడె ఆదెజ్ నుడెజినార్.

14 గాని నాను, మా ప్రబు ఆతి యేసు క్రీస్తు సిలువాదు మా వందిజ్ సాతాన్ ఇజి ఆవిండ మరి ఇనిదని వందిజ్బా పొగడె. వాండ్రు అయాలెకెండ సాతిజ్, నాను గొప్ప విలువ మనిక ఇజి ఒడెబిని దనిజ్ యా లోకముదికార్ విలువ సెివ. వారు విలువ మనిక ఇజి ఒడెబిని దనిజ్ నాను విలువ సెివ.

15 ఒరెన్ సునతి కిబె ఆతాండ్రా, సిల్లెనా ఇజి ఆవిద్ ముకెలం. ముకెలముతిక ఇనిక ఇహిజు, ఒరెన్ పడాఱు బత్తు డెసి కొత్తాజ్ ఆతాన్ ఇజినె.

16 యా మాటు వెంజి అయా వజి కిని విజెరిజ్ దేవుణు వన్ని సమాదనం సీజి, వన్ని మున్సు కనికారం తోరిస్సాన్. మీరు ఎయెరె ఇహిజు, దేవుణు వన్ని వందిజ్ ఎర్లిస్తికారె.

17 ఆకారెదు, ఎయెన్బా నజి మరి బాదెజ్ కిమాట్. ఎందనిజ్ ఇహిజు యేసుజ్ సేవ కిత్తి వందిజ్ నజి కిత్తి బాదెజు మనెజ్ నా ఒడెబిల్దు మన్సె. యాకెజ్ నాను వన్ని వెట్టిపణి మణిసి ఇజి తోరిస్సె.

18 తంబెరిజాండె, మా ప్రబు ఆతి యేసుక్రీస్తు దయ దర్మం మీ మున్సు మనీద్. ఆమెన్.

అపొస్తుడు ఆతి పవులు ఎపెసుదు మని దేవుణుదిజ్ నమ్మితి వరిజ్ రాస్తి ఉత్తం

నెల్వు కిదిస్సిక

అపొస్తుడు ఆతి పవులు ఎపెసు ఇని పట్టమదు మని దేవుణు సజమ్దిజ్ రాసిని ఉత్తమ్నె యాక. యా ఉత్తం రాస్తి మహివలె, వాండ్రు రోమ ఇలిదు తోహా ఆత మహాన్. నస్తివలె ఆసియ ఇని రోమ ప్రాంతమదు మని ఉండ్రీ ముకెలమాతి పట్టమనె ఎపెసు.

పవులు యా ఉత్తం రాస్తాండ్రె, తుకికు వెట పొక్కినాన్. దేవుణుదిజ్ నమ్మిత్తికార్, వన్ని దయ దర్మం ఎసా గొప్ప వెరిక ఇజి వారు అర్ధం కిజి నెన్జిజ్ రాస్తికాదె. మరి దేవుణు ఎత్తు కిత్తి సజితిజ్ క్రీస్తు వెటనె పూర్తి ఆతె. వాండ్రె విజు వన్యా మున్సు మనికాన్. క్రీస్తు వెటనె దేవుణు యూదురిజ్, యూదురు ఆజి వరిజ్ రక్కిసి వరిజ్ ఉండ్రె ఒడోలె కిజినాన్. ఇబ్బి ఒడోలె ఇజి వెస్సానిక, యా లోకమదు మని దేవుణుదిజ్ నమ్మిత్తికార్ విజెరి కూడితి మని సజమనె. మరి దేవుణు సజం ఎలాగ ఉండ్రె ఆజి మండ్రెజ్ నమ్మిత్తికార్ ఒరెన్ ఒరెన్ ఎలాగ మండ్రెజ్ ఇజి వెస్సానాన్. నమ్మిత్తికార్ ఎద్రిసినిక యా లోకమది లోకుర వెటనె ఆవెద్. గాని సయతాను వెటనె ఎద్రిసినార్ ఇజి ఎత్తు కిదిసి, ఎలాగ సయతానుజ్ ఎద్రిస్తిజ్ ఇజి వెస్సానాన్.

1 క్రీస్తు యేసు వందిజ్ అపొస్తుడు ఆతి పవులు ఇని నాను ఎపెసు పట్టమదు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కిత్తి పజనె నాను క్రీస్తు యేసు వందిజ్ అపొస్తుడు ఆత. మీరు క్రీస్తు యేసుజ్ నమ్మిజినె మనికిదెర్.

2 మా బుబ్బి ఆతి దేవుణుని ప్రబు ఆతి యేసు క్రీస్తు దయ దర్మమదాన్ మీరు నిపాతిదాన్ మండ్రెజ్ సాయం కిపిర్.

3 దేవుణుదిజ్ పొగిడిజినాట్. వాండ్రె మా ప్రబు ఆతి యేసు క్రీస్తు దేవుణు. మరి వాండ్రె వన్ని బుబ్బిబా. ఎందనిజ్ ఇహిజ, దేవుణు ఆత్మ మా మన్సుదిజ్ వెస్సా, వన్ని నరిదు నడిప్పిందనితాన్ మజి వాజిని విజు నెగ్గెజ్ సీజి వాండ్రె మజి దీవిస్తాన్. పరలోకమదాన్ వాజినికెజె అయా నెగ్గెజ్. క్రీస్తు వెట మజి కుడుప్తాండ్రె, యా నెగ్గెజ్ మజి సితాన్.

4 ఎందనిజ్ ఇహిజ దేవుణు లోకం పుటిన్ఎండ ముజాలె మజి వన్ని లోకుర ఇజి ఎద్రిస్తాన్. క్రీస్తు వెట మజి మని సమమదమదాన్ యా లెకెండ్ మజి ఎద్రిస్తాన్. మాటు వన్ని వందిజ్ కేట ఆతి లోకుర లెకెండ్, ఇని నిందెజ్ సిల్లెండ వన్ని ఎద్రు మండ్రెజ్నె వాండ్రు యా లెకెండ్ ఎద్రిస్తాన్.

5 వాండ్రు మజి ప్రేమిసినాన్. అందెజె యేసు ప్రబు మా వందిజ్ ఆతి దనితాన్ మాటు వన్ని కొడోర్ ఆదెజ్ ఇజి నండో ముజాలె వాండ్రు తిరుమానం కిత్తాన్. వాండ్రు యా లెకెండ్ తిరుమానం కిత్తాన్. ఎందనిజ్ ఇహిజ, అయాకదె వాండ్రు ఎత్తు కిత్తిక. వన్నిజ్ ఇస్టం ఆతిక.

6 అందెజె గొప్ప బమ్మ కిని వన్ని దయ దర్మం వందిజ్ దేవుణుదిజ్ పొగిడిజినాట్. వాండ్రు ప్రేమిసిని వన్ని మరిని ఆతి దని దనటానె యా గొప్ప దయ దర్మం మా మున్సు వాతాద్. మజి నెడ్డినె దొవ్కాద్.

7-8 క్రీస్తు మా వందిజ్ నల వాక్కి సాతి సాపదాన్ దేవుణు మా పాపమ్కాణిజ్ మజి డిన్పిస్తాన్. ఇహిజ మా పాపమ్కు సెమిస్తాన్. అయా లెకెండ్ వన్ని దయ దర్మం గొప్ప వెరిక ఇజి తోరిస్తాన్. మా మున్సు నండో దయ దర్మం నెడ్డినె తోరిస్తాన్. వన్ని బుద్ది గెణమదానె వాండ్రు వన్ని దయ దర్మం మా మున్సు తోరిస్తాన్.

9 దేవుణు ఎత్తు కిత్తిక వాండ్రు కిత్తాన్. క్రీస్తు వెట పూర్తి కిదెజ్ ఇజి వాండ్రు వన్ని గర్భమదు ఎత్తు కిజి డాప్పి ఇట్టి వణి మజి తోరిస్తాన్. అయాక ముజాలె ఎయెర్బా నెన్ఎతార్.

10 వాండ్రు గర్భమదు ఎత్తు కిజి డాప్పి ఇట్టిక ఇనిక ఇహిజ, పరలోకమదు మని విజు వన్యాజ్, బూమి మున్సు మని విజు వన్యాజ్, కూడుప్పి ఒరెన్ వన్ని అడిగి ఇటతాన్. వాండ్రె క్రీస్తు. యాక కిదెజ్ తగితి సమయం వానివలె వాండ్రు పూర్తి కిసాన్.

11 విజు సజతిజ్ దేవుణు ఎత్తు కిత్తి వజు వాండ్రు కిజినాన్. క్రీస్తు వెట మజి కుడుస్తాండ్రె, వన్ని సొంత లోకుర్ ఇజ మజి ఎర్తిస్తాన్. ఎందనిజ్ ఇహిజ అయా లెకెండ్రె ఎర్లిస్తెజ్ ఇజ వాండ్రు పూరబమదునె తిరుమానం కిత మహాన్. అయాకదె వాండ్రు ఎత్తు కిత్తిక.

12 క్రీస్తు రక్తిస్తెజ్ వానాన్లె ఇజ విజెరె ఇంక ముజాలె నమకం ఇట్టికాపె యూదురు ఆతి మాపు. అందెజె దేవుణు గొప్పు పెరికాన్ ఇజ పొగిడిజనాన్. అయాకదె వన్ని ఉదెనం.

13 అయాలెకెండ్రె యూదురు ఆజ మీరుబ నిజమాతి బోద వెహిదెర్ ఇహిజ, దేవుణు మిజి రక్తిస్తాన్లె ఇజ వెహిని సువార్త వెహిదెర్. మీరు క్రీస్తు ముస్సు, నమకం ఇట్టిదెర్ వన్ని వెట కూడితి మనిదెర్. అందెజె దేవుణు సీన ఇజ ఒట్టు కిత్తి దేవుణు ఆత్మజ్ మిజి సితాన్. సితండ్రె దేవుణు మిజి లోకుర్ ఇజ కూక్రాన్. యా దేవుణు ఆత్మనె, మీరు దేవుణు లోకుర్ ఇని దనిజ్ ఉండ్రె గుర్తు.

14 మరి దేవుణు వన్ని లోకురిజ్ ఒట్టు కిత్తి విజు మజి దోహెత్తెఇని దనిజ్ ఉండ్రె ఆదారమనె యా దేవుణు ఆత్మ. వాండ్రు వన్ని లోకురిజ్ పూర్తి విడుడల కినివలె అయాలెకెండ్రె మిజి దోహెత్తె. దేవుణు గొప్పు పెరికాన్ ఇజ దినితాన్ లోకుర్ పొగిడినార్.

అవెసు సజమదు మని వరి వందెజ్ వవులు కిజిని పార్లనం

15-16 దేవుణు మిజి ముస్సు వెహి లెకెండ్రె దివిస్త మనాన్. అందెజె నాను మీ వందెజ్ వన్నిజ్ పార్లనం కిజిన. మీరు ప్రబు ఆతి యేసుజ్ నమ్మిజినిదెర్. దేవుణు వందెజ్ కేట ఆతి వరిజ్ విజెరిజ్ ప్రేమిసినిదెర్ ఇజ నాను వెహి బాణిజ్ అసి మీ వందెజ్ ఎస్తివలెబా డిజెన్ఎండ దేవుణుదిజ్ వందనమకు వెహిన్. ఎస్తివలెబా నాను పార్లనం కినివలె, మీ వందెజ్ పార్లనం కిజిన.

17 గొప్పు పెరికాన్ ఆతిమా బుబ్బెజ్ పార్లనం కిజిన. వాండ్రెమా బుబ్బె ఆతి యేసు క్రీస్తుజ్ దేవుణు. మీరు వన్నిజ్ బాగ నెస్తి వందెజ్ దేవుణు ఆత్మ మిజి గెణం సిదెజ్ ఇజ, దేవుణు వందెజ్ మిజి తెలివి కిబిస్తెజ్ ఇజ నాను వన్నిజ్ పార్లనం కిజిన.

18 దేవుణు వందెజ్ కేట ఆతి లోకుర్ వందెజ్ వాండ్రు ఇట్టి మని గొప్పు పెరి దివెనమకు ఇనికెజ్ ఇజ మీరు నెస్తి వందెజ్, అయా దివెనమకాజ్ ఆనదాన్ ఎర్దు సూణి వందెజ్ వరిజ్ నెస్తిన్లె ఇజ నాను పార్లనం కిజిన. దేవుణు వన్ని లోకురిజ్ సీన ఇజ ఒట్టు కిత్తి దివెనమకు ఎనా పెరికెజ్ ఇజ మీరు నెస్తిజ్ ఇజ నాను వన్నిజ్ పార్లనం కిజిన.

19-21 వన్నిజ్ నమ్మిజిని మా లొఇ మని వన్ని సత్తు ఎనా పెరిక ఇజ మీరు నెస్తిజ్ ఇజ నాను పార్లనం కిజిన. అయా సత్తు విజు వన్కా ముస్సు గొప్పు పెరిక. యా గొప్పు పెరి సత్తుదాన్ దేవుణు క్రీస్తుజ్ సావుదాన్ బత్తిస్తాండ్రె పరలోకమదు వన్ని ఉణెర్ వడకాదు బనె కిత్తాన్. క్రీస్తు అబె అతికారం కిజినాన్. విజు రకమ్కాణి అతికారం కిజిని దూతెజ, దెయమక ముస్సు అతికారం కిజినాన్. అతికారం కిజిని విజెరె ముస్సు వాండ్రె గొప్పు అతికారం మనికాన్. వన్ని అతికారం ఏలు అతికారం కిజిని వరి ముస్సునె ఆవిద్. గాని వాని కాలమదు అతికారం కిని వరి ముస్సుబా వాండ్రె గొప్పు అతికారం మనికాన్.

22 దేవుణు విజు వన్కాజ్ క్రీస్తు పాదమక అడెగి ఇట్టాన్. దేవుణు సజం ముస్సు అతికారి లెకెండ్రె వన్నిజ్ ఏర్పాటు కిత్తాన్.

23 వాండ్రు దేవుణు సజమదిజ్ బుర్ లెకెండ్రె దేవుణు సజమనె వన్ని ఒడెల్ లెకెండ్రె దేవుణు సజమనె వన్నిజ్ పూర్తి కిజినాద్. ఎంబెబా విజు వన్కాజ్ పూర్తి కిజినికాన్ వాండ్రె.

2

దేవుణు వన్ని కనికారమదాన్ మజి రక్తిసినాన్.

1 మీరు క్రీస్తుజ్ నమ్మిజ ముజాలె సాతి వరి లెకెండ్రె మహిదెర్. ఎందనిజ్ ఇహిజ మీరు దేవుణుదిజ్ లొజెఇతిదెర్, సెజ పణిజ్ కిజి మహిదెర్.

2 యా లోకమదు మని దేవుణుదిజ్ దూసిస్తికార్ కిజి మహి లెకెండ్రె మీరుబా కిజి మహిదెర్. అగాసమదు బుల్లెయ్ కిని దెయమకాజ్ నెయ్కి ఆతి నయ్తానుజ్ లొజెజి మహిదెర్. వీండ్రె దేవుణుదిజ్ లొజెఇ వరి ముస్సు ఏలు అతికారం కిజినాన్.

3 ఉండ్రీ కాలమ్దు, నిజమె, మాటుబా నని వరి లెకెండ మహాట్. మా సొంత నెజ ఇస్టమ్దానె కిజి మహాట్. ము ఒడోల్దె ఆనెజి వజ, నెజ ఆలోనమ్క వజ కిజి మహాట్. మహి విజెరి లెకెండ, మాటుబా దేవుణు కోవమ్దిట్ గురి ఆతి మహికోట్.

4 గాని దేవుణు నండో కనికారం మనికాన్. వాండ్రు మజి నండో ప్రేమిసినాన్.

5 అందెజి మజి క్రీస్తు వెట కుడుప్రాండ్రె మజి కొత్త బత్తు సితాన్. మాటు దేవుణుదిట్ లోజిఎండ ఆతి మహిజ్, సాతి వరి లెకెండ మహాట్. అయావలెబా వాండ్రు యా లెకెండ కొత్త బత్తు సితాన్. దేవుణు దయాదరమ్దానె వాండ్రు మజి రక్సిస్తాన్.

6 వాండ్రు మజి క్రీస్తుయేసు వెట సాపుదాన్ మరజి బత్తిస్తాండ్రె, పరలోకమ్దు వన్ని వెట కూడోజి ఏలుబడిజి కిదెజ్ బనె కిత్తాన్. క్రీస్తు వెట మజి కుడుప్రాండ్రె యా లెకెండ కిత్తాన్.

7 వాని కాలమ్దు లోకుర్ విజెరి వన్ని దయ దర్పం విజా వన్యా మున్సు గొప్పు నండో పెరిక ఇజి నుడోదెజె యా లెకెండ క్రీస్తు వెట మా మున్సు దయ దర్పం తోరిస్తాన్.

8 ఎందనిజ్ ఇహిజ దేవుణు, దయాదరమ్దానె మిజి రక్సిస్తాన్. మీరు క్రీస్తుజ్ నమ్మిత్తి దనితానె రక్సిస్తాన్. మీరు కిత్తి నెగ్గి పణిజాణిజ్ ఆవద్ వాండ్రు మిజి రక్సిస్తాన్. అయాక వాండ్రు మిజి సీతి ఉండ్రీ ఇనాయమ్నె.

9 మీరు కిత్తి నెగ్గి పణిజాణిజ్ ఆవద్ దేవుణు మిజి రక్సిస్తాన్. అందెజి ఎయెనబా నాను కిత్తి నెగ్గి పణిజాణిజ్ దేవుణు నజి రక్సిస్తాన్ ఇజి పొజిదెజ్ ఆవద్.

10 మాటు నెగ్గి పణిజ్ కిజి నె మంజిని వందిజ్ క్రీస్తు యేసు వెట మజి కుడుప్రాండ్రె కొత్త బత్తు మజి సితాన్. మాటు కిదెజ్ మని యా నెగ్గి పణిజ్ వాండ్రు ముజాలె తిరుమానం కితాండ్రె ఇట్టాన్. నిజమె దేవుణు ఒరెండ్రె యా లెకెండ మా బత్తుదిట్ కొత్తాజ్ కిత్తాన్.

11 అందెజె యూదురు జాతిదు పుట్ఇతి మీరు క్రీస్తుజ్ నమ్మిజ ముజాల ఎలాగ మహిదెర్ ఇజి ఎత్తు కిదు. మీరు సునతి కిబె ఆజకిదెర్ ఇజి యూదురు మిజి వెహిన్సాన్. ఎందనిజ్ ఇహిజ, వారు సునతి కిబె ఆత మనార్. అందెజె వారు దేవుణు లోకుర్ ఇజి ఒడోబిజనార్. (గాని యా సునతి ఒరెన్ వన్ని ఒడోల్దె ము కిని ఆసారమ్నె)

12 నుడోడు, అయా కాలమ్దు మీరు క్రీస్తుజ్ దూరం మహిదెర్. దేవుణు లోకుర్ ఆతి ఇస్తాయేలుదిట్ నెందిజకిదెర్. మీరు పయవారు. దేవుణు వన్ని లోకురిజ్ కిత్తి ఒట్టుదిట్ నమందం సీలికిదెర్. మీరు యా లోకమ్దు ఇని ఆన సిల్లెండ, దేవుణుదిట్ నెన్ఎండ బత్తిజి మహిదెర్.

13 గాని ముజాల క్రీస్తుజ్ దూరం మహి మీరు ఏలు వన్ని వెట కూడితి మనిదెర్. క్రీస్తు నల వాక్కి సాతి సాపుదాన్ దేవుణు మిజి డగ్గు కిత్తాన్.

14 క్రీస్తునె యూదురు ఆజ మిజి, యూదురు ఆతి మజి రాజనం కిబిస్తికాన్. ముజాల మిజి మజి అడ్డు లెకెండ మహి పగ వాండ్రు లాగితండ్రె, ఉండ్రె నన్ని లోకుర్ కిత్తాన్.

15 యూదురి రూలుదు మని ఆడ్రెజ, రూలుజి క్రీస్తు వన్ని ఒడోల్దె సాతి సాపుదాన్ వన్యాజ్ నత్తు సిల్లెండ కితాండ్రె, అడు లెకెండ మహి పగ లాగితాన్. ఎందనిజ్ ఇహిజ, రుండి లోకురిజ్ ఇహిజ, యూదురిజ్, యూదురు ఆజ వరిజ్ వన్ని వెట కుడుప్పి ఉండ్రె నని కొత్త లోకు కిత్తాన్. యా లెకెండ వాండ్రు రాజనం కిబిస్తాన్.

16 మరి సెలువాదు సాతి సాపుదాన్ వాండ్రు రుండి జాతిజి నడిమి మహి పగ సాన్నిసి, ఉండ్రె నని లోకుర్ లెకెండ కిజి, దేవుణు డగ్గు మరజి తతెజ్ యా లెకెండ రాజనం కిబిస్తాన్.

17 క్రీస్తు యా లోకమ్దు వాతండ్రె, దేవుణుదిట్ దూరం మహి యూదురు ఆజ మిజి, వన్ని డగ్గు మహి యూదురు ఆతి మజి నమాదనం సీజిని సువార్త వెహ్తాన్.

18 వన్ని వెట మజి రివిజ్, ఇహిజ యూదురు ఆజ మిజి, యూదురు ఆతి మజి, బుబ్బు ఆతి దేవుణు ముజాల దయరమ్దాన్ సాండ్రెజ్ వన్నిజ్ లొస్తాజ్ అక్కు దొహ్కాద్. యాక దేవుణు ఆత్మ వెట మజి దొహ్కాద్.

19 అందెజె మీరు ఏలుదాన్ పయిదికిదెర్ ఆజదెర్. దేవుణుదిట్ నెందిజకిదెర్ ఆజదెర్. గాని మీరు దేవుణు లోకుర్ వెట అక్కు ఆతికిదెర్. దేవుణు కుటుమ్దికిదెర్.

20 ఉండ్రీ ఇల్లు పణకాణిజ్ తొప్పొలెకెండ్ మీరు మనిదెర్. దనిజ్ వునాది ఆతికార్ ప్రవక్తరు, అప్పొస్తురు. దనిజ్ మూల పణుకు క్రీస్తుయేసుని.

21 వాండ్రె ఆ ఇల్లు అర్ఎండ అన్నికాన్. వన్ని వెటనె ఆ ఇల్లు తొహె ఆజి పిరిసి ప్రబు ఆతి యేసు క్రీస్తు మండ్రెజ్ వన్ని వందిజ్ కేట ఆతి నెగ్గి ఇల్లు ఆనాద్.

22 క్రీస్తు వెట కూడితి మని మిజి వాండ్రు మహి నమ్మిత్తి వరివెట కుడుప్పినాన్. అయావలె మీరు మహి నమ్మిత్తి వరివెట, దేవుణు వన్ని ఆత్మ సత్తుదాన్ మంజిని ఉండ్రీ ఇల్లు ఆజినిదెర్.

3

యూదురు ఆఇ వరిజ్ సువార్త వెప్పొ పణి వవులుజ్ దేవుణు ఒపజెప్పినాన్

1 అందెజి క్రీస్తు యేసుజ్ నేవ కిని వందిజ్ జెలిదు మని పవులు ఇని నాను మీ వందిజ్ పార్దనం కిజిన. యూదురు ఆఇ మిజి సువార్త వెప్పొని వందిజె నాను జెలిదు ఆత.

2 మీరు తవ్వెండ వెహిమనిదెర్. దేవుణు దయ దర్మమదాన్, మిజి సువార్త వెప్పొ పణి నజి ఒపజెప్పాన్

3-4 దేవుణు ఎత్తు కిజి వన్ని గర్భమదు డాప్పి ఇట్టిక వాండ్రు నా వెట తోరిస్తాన్. దిని వందిజ్ నాను ముసుక్కు కండెక్ రాస్త మన. అయాక మీరు నదవెతిజ, క్రీస్తు వందిజ్ దేవుణు ఎత్తు కిజి గర్భమదు డాప్పి ఇట్టిక నాను నెస్త మన ఇజి మీరు నెన్సిదెర్.

5 యాక దేవుణు పూర్బమదు మహి లోకురిజ్ తోరిసి నెన్పిన్ఎతాన్. గాని ఏలు వన్ని వందిజ్ ఏర్పాటు కిత్తి అప్పొస్తుడురిజ్, ప్రవక్తరిజ్ తోరిసి నెన్పిస్తాన్. దేవుణు ఆత్మదాన్ నె ఈహు తోరిసి నెన్పిస్తాన్.

6 దేవుణు ఎత్తు కిజి గర్భమదు డాప్పి ఇట్టిక ఇనిక ఇహిజ, యూదురు ఆఇ వరిజ్, యూదురు ఆతి వరివెట దేవుణు సీని దీవెనమ్కాజ్ అక్కు మనాద్. యూదురు ఆఇకార్ని, యూదురు ఉండ్రె ఒణ్ణో ఆత మనార్. దేవుణు క్రీస్తు యేసు వెట యూదురిజ్ కిత్తి ఒట్టుదిజ్, యూదురు ఆఇ వరిజిబా వంతు మనాద్. యాకెజ్ మీరు సువార్త నమ్మిత్తిజ్నె దొహెక్త.

7 యా సువార్తన నాను లోకురిజ్ వెప్పొన. యా సువార్త పణినె దేవుణు వన్ని దయ దర్మమదాన్ నజి ఒపజెప్పాన్. వన్ని సత్తు సీజి నా వెట కిబిసినాన్.

8 దేవుణు లోకుర్ లొఇ నాను ఎందనిజ్ పణిదిజ్ రెఇకాన్. గాని వాండ్రు నజి యా వెరి పణి ఒపజెప్పాన్. ఇహిజ, క్రీస్తు సీజిని అంతు సిలి దీవెనమ్క వందిజ్ యూదురు ఆఇ వరిజ్ వెహైజ్,

9 మరి దేవుణు ఎత్తు కిజి గర్భమదు డాప్పి ఇట్టిక ఎలాగ వాండ్రు కిసాన్ ఇజి లోకుర్ విజెరిజ్ నెన్సిస్తాజ్ వాండ్రు యా పణి నజి ఒపజెప్పాన్. విజు తయార్ కితి దేవుణు పూర్బమదాన్ అసి వాండ్రు ఎత్తు కిజి గర్భమదు ఇట్టిక లోకురిజ్ డాప్తాన్.

10 వాండ్రు ఎందనిజ్ యా లెకెండ్ డాప్తాన్ ఇహిజ, పరలోకమదు మని దూతారిజ్, వన్నా అతికారిజ, వాండ్రు గొప్ప గెణం మనికాన్ ఇజి దేవుణు నజం వెట ఏలు తోరిస్తెజ్ యాక వన్ని లోకుర్ వందిజ్ వాండ్రు ఆతి దనితాన్నె తోరిసినాన్.

11 లోకం పుటిన్ఎండ ముజాలె, యా లెకెండ్ కిదెజ్ ఇజి దేవుణు ఎత్తు కిత మహాన్. అయాలెకెండ్ మా ప్రబు ఆతి క్రీస్తు యేసు వెట కిత్తాన్

12 మాటు వన్నిజ్ నమ్మిజనాట్. వన్ని వెట కూడిత మనాట్. అందెజి తియెల్ సిల్లెండ దయర్మదాన్ దేవుణు డగ్రు సొన్ని లొస్తాజ్ అక్కు దొహెక్త మనాద్.

13 అందెజి మా వందిజె వన్నిజ్ స్రమెజ్ వాతె ఇజి నా వందిజ్ విసారిస్కాట్ ఇజి నాను మిజి బతిమాల్లిన్. గాని యా స్రమెజాణిజ్ మిజి గవరం సీనార్.

పవులు అవెసుదు మని నమ్మిత్తి వరి వందిజ్ పార్దనం కిజినాన్

14 దినివందిజె, నాను మా బుబ్బు ఆతి దేవుణు ఎద్దు ముణుకుజ్ ఊర్జి మీ వందిజ్ పార్దనం కిజిన.

15 పరలోకమదు మని నమ్మిత్తి విజెరిజ్, యా లోకమదు మని నమ్మిత్తి విజెరిజ్ వీండ్రె బుబ్బు. విజెరి వన్ని కుటుమ్దికార్.

16 వన్నీ లోకుర వందిజ్ ఇట్టి మని నండో దివెనమ్కాణిజ్, మీ మన్ను దయరమ్దాన్ నెగ్రెండ మండ్రెజ్ వన్నీ అత్తు వెట సత్తు సీదెజ్ ఇజి నాను వన్నీజ్ పార్దనం కిజిన.

17 మీరు క్రీస్తుజ్ నమ్మిజినిదెర. అందెజె వాండ్రు మీ మన్నుదు ఎలాకాలం మండ్రెజ్ ఇజి నాను పార్దనం కిజిన. మీరు దేవుణుదిజ్ ప్రేమిని మహి వరిజ్ ప్రేమిని మండ్రెజ్ ఇజి నాను పార్దనం కిజిన. అయ లెకెండ కిజి మహిజ, బూమి లోక సారితీ సాహి వెల్లెజ్ మని మరాన్ లెకెండ మీరు మనిదెర. నెగ్గి పునాది మున్ను తోహ్కీ మని ఇల్లు లెకెండ మనిదెర.

18 అయావలె క్రీస్తు మజి ఎసా ప్రేమినినాన్ ఇజి మీరు, దేవుణు వందిజ్ కేట అతి లోకుర విజెరె వెట పూర్తి నెస్టెజ్ అట్టిదెర. వాండ్రు మజి అంతు సిల్లెండ నండో ప్రేమినినాన్.

19 ఎయెరబా అర్దం కిదెజ్ అల్తె ఇక్రీస్తు ప్రేమ మీరు నెసి నె మండ్రెజ్ ఇజి నాను పార్దనం కిజిన. దేవుణుదిజ్ మని పూర్తి బుద్ధి మిజ్జెబా మంజిని వందిజె నాను ఈహు పార్దనం కిజిన.

20 మాటు లోన్సి విజు దని ఇంక, ఒడిజిబిని దనిజ్ నండో కిదెజ్ దేవుణు అట్టాన్. మా లోక పణి కిజిని వన్నీ అత్తు సత్తుదాన్ నె వాండ్రు కిజినాన్.

21 క్రీస్తు యేసు వెట వాండ్రు కితి గొప్ప పణి వందిజ్, దేవుణు సజం వెట వాండ్రు కితి గొప్ప పణి వందిజ్ యా దేవుణుదిజ్ తర తరమ్క పొగిడిజి మంజినాట్. వన్నీజ్ ఎలాకాలం పొగిడిజినాట్. ఆమెన్.

4

క్రీస్తు వెట ఉండ్రె ఒడోల్ అతాట్

1 అందెజె ప్రబుజ్ నేవ కిజిని వందిజ్ జెలిదు అతి నాను మిజి బతిమాలిజన. దేవుణు మిజి నా లోకు ఇజి కూక్తివలె నెగ్గి సరిదు నడిదెజ్ ఇజి కూక్తాన్. దనిజ్ తగ్గి వజ మీరు మండ్రెజ్ ఇజి నాను మిజి బతిమాలిజన.

2 ఎస్సివలెబా గర్ర అవిండ తగిజి మండ్రు. మహి వరివెట సార్లిదాన్ మండ్రు. మహి వరిజ్ ప్రేమిని, వరి వందిజ్ ఓరిసి మండ్రు.

3 దేవుణు అత్తునె మిజి కుడుపు మనాన్. అందెజె మీరు ఉండ్రె అజి మంజిని వందిజ్ సమాదనమ్దాన్ కూడేజి పాడేజి మండ్రెజ్ నండో సుడేదెజ్ వలె.

4 మాటు ఉండ్రె ఒడోల్. ఉండ్రె దేవుణు అత్తు మజి దోహ్క మనాన్. దేవుణు మజి వన్నీ లోకుర ఇజి కూక్తివలె, వాండ్రు సీన ఇజి ఒట్టు కితి ఉండ్రె నని దీవనమ్క వందిజ్ మాటు విజెటి ఆసదాన్ ఎద్దు సుడేజినాట్.

5 మజి విజెరిజ్ ఒరెండ్రె ప్రబు. మాటు నమ్మిజిని బోద ఉండ్రె. మాటు ఉండ్రె బాప్తీసం లాగె అతాట్.

6 మాటు ఒరెండ్రె దేవుణుదిజ్ మాడిసాట్. వాండ్రె విజెరిజ్ బుబ్బు. వాండ్రె విజెరె మున్ను అతికారం కినికాన్. వాండ్రె మా లోక మంజినాన్. మా వెట పణి కిబినినాన్.

7 గాని మా లోక ఒరెన్ ఒరెన్ వన్నీజ్ ఉండ్రె ఉండ్రె వరం, క్రీస్తు మజి సితాన్. అయాక వన్నీజ్ ఇస్టం అతి వజ వాండ్రు సీబాత సితాన్.

8 అందెజె దేవుణు మాటదు రాస్ట మనాద, “వాండ్రు ఎత్తు మని బాన్ ఎక్కి సాహివలె, వాండ్రు ఉద్దం గెలస్తివలె, అస్తి వరిజ్ వన్నీవెట తోహ్క ఒతాన్. వాండ్రు లోకురిజ్ ఇనాయమ్కు సీబాత సితాన్”, ఇజి.

9 (వాండ్రు ‘ఎక్త సాహాన్’, ఇజి వెహ్సాని దనిజ్ అర్దం ఇనిక? దని అర్దం ఇనిక ఇహిజ, వాండ్రు ముజాల, అడిగి మని యా బూమిదు వాతాన్.

10 యా బూమి మున్ను డిగితి వాతికాండ్రె అగాసం డాట్టి మున్ను. నండో అతికారం మని బాన్ ఎక్కి సాహికాన్. యా బూలోకమ్దు మని విజు వన్నాజ్ వన్నీ వెట పూర్తి కిదెజె వాండ్రు మున్ను ఎక్త సాహాన్)

11 వాండ్రె, లోకురిజ్ ఒరెన్ ఒరెన్ వన్నీజ్ ఉండ్రె ఉండ్రె వరం ఒవజెప్తాన్. సెగెండారిజ్ అపొస్టరు ఇజి సెగెండారిజ్ ప్రవక్తరు ఇజి, సెగెండారిజ్ సువార్త వెహ్సాకార్ ఇజి, సెగెండారిజ్ దేవుణు సజం సుడేజి, నెస్సిని, వరిజ్ నెగ్రెండ నడిపిస్సి పాస్టరుజు ఇజి వాండ్రు వీరపాటు కిత్తాన్.

12-13 ఎందనిజ్ ఇహిజ, దేవుణు లోకురిజ్ దేవుణు పణి కిదెజ్ పూర్తి నెన్పిస్తిజె యా లెకెండ వీరపాటు కిత్తాన్. క్రీస్తు ఒడోల్ అతి దేవుణు సజమదికార్ దేవుణుదిజ్ నెసి పూర్తి పిరిని వందిజె దేవుణు లోకుర

దేవుణులు పనికి కిరెజ్. అయీ లెకెండే మాటు దేవుణుడికే నమ్మిజి, వన్ని మురిసికే నెసి ఉండ్రె ఆజి ముంజినాట్. మాటు పూర్తి బుద్ధి వాతి వరి లెకెండే పిరినాట్ ఇహిజ క్రిస్తు లెకెండే పూర్తి ఆనాట్.

14 అయీవలె మాటు కొడోడోర్ లెకెండే మనవెట్. గాలి డెయిజి, ఉల్కెజ్ ఇతల్ అతాల్ దూక్కిని డోణి లెకెండే, అబద బోద నెస్సిన్ని మొసెం కిని వరి బాణిజ్ మొసెం ఆవెట్.

15 గాని మాటు ఎస్తివలెబా నిజం వెస్సి ప్రేమిసి ముండ్రెజ్. అయీలెకెండే మాటు కిజిని విజు వన్యా లోఇ, క్రిస్తు లెకెండే పూర్తి ఆనాట్. వాండ్రు మా బుర్ల లెకెండే.

16 మాటు వన్ని ఒడోల్. ఒడోల్దు ఒడోల్ది అత్తుజ్ అత్తిన్ని లెకెండే క్రిస్తు మజి అత్తిస్తాన్. ఒడోల్ది అత్తుజ్ విజు అయీకెజ్ పణి కిరెజ్ మని లెకెండే పణి కితిజ, ఒడోల్ సత్తుదాన్ పిపినాడ్. అయీలెకెండే దేవుణు సజమడికార్ ఒరెన్ మురి ఒరెన్ వన్నిజ్ ప్రేమిసి వారు కిరెజ్ మనికెజ్ కితిజనె దేవుణు సజం సత్తుదాన్ పిరినాడ్.

17 అందెజె ప్రబు నజి సీతి అతికారమదాన్ నాను మిజి వెహ్సిన. నాను డటమన మిజి వెహ్సిన. ఏలుదాన్ దేవుణుడికే నెన్ఇకార్ కిజిని లెకెండే మీరు మనమాట్. వారు పణిదికే రెకెజ్ ఒడోబినార్

18 వరి మున్నుదు సీకాట్ మని లెకెండే మనార్. దేవుణు సీజిని కొత్త బత్తుదికే దూరం మనార్. ఎందనికే ఇహిజ, దేవుణు వందికే నిజమాతికే వారు అర్థం కివెర్. వరి మున్ను గటిదిక.

19 వరిజ్ సీగు సూహాద్. వారు ఒడోల్ది సెఇ ఆసెజ ఒజు అతార్. విజు రకమకాణి పాపమకు కిజినార్. వారు అయీకెజ్ డీసెవెర్. మురి మురి కిరెజె ఆన ఇజినార్.

20 గాని మీరు క్రిస్తు వందికే నెస్తివలె అయీలెకెండే ముండ్రెజ్ అవెద్ ఇజ నెస్తిదెర్.

21 నిజమనె, మీరు వన్ని వందికే వెహ్దెర్. మీరు వన్ని వెట కూడితివలె యేను వందికే నిజమాతి దనికే తగ్గివజ మిజి దేవుణు అత్తు నెస్తిస్త మనాన్.

22 మీరు బత్తిజ మహి వడాఇ బత్తు డింస్తు ఇజినె నెస్తిస్తాన్. వడాఇ బత్తుదు, మిజి మహి సెఇ ఆసెజ్ మిజి మొసెం కిజి పాడు కిజినె మహి.

23 మీ బుద్ధిని మీ మున్ను దేవుణు మారిస్తెజ్ వలె.

24 దేవుణు మిజి వన్ని నని బుద్ధి సీతాన్. అందెజె వాండ్రు సీతి ఆ కొత్త బుద్ధిదాన్ మీరు ముండ్రు. అయీవలె సీతి నిజాయితీదాన్ ముంజినిదెర్. తప్పుజ్ కివెండ ముంజినిదెర్.

25 అందెజె ఏలుదాన్ అబద్ధం వర్గిమాట్. మహి వరి వెట నిజం వర్గిదెజ్ వలె. ఎందనికే ఇహిజ మాటు ఉండ్రె ఒడోల్దికే సెందితికాట్.

26 మీరు కోపం ఆతిజ, మీ కోపం మిజి పాపం కిబినెండ సుడెదెజ్. మీ కోపం వెడారు ముండ్రెజ్ అవెద్.

27 తప్పు కిబిస్తెజ్ నయతానిదికే సరి సీమాట్.

28 డొజి కిజి మహికాన్ ఏలుదాన్ డొజి కిరెజ్ అవెద్. గాని వాండ్రు వన్ని కికాణిజ్ కష్టబడిజి వన్నికే పణిదికే వానికెజ్ కిరెజ్. ఎందనికే ఇహిజ, అయీవలె వాండ్రు బీదవరికే సాయం కిరెజ్ అట్టాన్.

29 మీ వెయదాన్ సెఇ మాటిజ్ వాదెజ్ అవెద్. గాని మహికార్ నమకమదు పిరిదెజ్ తగ్గి నెగ్గి మాటిజె వర్గిదెజ్. లోకురికే వరి అవుసరం సుడెజి వర్గిదెజ్. ఎందనికే ఇహిజ అయీవలె మీ మాటిజ్ వెని వరికే లాబం ముంజినాడ్.

30 దేవుణు అత్తుదికే దుకం కిబిస్తాట్. ఎందనికే ఇహిజ, దేవుణు మిజి పూర్తి విడూదల కిని దినమదాక మీరు వన్ని లోకుర్ ఇని దనికే గుర్తు యీ దేవుణు అత్తునె.

31 మీ లోఇ ముని కుత అస్తిక, కోపం, వగ అస్తిక, జటిజ్ ఆనిక, దుసలాడెనిక, మహి వరికే సెఇకెజ్ కిజ బుద్ధి, మీ లోఇహాన్ డింస్తు.

32 గాని మహి వరి వందికే నెగ్గికెజ్ కిదు. వరికే కనికారం తోర్స్తు. మిజి కితి సెఇ దని వందికే సెమిస్తు. క్రిస్తు వెట దేవుణు మీ తప్పుజ సెమిస్తి లెకెండే, మీరు వరికే సెమిస్తు.

5

1 అందెజె మీరు దేవుణుడికే పోలిజె ముండ్రు. ఎందనికే ఇహిజ, వాండ్రు నండో ప్రేమిస్తి వన్ని కొడోణిరె మీరు.

2 క్రీస్తు మజి ప్రేమిస్తాండ్రె, మా వందిళ్ సాదెళ్ వన్నిళ్ వాండ్రె ఒపజెపె ఆతాన్. వాండ్రు వన్ని పాణం నెగ్గి వాననం సీని పూజ లెకెండె సీతాన్. దనివెట దేవుణు నరద ఆతాన్. అయావజ మీరుబా ఒరెన్ మరి ఒరెన్ వన్నిళ్ ప్రేమిసి మండ్రు.

3 మీ లొణ ఎయెన్బా రంకు బూలమాల్. కేలార్ బూలమాల్. మని దనిళ్ ఇంక మరి నండొ కావాలి ఇజి ఆస ఆమాల్. నిని పణి మీ లొణ మంజిని ఇజి మహికార్ వెప్తాళ్బా సరి సిదెళ్ ఆవద్. ఎందనిళ్ ఇహిజ, మీరు దేవుణు లోకుర్.

4 గాని మీ లొణ కేడి మాటనో, బుద్ది సీలి మాటనో వెంజి, సిగు ఆని మాటెన్ నో వర్గెదెళ్ ఆవద్. అయాకెళ్ మిజి తగ్గె. గాని దేవుణుదిళ్ వందనమకు మీరు వెప్తాళ్.

5 యాక మీరు తవ్వెండ నెస్తు రంకు బూలానికాన్, కెలార్ బూలానికాన్, మని దనిళ్ ఇంక మరి నండొ కావాలి ఇజి ఆస ఆనికాన్ ఎయెన్బా దేవుణుని క్రీస్తు ఏలుబడిః కిని లోకుర్ లొణ మనెవర్. అబె ఆక్కు మనికార్ ఆవర్. మని దని ఇంక మరి నండొ కావాలి ఇజి ఆస ఆనికాన్, బోమెజ మాడిస్సి వన్నిలెకెండె మనాన్. వాండ్రు వన్నిళ్ కావాలి ఇజి ఆస ఆని దనిజె దేవుణు ఇజి ఒడిబినాన్.

6 పణిదిళ్ రెణ మాటెళ్ వెప్పి ఎయెన్బా మిజి మొసెం కిఎండ సుడెఃదు. ఎందనిళ్ ఇహిజ, నెకెకె కిజి దేవుణుదిళ్ లోజెఎండ మని పరిళ్ వాండ్రు సిక్కు సీనాన్.

7 అందెజె నని పరి వెట జత కూడాల్.

8 ఎందనిళ్ ఇహిజ, ఉండ్రీ కాలమదు మీరు సీకటుదు బత్తితిదెర్. గాని ఏలు మీరు ప్రబు వెట కూడితిదెర్ జాయిదు బత్తిజినిదెర్. అందెజె జాయిదు బత్తిజిని వరిలెకెండె బత్తిదు.

9 ఎందనిళ్ ఇహిజ జాయిదు బత్తిజినికార్, ఎస్తివలెబా నెగ్గెకెళ్, సీతి మనికెళ్, నిజమాతికెళ్ కిజి మంజినార్.

10 ప్రబుజ్ ఇనికెళ్ ఇస్సం ఇజి నెసి అయావజ కిదెళ్ సుడెఃదు.

11 సీకటుదు మనికార్ కిని పణిదిళ్ రెణ పణిజ వెట కూడాల్. గాని అయాకెళ్ నెకెకె ఇజి లోకుర్ వెప్పు.

12 వారు సడి సిల్లెండ కిజిని పణిజ వందిళ్ వెప్తాళ్బా సిగునె.

13 గాని విజు వన్నాళ్ జాయి వెల్లి తపిస్సివలె అయాకెళ్ ఇనికెళ్ ఇజి లోకుర్ నెస్సార్. ఎందనిళ్ ఇహిజ, జాయి నిజమాతికె వెల్లి తోర్పాద్.

14 అందెజె వెప్పి మంజినార్, “నిద్ర కిజినికి తెలి ఆఅ. సాతి పరిబాణిళ్ నిజ్ఆ. క్రీస్తు నిజ జాయి సీనాన్”, ఇజి.

15 అందెజె మీరు ఎలాగ నడిజినిదెర్ ఇజి జాగర్ల సుడెఃదు. బుద్ది సీలివరి లెకెండె ఆవిండ, బుద్ది మని పరిలెకెండె నడిఃదు.

16 కాలం గడాప్పాల్. ఎందనిళ్ ఇహిజ ఏలు నెగ్గి దనిమకు ఆఉ.

17 అందెజె బుద్ది సీలిలెకెండె బత్తిమాల్. గాని ప్రబుజ్ ఇనికెళ్ ఇస్సం ఇజి నెసి అయాకెళ్ కిదు.

18 మతు సీనికెళ్ ఉణిజి సోని మనమాల్. ఎందనిళ్ ఇహిజ అయాక పాడు కినాద్. గాని దేవుణు ఆత్మదాన్ నిండ్రీజి మండ్రు.

19 మీరు ఒరెన్ మరి ఒరెన్ వన్ని వెట వర్గిని వలె దేవుణు మాటెళ్ పాటెళ్ వజ వెప్పి, దేవుణుదిళ్ పొగిడిఃజి వందనమకు వెప్పి, దేవుణు ఆత్మ మీ మన్నుదిళ్ రేప్పిని వజ పాటెళ్ వెప్పి వర్గిదు. మీ మన్ను పూర్తిదాన్ ప్రబు ఆతి దేవుణుదిళ్ పాటెళ్ పార్దు.

20 మా ప్రబు ఆతి యేసు క్రీస్తు వెట మజి దోహక్తి మని విజు దని వందిళ్ ఎస్తివలెబా మా బుబ్బు ఆతి దేవుణుదిళ్ వందనమకు వెప్పు.

దేవుణు నజమదిళ్ క్రీస్తు మాసి

21 క్రీస్తుజ్ మీరు గవరం సీజినిదెర్. అందెజె ఒరెన్ మరి ఒరెన్వన్నిళ్ లోజెదు.

22 బోదెకాండె, మీరు ప్రబుజ్ లోజిజిని వజ మీ మాసిరిళ్ లోజెదు. మాసిరు మీ ముస్సు అతికారం మనికార్ ఇజి ఒడిబిజి పరిళ్ లోజెదు.

23 ఎందనిజ్ ఇహిజ క్రీస్తు, విజు దేవుణు సజమ్కాజ్ బుర్ర ఆతి లెకెండ, మాసి వన్ని బోదెల్దిజ్ బుర్ర ఆత మనాన్. దేవుణు సజమ్కు విజు క్రీస్తు ఒడోల్నె. వాండ్రె విజు దేవుణు సజమ్కాజ్ రక్కిన్సికాన్.

24 విజు దేవుణు సజమ్కు క్రీస్తుజ్ లోజీజిని వజ, బోదెకుబా వన్యా, మాసిరిజ్ విజు వన్యా లోఇ లోజీదెజ్.

25 మొగ్గ కొడోరాండె, మీరు మీ బోదెకాజ్ ప్రేమిస్తు. క్రీస్తు విజు దేవుణు సజమ్కాజ్ ప్రేమిసి విజు సజమ్క వందిజ్ సాతిలెకెండ మీరు మీ బోదెకాజ్ ప్రేమిస్తు.

26-27 క్రీస్తు ఎందనిజ్ విజు దేవుణు సజమ్కాజ్ వందిజ్ సాతాన్ ఇహిజ, విజు దేవుణు సజమ్కు సుబ్బరమ్దాన్ మండ్రెజ్ ఇజెనె. వాండ్రు దేవుణు మాటదాన్, బాప్తీనమ్దాన్ సజమ్కాజ్ సుబారం కిత్తాన్. మరి సజమ్కు ఇని పాపం సిల్లెండ, నిందెజ్ సిల్లెండ, తకుజ సిల్లెండ, ఇని సెఇకెజ్ సిల్లెండ వన్ని ఎద్రు వాండ్రె నెగ్రెండ తోరిస్తెజె విజు దేవుణు సజమ్క వందిజ్ వాండ్రు సాతాన్.

28 అయలెకెండెన్ క్రీస్తు విజు దేవుణు సజమ్కాజ్ ప్రేమిసినాన్. అయలెకెండెన్ ఒరెన్ మాసి ఆల్కిజ్ ప్రేమిస్తెజ్. ముకెలం మాసిరు వరి సొంత ఒడోల్దిజ్ ప్రేమిస్సి లెకెండ, వరి బోదెకాజ్ ప్రేమిస్తెజ్ వలె. వన్ని బోదెల్దిజ్ ప్రేమిస్సికాన్ వన్నిజ్ వాండ్రె ప్రేమిస్తాన్.

29-30 ఎందనిజ్ ఇహిజ ఎయెనబా వన్ని సొంత ఒడోల్దిజ్ దూసిన్ఎనె. గాని దనిజ్ నెగ్రెండ సుడోజి పొస కిన్సాన్. మాటు క్రీస్తు ఒడోల్దు అత్తిత మనాల్. అందెజె క్రీస్తు వన్ని ఒడోల్ ఆతి విజు దేవుణు సజమ్కాజ్ నెగ్రెండ సుడోజినాన్.

31 యాక దేవుణు మాటుదు రాస్సి మని లెకెండ మనాద్. అందెజె, “మొగ్గకొడో వన్ని అయిసి అప్పాసిరుజ్ డిసి వన్ని బోదెల్ వెట కూడోనాన్. వారు రిఎర్ ఉండ్రె ఒడోల్ ఆనార్”.

32 యా మాటదిజ్ నండో నిరీ అర్లం మనాద్. గాని యా మాటెజ్ క్రీస్తు వెట విజు దేవుణు సజమ్కాజ్ మని సవదం వందిజ్ వెప్పినికెజ్ ఇజె నాను ఒడోబిజెన.

33 గాని యా మాటెజ్ మీ వందిజ్బా మనికాదె. ఒరెన్, వన్నిజ్ వాండ్రె ప్రేమిస్సి లెకెండ, వాండ్రు వన్ని బోదెల్దిజ్బా ప్రేమిస్తెజ్ వలె. మరి బోదెల్ మాసిజ్ గవరం సీదెజ్ వలె.

6

కొడోరిజ్, అయిసి అప్పాసిరిజ్ వెప్పినిక

1 కొడోరాండె, మీరు ప్రబు వెట కూడితి మనికిదెర్. అందెజె మీ అయిసి అప్పాసిరిజ్ లోజీదు. యాక కిదెజ్ తగ్గికాదె.

2-3 దేవుణు మాటుదు రాస్త మనాద్, “మీ అయిసి అప్పాసిరిజ్ గవరం సీదు. యాకదె దేవుణు వెప్తా ఆడ్రెజ లోఇ ఒట్టుదాన్ కూడితి మని మొదొహి ఆడ్ర. అయా ఒట్టు ఇనిక ఇహిజ, ‘మీరు మీ అయిసి అప్పాసిరిజ్ లోజీతిజ విజు మీజె నెగ్రెండ మంజెనె. మీరు నండో పంటోజె యా బూమిదు బత్తినిదెర్’.

4 అప్పాసిరాండె, మీరు మీ కొడోరి మన్నుదిజ్ కోపం రేప్మాల్. గాని ప్రబుజ్ ఇన్లం ఆతి వజ, వరిజ్ బుద్ది వెప్పి, నెస్సిని పొస కిదు.

వెట్టిపణి కిని వరిజ్ ఎజమానిరిజ్ వెప్పినిక

5 వెట్టిపణి కినికిదెరా, బూమి మున్ను మని మీ ఎజమానిరిజ్ లోజీదు. మీరు క్రీస్తుజ్ లోజీజిని లెకెండ వరిజ్ లోజీదు. మీరు పూర్తి మన్నుదాన్ వరిజ్ తియెల్ ఆజె వరిజ్ సీని గవరం సీజె లోజీదు.

6 నెగ్గికార్ ఇజె వెహె ఆదెజ్ వారు సూణివలెనె ఆవెద్. వరిజ్ లోజీదెజ్. గాని మీరు కిదెజ్ ఇజె దేవుణు కోరిజెన వజ మీ పూర్తి మన్నుదాన్ కిదు. ఎందనిజ్ ఇహిజ మీరు క్రీస్తుజ్ వెట్టి పణిమణిసీర్.

7 మీరు పణిజ్ కిని వలె, లోకుర్ వందిజె కిజినాప్ ఇజె ఆవిండ, దేవుణు వందిజ్ కిజినాప్ ఇజె సర్దదాన్ కిదు.

8 ఎందనిజ్ ఇహిజ వెట్టిపణి కినికాన్ ఆతిజ్బా, మరి ఎయెన్ ఆతిజ్బా మరి ఇని నెగ్గి పణి కినికాన్ ఆతిజ్బ ప్రబు వలితం సీనాన్ ఇజె మీరు నెసినిదెర్.

9 ఎజమానురుజాండె, మీరుబా మీ వెట్టివణి మణిసిరిజ్ నెగ్రెండ సుడోడు. వరిజ్ బెద్రిస్సాట్. ఎందనిజ్ ఇహిజ మీరు నెస్సిదెర్, మిజిని వరిజ్ ఒరెన్ ఎజమాని దేవుణు మంజిని బాడిోడు మునాన్. ఇజ్కాన్ పెరికాన్ ఇజి వన్నిజ్ తెడ సిల్లెద్.

సయ్తానుజ్ ఎద్రిస్సిక ఎలాగ ఇజి వెహ్సినాన్

10 కడోవెరిదు నాను మిజి వెహ్సిన, ప్రబు వెట మీరు కూడోజి వన్ని సత్తుదాన్ మండ్రు. ఎందనిజ్ ఇహిజ వన్ని సత్తు గొప్ప వెరిక.

11 దేవుణు సీజిని విజు అయుదమకు తోడిోగిజి తయార్ ఆజి మండ్రు. సయ్తాను అడ్డుజ ఎద్రిసి గెలస్సివందిజ్ యా లెకెండ తోడిోజి తయార్ ఆజి మండ్రు.

12 ఎందనిజ్ ఇహిజ, మాటు లోకుర్ వెట ఆవద్ ఎద్రిస్సిక. గాని సీకటుదు మని లోకుర్ ముస్సు. అతికారం కిజిని దెయమక వెట, వన్కా నెయ్కిర వెట, ఆగానమ్దు మని విజు దెయమ్కాజ్ నె మాటు ఎద్రిసినాట్.

13 అందెజి మీరు దేవుణు సీజిని విజు అయుదమకు తోడిోగిజి సయ్తానుజ్ ఎద్రిస్సిజ్ తయార్ ఆజి మండ్రు. సెజ దినమకు వానివలె, దయిరమ్దాన్ నిల్దెజ్ అట్టిదెర్. ఆకర్ దాక, మీరు దయ్ రమ్దాన్ నిల్దెదెర్.

14 అందెజి మీరు దయ్ రమ్దాన్ నిల్దెజ్ తయార్ ఆజి మండ్రు. ఒరెన్ విదెం కినికాన్ నడుముదు బెల్లు తోహా ఆజి విదెమ్దిజ్ తయార్ ఆజిని లెకెండ, దేవుణు వందిజ్ నిజమాతికెజ్ నమ్మిజి తయార్ ఆజి మండ్రు. గుండెదు కాడోఎండ మంజిని వందిజ్ ఇనుము కవనం తోడిోగిజిని లెకెండ దేవుణు ఎద్రు నీతి నిజాయతిదాన్ మంజి, సయ్తాన్ బాణిజ్ తప్రె ఆదు.

15 జారెండ నెగ్రెండ నిల్లి వందిజ్ బూట్టు. తోడిోగిని లెకెండ నమాదనం సీజిని సువార్త మాట నమ్మిజి, సయ్తానుజ్ ఎద్రిసి నెగ్రెండ నిల్దెదు.

16 యాకెజి ఆవండ, ఒరెన్ ఉద్దం కినికాన్, వన్నిజ్ వడోఇకాన్ వన్ని ముస్సు. పోక్కిని సీను బాణమ్కు డాలు అసి నప్పి ఎద్రిస్సి లెకెండ, సయ్తాను బాణిజ్ తప్రె ఆదెజ్ ఎస్తివలెబా యేసు క్రీస్తు ముస్సు. నమకం ఇడోజి నె మండ్రు.

17 బుర్దు దెబ తగ్గిఎండ మంజిని వందిజ్ గొప్ప గటి మని టోపి తోడిోగిని లెకెండ దేవుణు మిజి రక్కిన్త మనాన్ ఇజి నెసి నమ్మిజి సయ్తాన్ మిజి బాదెజ్ కిఎండ వన్ని బాణిజ్ దూరం మండ్రు. కీదు కూడం అసి తయార్ అతి లెకెండ, దేవుణు మాటదాన్ సయ్తానుజ్ ఎద్రిస్సిజ్ తయార్దాన్ మండ్రు. దేవుణు అత్తు మిజి సీజిని కూడోమనె దేవుణు మాట.

18 దేవుణు అత్తు మన్సుదు వెహ్సిన డిజిపిస్సి లెకెండ ఎస్తివలెబా పార్దనం కిదు. దేవుణు బాణిజ్ సాయం లొస్తు. మీరు ఎస్తివలెబా పార్దనం కినివలె బదకమ్దాన్ పార్దనం కిమాట్. పార్దనం డిస్మాట్. దేవుణు వందిజ్ కేట అతి లోకుర్ విజెరె వందిజ్ ఎస్తివలెబా పార్దనం కిదు.

19 నా వందిజ్బా పార్దనం కిదు. నాను వర్గిని వలె నెగ్గిమాట నా వెయిదు దేవుణు సీని లెకెండ, ఎందనిజ్ ఇహిజ, సువార్తదు ముజాలె డాజిజితి మహి. గాని ఏలు దేవుణు తోరిసి నెన్పిస్సి గొప్ప సజిజిజ్ వెల్లి తసి దయిరమ్దాన్ లోకురిజ్ తోరిస్సిజ్.

20 యా సువార్త వెహ్సాజ్, వన్ని కబ్బు తనివన్ని లెకెండ యేసుక్రీస్తు నజి ఏర్పాటు కిత్తాన్. దిని వందిజె ఏలు నాను జెలిదు మని. అందెజి నాను నెగ్రెండ దయిరమ్దాన్ వెహ్సాజ్, మని లెకెండ వెహ్సాజ్ నా వందిజ్ పార్దనం కిదు.

21 మాటు ప్రేమ కిజిని మా తంబెరి అతి తుకికు, నా వందిజ్ మిజి విజు వెహ్సాన్. నాను ఇనిక కిజన, ఎలాగ మన ఇజి మీరు నెస్సెజ్ నా వందిజ్ వాండ్రు వెహ్సాన్. వాండ్రు ప్రబు వందిజ్ నమ్మకమ్దాన్ నేవ పణి కిజినికాన్.

22 మజి జరిజిని దని వందిజ్ మిజి వెహ్సాజ్, మిజి దయిరం మాట వెహ్సా ఓదరిస్సిజ్, దిని వందిజె నాను వినిజ్ మీ డగ్రు పోక్కిన.

23 మా బుబ్బు అతి దేవుణుని మా ప్రబు అతి యేసు క్రీస్తు, తంబెరిబు అతి మీరు విజెరె, నిపాతిదాన్ మండ్రెజ్ సాయం కిపిన్. మీరు మహి వరిజి ప్రేమిసి మండ్రెజ్ క్రీస్తుజ్ నమ్మిజిని మండ్రెజ్ సాయం కిపిన్.

²⁴ కొన సిల్లెండ, మా ప్రబు ఆతి యేసు క్రీస్తుజ్ ప్రేమిన్ని విజెరిజ్ దేవుణు దయ దర్మం మనీద్.

అపొస్తుడు ఆతి పవులు పిలిపియ పట్టుమదు మని దేవుణు సజమ్దిక్ రాస్తి ఉత్త్రం నెల్వు కిబిస్సిక

అపొస్తుడు ఆతి పవులు పిలిపియ పట్టుమదు మని దేవుణుదిక్ నమ్మిత్తి వరి సజమ్దిక్ రాసిని ఉత్త్రమనె యాక. యా సజం మొదొల్స్సికాన్ పవులునె. డగ్గు పది పంటిక్ వెనుక, సువార్త వెప్పిని వందిక్ పవులు జెలిదు మహివలె, యా సజమ్దికార్ వన్నిక్ ఎత్తు కితారె, వరి లోఇ మని ఎవప్రాదితుక్ వన్నిక్ తోడుః కిని వందిక్ పొక్కినార్. పవులుక్ సాయమ్బా వన్ని వెట పొక్కినార్. వారు కితి యా నెగ్గి పణి వందిక్ వరిక్ వందనమ్కు వెప్పి రాసిని ఉత్త్రమనె యాక. నిజమాతి సర్ద యేసుక్రీస్తు బాణిజె వానాద్ ఇజి వెప్పి వరిక్ దయరం కిబిసిన్.

1 క్రీస్తు యేసు పణిమనిసి ఆతి పవులు ఇని నాను రాసిని ఉత్త్రం. క్రీస్తు యేసు పణిమనిసి ఆతి తిమోతి నా వెట మనాన్. పిలిపియ పట్టుమదు మని క్రీస్తు యేసు వెట కూడితి మని దేవుణుదిక్ కేట ఆతి విజెరిక్, మరి సజం నడిపిస్సి పార్లన, సజ పెద్దల్జ, రాసినిక.

2 బుబ్బు ఆతి దేవుణు ని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెక్ సాయం కిపిర్.

పవులు కిని పార్లనం

3 నాను ఎస్తివలెబా, మిజి ఎత్తు కినివలె, నా దేవుణుదిక్ మీ వందిక్ వందనమ్కు వెప్పిన్.

4-5 మీరు సువార్త వెంజి, నమ్మిత్తి దినందాన్ మొదొల్ని ఏలుదాక, సువార్త సాటిస్సి వందిక్ మీరు నా వెట జత కూడితి మనిదెర్. అందెజి మీ విజెరె వందిక్ నాను పార్లనం కినివలె, నాను సర్దదాన్ పార్లనం కిజన.

6 మరి, మీ మన్నుదు నెగ్గి పణి మొదొల్స్తి దేవుణు, క్రీస్తు యేసు వాని రోజుదు అయాక పూర్తి ఆనిదాక, వాండ్రు నడిపిసిని మంజినాన్. యా సజతి, నాను అనుమానం సిల్లెండ పూర్తి నమ్మిజన.

7 మిజి నాను నండొ పెమిస్సు. అందెజి మీ విజెరె వందిక్ యా లెకెండ్ నాను ఒడేబిదిక్ తగ్గికాదె. ఎందనిక్ ఇహిజ, నాను జెలిదు మనివలెబా, సువార్తదిక్ విరోదం అతికెక్ వెప్పి వరిక్ నెగ్గెండ మరజి వెప్పి, అయా సువార్త నిజం ఇజి లోకురిక్ వెప్పి తోరిస్సి వలెబా, దేవుణు నజి సీతి యా గొప్ప పణిదు మీరు విజెరె నా వెట కూడితి మనిదెర్.

8 క్రీస్తు యేసు మిజి ప్రేమిసిని వజనె, నానుబా మిజి ప్రేమిస్సు. మిజి విజెరిక్ నండొ ఎత్తు కిజన యాక నిజం ఇని దనిక్ దేవుణునె సాక్కి.

9-11 నాను ఈహునె మీ వందిక్ పార్లనం కిజన ఇనిక వాతిక్బా, మీరు ఒరెన్ మరి ఒరెన్ వన్నిక్ నెగ్గెండ లావు ప్రేమిసి మండ్రెక్ ఇజి పూర్తి నెస్సెక్ ఇజి, మరి, ఇనిక వాతిక్బా, నెగ్గెక్ ఇని ఇనికెక్, సెఇకెక్ ఇని ఇనికెక్ ఇజి మీరు పూర్తి నెస్సెక్ ఇజి నాను పార్లనం కిజన. నాను ఎందనిక్ ఈహు పార్లనం కిజన ఇహిజ, క్రీస్తు వాని రోజుదాక నెగ్గెక్ ఇనిక ఇజి టట నెసి మీరు ఇని పాపం సిల్లెండ, ఇని నింద సిల్లెండ నెగ్గెండ మండ్రెక్. మరి, యేసు క్రీస్తు నత్తుదాన్ మీ బత్తు. విజు పలితం వాని లెకెండ్ సీతి నిజయితిదాన్ మంజిని వందిక్ నాను ఈహు పార్లనం కిజన. నాను యా లెకెండ్ పార్లనం కిజన, ఎందనిక్ ఇహిజ, మీ బత్తు. నుడేజి లోకుర్ దేవుణుదిక్ గనం సీదెక్, పొగిడిదెక్.

పవులు జెలిదు మనిక సువార్త సాటి ఆని వందిక్ నెగెద్

12 తంబెరిజాండె, నజి వాతి బాదెక్ విజు, మరి నండొ లోకుర్ సువార్త విని వందిక్ పణిదిక్ వాతాద్ ఇజి మీరు నెస్సెక్ ఇజి నాను కోరిజన.

13 అందెజి, క్రీస్తు వందిక్ సువార్త వెప్పిని వందిక్నె తోహె అత మన ఇజి రాజు ఇండ్రొ మని జమనుజు విజెరెని మరి పట్టుమది లోకుర్ విజెరె ఏలు నెస్సు మనార్.

14 మరి నాను తోహా అతి మనిజ్, నమ్మిత్తి త్తంబెరిజ్జా లోఇ నండోడార్ దయరమదాన్ తియెల్ సిల్లెండ దేవుణు మాట వెప్పినార్. ఎందనిజ్ ఇహిజ, నాను జెలిదు మహివలె, ప్రబు ఎలాగ నజీ సాయం కితాన్ ఇజి వారు సుడతార్. అందెజె, వారు ప్రబు మున్ను, నండో నమకం ఇట్టా మనార్.

15-17 నిజమె, నెగొండార్ నా మున్ను, గోన ఆజినార్. గొడుబెజ్ ఆజినార్. అందెజె వారు క్రీస్తు వందిజ్ వెప్పినార్. వీరు నెగ్గి మున్నుదాన్ అవిండ, పవులు మున్ను, మాపు పెరికాన్ ఇజి పొజె ఆని వందిజ్ క్రీస్తు వందిజ్ వెప్పినార్. ఈహు కితిజ, నాను జెలిదు మనివలె, మరి నండో బాదెజ్ నజీ వానె ఇజి వారు ఒడోబిజినార్. గాని మరి నెగొండార్ నెగ్గి బుద్దిదాన్ వెప్పినార్. వీరు నజీ ప్రెమిసినార్. సువార్తదిజ్ ఎద్రిన్సి వరిజ్, మరజి వెప్పి నిజం ఇజి తోరెన్జె దేవుణు నజీ ఏరపాటు కిత మనాన్ ఇజి వీరు నెసినార్. అందెజె వీరు నెగ్గి బుద్దిదాన్ వెప్పినార్.

18 వారు నా వందిజ్ ఇనిక ఒడోబితిజ్బా, ఇనిక కిదెజ్ సుడోతిజ్బా నజీ ఇని తియెల్ సిల్లెద్. నెగ్గి బుద్దిదాన్ అతిజ్బా, సెజ బుద్దిదాన్ అతిజ్బా, ఎలాగ అతిజ్బా, క్రీస్తు వందిజ్ వెహె ఆజినె. అయోకదె ముకెలం. దని వందిజ్ నాను సరద ఆజిన.

19 మరి, సరద ఆజినె ముజిన. ఎందనిజ్ ఇహిజ, మీ పార్తనమదాన్, యేసు క్రీస్తు నజీ సీతి దేవుణు అత్తు సాయమదాన్, నజీ ఏలు వాతి యా బాదెజ్ విజు, ఆకారదు, నా విడుజదల వందిజ్ నె వాతె ఇజి నాను నెసిన.

20 నాను ఇని దని లోఇబా సిగు అవిండ మండ్రెజ్ ఇజినె నాను నండో ఎద్దు సుడోజి ఆస ఆనిక. గాని ఎస్తివలెబా నాను కితి లెకెండ, ఏలుబా నండో దయరమదాన్ క్రీస్తు గొప్ప పెరికాన్ ఇజి తోరిన్ను. ఎందనిజ్ ఇహిజ, నాను సాతిజ్బా, బత్తితిజ్బా క్రీస్తు గొప్ప పెరికాన్ ఇజి నాను కిజిని విజు పణిజాణిజ్ నాను తోరిన్ను.

21 అందెజె నాను బత్తిజిన ఇహిజ క్రీస్తు వందిజె. నాను సాతిజ నజీ లాబం. ఎందనిజ్ ఇహిజ, అయావలె నాను క్రీస్తు వెటెనె ముజినలె.

22-23 గాని నాను బత్తిజి మహిజ, క్రీస్తు వందిజ్ పలితం వాని పణి కిదెజ్ అట్టు. అయావలె ఇనిక నాను కోరిదెజ్? సాదెజ్నా, బత్తిదెజ్నా? నాను నెనెవ. నాను రుండి వన్యాజ్ గుపె ఆజిన. యా లోకం డిసి క్రీస్తు వెటె మండ్రెజ్ ఇజినె నా ఆస. ఎందనిజ్ ఇహిజ అయోకదె నజీ ఒదె నెగెద్.

24-25 గాని నాను బత్తిజినక, మిజి గొప్ప అవుసరం. యాక నాను పూర్తి నెసిన. అందెజె, నాను ముజి మీ విజెరె వెటె కూడోజి మండ్రెజ్ వలె ఇజి నెసిన. ఎందనిజ్ ఇహిజ, అయావలె, మీరు క్రీస్తుజ్ నెగ్గెండ నమ్మిజి మండ్రెజ్ సాయం కిని వందిజ్ నాను అట్టు. అయాలెకెండ మీరు నెగ్గెండ నమ్మిజినెజ్ మీరు సరద ఆనిదెర్.

26 అందెజె, నాను మీ వెటె మరి కూడ్తివలె, క్రీస్తు మరి నజీ మీ నడిమి తప్పిస్తాన్ ఇని దని వందిజ్ క్రీస్తుయేసుజ్ పొగిడినిదెర్లె.

27 ఇనిక అతిజ్బా, క్రీస్తు వందిజ్ వెప్పిని సువార్తదు మని దనిజ్ తగ్గి వజ నడిదు. ఎందనిజ్ ఇహిజ, నాను మీ డగ్గు వాజి, మిజి సుడోతిజ్బా, సిలిజ రెంపెండ మీ వందిజ్ వెహెజ్బా, మీరు విజెదెరె సువార్తదు వెప్పిని నమకం వందిజ్ ఉండ్రె మున్ను కల్లిజి ఉండ్రె ఉదెనమదాన్ ఉండ్రె ఆజి నెగ్గెండ నిల్పిదెర్లె ఇజి నాను నెస్సాలె.

28 మరి, మిజి ఎద్రిన్సి వరిజ్, ఇని దని లోఇ మీరు తియెల్ ఆజెదెర్ ఇజి నాను నెస్సాలె. యాక దేవుణు వరిజ్ నాసనం కిసాన్ ఇని దనిజ్ నెగ్గి రుజుప్ ఆనాద్. గాని దేవుణు మిజి ఎల్లకాలం రక్సిన్నానెలె ఇని దనిజ్బా రుజుప్ ఆనాద్. దేవుణునె యాకెజ్ విజు కిసాన్.

29 క్రీస్తుజ్ నమ్మిదెజ్నె అవిండ, వన్ని వందిజ్ కన్ఘమకు ఓరిస్సెజ్బా దేవుణు మిజి అక్కు సిత మనాన్.

30 అందెజె సువార్తదిజ్ విరోదం అతికెజ్ వెప్పివరిజ్ ఎద్రిస్సెజ్ కన్ఘబడిజి దనిజ్ మాటు ఉండ్రె ఆతాల్. నాను ముజాలె, పిలిప్పీయదు మహివలె ఎద్రిస్సెజ్ కన్ఘబడితిక మీరు సుడోతిదెర్. ఏలుబా కన్ఘబడిజినక వెంజెనిదెర్.

2

1 క్రీస్తు వెటె కూడితి మనిజ్, మీ బత్తుదు దయరం మనాద్ గదె? క్రీస్తు మిజి ప్రేమినిని ప్రేమదాన్ మిజి నిపాతి కల్లిత మనాద్ గదె? దేవుణు అత్తు వెటె మిజి నమందం మనాద్ గదె? క్రీస్తు మీ వందిజ్ పాణం నొత

మనాన్ గదె?

2 ఆహా మహిజ, మీరు ఉండ్రె లెకెండ ఒడోబిజి, ఒరెన్ మరి ఒరెన్ వన్నిజ్ ప్రేమిసి, ఉండ్రె మన్నుదాన్, ఉండ్రె ఉదెనమదాన్ మంజి, నా నరద పూర్తి కిదు.

3 సొంత ఇస్టం వందిజ్ ఆవిండ, కితి దని వందిజ్ నాను కిత ఇజి పొజె ఆవిండ, ఇనికలా కిదెజ్ గాని, మహికార్ నజీ ఇంక పెరికార్ ఇజి ఒడోబిజి, తగిజి మండ్రెజ్.

4 మీ లొఇ విజిదెరెబా, మీ సొంత పణిజె తొవిండ, మహి వరిజ్ సాయం కిదెజ్ బా నుడోదెజ్ వలె.

5 క్రీస్తుయేనుజ్ మహి యా మన్నునె మిజిబా మండ్రెజ్.

6 వాండ్రు ఎస్తివలెబా దేవుణు ననికాన్ ఆతిజ్ బా, దేవుణు వెట సమానం ఆతికాన్ ఇజి, అయా అక్కు మండ్రెజ్ వలె ఇజి పటుతల కివతాన్.

7 గాని వాండ్రు వన్ని మన్నుదాన్, అయాక విజి డిస్తాండ్రె, ఒరెన్ పణి కిని వన్ని లెకెండ ఒడోబిజి, లోకు ఆతాన్.

8 వాండ్రు ఒరెన్ లోకు ఆతండ్రె, వన్నిజ్ వాండ్రె తగి ఆతాన్. వాండ్రు దేవుణుదిజ్ లోజితాండ్రె, సాదెజ్ బా వన్నిజ్ వాండ్రె ఒపజెవె ఆతాన్. గొప్ప సిగుదాన్ కూడితి మని సిలువారు సాని సాపు సాదెజ్ బా వన్నిజ్ వాండ్రె ఒపజెవె ఆతాన్.

9 అందెజి దేవుణు వన్నిజ్ గొప్ప పెరికాన్ కితాండ్రె, మహి విజి పెర్కు మున్ను గొప్ప పేరు సితాన్.

10-11 దేవుణు యా లెకెండనితాన్. ఎందనిజ్ ఇహిజ, వరలోకమదు మనికెజ్ విజి, బూమి మున్ను మనికెజ్ విజి సాతికారని మరి తోరెకెజ్ విజి యేను పేరుదు ముణుకుజ్ ఊరెజి మాడిసెజ్. విజి యేనుక్రీస్తు ప్రబు ఇజి వరి వెయదాన్ ఒప్పుకొండెజ్. అయ లెకెండ బుబ్బు ఆతి దేవుణుదిజ్ గొప్ప గనం సీజినార్.

12 అందెజి నాను ప్రేమిసినికిదెరా, దేవుణు రక్తిస్తి లోకుర్ కిదెజ్ తగ్గి పణిజ్, మీ లొఇ ఒరెన్ ఒరెన్ తియెల్దాన్ వణుకుదాన్ కిదెజ్ నండో కస్టపడిదెజ్. ఎస్తివలెబా, మీరు నా మాట వెంజి లోజితిదెర్. నాను మీ వెట మనివలెనె ఆవిండ, మీ వెట ఏలు సిలివలె, మరి ఒదె అయాక కిదెజ్ కస్టబాడిసె.

13 మీరు అయాక కిదెజ్ అట్టిదెర్. ఎందనిజ్ ఇహిజ, దేవుణుదిజ్ ఇస్టం కితి పణిజ్, కిదెజ్ ఇజి మీ లొఇ ఆస పుణిస్సికాన్ దేవుణునె. అయాక కిదెజ్ సాయం కినికాన్ బా దేవుణునె.

14-15 మీరు విజి పణిజ్, ఒరెన్ వన్నిజ్ మొరొ ఆవిండ, జటిజ్ ఆవిండ కిదెజ్. ఎందనిజ్ ఇహిజ, మీరు మూర్కమది వరి నడిమి, సెజవరి నడిమి బత్తినివలె, నిందెజ్ సిల్లెండ, పాపం సిల్లెండ, ఇని తప్ప సిలి దేవుణు కొడోర ఇజి తోరె ఆదెజ్. మీరు నని వరి నడిమి మంజి, బత్తు సీని మాట మీరు నెన్పిస్తివలె, ఆగాసమదు నుక్కెజ్ ఎలాగ జాయ సీజినానో, అయా లెకెండ మీరుబా మనిదెర్.

16 మీరు యా లెకెండ మహిజ, క్రీస్తు వాని దినమదు నాను గెలస్తి వన్నిలెకెండ నరద ఆదెజ్ అట్టు. ఎందనిజ్ ఇహిజ, నాను మీ నడిమి కస్ట బాడిజి కితి పణి, ఎందనిజ్ పణిదిజ్ రెవిండ ఆవతాద్ ఇజి మీ బత్తు రుజుప్ కినాద్.

17 మీరు నువార్త నమ్మిత్తివలె, మీ బత్తు దేవుణుదిజ్ సితిదెర్. ఒరెన్ పుజెరి, దేవుణుదిజ్ పూజి సీనివలె, పూజి సీని దని మున్ను ద్రాక్కు పట్టు రసం వాక్తి లెకెండ, రోమ అతికారిజు నజీ నప్పిజ, నా నల మీ పూజి మున్ను వాక్తి లెకెండ ఆనాద్. అయ లెకెండ జరితిజ, నాను నరద ఆజిన. మీ విజెరె వెట నరద ఆజిన.

18 అయాలెకెండ మీరు విజిదెరెబా నా వెట నండో నరద ఆదు.

తిమోతిని ఎవప్రాదితు

19 తిమోతిజ్ మీ డగ్గు బేగి పోకెజ్ ప్రబు ఆతి యేను నజీ తప్ఎండ సాయం కినాన్ ఇజి నాను ఆస ఆజిన. వాండ్రు నా వందిజ్ వెప్పి, మిజి నరద కిబిస్సాన్. అయ లెకెండ వాండ్రు మరెజి వాజి మీ వందిజ్ వెప్పిజ, నాను నరద ఆస. అందెజి తిమోతిజ్ మీ డగ్గు బేగి పోక్కిన.

20 మీరు నెగ్గెండ మండ్రెజ్ ఇజి నిజం ఆస ఆజనికాన్ వీండ్రె. మీ వందిజ్ వినిజ్ మని ఆస ననికాన్ మరి ఎయెన్ బా నా డగ్గు సిలెన్.

21 మహికార్ విజెరె, వరిజ్ ఇన్ఱం ఆతి సొంత పణిజె నుడఃజినార్. గాని యేసు క్రీస్తుజ్ ఇన్ఱం ఆతికెజ్ తోవర్.

22 గాని, తిమోతి నమ్మకమదాన్ ప్రబుజ్ సేవ కిజి నెగ్గికాన్ ఇజి రుజువ్ కితిక మీరు నెస్సిదెర్. అప్పొసి వెట మరిసి ఎలాగ కూడ్డి పణి కినాండ్రొ, అయాలెకెండ సువార్త నండొ లోకుర్ విని వందిజ్ నా వెట కూడ్డి సాటిస్తాన్.

23 అందెజె, ఇబ్బె నజీ జగ్గిదెజ్ మనిక ఎలాగ జగ్గినాద్ ఇజి నెస్సిజ, వెటనె నాను వినిజ్ మీ డగ్రు పోక్తెజ్ ఇజి నాను ఆస ఆజిన.

24 నానుబా బేగి మీ డగ్రు వాదెజ్ ప్రబు నజీ తవ్వెండ సాయం కినాన్ ఇజి నాను నమ్మిజిన.

25 ఏవప్రాదితుజ్ మీ డగ్రు మరజి పోక్తెజ్ వలె ఇజి నాను బాగ ఎత్తు కిజిన. వాండ్రు నా తంబెరి ననికాన్. నా వెట జత కూడఃజి పణి కినికాన్. క్రీస్తు వందిజ్ నా వెట కూడఃజి నండొ కన్ఱబాడిఃజినాన్. నజీ అవ్వసరం మనివలె తోడః మంజి సాయం కిదెజ్ మీరు నా డగ్రు పోక్తికాన్.

26 నాను వన్నిజ్ మీ డగ్రు మరజి పోక్తిన. ఎందనిజ్ ఇహిజ, వాండ్రు మిజీ విజెరిజ్ నండొ ఎత్తు కిజినాన్. వన్నిజ్ జబ్బు వాతాద్ ఇని మాట మీరు విహిదెర్ ఇజి నెస్తాండ్రె, మీరు వెహిదెర్ ఇజి నండొ బాద ఆజినాన్.

27 నిజమె, వాండ్రు నండొ కన్ఱం అర్చి సాపు బత్తు ఆతాన్. గాని దేవుణు వన్ని మున్ఱు కనికారం తోరిస్తాన్. వన్నిజె ఆవెండ, నా మున్ఱు బా కనికారం తోరిస్తాన్. వన్ని జబ్బు వందిజ్ దుకం ఆతి దని మున్ఱు వన్ని సాపు వందిజ్ బా దుకం ఆవెండ మంజిని వందిజ్ నా మున్ఱు కనికారం తోరిస్తాన్. వన్నిజ్ నెగ్గెణ్ కితాన్

28 అందెజె, మీరు వన్నిజ్ మరి నుడఃజి నరద ఆని వందిజ్, నజీ మని దుకం తకు ఆని వందిజ్ గజి బిజి పోక్తెజ్ ఇజి ఒదె ఆస ఆజిన.

29-30 అందెజె, ప్రబు వెట కూడిఃజి మని వినిజ్ నండొ సరదదాన్ డగ్రు కిదు. వాండ్రు క్రీస్తుజ్ సేవ కిని వందిజ్ సాపు బత్తు ఆతాన్. మీరు నా వందిజ్ కిదెజ్ అట్ ఇతి సాయం కిదెజ్, వాండ్రు వన్ని పాణం సిదెజ్ బా గునె ఆవెండ కితాన్. అందెజె వినిజ్ గవ్వరం సిదు. విని నని వరిజ్ బా గవ్వరం సిదు.

3

1 ఆకార్దు, నా తంబెరిజాండె, ప్రబు వెట మీరు కూడిఃజి మనిదెర్. అందెజె, మీరు సరద ఆజిన మండ్రు. నాను ముజాలె నెగెండార్ నెఇ వరి వందిజ్ వెస్తా మన. అయో సజతిజ్ నె మరి మరి రాస్తిజ్ బా నాను వంద్. అయక మిజి మెనిం కిని వరి బాణిజ్ తప్తిస్తాద్.

2 వెరి నుకుడిఃజి పోలితి వరి వరిజ్ జాగ్రత మండ్రు. వారు నండొ సెఇ పణిజ్ కినికార్. దేవుణుదిజ్ నమ్మితి లోకు ఆని వందిజ్ మెగ్కోడొర్ సునతి కిబె ఆదెజ్ వలె ఇజి వారు కనితం వెహిస్తాన్. అయక నిజం ఆవెద్. వారు పణిదిజ్ రెవెండ ఒడొఃల్ కొయ్జినార్. అందెజె వరి వందిజ్ జాగ్రత మండ్రు.

3 నాను ఆహె వెహిన్. ఎందనిజ్ ఇహిజ, నిజమాతి సునతి కిబె అతికాల్ మాట. వారు ఆవెర్. ఇహిజ, దేవుణుదిజ్ నిజమాతి లోకుర్ మాట. దేవుణు ఆత్మదాన్ నె, మాటు దేవుణుదిజ్ పొగిడిఃజి మాడిఃసినాల్. క్రీస్తు యేసు మా వందిజ్ కితి దని వందిజ్ సరద ఆజినాల్. సునతి మున్ఱు ఆవెద్, మా నమకం సునతి కితిజ, దేవుణు కొడొర్ ఆదెజ్ ఆనాద్ ఇజి నమ్మివెట్.

4 అహిజ, యో లెకెండొ మని సజతిజ మున్ఱు ఒరెన్ వన్నిజ్ నమకం ఇడెదెజ్ ఆనాద్ ఇహిజ, మహి వరిజ్ ఇంక నండొ వెస్తాజె అట్టికాన్ నానె. దేవుణు కొడొః ఆదెజ్ యో లెకెండొ మని సజతిజ కిదెజ్ ఆనాద్ ఇజి ఎయెన్ బా ఒడొఃబితిజ, వన్ని మున్ఱు మరి ఒదె వెస్తాజె అట్టికాన్ నానె.

5 ఎందనిజ్ ఇహిజ, నాను పుట్టి ఎనిమిది రోస్కాజె నజీ సునతి కిత్తార్. నాను ఇస్తావెలు జాతిదిదు మని బెనియమిను తెగ్గెదు పుట్టికాన్. నా అనిగొగొర్ విజెరె ఎబ్రివారు. నానుబా పూర్తి ఎబ్రి వాండ్రునె. నాను పరిసయ వాండ్రు. దేవుణు మోసెజ్ సీతి రూలుజ్ నాను పూర్తి లోజిత.

6 యో లెకెండొ కినిక దేవుణుదిజ్ ఇన్ఱం అతికాదెను ఇజి ఒడిఃబిజ, క్రీస్తు మున్ఱు నమకం ఇట్టి వరిజ్ నాను నండొ బాదెజ్ కితికాన్. మోసెజ్ సీతి రూలుజ లోజెజ, ఒరెన్, సీతి నిజాయితి మనికాన్ ఇజి తోర్ ఆదెజ్ అట్టిజ, వన్ని లెకెండొ నానుబా తోర్ ఆదెజ్ అట్టు. ఎందనిజ్ ఇహిజ, రూలుజ లోఇ ఇనికబా తవ్వెత.

7 నజీ లాబం వానిక ఇజ ఒడిబితి యా నజతిజ్ విజు, పణిదిజ్ రెఇక ఇజ నాను డిస్త సిత. క్రీస్తుజ్ నెన్ని వందిజె డిస్త సిత.

8-9 అయాకదె ఆవండ, నాను ముజాలె కిజ మహి విజు నజతిజ్ పణిదిజ్ రెఇక ఇజ నాను ఒడిబిజన. క్రీస్తు యేసుజ్ నెనినికాదె విజు వన్యా మున్కు గొప్ప విలువ మనిక. క్రీస్తు యేసుజ్ నెన్ని వందిజె యా సజతిజ్ విజు పణిదిజ్ రెఇక ఇజ డిస్త సిత. నాను క్రీస్తు వెట కూడజి మంజిని వందిజ్, మరి, నాను పూర్తి క్రీస్తుయేసు వాండ్రు ఆని వందిజ్ నాను అయాకెజ్ విజు గుమమ్ది కసర ఇజ నాను ఒడిబిజన. దేవుణు మోసాజ్ సీతి రూలుదు మనికెజ్ లోజిజినిజ్ ఆవద్ నాను సీతి నిజాయితి మనికాన్ ఆతిక. నాను క్రీస్తుయేసు మున్కు నమకం ఇడజ్నె, దేవుణు నజీ సీతి నిజాయితి మనికాన్ ఇజ కూకాన్.

10-11 నాను క్రీస్తుజ్ పూర్తి నెన్నెజ్ ఇజనె నాను మరి మరి కోరిజన. ముకెలం, వాండ్రు సాపుదాన్ నిజీతి వలె, దేవుణు వన్నిజ్ సీతి సత్తు నజీబా కావాలి ఇజ నాను కోరిజన. వాండ్రు నా వందిజ్ కస్టమ్కు ఓరిస్తి లెకెండ్ నాను వన్నివందిజ్ కస్టమ్కు ఓరిస్తి వన్ని వెట కూడజి మండ్రెజ్ ఇజ నాను కోరిజన. వాండ్రు నా వందిజ్ సాతి లెకెండ్ నాను వన్ని వందిజ్ సాదెజ్ ఇజ కోరిజన. నాను సాతి వెనక మరజ్ బత్కిని బత్కు ఎలాగబా నజీ దోహిద్ ఇజనె నాను అయా లెకెండ్ కోరిజన.

12 నాను క్రీస్తు లెకెండ్ పూర్తి ఆత ఇజ నాను వెహె. ఇహిజ, దేవుణుదిజ్ ఇష్టం ఆతి వజ నాను పూర్తి ఆతమన ఇజ వెహె. గాని క్రీస్తుయేసు నజీ కూక్తివలె, నాను ఎలాగ మండ్రెజ్ ఇజ వాండ్రు కోరిత మనాండ్రె, దని వందిజ్ నాను కస్టబడిజన.

13 తంబెరిజాండె, క్రీస్తు లెకెండ్ నాను పూర్తి ఆత ఇజ నాను వెహె. గాని ఉండ్రీ సజతి నాను కిజన. నాను ముజాలె కిజ మహి వన్యాజ్ పోసి, నాను బత్కిజిని బత్కు అంతు క్రీస్తు లెకెండ్ మండ్రెజ్ ఇజ నాను నుడజి కస్టబడిజన.

14 అందెజె దేవుణు నజీ పరలోకమ్దు కూక్కి సీని ఇనాయం లోన్ని నా గురి వందిజ్, నాను కస్ట బాడిజన. ఎందనిజ్ ఇహిజ, క్రీస్తుయేసు మున్కు నాను నమకం ఇట్టా మన.

15 అందెజె, నమకమ్దు పూర్తి పిరితి మాటు విజెట్, ముజాలె వెహి వజ మండ్రెజ్ ఇజ, ఉండ్రె మన్కు మండ్రెజ్. గాని ముజాలె వెహి ఇని దని లోఇబా మిజి మరి ఉండ్రీ మన్కు మహిజ, దేవుణు అయాకబా మిజి వెహి తోరిస్తాన్.

16 దేవుణు మిజి వెహి తోరిస్తి వజ మాటు మండ్రెజ్ ఇనికాదె ముకెలం ఆతిక.

17 తంబెరిజాండె, మీరు విజెదెరె, నజీ నుడజి నడిదు. మాపు నడితి వజ నడిజిని వరిజ్ నుడజి మీరు నడిదు.

18 ఎందనిజ్ ఇహిజ, నండొండార్ నమ్మిత్రికావ్ ఇజ వెహె ఆనికార్, క్రీస్తు సిలువారు సాతి ఉదెనమ్దిజ్ పడిఎండ మనార్ ఇజ వరి బత్కుదాన్ తోరిసినాద్. నిని వరి వందిజ్ నాను ముజాలె మిజి నండొ సుట్కు వెహి మన. ఏలు వరి వందిజ్ నాను వెహి వలె, అడజిబిజనె వెహిన్.

19 దేవుణు వరిజ్ నానం కినాన్. వారు ఒడొలది ఆన వందిజె బత్కిజినార్. దేవుణుదిజ్ సర్గ కిబిస్తెజ్ బత్కివెర్. సిగు తపిస్సి పణిజె వారు కిజినార్. వన్యా లోఇనె సరద ఆజినార్. యా లోకమ్ది పణి కిదెజె వారు ఎత్తు కినార్.

20 గాని మాటు పరలోకమ్దు మనికాల్. అబెణిజ్ వాని, మజి రక్కిస్సి వన్నిజ్ మాటు ఎర్దు నుడజినాల్. వాండ్రు ప్రబు ఆతి యేసు క్రీస్తు.

21 వాండ్రు మరజి వానివలె, మా సత్తు సీతి సబజి సాని ఒడొలదిజ్, వన్ని సత్తు మని సబజి ఒడొలది లెకెండ్ కినాన్. విజు వన్యాజ్ అతికారం కిని వన్ని గొప్ప సత్తుదాన్, వాండ్రు యా లెకెండ్ మా ఒడొలదిజ్ కినాన్.

4

1 అందెజె నా తంబెరిజాండె, ముజాలె నాను నెన్పిస్తి దని వజ మీరు ప్రబు మున్కు మని నమకం డిస్ఎండనె మండ్రు. మీరు నా లెకెండ్ దేవుణుదిజ్ నమ్మిత్రికిదెరె. మీరు నజీ నండొ ఇష్టం ఆతికిదెరె. మీ వెట మండ్రెజ్ నాను నండొ ఆన ఆజన. మీరె నజీ నండొ సరద కిబిస్సికిదెరె, నజీ నెగ్గి పేరు తపిస్సికిదెరె.

2 ఓ యువోదయ సుంతుకె మీరు కూడఃజి పాడఃజి మండ్రు ఇజి నాను మిజి బతిమాల్లిన. ఎందనిజ్ ఇహిజ, మీరు ప్రబు లోకు.

3 మరి, నా వెట నేవ పణి కినికి, నీను నమ్మిదెజ్ తగ్గికి. నీను యా బొదెక్ కూడఃజి పాడఃజి మంజిని లెకెండె వెవాల ఇజి నాను నిజి వెప్పిన. ఎందనిజ్ ఇహిజ, క్రీస్తు వందిజ్ సువార్త సాటిస్తెజ్ నా వెట నండొ కస్తబాడితె. మరి, కైమెంతు వెట, నా వెట జత పణి కిని మహి వరి వెటబా కూడఃజి సువార్త సాటిస్తెజ్ అవికు నండొ కస్తబాడితె. ఎలాకాలం దేవుణు వెట బత్కిని వరి పేర్కు రాసి ఇడ్డిని పుస్తకమదు వాండ్రు వన్యా పేర్కు రాస్తు మనాన్.

4 ఎస్తివలెబా మీరు సరద ఆదు. ఎందనిజ్ ఇహిజ, మీరు ప్రబు లోకుర్. నాను మరిబా వెప్పిన, సరద ఆదు.

5 మీరు విజెరె వెట సార్లిదాన్ మంజిన ఇజి తోరిన్అ. ప్రబు బేగి వానాన్ ఇజి పోస్సాల్

6 ఇని దని వందిజ్బా విసారిస్సాల్. గాని ఎలాగ మర్రి సమయమదుబా, మహిజ్బా, సిలిజ్బా, దేవుణుదిజ్ పార్దనం కిదెజ్. మిజి మని అవ్సరమకు వన్నిజ్ వెవ్వాజ్. వన్ని సాయం మీరు లొస్తెజ్. వన్నిజ్ ఎస్తివలెబా వందనమకు వెవ్వాజ్.

7 అయావలె, దేవుణు వన్ని సమాదనం మీ మన్నుదు, మీ గర్భమదు మిజి కాపాడఃదెజ్ సీనాన్. ఎందనిజ్ ఇహిజ, మీరు క్రీస్తు యేసు వెట కూడితి మనికిదెర్. యా సమాదనం లోకుర్ అర్దం కిదెజ్ అభిఇక.

8 నా తంబెరిజాండె, ఆకార్దు, నాను ఉండ్రీ వెప్పిన. మీరు ఈహు ఒడిబిజి మండ్రెజ్ ఇజి నాను వెప్పిన. నిజమాతి వన్యాజ్, లోకుర్ గవరం సీదెజ్ తగ్గి వన్యాజ్, నాయం మని వన్యాజ్, పాపం సిలి వన్యాజ్, లోకుర్ ఇష్టం కిదెజ్ తగ్గి వన్యాజ్, గొప్ప పేరు తపిన్ని వన్యాజ్, లోకుర్ పొగిడిసి వన్యాజ్ మీరు ఒడిబిజి మండ్రు.

9 మరి నాను మిజి నెన్పిస్తికెజ్, మీరు నమ్మిత్తికెజ్, కిజినె మండ్రు. నా బాణిజ్ మీరు విహికెజ్, నాను కిజినెకెజ్ మీరు సుడఃతికెజ్ కిజినె మండ్రు. అయావలె, సమాదనం మిజి సీజిని దేవుణు మిజి తోడః మంజినాన్.

నజి సీజిని సాయం వందిజ్ వందనమకు

10 సగం రోస్సు డిస్సిదెర్, నజి ఎత్తు కిజినావ్ ఇజి ఏలు మీరు తోరిస్సి వందిజ్ నాను ప్రబుజ్ సరద ఆజి వందనమకు వెప్పిన. మీరు ఎస్తివలెబా నజి ఎత్తు కిజినె మహిదెర్ ఇజి నాను నెన్పు. గాని నజి సాయం కిజి ఎత్తు కిజినావ్ ఇజి మిజి తోరిస్సిజ్ అవకాసం దొవ్వావతాద్.

11 నజి అవ్సరం మనిజ్ ఇజి ఆవద్ యా లెకెండె వెప్పనిక. ఎలాగ మర్రి సమయమదుబా నజి మనికాదె సాలు ఇజి సరి కిదెజ్ నెన్పు మన.

12 ఇహిజ, నజి కావాలస్తికెజ్ విజు సిలితివలె ఎలాగ మండ్రెజ్ ఇజి నాను నెసిన్. నండొ మనివలె ఎలాగ మండ్రెజ్ ఇజిబా నాను నెసిన్. ఎలాగ మర్రి సమయమదుబా సరి కిబె ఆదెజ్ నాను నెన్పు మన. పొట పంజితి వలెబా, బజ కట్టిని వలెబా, నండొ మనివలెబా, ఇనిక సిలివలెబా సరి కిబె ఆదెజ్ నాను నెన్పు మన.

13 యా లెకెండె సరి కిబె ఆదెజ్ విజు నాను అటసిన. ఎందనిజ్ ఇహిజ, క్రీస్తు నజి సత్తు సీజినాన్.

14 అహిజ్బా, ఏలు యా లెకెండె నాను కస్తమదు మనివలె, మీరు నజి సాయం కితిదెర్. నెగ్గి పణినె కితిదెర్.

15 పిలిప్పియదు మని నమ్మిత్తికిదెరా, మీరు నెస్సిదెర్ నాను సువార్త వెవ్వాజ్ మొదొల్ని తొలి రోస్సాజ్, నాను మనిదొనియ రాస్త్రం డిస్సి వాతివలె, మీ సజమదికిదెర్ నజి సీతిదెర్, నా బాణిజ్ లొన్ ఆతిదెర్. మరి ఎమేణి సజమదికొరబా సివతార్.

16 మరి నాను తెసెలొనికయ పట్టమదు మహివలెబా నజి అవ్సరం మహివలె మీరు ఉండ్రీ సుటునె ఆవందె నండొ సుట్టు డబ్బు పోక్తిదెర్.

17 మీరు యా లెకెండె మరి డబ్బు పోక్తెజ్ ఇజి నాను ఆస ఆజి వెవ్ఎ. గాని మీరు యా లెకెండె సీతి దనిజ్ దేవుణు మిజి నండొ దీవిన్పిన ఇజినె ఆస ఆజిన.

18 ఏలు నజి సరి ఆని ససా మనాద్. మరి నండొబా మనాద్. మీరు ఎవప్రాదితు వెట పోక్తికెజ్ వాండ్రు తత సితాన్. అందెజ్ ఒదె నండొ మనాద్. మీరు నజి సీతిక, దేవుణుదిజ్ సీజిని వాసనం మని పూజ లెకెండె మనాద్. వాండ్రు దని వెట సరద అతండ్రె డగ్గు కితాన్.

19 మరి, నా దేవుణు, మీ అవసరం విజు తీరిస్తాన్. లెక్క సిల్లి వన్ని నండో ఆస్తిదాన్ మాటు బమ్మ ఆని లెకెండ్ తీరిస్తాన్. ఎండనిజ్ ఇహిజు, క్రీస్తు యేసు వెట కూడితి మనికిదెర్.

20 మా బుబ్బ ఆతి దేవుణుదిజ్ అంతు సిల్లెండ ఎల్లకాలం గవరం మనిద్. ఆమెన్.

21 క్రీస్తుయేసు మున్కు నమకం ఇట్టి దేవుణు లోకుర్ ఆతి విజెరిజ్ నాను వెన్బాతి లెకెండ్ వెచ్చు. నా వెట మని తంబెర్జు మిజి వెన్బాతి లెకెండ్ వెప్పినార్.

22 ఇబ్బె మని దేవుణు లోకుర్ విజెరె, ముకెలం కయనరు రాజు ఇంత్తొ పణి కిజిని నమ్మిత్తికార్ మిజి వెన్బాతి లెకెండ్ వెప్పినార్.

23 ప్రబు ఆతి యేసు క్రీస్తు దయా దర్మం మిజి తోడు మనిద్. ఆమెన్.

అపొస్తుడు ఆతి పవులు కొలోసు పట్టుమీదు మని దేవుణు సజమేదిళ్ రాస్తి ఉత్తం నెల్య కిబిస్సిక

అపొస్తుడు ఆతి పవులు కొలోసి పట్టుమీదు మని దేవుణు సజమేదిళ్ రాసిని ఉత్తమనె యాక. వాండ్రు రోమ జెలిదు పొకె ఆతి వహివలె రాస్తికాదె. పవులు ఎనెజ్బా కొలోసి పట్టుమీదు సాన్ఎతాన్. వాండ్రు దేవుణు దరోట్ నడిఃపిస్తి ఎపవ్రాదితునె యా పట్టుమీదు దేవుణు సజం మొదోల్స్తాన్.

యా లోకమీదు మని దేవుణుదిళ్ నమ్మిత్తికార్ విజేరె కూడిఃతి మని సజమేదిళ్ బుర లెకెండ క్రీస్తు మనాన్. వన్ను ఒడోల్ దేవుణు సజం. వాండ్రు విజు వన్యాజ్ ముజాలె మనికాన్. విజు తయార కితికాన్ వాండ్రె. విజు అతికారమక మున్ను అతికారం మనికాన్ వాండ్రె ఇజి ఎత్తు కిబిసి రాసికాన్.

నమ్మిత్తికార్ యా లోకమీది సజతిజ మున్ను మన్ను ఇడఃఎండ, పరలోకమీదు మని సజతిజ మున్ను మన్ను ఇడదెజ ఇజి వెహిసాన్. నమ్మిత్తికార్ ఎలాగ నడిఃదెజ్ ఇజిబా యా ఉత్తమీదు రాసి వెహిసాన్.

1-2 క్రీస్తు యేసు వందిళ్ అపొస్తుడు ఆతి పవులు ఇని నానుని, మా తంబెరె ఆతి తిమోతి కొలోసి పట్టుమీదు మని దేవుణు వందిళ్ కేట ఆతి వరిళ్ రాసిని ఉత్తం. దేవుణు ఎత్తు కితి వజనె నాను క్రీస్తు యేసు వందిళ్ అపొస్తుడు ఆత. మీరు నమ్మిదెజ్ తగ్గి తంబెరిజు. మా బుబ్బు ఆతి దేవుణు దయ దర్మమీదాన్, మీరు నిపాతిదాన్ మండ్రెజ్ సాయం కిసిన్.

3 మాపు మీ వందిళ్ ఒడఃబిజి పార్లనం కినివలె, ఎస్తివలెబా మా ప్రబు ఆతి యేసుక్రీస్తుజ్ బుబ్బు ఆతి దేవుణుదిళ్ వందనమక వెహిసాన్.

4 ఎందనిళ్ ఇహిజ, మీరు క్రీస్తు యేసుజ్ నమ్మిజినిదెరె ఇజి, దేవుణు వందిళ్ కేట ఆతి లోకుర విజెరిళ్ ప్రేమికినిదెరె ఇజి మాపు వెహి మనాన్.

5 మీరు యా లెకెండ, క్రీస్తుయేసుజ్ నమ్మిజినిదెరె, దేవుణు వందిళ్ కేట ఆతి లోకురిళ్ విజెరిళ్ ప్రేమికినిదెరె. ఎందనిళ్ ఇహిజ, నిజమాతి బోద, ఇహిజ, సువార్త మీరు వెహివలె, దేవుణు పరలోకమీదు మీ వందిళ్ ఇడ్డి మని దని వందిళ్ ముజాలె మీరు వెహి మనిదెరె. అయాక తవ్వంండ దోహ్కాద్ ఇజి దని వందిళ్ ఆనదాన్ ఎద్దు సుడఃజినిదెరె.

6-7 లోకమీది నండ్ దేసమకాజ్ యా సువార్త వెహి ఆతి లెకెండ, మీ నడిఃమిబా వెహి ఆత మనాద్. మీరు అయాక వెంజి దేవుణు దయ దర్మం నిజం ఇజి నెస్తి బాణిజ్ అసి మీ నడిఃమి అయా సువార్త నెగ్గి పణి కిజినాద్. మీ నడిఃమి అయా సువార్త నెగ్గి పణికిజిని లెకెండ మహి లోకురిళ్బా నెగ్గి పణి కిబిస్సాద్. మరి, నండ్ నండ్ లోకుర సువార్త నమ్మిజినార. ఎపవ్రానె మిజి సువార్త నెన్పిస్తాన్. మాపు వన్నిజ్ ప్రేమిస్సామ్. మజి బదులు వాండ్రు క్రీస్తుజ్ అబె నేవ కిజినాన్. మీ మేలు వందిళ్ నమకమీదాన్ వాండ్రు క్రీస్తుజ్ నేవ కిజినాన్.

8 దేవుణు ఆత్మ మీ లోఇ పుటిస్తి ప్రేమదాన్, మీరు దేవుణు వందిళ్ కేట ఆతి లోకుర విజెరిళ్ ప్రేమికినిదెరె ఇజిబా వాండ్రు మజి వెప్తా మనాన్.

9 అందెజ, మీ వందిళ్ వెహి బాణిజ్ అసి, డిన్ఎండ ఎస్తివలెబా మీ వందిళ్ దేవుణుదిళ్ పార్లనం కిజినాన్. మీ బత్తుదు మీరు కిదెజ్ ఇజి దేవుణు కోరిజిన విజు సజతిజ్ మీరు బాగ నెస్తిజ్ ఇజి పార్లనం కిజినాన్. ఇహిజ మీరు, దేవుణు ఆత్మ సీజిని విజు గెణం, బుద్ధి మనికిదెరె ఆదెజ్ ఇజి మాపు పార్లనం కిజినాన్.

10 మాపు ఎందనిళ్ యా లెకెండ పార్లనం కిజినాన్ ఇహిజ, దేవుణు కోరిజిన వజ మీరు బత్తిజి, వన్నిజ్ సర్ద కిబిస్సికెజ్ ఎస్తివలెబా కిదెజ్. ముకెలం, మీరు విజు రకమకాణి నెగ్గి పణి కిని వందిళ్, దేవుణుదిళ్ నిజం మరి లాపు నెస్తి వందిళ్ మాపు యా లెకెండ పార్లనం కిజినాన్.

11 దేవుణులు, లోకురిజ్ తోరిస్తి గొప్పు బమ్మ కిని వన్ని సత్తుదాన్ మీరు సత్తు మనికిదెర్ ఆని వందిజ్ యా లెకెండ్ పార్లనం కిజినావ్. ఎందనిజ్ ఇహిజ, ఎస్తివలెబా విజు బాదెజ, సరదదాన్ విజు ఓరిసి, బరిసి మండ్రెజ్, మీరు సత్తు మనికిదెర్ ఆదెజ్. అందెజె యా లెకెండ్ పార్లనం కిజినావ్.

12 మరి, దేవుణులు ఏలుబడిడు ఇహిజ గొప్పు జాయిదు వన్ని వందిజ్ కేట ఆతి లోకుర్ వందిజ్ వాండ్రు తయార్ కితి ఇడ్డి మని విజు దని లోకు మిజిబా అక్కు, మండ్రెజ్ తగ్గి వరి లెకెండ్ మిజి కితి దని వందిజ్ బుబ్బు ఆతి దేవుణుదిజ్ వందనమకు వెస్పినె మండ్రెజ్ ఇజి మాపు మీ వందిజ్ యా లెకెండ్ పార్లనం కిజినావ్.

13 దేవుణులు మజి సయతాన్ అతికారం అడిగి సీకటుదు తోహా ఆతి బాణిజ్ తప్పిస్తాండ్రె వాండ్రు ప్రేమిసిని వన్ని మరిన్ అతికారం అడిగి మజి తతాన్.

14 వన్ని మరిన్ ఆతి దనితాన్ దేవుణులు మజి విడుదల కిత్తాన్. ముకెలం, మా పాపమకు వాండ్రు సెమిస్త మనాన్.

క్రీస్తు విజు వన్యా మున్సు గొప్పు పెరికాన్

15 తోరెజ దేవుణులు మూర్తినె క్రీస్తు. దేవుణులు ఎలాగ మనాన్ ఇజి వీండ్రు తోరిస్తాన్. దేవుణులు విజు తయార్ కిని ముజాల వీండ్రు మహాన్. తయార్ కితి విజు వన్యా మున్సు అతికారం మనికాండ్రె క్రీస్తు.

16 ఎందనిజ్ ఇహిజ, వన్నివెటనె దేవుణులు విజు తయార్ కిత మనాన్. బూమిదు మనికెజ్, ఆగాసమదు మనికెజ్, తోర్లికెజ్, తోరెకెజ్, ముకెలం గొప్పు సత్తు మని విజు రకమ్కాణి అతికారం కిని విజు దూతెజ దెయమ్కాజ్, విజు వన్ని వెటనె దేవుణులు తయార్ కిత్తాన్. విజు క్రీస్తు వెటనె తయార్ కిత్తాన్. విజు వన్నిజ్ గవర్నం సీని వందిజె దేవుణులు తయార్ కిత్తాన్.

17 క్రీస్తు, విజు తయార్ ఆని ముజాల మనికాన్. విజు వన్యాజ్ వాండ్రు కుడుప్పి అస్త మనాన్.

18 వన్ని ఒడోల్ ఆతి దేవుణులు సజమదిజ్ బుర్ల వాండ్రె. వన్ని బాణిజె దనిజ్ కొత్త బత్తు వాజినాద్. ఎందనిజ్ ఇహిజ, సాతి వరి బాణిజ్ ముజాల మరజి బత్తితి మనికాన్ వాండ్రె. విజు వన్యా మున్సు గొప్పు పెరికాన్ ఆని వందిజె, సాతి వరి బాణిజ్, ముజాల మరజి బత్తిత మనాన్.

19 ఎందనిజ్ ఇహిజ, వన్ని లోకనె వన్ని బుబ్బు ఆతి దేవుణులు వెల్తి నిల్లెండ పూర్తి మండ్రెజ్ ఇజి తీర్చునం కిత్తాన్.

20 అందెజె, మరిన్ వెటనె బూమిదు మని విజు వన్యాజ్, పరలోకమదు మని విజు వన్యాజ్, వన్ని డగ్గు మరజి కుడుప్పెజ్ ఇజి దేవుణులు తీర్చనం కిత్తాన్. వన్ని మరిన్ సిలువాదు సాతివలె, నల వాక్కి దనితాన్, దేవుణులు బూమిదు మని విజు వన్యా వెట, దేవుణులు మంజిని పరలోకమదు మని విజు వన్యా వెట రాజినం ఆతండ్రె, విజు వన్యాజ్ వన్ని డగ్గు మరజి కుడుప్పాన్.

21 ఉండ్రె కాలమదు, మీరు కితి సెజ పణిజాణిజ్, సెజ ఆలోసనెజాణిజ్ దేవుణులు బాణిజ్ దూరం మహాదెర్. దేవుణుదిజ్ పడిఎండ మహాదెర్.

22 గాని ఏలు, వన్ని మరిన్ ఒరిన్ లోకు ఆజె సాతి సాపదాన్ వాండ్రు మీ వెట రాజినం ఆతాన్. ఎందనిజ్ ఇహిజ, ఇని నింద సీతి, ఇని నేరమకుబా రెజ, నొరె ఆతి లోకుర్ లెకెండ్, క్రీస్తు మరజి వానివలె మిజి దేవుణులు ఎర్దు మిజి నిల్పెజె వాండ్రు మీ వెట రాజినం ఆతాన్.

23 మీరు సువార్ల నమ్మిజి మహిజ అయాలెకెండ్ మంజినిదెర్. మీరు సమ్మకమ్దాన్ దిగజార్ఎండ మండ్రెజ్ వలె. యా సువార్ల వెస్పిని ఆన వందిజ్ డిసెంండ ఎర్దు సుడెజెనె మండ్రెజ్ వలె. యా సువార్లనె నండొ దేనిమ్కాణి లోకుర్ నడిమి వెహా ఆత మనాద్. యాక వెహెజె పవులు ఇని నజి దేవుణులు ఏర్పాటు కిత్తాన్.

పవులు దేవుణులు సజం వందిజ్ సేవ కిజినాన్

24 ఏలు, మీ మేలు వందిజ్ నాను స్రమెజ్ ఓరిసిన ఇజి సరద ఆజిన. ఇహిజ, క్రీస్తు ఒడోల్ లెకెండ్ మని సజమది మేలు వందిజ్ నాను నా ఒడోల్దు స్రమెజ్ ఓరిస్తాజ్ వలె ఇజి క్రీస్తు ఏర్పాటు కితిక నాను పూర్తి కిజిన.

25-26 దేవుణులు నజి సజమదిజ్ సేవ కిదిజ్ ఇజి ఏర్పాటు కిత్తాన్. మీ మేలు వందిజ్, క్రీస్తు వందిజ్ మని సువార్ల మిజి పూర్తి నెస్పిన్ బాజత వాండ్రు నజి సితాన్. యా సువార్ల, ముజాల బత్తితి మహి లోకుర్

బాణిజ్ దేవుణు డాప్పి వన్ని గర్భమదు ఇట్టా మహాన్. గాని ఏలు వాండ్లు వన్ని వందిజ్ కేట ఆతి లోకురిజ్ అయాక తోరిసి నెన్పిస్తాన్.

27 దేవుణు అయాలెకెండ కిత్తాన్. ఎందనిజ్ ఇహిజు, వాండ్లు యూదురు ఆఇ వరిజ్ నండో దీవిస్తాన్ ఇజి వన్ని గర్భమదు వాండ్లు ఎత్తు కిజి డాప్పి ఇట్టిక వరిజ్ తెలివి కిదెజ్ ఇజి తీర్చునం కిత్తాన్ ఇజి తోరిస్తెజ్. ముకెలం, క్రీస్తు, యూదురు ఆఇ మీ మన్సురు మంజినాన్. అందెజి, కడెవేరిదు దేవుణు జాయదు మండ్రెజ్ మిజి ఒనిదెర్ ఇజి ఆసదాన్ ఎర్దు సుడెజి మంజినిదెర్ ఇజి. యాకదె దేవుణు వన్ని లోకురిజ్ తోరిసి నెన్పిస్తాన్ సువార్.

28 అందెజి మాపు క్రీస్తు వందిజ్ విజెరిజ్ వెప్పినావ్. ముకెలం మాపు నండో గెణమ్దాన్ విజెరిజ్ బుద్ది వెప్పి నెన్పిస్తావ్. ఎందనిజ్ ఇహిజు, క్రీస్తు వెట కూడితి మని వరిజ్ విజెరిజ్ వాండ్లు మరజి వానివలె దేవుణు ఎర్దు నిల్పేవలె, వారు పూర్తి ఆతికార్ ఆదెజ్ మాపు బుద్ది వెప్పి నెన్పిస్తావ్.

29 వారు పూర్తి ఆతికార్ ఆని వందిజ్ క్రీస్తు సీజిని గొప్పు సత్తుదాన్ నాసు నండో కన్జబాడిజెన. అయా గొప్పు సత్తునె, నాసు కన్జబాడిదెజ్ నజి సత్తు కిబిస్తాద్.

2

1 మీ వందిజ్, లవొదియ పట్టుమదు మని దేవుణుదిజ్ నమ్మిత్తి వరి వందిజ్, నజి ఎనెజ్బా తొఇ వరి వందిజ్ నాసు ఎసా కన్జబాడిజెన ఇజి మీరు నెన్జెజ్ ఇజి నాసు కోరిజెన.

2 నాసు ఎందనిజ్ యా లెకెండ కన్జబాడిజెన ఇహిజు, మీరుని వారు, నెగ్రెండ దయరమ్దాన్ నిల్పివందిజ్, మరి, మీరు ఒరెన్ మరి ఒరెన్ వన్నిజ్ ప్రేమిసిని వజ, కూడెజి పాడెజి మంజిని వందిజ్ కన్జ బడిజెన. ఎందనిజ్ ఇహిజు, అయావలె మీరు అనుమానం సిల్లెండ దేవుణు వన్ని గర్భమదు డాప్తి ఇట్టిక ఇహిజు, క్రీస్తుజ్ పూర్తి నెన్జెజ్.

3 ఎందనిజ్ ఇహిజు, క్రీస్తు వెటనె దేవుణు వన్ని గర్భమదు డాప్తి ఇడ్డి విజు గెణమ్ని ఆలోసనెజ్ నెన్జెజ్ అట్టాట్.

4 నాసు ఎందనిజ్ యా లెకెండ వెప్పిన ఇహిజు, ఎయెర్బా మిజి తియాని మాణిజ్ వెప్పి మోసం కిఎండ మండ్రెజ్.

5 నాసు మీ నడిమి సిలితిజ్బా మీ వందిజ్ నండో ఎత్తు కిజెన. నాసు నండో సర్దబా ఆజెన. ఎందనిజ్ ఇహిజు, మీరు ఉండ్రె ఆజి కూడెజి పాడెజి మంజినిదెర్. మీరు క్రీస్తుజ్ డటం నమ్మిజెనిదెర్ ఇజి నాసు నెన్పు.

6 మీరు క్రీస్తుయేసుజ్, ప్రబు ఇజి ఒవుకోటి మనిదెర్. అందెజి వన్ని వెట కూడితి మనికార్ కిదెజ్ మని లెకెండ మండ్రు.

7 వన్ని వందిజ్ మిజి నెన్పిస్తా మనికెజ్ నమ్మిజి, అయకెజ్ కిజెనె మండ్రు. అయా సజతిజ్ నలిజెజి నమకమ్దు పిరిదు. మిజి నెన్పిస్తా వజ నిజమాతి బోదదిజ్ అసినె మండ్రు. మా బుబ్బు ఆతి దేవుణు మీ వందిజ్ కితి దని వందిజ్ పూర్తి మన్సుదాన్ వందనమ్కు వెప్పినె మండ్రు.

8 ఎయెర్బా మోసం కిని బోదెజ్ నెప్పిని మిజి తొహ్కీ మని వరిలెకెండ కిఎండ జాగర్ల మండ్రు. వారు మిజి అర్లం సిలి మోసం కిని లోకురిజ్ మని గెణం నెప్పిని మోసం కినార్. అయాకెజ్ క్రీస్తు బాణిజ్ వాజినికెజ్ ఆఉ. గాని పూర్బమ్దాన్ అసి నెప్పిని బోదెజి బాణిజ్ వాజినికెజె. యా లోకమదిజ్ అతికారం కిజిని దెయమ్క బాణిజ్ వాజినికెజె.

9 నాసు అయ లెకెండ వెప్పిన. ఎందనిజ్ ఇహిజు, దేవుణు, క్రీస్తు ఒడోల్దునె వెల్తి సిల్లెండ పూర్తి మంజినాన్.

10 క్రీస్తు వెట మీరు కూడితి మనిజ్, మీ కొత్త బత్తుదిజ్ కావాలిస్తెకెజ్ విజు మిజి సిత మనాన్. అతికారం కిజిని విజు సత్తుజ మున్సు, ఏలుబడికి కిని వరి మున్సు, తోర్ని వన్యాజ్, తోరెజి వన్యాజ్ మున్సు. వాండ్రె గొప్పు అతికారం మనికాన్. తోరెజి వన్యాజ్ ఇహిజు, దేవుణు దూతారని దెయమ్కు. వన్యా మున్సు గొప్పు అతికారం మనికాండ్రె వాండ్రు.

11 వన్నివెటట మీరు కూడితి మనిదెర్. అందెజె క్రీస్తు బాణిజ్సునతి కిబె ఆతి లెకెండే మనిదెర్. లోకుర్ వరి కికాణిజ్ కిని సునతి కిబె అజదెర్, గాని క్రీస్తు కితి సునతిని కిబె ఆతిదెర్. ఇహిజ, క్రీస్తు మీ సెజ ఆసెజ్ విజు పూర్తి లాగితాన్.

12 మరి, మీరు బాప్తిసం లాగె ఆతివలె, క్రీస్తు వెట సాజ ముసె ఆతి లెకెండే మనిదెర్. వన్ని వెట మర్జె నికె ఆతి లెకెండే మనిదెర్. దేవుణు గొప్పు సత్తు మనికాన్ ఇజి మీరు నమ్మిజిని దనిదానె వన్ని వెట మర్జె నికె ఆతిదెర్. దేవుణు సత్తునె వన్నిజ్ సాతి వరి బాణిజ్ బత్మిస్తాన్.

13 ఉండ్రీ కాలమ్దు, మీరు సాతి వరి లెకెండే మహిదెర్. ఎందనిజ్ ఇహిజ, మీరు పాపమ్కు కిజినె మహిదెర్, పాపం కిబిన్మి సెజ ఆసెజ్బా మిజె మహె. అయాకెజ్ సాన్ఎండ మహె. గాని ఏలు మిజినె దేవుణు క్రీస్తు వెట కొత్త బత్మి, సితాన్. ఎందనిజ్ ఇహిజ, వాండ్రు మా పాపమ్కు విజు నొహ్తాన్.

14 ఇహిజ, మజి సిక్కు సీని, మాటు కితి తప్పుజ్ రాస్తి ఇడ్డి కాకితం సిల్లెండే లెకెండే మనాద్ అయాక క్రీస్తు సాతివలె మా పాపమ్కు వెట అయా కాకితమ్బా సిలువాదు కుంటిజాణిజ్ డెయితాండ్రె అయాకెజ్ పూర్తి సిల్లెండే ఆతె ఇజి తోరిస్తాన్.

15 అతికారమ్దు మహి ఏలుబడిః కిజి మహి దెయమ్కాజ్ మరి తోరెజ సత్తుజ, దేవుణు వీజిస్తాండ్రె, వన్యా ముస్సు, గెలస్తాన్. క్రీస్తు సిలువాదు ఆతి దనిదనటాన్ దేవుణు వన్యా, ముస్సు, గెలస్తాండ్రె, విజెరె ఎద్రు వన్యాజ్ సిగు కిత్తాన్.

16 అందెజె, మీరు సెగం బోజనం ఉణిజి తింజిని వందిజ్ సిలిజ, మీరు ఏంటు ఏంటు బత్తువందిజ్ కిజిని వండొయి కిజి వందిజ్, ఆమాన్దు వండొయి కిజి వందిజ్, విస్తాంతి దినం సుడఃఇ వందిజ్ మీరు తప్పు కితిదెర్ ఇజి తీర్పు కిని వన్నిజ్ దూరం కితి.

17 నిని ఆడ్రెజ్ విజు ఉండ్రీ నీడః లెకెండే మన్నె. ఆ నీడ ఎయెదిన్ వాండ్రు వెనుక వాజినాన్. అయా వాండ్రు క్రీస్తునె.

18 'తగ్ ఆజినాప్' ఇజి వేసం తోరె ఆజతిజ్, దూతెజ్ మాడిసెఇతిజ్, మీరు తప్పు కితిదెర్ ఇజి మిజి తీర్పు కిని వన్నిజ్ దూరం ఆదు. ఎందనిజ్ ఇహిజ, వాండ్రు కలాదు సుడఃతి ఇనిదనిజ్ ఆదారం ఇడఃజి అతికారం కిజినాన్. వాండ్రు కిజిని ఆలోసెనెజ్ సెఇకెజ్. అందెజె వాండ్రు గర్త ఆజినాన్. వాండ్రు గర్త ఆదెజ్ మని ఇని సజతిబా వన్నిజ్ సిలితిజ్బా గర్త ఆజినాన్.

19 అయా లెకెండే మనికాన్ క్రీస్తు బాణిజ్ ముజాలె దూరం ఆత మనాన్. బుర్త ఆతి క్రీస్తు వందిజ్ మని నిజమాతి బోద్ వాండ్రు నెన్పిసెవెన్. బుర్త వెహ్తా వజనె ఒడెఃల్ సత్తుదాన్ పిపినాద్. ఒడెఃల్ అత్తుజాణిజ్ సీరిజాణిజ్ అత్మిస్త మనాద్. అయాలెకెండే, దేవుణు ఎత్తు కితి వజనె సజమదిజ్ సత్తుదాన్ పిరిప్పికాన్ క్రీస్తునె.

20-21 సాతి క్రీస్తు వెట మీరు కూడితి మనిదెర్. అందెజె నని ఆడ్రెజ, బోదెజ లోజెఎండ డిఃబె ఆతిదెర్. అయకెజ్ క్రీస్తుజ్ నమ్మిజ లోకుర్వందిజ్ఇడ్డి మనికెజె. అందెజె మరి ఎందనిజ్, సెగం సజతిజ్ వాడుకొడమూట్, రుసి సుణ్మూట్, ముట్మూట్, ఇని యా లోకమ్ది ఆడ్రెజ లోజెదిజ్ వలె ఇజి లోజెజినిదెర్.

22 ఆడ్రెజాదు వెహ్సాని బోజనమ్మెని మహి సజతిజ్ వాడు కొడుజి మహిజ, సిల్లెండే ఆనె. మరి ఎందనిజ్ అయాకెజ్ లోజెజినిదెర్. అయకెజ్ లోకుర్ ఇడ్డి ఆడ్రెజ బోదెజె.

23 నిని ఆడ్రెజ, ఇట్టికార గొప్పు గెణం మనికార ఇజి తోర్నాన్. ఎందనిజ్ ఇహిజ, లోకుర్ తీర్పునం కిత ఇట్టా మనార్ ఎలాగ మాడిసెజ్ ఇజి. అయాలెకెండే కిదెజ్ ఇజి ఆడ్రెజ్ వెహ్సానాద్. తగ్ ఆజినాప్ ఇజి వేసం తోరె ఆదెజ్ ఇజి, దేవుణుదిజ్ సర్ద కిదెజ్ ఒరెన్ వన్ని ఒడెఃల్దిజ్ బాదెజ్ కిదెజ్ ఇజి ఆడ్రెజ్ వెహ్సానాద్. అందెజె నిని ఆడ్రెజ్ నెగ్గెకెజ ఇజి తోర్నె. గాని, ఒరెన్ వన్నిజ్, వన్ని ఒడెఃల్ది ఆసెజ, ఆప్కిదెజ్ ఇజి ఆసె ఆసె వన్నిజ్ ఇని సాయమ్బా కిడ. అందెజె నిని ఆడ్రెజ్ లోకురిజ్ సెఇకెజి కిబిన్మె.

3

పరలోకమ్దు మంజిని సజతిజ వందిజ్ ఎత్తుకిజి మండ్రు

1 క్రీస్తుజ్ఞ సాతి బాణిజ్ దేవుణు బత్తిన్నీ లెకెండె, మిజి బా వాండ్లు కొత్త బత్తు, సితాన్. అందెజె క్రీస్తు మని దేవుణు మంజిని బాడిడు మని సజతిజ వందిజ్ ఎన్దీవలెబా నండో ఆస ఆజి మండ్రు. వన్నిజ్ దేవుణు గొప్ప అతికారమని నండో మర్కాద సిత మనాన్.

2 యా లోకమీదు మని సజతిజ మున్ను మీ మన్ను ఇడ్డాట్. గాని పరలోకమీదు మని సజతిజ మున్ను మీ మన్ను ఇడ్డెడు.

3 ఎందనిజ్ ఇహిజ, మీ పడాఱి బత్తు సాత మనాద్. మీరు ఏలు క్రీస్తు వెట దేవుణు ఎర్దు బత్తిజినిదెర్. అయాక లోకుర్ సుడెడెజ్ అటెవెర్.

4 మిజి నిజమాతి బత్తు సీజనికాన్ క్రీస్తునె. వాండ్లు మరజి వానివలె, దేవుణు విజెరె ఎర్దు వన్నిజ్ వెల్లి తోరిస్సి వలె మిజిబా వన్నివెట వెల్లి తోరిస్సాన్. మీరుబా వన్ని వెట వన్ని జాయదు మంజినిదెర్. లోకుర్ మిజి వన్ని వెట గవరం సీనార్.

5 అందెజె, మీరు ముజాలె కిజి మహి యా లోకమీది తప్ప పణిజ్ పూర్తి డిఱిస్సు. ముకెలం, రంకు బూలమాట్, కెలార్ బూలమాట్. దిన్ని వందిజ్ నండో ఎత్తు ఆజి మన్ను ఇడ్డాట్. సెఇకెజ్ కిడెజ్ ఆస ఆమాట్. మని దని ఇంక మరి నండో కావాలి ఇజి ఆస ఆమాట్. ఎందనిజ్ ఇహిజ, అయా లెకెండె కినిక మీరు ఆస ఆనిదనిజ్ మాడిసిని లెకెండె మనాద్.

6 యా లెకెండె కిమాట్. ఎందనిజ్ ఇహిజ, దేవుణు కోపం యా లెకెండె కిజిని వరి మున్ను వానాద్.

7 ముజాలె మీరుబా దేవుణుదిజ్ లోజిఎండ మహివలె, యా లెకెండె కిజి మహిదెర్.

8 గాని ఏలు యాకెజ్ ఇనికబా కిమాట్. ముకెలం పగ అస్మాట్. కోపం ఆమాట్. మహి వరి వందిజ్ సెఇకెజ్ ఎత్తు కిమాట్. దుసలాడిఱమాట్. కెడి మాటెజ్ మీ వెయదాన్ వర్గిమాట్.

9 మరి ఒరెన్ వన్ని వెట అబద్దం వర్గిమాట్. ఎందనిజ్ ఇహిజ, మీ పడాఱి బత్తు మీరు డిఱిస్సిదెర్, నస్తివలె కిజి మహి సెఇ పణిజ్ మీరు డిఱిస్సిదెర్.

10 అయాకెజ్ డిఱిస్సిదెర్, ఉండ్రీ నెగ్గి కొత్త బత్తు బత్తిజినిదెర్. మిజి తయార్ కితి దేవుణునె యా కొత్త బత్తు మీ లోఇ ఇట్టాన్. వన్ని లెకెండె మంజిని వందిజ్ మరి మరి మిజి కొత్తాజ్ కిజినాన్. వన్నిజ్ మీరు నెగ్గెండె నెస్సి వందిజె, యా లెకెండె మరి మరి కొత్తాజ్ కిజినాన్.

11 అందెజె, యూదురు ఇజినో, యూదురు ఆఇకార్ ఇజినో, సునతి కిబె ఆతికార్ ఇజినో, కిబె ఆఇకార్ ఇజినో, తకు జాతిదికార్ ఇజినో, మూర్కమీది నని ఒదె తకు జాతిదికార్ ఇజినో, వెటి పణి కినికార్ ఇజినో, కిఇకార్ ఇజినో ఆవిద్ ముకెలం. గాని క్రీస్తునె ముకెలమాతికాన్. వాండ్లు నమ్మిత్తి వరి విజెరె లోఇ మంజినాన్.

12 మీరు దేవుణు లోకుర్. వాండ్లు మిజి ప్రేమిస్సాండ్రె వన్ని సొంత లోకుర్ ఇజి కేట ఇట్టాన్. అందెజె, మీరు మరి ఒరెన్ వన్ని వందిజ్ మీ పాణం నొతెజ్ దయ తోరిస్సు. తగిజి మండ్రు. సార్దిదాన్ మండ్రు. ఒరిసి మండ్రు.

13 మహి వరి వెట బరిస్సు. మీ లోఇ ఒరెన్ మరి ఒరెన్ వన్ని వెట మొరొ ఆజి మహిజ, అయాక ఇనిక అతిజిబా నెమిస్సు. ప్రబు అతి క్రీస్తు మిజి నెడ్డినె నెమిస్సి వజ, మీరు నెమిస్సు.

14 దినిజ్ విజి ఇంక మహి వరిజె ప్రేమిస్సు. అయాకదె ముకెలం. ఎందనిజ్ ఇహిజ, మీరు ప్రేమిస్సి దనిదనటాన్ మీరు పూర్తి కూడిజె మంజినిదెర్.

15 మీరు ఒరెన్ మరి ఒరెన్ వన్ని వెట కూడిజె పాడిజె మండ్రెజ్ క్రీస్తు సీని నమదనం నీ మన్నుదు మంజినాద్. ఎందనిజ్ ఇహిజ, మీరు దేవుణు సజమీదు ఒరెన్ మరి ఒరెన్ వన్నివెట నమదనమదాన్ మంజిని వందిజె, దేవుణు మిజి కూక్కు మనాన్. దేవుణు కితి సజతిజ వందిజ్ ఎన్దీవలెబా పోన్ఎండ దనిజ్ ఎత్తుకిజినె వందనమకు వెహ్ని మండ్రు.

16 క్రీస్తు వందిజ్ మని బోద మీరు నెగ్గెండె నెసిని మండ్రు. నండో గెఱెమదాన్ ఒరెన్ వన్నిజ్ నేరపిని, బుద్ది వెహ్ని మండ్రు. దేవుణు మాటెజ్ పాటెజ్ వజ పారజి, దేవుణుదిజ్ పాగిడిజె వందనమకు వెహ్నిని పాటెజ్ పారజి, దేవుణు అత్తు మీ మన్నుదిజ్ రేప్పని వజ పాటెజ్ పారజి మండ్రు. దేవుణు కితికెజ్ పోన్ఎండ మీ పూర్తి మన్నుదాన్ దేవుణుదిజ్ పాటెజ్ పార్దు.

17 మీరు ఇనిక వెహ్లాజ్ బా, ఇనిక కితిజ్ బా ప్రబుయేసుజ్ లోజీతికార్ కిదెజ్ మని వజ కీదు. మా ప్రబు ఆతి క్రీస్తు వెట, మిజి దోహ్ క్తి దని వందిజ్ బుబ్బు ఆతి దేవుణుదిజ్ వందనమ్ కు వెహ్లావలె, యా లెకెండ్ కీదు.

దేవుణుదిజ్ నమ్మిత్తికార్ ఒరెన్ ఒరెన్ ఎలాగ మండ్రెజ్.

18 బోదెకాండె, మీరు మీ మాసిర మీ మున్ను అతికారం మనికార్ ఇజ ఒడోబిజి వరిజ్ లోజీదు. మీరు ప్రబు వెట కూడితి మనికిదెర్. అందెజి అయాకదె మీరు కిదెజ్ మనిక.

19 మాసిరాండె, మీరు మీ బోదెకాజ్ ప్రేమిస్తు. వన్కాజ్ బాదెజ్ కిమాట్.

20 కొడోఱాండె, మీరు మీ యాయ బుబ్బెజ్ ఎస్తివలెబా వెండ్రు. ఎందనిజ్ ఇహిజ, యాకదె ప్రబుజ్ ఇస్టం ఆతిక.

21 అప్పొసిరాండె, మీ కొడోఱో మున్ను రుజ్ ఎండ వంజిని వందిజ్ మరి మరి జటిజ్ ఆమాట్.

22 వెటి పణి కినికిదెరా, మీరు యా లోకమేది మీ ఎజుమారుజు, విజు వన్కా లోఇ లోజీదు. నెగ్గికార్ ఇజి వెహె ఆదెజ్ వారు సూణివలెన్ ఆవెద్. గాని పూర్తి మున్నుదాన్ వరిజ్ లోజీదు. ఎందనిజ్ ఇహిజ, మీరు ప్రబుజ్ తియెల్ ఆజి గవరం సీజినిదెర్.

23 మీరు ఇనిక కితిజ్ బా, పూర్తి మున్నుదాన్ కీదు. లోకుర్ వందిజ్ ఆవెద్. గాని దేవుణు వందిజ్ కిజినాన్ ఇజి పూర్తి మున్నుదాన్ కీదు.

24 ఎందనిజ్ ఇహిజ, ప్రబునె మిజి పలితం సీనాన్ ఇజి మీరు నెసినిదెర్. ఇహిజ, వాండ్రు ఒట్టు కితికెజ్ మిజి దోహ్ క్తె. ఎందనిజ్ ఇహిజ మీరు సేవ కిజిని నిజమాతి ఎజుమాని ప్రబు ఆత క్రీస్తునె.

25 తప్ప కిని వన్సిజ్, వాండ్రు ఎయెన్ ఆతిజ్ బా వాండ్రు కితి తప్పదిజ్ దేవుణు సిక్కు సీనాన్. ఇజ్రికార్ పెరికార్ ఇజి దేవుణుదిజ్ తేడ సిల్దెద్.

4

1 ఎజుమానిరాండె, మీరు మీ వెట్టిపణి మనిసీరిజ్ నాయమ్ దాన్, వరిజ్ సీదెజ్ మనికెజ్ సీజి నెగ్రెండ నుడోడు. ఎందనిజ్ ఇహిజ, మిజిబా ఒరెన్ ఎజుమాని పరలోకమేదు మనాన్ ఇజి ఒడోబిడు.

2 వన్సివేండె పార్లనం కిజి మండ్రు. మీరు పార్లనం కినివలె మున్ను ఇతాల్ అతాల్ ఆవెండ జాగర్లదాన్ మండ్రు. దేవుణు మిజి కితి దని వందిజ్ వందనమ్ కు వెహ్లా మండ్రు.

3 మరిమా వందిజ్ బా పార్లనం కీదు. దేవుణు బోదె వెహ్లాజ్ మజి సరి దోహ్ క్తెజ్ సాయం కిపిన్ ఇజి పార్లనం కీదు. ఎందనిజ్ ఇహిజ, క్రీస్తు వందిజ్ ఉండ్రీ కాలమ్ దు డాజితి మహికెజ్ గాని, ఏలు తోర ఆతి నిజమాతి సజతిజ్ బోదెసెజ్. యాక బోదెస్సిజ్ నె, నాను జెలిదు ఆత.

4 యాక నాను బోదెస్సిజ్ మనికాదె. అందెజి నాను నెగ్రెండ, అర్థం ఆనిలెకెండ్ వెహ్లాజ్ నజి సరి దోహ్ క్తెజ్ సాయం కిపిన్ ఇజి నా వందిజ్ దేవుణుదిజ్ పార్లనం కీదు.

5 మీరు కిజిని దనితాన్ తెలివిదాన్ నమ్ ఇ వరివెట మండ్రు. మిజి దోహ్ క్తి నమయమ్ దు విజు క్రీస్తు వందిజ్ వరిజ్ వెహ్లాజ్ తయార్ దాన్ మండ్రు.

6 మీరు తెలివిదాన్, నెగ్రెండ, ఎస్తివలెబా వరి వెట వర్గిదు. అయావలె, వరి లోఇ విజెరి వెట వారు వెనబాతి దనిజ్ ఎలాగ మరజి వెహ్లాజ్ ఇజి ఎస్తివలెబా నెస్సిదెర్.

7 నజి జర్రిజిని విజు సజతిజ్, తుకికు మిజి వెహ్లాజ్. వాండ్రు నాను ప్రేమ కిజిని ఒరెన్ తంబెరి. నమ్మకమ్ దాన్ దేవుణు సేవ పణి కిజినికాన్. నా వెట జత కూడోజి ప్రబుజ్ సేవ కిజినికాన్. వాండ్రు నా వందిజ్ మిజి వెహ్లాజ్.

8 మజి జర్రినికెజ్ మీరు నెస్సి వందిజ్ నెగ్గి మాట వెహ్లాజ్ మిజి దయరం కిలిస్సి వందిజ్ నాను వన్సిజ్ మీ డగ్గు పోక్కిన్.

9 ఒనెసిము వన్సి వెట మీ డగ్గు వాజినాన్. వీండ్రు నమ్మిదెజ్ తగ్గికాన్. మాపు ప్రేమిస్సి ఒరెన్ తంబెరి. మీ పట్టుమేదికాన్. ఇబ్బె జర్రినికెజ్ విజు వీరు మిజి వెహ్లాజ్.

10 నా వెట జెలిదు మని అరిస్తర్కు మిజి వెన్బాతి లెకెండ్ వెప్పినాన్. బర్నబెజ్ బణిజ ఆతి మార్కుబా మిజి వెన్బాతి లెకెండ్ వెప్పినాన్. (విని వందిజ్ ముజాలె మీరు వెవె ఆతి మనిదెర్. అందెజె వాండ్రు మీ డగ్రు వాతిజ డగ్రు కిదు)

11 యుస్తు ఇని యేసుబా మిజి వెన్బాతి లెకెండ్ వెప్పినాన్. సమ్మిత్తి యూదుర్జ లొఇ నా వెట కూడేజి పణి కిజినికార్ వీరు మువెరె. దేవుణు ఎలుబడిః వందిజ్ వెప్టాజ్ వారు పణి కిజినార్. వారు నజి గొప్ప తోడుః ఆత మునార్.

12 క్రిస్తుయేసుజ్ నేవ కిజిని, మీ లొఇ ఒరెన్ ఆతి ఎపప్రా మిజి వెన్బాతి లెకెండ్ వెప్పినాన్. వాండ్రు ఎస్తివలెబా మీ వందిజ్ డిఃన్ఎండ డటం పార్దనం కిజినాన్. మీరు అనుమానమ్కు సిల్లెండ నమకమ్దు పూర్తి పిరీని వందిజ్, దేవుణు ఇన్దం కినికెజ్ విజు మీరు పూర్తి నెస్తి వందిజ్ వాండ్రు డటం పార్దనం కిజినాన్.

13 ఎందనిజ్ ఇపిః, వాండ్రు మీ వందిజ్, లవొదికియ పట్టుమ్ది సమ్మిత్తి వరి వందిజ్ ఇయరపొలి పట్టుమ్ది సమ్మిత్తి వరి వందిజ్ వాండ్రు నండొ కన్ద బాడిఃజినాన్. యాక నిజం ఇజి నాను వెప్టాజ్ అట్టు.

14 మాపు ప్రేమ కిజిని లూక డాక్టరుని దెమా మిజి వెన్బాతి లెకెండ్ వెప్పినార్.

15 లవొదికియ పట్టుమ్దు మని కూలెజ్, నుమ్పాకుజ్, వన్ని ఇండ్రో కూడేజి వాజిని దేవుణు సజమ్దిజ్ నాను వెన్బాతి లెకెండ్ వెహా.

16 మీ లొఇ యా ఉత్తం డటం సద్విజి వెనుక లవొదికియ పట్టుమ్దు మని దేవుణు సజమ్దుబా యాక సద్విదెజ్. అయాలెకెండ్ లవొదికియ పట్టుమ్దు మని దేవుణు సజమ్దిజ్ నాను రాస్తి ఉత్తం, వారు మిజి పొక్కార్. అయాక మీరుబా డటం సద్విదెజ్.

17 అర్కిపుజ్ వెహా, 'ప్రబు వెట నీను కూడిఃతి మనికి. నిజి ఏర్పాటు కితి పణి పూర్తి కిదెజ్ నుడేదెజ్ వలె', ఇజి.

18 పవులు ఇని నాను మిజి వెన్బాతి లెకెండ్ వెప్పిన. నా సొంత కీదానె ఆకర్తి యా మాటెజ్ రాసిన. నాను జెలిదు మన ఇజి పొస్సాట్. దేవుణు దయాదర్తం మీ మున్కు మనిద్.

అపొస్తుడు ఆతి పవులు తెస్సలోనిక పట్టుమ్ది దేవుణు సజమ్డ్ రాస్తి మొదోహి ఉత్తం

నెల్వు కిబిసినిక

ఇక్క అపొస్తుడు ఆతి పవులు దెస్సలోనిక పట్టుమ్దు మని దేవుణు సజమ్ది వరిజ్ రాస్తి మొదోహి ఉత్తం. పవులు కొరింతు పట్టుమ్దు మహివలె బాణిజ్ యా ఉత్తం రస్సపోక్తాన్ ఇజి నండొండార్ ఒడొబిజినార్. తిమోతి, సిల ఇనికార్ యా ఉత్తం ఒత్త సిత్తార్ ఇజి నండొండార్ ఒడొబిజినార్. పవులుని వన్ని వెట సువార్త పణి కినికార్ కూడొజి దెస్సలోనిక పట్టుమ్దు సొన్ని సువార్త సాటిసి దేవుణు సజం మొదోల్స్తాన్ మనాద్. (అపొస్తురు కిత్తి పణిజ్ 17:1-9). యూదురు మీటిజ్ కిని ఇల్కాజ్ వాండ్రు సువార్త సాటిస్తాజ్ మొదోల్స్తాన్. బక్తి మనికార్ ఆతి యూదురు ఆఇకార్ బా నండొండార్ బాన్ కూడ్డి వాజి దేవుణుదిజ్ పొగ్డిజి మూడిసి మహార్. అందెజి దెస్సలోనిక పట్టుమ్దు మని సెగొండార్ యూదురుని యూదురు ఆఇకార్, పవులు సాటిస్తామని సువార్త నమ్మితార్. యూదురిజ్ ఇంక యూదురు ఆఇకార్ నండొండార్ సువార్త నమ్మితార్. ఇంజుముంజు మూండ్రి వార్మకు బాన్ మహండ్రి వాండ్రు బాణిజ్ సొత సొహన్. కొత్తాన్ దేవుణుదిజ్ నమ్మితి వరిజ్ హిమ్నెజ్ కినార్లెను ఇజి వరిజ్ దయరం వెప్రాజ్ ఇజి బాన్ తిమోతిజ్ పోక్తాన్. మరి వెనుక దేవుణు సజమ్ది వరిజ్ దయరం వెప్రాజ్ ఇజి, మరి దేవుణుదిజ్ నమ్మితికార్ దేవుణుదిజ్ తియాలాజి ఎలాగ బత్తిదెజ్, మరి బండెజ్ ఆవండ, మహికార్ గవరం సీనిలెకండె ఎలాగ బత్తిదెజ్ ఇజి నెస్సిస్తాజ్ ఇజి యా ఉత్తం వరిజ్ రాస్తాన్. నండొండార్ యేసుప్రబు మర్దివాని దస్స వందిజ్ అనుమానమాతార్. దస్సి వందిజ్ వరిజ్ నెస్సిస్తాజ్ ఇజి యా ఉత్తం రాస్తాన్. యేసుప్రబు మర్దివాని వందిజ్ విజు అద్యయమ్కు రాస్త మనాద్.*

1 బుబ్బాతి దేవుణుదిజ్ దేవుణుదిజ్, ప్రబు ఆతి యేసుక్రీస్తుజ్ సెందితి మన్ని, తెస్సలోనిక పట్టుమ్దు మని దేవుణు సజమ్ది వరిజ్, పవులుని సిలువాను తిమోతి ఇనికార్ రాసిని ఉత్తం. దేవుణు దయాదర్మమ్దాన్ మీరు నిసాతిదాన్ మండ్రెజ్ నయం కిపిన్.

తెస్సలోనికాది వరి నమకం వందిజ్ దేవుణుదిజ్ నమదనమ్కు!

2 ఎస్సివలెబా మా పార్దనమ్దు మిజి ఎత్తు కిజి, మీరు విజెదెరి వందిజ్ మాపు దేవుణుదిజ్ వందనమ్కు వెస్సినావ్.

3 మిజి దేవుణు ముస్సు మని నమ్మకమ్దాన్ మీరు కితి పణిజి వందిజ్, మహి వరి వందిజ్ ప్రేమదాన్ మీరు కస్సబాడొజిని దస్సి వందిజ్, ప్రబు ఆతి యేసు క్రీస్తు ముస్సు మని ఆనదాన్ ఎర్దు సుడొజి డీనివండ ఓరిసిని ఓర్పు వందిజ్ మాపు ఎస్సివలెబా మా బుబాతి దేవుణు ముండాల ఎత్తు కిజి మంజినావ్.

4 తంబెరికొండె, దేవుణు మిజి ప్రేమిస్తాండ్రి ఎర్దిస్త మనాన్ ఇజి మాపు నెస్సావ్.

5 ఎందనిజ్ ఇహిజు, మాపు మిజి వెప్తా సువార్త, వహి మాటొణాణిజ్ నె ఆవండ, దేవుణు సత్తుదాన్, దేవుణు ఆత్తుదాన్ మరి మా మన్సుదు పూర్తి నమ్మకమ్దాన్ మిజి నెస్సిస్తావ్. మీ వందిజ్ మాపు మీ వెట కూడొజి ఎలాగ బత్తితావ్ ఇజి మీరు నెసినిదెర్.

6 గొప్పు పెరి కస్సమ్దు మీరు ప్రబుజ్ని మజి పోలిసి నడితిదెర్. గొప్పు పెరి కస్సమ్కు మిజి వాతె. గాని దేవుణు ఆత్తు మిజి సీతి సర్దదాన్ మీరు యా సువార్తదిజ్ డగ్గు కితిదెర్.

7 అందెజి అయాలెకండె నమ్మితికిదెర్ ఎలాగ మండ్రెజ్ ఇజి నెస్సెజ్ మాసిదోణియని అకాయ ఇని ప్రాంతమ్కాజ్ నమ్మితి వరిజ్ విజెరిజ్ మీరు ఉండ్రె గుర్తు లెకండె ఆతిదెర్.

* 0: 1:0 1:8-10; 2:19-20; 3:13-18; 5:23-24

8 మానిదోణియని అకాయ ప్రాంతమకాజ్‌నే ఆవిండ దేవుణు సువార్త మీ బాణిజ్ విజుబాన్ సాటె ఆతాద్. అక్కాదె ఆవిండ దేవుణు ముస్సు, మిజి మని నమకం విజేరె నెస్తారె. అందెజి దని వందిజ్‌మాపు ఇనికబా వెహ్తాజ్ అకరె సిల్లెద్.

9-10 ఎందనిజ్ ఇహిజు మీరు ఎలాగ మజి డగ్గు కితిదెరె ఇజి వారె వెహ్సినారె. బోమ్మెజు మాడిసిక్ డిసి, సిజి బత్తిజిని నిజమాతి దేవుణుదిజ్ పొగ్‌డిజి మాడిసిక్ మీరు ఎలాగ దేవుణు దరోటు మహ్తాదెరె ఇజి వారె వెహ్సినారె. బత్తిజిని నిజమాతి దేవుణుదిజ్ నమ్మిజిని వందిజ్, దేవుణు బాణిజ్ వాని కోవమ్‌దాన్ మజి తప్పినికాన్ నాతి, సాతివరి బాణిజ్ దేవుణు నిక్కిమని వన్ని మరెన్ ఆతి యేసు, దేవుణు పరలోకమ్‌దాన్ డిగ్‌జి వానాన్‌లె ఇజి వన్ని వందిజ్ అసదాన్ ఎర్తు సుడేజి మంజినిదెరె.

2

దెసలోనిక పట్టుమ్‌దు పవులు కితి సువార్త పణి

1 తంబెరిజాండె, మాపు మీ డగ్గు వాతిక పణిదిజ్ రెవిండ ఆవతాద్, ఇజి మీరె నెసినిదెరె.

2 ముజాల పిలిపియా పట్టుమ్‌దు మజి ఎసా కస్టమ్‌కు వాతె, మరి ఎసానో సిగు కిత్తారె ఇజి మీరు నెసినిదెరె. గాని గొప్పు గటిదాన్ అడ్డుజ్ వాతిజ్‌బాగాని దేవుణు మజి సితి దయరమ్‌దాన్ సువార్త మాపు మిజి వెహ్‌వ్ ఇజి మీరు నెసినిదెరె.

3 మా మన్సుదు ఇనికాదో నెజ ఉదేసమ్‌దానో, మజి ఇనికాదో లాబం దోహ్‌కెజ్ ఇజినో, మిజి మోసం కిదెజ్ ఇజినో మాపు యా సువార్త మిజి వెహ్‌వితావ్.

4 గాని అక్కడె ఆవిండ మాపు తగ్గికావ్ ఇజి దేవుణు మజి సుడేజి సువార్త వెహ్తాజ్ ఇజి ఒవజెప్పి వందిజ్ మాపు వర్గిజనావ్. అందెజి మాపు లోకురిజ్ సర్త కిబిస్సికారె అవిండ, మా మన్సుజు పరీక్కు కిజిని దేవుణుదిజ్‌నే సర్త కిబిస్సికారె ఆదెజ్ ఇజి సుడేజినావ్.

5 మాపు మిజి వెహ్‌కెజ్ ఇనికెజిబా పొజిజిని మాటెజ్ అఉ ఇజి మీరు నెసినిదెరె. మరి మజి డబ్బు వందిజ్ నండ్ అస మనాద్ ఇజి మీరు నెన్‌ఎండ, మీ బాణిజ్ ఇనికబా గణస్తాజ్ ఇజి మాపు ఇనికబా డాఁప్పి వర్గివితావ్ ఇనిదన్నిజ్ దేవుణునె సాక్కి.

6 లోకురె మజి పొగ్‌డిదెజ్ ఇజి మాపు కోర్‌వితావ్. మీరు గాని మహికారె ఎయెరెబాగాని మజి పొగ్‌డిదెజ్ ఇజి మాపు కోర్‌వితావ్. మాపు క్రిస్తు వందిజ్ అహ్సారు అతికావ్ ఇజి మీబాణిజ్ లోసె ఆదెజ్ అక్కు మన్నికావ్.

7 గాని అయాలెకెండె కిఎండ, ఉండ్రె అయెసి దని కొడోరిజ్ ఎలాగ సుడేజినాదో, అయాలెకెండెనె మాపు మీ నడిమి తగె ఆత మహావ్.

8 మీరు మజి నండ్ ఇన్జం అతికిదెరె. అందెజి మాపు గొప్పు సర్తాదాన్ మీ వెట దేవుణు సువార్త వెహ్‌కెదె అవిండ, మరి మీ వందిజ్ మా బత్తుదాన్ ఇనిక కిదెజ్ అట్టాపొ అక్కెజ్ కిదెజిబా తయారె ఆత మహావ్. ఎందనిజ్ ఇహిజు మీరు మజి నసా డగ్గుహికెరె ఆతిదెరె.

9 తంబెరిజాండె, మీ నడిమి సువార్త వెహ్‌పొ మహివలె, మాపు మీ ముస్సు అదారం ఆవిండ, రెయె పొగెలో కస్టబాడ్డి పణి కిజి మహావ్. మాపు కస్టబాడ్డి పణికితిక మరి మా కస్టమ్‌కు విజు మీరు తవ్‌విండ ఎత్తు కిజి మంజినిదెరె ఇజి మాపు నెసినావ్.

10 దేవుణుదిజ్ నమ్మిత్తికిదెరె ఆతి మీ నడిమి, మాపు ఎసా బక్కిదాన్, నీతి నిజాయతిదాన్, నిందెజ్ సిల్లెండె ఎలాగ బత్తితావ్ ఇని దనిజ్ మిరె సాక్కి, దేవుణుబా సాక్కి.

11-12 ఎందనిజ్ ఇహిజు. వన్ని గొప్పు జాయదుని, వన్ని ఏలుబడిందు మండ్రెజ్ ఇజి మిజి కూక్కి మని దేవుణుదిజ్ తగితి లెకెండె మీరు బత్తిదెజ్ ఇజి మిజి బరెన్ అహ్సాని వన్ని కొడోరి వెట ఎలాగ వెహ్‌పొ నెగ్గి సర్తు నడిపిసిండ్రె, అయ లెకెండె మీ లోఇ ప్రతి బరెన్ వన్నిజ్ ఉసారె కిజి, దయరం వెహ్‌పొ, బతిమాల్‌జి మాపు మీ వెట మహావ్ ఇజిబా మీరు నెస్సిదెరె.

13 మాపు దేవుణుదిజ్ ఎస్సెవలెబా డిసేవిండ వందనమ్‌కు కిజిని మంజినావ్. ఎందనిజ్ ఇహిజు మా బాణిజ్ మీరు వెహి మని దేవుణు మాట, అక్కు లోకురె బాణిజ్ వాతి మాట లెకెండె ఆవిండ, అక నిజం

మని లెకెండేనె, దేవుణు బాణిజ్ వాతి దేవుణు మాటు లెకెండ్చె మీరు డగ్రు కితిదెర్. అందెజె దేవుణుదిజ్ నమ్మిత్తికిదెర్ ఆతి మీ మన్నుదు అక్క నెగ్గి పణి కిజినాద్.

14 తంబెరిజాండె మీరు యూదరు దేసమదు మని క్రీస్తు యేసుజ్ నమ్మిత్తి మని దేవుణు నజమకాణి వరిజ్ పోలిసి నడిసినెదెర్. ఎండనిజ్ ఇహిజ, వారు వరి సొంత లోకుర్ ఆతి యూదురు బాణిజ్ న్రమెజ్ ఒరిస్సి మహి లెకెండే మీరుబా మీ సొంత లోకుర్ బాణిజ్ న్రమెజ్ ఒరిస్సిదెర్.

15 యూదురు ఆతికార్ ప్రబు ఆతి యేసుజ్ని దేవుణు ప్రవక్తరుజ నప్తార్. వారు మజిబా డిన్విండె హిమ్మెజ్ కిత్తార్. యూదురు అకకార్ సువార్త వింజి దేవుణు వరిజ్ రక్సిస్తెజ్ ఆవెద్ ఇజి మాపు వరి వెటు వర్తివిండె మజి అడు కిజి దేవుణుదిజ్ పడిఱ పణిజ్ కిజి వారు లోకుర్ విజెరిజ్ పగాతికార్ ఆజినార్.

16 యా లెకెండే వారు వరి పాపమకు మున్ను మరి కుడుఱ్చి పూర్తి కిజినార్. అందెజె కడివేరిదు దేవుణు కోపం వరి మున్ను మనాద్.

తెప్పలొనికది వరిజ్ నుడెదెజ్ పవులుజ్ మని గొప్పు ఆన

17 తంబెరిజాండె, మాపు నెగం కాలం మీ బాణిజ్ దూరం ఆతి మనిజ్ (మా ఒణ్జోల్నే దూరం ఆతాద్ గాని మా మన్ను దూరం అవతాద్) మరజి మీ డగ్రు వాజి మిజి నుడెదెజ్ ఇజి నండో ఆన ఆజి నండో పణి కిత్తావ్.

18 నిజమె, మీ డగ్రు వాదెజ్ ఇజి గొప్పు ఆన ఆతావ్గాని సయతాను దనిజ్ అడ్డు కిత్తావ్. పవులు ఇని నాను మరి మరి మీ డగ్రు వాదెజ్ ఇజి నుడెత.

19 మాపు ఎయెర్ వందిజ్ దేవుణు ఎర్దు ఆనదాన్ ఎర్దు నుడెజినావ్? మజి సర్త కిటిస్సికార్ ఎయెర్? సిల్లిజి ఎస్సివలెబా మాపు యేసుక్రీస్తు ఎర్దు పొగిడిఱ, మజి గొప్పు సర్త కల్లిసిని ఉండ్రె టోపె లెకెండే మనికార్ ఎయెర్? మా ప్రబు ఆతి యేసు క్రీస్తు వాని వలె వన్ని ఎర్దు మంజిని మీరెగదె?

20 నిజమె మీరి మజి నెగ్గి పేరు తపిసినికిదెర్. మజి సర్త కిటిసినికిదెర్ మీరి.

3

1 మిజి నుడెదెజ్ ఇజి మజి మని ఆన బరిస్తెజ్ అట్విండెతిజ్, మాపు ఏదెన్ను ఇని పట్టుమ్దు మంజినిక నెగ్గక ఇజి ఒడిఱిజినె,

2 యేసుక్రీస్తు మున్ను మీరు ఇడ్డి నమకమదు కద్దివిండె మిజి దయెరం వెస్పొ, సత్తు మని వరి లెకెండే ముజాల నడిపెస్తెజ్ ఇజి యేసుక్రీస్తు వందిజ్ సువార్త సాటిస్తెజ్ మా వెటు కూడ్డి దేవుణు పణి కినికానాతి మా తంబెరి ఆతి తిమోతిజ్, మీ డగ్రు పోక్తావ్.

3 అందెజె మీ లొఇ ఎయెన్బా యా కస్టమ్కాజ్ నుడెజి వెనుక సొన్విండె, యేసుక్రీస్తు మున్ను మని నమకమదు గటిజ నిల్లి మండ్రెజ్ వలె. ఎండనిజ్ ఇహిజ మాటు యాకెజ్ ఒరిస్తెజ్ వలె ఇజి మీరు నెసినిదెర్.

4 నిజమె, మాపు మీ వెటు మహివలెనె మజి హిమ్మెజ్ వాని ఇజి మిజి వెస్పొ మహవ్. యాకెజ్ మాపు వెహితి లెకెండేనె జర్గితె ఇజి మీరు నెసినిదెర్.

5 ఎలాగబా సయ్యాను సెఇ పణిజ్ కిదెజ్ ఇజి మీ మన్నుదు ఆన పుటిసి, మీ నడిఱి మి మాపు కితి పణిజ్ విజు ఉండ్రె వేల పణిదిజ్ రెవిండె కిత్తాను ఇజి నాను తియెలాత. అందెజె దన్ని వందిజ్ ఎత్తు కిజి, యాక ఒరిస్తెజ్ అట్విండె మీ నమకం వందిజ్ నెస్తెజ్ ఇజి నాను తిమోతిజ్ పోక్త.

తిమోతి తతి నెగ్గి కల్లు

6 గాని తిమోతి మీ బాణిజ్ ఏలె మా డగ్రు వాతావ్. మిజి దేవుణు మున్ను మని నమకం వందిజ్, మీ ప్రేమ వందిజ్ నెగ్గి కల్లు తతావ్. మాపు మిజి నుడెదెజ్ ఆన ఆజిని లెకెండే, మీరుబా మజి నుడెదెజ్ ఆన ఆజినిదెర్ ఇజి వాండ్రు వెప్తావ్. మరి మా వందిజ్ ఎస్సివలెబా సర్తాదాన్ ఎత్తు కిజినిదెర్గె.

7 అందెజె తంబెరిజాండె, మాపు మజి వాతి దుకమదాన్ మహివలె, మజి హిమ్మెజ్ వాతివలె మీ నమకం వందిజ్ విహపె ఉసార్ కిబె ఆతావ్.

8 మీరు ప్రబు మున్ను మని నమకమదు గటిజ నిల్లి మంజినిదెర్, అందెజె దేవుణు మున్ను మిజి మని నమకం మా బత్తు లెకెండేనె మజి విలువాతిక ఆజినాద్.

9 దేవుణులు ముందాల మీ వందిళ్ల మన్ని విజు సర్ద వందిళ్ల దేవుణుదిళ్ల వందనమ్మకు ఎసా వెహ్టిజ సరి ఆనాద్? ఎస్సా మాపు వెహ్టిజ్ బా అక్కు తక్కునె వంజినె.

10 మాపు మిజీ మరి ఉండ్రి సుటు సుడఃజి దేవుణు మున్కు మని మీ నమకమ్దు మిజీ తకు మనిక పూర్తి కిదెళ్ల ఇజి ఉండ్రి సుటు అవ్కానం దోహ్కీకెళ్ల ఇజి రెయు పొకల్ దేవుణు వెట పార్దనమ్దు నండ్ బతిమాలిజనావ్.

11 మా బుబ్బాతి దేవుణుని మా ప్రబువాతి యేసు మీ డగ్రు వాదెళ్ల, మజి ఇని అడ్డు సిల్లెండ సరి తొరిసిన.

12 మాపు మిజీ ప్రేమిసిని లెకెండ్ మీరు ఒరెన్ మరి ఒరెన్ వెట ప్రేమిస్టెళ్ల, మరి మీ లొఇ మని ప్రేమ నండ్ అజి పొగిజని లెకెండ్ ప్రబు మిజీ సాయం కిపిన్.

13 మా ప్రబువాతి యేసు వన్ని నీతి నిజాయితి మని వరి వెట వాని వలె, మా బుబ్బాతి దేవుణు ఎర్దు మీరు ఇని కరయ సిల్లెండ, నీతి నిజాయితిదాన్ మండ్రెళ్ల, మీ మన్కుదు దేవుణు మిజీ సత్తు సిపిన్.

4

దేవుణుదిళ్ల ఇస్టమాతి లెకెండ్ బత్తిని వందిళ్ల

1 తంబెరిజాండె, దేవుణుదిళ్ల ఇస్టం ఆతివజ ఎలాగ బత్తిదెళ్ల ఇజి మాపు మిజీ నెస్సిస్త మనావ్. మీరు అయాలెకెండ్ నె కిజినిదెర్. గాని అక్కరదిళ్ల, మాపు మిజీ యేసుప్రబు పేరుదాన్ గటిజ సారిసి సారిసి వెహ్టిగిక్ ఇనిక ఇహిజ మీరు అయ లెకెండ్ మరి ఒదె నెగెణ్ కిజి మండ్రు.

2 యేసుప్రబు బాణిళ్ల మజి దోహ్కీ అతికారమ్దాన్ మాపు మిజీ నెస్సిస్కెళ్ల ఇనికెళ్ల ఇజి మీరు నెసినిదెర్.

3 మీరు దేవుణు వందిళ్ల ఒప్పజిప్పి వన్ని వందిళ్ల కేట ఆతికార్ ఆజి మండ్రెళ్ల ఇజినె దేవుణు ఇస్టమాజినాన్. మీరు రంకు బూలానిక ఆవద్ ఇజినె దేవుణు కోరిజినాన్.

4 అక్కాదె ఆవండ్ దేవుణు మీ ఒడోల్దిళ్ల మని ఆనదిళ్ల సరి సివండ్, ఒరెన్ సొంత ఒడోల్దిళ్ల ఇని పాపమ్దిళ్ల సొవండ్ ఎలాగ తగితి లెకెండ్ దేవుణుదిళ్ల ఇస్టమాతి వజ అడిదెళ్ల ఇజి మీరు ఒరెన్ ఒరెన్ నెస్టెళ్ల వలె.

5 మీరు, దేవుణుదిళ్ల నెనెఇ, దేవుణుదిళ్ల నమ్మిఇ వరిలెకెండ్, ఉత్పుత ఆజి మండ్రెళ్ల ఆవద్.

6 ఎయెన్ బా, ఉత్పుత ఆజి, వన్ని వెట మన్ని నమ్మిత్తికానాతి ఒరెన్ తంబెరి ఆల్ని వెట, కూడజి మంజి, వన్నిళ్ల మొసం కిదెళ్ల ఆవద్. యా లెకెండ్ కిని వరిళ్ల దేవుణు సిక్కు సీనాన్. దిన్ని వందిళ్ల మాపు ముజాల మీ వెట కనితం వెహ్టా మహావ్.

7 ఎందనిళ్ల ఇహిజ. రంకు బూలాజి బత్తిదెళ్ల ఇజి దేవుణు మజి కూకెళ్ల సిల్లెన్, గాని పాపం నీతి నెగ్గి బత్తు బత్తిదెళ్ల ఇజినె కూక్ మనాన్.

8 అందెజి యా బోదదిళ్ల నెక్కి పొక్కికాన్, లోకుదిళ్ల నెక్కి పొక్పన్ గాని దేవుణు ఆత్మదిళ్ల మిజీ నీజిని దేవుణుదిళ్ల నెక్కి పొక్కికాన్ ఆజినాన్.

9 తంబెరిజి నడిఃమి, ఒరెన్ వన్నిళ్ల మరి ఒరెన్ వన్ని వెట మన్ని ప్రేమ ఎలాగ మండ్రెళ్ల ఇజి, మాపు మిజీ ఏలు రాస్టెళ్ల అవ్నరం సిల్లెద్. ఒరెన్ మరి ఒరెన్ వన్నిళ్ల ఎలాగ ప్రేమిసి మండ్రెళ్ల ఇజి దేవుణునె మిజీ నెస్సిస్త మనాన్.

10 నిజమె మాసిదొనియ ప్రాంతమ్దు మనిక తంబెరిజి విజెరిళ్ల మీరు ప్రేమిసినిదెర్. గాని మీరు మరి ఒదె ప్రేమిసి మండ్రెళ్ల ఇజి మాపు సారిసి సారిసి వెహ్టినావ్.

11 మాపు ముజాలల్లె మిజీ ఆడ్ర సిత్తిమహి లెకెండ్ సార్దిదాన్ బత్తిదెళ్ల ఆన ఆజి మండ్రు. మరి మీ కికాణిళ్ల మీ వందిళ్ల పణి కిజి మండ్రు మహివరి సజతిజ లొఇ బుర డుఃత్వండ్, మీ పణిళ్ల సుడఃజి మండ్రు.

12 నస్తివలె మీ బత్తు సడఃజి నమ్మిఇకార్ మిజి గవ్నరం సీనార్. మరి మీరు, మహి వరి మున్కు ఇనిదని వందిళ్ల బా ఆదారం ఆవండ్ మంజినిదెర్.

ప్రబు మర్జి వాని వందిళ్ల

13 తంబెరిజాండె, దేవుణు మున్ను, నమకం ఇట్టి సాతివరిజ్ ఇనికా జర్గినాదలె ఇజి మీరునెసి మండ్రెజ్ ఇజి మాపు కోరిజినావ్. ఎందనిజ్ ఇహిజ దేవుణు ఎర్దు ఇని ఆన సిలి నమ్మిఇ వరి లెకెండే మీరు దుకం ఆవీండ మండ్రెజ్ వలె ఇజి మాపు కోరిజినావ్.

14 యేసుప్రబు సాతండ్రి మరజి నిజితాన్ ఇజి మాటు నమ్మిజినాత్. అయలెకెండెనె యేసుప్రబు మున్ను, నమ్మకం ఇడేజి సాతివరిజ్బా దేవుణు యేసు వెట కూక్కు తనాన్.

15 అందెజె ప్రబు ఆతి యేసు వెప్టి మని మాట అసి మాపు మిజి దయరమ్దాన్ వెహ్నినిక ఇనిక ఇహిజ, ఏలు బత్తిజిని మాటు, యేసు ప్రబు మరజి వాని రోజు బత్తిజి మహిజ్బా, ప్రబు మున్ను, నమకం ఇడేజి సాతి వరిజ్ ఇక ముజాల వన్ని డగ్రు సాండ్రెజ్ అట్వీట్. వారి ముజాల సానార్లె.

16 ప్రబువాతి యేసుక్రీస్తు వన్ని గొప్ప పెరి జాటుదాన్ ఆడ్ర సీజి, విజి దాతారి మున్ను, నెయ్యి, ఆతి దూత జాటుదాన్, దేవుణుది గొప్ప పెరి జోడుబంగ ఊక్కి జాటుదాన్ పరలోకమ్దాన్ డిజ్గి వానివలె, యేసుప్రబు మున్ను, నమకం ఇడేజి సాతికార్ ముజాల నిజ్నార్లె.

17 నన్వలె బూమి మున్ను, బత్తిజిని మాటు యేసుప్రబుజ్ దనుల్ ఆదెజ్ ఆకానమ్దు మని మొసాపుదు వరివెట పెరి ఆనార్లె. అయాలెకెండే మాటు ప్రబు వెట ఎలాకాలం మంజినార్లె.

18 అందెజె మీరు యా మాటజాణిజ్ ఒరెన్ మరి ఒరెన్ వన్ని వెట దయరం వెహ్ని మండ్రు.

5

1 తంబెరిజాండె, ఎస్తివలె అప్రెజ్ విజి జర్గినాదలె ఇజి, ఆ గడియ వందిజ్నో, ఆకెజ్ ఎలాగ జర్గెనె ఇని వందిజ్నో మాపు మిజి రాస్తాజ్ అవ్నరం సిల్లెద్.

2 ఎందనిజ్ ఇహిజ, ఎయెరబా ఒడేబిఎండ మనివలె రెయ్య, డోజి కిడిజ్ డోజారి ఎలాగ వానాండ్రొ, అయా లెకెండెనె ప్రబు వాని దినంబా మంజినాద్ ఇజి మీరు బాగ నెసినిదెర్.

3 “నమదనమ్దాన్ మనావ్, మజి ఇని తియెల్ సిల్లె”, ఇజి లోకుర్ వర్గిజి మంజిని వలెనె, పొటాదు మన్ని బోదెలిదిజ్ ఎలాగ ఏరు ఈబాని నొప్పి వానాడొ, అయలెకెండెనె వెటనె నానసం వరి మున్ను, వానాదలె. అందెజె ఎయెరబా తప్రు ఆదెజ్ అట్వీర్.

4 తంబెరిజాండె, ఇనికబా ఒడేబిఎండ మనివలె, ఒరెన్ డోజారి లెకెండే అయా దినం మీ మున్ను, వాతిజ్బా మీరు బమ్మ ఆఇదెర్. ఎందనిజ్ ఇహిజ, మీరు దిని వందిజ్ నెన్విండ సీకటిదు బత్తిని కిడిర్ ఆఇదెర్.

5 మీరు విజదెర్ జాయ్దు పుట్టి నని వరి లెకెండే మనిదెర్, వెడెదిజ్ పుట్టి నని వరి లెకెండే మన్నిదెర్. మాటు రెయ్యుదిజ్ పుట్టి నని వరి లెకెండే ఆవట్.

6 అందెజె మాటు మహి వరి లెకెండే నిద్ర కిజి మన్విండ మా మున్నుదిజ్ అడిజి తెలిదాన్ మంజినాత్.

7 నిద్ర కినికార్ రెయ్యు నిద్ర కిజినార్. ఉణిజి సోస్సికార్ రెయ్యు, సోసి మంజినార్.

8 మాటు వేలిదిజ్ పుట్టి నని వరి లెకెండే మనికాత్. అందెజె మాటు మా మున్నుదిజ్ అడిజి, దేవుణు మున్ను, మని నమకమ్ని ప్రేమ, మజి గుండెదిజ్ అడు కిని ఉండ్రొ ఇనుము సొక లెకెండే తోడుగినాత్. మరి దేవుణు మజి రక్తిసాన్లె ఇజి వన్ని వందిజ్ ఆనదాన్ ఎర్దు నుడేజి మంజినిక, మజి బురాదిజ్ అడు కిని ఇనుము టోపి లెకెండే తోడిగిజి మంజినాత్.

9 ఎందనిజ్ ఇహిజ, మా ప్రబువాతి యేసుక్రీస్తు మజి రక్తిస్తాజ్ ఇజి దేవుణు మజి వీరపాటు కిత్తాన్. గాని వన్ని బాణిజ్ వాని సిక్స వందిజ్ అవద్.

10 మాటు బత్తితి మహిజ్బా, సాతి మహిజ్బా, వాండ్రు మరజి వానివలె వన్నివెట మజి బత్తిస్తాజ్నెనె యేసుక్రీస్తు మా వందిజ్ సాతాన్.

11 అందెజె మీరు ఏలు కిజిని లెకెండెనె ఒరెన్ మరి ఒరెన్ వన్ని వెట దయరం వెహ్ని, ఒరెన్ వన్నిజ్ దేవుణు మున్ను, మని నమ్మకమ్దు పిరిని లెకెండే సాయం కిజి మండ్రు.

12 తంబెరిజాండె, యేసుప్రబు బాణిజ్ మన్ని అతికారమ్దాన్ మిజి నెస్సిసి, బుది వెహ్ని, మీ నడిమి కస్తబాడిజి దేవుణు వణి కిని వరిజ్ గవరం సీదు ఇజి మిజి బతిమాలజినావ్.

13 వారు కిజిని పణి వందిజ్ వరిజ్ నండో ప్రేమిసి గవరం సీజి మండ్రు. ఒరెన్ మరి ఒరెన్ వన్ని వెట నిపాతిదాన్ బత్తిజి మండ్రు.

14 తంబెరిజాండె, మాపు మిజి వెప్పినిక ఇనిక ఇహిజ, బదకమదాన్ మని వరిజ్ మీరు బుద్ది వెప్తు. విసారం అస్తి మనివరిజ్ దయరం వెప్పి మండ్రు. దేవుణు ముస్సు మని నమకమదు పిరిదెజ్ అట్ఇ వరిజ్ సాయం కిజి మండ్రు. విజేరె వెట ఒరిసి మండ్రు.

15 ఎయెన్బా వన్ని వెట మరి ఒరెన్ కితి సెఇ పణిదిజ్ మర్ది సెఇ పణిజ్ కివిండ సుడోదు. ఎస్తివలెబా ఒరెన్ మరి ఒరెన్ వన్ని వెట కనికారమదాన్ మండ్రు. లోకుర్ విజెరె వెటబా కనికారమదాన్ మండ్రు.

16 ఎస్తివలెబా సర్దదాన్ మండ్రు.

17 డిన్విండ పార్దనం కిజి మండ్రు.

18 ఎలాగ మర్ది సమయమదుబా విజి దనిజ్ దేవుణుదిజ్ వందనమ్కు వెప్పి మండ్రు. యేసుక్రీస్తుజ్ నమ్మిత్తి మని మీరు యాలెకెండ్ మండ్రెజ్ ఇజినె దేవుణు కొరిజినాన్.

19 మీ లొఇ మని దేవుణు అత్తిదిజ్ నప్పాట్.

20 దేవుణు బాణిజ్ వాతి దేవుణు ప్రవక్తరు వెప్తి మాటజ నెక్కి పొక్కాట్.

21 విజి వనకాజ్ పరిస కిజి నెగ్గి దనిజ్ డగ్గు కిదు.

22 సెఇ విజి వన్యాజ్ దూరం కిదు.

23 నిపాతిదిజ్ ప్రబువాతి దేవుణునె మిజి పూర్తి నెగ్గికార్ కిపిన్. మా ప్రబువాతి యేసుక్రీస్తు వానిదాక వన్ని ఎర్దు మీ దేవుణు అత్తాని, మీ పాణం, ఒడోల్ విజి ఇని నిందెజ్ సిల్లెండ దేవుణు కాపాడోజి మనీన్ ఇజి నాను పార్దనం కిజిన.

24 మిజి కూక్కి మని దేవుణు నమ్మకమాతికాన్. అందెజె వాండ్రు వెప్తి లెకెండె కినాన్.

25 తంబెరిజాండె, మా వందిజ్ పార్దనం కిదు.

26 పూర్తి నెగ్గి మన్సుదాన్ పొంపిజి ముద్దు కిజి తంబెరిజ్ విజెరిజ్ వందనమ్కు వెప్తు.

27 తంబెరిజ్ విజెరిజ్ యా ఉత్తం నద్విజి వెన్పిస్తెజ్ ఇజి ప్రబువాతి యేసుక్రీస్తు పేరుదాన్ మిజి బతిమాలిజిన.

28 మా ప్రబువాతి యేసుక్రీస్తు దయాదర్పం మీ వెట మనీద్.

అపొస్తుడు ఆతి పవులు తెస్సలోనిక పట్టుమది నమ్మిత్తి వరిజ్ రాస్తి రుండి ఉత్తం

నెల్వ కిబిసినిక

ఇక్క అపొస్తుడు ఆతి పవులు దెస్లోనిక పట్టుమదు మహి దేవుణు సజమ్మది వరిజ్ రాస్తి మన్ని రుండి ఉత్తం. సీలాని తిమోతి ఇనికార్ దెస్లోనిక పట్టుమదు సొన్ని, అపొస్తుడు ఆతి పవులు రాస్తి ఉత్తం సీజి మర్ది వాత్తి వెనుక యా ఉత్తం రాసి ఆత మనాద్ ఇజి ఒడఃబిజినార్.

యా ఉత్తమదు మొదోహి ఉత్తమదు మన్ని దన్నిజ్ సమానమాతి మాటెజ్ మన్నె. (ఉంత్రి దెస్లోనిక నెల్వ కిబిసినిక నుడఃదు). రుండి ఉత్తమకాజ్, వాండ్తు కిత్తి సువార్త పణిదాన్ తయారాతి మన్ని సజమ్కాజ్ వన్ని మన్నుదు మన్ని బాద, పవులు తోరిసినాన్. తప్పు బోదదిజ్, అబద్దం నెస్సిసిని వరిజ్ లోజిజి మన్ఎండ, గటిజ నిల్చి మండ్తు ఇజి పవులు వరిజ్ ఎత్తు కిబిసినాన్.

యేసుప్రబు మర్ది వాని వందిజ్ యా ఉత్తమదు రాస్త మనాద్. (రుండి దెస్లోనిక 1:9-10; 2:1-3). యేసుప్రబు సిలువాదు సాజి, మర్ది నిజితి వెనుక ఇంజు ముంజు 17-20 పంటెజ్ డాట్టి వెనుక పవులు ఇక్క రాస్తిన్ ఇజి విజెరి ఒడఃబిజినార్ దేవుణు మున్ను, నమ్మకం ఇట్టి వరిజ్ వాని కాలమ్దు ఇనిక ఆనాద్ ఇజి నెస్సిన్జెజ్, మరి వారు నమకం డిఃన్ఎండ గటిజ నిల్చిమండ్రెజ్ ఇజి యా ఉత్తం రాస్తిన్.

1 బుబ్బాతి దేవుణుదిజ్ని ప్రబు ఆతి యేసు క్రీస్తుజ్ నెందితి మని దెస్లోనిక పట్టుమది దేవుణు సజమ్దిజ్ పవులుని సిలువానుని తిమోతి రాసిని ఉత్తం.

2 బుబ్బాతి దేవుణుని ప్రబు ఆతి యేసుక్రీస్తు, దయాదర్మమదాన్ మీరు నిపాతిదాన్ మండ్రెజ్ సాయం కిప్పిర్.

3 తంబెరిజాండ, మాపు ఎస్తివలెబా మీ వందిజ్ దేవుణుదిజ్ వందనమ్కు వెప్పినె మండ్రెజ్ వలె. ఆయ లెకెండ వెప్పినిక, కిదెజ్ మన్ని సరి ఆతి సజతిసె. ఎండనిజ్ ఇహిజ దేవుణు మున్ను మని మీ నమకం మరి నండో అజి పిరిసినాద్. ఒరెన్ వన్నిజ్ మరి ఒరెన్ వన్ని వెట మని ప్రేమ మీరు విజెదెరి లోఇ మరి నండో అజినాద్.

4 అందెజి మీరు, డిఃన్ఎండ హిమ్మెజ్ ఒరిసిని వందిజ్, ప్రమెజ్ ఒరిసి మహిజ్బా దేవుణు మున్ను మని నమకమ్దు మీరు ఎలాగ గటిజ నిల్చి మంజనిదెర్ ఇజి మహి దేవుణు సజమ్కాజ్ మీ వందిజ్ మాపు పొగడిజి వెప్పినావ్.

5 నీతి నిజాయ్దుదాన్ దేవుణు తీర్పు సిజినాన్ ఇని దనిజ్ యాకెజ్ విజు రుజువ్ అజినె. దేవుణు కిని ఏలుబుడిదు మండ్రెజ్ మీరు తగ్గికిదెర్ అజనిదెర్. దని వందిజ్నె యా కస్టమ్కు విజు మీరు ఒరిసినిదెర్.

6-8 మా ప్రబు ఆతి యేసు నేగడిజిని సిసు కొనెజాణిజ్ వన్ని గొప్ప సత్తుమని దూతెజి వెట పరలోకమ్దాన్ తోరె ఆనివలె, దేవుణుదిజ్ నెన్ఇ వరిజ్నె, మా ప్రబు ఆతి యేసు సువార్త మాటెజ్ లోజిజి వరిజ్ సిక్కు సీనాన్లె. దేవుణు నీతి నిజాయ్దుమనికాన్. అందెజి నస్తివలె మిజి ప్రమెజ్ కితి వరిజ్ ప్రమెజ్ మరజి సీనాన్లె. ప్రమెజ్ ఒరిస్తిమని మిజిని, మజి రెంబిస్సాన్లె.

9 నస్తివలె యేసుప్రబు సెజి వరిజ్ వన్ని ఎద్దుహాన్, వన్ని గొప్ప సత్తుదాన్, వారు వన్ని డగ్రు మన్ఎండ దూరం కిజి ఎలాకాలం మంజిని నాననమ్దాన్ సిక్కు సీనాన్లె.

10 అయా రోజు, వన్నిజ్ నెందితి వరివెట వన్ని గొప్ప జాయ్ తోరె అదెజ్, మరి వన్నిజ్ నమ్మిత్తికార్ విజెరి బమ్మ ఆని లెకెండ వరి నడిఃమి ప్రబు వానివలె మాపు వెప్తి మా సాస్యమ్కు నమ్మిత్తికిదెర్ ఆతి మీరుబా వరి వెట మంజనిదెర్లె.

11 యాకా మా మన్నుదు మంజి, మిజి వాండ్తు కూక్తి దనిజ్ తగ్గికిదెర్ లెకెండ దేవుణు మిజి నుడఃదెజ్ ఇజి, మరి మీ నెగ్గి ఉదెనమ్కు విజు, మరి మీరు వన్ని మున్ను ఇడ్డి మని నమ్మకమ్దాన్ కిజిని విజు వణిజ్ దేవుణు వన్ని సత్తుదాన్ పూర్తి కిదెజ్ ఇజి మాపు మీ, వందిజ్ ఎస్తివలెబా దేవుణుదిజ్ పార్దనం కిజినావ్.

12 మా దేవుణు బాణిజ్‌ని ప్రబు ఆతి యేసు క్రీస్తు బాణిజ్ వాతి దయా దర్శమదాన్ యేసు ప్రబు పేరు మీ నడిమి గొప్ప పెరిక ఆదెజ్, మరి మీరు వన్ని వెట కూడ్డి గొప్ప పేరు పొందితికిదెర్ ఇజి తొర ఆదెజ్ ఇజి మాపు యా లెకెండ్ మీ వందిజ్ దేవుణుదిజ్ పార్దనం కిజినాన్.

2

దేవుణుదిజ్ పడిఃఇకాన్

1-2 తంబెరిజాండె, మా ప్రబు ఆతి యేసు క్రీస్తు మర్ది వాని దినమ్ వందిజ్‌ని మాటు వన్ని వెట కూడ్డి మంజిని వందిజ్ ఏలు వెప్పొనాన్. ప్రబు ఆతి యేసు వాత మనాన్ ఇజి ఉండ్రి ప్రవక్త మాటదానో, మా బాణిజ్ వాతి లెకెండ్ ఉండ్రి ఉత్రం వాతాద్ ఇజినో, కబ్బు వాతాదిజినో వెంజి గజిబిజి ఆజి మీ మన్ను నెద్రిన్‌విండ, తియెల్ ఆవిండ మండ్రెజ్ ఇజి మాపు మిజి బతిమాల్లినాన్.

3 ఎయెర్‌బా ఇని పణి కిజి మిజి మోసం కివిండ జాగర్త మండ్రు. (అయ దినం ఏలు దాక రెవిదె). లోకుర్ నండొండార్ దేవుణుదిజ్ పడిఃఇ పణిజ్ కిజి టంటెజ్ ఆనార్దె. మరి దేవుణు రూలుజ విజు పడిఃఇ కిజిని నాసనమ్‌దిజ్ తగ్గికాన్ ఆతి సెఇకాన్ తొర ఆనిదాక అయ రోజు రెవిదె.

4 దేవుణు ఇజి పేరు ఇడెఃఆతి మని విజు వన్నాజ్, పూజెజ్ కిబి ఆజిని విజు వసకాజ్ పడిఃవిండ పణిజ్ కిజి, అయ విజు వన్నాజ్ మున్ను వన్నిజ్ వాండ్రె దేవుణు ఇజి వెప్పొడ్రె, వాండ్రు దేవుణు గుడిఃదుబా సొన్ని బన్నాన్.

5 నాను మీ వెట మహిపలె యా సజతిజ్ మీవెట వెప్పొ మహిక మీరు ఎత్తు కిజెదెరా?

6 వన్ని వందిజ్ ఏర్పాటు కితి మని గడిఃయాదునె వాండ్రు తొర ఆదెజ్ వలె. అందెజె, ఏలు నాసనమ్‌దిజ్ తగ్గికాన్ ఆతి వన్నిజ్ అడ్డు కిజి నిల్‌నిక ఇనికాదొ ఇజి మీరు నెస్సిదెర్.

7 దేవుణు విజు రూలుజ పడిఃఇ పణి కిజిని డాఃజితి మని సత్తు ఏలుబా పణి కిజినాన్. గాని దనిజ్ అడ్డు కిజి నిల్‌ని మంజినికాన్ నడిఃమిహాన్ లాగె ఆనిదాక యా లెకెండ్ అడ్డు కిజి మంజినాన్.

8 నస్సివలె దేవుణు రూలుజ పడిఃఇ పణిజ్ కినికాన్ తొర ఆనాన్‌లె. వన్నిజ్ మా ప్రబు ఆతి యేసు వన్ని వెయ్యుదాన్ వాని ఊప్పిదాన్ సప్పి, వాండ్రు వానివలె మంజిని గొప్ప జాయ్‌దాన్ వన్నిజ్ నాసనం కినికాన్‌లె.

9-10 దేవుణు రూలుజ పడిఃఇ పణిజ్ కినికాన్ తొర ఆనివలె సయ్యాసు వన్ని సత్తుదాన్ రకరకమ్‌ది బమ్మ పణిజ్‌ని గొప్ప పెరి పణిజ్ కిజి, నాసనం ఆజి సొని వరిజ్ విజెరిజ్ మోసం కిదెజ్ విజు సెఇ పణిజ్ కిజి తొరొన్నాన్. ఎండనిజ్ ఇహిజు నిజమాతి దనిజ్ ప్రేమిని దేవుణు వరిజ్ రక్సిన్దెజ్ వారు ఒవ్‌వెతార్. అందెజె వారు నాసనం ఆజి సొన్నినార్.

11 అందెజె వారు అబదమ్‌దిజ్ నమ్మిని లెకెండ్ మోసం కిని సత్తుదిజ్ దేవుణు వరి మున్ను పొక్కాన్.

12 అందెజె, నిజమాతి దనిజ్ నమ్మివిండ సెఇదని వెట సర్ద ఆతి విజెరిజ్ దేవుణు సిక్స సీనాన్.

గటిజు నిల్పి మండ్రు

13 గాని మీ వందిజ్ ఎస్సివలెబా దేవుణుదిజ్ మాపు వందనమ్‌కు వెప్పొ మండ్రెజ్ వలె. యాక కిజి మంజినిక సరి ఆతి పణినె. తంబెరిజాండె ఎండనిజ్ ఇహిజు దేవుణు ఆత్మ వన్ని నెగ్గెక కిజిని పణిదాన్, మీరు నిజమాతి దనిజ్ నమ్మిజు దేవుణు మిజి రక్సిన్దెజ్ ఇజి, దేవుణు యా లోకం పుట్‌ఎండ ముజాలె మిజి ఎద్దిస్త మహాన్.

14 మీరు యా లెకెండ్ యేసుప్రబు వెట వన్ని గొప్ప పెరి జాయ్‌దు మండ్రెజ్ అక్కు మనికిదెర్ ఆదెజ్ ఇజి మాపు వెప్పొ సువార్దాన్ దేవుణు మిజి కూక్ మనాన్.

15 అందెజె తంబెరిజాండె, మాపు మాటాదానో ఉత్రమ్‌దానో మిజి నెస్సితికెజ్ డిఃన్‌విండ మీ మన్నుదు ఇడ్డి కర్దివిండ మండ్రు.

16-17 మజి ప్రేమిని ఎలాకాలం ఎద్దు సుడ్ఃజి మంజిని ఆసని, ఉసార్ మా మన్నుదు వన్ని దయాదర్శమదాన్ మజి సీతి మా బుబ్బాత్తి దేవుణుని, మా ప్రబు ఆతి యేసు క్రీస్తు మీ మన్నుజ దయెరం వెప్పొ, మీ విజు నెగ్గె మాటాదుని, మీరు కిజిని నెగ్గె పణిదు సత్తు సిజి నడిఃపిసీర్.

3

పార్లనం కిజి మండ్రు

1 కడెవేరిది మాట ఇనిక ఇహిజ, తంబెరిజాండె, ప్రబు మాటెజ్ మీ నడిమి సారెతి లెకెండ మహిబాన్ బా మరి బేగి సార్లెజ్, గవరం లొనె ఆదెజ్ ఇజి మీరు మా వందిజ్ పార్లనం కిజి మండ్రు.

2 విజెరిజ్ నమకం సిల్లెద్ గదె, అందెజె మాపు మూర్కతమ్దు మని వరి బాణిజ్ నె ఇ వరి బాణిజ్ తప్పె ఆనిలెకెండబా మా వందిజ్ పార్లనం కిదు.

3 అహిజ ప్రబు నమ్మిదెజ్ తగ్గికాన్ అందెజె వాండ్రు మిజి సత్తు నీజి నె ఇ వన్ని బాణిజ్ వాండ్రు కాపాడ్వాన్.

4 ఇక్కెజ్ మీరు కిజి మండ్రెజ్ ఇజి మాపు మిజి ఆడ్ర సితిమనికెజ్ అయాలెకెండ మీరు కిజినిదెర్. మరి కిజి మంజినిదెర్లె ఇజి ప్రబు పేరుదాన్ మాపు మన్నుదు ఒడెబిజినాన్.

5 దేవుణు మున్ను మని ప్రేమని, మరి మీరు ఎలాగ కన్యమకు ఒరిస్తెజ్ ఇజి యేసుక్రీస్తు తోరిస్తె లెకెండ ఒరిస్తెజ్ మీ మన్నుదు రేపె ఆజి మండ్రెజ్ దేవుణు మిజి సాయం కిపిన్.

బండెజ్ ఆదెజ్ ఆవిద్

6 తంబెరిజాండె, మా బాణిజ్ మీరు నెస్తిమని లెకెండ ఆవిండ బదకమ్దాన్ మంజిని వరిజ్ గుర్తు కిజి, వరి బాణిజ్ మీరు ఏడాః డిసి మండ్రు ఇజి మా ప్రబు ఆతి యేసుక్రీస్తు పేరుదాన్ మిజి ఆడ్ర సితి లెకెండ వెహ్సినాన్.

7 మజి నుడెజి మా లెకెండ ఎలాగ నడిచెజ్ ఇజి మీరు నెస్సిదెర్ గదె. మాపు మీ వెట మహివలె బదకమ్దాన్ మనివితాప్.

8 మాప్ ఎయెర్ బాణిజ్ బా నెడ్డిః నె తిండి ఉణివితాప్. ఎయెన్ మున్నుబా ఆదారం ఆవిండ మాపు రెయు పొగల్ కన్యబాడెజి పణి కిజి మహిక మీరు నెస్సిదెర్.

9 మీ బాన్ లొని ఉండెజ్ అతికారం సిల్లెద్ ఇజి ఆవిద్. గాని మీరు మజి నుడెజి నెసి అయా లెకెండ మండ్రెజ్ ఇజి మాపు అయా లెకెండ ఇనికబా లొన్ ఎండ పణి కిజి మహాప్.

10 మరి మాపు మీ నడిమి మహివలె “ఒరెన్ పణి కవిండ మహిజి వాండ్రు బోజనం కిదెజ్ ఆవిద్”, ఇజి మిజి రూలు సిత్తాప్.

11 మీ లొఇ సెగొండార్ వరి సొంత పణి ఇనికబా కివిండ, అనవునరమ్దిజ్ ఆఇవరి నజతిజ్ లొఇ బుర్ డుక్కి మంజినార్ ఇజి మాపు వెహాప్.

12 ననికార్ వారు కిజిని అవనరం సిల్లి పణిజ్ డిసి సిజి నిపాతి పణి కిజి, వరి తిండి వందిజ్ గణస్తెజ్ ఇజి మా ప్రబు ఆతి యేసుక్రీస్తు పేరుదాన్ బతిమాల్జి ఆడ్ర సితి లెకెండ వెహ్సినాన్.

13 మరి తంబెరిజాండె మీరు నెగ్గికెజ్ ఆతికెజ్ కిదెజ్ ఎనెజ్ బా వందిదెజ్ అవిద్.

14 మాపు యా ఉత్తమ్దు రాస్తి పొక్కి మాటెజ్ లొజి ఇ వన్నిజ్ గుర్తు కిదు. వాండ్రు సిగు ఆని వందిజ్ వన్ని వెట కూడెవిండ మండ్రు.

15 అహిజ వన్నిజ్ వగాతి వన్ని లెకెండ ఒడెబివిండ తంబెరి లెకెండ ఒడెబిజి వన్నిజ్ బుది వెహ్సె.

16 నమదాన్ ముదిజ్ ప్రబు ఆతికాన్ ఎస్తివలెబె ఎలాగ మర్తి కాలమ్దుబా మిజి నిపాతిదాన్ మండ్రెజ్ సిపిన్. ప్రబు మీ విజెరె వెట ఎస్తివలెబా మనిన్.

17 పప్పులు ఇని నాను, నా కియదాన్ యా కడెవెరి మాటెజ్ రాసిన్. నా విజి ఉత్తమ్దు యాకాదె గుర్తు. అందెజె నాను ఎలాగ రాసిన్ ఇజి మీరు పొల్లిస్తెజ్ అట్టిదెర్.

18 మా ప్రబు ఆతి యేసు క్రీస్తు దయా దర్మం మీ విజెరె వెట మనిద్.

అపొస్తుడు ఆతి పవులు తిమోతిజ్ రాస్తి ఉండ్రీ ఉత్తం

నెల్వ కిబిసినిక

అపొస్తుడు ఆతి పవులు తిమోతిజ్ రాస్తి ఉండ్రీ ఉత్తమనె యాక. ఎపెసి పట్టుమీదు మని దేవుణుదిజ్ నమ్మిత్తి వరి నజమదిజ్ నడిపిస్సి వన్ని లెకెండ తిమోతిజ్ ఏర్పాటు కిత మనాన్. అందెజె, నజం నడిపిస్సిక ఎలాగ, నడిపిస్సి ప్పార్వరుజు, పెద్దెల్బు ఎలాగ మండ్రెజ్ ఇని దనివందిజ్ వెప్పినాన్.

ఎపెసి పట్టుమీదు నండో రకమకాణి గుడిజ్ మన్నె. దేనమకాజ్ నండో లోకుర బాన్ వానార్. అందెజె క్రీస్తు వందిజ్ నిజమాతి బోదదిజ్ కూడఃఇకెజ్ నెన్పిస్సికార్ నండోడార్ మనార్. వరి వందిజ్ జాగ్రత మండ్రు. నని బోద తపిస్సివరిజ్ బాణిజ్ దూరం ఆదు ఇజి వెప్పినాన్.

1-2 క్రీస్తు యేసుజ్ అపొస్తుడు ఆతి పవులు ఇని నాను తిమోతిజ్ రాసిన్. నీను నా సొంత మరిన్ లెకెండ మని. ఎందనిజ్ ఇహిజు నానె నిజి దేవుణు దరోట్ తత. మజి రక్సిసిని దేవుణు వెప్తి ఆడ్ర వజ, మాటు ఆనదాన్ ఎర్తు సుడఃజిని క్రీస్తు యేసు వెప్తి ఆడ్ర వజ, నాను క్రీస్తు యేసుజ్ అపొస్తుడు ఆత. బుబ్బు ఆతి దేవుణుని ప్రబు ఆతి క్రీస్తుయేసు దయా దర్మమదాన్, మీ మున్ను కనికారం తోరిసి, మీరు నిపాతిదాన్ మండ్రెజ్ సాయం కిపిర్.

3-4 నాను మనిదోనియదు సొన్సి మహివలె నిజి వెప్తి లెకెండ, నీను ఎపెనుదు మండ్రెజ్ వలె ఇజి నాను కనితం వెప్పిన. ఎందనిజ్ ఇహిజు, అబె నెగొండార్ తపు బోద నెన్పిసినార్. వారు అయకెజ్ మరి ఎనెజ్బా నెన్పిన్తెజ్ ఆవద్ ఇజి నీను డటం వెప్తిజ్ వలె. వారు డొక్టార్ వెప్పి మంజిని కత సాన్తరమక లోఇ, అంతు సిల్లెండ అని గొగొర్ వందిజ్ వెప్పిని సాన్తరమక లోఇ మన్ను ఇడఃదిజ్ ఆవద్ ఇజి నీను డటం వెప్తిజ్ వలె. అయకెజ్ దేవుణు ఎత్తు కితి సజతిజ అడ్డు కిజి ఒరెన్ వెట ఒరెన్ తర్కిసిని సజతిజ్ నె రేజ్జిని. దేవుణు మున్ను మని నమకం దానె, వాండ్రు ఎత్తు కితి సజతిజ్ నెస్టెజ్ అనాద్.

5 నమ్మిత్తికార్, ఒరెన్ వెట ఒరెన్ ప్రేమిని మండ్రెజ్. అందెజె నీను యా లెకెండ డటం వెప్తిజ్ వలె ఇజి నాను నిజి వెప్పిన. నెగ్గి మన్నుదాన్ వాజిని ప్రేమదాన్, నెగొండ గదిసిని గరబందాన్ వాజిని ప్రేమదాన్, దేవుణు మున్ను మని నిజమాతి నమకమదాన్ వాజిని ప్రేమదాన్, ప్రేమిని మండ్రెజ్.

6 నెగొండార్, మున్ను వెప్తి సజతిజ డిస్ట సొహార పణిదిజ్ రెఇకెజ్ వర్గిజనార్.

7 వారు దేవుణు మోసెజ్ సీతి రూలుజ్ నెస్సిసినికార్ అందెజె కోరిజనార్. గాని ఇని దని వందిజ్ వర్గిజనార్ ఇజినో, నండో దయరమదాన్ నిజమనె ఇజి వర్గిజని సజతిజ వందిజ్నో, వారు నెన్ఎర్.

8 దేవుణు మోసెజ్ సీతి రూలుజ్ వాడుకండెజ్ మని వజి వాడుకొటిజ, అయా రూలుజ్ నెగ్గికెజ్ ఇజి మాటు నెస్సాట్.

9-11 మరి మాటు నెసినాట్, దేవుణు మోసెజ్ సీతి యా రూలుజ్, నాయమదాన్ మని వరిజ్ వరి తప్పజ్ దిదిదెజ్ సిఎన్ ఇజి. గాని రూలుజ్ తప్పి వరిజ్, లోజ్ ఇ వరిజ్, నమ్మి ఇ వరిజ్, పాపిన్టిజ్, దేవుణు బాణిజ్ వాజిని సజతిజ్ ఇజ్ కణకదాన్ సూణి వరిజ్ మతమదిజ్ దూసిస్సి వరిజ్, అయిని అప్పానిరిజ్ నప్పి వరిజ్, లోకాజ్ నప్పి వరిజ్, రంకు బూలాని వరిజ్, మొకకొడః మొకకొడఃరెన్ కూడ్పి వరిజ్, వెట్టిపణి కిదెజ్ లోకురిజ్ అసి పొర్పి వరిజ్, అబద్దం వర్గిని వరిజ్, అబద్దమదిజ్ ఒట్టు కిని వరిజ్, నిజమాతి బోదదిజ్ విరోదం ఆతికెజ్ కిని వరిజ్, నని వరి వందిజె రూలుజ్ సీత మనాన్. నీను మహి లోకురిజ్ వెహా ఇజి, దేవుణు నజి ఒపజెప్తి సువార్తుదు అయా నిజమాతి బోద మనాద్. లోకుర పొగిడిజిని కిజిని గొప్ప పెరి దేవుణు బాణిజ్ అయా సువార్తు వాజినాద్.

పవులు మున్ను దేవుణు తోరిస్సి కనికారం

12-13 ముజాల నాను యేసుప్రబు ఆతి యేసుక్రీస్తుజ్ దూసిస్సికాన్. నమ్మిత్తి వరిజ్ ఇప్పెజ్ కిజి అపా వన్నిజ్ ఇప్పెజ్ కితికాన్. వన్నిజ్ ప్రమెజ్ కితికాన్. అహిజ్బా నాను నమ్మిదెజ్ తగ్గుకాన్ ఇజి వాండ్రు ఒడిబిజి, మహివరిజ్ సువార్తు వెప్పిని వన్ని వణిదిజ్ నజి ఏర్పాటు కిత్తాన్. అందెజె నాను మా ప్రబు ఆతి

క్రీస్తు యేసు నజీ కితి దని వందిజ్ ఎనెజ్బా పోన్ ఎండ మన. వాండ్రునె వన్ని పణి కిదెజ్ నజీ నత్తు సిత్తాన్. నాను యేసుజ్ నమ్మిఎండ మహివలె, తెలిఎండ అక్కెజ్ కిత. అందెజ్ దేవుణు నా మున్ను కనికారం తోరిస్తాన్.

14 మా ప్రబు దయా దర్మమదాన్, వన్నిజ్ నమ్మిదెజ్, మహివరిజ్ ప్రేమిస్తెజ్ నజీ సాయం కిత్తాన్. క్రీస్తుయేసు వెట మాటు కూడితి మని దని దటాన్, నమకమని ప్రేమ నజీ దోహ్కె.

15 పాపం కిని వరిజ్ రక్సిస్తెజ్ క్రీస్తు యేసు లోకమదు వాతాన్ ఇని మాట నిజం ఆతిక. అయాక పూర్తి నమ్మిదెజ్ తగ్గిక. నాను కిత్తి పాపం ససా పాపం కినికార్ కివెర్.

16 గాని, ససా పాపం కితి నా మున్ను దేవుణు కనికారం తోరిస్తాన్. ఎండనిజ్ ఇహిజ, వాని కాలమదు యేసు మున్ను నమకం ఇడఃజి, ఎలాకాలం దేవుణు వెట బత్తిని బత్తు దోహ్కె వరిజ్ నాను ఉండ్రె గుర్తు లెకెండ ఆని వందిజ్, ససా పాపం కితి నజీ, క్రీస్తుయేసు అంతు సిల్లెండ నండ్ బిరిస్తాన్.

17 ఎలాకాలం రాజు ఆతి, ఎనెజ్బా సాఇ, సుడఃజెజ్ అటెఇ ఒరెండ్రె దేవుణుజ్ ఎలాకాలం గవరం సీజి పొగిడిజి మనీర్. ఆమెన్.

18 నా మరిన్ లెకెండ మని తిమోతి యాకదె నాను వెప్పిని బుద్ది 'నీను కిదెజ్ మని వన్యా వందిజ్ ప్రవక్తరు ముజాలె వెప్తా మనార్ గదె. వారు వెప్తా వజని నాను వెప్పిన. వారు వెప్తా మని వజి లోజిజి, తప్ప బోద నెన్ పిస్సి వరిజ్ గటిజి ఎద్రిన్ అ.

19 నా మున్ను మని నీ నమకం డిఃస్సు. గర్బం గదిన్ ఎండ నెగ్రెండ మన్ అ. నెగెండార్, గర్బం గదిసి వెప్పిని దనిజ్ నెక్త పొక్తారె వరి నమకం పాడు కిత్తార్.

20 నని వరి లోఇ, హుమెనియ, అలక్నాండర్ ఇనికార్ మనార్. దేవుణుదిజ్ దూసిస్తెజ్ ఆవిద్ ఇజి వారు నెస్సి వందిజ్, నయేతాను కీదు నాను వరిజ్ ఒపజెప్త మన.

2

నజమదు పార్లనం కిని వందిజ్ వెప్పినాన్.

1 అందెజ్ మరి ముకెలం, లోకుర్ విజెర్ వందిజ్, దేవుణుదిజ్ పార్లనం కిదెజ్. వరిజ్ కావాలిస్తికెజ్ సిఅ ఇజి బతిమాలజి లొస్తెజ్, వరి విజు వన్యా వందిజ్ ఎస్తివలెబా పార్లనం కిదెజ్, వాండ్రు విజెరిజ్ కితి మేలు వందిజ్ వన్నిజ్ వందనమకు వెప్తాజ్ ఇజి నాను మిజి ఉసార్ కిబిన్సు.

2 యా లెకెండ రాజుర్ వందిజ్, అదికారమదు మని విజెర్ వందిజ్ పార్లనం కిదెజ్. ఎండనిజ్ ఇహిజ, మాటు సాంతి సమాదనమదాన్ మహి వరి ఎర్దు నెగ్రెండ బత్తిదెజ్, దేవుణుదిజ్ తియెల్ ఆజి పూర్తి బక్తిదాన్ మండ్రెజ్.

3 యా లెకెండ కినిక నెగెద్. మజి రక్సిస్సి దేవుణుదిజ్ ఇస్సం ఆతిక.

4 ఎండనిజ్ ఇహిజ, లోకుర్ విజెరిజ్ ఎల్లకాలం మని సిక్చదాన్ తప్పిస్తెజ్ ఇజి, లోకుర్ విజెర్ క్రీస్తు వందిజ్ నిజమాతి మాటిజ్ నెస్సెజ్ ఇజి దేవుణు కోరిజినాన్.

5 దేవుణు ఒరెండ్రె. దేవుణు, లోకుర్ నడిఃమి ఒప్పిస్సికాన్ ఒరెండ్రె మనాన్. అయా ఒరెన్ క్రీస్తుయేసునె.

6 వాండ్రు లోకుర్ విజెర్ పాపమకాజ్, ఎల్లకాలం మని సిక్చదాన్ తప్పిస్సి వందిజ్ సాదెజ్ వన్నిజ్ వాండ్రె ఒపజెపె ఆతాన్. యాకదె, దేవుణు ఏర్ పాటు కితి కాలమదు, లోకుర్ విజెరిజ్ రక్సిస్తెజ్ దేవుణు కోరిజిని దనిజ్ సాస్యం.

7 అందెజ్, ఒరెన్ సాటిస్సి వన్ని లెకెండ, అపొస్తుడు లెకెండ, నేర్ పిస్సి వన్ని లెకెండ, యూదురు అఇకార్ యేసు వందిజ్ నిజమాతి సజతిజ్ నెని నమ్మిదెజ్, వరి వందిజ్ దేవుణు నజీ ఏర్ పాటు కిత్తాన్. ఈహు నజీ ఏర్ పాటు కిత్తాన్ ఇజి వెప్పినిక నిజమనె అబద్ధం ఆవిద్.

8 అందెజ్, దేవుణుదిజ్ పార్లనం కిదెజ్ మీరు కూడఃజి వానివలె ఎంబెబా మొకకోడోర్ పార్లనం కిదెజ్ ఇజి నాను కోరిజిన. వారు దేవుణు వందిజ్ కేట ఆతి బత్తు బత్తిదెజ్ వలె. వారు పార్లనం కినివలె, వరి మన్నుదు కోపం సిల్లెండ, ఎయెవెటబ జటిజ్ ఆవిండ కిక్కు పెర్తి కిదెజ్.

9 అయాలెకెండ, దేవుణుడికి పార్లనం కిదెక్ మీరు కూడఃజి వానివలె, బోదెకు నెగ్గెండ తయార అజి, వన్నాక్ తగ్గు వజ తయార అజి వాదెక్. అవికు సొకుజాణిక్ మూల కనిసె, బజారమనె, నండొ కరీదీది పుసాన్ నండొ కరీదీతి పాతెక్ నె పొరపాజి తయార అదెక్ అవిద.

10 గాని దేవుణుడికి నమ్మిజనికెక్ ఇజి వెహె అని బోదెకు మహివరి వందిక్ నెగ్గి పణిక్ కిజి వన్నా సొకు తోరె అదెక్.

11 మొకకొడొరె నెన్ పిస్సివలె, బోదెకు నెగ్గెండ వెంజి, జమ్న మంజి, వరిక్ లొజిజి నెస్టెక్.

12 మొక వరిక్ నెన్ పిస్టెక్ నె వరి మున్ను అతికారం కిదెక్ నె బోదెకాక్ నాను నెల్లె సివి. అవికు జమ్న మండ్రెక్.

13 ఎందనిక్ ఇహిజ, దేవుణు అవ్వెక్ అవిద, ఆదముజునె ముజాలె తయార కిత్తాన్.

14 నయతాను ఆదముక్ అవిద, అవ్వెక్ నె మొసం కిత్తాన్. ఆహె అది పాపమ్దు అర్తాన్.

15 గాని అవికు దేవుణు మున్ను మని నమకం డిన్ ఎండ, మహి వరిక్ ప్రేమిసి, దేవుణుడికి ఒపజెవె అతి లోకు వజ నెగ్గెండ బత్తిదెక్. ఆహె బత్తిజి మహిజ, కొడొరిక్ ఏరుఈబాని వలె దేవుణు బోదెకాక్ రక్సిన్నాన్.

3

1 ఒరెన్ పాస్టరు అదెక్ కోరిజనాన్ ఇహిజ, వాండ్రు నెగ్గి పణి కోరిజనాన్. యా మాట పూర్తి నమ్మిదెక్ తగ్గిక్.

2 పాస్టరు నింద సిలికాన్ అదెక్ వలె. ఉండ్రె అల్లి మంజినికాన్, అణసె అజి మంజినికాన్ అదెక్ వలె. నెగ్గి బుది మంజినికాన్, వని పణిజాణిక్ తగమూతికాన్ ఇజి తోరె అదెక్ వలె. వాతి వరిక్ నెగ్గెండ డగ్రు కినికాన్ అదెక్ వలె. దేవుణు మాట నెగ్గెండ నెన్ పిస్సికాన్ అదెక్ వలె.

3 వాండ్రు సొన్ ఎండ, డెయేనె ఆవిండ మంజినికాన్, సార్దిదాన్ మంజినికాన్, జటిక్ ఆవిండ మంజినికాన్ అదెక్ వలె. వాండ్రు డబ్బుదిక్ ఆస అకాన్ అదెక్ వలె.

4 వాండ్రు వన్ని సొంత ఇండ్రొణి వరిక్ నెగ్గెండ సూణికాన్ అదెక్ వలె. వన్ని కొడొరె ఎస్తివలెబా విజెరిక్ గవరం సీజి, వన్ని మాటదిక్ లొజిజిని వరి లెకెండ వాండ్రు కిదెక్.

5 ఎందనిక్ ఇహిజ, సొంత ఇండ్రొణి వరిక్ నెగ్గెండ సుడెదెక్ నెన్ ఇకాన్ ఇహిజ ఎలాగ దేవుణు సజం నడిపిస్టెక్ అట్నాన్.

6 వాండ్రు కొత్తాక్ నమ్మిత్తికాన్ అజి మండ్రెక్ అవిద. ఎందనిక్ ఇహిజ, కొత్తాక్ నె వన్నిక్ యా పెరి పణిదిక్ ఏరపాటు అత ఇజి గర్ర అజి, నయ్తాన్ ఎలాగ దేవుణు తీర్పు అజి సిక్కుదు అర్త మనాండ్రొ, అయ లెకెండ వీండ్రు బా అర్నాన్.

7 మహికార్ వన్ని వందిక్ నెకెక్ వెహె ఎండ, నయతాన్ సికుదు అరెండ మంజిని వందిక్ నమ్మిఇ వరి ఎర్దు పల్కుబడిః మనికాన్ అదెక్ వలె.

8 అయాలెకెండ, పెద్దెల్జు, విజెరె వన్నిక్ గవరం సీదెక్ తగ్గి వరి లెకెండ మండ్రెక్. వారు రుండి నాలికెక్ మన్ ఇకార్ అదెక్ వలె. వారు సొన్ ఎండ, డబ్బు వందిక్ ఆస గొబు ఆవిండ మంజినికార్ అదెక్ వలె.

9 దేవుణు ఏలు తోరిసి నెన్ పిస్సి డాజితి మహి గొప్ప నిజమాతి నజతిక్, వన్ని గర్బం వన్నిక్ గదిసిని లెకెండ ఆవిండ నెగ్గెండ మంజినికాన్ అదెక్.

10 పెద్దెల్జు ఇజి వరిక్ ఏరపాటు కిని ముజాల, వారు నెగ్గెండ మంజినారా, నమ్మకమ్దాన్ పణి కిజినారా ఇజి సుడెదెక్. నింద సిలికార్ ఇజి వారు రుజువ కితిజ, వారు పెద్దెల్జు పణి కిదెక్.

11 అయాలెకెండ, పెద్దెల్జు బోదెకు, మహికార్ వరిక్ గవరం సీని వరి లెకెండ మండ్రెక్. అవికు సొండిక్ వర్గి ఎండ, సొన్ ఎండ మండ్రెక్ వలె. విజా దని లొఇబా మాపు నమ్మిదెక్ తగ్గికెక్ ఇజి తోరె అదెక్ వలె.

12 పెద్దెల్జు ఉండ్రె అల్లి మంజినికాన్ అదెక్ వలె. వన్ని కొడొరిక్ వన్ని ఇండ్రొమని వరిక్ నెగ్గెండ సుడెఃజి నడిపిస్సికాన్ అదెక్ వలె.

13 నెగ్గెండి పణి కిని పెద్దెల్జు ఎయెన్ వన్నిక్ బా పల్కు బడిః మనాద్. క్రీస్తు యేసు మున్ను మని వన్ని నమకం వందిక్ వెహెక్ వన్నిక్ తియెల్ సిల్దెద్.

14 నీ డగ్గు బేగి వాడెజ్ ఇజి నాను ఆన ఆజిన. అహిజ్ బా, నాను యా సజతిజ్ నిజి రాసిన.

15 ఎందనిజ్ ఇహిజ, నాను వాడెజ్ ఆలెసెం ఆతిజ, దేవుణు కుటుమ్దు ఒరెన్ ఒరెన్ ఎలాగ మండ్రెజ్ ఇజి నీను నెన్సిలె. బల్మజిని దేవుణు సజమదికార్ విజెరెనె దేవుణు కుటుమ్దికార్. ఉండ్రీ నిట కొహి ఉండ్రీ ఇల్లు అరెంండ అన్సి లెకెండ్ దేవుణు సజమదికార్ దేవుణు వందిజ్ నిజమాతికెజ్ అస్సార్. అయాలెకెండ్, ఉండ్రీ పునాది లెకెండ్ దేవుణు సజమదికార్ దేవుణు వందిజ్ నిజమాతికెజ్ అస్సార్.

16 మాటు నమ్మిజిని మతమ్దు మని, యేసుక్రీస్తు వందిజ్ ముజాలె డాజితి మహికెజ్, గాని ఏలు దేవుణు తోరిసి నెన్పిస్సి నిజమాతికెజ్ గొప్పు పెరిక ఇజి ఎయెర్ బా ఒప్పుకొణార్. క్రీస్తు లోకు వజ లోకమ్దు వాతాన్. దేవుణు ఆత్మ, వాండ్రు నీతి నిజాయతి మనికాన్ ఇజి రుజువ్ కిత్తాన్. దేవుణు దూతార్ వన్సిజ్ సుడెతార్. లోకుర్ వన్సి వందిజ్ యూదురు ఆఇ వరిజ్ వెహ్తార్. లోకమ్దు ఎంబెబా, లోకుర్ వన్సిజ్ నమ్మితార్. పరలోకమ్దు దేవుణు వన్సిజ్ ఒత మనాన్.

4

తప్పుబోద నెన్పిసినికార్.

1 కడెవెరి దినమ్కాజ్ నెగొండార్, వారు నమ్మిత్తి నిజమాతి మాటెజ్ డిసి, అబద్దం వర్గిని దెయమ్దు వెట సానార్, అయా దెయమ్దు బోద వినార్ దనిజ్ లోజెనార్ ఇజి దేవుణు ఆత్మ టెటెజ్ వెహ్సానాన్.

2 అబద్దం వర్గిని వేసం కినికార్ యా బోదెజ్ నెన్పిసినికార్. ఇనుముదాన్ సుమాతిజ ఎలాగ మా తోలు సాతి లెకెండ్ ఆనాదో అయ లెకెండ్ వరి గర్బం గదిన్ఎండ సాత మనాన్.

3 పెండ్రీ అనిక తప్పు ఇజి, నెగం రకమ్కాజి ఉణి తినికెజ్ తిండ్రెజ్ ఆవద్ ఇజి వారు నెన్పిస్సార్. గాని దేవుణుదిజ్ నమ్మిత్తి, నిజమాతి మాటెజ్ నెస్సికార్, దేవుణుదిజ్ వందనమ్దు వెహ్సి తిండ్రెజ్ ఇజినె దేవుణు అయాలెకెజ్ తయార్ కిత్తాన్.

4 ఎందనిజ్ ఇహిజ, దేవుణు తయార్ కితికెజ్ విజు నెగ్గికెజె. ఇనికబా నెక్కి పొక్కిక ఆవద్. గాని దేవుణుదిజ్ వందనం వెహ్సి అయాలెకెజ్ తిండ్రెజ్.

5 ఎందనిజ్ ఇహిజ, దేవుణు మాటదాన్, పార్లనదాన్ దేవుణు వందిజ్ కెటె ఆతికెజ్ ఆతె మన్నె.

6 నీను యా సజతిజ్, నీ సజమదు మని తంబెరెనిరిజ్ నెస్సిని మహిజ, నీను క్రీస్తు యేసుజ్ నెగ్గి పణి మనిసి ఆని. దిని వెట, ఏలుదాక నీను నమ్మిజిని నీ నమకం వందిజ్ వెహ్సిని మాటదాన్ నిజమాతి నెగ్గి బోదదాన్ నీను నమకమ్దు పిరిత

7 వర్గిదెజ్ బా విలువ నీలి, డొక్టార్ వెహ్సి మంజిని కత సాన్తరమ్కాజెజ్ నీను దూరం మన్త. గాని దేవుణు వందిజ్ తియెల్ ఆజి బక్తిజి మండ్రెజ్ నీను ఒజ్జ ఆత.

8 ఒడెల్దిజ్ రూణు వాక్కి ఒజ్జ కితిజ నెగెద్. గాని దేవుణు వందిజ్ తియెల్ ఆజి బక్తితి మహిజ, విజు వన్యూ లోఇ గొప్పు లాబం మంజినాద్. ఎందనిజ్ ఇహిజ, అయాలెకెండ్ మహిజ, ఏలుబా నెగ్గి బత్తు మంజినాద్, వాని కాలమ్దుబా నెగ్గి బత్తు మంజినాద్ ఇజి ఒట్టు కిజినాద్.

9 నాను మున్సు వెహ్సి సజతి నమ్మిదెజ్ తగ్గిక. పూర్తి నమ్మిదు.

10 బల్మజిని దేవుణు మున్సునె మా ఆన మాటు ఇట్టా మనాట్. అందెజె మాటు అయా నెగ్గి బత్తు వందిజ్ నండ్ అరల ఆజి కళ్లబడిజినాట్. వాండ్రె లోకుర్ విజెరిజ్ ముకెలం వన్సి మున్సు నమకం ఇడ్డి వరిజ్ రక్కిస్సికాన్.

11 నీను యా సజతిజ్ నీ సజమదు మని వరిజ్ నెన్పిసి, ఆహా కిదెజ్ ఇజి డటం వెహ్త.

12 నీను దజడెజ ఇజి, ఎయెర్ బా నిజె ఇజ్జి కణక సుడెంండ నీను నిజె సుడెజె. గాని నీను వర్గిని మాటదు, నడిసి నడెకదు, నీను ప్రేమిస్సి ప్రేమదు, దేవుణు మున్సు మని నీ నమకమ్దు, ఇని పాపం నీలి నీ బత్తుదు, నమ్మిత్తి వరిజ్ ఉండ్రీ గుర్తు లెకెండ్ నీను మన్త. వారు నిజె సుడెజె అయాలెకెండ్ మండ్రెజ్, నీను గుర్తు లెకెండ్ మన్త.

13 నాను వానిదాక, నీను విజెరిజ్ దేవుణు మాట నద్విజి విన్పిసి, బోదిసి, నెన్పిసి నెన్త.

14 సజం పెద్దెలెజు నీ మున్సు కికు ఇట్టివలె, ప్రవక్తరు నీ వందిజ్ వర్గితి దని వెట, దేవుణు ఆత్మ నిజె నీతి వరం డిన్ఎండ, నీను అయాలెకె కిల.

15 యా సజతిజ్ నీను జాగ్రద్దాన్ కిత. నీ మన్సు విజు, దిని మున్సునె ఇడోత. ఎందనిజ్ ఇహిజు, నీను నమకమ్దు పిరిజనిక లోకుర విజెరె టెటజు సుడోదెజ్. అందెజె, నీ మన్సు విజు దని మున్సునె ఇడోత.

16 నీను కిజిని పణి నెగ్రెండ కిత. నీను నెస్సినిని బోదదు తపు సిల్లెండ నెస్సిన్త. నీను అయకెజ్ డిసేంపెండ కిజి మన్త. ఎందనిజ్ ఇహిజు, నీను అయ లెకెండ కితిజు, ఎలాకాలం మని సాపుదాన్ నిజి నీనె తప్పె అనిలె. నీను వెహ్సినికెజ్ వెని వరిజ్బా తప్పిన్తె.

5

1-2 నీ సజమ్దు మని డోకెజ్ జటిజ్ ఆవిండ వన్నిజ్ బుబ్బు లెకెండ ఒడిబిజి, పణిని వెహ్త. దజుడారిజ్ తంబెరిజు లెకెండ సుడోత. డోక్రికాజ్ యాయెక్ లెకెండ సుడోత. దజుడికాజ్ తపు అలోసనదాన్ సుడోపెండ, తజిక్ లెకెండ సుడోత.

3 దిక్కు, సిల్లి రాండి బోదెకాజ్ గవరం సిత.

4 ఎంబెణి రాండి బోదెలిదెజ్బా కొడోరెనో నాతిసిరెనో మహిజు, వీరు వరి సొంత ఇండ్రోణి వరిజ్ సుడోదెజ్ వలె. సొంత ఇండ్రోణి వరిజ్ సూణికాదె దేవుణుదిజ్ సేవకిని వందిజి ముకెలమతిక ఇజి ముజాలె నెస్సెజ్ వలె. అయ లెకెండ అయేసి అప్పాసిజ్, అని అమ్మెజ్ రుణం తీరిసినార్. ఎందనిజ్ ఇహిజు, అయోక దేవుణుదిజ్ ఇస్సం ఆతిక.

5 దిక్కు, సిల్లి రాండి బోదెలి దేవుణు మున్సునె వాండ్రు కావలిస్సికెజ్ విజు సీనాన్ ఇజి, దని ఆస ఇట్టా మనాద్. అది రెయు పొగాల్ పార్దనం కిజి, వన్ని సాయం లోసి మంజినాద్.

6 గాని ఉణిజి, తింజి సుకం వందిజి బత్తిజిని రాండి బోదెలి బత్తితిజ్బా ఆత్మియ బత్తు, సాతి లెకెండ మనాద్.

7 మహికార్ ఎయెర్బా వరిజ్ దుసలాడోపెండ మంజిని వందిజ్, నీను సజమ్దు మని నమ్మిత్తి వరిజ్ యా సజతిజ్ ఆడ్ర సిత.

8 ఎయెన్బా వన్ని కుటుమ్ది వరిజ్, ముకెలం వన్ని సంత ఇండ్రోణి వరిజ్ సుడోపెండ మహిజు, వన్ని నమకం డిసేన్ లెకెండేని దేవుణు ఎద్దు మనాన్. వాండ్రు నమ్మిఇ వన్ని ఇంక నండో నెఇకాన్.

9 ఉండ్రీ రాండి బోదెలిదెజ్ అరువయం పంటిజ్ లాపు మహిజునె, దనిజ్ రాండి బోదెక్ లెక్కాదు కూడువ్త. మరి, అది ఒరెన్ వన్నిజె పెంట్లి ఆతిమహికాద్ అదెజ్ వలె.

10 నెగ్గి పణిజు వందిజ్ నెగ్గికాద్ ఇజి పేరు అనుపె ఆతికాద్ అదెజ్. ఇహిజు, దని కొడోరిజ్ నెగ్రెండ పోస కితాదా, నెల్సు సిల్లి వరిజ్బా డగ్రు కిజి నెగ్రెండ సుడోతదా, దేవుణుదిజ్ నమ్మిత్తి వరి పాదమ్కు నోరిజి మహదా, కస్టమ్దు మని వరిజ్ సాయం కిజి మహదా, విజు నెగ్గి పణిజు వందిజ్ దనిజ్ అదిసె ఒవజెపె ఆజి మహదా, ఇజి సుడోదెజ్. యా లెకెండ మని వన్యాజ్ లెక్కాదు కూడువ్త.

11 దజుడికా కాలమ్దు రాండి ఆతి బోదెకాజ్ లెక్కాదు కూడుబమ. ఎందనిజ్ ఇహిజు, నెగం కాలం వెన్యా అవికు మన్సు అస్సెజ్ అట్పెండ పెంట్లి అనె. ఆహె క్రీస్తుజ్ డిసేన్.

12 అయవలె, మరి పెంట్లి అపె ఇజి దేవుణు పణిసె కిస ఇజి ముజాలె కితి ఒట్టు తప్పిసె. అందెజె, అవికు తప్పె ఇజి లోకుర బాణిజ్ వెహె అనె.

13 మరి అవికు బదకం ఆజి ఇల్లు ఇల్లు బూలాదెజ్ ఒజి అనె. బదకమ్సె అవిండ సొండిజు వర్గిజి మహి వరి సజతిజు జిలో కిసె. వర్గిదెజ్ ఆఇకెజ్ వర్గిసె.

14 అందెజె, దజుడికా కాలమ్దు రాండి ఆతి బోదెకు పెంట్లి ఆజి, కొడోరి ఇడోజి, ఇండ్రోణి పణి సుడోజి మండ్రెజ్ ఇజి నాను కోరిజన. ఆహె, సజమ్దిజ్ దూసిస్సెజ్ పడోఇ వన్నిజ్ అవనరం నీదెజ్ అవిద్ ఇజి నాను కోరిజన.

15 దజుడికా కాలమ్దు రాండి ఆతి నెగండెక్ నమకం డిసేన్సె సయ్తాన్ వెట సాహె.

16 దేవుణుదిజ్ నమ్మిత్తి ఉండ్రీ దని కుటుమ్దు రాండి బోదెక్ మహిజు, అది వన్యాజ్ సుడోదెజ్ వలె. వెన్సు బాణిత సజమ్దు ఒవజెప్పెజ్ అవద్. ఎందనిజ్ ఇహిజు, దిక్కు, సిల్లి రాండి బోదెకాజ్ సుడోదెజ్ సజం ఆనాద్.

17 దేవుణు సజం ఏలుబడికా కిజిని పెద్దెల్లెజు, ముకెలం కస్టబడికా దేవుణు మాట బోదిసి నెస్సినిని వరిజ్ వరి జితమ్దిజ్ మరి నసానె కూడుప్పె లోసె అదెజ్ వారు తగ్గికార్.

18 ఎందనిజ్ ఇహిజ, “కలమ్మదు మటిసిని డాఃను మూతుదు కిమ తోహమాట్” ఇజి, “పణికినికాన్ జితమ్దిజ్ తగ్గివాన్”, ఇజి దేవుణు మాటుదు వెహ్సినాద్.

19 ఒర్వె పెద్దలి మున్సు, మోహ్తి నేరమ్దిజ్ రిఎర్ ముఎర్ సాసిరు మహిజనె అయాక నమ్మిదెజ్.

20 మహికార్ తప్పుదిజ్ తియెల్ ఆజి మంజిని వందిజ్ పాపం కిజినె మంజిని పెద్దలుజు వరి నజమ్దు మని విజెరె ఎద్దు డటం దిదిత.

21 ఇజ్కాన్ పెరికాన్ ఇజి తేడ తొంండ నాసు మున్సు, వెహ్తి నజతిజ్ నీను కిదెజ్ వలె ఇజి దేవుణు ఎద్దు, క్రిస్తుయేసు ఎద్దు, ఏర్పాటు ఆతి దేవుణు దూతార్ ఎద్దు నాసు నిజి ఆడ్ర సీజిన.

22 గలి బిజి, ఎయెరి మున్సుబా పెద్దలి పణి వందిజ్ కిక్కు ఇడఃజి దివిస్సు. మహి వరి పాపమ్కాజ్ వెలు కూడఃజి మన్త. విజు పాపమ్కాజ్ నీను దూరం మన్త.

23 నీను ఉణిజినిక అర్గిని వందిజ్, డిఃసేంండ వాజిని జబ్బు వందిజ్ ఏరునె ఉణిఎండ, బుకెండ్ ద్రాక్కు కల్లుబు ఉణ్త.

24 నెగొండార్ కిజిని పాపమ్కు విజెరె ఎద్దు తోరజినె. వారు, తీర్పు తిరసె ఆదెజ్ సాని ముజాలె, తీర్పు సీనికార్ వరి నజతి నెసినార్. గాని మరి నెగొండారి పాపమ్కు వెనకనె తెలిసె.

25 అయాలెకెండ్, నెగొండార్ కితి నెగ్గి పణి విజెరె ఎద్దు తోరజినె. విజెరె ఎద్దు తోరజక ఎన్జిబా డాజ్జి మండ్రెజ్ అట్ఉలె.

6

వెటిపణి కినికార్ ఎలాగ మండ్రెజ్

1 దేవుణుదిజ్ నమ్మితి వెట్టిపణి కినికార్ విజెరె వరి ఏజుమానురిజ్ సీని గవరం విజు సీదెజ్. ఎందనిజ్ ఇహిజ, ఎయెర్బా దేవుణు పేరుదిజ్, యేసు వందిజ్ మాపు నెన్పిసిని మాటుదిజ్ దూసిన్ఎండ మంజిని వందిజ్ వరిజ్ సీదెజ్ మన్ని గవరం సీదెజ్.

2 వరి ఏజుమానిరు నమ్మిత్కార్ ఇహిజ, వారు మా తంబెరిజునెగదె ఇజి తక్కు గవరం సీదెజ్ ఆఎద్. గాని వారు మరి ఒది ఏజుమానిరు వందిజ్ పణికిదెజ్. ఎందనిజ్ ఇహిజ, వారు ప్రేమిసిని నమ్మిత్తి వరిజె వారు కిజిని పణిజాణిజ్ మేలు వాజినె. నీను యా నజతిజ్ నీ నజమ్దు మని వరిజ్ నెన్పిసి, డటం వెహ్తాజ్ వలె.

డబ్బు వందిజ్ ఆస ఆదెజ్ ఆఎద్.

3-5 ఎయెనబా యేసుప్రబు వందిజ్ ఆజ బోదెజ్ నెన్పిసి, మా ప్రబు ఆతి యేసుక్రిస్తు వెహ్తి నిజమాతి బోదెజు ఒప్పుకోడెంండ, దేవుణు బక్రిడాన్ కూడితి మని బోదెజు ఒప్పుకోడిఎండ మనికాన్ గర్దదాన్ నిండ్రిత మనాన్. వన్నిజ్ ఇనికబా తెలిఎద్. వన్నిజ్ అవసరం మన్ని దన్నిజ్, అవసరం సిల్లి దన్నిజ్ విజు వన్కా వందిజ్ తర్కిస్తెజ్ పెరి ఆస మనాద్. క్రిస్తు వెహ్తి మాటెజు అర్థం వందిజ్ జటిజ్ ఆనాన్. యా లెకెండ్ కినిక, గోస, జటిజ్, దుసలాడఃనిక, సెజ అనుమానమ్కు విజు పుటిస్సు. ఎన్నివలెబా గొడఃబెజ్ పుటిస్సు. యా లెకెండ్ తర్కిస్సు వరి బుద్ది నెద్రిత మనాద్. వరి లోఇ నిజమాతి బోదె సిల్లెద్. క్రిస్తు మతం వందిజ్ వెహ్తి, ఆస్తి గణస్తెజ్ ఇజి వారు ఒడఃబిజినార్.

6 దేవుణుదిజ్ ఇస్తం ఆతివజు బత్తిజి, దన్ని దటాజ్ సర్దె ఆజి, నజి యాకదె సాలు ఇజి ఎత్తు కిని వన్నిజ్ గొప్పు లాబం మనాద్

7 ఎందనిజ్ ఇహిజ, మాటు పుట్టివలె ఇనికబా యా లోకమ్దు తెవెతాట్. మాటు సానివలె యా లోకమ్దాన్ ఇనికబా ఒత్తెజ్ అట్ఎల్.

8 అందెజి, మజి ఉణిక మహిజ, పొర్పాదెజ్ పాత పర మహిజ, అయాకదె మజి సాలు.

9 గాని ఆస్తి మన్నికానాదెజ్ కోరిజినికాన్ డబ్బు గణస్తెజ్ ఇని ఆసెజు నిక్కుదు అర్కాన్. బుద్ది సీలి పాడు కిని నండో ఆసెజ్ ఉరి లెకెండ్ ఆజి, అయాకెజ్ వన్నిజ్ పాడు కిని, నానం కిని.

10 ఎందనిజ్ ఇహిజ, ఉండ్రీ మొకదిజ్ వెల ఎలాగ మంజినాదో, అయ లెకెండ్ విజు సెజ పణిదిజ్ డబ్బు ఆసనె వెల. నెగొండార్ డబ్బుదిజ్ ఆస ఆజి, వారు నమ్మిత్తి నిజమాతికెజ్ డిఃసి, వరి మన్సు కూడం గుత్తి సాహిజు ఎలాగ మంజినాద్, అయ లెకెండ్ వరిజ్ వారి నండో బాదెజ్ కల్గిస్సు.

11 గాని దేవుణు లోకు ఆతి నీను యా సెజ ఆసెజాణిజ్ దూరం మన్అ. నీతి నిజయ్యాకెజ్ని నెగ్గెకెజ్ కిజి దేవుణు బక్తిదు మన్అ. దేవుణుదిజె నమ్మిజి మహి వరిజ్ ప్రేమిసి, కన్యమకు ఓరిసి, సార్దిదాన్ మన్అ.

12 నీను యేసుక్రీస్తుజ్ నమ్మితిజ్ కన్యమకు వానె. వన్యాజ్ నీను గెల్సైజ్ నీను నెగ్గెండ సుడఃఅ. నీను అయాలెకెండ గెల్సైజ, ఎలాకాలం బత్తిని బత్తు దోహ్కాద్. దిని వందిజె దేవుణు నిజి కూక్ మనాన్. 'నాను క్రీస్తుజ్ నమ్మిజన', ఇజ నండో లోకుర్ ఎద్రు నీను ఒవుకొటివలె, నని బత్తు వందిజె దేవుణు నిజి కూక్నాన్.

13-14 విజు వన్యాజ్ పాణం సీజిని దేవుణు ఎద్రుని పొంతి పిలాతు ముజాలె వెన్బాతివలె, దయేరమ్దాన్ నెగ్గెండ ఒవుకొటి క్రీస్తుయేసు ఎద్రు నాను నిజి ఆడ్ర సీజిన. మా ప్రబు ఆతి యేసుక్రీస్తు వాని దినమ్దాక నీను పాపం సిల్లెండ, నిందెజ్ సిల్లెండ నాను నిజి వెస్తి నజతిజ్ కిజి మన్అ ఇజ ఆడ్ర సీజిన.

15 దేవుణు ఏరపాటు కితి సమయమ్దు యేసుప్రబుజ్ వాండ్రు రపిస్సాన్. గొప్పు పెరికాన్ ఆతి విజు వన్యా మున్సు, ఒరెండ్రె అతికారం మనికాండ్రె దేవుణు. వాండ్రు రాజారిజ్ ఇంక పెరి రాజు. ప్రబురిజ్ ఇంక పెరి ప్రబు.

16 వాండ్రు ఒరెండ్రె ఎసెజ్బా సాఇకాన్. డగ్రు సొండ్రెజ్ అట్ఠెజ నసా జాయ్దు బత్తిజినాన్. వన్సిజ్ ఎయెర్బా ఎసెజ్బా తోవర్. ఎయెర్బా ఎసెజ్బా సుడఃదెజ్ అట్ఠెవర్. వన్సిజె విజు గవేరమ్ని ఎలాకాలం అతికారం మనిద్, ఆమెన్.

17 యా లోకమ్దు ఆస్తి మనికార్, గర్ర ఆవిండ, ఆస్తి మున్సు, ఆస ఆవిండ మండ్రెజ్ ఇజి నీను డటం వెహ్అ. యా ఆస్తిదిజ్ నమ్మిదెజ్ అట్ఠెక. గాని వరి ఆస దేవుణు మున్సు, ఇడఃదెజ్ ఇజి నీను వెహ్అ. సుకమ్దాన్ సరద ఆజి మండ్రెజ్ దేవుణునె తకు సిల్లెండ విజు సీనికాన్.

18 వారు మహి వరిజ్ నండో మేలు కిదెజ్, నండో నెగ్గె పణిజ్ కిదెజ్, నీను వారు ఆవిండ, నండో సీబాజి సీనికార్ ఆదెజ్ ఇజి నీను వరిజ్ వెహ్అ.

19 అయాలెకెండ, వాని కాలమ్ది వరి బత్తు వందిజ్ వారు ఉండ్రె నెగ్గె పునాది తయార్ కిజినార్. ఎండనిజ్ ఇహిజ, అయావలె వరిజ్ దేవుణు వెట ఎలాకాలం బత్తిని బత్తు దోహ్కాద్.

20 ఓ తిమోతి, దేవుణు నిజి ఒవజెప్తి సేవ పణి నీను నెగ్గెండ సుడఃఅ. పణిదిజ్ రెజ సెజ మాటెజ వర్తిఎండ దూరం మన్అ. అరదం సిల్లెండ తర్కిస్సి వన్యాజ్ దూరం మన్అ. దనిజె సెంగెండార్ అబద్దమ్క గెణం ఇజి కూక్సినార్.

21 నెగెండార్, 'అయాక నజి మనాద్', ఇజ ఒవుకొటారె, యేసు వందిజ్ నిజమాతి నజతిజ్ డిఃస్ట సాహార్. దేవుణు దయా దగ్రు మీ వెట మనీద్.

అపొస్తుడు ఆతి పవులు తిమోతిజ్ రాస్తి రుండి ఉత్తం

నెల్ల కిబిస్సిక

అపొస్తుడు ఆతి పవులు ఎవెసి నజం నడిపిసిని తిమోతిజ్ రాస్తి రుండి ఉత్తమ్ నె యాక. పవులు, సాదెక్ కాలం డగ్రు ఆతాద్ ఇజి నెస్తాండ్రె, నజమదిజ్ నెగ్రెండ నడిపిసి, నిజమాతి బోద్ వరిజ్ నెన్ పిస్సెజ్ వలె ఇజి తిమోతిజ్ వెప్సిన్ నాన్.

1-2 క్రీస్తుయేసు పోక్తి అపొస్తుడు ఆతి పవులు ఇని నాను, నా సొంత మరిన్ లెకెండ్ నాను ప్రేమిసిని తిమోతిజ్ రాసిన్. దేవుణు ఎత్తు కితి వజనె నాను అపొస్తుడు ఆత. క్రీస్తుయేసు వెట మాటు కూడితి మన్ని దన్నితాన్ లోకుర్ ఎలాకాలం బత్రినార్ ఇజి దేవుణు కితి ఒట్టు వెప్సాజ్ నె నాను అపొస్తుడు ఆత. మా బుబ్బు ఆతి దేవుణుని ప్రలు ఆతి క్రీస్తుయేసు దయా దర్మమదాన్ మీ ముక్కు కనికారం తోరిసి, నిపాతిదాన్ మండ్రెజ్ సాయం కిపిర్.

నమకమదాన్ మంజని వందిజ్ దయరం వెప్సిన్ నాన్

3 రెయం పొకాల్ నాను పార్సం కినివలె డిన్ ఎండ నిజి ఒడిబిజి దేవుణుదిజ్ వందనమ్ కు వెప్సిన్. నా అనిగోగొరు వన్నిజ్ పొగిడిజి మాడిస్తి లెకెండ్, నానుబా నా గర్బం నజి గదిన్ ఎండ నెగ్రెండ వన్నిజ్ పొగిడిజి మాడిసిన్.

4 నాను నిజి డిస్టానె వాజి మహిజ్, నీను అడఃబాతి. అయాక ఎత్తు కితానె నిజి సుడఃదెజ్ ఇజి నండ్రె ఆస ఆజిన. ఎండనిజ్ ఇహిజ, నజి సర్ద పూర్తి వానాద్.

5 నీను క్రీస్తుయేసుజ్ నిజం నమ్మిజిని. అయాక నాను ఎత్తు కిజిన. ముజాలె, నీ డొక్ర బిబి ఆతి లొయిని నీ యాయ యునికె, క్రీస్తుయేసుజ్ నమ్మితె మాహె. అయ లెకెండ్ ఏలు నీనుబా నమ్మిజిని ఇజి నాను తవ్వండ్ నెసిన్.

6 అందెజి నీను కిదెజ్ ఇజి దేవుణు నిజి సీతి, వరం నీను నెగ్రెండ నండ్రె కిదెజ్ ఇజి నాను నిజి ఎత్తు కిబిసిన్. నాను దేవుణు సేవ పణి వందిజ్ నీ మున్కు కిక్కు ఇడఃజి దీవిస్తివలె, దేవుణు అయా వరం నిజి సీత్తాన్.

7 నీను కిదెజ్ ఇజి దేవుణు నిజి సీతి వరం నీను కిఅ. ఎందనిజ్ ఇహిజ, దేవుణు వన్ని ఆత్మ మజి సీత మనాన్. అయాక మజి తియెల్ పుటిసిని ఆత్మ ఆవద్. గాని దేవుణు పణి కిదెజ్ సత్తు సీని, మహి వరిజ్ ని దేవుణుదిజ్ ప్రేమిసిని, మాటు అణసె ఆజి మండ్రెజ్ సాయం కిని ఆత్మనె సీత మనాన్.

8 అందెజి, మా ప్రలు వందిజ్ వెప్సాజ్ నీను సిగు ఆమ. వన్ని వందిజ్ వెప్సాజ్ జెలిదు ఆతి, నా వందిజ్ బా సిగు ఆమ. గాని సువార్త వందిజ్ నా వెట కస్టమ్ కు ఓరిన్ అ. దేవుణు నత్తుదాన్ అయాక ఓరిన్ అ.

9 దేవుణు మజి రక్సిస్తాండ్రె, వన్ని వందిజ్ కేట ఆతి బత్తు. బత్రిదెజ్ ఇజి మజి కూక్తాన్. మాటు కితి పణిజాణిజ్ ఆవద్ గాని వన్ని సొంత ఎత్తుదాన్ వన్ని దయా దర్మమదాన్ వాండ్రు మజి రక్సిస్తాండ్రె కూక్తాన్. లోకం పుట్వండ్ ముజాలె, క్రీస్తు యేసు కితి దనితాన్ యా దయా దర్మం దేవుణు మజి సీత మనాన్.

10 గాని మజి రక్సిస్తి క్రీస్తుయేసు లోకమ్ దు వాతివలెనె అయాక ఏలు తొర ఆతాద్. వాండ్రు సాపుదిజ్ సిల్లెండ్ కితాండ్రె, సువార్త వెంజి నమ్మిని దనితాన్, సావండ్ దేవుణు వెట ఎలాకాలం బత్రిని బత్తు తొరిస్తాన్.

11 యా సువార్త వెప్సి వందిజి, ఒరెన్ సాటిస్సి వన్ని లెకెండ్, అపొస్తుడు లెకెండ్, నెన్ పిస్సి వన్ని లెకెండ్ దేవుణు నజి ఏర్ పాటు కిత్తాన్.

12 అందెజి నాను యా కస్టమ్ కు ఓరిసిన్. గాని నాను సిగు ఆమ. ఎండనిజ్ ఇహిజ, నాను నమ్మిత్తి వన్నిజ్ నాను నెన్సు. వాండ్రు, తీర్పు కిదెజ్ వాని దినమ్ దాక, నజి ఒపజిప్తి సువార్త కాపాడఃదెజ్ వాండ్రు అట్టికాన్ ఇజి నాను నిజం నెన్సు.

13 నిజమాతి మాట నీను నా బాణిజ్ విహి లెకెండ్ నీను మహి వరిజ్ వెహాల. క్రీస్తుయేసు వెట మని సమందమదాన్ మని నమకమదు ప్రేమాదు నీను మన్ అ.

14 దేవుణు నిజీ ఒపజెప్పి సువార్ ఎయెర్బా మారిన్ఎండ నీను సుడేఱ. మా లోఇ మంజిని దేవుణు ఆత్మ సాయమ్దాన్ అయాక కాపాడేఱ.

15 ఆనియ ప్రాంతమ్దు మన్ని నమ్మిత్తికార్ విజెరె నా బాణిజ్ దూరం ఆతార్ ఇజి నీను నెన్ని. పుగెలు హార్మెను ఇనికార్ వరి లోఇ మనార్.

16 ఒనెసిహారు ఇండ్రోణి వరిజ్ ప్రబు కనికారం తోరిన్పిన్. ఎండనిజ్ ఇహిజ, వాండ్రు నజీ నండో నుట్టు. ఆదరిస్తాన్. నాను జేల్లిదు మహిజ్బా వాండ్రు నా వందిజ్ సిగు ఆతాన్.

17 గాని వాండ్రు రోసు పట్టుమ్దు వాతివలె, నాను తోర్నిదాక నండో రెబాతాన్.

18 నాను ఎపెనుదు మహివలె, వాండ్రు నజీ నెగ్రెండ సుడేఱ, ఎసా సాయం కిత్తాన్ ఇజి నీను బాగ నెసిని. ప్రబు తీర్పు కిని దినమ్దు ప్రబు వన్నిజ్ కనికారం తోరిన్పిన్.

2

1 అందెజి నా మరిన్ లెకెండ్ ముని నీను, క్రిస్తుయేసు దయా దర్మమ్దాన్ సత్తు పొందిజి మన్అ.

2 నండో లోకర్ ఎద్దు నాను వెప్తి నిజమాతి మాటిజ్ నీను వెహిమని. అయా మాటిజ్ నమ్మిదెజ్ తగ్గి వరిజ్ ఒపజెవ్అ. వారు యా నిజమాతి మాటిజ్ మహివరిజ్ బాగ నెన్పిస్తాజ్బా అట్టికార్ ఆదెజ్.

3 ఒరెన్ నెగ్గి విద్దె కినికాన్ వన్ని కష్టమ్కు ఓరిసిని లెకెండ్ నీను క్రిస్తుయేసు వందిజ్ మా వెట కష్టమ్కు ఓరిసి మన్అ.

4 ఒరెన్ ఉద్దం కినికాన్, వన్ని బత్తు. వందిజ్ మరి ఆఇ పణిజి సాన్ఎన్. ఎండనిజ్ ఇహిజ, సాహిజ వన్నిజ్ నయన్మదు ఏర్పాటు కితి అతికారిజ్ సరద కిబిన్ఎన్. అయా లెకెండ్ నీనుబా క్రిస్తు సేవ పణిదు మన్అ.

5 మరి అయాలెకెండె, ఉహ్కీ వందెమ్దు ఒరెన్ ఉహ్కీకాన్ వందెమ్దు వెప్తి రూలు వజి ఉహ్కీఎండ మహిజ, వాండ్రు గెలెన్ఎన్. వన్నిజ్ ఇనాయం దోహ్కీఎద్. అయా లెకెండ్ నీనుబా క్రిస్తు సేవ పణిదు మన్అ.

6 కష్టపడిజి పణి కిని ఒరెన్ రయ్దు వన్నిజ్, వండితి వంటది తోలి వంతు దోహ్కీజ్వలె. అయా లెకెండ్ నీనుబా క్రిస్తు సేవ పణిదు మన్అ.

7 నాను మున్సు, వెప్తి దన్ని వందిజ్ నీను మరి మరి ఆలోననం కితి. ఎండనిజ్ ఇహిజ, నీను ఆలోననం కితిజ, నీను నెన్జెజ్ మన్ని విజి వన్యాజ్ వాండ్రు అరదం కిబిస్తాన్.

8 ఎన్సివలెబా క్రిస్తు యేనుజ్ ఒడేబితి. సావుదాన్ దేవుణు వన్నిజ్ బత్తిస్త మనాన్. దావీదు రాజు తెగ్గదు పుట్టి మనికాన్. యాకది నాను లోకురిజ్ వెహిని సువార్.

9 నాను యా సువార్ వెహినిజ్, నజీ బాదెజ్ వాజెనె. తప్పుజ్ కితి ఒరెన్ వన్నిజ్ తోహ్కీలెకెండ్, నాను తోహ్కీ ఆజిన. గాని దేవుణు మాట తోహ్కీ అవతాద్.

10 అందెజి, దేవుణు ఏర్పాటు కితి వరి వందిజ్ నాను విజి కష్టమ్కు ఓరిసిన్. క్రిస్తుయేసు వరిజ్బా రక్కిసి, దేవుణు గొప్పు జాయ్దు మంజిని బాడిజ్దు వన్ని వెట ఎల్లకాలం వారుబా మంజిని వందిజ్, వరి వందిజ్ నాను కష్టమ్కు ఓరిసిన్.

11 యా మాటిజ్ నమ్మిదెజ్ తగ్గిక్ మాటు వన్ని వెట సాతిజి వన్నివెట బత్తిమాట్మరి.

12 మాటు మా కష్టమ్కు ఓరిస్తిజి వన్నివెట ఏలుబడి కినాట్మరి. వన్నిజ్ నెన్ఎ ఇహిజ వాండ్రుబా మజీ నెన్ఎ ఇనాన్.

13 మాటు నమ్మిదెజ్ తగ్గికాట్ ఇహిజ వాండ్రు ఎన్సివలెబా నమ్మిదెజ్ తగ్గికాన్ ఆజి మంజినాన్. ఎండనిజ్ ఇహిజ వన్నిజ్ వాండ్రె తప్పెజ్ అట్ఎన్.

నమకమాతి నెగి పణిమణిసి

14 నాను మున్సు, వెప్తి సజతిజ్ లోకురిజ్ ఎత్తు కిబిని మన్అ. ఇని ఇని మాటిజి వందిజ్ జటిజ్ ఆమాట్ ఇజి దేవుణు ఎద్దు వరిజ్ సరి దిదితి. అయాక పణిదిజ్ రెఇజ్. వెనివరి నమకం పాడు: కిజినాద్.

15 నెగ్గి పణి మనిని ఇజి దేవుణు బాణిజ్ అనువె ఆదెజ్, నీను అయ లెకెండ్ మండ్రెజ్ బాగ సుడేఱ. కిని పణిజి వందిజ్ దేవుణు వెనబానివలె, సిగు ఆవిండ మంజిని పణి మనిని లెకెండ్ నీను మన్అ. నిజమాతి మాట నెగ్రెండ నెన్పిన్ని వన్ని లెకెండ్ మన్అ.

16 వణిదిట్ రెజ, సెజ మాటిజణిట్ నీను దూరం మన్అ. ఎందనిట్ ఇహిజ, నని మాటిట్ వర్గిజ మంజనికార్ మరి ఒది సెజకార్ ఆజి దేవుణు బాణిట్ దూరం ఆనార్.

17 మలెరియ నోబు నండొడారిట్ పాడు కిని లెకెండ, వారు నెస్సిసిని మాటిట్ మహివరిట్ పాడు; కిని. నని వరి లోజ మనికారె హుమెనయ, పితెతు ఇనికార్.

18 వీరు నిజమాతి మాటిజ డిస్త సాహార్. వారు తప్ప వెప్పినార్, దేవుణు సాతి సాహి వరిట్ మర్జి బత్తిస్త మునా ఇజి ఆహ వెప్పి, ఇనిక నమ్మిదెట్ ఇజి నెన్ఎండ, ఇతల్ అతాల్ కిజి సెగెండారిట్ బమ్మ కిజినార్.

19 అహిట్బా, దేవుణు బాణిట్ వాతి నిజమాతి మాట తవ్వెదు. అయాక నెగెండ నిల్పిని ఉండ్రీ పునాది లెకెండ మనూద్. 'ప్రబు వన్ని సొంత వరిట్ నెస్సాన్' ఇజి, 'యేసుజ్ నా ప్రబు ఇజి ఒప్పకొణికార్ విజెరెబా సెజ వణిజాణిట్ దూరం ఆదెజ్ వలె' ఇజి అయా పునాదిదు ముద్ద పొక్త మనూద్.

20 ఉండ్రీ పెరి ఇండ్రీ నండొ రకమ్కాణి కుండెట్ మండెట్ మంజిని. సెగం వెండిదాన్, బజారమ్దాన్ తయార్ కితికెట్, మరి సెగం సెకదాన్, దుల్లిదాన్ తయార్ కితికెట్. విన్యా లోజ వెండిదాన్ బజారమ్దాన్ తయార్ కితికెట్ నెగ్గి వణిదిట్ వాడుకొణార్. సెకదాన్, దుల్లిదాన్ తయార్ కితికెట్ ఆఇ వణిదిట్ వాడుకొణార్. అయాలెకెండ, దేవుణుదిట్ నమ్మిత్తి వరి నజమ్దు, దేవుణు వందిట్ నెగ్గి వణి కిదిట్ తగ్గికార్ మంజినార్. ఆఇకార్బా మంజినార్.

21 అందెజె ఎయెన్బా సెజకెట్ విజు డిస్టిజ, వాండ్రు నెగ్గివణి కిదిట్ తగ్గికాన్ ఆనాన్. పెరి ఇండ్రొణి ఎజుమాని, నెగ్గి వణిదిట్ వాడుకొండెట్ కేట ఇడ్డి వెండి బజారమ్ది కుండెట్ మండెట్ లెకెండ, ఏండ్రుబా దేవుణు వందిట్ ఇని నెగ్గి వణిదిట్బా తగ్గికాన్ ఆనాన్.

22 దజడాారిట్ మని ఉత్పత్తదాన్ దూరం మన్అ. గాని నీతి నిజయ్దికెజె కిదిజె సుడెజె. దేవుణు వందిట్ నిజమాతి మాటిట్ నమ్మిత్తి. ఎస్తివలెబా ప్రేమ తోరిన్అ. విజెరె వెట సాంతి నమాదనమ్దాన్ మండ్రెట్ సుడెజె. నెగ్గి మన్పుదాన్ ప్రబుజ్ పార్దనం కినివరి వెట కూడెజి మన్అ.

23 బుద్ది సిల్లెండ అర్దం సిల్లెండ తర్పిసిని వరి బాణిట్ దూరం మన్అ. ఎందనిట్ ఇహిజ, వారు జటిట్ పుటిసినార్ ఇజి నీను నెసిని.

24 దేవుణు వణి మనిసి జటిట్ ఆదెజ్ ఆవద్. గాని వాండ్రు విజెరెవెట కనికారం ఆజి మండ్రెట్ వలె. నెగ్గెండ నెన్పిసినికాన్ ఆదెజ్ వలె. ఓరిసినికాన్ ఆదెజ్వలె.

25 నిజమాతి మాటిజ, ఎద్రిస్సి వరిట్ వాండ్రు సారలిదాన్ వెప్పి దిదిదెట్. వారు పాపమ్కు ఒప్పకొడిజి, నిజమాతికెట్ నెస్సి వందిట్, దేవుణు ఉండ్రీ వేలా వరి మన్పు మారిస్సాన్సు.

26 ఆహ వారు బుద్దిదు వాజి, నయ్హాన్ ఉరిదాన్ తప్పె ఆనార్. నయ్హాను, వన్ని ఇష్టమ్కు కిబిస్టెజె వరిట్ అస్తమనాన్. అందెజె దేవుణు వణి మనిసి వరిట్ సారలిదాన్ వెప్తాజ్.

3

కడెవెరి దినమ్క వందిట్ వెప్పినిక

1 యేనుప్రబు వాని ముజాల, కడెవెరి దినమ్కాజ్ నండొ తియెల్ ఆని రోస్కు మంజినెలి ఇజి నీను నెన్అ.

2-5 లోకర్, వరిట్ వారి నెగ్గెండ మండ్రెట్ ఇజి సుడెజె ఆనార్ డబ్బుదిట్ ఆన ఆనార్. నా ననికాన్ మరి ఎయెన్బా సిలెన్ ఇజి వెహె ఆనార్. గర్త ఆనార్, దూసిస్సార్. యాయబ్బారిట్ లోజిఎర్. మేలుదిట్ నెన్ఎర్, సెజకార్ ఆనార్. ప్రేమ సిల్లికార్ ఆనార్, సెమిన్ఇకార్ ఆనార్. సొండిజ్ వెప్పికార్ ఆనార్. అణని ఆఇకార్ ఆనార్. అడివి జంతు నని మూర్కమ్దికార్ ఆనార్. సొంత వరిట్బా మొసెం కినికార్ ఆనార్. బుద్ది సిల్లెండ ఇని ఇనికెట్ కినార్. గర్త ఆనార్. దేవుణుదిట్ ప్రేమిన్ఎండ వరి సుకమ్కాజ్ ప్రేమిస్సార్. వారు దేవుణు బక్తి మనికార్ ఇజి మున్పునె తోర ఆనార్. గాని వన్నిట్ లోజిదెట్ వాండ్రు సీజిని నత్తుదిట్ నెక్కి పొక్కినార్. నని వరి బాణిట్ దూరం మన్అ.

6-7 ఎందనిట్ ఇహిజ, నని వరి లోజ సెగెండార్, లోకర్ వెట నెల్లు ఆజి ఇల్కాజ్ వానారె, తప్ప బోదెట్ వెప్పి, బాన్ మని బుద్ది ని బోదెకాజ్ మోసం కినార్. అవికు వీరు వెప్పినికెట్ నమ్మిజ మోసం ఆనె. అవికు కితి నండొ పాపమ్క వందిట్ వన్యా గర్బమ్కు గదిసిని మంజిని. అవికు, వన్యా అనిజ విజి ఎత్తు కిజిని మంజిని. ఎస్తివలెబా నెనె ఆదెజ్ ఆన ఆనె. గాని నిజమాతికెట్ ఇనికెట్ ఇజి టెటెట్ నెన్ఉ.

8 యెనె, యెంబ్రె ఇనికార్ మోసెజ్ ఎద్రిస్తిలెకెండ, వీరుబా దేవుణు వందిజ్ నిజమాతికెజ్ ఎద్రిసినార్. వీరు విరి మున్నురు సెఇకెజ్నె ఒడెబినార్. అందెజె వారు నమ్మిజునికెజ్ పణిదిజ్ రెఇకెజ్

9 యెనె, యెంబ్రె బుద్ది సిలికార్ ఇజి లోకుర్ విజెరె టెటజ్ నుడితి లెకెండ, వీరుబా బుద్ది సిలికార్ ఇజి లోకుర్ విజెరె టెటజ్ నూణారె. అందెజె ఎలాకాలం దేవుణు మాటదిజ్ ఎద్రిసి సొండ్రెజ్ వారు అట్వెర్.

తిమోతిజ్ ఆడ్ర సీజినాన్.

10-11 గాని నాను నెన్పిస్తికెజ్, నాను ఎలాగ బత్తిజి నడిత ఇజి నాను కిదెజ్ ఇజి నా బత్తుదు మని ఉడెనం, నాను దేవుణుదిజ్ ఎలాగ నమ్మిజి మహ ఇజి, నజి కితి కీడుదిజ్ ఎలాగ ఓరిస్త ఇజి, నాను ఎలాగ మహి వరిజ్ ప్రేమిస్త ఇజి నీను పూర్తి నెసిని. లోకుర్ నజి బాదెజ్ కితివలె నాను ఎలాగ అయికెజ్ ఓరిస్తెజ్ అట్ట ఇజి నీను నెసిని. నజి వాతి హిమ్నెజ్ విజు నీను నెసిని. అందియొకయ, ఇకొనియ, లున్త్ర ఇని పట్టుమ్కాజ్ నజి వాతికెజ్ విజు నీను నెసిని. లోకుర్ కితి నండె బాదెజ్ నాను ఓరిస్త. గాని ప్రబు వన్నా బాణిజ్ విజు నజి తప్తిస్తాన్.

12 క్రీస్తుయేసు వెట సమందం ఆజి, దేవుణు బక్తిదాన్ బత్తిదెజ్ ఆస ఆని ఎయెరిజ్బా బాదెజ్ వాన్.

13 గాని సెఇ పణిజ్ కినికార్ని, మహివరిజ్ మొసం కినికార్ ఇంక ఒడె పాడాణాన్. వారు మొసం కినికార్. మొసం కిబె ఆనార్.

14-15 గాని నీను, నెస్తిమనికెజ్, తప్వండ నమ్మిజి మనికెజ్ డిన్వండ మన్అ. ఎండనిజ్ ఇహిజ, నిజి నెన్పిస్తి వరిజ్ నీను నెసిని. ఇజ్జవలెహన్ ఆని నీను దేవుణు మాట ఎలాగ నెస్తి ఇజి నీను నెసిని. యాకెజ్, క్రీస్తు యేసు మున్ను నీను ఇడ్డె నమ్మకమదాన్, దేవుణు నీ పాపమ్కాజ్ నిజి రక్సిన్మి వందిజ్ నిజి గెంం నీదెజ్ అట్టె.

16 దేవుణు మాటజ్ విజు దేవుణు వన్ని ఉస్పిదాన్ వెప్పి రాన్పిస్తికెజె. అయాకెజ్, నిజమాతికెజ్ మజి నెస్తిస్తెజ్, మా తప్పుజ్ తోరిస్తెజ్, మజి సరి దిదిదెజ్, నీతి నిజయితికెజ్ కిదెజ్ నెన్పిస్తికెజ్ పణిదిజ్ వానికెజ్.

17 ఈహునె ఒరెన్ దేవుణు లోకు వాండ్రు కిదెజ్ మనికెజ్ విజు కినికార్. విజు నెగ్గి పణి కిదెజ్ ఎస్తివలెబా తయార్ ఆనాన్.

4

1 దేవుణు ఎద్రు, సాతి వరిజ్ బత్తిజిని వరిజ్ తీర్పు సీని క్రీస్తుయేసు ఎద్రు నాను నిజి ఆడ్ర సీజిన. ఎండనిజ్ ఇహిజ వాండ్రు మరజి వాజి రాజు వజి ఎలుబడి కినికార్.

2 నాను నిజి ఈహు ఆడ్ర సీజిన నీను దేవుణు మాట లోకురిజ్ వెవ్అ. లోకుర్ వినారె, వన్ఎరె ఇజి నెగ్గి సమయం, ఆఇ సమయం తోవండ ఎస్తివలెబా అయాక వెప్తాజ్ తయార్ ఆజి మన్అ. లోకురిజ్ వరి తప్పుజ్ తోరిసి వెవ్అ. వరి తప్పుజు దిదిఅ. వారు కిదెజ్ మనికెజ్ పణిన్అ. నీను కోపం ఆవండ నిసాతిదాన్ వరిజ్ నెస్తిన్అ.

3 ఎండనిజ్ ఇహిజ, లోకుర్ నిజమాతికెజ్ వన్వండ బత్తిని కాలం వానాద్. గాని వరిజ్ ఇస్తం ఆని వజి లోతు మాట వెప్పి నని బోద కిని నండెండారిజె వారు తపిసి డగ్గు కినికార్. అందెజె, నని వరిజ్ తపిసి డగ్గు కినికార్.

4 ఇహిజ, నిజమాతి మాట వారు వన్ఎర్. గాని కత సాన్తరమ్క దరోట్ మర్నార్.

5 గాని ఓ తిమోతి, నీను విజు వన్నా లోఇ నెగ్గి బుద్దిదాన్ మన్అ. కస్టమకు ఓరిన్అ. క్రీస్తుయేసు వందిజ్ సువార్త లోకురిజ్ వెవ్అ. దేవుణు సేవపణి కినివలె, నీను కిదెజ్ మనికెజ్ విజు పూర్తి కితి.

6 ఎండనిజ్ ఇహిజ, నాను పూజి ఆదెజ్ సమయం డగ్గు ఆత మనాద్. నాను సాదెజ్ సమయం డగ్గు ఆత మనాద్.

7 వందెమ్దు ఒరెన్ కస్టబడితి లెకెండ, నాను సువార్త లోకురిజ్ వెప్పి వందిజ్ కస్టబడిత. ఉప్పి వందెమ్దు, ఒరెన్ ఉప్పి, పూర్తి కిని లెకెండ, నాను కిదెజ్ దేవుణు నజి వెప్తాకెజ్ పూర్తి కితి. దేవుణు మున్ను మని నమకం డిన్వెత.

8 అందెజె నజి ఉండ్రె ఇనాయం మనాద్. నాను నీతి నిజయితిదాన్ బత్తితి దని వందిజ్ సీని ఇనాయం. అయాక ఆకరి దినమ్ది తీర్పుదు, నీతి నాయమ్దాన్ తీర్పు సీని ప్రబు అయాక నజి సీనాన్. నజిన్ ఆవండ వాండ్రు వాని దనిజ్ ఎద్రు నుడెజి ఆస ఆని విజెరిజ్ సీనాన్.

9-10 తిమోతి, నా డగ్గు బేగి వాదెజ్ నీను సుడఃఅ. ఎందనిజ్ ఇహిజ, దెమ, యా లోకమ్ది సజతిజ్ ప్రేమిసి, నజి డిఃస్త సాహాన్. వాండ్రు దెసలోనిక పట్టుమ్దు సాహాన్. క్రెన్కె ఇనికాన్ గలతియ ఇని ముటూదు సాహాన్. తీతు దెల్మియ జిల్లాదు సాహాన్.

11 లూక ఒరెండ్రె నా వెట మనాన్. నీను వానివలె మార్కుజ్ నీ వెట కూక్చి తగ్గఅ. ఎందనిజ్ ఇహిజ, వాండ్రు నజి తోడుఃదిజ్ బాగ మంజినాన్.

12 తుకికుజ్ ఎపెసు పట్టుమ్దు పోక్త.

13 నీను వానివలె త్రోయ పట్టుమ్దు కార్పు ఇని వన్ని బాన్ నాను ఇట్టా వాత సాల్వ తగ్గఅ. పున్కమ్కుబా తగ్గఅ, ముకెలం తోలుదు రాస్తి మనికెజ్.

14 అలెక్సెజుండర్ ఇని కంసు తయార్ కిని సరాబు నజి నండో బాదెజ్ కిత్తాన్. వాండ్రు కితి దనిజ్ ప్రబు వన్నిజ్ సిక్చ సీనాన్.

15 వాండ్రు నిజిబా బాదెజ్ కిఎండ నీను జాగర్త మన్అ. ఎందనిజ్ ఇహిజ, మాటు బోదిన్తి మాటబ, వాండ్రు నండో ఎద్రిస్తాన్.

16 నజి ముజాలె, కోర్టుదు ఒసి వెనబాతివలె, నజి నానె ముదాయి. ఎయెర్బా నా దరోజ్ వర్గిఎత్తార్. విజెరె నజి డిఃస్త సాహాన్. దిన్ని వందిజ్ దేవుణు వరిజ్ సిక్చ సిఎండ మనీన్.

17 అహిజ, కోర్టుదు మహి యూదురు ఆఇకార్ విజెరె, నా వెట సువార్త పూర్తి విని వందిజ్, ప్రబు నా పడఃకాద్ మంజి, నజి సత్తు సితాన్. నొరెన్ వెయుదాన్ తప్తిన్తి లెకెండ్రె సాపు సిక్చదాన్ తప్తిస్తాన్.

18 అందెజె, ప్రబు నజి విజు సెఇ వన్నా. బాణిజ్ తప్తిసి, వాండ్రు రాజు వజ ఎలుబుడిః కిని పరలోకమ్దు నెగ్గెండ్రె కూక్చు ఒనాన్. వన్నిజ్ ఎలాకాలం గవ్దరం మనీద్. ఆమెన్.

19 ప్రిస్కిలెజ్, అక్కులెజ్, ఒనెసిఫారు ఇండ్రోణి వరిజ్ నాను వెన్బాతి లెకెండ్రె వెహాఅ.

20 ఎరాస్టు కొరింతు పట్టుమ్దు నిహాన్. త్రోపిముజ్ కన్యం అర్తిజ్, వన్నిజ్ మిలెతు పట్టుమ్దు డిఃస్త వాత.

21 పినికాలం రెఎండ్రె ముజాలె, నీను బేగి వాదెజ్ సుడఃఅ. యుబులు, పుదె, లిను, క్షణడియ ఇనికార్ నిజి వెన్బాతి లెకెండ్రె వెస్సినార్. అయ లెకెండ్రె యా పట్టుమ్దు మని మహి నమ్మిత్తకార్బా వెన్బాతిలెకెండ్రె వెస్సినార్.

22 ఓ తిమోతి, ప్రబు నీ వెట తోడుః మనీన్. వన్ని దయా దర్తం మీ విజెరె వెట మనీద్.

అపొస్తుడు ఆతి పవులు తీతుజ్ రాస్తి ఉత్రం

నెల్వ కిబిసినిక

అపొస్తుడు ఆతి పవులు తీతుజ్ రాస్తి ఉత్రమనె యాక. పవులువెట దేవుణు సేవపణి కినివరి లొజ ఒరెనె తీతు. క్రేతు దేసమదు మన్ని దేవుణుదిజ్ నమ్మితి వరి సజమ్కాజ్ నెగ్రెండ నడిపిస్తెజ్, వన్నిజ్ సజం మున్ను అతికారి లెకెండ పవులు ఏర్పాటు కిత్తాన్. అందెజె సజమ్కాజ్, ఎలాగ మన్ని పెద్దల్జ నిల్పెజ్, వారు కిదెజ్ మన్ని పణిజ్, దిన్ని వందిజ్ వెప్పి పవులు తీతుజ్ రాసినాన్. మరి, సజమ్దు మన్ని ఒరెన్ ఒరెన్ ఎలాగ మండ్రెజ్ ఇజబా వెప్పినాన్.

1-4 దేవుణు సేవకిని, యేసు క్రీస్తు వందిజ్ అపొస్తుడు ఆతి పవులు ఇని నాను తీతుజ్ రాసిన. నీను నా సొంత మరిన్ లెకెండ మన్ని. ఎందానిజ్ ఇహిజ, దేవుణు వందిజ్ వెప్పి మన్ని మాటెజ్, నాను నమ్మిజనికెజె నీనుబా నమిజని. దేవుణుదిజ్ నెగ్రెండ నమ్మిదెజ్, వాండ్రు ఏర్పాటు కిత్తి లోకురిజ్ నడిపిస్తేవందిజ్, వాండ్రు సజి ఏర్పాటు కిత్తాండ్రె పొక్తాన్. మరి, దేవుణు వందిజ్ నిజమాతి సజతిజ్ నెన్పిసిని వందిజ్ వాండ్రు సజి ఏర్పాటు కిత్తాండ్రె పొక్తాన్. యా నిజమాతి సజతిజ్ దేవుణుదిజ్ లోజిజి నడిపిక ఎలాగ ఇజ వెప్పి తోరిస్తాద్. అయావలె వారు ఎలాకాలం దేవుణు వెట బత్తిని బత్తుదిజ్ ఆసదాన్ ఎర్దునూణార్. అబద్ధం వరిగిజ దేవుణు, ఎలాకాలం వన్నివెట బత్తిని బత్తు వందిజ్ లోకుర్ వెట ఒట్టు కిత్తాన్. నిరకారమ్బా నెల్లెండ మన్నివలె మహి వన్ని ఉదెసం వజనె వాండ్రు ఒట్టు కిత్తాన్. దేవుణు పణిమనిసిర్ నువార్ వెప్టార్. ఆహా వాండ్రు ఏర్పాటు కిత్తి కాలమదు, లోకురిజ్ నువార్ వెన్పిస్తాన్. అయాక వెప్టాజ్ సజి ఒపజెప్త మనాన్. మజి రక్కిసిని దేవుణు అడ్ర వజనె నాను వెప్పిన. బుబ్బాతి దేవుణుని, మజి రక్కిసిని క్రీస్తుయేసు, దయాదర్మమదాన్, నీను నిసాతిదాన్ మండ్రెజ్ సాయం కిదిర్.

క్రేతు దేసమదు తీతు కిదెజ్ మన్ని పణి

5 నాను నిజి వెప్పి వజనె, తప్పికెజ్ దిదిజి, దేవుణు సజమ్కు మన్ని పట్టుమ్కాజ్ విజు పెద్దెలుజ నిల్వల. దిన్నివందిజె నాను నిజి క్రేతు దేసమదు డిజిన్ వాత.

6 దేవుణు సజమ్దు, పెద్దెలి అనికాన్ ఎయెన్ ఇహిజ, నింద సిల్లికాన్. ఉండ్రె ఆల్సీ మంజనికాన్. వన్ని కొడోర్ దేవుణుదిజ్ నమినికార్ ఆదెజ్. కొడోర్, సెఇ పణిజి వందిజ్ నేరం మొవె ఆఇకార్ ఆదెజ్. వెప్పిమాట వెనికార్ ఆదెజ్. నన్ని వరి అప్పొసిన్ పెద్దెలి ఆదెజ్.

7 ప్షాన్దు నింద సిల్లికాన్ ఆదెజ్వెలి. ఎందానిజ్ ఇహిజ, వాండ్రు దేవుణుదిజ్ నమ్మితి వరిజ్ నడిపిస్తేకాన్. వాండ్రు గర్ ఆఇకాన్. మూంజిడ్ కోవం మన్ఎండ, సోన్ఎండ, డెయేసె ఆవండ, సిగు వాని సెఇ పణిజ్ కిజి లాబమ్వందిజ్ నుడెఎండ మంజనికాన్ ఆదెజ్వెలి.

8 అహిజ, వాండ్రు వాతివరిజ్ డర్గు కినికాన్, నెగ్గి వన్యాజ్ కోరిజనికాన్, అణెనె ఆజి మంజనికాన్, నీతి నిజాయి మనికాన్, దేవుణు వందిజ్ కేట ఆతికాన్, నెగ్గి బుద్ది మనికాన్ ఆజి మండ్రెజ్.

9 ప్షాన్దు అనికాన్ యేసుక్రీస్తు వందిజ్ మాటు నెన్పిస్తే నిజమాతి మాటెజ్ అయవజ గటిజ సమ్మినికాన్ ఆదెజ్వెలి. ఎందానిజ్ ఇహిజ, వాండ్రు నమ్మిత్తి వరిజ్ నిజమాతి మాటెజ్ నెన్పిసి, నిజమాతి మాటెజ్ ఎద్రిసిని వరిజ్ వరి తప్పజు తోరిస్తెజ్ అట్టికాన్ ఆదెజ్.

10 ఎందానిజ్ ఇహిజ, సంఠొండార్ మనార్, అతికారమ్దిజ్ లోజిఎండ, పొక్తి వర్గిజ, మొసుం కినికార్ సంఠొండార్ మనార్. ముకెలం, యేసుప్రబు రక్కిస్తెజ్ ఇహిజ నునతి కిబి ఆదెజ్ వెలి ఇజ కనితం వెప్పినికార్ యాలెకెండ మనార్.

11 వరి వెయికు మీరు మూక్తెజ్వెలి. ఎందానిజ్ ఇహిజ, వారు నమ్మిత్తి వరిజ్ తప్పజ్ నెన్పినార్. ఆహా నమ్మిత్తి వరి కుటుమ్దికార్ విజెర్ నిజమాతి మాటెజ్ నమ్మిఎండ ఆవ్కిజనార్. వరి సొంత లాబం వందిజె వారు ఈహు కిజనార్.

12 క్రేతుదికార్ వెహ్సాన్, “క్రేతుదికార్ ఎస్సెవలెబా అబద్ధం వర్గినికార్, మూర్కమదికార్, బదకం ఆజి తిండికకర్తి ఆతికార్”, ఇజి. యా లెకెండె వెహ్సాకాన్, వరి లోఇ ఒరెన్ పల్కుబడిః మన్నికార్తె.

13 వాండ్రు క్రేతుది వరి వందిజ్ వెహ్సాకెజ్ నిజమనె. అందెజి బాన్ మన్ని నమ్మితికార్ నిజమాతి మాటెజ్ నెగ్రెండె నమ్మిని వందిజ్ నీను వరిజ్ డటిసి డటిసి దిదిఅ.

14 వారు అరీదం సిల్లి యూదురి కత సాన్తరమ్కకు అన్ఎండ మంజిని వందిజ్ నీను వరిజ్ దిదిఅ. మరి, నిజమాతి నజతిజ్ డిఃసి సాహివరి మాటెజ్ లోజిఎండ మంజిని వందిజ్ నీను వరిజ్ డటం దిదిఅ.

15 మన్ను పాపమ్కాజ్ సుబరం ఆతివరిజ్, విజుబా సుబరం ఆతిలెకెండె నెగెండె మనాద్. గాని, మన్ను సుబరం ఆవిండ, యేసుక్రీస్తుజ్ నమ్మిఇ వరిజ్ ఇనికబా సుబరం ఆవిండ నెవణ్ మనాద్. ఎందానిజ్ ఇహిజు, వరి గరబం సెఇక ఆత మనాద్. వారు సెఇకెజ్ కినివెలె, ‘తప్తాప్’, ఇజిబా వరి గరబం గదివిద్.

16 వారు దేవుణుదిజ్ నెస్పాప్ ఇజి వెహా ఆజినార్. గాని వరి వణిజాణిజ్ వన్నిజ్ నెక్కిపాక్కినార్. వారు పెంటు లెకెండె మనికార్. దేవుణుదిజ్ లోజిఇకార్. ఇని నెగి వణిజ్ కిడిజ్బా తగిఇకార్.

2

నిజమాతి మాటెజ్ వెహ్సానాన్

1 తీతు, నీను దేవుణుదిజ్ నమ్మితి వరిజ్, నిజమాతి మాటెదిజ్ కూడితి మన్ని నజతిజ్ నెన్పిన్అ.

2 డోకారిజ్ నెన్పిన్అ, వారు సోన్ఎండ మండ్రెజ్ ఇజి. విజెరి వరిజ్ గవరం నీజి మంజిని లెకెండె మండ్రెజ్ ఇజి. నెగి బుద్దిదాన్ మండ్రెజ్ ఇజి నెస్సెన్అ. మరి, వారు నిజమాతి మాటెజ్ నెగ్రెండె నమ్మిజు, మహివరిజ్ ప్రేమిని ఓరిసి మండ్రు ఇజి నెస్సెన్అ.

3 అయాలెకెండె, డోక్రికాజ్బా నెన్పిన్అ, అవిక్ బక్రిదాన్ మంజిని వరిలెకెండె మండ్రెజ్ ఇజి. అవీక్ సాండిజ్ వర్గిఎండ, సోన్ఎండ, మహి వన్కాజ్ నెగి నజతిజ్ నెన్పిన్జె ఇజి.

4-5 అయావలె అవిక్, బోదెకాజ్ నెన్పిన్జె అనాద్. ఇనికెజ్ నెన్పిన్జె ఇహిజు, వనక మాసిరిజ్ని కొడెఱిజ్ ప్రేమిన్జె, అణసె ఆజి మండ్రెజ్, నెగి మన్నుదాన్ మండ్రెజ్, ఇండ్రోణి వణిజ్ నుడఃజి, కనికారం తోరిసి మండ్రెజ్, మాసిరిజ్ లోజిదెజ్ ఇజి. బోదెక్ అయాలెకెండె మండ్రెజ్, ఎందానిజ్ ఇహిజు దేవుణు మాటె ఎయెన్బా దూసిన్ఎండ మండ్రెజ్.

6 అయాలెకెండె, దజ్డార్ అణసె ఆజి మండ్రెజ్ వరిజ్ ఉసార్ కిబిన్అ.

7-8 నీను విజు వనకాజ్ లోఇ నెగికెజ్ కిజి వరి ఎద్దు ఉండ్రీ గుర్దు లెకెండె తోరి ఆఅ. నీను నెన్పిసినివెలె, డోజు సాటు వెహా ఆవిండ, నీను వెహ్సాని మాటెదు మొసం సిల్లెండ, పూర్తి నీను వరిజ్ నెన్పిన్అ. ఎందానిజ్ ఇహిజు, మజి వడఃఇకార్ మా మున్ను సెఇ మాటెజ్ వర్గిదెజ్ ఆవిండ, సిగు ఆజి మండ్రెజ్.

9-10 నీను వెటి వణి కినివరిజ్ నెన్పిన్అ, వారు విజు దని లోఇ ఎజుమానిరిజ్ లోజిజి, వరిజ్ ఇస్సం ఆనివజు కిజి మండ్రెజ్ ఇజి. ఎజుమానిరిజ్ మరజు వెహాఎండ, డోజు కివిండ మండ్రెజ్ ఇజి నెన్పిన్అ. వారు ఎజుమానిరిజ్, ‘మజి పూర్తి నమ్మిదెజ్ అనాద్’, ఇజి తోరిన్జె. వెట్టివణి కినికార్ అయాలెకెండె మండ్రెజ్. ఎందానిజ్ ఇహిజు, వారు కిని విజు దన్ని లోఇ లోకుర్ నెస్సెజ్, మజి రక్కిసిని దేవుణు వందిజ్ మన్ని మాటెజ్ గొప్ప నెగికెజ్ ఇజి.

11 ముజాలె వెహ్సాలెకెండె నమ్మిత్తి వరిజ్, నీను నెన్పిన్జె. ఎందానిజ్ ఇహిజు, లోకురిజ్ విజెరిజ్ రక్కిన్మందిజ్ దేవుణు, వన్ని దయాదర్మమదాన్ యేసుక్రీస్తుజ్ యా లోకమదు షోక్తాన్.

12 వాండ్రు మజి వన్ని దయా దర్మమదాన్ నెన్పినాన్, దేవుణుబాణిజ్ దూరం కిబిసిని విజు నజతిజు డిఃన్అ, ఇజి. యా లోకమది లోకుర్ అస ఆజినికెజ్ డిఃన్అ’, ఇజి నెస్సెనినాన్. మరి, మాటు నెగి బుద్దిదాన్, నీతి నిజయ్దిదాన్, దేవుణుదిజ్ సర్గ సీనికెజ్ కిజి యా తరమ్దు మండ్రెజ్ ఇజి నెన్పిన్సాన్.

13 మాటు అయా లెకెండె మండ్రెజ్. ఎందానిజ్ ఇహిజు, మజి గొప్ప సర్గ కిబిన్జె ఉండ్రీ రోజువందిజ్ మాటు అసదాన్ ఎద్దు నుడఃజినాట్. ఇహిజు, మాటు మజి రక్కిసిని పెరి దేవుణు అతి యేసుక్రీస్తు వాజిని రోజు వందిజ్ అసదాన్ మజి కొత్తాజ్ పుటిస్తాండ్రె ఎద్దు నుడఃజినాట్. వాండ్రు గొప్ప జాము కూడితి మన్ని నండ్రె సోకుదాన్ వానాన్.

14 మా విజు పాపమకాజ్ మజి డిఁసపిస్తెజ్, సాదెజ్ వన్నిజ్ వాండ్రె ఒపజెవె ఆతాన్. మురి, మజి నుబరం కిజి, నెగ్గికెజ్ కిదెజ్ పూర్తి ఒపజెవె ఆతి వన్ని సొంత లోకూర్ లెకెండ తయూర్ కిదెజ్ వాండ్రె ఒపజెవె ఆతాన్.

15 నాను ఏలు వెప్తికెజ్ విజు నమ్మితివరిజ్ పూర్తి అతికారమదాన్ నెస్సినెల. వారు అయాకెజ్ కిదెజ్ వరిజ్ పణిసి వెహాల. అయాకెజ్ కిజవరిజ్ దిదిల. నిజి ఎయెనబా దుసలాడిఁవిండ నుడఁజె.

3

నెగ్గి పణిజ్ కినివందిజ్ వెప్పొనాన్

1 దేవుణుదిజ్ నమ్మితి లోకూర్ అతికారిజ లోజెదెజ్, వెప్తి మాటు వెజి మండ్రెజ్, ఇని నెగ్గి పణిజ్ కిదెజ్ బా తయారాజి మండ్రెజ్ ఇజి నీను వరిజ్ ఎత్తు కిబిని మన్ల.

2 వారు, ఎయెరిజ్ బా నెఇకెజ్ వెహావిండ, జటిజ్ ఆవిండ, సార్లిదాన్ విజెరె వెట తగిజి మండ్రెజ్ ఇజి వరిజ్ వెప్పొ మన్ల.

3 ఎందానిజ్ ఇహిజు, మాటుబా ముజాల నమ్మిజు వరిలెకెండ, బుద్ది సిల్లెండ మహాట్. మాటు ఎయెరిజ్ బా లోజెవిండ మహాట్. మొసెం కిబె ఆజి మహాట్. యా లోకమది నెఇ ఆనెజ్ నీ సుకమకాజ్ నండో ఆన ఆజి మహాట్. పగదాన్, గోసదాన్ కాలం గడఁప్ప మహాట్. మహి వరిజ్ దూసలాడిఁజి మహాట్. వారు మజి దూసలాడిఁతారె.

4 గాని అయాలెకెండ మహివలెనె, మజి రక్కిసిని దేవుణు వన్ని కనికారం తోరిస్తాండ్రె, ప్రేమ తోరిస్తాండ్రె మజి రక్కిస్తాన్.

5 మాటు కిత్తి నీతి పణిజాణిజ్ ఆవిద. గాని వన్ని కనికారమదానె మజి రక్కిస్తాన్. దేవుణు ఆత్మదాన్, వాండ్రు మా పాపమక నొరిజి మజి కొత్తాజ్ పుటిస్తాండ్రె, ఉండ్రె కొత్త బత్తు సిత్తాండ్రె మజి రక్కిస్తాన్.

6-7 దేవుణు దయా దర్శమదాన్ మాటు నీతి నిజయ్ మన్నికాట్ ఇజి వాండ్రు తీర్పు సితాన్. ఆహా, తీర్పు సిత్రుజ్ మాటు కోరిజిని ఎలాకాలం దేవుణు వెట బత్తిని బత్తుదిజ్ అక్కు మన్నికార్ ఆనివందిజ్ మా మున్కు దేవుణు ఆత్మ నండో పోక్తాన్. వాండ్రు మజి రక్కిసిని యేసుక్రీస్తు వెటనె దేవుణు ఆత్మ నండో పోక్తాన్.

8 యా మాటు పూర్తి నమ్మిదెజ్ తగ్గిక. అందెజె దేవుణుదిజ్ నమ్మితి వరిజ్ అయాకెజ్ డటిసి నీను నెన్పిస్తెజ్ ఇజి నాను కోరిజిన. ఎందానిజ్ ఇహిజు, వారు మహి వరిజ్ వరి మన్ను పూర్తిదాన్ నెగ్గి పణిజ్ కిదెజె. మున్కు వెప్తి మన్ని మాటజ్ విజు విజెరిజ్ నెగ్గికెజ్ నె, పణిదిజ్ వానికెజ్ నె.

9 గాని అరదం సిల్లెండ తర్కిస్తెకెజ్, అనిగొగొర్ వందిజ్ వెప్పొనికెజ్, జటిజ్ ఆనికెజ్, యూదురి రూలుజి వందిజ్ వెప్పొ గొడఁబ కినికెజ్ విజు, ఎందానిజ్ పణిదిజ్ రెఇకెజ్, విలువ సిలికెజ్. అందెజె వనక వందిజ్ దూరం మన్ల.

10 నమ్మితి వరి నజమదు, నిజమాతి మాటజి వెట కూడిఁఇకెజ్ నెన్పిసి, వరిజ్ ఎరలిసి కేట కిని వన్నిజ్ ఉండ్రె రుండి నుట్టు బుద్ది వెహాల. మురి, వాండ్రు విన్విండ మహిజు, వన్నిజ్ దూరం కీత.

11 నన్నికాన్ నిజమాతి నజతిజ్ నరి తప్పి పాపం కిజినాన్ ఇజి నిజి తెలినాద. వన్ని పాపమక వాండ్రు తప్పు కిజినాన్ ఇజి రుజుప్ కిజినె.

12 నాను పిన్ని కాలం నికొపొలితు గడఁప్పెజ్ ఇజి తిరుమానం కిత్త మన. అందెజె నాను అర్తమానుజ్ ఇని వన్నిజ్ నో, తుకికుజ్ నో నీ డర్పు పొక్కు. నస్తివలి నీను అబె నా డర్పు వాదెజ్ నుడఁజె.

13 జెనా ఇని లాయరు, అపొలు, క్రేతు దేసం డిఁసి మురి సొండ్రెజ్ నుడఁజినార. వరి పయెనమ్దు ఇనికబా తక్కు సిల్లెండ వరిజ్ కావాలిస్తెకెజ్ విజు సీజి నెగ్గెండ పోకెల.

14 నమ్మితికార్ పణిదిజ్ రెఇ బత్తు బత్తివిండ, పణిదిజ్ వానికెజ్ కిజి మండ్రెజ్. అందెజె, వారు వరి సమయం విజు అవ్సరం మన్ని వరిజ్ సాయం కిదెజ్ నెస్తిజ్ వెలి.

15 నా వెట మనికార్ విజెరె నిజి వెన్బాతిలెకెండ వెప్పొనార. మాటు నమ్మిజిని లెకెండ నమ్మిజి, మజి ప్రేమిస్తెవరిజ్ నాను వెన్బాతి లెకెండ వెహాల. దేవుణు దయా దర్శం మీరు విజెరె వెట మనీద.

అపొస్తుడు ఆతి పవులు పిలెమొనుజ్ రాస్తి ఉత్తం

నెల్ల కిబిన్సిక

అపొస్తుడు ఆతి పవులు కొలోసి పట్టుమదు మని పిలెమొను ఇని ఒరెన్ దేవుణుదిజ్ నమ్మిత్తి వన్నిజ్ రాస్తి ఉత్తమెనె యాక. పిలెమొనుజ్ ఒనెసిము ఇని ఒరెన్ వెట్టిపణి మనిసి మహాన్. ఒనెసిము పిలెమొనుజ్ డిఃస్తాండ్రె, ఉహాక్సి ఎంబెనొ సొహాన్. వాండ్రు సొహా మహివలె పవులుజ్ దనూల్ ఆతాన్. పవులు వన్నిజ్ నువార్త వెహ్లాజ్, వాండ్రు యేసుక్రీస్తుజ్ నమ్మిత్తాన్.

పవులు ఒనెసిముజ్ పిలెమొను డగ్రు మరజి పొక్కినాన్. నీను, ఒనెసిముజ్ నెమిసి ఒరెన్ తంబెరి లెకెండ్ర వన్నిజ్ డగ్రు కిత, ఎందనిజ్ ఇహిజ, వాండ్రు ఏలు దేవుణు వెట సమందం ఆతికాన్ ఇజి యా ఉత్తమదు రాసి ఒనెసిము వెట పొక్కినాన్.

1-2 క్రీస్తుయేసు వందిజ్ జెలిదు మన్ని పవులు ఇని నాను రాసిని ఉత్తం. మా వెట నువార్త పణి కిజిని మా సొంత కూలాయెన్ ఆతి పిలెమొనుజ్, మా తజి లెకెండ్ర మని ఆపియెజ్, మా వెట క్రీస్తు వందిజ్ నేవకిదెజ్ నండొ కర్ణబడిజి కాట్లాడజిని అరకివుజ్, మీ ఇండ్రొ కూడజి వాజిని దేవుణు నజమదిజ్ రాసిన్. మా కూలాయెన్ ఆతి తిమోతిబా నా వెట మిజి వెన్బాతి లెకెండ్ర వెహ్లానాన్.

3 మా బుబ్బు ఆతి దేవుణుని ప్రబు ఆతి యేసు క్రీస్తు దయా దర్మమదాన్ మీరు నిపాతిదాన్ మండ్రెజ్ సాయం కిపిర్.

దేవుణుదిజ్ వందనమ్కు

4-5 ఒ పిలెమొను, నాను నిజి ఒడిబిజి పార్దనం కినివలె, నా దేవుణుదిజ్ ఎస్తివలెబా వందనమ్కు వెహ్లాన. ఎందనిజ్ ఇహిజ, లోకర నజి వెహ్లానార నీను ప్రబు ఆతి యేసుజ్ నమ్మిజిని ఇజి. దేవుణుదిజ్ నమ్మిత్తి వరిజ్ విజెరిజ్ ప్రేమిన్సి ఇజి. దిని వందిజ్ నాను దేవుణుదిజ్ వందనమ్కు వెహ్లాన.

6 క్రీస్తు వందిజ్ నీను నమ్మిత్తి నజితిజ్ మహిపరిజ్ ఉసారదాన్ వెహ్లాజ్ ఇజి నాను పార్దనం కిజిన్. అయావలె దేవుణు మజి సీజిని విజి నెగ్గి ఇనాయమ్కు నీను పూర్తి నెస్తిలె. యేసు క్రీస్తు వెట మాటు కూడితి మనితానె దేవుణు అయా ఇనాయమ్కు మజి సీనాన్.

7 ఒ తంబెరి, దేవుణుదిజ్ నమ్మిత్తి వరిజ్ నీను ప్రేమిసి, వరి పాణుదిజ్ నిమాలం కిబిన్అ. ఆహె, నీను నజి నండొ సరద కిబిన్సిదె ఆదరిన్సి.

పవులు ఒనెసిము వందిజ్ బతిమాలజినాన్.

8-10 అందెజె, క్రీస్తు నజి సీతి అతికారమ్దాన్ నీను కిదెజ్ మని పణి కిత ఇజి ఆడ్ర నీదెజ్ నజి ఆక్కు మనాద్. గాని నాను నిజి బతిమాల్లిన్. ఎందనిజ్ ఇహిజ, నీను దేవుణుదిజ్ నమ్మిత్తి వరిజ్ ప్రేమిన్సికె ఇజి నాను నెసిన్. డొక్ర ఆత, ఏలు క్రీస్తుజ్ నేవ కిని వందిజ్ జెలిదు మని పవులు ఇని నాను నిజి బతిమాల్లిన్. నా మరిన్ లెకెండ్ర మని ఒనెసిముజ్ సాయం కిని వందిజ్ నాను బతిమాల్లిన్. నాను గెలుస్కాణిజ్ మహివలె వాండ్రు నా మరిన్ లెకెండ్ర ఆతాన్. నాన వన్నిజ్ దేవుణు దరొట్ తత.

11 వాండ్రు* ముజాల, నిజి ఎందనిజ్ పణిదిజ్ రెఇకాన్. ఎందనిజ్ ఇహిజ, వాండ్రు నిజి డిఃస్త సొహాన్. గాని ఏలు నిజిని నజి పణిదిజ్ వాతికాన్ ఆతాన్.

12 నజి నండొ ఇస్సం ఆతి వినిజ్ నీ డగ్రు మరజి పొక్కిన్.

13 నువార్త వెహ్లాని వందిజ్ నాను గెలుస్కాణిజ్ మనివలె, నజి సాయం కిదెజ్ వినిజ్ నా డగ్రు ఇడెదెజ్ నజి ఇస్సం మనాద్. ఎందనిజ్ ఇహిజ, విన్ని సాయం నీను కిత లెకెండ్ర ఆదెజ్.

14 గాని నీను వెహ్ఎండ్ర నాను వినిజ్ ఇబ్బె ఇడెఎ. ఎందనిజ్ ఇహిజ, నా వందిజ్ నీను కిని ఇని మేలుబా నాను డటిని వెహ్లాజ్ ఇజి ఆమాట్. గాని నిజి ఇస్సం ఆతివజ, పూర్తి మన్నుదాన్ కిదెజ్.

* 1:11 1:11 ఒనెసిము ఇని పేరుదిజ్ అరదం పణిదిజ్ వానికాన్ ఇజి.

15-16 వాండ్రు మర్జి వానిక నీ డగ్రు ఎలాకాలం మంజని వందిజ్నెను. వాండ్రు సెగం కాలం దూరం ఆత మహాన్. అందెజె ఏలుదాన్ వాండ్రు నీ వెట్టిపణి కిని వన్నిలెకెండ్ అఎన్. దన్నిజ్ ఇంక నండో ఇన్జం మని ఒరెన్ తంబెరి లెకెండ్ మనాన్. నజి వన్ని మున్కు ఒరెన్ తంబెరి లెకెండ్ నండో ఇన్జం మనాద్. గాని వన్నిజ్ నిజి ఒదె ఇన్జం మంజినాద్లె. ఒరెన్ వెట్టిపణి కిని వన్ని వజ ఇన్జం మంజినాద్లె. యేసుప్రబు వెట కూడితి మని దనితాన్ ఒరెన్ తంబెరి వజబా ఇన్జం మంజినాద్లె.

17 అందెజె క్రిస్తు వందిజ్ నీ వెట జత కూడేజి పణికినికాన్ ఒరెన్ ఇజి, నజి ఒడేబితిజ, నీను నజి ఎలాగ డగ్రు కినిదో, అయా లెకెండ్ వన్నిజ్ డగ్రు కిత.

18 వాండ్రు నిజి ఇని తపు కితిజనో, నిజి అప్పు మర్జి సీదెజ్ మహిజనో, అయాక నా మున్కు మోవ్ అ.

19 పవులు ఇని నాను నా సొంత కీదాజె రాసిన. నీను దేవుణు దరోట్ వాదెజ్ నానె సాయం కిత. అందెజె నీ కొత్త బత్తు వందిజ్, నజి నీ బత్తునె సీదెజ్ మనాద్. గాని నాను అయాక లోన్ ఎ. వాండ్రు సీదెజ్ మనికెజ్ నాను తిరిస్సు.

20 ఓఓ తంబెరి, యేసుప్రబు వెట మజి మని సమందమ్దాన్, నీ బాణిజ్ నాను యా సాయం కోరిజిన. యేసుప్రబు వెట కూడితి మని దనితాన్ వన్నిజ్ డగ్రు కిజి నజి సర్ద కిబిన్ అ.

21 నాను వెప్టాకెజ్ నీను తవ్వెండ కిని ఇజి నాను నెసిన. అందెజె నాను నిజి రాసిన. ఒబ, నాను వెప్టా దని మున్కు నీను నండో కినిలె ఇజి నాను నెసిన.

22 జెలిదాన్ నజి డిస్సి వందిజ్ మీరు పార్లనం కిజినిదెర్. మీ పార్లనం దేవుణు వెంజి, మీ డగ్రు మర్జి వాదెజ్, దేవుణు సాయం కినాన్ ఇజి నాను కోరిజిన. అందెజె నా వందిజ్ ఉండ్రీ బాడ్డి తయార్ కిత.

23 యేసు క్రిస్తుజ్ వెప్సాని వందిజ్ నా వెట జెలిదు మని ఎవప్ర నిజి వెన్ బాతి లెకెండ్ వెప్సానాన్.

24 అయాలెకెండ్, నా వెట సెవ పణి కిజిని మార్కు, అరిస్తార్కు, దెమ, లూక ఇనికార్బా నిజి వెన్ బాతి లెకెండ్ వెప్సానార్.

25 ప్రబు ఆతి యేసుక్రిస్తు దయా దర్లం మిజితోడు మనీద్.

ఎత్తి లోకురిజ్ రాస్తి ఉత్తమదిజ్ నెల్ల కిబిసినిక

ఇస్రాయేలు లోకుర్ అయగుస్తు దేసమదు వెటిపణి కిజి మహార్. వారు నండో బాదెజ్ ఆజి మహార్. దేవుణు ఇస్రాయేలు లోకురిజ్ అయగుస్తు దెసమదాన్ డిసేపిసి, కానాను దేసమదు ఒత్తెజ్ ఇజి, మోసె వరిజ్ నడిపిసి తత్తాన్. కానాను దేసమనె వరిజ్ సీన ఇజి దేవుణు వరిజ్ ఒట్టు కిత్తాన్, వారు పయసం కిజి మహి వలె, మోసె వెట దేవుణు వరిజ్ పది ఆత్తెజ్ సీజినాన్. దన్ని వెట దేవుణు వెప్పినాన్, “నాను వరి నడిపి మండ్రెజ్ ఇజి నా వందిజ్ నెగ్గి ఇల్లు లెకెండే మంజిని ఉండ్రీ గుడారం తోవ్రాజ్”, ఇజి (నిర్లము 25:8). యాక ఎలాగ తోవ్రాజ్ ఇజి గుర్తులెకెండే ఉండ్రీ రూపు దేవుణు మోసెజ్ తోరిసినాన్. “నాను మిజి సుడోజి, మీ వెట అబ్బె వర్గిన”, ఇజి దేవుణు వెప్సాన్ (నిర్లము 29:42). అందెజ్, దేవుణు మంజిని ఉండ్రీ బాడ్డినె గుడారం. దేవుణు మంజిని బాడ్డిదిజ్ పోలిత మనాద్ యా గుడారం (ఎత్తి 9:11).

పుజేరిబు - యూదురి మతమదు, లేవి తెగాదు మన్ని వరిజె, పుజేరిబు ఇజి ఏర్పాటు కిసార్. మహి తెగాదికార్ విరిజ్ వరి దసమబాగం సీదెజ్. పుజేరిబు ఆవండ, పెరి పుజేరిబు ఇజి, విజేరి పుజేరిబు ముస్సు, మన్ని పెరి పుజేరిబు ఇజి నండోడార్బా మహార్. ఉండ్రీ కాలమదు విజేరి పుజేరిబు ముస్సు, మన్ని పెరి పుజేరి ఇజి దేవుణు తోలిత ఏర్పాటు కిత్తాన్*. పుజేరిబు దేవుణుదిజ్ ఒద్దె కెట ఆతి గదిదు డుగజి సేవ కిత్తార్. గాని విజేరి పుజేరిబు ముస్సు, మని పెరి పుజేరి ఒరెండ్రె దేవుణుదిజ్ ఒద్దె కేట ఆతి గదిదు డుగజి సేవ కిత్తాన్. ఏలు యేసు మా వందిజ్ విజేరి పుజేరిబు ముస్సు, మన్ని పెరి పుజేరి వజి వాత మనాన్.

గుడారం - దేవుణు మోసెజ్ తోరిస్తి రూపు వజి తయార్ కిత్తి ఉండ్రీ టంబు గుడుసని దన్నిలోఇ మన్ని వనక వందిజ్నె గుడారం ఇసార్. ఇబ్బెనె దేవుణు వన్ని లోకుర్ వెట వర్గినాన్. టంబు గుడుసనిదిజ్ రుండి గద్దిజ్ మన్నె. దేవుణు వందిజ్ కేట ఆతి గదిని దేవుణు వందిజ్ ఒద్దె కెట ఆతి గది ఇజి రుండి మన్నె. యా రుండి గదిజిబా దేవుణు వందిజ్ కేట ఆతి ఇట్టికెజె. ఉండ్రీ తెరనె యా రుండి గదిజి కేట కేట కిత్తాద్. తెర, నీరి దుపాటి లెకెండే మనాద్. రుండి గదిజి నడిపి డోయె ఆత మనాద్. అయాక నండో దలం మన్నిక, నండో సోకుదాన్ అట మనాద్.

దేవుణుదిజ్ కేట ఆతి గది - దేవుణుదిజ్ కేట ఆతి గది పెరిక. దన్నిజ్ 30 మూరెజ్ నీరిండే, 15 మూరెజ్ ఒసార్ మహాద్. దన్ని లోఇ దేవుణు ఎద్దు రోటిజ్ ఇడ్డి బల్ల ఉండ్రీ కత్తితి సిల్లి బజారమదాన్ తయార్ కిత్తి దీవెజ్ డండి ఉండ్రీ, దేవుణుదిజ్ దూపం సురుని మాలి పెటె ఉండ్రీ, మన్నె.

1 దేవుణు ఎద్దు రోటిజ్ ఇడ్డి బల్ల

దేవుణుదిజ్ కేట ఆతి గదిని ఉణెరి పడోకాదు యా బల్ల మంజినాద్. యాక తుంబ మరాతి సెక్కెజాణిజ్ తయార్ కితిక. దన్ని ముస్సు, కత్తిసిల్లి బజారమదాన్ పూత రాస్త మనాద్. దేవుణు ఎద్దు ఇడ్డి రోటిజ్ ఎన్సివలెబ దన్ని ముస్సు మంజినె. యూదురి ఆసారం వజి యా రోటిజ్ ఉండ్రీ పలెమదు, రుండి వర్సిజ్ ఆరు దొట్టిజ్ మంజినె. విస్రాంతి దిసమదునె యాకెజ్ మారిసి మరి కొత్తికెజ్ ఇడ్పార్. అయా పడోయ రోటిజ్ పుజేరిబునె తిండ్రెజ్. మరి ఎయెర్బా తిండ్రెజ్ ఆవీద్. లేవి తెగాదు మన్నికార్, యా రోటిజ్ తయార్ కిసార్. విస్రాంతి దిసమదిజ్ ముజాల మన్నిరెయనె తయార్ కిసార్.†

2 కల్తితి సిల్లి బజారమదాన్ తయార్ కిత్తి దీవ డండిజ్

యా డండిజ్ కల్తితి సిల్లి బజారమదాన్ తయార్ కిత్తిక్కాదె. దేవుణు వందిజ్ కేట ఆతి గదిని డేబ్ల పడోకాద్ మంజినాద్. యా కంతుదు ఏడు దీవెజ్ మంజినె. దన్ని ముజాల మన్నిబాడ్డిదు జాయ్ మండ్రెజ్నె యాక మంజినాద్. ఒరెన్ పుజేరి పెందల్కని పొదొయక కనిసి మంజినాన్.‡

3 దూపం సుర్సి మాలి పెటె

యాక, నడిపిమ డెర డగ్గు మంజినాద్. దన్ని ముస్సు, దూపమనె ఆవండ మరి ఇనికబా కూలిజ్నో, జంతుజ్నో పార పొట్టిజ్నో సురదెజ్ ఆవీద్. పెందల్కని పొదొయక దూపం సుర్పార్. గాని యాక దేవుణు

* 0: 1:0 ఏత్తి 5:4 † 0: 1:0 లేవి 24:5-9 ‡ 0: 1:0 నిర్లము 26:35

వందిక్ ఒడ్డె కేట ఆతి గదిదు మన్ని ఉండ్రె వస్తు. అందెజె, దేవుణు వందిక్ ఒడ్డె కేట ఆతి గద్దిదు మంజినక ఇజి ఒడోబిజినార్.⁵

దేవుణు వందిక్ ఒడ్డె కేట ఆతి గది - దేవుణు వందిక్ ఒడ్డె కేట ఆతి గది నీరిండ్, ఒసార్ ఉండ్రె సమానమనె. 15 మూరెక్ మన్నె. దిన్ని లోఇ మందసం మనాద్. మందసం ఇహిజ ఉండ్రె పెటె. యాక దేవుణు మనాన్ ఇజి ఉండ్రె గుర్తు లెకెండ్ మనాద్. దేవుణుదిక్ కేట ఆతి గదిదిక్ని ఒడ్డె కేట ఆతి గదిదిక్ నడిమి ఉండ్రె డెర అడ్డు మనాద్. యా డెర నండో దలం మన్నిక. నండో కరిదిక. దన్ని మున్ను, నండో సోకుదాన్ అటార్. దేవుణు వందిక్ ఒడ్డె కేట ఆతి గదిదు విజేరి పుజేరిజ మున్ను, పెరి పుజేరి ఒరెండ్రె సొనాన్. మరి ఎయెన్బ సొన్ఎన్. వాండ్రుబా ఏంటుదిక్ ఒర్పునె, సోనాన్. లోకురి విజెరి పాపమక వందిక్ పూజ సీదెక్ ఉండ్రె రోజు మనాద్. నాండిజె డెర వెరెజి, లోఇ సొనాన్.*

యేసు మా వందిక్ విజెరి పుజేరిజ మున్ను, మన్ని పెరి పుజేరి అత మనాన్. వాండ్రు సిలువాదు సాతిక్, పాపమక వందిక్ ఎలాకాలం వందిక్ ఉండ్రె సుట్టు పూజ లెకెండ్ వన్నిక్ వాండ్రె ఒవజెపె ఆతాన్.† యేసు సిలువాదు సాతి గడియాదు దేవుణు గుడిఁదు దేవుణు వందిక్ కేట ఆతి గదిదిక్ని దేవుణు వందిక్ ఒడ్డె కేట ఆతి గదిదిక్ నడిమి మహి డేర, మున్నుహాన్ అడిఁగిదాక రుండి బదెక్ ఆజి కింజెతాద్.‡ ముజాల డేర వెరెజి విజేరి పుజేరిజ మున్ను, మన్ని పెరి పుజేరి ఒరెండ్రె దేవుణు వెట వర్గదిక్ లోఇ డుఁగీనాన్. గాని క్రిస్తు సాతిక్, వన్ని మున్ను, నమకం ఇడ్డి ఎయెన్బా దేవుణు డర్పు సొండ్రెక్ అటాన్. మరి పూజదిక్ అవ్సరమేబా సిల్లెద్.

మందసం - మందసం ఉండ్రె దేవుణు వందిక్ కేట ఆతి గదిదు మన్ని వస్తు. మందసం ఇహిజ ఉండ్రె పెటెనె. యాక తుంబ మరాతి సెక్కెజాణిక్ తయార్ కిజి దిన్ని మున్నుని లోఇ కల్తె సిల్లి బజారమ్దాన్ పూత రాసె అతమనాద్. దిన్ని మున్ను, ఉండ్రె మూత మనాద్. అయొకబా కల్తె సిల్లి బజారమ్దాన్ పూత రాసె అత మనాద్. అయొక మూత నెక్కి ముద కిదెక్ ఆనాద్. లాగిజ సొప్తాజిబా ఆనాద్.⁵ యా మూతదిక్ “కరుణ పీటం” ఇనార్.* కరుణ పీటం ఇహిజ, పాపమక సెమిన్ని బాడ్డి ఇజి అర్లం. కరుణ పీటం మున్ను, కెరూబుక్ మన్నె. కెరూబుక్ లోకు మూర్తి వజినె మన్నె గాని రెక్కెక్ మన్నె. యా కెరూబుక్ ఇతాన్ ఉండ్రె ఆతాన్ ఉండ్రె ఎద్దు నిల్లి, కరుణ పీటమదునె బేసి రెక్కెక్ కొరెన్సె మన్నె.† కెరూబుజ నడిమి మొసావ్ మనాద్. కరుణా పీటం మున్ను, యా మొసావ్దు దేవుణు మంజినాన్. పరిసుద్దమాతి దేవుణు యా లెకెండ్ బాన్ మంజినాన్. అందెజె ఇని సెకాన్సో తప్పు కిత్తికాన్సో బాన్ కరుణ పీటం డర్పు సొండ్రెక్ అటెవ్. గాని దేవుణు ఏరెపాటు కిత్తి విజేరి పుజేరిజ మున్ను, మన్ని పెరి పుజేరి ఒరెండ్రె సొండ్రెక్ అటాన్. వాండ్రుబా వన్ని సొంత ఇష్టమదాన్సో, పూజ కిత్తి దన్ని నల సిల్లెండనో సొండ్రెక్ ఆవద్. యా లెకెండ్ సిల్లెండ సొహిజ వాండ్రు నిజం సొనాన్.

మందసమేదు మన్నికెక్ - మందసమేదు దేవుణు మొసెక్ సిత్తి వది ఆడ్రెక్ రాస్తి మన్ని రుండి పల్కెక్ మన్నె. కల్తెసిల్లి బజారమ్దాన్ తయార్ కిత్తి జగ్గుదు మన్నా మనాద్. మరి, సిగిరిస్తిమన్ని, అహారోసు డుడ్డుబా మనాద్.

మన్నా ఇహిజ తెలాని గింజ లెకెండ్ మనాద్. తేనె నూనె లెకెండ్ రుసి మంజినాద్. దేవుణు ఇస్రాయేలు లోకురిక్ బిడిఁవ్ బూమిదు నడిపిసి మహివలె వరిక్ తిండ్రెక్ యాక సిత్తాన్.‡

పది ఆడ్రెక్ రాస్తి ఇడ్డి పల్కెక్ - యా పల్కెక్ వణకాణిక్ తయార్ కిత్తికెజె. నన్ని పల్కెజ ఆడ్రెక్ గిస్తు మనాద్.⁵

డేవ - డేవ నడిమి టంబు గుడుఁస మనాద్. డేవ నుటులం వెలీగు మనాద్. దిన్నిక్ ఉండ్రె సరి మానాద్. డేవదు నంత సుర్ని మాళి పీటని నొరెబాదెక్ ఏరు ఇడ్డి వలెం మన్నె.

సంత సుర్ని మాళి పీట - యాక తుంబ మరాతి సెక్కెజాణిక్ తయార్ కిత్తిక. దిన్ని మున్ను, కంసు పూత రాస్తు మనాద్. ఇట్టెనె నంద సుర్ని పూజ కినార్. యా పీటదు సిసు ఎన్నివలెబా నమ్బివిండ కసినె మండ్రెక్, యా మాళి పీట సరి డర్పు మంజినాద్.

§ 0: 1:0 ఏత్తి 9:4, 1రాజు 6:22 * 0: 1:0 ఏత్తి 9:27 † 0: 1:0 ఏత్తి 7:27 ‡ 0: 1:0 మత్తయి 27:51 § 0: 1:0 నిర్గమ 25:10-15 * 0: 1:0 నిర్గమ 25:7 † 0: 1:0 నిర్గమ 25:18-22 ‡ 0: 1:0 నిర్గమ 16:14-31 § 0: 1:0 నిర్గమ 31:18

నోర్బాదెజ్ ఏరు ఇడ్చి వలెం - యా వల్లెం నంద సుర్ని మాల్ పీటని, గుడారం నడిమి మంజినాద్. యాకబా కంసుదాన్ తయార్ కిత్తిక. పుజేరిజు పూజ కిని ముజాల్నో, గుడారమ్ లోఇ సొని ముజాల్నో నోర్బాదెజ్ ఏరు ఇడ్చికాదె యాక.

ఏబ్రి లోకురిజ్ రాస్తి ఉత్తం

నెల్వ కిబిసినిక

ఏబ్రి లోకురిజ్ రాసిని ఉత్తమ్నె యాక. ఏబ్రి లోకుర్ ఇహిజ, క్రీస్తు ముస్సు, నమకం ఇట్టి యుదురి లోకుర్. యా ఉత్తం రాస్తికాన్ ఎయెన్ ఇజి తెలివీద్. యేసు ప్రబునె, దూతారిజ్ ఇంక మోసెజ్ ఇంక, మోసి సీతి రూలు వజ పుజెరి పణి కిజిని పెరి పుజేరిజ ఇంక గొప్ప పెరికాన్ ఇజి యా ఉత్తమ్దు వెహ్సినాద్. పూజెజ్ లోకురి పాపమ్కు సొన్పిన్ఉ. గాని యేసు ప్రబు పూజ ఆతి దన్నితాన్నె లోకురి పాపమ్కు సొనె. వన్ని నలదాన్నె, లోకుర్ సుబ్బరం ఆనార్. దేవుణు డగ్గు దయరమ్దాన్ మండ్రెజ్ అటూర్. అయాలెకెండ, కొత్త బప్పమానం నడిపిన్సికాండ్రె యేసు ఇజి వెహ్సినాద్. మరి దేవుణు ముస్సు, నమకం ఇట్టి పూర్బమ్దు బత్తిజి మహి నండొండార్ వరిజ్ వెహ్సినార్. కండెవెరిదు, నమ్మితి లోకుర్ ఎలాగ మండ్రెజ్ ఇజి యా ఉత్తమ్దు వెహ్సినాద్.

1 పూర్బమ్దు, ఆఇ ఆఇ నండొ నమయమ్దు, నండొ రకమ్కాణిజ్, దేవుణు ప్రవక్తరు వెట మా అనిగొగొరిజ్ వర్గితాన్.

2 గాని యా కడెవెరి దినమ్కాజ్, వాండ్రు వన్ని మరిన్ వెట మజి వర్గితాన్. వన్ని వెటనె బూలోకమ్ని దని లోఇ మనికెజ్ విజు దేవుణు తయార్ కిత్తాన్. వన్నిజె, విజు దనిజ్ అక్కు, మనికాన్ ఇజి వీర్పాటు కిత్తాన్.

3 దేవుణు గొప్ప పెరికాన్ ఇజి తోరిన్సికాండ్రె మరిన్. వన్ని లెకెండె వీండ్రు మనాన్. గొప్ప నత్తు మని వన్ని మాటదాన్, బూలోకమ్దు మని విజు వన్కాజ్ వీండ్రు నడిపినినాన్. లోకురి పాపమ్కు నోర్దెజ్ వాండ్రు సాతి వెనుక, గొప్ప పెరి దేవుణు ఉణెర్ పడకాదు అతికారమ్దు బస్తాన్.

4 అందెజె, వాండ్రు దూతార్ ముస్సు, గొప్ప పెరికాన్ అతాన్. దూతార్ పేర్కు, ముస్సు, దేవుణు వన్నిజ్ సీతి పేరు గొప్ప పెరిక మని లెకెండ, వాండ్రు పెరికాన్ అతాన్.

5 ఎందనిజ్ ఇహిజ, దేవుణు యేసుప్రబుజ్నె అవండ, వన్ని దూతారిజ్ ఎయెరిజ్బా ఎనిజ్బా వెహ్ఎతాన్, "నీను నా మర్రిన్. నేండ్రు నాని నీ బుబ్బు అత మన",* ఇజి. మరి, దేవుణు దూతారిజ్ ఎయెరిజ్బా ఎనిజ్బా వెహ్ఎతాన్", నానె వన్ని బుబ్బు ఆన. వాండ్రె నా మరిన్ ఆనాన్లె",* ఇజి.

6 మరి, దేవుణు వన్ని లోలోసుర్ కొడొడిజ్ యా లోకమ్దు తపినిని వలె, వెహ్సినాన్, "దేవుణు దూతార్ విజెరి వన్నిజ్ పొగడిజి మాడిస్సెజ్వలె",* ఇజి.

7 దూతార్ వందెజ్ వెహ్సినాన్, వాండ్రు ఈహు వెహ్సినాన్, "గాలి లెకెండె వన్ని దూతారిజ్ తయార్ కిజినాన్, కనిన్సి సెను లెకెండ, వన్ని పణి మణిసిరిజ్ తయార్ కిజినాన్",* ఇజి.

8 గాని వన్ని మరిన్ వందెజ్ ఈహు వెహ్సినాన్, "ఓ దేవుణు, నీను బన్ని సిమానసం అంతు సిల్లెండ ఎల్లాకలం మంజినాద్. నీను సీతి నిజాయితిదాన్ రాజు వజ ఏలుబడి కిని.

9 నీను నిజమాతి దనిజ్ ప్రేమిన్సి మని. సెఇ దనిజ్ దూసిన్సి మని. అందెజె, నీ దేవుణు ఆతి దేవుణు నిజె ఎర్లెసి సరద్ ఆని గొప్ప గసం సితాన్. యాక నీ జత మని వరిజ్ సీతి దన్నిజ్ ఇంక నండొ గొప్ప పెరిక",* ఇజి, దేవుణు మరిన్ వందెజ్ వెహ్సినాన్.

10 వాండ్రు మరి వెహ్సినాన్, "ఓ ప్రబువా, లోకం పుటిన్ఎండ ముజాలె, యా లోకమ్దిజ్ పునాది ఇడ్చికి నీనె. ఆగాసం తయార్ కితికి నీనె.

11 అయాలెజ్ విజు నానసం ఆనె. గాని నీను మంజిని. పాత పణిదిజ్ రెఎండ పడాాయిక ఆనిలెకెండ అయాలెజ్ విజు పణిదిజ్ రెఎండ పడాాయికెజ్ ఆనె.

* 1:5 1:5 క్రిస్ 2:7. * 1:5 1:5 1సము 7:14; 1దిసరు 17:13. * 1:6 1:6 ద్వితి 32:43. * 1:7 1:7 క్రిస్ 104:4.
* 1:9 1:9 క్రిస్ 45:6,7.

12 పంసె ముడఱత కినిలెకెండ, నీను వన్యూజ్ ముడఱత కిని. పాత మారిసిని లెకెండ, వన్యూజ్ మారిసిని. గాని నీను ఎలాకాలం ఉండ్రె లెకెండె మంజిని. నీను ఎనెజ్బా డొక్ర అజ",* ఇజి.

13 దేవుణు వన్ని దూతారె ఎయెరిజ్బా ఎనెజ్బా వెహెతాన్, "నాను నీ వగతి వరిజ్ నీ పాదమక అడిఱి ఇడ్డిదాక, నీను నా ఉణెరి పడఱకాద్ మసి మన్అ",* ఇజి.

14 అహిజ, దూతారె ఎయెరి? వారు విజెరి దేవుణుదిజ్ సేవ కిని అత్తెనె. దేవుణు రక్కిసిని వరిజ్ సాయం కిదిజ్, వాండ్రు పొక్కికారె.

2

యేసు రక్కిస్సాన్ ఇని నిజమాతి పెరి సజతి నెక్కిపొక్కిమిండ జాగర్త వెండ్రెజ్.

1 అందెజె మాటు వెహిమని నిజమాతి సజతిజ్, మరి నండొ జాగర్తదాన్ వెండ్రెజ్ వలె. ఎందనిజ్ ఇహిజ, దని బాణిజ్ దూరం అవిండ మంజిని వందిజె.

2 దేవుణు దూతారిజ్ వాండ్రు వెహిపిసతి మాటిజ్, నిజం ఇజి రుజువ్ అత మనాద్. అయా మాటిజ్ తప్పిక్సాన్, లోజిఇకాన్ ఎయెరి అతిజ్బా, తగితి సిక్కు వన్నిజ్ దొహ్క మనాద్.

3 అహిజ, దేవుణు లోకురిజ్ సిక్కుదాన్ ఎలాగ తప్పె అదెజ్ అట్టూట్? గెల్పిస్సి వందిజ్ మని యా బోద్ ప్రబునె తొలిత వెహ్సాన్. వాండ్రు వెహ్సెకెజ్ వెహెకారె, అయాక నిజం ఇజి మజి రుజువ్ కిత్తారె.

4 మరి, దేవుణుబా విజు రకమకాణి నత్తుమని పణిజ్, గొప్ప బమ్మాని పణిజ్ కిజి రక్కుణ వందిజ్ వెహ్సెక నిజం ఇజి రుజువ్ కిత్తారె. వన్నిజ్ ఇస్టం అతివజ, దేవుణు అత్తెజ్ సీబాజి సీజ దేవుణు రుజువ్ కిత్తారె.

యేసుప్రబునె లోకురిజ్ రక్కిస్సికాన్.

5 వాజని కాలమది లోకం ఎలుబడిఱ కిదిజ్ దేవుణు, దూతారిజ్ ఒవజెవ్ఎతాన్. పరలోకం వందిజె మాటు వర్ణజనాట్.

6 గాని దేవుణు మాటుడు ఎంబెసె ఎయెండ్రె డటిసి ఈహు వెహ్సికాన్, "ఓ దేవుణు, నీను ఎత్తు కిదిజ్ లోకు ఏవటిదికాన్? నీను బాగ నుడెదెజ్ లోకు ఏవటిదికాన్?"

7 నీను దూతారిజ్ ఇంక వన్నిజ్ సణెం ఇజ్జికాన్ కితి. నీను వన్నిజ్ పెరికాన్ కితి. గవరవమదిజ్ తగ్గికాన్ లెకెండొ కితి.

8 విజు వన్యూజ్ మున్సు. వన్నిజ్ అతికారం సితి* ఇ. లోకురిజ్ విజు వన్యూజ్ మున్సు. దేవుణు అతికారం సితి", ఇజి వెహ్సికాన్. ఇహిజ, విజు వన్యూజ్ మున్సు అతికారం వన్నిజ్ మనాద్. గాని ఏలు, లోకురి విజు వన్యూజ్ మున్సు అతికారం కిజినిక తొవట్.

9 గాని ఏలు, యేసుజ్ గొప్ప గనమదాన్, గొప్ప గవరవమదాన్ దేవుణు పెరికాన్ కితిక మాటు నుడెజినాట్. ఎందనిజ్ ఇహిజ, వాండ్రు నండొ బాదెజ్ ఓరిసి సాతాన్. వన్నిజ్ దూతారిజ్ ఇంక సణెం దేవుణు ఇజ్జికాన్ కిత్తారె. ఎందనిజ్ ఇహిజ, వాండ్రు యా లెకెండొ లోకురి విజెరి వందిజ్ సాదెజ్. యా లెకెండొ, దేవుణు దయా దర్శం కిత్తారె.

10 విజు, దేవుణు తయారొ కిత్తారె. విజు వన్నివందిజె తయారొ కిత్తారె. యేసుప్రబు బాదెజ్ ఓరిసి సాజిని దనితాన్ దేవుణు వన్నిజ్ పూర్తి కిజినాన్. వాండ్రు పూర్తి అతికాన్ అతాన్. అయె లెకెండొ యేసుజ్ పూర్తి కిజినిక తగ్గికాదె. ఎందనిజ్ ఇహిజ, నండొ కొడెరిజ్ వాండ్రు ఎలాకాలం దేవుణు వెట బత్కిని బత్కుడు నడిపిస్సిజ్. యేసునె వరిజ్ రక్కుణుడు నడిపిస్సికాన్.

11 వాండ్రె లోకురిజ్ దేవుణు వందిజ్ కేట అతి వరి లెకెండొ కిజినాన్. వన్నిజ్ని వాండ్రు దేవుణు వందిజ్ కేట కిత్తి లోకురిజ్, బుబ్బు ఒరిండ్రె. అందెజె వరిజ్ తంబెరిజు ఇజి కూక్తెజ్ యేసు సిగు ఆవన్.

12 వాండ్రు దేవుణుదిజ్ వెహ్సికాన్, "నీ వందిజ్ నాను నా తంబెరిజు వెహ్సి, నీ లోకురి కూడఱిబాన్, నాను నిజి పొగిడిఱన్"* ఇజి.

13 మరి వాండ్రు వెహ్సికాన్, "నాను వన్ని మున్సు. నా నమకం ఇడ్డి"* ఇజి. మరి బా వెహ్సికాన్, "ఇదిలో, నానుని దేవుణు నజి సితి కొడెరి",* ఇజి.

* 1:12 1:12 క్విస్ 102:25-27. * 1:13 1:13 క్విస్ 110:1. * 2:8 2:8 క్విస్ 8:4-6. * 2:12 2:12 క్విస్ 22:22.

* 2:13 2:13 యెనయ 8:17. * 2:13 2:13 యెనయ 8:18.

14 దేవుణు కొఱ్ఱోన నలని, కండదాన్ తయార్ ఆతి లోకురనె. అందెజె యేనుప్రబుబా నలని, కండదాన్ తయార్ ఆతి లోకు వజ ఆతాన్. ఎందనిజ్ లోకు ఆతాన్ ఇహిజ, ఒరెన్ లోకు వజనె సాదెజ్ అట్వాన్. వాండ్రు సాజినె, సావు మున్సు అతికారం మని సయతానుజ్ సిల్లెండ కిదెజ్ అట్వాన్.

15 అయా లెకెండ, సావుదిజ్ తియెల్ ఆజి, వరి బత్తు విజు సావు తియెల్దిజ్ అడిఃగి మని విజెరిజ్ డిఃన్పిన్జెజ్ అట్వాన్.

16 నిజమె, వాండ్రు దూతారిజ్ సాయం కిఎన్. గాని అబ్రాహము* తెగ్గాది వరిజ్ సాయం కిజినాన్.

17 దిన్ని వందిజ్, వాండ్రు ఎల్లగాతిజ్బా వన్ని తంబెరిజు లెకెండ ఆదెజ్వలె. ఎందనిజ్ ఇహిజ, వాండ్రు నండొ కనికారం మని, నమ్మిదెజ్ తగ్గు పెరి పుజెరి ఇజి, దేవుణుదిజ్ సేవ కిదెజ్ మరి, లోకురి పాపమక వందిజ్ పూజ కిదెజ్.

18 వాండ్రె పరినిజ్ కిబె ఆజి, బాదెజ్ ఆతాన్. అందెజె పరినిజ్ కిబె ఆని పరిజ్ సాయం కిదెజ్ అట్వాన్.

3

యేను మోసె మున్సు పెరికాన్.

1 అందెజె దేవుణు వందిజ్ కేటె ఆతి, దేవుణు కూకె ఆతి తంబెరిజాండె, యేనుప్రబుబుజ్ ఎత్తు కిదు. వాండ్రె, దేవుణు పొక్తి అపొన్సుడుః ఇజి, విజెరి పుజెరిజు మున్సు పెరి పుజెరి ఇజి, మాటు నమ్మిజు ఒప్పకొడిఃజినాట్.

2 దేవుణు కుటుమ్ది వరిజ్ విజెరిజ్ మోసె నమ్మకమ్దాన్ సేవ కితి లెకెండ, వీండ్రుబా వన్నిజ్ పణి ఒపజెప్తి దేవుణుదిజ్ నమ్మకమ్దాన్ సేవ కిత్తాన్.

3 ఉండ్రె ఇల్లుదిజ్ ఇంక ఇల్లు తొహిన్తి వన్నిజె గొప్ప గనం వానాద్. అయాలెకెండ, మోసె ఇంక యేనునె గొప్ప గనమ్దిజ్ తగ్గికాన్.

4 నిజమె, విజు ఇల్లుబా, ఎయెండ్రొ ఒరెన్ తొహిన్. గాని విజు తొహిన్కాన్ దేవుణునె.

5 దేవుణు కుటుమ్ది వరిజ్ విజెరిజ్, ఒరెన్ సేవమపణిమణిని వజ మోసె నమ్మిదెజ్ తగ్గికాన్ ఆతాన్. వాని కాలమ్దు దేవుణు వెహెజ్ మనికెజ్ వాండ్రు వెహెన్.

6 గాని దేవుణు కుటుమ్ది వరి మున్సు అతికారం మని మరిన్ వజ, క్రీస్తు నమ్మిదెజ్ తగ్గికాన్. మాటు దయరమ్దాన్ నిల్చి, మాటు ఎద్రు సుడఃజిని ఆసదిజ్ డిఃన్ఎండ గటిజు అసినె మహిజ, మాటు వన్ని కుటుమ్దికాట్.

నమ్మిఇతి వందిజ్ సారిని సారిని వెహిన్నిక.

7-8 అందెజె, దేవుణు ఆత్మ ఈహు వెహిన్ని లెకెండ, “నేండ్రు మీరు దేవుణు వెహిన్నిక వెహిజ, అయా దినమ్దు బిడిఃమ్ బూమిదు దేవుణుదిజ్ లోజెదెజ్ కెఇత్తి వలె, వన్నిజ్ పరిని కితివలె, మీ మున్సుజ్ గర్ర ఆతి లెకెండ గర్ర కిమాట్.

9 అబె, నాల్వయి పంటెజ్ నాను కితి గొప్ప బమ్మ ఆతి పణిజ్ సుడఃతిజ్బా, మీ అనిగొగొర్ నజి పరిని కిజి నజి లోజెదెజ్ కెవెతార్.

10 అందెజె నాను అయా తరమ్ది లోకుర్ వెటె కోపం ఆతాన్ వెహె. “ఎన్సివలెబా వరి మున్సు నా బాణిజ్ దూరం ఆజినాద్, నాను వెహిన్నికెజ్ వారు వెన్ఎర్”, ఇజి.

11 అందెజె నాను నండొ కోపం ఆజి ఉండ్రె ఒట్టు కిత, ‘వారు ఎనెజ్బా నా డగ్రు వాజి నా వెటె రోమ్బెవిర్లె’,* ఇజి.

12 తంబెరిజాండె, మీ లొఇ ఎయెన్ వన్నిజ్బా, బత్తిజిని దేవుణు బాణిజ్ దూరం కిబిన్సి నమకం సిలి, సెఇ మున్సు మన్ఎండ జాగర్ర సుడఃదు.

13 గాని, విజు దినమ్కాజ్ మీరు ఒరెన్ మరి ఒరెన్ వన్నిజ్ బుద్ది వెహిన్, ఆదరిని మండ్రెజ్ వలె. ‘నేండ్రు’ ఇజి వెహిన్దినిం విజు, అయాలెకెండ కిజి మండ్రెజ్ వలె. ఎందనిజ్ ఇహిజ, మీ లొఇ ఎయెన్బా పాపమ్దాన్ మోసెం ఆజి, మున్సు గటి ఆవిండ మంజిని వందిజ్ ఆదరిని మండ్రెజ్ వలె.

* 2:16 2:16 అబ్రాహము తెగాతికార్ ఇజి వెహిన్నిక దేవుణు లోకుర్ వందిజె. * 3:11 3:11 క్రిస్టు 95:7-11.

14 మాటు, క్రీస్తుజ్ తొలిత నమకం ఇట్టివలె వన్నిజ్ నమ్మిత్తి లెకెండ, అకర్దాక డటం నమకమ్దాన్ మహిజనె, మాటు క్రీస్తు వెట జత కూడితి మనికాట్.

15 దేవుణు మాటదు ముజాలె వెప్పొని లెకెండ, “నేండ్రు, మీరు దేవుణు వెప్పొనిక వెహిజ, దేవుణుదిజ్ లోజీదెజ్ కెకత్తి వలె మీ మన్ను గర్త ఆతిలెకెండ గర్త కిమాట్”*.

16 దేవుణు వెప్పొనిక వెంజ, వన్నిజ్ లోజీదెజ్ కెకతికార్ ఎయెర్? ఎయెర్ ఇహిజ, అయ్గుప్పు దేనమ్దాన్ మోని డిస్సిసి, నడిపిసి తతి లోకుర్ విజెరె గదె.

17 ఎయెర్ వెట దేవుణు నలపుయ్ వంటిజ్ కోపం దాన్మహాన్? పాపం కిజ, బీడిమ్ బూమిదు సాతి వరివెట గదె కోపమ్దాన్ మహాన్.

18 “వారు ఎనెజ్బా నా డగ్రు వాజి నా వెట రోమ్బెవెరెల”, ఇజ దేవుణు ప్రమానం కితివలె ఎయెర్ వందిజ్ వెహాన్? వాండ్రు వెహికిజ్ వెన్ఇతి వరి వందిజ్ గదె వెహాన్.

19 అందెజ, వారు నమ్మిఇతిజ్నె, దేవుణు డగ్రు సొన్ని రోమ్బిదెజ్ అట్ఎతార్ ఇజ మాటు నెస్సాట్.

4

దేవుణు లోకురిజ్ రోమ్బిదెజ్ సిత మనాన్

1 దేవుణు డగ్రు సొన్ని వన్ని వెట రోమ్బిదెజ్ అట్నారె ఇజ వాండ్రు కితి ఒట్టు ఏలుబా మనాద్. అందెజ, మీ లోక ఎయెన్ వన్నిజ్బా అయా ఒట్టు కితిక తప్పి సొన్ఎండ మండ్రెజ్, మాటు జాగర్త మంజినాట్.

2 ఎందనిజ్ ఇహిజ, బీడిమ్ బూమిదు నడికెకార్ వెపాలెకెండెనె మాటుబా సువార్త వెహ మనాట్. గాని వారు వెహి మని దేవుణు మాట, వరిజ్ ఎందనిజ్ పణిదిజ్ రెఅతాద్. ఎందనిజ్ ఇహిజ, వారు అయా మాట నమ్మిఅతార్.

3 ఏలు అయొక నమ్మిత్తి మాటు, దేవుణు డగ్రు సొన్ని వన్నివెట రోమ్బిజినాట్. యొక, వాండ్రు వెహి లెకెండెనె మనాద్. “అందెజ, నాను నండో కోప ఆజి ఉంత్రి ప్రమానం కితి. ‘వారు ఎనెజ్బా నా డగ్రు వాజి రోమ్బెవెరెల’, ఇజ. దేవుణు లోకం తయార్ కితి వలెహాన్ అసి, వన్ని డగ్రు సొన్ని మాటు వన్నివెట రోమ్బిదెజ్ వాండ్రు మా వందిజ్ తయార్ కితండ్రె మనాన్. గాని వాండ్రు ఆహ వెహాన్.

4 ఎందనిజ్ ఇహిజ, దేవుణు మాటదు ఎంబెని ఏడు దినం వందిజ్ వెప్పొనాద్. “దేవుణు విజు పణిజ్ పూర్తి కితండ్రె, ఏడు దినమ్దు రొబితాన్”, ఇజ.

5 మరి, ముజాలె వెప్పొని మాటదు వెప్పొనాద్, “వారు ఎనెజ్బా నా డగ్రు వాజి రోమ్బెవెరెల”,* ఇజ.

6 ముజాలె సువార్త వెహి మనికార్, దేవుణు డగ్రు సొన్ని వన్నివెట రోమ్బెవెరెల. ఎందనిజ్ ఇహిజ, వారు నమ్మిఅతార్. గాని, దేవుణు డగ్రు సొన్ని వన్ని వెట రోమ్బెజ్ మహి సెగొండార్ మనార్.

7 అందెజ, దేవుణు, వన్ని డగ్రు సొన్ని వన్ని వెట రోమ్బిదెజ్ మరి ఉంత్రి రోజు ఇట్టండ్రె, ‘నేండ్రు’, ఇజి కూక్రాన్, దిన్ని వందిజ్, నండో కాలం వెనుక దాబీదు వెట వెహిప్పిసి వలె, ముజాలె వెహి అయా మాటనె వెహిప్పిసాన్. “నేండ్రు మీరు దేవుణు వెప్పొనిక వెహిజ, మీ మన్ను గర్త కిమాట్”,* ఇజ.

8 దేవుణు డగ్రు సొన్ని వన్నివెట రోమ్బిదెజ్, యెహొసువ వరిజ్ నడిపిసి మంజిని కిహిజ, మరి ఉంత్రి రోమ్బిని దినం వందిజ్ దేవుణు వెనుక వెహిఎండ మహాన్ మరి.

9 అందెజ దేవుణు ఏడు దినమ్దు రోమ్బితిలెకెండ, లోకుర్బా రోమ్బిదెజ్ ఇజి వాండ్రు సిత మనాన్.

10 ఎందనిజ్ ఇహిజ, దేవుణు డగ్రు సొన్ని వన్ని వెట రోమ్బిని ఎయెన్బా, దేవుణు వన్ని పణిజ్ వీస్తాండ్రె రోమ్బితి లెకెండ, వాండ్రుబా వన్ని పణిజ్ వీస్తాండ్రె రోమ్బిజినాన్.

11 అందెజ, దేవుణు డగ్రు సొన్ని వన్నివెట రోమ్బిదెజ్ మాటు నండో కర్ణుడిజినాట్. ఎందనిజ్ ఇహిజ, ఇస్తాయెలు లోకుర్ దేవుణుదిజ్ లోజీఎండ అర్తిలెకెండ ఎయెన్బా అర్ఎండ మండ్రెజ్.

12 ఎందనిజ్ ఇహిజ, దేవుణు మాట పాణం మనిక. నండో నత్తు మనిక. రుండి దరోట్ తెవుగు మని ఎలాగ మర్తి కుర్తదిజ్ ఇంక ఒదె తెవుగు మనిక. దేవుణు మాట, లోక డుగ్జె మన్నుదిజ్ గర్తమ్దిజ్ ఎర్రిసి డూగ్గు సొనాద్. అత్తుజ, ముల్వుజ ఎర్రిసినాద్. ఆలోసనమ్కాజ్, మన్నుదు మని ఉదెనమ్కాజ్ పరిక్కి కినాద్.

13 తయారీ అతి ఇనికబా దేవుణు బాణిక్ డపె అదెక్ అబ్డ. విజు వన్ని కణకెజ ఎద్రు టిటాక్ తోరెజెనె, డాజ్ఎండ తోరెజెనె వన్నిజె, మాటు కితి విజు వన్కా వందిక్ లెక ఒవజెప్పెక్ మనాద్.

యేసునె విజు పుజెరిజ మున్కు గొప్ప పెరి పుజెరి.

14 అందెజె, మాటు డటం వెహ్సాని నమకం డీన్ఎండ అసి మంజనాట్. ఎండనిక్ ఇహిజ, ఆగాసం డాట్టి, దేవుణు డగ్రు సాహి విజెరి పుజెరిజ మున్కు మని పెరి పుజెరి ఒరెన్ మజి మనాన్. వాండ్రు దేవుణు మరిసి అతి యేసు.

15 మా విజెరి పుజెరిజ మున్కు మని పెరి పుజెరి, మజి మని తకుజ విజు నెన్ఇకాన్ అఎన్. గాని మజి వాజిని విజు రకమకాణి పరినెక్, వన్నిజ్బా వాతె. గాని వాండ్రు పాపం కిఎతాన్.

16 అందెజె నండో దయా దర్మం తోరిసిని దేవుణు బన్ని సిమసనం డగ్రు మాటు తియెల్ సిల్లెండ దయరమదాన్ సానాట్. అబె వన్ని కనికారం మజి దోహనాద్. మజి అవ్సరం మనివలె మజి సాయం కిదెక్ వన్ని దయా దర్మం దోహనాద్.

5

1 విజెరి పుజెరిజ మున్కు మని పెరి పుజెరిజబా వరి లోకుర నడిమిహునె దేవుణు ఎరలిస్తాండ్రె, లోకుర వందిక్ దేవుణుదిక్ సేవ కిదెక్, వాండ్రు ఏర్పాటు కిసాన్. ఎండనిక్ ఇహిజ, వారు లోకురి దేవుణుదిక్ సిదెక్.

2 విజెరి పుజెరిజ మున్కు మని పెరి పుజెరి, నెన్ఎండ తపు కినివరిక్, సరి తప్పి సాని వరిక్ సారలి తోరెన్జెక్ అటూన్. ఎండనిక్ ఇహిజ, వరిక్ మని తకుక్ విన్నిజ్బా మన్నె.

3 దిన్ని వందిజె, లోకురి పాపమక వందిజె అవండ, వన్ని సొంత పాపమక వందిజెబా, వాండ్రు పుజెక్ సిదెక్ మనాద్.

4 ఎయెనబా వన్నిక్ వాండ్రె, విజు పుజెరిజ మున్కు మని పెరి పుజెరి ఇని పెరి గనం తపె అఎన్. అహలోసుక్ విజెరి పుజెరిజ మున్కు మని పెరి పుజెరి ఇజ దేవుణు ఏర్పాటు కితి లెకెండ, దేవుణునె వన్నిక్ ఏర్పాటు కిదెక్ వలె.

5 అయాలెకెండ, క్రీస్తుబా వన్నిక్ వాండ్రె విజెరి పుజెరిజ మున్కు మని పెరి పుజెరి ఇని యా పెరి గనం తపె అతాన్. గాని విజెరి పుజెరిజ మున్కు మని పెరి పుజెరి ఇజ వన్నిక్ ఏర్పాటు కితి దేవుణు వన్నిక్ వెహ్సాన్. “సిను నా మరిన్. నేండ్రు నాను ని బుబ్బు అత మన”, ఇజె.

6 మరి, ఎంబెనెబా దేవుణు వెహ్సానాన్, “మెల్కిసెదెక్ మహి లెకెండ, సిను ఎల్లకాలం మని ఒరెన్ పుజెరి”, ఇజె.

7 యేసు బూమిదు మహివలె, వన్నిక్ సావుదాన్ తపిస్సెక్ అట్టి దేవుణుదిక్ డటం అడబాజి, కణెర్ వాక్సి పార్దనం కిత్తాన్. వన్ని మొరె దేవుణు వెహ్సాన్ ఎండనిక్ ఇహిజ వాండ్రు తియెల్దాన్ తగె అత మహాన్.

8 వాండ్రు దేవుణు మరిసి అతిజబా, వన్నిక్ వాతి స్రమెజాణిక్ దేవుణుదిక్ లోజెదెక్ వాండ్రు నెస్తాన్.

9 దేవుణు వన్నిక్ పూర్తి కితివలె, వన్నిక్ లోజెని వరిక్ విజెరిక్ రక్సిన్సికాన్ అతాన్.

10 మెల్కిసెదెక్ మహి లెకెండ, విజెరి పుజెరిజ మున్కు మని పెరి పుజెరి ఇజ దేవుణు వన్నిక్ ఏర్పాటు కిత్తాన్.

నమకమదాన్ అరెండ జాగర్త సుడెదెక్.

11 దిన్ని వందిక్ మరి నండో వెహ్సెక్ మజి మన్నె గాని, మీరు నిపాతిని అర్దం కిజెనిదెర్. అందెజె నండో వెహ్సెక్ కస్టం ఆజినాద్.

12 మీరు దేవుణుదిక్ నమ్మిజె నండో వంటెజ్ ఆజినాద్. ఏలు మహి వరిక్ బోద్సెక్ మనికిదెర్ మీరు. గాని, దేవుణు మాటరు తోలితె నెన్జెక్ మని నిజమాతి సజతిక్ మరిబా నెన్సిన్జెక్ ఎయెనబా నెన్పిస్సాన్ మండ్రెక్ వలె. పాలు ఉణిజిని లేత కొణెర్ లెకెండ మీరు మనిదెర్. బోజనం ఉండెక్ అబ్ఇకిదెర్.

13 పాలు ఉణికాన్ ఎయెనబా లేత కొణెనె. నిజమాతికెక్ ఇనికెక్ ఇజ నెన్పిసిని బోద్ నెన్ఎన్.

14 గాని పెరి వరిజె బోజనం మనాద్. నెగ్గెక్, సెఇకెక్ తేడ నెసి, నెగ్గెక్ కిదెక్ నెస్తిమనికారె వారు.

6

1 అందెజె, క్రీస్తు వందిజ్ తొలిత నెన్ని మహి బోదెజె నెనినె మన్ఇండ, మరి పెరి మాటెజ్ బా నెసి పిరినాట్. సావుదు నడిపిసిని సెజ పణిజ్ ఒప్పుకోడిజె డిసి సీజి, దేవుణు మున్ను, నమకం ఇడెదెజ్ ఇజ మరి మరి వెహ్సానె మన్మాట్.

2 బాప్తీసం లాగ ఆని దని వందిజ్, కికు ఇడ్చి దని వందిజ్, లోకుర్ సావుదాన్ మరజె నిజ్ దని వందిజ్, ఆకారదు దేవుణు సిని లిర్పు వందిజ్ మరి మరి వెహ్సానె మన్మాట్.

3 దేవుణుదిజ్ ఇష్టం ఇహిజ, మరి లావు నెసి పిరినాట్.

4-6 ఉండ్రీ కాలమదు దేవుణు జాయ్దు మహికార్, పరలోకమది ఇనాయం వందిజ్ బాగ నెన్ని మనికార్, దేవుణు ఆత్మ వెట కూడితికార్, దేవుణు మాట నెగ్గక ఇజ నెస్తికార్ క్రీస్తు మరజి వానివలె నమ్మిత్తి లోకురిజ్ నస్తివలె మంజిని పెరి సత్తు వందిజ్ నెస్తికార్, వారు దేవుణు బాణిజ్ దూరం ఆతిజ, మరి పాపమ్కు ఒప్పుకోడిజిని వరిజ్ మరజి తతెజ్ అట్వెద్. ఎందనిజ్ ఇహిజ, వారు దేవుణు మురిసిజ్ మరి ఉండ్రీ సుటుబా సిలువాదు కుటిజాణిజ్ డెయ్జె, విజెరె ఎద్దు సిగు కిబిస్సార్.

7 నిన్ని వరిజ్ పణిదిజ్ రెజ బూమిదిజ్, పోలిస్తెజ్ ఆనాద్. ఎందనిజ్ ఇహిజ, ఎసిజ్ ఎసిజ్ అరసిని పిరుదాన్ ఊద్చి బూమిదు, పంట పండిసిని వన్నుజ్ పణిదిజ్ వానిలెకెండ్ బూమి పంట పండిసి సీనాద్. అయా బూమిదిజ్ దేవుణు దీవిస్సాన్.

8 గాని లటిజ్ సాప్పుజ్ పండిసిని బూమి పణిదిజ్ రెవెద్. దేవుణు దనిజ్ తవ్వెండ సాయివు సీనాన్ కడెవేరిదు సినుదాన్ నానసం మనాద్.

9 గాని తంబెరిజాండె, మాపు యా లెకెండ్ వెహ్సాజ్ బా, మీరు అయాలెకెండ్ ఆఇదెర్, ఇజి మాపు పూర్తి నమ్మిజానావ్. క్రీస్తు మున్ను, నమకం ఇడెజ రక్తణదు వాతి లోకుర్ కిని నెగ్గి పణిజె, మీరుబా కిజినిదెర్ ఇజి మాపు పూర్తి నెసినావ్.

10 దేవుణు అనెయం కినికాన్ అవెన్. మీరు వన్ని వందిజ్ కితి పణిజ్, వన్ని లోకురిజ్ సాయం కిజి, మరి మరి సాయం కిజి వన్నిజ్ తోరిసిని ప్రేమ వాండ్రు పోన్వెన్.

11 మీ లోజు విజెదెరబా, యా లెకెండ్ కడెవేరిదాక మండ్రెజ్ ఇజి మాపు ఆన ఆజినావ్. ఎందనిజ్ ఇహిజ, మీరు ఆన ఆజినికెజ్ విజు తవ్వెండ పూర్తి ఆదెజ్

12 మీరు బండెజ్ ఆదెజ్ ఇజి మాపు కోరివెవ్. గాని దేవుణు మున్ను, మని నమ్మకమ్దాన్, కష్టమ్కు ఓరిసినిదనితాన్ దేవుణు సిన్ ఇజి ఒట్టు కితికెజ్ దోహ్క్కి పరిలెకెండ్ మీరు ఆదెజ్ ఇజి కోరిజినావ్.

దేవుణు అబ్రాహాముజ్ కితి ఒట్టు

13 దేవుణు అబ్రాహాముజ్ నెగ్గికెజ్ కిన్ ఇజి ఒట్టు కిత్తాన్. కితివలె వన్ని మున్ను, ఎయెన్ బా పెరికాన్ సిలితిజ్, వాండ్రు వన్నిజె, తోడు: ఇడ్డె: ఆజి అబ్రాహాముజ్ ఒట్టు కిత్తాన్.

14 వాండ్రు వెహ్సాన్, “నాను నిజి తవ్వెండ దీవిసి, నిజి నండో తెగ్గి ది వరిజ్ సీన్”,* ఇజి.

15 అబ్రాహాము ఓరిసి కావ్ కిజి మహాన్. అందెజె దేవుణు సిన్ ఇజి ఒట్టు కితికెజ్ వన్నిజ్ దోహ్క్కాద్.

16 లోకుర్ ఒట్టు కినివలె వరిజ్ ఇంక పెరి వరిజ్, వాండ్రె నజి తోడు: ఇజి వెహ్సా ఒట్టు కినార్. వరి నడిమి మని గోడు:వెజ్ విజు ఉండ్రీ ఒట్టుదాన్ సార్లి అనె.

17 దేవుణు, వాండ్రు ఒట్టు కితికెజ్ దోహ్క్కెజ్ అక్కు, మని వరిజ్, వన్ని ఉదెసం వాండ్రు కండెకెబా మారెన్వెన్, ఇజి వరిజ్ టెటాజ్ నెన్పిసిని వందిజ్, వాండ్రు వన్నిజె తోడు: ఇడ్డె: ఆజి ఒట్టు కిత్తాన్.

18 అందెజె దేవుణు మజి వన్ని ఒట్టు సిత మనాన్. వన్నిజె తోడు: ఇడ్డె: ఆజి సిత మనాన్. యా రుండి నజిలిజ్ మారెం. ఎందనిజ్ ఇహిజ, దేవుణు అబద్దం వర్గిదెజ్ అట్వెన్. అందెజె, దేవుణునా నా గతి ఇజి నమకం ఇడ్చి మజి, మా ఎద్దు ఇడ్చి మని ఆనదిజ్ డిన్వెండ అస్టెజ్ దయరం మంజినాద్.

19 మా పాణం ఇతల్ అతాల్ కద్లెండ, నెగెండ నిల్తెజ్ యా ఎద్దు సూణి ఆనెనె ఉండ్రీ కన్నె లెకెండ్ మనాద్. తెర వెన్యా, మని దేవుణు వందిజ్ ఒదె కేట ఆతి గదిదు అయాక ఒనాద్.

* 6:14 6:14 అది 22:17.

20 యేసు మా వందిజ్ మజి ఇంక ముజాలె అబె సోహాన్. మెల్కిసెదికు మహివజ, వాండ్రు ఎలాకాలం ఒరెన్ విజెరె పుజెరిజ ముస్సు, మని పెరి పుజెరి ఆత మనాన్.

7

పుజెరి ఆతి మెల్కిసెదికు

1 యా మెల్కిసెదిక్ సాలెం పట్టుమది రాజు. విజు దని ముస్సు ఆతికారం మని దేవుణు పుజెరి. నండొ రాజురి ముస్సు విదెం కిజి గెలసి, అబ్రాహము వన్ని ఇండ్రొ మరజి వాజి మహివలె, మెల్కిసెదిక్ వన్నిజ్ దసూల్ ఆతండ్రె, దీవిస్తాన్.

2 అయావలె అబ్రాహము, వాండ్రు ఉద్దం కిజి గెలసి దోహాక్తి విజు వన్యాజ్ లోఇ మెల్కిసెదికుజ్ దసంబాగం సితాన్. వన్ని పేరు తోలిత అర్దం ఇనిక ఇహిజ, నీతి నిజాయితీదాన్ ఏలుబడి: కిని రాజు. మరి ఉండ్రె అర్దం ఇనిక ఇహిజ సమాదసమదాన్ ఏలుబడి: కిని రాజు ఇజ. ఎందనిజ్ ఇహిజ, వాండ్రు సాలెం పట్టుమది రాజు. సాలెం ఇహిజ సమాదసం.

3 వన్ని అయేసి అప్పొసి వందిజ్నో, వన్ని అనిగొగొర్ వందెజ్నో గుర్తు ఇనికెజ్ సిలు. వన్ని పుడుగు వందిజ్నో, పాపు వందిజ్నో తెలివద్. వాండ్రు దేవుణు మరిసి లెకెండొ ఎల్లకాలం ఒరెన్ పుజెరి.

4 యా మెల్కిసెదికు ఎసా పెరికాన్ ఇజి ఎత్తు కిదు. దేవుణు ఏరపాటు కితి లోకుర్ లోఇ గొప్పు పెరి అనిగొగొ ఆతి అబ్రాహము, విదెమదు గెలసి వన్నిజ్ దోహాక్తి విజు వన్యాజ్ లోఇ వన్నిజ్ దసంబాగం సితాన్.

5 మోసి సీతి రూలు వజ, లేవి తెగ్గదు పుట్టి పుజెరిజు ఆతికార, ఇస్తాయేలు లోకుర్ బాణిజ్ దసంబాగం లోసినార్. ఇహిజ వారు వరి సొంత లోకుర్ బాణిజ్ లోసినార్. యా పుజెరిజుబా, అబ్రాహము తెగ్గదు పుట్టికార ఆతిజ్బా వరి సొంత లోకుర్ బాణిజ్ దసంబాగం లోసినార్.

6 మెల్కిసెదికు లేవి తెగ్గదు పుట్టికాన్ ఆవెన్. గాని వాండ్రు అబ్రాహము బాణిజ్ దసంబాగం లోస్తాండ్రె, దేవుణు సీతి ఒట్టుజ్ మని అబ్రాహముజ్, దీవిస్తాన్.

7 దీవిస్తాండ్రె, దీవన లోసె ఆని వన్నిజ్ ఇంక పెరికాన్ ఇని మాట అసమాసం సీలికాదె.

8 యూదురి పుజెరిజు సుడఃతిజ, సాజిసానికారి దసంబాగం లోసినార్. గాని మెల్కిసెదికుజ్ సుడఃతిజ, దసంబాగం లోసె అనికాన్ బత్తిజినాన్ ఇజెనె దేవుణు మాట వెప్పొనాద్.

9 అహిజ, దసంబాగం లోసెని లేవి తెగ్గదు పుట్టికార, మెల్కిసెదికుజ్ దసంబాగం సితార్. వరి అనిగొగొ ఆతి అబ్రాహము సీలిదనితాన్ వారు సితార్ ఇజి ఒరెన్ వన్నిజ్ వెహైజ్బా ఆనాద్.

10 ఎందనిజ్ ఇహిజ, మెల్కిసెదికు అబ్రాహముజ్ సుడఃతివలె, లేవి పుట్టెండ్రె. వాండ్రు అబ్రాహము పొటాద్నె నస్తవలె మహాన్.

మెల్కిసెదికు లెకెండొ యేసు ఒరెన్ పుజెరి

11 దేవుణు మెసి వెట మజి రూలుజ్ సిత మనాన్. అయా రూలుజ్ వజ, లేవి తెగ్గదు పుట్టికార పుజెరిజు ఆదెజ్వలె. ఏలు, లేవి తెగ్గదు మని పుజెరిజు ఇహిజ ఆలోసు కుటుమదికార దేవుణు ఎత్తు కితి ఉపదేసమకు పూర్తి కిదెజ్ అట్టార్ ఇహిజ, మరి ఒరెన్ పుజెరి వాదెజ్ అవ్సరం సీలెతాద్ మరి. అహోసు కుటుమదు మనికాన్ ఆవండ, మెల్కిసెదికు మహి లెకెండొ ఒరెన్ వన్నిజ్ పొక్తెజ్ అవ్సరం సీల్దెద్.

12 పుజెరిజు యా లెకెండొ మారతిజ, మోసె సీతి రూలుజ్బా మారదెజ్ వలె.

13 ఎయె వందిజ్ మాటు వెప్పొనాటో, వాండ్రు మరి ఉండ్రె తెగ్గదు మనికాన్. అయా తెగ్గదు మనికార ఎయెరబా పుజెరి వజ, మాలి పీటదు ముజాలె సేవ పణి కివెర్. యా సజతిజ్, మా ప్రబు వందిజె వెహై మన్నె.

14 వాండ్రు యూద తెగ్గదు పుట్టికాండ్రె ఇజి టెటాజ్ నెసినాట్. పుజెరిజు వందిజ్ మోసె వెహైవలె, యూద తెగ్గ వందిజ్ ఇనికబా వెహైవతాన్.

15 మెల్కిసెదికు పుజెరి మహివజ, మరి ఒరెన్ పుజెరి వాత మనాన్. అందెజె, మాటు వెహైక మరి ఒదె టెటాజ్ అర్దం ఆజినాద్.

16 లేవి తెగ్గదు మనికాండ్రె పుజెరి ఆదెజ్ ఇని రూలు వాండ్రు పూర్తి కివెండ పుజెరి ఆతాన్. గాని నాసనం కిదెజ్ అత్తె, బత్తిజిని నత్తుదాన్నె పుజెరి ఆతాన్.

17 ఎందనిజ్ ఇహిజ “మెల్కిసెదెకు మని లెకెండ, నీను ఎలాకాలం ఒరెన్ పుజెరి”,^{*} ఇజి దేవుణు మాటు క్రిస్తు వందిజ్ వెహ్సినాద్.

18 అందెజె, పుజెరిజ వందిజ్ మని వడాఱి రూలుదిజ్ విలువ సిల్లెద్. ఎందనిజ్ ఇహిజ దనిజ్ సత్తు సిల్లెత్తాద్. వణిదిజ్ రవెత్తాద్.

19 ఎందనిజ్ ఇహిజ, మోసె సితి రూలుజ్, ఇని దనిజ్బా పూర్తి కిఉతె. ఏలు మాటు ఎద్దు నుడఱితిక మోసె సితి రూలుజ్ కితి ఒటుదిజ్ ఇంక నెగెద్. అయా ఒట్టుదాన్ దేవుణు డగ్గు సొండ్రెజ్ అట్టాట్.

20 క్రిస్తు ఎలాకాలం మని ఒరెన్ పుజెరి ఇజి దేవుణు ఒట్టు కిత్తాన్. గాని మరి ఎమేణి పుజెరిజబా దేవుణు యా లెకెండ ఒట్టు కివెత్తాన్.

21 దేవుణు యేసుజ్ నె వెహ్సెన్, “ప్రబు ఉండ్రీ ప్రమాణం కిత మనాన్. అయాక ఎనెజ్బా తవ్ ఎన్. ‘నీను ఎలాకాలం మని ఒరెన్ పుజెరి’^{*}”, ఇజి.

22 దేవుణు యా లెకెండ ఒట్టు కత్తాన్. అందెజె, యాక ఉండ్రీ నెగ్గి ఒప్పమానం ఇజి తవ్ ఎండ నిజం కినికాన్ యేసునె.

23 వడాఱి అలవాటు వజ నంణెండార్ పుజెరిజు మహార్. ఒరెన్ సాతిజ, మరి ఒరెన్ వన్ని పణి కిన్.

24 గాని యేసు ఎలాకాలం మని ఒరెన్ పుజెరి. ఎందనిజ్ ఇహిజ, వాండ్రు ఎలాకాలం బత్తిజినాన్.

25 అందెజె వాండ్రు, ఏలు మరి ఎలాకాలం వన్ని వెట దేవుణు డగ్గు సొని వరిజ్ రక్సిన్తెజ్ వాండ్రు అట్టాన్. ఎందనిజ్ ఇహిజ, వరి వందిజ్ దేవుణుదిజ్ బతిమాల్ దెజ్ వాండ్రు ఎల్లకాలం బత్తిజినాన్.

26 అందెజె, మా అవ్ సరమ్ కు తిరిసిని విజా పుజెరిజ మున్ను మని పెరి పుజెరి యేసునె. వాండ్రు ఇని పాపం సిలికాన్, నింద సిలికాన్, ఇని తప్ప సిలికాన్, పాపం కిని వరిబాణిజ్ కేట ఆతికాన్. వన్నిజె పరలోకమ్ దు గొప్ప పెరి గవరం సిత మనాన్.

27 మహి పెరి పుజెరిజు లెకెండ, వాండ్రు రోజు పూజెజ్ సిదెజ్ అవ్ సరం సిల్లెద్. ముజాలి వన్ని పాపమ్ క వందిజ్, వెనుక లోకురి పాపమ్ క వందిజ్ పూజెజ్ సిదెజ్ అవ్ సరం సిల్లెద్. వన్నిజ్ వాండ్రె సిలువాదు ఒపజెప్పి వలె, వరి పాపమ్ క వందిజ్, ఎలాకాలం వందిజ్ ఉండ్రీ నుటు పూజ సిత్తాన్.

28 మోసె సితి రూలు వజ ఏర్ పాటు ఆతి విజెరె పుజెరిజ మున్ను మని పెరి పుజెరిజు పూర్తి ఆకారం. గాని మోసె సితి రూలుజ్ వెనుక, దేవుణు ఒట్టు కిత్తాన్. అయా ఒట్టు వజ మరిని విజెరె పుజెరిజ మున్ను మని పెరి పుజెరి ఇజి ఏర్ పాటు ఆత్తాన్. దేవుణు వన్నిజ్ ఎలాకాలం పూర్తి ఆతికాన్ కిత్తాన్.

8

యేసునె పుజెరిజ మున్ను మని మా పెరి పుజెరి.

1 మాపు వెహ్సెని సజతిజ లోక ముకెలమాతి మాట యాకదె. అయాక ఇనిక ఇవెహిజ పరలోకమ్ దు గొప్ప పెరి దేవుణు బసిని సమానం ఉణెరె వడఱాదు, గొప్ప బస్తిమని ఒరెన్ విజెరె పుజెరిజ మున్ను మని పెరి పుజెరి మజి మనాన్.

2 వాండ్రు దేవుణు వందిజ్ ఒది కేటి కితి గదిదు విజా పుజెరిజ మున్ను మని పెరి పుజెరి వజ సేవ కిజినాన్. ఇహిజ, ప్రబునె తయార్ కిజ ఇడ్డి నిజమాతి గుడారమ్ దు సేవ కిజినాన్. లోకురె తయార్ కితి గుడారమ్ దు ఆవ్ ద సేవ కిజినక.

3 విజెరె పుజెరిజ మున్ను మని పెరి పుజెరిజుబా, నంణె రకమ్ కాణి పూజెజ్ దేవుణుదిజ్ సిదెజ్ ఏర్ పాటు ఆత మనార్. అందెజె, విజెరె పుజెరిజ మున్ను మని యా పెరి పుజెరిబా ఇనికబా ఉండ్రీ పూజ సిదెజ్ వలె.

4 వాండ్రు యా లోకమ్ దునె మంజనిక ఇహిజ వాండ్రు ఒరెన్ పుజెరిబా ఆత్తాన్ మరి. ఎందనిజ్ ఇహిజ, మోసె సితి రూలుజ్ వజ పూజెజ్ సీని నంణె పుజెరిజు మనార్.

5 వారు సేవ కిజిని గుడారం, పరలోకమ్ దు మని నిజమాతి గుడారమ్ ది ఉండ్రీ రూపునె, సిడఱె. నని బానె వారు సేవ కిజినార్. అందెజె, మోసె గుడారం తయార్ కిదెజ్ మెుదొల్లివలె దేవుణు డటం వెహ్సెన్, “నిజి గొరెతు తొరిస్తి రూపు వజనె విజా తయార్ కిదెజ్ జాగ్రత నుడఱెదెజ్ వలె”, ఇజి.

* 7:17 7:17 క్రిస్త 110:4. * 7:21 7:21 క్రిస్త 110:4.

6 గాని ఏలు, దేవుణునిది లోకుర్ నడిమి యేసు ఏర్పాటు కితి ఒప్పుమానమనె గొప్పు నెగ్గక. అయాలెకెండె, మహి పుజెరిజ పణి ఇంక, యేసుజ్ దొహ్కొ మని పుజెరి పణినె గొప్పు నెగ్గక. ఎండనిజ్ ఇహిజ, నెగ్గ నజతిజ్ సిన ఇజి కితి ఒటుదిజ్ ఆదారం ఇడజినె యేసు అయా ఒప్పుమానం ఏర్పాటు కిత్తాన్.

7 మొదొహి ఒప్పుమానం, ఇని తప్ప నీలిక ఆనిక ఇహిజ, మరి ఉండ్రీ ఒప్పుమానమదిజ్ అవ్సరం సిల్లెతాద్మరి.

8 గాని దేవుణు, లోకుర్ లొఇ తప్ప సుడజతండ్రె, వరి తప్పుజ తోరిసి, వరిజ్ ఈహు వెహ్సన్, “ప్రబు వెహ్సినాన్, ‘ఇస్రాయేలు లోకుర్ వెట, యూద తెగ్గాది వరి వెట నాను ఉండ్రీ కొత్త ఒప్పుమానం కిని కాలం వాజినాద్.

9 నాను వరి అనిసిరిజ్ అయగుప్పు దేనెమదాన్ వరి కియు అసి వెల్లి నడిపిస్తవలె వరివెట కితి ఒప్పుమానం లెకెండె ఆవద్ యా ఒప్పుమానం. నాను వరివెట కితి ఒప్పుమానం వారు తవ్ఫార్. అందెజ్, నాను వరిజ్ డిజ్ నిత”, ఇజి ప్రబు వెహ్సినాన్.

10 మరి ప్రబు వెహ్సినాన్, ఇస్రాయేలు లోకుర్ వెట నాను కిని ఒప్పుమానం యాకదె. వాని దినమకాజ్ వెనుక, నాను నా రూలుజ్ వరి గబమదు ఇచ్చు. నాను వరి మున్నుదు అయాలెకె రాన్సు. నాను వరి దేవుణు అన. వారు నా లోకుర్ ఆనార్.

11 ఎయెర్బా వరి పడజకది వరిజ్, వరి సొంత ఇండ్రెణి వరిజ్, ‘మీరు ప్రబుజ్ నెస్తు, ఇజి నెన్పిన్ఎర్. ఎండనిజ్ ఇహిజ, వారు విజెర్ నజి నెస్సార్. ఇజ్జివరి బాణిజ్ మొదొలెసి, పెరివరిదాక నజి నెస్సార్.

12 నాను, వారు కితి నెఇకెజ్ నెమిస్తు. వరి పాపమకు నాను ఎనెజ్బా ఎత్తు కివె”,* ఇజి.

13 యా ఒప్పుమానమదిజ్, ‘కొత్తక’ ఇజి దేవుణు వెహ్సినాన్, మొదొహి ఒప్పుమానమదిజ్ పడాయక కిత్తాన్. పణిదిజ్ రజ పడాయ్ ఒప్పుమానం బేగినె సిల్లెండ ఆనాద్.

9

కొత్త ఒప్పుమానమది విజెరి పుజెరిజ మున్ను మన్ని పెరి పుజెరి

1 దేవుణుని వన్ని లోకుర్ నడిమి మహి మొదొహి ఒప్పుమానమదు, దేవుణునిది పొగడిజి మాడిసిని వందిజ్ రూలుజ్ మహి. యా బూమిదు దేవుణునిది పొగడిజి మాడిసిజ్ ఉండ్రీ గూడారమబా మహద్.

2 ఉండ్రీ గుడారం తయార్ కిత మనాద్. దన్నిజ్ రుండి గదిజ్ మహి. మొదొహి గదిదు దీవ డండి ఉండ్రీ, బల్ల ఉండ్రీ, మరి దేవుణు ఎద్దు ఇడ్డి లొటెజ్ మహి. యా గదిదిజ్ దేవుణు వందిజ్ కేట ఆతి గది ఇనార్.

3 (యా రుండి గదిజ్ నడిమి అడ్డు వజ ఉండ్రీ తెర మనాద్) తెర వెనుక మన్ని గదిదిజ్ దేవుణు వందిజ్ ఒడ్డె కేట ఆతి గది ఇనార్.

4 అబ్బె బజారమదాన్ తయార్ కితి దూపం సుర్ని మాలి పెజె, ఒప్పుమానం కితిక ఇడ్డిమని మందనం మన్నె. మందనమదిజ్, లొఇ వెల్లి సుటులం బజారం పూత రాస్త మనాద్. యా మందనం లొఇ బజారమదాన్ తయార్ కితి జగ్గుదు మన్ను, సిగిరితిమన్ని ఆహారోసు డుడ్డుని దేవుణు మోసెజ్ సిత్తి పతి ఆడ్రెజ్ రాన్సి ఇడ్డి పల్కెజ్ మన్నె.

5 మందనం మున్ను, దేవుణు మనాన్ ఇజి, తోరిసిని కెరూబుజ్ మన్నె. కెరూబుజ్ కరణపీటం మున్ను, ఇహిజ, మందనం మూత్త మున్ను రెక్కెజ్ కోరిసయ్యె మన్నె. ఏలు యా నజతిజ్ లావు వెహ్సాజ్ మాటు అట్వెల్.

6 యాలెకెండె, విజు నెగ్రెండ ఇడ్డివెనుక, పుజెరిజు, మొదొహి గదిదు వరి సేవపణి కిదిజ్ ఎస్సిన్సివలె డుజగినార్.

7 గాని విజెరి పుజెరిజ మున్ను మన్ని పెరి పుజెరి ఒరెండ్రె, లొఇమన్ని గదిదు డుజగినాన్. అయాకబా వాండ్రు ఏంటుదు ఉండ్రీ సుటునె డుజగినాన్. డుజగివలె నల సిల్లెండ డుజగివన్. అయాక వాండ్రు వన్ని పాపమకాజ్ వందిజ్, నెన్ఏందె లోకుర్ కితి పాపమకాజ్ వందిజ్ దేవుణునిజ్ పూజ సీనాన్.

8 యాలెకెండె కిజిని అలవాటుదాన్, దేవుణు ఆత్మ టెటాజ్ నెస్సిసిని నజతి ఇనిక ఇహిజ, మొదొహి గదిని అబ్బె కిని అలవాటుజ్ విజు నిల్లి మంజనివలె, లోకుర్ దేవుణు వందిజ్ ఒదె కేట ఆతి గదిదు సొండ్రెజ్ అట్వెల్.

* 8:12 8:12 యిర్షీయా 31:31-34.

9 యాక యా కాలమ్దిజ్ ఉండ్రీ గుర్తు. ఇనిక ఇహిజ, దేవుణుదిజ్ పూజ సీని విజా రకమ్కాణి పూజెజ్, సీనివన్ని గర్భమ్దు సుబ్బురం కిదెజ్ అల్తేఉ.

10 యా పడాయ్ ఆసారం, తిండి వందిజ్, ఉణి దన్ని వందిజ్, రకమ్రకం సమయమ్దు నొరబాని దన్ని వందిజె వెప్పిని రూలుజ్. యా రూలుజ్ మున్ను కిజినికెజ్. కొత్త రూలుజ్ వాని కాలమ్దాక యా రూలుజ్ మంజినె.

11 గాని, ఇబ్బె ఏలె మన్ని నెగ్గె సజతిజ్ కల్గిసని విజేరె పుజేరిజ మున్ను మన్ని పెరి పుజేరి ఇజి క్రీస్తు వాత మనాన్. వాండ్రు సేవ కిని గుడారం ఇహిజ పరలోకం. గొప్ప ముకెలమతిక. నండొ వార్తియాతిక. అయ్యాక లోకుర తయార్ కితిక ఆవిద్. తయారాతి లోకమ్దు మనిక ఆవిద్.

12 క్రీస్తు గుడారమ్దు డుగ్గెజ, ఎలాకాలం వందిజ్ ఉండ్రీ సుటు, దేవుణు వందిజ్ ఒదె కేటె ఆతి గదిదు సాహివలె, పూజ సీదెజ్ ఇజి గొరెజ, దూడెజు నలె వాండ్రు ఒవిన. గాని, వాండ్రు వన్ని సొంత నలెనె ఒతాండ్రె మజి పాపమ్కాణిజ్ సావుదాన్ ఎలాకాలం డీన్పిస్తాన్.

13 మోసె సత్తిరూలుజు వజ, గొరెజ, కొడ్డిజు నలని దూడెజ్ సమ్మి సీరు, మయిల* ఆతి లోకురి ఒడొల్దు వాక్కార్. ఎందనిజ్ ఇహిజ, వరి ఒడొల్ సుబ్బురం ఆజి దేవుణు వందిజ్ ఒపజెవె ఆజి కేటె ఆదెజ్.

14 అహిజ, క్రీస్తు నల ఎసా నెగ్రెండ సుబ్బురం కినాద్ ఇజి ఎత్తు కిదు. ఎలాకాలం మన్ని ఆత్మసత్తుదాన్, క్రీస్తు మా పాపమ్కాణి వందిజ్ వన్నిజ్ వాండ్రె దేవుణుదిజ్ ఒపజెవె ఆతాన్. ఇని పాపం సీల్లి పూజ లెకెండ, వన్నిజ్ వాండ్రె ఒపజెవె ఆతాన్. సాపు తపిప్పి సెజ పణిజాణిజ్ వన్నినల మా గర్భం మజి గదిన్విండలెకెండ సుబ్బురం కినాద్. ఎందనిజ్ ఇహిజ బత్తిజిని దేవుణుదిజ్ మాటు పొగడిజి మాడిసెజ్.

15 అందెజి క్రీస్తునె అయా కొత్త ఒపుమానం నడిపిప్పికాన్. ఎందనిజ్ ఇహిజ, దేవుణు కూక్తి లోకురిజ్ దేవుణు సీన ఇజి ఒట్టు కితి ఎలాకాలం మంజిని దీవెనమ్కు దొవ్కెజ్. మొదొల్ కితి ఒపుమానమ్దిజ్ అడిగి మహివలె, వారు కితి తప్పజుణిజ్ వాజిని సిక్కదాన్ వరిజ్ డీసెప్పిస్తెజ్, క్రీస్తు సాతాన్.

16 ఉండ్రీ తీర్తన పత్రం రాస్తి ఇడ్డిమహిజ, అయా తీర్తన పత్రం తయార్ కితికాన్ సాత మనాన్ ఇజి రుజువ్ ఆదెజ్.

17 అయ్యాక రాస్తిమన్నికాన్ బత్తిజి మహిజ, అయా తీర్తన పత్రమ్దిజ్ విలువ సీల్లెద్. వాండ్రు సాతివెనకానె అయా తీర్తన పత్రం పణిదిజ్ వానాద్.

18 అందెజె, మొదొల్ సత్తి ఒపుమానమ్దిజ్బా నల సీల్లెండ సత్తు మన్విద్.

19 దేవుణు వెప్పి రూలుజ్ విజా, లోకురిజ్ విజేరిజ్ సత్తివెనుక, మోసె దూడెజు నల, ఏరువెటె కలెస్తాండ్రె, ఇసాపు మొక్కాది కొముదాన్, నండొ ఎరాని బులున్నుదాన్ లోకుర విజేరె మున్ను, దేవుణు రూలుజ్ రాస్తి ఇడ్డి పుస్తకం మున్ను సీల్కరిస్తాన్.

20 వాండ్రు వెప్టాన్, “మీరు కిదెజ్ ఇజి దేవుణు ఆడ్ర సత్తి ఒపుమానమ్దిజ్ ముద్దనె యా నల”*, ఇజి.

21 అయాలెకెండ, గుడారం మున్నుని అబ్బె మన్ని విజా వనకాణి మున్ను నల సీల్కరిస్తాన్.

22 మోసె సత్తి రూలుదు వెప్పిని వజ విజా నలదాన్ సుబ్బురం ఆనాద్ ఇజి వెప్టాజ్ ఆనాద్. నల వాక్విండ, పాపమ్కు సొన్తేఉ.

23 అందెజె, పరలోకమ్దు మన్ని వనకాణి రూపు లెకెండ మన్ని లోకమ్ది గూడారమ్ని దన్ని లొజ మనికెజ్, జంతుజు నలదాన్ సుబ్బురం ఆదెజ్ వలె. గాని పరలోకమ్దు మనికెజ్ జంతుజు నలదాన్ ఆవిండ, దన్నిజ్ ఇంక నెగ్గె పూజెజాణిజ్ సుబ్బురం ఆదెజ్ వలె.

24 ఎందనిజ్ ఇహిజ, క్రీస్తు పరలోకమ్దు సాహాన్. ఏలు మా వందిజ్ దేవుణు ఎద్దు జామ్లి నిల్సని వన్నిలెకెండ నిల్దెజ్ సాహాన్. వాండ్రు లోకుర కీదాన్ తయారాతి గుడారమ్దు డుగ్గెవతాన్. అయ్యాక నిజమాతి గుడారమ్ది ఉండ్రీ మూర్తినె.

25 యూదురిజు పెరి పుజేరి, ఏంటు ఏంటు జంతుజు నలదాన్ దేవుణు వందిజ్ ఒదె కేటె ఆతి గదిదు డుగ్గెజ్. గాని, యేసు వన్నిజె ఒపజెవె ఆదెజ్ మరి మరి పరలోకమ్దు సొన్విన్.

26 ఆహె సొండ్రెజ్ ఇహిజ, లోకం పుట్టిప్పి బాణిజ్ అసె, వాండ్రు మరిమరి సాదెజ్ మహాద్ మరి. గాని కాలమ్ది ఆకార్దు, వాండ్రు పూజ ఆతి దన్నిదటాన్, పాపం సీల్లెండ కిదెజ్, వాండ్రు ఎలాకాలం వందిజ్

* 9:13 9:13 ఇబ్బె మయిల ఇజి వెప్పినిక దేవుణుదిజ్ డగ్గు కిదెజ్ అల్తే ఇ సజతిజ్, సీల్లిజ దేవుణు ఎద్దు కల్లి ఆతికెజ్ * 9:20 9:20 నిర్లమ 24:8.

ఉండ్రి నుటు తోరె అతాన్.

27 లోకుర విజేరె ఉండ్రి నుటు సాదెజ్ వలె. వెనుక దేవుణు బాణిజ్ తీర్పు జర్గిదెజ్ వలె, ఇజి వీరపాటు మనాద్.

28 అయాలెకెండ్, సంఠెండారి పాపమకు సాన్పిస్తెజ్, క్రీస్తు పూజ అతాన్. వాండ్రు మరి మరజి వానాన్, పాపమకు సాన్పిస్తెజ్ ఆవీద; గాని వన్నిజ్ ఆసదాన్ ఎద్రునుడ్డెజి ముంజిని వరిజ్ రక్సిస్తెజి వానాన్.

10

క్రీస్తు ఎలాకాలం వందిజ్ ఉండ్రి నుటు పూజ అతాన్

1 మోసా సితి గూలుజ్దు మని పడాయి ఆసారమకు, వాని కాలమదు వాజిని నెగ్గి నజతిజ ఉండ్రి నీడెనె. అయాలెజ్ నిజమాతి సజతిజ్ ఆఉ. అందెజె వడాయి ఆసారం వజి కిని పూజెజ్, డిజిన్ఎండ ఏంటు ఏంటు కిజి మహో. గాని దేవుణుదిజ్ పొగిడెజి మూడిస్తెజి వాని వరిజ్ పూర్తి నుబ్బం కిదెజ్ అబ్జె.

2 దేవుణుదిజ్ పొగిడెజి మూడిస్తెజి వాతి లోకుర, వరి పాపమదాన్ పూర్తి నుబ్బం ఆతార ఇహిజ, వారు మరి మరి పాపమకు వందిజ్ ఎత్తు కిజి బాద అవతార మరి. విజు పూజెజ్బా ఆవ్ ఆతె మరి.

3 గాని యా పూజెజ్, ఏంటు ఏంటు, లోకురిజ్ వరి పాపమకు ఎత్తు కిబిస్తె.

4 ఎందనిజ్ ఇహిజ, కొడ్డిజ, గొరెజ నల పాపమకు సాన్పిస్తెజ్ అబ్జె.

5 అందెజె, క్రీస్తు యా లోకుమదు వాతివలె వాండ్రు దేవుణుదిజ్ వెప్తాన్, “పూజెజ్ని సందెజ్, నీను కోరిజి. గాని నీను నా వందిజ్ ఉండ్రి ఒడోల్ తయారో కితి”.

6 మాలి పీట మున్సు, నుస్తూ జంతుజాణిజ్ నీను సరద ఆఇ. పాపమకు సాన్పిస్తెజ్ సీజిని పూజెజాణిజ్ సరద ఆఇ, ఇజి.

7 నస్తవలె నాను వెప్తా, “ఓ దేవుణు, ఇదిలో నాను దేవుణు మాటదు నా వందిజ్ రాస్తీ మని వజ, నాను కిదెజ్ ఇజి నీను కోరిజినికెజ్ కిదెజ్ నాను వాత మన్సు”,* ఇజి.

8 ముజాలె వాండ్రు వెప్తాన్, “పూజెజ్ని సందెజ్ పూజి సీని పెటి మున్సు నురుజిని జంతుజిని పాపమకు సాన్పిస్తెజ్ సీని పూజెజ్ నీను కోరిజి. వన్కాణిజ్ నీను సరద ఆఇ”, ఇజి. (మోసా సితి రూలుజి వజి యా పూజెజ్ కిదెజ్ మనికాదె. గాని వాండ్రు అయాలెకెండ్ వెప్తాన్)

9 వెనుక వాండ్రు వెప్తాన్. “ఇదిలో నీను కోరిజినికెజ్ కిదెజ్ నాను వాత మన్”, ఇజి. అందెజె, దేవుణు పడాయి పూజెజ్ విజు సిల్లెండ కిజి, క్రీస్తు పూజి ఆతి దనిజ్ పడాయి పూజెజి మున్సు ఇడ్డినాన్

10 దేవుణు కోరితికెజ్ వాండ్రు కితాన్. అందెజె యేను క్రీస్తు ఒడోల్దాన్ ఎలాకాలం వందిజ్ ఉండ్రి నుటు పూజి ఆతి దనిదాన్, మాటు పాపమకాణిజ్ నుబ్బం ఆత మనాల్.

11 యూదురి పుజెజి విజెరె, మాలి పీట ముజాలె నిల్పి, రోజు రోజు వరి పుజెరి పణి కిజినార్. మరి మరి ఉండ్రె నని పూజెజి కిజినార్. అయా పూజెజ్ ఎసిజ్బా పాపమకు సాన్పిన్ఉ.

12 గాని క్రీస్తు ఎలాకాలం వందిజ్ దేవుణుదిజ్ ఉండ్రి పూజి అతాన్. వాండ్రె అయా పూజి అతాన్. ఎలాకాలం వందిజ్ పూజి అతాన్. వెనుక వాండ్రు దేవుణు ఉణెరె పడకాడ్, గొప్ప మర్యాద్దు బని అతాన్.

13 అబ్బె, ఎలు క్రీస్తు పడిజి వరిజ్, వన్ని పాపమక అడిగి దేవుణు ఇడ్డిదాక వాండ్రు కావ్ కిజినాన్.

14 ఎందనిజ్ ఇహిజ, అయా ఉండ్రి పూజదాన్ పాపమకాణిజ్ నుబ్బం ఆతి వరిజ్, వాండ్రు ఎలాకాలం పూర్తి ఆతికార్, కిత మనాన్.

15 దేవుణు ఆత్మబా యాక నిజం ఇజి నెసి వెప్పినాన్. తొలిత వెప్పినాన్.

16 “వాని దిసమకాజ్ వెనుక, నాను వరివెట కిని కొత్త బవుమానం యాకదె. నాను వరి గర్భమదు నా రూలుజ్ ఇడ్డు. వరి మన్సుదు అయాలెజ్ రాస్తూ, ఇజి ప్రబు వెప్పినాన్”,* ఇజి.

17 వెనుక వాండ్రు వెప్పినాన్, “నాను వరి పాపమకు, వరి నిజి పణిజ్ ఎసిజ్బా ఎత్తు కివి”,* ఇజి.

18 దేవుణు పాపమకు సిమిసి మహివలె, పాపం సెమిస్తెజ్ మరి పూజి అవుసరం సిల్లెద్.

నమ్మిజిని మండ్రెజ్.

* 10:7 10:7 కిర్వన 40:6-8. * 10:16 10:16 యిర్మీయా 31:33. * 10:17 10:17 యిర్మీయా 31:34.

19 అందెజె, తంబెరిజాండె, యేసు నల వాక్కి సాతి సావుదాన్ దేవుణు వందిజ్ ఒద్దె కేట ఆతి గదిదు, మాటు దయరమ్దాన్ డుగ్గదెజ్ అనాద్.

20 వాండ్రు మా వందిజ్, బతుద్దు నడిపిసిని ఉండ్రొ కొత్త సరి రేతాన్. అయ్యాక తెరదాన్, ఇహిజ వన్ని సొంత ఒడొలదాన్ రేతాన్.

21 దేవుణు లోకుర్ మున్ను, అతికారం మని ఒరెన్ పెరి పుజెరినె మజి మనాన్.

22 అందెజె, మాటు వన్నిజ్ పూర్తి నమ్మిజె నెగ్గి మన్నుదాన్ దేవుణు ఎద్దు సొనాట్. మజి సుబ్రం కిదెజ్, మా సెజ పణిజ్ నెసిని మన్ను, క్రీస్తు నలదాన్ సిల్కరెనె ఆత మనాద్. మా ఒడొలె, నెగ్గి ఏరుదాన్ నొర ఆత మనాద్. ఆసా మాటు దేవుణు ఎద్దు సొనాట్.

23 ఇతల్ అతల్ కద్దిఎండ, మటు మనాట్ ఇజ మాటు వెహె ఆజని ఎద్దు సూణి ఆనదిజ్ డటం అన్నాట్. ఎందనిజ్ ఇహిజ, మా వెట ఒట్టు కితికాన్ నమ్మిదెజ్ తగ్గికాన్.

24 మహికార్ ప్రేమ తోరిస్తెజ్, నెగ్గి పణిజ్ కిదెజ్ వరిజ్ ఉసార్ కిబిన్నుక ఎలాగ ఇజ ఎత్తుకిజెనాట్.

25 నెగ్గెండార్ డిసి సీజని లెకెండ, కూడొజి వాజని అలవాటు మాటు డిస్తెజ్ ఆవెద్. గాని మాటు ఒరెన్ మరి ఒరెన్ వన్నిజ్ మరి ఒదె దయరం కిబిసి మంజెనాట్. ఎందనిజ్ ఇహిజ, ప్రబు వాని దినం డ్రప్పు ఆజెనాద్ ఇజ మీరు సుడొజెనిదెర్.

26 నిజం నెస్తి వెనుక మరి మరి పాపమ్కు కిజెనాట్ ఇహిజ, అయా పాపమ్కు సొన్పిస్తెజ్ మరి పూజ సిల్లెద్.

27 గాని మరి మనిక ఇనిక ఇహిజ, దేవుణు సిని తీర్పుదిజ్, వన్నిజ్ పడొక వరిజ్ నాననం కిని గొప్ప పెరి సిసుదిజ్ ఎద్దు సుడొజెనికాదె.

28 మోసె సీతి రూలుజ్ లొజెఇతి ఎయె వన్నిజ్బా, రిఎరో, ముఎరో సాక్సిరు వాండ్రు తప్ప కిత్తాన్ ఇజ వెహిజ, కనికారం తొఎండ సప్పార్.

29 అహిజ, దేవుణు మరిసిజ్ దూసిస్తి వరిజ్ ఎసా పెరి సిక్కు మనాద్. వరిజ్ దేవుణు వందిజ్ కేట కిత్తి నలదిజ్ పణిదిజ్ రెజ లెకెండ సుడొకతి వరిజ్ ఎసా పెరి సిక్కు మనాద్. అయా నలనె ఒప్పమానం తప్పిస్తాద్. కనికారం తొరోసిని దేవుణు అత్తిదిజ్ దూసిస్తి వరిజ్ ఎసా పెరి సిక్కు మనాద్ ఇజ ఎత్తు కిదు.

30 ఎందనిజ్ ఇహిజ, “సిక్కు నానె సీన. సిక్కుదిజ్ తగితి వరిజ్, నాను మరజె సీన”, ఇజ వెహిజ వన్నిజ్ మాటు నెసినాట్. మరిబా వెహిజాన్, “ప్రబునె వన్ని లోకురిజ్ తీర్పు సీనాన్”,* ఇజ.

31 బత్తిజెని దేవుణు కీదు అర్చిక గొప్ప తియెల్ కల్లిస్తి సజతినె.

32 మీరు క్రీస్తు వందిజ్ తొలిత నెస్తి రొస్సు, ఎనెజ్బా పోన్మాట్. నండొ బాదెజ్ వాతిజ్బా, నమ్మకమ్దాన్ ఎలాగ నిహి మహిదెర్ ఇజ ఎత్తు కిదు.

33 నెగం కాలమ్దు, మిజి విజెరె ఎద్దు దూసిస్తార్. మిజి డెయెతార్. మరి నెగం కాలమ్దు, మీరు, అయాలెకెండ బాదెజ్ ఆతి వరివెట కూడొజి నిహిదెర్.

34 జెలిదు ఆతి వరిజ్ సుడొకతి మీ పాణం నొతాద్. మిజి కల్లిజి మనికెజ్ విజు లాగ్గి ఒతివలెబా సర్దదాన్ ఓరిస్తిదెర్. ఎందనిజ్ ఇహిజ, ఎలాకాలం మనికెజ్, మిజి మన్నె ఇజ నెసినిదెర్. అయ్యాక కల్లితి మహిదని ఇంక మరి ఒదె నెగ్గిక.

35 అందెజె, దయరమ్దాన్ మండ్రు. ఎందనిజ్ ఇహిజ నండొ పలితం దొహ్కాద్.

36 మీరు ఓరిసి మండ్రెజ్ వతి. ఎందనిజ్ ఇహిజ, మీరు దేవుణుదిజ్ ఇస్సం ఆతికెజ్ కితి వెనుక, వాండ్రు సీన ఇజ ఒట్టు కితికెజ్ దొహ్కాచ్చె.

37 ఎందనిజ్ ఇహిజ, దేవుణు మాటదు వెహిజని లెకెండ, “నణెం కాలం లొజ, వాదెజ్ మనికాన్ బేగినె వానాన్. ఆల్సెం ఆవెన్.

38 నీతి నిజాయితి మని నా వారు, నమ్మకమ్దాన్ బత్తిజార్. వారు మరజె వెనుక సొహిజ, నాను వరివెట నరద ఆవె”,* ఇజ.

39 మాటు, మరజె వెనుక సొన్పి నాననం ఆని లోకు ఆవెట్. గాని మజి దేవుణు మున్ను, నమకం మనాద్. వాండ్రు మజి రక్కిస్తాన్.

* 10:30 10:30 ద్వితీ 32:35. * 10:38 10:38 అబ్దుకు 2:3,4.

11

1 నమకం ఇహిజ, మాటు ఆన అనిక తవ్ఎండ జర్గినాద్ ఇజి పూర్తి నమ్మిజినిక. కణకదాన్ సుడఃఇకెజ్ నిజం మన్నె ఇజి పూర్తి నమ్మిజినిక.

2 దేవుణు మున్ను, నమకం ఇడ్డి లోకుర్ పూర్బమ్మడు మహార్. అందెజె దేవుణు బాణిజ్ అనువె ఆతార్.

3 దేవుణు మాటదానె యా బూలోకం తయార్ ఆత మనాద్ ఇజి నమకమ్దానె మాటు నెసినాట్. ఎండనిజ్ ఇహిజ, మాటు ఏలు సూణికెజ్, సుడఃఇ వన్నా బాణిజ్ తయార్ కితికెజ్.

4 నమకమ్దానె, కయసు నీతి దని మున్ను ఏబలు దేవుణుదిజ్ నెగ్గి పూజి నీతాన్. వన్ని నమకమ్దానె, నీతి నిజాయితి మనికాన్ ఇజి దేవుణు బాణిజ్ మెపు దోహ్కాద్. ఎండనిజ్ ఇహిజ, వాండ్రు నీతి నందదు దేవుణు నరద ఆతాన్. వాండ్రు సేనదినమకాజ్ ముజాలె సాత సాహాన్. అహిజ్బా, వన్ని నమ్మకమ్దాన్ ఏలు బా మజి వర్గిజినాన్.

5 నమకమ్దానె, హనోకు సాఎండ దేవుణు మంజిన బాడ్డిఃదు దేవుణు ఒత మనాన్. ఎయెర్బా వన్నిజ్ సుడఃదెజ్ అట్ఎతార్. ఎండనిజ్ ఇహిజ, దేవుణునె వన్నిజ్ ఒత మహాన్. వన్నిజ్ ఒక ముజాలె, దేవుణుదిజ్ నరద కితికాన్ ఇజి అనువె ఆతాన్.

6 నమకం సిల్లెండ, దేవుణుదిజ్ నరద కిబిన్జెజ్ అట్ఎట్. ఎండనిజ్ ఇహిజ, వన్ని డగ్గు వానికాన్ ఎయెర్బా దేవుణు మనాన్ ఇజి నమ్మిడెజ్వలె. వన్నిజ్ నిజం రెబాని వరిజ్ వాండ్రు నెగ్గికెజ్ కిసాన్ ఇజి నమ్మిడెజ్వలె.

7 నమకందానె, నోవ వవి ఇండ్రొణి వరిజ్ వెరి గడదాన్ రక్కిన్జెజ్ ఉండ్రె ఒడః తయార్ కిత్తాన్. జర్గిదెజ్ మని నజతిజ వందెజ్ దేవుణు డటం వెస్తావలె వాండ్రు లోజెతాన్. వన్ని నమకమ్దానె, లోకమ్దు మహి, మహి లోకురిజ్ దేవుణు మున్ను, నమకం సిల్లెద్ ఇజి వాండ్రు తోరిస్తాన్. అందెజె వారు తప్ప కిత్తార్ ఇజి దేవుణు తీర్పు కిత్తాండ్రె, నోవెజ్ నీతి నిజాయితి మనికాన్ ఇ జి ఇట్టాన్. నోవ నమకమ్దానె నీతి నిజాయితి మనికాన్ ఇజి ఇట్టాన్.

8 నమకమ్దానె, అబ్రాహము, 'నీను నీ ఇల్లు డిసి, నీది ఇజి వెనుక దోహ్కాక్కి బాడిఃదు సాన్అ', ఇజి దేవుణు వెస్తావలె, లోజెతాండ్రె సాహాన్. ఎంబె సాన్సినాన్ ఇజి తెలిఎండ వాండ్రు సాహాన్.

9 నమకమ్దానె, పయువాండ్రు లెకెండ దేవుణు సీన ఇజి ఒట్టు కితి దేసెమ్దు బత్తితాన్. వాండ్రు గుడారమ్దు బత్తితాన్. అయాలెకెండె, ఇసాకు ని యాకోబు బా. వరిజ్బా వెనుక అయా ఒట్టునె దేవుణు నీతాన్.

10 అబ్రాహము పయువాండ్రు లెకెండె అబె బత్తితాన్. ఎండనిజ్ ఇహిజ, వాండ్రు ఎలాకాలం నిల్చిని నిజమాతి పునాది మని పట్టుం వందిజ్ ఎద్దు సుడఃజి మహాన్. అయా పట్టుం రూపు సీజె తోప్పికాన్ దేవుణు.

11 నమకమ్దానె, అబ్రాహము నండొ డొక్క ఆతిజ్బా, సార గొడ్డు బోదెలి ఆతిజ్బా అప్పొసి ఆతాన్. ఎండనిజ్ ఇహిజ, సీన ఇజి ఒట్టు కితికాన్ నమ్మిడెజ్ తగ్గికాన్ ఇజి ఒడిబితార్.

12 అందెజె, సాతిలెకెండె మని యా ఒరెన్ వన్ని బాణిజ్, నండొ నండొ లోకుర్ ఆతార్. ఆగానమ్దు మని సుకెజె లెకెండె, నమ్దరమ్ది ఒడ్డుదు మని లెక కిదెజ్ అట్ఇ ఇన్ను లెకెండె, లోకుర్ ఆతార్.

13 యా లోకుర్ విజెరి, సానిదాక వారు నమకమ్దానె బత్తిజి మహార్. దేవుణు సీన ఇజి ఒట్టు కితికెజ్ దోహ్కాతు. వారు నండొ ముజాలె వన్నా వందిజ్ ఆనదాన్ ఎద్దు సుడఃఇ వన్నాజ్ నరద ఆతార్. యా బూమిదు వారు పయువారు ఇజి ఒప్పుకోటార్.

14 యా లెకెండె వెప్పొ లోకుర్, వరిజ్ సాంత ఉండ్రె దేసెం వందిజ్ ఎద్దు సుడఃజినార్ ఇజి టిటాజ్ తోరిసినాద్.

15 వారు డిఃని వాతి దేసెం వందిజ్ ఎత్తు కివెర్. ఎత్తు కిత్తార్ ఇహిజ, మరెజి సాండ్రెజ్ అవ్సరం మహాద్మరి.

16 గాని వారు, ఇంక నెగ్గి ఉండ్రె దేసెం వందిజ్ కోరితార్. ఇహిజ పరలోకమ్ది దేసెం వందిజ్ కోరితార్. అందెజె, దేవుణు, వరి దేవుణు ఇజి వెవె ఆదెజ్ సిగు ఆవెన్. ఎండనిజ్ ఇహిజ, వాండ్రు వరి వందిజ్ పరలోకమ్దు ఉండ్రె పట్టుం తయార్ కిత మనాన్.

17 నమకమ్దానె, దేవుణు అబ్రాహముజ్ పరిస కితివలె, వన్ని మరిసి ఇస్సాకుజ్, పూజ లెకెండ్ సితాన్. దేవుణు అబ్రాహముజ్ నె ఒట్టు సితాన్. గాని వన్ని ఒరెండ్రె ఒరిన్ మరిసిజ్ పూజ లెకెండ్ సిదెజ్ వాండ్రు తయార్ ఆతాన్.

18 దేవుణు అబ్రాహముజ్ వెప్సాన్, “ఇస్సాకు వెటనె నీ తెగ్గదికార్ పుట్టార్”,* ఇజి

19 సాతి వరిజ్ మరజ్ బత్తిసైజ్ దేవుణు అట్టాన్ ఇజి అబ్రాహము ఒడెబితాన్. యాక సుడెతిజ, అబ్రాహముజ్ సాపుదాన్ ఇస్సాకుజ్ మరజి దోహక్తి లెకెండ్ మనాద్.

20 నమకమ్దానె, ఇస్సాకు, యాకోబుజ్ ని యాసాపుజ్, వరిజ్ వానికాలం వందిజ్ దీవిస్తాన్.

21 నమకమ్దానె, యాకోబు వాండ్రు సాని ముజాలె యోసేపు మరిసిర్ రివిరిజ్ దీవిస్తాన్. వన్ని డుడుదు ఒర్గితాండ్రె దేవుణుదిజ్ పొగిడిజి మాడిస్తాన్.

22 నమకమ్దానె, యోసేపు సాదెజ్ డగ్గు ఆతివలె ఇస్సాయేలు లోకురిజ్ అయిగుప్పు దేసెమ్దాన్ దేవుణు నడిపిసి తనిదని వందిజ్ వెప్సాన్. వన్ని డుముక వందిజ్ ఇనిక కిదెజ్ ఇజి ఆడ్ర సితాన్.

23 నమకమ్దానె, మోసె అయిసి అప్సానిర్, వాండ్రు పుట్టి మూండ్రె నెలెజ్ డాప్పి ఇట్టార్. ఎందనిజ్ ఇహెజ, వాండ్రు నెగ్గి ఒరిన్ కొడెజి ఇజి వారు నెస్తార్. రాజు సితి ఆడ్రదిజ్ తప్పెజ్ వారు తియెల్ అవతార్.

24 నమకమ్దానె, మోసె, వాండ్రు పిరితి వలె పరో గాల్సి మరిసి ఇజి కూకె ఆదెజ్ కెవతాన్.

25 వాండ్రు, పాపం తప్పిసి సణెం మంజిని సర్దదు మంజిని దని ముస్సు, దేవుణు లోకుర్ వెట బాద ఆదెజ్ కోరితాన్.

26 అయెగుప్పు దేసెమ్ది ఆస్తి ముస్సు, క్రీస్తు వందిజ్ బాదెజ్ ఆనికాదె విలువ మనిక ఇజి వాండ్రు ఒడెబితాన్. ఎందనిజ్ ఇహెజ, వాని కాలమ్దు దేవుణు వన్నిజ్ కిని నెగ్గి దని వందిజ్ వాండ్రు ఎద్దు సుడెతాన్.

27 నమకమ్దానె, మోసె, రాజు కోపమ్దిజ్ తియెల్ అవండ, అయెగుప్పు దేసెం డిస్తాన్. వాండ్రు మరజి వాదెజ్ కెవతాన్. ఎందనిజ్ ఇహెజ, వాండ్రు తోరె ఇ దేవుణుదిజ్ సుడెతి లెకెండ్ మనాద్.

28 నమకమ్దానె, మోసె, ఇస్సాయేలు లోకురిజ్ పులాజ్ ఆఇ రొటెజ్ తయార్ కిని పండెయి కిదెజ్ ఇజి ఆడ్ర సితాన్. వరి తొలిత పుట్టి కొడెరిజ్, సప్పి దూత నవ్వెండ మండ్రెజ్, వరి దార్బందరమ్దు నల సిల్కరిసైజ్ ఇజి ఆడ్ర సితాన్.

29 నమకమ్దానె, ఇస్సాయేలు లోకుర్ ఎర్రజ్ సమ్దరమ్దాన్ వస్త్రా బూమిదు నడిసి లెకెండ్ నడిసి సాహార్. అయెగుప్పు దేసెమ్దికార్ అయాలెకెండ్ కిదెజ్ సుడెతి వలె వారు ముడుగితార్.

30 నమకమ్దానె, ఇస్సాయేలు లోకుర్ ఏడు రోస్సు, యెరికో వట్టుం సుటులం బూలాతివలె, పట్టుమ్ది గోడెజ్ ఆరై.

31 నమకమ్దానె, సాని బూలాని రాహబు, దేవుణుదిజ్ లోజిజ దని పట్టుమ్ది వరివెట సావతాద్. ఎందనిజ్ ఇహెజ, దేసెమ్దిజ్ గుటు లాగిదెజ్ వాతి వరిజ్ అది డగ్గు కితాద్.

32 నాను మరిబా వెప్సాజా? గిదియెను, బరాకు, సంసాను, యెప్ప, దావీదు, సముయేలు, ప్రవక్తరు నిని వరి వందిజ్ వెప్సాజ్ నజి సమయం సాల్ఎద్.

33 నమకమ్దానె, వారు దేసెమ్కాజ్ ముస్సు విద్దెం కిజి గెలస్తార్. వారు నీతి నిజాయితికెజ్ కితారె, దేవుణు ఒట్టు కితికెజ్ దోహక్తె. వారు నొరెస్సు వెయ్యు మూక్తార్.

34 నండె కన్నె సిసుదిజ్ సప్తార్. కూర్కొజిజ్ సావండ తప్ప ఆతార్. వారు సత్తుసిలికార్ గాని సత్తు మనికార్ ఆతార్. వారు విదెమ్దు సత్తు మనికార్ ఆతార్ పయి సయెనమ్ది వరిజ్ ఉలుప్తార్.

35 నెగొండెక్ బోదెకాజ్, వరి సాంతది వరిజ్ సాపుదాన్ మరజి దోహక్తె. మహికార్ నండె బాదెజ్ అతిజ్ బా, వారు దేవుణు ముస్సు మని నమకం డిసి, డిబె ఆని దని ముస్సు సానిక నెగిద్ ఇజి సుడెతాన్. ఎందనిజ్ ఇహెజ, వారు మరజి నిజ్ ని వలె నెగ్గి బత్తు దోహక్తెజ్.

36 నెగొండార్ దూసె ఆతార్. కొరడెజిజిజ్ డెయెవ ఆతార్. మరి నెగొండార్ తోహ ఆతారె, జెలిదు ఇడ్డెజి ఆతార్.

* 11:18 11:18 ఆది 21:12.

37 వారు పణకాణిజ్ డెయివ్ ఆతార్. రంపమ్కాణిజ్ రుండి ముకెజ్ కొయె ఆతార్. కుర్తెజాణిజ్ నవ ఆతార్. నెగొండార్ మెండ గొరెదినొ, ఏలెలు గొరెదినొ తోలు పొరెవె ఆజి, బజ ఆజి, బాదెజ్ ఆజి, దూసె ఆజి బూలాతార్.

38 యా నెగ్గి లోకూర్ మండ్రెజ్, యా లోకం తగ్గెవెద. వారు బీడిజిమ్ బూమిజు, గొరొకాజ్ బూలాతార్. సాలమ్క లొజ, బూమిదు మని బొరోజు డాజిజితార్.

39 వారు నమకం ఇట్టార్. అందెజె, నెగ్గికార్ ఇజి దేవుణు బాణిజ్ మెపు దొవ్కాద్. గాని వరి లొజ ఎయెరిజ్బా, దేవుణు సీన ఇజి ఒట్టు కితికెజ్ దొవ్కాతు.

40 ఎందనిజ్ ఇహిజు, దేవుణు మా వందిజ్ ఇంక నెగ్గిక వీరపాటు కిత మనాన్. మా వెటనె, వరిజ్ పూర్తి కిదెజ్ ఇజి వన్ని ఉదెనం.

12

దేవుణు వన్ని కొణెరిజ్ దిదిజి సిక్స సీజినాన్

1 అందెజె, మా సుటులం సేన సాక్కిరు మనార్. అందెజె, అడు కిజిని నజతిజు డిజిసి, మజి సిక్కుజు అర్వెసిని పాపం డిజిసి, దేవుణు మా ఎత్తు ఇడ్డి బత్తు. ఇని ఉహ్కొప్పి పోటిదు ఓరిసిని ఉహ్కొట్.

2 మా గురి యేసు దరోట్నె ఇడెజి ఉహ్కొట్. వాండ్రె మా నమకం మొదొల్స్తెకాన్. పూర్తి కినికాన్. వాండ్రు సిలువాదు సిగు మని సాపు సాదెజ్ తయార్ ఆతాన్. ఎందనిజ్ ఇహిజు, వెనుక వన్నిజ్ మంజిని సరద వాండ్రు నెన్నాన్. ఏలు పరలోకమదు దేవుణు సిమననం ఉణెరి పడెకాదు గొప్పు మర్యాద్దాన్ బస్త మనాన్.

3 పాపం కినికార్ కితి నండ్రె బాదెజ్ వాండ్రు ఓరిస్తెకెజ్ ఎత్తు కిదు. అందెజె, మీరు మన్ను విస్సిఎండ, డిజిసిఎండ మండ్రెజ్, వన్నిజ్ ఎత్తు కిదు.

4 పాపం వెట కల్లాడెజినిక నల సీని నసా ఏలుదాక మీరు ఎద్రినెఇతిదెర్.

5 దేవుణు వన్ని కొణెరి లెకెండ్ మిజి ఉసార్ కిబిన్ని మాటు మీరు పొన్దెరా? "నా కొణెరి, ప్రబు నిజి దిదిని వలె మన్ను బాద కిమాట్. వాండ్రు డటం వెప్పి వలె మీ మన్ను విస్సిమాట్.

6 ఎందనిజ్ ఇహిజు, ప్రబు వాండ్రు ప్రేమిసిని వరిజ్ దిదినాన్. వన్ని మరిన్ ఇజి డగ్రు కిని వన్నిజ్ దిదినాన్", ఇజి వెప్పినాన్.

7 ఒరెన్ అప్పాసి దిదిని వజ, మీ సైమెజ్ ఓరిస్తు. ఎందనిజ్ ఇహిజు, మీ సైమెజ్, దేవుణు మిజి వన్ని కొణెరి లెకెండ్ సుడెజినాన్ ఇజి తొరెన్. అప్పాసి దిదిని మరిసి ఎయెన్బా మనాండ్రా?

8 వన్ని మరిసిర్ విజెరిజ్ దిజినిలెకెండ్, మిజి దిదిఎండ మహిజు, మీరు వన్ని నిజమాతి కొణెరి ఆవెర్. గాని ఆఇ కొణెరి ఇజి నె అర్దం.

9 మజి విజెరిజ్ కాన్సి అప్పాసిర్ మహార్. వారు మజి దిదిజి మహార్. మాటు వరిజ్ గవీరం సీజి మహార్. అహిజు, మా అయా లోకమది బుబ్బు ఆతికాన్దిదినివలె, ఎసా లాపు వన్నిజ్ లొజిజి మాటు ఎలాకాలం బత్తిదెజ్?

10 మా బుబ్బర్, నెగం కాలం మజి దిదితార్. ఎందనిజ్ ఇహిజు అయాక నెగెద్ ఇజి వారు ఒడెజిత్తార్. గాని, మా నెగ్గిదనివందిజ్ దేవుణు మజి దిదిజినాన్. ఎందనిజ్ ఇహిజు, మాటు వన్నిలెకెండ్ పరిసుదమ్క మండ్రెజ్.

11 మజి దిదినివలె, అయాక సరద కిబిన్వెద, దుకం కిబిన్నాద్. గాని అయాలెకెండ్ దిదిజి సిక్స లాగి ఆజి నెగ్గి సరిదు వాతికార్, వెనుక సీతి నిజాయితిదాన్ కిజి, సమాదనందాన్ మంజినార్.

12 అందెజె, డిజిప్తి* మీ కికు వెర్దు. వణక్కిని ముణుకుజ్ నత్తు కిబిన్తు†.

13 "మీ కాల్యాజ్ తినాజ్ సరి తయార్ కిదు"*. సాటు కాల్యు బెన్వెండ, నత్తు ఆని వందిజ్ తినాజ్ సరి తయార్ కిదు.

* 12:6 12:6 సామెత 3:11-12. * 12:12 12:12 దిని అర్దం ఇనిక ఇహిజు, క్షమకు వాని వలె మీరు మనుసు విస్సిఎండ దయరమదాన్ నిల్దు ఇజి. † 12:12 12:12 ప్రమెజ్ వాని వలె, మన్ను విస్సిఎండ దయరమదాన్ నిల్లి మండ్రు ఇజి నె అర్దం. * 12:13 12:13 సామెత 4:26.

దేవుణుడికే నెక్కి పొమ్మాట్

14 విజెరె వెట నమాదనమ్దాన్ కూడఃజి పాడఃజి మండ్రెజ్ నుడఃదు. పాపం కిఇ, దేవుణు వందిజ్ కేట ఆతి బత్తు బత్తిదెజ్ నుడఃదు. ఎందనిజ్ ఇహిజ, అయాలెకెండ బత్తిఇకాన్, ప్రబుజ్ నుడఃవెన్.

15 ఎయెన్బా దేవుణు బాణిజ్ వాజిని వన్ని దయా దర్దుం తప్పి సాన్ఎండ జాగర్త నుడఃదెజ్. ఉండ్రీ నేందు మొక్కు పిరిసి దని నేందు నండొండారిజ్ బాద కినిలెకెండ, ఎయెన్బా అవిండ జాగర్త నుడఃదెజ్.

16 సాపు లెకెండ సాని బూలాజినో, దేవుణు వందిజ్ బక్తి సిల్లెండనో, ఎయెన్బా మన్ఎండ జాగర్త నుడఃదెజ్. వాండ్రు ఉండ్రీ పుటా తిండి వందిజ్, వన్ని వెరి మురిసి ఇని అక్కు పొర్తాన్.

17 మీరు నెసిని లెకెండ, వెనుక వన్ని అప్పాసి. సీని దీవెనమ్కు వాండ్రు కోరితివలె, వాండ్రు నెక్కి పొకె ఆతాన్*. ఎందనిజ్ ఇహిజ, వాండ్రు కితిక మారిస్తాజ్ వాండ్రు అట్వతాన్. వాండ్రు నండో అడఃబాజి దీవెనమ్కు లొస్సిజ్బా దొహ్కతు.

18 మీరు, ఇస్తాయేలు లోకుర్ సీనాయి గొరోజ్ డగ్రు వాతి లెకెండ రెజతిదెర్. ముట్టి నెస్తెజ్ ఆని, సిసు కసిసి, గొప్ప సీకట్మని, తుపాన్ మని గొరోజ్ డగ్రు రెజతిదెర్.

19 వారు, జోడుబాంకెజ్ ఊహ్కొప్పి వెరి జాటు, వర్గిని జాటు వెహర్. అయొక వెహివలె, మురి వరివెట వర్గిమా ఇజ దేవుణుడికే బతిమాలతార్.

20 ఎందనిజ్ ఇహిజ, “ఉండ్రీ జంతు ఆతిజ్బా, గొరోతు మట్టిజ, దనిజ్ పణకాణిజ్ డెయిజి నస్తెజ్”*, ఇజ దేవుణు వెప్పా ఆడ్ర ఓరిస్తెజ్ అట్వతార్.

21 అబ్బె తోరె ఆతిక, గొప్ప తియెల్ కల్లిస్తెక. అందెజె మోసి వెప్తాన్, “నాను గొప్ప తియెల్ ఆజి వణకీసిన”, ఇజ. నని గొరోజ్ డగ్రు అవిద్ మీరు వాతిదెర్.

22 గాని మీరు, సియెను గొరోజ్ వాతి మనిదెర్. బత్తిజిని దేవుణు మంజిని పట్టుమ్దునె వాతి మనిదెర్. ఇహిజ, పరలోకమ్ది యెరుసలెమ్దునె వాతి మనిదెర్. సేన దూతార్ సర్దదాన్ కూడితి మని బానె, వాతి మనిదెర్.

23 దేవుణు తొలిత కొడొరె, కూడితి మని బానె వాతి మనిదెర్. వరి పేర్కు పరలోకమ్దు రాస్తె ఇడ్రె మన్నె. మీరు దేవుణు డగ్రునె వాతి మనిదెర్. వాండ్రె విజెరిజ్ తీర్పు సీనికాన్. పరలోకమ్దు మని నీతి నిజాయతి మని వరి పాణమ్క, డగ్రునె వాతిమనిదెర్. వారు పూర్తి కిబె ఆతికార్.

24 మీరు యేను డగ్రునె వాతి మనిదెర్. వాండ్రె, అయొ కొత్త ఒప్పుమానం నడిపిస్తెకాన్. మీరు, సీల్కరెనె ఆతి నల డగ్రు వాతి మనిదెర్. ఏబేలు నల వెప్పిని దన్నిమున్ను నెగ్గి మాట వెప్పిని నల డగ్రు వాతి మనిదెర్.

25 అందెజె, మీ వెట వర్గిజిని దేవుణుడికే జాగర్త వెండ్రు. యా లోకమ్దు, దేవుణు డటం వెప్పివలె వెండ్రెజ్ కెతి ఇస్తాయేలు లోకుర్, దేవుణు సీని తీర్పుదాన్ తప్పె అదెజ్ అట్వతార్ ఇహిజ, పరలోకమ్దాన్ డటం వర్గిజిని వన్నిజ్ నెక్కి పొక్తిజ, మాటు సిక్కుదాన్ తప్పె అదెజ్ అట్వాట్?

26 దేవుణు, సీనాయి గొరోజ్దాన్ వర్గితివలె, బూమి కర్గితాద్. గాని ఏలు వాండ్రు ఒట్టు కిత మనాన్. “మరి ఉండ్రీ నుటుబా, నాను బూమిడిజ్నె అవిండ, ఆగానమ్మిడిజ్బా కర్దలిస్తలె”* ఇజ.

27 “మరి ఉండ్రీ నుటుబా”, ఇని మాటదిజ్, కర్గినికెజ్ మారిస్తె ఇజినె అద్దం. ఇహిజ, తయార్ కితికెజ్ కర్గిజ మారె ఆనె ఇజ. ఎందనిజ్ ఇహిజ, కర్దలికెజ్ ఎలాకాలం మండ్రెజ్.

28 అందెజె దేవుణు ఏలుబడిః ఎనిజ్బా కర్దలివెద్. అందెజె* దేవుణుడికే వందనం వెప్పి తియెల్దాన్ గవేరమ్దాన్, వాండ్రు సర్ద అని వజ మాడిస్తాట్.

29 ఎందనిజ్ ఇహిజ, “మా దేవుణు సుర్పి సీసు ననికాండ్రె.

13

దేవుణుడికే ఎలాగ సర్ద కిబిస్తెజ్

1 క్రీస్తు వెట కూడితి మని తంబెరిబు ఇజి, ఒరెన్ మురి ఒరెన్ వన్నిజ్ ప్రేమిసినె మండ్రు.

* 12:17 12:17 మురి ఉండ్రీ రకం వెప్పాజ, వాండ్రు కిత్తి తప్పె ఒప్పుకోదెజ్ వన్నిజ్ అట్వెండ ఆతాద్ ఇజ. * 12:20 12:20 నిర్గు ము 19:12,13. * 12:26 12:26 అగ్గుం 2:6. * 12:28 12:28 ద్విత్తి 4:24.

2 నెన్జ వరిజ్ డగ్గు కిదెజ్ పోస్మాట్. యా లెకెండే డగ్గు కిజి, సెగొండార్, నెన్ఎండనె దూతారిజ్ డగ్గు కితార్.

3 జెలిదు మని వరిజ్ ఎత్తు కిదు. మీరు వరి వెట బాన్ మహివజి ఎత్తుకిదు. బాద ఆని వరిజ్ ఎత్తు కిదు. మీరు వరి లెకెండే బాద ఆజి మహివజి వరిజ్ ఎత్తు కిదు.

4 వండ్డిదిజ్ విజెరి గవేరం సిదెజ్ వలె. ఆల్ని మాసిర్ రిఎర్బా, ఒరెన్ మరి ఒరెన్ వన్నిజ్ నమ్మిదెజ్ తగ్గి వరిలెకెండే మండ్రెజ్ వలె, సాని బూలాని వరిజ్, రంకు బూలాని వరిజ్ దేవుణు తవ్వెండే సిక్కి సీనాన్.

5 డబ్బుదిజ్ ఆస అమాట్. మిజి కల్లితి మనిదనితాన్ నరద్ ఆదు. ఎందనిజ్ ఇహిజ, దేవుణు వెచ్చా మనాన్, “నాను ఎనెజ్బా మిజి డిఁనె, నాను ఎనెజ్బా మిజి నెక్కి పొక్ఎ”,* ఇజి.

6 అందెజి దయరమ్దాన్ వెచ్చాజ్ అట్పాట్, “ప్రబునె నజి తోడుః. నాను తియెల్ ఆఎ. లోకు నజి ఇని కిదెజ్ అత్ఎర్”*.

7 దేవుణు మాటు మిజి వెప్పా, మిజి నడిఁపినిని వరిజ్ ఎత్తు కిదు. వరి బత్తుదాన్ వాతి విజు నెగ్గి దని వందిజ్ ఎత్తు కిదు. వారు నమ్మిత్తి లెకెండే నమ్మిదు.

8 యేసు క్రీస్తు ఇపెన్, నేండ్రు, ఎలాకాలం ఉండ్రె లెకెండే మంజినాన్.

9 విజు రకమ్కాణి నెన్జ బోదెజి వెట సాస్మాట్. దేవుణు దయా దర్మమ్దాన్ మా మన్ను సత్తు ఆనికాదె నెగ్గి. తిండి వందిజ్ మని రూలుజి లోజిజి ఆవెద్. అయాకెజ్ లోజితి వరిజ్ ఇని లాబమ్బా రెవెద్.

10 మజి ఉండ్రె పూజి సీని మాల్ పీట మనాద్. దని బాణిజ్, గుడారమ్దు సేవ కిజిని పుజెరిజి తిండ్రెజ్ అక్కు సిల్లెద్.

11 యూదురి రూలు వజి, విజు పుజెరిజి మున్ను మని పెరి పుజెరి పాపం వందిజ్ పూజి లెకిండే జంతుజి నల దేవుణు వందిజ్ ఒద్దె కేట అతి గదిదు తనాన్. గాని కండ పట్టు వెల్లి సుర్నార్.

12 అందెజి, యేసుబా పట్టుమ్ది వెల్లిగె వెల్లి బాద ఆతండ్రె సాతాన్. వన్ని సాంత నల వాక్కి వన్ని లోకురిజ్ పాపం సిలివరి లెకెండే కిదెజ్ వాండ్రు పట్టుమ్ది వెల్లిగె వెల్లి బాద ఆతండ్రె సాతాన్.

13 అందెజి మాటు పట్టుం వెల్లిగె వెల్లి వన్ని డగ్గు సాన్ని వాండ్రు లాగి అతి సిగుదు వన్నివెట కూడ్వాట్.

14 ఎందనిజ్ ఇహిజ యా బూమిదు మజి ఎలాకాలం మని ఉండ్రె పట్టుం సిల్లెద్. వాదెజ్ మని పట్టుం వందిజ్ మాటు ఎద్రు సుడెజినాట్.

15 అందెజి, యేసు పేరుదాన్, పూజి లెకెండే దేవుణుదిజ్ ఎస్తివలెబా పొగిడిజినాట్. ఇహిజ, వాండ్రు ప్రబు ఇజి మా వెయ్దాన్ ఒప్పకొడిజిని పూజి సీనాట్.

16 మహి వరి వందిజ్ నెగ్గికెజ్ కిదెజ్, వరిజ్ సాయం కిదెజ్ పోస్మాట్. ఎందనిజ్ ఇహిజ, నిని పూజిజి దేవుణు నరద్ ఆనాన్.

17 మీ అతికారిజి మాటిజ్ వెండ్రు. వరి అతికారమ్దిజ్ లోజిదు, వారు మిజి జాగర్త నూణార్. ఎందనిజ్ ఇహిజి వరి పణిదిజ్ దేవుణుదిజ్ లెక్కు ఒవజెప్తెజ్ ఇజి వారు నెస్సార్. మీరు వరిజ్ లోజితిజి, వారు నర్దదాన్ వరి పణిజ్ కినార్. సిలిజి వారు దుకమ్దాన్ కినార్. అయాకెజ్ మిజి నెగ్గికెజ్, సీఘ.

18 మా వందిజ్ పార్లనం కిదు. మా గర్బం మజి గదిన్ఎండ మన ఇజి మాపు పూర్తి నమ్మిజినామ్. మాపు కిజిని దని లోఱ నెగ్గెండే విజు కిదెజ్ కోరిజినామ్.

19 దేవుణు బేగినె నజి మీ డగ్గు మరెజి తలెజ్ మీరు మరి లాపు పార్లనం కిదెజ్ ఇజి నాను ముకెలం బతిమాల్లిన.

20-21 దేవుణు మా ప్రబు ఆతి యేసుజ్ సావుదాన్ నిక్రాన్. వాండ్రె గొరెజి పెరి గప్పడుఎన్. ఎందనిజ్ ఇహిజ, వాండ్రు వన్ని నల వాక్తాండ్రె సాతాన్. వన్ని నలదాన్ వాండ్రు ఎలాకాలం వందిజ్ ఒప్పమానం ముద్ద కితాన్. లోకురిజ్ నమాదనం సీని దేవుణు, వన్నిజ్ ఇన్దం ఆతికెజ్ కిదెజ్, మిజి నెగ్గికెజ్ వాదెజ్ సాయం కిపిన్. యేసు క్రీస్తు నత్తుదాన్, వన్నిజ్ ఇన్దం ఆతికెజ్ విజు మా లోఱ కిపిన్. వన్నిజ్ ఎల్లకాలం గవేరం మనిద్. ఆమెన్.

22 తంబెరిజాండె, నాను మిజి ఉండ్రె ఇజి ఉత్తమెనె రాస్త మన. అందెజి, నాను పణిస్తి మాటిజ్ జాగర్త వెండ్రు ఇజి ఉసార్ కిల్లిన్సు.

23 మా తంబెరి ఆతి తిమోతి జెలిదాన్ డిఃబె ఆతాన్ ఇజి మీరు నెస్టెజ్ ఇజి నాను కోరిజిన. వాండ్రు ఇబ్బె బేగి వాతిజ, మిజి సుడఃదెజ్ వన్నిజ్ బా నా వెట తన.

24 మిజి నడిఃపిసిని విజెరిజ్, దేవుణు లోకుర్ విజెరిజ్ నాను వెన్బాతి లెకెండ్ వెప్టు. ఇటలిదు మని నమ్మిత్తికార్ మిజి వెన్బాతి లెకెండ్ వెస్సినార్.

25 దేవుణు దయా దర్మం మీ విజెదెరె వెట మనీద్.

యాకోబు రాస్తే ఉత్త్రం

నెల్లకెబిసినిక

యా ఉత్త్రం రాస్తే యాకోబు ప్రబుఆతి యేసుజ్ తంబెరెసి ఆతికాన్. యాకోబు యెరుసలేమ్దు మన్ని నజమ్ది వెద్దెలిజ లోణ బరెన్. యాక రాస్తే కాలం రమారమి క్రీస్తు సకం 45 దాన్ 50 నడిఃమ కాలమ్దు రాస్త మనాన్. యా ఉత్త్రమ్దు ముకెలమాతిక నమకమ్దిజ్ రుజుప్ కినికాదె. నమకం నిజమాతికదో ఆవద్దో ఇజ ఎలాగ నెస్త్రెజ్ ఇజ రాస్త మనాన్.

1 దేవుణుదిజ్ని, ప్రబు ఆతి యేసు క్రీస్తుజ్, సేవకినికానాతి యాకోబు, ఆఇ దేసెమ్కాజ్ సెద్రితి మని దేవుణు లోకాజ్ విజెరిజ్ రాసిని ఉత్త్రం. మిజి విజెరిజ్ వందనమ్కు.

మాలెజ్ వానివలె అక్కెజ్ ఓరిస్త్రెజ్వలె

2-3 నాను ప్రేమిసిని తంబెరిజండె, నండో మాలెజ్ వానివలె మీరు సర్దదాన్ మండ్రు. ఎందనిజ్ ఇహిజ, మాలెజ్ వానివలె యేసుప్రబు ముస్సు. మన్ని నమకం డిసెన్ఎండ మహిజ, మాలెజ్ బిరిస్త్రెజ్ మిజి నత్తు మనాద్ ఇజ దినివలెహాన్ రుజుప్ వానాద్.

4 మీరు కిజిని పణిదు డిసెన్ఎండ ఓరిసి మండ్రు. అయాలెకెండ కితిజ మీరు కన్టం బరిస్సిదన్ని లోణ పూర్తి ఆతికిదెర్ ఆనిదెర్. అయాలె మి గుణమ్దు ఇనికబా తక్కు సిల్లెండ మంజినిదెర్.

5 మీ లోణ ఎయెజ్బా గెణం తక్కు మహిజ, వాండ్రు దేవుణుదిజ్ లోస్త్రెజ్. దేవుణు వన్నిజ్ సీనాన్. ఎందానిజ్ లోసనార్ ఇజ కోపం ఆవండ దేవుణు విజెరిజ్ తక్కు సిల్లెండ సీనాన్.

6 గాని, వాండ్రు కండెకబా అనుమానం సిల్లెండ నమకమ్దాన్ దేవుణుదిజ్ లోస్త్రెజ్. ఎందానిజ్ ఇహిజ అనుమానం ఆనికాన్ గాలిదాన్ ఎగ్రిని నమదరమ్ది ఉల్పాలెకెండ తూల్లి అర్పి జోజ్జీవజ ఆనాన్.

7-8 అనుమానం ఆనికాన్ దేవుణు బాణిజ్ ఇనికబా దోహక్కాద్ను ఇజ ఒడఃబినిక ఆవద్. అనుమానం ఆనికాన్ రుండి మన్సుజ్ ఆజి ఇనిదన్ని లోణబా స్తిరం సిల్లికాన్.

9 దేవుణుదిజ్ నమ్మితి బీదవాండ్రు, దేవుణు వన్నిజ్ పెరికాన్ కిత్తిజ్ సర్ద ఆజి మండ్రెజ్.

10 అయావజనె ఆస్తి మనికాన్, వన్నిజ్ కలేగితిక తక్కు ఆజి ఇజరికానాతిజ్బా సర్ద ఆజి మండ్రెజ్. ఎందానిజ్ ఇహిజ ఉండ్రీ గడ్డి పూజు వెటని రాల్పివజ, ఆస్తి మనికాన్ ఆపా ఆన సానాన్ ఇజి వాండ్రు నెస్సాన్.

11 పొద్దు సోసి నండో ఎండ కిత్తిజ గడ్డి వహ్నా సానాద్, పూజు రాల్పి సానాద్. అయ పూజు సోకు విజి పాడాఃన సానాద్. అయావజనె గణస్త్రెజ్ కిని పణిలోణ ఆస్తి మన్నికాన్ సిల్లెండ ఆనాన్.

12 మాలెజ్ వానివలె దేవుణు ముస్సు. నమకం డిసెన్ఎండ అక్కెజ్ బరిస్సికాన్ సర్ద ఆనాన్. మాలెజ్ విజి బిరిస్తి వెనుక దేవుణుజ్ ప్రేమిస్తివరిజ్ సీనా ఇజ ఒట్టు కిత్తి ఎలాకాలం బత్తిని బత్తు ఇని ఇనాయం దేవుణు సీనాన్.

13 తప్పుపణి కిదెజ్ మన్సుద్ వాతివెలె, అక్క దేవుణు సిత్తిక ఇజి ఎయెంబా వెప్పిక ఆవద్. ఎందానిజ్ ఇహిజ సెఇ దన్నిదటాన్ దేవుణు తప్పుపణి కిబిస్త్రెజ్ అబ్విన్. తప్పుపణి కిబిస్త్రెజ్ దేవుణు ఎయెర్ది మన్సుదుబా ఆన పుటిన్ఎన్.

14 గాని బరెన్ బరెన్ వన్ని సొంత మన్సుదాన్ మన్ని ఆనదాన్ మరజి లాగ ఆజి సెఇ పణి కిజినాన్.

15 తప్పుకిదెజ్ మన్ని ఆన ఎలాగ ఇహిజ అయెలికోడోః పొటాద్ పిండెం ఆతిలెకెండె అయాక పిరితివలె ఏరు ఈబాజినాద్. అయాలెకెండె బరెన్ మన్సుదు సెఇ ఆన నండో ఆజి పాపం పుట్టాద్. పాపం ముద్రితిజి వన్నిజ్ సాపు వాజినాద్.

16 నాను ప్రేఇని తంబెరిజండె, ఎయెర్బా మిజి మోసెం కివండ సుడఃదు.

17 నెగ్గెకెజ్ విజి, కల్పిసిల్లికెజ్ విజి దేవుణు సీని ఇనాయమ్కునె. అగనమ్దు మన్ని జాయ్ విజి పుటిస్తి దేవుణుబాణిజ్ నెగ్గెకెజ్ విజి వాజినె. జాయ్ సొన్ని నీడః వానాద్. గాని దేవుణు మార్ఇకాన్.

18 నిజమాతి వన్నీ మాటదాన్ వాండ్లు తీర్చనం కిత్తిలెండ దేవుణు మజి కొత్త బత్తు. సిత్తాన్. ఎందానిజ్ ఇహిజ పుట్టిసి విజు వనకమున్ను. దేవుణు మజి వన్నీ వందిజ్ ఎర్రిసి ఇత్తాన్.

దేవుణు మాట వెంజి అయ మాటవజ నడిదెజ్వలె

19 నాను ప్రేమిసిని తంబెరుజాండె, యాక నెగ్రిండ వెండ్లు. ఒరెన్ ఒరెన్ బాగ వెంజి, వెహి వెటనె వరగివండ, వెహి వెటనె కోపం ఆవెండ మండ్రెజ్.

20 ఒరెన్ కోపం ఆతిజ దేవుణుదిజ్ ఇస్టమాతివజ నీతినిజయిదాన్ పణి కిదెజ్ అట్వన్.

21 అందెజ మన్నుద్ నిండ్రీతి నెకెజ్ విజు డిఃసిసీజి, పిరిజివాన్ నెజ అలవాటుజ్ విజు డిఃసిసీజి, మిజి నె తగిసి దేవుణు మీ మన్నుదు ఇట్టి మాటజ లోజిదు. దేవుణు మీ మన్నుదు ఇట్టి ఆ మాటజలోజ, మిజి గెల్పిస్సెజ్ సత్తు మన్నె.

22 మీరు దేవుణు మాటజ వెండ్రెజె ఆవద్. దేవుణు మాట వెంజి అయ మాట వజ నడిదెజ్బావలె. దేవుణు మాటజ వెంజి అయవజనె నడిఃవిండ మహిజ మిజి మీరె మొసెం కిజినిదెర్.

23 దేవుణు మాట వెంజి అయావజ నడిఃకాన్ అద్దమదు వన్నీ మొకొం సుడఃతి వన్నీలెకెండ మనాన్.

24 వాండ్లు అద్దమదు సుడఃజి మరెజ సాహి వెటనె వన్నీ మొకొం, ఎలాగ మర్రికదొ ఇజి పోసినాన్.

25 దేవుణు వెహి పూర్తి ఆతి రూలుజ్ లోకాజ్ పాపమదాన్ డిఃస్పిస్సాద్లె. ఒరెన్ లోకు దేవుణు వెహి అయ మాటజ్ విజు నెగ్రిండ నదవిజి బాన్ మనికెజ్ పోన్వెండ అయావజనె వన్నీ బత్తుదు నడిఃతిజ, వాండ్లు కిని విజు పణిజలోజ దేవుణు వన్నీజ్ దీవిస్సాన్.

26 ఎయెనబా, నజి దేవుణు మున్ను, నండొ బక్తి మనాద్ ఇజి వెహి వెనుక, వన్నీ నాలిక అడ్డు సిల్లెండ వరగితిజ వన్నీజ్ మన్నీబక్తి విలువ నీల్లికాద్. వన్నీజ్ వాండ్రె మొసెం కిబె ఆజినాన్.

27 మా బుబ్బాతి దేవుణు సుడఃతిజ నిజమాతి బక్తి ఇనిక ఇహిజ, యాయ బుబ్బార్ సిల్లి కొణ్కొరిజ్, ముండ మణిసి ఆతి అయలొకొణ్కొకాజ్ వరి కస్టమదు సాయం కిదెజ్, దేవుణుదిజ్ వడిఃక వనకలోజ కూడఃవిండ మండ్రెజ్ ఇకాదె నిజమాతి బక్తి.

2

విజేరిజ్ ఉండ్రెలెకెండ సుడఃదెజ్వలె

1 నాను ప్రేమిసిని తంబెరిజండె, గొప్ప జాయదాన్ నిండ్రీతి సోకు మన్నీ ప్రబువాతి యేసుక్రీస్తుజ్ నమ్మిత్తి మీరు, లోకాజ్ నడిఃమి తేడ తోరిస్కాట్.

24 ఎలాగ ఇహిజ బజారం బిందు ఇట్కిజి, నండొ దరది సొక్కెజ్ పోర్పాజి ఒరెన్, మరి ఒరెన్ బీదవాండ్లు, మీరు పార్దనం కినిబాన్ యా రిఎర్ వాతార్ ఇహిజ, నెగ్గి సొక్క పోర్పాజి వాతివన్నీజ్ మర్యాద సిజి అయ బీదవన్నీవెట, “నీను అబ్బి నిల్త, సిల్లిజ నా కాల్కు డగ్గు ఇబ్బి అడిగి బన్త”, ఇజి వెహిజ, మీరు బీదవన్నీజ్ ఆస్తిమన్నీ వన్నీజ్ ఎర్రిస్తిలెకెండ మంజినాద్. ఈహు మీరు మీ మన్నుదు మన్నీ నెజ ఉదెవమదాన్ లోకాజ్ తీర్పు కిజినిదెర్.

5 నాను ప్రేమిసిని తంబెరిజండె, మీరు నెగ్రిండ వెండ్లు. యా లోకమది బీదవారు దేవుణు మున్ను ఇత్తి నమకం వందిజ్ ఆస్తి మన్నీకారాదెజ్ దేవుణు వరిజ్ ఏర్పాటు కితాన్. దేవుణుదిజ్ ప్రేమిసిని వరిజ్ సీనా ఇజి ఒట్టు కిత్తి దేవుణు రాజ్యం దేవుణు వరిజ్ సీనాన్.

6 గాని మీరు బీదవరిజ్ సిగు కిజినిదెర్. మిజి మాలెజ్ కినికార్ ఆస్తిమన్నీకార గదె. మిజి కోర్టుదు లాగ్జి ఒనికార్ వారె గదె.

7 మీరు అసిని యేసుక్రీస్తు నెగ్గి పేరు, వీరె దూసిసినార్ గదె.

8 దేవుణు మాటదు మన్నీ ముకెలమాతి రూలు ఇనిక ఇహిజ, నీను నిజి ప్రేమిసిని లెకెండ మహివరిజ్బా ప్రేమిన్త* ఇజి ఆహు కిత్తిజ మీరు బాగ నడిఃసినిదెర్.

9 గాని మీరు విజేరిజ్ ఉండ్రె లెకెండ సుడఃవిండ మహిజ పాపం కిజినిదెర్. దేవుణు సిత్తి రూలు మీరు తప్పిదెర్ ఇజి తీర్పు వాజినాద్.

10 ఎయెనబా దేవుణు రూలుజ విజు వన్నాజ్ లోజిజి ఉండ్రె రూలు తప్పిజ విజు రూలుజ్ తప్పిలెకెండె.

* 2:8 2:8 లేవి 19:18.

11 మీరు రంకు బూలానిక అవిద్ ఇజ రూలు మనాద్. లోకాజ్ సప్పిక అవిద్ ఇజబా రూలు మనాద్. మీరు రంకు బూలాఇదెర్ గాని లోకాజ్ సప్పిక విజు రూలుజ్ తప్పితెకెండె.

12 లోకాజ్ విడుబుడల సీని రూలుదాన్ దేవుణు మిజీ తీర్పు కిసాన్లె. అందెజె సరి ఆతి మాట వర్గిదు, ఆహె నడిబుడు.

13 ఎందానిజ్ ఇహిజు, కనికారం తోరినె ఇ వన్నిజ్ కనికారం సిల్లి తీర్పు వానాద్. గాని దేవుణు తీర్పుకినివలె కనికారం తోరిస్తీ వన్ని ముస్సు. దేవుణు కనికారమేనె గెలిస్తాన్లె. వన్నిజ్ తీర్పు రెవిద్. ఎందానిజ్ ఇహిజు దేవుణు తీర్పు కిదెజ్ తయార్ ఆతిజబా వన్ని కనికారం తీర్పుదిజ్ ఇంక పెరిక.

నెగ్గి పణిని నమకం

14 నా తంబెరిజండె, ఒరెన్ దేవుణు ముస్సు, నమకం మనాద్ ఇజ వెహ్సి నమ్మకమదిజ్ తగ్గిపజు పణి కివిండ మహిజు వన్నిజ్ లాబం సిల్లెద్. నన్ని నమకం వన్నిజ్ గెల్పిసివిద్.

15-16 ఉండ్రీ వేల ఒరెన్ తంబెరి గాని తజీసి గాని సరి ఆతి సొక్కపాతెజ్ సిల్లెండ, తిండి సిల్లెండ మహివలె వరిజ్ కావాలిస్తీ వనకాజ్ వందిజ్ ఇని సాయం కివిండ, “ఏలు సాన్అ, సిసు కాయుజి నెగ్గెండ ఉణిజి మన్అ”, ఇజ వెహ్సిజు ఇని లాబంబా సిల్లెద్.

17 అయావజునె నమకమదిజ్ తగ్గితి పణి కివిండ, నమకం ఉండ్రె మహిజు అయ నమకమదాన్ ఇని లాబం సిల్లెద్.

18 గాని మీరు ఒప్పుకోణెదెర్సు. ఒరెన్ వన్నిజ్ దేవుణు ముస్సు, నమకం మనాద్ ఇజ వెహ్సినిదెర్సు, మరి ఒరెన్ వన్నిజ్ నెగ్గి పణిజ్ మన్నె. గాని నెగ్గి పణిజ్ కివిండ మిజీ నమకం మనాద్ ఇజి ఎలాగ మీరు తోరిస్తీదెర్ ఇజి నాను వెన్బాజిన. నాను నా నెగ్గి పణిజాణ్ నా నమకం తోరిస్తీ.

19 దేవుణు ఒరెండ్రె ఇజి నీను నమ్మిజిని. ఆహె నమ్మిదెజ్ నెగ్గెద్. దెయమ్కుబా ఆహె నమ్మిజి తియెలాజి వణిక్కినె.

20 బుద్ది సిల్లికి, నిజి నమకం మనాద్ ఇజి తోరిసిని నెగ్గి పణిజ్ సిల్లు ఇహిజు అయ నమకం పణిదిజ్ రెక ఇజి నీను నెన్ఇదా?

21 మా అనిగ్గో ఆతి అబ్రహాం, వన్ని మురిసి ఆతి ఇసాకుజ్ పూజ కిదెజ్ పూజ బసాదు ఒత్తివలె, వాండ్రు కిత్తి పణిదాన్ నీతి నిజయ్లు మన్నికాన్ ఇజి దేవుణు వన్నిజ్ ఇడ్డాన్.

22 సుడబుడు, వన్ని నమకమని, వాండ్రు కిత్తి పణి రుండిబా కూడజి వన్ని నమకం పూర్తి ఆతాద్.

23 “అబ్రహాం దేవుణుదిజ్ నమ్మిత్తాన్. అందెజె దేవుణు వన్నిజ్ నీతినిజయ్లు మన్నికాన్ ఇజి ఒప్పుకోటాన్”, ఇజి దేవుణు మాటదు రాస్తి మాట ఆహె జర్గితాద్. మరి దేవుణు కూలాయెన్ ఇజి పేరు వన్నిజ్ వాతాద్.

24 ఎయెన్బా దేవుణు ముస్సు, మన్ని నమకం ఉండ్రెదానె అవిద్, నెగ్గి పణిజాణ్బా నీతినిజయ్లుకాన్ ఇజి దేవుణు ఇడ్డాన్ ఇజి మీరు నెసినిదెర్.

25 అయావజునె సాని బూలానికాద్ ఆతి రాహాబుబా వట్టుమదిజ్ నడిసిల్లెండ సుడబుడెజ్ వాతి వరిజ్ దన్ని ఇండ్రె బాడ్డి సీజి ఆజ సరి దాన్ పోక్తాద్. అది కిత్తి నెగ్గి పణిదాన్ నీతినిజయ్లుకాద్ ఇజి దేవుణు ఇడ్డాన్.

26 పాణం సిల్లి ఒడోల్ సాతికదె. అయావజునె నెగ్గి పణి సిల్లి నమకం సాతి వజునె.

3

నాలికదిజ్ అడ్డు కిదెజ్

1 నాను ప్రేమిసిని తంబెరిజండె, మీ లోఇ నండొండార్ బోద్ వెహ్సికిదెర్ అమాల్. ఎందానిజ్ ఇహిజు, బోదిసినికార్ ఆతి మిజీ దేవుణు గణిజ్ ఆతి తీర్పు సీనాన్ ఇజి మీరు నెసినిదెర్.

2 మాటు విజేటి నండొ పణిలోఇ తప్పి సొన్నినాట్. గాని ఎయెన్బా వాండ్రు వెహ్సి మాటెజు లోఇ ఎనెజ్బా తవ్వండాతిజు వాండ్రు పూర్తి అతికాన్, ఇని తప్ప సిలికాన్. వాండ్రు వన్ని ఒడోల్ ముస్సు విజు అణునె ఆజి మండ్రెజ్ అటూన్.

3 గుర్రమేది వెయ్యదు కలె* ఇట్టిజ అక్క లోజీజనాద్. అయ ఇజిరి కలెమదానె మజీ ఇస్టమాతి బాడ్డిదు దన్నిజ్ మహ్రాజ్ ఆనాద్.

4 సిల్లిజ ఉండ్రీ ఓడఃదిజ్ సుడఃదు. అక్క ఎసా పెరిక ఆతిజ్బా, పెరి గాలిదాన్ సానికెజ్ అతిజ్బా, ఓడఃదు మన్ని సుకాని ఇని ఇజిరి మరదాన్ ఓడః నడిఃపిసినికాన్, వన్నిజ్ ఇస్టమాతి బాడ్డిదు ఒసిసాన్.

5 అయాలెకెండ్ నాలికబా ఇజిరిక ఆతిజ్బా అక్క గొప్ప వనక వందిజ్ పొజీజి వరగిజనాద్ ఎస్సా ఇజిరి సిసు ఆతిజ్బా పెరి గొరొన్ది మరకాజ్ విజు సుర్పొక్కాద్.

6 నాలికబా ఉండ్రీ సిసు లెకెండ్. ఒడొల్దు మన్ని వనకలోజ అక్క పూర్తి సెఇక. అక్క ఒరెన్ వన్నిజ్ పూర్తి సెఎల్ కిజనాద్. నరకమదానె వాతి సిసు నాలికారు కని వన్ని బత్తు విజు నాసనం కిజనాద్.

7 విజు రకమ్కాణి జంతుజ, ఆగనమదు మన్ని పొటిజ, సరాన్కాజ్, ఏరు లోజ మన్ని విజు మొయెజ, లోజీస్తాజ్ లోకు అటూన్.

8 గాని ఎయెర్బా నాలికదిజ్ లోజీస్తాజ్ అట్విర్. అది పూర్తి సెఇక. దనిజ్ అడ్డు కిడెజ్ ఎయెర్ అట్విర్. సావుదిజ్ తగితి పిసం తసినాద్.

9 యా నాలికదానె బుబ్బాతి దేవుణుదిజ్ స్తుతి కిజనాట్. యా నాలికదానె దేవుణు మూర్తి లెకెండ్ పుటిన్ లోకాజ్ నయివ్ సీజినాట్.

10 ఉండ్రీ వెయదానె నెగ్గి మాటజ్, నయివ్ సీని మాటజ్ వాజినాద్. నా తంబెరిజాండ్, మీరు ఆపా మంజనిక ఆవిద్.

11 ఉండ్రీ ఊటదానె నెగ్గి ఏరుని సెఇ ఏరు రెఉ.†

12 బొడె మూతు ఒలివ పట్టు అన్ఉ. ద్రాక్స తివాద్ బొడె పట్టు రెఉ. అయవజనె సోరు ఏరు సోని ఊటదాన్ నెగ్గి ఏరు రెఉ.

రుండి రకమ్కాణి గెణమ్కు

13 మీ లోజ గెణం తెలివి మన్నికాన్ మహిజ, అక్క వన్ని నెగ్గి బత్తుదాన్ రుజవ్ కిడెజ్. గెణమ్దాన్, లోజీజి మంజిని గుణం వానాద్. సజీ గెణం తెలివి మనాద్ ఇజి లోజీజి మంజిని గుణమ్దాన్ వాండ్రు కిని పణి లోజ తోరిసన్.

14 గాని మీ మన్నుదు నండె పగ, గోస, మీ వందిజ్ మన్ని మన్ను ఇడఃతిజ మీ గెణం వందిజ్ పొజీదెజ్ ఆవిద్. మీ గెణం వందిజ్ వెప్పొక నిజం ఆవిద్.

15 నన్ని బుద్ది దేవుణు సత్తిక ఆవిద్. అక యా లోకమ్దాన్, లోకు బుద్దిదాన్, నయ్తానుబాణిజ్ వాతి గెణమె.

16 ఎంబె గోస, మీ వందిజి మని మన్ను మనాదొ, అబ్బె టంటిజ్, విజు రకమ్కాణి పాపమ్కు మంజినె.

17 గాని దేవుణుబాణిజ్ వాని గెణం కల్తి సిల్లిక. అయ గెణం మన్నికార్ సమదనమ్దాన్, సార్లిదాన్, విజెరెవెట కూడఃజి, లోజీజి మంజిని బుద్దిదాన్, కనికారమ్దాన్, నెగ్గి పణిజాణ్, విజెరిజ్ ఉండ్రెలెకెండ్ సుడఃజి, నిజమ్దాన్ పణి కినార్.

18 నమదనం కినికార్ సమదనం విత్తి, నీతి నిజయ్తి ఇని పంట కొయనార్.

4

దేవుణుదిజ్ లోజీదు

1 మీ లోజ జటిజ్ అదిజ్, పొట్టాడెజ్ బుద్ది మనాద్. సుకం మున్ను మండ్రెజ్ ఇజి మీ మన్నుదు మన్ని ఆసదానె నన్ని బుద్ది వాజినాద్.

2 మీరు ఇనికెజ్ దొహ్క్కద్ ఇజ ఆస ఆజనిదెర్ గాని అకెజ్ మిజి దొహ్క్కావండ ఆజని. అయావలె మీరు సప్పిదెర్. ఇతాహా వరిది ఆస ఆనిదెర్ గాని దొహ్క్సిజ్ అట్ఇదెర్. మీరు టంటిజ్ ఆజి పొట్టాడఃజినిదెర్. మిజి కావాలిస్సిక ఎందానిజ్ దొహ్క్విద్ ఇహిజ, మీరు దేవుణుదిజ్ లొసెఇదెర్.

3 మీరు లొస్సివలె మిజి దొహ్క్విద్. ఎందానిజ్ ఇహిజ మీరు సెఇ ఉదనమ్దాన్ లొస్సిదెర్. సుకం మున్ను మండ్రెజ్ ఇజి మీరు లొస్సిదెర్.

* 3:3 3:3 గుర్రం వెయ్యదు ఇట్టి ఇజిరి సెక్క ముక్క అక్క గుర్రం వెయ్యదు మహిజానె దన్నిజ్ నడిపిస్తాజ్ ఆనాద్. † 3:11 3:11 బూమిలోహాన్ నెగ్గి ఏరుని సెఇ ఏరు వానె. బానె సెఇ ఏరునె వానె. తియాజ్ అఉ. సోరు మన్నికాద్.

4 మీరు దేవుణుడికి డీసిని సాహికిదెర్. యా లోకమదిక్ ప్రేమిన్సికాన్ దేవుణుడిక్ విరోధమాతికాన్ ఇజ మీరు నెన్ఇదెరా? యా లోకమదిక్ కుల తోహికాన్ దేవుణుడిక్ వడిజకాన్ ఆనాన్.

5 దేవుణు మా లోక ఇడ్డత్య, మా వందిక్ నండో ఆన ఆజినాన్ ఇజ దేవుణు మాటదు మనాద్. అయ మాట నిజం ఇజ మీరు నెసినిదెర్.

6 గాని దేవుణు సత్తుదాన్ కూడితి దయాదర్తం మీరు ఆన ఆని దన్నిక్ ఇంక నండో సీజినాన్. అందెజె “గర్త ఆని వరిక్ దేవుణు ఎద్రిసినాన్. గాని తగి ఆతి మన్ని వరిక్ దయాదర్తం సీజినాన్”, ఇజ దేవుణు మాటదు వెప్పొనాద్.

7 అందెజె మీరు దేవుణుడిక్ లోజిదు. సయతాన్దిక్ ఎద్రిస్తు. అయావలె సయతాన్ మీబాణిక్ ఉహ్కన్న సానాన్.

8 మీరు దేవుణు డగ్గు రద్దు. అయావలె మీ డగ్గు రద్దు. అయావలె దేవుణు మీ డగ్గు వానాన్. మీరు కిని పణిజ లోక ఇని తప్పబూ మన్వండ మండ్రెక్, పాపం పణిక్ విజా డీసిసిదు. దేవుణుడిక్, లోకమదిక్, ప్రేమిసిని రుండి మన్ను డీసిసీజ, దేవుణుడిక్ ప్రేమిసిని ఉండ్రె మన్ను ఆజి మండ్రు.

9 మీ పాపం వందిక్ ఒడోబిజి దుకం ఆజి నండో అడోబాదు. మీరు సిక్కిక్ డీసి, అడోబాదు. మీరు సర్ద డీసి, దుకం ఆదు.

10 దేవుణు ముజాల మీరు తగిజి మండ్రు. అయావలె దేవుణు మిజి గవర్ం సీనాన్.

11 నాను ప్రేమిసిని తంబెరిజాండె, ఒరెన్ మున్ను ఒరెన్ విరోదం వరిగమాట్. మరి ఒరెన్ వన్నిక్ వడిజక వెప్పొకాన్, మరి ఒరెన్ వన్నిక్ తీర్పు కినికాన్. దేవుణు వెప్తి రూలుదిక్ విరోదం ఆజినాండ్రె దేవుణు సిత్తి రూలుదిక్ వాండ్రు నెక్కిపొక్కినాన్. మీరు దేవుణు రూలుక్ నెక్కిపొక్కిజ మీరు దేవుణు రూలుదిక్ లోబడోకదెర్. గాని దేవుణు రూలుక్ సరిఆతికెక్, ఆవద్ ఇజ మీరు తీర్పు తీరిసినికార్ ఆనిదెర్.

12 విజా రూలుక్ సీనికాన్ దేవుణునె. విజేరిక్ తీర్పు సీనికాన్ దేవుణునె. ఒరెన్ వన్నిక్ గెల్లిస్తాక్ వాండ్రు అట్నాన్. ఒరెన్ వన్నిక్ నాసనం కిదెక్ వాండ్రు అట్నాన్. పడోకాతి వన్నిక్ తీర్పు సీదెక్ నీను ఎయి?

మర్న రోజు వందిక్ పొజిదెక్ ఆవద్

13 నాను వెప్పొక నెగ్రెండ వెండ్రు. మీ లోక నిగొండార్ ఈహు వెప్పొర్, “నెండ్రు సిల్లె, విగిహిక్ ఎంబె ఎంబె ఉండ్రె పట్టుం సొన్సి, అబ్బె ఉండ్రె ఎంటు మంజి బేరం కిజి నండో డబ్బు గణాన్”.

14 అహిజ, విగిహిక్ నీ బత్తుదు ఇనిక వానాదొ నిజి తెలివద్. నీ బత్తు సణెం తోరె ఆజి నణెమదిజి మాలు ఆని ఆవిరి నన్నిక.

15 అందెజె మీరు ఈహు వెప్టాక్, “దేవుణుడిక్ ఇష్టం మహిజ మాపు బత్తినావ్, అక్క కినావ్, ఇక్క కినావ్”.

16 గాని మీరు గర్త ఆజినిదెర్. మీరు మీ వందిక్ పొజిజినిదెర్. ఇక్క విజా తప్ప.

17 ఎయెర్బా సరిఆతి పణి ఎమేణిక్ ఇజ నెసి, అయాలెకెండె కిపిండ మహిజ వాండ్రు పాపం కిజినాన్.

5

ఆస్తి మన్నికార్ జాగర్త మండ్రు

1 ఆస్తి మన్నికార్ నాను వెప్పొక వెండ్రు. మిజి వాని గోవ కష్టమక వందిక్ దుకమ్దాన్ నండో అడోబాదు.

2 మీ ఆస్తి విజా పాడాన సొనాద్దె. మీ పాతెక్ విజా నెద తినెలె.

3 మీ బజారం, వెండిదిక్ కరి తినాద్దె. దేవుణు తీర్పు కినివలె ఆ కరి నీ మున్ను రుజువ్ మంజి సిసువజి మిజి నాసనం కినాద్దె. మీరు గణాస్తి ఆస్తి విజా, దేవుణు తీర్పు కిని రోజు వందిక్ కుంబ కిజినిదెర్.

4 నుడోదు, మీ బూమిదు పణి కిత్తివరిక్ కూలి డబ్బు నిఇతిదెర్. అయా కూలిడబ్బు మీ ఎద్దు మొరొ ఆజి. మీ పంట కొయ్యివరి మొరొ గొప్ప సత్తు మన్ని దేవుణుబాన్ సొహాద్.

5 మీరు యా లోకమదు మహిపలె సుకం మున్ను మంజి సర్దదాన్ బత్తితిదెర్. కొయ్దిక్ బలస్తి మన్ని కోడ్లికెండె కడోవెరి దిసమ్కాక్ వాని మీ నాసనమ్ వందిక్ మీ మన్ను బలసి వాతాద్.

6 తప్పు కిజ వరిజ్ తప్పు కిత్తికార్ ఇజ నేరం మొప్పి, వరిమున్ను తీర్పు తపిసి సప్తిదెర్. మిజి ఎద్రిస్తజ్ వారు అట్ఎత్తార్.

కస్టమ్దు ఓరిసి మండ్రు

7 అందెజె, నా తంబెరిజాండె, ప్రబు ఆతి యేసు క్రిస్తు వాని దాక వన్నివందిజ్ ఓరిసి మండ్రు. నుడేడు, ఒరెన్ రెయ్యు వాండ్రు గొప్పు విలువాతి వన్ని బూమి పంట బూమిపంట వానేండ ఎస్సా కాలం కాన మంజనాన్. ముజాల్ పిరుదిజ్, కడివేరి పిరుదిజ్ వాండ్రు కాన మంజనాన్.

8 అయావజనె మీరుబా ఓరిసి మండ్రు. మీ మన్ను కద్దివిండ ఇడేడు. ప్రబు ఆతి యేసు క్రిస్తు వాని రోజు డగ్రు ఆతాద్.

9 నాను ప్రేమినిని తంబెరిజాండె, దేవుణు మిజి తీర్పు కివిండ మండ్రెజ్ ఇహిజ ఒరెన్ మున్ను ఒరెన్ మొరొ అమాట్. ఎందానిజ్ ఇహిజ దేవుణు మిజి తీర్పు సీనాన్. తీర్పు కినికాన్ డగ్రునె మనాన్.

10 దేవుణు మాట వెస్తా ప్రవక్తరు ఎలాగ మహోర్ ఇజ నుడేడు. వరిజ్ నండో మాలెజ్ కిత్తిజ్బా వారు అక్కజ్ బరిస్తార్.

11 నమకం డీన్విండ బరిసి మహికార్ సర్ల ఆనికార్ ఇజి మాప్ వెస్సానాప్ ఇజి మీరు నెనిదిదెర్. యోబు, కస్టమ్కు వాతివలె ఓరిస్టిజ్ దేవుణు ఎలాగ వన్ని ఉదెనమ్కు పూర్తి కిత్తాన్ ఇజి మీరు వెబాదెర్. ఎందానిజ్ ఇహిజ దేవుణు నండో కనికారం, దయ మన్నికాన్.

12 ముకలమాతి ఉండ్రీ మాట ఇనిక ఇహిజ మీరు ఆగసం తోడు గాని, బూమి తోడు గాని, మరి ఇనిదన్ని తోడుబా గాని అసి ప్రమాణం కినిక అవిద్. మీ మాట ఒఓ ఇహిజ ఒఓ ఇజి, అవిద్ ఇహిజ అవిద్ ఇజి మండ్రెజ్. అహె మహిజ దేవుణు తీర్పు సీనివెలె మిజి సిక్స రెవిద్.

నమకమ్దాన్ కూడితి పార్లనం

13 మీ లోఇ ఎయెజ్బా మాలెజ్ వాతిజ వాండ్రు దేవుణుదిజ్ పార్లనం కిదెజ్. మీ లోఇ ఎయెజ్బా నర్దదాన్ మహిజ దేవుణు వందిజ్ పాటెజ్ పార్దెజ్.

14 మీ లోఇ ఎయెజ్బా జబ్బు మహిజ వాండ్రు సజం పెద్దెల్జ కూకెజ్. వారు ప్రబు పేరుదాన్ నూనె రాసి వన్ని వందిజ్ పార్లనం కిదెజ్.

15 నమకమాతి పార్లనం ఆ జబ్బుది వన్నిజ్ నెగెండ కినాద్. దేవుణు వన్నిజ్ నికాన్. వన్ని పాపమ్కు దేవుణు నెమిస్సాన్.

16 అందెజె మీరు నెగెండ ఆనివందిజ్ ఒరెన్, పాపమ్కు మరి ఒరెన్ వన్నిజ్ ఒప్పుకోడిజె, ఒరెన్, మరి ఒరెన్ వందిజ్ పార్లనం కిదు. నీతి నిజయ్యి వాండ్రు కిని పార్లననమదిజ్ గొప్పు సత్తు మనాద్.

17 ఏలియ ప్రవక్త మానన్ని లోకునె. వాండ్రు బూమి మున్ను పిరు రమ ఇజి గటిజ పార్లనం కితిజ్, మూండ్రీ పంటిజ్ ఆరు నెలెజ్ దాక బూమి మున్ను పిరు రెవెత్తాద్.

18 ఏలియ మరి పార్లనం కితిజ్ ఆగసం పిరు సితాద్. పిరు సితెజ్ బూమి పంట సితాద్.

19 నా తంబెరిజాండె, మీరు యాక నెస్తు. మీ లోఇ ఎయెన్బా నిజమాతి సరి తప్తిజ, వన్నిజ్ మరి ఒరెన్ నిజమాతి సరిదు తత్తెజె.

20 అహు కితిజ పాపం కిత్తిజ్ వాతి సావుదాన్, వన్ని అత్తుదిజ్ తప్తిస్సాన్. దేవుణు వన్ని పాపమ్కాజ్ విజు నెమిస్సాన్.

పేతురు రాస్తి మొదోహి ఉత్రం

నెల్వ కిదిసినిక

యా ఉత్రం రాస్తికాన్ యేసుప్రబుజ్ అపొస్తుడు ఆతి పేతురు. రమారమి క్రీస్తు సెకం 60 దు యా ఉత్రం రాస్తికాన్. అయా కాలమదు ఆసియాదు బానె బత్తిజి మహి క్రీస్తు లోకాజ్ మాలేజి వాజి మహా. ఏలుబడిః కిని రాజుర్ క్రీస్తు లోకాజ్ వరి నమకం వందిజ్ హిమన కిత్తార్. వరిజ్ దయరం కిబిస్తాజ్ యా ఉత్రం రాస్తికాన్. ముకెలమాతి మాటేజ్ ఇహిజ, కస్టమ్కు వానివలె ఓరిసి మండ్రెజ్, అతికారి లోకాజ్ లోజేజి మండ్రెజ్, దేవుణు వందిజ్ బత్తిదెజ్ ఇహిజ ఎలాగ నినికెజె.

1 యేసు క్రీస్తుజ్ అపొస్తుడు ఆతి పేతురు రాసిని ఉత్రం. పొంతు, గలతీయ, కపదొకియ, ఆసియ, బితునియ ఇని దేసమ్కాజ్ నెద్రితి మని ఆఇ దేసమది వరి లెకెండ మనివరిజ్, ఎయెర్ ఇహిజ దేవుణు వన్ని వందిజ్ ఏర్పాటు కితి వరిజ్ రాసిన్.

2 బుబ్బాతి దేవుణు మిజి ఎర్రినైజి ఇజి ఒడేబితాండై వన్ని వందిజ్ మిజి ఎర్రిస్తాన్. యేసు క్రీస్తుజ్ లోజేజి వన్ని నలదాన్ నొరె ఆజి సుబరం ఆజి మండ్రెజ్ దేవుణు ఆత్మ మిజి కేట కిత మనాన్. మిజి దేవుణు దయా దర్మం, నిపాతి నిండ్రెజి మనిద.

ఎలాకాలం ఎర్దు సుడేజి మండ్రెజ్.

3-4 మాటు దేవుణుదిజ్ నండో పొగిడేనాట్. వాండ్రె, మా ప్రబు ఆతి యేసుక్రీస్తుజ్ బుబ్బా. దేవుణు గొప్ప కనికారమదాన్ మజి కొత్త బత్తు. సితాన్. ఎలాగ ఇహిజ, యేసు ప్రబుజ్ సాతి వరి లోఇహాన్ నిక్తాన్. నిక్తిజ్ ఎల్లకాలం ఎర్దు సుడేజి మండ్రెజ్ కొత్త బత్తు. మజి సితాన్. అక్కడె ఆవిండ మజి ఉండ్రె అక్క. సితాన్. అక్క. పాడాజి సాన్ఇక. పూర్తి నెగ్గిక. ఎల్లకాలం మంజినిక. అక్క. పరలోకమదు మీ వందిజ్ ఇట్టా మనాన్.

5 మీరు దేవుణుదిజ్ నమ్మితిజ్ దేవుణు వన్ని గొప్ప సత్తుదాన్ మిజి కావకిజి ఇడ్నాన్. కడేవెరి రోస్కాణ్ మజి వాని సిక్చదాన్ ఎలాగ గెల్చిస్తాన్ ఇజి తోరిస్తాన్.

6 దిన్ని వందిజ్ మీరు నండో సర్ద ఆదు. గాని ఏలు సెగం రోస్కు. మిజి కల్లితి అనెకమాతి విజా రకమ్కాణి కస్టమ్క వందిజ్ దుకం ఆదెజ్ వలె.

7 ఎండనిజ్ ఇహిజ, వడాజి సాని బజారం సిసుదు ఇడ్డి సుబ్రం కినార్ గదె. అయ లెకెండ బజారం ముస్కు. ఏలువ మన్ని మీ నమకమ్బా కల్లి సిలిక ఇజి రుజుప్ కిదెజ్ వలె. ఆహె రుజుప్ కితిజి యేసు క్రీస్తు తోరె ఆనివలె నని నమకమ్ వందిజ్ మిజి పొగిడేనాన్. మిజి, గొప్ప గనం డొహ్కాద్.

8-9 మీరు వన్నిజ్ సుడేజినిదెరె గాని వన్నిజ్ ప్రేమిసినిదెరె. ఏలు సుడేవిండ మహిజబా వన్నిజ్ నమ్మిజినిదెరె. మరి, వెప్టాజ్ ఆటేజ్ నని గొప్ప సర్దదాన్ సర్ద ఆజినిదెరె. ఎండనిజ్ ఇహిజ మిజి యేసు క్రీస్తు ముస్కు. మన్ని నమకమ్దానె, మీ పాణం ఎలాకాలం మంజిని సిక్చదాన్ గెల్చిస్తాజ్ అటూద్.

10 మిజి వాని రక్తణం వందిజ్ దేవుణు మాటేజ్ వెప్టా ప్రవక్తరు రెబాతరె బాగ నెస్టెజ్ సుడేజాన్. దేవుణు మిజి సీదెజ్ ఇడ్డి యా దయా దర్మం వందిజ్ వారు వర్గితార్.

11 క్రీస్తు కస్టమ్కు ఓరిస్తి వెనుక గొప్ప గనం కల్లినాద్ ఇజి ప్రవక్తరు లోఇ మన్ని క్రీస్తు ఆత్మ అక్క. జర్గివిండ మహి నండో ముందాలన్ వరిజ్ వెప్టా మహూర్. వెప్టాజ్ దన్ని అర్దం ఇనిక ఇజి వారు రెబాతార్. అక్కెజ్ ఎసెజ్ జర్గిన్లె, ఎలాగ జర్గిన్లె ఇజి రెబాతార్.

12 ఆహు రెబాతిజ్, వారు వరి వందిజ్నె ఆవద్, మీ వందిజ్ వెహిన్సార్ ఇజి దేవుణు ఆత్మ వరిజ్ నెస్పిస్తాన్. పరలోకమదాన్ దేవుణు పోక్తి వన్ని ఆత్మ సత్తుదాన్ మిజి సువార్త వెప్టాకార్ యాక్కెజ్ మిజి నెస్పిస్తార్. పరలోకమదు మని దూతెజబా దిన్ని వందిజ్ నెస్టెజ్ ఇజి ఆస ఆజినార్.

దేవుణు వందిజ్ కేట ఆజి మండ్రు.

13 అందెజె మీ మన్నుదిజ్ తయార్ కిజి మండ్రు. మన్నుదు అణెన ఆజి మండ్రు. యేసుక్రీస్తు తోరె అనివలె మీజి దోహాక్కి దేవుణి దయా దర్శం వందిజ్ పూర్తి అసదాన్ ఎర్దు సుడఃజి మండ్రు.

14 దేవుణుదిజ్ లోజిజి వన్ని కొణ్ణోర్ లకెండ మండ్రు. ముజల్నె మీరు దేవుణుదిజ్ నెన్ఎండ మహివలె నెజ అనెజ వందిజ్ లెకెండ అమాల్.

15 గాని మీరు కిని విజు దని లోనుబా దేవుణు వందిజ్ కేట ఆజి మండ్రు. ఎందనిజ్ ఇహిజ వన్ని సొంతం ఇజి మీజి ఇడ్డికాన్ పరిసుదం ఆతికాన్.

16 ఎందనిజ్ ఇహిజ దేవుణు పరిసుదం ఆతికాన్. అయ లెకెండ మీరుబా పరిసుదం ఆజి మండ్రెజ్ ఇజి దేవుణు మాటదు రాస్త మనాద్.

17 బుబ్బు ఇజి కూక్కి మీరు పార్లనం కిజిని దేవుణు విజెరిజ్ వరి పణిజ సుడఃజి ఇని తేడః సిల్లెండ తీర్పు కిజిసాన్. అందెజె మీరు యా లోకమ్దు కూడః వాతి పరిలెకెండ బత్కిని వలె దేవుణుదిజ్ తియెల్ ఆజి మండ్రు.

18 మీ అనిగోగోర్ బత్కితి లెకెండ దేవుణుదిజ్ నెన్ఎండ బత్కిని మీ బత్కు. పణిదిజ్ రెజక. నన్ని బత్కుదాన్ యేసు ప్రబునె మీజి డిబిస్తాన్. సిల్లెండ ఆజి సొని వెండి బజారం మీజి డిబిన్ఎతాద్ ఇజి నెస్సిదెర్ గదె.

19 గాని ఇని తపు సిలి గోరె పిల్ల నని యేసుక్రీస్తు విలువాతి నలదాన్నె మీరు డిబె ఆతిదెర్.

20 యా లోకమ్దిజ్ పుటి నెలెండ మహివలెనె దేవుణు యేసుక్రీస్తుజ్ యా పణి వందిజ్ ఎర్లిస్తాన్. గాని యా కడఃవెరి రోస్కాజ్నె వన్నిజ్ పోక్తాన్. మీ వందిజ్ పోక్తాన్.

21 సాతి వరిబాణిజ్ దేవుణు నిక్తి యేసు క్రీస్తు వెటనె మీజి దేవుణు మున్ను. నమకమ్ మనాద్. నిక్తిజ్ వన్నిజ్ గొప్ప పెరికాన్ ఇజి ఇట్టాన్. అందెజె మీ నమకం దేవుణు మున్ను. ఇడ్డిదెర్. అందెజె దేవుణు ఒట్టు కితి దనిజ్ ఎర్దు సుడఃజి మంజినిదెర్.

22 నిజమాతి మాటదిజ్ మీరు లోజితిజ్ మీరు టేటజ్ ఆతిదెర్. అందెజె నమ్మితి వరిజ్ కల్లి సిల్లెండ ప్రేమిసినిదెర్. అహిజ నిజమాతి ప్రేమదాన్ మీ మన్ను పూర్తి నెమిస్తాజ్ వలె.

23 ఎందనిజ్ ఇహిజ సాజి సొని లోకాజ్ అవిద్. గాని ఎల్లకాలం బత్కిని దేవుణుదనె మీరు పుట్టిదెర్. ఎల్లకాలం బత్కిని దేవుణు మాటదాన్నె మీరు మరి పుట్టిదెర్.

24-25 ఎందనిజ్ ఇహిజ, “విజెరి లోకుర్ గడ్డి లకెండె వరి పేరు గడ్డి పుజు లెకెండె మనాద్. గడి వహ్వాద్. పుజు రాల్లు అర్వాద్. గాని ప్రబు ఆతి దేవుణు మాట ఎల్లకాలం మంజినాద్”, అయా మాట ఇనిక ఇహిజ మీజి సువార్త వెప్తై మని మాటనె.

2

1-3 యేసు క్రీస్తు ఎసా నెగికాన్ ఇజి మీరు నెసి సుడఃజి మహిదెర్. అందెజె ఆఇ వన్ని మున్ను. కుల్ల కినికెజ్, విజు మొసెం పణిజ్, మీ మన్నుదు మనికెజ్, డాఃప్పి మరి ఉండ్రీ వెప్పికెజ్, కినికెజ్, గోన, మరిబరెన్ వన్నిజ్ దూసిన్సిక యాకెజ్ విజు డిస్సు. ఎలు పుట్టి ఇజి కొణ్ణోర్ లెకెండ దేవుణు మాట ఇని కల్లి సిలి పాలు ఉండజ్ నండో అస ఆదు. దని సత్తుదాన్ పిరిజి మీ బత్కు. రక్కిస్తు.

పాణం మన్ని పణుకు, దేవుణుదిజ్ ఎర్లిసి మన్ని లోకుర్.

4 మీరు బత్కిజి మని క్రీస్తుబాన్ వాతిదెర్. ఇల్లు తోహ్పికార్ పణిదిజ్ రెజక ఇజి నెక్కి పోక్తి పణుకు లెకెండె క్రీస్తు. లోకుర్ వన్నిజ్ నెక్కపొక్తార్ గాని దేవుణు వన్నిజ్ గొప్ప విలువాతికాన్ ఇజి ఎర్లిస్తాన్.

5 మీరుబా పణుకుజ్ లెకెండె దేవుణు మండ్రెజ్ ఇజి తోహ్ అని గుడిదిజ్ మీరు పణుకుజ్ లెకెండె. గాని క్రీస్తు లెకెండె మీరుబా పాణం మని పణుకుజె. దేవుణుదిజ్ కేట ఆతి పుజెరి లోకుర్ లెకెండె మండ్రు. దేవుణుదిజ్ పొగడిజి, వందనమ్కు వెప్పి, వన్నిజ్ లోజిజి మంజి యేసు క్రీస్తు వలెహాన్ వన్నిజ్ తగితి పూజెజ్ నీదు.

6 దేవుణు మాటదు ఈహు రాస్త మనాద్ ఇనిక ఇహిజ ఇదిలో నాను సియెనుదు ఉండ్రీ పణుకుదిజ్ ఎర్లిసినె. అయా మూల పణుకు గొప్ప విలువాతిక. వన్ని మున్ను. నమకం ఇడ్డికాన్ ఎయెన్బా సిగు అవిన్.

7 అందెజె, యేసు క్రీస్తుజ్ నమ్మిత్తి మిజి, యా పణుకు గొప్ప విలువాతి పణుకు. గాని నమ్మిజ వరిజ్ ఇనిక అనాద్ ఇహిజ, “ఇల్ల తొప్పికార్ నెక్కి పొక్తి పణుకునె మూలదిజ్ మూల పణుకు అతాద్”.

8 మరి రాస్ట్ర మనాద్ ఇనిక ఇహిజ “అయ పణుకునె లోకాజ్ అడ్డు కినాద్. అయ పణుకుదిజ్ తొరొడిజె అర్నార్. ఎలాగ్ అర్నార్ ఇహిజ దేవుణు మాటదిజ్ లోజిఎర్. దేవుణు మాటదిజ్ లోజిజకార్ అర్నార్ ఇజ దేవుణు ముందాల్పె నెస్తాండ్రె వెప్తా మహాన్.

9 గాని మీరు దేవుణు ఎర్లెస్తి జాతి. రాజుజ్ పుజెరి లోకుర్. దేవుణుదిజ్ కేట ఆతి వన్ని సొంత లోకుర్. అహె పాపం ఇని సీకటిదాన్ వాని గొప్ప బమ్మాతి జాయ్దు మిజి కూక్త తతాన్. వన్ని గొప్ప బమ్మాతి వణిజ వందిజ్ సాటిస్తెజ ఇట్టాన్.

10 ముందాల మీరు దేవుణు లోకుర్ ఆఇకిదెర్. ఏలు దేవుణు లోకుర్ ఆతిదెర్. ముందాల దేవుణు కనికారం మిజి దొప్పాఎతాద్. ఏలు కనికారం దొహ్కాద్.

11 నాను ప్రేమిసిని తంబెరిజాండె, నాను మిజి బతిమాల్లి వెప్పిన్, మీరు యా లోకమది వరి లెకెండె అఇదెర్, ఆఇ దేనెమది వరి ననికిదెర్. దేవుణు వందిజ్ మని అసెజ అడ్డు వాజిని ఒడోల్ది అసెజ డిఃస్తు.

12 దేవుణుదిజ్ నెన్ ఇ లోకుర్ నడిఃమి మీరు నెగ్రెండ మండ్రెజ్. ఎందనిజ్ ఇహిజ ఇని దని లోఇబా మిజి సెఇకార్ ఇజ వారు వెప్తిజ, మీ నెగ్గి బత్తుదిజ్ సుడఃజి దేవుణు తీర్పు కిదెజ్ వాని రోజుదు వారు దేవుణుదిజ్ పొగిడిదెజ్.

అతికారమేదు మన్ని వరిజ్ లోజిజి మండ్రు.

13-14 ఏలుబడిః కినివరి లోఇ పెరికాన్ ఆతి రాజుజ్ గాని, అతికారమేదు మని వరిజ్ గాని క్రీస్తు వెప్తి లెకెండె లోజిజి మండ్రు. తప్ప కితి వరిజ్ సిక్స సిదెజ్, నెగ్గికెజ్ కితి వరిజ్ పొగిడిదెజ్ విరిజ్ పొక్తాన్ గదె.

15 ఎందనిజ్ లోజిదెజ్ ఇహిజ, మీ నెగ్గి వణిజ తోరిసి మీరు బుద్ది సిల్లెండ వర్గిని వరి వెయు మూక్తెజ ఇజ దేవుణు కోరిజనాన్.

16 మీరు డిఃబె ఆతి లోకుర్. అహిజ, మీరు ఎయెర్ నెసెఎండ సెఇ వణిజ్ కిదెజ్ అవెద్. దేవుణు అడ్డి వణి కినివరి లెకెండె మండ్రు.

17 విజెరిజ్ మర్యాద సిదు. నమ్మిత్తి వరిజ్ ప్రేమిస్తు. దేవుణుదిజ్ తియెల్ ఆజి మండ్రు. రాజుజ్ మర్యాద సిదు.

18 వణి మణిసిర్ వరి ఎజుమానిరిజ్ నండె మర్యాద సీజి లోజిజి మండ్రెజ్. మీ మున్ను కనికారమేదాన్ సార్లిదాన్ మని వరిజె అవెద్. మీ మున్ను కనికరం సిలి వరిజెబా లోజిజి మండ్రు.

19 ఎందనిజ్ ఇహిజ, నాయం సిల్లెండ ఎయెన్బా మిజి బాద కితిజ అక్కు మీరు దేవుణు వందిజ్ ఓరిస్తు. అక నెగ్గికదె. దేవుణుదిజ్ ఇష్టమాతి వణిసె.

20 మీరు తప్ప కితి వందిజ్ ఉండ్రె దెబ తిహిజ అక ఓరిస్సిదెర్. గాని మిజి ఇని లాబం? గాని దేవుణు ఎర్దు సరి అతికెజ్ కితి దనిజ్ సిక్స వానివలె అక ఓరిస్సిజ అక నెగ్గికదె. దిని వందిజె దేవుణు మిజి ఏర్పాటు కిత్తాన్.

21 ఎందనిజ్ ఇహిజ క్రీస్తుబా మీ వందిజ్ కన్టం ఓరిస్తాండ్రె మీరుబా వాండ్రు నడిఃతి లెకెండె నడిఃదిజ్ ఉండ్రె గుర్తు తోరిస్తె సితాన్.

22 “క్రీస్తు ఇని తప్పబా కిఎతాన్. వన్ని మాటిజ్ లోఇ ఇని అబద్దమేబ సిల్లెతాద్.

23 వన్నిజ్ దూసిస్తి వలె మరెజి దూసిసెఎతాన్. వన్నిజ్ మల్లెజ్ కితివలె వరిజ్ బెద్రిన్ఎతాన్. నాయమేదాన్ తీర్పు కిని దేవుణుదిజ్ వానిజ్ వాండ్రె ఒవజెవె అతాన్.

24 యేసుక్రీస్తు సిలువాదు సాతివలె మా పాపమేకు పిండితాన్. ఎందనిజ్ ఇహిజ మాటు పాపమేకు పూర్తి డిఃసిసిదెజ్ ఇజ, దేవుణు ఎర్దు సరి ఆతి బత్తు బత్తిదెజ్ ఇజ. వన్ని ఒడోల్ది దెబ్బిజాణిజ్ మాటు నెగెణ్ అతాట్.

25 ఎందనిజ్ ఇహిజ మీరు గొరెజ్ లెకెండె తప్పి సాహిదెర్. గాని ఏలు గప్పడుఃఎన్ ఆతి వన్ని డగ్గు, మీ పాణం కావ్ కిని వన్ని డగ్గు మరెజి వాతిదెర్.

3

అల్పిమూసిర్

1-2 అయావజనె, అల్పికె అతికెజ్ వన్యా, సొంత మూసిరిజ్ లోజీజి మండ్రెజ్. ఎందనిజ్ ఇహిజ, మూసిర్ దేవుణు మాట నమ్మిఇకార్ అతిజ్ బా వన్యా, నెగ్గి బత్తుదాన్ దేవుణుబాన్ వరిజ్ తతెజ్ అట్టె. ఎలాగ ఇహిజ వన్యా కల్పిసిల్ బత్తుని, దేవుణు మున్ను మన్ని తియెల్ నూణారం దేవుణుదిజ్ నమ్మినార్.

3-4 నెగ్గెండ తోర అదిజ్ ఇజ బుర్ర డూని మండ్రెజ్, బజారం గొలున్ను ఇట్టిదిజ్, నెగ్గి పాతెజ్ పార్పాదెజ్, గాని వనక వందిజె మన్ను ఇడెదెజ్ ఆవిద. మీ మన్నుదు ఇని ఇనికెజ్ ఇడెజినిదిర్ ఇజి సుడెదు. ఇనికెజ్ ఇహిజ సార్పిదాన్, నిపాతి మన్నుదాన్, పాడాజి సాన్ ఇ నన్ని నెగ్గి గుణమకు మన్నుదు ఇడెదు. నన్నికది దేవుణుదిజ్ గొప్ప విలువతికాద్.

5-6 అయావజనె, పూర్పమేదు దేవుణు మున్ను నమకం ఇడ్డి బోదెక్, దేవుణు ఒట్టు కితి దన్నిజ్ ఎర్దుసుడెజి మహానె, వన్యా సొంత మూసిరిజ్ లోజీజి వన్యా, నెగ్గి గుణమకు అయాలెకెండ తోరిస్తె. అబ్రాహాం అల్పి అతి సార నన్నికది. అది అబ్రాహాముజ్ లోజీజి, వాండ్రు నా మున్ను అతికారం మన్నికాన్ ఇజి మర్పాదె సిత్తాద్. మీరుబా అయావజనె సరి అతికెజ్ కిజి ఇనిదన్నిజ్ బా తియెల్ సిల్లెండ మహిజ సార పొటది గాల్పికె ఆనిదిర్.

7 అయావజనె, మూసిర్ వరి బోదెకాజ్, మజి ఇంక సత్తు తక్కు మనికెజ్ ఇజి నెసి, వన్యాజ్ గవరం సీజి, నెగ్గెండ సుడెజి మండ్రెజ్ వలె. దేవుణు కనికారమేదాన్ సీత్తి ఎలాకాలం బత్తిని బత్తు ఉండ్రె లెకెండ మీ వెట వనకాజ్ బా సీనాన్. అందెజె వన్యాజ్ మీరు మర్పాదె సీదెజ్. అయాలెకెండ కితిజ మీ పార్దనమేదిజ్ ఇని అడ్డుబా మన్ ఏదె.

సరి అతికెజ్ కితి వందిజ్ వాజిని బాద్

8 ఆక్కర్దు నాను విజిరేజి వెప్పిన, ఉండ్రె మన్ను ఆజి మండ్రు. ఒరెన్ మరి ఒరెన్ వెట వన్నిజ్ సర్ద మహివలె గాని దుకం మహివలె గాని కూడెజి పాడెజి మండ్రు. తంబెరిబు లెకెండ ఒరెన్ మరిఒరెన్ వన్నిజ్ ప్రేమకిజి మండ్రు. ఒరెన్ మరిఒరెన్ వందిజ్ పాణం నొత్తెజ్. నాను పెరిక ఇజి గర్ద ఆవిండ విజెరె వెట ఉండ్రె మన్ను ఆజి మండ్రు.

9 ఎయెంబా మిజి కీడు కితిజ మరేజి వన్నిజ్ కీడు కిమాట్. దూసిస్తిజ మరేజి దూసిస్మాట్. అహా కివిండ వరిజ్ నెగ్గెకెజ్ రపిద్ ఇజి దేవుణుదిజ్ వెప్పూ. ఎందనిజ్ ఇహిజ మిజి దేవుణు బాణిజ్ నెగ్గెకెజ్ దొహ్కెజె, దేవుణు మిజి దీవిస్సెజె, వన్ని వందిజ్ ఎర్పిసి ఇట్టా మనాన్.

10 అందెజె “నెగ్గి బత్తు బత్తిదెజ్ సుడెజి నాన్, నెగ్గి రోస్సు గడెప్పెజె సుడెజి నాన్ ఎయెంబా సెజ మాటిజ్ వర్పిండ, అబద్దం మాటిజ్ వర్పిండ మండ్రెజ్ వలె.

11 వాండ్రు సెఇకెజ్ డిసి మండ్రెజ్, నెగ్గెకెజ్ కిజి మండ్రెజ్. నమదనమ్ వందిజ్ సుడెజి అక్కాదె దొహ్కెజె ఇజి దన్ని వందిజ్ రెబాదెజ్.

12 ఎందనిజ్ ఇహిజ, దేవుణు ఎర్దు సరి అతికెజ్ కిని వరిజ్ దేవుణు కాప్ కిజి నాన్. వరి పార్దనమకు వెనాన్. గాని సెజ వణిజ్ కిని వరివెట దేవుణు వన్ని మొకొం కోవం దాన్ ఇడ్మాన్”.

13 మీరు నెగ్గి వణిజ్ కిదిజ్ ఇజి నండో ఆన ఆజి మహిజ, ఎయెంబా బాద్ కిపిర్ గదె.

14 గాని దేవుణు ఎర్దు సరి అతికెజ్ కితి వందిజ్ ఉండ్రె వేలా బాద్ వాతిజ్ బా సర్ద ఆదు. వరిజ్ తియెల్ ఆమాట్. వరిజ్ బెద్రిమాట్.

15-16 మీ మన్నుదు క్రీస్తుజ్ మీ ప్రబు ఇజి బసె కిదు. మరి, మీ నమకమ్ వందిజ్ మిజి వెన్ బాని వరిజ్ నెగ్గెండ వెహ్జె ఎస్తివలెబా తయార ఆజి మండ్రు. గాని సార్పిదాన్, దేవుణుదిజ్ తియెల్ దాన్ వెహ్జె. ఎందనిజ్ ఇహిజ మిజి బెద్రిసినికార్ మిజి దూసిసిని వలె మీ మన్ను దేవుణు ఎర్దు నిపాతి మండ్రెజ్. మీరు క్రీస్తు లోకుర్ ఇజి, నెగ్గి గుణమకు కల్పిజి మనికార్ ఇజి సుడెజి వారు సిగు ఆదెజ్.

17 సరి అతికెజ్ కితి వందిజ్ కష్టం బరిస్సెజ్ ఇజి దేవుణు ఇష్టం అతిజ అక్క నెగ్గెకాద్. సెఇకెజ్ కితి వందిజ్ కష్టం బరిసిని మున్ను అక్కాదె నెగ్గెకాద్.

18 ఎందనిజ్ ఇహిజ క్రీస్తుబా ఉండ్రై సుటును పాపముకు లాగ్ దెజ్ సాతాన్. మజి దేవుణుబాన్ తతెజ్ ఇజి దేవుణు ఎర్దు నీతిమనికాన్ ఆతికాన్ దేవుణు ఎర్దు నీతి సిల్లెండ మహి వరి వందిజ్ సాతాన్. వన్ని ఒడోల్ వస్తార్. గాని దేవుణు అత్తు వన్నిజ్ నిక్రాన్.

19 క్రీస్తు అత్తు అయా లోకముదు తోహా ఆతిమని వరి నడిఃమి సాహండ్రై సువార్త సాటిస్తాన్.

20 మీరు నోవవు కాలముదు దేవుణుదిజ్ లోజివిండ మహికార్. నోవవు ఒడః తయార్ కిజిమహివలె దేవుణు విరివందిజ్ ఓరిస్త మహాన్. గాని ఒడః తయార్ ఆతిజ్ నెగొండార్, ఇహిజ ఎనిమిది మణిసిరి పెరి గడ్డదాన్ తప్తై అతార్.

21 యాక బాప్తిసముదిజ్ పోలిత మనాద్. యా బాప్తిసముదానె దేవుణు మిజి రక్కిసినాన్. యా బాప్తిసం ఒడోల్ నుబ్బరం ఆదెజ్ ఆవిద్. గాని ఏలు దేవుణు ఎర్దు పాపం సిల్లెండ మండ్రెజ్ ఒప్పుకోడెఃజినావ్ ఇజి తోరిస్తెజి యా బాప్తిసం. యేసు క్రీస్తు సావుదాన్ నిజిత్తిజ్ మీరు సావుదాన్ తప్తై అతిదెర్ ఇజి తోరిస్తెజి.

22 యేసు క్రీస్తు సావుదాన్ నిజితండ్రై పరలోకముదు ఎక్కి సాహండ్రై, దూతారిజ, అతికారిజ, సత్తు మన్నివరిజ వన్ని అడ్లి ఇట్టాండ్రై, దేవుణు ఉణెర్ పడఃకాద్ బస్తాన్.

4

పేతురు రాస్తి మొదోహి ఉత్తం

1 అందెజి క్రీస్తు, వన్ని ఒడోల్దు కన్వం ఓరిస్తి లెకెండ కన్వం ఓరిస్తిజ్. మీరుబా మన్ను తయార్ కిజి మండ్రు. ఎందనిజ్ ఇహిజ ఒడోల్దు కన్వం ఓరిస్తికాన్ పాపముదు నడిఃవన్.

2 అహిజ ఏలుహాన్ అసి సావుదాక, మాములుక లోకుర్ ఆస ఆని వజి ఆవిద్, దేవుణుదిజ్ ఇన్వం ఆతి లెకెండ బత్తిదెజ్.

3 గడిఃస్తి సాహి కాలముదు దేవుణుదిజ్ నెసికార్ బత్తిని లెకెండ మీరు బత్తిజి మహిదెర్. ఎలాగ ఇహిజ, రంకు బూలాజి, ఒడోల్ వందిజ్ ఆనెజ్ ఆజి, కల్లు ఉణిజి సోసి, సిగు సిల్లెండ డాట్టి కర్గిజి, కల్లు విందుజ్ నడఃపిసి, దెయమ్కాజ్ పూజి కిజి మహిదెర్.

4 ఏలు మీరు వరివెట కూడఃఎండ, వారు కిని వెరి పణిజ్ లోక సాన్ఎండ ఆజినిజ్ వారు బమ్మ ఆజి మిజి దూసినార్.

5 గాని బత్తిని వరిజ్ సాతి వరిజ్ తీర్పు తీరిస్తెజ్ తయార్ ఆజి మని డేవుణుబాన్ వారు బత్తితి బత్తు వందిజ్ ఎందనిజ్ నన్ని నెకెజ్ కిజి బత్తిత్తార్ ఇజి వెస్తెజ్ వలె.

6 అందెజి సాతిసాహి నమ్మత్తి వరిజ్ సువార్త సాటి ఆజి మహాద్. ఎందనిజ్ ఇహిజ యా బత్తుదు మహివలె లోకాజ్ తీర్పు లెకెండ సావు వానాద్. గాని సాతి వెనుక దేవుణు బత్తిజిని లెకెండ బత్తిదెజి.

7 అహిజ విజి దన్నిజ్ ఆక్కి రోస్సు వాజినాద్. అందెజి నెగ్గి బుది కల్లిజి మండ్రు. మన్నుదు అణని ఆజి మండ్రు. నస్తివలె మీరు ప్రార్థనం కిదెజ్ అట్టిదెర్.

8 అక్కదె ఆవిద్. విజి దని మున్ను మని సజతి ఇనిక ఇహిజ, ఒరెన్ మరి ఒరెన్ వన్నిజ్ నెగ్గెండ ప్రేమ కిజి మండ్రు. ఎందనిజ్ ఇ హిజ మహికార్ కితి విజి తప్పుజ్ మాటు ప్రేమదాన్ సెమిస్తెజ్ అట్టాజ్.

9 మొరో ఆవిండ ఒరెన్ మరి ఒరెన్ వన్నిజ్ డగ్గు కిజి సీనికార్ ఆజి మండ్రు.

10 ఒరెన్ మరి ఒరెన్ వన్నిజ్ దేవుణు సీతి వరమదాన్ తోడుః కిజి మండ్రెజ్. దేవుణు సీతి విజి రకముది వరముకు నెగ్గెండ వాడు కొండెజ్.

11 ఎయెన్బా దేవుణు మాట బోదిస్తాన్ ఇహిజ వాండ్రు దేవుణు మాట బోదిస్తెజ్ వలె. ఎయెన్బా మహి వరిజ్ తోడుః కిదెజ్ ఇహిజ దేవుణు సీతి సత్తుదాన్ కిదెజ్ వలె. యేసు క్రీస్తు పేరుదాన్ దేవుణుదిజ్ పొగడుః కల్లిదెజ్ ఇజి యాకెజ్ విజి కిదు. వన్నిజ్ న అంతు సిల్లెండ ఎల్లకాలం గనమని, సత్తు మనీద్. ఆమెన్.

12 నాసు ప్రేమిసిని తంబెరిజాండె, మీ నమకం ఎలాగ్ మష్టికద్ ఇజి రుజాప్ కిదెజ్ సిసు నని పెరి కన్వముకు వానివలె ఇనిక జర్గినాదో ఇజి బమ్మ ఆహాట్.

13 క్రీస్తు మహిమదాన్ యా లోకముదు వానివలె మీరుబా గొప్పు సర్ల ఆజి మండ్రెజ్ ఇజి క్రీస్తు ఓరిస్తి కన్వముక లోక మీరుబా కూడ్లి ఓరిస్తి సర్ల ఆదు.

14 క్రీస్తు వందిజ్ ఎయెన్ బా మిజి దూసలాడిఃతిజ సర్ద అదు. ఎందనిజ్ ఇహిజ గొప్ప పెరికాన్ అతి అత్తు, ఇహిజ దేవుణు అత్తు మీ మున్ను మనాద్.

15 మీ లొజ ఎయెన్ బా ఓరిస్తజ ఇహిజ అక్క ఒరెన్ వన్నిజ్ సప్తి వందిజ్ అవద్. డొజ కితి వందిజ్ అవద్. నెన పణి కితి వందిజ్ అవద్. అజ వరి వెట ఒడెః ఆదెజ్ అవద్.

16 గాని మీ లొజ ఎయెన్ బా క్రీస్తు లొకు అతిదని వందిజ్ ఓరిస్తజ సిగు అమాట్. గాని క్రీస్తు పేరు అస్సిదని వందిజ్ దేవుణుదిజ్ స్తుతి కిదెజ్.

17 ఎందనిజ్ ఇహిజ దేవుణు తీర్పు వన్ని లొకుర్ లొజ మొదొల్నిని కాలం వాత మనాద్. దేవుణుదిజ్ నమ్మిత్తి వరి లొజనె తీర్పు మొదొల్నిజ సువార్దదిజ్ లొజెఱతివరి గతి ఇనిక అనాద్.

18 “దేవుణు ఎద్దు నితి నిజాయితిదాన్ మన్ని వరిజ్ నిస్సా కస్టం వాతిజ దేవుణుదిజ్ నెసిఇకార్ ఎలాకాలం మన్ని సిక్కుదాన్ తప్పె ఆదెజ్ ఒద్దె అట్పెర్తి”,

19 అందెజె దేవుణుదిజ్ ఇస్టం అతి వజ కస్టమ్కు ఓరిస్సికార్ వరి బత్తు, పుట్టిస్తి దేవుణుబాన్ ఒవజెప్తజల్లె. వాండ్రు నమ్మిదెజ్ తగ్గికాన్. వారు నెగ్గి పణిజ్ కిజి బత్తిజి మండ్రెజ్.

5

పెద్దెలుజ వందిజ్ వెహ్నిని మాటెజ్.

1 క్రీస్తు కస్టమ్కు ఓరిస్సిక నాను సుడెఱత. క్రీస్తు ఎసా గొప్ప పెరికాన్ ఇజి తొరిసి గొప్ప జాయ్ దాన్ మరజి వానివలె నానుబా వన్ని జాయ్ దు మంజినాలె. అందెజె, మీ లెకెండ్ ఒరెన్ పెద్దెలి అతి నాను పెద్దెలుజు అతి మిజి దటిసి వెహ్నిన.

2 గొరెజ్ అడినికాన్ గొరెజ నెగ్రెండ్ సూణి వజి మీ అడిగి మన్ని దేవుణు లొకాజ్ నెగ్రెండ్ నడిఱ్పు. బల్మి కిత్తిజ్ అవిద్. పూర్తి మున్నుదాన్ కిదు. దేవుణు ఇస్టమ్దు కూడిఱతి లెకెండ్ సుడెఱదు. ఇనికదొ లాబం వానాద్ ఇజి ఆన అజి సుడెఱమాట్. గాని నెగ్గి మున్నుదాన్ సుడెఱదు.

3 మీ అడ్లి మని లొకాజ్ మున్ను గర్దాన్ ఏలుబడిః కినిక అవిద్. మీ నెగ్గి గుణమ్కు సుడెఱజి వారుబా అయాలెకెండ్ నడిఱిని వజి మండ్రు.

4 అహిజ గొరెజ్ అడిని వరి లొజ పెరి గప్పడుయెన్ అతికాన్ తొరి అనివలె ఎనెజ్ బా పాడాఱజి సాన్ ఇ మెరిసిని టొపి మిజి దొహ్కాద్.

5 అయ వజినె ఇజికిదిదు, మీరుబా పెద్దెలజ్ లొజెజి మండ్రు. ఒరెన్ మరి ఒరెన్ వెట తగిజి మండ్రు. ఎందనిజ్ ఇహిజ “గర్ద అని వరిజ్ దేవుణు ఎద్రిసినాన్. గాని తగి అతి మని వరిజ్ వన్ని దయా దర్మం సిజినాన్”,

6 అందెజె దేవుణు, నరియాతి టయ్ ముదు మిజి పెరికాన్ కిదెజ్ ఇజి వన్ని గొప్ప నత్తుమని అతికారమ్దిజ్ తగి అజి మండ్రు.

7 మీ విసారమ్కు విజి దేవుణు మున్ను పొక్కు. ఎందనిజ్ ఇహిజ దేవుణు మిజి విజి సిదెజ్ సుడెఱజినాన్.

8 మీ మున్నుదు అణానె అజి మండ్రు. నెగ్గి బుద్ధి కల్లిజి తెలిదాన్ మండ్రు. అక్కర్నిని ఉండ్రీ పెరి నొరెన్ లెకెండ్ మిజి విరోదమాతి సయ్తాన్ ఎయెరిజ్ డిఃజ్ దెజి ఇజి రెబాజి బూలాజినాన్.

9 మీ నమకమ్దిజ్ గటిజి అసి సయ్తానుజ్ ఎద్రిసి మండ్రు. విజి లొకమ్దు మని నమ్మిత్తికార్ నిన్ని కస్టమ్కాజ్ బాద అజినార్ ఇజి నెసి మండ్రు.

10 గొప్ప దయా దర్మం మన్ని దేవుణు, క్రీస్తు వెట ఎలాకాలం మంజిని జాయ్ దు మంజిని వందిజ్ మిజి కూక్తాన్. మాటు క్రీస్తు వెట కూడిఱతిజ్ యాక జగ్గిజినాద్. సెగం కాలం మీరు కస్టమ్కు ఓరిస్తి వెనిక దేవుణు మిజి విజి దన్ని లొజ పూర్తి అతికార్ కద్దివండ, సత్తుదాన్ నిల్వ్వాన్.

11 వన్నిజె అంతు సిల్లెండ్ ఎలాకాలం గొప్ప నత్తు మనీద్. అమెన్.

12 దేవుణు గొప్ప ప్రేమ కిజి తొరిస్తి నిజమాతి దయాదర్మమ్దు గటిజి నిల్వి మండ్రు, ఇజి నాను రాసిన. వెహ్నిన. అయ క్రుపాదు గటిజి నిల్వి మండ్రు ఇజి నాను బతిమాల్లిన. యాక నాను బాగ నమకమ్ ఇడ్డి

సిల్వాను దిన్ని వందిజ్ నాను సాసి వెహ్సిన. యాక నాను బాగ నమకం ఇడ్డి సిల్వాను ఇని వన్ని కియుదాన్ రాస్సినిన.

13 మీ లెకెండ్ బబులోను పట్టుమ్దు దేవుణు ఏర్పాటు కిత్తి సజమ్దికార్ మిజి వందనమ్కు వెహ్సినార్. నజి మరిన్ లెకెండ్ మని మార్కు మిజి వందనమ్కు వెహ్సినాన్.

14 క్రీస్తు ప్రేమదాన్ ఒరెన్ మరిఒరెన్ వన్నిజ్ ముదు కిజి వందనమ్కు వెహ్సా. క్రీస్తుబాన్ కూడితి మిజి విజెరిజ్ సమదనం మనీద్.

పేతురు రాస్తి రుండి ఉత్తం

నెల్య కిబిసినిక

యేసుప్రబుజ్ అపొస్తుడు అతి పేతురు యా ఉత్తం రాస్తాన్. పేతురు వన్ని బత్తు అందిదెజ్ డగ్గు ఆతివలె యాక రాస్తాన్ ఇజ బయబిల్ వందిజ్ నెస్తికార్ వెహ్సానార్. క్రీస్తు సకం 68 దు క్రీస్తు లోకాజ్ మాలెజ్ కిత్తి నీరో ఇని రోమ వరి పెరి రాజు పేతురుజ్ సపిస్తాన్ ఇజబా బయబిల్ వందిజ్ నెస్తికార్ వెహ్సానార్. యా ఉత్తమదు ఇనికెజ్ రాస్తాన్ ఇహిజ, అయ కాలమదు సోత్తిమహి తప్పు బోద నెస్సిసిని వరి వందిజ్ జాగర్త మండ్రు ఇజ వెహ్సానార్. యేసుక్రీస్తు మర్జి రెపిన్ ఇజబా వారు వెహ్సాని వందిజ్ జాగర్త మండ్రు ఇజనాన్. దేవుణు కనికారమదాన్, గెణమ్దాన్ నెగ్గెండ పిరిదు ఇజ రాసినాన్.

1 యేసుక్రీస్తుజ్ పణి కినికాన్ అతి, అపొస్తుడు అతి సిమెసు పేతురు రాసిని ఉత్తం. దేవుణు దయా దర్తమదాన్, రక్సిన్సికానాతి యేసు క్రీస్తుజ్ దయా దర్తమదాన్ గొప్పవిలవాతి నమకం మజి దొహ్తాద్. మజి దొహ్కొత్తెకెండ అయ గొప్ప విలువాతి నమ్మకం దొహ్కొత్తి మన్ని వరిజ్ యాక రాసిన్.

2 మిజి దేవుణు దయాదర్తం, నివాతి, నండో వంతుజ్ ఆజి మనీద్. ఎలాగ ఇహిజ దేవుణుదిజ్ నెసిని దన్నితాన్ వాని గెణమ్దాన్, ప్రబువాతి క్రీస్తుజ్ నెసిని దన్నితాన్ వాని గెణమ్దు పిరిదు.

దేవుణు ఎర్లెస్తి లోకుర్ ఇజ రుజుప్ కిదెజ్.

3 దేవుణు వన్ని గొప్ప జాయ్దాన్ నెగ్గి గుణమ్దాన్ మజి వన్ని వందిజ్ ఏర్పాటు కిత్తాన్. దేవుణు వన్ని గొప్ప సత్తుదాన్ మా బత్తుదిజ్ కావల్సెకెజ్ విజు సితాన్. దేవుణుదిజ్ బక్తి మన్ని మన్ను సితాన్. యాకెజ్ విజు దేవుణుదిజ్ నెసిని దన్నితాన్ నె మణి తోహ్కొత్తె.

4 యా గొప్ప జాయ్దాన్ నెగ్గి గుణమ్దాన్ దేవుణు వన్ని ఒద్దె విలువాతి ఒట్టుజ్ సిత మనాన్. ఎందనిజ్ ఇహిజ అయ ఒట్టుజణిజ్ దేవుణు గుణం కల్లిజ మండ్రెజ్ అట్నాట్. యా లోకమదు సెన్ ఆనదాన్ మజి నెఎణ్ కిని విజు వన్నా బాణిజ్ తప్పె ఆదెజ్ అట్నాట్.

5-7 అందెజె మీరు నిని వన్నా వందిజ్ అక్కెజ్ దొహ్కొత్తి లెకెండ కన్బబాడిజి మండ్రు. ఇనికెజ్ ఇహిజ మీ నమకం వెట నెగ్గి గుణమ్కు కూడఃప్పు. నెగ్గి గుణమ్కు వెట గెణం కూడఃప్పు. గెణం వెట మన్ను అణెని ఆజి మంజిని గుణం కూడఃప్పు. దన్ని వెట విజు దనిజ్ ఓరిస్తిజ్ మని బుద్ది కూడఃప్పు. ఓరిసినిదని వెట దేవుణు వందిజ్ బక్తిమని మన్ను కూడఃప్పు. దేవుణు వందిజ్ బక్తి మన్ని మన్ను వెట మహి నమ్మితి వరిజ్ ప్రేమిసిని దన్ని వెట విజేరిజ్ ప్రేమిసిని మన్ను కూడఃప్పు.

8 యా గుణమ్కు మీ బత్తుదు పిరిజి ఒద్దె నిండ్రెజి వాతిజి యేసు క్రీస్తుజ్ పుర్తి నెస్సి దనిజ్ అక్కెజ్ పణి కిన్. బండెజ్ ఆని వరి లెకెండె ఆజెద్దె. పణిదిజ్ రెజ వరి లెకెండె మన్ఇద్దె.

9 యా గుణమ్కు కల్లిజ నిండ్రెజి మనికార్ గుడ్డి వరి లెకెండె, దూరమదు మనికెజ్ తోరెండె ఆన్. ముందాలె కితి పాపమకాణిజ్ నొరె ఆతావ ఇజ పోసినార్.

10 అందెజె నా తంబెరుజాండె, దేవుణు మిజి ఎర్లెసి, వన్ని లోకుర్ ఇజ కూక్కి ఎర్లెస్తాన్. మీరు అక్క ఒదె నెగ్గెండ రుజుప్ కిదెజ్. నిన్ని పణిజ్ కినికిదెజ్ ఇహిజ ఎన్వలెబా జారెజి అరెండె నిల్విదెర్.

11 యా లెకెండె మా ప్రబుని, మజి రక్సిన్సికాన్ అతి యేసుక్రీస్తు ఎల్లకాలం మంజిని రాజెమదు మజి గొప్ప మర్యాద సీజ కూడఃప్పి వలె, మజి సీని అవకాసం తక్కు ఆవద్.

ప్రవక్తరు దేవుణు మాటెజ్ వెహ్సార్.

12 అహిజ, విలు మీరు అన్సిమని దేవుణు వందిజ్ నిజమాతి యా సజతిజ్ మీరు బాగ నెసి కద్దిండె నిల్వి నిదెర్ గాని, మిజి నాను యా సజతిజ్ వందిజ్ ఎన్వివలెబ ఎత్తు కిబిస్తిజ్ తయారె ఆజి మంజిన్.

13 నాను సాని దాక యా సజతిజ్ వందిజ్ మిజి మరి మరి ఎత్తు కిబిస్తిజ్ నా బాజిత ఇజ నాను ఒడఃబిజిన్.

14 ఎందనిజ్ ఇహిజ, మా ప్రబు ఆతి యేసుక్రీస్తు నజీ వెహ్తి లకెండ నాను యా బత్సు బెగినె డిసిని సొండ్రెజ్ వలె ఇజి నెన్ను.

15 మరి నాను సాతి సొహి వెనుక మీరు ఎస్తివలెబా యా నజటిజ్ ఎత్తుకిజి మంజిని వందిజ్ నాను నండొ పణికిని.

16 ఎలాగ ఇహిజ, మా ప్రబువతి యేసు క్రీస్తుజ్ మని గొప్పు సత్తు వందిజ్, వాండ్రు మర్జి వాని వందిజ్ మిజి నెస్తిస్తి వలె, అక్క ఉండ్రీ కత సాన్తరం వలె అక్క ఉండ్రీ కత సాన్తరం వెహ్తి లకెండ ఆవిద్. గాని వాండ్రు ఎస్సా గొప్పు పెరికాన్ ఇజి మాపు కణకాణిజ్ సుడెతామ, అక్కాదె మిజి వెహ్త్వ.

17 ఎలాగ ఇహిజ, గొప్పు మెరిస్తి జాయ్ కల్లితి మహిమ నిండ్రీతి మహి బాణిజ్ ఉండ్రీ జాటు వాతాద్. ఇనిక ఇహిజ, “వీండ్రు నాను నా నండొ ప్రేమిసిని మరిన్. విన్ని ముస్సు, నాను సర్ద ఆజిన. అయా మాటెజ్ బుబ్బాతి దేవుణు బాణిజ్ వాతివలె మరిని ఆతి యేసుజ్ గొప్పు పేరు, మహిమ కల్లితాద్.

18 మాపు వన్ని వెట అయా పరిసుదం ఆతి గొరోజ్ ముస్సు మహివలె ఆగానమదాన్ వాతి యా జాటు మాపె విహాన్.

19 మరి, ఒద్ది నిజమాతి మాటెజ్, ఇహిజ ప్రవక్తరు వెహ్తి మాటెజ్ మజి మన్నె. అక్కెజ్ మీరు జాగర్త విండ్రెజ్. ఉండ్రీ కస్తిమని దీవ జాయిదాన్ సీకటిదు మనికెజ్ సుడెదెజ్ అట్టూట్. అయాలకండెనె ప్రవక్తరు వెహ్తి మాటెజ్ జాయ్ వానిదాక మీ గర్భమదు ఇడెదు. కోడిజామ్దు తోరి అని జాయ్ అని సుక్క మీ గర్భమదు సోనాద్.

20 విజి వన్యాజ్ ఇంక ముకెలం మీరు నెస్తిక ఇనిక ఇహిజ, ప్రవక్తరు రాస్తి మని మాటదు ఉండ్రీ మాటబా పరి సొంత ఆలోననమదాన్ వెహ్తి లకెండ వెహ్ఎతార్.

21 దేవుణు మాటెజ్ లోకు వన్నిజ్ ఇస్టం ఆతి వజి వెహ్తికెజ్ ఆఉ. గాని దేవుణు ఆత్మ సత్తుదానె దేవుణు మాటెజ్ లోకుర్ వెహ్త్.

2

తప్పు బోద నెస్తిసిని వరిజ్ వాని నానం.

1 గాని అయ కాలమదు లోకు నడిమి తప్పు బోద నెస్తిసినికారబా మహార్. అయ వజినె మీ నడిమి తప్పు బోద నెస్తిసినికార వానార్. వారు ఇనిక కినార్ ఇహిజ వన్ని సొంత పాణం సీజి కొటి ప్రబుజ్ నెక్త పొక్కార్ గొప్పు నానమదు ఒని ఆఇ బోదెజ్ డాప్పి నెస్తిసినికార. అయావజినె వరిజ్ వారి వెటనె వాని నానం తపె ఆజినార్.

2 నండొండార్ వీరు నెస్తితి సిగు అని పణిజ్ వెంజి ఆమె నడినారలె. వరి సెన పణిజ్ సుడెజి క్రీస్తుజ్ని వాండ్రు నెస్తిస్తి నిజమతి దన్ని వందిజ్ లోకుర్ దూసిస్సార్లె.

3 యా తప్పు బోద వెహ్తికార్ డబ్బుదిజ్ గొప్పు అన ఆజి నిజం ఆఇ మాటెజాణిజ్ మిజి మొసెం కినార్. వరిజ్ ముందాలన్ తీర్పు సీదెజ్ తయార్ అత మనాద్. వరిజ్ నానం తపెవిండ వానాద్.

4 ఎలాగ ఇహిజ, పాపం కితి దూతారిజ్ డిసెంండ తీర్పు వాని దాక ఇడెదెజ్ దేవుణు వరిజ్ ఎలాకాలం సిను మంజిని బాడిదు పొక్తాన్. సీకటి మని సాలం లొఇ తోహిస్త ఇట్టాన్.

5 మరి, పూర్బకాలమదు పాపం కిజి మహి లోకాజి సిక్త దాన్ తప్తినెంండ, దేవుణు వరి ముస్సు పెరి గడ్డ తపిస్తాన్. గాని నీతినిజాయితి వందిజ్ వెహ్తి మహి నోహాహుజ్ని, వన్ని వెట మహి ఏడుగురుదిజ్ గడ్డదాన్ తపిస్తాన్.

6 మరి సాదొమ, గొమొర్త ఇని పట్టుమకాన్ మహికార్ పాపం కిజి మహిజ్ దేవుణు వరిజ్ తీర్పు సితండ్రె సిసుదాన్ అయ పట్టుమకాజ్ సుహ్లాన్ దేవుణుదిజ్ ఇస్టం ఆఇ లకెండ నెఇ పణి కిని వరిజ్ వాండ్రు ఇనిక కినాన్ ఇజి ఉండ్రీ గుర్తు లకెండ వరిజ్ ఇడ్డాన్.

7 నీతినిజాయితిదాన్ పణి కితి లోతు వన్ని సురుల జర్గిజి మహి గొప్పు సిగ్గు ఆతి పాపం పణిజ్ సుడెజి గొప్పు బాద ఆజి మహిజ్ దేవుణు వన్నిజ్ గెల్పిస్తాన్.

8 ఎందనిజ్ ఇహిజ అయ నీతి మనికాన్ వరి గొప్పు నెఇ పణిజ్ సుడెజి అక్కెజ్ వెంజి రోజు వన్ని నెగ్గి మన్నుదాన్ గొప్పు బాద ఆజి మహాన్.

9 దేవుణు మున్ను బక్తి మన్ని వరిజ్ వాని పరిసెజాణిజ్, వరిజ్ గెల్పిస్తెజ్ దేవుణు నెనినాన్. దేవుణు ఎర్దు నీతి నీజాయితి సిలెండ నడిసి వరిజ్ సిక్కు నీజి తీర్పు దినమ్దాక ఇడ్డెజ్బా నెనినాన్.

10 సెఇ ఆలోసనమ్దాన్ పుట్టి ఒడొల్ వందిజ్ మన్ని సెఇ ఆసెజ్ వందిజ్ బత్తిజ్ దేవుణు అతికారమ్దిజ్ లోజిఎండ దన్నిజ్ నెక్కిపొక్కి వరిజ్ సిక్కు నీడిజ్ దేవుణు ఇడ్డ మనాన్. యా తప్పు బోద నెస్సినినికార్ గొప్పు గర్త ఆజి ఇనిక కిడిజ్బా తయార్ ఆనికార్. వరి సొంత ఇస్టమ్దాన్ విజు కినార్. గొప్పు బమ్మ అతి వనక వందిజ్ సెఇకెజ్ వెహ్జెజ్బా తియెల్ ఆఇకార్ వీరు.

11 దేవుణు దూతార్ గొప్పు సత్తు మనికారి ఇహిజ్బా దేవుణు ముందాల్ వినక వందిజ్ వరిజ్ దూసినెర్.

12 గాని యా తప్పు బోద నెస్సినినికార్, వారు నెనెఇ వన్నా వందిజ్బా దూసలాడ్వార్. వారు బుద్ది కిడిజ్ ఆటెఇ మూర్కతం మన్ని జంతుజ్ లెకెండె ఆలోసనం కిడిజ్ ఆటెవర్. వేట కినికార్ వనకాజ్ ఆసి సమ్మి లెకెండె వీరుబా ముర్కతం మన్ని అడవి జంతుజ్ లెకెండె పాడాన సొనార్.

13 వారు కిజిని నాసనమ్దిజ్ వరిజ్ మరజి నాసనం వాజినాద్. ఒడొల్ ఆస వందిజ్ సిగు ఆని ఇని పణిబా కిడిజ్ సర్త ఆజి వేడెకానె అయా సెఇ ఆసెజ్ సొస్సినినార్. మీరు కిజిని ప్రేమ విందుజు లోఇ వారుబా కూడ్డి మజినార్. వారు మన్ను రుజ్ని లెకెండె ఉణిజి తింజ ఒడొల్దిజ్ నుకం కిబినినార్. తెలాని పాతాదు మని మస సిగు తపిస్సి లెకెండె వీరుబా సిగు తపిసినార్.

14 బోదెకాజ్ నుడెజి వనక వెట పాపం కిడిజ్ ఇజి ఆస ఆజి మంజినార్. పాపం కిడిజ్ మని ఆస ఎసెజ్బా డెస్ఎర్. ఇతాల్ అతాల్ మన్ను మన్ని వరిజ్ వారు ఆసెజ్ తోరిసి ఆఇసరి నడిసిసినార్. వరి వందిజ్ లాపం తప్పె అడిజ్ నుడెజి మంజినార్. దేవుణు వరిజ్ సిక్కు నీనాన్.

15 వారు సరిఅతి బత్తు బత్తిఎండ, బెయ్యిరి ఇని వన్ని పొటెకాన్ బిలాము ఇని వన్ని లెకెండె ఆత మనార్. ఎలాగ ఇహిజ్ తప్పు కిత్తి వందిజ్ దోహ్కొక్కి డబ్బు వందిజ్ ఆజి బిలాము సరి తప్ప సొహన్.

16 గాని అయ బిలాము కితి సెఇ పణిదిజ్ వాని గాడెది అడ్డు కితాద్. మాటెజ్ నెని అయ గాడెది లోకు లెకెండె వర్ణిజి బిలాము ఇని ప్రవక్త ఒడిబితి వెరి పణిదిజ్ అడ్డు కితాద్.

17 నిని బోద కినికార్ ఏరు నీలి ఊట లెకెండె, సుర గాలి ఎగ్గిసి ఒని మొసాప్ లెకెండె విరి వందిజ్ గొప్పు నీకటి మని బాడ్డి దేవుణు తయార్ కిత మనాన్.

18 ఎందనిజ్ ఇహిజ్ యా తప్పు బోద నెస్సినినికార్ పణిదిజ్ రెఇ బడాయ్ మాటెజ్ వర్ణిజి అయ మాటెజాణిజ్ వరి ఒడొల్ ఆసెజ్ సొస్సిస్తెజ్ నుడెజినార్. తప్ప సరి నడిసి వరి లోఇహాన్ ఏలి తప్పె అతి లోకాజ్, వీరు మరి తప్పు సరి నడిసిసినార్.

19 ఇని దని అడ్డిబా మనెండ పూర్తి విడుదల మన్నిబాన్ ఒనాప్ ఇజి వీరు వెహ్పి మంజినార్. గాని వీరి నాసనం తపిసిని పావమ్దిజ్ తోహె అత మనార్. ఎందనిజ్ ఇహిజ్ ఒరెన్ ఇని దనిజ్ గెల్పిస్తెజ్ అటెఎండ మంజినాండ్రె, దనిజె వెటిపణి మణిని వజ అడిగి మంజినాన్.

20 మా ప్రబుని, రక్కిస్సుకాన్ అతి యేసు క్రీస్తుజ్ బాగ నెస్తి వెనుక, యా లోకమ్ది సెఇ వన్నాణిజ్ తప్పె అతి వెనుక, మరి అర్దిజ్ అకెజ్ వన్నిజ్ అడిగి ఇట్టిజు వారు ముందాల అతిమహి దన్నిజ్ ఇంక ఒడ్డె సెఇకార్ ఆనార్.

21 దేవుణు బాణిజ్ వాతి అడ్డ వరిజ్ ఒపజెపె అతి వెనుక అక్కు తప్పి సొహార్. ఆహె తప్పిసొని దన్నిజ్ ఇంక అయ నీతి నిజాయితి మన్ని సరి వందిజ్ నెన్ఎండ మంజినిక ఇహిజాని వరిజ్ నెగెత మహద్ మరి

22 “నుకుడి అది కక్కిక మరి మరజి తింజినాద్”, “ఏరుదాన్ నొరె అతి పండ్రి మరి బుర్దదు నూడ్బాదెజ్ సొస్సినినార్”, ఇజ వెహ్పి మని మాటెజ్ తప్పె సరిదు మహ్పి సొహి విరి వందిజ్ నిజం ఆజినాద్.

3

ప్రబు మరజి వాని దినం.

1 నాను ప్రేమిసినికెదిరా, తోలిత ఉండ్రె ఉత్రం రాస్త. మీరు ముందల్ నెస్తిమన్ని వనకాజ్ ఎత్తు కిబిస్తెజ్ ఏలు నాను మిజి మరి ఉత్రం రాసిస. కల్లినిల్లి మీ మన్నుదిజ్ ఉసార్ కిబిస్తెజ్ ఇజి యా రుండి ఉత్రమ్కు రాసిస.

2 దేవుణు ప్రవక్తలు పూర్వకాలమును వెళ్ళి మాటజే, మరి మా ప్రబుని రక్షిన్నికానాతి యేసుక్రీస్తు మీ అపొస్తుడుర్ సొత్తి ఆడ్రెజ్ మిజి ఎత్తు కిబిన్జెజ్ ఇజి నాను ఆస ఆజిన.

3 ముకెలమాతి ఉండ్రీ నజతి మీరు అర్థం కిజి మండ్రు. ఇనిక ఇహిజ, కడెవెరి రోస్కాజ్ నెగొండార్ వెక్సికార్ వానార్. వారు వరి ఒడెళ్ళి నెజ ఆనెజ్ సొన్నిసి మంజినార్. వారు మిజి లివాల్ కినార్.

4 వారు ఇనిక వెప్నార్ ఇహిజ, “వాండ్రు వానన్ ఇజి ఒట్టు కితిత్తాన్ గదె. ఎనెజ్ వానన్ లె? మా అనిగొగొర్ సాత సాహార్. గాని ఏలుదాక వాండ్రు వాదెజ్ సిల్లె. యా లోకం పుట్టిబాణిజ్ అసి విజు యా లెకెండ మనాద్, ఇని తేడ సిల్లెద్”, ఇజి వెప్నార్.

5 గాని పూర్వకాలమును దేవుణు వన్ని మాటదాన్ ఆగాసమదిజ్ బూమిదిజ్ తయార్ కిత్తాన్. యా బూమి ఏరుబాణిజ్ తయార్ ఆతాద్. ఏరు వెట తయార్ ఆతాద్ ఇజి నెస్సిమహికెజ్ వారు పొస్టెజి ఇజి సుడెజినార్.

6 వన్ని మాటదాన్ నె పెరిగడ్డ వాజి అయ ఏరుదాన్ అయావలె మహి లోకం విజు ముడుఃగితాదె పాడాతా సాహాద్.

7 దేవుణు అయా మాటదానె ఏలు మని ఆగాసమదిజ్ బూమిదిజ్ సినుదాన్ నాననం కిదెజ్ తీర్పు కిని రోజిదాక ఇట్టా మనాన్. దేవుణు వందిజ్ బక్తిసిల్లి లోకుర్ అయావలె పాడాజి సానార్.

8 నాను ప్రేమిసిని తంబెరుజాండె, దిని వందిజ్ పోస్కాట్. ప్రబు ఎద్దు ఉండ్రీ రోజు వెయి వంటిజ్ లెకెండ మనాద్. వెయి వంటిజ్ ఉండ్రీ రోజు లెకెండ మన్నె.

9 ప్రబు ఒట్టు కితి లెకెండ మంజి వాదెజ్ అలన్యం ఆజినాద్ ఇజి నెగొండార్ ఒడెజిజినార్. గాని ఎయెర్ బా పాడాజి సాన్ ఎండ, విజెరె పావమకు డిసి మన్ను మారిస్టెజ్ ఇజి మీ వందిజ్ ఓరిస్ట మనాన్.

10 గాని ప్రబు మరజి వాని దినం తవ్వెండ వానాద్. ఒరెన్ డోజారి ఎస్తివలె వానండ్రో ఇజి నెన్ ఏండ వాని లెకెండ వానాద్. నస్తివలె ఆగాసమదు దీడిజిని వలె సిల్లెండ ఆనె. ఆగాసమదు మని విజు, సినుదాన్ వేనె సానె. బూమి మున్ను, మనికెజ్ విజు వేనె సానె.

11 విజు యా లెకెండ పాడానె సానె. అందెజి మీరు దేవుణు వందిజ్ కేట ఆతి లోకుర్ ఆజి దేవుణు వందిజ్ బక్తిమన్ని లోకుర్ ఆజి బత్తిదు.

12 దేవుణు వాని రోజు వాదెజ్ ఇజి మీరు ఎద్దు సుడెజినెదెర్. అయా దినం బేగినె వాదెజ్ ఇజి మీరు గటిజి వణి కిదు. అయ దినమదు ఆగాసమకు దని లోజ మనికెజ్ విజు సినుదాన్ వేనె సానె. అయ సిను వేడిదిజ్ విజు కరెజిజి సానె.

13 గాని దేవుణు ఒట్టు కితి నని కొత్త ఆగాసమదిజ్, కొత్త బూమిదిజ్ మాటు ఎద్దు సుడెజినాట్. బానె విజు సీతి నజాయితి పూర్తి మంజినాద్ లె.

14 అందెజి నాను ప్రేమిసినికిదెరా, మీరు ఇని తపు సిల్లెండ, ఇని పావమబా సిల్లెండ దేవుణు ఎద్దు నండ్రో కన్టబాడిజి మండ్రు. దేవుణు వెట నిపాతిదాన్ మండ్రు. ఎందనిజ్ దేవుణు ఒట్టు కితి మన్ని దన్నిజ్ మీరు ఏద్దు సుడెజినెదెర్.

15 యాక నెస్సు. దేవుణు మా వందిజ్ ఎందనిజ్ ఓరిస్ట మనాన్. ఇహిజ మాటు పాపం డిసిని మన్ను మారిస్టెజి ఇజి. మాటు ప్రేమిసిని అన్ను పవులుబా దేవుణు సీతి గెణమ్దాన్ వినుక వందిజ్ రాస్ట మనాన్.

16 పవులు రాస్టి విజు ఉతరమక లోజ యా లెకెండనె రాస్ట మనాన్. వన్నా లోజ నెగం అర్థం కిదెజ్ కన్టం ఆతికెజ్. వనక వందిజ్ నెన్ ఇకార్, దేవుణు మున్ను, మన్ని నమకమదు ఇత్తాల్ ఆత్తాల్ దుజ్ కికార్ అయ మాటిజి అర్థం మారిసినార్. మహి దేవుణు మాటిజి లోజ మన్ని నెగమకుబా మారిసినార్. దిన్ని వందిజ్ వారు నాననం ఆస సానార్.

17 నాను ప్రేమిసినికిదెరా, మీరు యా నజతిజ్ ముజాలె నెస్తి మనిదెర్. అందెజి జాగర్ మండ్రు. దేవుణు రూలుజి లోజికార్ వెప్సిని తపు బోడెజాణిజ్ మొనెం కిబె ఆమాట్. ఎందనిజ్ ఇహిజి వరి బోదెజ్ మీ స్తిరం ఆతి మన్నిజి కద్దిస్నాద్.

18 గాని మీరు మా ప్రబు రక్షిన్నికాన్ ఆతి యేసు క్రీస్తు సొత్తి వన్ని దయా దర్జమ్దాన్, గెణమ్దాన్ నెగ్రెండ పిరిజి మండ్రు. వన్నిజ్ ఏలుని, మరి ఎల్లకాలం గవరం కల్లిపిద్. ఆమెన్.

యోహాను రాస్త్రీ మొదోహి ఉత్రం

నెల్ల కిబిసినిక

యేసు క్రీస్తు అపొస్తుడు ఆతి యోహాను యా ఉత్రం రాస్త్రాన్. వాండ్రు యా ఉత్రం యేసుప్రబుజ్ నమ్మితి వరిజ్ రాస్త్రాన్. యేసుప్రబు సాజి నిజితి వెనుక అరువయ్ పంటిజ్ డాట్టాద్. యోహాను డొక్ర ఆత మహాన్. మహి సిసూర్ విజేర సాత సాహర్. అయావల బానె మహి సంగమ్కాజ్ యోహాను నడిపిసిని వన్ని లెకెండ మహాన్.

బత్తు ఆతి మాట

1 దేవుణు మాట ఆతి వన్ని వందిజ్, నాను మిజి రాసిన్. వాండ్రు దేవుణు వెట అతు సిల్లి బత్తుకు సినికాన్. వాండ్రు యా లోకం పుట్వెండ ముజాల్ మహాన్. గాని వాండ్రు యా లోకమ్దు వాతిజ్ మాపు వన్నిజ్ వెహావ్. మాపు వన్నిజ్ సుడతావ్. మాపు వన్నిజ్ బెస్తామహావ్. మా కికాణిజ్ వన్నిజ్ ముట్టమహావ్. అయాక మిజి నెన్పిసినావ్.

2 బత్తు సీని వినిజ్ దేవుణు మా నడిమి పోకాన్. మాపు వన్నిజ్ సుడతావ్. మాపు సుడతిజ్ వన్నివందిజ్ మిజి నిజం వెప్పినావ్. బత్తు సీని వాండ్రు ఎల్లకాలం మంజి బత్తు ఇజి మిజి నెస్సిస్వావ్. వాండ్రు ముందాహాన్ అసి బుబ ఆతి దేవుణుబాన్ మహాన్. ఏలు వన్నిజ్ దేవుణు మజి తోరిస్తాన్.

3 మాపు సుడతిజ్ వన్ని వందిజ్, వెహివన్ని వందిజ్ మిజిబా వెప్పినావ్. ఎందనిజ్ ఇహిజ మిరు వన్నిజ్ నమ్మిడెజ్. ఆహె మా బాన్ కూడ్డి మండ్రెజ్ ఇజి. మాపు బుబ్బి ఆతి దేవుణు వెట, మరిన్ ఆతి యేసు క్రీస్తు వెట కూడిత మనావ్.

4 మీరుబా ఆహె కూడితిజ మా సర్ద పూర్తి ఆనాద్లె. అందెజ మాపు ఇకెజ్ రాసినావ్.

జాయ్దు నడినిక

5 అహిజ యేసు క్రీస్తు మజి వెప్తి మాటెజ ఏలు మిజి వెప్పినావ్. యాకదె మాట. అక ఇనిక ఇహిజ దేవుణు జాయి లెకెండ మనాన్. పూర్తి నెగ్గికాన్. వన్ని లో సికాటి అన్లె సిల్లెద్. ఇని కల్తతిబ సిల్లెద్.

6 అందెజ మాటు దేవుణు వెట కూడిత మనాట్ ఇజ వెప్పి మా లొఇ సీకాటి మని లెకెండ బత్తితిజ మాటు అబద్ధం వర్గిజనికాట్. దేవుణు నెన్పిన్సి నిజమాతి సరిదు నడినికాట్ అవెట్.

7 గాని దేవుణు విజు దన్ని లొఇ జాయ్ తోరిసిని లెకెండ మాటు విజు పణిజ లొఇ జాయ్ తోరిన్సిజ, మాటు నమ్మితి వరి వెట కూడ్డి మంజినాట్. మరి దేవుణు మరిసి ఆతి యేసుప్రబు నల్ల, మాటు కిజిని విజు పాపమ్కాణిజ్ మజి సుబరం కిజినాద్.

8 మాటు ఇని తప్పబా కినికాట్ అవెట్ ఇజ వెప్తిజ మజి మాటె మోసం కెబె ఆజినాట్. ఎందనిజ్ ఇహిజ దేవుణు నెన్పిన్సి వన్ని నిజమాతి మాట వజ మాటు కిడెజ్ సిల్లె.

9 గాని మాటు తప్ప కితాట్ ఇజి దేవుణుబాన్ ఒప్పుకోటిజ దేవుణు మా లొఇ మని నెఇకెజ్ విజు లాగ్గి పొక్కాండ్రె సుబరం కిసాన్. ఎందనిజ్ ఇహిజ సెమిన్ను ఇజి దేవుణు మాట వెప్తి మనాన్. వాండ్రు నమ్మిడెజ్ తగ్గికాన్. నాయం మనికాన్. వెప్తి వజ కినికాన్.

10 మాటు తప్ప కికాట్ ఇజి వెప్తిజ దేవుణు అబద్ధం వెప్పికాన్ ఇజి మాటు వెప్పినాట్. మాటు ఆహె వెప్తిజ దేవుణు వెప్తి మాట అన్నికాట్ అవెట్. ఎందనిజ్ ఇహిజ విజిరె లోకుర్ పాపం కిత్తార్ ఇజి దేవుణు వెప్తి మనాన్గదె.

2

1 నజి కొడొరె లెకెండ మీరు, అందెజ మిజి రాసిన్. మీరు పాపం కిడెజ్ అవద్ ఇజి యా సజతిజ్ మిజి రాసిన్. గాని ఎయెన్బా పాపం కిత్తాన్ ఇహిజ దేవుణు ఆతి దేవుణుబాన్ మా వందిజ్ వెప్పికాన్ ఒరిన్ ఒపిసినికాన్ మనాన్. విరి పాపమ్కు సెమిన్అ ఇజి వాండ్రు వెహాన్. వాండ్రు నీతి నిజాతి మనికాన్ ఆతి యేసు క్రీస్తునె.

2 వాండ్రు మా పాపముకు సొంపిస్తాడే పూజ అతికాన్. వాండ్రు పూజ అతికే దేవుణు మా పాపముకు సెమిస్తాడే అట్లనాన్. మా పాపముకాడే వందికే ఉండ్రె ఆవిద్. యా లోకముదు విజెరి పాపముక వందికే పూజ అతికాన్.

3 మాటు దేవుణుకే నెస్తికాట్ ఇజ మజీ ఎలాగ తెలిజనాద్. దేవుణు మజీ సీతి ఆడ్రెజ లోజీతిజనె తెలినాద్.

4 నాను దేవుణుదికే నెస్టు ఇజి వెప్పి, దేవుణు సీతి ఆడ్రెజ లోజీకాన్ అబదం వెప్పికాన్. దేవుణు నెన్పిస్సి నిజం అతి మాటెజి వాండ్రు లోజీఎన్.

5-6 దేవుణు వెప్పి మాటదికే ఎయెన్బా లోజీతిజి, దేవుణు మున్ను వన్నికే పూర్తి ప్రేమ మనాద్ ఇజి తోరిస్తాన్. దేవుణు వెట కాల తోహుమన ఇజి వెప్పికాన్, యెను ప్రబు నడితి లెకెండ్ దేవుణుదికే లోజీజి నడివికే. అహ దేవుణు వెట కూడేజి మంజినాట్ ఇజి మాటు నెస్తాట్.

7 నాను ప్రేమిసినికిదెరా, నాను ఉండ్రె కొత్త ఆడ్ర మిజీ రాన్. గాని ముజాల నెన్పిస్సి ఉండ్రె పడాయ్ ఆడ్రన్ రాసిన్. అయా ఆడ్ర మీరు క్రీస్తు లోకు అతి బాణిజ్ అసి నెస్తికదె. అయ ఆడ్ర మీరు వెహిమని దేవుణు మాటనె.

8 గాని నాను ఏలు రాసిని మాట కొత్త ఆడ్రనె. ఎలాగ ఇహిజ యెనుప్రబు వన్ని బత్తుదు యా ఆడ్ర తోరిస్తాన్. మీ బత్తుదుబా మీరు తోరిస్సిదెర్. ఎందనికే ఇహిజ మీ లోజి సీకటి లెకెండ్ మని పాపం ఏలు సొస్సినాద్. జాయ్ లెకెండ్ మని నిజమాతికెజి మీ లోజి వాజనె.

9 జాయ్దు నడిజిన ఇజి వెప్పి ఒరెన్, క్రీస్తుకే నమ్మిత్తి వన్నికే దూసిస్సికాన్ ఇహిజ వాండ్రు ఏలుబ సీకటిదునె నడిజినాన్.

10 మరి ఒరెన్ క్రీస్తుకే నమ్మిత్తి వన్నికే ప్రేమిస్సికాన్ ఇహిజ వాండ్రు జాయ్దు నడిజినాన్. వన్ని బత్తుదు పాపం కిబిస్సిక ఇనికబ సిల్లెద్.

11 మహిపరికే పగ అతికాన్ సీకటిదు మంజి సీకటిదు నడిజినాన్. ఎంబె సొన్సినాండ్రో ఇజి వాండ్రు నెన్. ఎందనికే ఇహిజ సీకటిదు వన్నికే గుడ్డి వన్ని లెకెండ్ కితాద్.

12 నాను ప్రేమిసిని బయిరాండె, క్రీస్తు మీ వందికే సాతికే దేవుణు మీ పాపముకు సెమిస్తాన్. అందెజె నాను యాకెకే మిజీ రాసిన్.

13 బుబ్బరాండె, దేవుణు ఇనికబా పుటీన్ఎండ ముజాల మహి యెనుక్రీస్తుకే మీరు నెస్సిదెర్. అందెజె నాను మిజీ రాసిన్. దక్షిణరాండె, మీరు నెజ బుద్ధి కల్గితి సయతానుకే గెల్సిదెర్. అందెజె నాను మిజీ రాసిన్. నాను ప్రేమిసిని బయిరాండె, బుబ్బ అతి దేవుణుదికే మీరు నెస్సిమనిదెర్. అందెజె నాను మిజీ రాసిన్.

14 అందెజె నాను మిజీ రాసిన్. దక్షిణరాండె, దేవుణు మాట మీ లోజి మనికే మీరు సత్తుమనికిదెర్ ఇజి తోరిస్సిదెర్. మీరు సయతనుకే గెల్సి మనిదెర్ అందెజె మిజీ రాసిన్.

లోకముదు మని వనకాడే ప్రేమ కిమాట్

15 యా లోకముదు మని వనక మున్ను మన్ను ఇడ్కాట్. యా లోకముది బత్తుదికే ప్రేమిన్మాట్. ఎందనికే ఇహిజ యా లోకముదికే ప్రేమిస్సి వన్నికే దేవుణు మున్ను ప్రేమ సిల్లెద్.

16 ఎందనికే ఇహిజ, యా లోకముదికే విజి దేవుణు బాణిజ్ వానికెకే ఆడ. అక్కడ ఇనికెకే ఇహిజ ఇనికెకే కిదెకే ఇజి ఆస అనాదొ, అక్కడ విజి కిదెకే ఇజి ఒడేబినిక, మరి, కణకెజిణిజ్ సుడేజినికెకే విజి కావాలి ఇజి ఆస అనిక, మరి, అస్తి కల్గితిమని వందికే గర్త అనిక, నినికెకే యా లోకముదికే ప్రేమ కినివలి వాని.

17 యా లోకముది లోకర్ అస అనికెకే విజి సిల్లెండ అనెలె. గాని దేవుణుకే ఇన్టం అతివజ నడినికాన్ ఎలా కాలం బత్కినాన్లె.

క్రీస్తుకే ఎద్రిస్సికార్ వానార్

18 నాను ప్రేమిసిని బయిరాండె, లోకం అందిని కడివేరి దినముకు అజినె. కడివేరి దినముకాడే క్రీస్తుకే ఎద్రిస్సికార్ వానాన్ ఇజి మీరు నెస్సిదెర్ గదె. అహిజ ఏలు క్రీస్తుకే ఎద్రిస్సికార్ నండొండొ సోత మనార్. అందెజె కడివేరి దినముకు అతి ఇజి మాటు నెస్తాట్.

19 వారు మా బాన్కూడిత మహార. గాని డిస్స సాహార. ఎలాగ ఇహిజ వారు మా లోకాజ్ సెందితికార ఆవర. వారు మా బాన్ మంజనికార ఇహిజ మా వెటనె కూడిజి పాడ్డి మహారమరి. గాని మజి డిస్స సాహారె, మజి సెందితికార ఆవర ఇజ వారు తోరిస్సార.

20 గాని క్రీస్తు పోక్తి దేవుణు ఆత్మ మిజి మనాన్. అందెజి మీరు విజిదెరి నిజమాతికెజ్ నెసినిదెర్.

21 మీరు నిజం నెన్ఇదెర్ ఇజ నాను యాక రాస్సిక ఆవెద్. నిజమాతికెజ్ మీరు నెసినిదెర్. అందెజి నాను రాసిన. నిజమాతి దని లోఇ అబద్దం ఆతి బోదే సిల్లెద్ ఇజ మీరు నెస్సిదెర్. అందెజి నాను రాసిన.

22 యేసు, దేవుణు పోక్తి క్రీస్తు ఆవెన్ ఇజ వెహ్నికాండ్రె అబద్దం వెహ్నికాన్. ఆహు వెహ్నికాన్ క్రీస్తుజ్ ఎద్రిసినికాజ్. వాండ్రు బుబ్బు ఆతి దేవుణుదిజ్, మరిసి ఆతి క్రీస్తుజ్ నెక్కి పోక్సినికాన్.

23 దేవుణు మరిసి ఆతి యేసుక్రీస్తుజ్ నెక్కిపోక్సినికాన్ ఎయెన్బా బుబ్బు ఆతి దేవుణుదిజ్బ నెక్కిపోక్సినికాన్. మరిసి ఆతి యేసుక్రీస్తుజ్ డగ్రు కినికాన్ బుబ్బు ఆతి దేవుణుజిబా డగ్రు కిజినాన్.

24 యేసు క్రీస్తుజ్ నమ్మితి బాణిజి అసి మీరు వెహి మనికెజ్ విజి మీ మన్యుదు నెగ్రెండ అసి మండ్రెజ్. ఆహె నెగ్రెండ మీ మన్యుదు మహిజ, మీరుబా మరిసి ఆతి యేసు క్రీస్తుబాన్, బుబ్బు ఆతి దేవుణుబాన్ కూడజి మంజనిదెర్.

25 మాటు ఆహె వన్నిబాన్ కూడతి మహిజ, మజి సిన ఇజి యేసు ఒట్టు కితి ఎలా కాలం బత్తిని బత్తు, మజి దోహెక్కాద్.

26 మిజి మోసెం కిదెజ్ నూణి వరి వందిజ్ ఇకెజ్ నాను రాసిన.

27 క్రీస్తు పోక్తి దేవుణు ఆత్మ మి లోఇ మనాద్. అందెజి మరి ఎయెన్బా మిజి నేరిపిస్తెజ్ అవనరం సిల్లెద్. ఎందనిజ్ ఇహిజ దేవుణు ఆత్మ వూర్తి నిజమె. ఇని అబద్దం సిల్లెద్. దేవుణు ఆత్మనె మీరు నెస్సెజ్ మని విజి వన్యా వందిజ్ నేరిపిస్సాన్. అందెజి దేవుణు ఆత్మ నెన్పిస్తి లెకెండెనె మీరు క్రీస్తు బాన్ నిల్చి మండ్రు.

మాటు దేవుణు కొడోర్

28 అందెజి నాను ప్రేమిసిని నా బయిరండె, క్రీస్తుబాన్ నిల్చి మండ్రెజ్. ఎందనిజ్ ఇహిజ వన్ని వెట నిలోసి మహిజ క్రీస్తు మరజి వానివలె వన్ని ఎద్దు సిగు ఆవెండ దయెరమదాన్ నిల్దెజ్ ఆనాద్.

29 దేవుణు నీతి నిజాయితి మనికాన్ ఇజి మీరు నెస్సిదెర్. అహిజ దేవుణు వెహ్ని వజి కిని ఎయెన్బా దేవుణు కొడోర్ ఇజి మీరు నెస్సిదెర్.

3

1 బుబ్బు ఆతి దేవుణు మజి నండో ప్రేమిస్తిజ్ మాటు దేవుణు కొడోర్ ఇజి కూకె ఆజినాట్. నసా దేవుణు ప్రేమ మా మున్కు మంజినాద్. మాటు దేవుణు కొడోర్నె. గాని దేవుణుదిజ్ నమ్మిఇకార, బుబ్బు ఆతి దేవుణుదిజ్ నెన్ఎర్. అందెజి మాటు దేవుణు కొడోర్ ఇజి వారు అర్థం కివెర్.

2 నాను ప్రేమిసినికిదెరా, ఏలు మాటు దేవుణు కొడోర్ ఆత మనాట్. మాటు ఇనిక ఆనాట్లె ఇజి దేవుణు ఇంక మజి తోరిన్వెతాన్. గాని యేసు క్రీస్తు తోరి ఆనివలె వాండ్రు మని లెకెండె మాటుబ అనాట్లె ఇజి నెన్నాట్. ఎందనిజ్ ఇహిజ వాండ్రు మనిలెకెండె మాటు వన్నిజ్ నూణాట్లె.

3 యేసు క్రీస్తు తోరి ఆని వందిజ్ ఎద్దు సుడెజిని ఎయెన్బా వని వజి ఆన ఆజి పాపం డిసి బత్కిజినాన్. ఎందనిజ్ ఇహిజ క్రీస్తు పాపం సిలికాన్.

4 పాపమకు కిజినె మంజనికాన్ ఎయెన్బా దేవుణు ఆడ్రెజ్ నెక్కిపోక్సినికాజ్. పాపం ఇనిక ఇహిజ, దేవుణు ఆడ్రెజ్ నెక్కి పోక్తిక.

5 మా పాపమకు విజి లాగ్గి పొక్తెజి క్రీస్తు యా లోకమదు వాతాన్ ఇజి మీరు నెసినిదెర్. అకదె ఆవెద్, వన్ని లోఇ పాపం ఇనికబా సిల్లెద్ ఇజిబా మీరు నెసినిదెర్.

6 అందెజి యేసు క్రీస్తు వెట కుల తోహ్నికాన్ పాపం కిజినె మన్ఎన్. పాపం కిజినె మనికాన్ ఎయెన్బా క్రీస్తు ఎయెన్ ఇజి అర్థం కివెన్.

7 నాను ప్రేమిసిని బయిరండె, ఎయెర్బా మిజి మోసెం కివెండ సుడెదు. యేసు క్రీస్తు నీతిమనికాన్. క్రీస్తు వెహ్ని మాటెజ్ వజి నడెజినికాన్, దేవుణు ఎద్దు నీతి నిజాయితి మనికాన్.

8 పాపం కిజినె మంజునికాన్ నయతాను జటుదికాన్. ఎందనిజ్ ఇహిజ యా లోకం పుట్వెండ మహి బాణిజ్ అసి నయతాన్ పాపం కిజినె మంజునాన్. దేవుణు మరిసి అతి యేసుక్రీస్తు యా లోకమ్దు ఎందనిజ్ వాతాన్ ఇహిజ నయతాన్ కిని విజు పణిజు పూర్తి నాసనం కిదెజె వాతాన్.

9 దేవుణు కొడోజ్ అతికాన్ ఎయెన్బా పాపం కిజినె మన్వెన్. ఎందనిజ్ ఇహిజ దేవుణు గుణం వన్ని లోఇ మనాద్. వాండ్రు దేవుణు పొటాదికాన్. అందెజె పాపం కిజి మండ్రెజ్ అటవెన్.

10 దేవుణు కొడోజ్ ఎయెర్, నయతాన్ కొడోజ్ ఎయెర్ ఇజి మాటు ఎలాగ నెన్నాట్ ఇహిజ దేవుణు ఎద్రు సరియాతికెజ్ కిఇకాన్ దేవుణు కొడోజ్ అవెన్. మహి వరిజ్ ప్రేమ కిఇకాన్బా దేవుణు కొడోజ్ అవెన్.

ఒరెన్ మరి ఒరెన్ వన్నిజ్ ప్రేమిస్తెజ్

11 అందెజె మీరు నమ్మితి బాణిజ్ అసి వెహిక యాకదె. ఇనిక ఇహిజ మాటు, ఒరెన్ మరి ఒరెన్ వన్నిజ్ ప్రేమిస్తెజ్ ఇజి,

12 మాటు కయును లెకెండ మండ్రెజ్ అవెద్. వాండ్రు నయతాను జటుదికాన్ అతండ్రె వన్ని తంబెర్సిజ్ సప్తాన్. ఎందనిజ్ సప్తాన్ ఇహిజ వన్ని పణిజ్ సెఇ బుద్ధి కలగితికెజ్. వన్ని తంబెర్సి పణిజ్ దేవుణు ఎద్రు సరిఅతికెజ్ అతిమహె.

13 అహిజ నా తంబెరుజాండె, దేవుణుదిజ్ నమ్మిఇకార్ మీ మున్ను పగ అతిజ బమ్మ అమాట్.

14 మాటు మహి వరిజ్ ప్రేమ కిజి మహిజ మాటు సాతి వరి లెకెండ అవెట్. ఎలా కాలం బత్తిని బత్తుదు బత్తిజినాట్ ఇజి నెసికాట్. మహి వన్నిజ్ ప్రేమ కిఇకాన్ సాతి వన్ని లెకెండ మనాన్.

15 మాటు ఒరెన్ వన్ని మున్ను పగ అస్తిజ, వన్నిజ్ సప్తిలెకెండె. లోకాజ్ సప్తి వన్నిజ్ ఎలా కాలం బత్తిని బత్తు సిల్లెద్ ఇజి మీరు నెసినిదెర్.

16 ప్రేమ ఇహిజ ఇనిక ఇజి మాటు ఎలాగ నెన్నాట్ ఇహిజ, యేసు క్రీస్తు, వాండ్రె వన్ని పాణం మా వందిజ్ సితాన్. అకదె ప్రేమ. అయవజనె మాటుబా మా తంబెరిజి వందిజ్ మా పాణం సీదెజ్ వలె.

17 విజు కల్గితి మనికాన్ ఒరెన్, అవ్నరమ్దు మని ఒరెన్ వన్నిజ్ కనికారం తోరివెండ మహిజ అయ విజు కలగితి మనికాన్ దేవుణుదిజ్ నెగ్రెండ ప్రేమివెన్ ఇజి తోరిన్నాన్.

18 నాను ప్రేమిసిని బయిరండె, మాటు మాట ఉండ్రె దానె అవెద్. మా పణిజు మా ప్రేమ నిజమె ఇజి తోరిన్నాట్.

19 మాటు మా పణిజాణిజ్ మహి వరిజ్ నిజం కిజి ప్రేమిస్తెజి మాటు నిజమాతిదాన్ లోజిజినావ్ ఇజి నెన్నాట్లె. మరి దేవుణు ఎద్రు మా మన్ను నిపాతి మంజునాద్లె.

20 ఎందనిజ్ ఇహిజ మాటు తప్టాట్ ఇజి మా మన్ను ఉండ్రె వేలా వెహ్వాద్ను గాని, దేవుణు మా మన్నుదిజ్ ఇంక పెరికాన్. దేవుణు నెన్ఇకెజ్ ఇనికెజ్ సీలు.

21 నాను ప్రేమిసినికిదెరా, మాటు తప్ప కివెట్ ఇజి మా మన్నుదు నెస్తిజి మాటు దేవుణు వెట కూడోజి దయరం కల్గిజి మంజునాట్.

22 మాటు ఇనిక లోస్తిజిబా దేవుణు బాణిజ్ దోహ్క్కినాద్. ఎందనిజ్ ఇహిజ దేవుణు వెష్టికెజ్ మాటు కిజినాట్. దేవుణుదిజ్ ఇస్టం అతి వజ బత్తిజినాట్.

23 యాకదె దేవుణు మజి వెహ్వి రూలు. ఇహిజ ఇహిజ యేసు క్రీస్తు దేవుణు మరిసి ఇజి మాటు నమ్మిదెజ్ వలె. క్రీస్తు వెహ్వి లెకెండ ఒరెన్ మరి ఒరెన్ వన్నిజ్ ప్రేమిస్తెజ్.

24 దేవుణు సీతి రూలుజ్ వజ నడినికాన్ దేవుణు వెట మంజునాన్. దేవుణు వన్ని వెట మంజునాన్. దేవుణు మా వెట మనాన్ ఇజి ఎలాగ నెన్నాట్ ఇహిజ, దేవుణు అత్తు మా లోఇ మనిజ్ మాటు నెన్నాట్.

4

విజు అత్తెజి నమ్మిదెజ్ అవెద్

1 నాను ప్రేమిసినికిదెరా, దేవుణు అత్తుదాన్ వర్గిజిన ఇజి వర్గిని విజు వన్మాజ్ నమ్మిమాట్. విజు దేవుణు బాణిజ్, వాతికదో అవెద్ ఇజి నెగ్రెండ నెసి నుడోదు. ఎందనిజ్ ఇహిజ అబద్ధం వెహ్వి ప్రవక్తరు సంఠెండోర్ యా లోకమ్దు సోతార తప్పు మాటిజ్ బోదిసినార్.

2 దేవుణు ఆత్మ మనికార్ ఎయెర్ ఇజి ఎలగ నెస్సాట్ ఇహిజ లోకు వజ దేవుణు బాణిజ్ వాతి యేసు క్రీస్తుజ్ నాను నెందితికాన్ ఇజి ఒప్పుకోణికాన్ ఎయెర్బా దేవుణు ఆత్మ మనికాన్ ఇజి నెస్సెజ్.

3 గాని ఎయెర్బా, యేసు ప్రబు నా ప్రబు ఆవెన్ ఇజి వెప్తాజి వాండ్రు దేవుణు బోద్ వెహ్పాకాన్ ఆవెన్. వాండ్రు క్రీస్తుజ్ పడికాన్ క్రీస్తుజ్ పడిఎండ వెహ్పాకార్ వానార్ ఇజి మీరు వెహికెజ్ యాకదె. అయి గుంపుదికార్ ఏలు మా నడిఃమిల్ల మనార్.

4 ఇజిరి బయిరండె, మీరు దేవుణుదిజ్ నెందితికిదెర్. మీరు వరి బోద్ కెఇతిదెర్, వరిజ్ గెల్స్తిదెర్. మీ లోఇ మని దేవుణు ఆత్మ సత్తు లోకమ్దు మని సయ్తాన్ సత్తు ముస్సు పెరికదె. అందెజి మీరు వరిజ్ గెల్స్తిదెర్.

5 తప్పు మాటెజ్ బోదిస్సికార్ యా లోకమ్దికార్. అందెజి వరి బోద్ యా లోలమ్ది వరి ఆలోసం లెకెండె ముస్సె. అందెజి యా లోకమ్దికార్ వరి బోద్ వెనార్.

6 మాటు ఇహిజ దేవుణుదిజ్ నెందితికాట్. దేవుణుదిజ్ నెస్సికాన్ మా మాటెజ్ వినాన్. ఆఇకాన్ విన్ఎన్. నిజం వెహ్పాకార్ ఎయెరో, తప్పు వెహ్పాకార్ ఎయెరో ఇజి మాటు ఈహు నెస్సాట్.

దేవుణు ప్రేమని, లోకు ప్రేమ

7 నా తంబెరిజడె, మాటు ఒరెన్, మరి ఒరెన్ వన్నిజ్ ప్రేమిస్సెజ్వలె. ఎండనిజ్ ఇహిజ దేవుణు బాణిజె ప్రేమ వాజినాద్. మరి ఒరెన్ వన్నిజ్ ప్రేమిస్సికాన్ దేవుణు బాణిజ్ పుట్టికాన్. వాండ్రు దేవుణుదిజ్ బాగ నెస్సికాన్.

8 మహి వరిజ్ ప్రేమిన్ఇకాన్ దేవుణుదిజ్ నెన్ఇకాన్. ఎండనిజ్ ఇహిజ దేవుణు ప్రేమ మనికాన్.

9 దేవుణు మజి ప్రేమిస్సాన్ ఇజి ఈహు తోరిస్సాన్. ఎలాగ ఇహిజ వన్ని ఒరెండె మరిసిజ్ యా లోకమ్దు పోక్తాన్. మజి ఎలా కాలం బత్కిని బత్తు దోహ్కెజ్ ఇజి దేవుణు వన్నిజ్ పోక్తాన్.

10 నిజమాతి ప్రేమ ఇహిజ మాటు దేవుణుదిజ్ ప్రేమిస్సాట్ ఇజి ఆవిద్. నిజమాతి ప్రేమ ఇహిజ యాకదె. ఏలాగ ఇహిజ దేవుణు మజి ప్రేమిస్సాండ్రె మా పాపమ్కు సొన్నిస్సి వందిజ్ వన్ని మరిసిజ్ పోక్తాన్. మా పాపమ్కు వందిజ్ పూజ ఆదిజ్ పోక్తాన్. అకదె ప్రేమ.

11 నాను ప్రేమిసినికిదెరా, దేవుణు మజి నిసా ప్రేమిస్సాన్. అందెజి మాటుబా ఒరెన్ మరి ఒరెన్ వన్నిజ్ ప్రేమిస్సెజ్వలె.

12 ఎయెర్బా ఎనెజ్బా దేవుణుదిజ్ సుడెదిజ్ సిల్లె. గాని మాటు ఒరెన్ మరి ఒరెన్ వన్నిజ్ ప్రేమిస్తిజి దేవుణు మా లోఇ బత్కిజినాన్. అయాలె దేవుణు ప్రేమిసిని లెకెండె మా ప్రేమబ పూర్తి ఆనాద్లె.

13 దేవుణు వన్ని ఆత్మ మజి సిత మనాన్. అందెజి మాటు దేవుణు వెట కూడిత మనాట్ ఇజి, మరి దేవుణు మా లోఇ మంజినాన్ ఇజి నెసినాట్.

14 మరి బుబ్బి ఆతి దేవుణు, మరిసి ఆతి యేసుక్రీస్తుజ్ పోక్తాన్. లోకాజ్ వరి పాపమ్కాణిజ్ వాని సిక్కుదాన్ తప్సిస్తిజి ఇజి పోక్తాన్. యాక మాపు సుడెతాపె విజెరిజ్ వెహ్పానాప్. యాక నిజమె ఇజి సాక్కి వెహ్పానాప్.

15 యేసు దేవుణు మరిసి ఇజి ఎయెర్బా ఒప్పుకోటిజి, దేవుణు వన్ని వెట మంజినాన్. వాండ్రు దేవుణు వెట కూడిజి మంజినాన్.

16 దేవుణు మా ముస్సు తోరిస్సి ప్రేమ మాటు నెస్తి మనాట్, నమ్మిత మనాట్. దేవుణు ప్రేమ మనికాన్. అందెజి మహి వరిజ్ ప్రేమిసినికాన్ దేవుణుబాన్ కూడిజి మంజినాన్. దేవుణు వన్నిబాన్ కూడిజి మంజినాన్.

17 దేవుణు ప్రేమిసిని లెకెండె మా నడిఃమిల్ల మని ప్రేమ పూర్తి ఆనాద్లె. అందెజి దేవుణు తీర్పు సీని వలె తియెల్ ఆవండె మంజినాట్. ఎండనిజ్ ఇహిజ యేసుప్రబు యా లోకమ్దు ఎలాగ బత్కితాండ్రె మాటుబ అయాలెకెండె బత్కిదిజ్.

18 ప్రేమ లోఇ తియెల్ సిల్లెద్. అక్కాదె ఆవిద్. పూర్తి ఆతి ప్రేమ మహిజ అక్క తియెల్ సాన్పిస్సాద్. ఎండనిజ్ ఇహిజ సిక్కు వానాద్ ఇజెనె తియెల్ వానాద్. తియెల్ ఆని వన్నిజ్ పూర్తి ప్రేమ సిల్లెద్.

19 దేవుణుని మజి ముజాల ప్రేమిస్తిజ్, మాటు వన్నిజ్ ప్రేమిస్తిజ్ అట్సినాట్.

20 ఎయెన్బా, 'నాను దేవుణుని ప్రేమిన్ను' ఇజి వెహ్ని, మరి ఒరేన్ నమ్మిత్తి వన్నిక్ ప్రేమ కిఎండ మహిజ వాండ్రు అబద్ధం వెహ్నినాన్. ఎందనిజ్ ఇహిజ తోరిజని వన్నిక్ ప్రేమిన్ ఇకాన్ తోరిజ దేవుణుని ప్రేమిన్ ఇకాన్ అట్ వన్.

21 యేసు క్రీస్తు మజి ఇని రూలు సిత మనాన్ ఇహిజ, దేవుణుని ప్రేమిన్ ఇకాన్ మహి క్రీస్తు లోకాజ్ బా ప్రేమిన్ ఇకాన్ వలె.

5

దేవుణు మరిసి మున్ను నమ్మకం

1 యేసునె క్రీస్తు ఇజి నమ్మిన్ ఇకాన్ ఎయెన్బా దేవుణు బాణిజ్ వుట్టాన్. బుబ్బెక్ ప్రేమిన్ ఇకాన్ ఎయెన్బా వన్ని బాణిజ్ వుట్టి విజేరిజ్ ప్రేమిన్ ఇకాన్.

2 దేవుణుని ప్రేమిని, వాండ్రు వెహ్ని రూలుజ వజ కితిజ, మాటు దేవుణు కొడొరిజ్ ప్రేమిన్ ఇకాన్ నెహ్ని.

3 దేవుణుని ప్రేమిన్ ఇహిజ వన్ని రూలుజ వజ కిదిజె. వన్ని రూలుజ్ కన్ఠం ఆతికెజ్ ఆఉ. సుల్కాణికెజె.

4 దేవుణుబాణిజ్ వుట్టికార్ విజేరి యా లోకమ్ దు దేవుణుని పడిజి విజు వన్మాజ్ జయిన్ ఇకాన్ అట్టూర్. దేవుణుని పడిజి విజు వన్మాజ్ జయిన్ ఇకాన్ ఎలాగ అట్టూర్ ఇహిజ, మాటు యేసుప్రబుజ్ నమకం ఇట్టివలెదాన్ అట్టూర్.

5 దేవుణుని పడిజి వన్మాజ్ జయిన్ ఇకాన్ ఎయెన్? యేసు, దేవుణు మరిసి ఇజి నమ్మిన్ ఇకాన్.

6 క్రీస్తు ఆతి యేసు యా లోకమ్ దు వాతండ్రి. ఏరుదు బాప్తీసం లాగి ఆతాన్. సిల్వారు నల వాక్కి సాతాన్. బాప్తీసం ఉండ్రె ఆవద్. సిలువారు నల వాక్కి సాదిజె వాతాన్. యాక నిజమె ఇజి దేవుణు ఆత్మ సాక్కి వెహ్నినాన్. అందెజె యాక నిజమె. ఎందనిజ్ ఇహిజ దేవుణు ఆత్మ నిజమెనె వెహ్నినాన్.

7 క్రీస్తు వందిజ్ సాక్కి వెహ్నికెజ్ మూండ్రె మన్నె.

8 దేవుణు ఆత్మ, బాప్తీసం లాగి ఆతి ఏరు, సిలువారు వాక్కి నల. యా మూండ్రె ఒప్పు కొడిజి క్రీస్తు వందిజ్ సాక్కి వెహ్నినె.

9 మాటు, లోకుర్ సాక్కి అస్సాట్ గదె. అహిజ దేవుణు సీని సాక్కి ఒది నత్తు మనికగదె. ఎందనిజ్ నత్తు మనిక ఇహిజ, దేవుణు వన్ని సొంత మరిసి ఆతి యేసు వందిజ్ వెహ్ని సాక్కినె.

10 దేవుణు మరిసి మున్ను నమం ఇట్టి వన్ని లోజ యా సాక్కి మనాద్. గాని దేవుణు మున్ను నమ్మకం ఇహిజకాన్ దేవుణు మని మరిసి వందిజ్ వెహ్ని సాక్కి నమ్మిఎన్. అందెజె వాండ్రు దేవుణు అబద్ధం వెహ్నినాన్ ఇజి వెహ్నినాన్.

11 దేవుణు వెహ్ని సాక్కి యాకదె. ఇనిక ఇహిజ దేవుణు వెట ఎలా కాలం బత్తిని బత్తు దేవుణు మజి సితాన్. యా బత్తు మజి ఎలాగ వాతాద్ ఇహిజ యేసు క్రీస్తు మున్ను నమ్మకం ఇహిజి వన్ని వెట కూడొతి మహిజ్ వాతాద్.

12 దేవుణు మరిసి ఆతి యేసు క్రీస్తు వెట కూడొజి మంజిని వన్నిక్ యా బత్తు మనాద్. దేవుణు మరిసి వెట కూడొజి మనిజి వన్నిక్ దేవుణు వెట ఎలా కాలం బత్తిని బత్తు సిల్లెద్.

13 దేవుణు మరిసి మున్ను నమ్మకం ఇహిజి వరిజ్ నాను ఇక్కె రొసిన. ఎందనిజ్ రొసిన ఇహిజి మిజి దేవుణు వెట ఎలా కాలం బత్తిని బత్తు మనాద్ ఇజి నెహ్నికె రొసిన.

14 అహిజ మజి దేవుణు మున్ను మని దయరం ఇనిక ఇహిజ, మాటు దేవుణు ఇన్ఠమ్ దిజ్ కూడొతి మని ఇనికబా లొస్తిజ, వాండ్రు అక కినాన్.

15 మాటు ఇనిక లొస్తిజ దేవుణు వెంజినాన్ ఇజి మాటు నెహ్నిజ, మాటు దేవుణుబాణిజ్ లొస్తికెజ్ విజి దొహ్కె లెకెండె నెసినాట్.

16 ఒరేన్ నమ్మిన్ ఇకాన్ సాపు తెజి పాపం కిజి మహిజి ఎయెన్బా అక సుడిఠిజ, వన్ని వందిజ్ పార్లనం కిదిజె. దేవుణు వన్నిక్ బత్తు సీనాన్. సాపు తెజి పాపం కినివరి వందిజె వెహ్నిన. గాని సాపు తపిన్ని పాపం మనాద్. నని పాపం కిని వరి వందిజ్ పార్లనం కిఆ ఇజి నాను వెహ్ని.

17 ఇని తప్ప కితిజ్బా పాపమనె. గాని లోకాజ్ సావు తపిన్ ఇ పాపమకు మున్నె.

18 దేవుణు బాణిజ్ వుట్టికాన్ ఎయెన్ బా పాపం కిజినె మన్ ఎన్ ఇజి మాటు నెసినాట్. ఎండనిజ్ ఇహిజు దేవుణు మరిసి వన్నిజ్ కాప్ కిజినాన్. అహిజు సయ్తాను వన్నిజ్ ముట్టి నాసనం కిదెజ్ అట్ ఎన్.

19 మాటు దేవుణు క్రొడోర్ ఇజి నెసినాట్. దేవుణుదిజ్ సెందితికార్ ఆఇకార్ సయ్తాను అడిగి మంజినార్ ఇజి నెసినాట్.

20 మరి దేవుణు మరిసి వాతండ్రె, నిజమాతి దేవుణుదిజ్ మాటు నెస్తెజ్ మజి తెలివి సితాన్. మాటు వన్ని వెట కూడితిజ్ నిజమాతి దేవుణు వెట కూడిత మనాట్. వీండ్రె నిజమాతి దేవుణు. వీండ్రె దేవుణు వెట ఎలా కాలం బత్కిని బత్కు లోకాజ్ సీనికాన్.

21 నాను ప్రేమిసిని బయిరండె, బోమ్మెజు మాడిస్టెజ్ ఆవద్.

యోహాను రాస్తా రుండి ఉత్త్రం

నెల్వు కిబిసినిక

యేసు క్రీస్తు అపొస్తుడు అతి యోహాను రాస్తా ఉత్త్రమేనె యాక. నండో ముజాలె సువార్త వెప్పికార బూలాజి బూలాజినె సువార్త సాటిసి మహార. అయావలె యేసుజ్ నమ్మిత్తికారె, యాలెకెండ్ సువార్త వెప్పి వరిజ్ వరి ఇండ్రొ డగ్రు కిజి, వరిజ్ కావాలిస్తెకెక్ సీజి పోక్కి మహార. తప్పు బోద వెప్పికారబా మహార. వారుబా యాలెకెండ్ బూలాజి బూలాజినె కిజి మహార. అందెజి నన్ని వరివందిజ్ జాగర్త మండ్రెజ్ ఇజి యా ఉత్త్రమదు రాసి వెప్పినాన్. నిజమాతికెక్ నమ్మిజి అయాలెకెండ్ బత్తిదెజ్ వలె ఇజిబా వెప్పినాన్.

1-2 పెదెలి అతి నాను, దేవుణు ఏర్పాటు కితి అమ్మెజ్, దన్ని కొడోరిజ్ రాసిన. నాను మిజి నిజమనె ఎత్తు కిజిన. నాను ఒరెనె ఆవిండ, దేవుణు తోరిస్తి నిజమాతి నజతిజ్ నెన్సికార విజెరెబా మిజి ఎత్తు కిజినార. ఎందనిజ్ ఇహిజ, దేవుణు తోరిస్తి నిజమాతికెక్ మజి తెలిజి మంజినె. అయాకెక్ మాటు ఎలాకాలం తెలిజి మంజినె.

3 దేవుణు తోరిస్తి నిజమాతికెక్ మాటు నమ్మిజినాట్. వాండ్రు మజి ప్రేమిస్నాన్. అందెజి బుబ్బ అతి దేవుణుని మరిసి అతి యేసు క్రీస్తు, దయా దర్మమదాన్, మా మున్సు, కనికారం తోరిసి మాటు నిపాతిదాన్ మండ్రెజ్ సాయం కిపిర్.

ప్రేమదాన్ నడినివందిజ్ వెప్పినాన్.

4 మీ కొడోరి లొజ సెగిందార, దేవుణు తోరిస్తి నిజమాతి నజతిజి వజి నడిజినార ఇజి నాను నెన్స.

అందెజి నాను నండో సరద అజిన. బుబ్బ మజి ఆడ్ర సిత్తివజినె వారు నడిజినార.

5 అపొజు ఒ అమ్మ, నాను కొత్త ఆడ్ర మిజి రాన్వ. గాని క్రీస్తుజ్ నమ్మిత్తిబాణిజ్ అసి, మాటు నెస్తి మన్ని ఆడ్రనె రాసిన. మాటు ఒరెన్ వన్నివెట ఒరెన్ ప్రేమిస్తెజ్ ఇని ఆడ్రనె వెప్పినాన్.

6 మాటు వన్ని ఆడ్రజి లొజిజి, అయావజి నడితిజినె దేవుణుదిజ్ ప్రేమిస్నాట్. మీరు క్రీస్తుజ్ నమ్మిత్తి బాణిజ్ అసి వెపాలెకెండ్, మాటు ఒరెన్ వన్ని వెట ఒరెన్ ప్రేమిసి అయాలెకెండ్ నడిదిజ్ ఇజినె వన్ని ఆడ్ర.

మొసెం కినివరివందిజ్ జాగర్త మండ్రు.

7 యెసుక్రీస్తు, యాయపొటలొఇహాన్ వాతికాన్ ఇజి ఒప్పుకొడోఇ నండోండార మొసెం కినికార లోకమదు సోత్త మనార. ననికాండ్రె మొసెం కినికాన్, క్రీస్తుజ్ ఎద్రిస్సికాన్.

8 అపొస్తురు అతి మాపు, మీ వెట మీ నడిమి కితి పణిజి పలితం, పాడు ఆవిండ మంజిని వందిజ్, మొసెం కినివరి మున్సు, జాగర్త మండ్రు. మరి, దేవుణు వెట ఎలాకాలం బత్తిని బత్తు, దొవ్వాక్కివందిజ్, మొసెం కినివరి మున్సు, జాగర్త మండ్రు.

9 ఎయెన్బా, క్రీస్తు నెన్పిస్తి మాట నమ్మిజి మన్విండ, వన్ని సొంత మాటెజ్, క్రీస్తు నెన్పిస్తి మాటవెట కలప్తిజి, వాండ్రు దేవుణుదిజ్ సేందిజకాన్. క్రీస్తు నెన్పిస్తి మాట నమ్మిజి మంజినికాన్ బుబ్బెజ్ మరిసిజ్ సేందితికాన్.

10 ఎయెన్బా క్రీస్తు నెన్పిస్తి మాట వెహవిండ, మీ డగ్రు వాతిజి, మీరు వన్నిజ్ ఇండ్రొ కూకాట్. వన్నిజ్ డగ్రు కిమాట్.

11 ఎందనిజ్ ఇహిజ, వన్నిజ్ డగ్రు కితికాన్ ఎయెన్బా వన్ని సెఇపణిజివెట కూడిత మనాన్.

12 నండో నజతిజ్ మిజి రాస్తెజ్ మనాద్. గాని ఉత్త్రమదాన్ వెప్తెజ్ నజి మున్సు సెల్లెద్. మా సరద పూర్తి అదెజ్ మీ డగ్రు వాజి, మిజి నుడోజి వర్గెదిజ్ నాను అస అజిన.

13 దేవుణు ఏర్పాటు కితి నీ తజి కొడోరి, మిజి వెన్బాతి లెకెండ్ వెప్పినార.

యోహాను రాస్తీ మూండ్రి ఉత్త్రం.

నెల్వ కిబిసినిక

యేసు క్రీస్తు అపొస్తలుడు అతి యోహాను రాస్తీ ఉత్త్రమేన యాక. వన్ని కూలాయెనాతి గాయుజ్ రాసినాన్. యా గాయు ఇనికాన్, యోహాను అతికారం అడిగి మన్ని దేవుణు సజం ఉండ్రి సుడేజి నడిపిస్తాన్. బూలాజి బూలాజి సువార్త వెప్పా వాజిని వరిజ్ వాండ్రు డగ్రు కిజి నెగ్రెండ మరజి పొక్కిని దన్ని వందిజ్ యోహాను వన్నిజ్ వందనమకు వెప్పినాన్. మరి, దియొత్తెవె ఇనికాన్ బూలాజి బూలాజి సువార్త కిని వరిజ్ డగ్రు కివీండ మరజి పొక్తాన్. వాండ్రు యోహాను అతికారం అడిగి మండ్రిజ్ కెవ ఇజినాన్. వన్నిజ్ డటిసి వెప్పిదన్ని వందిజ్ బా యా ఉత్త్రమదు రాసినాన్.

1 పెదెలి అతి నాను నిజం ఎత్తు కిజిని నా సొంత కూలాయెన్ అతి గాయుజ్ రాసిన.

2 ఓ, నాను ప్రేమిసిని కూలాయెన్, దేవుణు వెట నిజి మన్ని నమందం పిరిసిని వజ, నీను విజు వన్కా, లోజ పిరిదెజ్ ఇజి నాను పార్దనం కిజిన. నీను నోబు నొప్పి సిల్లెండ నెగెండ నెగెండ మండ్రిజ్ ఇజిబా నాను పార్దనం కిజిన.

3 నెగెండార్ నమ్మితికార్ నా డగ్రు వాతార్. వారు, దేవుణు తోరిస్తి నిజమాతి సజతిజ్ నీను లోజిజిని ఇజి, అయావజి నీను నెగ్రెండ నడిజిని ఇజి వెవ్తార్. అయాలెకెండ వెవ్తారె నజి నండో సరద కిబిస్తార్.

4 నా కొడోరె దేవుణు తోరిస్తి నిజమాతి సజతిజ్ లోజిజినార్. వారు అయావజి నడిజినార్ ఇజి వెంజినికాదె నజి నండో సరద. దన్నిజ్ మిస్తి సరద సిల్లెద్.

5 ఓ, నాను ప్రేమిసిని కూలాయెన్, బూలాజి బూలాజి సువార్త వెప్పా వాజిని వరిజ్ నీను డగ్రు కిజిని. వారు నిజి తెలికకార్ అతిజిబా నీను వరి వందిజ్ కిజిని ఇనికబా నమ్మకమదానె కిజిని.

6-7 వారు నీ ప్రేమ వందిజ్ ఇప్పి దేవుణు సజం ఎద్రు సాసి వెవ్తార్. నీను, దేవుణుదిజ్ ఇస్తం అతి వజి వరి పయనమదు అవనరం అతికెజ్ సీజి పోకెత. ఎందనిజ్ ఇహోజ, వారు క్రీస్తుజ్ నమ్మిజి వరిబాణిజ్ ఇనికబా లోసేవిండ, క్రీస్తుజ్ వెవ్తాజ్ సొత్తార్.

8 అందెజి వారు వెప్పావలె, మాటు వరివెట జత కూడేజి, దేవుణు వందిజ్ నిజమాతికెజ్ నెన్పిస్తివందిజ్, నన్నివరిజ్ మాటు డగ్రు కిదిజ్ వలె.

దియొత్తెవెని దెమెత్రియు.

9 నాను దేవుణు సజమదిజ్ ఉండ్రి సజతి రాస్త. గాని దియొత్తెవె నా అతికారమదిజ్ లోజివీన్. ఎందనిజ్ ఇహోజ, వాండ్రు దేవుణు సజమదు పెరికాన్ ఆదెజ్ కోరిజినాన్.

10 వాండ్రు మా మున్కు, సెఇ మాటిజ్ వర్గిజినాన్. యాకాదె అవిండ బూలాజి బూలాజి దేవుణు మాటు వెప్పా వరిజ్ డగ్రు కివీన్. వరిజ్ డగ్రు కిదెజ్ మన్ను మన్ని వరిజ్ అత్తు కిజి దేవుణు సజమదాన్ వరిజ్ వెల్లి పొక్కినాన్. అందెజి నాను వాతిజ, వాండ్రు కిజిని సెఇ వణిజి దేవుణు సజం ఎద్రు వెవ్తా.

11 ఓ, నాను ప్రేమిసిని కూలాయెన్, సెఇ వణిజ్ కిజిని వరిజ్ సుడేజి నడిపిండ, నెగ్గి వణిజ్ కిజిని వరిజ్ సుడేజి నడిపెత. నెగ్గి వణిజ్ కినికాన్ ఎయెన్బా దేవుణుదిజ్ నెందితికాన్. సెఇ వణిజ్ కినికాన్ ఎయెన్బా దేవుణుదిజ్ నెన్పిన్.

12 దెమెత్రియు వందిజ్ లోకుర విజెరె నెగ్గికెజ్ పొగిడిజినార్. దేవుణు తోరిస్తి నిజమాతి సజతిజ్ లోజిజి వాండ్రు నడిజినాన్. అయాక వాండ్రు నెగ్గి లోకు ఇజి రుజువ్ కిజినాద్. మాపుబా వన్ని వందిజ్ నెగ్గికెజ్ వెప్పినావ్. మా సాసి నిజమాతికెజ్ ఇజి నీను నెస్తి.

13 నండో సజతిజ్ నిజి రాస్తెజ్ మనాద్. గాని ఉత్త్రమదాన్ వెవ్తాజ్ నజి మన్ను సిల్లెద్.

14 నిజి బేగి సుడేజెదెజ్ ఆనాద్ ఇజి నాను కోరిజిన. అయావలె మాటు కూడేజి వర్గినాట్.

15 నిజి సమాదనం రపిద్. ఇట్టెణి దేవుణు సజమదికార్ నిజి వెన్బాతి లెకెండ వెప్పినార్. అట్టె మన్ని వరిజ్ విజెరిజ్ వెన్బాతి లెకెండ వెహత.

యూద రాస్తి ఉత్త్రం

నెల్ల కిబిసినిక

మా ప్రబు అతి యేసుక్రీస్తుజ్ తంబెరిజ్ ఇజి వెవె అతి వరి లొఇ మన్ని యూద ఇనికాన్ యా ఉత్త్రం రాస్తాన్. వాండ్రు యాకోబుజ్ బా తంబెరి. క్రీస్తు సకం 68-80 నడిమి కాలమదు యా ఉత్త్రం రాస్త్ర మనాద్దు. క్రీస్తుజ్ నమ్మిత్తివరి సజమ్కలొఇ నిజతిమాతి బొద నెక్కిపోక్కి తప్పుజ్ నెస్సిసిని వరి వందిజ్ రాస్తాన్. వరి బొదవందిజ్ వరి బత్తువందిజ్ డటిసి రాస్తాన్. నమ్మితి వరిజ్ దేవుణు సిత్తి రక్కుణ వందిజ్, నిజం వందిజ్ కాల్లాడఃదెజ్ ఇజి రాస్త్ర మనాన్.

1 యేసు క్రీస్తుజ్ పణి కినికానాతి యూద (వాండ్రు యాకోబుజ్ తంబెరి) రాసిని ఉత్త్రం. దేవుణు కూక్కి వరిజ్ నాను రాసిని. బుబాతి దేవుణు నండొ ప్రేమిసి యేసు క్రీస్తు మరజి వానిదాక కావ్ కిజి ఇడ్డిని మిజీనె రాసిని

2 మిజీ కనికారం, నిపాతి, దేవుణు - బాణిజ్ వాని ప్రేమ ఒదె నిండ్రిజి మనిద్.

దేవుణు వందిజ్ మన్సు సిల్లి వరిజ్ వాని సిక్కు.

3 నాను నండొ ప్రేమిసినికి దెరా, మజి విజెరిజ్ దొవ్వాక్కి రక్కుణ వందిజ్ మిజి రాస్త్రజ్ ఇజి నండొ ఆస అత మహా. గాని దేవుణుదిజ్ కేట అతి వరిజ్ ఉండ్రె సుటునె ఒపజెప్పి నిజతిమాతి నమకం కాపాడిజి ఇడదెజ్ మీరు కాల్లాడఃజి మండ్రెజ్ వరి ఇజి మిజి బతి మాల్లి రాస్త్రజె ఎలు ఒడఃబిజిన.

4 నెగొండార లొకుర మిజి తెలివండ మీలొఇ డుఃగిత మనార. దేవుణుబాణిజ్ వరిజ్ వాని తీర్పు వందిజ్ పూరబకాలమదు దేవుణు - మాటదు రాస్త్ర మనాద్. వారు దేవుణు - వందిజ్ బక్కిసిల్లి లొకుర. వారు ఒడఃలవందిజ్ మని, వరి సెఇ ఆసెజి వజి కిజి సరద ఆనివందిజ్ దేవుణుబాణిజ్ వాతి, వన్ని దయదర్శమ్దిజ్ మారిస్తార. అపా కితిజ్ మాటు సెవకిని ఒరెండ్రె ఎజుమాని అతి మా ప్రబు అతి యేసు క్రీస్తుజ్ నెక్కి పొక్కార.

5 నాను వెప్పొని యా సజతిజ్ విజు మీరు ముజాలె నెస్తి మన్నిదెర్ గాని నాను మిజి మరి ఎత్తు కిబిస్తెజ్ ఆస ఆజిన. అక్క ఇనిక ఇహిజి పుర్పుం అయగుప్పు దేసమ్దాన్ ఇస్తాయెలు లొకురిజ్ ఉండ్రె సుటునె గెల్పిస్తాన్. గాని వెనుక వరి లొఇ నమ్మిఎండ్రాతి వరిజ్ దేవుణు నానం కిత్తాన్.

6 దేవుణు సిత్తి అతికారమ్దు మండ్రెజ్ ఇస్సం ఆవిండ, వరిజ్ మహి అతికారం డిఃస్తిసిత్తి దేవుణు దూతార వందిజ్ ఎత్తు కిదు. తీర్పు సీజి సిక్కు సీని పెరిదినమ్ దాక, ఎల్లకాలం మంజిని గెలు గెలుస్కాణిజ్ తొప్పొ - స్త్రాండ్రె సీకటి మన్ని బాడ్డిదు దేవుణు వరిజ్ ఇట్ట మనాన్.

7 అయలెకెండ్రె సాదొమ గొమ్మెర్ పట్టుమ్క లొకాజ్, వసక సుటులం మన్ని నాహ్కాణి లొకాజ్ ఇనిక జగ్గితాద్ ఇజి ఎత్తు కిదు. వారు దేవుణు దూతార కితిలెకెండ్రె, ఒడొలొది సెఇ ఆసెజ్ వజి కిజి సర్ద ఆని కిని పణిజ్ కిత్తార. ఆఇ బొదెకవెట ఉండ్రె ఆవిద్, మొగవరివెట మొగవారు కూడఃజి పాపం కిత్తార ఎలాకాలం సంబిఇ సేసుదాన్ సురి ఆతార. నిన్నివరిజ్ ఇని సిక్కు వానాద్ ఇని దన్నిజ్ అక్క విజెరిజ్ ఉండ్రె గుర్తులెకెండ్రె మనాద్.

8 అయలెకెండ్రె వీరు కలెజ్ గాని ఒడొలొది సెఇ ఆసెజ్ వజి కిజి సరద ఆని పణిజ్ కిజినార. మరి, ఎలుబడిః కినివరిజ్ లొజివిర్. వారు దేవుణు దూతారిజ్ దూసిస్సార.

9 అహిజి దేవుణు దూతార మున్సు పెరి దూత అతి మికావెలుబా, మోసె పీసుగు వందిజ్, నయతాను మికాయెలుజ్ ఒదిన్సివలె ఇనిక కిత్తాన్ ఇహిజి, వన్నిజ్ దూసిసిని మాటెబాణ్ నేరం మొవ్విన్. గాని "ప్రబునె నిజి గదిసిన్", ఇజి వెచ్చాన్.

10 గాని వీరు ఇహిజి వరిజ్ అర్లం ఆఇవసకవందిజ్ దూసిసినార. బుద్దిసిల్లి జంతుజ్ లెకెండ్రె, మన్సుదు బాగ ఒడిఃబిదిజ్ అటేవిర్. జంతుజులెకెండ్రె ఒడొలొ ఆసెజ్ వజి కిజి సరద ఆదెజ్ నుడఃజినార. వరి సెఇ పణిజాణ్ వారి పాడఃజి సొన్నివార.

11 అబయ! వరిజ్ కస్తమ్కు తవ్ ఉ. ఎందనిజ్ ఇహిజ, వారు నిజ పణి కితి కయును లెకెండబా మనార్.* వారు బిలాము ఇని ప్రవక్త లెకెండబా ఇనాయం దొహ్మిద్ ఇజి, వరి బత్తు, తప్పుదిజ్ పూర్తి ఒపజెప్ప మనార్.† వారు కోర ఇనివన్ని - లెకెండబా మనార్. మోసె వెహ్తాదన్నిజ్ మరజి వెహ్తాడై డటం ఎద్రిస్తాన్‡. వీరుబా వన్నిలెకెండ నాననం ఆన సొనార్.

12 మీరు కిజిని ప్రేమవిందుజ్లో ఇ వారు తెల్లాని పాతూదు మన్ని మస లెకెండ సిగు తపిసినార్. ఇని తియెల్ సిల్లెండ పొటపంజు ఉణిజి వరిజ్ వారి పోస్ కిబె ఆజినార్. వారు గాలి డెయ్జి ఒసిని పిరు సిల్లి మొసావ్ సనికార్. వారు కాయెజ్ అన్ని కాలమ్దు కాయెజ్ అన్ఇ మరకే లకెండె. అక్కాదె ఆవద్. వారు వలెజాణిజ్ తెరి ఆతి మరకలెకెండె. పాణం సిల్లికార్, పూర్తి సాతికార్ వారు.

13 వారు నమ్దరమ్ది పెరి ఉల్కెజ్ లెకెండ మనార్. వరి సిగుపణిజ్ ఉల్కెజ్ డెయ్జి తపిని పొజు లెకెండ మన్నె. మరి సరి తప్పి బూలూని సుక్కెజ్‡ లెకెండ మనార్, వారు. అందెజె దేవుణు వరివందిజ్ ఎలాకాలం మండ్రెజ్ గొప్ప సీకటి మన్ని బాడ్డి* తయార్ కిజి ఇడ్డమనార్.

14 ఆదముదాన్ మొద్దొల్లి ఏడవ తరమ్దికాన్ ఆతి హానోకు పూర్బకాలమ్దు దేవుణుబాణిజ్ వాతి మాటెజ్ వెహ్తాన్. విరివందిజ్ వెహ్తా అయ మాటెజ్ వాని కాలమ్దు జర్గిని వందిజె. ఇనిక ఇహిజ “ఇదిలో ప్రబు వన్ని వెయ్యు వెయిజ్ దూతార్ వెట వాజినాన్.

15 విజెరిజ్ తీర్చ కిదెజ్ ప్రబు వాజినాన్. దేవుణు వందిజ్ బక్తి సిల్లి వరిజ్ తీర్చు సీజి సిక్కు సీదెజ్ వాండ్రు వాజినాన్. ఎందనిజ్ ఇహిజ దేవుణు వందిజ్ బక్తి సిల్లికార్, దేవుణుబాణిజ్ మన్ను దూరం ఇడ్డి నిజ పణిజ్ కిత్తార్. దేవుణు వందిజ్ బక్తి సిల్లికార్ తియెల్ సిల్లెండ దేవుణు ఎద్రు వన్నిజ్ పడిజె కటిసమతి మాటెజ్ వర్గితార్”.

16 వారు దేవుణు ఎద్రు సణిజిజినార్. ఆజవరి మున్ను నింద మోప్పనికార్. వారు వరి ఒడొల్దిది నిజ ఆసెజ్ వజ కిజి సర్ద ఆదెజ్ ఇజిని నుడెజినార్. వారు వరి వందిజ్ న పణిదిజ్ రెజ బడాయ్ మాటెజ్ వర్గిజినార్. ఆజ వరిబాణిజ్ ఇనికబా దొహ్మిద్ ఇజి వరిజ్ పొగడిజినార్.

ఓరిసి మండ్రెజ్ ఇజి వెహ్తాన్.

17 అహిజ నాను నండొ ప్రేమిసినికిదెరా, మా ప్రబు ఆతి యేసు క్రీస్తుజ్ అపొస్తరు ఆతికార్ మిజి ముజాల వెహ్తామని సజతిజ్ మీరు ఎత్తు కిదు.

18 వారు ఇనిక వెహ్తార్ ఇహిజ, కడెవెరి రోస్కాణ్ వెక్రిసినికార్ వానార్. వారు దేవుణు వందిజ్ బక్తి సిల్లెండ, వరి ఒడొల్లి నిజ ఆసెజ్ వజ కిజి సర్ద ఆజిని మంజినార్.

19 లోకాజ్ కేటెజ్ కేటెజ్ కిదిన్నికార్ వీరి. పాపం ఏలుబడిజె కిని మన్ను మన్నికార్, దేవుణు ఆత్మ సిల్లికార్ వీరు.

20 గాని మీరు, ఇహిజ నాను నండొ ప్రేమిసినికిదెరా, దేవుణుబాణిజ్ మిజి దొహ్కొక్తి నమకమ్దు పిరిజి వాదెజ్ ఒరెన్ మరి ఒరెన్ వన్నిజ్ తోడుజె కిదెజ్. దేవుణు ఆత్మ నడిపిసిని వజ పార్లనం కిజి మండ్రు.

21 దేవుణు మీ మున్ను తోరిస్తి మన్ని ప్రేమదు మండ్రు. ప్రబు ఆతి యేసు క్రీస్తు మీ మున్ను కనికారం మాజి, దేవుణు వెట ఎల్లకాలం బత్కని బత్కు సీదెజ్ ఇజి ఎద్రు నుడెజి మండ్రు.

22 దేవుణు మున్ను మన్ని నమకం వందిజ్ అనుమానం మని నీ మున్ను కనికారం తోరిస్తి.

23 నమకమ్దాన్ తప్పిసాహి సెగెండారిజ్, సిను నడిమిహాన్ వెల్లి లాగితిలెకెండె రక్కిస్తు. తప్పి సాహి మరి సెగెండారిజ్ కనికారం తోరిస్తి. గాని తియెల్దాన్ మండ్రు. వరి పణిజ్ మజి పడివద్. వారు కిని నిజ పణిజాజ్ మాటు సెవెణ్ ఆదెజ్ ఆవద్.

24 మీరు పాపమ్దు తోరో ఒడిజి అరవింద మిజి కావ్ కిదెజ్, దేవుణు గొప్ప పెరి జాయ్ ఎద్రు, గొప్ప సర్దదాన్, ఇని తప్పుబా సిల్లెండ మిజి నిల్వెజ్, మజి రక్కిస్సికాన్ ఆతి ఒరెండై దేవుణు అటూన్.

25 మజి రక్కిస్సికాన్ ఆతి దేవుణు, ఒరెండై దేవుణు. మా ప్రబు ఆతి యేసు క్రీస్తు - వలెహాన్ వన్నిజ్ పొగడినాట్. ఎందనిజ్ ఇహిజ వాండ్రె జాయ్దాన్ నిండ్రెతి సోకు మన్నికాన్, వాండ్రె గొప్ప పెరికాన్, వాండ్రె

* 1:11 1:11 కయును వందిజ్ నద్దవీదు, అదికాండం 4:1-16 † 1:11 1:11 బిలాము వందిజ్ నద్దవీదు, సంతియా పుస్తకం 22 - 24. అధ్యాయముక లొక మనద్ ‡ 1:11 1:11 కోర వందిజ్ నద్దవీదు, సంతియా పుస్తకం 16:1-35 § 1:13 1:13 యా సుక్కెజ్ బాము నన్నికెజ్ గాని ఎనెజ్ ఎనెజ్ సాని సరి తప్పి సాని * 1:13 1:13 ఒది సీకటి మని బాడ్డి. యా బాడ్డి నరకమున

గొప్ప సత్తు మన్నికాన్, వాండ్రై విజుదన్ని - మున్కు యా అతికారం మన్నికాన్. వాండ్రు విజు వనకాజ్ ముజాల యాపజ మహాన్, వాండ్రు ఏలు యాపజ మనాన్, వాండ్రు వాని కాలమ్దు యాపజ మంజినాన్. ఆమెన్.

ప్రకటన పుస్తకం డాజీతిమన్నికెక్ దేవుణు యోహానుజ్ తోరిస్తికెక్

నెల్ల కిబిసినిక

ఇక్క బయ్యెబిల్దు మన్ని కడెవెరి పుస్తకం. తెలుగు బయ్యెబిల్దు యా పుస్తకం, ప్రకటన ఇజి మనాద్. ప్రకటన ఇని మాటదిజ్ అర్థం డాజీతిమన్నికెక్ వెలి తోరిసినిక, టుకుర్ ఇడ్డిమన్నిక టుకుర్ లాగ్గి తోరిసినిక ఇజి అర్థం మనాద్. ఇక్కెక్ ఎయెర్బా ముజాల నెస్తిమన్ని మాటెజ్ ఆఉ. యేసుప్రబు వందిజ్ని దేవుణుమాటదిజ్ సాస్యం వెహ్ని వందిజ్, యేసుప్రబు సిసుర్లోఇ ఒరెన్ ఆతి యోహాను ఇనివన్నిజ్ రోమప్రబుత్తం ఆతికారిబు, నారు డిబిన్సి పోక్తార్. ఈజియన్ నమ్దరం నడిమిమన్ని పత్తోన్ ఇని లోకు సిల్లి ఇజిరి దేసమ్దు పోక్తార్ (ప్రకటన 1:9).

వాండ్రు అయ ద్విప్పుదు మహివలె, దేవుణు వన్ని దూతవెట యోహానుజ్ తోరిస్తికెక్ వాండ్రు యా పుస్తకమ్దు రాస్త మనాన్. యేసు క్రీస్తు సిలువాదు సాజి, మరజి నిజీత్తి వెనుక, ఇంజుముంజు 60 పంటెజ్ డాట్టివెనుక యా పుస్తకం రని ఆత మనాద్ ఇజి నమ్మిజనార్.

యా పుస్తకం, ఆసియాదు మన్ని ఏడు సజమ్కాజ్ రాస్తి ఉండ్రీ ఉత్తమలెకెండ్ మనాద్ (ప్రకటన 1:10-11). వాని కలమ్దు ఇనికెక్ జర్గినెలి ఇని వందిజ్ యా పుస్తకమ్దు రాస్త మనాద్. యేసుప్రబు మరజి వానివందిజ్, మరి యా లోకమ్దు జర్గిదెజ్ మన్నికెక్వందిజ్, మరి యా లోకమ్ది ఆక్కర్వందిజ్ యా పుస్తకమ్దు రాస్త మనాద్. డెహిసియన్ ఇనికాన్ రోమ రాజు మహివలె యా పుస్తకం రాసి ఆత మనాద్ ఇజి నంఠెండ్ నమ్మిజనార్.

మొదోల్

1 యాక డాజీతిమహి సజతిజ్ దేవుణు, యేసుక్రీస్తుజ్ సెందితివరిజ్ తోరిస్తికెక్ ఇజి వన్నిజ్ తోరిస్తికెక్. వెటని ఇనికెక్ జర్గినెలి ఇజి యేసు క్రీస్తు, వన్ని దూతెజ్ వెప్తా పోక్తాండ్రె, అయ సజతిజ్ వన్ని పణిమణిసి ఆతి యోహానుజ్ తోరిస్తాన్.

2 దేవుణు మాటెజ్ వందిజ్ని, యేసు క్రీస్తు వన్నిజ్ తోరిస్తి విజు వనకాజ్ సుడెజి నిజమాతికెక్ ఇజి యోహాన్ సాస్యం వెహ్నినాన్.

3 దేవుణుబాణిజ్ వాతి యా ప్రవక్త మాటెజ్, డటం సదివీజి మహివరిజ్ వెన్పిసినికాన్ని, నదవినికెక్ వెంజి అయాకెక్ మన్నుదు ఇడ్డి నమ్మిజి మంజినికాన్ దేవుణు సీజిని దివెనమ్దు మంజినికాన్ ఆనాన్. ఎందానిజ్ ఇహిజ, అయాకెక్ అయాలెకెండ్ జర్గిదెజ్ సమయం డగ్రు ఆత మనాద్.

దేవుణుదిజ్ పోగడిజి వెహ్నిని మాటెజ్.

4 ఆసియాదు మన్ని ఏడు, దేవుణు సజమ్కాజ్ యోహాను రాసినాన్. ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతికాన్, మరి వాండ్రు బస్తిమన్ని వన్ని సింహాసనం ఎత్తుమన్ని ఏడు ఆత్తెజ్, వన్ని దయదార్థం మీ మున్ను మంజి, మీరు నిసాతిదాన్ మండ్రెజ్ సాయం కిపిన్.

5-6 నమ్మకమాతికాన్ ఆతి సాసి, సాతి వరిబాణిజ్ తోలిత నిజీత్తికాన్, బామి మున్ను ఏలుబడికి కిజిని విజు రాజురిజ్ మున్ను రాజు ఆతి యేసుక్రీస్తుబా వన్ని దయదార్థమ్దాన్ మీరు నిసాతిదాన్ మండ్రెజ్ సాయం కిపిన్. మజి ప్రేమిస్తాండ్రె వన్ని నలదాన్, మా పాపమ్కాజ్ మజి విడుదల కిజి, వన్ని బుబ్బాతి దేవుణుదిజ్ ఉండ్రీ రాజ్యం లెకెండ్ని, వన్నిజ్ పణి కిని పుజేరిజ్ లెకెండ్ కిత్తిమన్ని యేసుక్రీస్తుజ్ గొప్ప గవర్మన్ అతికారం అంతు సిల్లెండ ఎలాకాలం మనీద్. ఆమెన్.

7 ఇదిలో, వాండ్రు మొసాపుదాన్ వాజినాన్! విజేరి కణుకెక్ వన్నిజ్ సూణెలె. వన్నిజ్ బల్లెమ్దాన్ గుత్తికార్బా సూణార్లె. బామి మున్ను మనికార్ విజేరి, వన్నిజ్ సుడెజి గుండ్రె కొత్తె ఆజి అడెబనార్లె. అయాలెకెండ్ని ఆనాద్. ఆమెన్.

8 “అల్పాని ఒమెగ* నాన”, ఇహిజ మొదొల్ని కొన నానె. “ముజాల మహికాన్, ఏలు మన్నికాన్, వాని కాలమదు మంజనికాన్ అతి విజా దన్నిజ్ నత్తు మన్నికాన్” అతిమన్ని ప్రబు అతి దేవుణు వెహ్హినాన్.

లోకుమరిసి లెకెండ్ ఒరెన్

9 యేసువందిజ్ వాజని ప్రవెజు లోఇ, వాండ్లు కిని ఏలుబడిడుని, వన్ని వందిజ్ కష్టమకు ఓరిస్తాజ్, మీవెట కూడేజి మన్నికాన్ అతి, మీ తంబెరి అతి యోహాసు ఇని నాను, దేవుణు మాట వందిజ్ని యేసువందిజ్ సాస్యం వెహ్హి వందిజ్, నవదరం నడిమి మన్ని పత్మోసు ఇని ద్వీవుదు† ఒరెన మహా.

10-11 వారమందిజ్ మొదొహి రోజు అతి ప్రబు దినమదు, నాను దేవుణు అత్తుదాన్ నిండ్రీతి మహివలె, జోడు బాంగ ఊక్విలెకెండ్ ఉండ్రీ కంటం నా వెనుకహాన్ వెహా. నీను సుడేజనికెజ్ విజు ఉండ్రీ పుస్తకమదు రాసి, ఎపెను, స్ఫూర్న, పెరిగాము, తుయతయర, సరదెను, పిలదెల్వెయ, లవొదికియ ఇని ఏడు, దేవుణు సజమకాజ్ పోత్ అ ఇజి, అయా కంటం నజీ వెహ్హిమన్నిక, నా వెనుకహాన్ నాను వెహా.

12 యాక వెహానె, నావెట వర్గిజని కంటం ఇనికాదొ ఇజి సుడేదెజ్, నాను వెనుక మహ్తా. నాను వెనుక మహ్హిజ్, బజారమదాన్ తయార కిత్తి ఏడు దీవ డండిజ్ సుడేత.

13 అయ దీవ డండిజ నడిమి, లోకు మరిసి అతి వన్నిజ్ పొలితి ఒరెన్ వన్నిజ్ సుడేత. వాండ్లు వన్ని పాదమ్ దాక అందితి మన్ని ఉండ్రీ నీరి సొక్క పొర్పాజి గుండెదు బజారమదాన్ మన్ని కంటువ తోహా అత మహాన్.

14 వన్ని బురాని వన్ని బుర్రది కొప్పు తెల్లూని దూతిదిజ్ పోలిసి, గాండులెకెండ్ తెలాజ్ మహాద్. వన్ని కణకెజ్, నీను కొనెజ్లెకెండ్ మహా.

15 వన్ని పాదమకు కంసు సొల్లుదు కాప్తి, కంజు మెర్నినిలెకెండ్ మహా. వన్ని కంటం గొప్పు పెరి గడ్డ జాటు లెకెండ్ మహాద్.

16 వాండ్లు వన్ని ఉణెరి కియుదు ఏడు సుక్కెజ్ అస్త మహాన్. రుండి దరిజ్బా తెవుగు మన్ని కుర్త లెకెండ్ మన్ని మాటెజ్ వన్ని వెయదాన్ వెల్లి వాతె. వన్ని మొకొం పూర్తి జాయదాన్ మెర్నిని పొడ్డుది జాజ్ లెకెండ్ మహాద్.

17 వన్నిజ్ సుడేతానె, నాను సాతిమన్నిలెకెండ్ వన్ని పాదమకాజ్ అర్త. అయావలె వాండ్లు వన్ని ఉణెరి కియు మా ముస్సు ఇడేజి ఈహు వెహ్హాన్. “తియెల్ ఆమా. నాను మొదొహికాన్. నాను కడేవెరిదికాన్.

18 నాను బత్తిజి మంజనికాన్. నాను సాతిమహికాన్ గాని ఇదిలో ఎలాకాలం బత్తిజిన. మరి సాపదిని సాతికార్ మంజని అయా లోకమది తాలంకియు నా కీదు మనాద్.

19 అందెజ్, ఏలు మన్ని వనకాజ్ వందిజ్, మరి వాని కాలమదు బగ్గిదెజ్ మనికెజ్, నీను సుడేతి మనికెజ్ నీను రాన్ అ.

20 నా ఉణెరి కియుదు నీను సుడేతి మన్ని ఏడు సుక్కెజ్, ఏడు దేవుణు సజమక దూతార్. మరి బజారమదాన్ తయార కితి మన్ని ఏడు దీవ డండిజ్, ఏడు దేవుణు సజమక.

2

ఎపెను పట్టుమదు మన్ని దేవుణు సజమందిజ్ రాసిని ఉత్తం

1 “ఎపెను పట్టుమదు మన్ని దేవుణు సజమది దూతెజ్ రాన్ అ, వన్ని ఉణెరి కియుదు ఏడు సుక్కెజ్ అసి, ఏడు దీవడండిజ నడిమి బూలాజనికాన్ వెహ్హిని మాటెజ్ ఇక్కెజ్.

2 నీను కిజిని పణిజ్ని, నీను కష్టబాడేతికెజ్ నాను నెనిన. నీను ఎస్సానొ హిమ్మెజ్ ఓరిస్తిమన్ని ఇజిబా నాను నెనిన. సెఇకెజ్ కినివరిజ్ నీను ఓరిసి మండ్రెజ్ అల్లె ఇజి నాను నెనిన. అపొస్తురు ఇజి వెహా ఆజి అపొస్తురు ఆజి వరిజ్ నీను పరిన కిజి, వారు అబద్ధం వెహ్హికార్, ఇజి నీను నెస్తి ఇజి నాను నెనిన.

3 నీను నా పేరు వందిజ్ హిమ్మెజ్ డిన్వింధ ఓరిస్తి మన్ని మరి కష్టమకు బరిస్తిమన్ని గాని నీను దన్ని వందిజ్ ఎనెజ్బా వందితిఇ ఇజిబా నాను నెనిన.

4 అహిజ్బా, మొదొహాన్ నా వందిజ్ నీజ్ మహి మొదొహి ప్రేమ, నీను డిస్సినిత్తి ఇజి ఉండ్రీ తప్పు నీ ముస్సు సుడేత.

* 1:8 1:8 అల్ప గ్రీకుబాదని మొదొహి అక్కరం. ఒమెగ కడేవెరి అక్కరం † 1:9 1:9 ద్వీవుసురుల నవదరం మన్ని ఇజి దీసెం

5 నా మున్ను మన్ని ప్రేమ డిసిసిజి, నీను ఎస్సా వెనక సొన్ని మహి ఇజి నీను ఒడిబిల. దన్ని వందిజ్ నీ మున్ను మరిసి, తప్పుజ్ ఒప్పుకొడెజి డిసిసిజి, ముజాల కిజి మహికెజ్ కిజి మన్ల. నీను మున్ను మారిసి, పాపమకు ఒప్పుకొడెజి డిసిసి - సివండ మహిజ, నాను నీడగ్రు వాజి, నీ దీవడండిదిజ్ దన్ని బాడ్డిదాన్ లాగ్గు విసిర్చు.

6 గాని, నీవందిజ్ ఉండ్రె సెగ్గి సజతి మనాద్. నాను ఇన్జం కిఇకార్ ఆతి నికొల జటుదివరి పణిజ్ నీనుబా ఇన్జం కిఇతి.

7 దేవుణు అత్తు దేవుణు సజమ్కాజ్ వెప్పికెజ్ ఇనికెజ్ ఇజి గిబ్బిజ్ ఒడెజి వెంజి అయూవజి నడిజిజి మండ్రు. సెఇకెజి మున్ను, గెలిన్ని వన్నిజ్ పరలోకం ఆతి పరదీనుదు మన్ని పాణం సీని మరాతి పట్టు, తిండ్రెజ్ అక్కు, సీనా.

స్మృత పట్టుమీదు మన్ని దేవుణు సజమ్దిజ్ రాసిని ఉత్తం

8 “స్మృత పట్టుమీదు మన్ని దేవుణు సజమ్ది దూతెజ్ రాన్ల. మొదోహికాన్ని కడెవెరిదికాన్ ఆతి, సాతి వెనుక మరజి నిజీతికాన్ వెప్పిని మాటిజ్ ఇక్కెజ్.

9 నీ కష్టమకు, నీ కరు బత్తు. నాను నెసిన. గాని దేవుణుదిజ్ సెందితి సజతిజ్లోఇ నీను ఆస్తి మన్నికెలికెండె. మాపు యూదురు ఇజి వెప్పిని దేవుణు లోకుర్ ఆఇకార్ ఆతి, సయతానుజ్ సెందితికార్ ఆతి యూదురు, నీవందిజ్ వెప్తి దూసణ మాటిజ్ నాను నెసిన.

10 నీ మున్ను వాడెజ్ మన్ని కష్టమకాజ్ వందిజ్ నీను తియెల్ అమా. నిజి పరిస కిదెజ్, నీ లోకురిజ్ సెగెండారిజ్ సయతాను అస్సిని జెలిదు ఇడిస్సాన్లె. పది దినమకు నీను హిమ్మెజ్ ఒరిసి మండ్రెజ్ వలె. గాని నా మున్ను మన్ని నమకమ్వందిజ్ సాపు వాటిజ్బా నమకమాటికి ఆజి మన్ల. ఎలాకాలం మంజిని బత్తు ఇని ఇనాయం నాను నిజీ సీనాలె.

11 దేవుణు అత్తు దేవుణు సజమ్కాజ్ వెప్పికెజ్ ఇనికెజ్ ఇజి గిబ్బిజ్ ఒడెజి వెంజి, అయూవజి నడిజిజి మండ్రు. సెఇకెజి మున్ను, గెలిన్ని వన్నిజ్ రుండి సాపు ఇని దెబ తగ్గివిద్.

పెర్గాము పట్టుమీదు మన్ని దేవుణు సజమ్దిజ్ రాసిని ఉత్తం

12 పెర్గాము పట్టుమీదు మన్ని దేవుణు సజమ్ది దూతెజ్ రాన్ల.

“రుండి దరిజ్ తెపుగు మన్ని కుర్లెకెండ మన్ని మాటిజ్ మన్నికాన్ వెప్పినికెజ్ ఇక్కెజ్.

13 సయతాను ఏలుబడి: కిజిని పట్టుమీదు నీను బత్తిజిని ఇజి నాను నెసిన. సయతాను ఏలుబడి: కిజిని అయ పట్టుమీదు నా మున్ను, నమకం ఇడ్డి నమకమాతి సాసి ఆతి అందిపాయెజ్ సప్తి కాలమ్దుబా నా మున్ను, ఇడ్డి నమకం డిసిసివిండ, నా పేరు వందిజ్ నీను నిజం నిహిమహి ఇజి నాను నెసిన.

14 గాని నజీ వడి:ఇకెజ్ సెగం సజతిజ్ నిబాన్ మన్ను. బొమ్మెజి పూజి సిత్తికెజ్ తింజి, రంకు బులాలాజి పాపం కిదెజ్ ఇస్రాయేలు లోకురిజ్ రేప్పి మన్నికాన్ ఆతి బాలాకుజ్* అక్కెజ్ నెస్సిని మన్నికానాతి బిలాము† బోద లోజిజి నడిసినికార్ నీ లోఇ మనార్.

15 నికొల బోద లోజిజి మన్నికార్బా నీ లోఇ మనార్.

16 అందెజి నీను మున్ను మారిసి పాపమకు ఒప్పుకొడెజి డిసిసిల. నీలిబి నాను బేగి నీడగ్రు వాజి నా వెయూదాన్ వాజిని కుర్లె కెండ మన్ని మాటిజాణిజ్ పరివెట విదెం కినా.

17 దేవుణు అత్తు, దేవుణు సజమ్కాజ్ వెప్పికెజ్ ఇనికెజ్ ఇజి గిబ్బిజ్ ఒడెజి వెంజి అయూవజి నడిజిజి మండ్రు. సెఇవనకాజ్ మున్ను, గెలిసినివన్నిజ్ నాను పరలోకమ్దు డాజిజితి మన్ని మున్ను ఇని తిండి సెగం ఉండెజ్ సీనా. మరి, దోహక్కికాండ్రె ఆవిండ, మరి ఎయెన్ వన్నిజ్బా నెన్ఇ ఉండ్రె కొత్త పేరు రాస్తి మన్ని ఉండ్రె తెల్లని పణకుబా సీనా.

తుయతయిర పట్టుమీదుమన్ని దేవుణు సజమ్దిజ్ రాసిని ఉత్తం

* 2:14 2:14 ఇస్రాయేలు లోకురి మున్ను, సయెమ్ సీదెజ్ ఇజి బిలాము ఇని ఒరెన్ గురు నన్ని ప్రవక్తిజ్ కూక్కి మన్ని మోయాబు దేనెమ్ది రాజు. బుద్ది సిల్లెండ దేవుణుదిజ్ వెత్తెకమాతి పణి కితి వందిజ్ వన్ని వందిజ్ దేవుణు మాడుకు రాస్త మనార్. సంకియా 22-24, యెహోసువ 24:9, నాయాది 11:25. † 2:14 2:14 ఇస్రాయేలు లోకురి మున్ను, సయెమ్ సీదెజ్ ఇజి మోయాబు దేనెమ్ది రాజు బాలాక్ కూక్కి మని ఒరెన్ గురు నన్ని ప్రవక్త. సంకియా 22-24.

18 “తుయతయిర పట్టుమీదు మన్ని దేవుణు సజమీది దూతెజి రాన్అ కణుకెజ్ సినుకొనెజ్ లెకెండ మన్ని, మెర్నిని కంజుదిజ్ పోలితి పాదమీకు మన్ని దేవుణు - మరిసి అతి వన్ని మాటెజ్ ఇక్కెజ్.

19 నీను కిజిని పణిజ్ ఎలాగ మర్రికెజ్, నీ ప్రేమ ఎలాగ మర్రిక, నీ నమకం ఎలాగ మర్రిక ఇజి నాను నెసిన. నీను మహిపరి వందిజ్ కిజిని పణిజ్ని నీను హిమ్మెజ్ డిసేవిండ ఒరిని మంజినిక విజు నాను నెసిన. నిజమె ముజాల కిజి మహి దన్నిజ్ ఒద్దె నెగెండ నీను ఏలు కిజిని.

20 గాని నజి నపిజ ఉండ్రీ సజతి నీబాన్ మనాద్. దన్నిజ్ అదిని దేవుణు ప్రవక్త ఇజి వెప్పిని యెజెబెలు ఇని బోదెలిదిజ్, నీబాన్ మండ్రెజ్ ఒప్పుకొటి ఇజి ఉండ్రీ తప్పు నీ మున్ను, వెప్తాజ్ మనాద్. అది దన్ని బోదదాన్ రంకు బూలాదెజ్ మరి బొమ్మెజి మాడిసె, బొమ్మెజి పూజెజ్ సిత్తికెజ్ తిండ్రెజ్ ఆనాద్ ఇజి నా మున్ను, నమకం ఇడ్డిమన్ని, నా పణికిని వరిజ్ మొసెం కిజి తప్పు సరిదు నడిపెసినాద్.

21 అది రంకు బూలానిక డిసెసీజి, దన్ని మన్ను మారిసి పాపమీకు ఒప్పుకొడెజి డిసెసీదిజ్ సమయం సిత్ర, గాని అది ఒవపతాద్.

22 ఇదిలో నాను దన్నిజ్ నిజ్దెజ్ అట్టెజి పెరి కష్టమీకాజ్ మంసమ్దు తెర్ప్పాలె. దన్నివెలి కూడెజి రంకు బూలాతికార్, వారు దన్ని వెలి కూడెజి కిత్తిమహి పణిజవందిజ్ ఒడిబిజి, వనకాజ్ ఒప్పుకొడెజి డిసెసీవిండ మహిజ, వరిజ్ నాను నండ్రీ కష్టమీదు అర్ప్పాలె.

23 దన్ని కొడెరిజ్ నాను సప్పు. అయాపలె నాను లోకురి మున్నుజ మన్ని అలోసనమ్కుని ఆసెజ్ ఇనికెజ్ ఇజి సుడెజి నెసినికాన్ ఇజి విజు దేవుణుసజమీకు నెసె. నీ లోజ ఒరెన్ ఒరెన్ వన్నిజ్ వన్నివన్ని పణిదిజ్ తగితి లెకెండ్రీ నాను సూణా.

24 దన్ని బోదదిజ్ లోజివరిజ్ని మరి నయ్యూనులో ఇ డాజితి మన్ని వనకాజ్ నెస్టెజ్ వరి మున్ను ఇడెవిండ మంజిని వరిజ్, నాను వెప్పినిక ఇనిక ఇహిజ, మీరు మరి ఇనికబా కిదెజ్ ఇజి వెప్పి, మీ మున్ను మరి ఇని బరు నాను మొవపి.

25 గాని నాను వానిదాక మీరు నెస్తిమన్ని వనకాజ్ నెగెండ్రీ అసి మండ్రు.

26 ఆక్కర్దాక నజి ఇస్సమాతి వజి కిజి మంజి, సెజి వనకాజ్ మున్ను, గెలిసినివన్నిజ్, దేసమ్క లోకురి *మున్ను, ఏలుబడి కిదెజ్ అతికారం సీనా.

27 నా బుబ్బాతి దేవుణుబాణిజ్ నజి అతికారం దోహక్తిమన్నిలెకెండ్రీ, వన్నిజ్ లోకురి మున్ను, అతికారం సీనా. దేవుణు మాటదు రాస్తిమన్నిలెకెండ్రీ, “వాండ్రు ఇనుము డుడ్డుదాన్ వరిజ్ ఏలుబడి కిసాన్. కుంబెరి వన్ని కుండెజ్లెకెండ్రీ వరిజ్ పెడెల్ కొత్తాన్”

28 సెజి వనకాజ్ మున్ను, గెలిస్తి వన్నిజ్, నాను కోడిజామ్దు సోని సుక సీనా.

29 దేవుణు అత్తు దేవుణు సజమీకాజ్ వెప్పినికెజ్ ఇనికెజ్ ఇజి గిబ్బిజ్ ఒడిజి వెంజి అయావజి నడిజి మండ్రు.

3

నరీదిను పట్టుమీదు మన్ని దేవుణు సజమీదిజ్ రాసిని ఉత్తం.

1 “నరీదిను పట్టుమీది దేవుణు సజమీది దూతెజి రాన్అ. ఏడు సుక్కెజ్ని దేవుణు ఏడు అత్తు మన్నికాన్ వెప్పిని మాటెజ్ ఇక్కెజ్. నీను కిజిని పణిజ్ నాను నెసిన. బత్తిజినికాన్ ఇజి నిజి పేరు మనాద్. గాని నీను సాత్తికెసె.

2 నా దేవుణు ఎద్దు నీ పణిజ్ పూర్తి అతికెజ్ ఇజి తోరఉతె. అందెజి నీను, నిజిజి తెలి ఆజి, సాదెజ్ డగ్రు అతి మన్ని మిగిలిత్తి వనకాజ్ సత్తు కిబీన్అ.

3 అందెజి నీను ముజాల ఇనిక నెస్తి మన్నిదో, ఎలాగ వెహి మన్నిదో ఇజి ఎత్తు కిల. వనకాజ్ లోజిజి పాపమీకు ఒప్పుకొడెజి డిసెసీజి, మారు మున్ను పొందిల. నీను నిజిజి తెలి ఆజి మన్విండ మహిజ, ఒరెన్ డోజారి వానిలెకెండ్రీ నాను వానా. ఇనిక ఇహిజి ఎమేణి గడియారు నాను, నీ డగ్రు వానానో ఇజి నిజి తెలివద్.

4 గాని వరి సొక్కెజ్ మొప్పి, ఆవండ, నుబరం మన్నికార్ సెగొండార్ సర్దిన పట్టుమదు నీబాన్ మనార్. అందెజె వారు మొప్పి, సిల్లి తెల్లాని సొక్కెజ్ తోడిఃగిజి, నావెట బూలాదెజ్ తగ్గికార్.

5 సెజ వనకాజ్ గెలిసినికాన్, వరిలెకెండ తెల్లాని సొక్కెజ్ తోడిఃగిజి మంజినాన్. దేవుణు వెట ఎలాకాలం బత్తినివరి పేరుకు రాసి ఇడఃజిని పుస్తకమదాన్ నాను వన్ని పేరు ఎనెజబా డెయ్జి పోక్వ. గాని నా బుబ్బు ఎద్దుని వన్ని దూతార్ ఎద్దు వాండ్రు నజీ నెందితికాన్ ఇజి వన్ని పేరు ఒప్పకొణా.

6 దేవుణు ఆత్మ దేవుణు సజమకాజ్ వెప్పినికెజ్ ఇనికెజ్ ఇజి గిబ్బిజ్ ఒడఃజి వెంజి అయావజి నడిఃజి మండ్రు.

పిలదెల్లియ పట్టుమదు మన్ని దేవుణు సజమదిజ్ రాసిని ఉత్రం.

7 “పిలదెల్లియ పట్టుమదు మన్ని దేవుణు సజమది దూతెజి రాన్అ. పరిసుద్దమాతికాన్* నిజామాతికాన్ అతి, దావీదు పట్టుమదిజ్ ఎలుబడిః కిదెజ్ అతికారం మన్నివన్నిలెకెండ దన్ని తాలమ్కియు మన్నికాన్ వెప్పిని మాటెజ్ ఇక్కెజ్. వాండ్రు రేతిజి ఎయెనబా కెహ్లాజ్ అట్ఎన్. వాండ్రు కెహ్లాజి ఎయెనబా రేదెజ్ అట్ఎన్.

8 నీను కిజిని పణిజ్ నాను నెసిన. నిజి మన్ని సత్తు కండెక్ అతిజ్బా నీను నా మాటెజ్ లోజిజి నా పేరు నెన్వి ఇజి వెహిఇతి. ఇదిలో నీ ఎద్దు నాను సేహ్లా రేత మన్ను. దన్నిజ్ ఎయెనబా కెహ్లాజ్ అట్ఎన్.

9 యూదురు అవిండ, మాపు యూదురుజు, మాపు దేవుణు లోకుర్ ఇజి అబద్దం వెప్పిని సయూను సజమదివరిజ్, నీ డగ్గు వాజి నీ పాదమకాజ్ అర్చి మాడిఃస్పిలెకెండ నాను కీనా. నాను నిజి ప్రేమిస్త మన్ను ఇజి అయావలె వారు నెస్సార్లె.

10 ప్రమెజ్ డిఃనవిండ ఓరిసినివందిజ్ నాను సిత్తి అడైజ్ నీను లోజిత్తి మహి. అందెజె బూమి మున్ను బత్తిని వరిజ్ విజిరిజ్ వాజిని పెరి కస్తమకాజ్ కూడిఃతి పరిస కాలమదు నాను మిజి కాపాడ్చా.

11 ఇదిలో, నాను బేగెనె వాజిన. నీను గెలిస్పివందిజ్ నిజి దోహక్కిని ఇనాయం మరి ఎయెనబా ఒవిండ, నీను నెస్పిమన్ని వనకాజ్ డిఃనవిండ గటిజి అసి మన్అ.

12 సెజ వనకాజ్ మున్ను. గెలిస్పి వన్నిజ్ నా దేవుణు గుడిఃదు ఉండ్రీ తంపం లెకెండ కిన. వాండ్రు ఎనెజబా దన్ని బాణిజ్ డిఃసి సొన్విన్. నా దేవుణు పేరుని, పరలోకమదాన్ దేవుణుబాణిజ్ డిగ్గి వాజిని కొత్త యెరుసలెం ఇని నా దేవుణు పట్టుం పేరుని, నా కొత్త పేరుబా నాను వన్ని మున్ను. రాస్సా.

13 దేవుణు ఆత్మ దేవుణు సజమకాజ్ వెప్పినికెజ్ ఇనికెజ్ ఇజి గిబ్బిజ్ ఒడఃజి వెంజి అయావజి నడిఃజి మండ్రు.

లవొదికియ పట్టుమదు మన్ని దేవుణు సజమదిజ్ రాసిని ఉత్రం.

14 “లవొదికియ పట్టుమదు మన్ని దేవుణు సజమది దూతెజి రాన్అ. నమ్మకమాతికాన్ని నిజమాతి సాసి అతికాన్, దేవుణు తయార్ కితి విజి వనకాజ్ మున్ను. అతికారం అతి ఆమెన్ ఇనికాన్ వెప్పిని మాటెజ్ ఇక్కెజ్.

15 నీ పణిజ్ ఎలాగ మర్రికెజ్ ఇజి నాను నెసిన. నీను సలాజ్ మనికి ఆఇ. వేసాజ్ మన్నికెబా ఆఇ. నీను ఎమేణికబా ఉండ్రీ రకం ఆజి మంజినిక ఇహెజి బాగ మహోద్, ఇజి నాను కొరిజిన†

16 నీను పణిదిజ్ రెఇకి. నీను సలాజ్ సిల్లెద్. వేసాజ్బా ఆఇ. నీను గోరువేసాజ్ నన్నికి. అందెజె నా వెయుదాన్ నాను నిజి పూస్సు విసిర్చు.

17 నీను గత్ర నన్నికి, దిక్కు గతి సిల్లికి, బీదాదికి, గుడ్డిదికి, డుమ్డ మన్నికి. గాని యాకెజ్ నిజం నెన్విండ, నజి ఆస్తి మనాద్, నాను డబ్బుజ్ గణస్త మనా, నజి ఇనిక తక్కు. సిల్లెద్ ఇజి నీను వెహె ఆజిని.

* 3:7 3:7 గొప్ప నెగ్గాన్, ఇని తప్పుబా సిలికాన్ † 3:15 3:15 లవొదికియ పట్టుమదిజ్ డగ్గు గొప్ప పేరు మన్ని రుండి పట్టుమకు మహి. హయెరపోలిన్ ఇని పట్టుమదు వేసాజ్ ఏరు సొని ఉండ్రీ గడ్డ మహోద్. లోకుర్ వరి ఇబ్బుజ్ సొండ్రెజ్ ఇజి, బాన్ సొన్ని అయ గడ్డారు ఏరుతణెజి మహోర్. కొలోసాన్ ఇని పట్టుమదు ఉండ్రెజ్ గొప్ప రుసి మన్ని ఏరు సొని ఉండ్రీ గడ్డ మహోద్. గాని లవొదికియ పట్టుమది ఏరు సహాజ్ మహోద్. అందెజె లవొదికియ పట్టుమది దేవుణు సజమదిజ్ ఇని పణిదిజ్బా రెఇ వేసాజ్ ఏరుదిజ్ పొలిసి యేను క్రిస్తు వెప్పినికాన్ ఇజి సెగొండార్ వెప్పినికాన్.

18 గాని నాను నిజీ బుద్ధి వెహ్నినిక ఇనిక ఇహిజ, నీను ఆస్తి మనికి ఆదెజ్ ఇజి సినుదు సుర్జి సుబరం ఆతి బజారం నా బాణిజ్ కొలత. మరి నీ సిగు డాజీనిలెకెండ్ పొరపాదెజ్ తెల్లాని సొక్కెజ్ నా బాణిజ్ కొలత. నీ కణుకెజ్ టిటాజ్ తోర్దెజ్ కణుకెజి రాస్తెజ్ కాటికబా నా బాణిజ్ కొలత.

19 నాను ప్రేమిసిని విజేరిజ్ బుద్ధి వెహ్ని, సిక్కుదాన్ దిదిజినా. అందెజ్ నీను మన్నుదు నిజం ఆస ఆజి మన్త. మరి మారు మన్ను పొందిజి నీ పాపమ్కు ఒప్పుకోడెజి డిసి సితి.

20 ఇదిలో, నాను సేహ్లా డగ్గు నిల్సి, సేహ్లా రేతి ఇజి కొత్తినా. ఎయెన్బా నా కంటం వెంజి సేహ్లా రేతిజి, నాను లోఇ సొన్సి వన్నివెట బోజనం కినా. వాండ్రుబా నావెట బోజనం కినాన్.

21 నాను ఎలాగ సెఇ వనకాజ్ మున్ను గెలిసి, నా బుబ్బువెట వన్ని సింహాసనమ్దు బస్త్ర మనానో, అయాలెకెండెనె, సెఇ వనకాజ్ మున్ను గెలిన్సి వన్నిజ్ నావెట నా సింహాసనమ్దు బస్త్రెజ్ బా అక్క సినా.

22 దేవుణు ఆత్మ దేవుణు సజమ్కాజ్ వెహ్నినికెజ్ ఇనికెజ్ ఇజి గిబ్బిజ్ ఒడెజి వెంజి అయావజి నడిజి మండ్రు”.

4

పరలోకమ్దుమన్ని సింహాసనం.

1 యా సజతిజ్ జర్గితి వెనుక నాను సుండెతిజ్ ఇదిలో పరలోకమ్దు ఉండ్రీ సేహ్లా రే ఆతి మహిక సుండెత. జోడుబాంక పలక్తివన్ని జాటులెకెండ్, నావెట ముజాల వర్గితి మన్ని కంటం మన్నికాన్, “ఇబ్బె ఎక్కి రతి. దిన్ని వెనుక ఇనికెజ్ జర్గినెలె ఇజి నాను నిజీ తోరిస్తాలె”, ఇజి వెహ్లాన్.

2 వెటన నాను దేవుణు ఆత్మ వెట నిండ్రిత. నస్తీవలె పరలోకమ్దు ఉండ్రీ సింహాసనమ్దు ఒరెన్ బస్తిమన్నిలెకెండ్, నా ఎద్దు తోర ఆతాద్.

3 అయ సింహాసనమ్దు బస్తి మన్నికాన్ పొద్దులెకెండ్ గొప్పు జాయ్ మన్ని ఎరాని రంగు పణుకుదిజ్ పొలిసి తోరితాన్. సింహాసనమ్దిజ్ సుటులం గొప్పు జాయ్ మన్ని ఆకు రంగుది కొడెవేలి మహాద్.

4 అయ సింహాసనమ్దిజ్ సుటులం ఇరువయ నాల్లి సింహాసనమ్కు మహా. అయ ఇరువయ నాల్లి సింహాసనమ్కాజ్, తెల్లాని సొక్కెజ్ తోడిగిజి, రాజురి టోపిజ్ నన్ని బజారం టోపిజ్ బురారు తోడిగిజి ఇరువయ నాల్ఎరె పెద్దెలుబు బస్త్ర మహార్.

5 అయ సింహాసనమ్దాన్ గొప్పు మెర్గిని జాయ్, దీడెజినికెజ్, పిడుగుజ్ వెల్లి వాజి మహా. అయ సింహాసనం ఎద్దు ఏడు దీవెజ్ జాయ్ సీజి మహా. ఆక్కెజ్ దేవుణు ఏడు ఆత్మెజ్.

6 అయ సింహాసనం ఎద్దు గటి మన్ని గాజుదిజ్ పొలితి సమ్దరమ్లెకెండ్ మహాద్. అక్క ఇని రంగు సిల్లి గటి మన్ని అద్దం లెకెండ్ మహాద్. నడిమిని, అయ సింహాసనమ్దిజ్ సుటులం, ఒడోల్ మున్ను, వెనుక ముందాల విజి, కణుకెకాణిజ్ నిండ్రీతి మన్ని పాణం మన్ని నాల్లి జంతుజ్ మహా.

7 పాణం మన్ని, మొదోహి జంతు మొకొ సింహం లెకెండ్ మహాద్. రుండి జంతు మొకొ దూడెలెకెండ్ మహాద్. మూండ్రీ జంతు లోకు మొకొ నన్ని మొకొ మహికాద్. నాల్లి జంతు ఎగ్రిని డేగలెకెండ్ మహాద్.

8 యా నాల్లి జంతుజి, ఉండ్రీ ఉండ్రీ దన్నెజ్ ఆరెసిజ్ రెక్కెజ్ మహా. అయ రెకెజి మున్నుని అడిగి విజి నిండ్రు కణుకెజ్ మహా. అయ నాల్లి జంతుజ్.

“ముజాల మహికాన్, ఏలు మన్నికాన్, వాని కాలమ్దు మంజినికానాతి విజు వనకాజ్ అతికారం మన్ని దేవుణు పరిసుద్దమతికాన్, పరిసుద్దమతికాన్, *పరిసుద్దమతికాన్”, ఇజి రెయు పొగల్ డిఁన్ఏండ పాల్లి మహా.

9 ఎస్తివలెబా అయ పాణం మన్ని నాల్లి జంతుజ్, అయ సింహాసనమ్దు బస్తి మన్ని ఎలాకాలం బత్తిజినికాన్ ఆతి వన్నిజ్, పొగిడిజి గవరం సీజి వందనమ్కు వెహ్ని పొగిడిజి మహాలో,

10 నస్తీవలె అయ ఇరువయ నాల్ఎరె పెద్దెలుబు అయ సింహాసనమ్దు బస్తి మన్నివన్నిజ్ ఎద్దు పడగెజి అర్దారె, ఎలాకాలం బత్తిజిని వన్నిజ్ మాడిసి యా లెకెండ్ పొగిడిజి వెహ్ని మహార్.

* 4:8 4:8 ఇని కల్లి సిల్లెండ గొప్పు నగ్గికాన్

11 “మా ప్రభు అతి దేవుణు, విజు వనకాజ్ తయార కిత్తికి నీనె. నీను ఇస్తుమాతి వజ అక్కజ్ విజు తయార ఆతె. అయాలెకెండెన అక్కజ్ మన్నె. అందెజె నీ గొప్పు గవరం వందిజ్, నీ గొప్పు సత్తు వందిజ్ లోకుర విజెరె నిజి గవరం సీజి పొగిడిజెజ మంజినార్”, ఇజ వెహ్ని బజారమ్దాన్ తయార కిత్తి రాజురి టోపిలెకెండె మన్నె వరి టోపిజ్, సింహాసనం ఎద్దు ఇడ్డార్.

5

దేవుణు కియుదు మన్నె పుస్తాకమ్ని గొరెపిల్ల.

1 నస్తవలె, లోజని వెల్లి రాసె ఆతిమని, ఏడు సీలుజ్ పొక్తిమన్నె ఉండ్రి పుస్తకం అయ సింహాసనమ్దు బస్తె మన్నెవన్నె ఉణెరె కియుదు అస్తి మన్నెక సుడెజ్.

2 “అయ సీలుజ్ లాగ్ని పుస్తకం రెక్తెజ్ తగ్నికాన్ ఎయెన్ మనాన్”, ఇజ గొప్పు సత్తుమన్నె ఒరెన్ దేవుణు దూత డటం డేల్లి వెహ్నిక సుడెజ్.

3 గాని, పరలోకమ్దు మన్నె వరి లోజ గాని, బూమి మున్ను మన్నె వరి లోజ గాని, అయ లోకమ్దు మన్నె వరి లోజ గాని అయ పుస్తకం రెక్తెజ్ లోజ సుడెదెజ్నో అట్టి ఎంబె వన్నెజ్బా తోరెవతాద.

4 అయ పుస్తకం రెక్తెజ్నో, లోజ సుడెదెజ్నో తగ్ని ఎయెన్ వన్నెజ్బా తోరెఇతిజ్ నాను నండ్ అడెబాజె మహ.

5 నస్తవలె, అయ పెద్దెలుజలొజ ఒరెన్, “నీను అడెబామా. ఇదిలో, దావీదు మొదొల్దాన్ సిగ్నిస్తె, యూద కుటుమ్దికాన్ ఆతి సింహం ఇజ పేరు మన్నెకాన్, అయ ఏడు సీలుజ్ లాగ్ని పుస్తకం రెక్తెజ్ అట్టి వన్నె లెకెండె గెలస్త మనాన్”, ఇజ నజి వెహ్నెన్.

6 నస్తవలె, అయ పెద్దెలుజ నడిమిని పాణం మన్నె నాల్లి జంతుజ నడిమి మన్నె అయ సింహాసనం నడిమి, ముజాల కత్తె ఆతిమనిక, గాని ఏలు నిల్లి మంజని ఉండ్రి గొరె పిల్లదిజ్ సుడెజ్. అయ గొరె పిల్లదిజ్ ఏడు కొముకుని ఏడు కణుకెజ్ మహ. అయ కణుకు బూమి మున్ను విజు బాడ్డిజ పొక్తిమన్నె దేవుణు ఏడు ఆత్మెజ్.

7 వాండ్రు వాతాండ్రి అయ సింహాసనమ్దు బస్తెమన్నె వన్నె ఉణెరె కియుదు మన్నె పుస్తకం లొస్తాన్.

8 వాండ్రు అయ పుస్తకం లొస్తవలె, పాణం మన్నె అయ నాల్లి జంతుజ్ని, అయ ఇరువయ నాల్వెరె పెద్దెలుజు విజెరె, టోయలెజ్ని, నమ్మెతి వరి పార్దనమ్కు ఆతి నెగ్గి వాసనం సీజిని దువమ్కు ఇడ్డి మన్నె బజారమ్ది గిన్నెజ్ ఒరెన్ ఒరెన్ వరి కియుదు అస్తారె గొరె పిల్ల ఎద్దు పడగజె అర్దార్.

9 అయవలె, “నీను అయ పుస్తకం లొన్, దన్నె సీలుజ్ లాగ్దెజ్ తగ్నికి. ఎందాన్జె ఇహెజ నీనె కత్తె ఆతి, నీ నలదాన్ విజు జాతిజెజిజ్, విజు బానెజాణిజ్, విజు లోకుర బాణిజ్, విజు దేసమ్కాణిజ్ లోకురిజ్ దేవుణు వందిజ్ కొటి.

10 మరి పరిజ్ దేవుణుదిజ్ ఉండ్రి రాజ్యం లెకెండెన వన్నెజ్ పణి కిని పుజెరిబులెకెండె కిత్తి. వారు బూమి మున్ను ఏలుబడి: కినార్”, ఇజ అయ పాణం మన్నె నాల్లి జంతుజ్ని ఇరువయ నాల్వెరె పెద్దెలుజు ఉండ్రి కొత్త పాట పార్దార్.

11 నస్తవలె నాను సుడెతిజ్ నండ్ దూతారి కంటం వెహ. వరి లెక్క కొటి కొటిదిజ్ ఇంక లావ్ మహ. వారు అయ సింహాసనమ్దిజ్ని అయ పాణం మన్నె నాల్లి జంతుజ్ని అయ ఇరువయ నాల్వెరె పెద్దెల్లెజ సుటులం మంజె,

12 “కత్తె ఆతి గొరె పిల్ల పొగిడి: ఆదెజ్ తగ్నికాన్. అతికారం మన్నెకాన్ ఆదెజ్, అస్తి మన్నెకాన్ ఆదెజ్, గెణం మన్నెకాన్ ఆదెజ్, సత్తుమన్నెకాన్ ఆదెజ్, మర్యూద లొనె ఆదెజ్, గవరం లొనె ఆదెజ్, పొగిడి: ఆదెజ్ తగ్నికాన్”, ఇజ గొప్పు వెరి కంటమ్దాన్ పార్ది మహార్.

13 నస్తవలె పరలోకమ్దు మన్నె, బూమి మున్ను మన్నె, బూమి అడి:గి మన్నె, నమ్దరమ్దు మన్నె, పాణం మనికెజ్ విజు కూడెజె.

“సింహాసనమ్దు బస్తె మన్నెవన్నెజ్ని, గొరెపిల్లదిజ్, పొగిడి: ఆజె మంజనిక, మర్యూద, గవరం, సత్తు అంతు సిల్లెండె ఎలకాలం మనీద”, ఇజ వనక కంటమ్కాణిజ్ పారిజనిక, పొగిడి:జె మంజనిక నాను వెహ.

14 పాణం మన్ని అయ జంతుజ్ “అమెన్”, ఇజి వెహ్లాజ్ అయ ఇరువయ్ నాల్వర్ పెద్దెలుజు వడగజి అర్చి, గొరెప్పిల్లదిజ్ పొగిడిజి మాడిస్తార్.

6

సీలుజ్

1 నస్తవలె, గొరెప్పిల్ల అయ ఏడు సీలుజ లొఇ, మొదొహి దన్నిజ్ లాగితిక నాను సుడజత. అయావలె అయ పాణం మన్ని నాల్లి జంతుజలొఇ, ఉండ్రీ జంతు పిడుగు జాటు నన్ని కంటమ్దాన్ “రఅ!”, ఇజి వెహ్లాజ్ వెహ.

2 నాను సుడజతిజ్, ఉండ్రీ తెల్లాని గుర్రం తొరితాద్. దన్ని మున్ను ఒరెన్ దొను అసి బస్త మహాన్. వన్నిజ్ బజారమ్దాన్ తయార్ కిత్తి, రాజిరి టొపి నన్ని ఉండ్రీ టొపి దొహ్కాద్. వాండ్రు గెలిస్తాన్ ఆజి మరి గెలిస్తాజ్ ఇజి సొత్తాన్.

3 గొరెప్పిల్ల రుండి సీలు లాగితివలె పాణం మన్ని రుండి జంతు “రఅ!”, ఇజి వెహ్లాజ్ నాను వెహ.

4 నస్తవలె సిను నన్ని ఎరాని రంగు మన్ని ఉండ్రీ గుర్రం వెల్లి వాతాద్. బూమి మున్ను మన్ని లొకర్, ఒరెన్ మరిఒరెన్ వన్నిజ్ సప్తజ్ ఇజి, బూమి మున్ను సమదనం సిల్లెండ కిడెజ్ అయ గుర్రం మున్ను బస్తమన్నివన్నిజ్ అతికారం దొహ్కాద్. వన్నిజ్ ఉండ్రీ పెరి కుర్ద దొహ్కాద్.

5 గొరెప్పిల్ల మూండ్రీ సీలు లాగితివలె పాణం మన్ని మూండ్రీ జంతు “రఅ!”, ఇజి వెహ్లాజ్ నాను వెహ. నాను సుడజతిజ్, ఇదిలో, ఉండ్రీ కర్చి గుర్రం తొరితాద్. దన్ని మున్ను బస్త మన్నికాన్ తూన్సిక వన్ని కియుదు అస్త మహాన్.

6 “ఉండ్రీ రొజుదిజ్ కూలి ఉండ్రీ డొక్కు గొదుము ఇజి, మరి, ఉండ్రీ రొజుదిజ్ కూలి మూండ్రీ డొక్కుజ్ సామ ఇజి వెహ్లాన్. మరి నూనెదిజ్ ఒలివ మరెకని, ద్రాసపట్టురసమ్వందిజ్ ద్రాక్కు టొటదిజ్ పాడజ్ కిడెజ్ అవెద్”, ఇజి అయ పాణం మన్ని నాల్లి జంతుజ నడిమిహాన్ వెహ్లిలెకెండ ఉండ్రీ కంటం నాను వెహ.

7 గొరెప్పిల్ల నాల్లి సీలు లాగితివలె, పాణం మన్ని నాల్లి జంతు “రఅ!”, ఇజి వెహ్లాజ్ నాను వెహ.

8 నాను సుడజతిజ్ నస్తవలె, నీరు నన్ని రంగు మన్ని ఉండ్రీ గుర్రం తొరితాద్. దన్ని మున్ను బస్తమన్ని వన్ని పేరు, సావు. అయా లొకం వన్ని వెనుక నడిజి మహాద్. కుర్దెజాణిజ్, కరుదాన్, జబ్బుజాణిజ్, బూమిదు మన్ని అడివి జంతుజ వెట, బూమి మున్ను బత్తిజిని వరిజ్ నాల్లి బాటజ్ లొఇహాన్ ఉండ్రీ బాటది వరిజ్ సప్తజ్ ఇజి వన్నిజ్ అతికారం దొహ్కా మనాద్.

9 గొరెప్పిల్ల అయదు సీలు లాగితివలె, దేవుణు మాట లొజిత్తివందిజ్, మరి దేవుణుమాటవందిజ్ మన్ని నెగ్గి సాస్యం వందిజ్ కత్తె ఆతిమన్ని వరి ఆత్మెజ, పూజి సిని మాలిపీట అడిగి నాను సుడజత.

10 వారు గొప్ప పెరి కంటమ్దాన్, “పరిసుద్దమాతికాన్ ఆతి విజి దన్నిజ్ అతికారం మన్ని నిజమాతి దేవుణు, నీను, మజి సప్తి వరిజ్ దన్నిజ్ తగితి సిక్కు సిపిండ, బూమి మున్ను బత్తిని వరిజ్ తీర్చు తీరిసి, సిక్కు సిపిండ ఎసాని కాలం మంజినిలె?”, ఇజి డెల్చి వెహ్ని మహాన్.

11 నస్తవలె వరిజ్ ఒరెన్ ఒరెన్ వన్నిజ్ తెల్లాని సొక్కెజ్ దొహ్కె. వెనుక వారు సప్తె ఆతిలెకెండెన్ సప్తె అదెజ్ మన్ని తంబెరిజ్ లెక్క, మరి వరివెట కూడజి వణికితివరి లెక్కబా పూర్తి ఆనిదాక మరి కండెక్ కాలం కాప్ కిజి మండ్రెజ్, ఇజి వరిజ్ వెహ ఆతాద్.

12 గొరెప్పిల్ల ఆరు సీలు లాగితిక నాను సుడజత. నస్తవలె గొప్ప గటిజ బూమి కద్దితాద్. పొద్దు, కర్చి రంగులెకెండె ఆతాద్. నెల పూర్తి, నలరంగు లెకెండె ఎర్తజ్ ఆతాద్.

13 పెరి గాలిదిజ్ దూకె ఆజి బొడె: మరాతి ఆక్కరి కాయెజ్ రాలితిలెకెండెన్ ఆగసమ్దాన్ సుక్కెజ్ రాత్తె.

14 ఉండ్రీ కాకితం నుటిసి లెకెండెన్ ఆగసం నుటి ఆజి తొపిండ ఆతాద్. విజి గొరొక్, సమ్దరం నడిమి మన్ని ఇజిరి దేసెమ్కు విజి వనక వనక బాడ్డిదాన్ డిస్తె సాహె.

15 నస్తవలె, బూమి మున్ను మన్ని రాజర్, ఏలుబడి: కినికార్, సయ్నమ్ది నెయ్యర్, ఆస్తి మనికార్, గొప్ప అతికారం మన్నికార్, వెట్టివణి కినికార్ని వెట్టివణిమణసిరి ఆఇకార్ విజెరి తియెల్ ఆతార్, గొరొక్ సాలమ్కాజ్ లొఇ, నట్టు పొరొజ డాజితార్.

16 వారు గొరొకాజ్‌ని సట్టుజ యాలెకెండ్ వెప్పి మహార్, “వీరు మా మున్నుబా అర్చి, సింహాసనమీదు బన్తిమన్ని వన్ని మొకొమ్‌దాన్‌ని గొరెప్పిల్ల కోపమ్‌దాన్ మజి డాప్ప”.

17 “ఎందానిజ్ ఇహిజ దేవుణుని గొరెప్పిల్ల బూమి మున్నుబా మన్నివరి మున్నుబా తీర్పు తీరిస్సి రోజు వాతాద. వరి ఎద్దు ఎయెన్ నిల్లెజ్ అట్వాన్?”.

7

సీలు పొకె ఆతి 144,000 లోకుర్.

1 దిన్ని వెనుక బూమి మున్నుబా సమ్‌దరం మున్నుబా మరెక మున్నుబా గాలి కివీండ, నాల్లి దిక్కుజ గాలి అస్తార బూమిది నాల్లి దిక్కుజ, నాల్‌ఎర్ దూతార్ నిల్చి మంజినిక నాను సుడెత.

2 బత్తిజిని దేవుణుది సీలు అస్తిమన్ని, మరి ఉండ్రీ దూత పొద్దు సొని దరోటాన్ వాతిక నాను సుడెత. బూమిదిజ్‌ని సమ్‌దరమ్‌దిజ్ పాడె కిదెజ్ అతికారం దొహాక్తిమన్ని దూతార్‌వెట ఈహు వెప్తాన్.

3 “మాపు దేవుణు వణి కినివరి నొద్దుజ సీలు పొక్కిదాక బూమిదిజ్‌బా, సమ్‌దరమ్‌దిజ్‌బా, మరెకాజ్‌బా పాడె కిమాట్”, ఇజి వాండ్రు డటం వెప్తాన్.

4 సస్తివలె, సీలు పొకె ఆతివరి లెక్క వెప్తాక నాను వెహ. ఇస్తాయేలుది విజు తెగెజాణిజ్ లక్క నలపయనాల్లి వెయిజ్ లోకుర్ మహార్.

5 సీలు పొకె అతికార్ యూదా తెగదాన్ పన్నెండు వెయిజ్ లోకుర్ మహార్. రూబెను తెగదాన్ పన్నెండు వెయిజ్ లోకుర్ మహార్. గాదు తెగదాన్ పన్నెండు వెయిజ్ లోకుర్ మహార్.

6 అసీరు తెగదాన్ పన్నెండు వెయిజ్ లోకుర్ మహార్. సప్తాలి తెగదాన్ పన్నెండు వెయిజ్ లోకుర్ మహార్. మనసె తెగదాన్ పన్నెండు వెయిజ్ లోకుర్ మహార్.

7 సీమొను తెగదాన్ పన్నెండు వెయిజ్ లోకుర్ మహార్. లేవి తెగదాన్ పన్నెండు వెయిజ్ లోకుర్ మహార్. ఇసాకారు తెగదాన్ పన్నెండు వెయిజ్ లోకుర్ మహార్.

8 జెబులూను తెగదాన్ పన్నెండు వెయిజ్ లోకుర్ మహార్. యోసేపు తెగదాన్ పన్నెండు వెయిజ్ లోకుర్ మహార్. బెన్యామీను తెగదాన్ పన్నెండు వెయిజ్ లోకుర్ మహార్.

తెల్లాని సొక్కెజ్ తోడిఃగితిమన్ని గొప్ప మంద లోకుర్

9 దిన్ని వెనుక నాను సుడెతిజ్, విజు దేనమ్‌కాణిజ్, విజు జాతిజాణిజ్, విజెరె లోకుర్ బాణిజ్, విజు బాసెజ్ వర్గిని వరిబాణిజ్ వాతి ఎయెన్‌బా లెక్క కిదెజ్ అట్‌ఇనన్ని గొప్ప మంద లోకుర్ అయి సింహాసనం ఎద్దుని గొరెప్పిల్ల ఎద్దు నిల్చి మంజినిక సుడెత. వారు తెల్లాని సొక్కెజ్ తోడిఃగిజి ఈత మరాతి మటెజ్ కికాజ్ అస్త మహార్.

10 “సింహాసనమీదు బన్తి మన్నికాన్ ఆతి మా దేవుణుని గొరెప్పిల్ల మజి రక్కిస్త మనార్”, ఇజి వారు గొప్ప పెరి కంటమ్‌దాన్ వెప్పి మహార్.

11 అయి సింహాసనమీదిజ్‌ని అయి పాణం మన్ని నాల్లి జంతుజ్‌ని ఇరువయ్ నాల్‌ఎర్ పెద్దెల్‌జి సుటులం దేవుణు దూతార్ విజెరె నిహ మహార్. వారు సింహాసనం ఎద్దు పడగిజి అర్చి దేవుణుదిజ్ పొగిడిజి మాడిఃస్తార్.

12 “ఆమెన్, వన్ని గొప్ప పేరు వందిజ్, వన్ని గెణమ్‌వందిజ్, వన్ని అతికారమ్ వందిజ్, వన్ని సత్తువందిజ్ మాటు మా దేవుణుదిజ్ అంతుసిల్లెండ ఎలాకాలం పొగిడిజి మంజినాట్. మాటు విజెటి వన్నిజ్ గవేరం సీజి వందనమ్‌కు వెప్పి మంజినాట్. ఆమెన్”, ఇజి వారు వెప్పి మహార్.

13 నస్తివలె అయి పెద్దెలుజలో ఇ ఒరెన్, “యూ తెల్లాని సొక్కెజ్ తోడిఃగితి మనికార్ ఎయెర్? వారు ఎమేణిజ్ వాత మనార్”, ఇజి నజి వెన్‌బాతాన్.

14 “బాబు సీనె నెస్సి”, ఇజి నాను వన్నిజ్ వెప్తా. వాండ్రు నావెట ఈహు వెప్తాన్. “వీరు గొప్ప పెరి కష్టమ్‌కాణిజ్ వాతికార్. వారు గొరెప్పిల్ల నలదాన్ వరి సొక్కెజ్ నొరెబజి వనకాజ్ తెల్లాజ్ కిత్తికార్.

15 అందెజె, “వారు దేవుణులు సింహాసనం ఎద్దు మంజి రెయుపోగోల్ వన్ని గుడిఁదు వన్నిజ్ పణి కిజి మంజినార్. సింహాసనమదు బస్తి మన్నికాన్, వాండ్రె ఆజి వన్ని టంబు వరి మున్సు. వడ్డక్కి వరిజ్ కాపాడ్సాన్.

16 మరి ఎసెజ్బా వరిజ్ బజి కట్టివద్. మరి ఎసెజ్బా వారు ఏప్పి, సావర్. పొద్దుది గొప్ప ఏండ వరి మున్సు తగ్గివద్. మరి సుర్నిలెకెండ మన్ని వేడిఁబా వరిజ్ తగ్గివద్.

17 ఎందానిజ్ ఇహిజి, సింహాసనం నడిఁమి మన్ని గొర్రెపిల్ల వరిజ్ గవడుఁయెన్ అత మనాన్. పాణం సీని ఏరు వాని ఊట డగ్గు వాండ్రు వరిజ్ నడిఁపిసాన్. దేవుణులు వరి కణుకేఱాణిజ్ కణెర్ విజి తేల్నాన్”.

8

ఏడు సీలుని బజరమ్ది దూపమ్సుర్ని గిన్న

1 గొర్రెపిల్ల ఏడు సీలు లాగితివలె పరలోకమ్దు అరగంట జమనె మహద్.

2 నస్తివలె, దేవుణులు ఎద్దు ఏడు దేవుణులు దూతార్ నిల్చి మంజినిక నాను సుడఁత. వరిజ్ ఏడు జోడు బాంగెజ్ దోహ్కె మహా.

3 మరి బరెన్ దేవుణులు దూత బజరమ్దాన్ తయార్ కిత్తిమన్ని దూపం సుర్ని గిన్న కియుదు అస్తాండ్రె దూపం సుర్ని మాలి పెటె ఎద్దు వాతాండ్రె నిహాన్. సింహాసనం ఎద్దు బజరమ్దాన్ తయార్ కిత్తి దూపం సుర్ని మాలి పెటెదు, దేవుణులు వందిజ్ కేట ఆతివరి పారదనమ్కువెట సుర్ని పూజి సిదెజ్ అయ దూతెజ్ నెగ్గి వాసనం సీని దూపం నండ్రె దోహ్కె.

4 నస్తివలె నెగ్గి వాసనం సీని దూపమ్ది గోయి దేవుణులు వందిజ్ కేట ఆతివరి పారదనమ్కువెట కూడఁజి దేవుణులు దూత కియుదాన్ మున్సు. దేవుణులు దర్రోట్ సాహా.

5 వెనక అయ దేవుణులు దూత దూపం సుర్ని గిన్న అస్తాండ్రె, దూపం సుర్ని మాలి పెటెదాన్ డిప్పు, లాగ్గి అయ గిన్నాదు నిండ్రెస్తాండ్రె, అయ డిప్పుజ్ బూమి మున్సు. విసిర్తాన్. నస్తివలె గొప్ప దిడఁనికెజ్, పిడుఁగుజ్, మెర్నికెజ్ విజి వాతె. బూమి కద్దితాద్.

ఏడు జోడుఁబాంకెజ్.

6 నస్తివలె ఏడు జోడుఁబాంకెజ్ అస్తిమన్ని ఏడు దూతార్ వనకాజ్ ఊక్తెజ్ తయార్ అతార్.

7 మొదోహా దేవుణులు దూత వన్ని జోడుఁబాంకె ఉహ్కెజ్, వడఁజాని సిసు నలదాన్ కూడఁజి బూమి మున్సు. నెదరి ఆజి అర్తె. అందెజె బూమిదు మూండ్రె వంతుజి లొఱి ఉండ్రె వంతు వెతాద్. మరెకెబా మూండ్రె వంతుజి లొఱి ఉండ్రె వంతు వెతాద్. పసి గడ్డి విజి వెతాద్.

8 రుండ్ది దేవుణులు దూత వన్ని జోడుఁబాంకె ఉహ్కెజ్, కసి మంజిని ఉండ్రె పెరి గొర్రెన్ నన్నిక నమ్దరమ్దు అర్తాద్. నమ్దరం మూండ్రె వంతుజి లొఱి ఉండ్రె వంతు నల అతాద్.

9 నమ్దరమ్దు మన్ని పాణం మన్ని జుంతుజ్, మూండ్రె వంతుజి లొఱి ఉండ్రె వంతు సాతె. ఓడఁజ్బా మూండ్రె వంతుజి లొఱి ఉండ్రె వంతు నాసనం అతె.

10 మూండ్రె దేవుణులు దూత వన్ని జోడుఁబాంకె ఉహ్కెజ్ కగడలెకెండ్రె కసిమంజిని ఉండ్రె పెరి సుక్కు అగనమ్దాన్ రాల్లి పెరి గడ్డిజి మున్సుని ఏరు సోని ఊటెజి మూండ్రె వంతుజి లొఱి ఉండ్రె వంతు మున్సు అర్తాద్.

11 అయ సుక్కు పేరు సేందు. అందెజె మూండ్రె వంతుజి ఉండ్రె వంతు సేందు అతాద్. ఏరు సేందు అతిజ్ లోకర్ నండ్రెండ్రె సాతార్.

12 నాల్లి దేవుణులు దూత వన్ని జోడుఁబాంకె ఉక్తెజ్, పొద్దు మూండ్రె వంతుజి లొఱి ఉండ్రె వంతు సెఎణ్ అతాద్. నెల మూండ్రె వంతుజి లొఱి ఉండ్రె వంతు సీకటి అతాద్. సుక్కుజి దెబ్బ తగ్గితిజ్ మూండ్రె వంతుజి లొఱి ఉండ్రె వంతు సీకటి అతాద్. అందెజె వేడెక మూండ్రె వంతుజి లొఱి ఉండ్రె వంతు జాయ్ మన్వితాద్. రెయు మూండ్రె వంతుజి లొఱి ఉండ్రె వంతు నెల సుక్కుజి జాయ్ మన్వితాద్.

13 నాను సుడఁజి మహిజ్ నండ్రె మున్సు. ఎగ్గిజి మంజిని ఉండ్రె డేగ్, “మరి ఊక్తెజ్ మన్ని మూండ్రె జోడుఁబాంకెజి జాటుదాన్ బూమి మున్సు. బత్తిని వరిజ్, అబాయా కస్టం, కస్టం, కస్టం”, ఇజి గొప్ప పెరి జాటుదాన్ వెహ్నిమన్నిక వెహ్.

9

1 అయ్యదు దేవుణు దూత వన్ని జోడు బాంక ఉహాక్తిజ్ అగనమ్దాన్ బూమి ముస్సు రాత్రి మహి ఉండ్రీ సుక్కు సుడూత. దర్దిది తాలం కిక్కు అయ సుక్కుదిజ్ దోహ్కాద్.

2 వాండ్రు అయ మటుసిల్లి దాస్తిమన్ని దర్దిదిజ్ రెతిజ్, గొప్ప పెరి సొల్లుదాన్ సినుదాన్ గోయ్ వాతి లెకెండ్ గోయ్ వాతాద్. అయ దర్దిదాన్ వాతి గోయ్దాన్ పొద్దుని, అగనం సీకటి ఆతాద్.

3 అయ గోయ్దాన్ మేపిలెక్ బూమి ముస్సు వాతె. బూమి ముస్సు మన్ని కిపిడారొదిజ్ మన్నిలెకెండ్ వనకాజ్ సత్తు దోహ్కాద్.

4 నొద్రుజ దేవుణుగుర్తు సిల్లి లోకురిజ్ బాదకిదెజ్నె ఆవండ, బూమి ముస్సు మన్ని గడ్డిదిజ్బా, ఇని మొక్కుదిజ్బా, ఇని మరాతిజ్బా పాడూ కిదెజ్ ఆవద్ ఇజి వనకాజ్ ఆడ్ర దోహ్కాద్.

5 వరిజ్ నప్పజ్ వనకాజ్ అతికారం సిల్లెతాద్. గాని అయ్యదు నెలెజ్ దాక వరిజ్ హిమ్మెజ్ కిజి మండ్రెజ్ వన్నాజ్ అతికారం దోహ్కా మనాద్. అవిక హిమ్మెజ్ కితిజ్ వరిజ్ వాతి కస్టం, కుపిడారొ లోకురిజ్ కట్టిజి వాని నొప్పిలెకెండ్ మహాద్.

6 అయ దినమకాజ్ లోకుర్ సావుదిజ్ రెబానార్ గాని సావు వరిజ్ తప్పె ఆనాద్లె. వారు సావువందిజ్ ఆన ఆనారొలె గాని సావు వరిజ్ డిసి సొనాద్లె.

7 అయ మేపిలెక్ విదెమ్దిజ్ సొండ్రెజ్ తయారొ కితిమన్ని గుర్తమ్కాజ్ పోలితె మన్నె. బజారమ్దాన్ తయారొ కిత్తి టోపి నన్నక ఉండ్రీ, వనక బురెక ముస్సు మహా. వనక మొకోమ్కు లోకు మొకొం లెకెండ్ మహా.

8 వనక కొప్పు బోదెక బురాతి కొప్పులెకెండ్ మహాద్. వనక పల్కు సింహం పల్కు లెకెండ్ మహా.

9 ఇనుముదాన్ తయారొ కితిమన్ని లెకెండ్ గుండెదిజ్ అడిసి సొక్కెజ్ వనకాజ్ మహా. వనక రెక్కెజాణి జాటు విదెమ్దిజ్ ఉహాక్కిని గుర్తమ్కు లాగిజిని రదమ్క గొప్ప పెరి జాటులెకెండ్ మహాద్.

10 వనకాజ్ కిపిడారొ తోకెజ్ నన్ని సొప్పు మన్ని తోకెజ్ మహా. లోకురిజ్ అయ్యదు నెలెజ్ గుత్తి బాదెజ్ కిదెజ్ అయ తోకెజి వనకాజ్ సత్తు మహాద్.

11 దర్దిదిజ్ అతికారం మన్ని దూత వరి ముస్సు రాజు లెకెండ్ మహాన్. ఏత్తి బాసాదు వన్నిజ్ పేరు 'అబదోను' ఇని పేరు. గ్రీకు బాసాదు వన్ని పేరు 'అపొలుయోను' ఇని పేరు.

12 మొదోహి కస్టం గడూస్తాద్. ఇదిలో, మరి రుండి కస్టమ్కు వాదెజ్ మన్నె.

13 ఆరు దేవుణు దూత వన్ని జోడుబాంక ఉహాక్తిజ్, దేవుణు ఎర్తు మన్ని బజారమ్దాన్ తయారొ కిత్తి పూజి సీని మాలిపీటది కొముజాణిజ్ ఉండ్రీ జాటు వెహా.

14 "యూప్రటిను ఇని గొప్ప పెరి గడ్డ జోరెదు తోహా ఆతిమన్ని నాలెవర్ దూతారిజ్ కుత్తి డిన్అ", ఇజి వెక్తిక నాను వెహా.

15 బూమి ముస్సు మన్ని లోకురి మూండ్రీ వంతుజి లోఇ ఉండ్రీ వంతుది వరిజ్ సప్పెజ్ ఇజి యా పంటాది, యా నెలాది, యా రోజాది, యా గంటవందిజ్ తయారొ కిబె ఆజి ఇడ్డి మన్నికారె, అయ నాలెవర్ దూతారొ.

16 గుర్తమ్కు ముస్సు ఎక్తిమన్ని నయనమది వరిలెక్క రుండి వందెజ్ లెక్కిజ్. వరి లెక్క నిన్నా ఇజి నాను వెహా.

17 గుర్తమ్కాజ్ని వనక ముస్సు బస్తిమన్ని వరిజ్ నజీ వాతి కలాదు నాను యాలెకెండ్ సుడూత. వరిజ్ సిను నన్ని ఎరాని రంగుది, మరి నీలి రంగుది, మరి పసిక రంగుది గుండెదిజ్ అడిని సొక్కెజ్ మహా. గుర్తమ్క బురెక్ సింహం బురెక్లెకెండ్ మహా. వనక వెయుజాణిజ్ సిను, గోయ్, రెంజింక వెల్లి వాజి మహా.

18 వనక వెయుజాణిజ్ వాతి సిను, గోయ్, రెంజింక ఇని మూండ్రీ దెబ్బెజాణిజ్ లోకురి మూండ్రీ వంతుజి లోఇ ఉండ్రీ వంతు లోకుర్ సప్పె ఆతారొ.

19 అయ గుర్తమ్క సత్తు వనక వెయుజలోఇని వనక తోకెజి మహా. లోకురిజ్ కట్టి గాయమ్కు కిదెజ్ బురెక్ మన్ని సరానలెకెండ్ మన్ని తోకెజ్ వనకాజ్ మహా.

20 యా మూండ్రీ దెబ్బెజాణిజ్ సావండ్ మిగిలితి మన్ని లోకుర్ ఏలుబా వరి కిక్కాణిజ్ తయారొ కితిమన్ని దెయమ్కాజ్ని బొమ్మెజి మాడిసినిక డిసిసిజి పాపమ్కు ఒప్పుకోడెజి మన్ను మారినవెతారొ. వారు వరి కిక్కాణిజ్ బజారమ్దాన్, వెండిదాన్, కంసుదాన్, పణుకుదాన్, నెక్కదాన్ తయారొ కితిమన్ని సుడూదెజ్ అట్ఇ, వెండ్రెజ్ అట్ఇ, నడిదెజ్ అట్ఇ సత్తు సిల్లి వనకాజ్ మాడిసినిక డిసి సివెతారొ.

21 అక్కాదె ఆవండ, లోకురిజ్ సప్పిక, గురుజవెట సెట్టి కినిక, రంకు బూలానిక, డొజ కినిక యాలెకెండ వారు కిజి మహికెజ్ డిఃసిసీజి పాపమకు ఒప్పుకొడఃజి డిఃసిసీజి మన్ను మారిన్ ఏతార్.

10

ఇజిరి పుస్తకం అస్తిమన్ని దేవుణు దూత.

1 నస్తివలె గొప్ప సత్తు మన్ని మరి ఒరన్ దేవుణు దూత పరలోకమదాన్ డిగ్గి వాజినిక నాను సుడఃత. వాండ్రు మొసావ్ తోడుఃగిత మహాన్. వన్ని బుర్ర మున్ను కొడఃవేలి సుటె ఆత మహాద్. వన్ని మొకొం పొద్దులెకెండని వన్ని పాదమకు తంపం లెకెండ మన్ని సీను కొనెజ్ లెకెండ మహా.

2 వన్ని కియుదు రెక్కిమన్ని ఉండ్రి పుస్తకం మహాద్. వాండ్రు వన్ని ఉణెర్ పాదం సమ్దరం మున్ను మట్ట మహాన్. వన్ని డేబె పాదం బూమి మున్ను మట్ట మహాన్.

3 సింహం ఆక్కర్న్సి లెకెండ వాండ్రు ఉండ్రి గొప్ప పెరి జాటు సిత్తాన్. వాండ్రు జాటు సిత్తివలె ఏడు పిడుఃగుజ్ వనక వనక జాటుజాణిజ్ వర్గితె.

4 అయ ఏడు పిడుఃగుజ్ వర్గితివలె, నాను రాస్తాజ్ తయార్ ఆతిజ్, “అయ ఏడు పిడుఃగుజ్ వర్గితి సజతిజి సీలు పోకెత. వనకాజ్ రాస్తా”, ఇజి పరలోకమదాన్ ఉండ్రి కంటం వెవ్తాక వెహ.

5 నస్తివలె, సమ్దరం మున్నుని బూమి మున్ను నిహిమన్ని దేవుణు దూత వన్ని ఉణెర్ కియు పరలోకం దరోజ్ పెవ్తాండ్రి యాలెకెండ వెవ్తాన్.

6 పరలోకమని అబ్బి మన్ని విజువనకాజ్ని, బూమిని బూమి మున్ను మన్ని విజువనకాజ్ని, సమ్దరమని సమ్దరమదు మన్ని విజు వనకాజ్ తయార్ కిత్తికానాతి ఎలాకాలం బత్తిజిని దేవుణు పేరు అసి యా లెకెండ ఒట్టు పొక్తాన్. “మరి ఆలస్యం మన్ ఏద్”.

7 ఏడు దేవుణు దూత వన్ని జోడుఃబాంక ఊక్కి దినమ్కాజ్ దేవుణుది డాఃజితి మన్ని సజతిజ్, దేవుణు, వన్ని పఃకిని వరివెటని వన్ని ప్రవక్తర్ వెట ముజాల వెహ ఆతిమహాలెకెండ పూర్తి ఆనాద్లె”.

8 నస్తివలె పరలోకమదాన్ నాను ముజాల వెహిమన్ని కంటం మరి నావెట, “సీను సొన్ని సమ్దరం మున్నుని బూమి మున్ను నిహిమన్ని అయ దేవుణు దూత కియుదు మన్ని రెకె ఆతిమన్ని ఇజిరి పుస్తకం లోన్ ఆ”, ఇజి వెవ్తాక నాను వెహ.

9 అందెజె నాను సొన్ని “అయ ఇజిరి పుస్తకం నజి సీదా”, ఇజి అయ దేవుణు దూతెజ్ లొస్త. వాండ్రు, “దన్నిజ్ లాగ్గి తిన్ ఆ. అయాక నీ పొటాదు సేందు ఆనాద్ గాని నీ వెయదు తేనె లెకెండ తియాజ్ మంజినాద్”, ఇజి నావెట వెవ్తాన్.

10 అయావలె దేవుణు దూత కియుదాన్ అయ ఇజిరి పుస్తకం నాను లొస్తానె తిహా. అయాక నా వెయుదిజ్ తేనెలెకెండ తియాజ్ మహాద్. గాని అక తిహి వెనుక నా పొటాదు సేందు ఆతాద్.

11 అయావలె వాండ్రు, “సీను నండ్రి లోకుర్ వందిజ్, నండ్రి జాతిజాణిపరివందిజ్, నండ్రి బాసెజ్ వర్గినివరివందిజ్, నండ్రిరాడార్ రాజుర్ వందిజ్ దేవుణు ప్రవక్తలెకెండ మరి వెవ్తాజ్ వలె”, ఇజి నజి వెవ్తాన్.

11

దేవుణు వందిజ్ వాతి రిఎర్ సాసిర్.

1 మరి కొల్ల కిని ఉండ్రి డుడ్డు నజి సితాండ్రి ఈహు వెవ్తాన్. “సీను నిజిజి దేవుణు గుడిఃని, దేవుణుదిజ్ పూజ సీని మలిపీటదిజ్ కొల్ల కిజి, దేవుణు గుడిఃదు పొగిడిఃజి మాడిఃసినివరిజ్ లెక్క కెత.

2 గుడిఃదిజ్ వెల్లి మన్ని డేవ కొల్ల కివిండ డిఃన్ ఆ. అయాక దేవుణుదిజ్ నమ్మిఇవరి వందిజ్ మన్నిక. వారు నలీపయరుండి నెలెజ్ పరిసుద్దమతి యెరూసలేం పట్టమదిజ్ వరికాల్యాణిజ్ మట్టూర్లె.

3 మరి నాను నా రిఎర్ సాసిరిజ్ అతికారం సీనాలె. వారు బస్త సాక్కెజ్ తోడిఃగిజి పన్నెండు వందెజ్ అరువయరోన్ను దేవుణు ప్రవక్తరు లెకెండ దేవుణు మాటిజ్ సాటిస్సార్.

4 బూమిదిజ్ ప్రబు ఆతి దేవుణు ఎద్దు నిల్పి మంజిని రుండి ఒలివ మరెక్కిని రుండి దీవ డండ్రిజ్ అతికారి యా రిఎర్ సాసిర్.

5 ఎయెర్బా వరిజ్ హిమ్సెజ్ కిదెజ్ సుడేజిజు, వరి వెయుదాన్ సిసు వాజి వరిజ్ వగాతివరిజ్ సుర్దు విసిర్లాద్. వరిజ్ హిమ్సెజ్ కిదెజ్ సూణికార్ యాలెకెండ సాదెజ్వలె.

6 వారు ప్రవక్తరులెకెండ దేవుణు మాటెజ్ వెప్పి దినమ్దు అగసమ్దాన్ పిరు రెపెండ అడ్డు కిదెజ్ వరిజ్ అతికారం ముజినాద్. మరి వరిజ్ ఇస్తమాతి వజ ఎన్నివలెబా బూమిదు మన్ని ఏరుదిజ్ నలలెకెండ కిదెజ్, మరి నండో రకమ్ది జబ్బుజాణిజ్ బూమి మున్ను, మన్ని వరిజ్ బాదెజ్ కిదెజ్ వరిజ్ అతికారం ముజినాద్.

7 వారు సాస్యం వెప్పి ముజినిక పూర్తి ఆతిజసరి దర్దదాన్ వాని క్రూరమతి జంతు వరివెట ఉద్దం కిజి వరిజ్ సప్పాద్.

8 వరి పీసుగుజ్ యెరూసలేం ఇని అయ పెరి పట్టుమ్ది సర్దు అరై ముజినె. అయ పట్టుమ్దిజ్ సాదోమ పట్టుమ్దిజ్, అయగుప్పు దేనమ్దిజ్ పోలిసి వెహె ఆజినాద్. అబ్బె వరి ప్రబుబా సిలువ పోకె ఆత మహాన్.

9 వరి పీసుగుజ్ మూస్తెజ్ సరి సిపెండ విజు దేనమ్దికార్, విజు తెగిజాణికార్, విజు బానెజాణికార్, విజు జాతిదికార్ విజెరె మూండ్రినర రోస్సు. వరి పీసుగుజ్ సుడేజి ముజినార్.

10 యా రిఎర్ ప్రవక్తరు బూమి మున్ను, మన్ని వరిజ్ బాదెజ్ కిత్తి వందిజ్, బూమి మున్ను, మనికార్ విజెరె వరిజ్ జర్గితిక సుడేజి గొప్పు సర్ద ఆజి ఒరెన్ మరి ఒరెన్ వన్నిజ్ ఇనామ్కు సీజి వండోయ్ కినార్.

11 గాని అయ మూండ్రినర రోస్సు, ఆతి వెనుక దేవుణుబాణిజ్ పాణం మన్ని ఆత్తు వాజి వరి లోఇ డుగితిజ్ వారు కిక్కు, బూమిదు తిగిజి నిజ్జి నిల్తార్. వరిజ్ సుడేజికార్ విజెరె గొప్పు తియెల్ ఆతార్.

12 నస్తవలె, “ఇబ్బె ఎక్కి రదు”, ఇజి పరలోకమ్దాన్ గొప్పు పెరి కంటమ్దాన్ వరిజ్ వెప్తిక వారు వెహారె, వరిజ్ వగాతికార్ సుడేజి మహివలెనె వారు మొసాపుదాన్ పరలోకమ్దు వెరె ఆజి సాహార్.

13 అయ గడియారునె గొప్పు గటిజి బూమి కద్దితిజ్, అయ పట్టుమ్ది వది వంతుజి లోఇ ఉండ్రీ వంతు అర్తాద్. బూమి కద్దితిజ్ ఏడు వెయిజ్ లోకుర్ సాతార్. మిగిలిత్తికార్ గుండెజ్ వణక్కిలెకెండ తియెలాజి పరలోకమ్దు మన్ని దేవుణుదిజ్ పొగిడితార్.

14 రుండి కస్తం విజితాద్. ఇదిలో, మూండ్రీ కస్తం బేగినె వానాదలె.

మిగిలిత్తిమన్ని ఏడు జోడుజాంక.

15 ఏడు దేవుణు దూత వన్ని జోడుజాంక ఉక్కిజ్ పరలోకమ్దు గొప్పు పెరి కంటమ్దాన్ యాలెకెండ డేల్నిని జాటుజ్ వాతె. “యా లోకమ్దు ఏలుదాన్ ఏలుబడి కినిక, మా ప్రబుజ్ని వన్ని క్రీస్తుజ్ ఆత మనాద్. వాండ్రు అంతుసిల్లెండ ఎలాకాలం ఏలుబడి కిజి ముజినాన్లె”.

16 నస్తవలె, దేవుణు ఎద్దు సింహాసనమ్కాజ్ బస్తిమన్ని అయ ఇరువయ్ నాలెర్ పెద్దెలుజు వడగిజి అర్పి దేవుణుదిజ్ యా లెకెండ వెప్పి పొగిడిజి మాడిసి మహార్.

17 “ఏలు మన్నికి, ముజాల మహికి ఆతి, విజుదన్నిజ్ అతికారం మన్ని మా ప్రబు ఆతి దేవుణు, నీను నీ గొప్పు పెరి నత్తుదాన్ ఏలుబడి కిదెజ్ మొదొల్లిస్తవందిజ్ మాపు మిజి వందసమ్కు వెప్పినాచ్.

18 దేవుణుదిజ్ నమ్మిఇకార్ ఆతి యా లోకమ్ది లోకుర్ కోపమ్దాన్ నిండ్రీతార్. ఎందానిజ్ ఇహిజి నీను కోపం ఆదెజ్ సమయం వాతాద్. సాతి వరిజ్ విజెరిజ్ నీను తీర్పు తీరిస్తెజ్ గడియ వాతాద్. నీ పణిమణిసిరిజ్, ప్రవక్తెజ్, నిజి నమ్మిత్తి వరిజ్, నీ పేరు వందిజ్ గవరం సీజి బత్తిత్తి ఇజివరిజ్ని పెరివరిజ్ విజెరిజ్ తగితి ఇనాయం సిదెజ్ గడియ వాతాద్. బూమిదిజ్ నాసనం కినివరిజ్, నాసనం కిదెజ్ గడియ వాతాద్”.

19 నస్తవలె, పరలోకమ్దు మన్ని దేవుణుగుడి రే ఆతిజ్, దేవుణు లోకుర్ వెట కిత్తి ఒట్టు రాస్తి ఇడ్డి మన్ని మందసం తోరె ఆతాద్. నస్తవలె, మెరసిని జాయ్, పిడుగుజ్, దీడిజినికెజ్, వాతె. బూమి కద్దితాద్. గొప్పు వడజెజ్ అరై.

1 నన్నవలె పరలోకమీదు ఉండ్రీ బమ్మాతి గుర్తు తోరితాద్. పొద్దుదిజ్ పొర్లాతి మన్ని ఉండ్రీ బోదెలి తోరి ఆతాద్. దన్ని పాదమక అడిగి నెల మహాద్. బురాదు పనెండు సుక్కెజ్ మన్ని రాజురి బోపిలెకెండ్ ఉండ్రీ బజారం టోపి మహాద్.

2 అది పాత డిఃస్ట మహాద్. అది ఏరు ఈబాదెజ్ నొప్పిదాన్ గొప్ప డేల్లి అడఃబాజి మహాద్.

3 నన్నవలె, మరి ఉండ్రీ గుర్తు పరలోకమీదు తోరితాద్. ఇదిలో, ఉండ్రీ గొప్ప పెరి ఎరాని సరాన్ తోరితాద్. దన్నిజ్ ఏడు బుర్రెక్ని పది కొమ్ము మహా. దన్ని బుర్ర మున్ను రాజురి బోపిలెకెండ్ బజరమీది ఏడు బోపిజ్ మహా.

4 ఆగనమీది సుక్కెజి మూండ్రీ వంతుజ్లో ఇ ఉండ్రీ వంతు సుక్కెజ్ దన్ని తోక డెయ్జి బూమి మున్ను అర్పాద్. ఏరు ఈబాదెజ్ తయార ఆతి మన్ని అయ బోదెలి, ఏరుఈబాతిజ్ సరి, అయ బయిజ్ డిఃడెదెజ్ ఇజి అయ సరాన్ అయ బోదెలి ఎద్దు నిహా మహాద్.

5 అది ఒరెన్ మరినిజ్ కాస్తాద్. లోకమీది లోకురిజ్ విజేరిజ్ ఇనుము డుడ్డుదాన్ ఏలుబడిః కిదెజ్ ఇజి ఒరెన్ కొడొఃదిజ్ ఇట్లాద్. అది కాన్సి బయి దేవుణు డగ్గుని వన్ని సింహాసనం డగ్గు వెటనె లాగజి పెరి ఆతాన్.

6 అది వన్నెండు వందెజ్ అరువయ్ రోస్సు, దేవుణు దన్నిజ్ పోన్ కిదెజ్ ఇజి బిడిఃమబూమిదు దన్ని వందిజ్ తయార కితిమన్ని బాడ్డిదు ఉహ్కాన్సి సాహాద్.

7 నన్నవలె పరలోకమీదు ఉద్దం ఆతాద్. మికాయెలు ఇని దేవుణుదూతని వన్ని జటుది దూతార కూడఃజి అయ గొప్ప పెరి సరాన్వెట ఉద్దం కితార్. అయ గొప్ప పెరి సరాన్ని వన్ని దూతార మరజి ఉద్దం కితార్.

8 గాని వారు దేవుణు దూతార మున్ను గెలిస్తెజ్ అట్ఎతార్. అందెజి పరలోకమీదు మరి ఎనెజ్బా వరిజ్ మండ్రెజ్ బాడ్డి మన్ఏతాద్.

9 లోకమీదు మన్ని లోకురిజ్ విజేరిజ్ మొసెం కిజి నడిఃపిన్సికాన్ ఆతి సెఇకాన్ ఆతి సయ్తాన్ ఇజి పేరు ఇడ్డెః ఆతి మొదోపి సరాన్ ఇని అయ గొప్ప పెరి సరాన్ పరలోకమీదాన్ బూమి మున్ను అర్పె ఆతాన్. వాండ్రుని వన్ని దూతార బూమి మున్ను అర్పె ఆతార్.

10 నన్నవలె పరలోకమీదు యాలెకెండ్ వెప్పిని ఉండ్రీ పెరి కంటం నాను వెహ. “రెయుపోగోల్ మా దేవుణు ఎద్దు, మా తంబెరిజి మున్ను తప్పు మొప్పి మహికాన్ ఆతి సయ్తాన్ అర్పె ఆత మనాన్. అందెజి వన్ని గొప్ప సత్తుదాన్ మజి రక్సిన్సి దేవుణు ఎలాకాలం ఏలుబడిః కిజి మంజినాన్. మరి అతికారం వన్ని క్రిస్టుజ్ ఆతాద్.

11 మా తంబెరిసిర్ గొర్రెపిల్ల నలదాన్, వారు వప్తిమన్ని సాస్యమీదాన్ సయ్తాన్ మున్ను గెలస్త మనార్. వారు వరి సొంత పాణమకాజ్ గొప్ప వెరిక ఇజి ఒడిఃబివిండ సాదెజ్బా తయార ఆత మహాద్.

12 అందెజి పరలోకమీదికిదెరా మీరు సర్ద ఆదు. బూమిదుని సమదరమీదు మన్ని విజేరిజ్ కస్టమకునె. ఎందానిజ్ ఇహిజి సయ్తాన్ మీ డగ్గు వాత మనాన్. వన్నిజ్ సమయం తక్కునె మనాద్ ఇజి నెని వాండ్రు నండొ కోపమీదాన్ నీ డగ్గు వాత మనాన్”.

13 బూమి మున్ను అర్పె ఆతాన్ ఇజి నెస్తాండ్రె, అయ గొప్ప పెరి సరాన్, అయ మొగకొడొఃదిజ్ కాన్సి బోదెలిదిజ్ అని మాలెజ్ కిదెజ్ ఇజి వెటపెర్లి రెబాదెజ్ మొదోల్స్తాన్.

14 అందెజి, అయ గొప్ప పెరి సరనబాణిజ్ తప్తె ఆజి దేవుణు దన్ని వందిజ్ బిడిఃజ్బూమిదు తయార కితి మన్ని బాడ్డిదు ఎర్రిజి సొండ్రెజ్ ఇజి రుండి పెరి డేగ రెక్కెజ్ దన్నిజ్ దోహక్తె. అబ్బె అయ గొప్ప పెరి సరాన్ దన్నిజ్ తోవిండ ఉండ్రీ కాలం, కాలమకు, నెగం కాలం పోన్ కిబె ఆతాద్.

15 నన్నవలె, అయ బోదెలిదిజ్ గడ్డ పెర్లి ఒతెజ్ ఇజి అయ గొప్ప పెరి సరాన్ దన్ని వెయ్దాన్ పెరి గడ్డలెకెండ్, అయ బోదెలి వెనుకహాన్ ఏరు కస్తాన్.

16 గాని బూమి బదెజ్ ఆజి రే ఆతాదె, అయ గొప్ప పెరి సరాన్ వెయ్దాన్ కక్తి ఏరుదిజ్ డిఃజ్జి అయ బోదెలిదిజ్ తోడుః కితాద్.

17-18 అందెజి అయ గొప్ప పెరి సరాన్ అయ బోదెలి మున్ను కోపం ఆతాదె, దేవుణు అడ్రెజ్ లోజిజి యేసువందిజ్ సాసెం వెప్పిమన్నికార్ ఆతి దన్ని పొటాదు పుట్టిమహివరివెట ఉద్దం కిదెజ్ ఇజి తయార ఆతాద్. వరివెట ఉద్దం కిదెజ్ ఇజి అయ గొప్ప పెరి సరాన్ సొత్తాదె సమదరం ఒడ్డుదు నిహాద్.

13

నమ్దారమ్దాన్ ఎక్కి వాతి జంతు.

1 మరి, పది కొముకుని ఏడు బురెక్ మన్ని ఉండ్రి క్రూరమతి జంతు నమ్దారమ్దాన్ వెల్లి వాతిక నాను సుడేశత. దన్ని కొముకాక్ పది టోపిక్ మహా. ఉండ్రి ఉండ్రి బుర మున్ను దేవుణుదిక్ దుసలాడేశిని ఉండ్రి ఉండ్రి పేరుకు మహా.

2 నాను సుడేశతిమన్ని అయ జంతు సిటాడేశ నొరెన్ లెకెండ్ మహాద్. గాని దన్ని పాదమ్కు ఒడూజు పాదమ్కు లెకెండ్ మహా. దన్ని వెయు పెరి నొరెన్ వెయులెకెండ్ మహాద్. అయ గొప్ప పెరి సరాన్ దన్ని సత్తుని వన్ని సింహాసనమని దన్ని గొప్ప అతికారం విజు అయ జంతుదిక్ సితాన్.

3 అయ జంతుది ఏడు బురెకలోజ ఉండ్రి బురారు సాదెక్ సరియాతి పెరి గాయం తగ్గిత మహాద్. గాని సాదెక్ సరియాతి అయ పెరి గాయం మాందితాద్. అందెజె బూమి మున్ను మన్ని లోకుర్ విజేరె బమ్మ అజ అయ జంతువెట కూడితార్.

4 అయ జంతుదిక్ అతికారం సిత్తివందిక్ వారు అయ గొప్ప పెరి సరాన్దిక్ పొగడిజి మాడిసి మహార్. మరి వారు అయ జంతుదిక్ పొగడిజి మాడిసి, “యా జంతులెకెండ్ మన్నికాన్ ఎయెన్బా సిలెన్. మరి దన్ని వెట ఉద్దం కిదెక్ అట్టికాన్ ఎయెన్బా సిల్లెన్”, ఇజి గొప్ప వెప్ప మహార్.

5 పాజె ఆని మాటెక్ ఆహ వెహె అజి దేవుణుదిక్ దుసలాడిజి వర్గిదిక్ దన్నిక్ వెయు వాతాద్. నలపయరుండి నెలెక్ దన్ని వణిక్ కిదెక్ దన్నిక్ అతికారం దోహ్కాద్.

6 అందెజె దేవుణుదిక్ దుసలాడిజి, వన్ని పేరుదిక్ అబద్దం మాటెక్ వెప్పి, పరలోకమ్దిక్, పరలోకమ్దు బత్కిని వరివందిక్ దుసలాడిజి అయ జంతు దన్ని వెయుదాన్ వర్గిజి మహాద్.

7 దేవుణు వందిక్ కేట అతి వరివెట విదెం కిజి, వరిక్ గెల్లిస్తెక్ దన్నిక్ అతికారం దోహ్కాద్. విజు తెగిజాణివరి మున్ను, విజు జాతిజాణి వరి మున్ను, విజు బాసెక్ వర్గిని వరి మున్ను, విజు దేసమదివరి మున్ను దన్నిక్ అతికారం దోహ్కాద్.

8 బూమి మున్ను బత్కినికార్ విజేరె అయ జంతుక్ పొగడిజి మాడిస్తార్. బూమి పుట్టివండ ముందాల్పై కత్తె అతిమని గొరెప్పిదిక్ నెందితి మన్ని, దేవుణు వెట ఎలాకాలం బత్కిని వరి పేరుకు రాసి ఇడ్డిని పుస్తకమ్దు పేరు సిల్లికార్ విజేరె జంతుదిక్ పొగడిజి మాడిస్తార్లె. వరి పేరుకు అయ పుస్తకమ్దు సిల్లెద్.

9 వెండ్రెక్ మన్ను మన్నికాన్ గిబ్బిక్ ఒడేశి వెంజి అయావజ నడిజి మంద్రు.

10 ఎయెన్బా అజ దేసమది వరివెట అన్ని అజి, అజ దేసం సొనికాన్ అయాలెకెండ్ సొనాన్లె. ఎయెన్బా కుర్దదాన్ సప్పె ఆదెక్ మన్నికాన్, కుర్దదాన్ సప్పె అనాన్లె. దేవుణు వందిక్ కేట ఆతివరి ఓర్పు, మరి దేవుణు మున్ను వరిక్ మన్ని నమకం దన్నిదటాన్ తోరె అనాద్.

బూమిదాన్ వెల్లి వాతి జంతు

11 మరి బూమిదాన్ మరి ఉండ్రి క్రూరమతి జంతు వెల్లి వాతిక నాను సుడేశత. గొరెప్పిల్ల కొము నన్ని రుండి కొముకు దన్నిక్ మహా. గాని గొప్ప పెరి సరాన్లెకెండ్ వర్గిజి మహాద్.

12 అయ జంతుక్, మొదోహి జంతుక్ మహి విజు అతికారం దన్ని బాణిక్ దోహ్కాద్. అయ అతికారమ్దాన్ బూమి మున్ను బత్కినికార్ విజేరె సాదెక్ సరియాతి గాయం తగ్గిజి నెగెండ్ ఆతి మన్ని మొదోహి జంతుక్ పొగడిజి మాడిస్తెక్ ఇజి బలవంతం కిజి మహాద్.

13 అయ జంతు లోకుర్ విజేరె సూణిలెకెండ్ అగనమ్దాన్ సిను డిగ్గి వాని నన్ని గొప్ప పెరి బమ్మాతి వణిక్ గుర్తు లెకెండ్ కిజి తోరిసి మహాద్.

14 మొదోహి జంతు దన్ని పేరుదాన్ బమ్మాతివణిక్ గుర్తు లెకెండ్ కిజి తోరిస్తెక్ అతికారం దోహ్కాక్ అయ జంతు బూమి మున్ను బత్కిని వరిక్ మొసెం కితాద్. కుర్దదాన్ గాయం ఆతిక్బా సావింద బత్కిని మొదోహి జంతుది బొమ్మ ఉండ్రి తయార్ కిదెక్ ఇజి ఆడ్ర సిత్తాద్.

15 అయ మొదోహి జంతుది బొమ్మదిక్ వర్గిదిక్ అట్టిలెకెండ్ పాణం సిదెక్ దన్నిక్ అతికారం దోహ్కాద్. అందెజె బొమ్మదిక్ మాడిసేవింద మంజిని వరిక్ సప్పెక్బా అతికారం దోహ్కాక్ మనాద్.

16 అయ జంతు విజేరిజ్, అహిజ ఇజరికారాతిజ్బా పెరికారాతిజ్బా, ఆస్తి మన్నికారాతిజ్బా బిదాదికారాతిజ్బా, వెట్టిపణిమణిసిరీ ఆఇకార ఆతిజ్బా వెట్టిపణి కినికారాతిజ్బా విజేరె వరి ఉణెరె కిక్కాజ్నో, సిల్లిజ నొద్దుదునో మొదోహి జంతుది గుర్తు పోకె ఆదెజ్ ఇజ బలవంతం కిత్తాద్.

17 ఎందానిజ్ ఇహిజ, అయ జంతు పేరునో, దన్ని పేరుది అంకి ఆతి గుర్తునో పోకె ఆతివరిజ్నెన ఆఎండ మరి ఎయెరిజ్బా ఇనికబా కొండెజ్నో, పొరెజ్నో అతికారం సిల్లెద్.

18 ఏలు బుద్దిమన్నికాన ఎయెనబా వన్ని బుద్దిదాన జంతు అంకి ఎనా ఇజి లెకిన్తజ్ అట్టిజ లెక్కిసిన. అక ఉండ్రి లోకుది అంకి. ఆరువందెజ్ అరువయెఆరు. యాక లెకిన్తజ్ బుద్ది అవనరం.

14

గొరెపిల్లని లక్కనాల్పయనాల్లి వెయ్ లోకుర్.

1 నస్తివలె, నాను సుడూతిజ్ అయ గొరెపిల్ల యెరుసలేమదు మన్ని సియెను గొరెన మున్సు. నిహా మనాన్. అయ గొరెపిల్ల పేరుని, వన్ని బుబ్బాతి దేవుణు పేరు వరి నొద్దుదు రానె ఆతిమని లక్క నాల్పయనాల్లి వెయ్ లోకుర్ వన్నివెట మహార్.

2 గొప్ప పెరి గడ్డాది జాటు లెకెండెని గొప్ప పిడూగు జాటు లెకెండె ఉండ్రి కంటం పరలోకమదాన్ వాతిక నాను వెహ. నాను వెహిమన్ని కంటం టోయెల పలక్తివలె వాతి జాటు లెకెండె మహాద్.

3 అయ లక్క నాల్పయ నాల్లి వెయ్ లోకుర్ అయ సింహాసనం ఎద్దుని అయ పాణం మన్ని నాల్లి జంతుజ ఎద్దుని ఇరువయ్ నాల్పెర పెద్దెల్జ ఎద్దు, ఉండ్రి కొత్త పాట పార్తార్. యా లోకమదాన్ కొలె ఆతి, వారె ఆఎండ మరి ఎయెరబా అయ పాట నెన్వితార్.

4 వీరు బోదెకవెట కూడెజి, వరిజ్ వారి సెఇకార్ కిబె ఆఎండ నెగెండ మన్నికార్. గొరెపిల్ల ఎంబె సాహిజ్బా వీరుబా వన్నివెట సొన్ని మహార్. వీరు తొలిత పంటితి పంటలెకెండె దేవుణు వందిజ్, మరి గొరెపిల్లవందిజ్ బూమి మున్సు. మన్ని విజు లోకుర్ బాణిజ్ ఎద్దె ఆజి కేట అతికార్.

5 వీరు వెయుదాన్ ఇని అబద్దం మాటబా వరిగివితార్. వీరు ఇని కల్లి సిల్లి నెగ్గెకార్.

మాండ్రి దేవుణు దూతార్

6 నస్తివలె బూమి మున్సు. మన్నివరిజ్ విజేరిజ్, అహిజ విజు జాతిజిజి వరిజ్, విజు తెగాతివరిజ్, విజు బాసెజి వర్తిని వరిజ్, విజు దేనెమ్ది లోకురిజ్, వెప్తాజ్ దేవుణు వెట ఎలాకాలం మంజిని బత్సు. సీని సువార్త అసి మరి ఉండ్రి దేవుణు దూత ఆగనమ్దు ఎగ్రిజి మంజినిక నాను సుడూత.

7 వాండ్రు, “వీరు దేవుణుదిజ్ లోజిజి, వన్నిజ్ గవరం సీదు. ఎందానిజ్ ఇహిజ వాండ్రు తీర్పు తీరిసిని గడియె వాత మనాద్. అందెజి ఆగనమ్దిజ్, బూమిదిజ్, నమ్దారమ్దిజ్, ఏరు వాని ఉణెజి పుటిన్తి వన్నిజె పొగిడిజి మాడిస్సు”, ఇజి గొప్ప పెరి కంటమదాన్ వెప్తాన్.

8 మరి ఉండ్రి దూత వన్ని వెనుక వాజి, “ఉత్పత్ కిబిన్సి, రంకు బూలాజిని దన్ని పణిజాణిజ్ విజు లోకురిజ్ మత్తు కిబిన్సిలెకెండె ఉట్పిన్సికాద్ అతి గొప్ప పెరి పట్టుం ఆతి బబులోను అర్తాద్, అర్తాద్”, ఇజి వెప్తాన్.

9-10 అయ రుండి దేవుణు దూతార్ వెనుక, మరి ఒరెన్ దూత వన్ని వెనుక వాజి గొప్ప పెరి కంటమదాన్ ఈహు వెప్తాన్. “ఎయెనబా అయ జంతుజ్ మాడిసి, దన్ని బొమ్మదిజ్ మొకిజి, దన్ని గుర్తు వన్ని నొద్దుదునో, కియుదునో పోకె అతికాన్, ఇనికబా కలవ్విండ పూర్తి సత్తుదాన్ వాకె ఆజిని దేవుణు గొప్ప కోపం ఇని మత్తు కిబిన్సి కల్లు ఉణాన్లె. గొరెపిల్ల ఎద్దుని, దేవుణు వందిజ్ కేట అతికార్ ఆతి దేవుణు దూతార్ ఎద్దు, నెగిడిని సినుదాన్, వెయ్ని గండకమదాన్ ఇమ్సెజ్ కిబె ఆనాన్.

11 వారు హిమ్సెజ్ కిబె ఆజిని దన్ని గోయ్ ఎలాకాలం డిఃన్విండ మున్సు. సొన్ని మంజినాద్. అయ క్రూరమతి జంతుదిజ్ గాని, దన్ని బొమ్మదిజ్ గాని పొగిడిజి మాడిస్సికార్, దన్ని పేరుమన్ని గుర్తు ఎయెనబా పోకె అతిజ అబ్బె రెయుపొగిల్ కాలి సిల్లెండె హిమ్సెజ్ కిబె ఆజి మంజినాన్.

12 అందెజి దేవుణులు ఆడ్రెజ్ లోజీజి మంజి, యేసువందిజ్ మన్ని నమకమీదు నమకమాతివరిలెకెండ్ మంజినికార్, హిమ్సెజ్ విజు డిన్విండ్ ఓరిసి మంజినార్. వారు దేవుణుదిజ్ నెందితికార్ ఇజి తోరె ఆజినార్.

13 నస్తివలె, “ప్రబు మున్సు, నమకం ఇండేజి ఏబుదాన్ సానికాన్ దేవుణు సీని దీవెనమకు మంజినికార్ ఇజి రాన్అ”, ఇజి పరలోకమీదాన్ ఉండ్రీ కంటం వెహ్తాక వెహ. “నిజమె, వారు కస్టబాడేజినిక డిసి రోమ్పూర్. వారు కితిమన్ని పణిదిజ్ తగితి లెకెండ్ వరిజ్ ఇనాయం దోహ్కూద్”, ఇజి దేవుణు అత్తు వెహ్సినాన్.

బూమిది పంట కొయ్నిక.

14 మరి నాను సుడేతిజ్, ఇదిలో, తెల్లాని మొసాప్ తోరితాద్. “లోకు మరిసి” అతి వన్నిజ్ పోలితి ఒరెన్ మొసాప్ మున్సు బస్త మహాన్. వన్ని బుర మున్సు బజారం టోపి మహాద్. వన్ని కీదు తెవుగు మన్ని కొడేవేలి అస్త మహాన్.

15 నస్తివలె మరి ఉండ్రీ దేవుణు దూత, దేవుణుగుడిదాన్ వెల్లి వాజి, “బూమిది పంట పండిత మనాద్. కొయ్దెజ్ కాలం వాతాద్. అందెజి నీ కొడేవేలి అసి కొయ్అ”, ఇజి మొసాపు మున్సు బస్తిమన్ని వన్నిజ్ పెరి కంటమీదాన్ వెహ్సాన్.

16 మొసాపు మున్సు బస్తి మన్నికాన్ వన్ని కొడేవేలి బూమి మున్సు నెల్ఫ్రాన్. బూమిదు పంటితి మన్ని పంట కొయ్ అతాద్.

17 నస్తివలె మరి ఉండ్రీ దేవుణు దూత పరలోకమీదు మన్ని దేవుణుగుడిదాన్ వెల్లి వాతాన్. వన్నిజ్బా తెవుగుమన్ని ఉండ్రీ కొడేవేలి మహాద్.

18 మరి ఉండ్రీ దేవుణు దూత దేవుణుదిజ్ పూజి సీని మాలోపీటదాన్ వెల్లి వాతాన్. వాండ్రు సీను మున్సు అతికారం మన్నికాన్. “బూమి మున్సు మన్ని ద్రాక్కు పట్టు కొయ్దెజ్ పాకం వాతె. అందెజి తెవుగు మన్ని నీ కొడేవేలిదాన్ దన్ని గెలెజ్ కొయ్అ”, ఇజి గొప్ప పెరి కంటమీదాన్ వాండ్రు కొడేవేలి అస్తిమన్ని దూతెజ్ వెహ్సాన్.

19 అందెజి అయ దేవుణు దూత వన్ని కొడేవేలి బూమి మున్సు నెల్ఫ్రాండ్, ద్రాక్కు పట్టు కొయ్జి, ద్రాక్కు పట్టు మట్టి రసం లాగ్జిని గనుగుదు ఇద్దాన్. యా గనుగు దేవుణుబాణిజ్ వాజిని సీనున్న కొపమీదిజ్ గుర్తు.

20 ద్రాక్కు పట్టు మట్టిని గనుగుదు పట్టుమీదిజ్ వెల్లి వారు మట్టార్. రుండి వందెజ్ మయిలుజ్ దూరం, గుర్తం వెయుది కలిమీదిజ్ సమానం ఆతిలెకెండ్, అయదు అడుగుజ్ లోతు మన్ని గడ్డ లెకెండ్, అయ గనుగుదాన్ నల సోతాద్.

15

ఏడు దేవుణుదూతాన్ ఏడు జబ్బుజ్.

1 మరి ఉండ్రీ గొప్ప బమ్మాతి గుర్తు పరలోకమీదు నాను సుడేత. దేవుణు కోపం పూర్తి అనిలెకెండ్ కిదిజ్ ఇజి, కడేవెరిది ఏడు జబ్బుజ్ అస్తి మన్ని ఏడు దూతారిజ్ సుడేత.

2 మరి సీనుదాన్ కూడితి మన్ని గాజుదిజ్ పోలితి సమదరం లెకెండ్ మన్నిక నాను సుడేత. అయ క్రూరమతి జంతుజ్ దన్ని బోమ్మదిజ్, దన్ని పేరుది అంకిదిజ్ లోజీవిండ్ దన్నిజ్ గెలిస్తాకార్, దేవుణు వరిజ్ సిత్తి టోయ్లెజ్ అసి అయ గాజు నన్ని సమదరం వడేకాదు నిల్లి మంజినిక సుడేత.

3 వారు, “ప్రబు అతి దేవుణు, విజు దన్నిజ్ అతికారం మన్నికి నీ వణిజ్ గొప్ప పెరికెజ్ని బమ్మాతికెజ్. బూమి మున్సు మన్ని లోకర్ మున్సు ఎలాకాలం రాజు అతికి, నీ సరిజ్ నాయం ఆతికెజ్ని నిజమాతికెజ్ మన్నె.

4 ప్రబువా, నీను ఒదిగె గొప్ప నెగ్గికి, నీ నన్నికాన్ మరి ఎయెన్బా సిల్లెన్. లోకర్ విజేరె నిజి లోజీజి మంజినార్. బూమి మున్సు మన్ని లోకర్ విజేరె నిపేరుదిజ్ గవరం సీనాలె. తోరె అతిమని నీతినిజయ్ మన్ని వణిజి వందిజ్ లోకర్ విజేరె వాజి నీ ఎద్దు నిజి పొగిడిజి మాడిస్సార్లె”, ఇజి దేవుణు వణికినికాన్ అతి మోసె పాటని గొరెపిల్ల పాట పార్దార్.

5 దన్నివెనుక, నాను సుడఃతిజ్ సాస్యమదిజ్ గుడారం ఇని దేవుణు గుడిః పరలోకముదు రే ఆతాద్.

6 అయ ఏడు జబ్బుజ్ అస్తి మన్ని ఏడు దూతార్, కల్లిసిల్లి మెర్సిని తెల్లెని సాక్కెజ్ తోడిఃగిజ, దన్ని మున్ను గుండెదు బజారమ్దాన్ తయార్ కితి జమిదు తోహా ఆజ అయ దేవుణు - గుడిఃదాన్ వెల్లి వాతార్.

7 నస్తివలె, అయ పాణం మన్ని నాల్లి జంతుజ లోఱ ఉండ్రీ జంతు ఎలాకాలం బత్తిజిని దేవుణు కోపమ్దాన్ నిండ్రీతి మన్ని, బజారమ్దాన్ తయార్ కితి ఏడు కుడుకెజ్ అయ ఏడు దేవుణుదూతారిజ్ సితాన్.

8 అయావలె దేవుణు జాయ్దాన్ని వన్ని సత్తుదాన్ వాతి గోయ్దాన్ దేవుణు గుడిః నిండ్రీతాద్. అయ ఏడు దేవుణుదూతార్వెట వాదెజ్ మన్ని జబ్బుజ్ వాజి పూర్తి ఆనిదాక ఎయెన్బా దేవుణు గుడిఃదు డుగ్దెజ్ అట్వితాన్.

16

దేవుణు కోపం నిండ్రీతి మన్ని ఏడు కుడుకెజ్

1 నస్తివలె, “మీరు సొన్ని దేవుణు కోపమ్దాన్ నిండ్రీతి మన్ని అయ ఏడు కుడుకెజ్ బూమి మున్ను వాక్కు”, ఇజ దేవుణు గుడిఃదాన్ అయ ఏడు దేవుణుదూతారిజ్ గొప్ప పెరి కంటమ్దాన్ వెహ్కా వెహ.

2 మొదొహ దెవుణుదూత సాహండ్రే వన్ని కుడుకాదు మన్నిక బూమి మున్ను వాక్కిజ్, అయ క్రూరమతి జంతుది గర్బు పోకె ఆతి వరిజ్ని దన్ని బొమ్మదిజ్ మాడిఃస్తివరిజ్ డటం నొప్పి కిజిని నిఱ పుట్టు పుట్టె.

3 దన్నివెనుక రుండి దేవుణు దూత సొన్ని వన్ని కుడుకాదు మన్నిక సమ్దరమ్దు వాక్కిజ్, సమ్దరమ్దుది ఏరు పీనుగుది నల లెకెండ్ర ఆతాద్. అందెజి సమ్దరమ్దు మన్ని పాణం మనికెజ్ విజు సాతె.

4 అయ రుండి దేవుణు దూత వెనుక మూండ్రీ దేవుణు దూత సొన్ని వన్ని కుడుకాదు మన్నిక పెరి గడ్డెజిని ఏరు సొని ఊటెజ వాక్కిజ్, వనక ఏరు విజు నల ఆతె.

5 నస్తివలె, “ఏలు మన్నికి, ముజాల మహికి ఆతి నీను ఒరిదె పరిసుద్దమాతికాన్ ఆతికి. నీ నన్నికాన్ మరి ఎయెన్బా సితాన్.

6 వారు దేవుణు వందిజ్ కేట ఆతి వరిజ్ని దేవుణు ప్రవక్తరుజ్ సప్తార్. అందెజి వరిజ్ తగ్గిలెకెండ్ర తీర్పు తీరిసి, వరిజ్ ఉండెజ్ నల సిత్రీజ్, నీను నీతినిజాయ్దాన్ తీర్పు తీరిసినికె ఆజిని”, ఇజ ఏరుదిజ్ అతికారం మన్ని దేవుణు దూత వెహ్నినికె వెహ.

7 అందెజి “నిజమె, ప్రబు ఆతి దేవుణు, విజు దన్నిజ్ అతికారం మన్నికి, నీను తీరిస్సి తీర్పుజ్ నిజమాతికెజ్, నాయమాతికెజ్”, ఇజ పూజ సీని మాలిపీటదాన్ వెహ్కా వెహ.

8 అయ మూండ్రీ దేవుణు దూత వెనుక నాల్లి దేవుణు దూత సొన్ని వన్ని కుడుకాదు మన్నిక, పొద్దుమున్ను వాక్కిజ్ లోకురిజ్ సినుదాన్ సుర్దెజ్ పొద్దుదిజ్ అతికారం దొహ్కాద్.

9 అందెజి లోకుర్ నండో వేడిఃదాన్ వెయ్జ, పుట్కూజ్ని నొప్పి కిబిస్సి జబ్బుజ్ లోకుర్ మున్ను పోక్కిమన్ని దేవుణు పేరుదిజ్ దుసలాడిఃతార్. గాని వారు, పరి పాపమ్కు ఒప్పుకోడిఃజి డిఃసీసీజ మన్ను మారిస్సెజ్ ఒవ్వెతార్. వారు దేవుణుదిజ్ పొగిడిఃదెజ్బా ఒవ్వెతార్.

10 అయ నాల్లి దేవుణు దూత వెనుక అయ్దు దేవుణు దూత సొన్ని వన్ని కుడుకాదు మన్నిక అయ క్రూరమతి జంతు బన్ని సింహాసనం మున్ను వాక్కిజ్, అది ఏలుబడిః కిని దేసెం విజు సీకటి ఆతాద్. లోకుర్ వరిజ్ వాజిని నొప్పిజ్ బరిస్సెజ్ అట్వండ వరి నాలికెజ్ అడ్డం కొవ్కా ఆతార్.

11 పరి పుట్టుజవందిజ్, నొప్పిజవందిజ్ పరలోకమ్దు మన్ని దేవుణుదిజ్ దుసలాడిఃతార్. గాని వారు కిత్తి మహి నిఱ పణిజ వందిజ్ ఒడిఃబిజి మన్ను మరిసి పాపమ్కు ఒప్పుకోడిఃజి డిఃసీసీదిజ్ ఒవ్వెతార్.

12 అయ అయ్దు దేవుణు దూత వెనుక ఆరు దేవుణు దూత సొన్ని వన్ని కుడుకాదు మన్నిక యూప్రటిసు ఇని గొప్ప పెరి గడ్డ మున్ను వాక్కిజ్, తూర్పు దరొటాన్ వాని రాజారిజ్ వాదెజ్ సరి తయార్ ఆతిలెకెండ్ర గడ్డ వహ్కా సాహద్.

13 నస్తివలె, అయ గొప్ప పెరి సరాసు వెయ్దుదాన్, మరి అయ క్రూరమతి జంతు వెయ్దుదాన్ని అబద్ధం వెహ్ని ప్రవక్త వెయ్దుదాన్ కపొకిజ్ నన్ని మూండ్రీ దెయ్మకు వెల్లి వాతిక సుడఃత.

14 అయ దెయమ్మకు బమ్మాని గుర్తుకే కిజి తోరిసినె. అవి విజు దన్నిజ్ అతికారం ఆతిమన్ని దేవుణు తీర్పు తీరిన్ని, గొప్ప తియెల్ అని రోజుదు, దేవుణు వెట ఉద్దం కిదెజ్ ఇజి లోకమ్దు మన్ని విజు రాజురిజ్ కుడుఁప్పి తత్తెజ్ ఇజి వరి డగ్గు సాహె.

15 “ఇదిలో, ఎయెన్ బా ఒడిఁబివిండ మహివలె, డోఁజారి డోఁజి కిదెజ్ వానిలెకెండ్ నాను వాజన. నాను వానివలె సిగు అనిలెకెండ్ డుమ్డ నడిఁవిండ మండ్రెజ్ ఇజి తెలి ఆజిమంజి వన్ని సొక్కెజ్ కావ్ కిజి మంజినికాన్ దేవుణు సీజిని దీవనమ్మకు మంజినికాన్ ఆనాన్”.

16 నస్తివలె, అయ దెయమ్మకు ఏవ్రి బానదు ‘అర్ మెగెదోను’ ఇజి కూకె ఆజిని బాడ్డిదు లోకమ్ది రాజురిజ్ విజెరిజ్ కుడుఁప్పి తత్తె.

17 అయ ఆరు దేవుణు దూత వెనుక ఏడు దేవుణు దూత సొన్ని వన్ని కుడుఁకాదు మన్నిక ఆగనమ్దిజ్ బూమిదిజ్ నడిఁమి మన్ని బాడ్డిదు వాక్కిజ్, “పూర్తి ఆతాద్”, ఇజి దేవుణుగుడిఁలో ఇ మన్ని సిహాననమ్దాన్ వెప్పిని ఉండ్రె పెరి కంటం వాతాద్.

18 నస్తివలె మెర్పిని జాయ్, దీడోఁజినికెజ్, పిడుఁగుజ్, విజు వాతె. బూమి గొప్పజ కద్దితాద్. బూమి మున్ను లోకుర్ పుట్టిబాణిజ్ అసి ఎనెజ్ బా జర్రిలెకెండ్ నసా గొప్ప గటిజ బూమి కద్దితాద్.

19 గొప్ప పేరు పొందితిమన్ని బబులోను పట్టుం బదెజ్ ఆజి మూండ్రె ముకెజ్ ఆతె. దేవుణుదిజ్ నమ్మిఇవరి పట్టుమ్కు అర్తె సాహె. బబులోను పట్టుమ్దిజ్, దన్ని పాపమ్క వందిజ్, సిసు లెకెండ్ మన్ని, వన్ని గొప్ప పెరి కోపం మన్ని గిన్ను ఉండెజ్ సీదెజ్ దేవుణు ఎత్తు కిత్తాన్.

20 నమ్దరం నడిఁమి మన్ని ఇజి దేనమ్కు (ద్విపుజ్) విజు ముడుఁగితె సాహె. గొరోక్ అణెనె ఆజి నద్దుజ్ ఆతె.

21 డగ్గు యబాయ్ కేజిజ్ బరు మంజిని వడఁజెజ్ ఆగనమ్దాన్ లోకురి మున్ను అర్తె. అయ వడఁజెబాణిజ్ తగ్గితి గాయమ్కు గొప్ప పెరికెజాతిజ్, లోకుర్ అయ గాయమ్క వందిజ్ దేవుణుదిజ్ దుసలాడిఁతార్.

17

బోదెలిని జంతు

1 ఏడు కుడుఁకెజ్ అస్తిమన్ని ఏడు దూతారలో ఇ ఒరెన్ దూత వాతాండ్ర నావెట, “నీను ఇబ్బె రల. గొప్ప రంకు బూలాని బోదెలిలెకెండ్ మన్ని, నండో గడ్డెజ్ పడకాదుమన్ని పెరి పట్టుమ్దిజ్ తీర్పు కిజి, సీజిని సిక్కు నిజి తోరిస్తాల”, ఇజి వెప్తాన్.

2 బూమి మున్ను, మన్ని రాజుర్ దన్ని వెట కూడఁజి గూర్తార్. బూమి మున్ను, బత్తినికార్ దన్ని రంకు బూలాని పణిబాణిజ్ మత్తు ఆజి సోస్తార్.

3 నస్తివలె, దేవుణు ఆత్మదాన్ నిండ్రెతి మన్ని నజి, అయ దేవుణు దూత బిడిఁమ్ బూమిదు లాగ్గి ఒత్తాన్. అబ్బె దేవుణు పేరుదిజ్ దుసలాడిఁజిని పేరుదాన్ నిండ్రెతి మన్ని ఏడు బురెకిని పది కొమ్ము, మన్ని, ఉండ్రె ఎరాని జంతు మున్ను, బస్తిమన్ని ఉండ్రె బోదెలిదిజ్ సుడఁత.

4 అయ బోదెలి నీలి రంగు కూడిఁతి మన్ని ఎరాని రంగుది గొప్ప విలువాతి పాత పొరపాజి, మెర్పిని బజారం, విలువాతి రంగుపణకుది విలువాతి పూసెజ్ ఇట్టిజి ముహాద్. అది కిజి మంజిని సెజ పణిబాణిజ్. మరి అది కిజిని రంకు బూలాని పణిది సెజ గుణమ్కు విజు నిండ్రెతి మన్ని ఉండ్రె బజరమ్ది గిన్ను కియుదు అస్తి ముహాద్.

5 అర్దం కిదెజ్ అల్లెణ లెకెండ్ దన్ని పేరు దన్ని నొద్దుదు యాలెకెండ్ రానె ఆత మహాద్.

“బూమి మున్ను, మన్ని రంకు బూలాని బోదెకాజ్ ని విజు సెజ పణిజి అయెసి ఆతిమన్ని గొప్ప పెరి బబులోను”.

6 అయ బోదెలి దేవుణు వందిజ్ కేట ఆతిమన్ని వరి నలని యేసువందిజ్ సాస్యం వెప్తాజ్ నప్పె ఆతివరి నల ఉణిజి మత్తు ఆజి సొస్స ముహాద్. నాను దన్నిజ్ సుడఁజి నండో బమ్మ ఆత.

7 నస్తివలె, అయ దేవుణు దూత నావెట ఈహు వెప్తాన్. “నీను ఎందానిజ్ బమ్మ ఆజిని అయ బోదెలివందిజ్ ని మరి ఏడు బురెకిని పది కొమ్ముమన్ని అది బస్తిమన్ని జంతువందిజ్ డాఁజితి మన్ని నజితిజ్ నాను నిజి తెలియ కిసా”.

8 నీను సుడేశతి అయ జంతు ముజాల్ మహాద్ గాని ఏలు సిల్లెద్. గాని వెటనె దర్షిదాన్ వెల్లి వాజి, దన్ని వందిజ్ తయార్ ఆతిమని లెకెండ నాననం ఆజి సానాద్. బూమి పుట్వండ ముజ్జాల్పా, దేవుణు వెట ఎలాకాలం బత్కిని వరి పేరుకు రాసి ఇడేశజిని పుస్తకమీదు పేర్కు, సిల్లి, బూమి మున్ను, బత్కినికార్ అయ జంతుజ్ సుడేశజి, ఇక్క ముజాల మహాద్, ఏలు సిల్లెద్. గాని మరి వానాద్లె, ఇజి బమ్మ అనార్.

9 ఇక్క నెస్తజ్ గెణం మన్ని మన్ను మండ్రెజ్ వలె. అయ జంతుది ఏడు బురెక్ ఇహిజ, అయ బోదెలి బస్తిమన్ని ఏడు గొరొక్.

10 అయ ఏడు బురెక్, ఏడుగురు రాజురిజ్ బా పొలిత మనార్. అయదుగురుది కాలం గడేశ్ నాద్. ఒరెన్ ఏలుబడిః కిజి మంజినాన్. కడేశవెరిదికాన్ ఇంక రెవండ్రె. గాని వాండ్రు వానివలె, కండెక్ కాలం వాండ్రు ఏలుబడిః కిజి మండ్రెజ్ వలె.

11 అయ క్రూరమతి జంతు ముజాల మహికాండ్రె గాని ఏలు సిల్లికాన్ ఆతి ఎనిమిది రాజు. వాండ్రు, వన్ని ముజాల మహి ఏడు రాజుజ్ సెందితికాన్. వాండ్రు వన్ని వందిజ్ మన్ని ఎలాకాలం మంజిని నాననమీదిజ్ సాన్నినాన్.

12 నీను సుడేశతి మన్ని పది కొముకు, పది మణిసి రాజురిజ్ పొలిత మనార్. వరిజ్ ఏలుబడిః కిదెజ్ ఏలుదాక అతికారం దొహ్కావిదె. గాని ఉండ్రె గడియ అయ క్రూరమతి జంతు వెట రాజుర్ లెకెండ వరిజ్ అతికారం దొహ్కాద్లె.

13 వారు ఉండ్రె ఉదెనమదాన్ వరి సత్తుని అతికారం విజు అయ జంతుదిజ్ ఒవజిప్పారె.

14 వారు గొరెప్పిలవెట విదెం కినార్ గాని రాజురిజ్ రాజు, ప్రబురిజ్ ప్రబు ఆతిమన్ని గొరెప్పిల వరి మున్ను. గెలిన్నాలె. వాండ్రు కూక ఆతిమన్నికార్, మరి వన్ని వందిజ్ ఎర్రె ఆతిమన్నికార్ని వన్నిజ్ లోజిజి మంజిని నమ్మకమాతికార్ వన్నివెట మంజినార్లె.

15 నస్తివలె, అయ దేవుణు దూత నజి ఈహం వెహ్సాన్. “నీను సుడేశతిమన్ని, అయ గొప్ప రంకు బూలాని బోదెలి బస్తిమన్ని నండో పెరి గడ్డెజ్ ఇనిక ఇహిజ, యా లోకమీదు మన్ని విజు జాతిజాణికార్, విజు దేనమక లోకుర్, విజు తెగాదికార్, విజు బానెజ్ వర్గినకార్.

16 నీను సుడేశతి మన్ని అయ క్రూరమతి జంతుని అయ పది కొముకు, అయ రంకు బూలాని బోదెలిదిజ్ ఇస్తం ఆవిర్. వారు దన్నిజ్ కల్లితి మన్నికెజ్ విజు లాగ్గి విసిర్జి, నగడి కిజి, దన్ని కండ కొంబి తింజి, మిగిలిత్తిక సిసుదాన్ సుర్పు విసిర్పార్.

17 దేవుణు మాటదు మన్నిలెకెండ పూర్తి అనిదాక ఏలుబడిః కిదెజ్ ఇజి అయ క్రూరమతి జంతుజ్, వరి అతికారమకు విజు సీదెజ్ ఇజి దేవుణు వన్ని ఉదెసం పూర్తి కిదెజ్ ఇజి వరి మన్నుజ బుడ్డి సిత్రాన్

18 మరి నీను సుడేశతి అయ బోదెలి బూమి మున్ను, మన్ని రాజురిజ్ మున్ను, ఏలుబడిః కిని అయ గొప్ప పెరి పట్టుమనె”.

18

బబులోను పట్టుం అర్పినిక

1 దిన్ని వెనుక మరి ఒరెన్ దేవుణు దూత పరలోకమదాన్ డిగిజి వానిక నాను సుడేశత. వన్నిజ్ గొప్ప పెరి అతికారం మహాద్. వన్నిబాణిజ్ వాతిమన్ని గొప్ప జాయ్దాన్ బూమి విజు జాయ్ ఆతాద్.

2 వాండ్రు గొప్ప పెరి కంటమదాన్ ఈహు డెల్లి వెహ్సాన్. “గొప్ప పెరి పట్టుం ఆతి బబులోను అరె ఆతాద్, అరె ఆతాద్. అక్క దెయ్మకాజ్ మండ్రెజ్ ఇల్లు అత మనాద్. విజు సెఇ ఆత్మెజ్ బత్కిజిని బాడ్డి అత మనాద్. విజు సెఇకెజ్ ఇస్తం కిదెజ్ అట్ఇ పొటిజ్ బత్కిజిని బాడ్డి అతాద్.

3 ఎందానిజ్ ఇహిజ మత్తు కబిస్సి కల్లు నన్ని, ఉత్పుత్ కిబిస్సి, దన్ని రంకు బూలాని పణిజాణిజ్, ఉణిజి సొస్తిలెకెండ, విజు దేసెమ్కాణి లోకుర్ సోస్తార్. బూమి మున్ను, మన్ని రాజుర్ దన్ని వెట గూర్పార్. దన్నిజ్ మహి నండో లావ్ ఆతిమన్ని, ఒడోలేది ఆనిజు సర్గ కిబిస్సి పణిజాణిజ్ బూమి మున్ను, మన్ని నవుకారిబు గొప్ప ఆస్తి మనికార్ ఆతార్.

4 నన్నీవలె, యాలెకెండ్ మరి ఉండ్రీ కంటం పరలోకమదాన్ వెహ్తాక వెహ. “నజీ ఇస్తమాతికిదెరా, మీరు దన్ని పాపమక లోఇ కూడఃజి మన్వండ, దన్ని జబ్బుజ్ ఇనికబా మిజి అన్వండ, మీరు దన్ని బాణిజ్ వెల్లి రదు.

5 అది కిత్తి పాపమకు ఆగనమదు అందితిలెకెండ్ కొట్టు ఆతె మన్నె. అది కిత్తి తప్పజ్ విజు దేవుణు ఎత్తు కిత మనాన్.

6 అది సిత్తిమన్ని లెకెండ్నె దన్నిజ్ సీదు. అది కిత్తి మన్ని పణిజ రుండి వంతుజ్ దన్నిజ్ కిదు. అది కలప్తిమన్ని దన్ని గిన్నుదాన్ ఉండెజ్ రుండి వంతుజ్ కలప్పి దన్నిజ్ సీదు.

7 నాను రాణిలెకెండ్ బన్న మన్ను. నాను రాండి బోదెలి అవద్. నాను ఎనెజ్బా దుకమదాన్ అడఃబావి”, ఇజి దన్ని మన్నుదు అది పొజిజనాద్. అందెజె దన్నిజ్ అదినె ఎస్సానో పొజిజి ఒడఃలద్ ఆనెజి సర్ద కిబిస్తెజ్ కిత్తిమన్ని పణిజ సమానం ఆతి ససా దుకమని హిమ్నెజ్ దన్నిజ్ మరజి సీదు.

8 అందెజె, ఉండ్రె రోజుదునె, జబ్బుజ్, దుకం, కరు ఇని బాదెజ్ దన్నిజ్ వానె. దన్నిజ్ తీర్పు తీరిసి సిక్కు సీని ప్రబు ఆతి దేవుణు గొప్పు సత్తు మన్నికాన్, అందెజె దన్నిజ్ సీనుదాన్ సుర్పు విసీర్నాన్.

9 అది సురె ఆని సీనుదాన్ వాని గోయ్ సుడఃజి, దన్ని వెట గూర్తి మహికార్, దన్ని ఒడఃలద్ ఆనెజి సర్ద కిబిస్తె పణిజ వందిజ్ కూడిఃతికారాతి బామి ముస్సు. మన్ని రాజుర్ గుండె కొత్తె ఆజి దన్ని వందిజ్ అడఃబానార్.

10 వారు, దన్నిజ్ వాతి సిక్కుదిజ్ సుడఃజి తియెలాజి దూరం నిల్పి మంజి, అడఃబాజి, “అబాయా, అబాయా, గొప్పు పెరి పట్టుమాతి బబులోను, సత్తుమన్ని పట్టుమా, ఉండ్రీ గడిఃయూదునె నాననం వాతాద్”, ఇజి మెహె ఆజి మంజినార్.

11 అయ పట్టుం నాననం ఆతిక సుడఃజి, వరి వస్తుజ్ కొణికార్ మరి ఎయెర్బా సిల్లెర్ ఇజి బామి ముస్సు. మన్ని బేరం కినికార్ దన్నిజె సుడఃజి గుండె కొత్తె ఆజి అడఃబానార్.

12 వారు పొర్తి మహి వస్తుజ్ ఇహెజ, బజారం, వెండి, విలువాతి రంగు పణకుజ్ని పూసెజ్, విలువాతి నూలు పాతెజ్, మరి నీలి రంగు కూడిఃతి ఎరాని పాతెజ్, సిల్పు. పాతెజ్, విలువాతి నల రంగునన్ని ఎరాని పాతెజ్, రకరకమది గందం మరాతి ఒస్తుజ్, ఏనుగు కొముకాణిజ్ తయార్ కిత్తి రకరకమది ఒస్తుజ్, నండో విలువ మన్ని మరెకాణి ఒస్తుజ్, కంసు, ఇసుము, నునాజ్ మన్ని పణకు సెక్కెజ్, దాసిని మరాతి తోలు, వాసనం మన్ని కాయెజ్, దూపం సుర్పి ఒస్తుజ్, వాసనం మన్ని నూనె, కల్లు,

13 ఒలివ నూనె, మెత్తాని దూరు, గొదము, కోడ్డెజ్, గొర్రెజ్, గుర్రమకు, గుర్రమకు లాగ్గిని బండెజ్, వెట్టిపణి కిని లోకురిజ్బా వారు పొర్పి మహర్. ఏలుదాన్ ఇక్కెజ్ కొణికార్ సిల్లెర్ ఇజి వారు అడఃబానార్.

14 “సీను కోరిత్తిమన్ని విలువాతి గొప్పు నెగ్గి వస్తుజ్ విజు నీ బాణిజ్ లాగ్ ఆతాద్. మరి ఎనెజ్బా మరజి దొహ్కెఇలెకెండ్, సీ విలువాతి వస్తుజ్ని ఆస్తి విజు సిల్లెండాతాద్ ఇజి సవకారిజు దన్నిజ్ వెహ్నార్.

15 అయ పట్టుమదు సాన్ని వరి వస్తుజ్ పొర్పి దన్ని బాణిజ్ ఆస్తి గణెసికార్ ఆతి బేరం కినికార్, దన్నిజ్ వాతిమన్ని బాదెజ్ సుడఃజి తియెలాజి గుండె కొత్తె ఆజి అడఃబాజి యాలెకెండ్ వెహ్నార్.

16 “అబాయా, అబాయా, విలువాతి నూలు పాతెజ్, నీలిరంగు కూడిఃతి మన్ని ఎరాని పాతెజ్ని నలరంగు నన్ని విలువాతి ఎరాని పాతెజ్ పొర్పాజి, మెర్పిని బజారమని విలువాతి రంగు పణకుజ్ని పూసెజ్ అయ పట్టుమదు దొహ్కె మహద్.

17 నిస్సా గొప్పు పెరి ఆస్తి ఉండ్రీ గడిఃయూదునె పాడఃత సాహదా ఇజి ఒడఃజి నడిఃపిసిని విజు నెయ్యిర్, ఒడఃజి వయనం కినికార్, ఒడఃజి పణి కినికార్, సమదరమదు పణి కిజి బత్కినికార్ విజెర్ దూరం నిల్పిమంజినార్.

18 అది సురె ఆజిని సీనుది గోయ్ సుడఃజి, “యా గొప్పు పెరి పట్టుమదిజ్ సమానం ఆతి మరి ఉండ్రీ పట్టుం ఎంబెబా మనాదా”, ఇజి గొప్పు డేల్పి వెహ్నార్.

19 వారు వరి బురెకాజ్ ముస్సు. దుల్లి వాకె ఆజి గుండె కొత్తె ఆజి అడఃబాజి.

“అబాయ, అబాయ, సమదరం ముస్సు. ఒడఃజ్ మనికార్ విజెర్ బేరం కిజి ఆస్తి గణెసి మన్ని యా గొప్పు పెరి పట్టుమది ఆస్తి ఉండ్రీ గడిఃయూదునె నాననం ఆత సాహద్”, ఇజి డటం డేల్పి మంజినార్.

20 పరలోకమందు మన్నికెదెరా, అయ పట్టుం నాసనం ఆతివందిజ్ మీరు సర్ద ఆదు. దేవుణుదిజ్ నమ్మిత్తికెదెరా, అపొస్తురు ఆతికెదెరా, దేవుణు ప్రవక్తరు ఆతికెదెరా మీరు సర్ద ఆదు, ఎందానిజ్ ఇహిజ అది ఎలాగ మిజి తీర్పు సిత్త మనాదొ, అయాలెకెండెనె దేవుణు అయ పట్టుం మున్ను తీర్పు తీరిస్త మనాన్.

21 నస్తివలె, సత్తుమున్ని ఒరెన్ దేవుణు దూత, ఉండ్రి గొప్ప వెరి జత్త పణుకు నన్ని ఉండ్రి వెరి పణుకు పేరజి సమదరమందు విసిరీతాండ్రె, “మరి ఎనెజ్బా తొరెవిండాతిలెకెండె గొప్ప వెరి పట్టుమాతి బబులోసు గొప్ప వెరి టండెజాణిజ్ యాలెకెండె అడిగి అరె ఆనాదలె.

22 టొయలెజ్ పలక్కి జాటుజ్, పాటెజ్ పార్పివరి జాటుజ్, పిరుడిః ఊక్కి జాటుజ్, జోడుఃబాంక ఊక్కి జాటుజ్ మరి ఎనెజ్బా మీబాణిజ్ వెన్పె ఆఉ. ఎమేణి రకమది పణి కినికాన్ ఎయెనబా, మరి ఎనెజ్బా మీబాన్ తొరెవెన్. జత్తపణుకుదు నూర్పి జాటు మరి ఎనెజ్బా మీ లొఃహాన్ విన్నె అవి

23 ఉండ్రి దీవ మరి ఎనెజ్బా మీలొః జాయ్ సీజి మన్వద్. పెండ్లి దజ్డః జాటు గాని పెండ్లి బోదెలి జాటు గాని మరి ఎనెజ్బా మీలొః వెన్పె ఆఉ. నీ బేరం కినికార్, బూమి మున్ను మన్ని గొప్ప వెరికార్ ఆత మహార్. విజు దేనెమకాణి లోకుర విజెరె నీ మాయ పణిజాణిజ్, మొసెం కిజి, తప్పు సరిదు నీను నడిఃపిన్సి.

24 మరి దేవుణు ప్రవక్తరిజ్ సప్తివందిజ్, దేవుణుదిజ్ నమ్మితి వరిజ్ సప్తి వందిజ్, బూమి మున్ను, సప్పె ఆతి విజెరె వందిజ్ బబులోసు పట్టుమదిజ్ యా సిక్కు వాతాద్”, ఇజి అయ దేవుణు దూత వెహ్హాన్.

19

దేవుణుదిజ్ పొగిడిఃదు (హల్లెలుయ)

1-2 దన్ని వెనుక పరలోకమందు గొప్ప వెరి మంద లోకురి గొప్ప వెరి కంటం యాలెకెండె వెహ.

“దేవుణుదిజ్ పొగిడిఃదు. మజి రక్కిస్తవన్నిజ్ పొగిడిఃదు. వాండ్రు ఒరెండ్రె పూర్పి జాయ్ని సత్తు మన్నికాన్. ఎందానిజ్ ఇహిజ, ఎస్తివలెబా వాండ్రు నిజమాతి, నాయమాతి తీర్పుజ్ సీజనాన్. దన్ని రంకు బూలాని పణిజాణిజ్ బూమి మున్ను మన్ని వరిజ్ అది పాడః కిత్తాద్. అయ గొప్ప రంకు బూలాని బోదెలిదిజ్ వాండ్రు తీర్పు తీరిసి సిక్కుసిత్తాన్. వన్ని పణికినివరి నలవందిజ్ వాండ్రు దన్నిజ్ అయాలెకెండెనె మరజి సిక్కు సిత్తాన్.

3 వెనుక వారు మరి ఈహు డెల్పి వెహ్హార్. “హల్లెలుయ. అది సినుదు సురె ఆజిని గోయ్ డిఃన్వింఢ ఎలాకాలం మున్ను సొన్సి మంజినాద్.

4 నస్తివలె, అయ ఇరువయ్ నాల్వెరె పెద్దెలుజ్ని, పాణం మన్ని నాల్లి జంతుజ్ పడగ్జి అర్పి “అమెన్, దేవుణుదిజ్ పొగిడిఃదు”, ఇజి వెహ్హి సింహాసనమందు బస్తిమన్ని దేవుణుదిజ్ మాడిఃస్తార్.

5 “మా దేవుణుదిజ్ నెందితికెదెరా, వన్నిజ్ లోజిజి మంజిని ఇజిరికార్ని వెరికార్ ఆతికెదెరా, మీరు విజెరె దేవుణుదిజ్ పొగిడిఃదు”, ఇజి వెహ్హిని ఉండ్రి కంటం అయ సింహాసనమదాన్ వాతాద్.

6 నస్తివలె, గొప్ప వెరి గడ్డ సొని జాటులెకెండెనె పిడుఃగుజ గొప్ప వెరి జాటుదిజ్ పొలితి గొప్ప వెరి మంద లోకురి కంటమలెకెండె ఉండ్రి జాటు యాలెకెండె వెహ్హినిక నాను వెహ. “హల్లెలుయ! మా ప్రబు ఆతి దేవుణు, విజు దన్నిజ్ అతికారం మన్నికాన్ ఏలుబడిః కిజినాన్.

7 అందెజె మాటు సర్ద ఆజి డాటూట్. వన్నిజ్ గవ్సరం సినాట్. ఎందానిజ్ ఇహిజ గొరెపిల్ల పెండ్లి సమయం వాతాద్. వన్నిజ్, పెండ్లి దజ్డః దన్నిజ్ అదినె తయార్ కిజినాద్”.

8 “దన్నిజ్ పొర్పాదెజ్ ఇజి నమ్మితి వరి సీతి నిజాయితి మన్ని పణిజాతి సుబ్బరం ఆతి గొప్ప జాయ్ మన్ని, మెర్పిని పాతెజ్ దన్నిజ్ దొహ్కె.

9 మరి “గొరెపిల్ల పెండ్లి విందుదు కూకె ఆతికార్ దీవసమకు పొందితికార్ ఇజి రాన్అ”, ఇజి అయ దేవుణు దూత నజి వెహ్హాన్. “యా మాటెజ్ దేవుణు వెహ్హి నిజమాతి మాటెజ్”, ఇజిబా అయ దేవుణు దూత నజి వెహ్హాన్.

10 అయావలె, నాను వన్నిజ్ పొగిడిజి మాడిస్సిజ్ ఇజి వన్ని పాదమ్కాజ్ వడగజ్ అర్దిజ్ వాండ్రు, “నీను అయాలెకెండ కిమా. నానుబా, యేనువందిజ్ సాస్యం వెస్సాని మీ తంబెరిజవెటని, నీ వెట కూడజి పణికినికాండ్రె. దేవుణుదిజ్ పొగిడిజి మాడిస్సె. దేవుణుబాణిజ్ వాతి మాటెజ్, దేవుణు అత్తదాన్ వెప్తై దేవుణు పణిమణిసిరె యేను తోరిస్తిమన్ని నిజమాతికెజ్ నె వెస్సానార్”, ఇజి నజి వెప్తాన్.

తెల్లాని గుర్రమ్మున్ను బస్తి మన్నికాన్.

11 మరి పరలోకం రే అతిమనిక నాను సుడేశత. ఇదిలో, తెల్లాని గుర్రం ఉండ్రె తోరితాద్. దన్ని మున్ను బస్తి మన్నికాన్, నమ్మకమాతికాన్, నిజామాతికాన్ ఇని పేరు మన్నికాన్. వాండ్రు నాయమ్దాన్ తీర్పు తీరిసి లోకురిజ్ సిక్కు సీజి, నాయమ్దాన్ వన్ని విదెం కిజి మంజినాన్.

12 వన్ని కణుకు సిసుకొనెజ్ లెకెండ మన్నె. వన్ని బుర మున్ను బజారమ్దాన్ తయార్ కిత్తి రాజురి టోపిజ్ నన్ని, నండొ టోపిజ్ మన్నె. వన్నిజి ఆవండ మరి ఎయెర్బా నెనెఇ ఉండ్రె పేరు వన్ని మున్ను రాసె అతిక, వన్నిజ్ మనాద్.

13 నలాదు ముడుక్కిమన్ని సొక్క వాండ్రు తోడుగిత్త మనాన్. దేవుణు మాట ఇని పేరు వన్నిజ్ మనాద్.

14 పరలోకమ్దు మన్ని సయనమ్దికార్, కల్తినెల్లి తెల్లాని నూలు పాతెజ్ తోడిగిజి తెల్లాని గుర్రమ్మక మున్ను ఎక్కి వన్నివెట సాన్ని మహార్

15 దేసెమ్కాణి లోకురిజ్ డెయెదెజ్, వన్ని వెయెదాన్ తెవుగు మన్ని ఉండ్రె కుర్పు వెల్లి వాజి మహాద్. వాండ్రు ఇనుము డుడ్డుదాన్ పరిజ్ ఏలుబడి: కినాన్. విజు దన్నిజ్ అతికారం మన్ని దేవుణుది సిసు నన్ని కోపం, గనుగుదు ద్రాక్కు మట్టిసి ద్రాసపట్టురసం లాగ్గినెకెండ, వాండ్రు మట్టిసినాన్.

16 రాజురిజ్ రాజుని ప్రబురిజ్ ప్రబు ఇని పేరు వన్ని సొక్క మున్నుని వన్ని కుర్లుదు రాసె ఆత మనాద్.

17-18 మరి ఉండ్రె దేవుణు దూత పొద్దుదు నిహి మనిక నాను సుడేశత. వాండ్రు గొప్ప పెరి కంటమ్దాన్ డేల్ని వెప్తాన్. “దేవుణు నండొ కండ సీని గొప్ప పెరి విందుదిజ్ రదు. రాజురి కండ, మరి సయనమ్దిజ్ నడిపిసివరి కండ, మరి గొప్ప నత్తుమన్నివరి కండ, గుర్రమ్మక కండ, మరి వన్యా మున్ను బస్తిమన్నివరి కండ, మరి వెట్టిపణిమణిసిరె ఆఇవరి కండ, వెట్టిపణి కినివరి కండ, ఇజిరి వరి కండ, పెరివరి కండ, యాలెకెండ లోకుర్ విజిరి కండ తిండ్రెజ్ మీరు రదు”, ఇజి ఆగసం అడిగి ఎగ్రిజిని విజు పొటిజి వెప్తాన్.

19 నస్తివలె, అయ గుర్రం మున్ను బస్తిమన్నివన్నివెటని వన్ని సయనమ్ది వరివెట విదెం కిదెజ్ ఇజి, అయ క్రూరమతి జంతుని బూమి మున్ను మన్ని రాజురిని వరి సయనమ్దుకు విజు కూడజి వాతిక నాను సుడేశత

20 నస్తివలె, అయ క్రూరమతి జంతుని దన్ని పేరుదాన్ బమ్మాని పణిజ్ గుర్తు లెకెండ కిజి తోరిస్తి మన్ని అబద్దం వెస్సై ప్రవక్తబా అన్నె ఆతార్. అయ క్రూరమతి జంతుది గుర్తు పోకె అతి వరిజ్ నె దన్ని బొమ్మదిజ్ పొగిడిజి మాడిస్సి మహివరిజ్ వాండ్రు బమ్మాతి పణిజాణిజ్ మొసెం కిజి మహాన్. వారు రిఎర్ గండకు వెయెజిని సిసు మన్ని బాడ్డిదు పాణం డసానె అర్పె ఆతార్.

21 మిగిలిత్తి మహికార్, గుర్రం మున్ను బస్తిమన్ని వన్ని వెయెదాన్ వాతి కుర్లుదాన్ నప్పె ఆతార్. పొటిజ్ విజు వనక పొట పంజు వరి కండ తిహె.

20

వెయిజ్ పంటిజ్ మన్ని ఏలుబడి:

1 మరి దర్దిది తాలమ్కియెని ఉండ్రె గొప్ప పెరి గొలుసు కీదు అస్తిమన్ని మరి ఒరెన్ దేవుణు దూత, పరలోకమ్దాన్ డిగ్గెజి వాతిక నాను సుడేశత.

2 వాండ్రు, అయ మొదొహి సరానదిజ్, అహిజి అయ గొప్ప పెరి సరాన్ ఇని, నయ్తాను ఇని నెఇ వన్నిజ్ అస్తాండ్రె వెయెం పంటిజ్ దాక తొప్పా డిస్సాన్.

3 అయ వెయెం పంటిజ్ గడఱిన్యాదాక ఎమేణి దేసెమ్కాణి లోకురిజ్బా మొసెం కివిండ మండ్రెజ్ ఇజి అయ గొప్ప పెరి సరానదిజ్, దర్దిదు అర్పె మూక్కి దన్ని మున్ను సీలు పోక్తాన్. వెయిజ్ పంటిజ్ వెనక వాండ్రు నెగం కాలం వన్నిజ్ కుట్టి డిస్సాన్.

4 నస్తివలె, నాను సింహాసనమకాజ్ నుడేశత. అయ సింహాసనముక మున్సు బస్తిమన్నివరిజ్, తీర్పు తీరినైజ్ అతికారం దోహకై. దేవుణు మాట వందిజ్ని యేసువందిజ్ వారు వెహ్ని సాస్యం వందిజ్ బురెక్ కత్తై అతివరి ఆత్మ నుడేశత. వారు అయ క్రూరమతి జంతుదిజ్నో, దన్ని బొమ్మదిజ్నో పొగిడిజి మాడిజ్నవిండ మహికార్. వరి నొర్దుజ గాని వరి కొకాజ్ గాని దన్ని గుర్తు పోకె ఆవెండ మనికార్. వారు బత్తిత్తారె వెయు పంటిజ్ క్రీస్తు వెట కూడజి ఏలుబడిజి కితార్.

5 (మిగిలిత్తి మన్ని సాతికార్ అయ వెయిజ్ పంటిజ్ వీజినిదాక బత్తివితార్) యాకాదె సాతి వరిబాణిజ్ తొలిత మర్జి నిజి ఆనిక.

6 తొలిత మర్జి నిజ్నిదన్నిలోఇ కూడజి మంజినికార్ దేవుణు సీని దీవనమకు మన్నికార్. వారు దేవుణు వందిజ్ పూర్తి కేట అతికార్. నిన్నివరిమున్సు రుండి సాపుదిజ్ అతికారం సిల్లెద్. గాని వారు దేవుణుదిజ్ని క్రీస్తుజ్ పూజెరిబులెకెండ మంజి క్రీస్తు వెట కూడజి వెయిజ్ పంటిజ్ ఏలుబడిజి కినార్.

సయ్యాను నానం ఆజినిక

7 వెయిజ్ పంటిజ్ పూర్తి అతి వెనక సయ్యాను తోహా ఆతిబాణిజ్ డిజ్ని ఆనాన్.

8 వాండ్లు బూమి మున్సు నాల్లి దిక్కుజాణి విజు దేనెమ్కాణి లోక్కురిజ్ మొసెం కిజి, విదెం కిదెజ్ ఇజి గొప్ప పెరి సయ్యమిదిజ్ గోగిని మాగ్గి ఇనిబాన్ కూడుప్పి తనాన్లె. వరి లెక్క సమ్దరం పడకాది ఇన్సలెకెండ మంజినాద్.

9 వారు బూమి మున్సు మన్ని విజు దేనెమ్కాజ్ సాహార్. దేవుణు లోకుర్ మంద కూడజిమంజిని, దేవుణు గొప్పజి ఇన్సం కిజిని పట్టుమిదిజ్ నుటలుం ఆతార్, గాని పరలోకమదాన్ సిను డిజిజి వాజి వరిజ్ సుర్దాద్.

10 వరిజ్ మొసెం కిత్తికానాతి సయ్యాన్ గండకమదాన్ కసిని సిను మంజిని బాడ్డిదు అర్పె ఆతాన్. అబ్బై అయ క్రూరమతి జంతుని అబద్దం వెహ్ని వన్ని ప్రవక్త మనార్. అబ్బై వారు రెయుపొగోల్ డిజ్నవిండ ఎలాకాలం హిమ్నెజ్ కిబె ఆజి మంజినార్.

సాతికార్ తీర్పు పొందిజినార్.

11 నస్తివలె, గొప్ప తెల్లాజ్ మన్ని ఉండ్రీ పెరి సింహాసనమని దన్ని మున్సు ఒరెన్ బస్తిమన్నికబా నాను నుడేశత. బూమిని ఆగనం వన్ని ఎర్దుహాన్ ఉహ్కాక్తి సాహి లెకెండ సిల్లెండ ఆతె. అక్కైజ్ తోవండాతె.

12-13 మరి సాతికార్ విజెరె, అహిజ పెరికార్ని ఇజిరికార్ విజెరె అయ గొప్పపెరి సింహాసనం ఎర్దు నిహిమన్నిక నుడేశత. సమ్దరమదు సాతికార్ విజెరె సమ్దరమదాన్ డిజ్ని ఆతార్. సాతికార్ మంజిని అయా లోకమదు మహికార్బా డిజ్ని ఆతార్. నస్తివలె, పుస్తకమకు రెకె ఆతె. దేవుణు వెట ఎలాకాలం బత్తిని వరి పేరుకు రాసి ఇడజిని మరి ఉండ్రీ పుస్తకమబా రెకె ఆతాద్. అయ పుస్తకమకాజ్ రాస్తి ఇడ్డిమన్నిలెకెండ, ఒరెన్ ఒరెన్ కితిమన్ని పణిజి తగితి లెకెండ సాతికార్ తీర్పు పొందితార్.

14 సాపుని అయా లోకం గండకమదాన్ సిను కసి మంజిని నెరు నన్ని బాడ్డిదు అర్పె ఆతె. యా సిను మంజిని బాడ్డి రుండి సాపు.

15 దేవుణు వెట ఎలాకాలం బత్తిని వరి పేరుకు రాసి ఇడజిని పుస్తకమదు పేరు తోర్విండాతిజి ఎయెన్బా అయ సిను మంజిని బాడ్డిదు అర్పె ఆనాన్లె.

21

కొత్త యెరూసలేం

1 నస్తివలె, నాను ఉండ్రీ కొత్త ఆగానమని ఉండ్రీ కొత్త బూమి నుడేశత. మొదోహి ఆగనమని మొదోహి బూమి సిల్లెండ ఆతె మహా. సమ్దరమబా సిల్లెండ ఆత మహాద్.

2 మరి కొత్త యెరూసలేము ఇని దేవుణు పట్టుం, మాసి సొండ్రెజ్ ఇజి విజు ఇట్కిజి గొప్ప నెగండ్ తయారాతిమన్ని వెండ్లి దజ్డిలెకెండ, పరలోకమదాన్ డిజిజి వాతిక నాను నుడేశత.

3 నస్తివలె, “ఇదిలో, దేవుణు లోకుర్ వెట బత్తిని ఇల్లు మనాద్. వాండ్లు, వరి వెటనె బత్తినాన్. వారు వన్ని లోకుర్ ఆన మంజినార్. దేవుణు వన్నిజ్ వాండ్రై ఆజి వరివెట మంజి వరి దేవుణు ఆన మంజినాన్.

4 వాండ్లు వరి కణుకెణ్ణో కణిర్ తేల్వొన్. మరి సావు, దుకం, అడఃబానిక, నొప్పిజ్ ఎన్నెజ్బా మన్ఉ. ఎందానిజ్ ఇహిజ మొదోహి నజతిజ్ విజు గడఃన్లు సాహా”, ఇజి అయ సింహాసనమ్దాన్ ఉండ్రి పెరి కంటం వెప్పొక వెహా.

5 అయ సిమసనమ్దు బస్తి మన్నికాన్, “ఇదిలో నాను విజు కొత్తాకెజ్ కిజిన”, ఇజి వెప్తాన్. మరి “యా మాటెజ్ నమ్మిదెజ్ అట్టికెజ్ నిజమూతికెజ్. అందెజె ఇక్కెజ్ రాసి ఇడఃఅ”, ఇజి వాండ్లు నజి వెప్తాన్.

6 మరి నావెట వాండ్లు ఈహు వెప్తాన్. “విజు పూర్తి ఆతె. అల్వాని ఒమెగ నానె. మొదోల్ని ఆక్కర్ నానె. ఏప్పొ కట్టివన్నిజ్, పాణం సీని ఏరు వాని ఊటదాన్, వన్నిజ్ ఉండెజ్ ఏరు, నాను సెట్టిఃనె సీనా.

7 సెఇవనకాజ్ మున్ను గెలిస్సికాన్ ఏనుకాజ్ విజు అక్కు మన్నికాన్ ఆనాన్. నాను వన్నిజ్ దేవుణు ఆన మంజినాన్. వాండ్లు నజి మరిన్ ఆన మంజినాన్.

8 గాని పక్కాదికార్, దేవుణు మున్ను నమకం సిల్లికార్, సెఇ పణిజ్ కినికార్, లోకురిజ్ నమ్మికార్, రంకు బూలానికార్, గార్డి కినికార్, బొమ్మెజు మాడిఃస్సికార్, విజు రకమది అబద్ధం వర్గినికార్, నిన్నికార్ విజేరె గందకమ్దాన్ సిను కనిసి సెరు నన్ని బాడ్డిదు అర్పె ఆనార్. అక్కు వరి వంతు. యాకది రుండి సావు.

9 నస్తివలె, కడఃవెరిది జబ్బుజాణిజ్ నిండ్రితి మన్ని ఏడు కుడుకెజ్ అస్తిమన్ని ఏడు దేవుణుదూతార్లోఇ ఒరెన్ వాజి, “ఇబ్బె రత. గొర్రెప్పెళ్ల అల్లి ఆతి పెండ్లి దజ్డిఃడిజ్ నిజి తోరిన్లు”, ఇజి నజి వెప్తాన్.

10 దేవుణుఆత్మదాన్ నిండ్రితి మన్ని నజి, వాండ్లు గొప్ప ఎత్తు మన్ని ఉండ్రి పెరి గొరొన్ మున్ను ఒత్తాండ్రి, యెరుగలేము ఇని దేవుణు పట్టుం, పరలోకమ్దాన్ దేవుణుబాణిజ్ డిఃగిజి వాజినక తోరిస్తాన్.

11 అయ పట్టుం, దేవుణు జాయ్దాన్, దగదగ మెరిసిమంజిని జాయ్ మన్ని సూర్య కాంతం ఇని పేరు మన్ని ఎరాని జాయ్ మంజిని గొప్ప విలువాతి రంగు పణకుది జాయ్లెకెండ్రి, గటిమన్ని గాజు లెకెండ్ మహాద్.

12 అయ పట్టుమ్దిజ్ గొప్ప ఎత్తు మన్ని గోడఃని, మరి అయ గోడఃదిజ్ పన్నెండు దారబంద్రమ్కు మహా. అయ దారబంద్రమ్కాజ్ పన్నెండు దేవుణు దూతార్ మహార్. దారబంద్రమ్కాజ్ ఇస్తాయేలుది పన్నెండు తెగెజు పేరుకు రాసె ఆతె మహా.

13 తూర్పు దరిజ్ మూండ్రి దారబంద్రమ్కుని ఉత్తరదరిజ్ మూండ్రి దారబంద్రమ్కుని దసిణదరిజ్ మూండ్రి దారబంద్రమ్కుని పడమూట దరిజ్ మూండ్రి దారబంద్రమ్కు మహా.

14 అయ పట్టుమ్ది గోడఃదిజ్ పన్నెండు పునాదిజ్ మహా. అయ పన్నెండు పునాదిజు మున్ను గొర్రెప్పెళ్ల అపొస్తురు ఆతి పన్నెండు మణిసిరి పేరుకు తోరిజి మహా.

15 అయ పట్టుమ్దిజ్ని, దన్ని గోడఃజ్ని దారబంద్రమ్కు కొలిదెజ్, నావెట వర్గిని దేవుణు దూత కియుదు బజారమ్దాన్ తయార్ కితిమన్ని ఉండ్రి కొలిని డుడ్డు మహాద్.

16 అయ పట్టుం నాల్లి దరిజ్ ఉండ్రి లెకెండ్ కొల్ల మన్నిక. దన్ని నిరిండ్, దన్ని వెడల్పు నమానం మహా. వాండ్లు అయ కొలిని డుడ్డుదాన్ అయ పట్టుమ్దిజ్ కొలిత్తిజ్, దన్ని కొల్ల రుండి వెయుజ్ నాల్లి వందెజ్ కిలోమీటరుజ్ ఆతె. దన్ని నిరిండ్, ఎత్తు, వెడల్పు విజు నమానం మహా.

17 వాండ్లు దన్ని గోడఃజు కొలిత్తిజ్, అది లోకురి కొల్లదిజ్ వంద నాల్వయ్ నాల్లి మూరెజ్ దలం మనాద్. అయ కొల్లదానె దేవుణు దూత కొలిత్తాన్.

18 దన్ని గోడ్జు, సూర్య కాంతం ఇని పేరు మన్ని ఎరాని జాయ్ మన్ని విలువాతి రంగు పణకుజాణిజ్ తోప్తా మనాద్. మరి అయ పట్టుం గాజు లెకెండ్ మన్ని మెర్గిని బజారమ్దాన్ తయార్ ఆత మనాద్.

19 అయ పట్టుమ్ది గోడఃజు పునాది రకరకమ్ది గొప్ప విలువాతి రంగు పణకుజాణిజ్ సోకుదాన్ తయార్ ఆత మనాద్. మొదోహి పునాది సూర్య కాంతం ఇని ఎరాని రంగు పణకు, రుండి పునాది నీలి రంగు పణకు, మూండ్రి పునాది జమున రంగు పణకు, నాల్లి పునాది ఆకు రంగు పణకు.

20 అయదు పునాది వయ్దుర్యం ఇని రంగు పణకు, ఆరు పునాది కెంపు ఇని రంగు పణకు, ఏడు పునాది బజారు రంగు పణకు, ఎనిమిది పునాది గోమెదికం ఇని రంగు పణకు, తొమ్మిది పునాది

పున్యరాగం ఇని రంగు పణకు, పది పునాది సార్థసూనియం ఇని రంగు పణకు, పదకొండు పునాది పద్మరాగం ఇని రంగుపణకు, పన్నెండు పునాది సుగందం ఇని రంగు పణకాణిక్ కిత్త మనాద్

21 దన్ని పన్నెండు దారబంద్రమ్కు పన్నెండు ముజెలుజాణిక్ కిత్త మనాద్. ఉంత్రి ఉంత్రి దారబంద్రం ఉంత్రి పూసదాని కిత్త మనాద్. పట్టుమది రోడుక్ అడ్లి మన్నికెక్ తోరిజని గాజుదిక్ పోలితి బజారమ్దాన్ తయార్ ఆత మనాద్.

22 విజు దన్నిక్ అతికారం మన్ని ప్రబు ఆతి దేవుణుని గొరెపిల్ల దన్ని దేవుణు గుడిః ఆతిమన్నిక్ అయ పట్టుమ్ లొజ దేవుణు గుడిః ఉంత్రిబా తోరివితాద్.

23 అయ పట్టుమ్దిక్ జాయ్ సిదెక్ ఇజి పొద్దుబా నెలబా అక్కర సిల్లెద్. ఎందానిక్ ఇహిజ, దేవుణు గొప్ప జాయ్నె పట్టుం విజు జాయ్ సీజి మహాద్. గొరెపిల్ల దన్నిక్ దీవలెకెండ్ మహాద్.

24 విజు దేసమ్కాణి లోకుర్ అయ జాయ్దు నడిఃనార్. బూమి మున్కు మన్ని రాజార్, వరిక్ కల్గెతిమన్ని విజు గవరమ్మని ఆస్తి అయ పట్టుమ్ లొజ తనార్.

25 అబ్బె రెయు సిల్లెండ, జాయ్నె మన్నిక్ ఎనెక్బా అయ పట్టుమది దారబంద్రమ్కు కెహ్విద్.

26 విజు దేసమ్కాణికార్ వరి ఆస్తిక్ని వరిక్ గవరం తప్పిక్ విజు అయ పట్టుమ్ లొజ తనార్.

27 దేవుణు వెట ఎలాకాలం బత్తిని వరి పేరుకు రాసి ఇడఃజని గొరెపిల్లాది పున్యకమ్దు పేరుకు మన్నికార్, దన్ని లొజ సొనార్. గాని సెజ పణిక్ కినికార్, మొసెం కినికార్, సిగు ఆనికెక్ కినికార్ ఎయెరిబా దన్ని లొజ సొండ్రెక్ అట్విద్.

22

పాణం సీని గడ్డ

1 నస్తివలె, కల్తినెల్లి అద్దం నన్ని, పాణం సీని ఏరు మన్ని గడ్డ, దేవుణుదిని గొరెపిల్లది సింహాసనమ్దాన్ సొన్ని మంజనిక అయ దేవుణు దూత నజీ తోరిస్తాన్.

2 అయ గడ్డ పట్టుమది రోడు నడిఃమిహాన్ సొన్ని మహాద్. అయ వెరి గడ్డాది రుండి ఒడ్డుజు పన్నెండు నెలెజ, పన్నెండు సుట్టు. కాయెక్ కాసి పట్టు సీని పాణం సీని మరాన్ మనాద్. అయ పాణం సీని మరాతి ఆకుక్ విజు జాతిజణి వరిక్ జబ్బుజాణిక్ నెగెండ్ ఆదెక్ పణి కినాద్.

3 దేవుణు నయమ్ సిత్తి మహికెక్ ఇనికబా అయ పట్టుమ్దు మన్విద్. దేవుణుదిని గొరెపిల్లది సింహాసనం అబ్బె మంజనాద్. వన్ని పణికినికార్ వన్నిక్ పొగడిఃజు మాడిసి మంజనార్.

4 వారు దేవుణు ఎద్రు మంజి. మొకొం నిండ్రు వన్నిక్ నుడిఃజి మంజనార్. వన్ని పేరు వరి నొద్దుజు రాసి ఆనాద్లె.

5 అబ్బె ఎనెక్బా రెయు మన్విద్. దీవ జాయ్ గాని పొద్దు జాయ్ గాని వరిక్ అక్కర సిల్లెద్. ఎందానిక్ ఇహిజ, ప్రబు ఆతి దేవుణునె వరిక్ జాయ్ సీజి మంజనాన్. వారు అంతుసిల్లెండ ఎలాకాలం ఏలుబడిః కీజి మంజనార్.

6 మరి అయ దేవుణు దూత, నజీ యాలెకెండ్ వెహ్హాన్. “యా మాటిక్ నమ్మిదెక్ తగ్గిక్ నెని నిజమాతికెక్. ఎందానిక్ ఇహిజ ఇనికెక్ వెహ్హెక్ ఇజి వన్ని ప్రవక్తరిక్ వెహ్హిని దేవుణు, బేగి జగ్గిదెక్ మన్ని వనకాక్ వన్నిక్ నెందితివరిక్ తోరిస్తెక్ ఇజి వన్ని దూతెక్ పొక్తాన్.

యేసు మరణి వాజినాన్.

7 “ఇదిలో నాను బేగినె వాజిన. యా పున్యకమ్దు మన్ని, దేవుణుబాణిక్ వాతి మాటిక్, వెంజి, లోజిజి, నడిఃనికాన్ దేవుణు సీని దీవెనమ్కు మంజనికాన్ ఆనాన్”.

8 యోహాను ఇని నాను, యా సజతిక్ వెహ మన్ను, నుడిఃత మన్ను. నాను యాకెక్ వెంజి వెనుక, యాకెక్ నజీ తోరిసిని వన్నిక్ పొగడిఃజు మాడిఃసెక్ ఇజి అయ దూత పాదమ్కాక్ పడఃగిజి అర్ద.

9 గాని వాండ్లు, “పోని, నీను యాలెకెండ్ కిమా. నాను, నీవెటెని, ప్రవక్తరు ఆతి నీ తంబెరిజవెటెని, యా పుస్తకమ్దు మన్ని మాటెజ్ లోజిజి నడిఱినివరివెటె కూడఱిజి పఱికినికానె. దేవుణుదిజె పొగిడిఱిజి మాడిఱిన్అ”, ఇజి నజీ వెహ్సాన్.

10 మరి నావెటె ఈహు వెహ్సాన్. “యా పుస్తకమ్దు మన్ని మాటెజ్ దేవుణు వెహ్సాకెజ్, అందెజె దిన్నిజ్ మూక్సి నీలు కిదెజ్ ఆవద్. ఎందానిజ్ ఇహిజి యాకెజ్ విజు జర్దిదెజ్ కాలం డగ్గు ఆత మనాద్.

11 తప్పు పఱికి కినికాన్ మరి ఒదె తప్పు పఱికి కిపిన్. ఎయెన్బా కెలార్ బూలానికాన్ మరి కెలార్ బూలాజి మనీన్. నీతి మన్నికెజ్ కినికాన్ మరి ఒద్దె నీతి మనికెజ్ కిపిన్. దేవుణు వందెజ్ కేటె ఆతికాన్, మరి అయాలెకెండ్ దేవుణు వందెజ్ కేటె ఆజి మనీన్”.

12 “ఇదిలో, నాను బేగినె వాజిన. నాను వానివలె ఒరెన్ ఒరెన్ వన్నిజ్, వాండ్లు కితి పఱికిదిజ్ తగితి లెకెండ్ సీదెజ్ ఇనాయం తనా.

13 అల్పాని ఒమెగ నానె. మొదోహి - కాన్ని కడెవెరిదికాన్ నానె. మొదోల్ని ఆకార్ నానె.

14 పాణం సీని మరాతి పట్టు. తిండ్రెజ్ అక్కు. మన్నికారాజి దారబంద్రమ్కాణిజ్ అయ పట్టుమ్ లోఇ సాండ్రెజ్ వరి సాక్సెజ్ నోరబానికార్ దేవుణు సీని దీవెనమ్కు మంజినికార్ ఆనార్.

15 నుకుడిఱిని మత్రిసినికార్, రంకు బూలానికార్, లోకురిజ్ సప్పికార్, బొమ్మెజి మాడిఱిస్సికార్, అబద్దమ్దెజ్ ప్రేమిని అయాలెకెండ్ కిజి మంజినికార్ విజేరె వెల్లి మంజినార్.

16 దేవుణు సజమ్కాజ్ మన్నివరివందెజ్, యా సజతిజి వందెజ్ సాస్యం వెహ్సాజ్ యేసు ఇని నాను, నా దూతెజ్ పొక్ మన్ను. నాను దావీదువెలెదాన్ సోత్రి సిగ్గుని వన్ని తెగాదు పుట్టికాన్. కోడిఱిజామ్దు సోని గోప్పు జాయ్ మన్ని నుక ఆత మన్ను”.

17 మరి దేవుణు ఆత్మని పెండ్లి దజ్డిఱి, “రఅ”, ఇజి వెహ్సానార్. యాక వినికాన్బా “రఅ’ ఇజి వెహ్సాజ్వలె. ఎయెన్బా ఏహ్పి కట్టిజి వాండ్లు రపిన్. ఎయెన్బా వాండ్లు కోరిత్తిలెకెండ్, పాణం సీని ఏరు ఇని ఇనాయం సెడ్డిఱిని లోసీన్.

18 యా పుస్తకమ్దు మన్ని దేవుణు ప్రవక్త వెహ్సా మాటెజ్ వెనివరిజ్ విజేరిజ్, వారు జాగర్ల మండ్రెజ్ ఇజి నాను వెహ్సానిక ఇనిక ఇహిజి, ఎయెన్బా దిన్నివెటె మరి ఇనికబా కూడుఱిజి యా పుస్తకమ్దు రాస్తీమని జబ్బుజ్ విజు, దేవుణు వన్ని మున్ను తపిసాన్.

19 ఎయెన్బా యా పుస్తకమ్దు మన్ని దేవుణు ప్రవక్త వెహ్సా మాటెజ్, ఇనికబా లాగితిజి, వన్నిజ్ దేవుణు యా పుస్తకమ్దు వెహ్సామని పాణం సీని మరాతి పట్టు. తిండ్రెజ్ అక్కు. సిల్లికాన్ లెకెండ్ కినాన్. నెగ్గి పట్టుమ్దు వంతు మనీఇకాన్ లెకెండ్ కినాన్.

20 యా సజతిజి వందెజ్ సాస్యం వెహ్సాకాన్, “నిజమె నాను బేగినె వాజిన”, ఇజి వెహ్సానాన్. ఆమెన్. ప్రబు ఆతి యేసు రఅ.

21 ప్రబు ఆతి యేసు దయాదర్శం దేవుణులోకుర్ విజెరె వెటె మనీద్. ఆమెన్.